


Xela wezria cube nen  
salmo ca'



New Testament and Psalms in Zapotec, Tabaa (MX:zat:Zapotec,  
Tabaa)

# **Xela wezria cube nen salmo ca'** **New Testament and Psalms in Zapotec, Tabaa (MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

## **Copyright Information**

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament and Psalms**

in Zapotec, Tabaa

#### **© 1981, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files dated 29 Jan 2022  
 80626b72-93df-58ae-9f5e-9d86733fab46

## Contents

San Mateo . . . . .	1
San Marcos . . . . .	62
San Lucas . . . . .	101
San Juan . . . . .	163
Los Hechos . . . . .	209
Romanos . . . . .	264
1 Corintios . . . . .	288
2 Corintios . . . . .	310
Gálatas . . . . .	325
Efesios . . . . .	334
Filipenses . . . . .	342
Colosenses . . . . .	348
1 Tesalonicenses . . . . .	354
2 Tesalonicenses . . . . .	359
1 Timoteo . . . . .	362
2 Timoteo . . . . .	369
Tito . . . . .	374
Filemón . . . . .	377
Hebreos . . . . .	379
Santiago . . . . .	396
1 San Pedro . . . . .	402
2 San Pedro . . . . .	409
1 Juan . . . . .	413
2 Juan . . . . .	419
2 Juan . . . . .	420
Judas . . . . .	421
Apocalipsis . . . . .	423
Salmos . . . . .	450

## **DIZRA' CHAWE' CA NACA CHEE JESUCRISTO DA BZUAJ SAN MATÊO**

*La benne' ca' gulaque' xra gula chee Cristo  
(Lc. 3.23-38)*

<sup>1</sup> Da caní zaj naca na la chee benne' zaj naque' xra wdé chee Jesucristo. Jesús nigá nababê' zri'ine zre sua David, ne zri'ine zre sua Abraham.

<sup>2</sup> Abraham nigá guque' xra Isaac.

Isaac nigá guque' xra Jacob.

Jacob nigá guque' xra Judá, ne benne' biche' ca'.

<sup>3</sup> Judá nigá guque' xra Fares, ne Zara, na' Tamar guque' xrna Fares, ne Zara caní.

Fares nigá guque' xra Esrom.

Esrom nigá guque' xra Aram.

<sup>4</sup> Aram nigá guque' xra Aminadab.

Aminadab nigá guque' xra Naasón.

Naasón nigá guque' xra Salmón.

<sup>5</sup> Salmón nigá guque' xra Booz, na' Rahab guque' xrna Booz nigá.

Booz nigá guque' xra Obed, na' Rut guque' xrna Obed nigá.

Obed nigá guque' xra Isaí.

<sup>6</sup> Isaí nigá guque' xra David, benne' wenná bea.

Wenná bea David nigá, ne nu'ula na' nédxute guque' zru'ula Urías gu-  
laque' xra xrna Salomón.

<sup>7</sup> Salomón nigá guque' xra Roboam.

Roboam nigá guque' xra Abías.

Abías nigá guque' xra Asa.

<sup>8</sup> Asa nigá guque' xra Josafat.

Josafat nigá guque' xra Joram.

Joram nigá guque' xra Uzías.

<sup>9</sup> Uzías nigá guque' xra Jotam.

Jotam nigá guque' xra Acaz.

Acaz nigá guque' xra Ezequías.

<sup>10</sup> Ezequías nigá guque' xra Manasés.

Manasés nigá guque' xra Amón

Amón nigá guque' xra Josías.

<sup>11</sup> Josías nigá guque' xra Jeconías ne benne' biche' ca' ca lu zra ca' gate benne' Babilonia guleché'e benne' Israel ca' lu xezr la xu Babilonia.

<sup>12</sup> Jeconías nigá guque' xra Salatiel.

Salatiel nigá guque' xra Zorobabel.

<sup>13</sup> Zorobabel nigá guque' xra Abiud.

Abiud nigá guque' xra Eliaquim.

Eliaquim nigá guque' xra Azor.

<sup>14</sup> Azor nigá guque' xra Sadoc.

Sadoc nigá guque' xra Aquim.

Aquim nigá guque' xra Eliud.

<sup>15</sup> Eliud nigá guque' xra Eleazar.

Eleazar nigá guque' xra Matán.

Matán nigá guquę' xra xetú benne' lę' Jacob.

<sup>16</sup> Jacob nigá guquę' xra José, benne' cheę María, xrna Jesús, Bénnea' naque' Cristo.

<sup>17</sup> Caní naca, gulaca chidá' cue' bėnneache gate guzú lau zua Abraham, ca bzrintę zra zua David, na' gulaca xechidá' cue' bėnneache ca' gate guzú lau zua David, ca bzrintę zra gate na' benne' Babilonia ca' guleché'e benne' Israel ca' lu xęzr la xu cheę', na' gulaca xechidá' cue' bėnneache ca' gate guzú lau zra na', ca bzrintę zra gulaj Cristo.

*Ca guca gate gulaj Cristo*

*(Lc. 2.1-7)*

<sup>18</sup> Caní guca gate na' gulaj Jesucristo. María, xrna Jesús ba nachėbebe' gácabe' zru'ula José. Nédxula ca za xelenitę', nu'ula nigá ba zuę' zi'i nę cheę xel-la' waca cheę Be' Lá'azxa cheę Dios. <sup>19</sup> José, benne' cheę María nigá, naque' benne' xrlátaje. Quebe guca lazre' gulé'ene' ca ba naca cheę María lau benne' xęzre ca'. Guca lazre' gusanę' lę' bagácheze. <sup>20</sup> Dxácatę dxudé lazre' da nigá, ble'e lau tu gubáz cheę xabáa, gubáz cheę Xránadxu, ga zua José na' lu bchigala, na' guzre' lę':

—José, zri'ine zre sua David, quebe zrebu' si' lu na'u María cheę gácabe' zru'ulu', lawe' da bidu biu na' sanbe' zabe' nę cheę Be' Lá'azxa cheę Dios. <sup>21</sup> Zrú'ulu' gúxrube' tu bidu biu cheębe', na' lue' gu'u labe' Jesús. Caní gu'u labe' lawe' da guselabe' bėnneache lu dul-la da zaj nabague'.

<sup>22</sup> Xúgutę da caní gulaca ca' cheę guca ca da gunná Xránadxu lu dxu'a benne' ca' buluchálaje' waláz cheę'. <sup>23</sup> Caní gunné': Tu nú'uladau' gúadaube' sanbe' tu bidu biu cheębe', na' xelu'e labe' Emanuel.

Emanuel zéaje na: Dios zúalęņę' dxi'u.

<sup>24</sup> Ca bebán José, na' bęne' cáteze gunná gubáz cheę Xránadxu, na' guzí' lu nę'e María cheę gácabe' zru'ulę'. <sup>25</sup> Quebe gulaque' tuze ca gusandxa María bidu biu nedxu cheębe', na' buluzúę' labe' Jesús.

## 2

*Dxelezhín benne' sina ca' lu xęzre Jerusalén*

<sup>1</sup> Bidau' Jesús gúlajbe' lu xęzre Belén da nababa xęzr la xu Judea gate dxenná bea benne' lę' Herodes ga na'. Nadxa belezhín benne' ca' lu xęzre Jerusalén, benne' zá'aque' chalá'a naga dxalaj gubizra, zaj naque' benne' sina gula. <sup>2</sup> Na' gulenabę':

—¿Ga zua bidu na' ba gúlajbe' cheę gácabe' benne' nna bé'ene' benne' judío ca'? Gate zuantu' chalá'a naga dxalaj gubizra blé'entu' belaj cheębe', na' bla'ntu' nigá cheę gúe lá'ana gúe szrentu'-be'.

<sup>3</sup> Ca guneze Herodes, benne' wenná bea, da nigá, na' guzúę' stębe, ne cá'unqueze guca cheę xúgutę benne' zaj zre'e Jerusalén. <sup>4</sup> Nadxa Herodes, wenná bea na', btupe' xúgutę benne' xíchaje cheę bxruze ca', ne benne' dxuluxuzájle'e da nadxixruj bea Dios, na' gunábene' benne' ca':

—¿Gazra na' galaj Cristo?

<sup>5</sup> Benne' caní gulé'e lę':

—Lu xęzre Belén da nababa xęzr la xu Judea, lawe' da bzujaj caní tu benne' bchálaje' waláz cheę Dios, gate na' gunné':

<sup>6</sup> Lue', Belén cheę xęzre ca' zaj nababa na Judá,

nacu' lue' xęzre da quebe naca na da bzėbedxa ládujla benne' ca' dxelenná be'ene' xęzr la xu Judá nigá,

lawe' da ládujla bénneache chiu' dxuaj tu benne' nna be'e,  
na' guxúequeze' bénneache chia', benne' Israel.

<sup>7</sup> Nadxa Herodes, wenná bea na', bláwizre' bagácheze benne' sina gula ca', na' gunábene' le' bátala ble'e lau belaj na' belelé'ene'. <sup>8</sup> Nadxa gusel-le' benne' ca' chjaque' xezre Belén, ne guzre' le':

—Le chjaca na', ne le naba xanne' chee' bidu na', na' ca cheajxrácale-be', na' le guzén neda' chee' cha'a neda' gúe lá'ana gúe szrena'-be'.

<sup>9</sup> Ca bexuzre belén benne' sina gula ca da gunná Herodes, wenná bea, nadxa besía'que', na' belaj da belelé'ene' gate zaj zre'e chalá'a naga dxalaj gubizra zeaj na lau le', na' bzrinte' na, ne guzúa na naga zua bidu na'.

<sup>10</sup> Gate benne' sina gula ca' belelé'ene' belaj na', nadxa gulebéle'ene'. <sup>11</sup> Ca gulu'e lu xu'u, belelé'ene' bidu na', ne xrnabe' María. Nadxa buluzú zribe' dxelúe lá'ana dxelúe szrene' bidu na'. Nadxa gulesálaje' xua chee' ca', ne bulunézruje'-be' oro, ne xalaj zixre, ne mirra da naca na zichaj. <sup>12</sup> Ca gudé na', Dios guzre' benne' ca' lu bchigala québedxa xelexedé' naga zua Herodes. Chee' le' na belexequé'e neza xula, belexezrine' lazrie'.

*Ca guca beleché'e Jesús lu xezr la xu Egipto*

<sup>13</sup> Ca gudé besí'aca benne' sina gula ca', nadxa tu gubáz chee' xabáa, gubáz chee' Xránadxu ble'e lawe' José lu bchigala, na' guzre' le':

—Guxasa. Becá'a bidu na', ne xrnabe', na' le chjaca lu xezr la xu Egipto, na' xegá'anú' ga na' ca zrindxa zra xapa' lue' xetú. Caní dxal-la' gunu' lawe' da wexilaj Herodes bidu nigá chee' gutie'-be'.

<sup>14</sup> Nadxa José guxase', na' chizrélala beche'e bidu na', ne xrnabe', na' bexu'e-be' lu xezr la xu Egipto. <sup>15</sup> Gulezré'e na' ca bzrindxa zra gute Herodes. Caní guca ca naca da gunná Xránadxu lu dxu'a benne' bchálaje' waláz chee', gunné': "Xuláwizra' bi biu chia' chee' xedxúajbe' lu xezr la xu Egipto."

*Dxenná be'e Herodes benne' ca' xelúti'e' bidu biu ca'*

<sup>16</sup> Gate gúquebe'e Herodes gulezí xē benne' sina ca' le', na' bzrá'ale'e, ne gunná bé'ene' benne' ca' xelúti'e' xúgute' bi biu dxé'enedau', ca zrinte' bidu ca' ba zaj zua chup iza, bidu ca' zaj zrabe' xezre Belén, ne bidu ca' zaj zrabe' lu xézredu ca' zaj naxechaj na xezre Belén na'. Caní ben Herodes cáteze buluzén benne' sina gula ca' le' ca naca zra na' belelé'ene' belaj na'.

<sup>17</sup> Ca'an guca ca da bzuj Jeremías, bénnea' bchálaje' waláz chee' Dios ba guca zan' iza, gunné':

<sup>18</sup> Guca tu schaga lu xezre Ramá.

Guca webezre, ne gulebezre xache'.

Raquel na' dxebézrele'e chee' bi chee' ca'.

Québequeze dxaca lazre' xexaca zrene'

lawe' da ba gulate bi chee' ca'.

<sup>19</sup> Ca gudé gute Herodes, na' tu gubáz chee' xabáa, gubáz chee' Xránadxu ble'e lawe' José lu bchigala naga zu'e Egipto, na' guzre' le':

<sup>20</sup> —Guxásache. Beche'e bidu chiu' nigá, ne xrnabe'. Bexíaj lu xezr la xu Israel, lawe' da ba gulate benne' ca' gulaca lazre' xelúti'e' bidu nigá.

<sup>21</sup> Nadxa guxasa José, na' beche'e bidu na', ne xrnabe', na' belexezrine' lu xezr la xu Israel. <sup>22</sup> Ca guneze José dxenná bea Arquelao naga nababa Judea waláz chee' xre', Herodes na', na' bzrebe José xexíaje' ga na'. Nadxa bexíaje' naga nababa Galilea ca da ba guzre gubáz chee' xabáa le' lu bchigala. <sup>23</sup> Ca bezrine' na', na' bexíaje' cheajxézúe' lu xezre Nazaret.

Caní guca ca da gulenná benne' ca' buluchálaje' waláz chee Dios, gulenné' Jesús nigá si le' benne' Nazaret.

### 3

*Juan dxegu'e lban le'e xixre' lawe' lataj*  
(Mr. 1.1-8; Lc. 3.1-9, 15-17; Jn. 1.19-28)

<sup>1</sup> Ca lu zra ca' bla' Juan, bénnea' bchue' bénneache nisa, dxegu'e lban le'e xixre' lawe' lataj naga nababa Judea. <sup>2</sup> Dxenné':

—Le xebí'i lazre' lawe' da ba zua gáguze zra nna bea Dios lu xezr la xu nigá.

<sup>3</sup> Juan nigá naque' bénnea' bchalaj Isaiás chee'. Isaiás bchálaje' waláz chee Dios gate bzuaje' caní:

Dxene chi'i benne' dxebezre xe'e le'e xixre' lawe' lataj, dxenné':

Le gucá'ana chawe' neza naga te Xránadxu.

Le xulí neza lase ca' lau Le' naga téé'.

<sup>4</sup> Zra lana Juan nigá nune na xicha zra camello, ne bazxu dxu'a le'e chee' naca na xide, na' dxawe' biche xuaj, ne bzrína'dau' chee' bézudau'.

<sup>5</sup> Belezrín benne' belenne' ca da dxuchalaj Juan, benne' zá'aque' xezre Jerusalén, ne benne' chee' xúgute' xezre ca' zaj nababa Judea, ne benne' zá'aque' xézredu ca' zaj nnita gáguze xegu Jordán. <sup>6</sup> Ca gulexráulape' dul-la chee', Juan nigá bchue' benne' ca' nisa lu xegu Jordán.

<sup>7</sup> Gate ble'e Juan benne' zan benne' xudau' fariseo, ne benne' xudau' saduceo zá'aque' chee' xelexedxúe' nisa, na' guzre' benne' ca':

—Le'e, be snia. ¿Zua nu guzre le'e guzrúnnajle da ba xa' da za? <sup>8</sup> Le

gun da xrlátaje da xelunna bea na ba bebí'i lázrele. <sup>9</sup> Quebe guéquele lale, dxennale le'eze: “Nalatu' lawe' da nácantu' xrtia Abraham.” Neda' dxapa' le'e: Dios waca xexune' xiaj caní zri'ine xrtia Abraham. <sup>10</sup> Le'e nácale ca

xaga ca'. Xia waga bache nalá na chee' chugu na xaga ca', na' xúgute' xaga ca' quebe dxelebía na da zixre chawe' welechugue na, na' xelexxe na lu

xi'. <sup>11</sup> Da li neda' dxuchúa' le'e nisa, da dxunna bea na ba bebí'i lázrele, san Bénnea' ze'e ca te chia' neda', Le' gune' ca da zéaje' xel-la' dxedxúa

nisa, guzúe' le'e Dios Be' Lá'azxa, ne xi' chee'. Benne' nigá nácadxe' blau ca neda', na' quebe zaca' cuéajza' zrele' xu'u ni'e. <sup>12</sup> Cá'anqueze nácale ca

zrua' xtila. Benne' nigá ba nu'e da dxun be', cuéaje' xрте zrua' xtila na', na' xebéaje' chalá'ala xizre chee' na, na' xuzrá chawe' zrua' xtila na' lu da'a

chee' na, san guzezxe' xizre na' lu xi' da quebe xexula na.

*Da guca gate gudxúa Jesús nisa*

(Mr. 1.9-11; Lc. 3.21-22)

<sup>13</sup> Nadxa Jesús bezé'e naga nababa Galilea, na' bezrine' dxu'a xegu Jordán naga zua Juan chee' guchúe' Le' nisa. <sup>14</sup> Nédxute' Juan quebe guca lazre', na' dxé'e Jesús:

—Lue' dxal-la' guchú'u neda' nisa. Quebe zaca' neda' guchúa' Lue' nisa.

<sup>15</sup> Jesús guzre' le':

—Be' lataj gaca caní na'a. Dxun na ba xen gundxu xúgute' da xrlátaje lau Dios.

Nadxa Juan bene' ca'. <sup>16</sup> Gate bexuzre gudxúa Jesús nisa, na' la bxálajte xabáa, na' ble'e Juan Be' Lá'azxa chee' Dios dxétaje' ca tu gugu chíchidau', zajsúaba' lawe Jesús. <sup>17</sup> Nadxa ben tu chi'i lu be', gunné':

—Benne' nigá naque' Zri'inequeza' nazrí'ite' lazra'. Dxezaca ba lázrele'na' Le'.

## 4

*Dxaca lazre' da xriwe' gun na бага Jesús zria*

*(Mr. 1.12-13; Lc. 4.1-13)*

<sup>1</sup> Nadxa Be' Lá'azxa chee Dios la guché'te' Jesús le'e xixre' lawe' lataj naga gúe lazre' da xriwe' gun zréaje na Le'. <sup>2</sup> Quebe bi gudagu Jesús chua zra chua xela, na' ca gudé na' gudune'. <sup>3</sup> Nadxa da xriwe' bzrin na naga zua Jesús chee gun zréaje na Le', na' dxé na Le':

—Che Lue' nacu' Zri'ine Dios, gunná be'e xiaj caní xelexaca na xeta xtila.

<sup>4</sup> Jesús bechebe':

—Lu xiche chee Dios dxenné': “Quebe gaca ban nu benne' gawe' xétaze, san nen xúgute dizra' chee Dios gaca bané'.”

<sup>5</sup> Nadxa da xriwe' guché na Jesús lu xezre lá'azxa Jerusalén, na' bzua na Le' xíchajte xudau', <sup>6</sup> na' guzre na Le':

—Che Lue' nacu' Zri'ine Dios, guxrite' nigá, lawe' da dxenná lu xiche chee Dios:

Dios nna bé'ene' gubáz chee xabáa chee' ca'  
chee xelácalene' Lue'.

Welexechise' Lue' nen ne'e  
chee quebe gunu' zi' ni'u lu xiaj ca'.

<sup>7</sup> Na' gunná Jesús:

—Cá'aqueze dxenná lu xiche chee Dios, dxé'e bénneache: “Quebe guchínenu' Xranu' Dios cáteze dxaca lazru'.”

<sup>8</sup> Nadxa da xriwe' guché na Le' tu lu xi'a sibe, na' ble'e na Le' ca naca xúgute cue' xezr la xu zaj nnita lu xezr la xu, ne ca naca xel-la' guni'a chee na. <sup>9</sup> Na' gunná da xriwe', dxé na Le':

—Xúgute da caní gunna' chiu' che guzú zribu' gucá'ana szrenu' neda'.

<sup>10</sup> Nadxa Jesús guzre' na:

—Bexíaj, da xriwe', lawe' da dxenná Dios lu xiche chee', dxé'e bénneache: “Bca'ana szren Xranu' Dios, ne be lá'ana tuze Le'.”

<sup>11</sup> Nadxa da xriwe' becuasa na lau Jesús, na' belezrin gubáz chee xabáa chee Dios, ne bulunézruje' da dxechine Jesús.

*Dxuzú lau Jesús dxuchálaje' xrtizra' Dios naga nababa Galilea*

*(Mr. 1.14-15; Lc. 4.14-15)*

<sup>12</sup> Gate ben Jesús xu'u Juan lizre xia, na' bezé'e zexíaje' naga nababa Galilea. <sup>13</sup> Quebe bga'ana Jesús xezre Nazaret. Xeajsúe' lu xezre Capernaum da zua na dxu'a nísadau' naga zaj zra' xrtia Zabulón, ne xrtia Neftalí. <sup>14</sup> Caní guca ca da bzuaj Isaías, benne' bchálaje' waláz chee Dios, gunné':

<sup>15</sup> Lu xezr la xu chee Zabulón, ne chee Neftalí,  
naga zrua neza da zeaj na dxu'a nísadau',  
chalá'a naga dxalaj gubizra xechalá'a xegu Jordán.  
Naga nababa Galilea,

naga zaj zra' benne' quebe zaj naque' judío.

<sup>16</sup> Bénneache zaj zra' lu da chul-la belelé'ene' tu da dxusaníle'e na,  
na' benne' zaj zra' naga xu'u zrul-la chee xel-la' gute  
ba bsaní' tu xi' naga zaj zre'e.

<sup>17</sup> Ca lu zra na' guzú lau Jesús dxegu'e lban, dxenné':

—Le xebí'i lázrele, lawe' da ba zua gáguze zra nna bea Dios lu xezr la xu nigá.



*Jesús dxuláwizre' tapa benne' wezén bela*

*(Mr. 1.16-20; Lc. 5.1-11)*

<sup>18</sup> Gate na' zeaj Jesús dxu'a nísadau' ga nababa Galilea, na' blé'ene' chupa benne'. Tué' le' Simón, ne zua xetú le' Pedro, na' xetúe' le' Andrés, biche Simón na'. Benne' caní zaj naque' benne' wezén bela, na' dxuluzale' xixruj bela chee' lu nisa. <sup>19</sup> Nadxa Jesús dxé'e benne' caní:

—Le gun neda' tuze, na' guna' le'e benne' gutúpale chia' bénneache ca dxunle dxezenle bela.

<sup>20</sup> La bulucá'anate' xixruj chee' ca, na' zjácálene' Jesús.

<sup>21</sup> Xelátedauze gusá'aque', na' ble'e Jesús xechupa benne'. Tué' le' Jacobo, ne xetúe' le' Juan, biche Jacobo nigá. Zaj naque' zri'ine Zebedeo, ne zaj xu'e tu lu da dxedá lawe' nísadau' nen xre', dxelexún chawe' xixruj chee'. Jesús bláwizre' le', <sup>22</sup> na' la bulucá'anate' da dxedá lawe' nísadau' na', ne xre', na' zjácálene' Jesús.

*Jesús dxusédené' bénneache naga nababa Galilea*

*(Lc. 6.17-19)*

<sup>23</sup> Zeaj Jesús xúgute xezre zaj nababa Galilea, na' tu tu xezre ca' dxuzéajni'ine' bénneache lu xu'u ca' naga dxulucá'ana szren benne' judío ca' Dios. Na' dxegu'e lban ca nna bea Dios, ne dxexune' xúgute benne' ca' ca zaj naca xízrawe' cha chee'. <sup>24</sup> Ca'an guca, xúgute benne' chee' xezr la xu Siria belenne' ca da dxun Jesús, na' belezrine' lau Jesús, zaj naché'e benne' we' ca', benne' zaj xu'e xízrawe', ne benne' zaj zu'e lu xel-la' dxudía, ne benne' zaj xu'e be' xriwe', ne benne' zaj xu'e chuna', ne benne' zaj naxrú'unie' bine, na' bexún Jesús xúgute benne' caní. <sup>25</sup> Zjácále benne' zan Le', benne' zaj nababe' xezre ca' zaj nababa Galilea, ne benne' zá'aque' xezre Decápolis ca', ne benne' Jerusalén, ne benne' zaj nababe' xezre ca' zaj nababa Judea, ne benne' zá'aque' xechalá'ala xegu Jordán naga dxalaj gubizra.

## 5

*Lban da bchalaj Jesús tu lu xi'a*

<sup>1</sup> Gate ble'e Jesús xúgute benne' zan ca' zá'aque' naga zué', nadxa guluéne' tu lu xi'a, ne gudxé'e na'. Nadxa benne' ca' dxuséde Jesús beledube' cuite'. <sup>2</sup> Nadxa guzú lau Jesús dxusédené' benne' ca'.

*Nu benne' naca chee' tu da ba neza*

*(Lc. 6.20-23)*

<sup>3</sup> Gunná Jesús:

—Da ba neza zrenté naca na chee' benne' ca' dxelexúnbe'e ca naca xel-la' dxexazrje chee' lau Dios. Benne' caní zaj naca chee' xelexú'e naga dxenná bea Dios xabáa.

<sup>4</sup> Da ba neza zrenté naca na chee' benne' ca' dxelelé'ele' zaj zué' lu da baxache' lawe' da zaj nabague' dul-la. Dios dxexúe zrene' benne' caní.

<sup>5</sup> Da ba neza zrenté naca na chee' benne' zaj naque' zren lazre'. Benne' caní xelezí'e chee' xezr la xu da nachébe lazre' Dios gunézruje' benne' caní.

<sup>6</sup> Da ba neza zrenté naca na chee' benne' du lazre' dxelaca lazre' xelune' da naca xrlátaje lau Dios. Dios gácaléne' benne' caní.

<sup>7</sup> Da ba neza zrenté naca na chee' benne' dxelexexache lazre' benne' xula. Dios wexache lazre' benne' caní.

<sup>8</sup> 'Da ba neza zrentę naca na cheę benne' ca' zaj xu'u xichaj lázrdawę' da xrlátaje. Benne' caní welelé'eng' Dios.

<sup>9</sup> 'Da ba neza zrentę naca na cheę benne' dxelebeza zri lazrę' nen bėnneache. Dios guzúę' le' ca bi cheéqueze'.

<sup>10</sup> 'Da ba neza zrentę naca na cheę benne' dxeledéę' xel-la' zi' lu na' benne' ca' dxelunę' cheę' da calęla cate' dxelunę' da xrlátaje. Benne' caní zaj naca cheę' xelexú'e naga dxenná bea Dios xabáa.

<sup>11</sup> 'Da ba neza zrentę naca na cheęle le'e che benne' dxelennę' schanni' cheęle, ne dxelunę' cheęle da calęla, ne dxelennę' cheęle xúgute dizra' węn lazre' lawe' da nácale chia' neda'. <sup>12</sup> Le be, ne le xezaca ba lázrele lawe' da wazile tu da zrentę da gunna Dios le'e xabáa. Caní gaca na lawe' da cá'anqueze caní guláu zi' xuzrę' benne' ca' buluchálaje' waláz cheę Dios, benne' ca' gulezrę'e nédxudxa ca le'e.

*Nácale ca zede', ne ca tu xi' lu xęzr la xu  
(Mr. 9.50; Lc. 14.34-35)*

<sup>13</sup> Na' gunná Jesús:

—Le'e nácale ca zede' cheę bėnneache lu xęzrla xu nigá. Che zede' nigá xenite xel-la' sna'a cheę na, ¿ájazra gácalele bėnneache ca'? Québedxa gaca guchínedxu zede' caní. ¡Chú'unadxu na, na' xululéaj bėnneache le na!

<sup>14</sup> 'Le'e nácale ca tu xi' cheę bėnneache zaj zrę'e xęzr la xu. Tu xęzre da zua na tu lu xi'a, quebe gáchequeze na. <sup>15</sup> Gate guzáajdxu tu xi', quebe gudúsedxu na. Guzáadxu na sibe naga gusení na cheę xeledé'e xúgute benne' zaj zrę'e lu xu'u. <sup>16</sup> Cá'anqueze le gun le'e. Le güe lataj gusení xi' da nácale lau bėnneache ca' cheę xeledé'eng' ca da xrlátaje da dxunle. Nadxa xelúe lá'anę' Xrale Dios zuę' xabáa.

*Da bchalaj Jesús ca naca cheę da nadxixruj bea Dios*

<sup>17</sup> Gunná Jesús:

—Quebe dxal-la' guéquele le'e za'a neda' cheę cua' ca naca da bdxixruj be'e Moisés, ne ca naca dizra' da buluchalaj benne' ca' buluchálaje' waláz cheę Dios. Quebe za'a cheę cua' na. Za'a cheę gulé'eda' cáteze zéaje na. <sup>18</sup> Da li dxapa' le'e. Dxácatę zaj zua xabáa, ne xęzr la xu nigá, quebe dúaqueze tu dizra', ne tu da da' lu da nadxixruj bea na nigá ca zrindxa zra gaca xúgute ca da dxal-la' gaca na. <sup>19</sup> Cheę le na', che tu benne' guzúę' chalá'ala bítetezla da nigá da bdxixruj bea Dios, láqueze naca na tu da dauze, ne che guzėjajni'ine' bėnneache cheę xelúnqueze' ca', benne' nigá xegá'anę' cá'aze naga dxenná bea Dios xabáa. Bėnnea' guzúę' dizra' da nadxixruj bea nigá, ne gulé'eng' bėnneache cheę xelúnqueze' ca', benne' nigá wegá'anaqueze' ba lá'ana naga dxenná bea Dios xabáa. <sup>20</sup> Dxapa' le'e, che quebe gunle da nácadxa xrlátaje ca da dxelún benne' ca' dxuluxuzájle'e da nadxixruj bea Dios, ne ca da dxelún benne' xudau' fariseo ca', cabata' xexú'ule le'e naga dxenná bea Dios xabáa.

*Da bchalaj Jesús ca naca cheę xel-la' dxezrá'a  
(Lc. 12.57-59)*

<sup>21</sup> Na' gunná Jesús:

—Le'e ba bénele ca gulenná xrtíale gula ca': "Quebe gütele benne'," na' "Núteze benne' gutię' benne' waxíaje' cheę cuía xi'e." <sup>22</sup> Neda' dxapa' le'e, núteze benne' dxezrę'e le sa' ljwezrę' waxíaje' cheę cuía xi'e. Na' bėnnea' dxennę' schanni' cheę le sa' ljwezrę' waxíaje' lau benne' cheę xu'u

lawe' blau, na' xuludé' le' chee' cuía xi'e. Bénnea' dxenné' chee' le sa' ljwezre' tu dizra' sban, benne' nigá nácaqueze chee' chéajé' lu lataj ba xa'.

<sup>23</sup> 'Che gu'u lu xudau' tu da gunézruju' lau Dios, ne na' cheajsá lazru' chee' tu da nunu' chee' le sa' ljwezru', <sup>24</sup> bca'ana da na' gunézruju' na', teca xexíaju' xegá'anu' chawe' nen le sa' ljwezru'. Nadxa waca xexíaju' lu xudau' chee' bi gunézruju' lau Dios.

<sup>25</sup> 'Che zua nu benne' dxebagu' chee', na' ché'e lue' lau benne' guchi'e chiu', bexaca chawe' nen le' la neza na', chee' quebe gudé' lue' lau bénnea' dxuchi'e da dxaca. Che quebe gunu' caní, nadxa benne' dxuchi'e da dxaca na' gudé' lue' lu na' benne' dxuséxujé' bénne' ca' lizre xia, na' xelegú'e lue' lizre xia na'. <sup>26</sup> Da li dxapa' lue'. Quebe xedxúaju' na' che quebe quízruju' xúgute da dxebagu' chee' benne' na'.

*Da bchalaj Jesús ca naca chee' benne' dxíchajé' xrba chee' xel-la' nuchaga na'*

<sup>27</sup> Na' gunná Jesús:

—Le'e bache bénquezle ca gulenné' nédxute: “Quebe gunu' dul-la da dxichaj na xrba chee' xel-la' nuchaga na'.” <sup>28</sup> Neda' dxapa' le'e, núteteze benne' ne'e tu nu'ula, ne sa lazre' le', báchequeze bené' dul-la nen nu'ula na' lu xichaj lázrdawe'.

<sup>29</sup> 'Che xiaj lau' da zua xabéla dxuzúa na lue' lu dul-la, guleaj na, ne gudxú'una na zítu'la. Nácadxa chawe' nite late' da naca na chee' bel-la' dxen chiu' quézcala chu'u lataj ba xa' duté bel-la' dxen chiu'. <sup>30</sup> Che na'u da zua xabéla chiu' dxuzúa na lue' lu dul-la, guchugu na, ne gudxú'una na zítu'. Nácadxa chawe' nite late' da naca na chee' bel-la' dxen chiu', quézcala chu'u lataj ba xa' duté bel-la' dxen chiu'.

*Jesús dxusédené' ca naca chee' benne' dxexelé'e nen zru'ule'*

(Mt. 19.9; Mr. 10.11-12; Lc. 16.18)

<sup>31</sup> Na' gunná Jesús:

—Cá'anqueze gulenné' nédxute: “Núteteze benne' dxexelé'e nen zru'ule', dxal-la' gunézruje' nu'ula na' tu xiche da dxulé'e na belexelé'e.” <sup>32</sup> Neda' dxapa' le'e, che tu benne' dxexelé'e nen zru'ule', na' nu'ula nigá quebe guzúaléne' benne' xula, benne' chee' nu'ula nigá dxuzúe' le' lu dul-la chee' da dxichaj na xrba chee' xel-la' nuchaga na' che tu benne' biu xula guchaga ne'e nen nu'ula na' bsan benne' chee' le'. Cá'anqueze le' dxune' dul-la nen nu'ula na'.

*Jesús dxusédené' ca naca chee' benne' dxucá'ana lié' xrtizre'*

<sup>33</sup> Na' gunná Jesús:

—Cá'anqueze ba bénele ca gulenná benne' gula ca', gulenné': “Quebe gucá'anu' cá'aze ca da nachébe lazru' nen dizra' bca'ana liu' lau Xránadxu Dios.” <sup>34</sup> Neda' dxapa' le'e: Quebe dxal-la' guzétjale xabáa chee' guca'ana lile dizra' chee', lawe' da naca na naga dxé' Dios, <sup>35</sup> ne quebe guzétjale xezr la xu nigá lawe' da naca na naga nuzúa Dios ni'e, ne quebe guzétjale Jerusalén lawe' da naca na xezre chee' Benne' Blau naque' Wenná Bea. <sup>36</sup> Quebe guzétjale xíchajle chee' guca'ana lile dizra' chee' lawe' da quebe séquele gunle da chiche, ne da gasaj netú xicha xíchajle. <sup>37</sup> Le nnaze: “Awe’,” u le nnaze: “Cabí,” lawe' da gate tu benne' dxudadxé' chee' chee' da nigá, naca na chee' da xriwe'.

*Dxulé'e Jesús ca naca chee' nu benne' dxexebéaj lazre'*

(Lc. 6.29-30)

38 Na' gunná Jesús:

—Le'e ba bénele ca da gulenné' nédxute: “Che tu benne' cuéajé' xiaj lau', cá'anqueze gunu' cheé', ne che cuéajé' lazxu', cá'anqueze gunu' cheé'.”  
 39 Neda' dxapa' le'e, quebe tíl-lalele nu benne', san che tu benne' gu'e chalá'a xragu', be' lataj gu'e xechalá'a xragu'.<sup>40</sup> Che tu benne' gaca xúzre'lene' lue', ne dxaca lazre' cue' zrau', be' lataj xúate' xicha chiu'.  
 41 Che dxulusebágué' lue' gu'u xua cheé' tu cuéndau', bia na chupa cuenla.  
 42 Che núteteze benne' bi dxenabé' chiu', bnézrujé' na, ne quebe guzagu' ca gunézruju' cheé' nu benne' bi dxenabé' chite'.

*Jesús dxusédené' ca dxal-la' zri'idxu benne' ca' dxeledábague' dxi'u*  
 (Lc. 6.27-28, 32-36)

43 Na' gunná Jesús:

—Cá'anqueze ba bénele ca da gulenné' nédxute: “Bzri'i le sa' ljwezru', ne gucuide benne' dxedábague' lue'.”<sup>44</sup> Neda' dxapa' le'e, le zri'i benne' ca' dxeledábague' le'e. Le naba gaca chawe' cheé' benne' dxelenné' cheele. Le gun da chawe' cheé' benne' dxelecuídené' le'e. Le naba lau Dios gaca chawe' cheé' benne' dxelenné' schanni' cheele ne dxeluné' cheele da calela.<sup>45</sup> Che gunle caní gácale bi cheéqueze Xrale zué' xabáa, lawe' da dxun Le' dxusaní' gubizra naga zaj zra' benne' wen da calela ne naga zaj zra' benne' xrlátaje ca', ne dxusel-la' nisa xiuj lu xezr la xu cheé' benne' chawe' ca', ne lu xezr la xu cheé' benne' ca' dxeluné' da calela.<sup>46</sup> Che nazrí'ile tuze benne' zaj nazrí'ine' le'e, zájazra na' dxezá' lázrele quizruj Dios le'e? Cá'anqueze dxelún benne' wechizruj ca', zaj nazrí'ine' le sa' ljwezre'.<sup>47</sup> Che le'e dxugápale diuzre tuze le sa' ljwézrele, zbizra da xrlátaje dxunle? Cá'anqueze dxelún benne' quebe zaj núnbe'e Dios.<sup>48</sup> Le gaca benne' xrlátaje cáteze naca Xrale zué' xabáa, naque' xrlátaje.

## 6

*Dxulé'e Jesús ca naca da xrlátaje da dxelún bénneache*

1 Caní gunná Jesús:

—Le guxúe xanne' cuínale cheé' quebe gunle da naca cheé' xel-la' benne' xudau' cheele lau bénneache cheé' xelelé'ene' na. Che ca'an dxunle, na' Xrale Dios zué' xabáa québequeze bi gunné' le'e.<sup>2</sup> Cheé' le na', gate lue' dxácalenu' benne' dxelexázejene', quebe guzennu' xúgute' bénneache ca da dxunu', ca dxelún benne' ca' dxeluné' xrlátaje cúzreze la neza, ne lu xu'u naga dxulucá'ana szren benne' judío ca' Dios. Dxeluné' da caní cheé' xelenné' bénneache xrlátaje cheé'. Da li dxapa' le'e, ba déqueze lazruj cheé'.<sup>3</sup> Gate lue' gunézruju' late' cheé' benne' dxelexázejene', ben na luéze cheé' quebe neze le sa' ljwezru'.<sup>4</sup> Ben da caní bagácheze, na' Xrau' Dios, Bénéa' dxelé'ene' ca da dxunu' bagácheze, Le' gunné' lazruj chiu'.

*Jesús dxusédené' ca dxal-la' gundxu xel-la' dxuláwizra Dios*  
 (Lc. 11.2-4)

5 Na' gunná Jesús:

—Gate le'e gunle xel-la' dxuláwizra Dios, quebe gunle ca dxelún benne' ca' dxeluné' xrlátaje cúzreze. Dxeledáneng' dxeluné' xel-la' dxuláwizra Dios zaj zeze' lu xu'u naga dxulucá'ana szren benne' judío ca' Dios, ne la neza, cheé' xelelé'e bénneache da dxeluné'. Da li dxapa' le'e, ba déqueze lazruj cheé'.<sup>6</sup> Gate lue' dxuláwizru' Dios, guxú'u lu xu'u chiu'. Bsezxuj dxa xu'u chiu', na' bláwizra Dios guchálajlenu' Xrau' Dios zúalene' lue' naga zu'

tuzu'. Nadxa Xrau' Dios, Bénnea' dxelé'eng' ca da dxunu' bagácheze, Le' xuzri'e chiu'.

<sup>7</sup>Gate dxuláwizru' Dios dxuchálajlenu' Le', quebe tuz ca da nneu' zánete lasa ca dxelún benne' ca' quebe zaj núnbe'e Dios. Dxeléquene' wen Dios chee' lawe' da dxelenné'le'e. <sup>8</sup>Quebe gunle ca dxelún benne' ca', lawe' da Xrale Dios ba nézquezne' ca da dxechínnele le'e nédxula ca za nábale na. <sup>9</sup>Chee le na', le guláwizra Dios nnale caní:

Xrantu' Dios, zu' xabáa,  
gaca lá'azxaqueze Lau'.

<sup>10</sup>Gudá nna be'u lu xęzr la xu nigá.

Gaca lu xęzr la xu nigá ca dxaca lazru' Lue',  
cáteze dxaca xabáa.

<sup>11</sup>Benna netu' da gáguntu' na'a.

<sup>12</sup>Bnite lau cheętu' ca naca da calela da bęntu',  
ca netu' ba bnite launtu' chee benne' belune' cheętu'  
da calela.

<sup>13</sup>Quebe gu'u lataj nu gun zréaje netu',

2 san bselá netu' lu na' da xriwe'.

Naca chiu' gápaquezu' xel-la' dxenná bea,  
ne xel-la' waca,

ne da xabáa chadía chacanna. ¡Ca'an gaca na!

<sup>14</sup>'Che le'e gunite laule chee benne' belune' chee da calela, na' Xrale Dios zue' xabáa gunite lawe' chee le'e. <sup>15</sup>Che le'e quebe gunite laule chee benne' ca', na' Xrale Dios quebe gunite láuqueze' chee le'e ca naca dul-la da nabágale.

*Jesús dxusédenę' ca dxal-la' gundxu gubasa*

<sup>16</sup>Na' gunná Jesús:

—Gate le'e dxunle gubasa, quebe guzúale baxache' laule ca dxelún benne' dxelune' xrlátaje cúzreze. Benne' caní dxelune' ca' chee xelee'e bénneache le' dxelune' gubasa. Da li dxapa' le'e, ba déqueze lazruj chee benne' ca'. <sup>17</sup>Lue', gate dxunu' gubasa, bza xíchaju' chawe', ne gudibe lau', <sup>18</sup>chee quebe xeléquebe'e bénneache dxunu' gubasa. Tuze Xrau' Dios na', Bénnea' zúaleņe' lue' naga zu' tuzu', Le' dxennátequeze', na' gunne' da naca na chiu'.

*Jesús dxusédenę' chee da gunní'a chee xabáa*

*(Lc. 12.33-34)*

<sup>19</sup>Na' gunná Jesús:

—Quebe gutúpale da gunní'a lu xęzr la xu nigá, naga guteba' na, ne da ca' dxelebia xi na, na' xelú'u gubán ne xeleanę' na. <sup>20</sup>Le'e, le gun da xrlátaje, da gaca na ca guzrá cháwele da gunní'a xabáa, naga quebe guteba' na, ne da ca' quebe bi xelee na, na' québequeze xelú'u gubán chee xelee' na. <sup>21</sup>Naga nuzrale da gunní'a chee, na' zúaqueze lázrdaule.

*Jesús dxusédenę' chee tu xi' da xú'udxu*

*(Lc. 11.34-36)*

<sup>22</sup>Na' gunná Jesús:

—Xiaj laule zaj naca na ca tu xi' chee beł-la' dxen chee. Che xiaj laule zaj naca na chawe', dute ca naca beł-la' dxen chee naxaní'. <sup>23</sup>Che xiaj

laule quebe zaj naca na chawe', dutē ca naca bēl-la' dxen cheēle nachul-la na. Cá'anqueze che xi' da xu'ule xexaca na tu da chul-la, chúl-lalē'ēdxa súaquezle.

*Jesús dxusédenē' cheē Dios, ne cheē da gunní'a*  
(Lc. 16.13)

<sup>24</sup> Na' gunná Jesús:

—Netú benne' quebe séquene' guzúa cuine' lu na' chupa xrane', lawe' da wazré'ē tu xrane' ne wazrí'ine' xetúē', u wéquene' ba lá'ana tu xrane' na' xetúē' guzúē' chalá'ala. Quebe séquele guzúa cuinle lu na' Dios, ne lu na' da gunní'a.

*Jesús dxusédenē' ca dxun Dios, dxuxúē' xúgutē bi cheē' ca'*  
(Lc. 12.22-31)

<sup>25</sup> Na' gunná Jesús:

—Cheē lē na' dxapa' le'e, quebe cue'le gunne xue ga sa' da gágule da xí'ajle cheē gaca banle, ne ga sa' zra lánale da gágule. Zácadxa xel-la' nabán cheēle ca da dxágule, ne zácadxa bēl-la' dxen cheēle ca zra lánale. <sup>26</sup> Le nna'xque bxínnedu ca' dxeledaba' lu be'. Quebe dxelázaba'. Quebe dxelelápaba'. Quebe ga dxuluxuzrá cháweba' na. Xrale Dios zuē' xabáa dxunézruje' da dxeláguba'. Zácadxale le'e ca bxínnedu ca'. <sup>27</sup> ¿Nuzra benne' ládujla le'e gaca gusetunna cuine' xate' lawe' da dxe'ē gunne xue?

<sup>28</sup> ¿Bizr cheē na' dxe'le le'e gunne xue cheē zra lánale? Le nna'xque ca dxelegula xiaj ca' zaj zē lē'ē xixre'. Quebe dxelún na zrin, ne quebe dxelache na du. <sup>29</sup> Dxapa' le'e, Salomón benne' wenná bea na' quebe gucue' ca da xrtan cheē xiaj caní, na' le' gúta'le'ē cheē da gunní'a. <sup>30</sup> Che Dios dxudxene' xrtánlē'ē xiaj caní da ca' zaj zua na na'a lē'ē xixre', na' wxre xelexxe na lu xi', quegá gundxē' da chawe' cheēle le'e, benne' québetē ca dxeajlí lazre'. <sup>31</sup> Cheē lē na', quebe cué'tecale gunne xue, nna'le: "¿Ga sa' da gágudxu? ¿Ga sa' da xí'ajdxu? ¿Ga sa' da gágudxu?" <sup>32</sup> Cheē da caní zaj dxe' gunne xue benne' quebe zaj núnbe'ē Dios, san le'e, zua tu Xrale xabáa ba nézquezne' ca naca xúgutē da dxechínnele. <sup>33</sup> Zria laudxa cuele gunne xue cheē nna bea Dios lu xichaj lázrdaule, ne cheē gunle da xrlátaje da xezaca ba lazre' Dios, na' sile xúgutē da ca' dxechínnele. <sup>34</sup> Quebe cuele gunne xue na'a da naca na cheē wxre, lawe' da wxre ca'an gáta'queze da cuele gunne xue. Tu zra tu zra déqueze da guchaga laudxu.

## 7

*Jesús dxusédenē' cheē benne' dxuchi'ē da dxun le sa' ljwézre'*  
(Lc. 6.37-38, 41-42)

<sup>1</sup> Na' gunná Jesús:

—Quebe guchí'ale da dxelún le sa' ljwézrele cheē quebe guchi'a Dios caní cheēle le'e. <sup>2</sup> Lē' guchi'ē cheēle le'e cáteze dxunle le'e cheē le sa' ljwézrele, ne cáteze dxunle le'e cheē le sa' ljwézrele, ca'an gun Dios nen le'e. <sup>3</sup> ¿Bizr cheē na' dxená'u bēbedau' da xu'u xiaj lau le sa' ljwezru', ne quebe dxená'u da zrentē da xu'u na xiaj láuquezu' lue'? <sup>4</sup> ¿Ájazra gunu' xu'u le sa' ljwezru': "Benna lataj xebéaja' bēbedau' da xu'u xiaj lau'", che da zrendxa xu'u xiaj láuquezu' lue'? <sup>5</sup> Lue', benne' dxun xrlátaje cúzreze. Bebéaj nedxu da zrentē da xu'u xiaj láuquezu', na' gaca le'enu' cháwedau' xebéaju' bēbedau' da xu'u xiaj lau le sa' ljwezru'.

<sup>6</sup> 'Quebe gunézrujle da naca lá'azxa chee benne' dxelunę' ca dxelún becu' snia, checa xelexéxaje', ne xuluzúzruę' le'e. Quebe guzúale da zaca chee lau benne' dxelunę' ca dxelún cuche, dxuluchuchuj dxululéajba' da dxugágule-ba'.

*Dxuchalaj Jesús ca dxal-la' nábaxu, ne xexílajdxu, ne nneđxu dxu'a dxa xu'u*

*(Lc. 11.9-13; 6.31)*

<sup>7</sup> Na' gunná Jesús:

—Le naba, na' Dios gunne' na chee. Le xilaj na, na' xezrélele na. Le nne dxu'a dxa xu'u, na' sáluje' chee. <sup>8</sup> Le gun caní lawe' da benne' bi dxenabe', dxezi'e na. Benne' bi dxexílaje', dxeajxraque' na, na' benne' dxenné' dxu'a dxa xu'u, zua nu benne' sáluje' chee'.

<sup>9</sup> 'Netule le'e quebe gunézrujle zrí'inele tu xiaj che lebe' dxenábabe' le'e tu xeta. <sup>10</sup> Quebe gunézrujle zrí'inele tu bela' snia che lebe' dxenábabe' le'e tu bela. <sup>11</sup> Che le'e, benne' wen da calela, nézele gunézrujle zrí'inele da naca na chawe', da cháwedxa gunna Xrale Dios zua xabáa, gunne' da chawe' chee benne' bi dxenábene' Le'.

<sup>12</sup> 'Le gun chee le sa' ljwézrele ca dxaca lázrele le'e xelún lebe' chee. Da nigá naca da nadxixruj bea na Moisés, ne da dxenná na lu xiche naga naxúaj da gulenná benne' ca' buluchálaje' waláz chee Dios.

*Jesús dxusédenę' chee dxa xu'u lechide'*

*(Lc. 13.24)*

<sup>13</sup> Na' gunná Jesús:

—Le chu'u lu dxa xu'u lechide'. Dxa xu'u laga, ne neza xu zaj naca naga zjaca benne' xelebía xi'e, na' benne' zante zjaque' na'. <sup>14</sup> Dxa xu'u lechide', ne neza lase zaj naca naga zjaca benne' xezezi'e xel-la' nabán da zeajlí canna, na' bábaze benne' dxelexezrelnę' na.

*Naca bea tu xaga ne chee da zixre dxebía na*

*(Lc. 6.43-44)*

<sup>15</sup> Na' gunná Jesús:

—Le guxúe cuínale chee benne' wen lazre' ca', benne' dxelenné' zaj naque' benne' dxuluchálaje' waláz chee Dios. Benne' caní zá'aque' naga zrale le'e, zaj nun cuine' ca tu benne' dxexruj lazre' ca naca tu zríla'dau', san lu xichaj lázrdawe' zaj naque' snia ca tu becu' xi'a. <sup>16</sup> Le'e xúnbeale le' ne chee da dxelunę'. Da zixre da dxebía lba uva quebe xuchíbedxu na lu xaga xeche', na' da zixre da dxebía xaga higo quebe xuchíbedxu na lu xeche' ga'. <sup>17</sup> Ca'an naca, xúgute xaga chawe' dxelebía na da zixre chawe', na' xaga da quebe naca na chawe', quebe dxebía na da zixre chawe'. <sup>18</sup> Xaga chawe' ca' quebe dxelebía na da zrinnaj, na' xaga zrinnaj na' quebe dxebía na da chawe'. <sup>19</sup> Xúgute xaga zrinnaj welechugue na, na' xezeze na lu xi'. <sup>20</sup> Ca'an naca, le'e xúnbeale benne' ca' ne chee da ca' dxelunę'.

*Quegá xúgute benne' xelu'e naga dxenná bea Dios xabáa*

*(Lc. 13.25-27)*

<sup>21</sup> Na' gunná Jesús:

—Quebe xelu'e naga dxenná bea Dios xabáa xugute benne' ca' dxelé'e neda': "Xrana', Xrana'." Welú'u tuze benne' ca' dxelunę' ca da dxaca lazre' Dios zue' xabáa. <sup>22</sup> Ca zrin zra na', benne' zante xelé'e neda': "Xránantu', Xránantu', netu' bchálajntu' ne chee Lau' Lue', ne bchínentu'

Lau' bebéajntu' be' xriwe' ca', ne nen Lau' Lue' bēnle'entu' xel-la' waca ca' chee xabáa." <sup>23</sup> Nadxa neda' xápaqueza' benne' ca': "Quebe núnbe'a le'e. Le cuasa cuita' neda', le'e, ba benle da calela."

*Jesús dxusédenē' chee chupa lane xu'u*

(Lc. 6.47-49; Mr. 1.22)

<sup>24</sup> Na' gunná Jesús:

—Bénnea' dxenne' chia', ne dxune' ca da dxennía', naque' ca tu benne' naxéajni'iqueze', benne' beñe' tu lizre' lu xiaj xre. <sup>25</sup> Guca xiuj, na' bdxuaj guba'u, ne guxasa be' bđunu' chee xuluzría xi na xu'u na', san quebe guzré'e na lawe' da xu'u lane na lu xiaj xre. <sup>26</sup> Bénnea' quebe dxuzé nague' chia', ne quebe dxune' ca da dxennía', naque' ca tu benne' xala, benne' beñe' tu lizre' lu xu dxeze. <sup>27</sup> Guca xiuj, na' bdxuaj guba'u ne guxasa be' bđunu' chee xuluzría xi na xu'u na', na' chadite guzré'e na, ne guzría xite na.

<sup>28</sup> Ca bexuzre bchalaj Jesús, na' belexebanne benne' ca' ca naca da bsédenē', <sup>29</sup> lawe' da dxusédenē' benne' ca' ca tu benne' nape' xel-la' dxenná bea, ne quegá ca dxelún benne' ca' dxuluxuzájlē'e da nadxixruj bea Dios.

## 8

*Dxexún Jesús tu benne' dxuzru lu xpele'*

(Mr. 1.40-45; Lc. 5.12-16)

<sup>1</sup> Gate bexetaj Jesús lu xi'a na', benne' zante zjácálenē' Le'. <sup>2</sup> Na' bzrin tu benne' we' dxuzru lu xpele', ne bzu zribe' lau Jesús. Dxe'e Le':

—Xran, che dxaca lazru', waca xexunu' neda'.

<sup>3</sup> Nadxa Jesús guxrúa ne'e bénnea'. Dxe'e le':

—Dxaca lazra', Na'a dxexuna' lue'.

Ca gunné' caní, benne' we' na' bexácate' ca naca xízrawe' chee'. <sup>4</sup> Na' Jesús guzre' le':

—Gunná' xque. Quebe nu xu'u ca'. Bexíajze na'a xeajxelé'e cuinu' lau bxruze, ne xeajnezruj guna' ca da dxenná bea lu da bdxixruj be'e Moisés, chee xelelé'e benne' ca' ba bexacu' na'a.

*Dxexún Jesús bi wen zrin chee tu benne' dxenná be'e lu wedil-la*

(Lc. 7.1-10)

<sup>5</sup> Ca bexú'u Jesús lu xezre Capernaum, na' bzrin lawe' tu benne' Roma, benne' dxenná be'ene' benne' ca' dxjaque' wedil-la, na' guta' xuenē' Le', <sup>6</sup> dxe'e Le':

—Xran, bi wen zrin chia' debe' lizra'. Naxrú'unebe' bine, ne dx-ezácále'ebe'.

<sup>7</sup> Jesús dxe'e le':

—Wazá'a xexuna'-be'.

<sup>8</sup> Benne' dxenná be'e na' gunné':

—Xran, quebe naca chia' chu'u lizra'. Cun gunneze, na' xexaca bi wen zrin chia'. <sup>9</sup> Caní waca gunu' lawe' da zua benne' dxenná bé'ene' neda', ne cá'anqueze neda' dxenná be'eda' benne' ca' dxjaque' wedil-la. Gate dxapa' tube': "Guxíaj", na' dxéajbe'. Na' gate dxapa' bi xula: "Gudá", na' dxídabe'. Na' gate dxuchínedá' bi wen zrin chia' chee bi da gunbe', na' dxunbe' na.

<sup>10</sup> Gate bene Jesús da nigá, bebánene', na' guzre' benne' ca' zjácálenē' Le':

—Da li dxapa' le'e, ládujla benne' Israel quebe nu ne xezrelda', benne' dxéajle'e chia' ca dxun benne' nigá. <sup>11</sup> Neda' dxapa' le'e, zá'aca benne'



zantę chál'a naga dxalaj gubizra, ne xechalá'ala naga dxebía gubizra, na' xelebé'e tu zren xelawę' nen Abraham, ne Isaac, ne Jacob naga dxenná bea Dios xabáa. <sup>12</sup> Benne' ca' gucá'a zga'ale Dios cheę xelu'e naga dxenná bea Le', guzale' benne' ca' lataj chul-la naga xebeze, ne xeláguxa'ate lazxe'.

<sup>13</sup> Nadxa Jesús guzre' benne' dxenná be'e na':

—Bexíaj lizru'. Waca ca da ba guxéajle'u.

Ca lu zra ná'queze bexácate bi wen zrin cheę'.

*Dxexún Jesús xrna zru'ule Pedro*

(Mr. 1.29-31; Lc. 4.38-39)

<sup>14</sup> Guxíaj Jesús lizre Pedro, na' blé'ene' xrna zru'ule' de' lu da'a, xu'e da la. <sup>15</sup> Xejtę' ne'e, na' bedxúaj da la da xu'e. Nadxa nu'ula na' guxase', ne guzú lawe' dxusení'e da xelagu benne' ca'.

*Dxexún Jesús benne' zantę benne' we'*

(Mr. 1.32-34; Lc. 4.40-41)

<sup>16</sup> Ca guzríaj gubizra, na' belezrín benne' zantę lau Jesús, zaj naché'e benne' zaj xu'e be' xriwe' ca'. Nen dízra'ze da gunná Jesús, bebéaje' be' xriwe' ca', ne bexune' xúgute' benne' we' ca'. <sup>17</sup> Da nigá guca na ca da gunná Isaías, benne' bchálaje' waláz cheę Dios, gunné': "Le' bequę'e xízrawe' ca' da nápadxu, ne gubague' ca da dzezácadxu."

*Dxelaca lazre' benne' chjácalęe' Jesús*

(Lc. 9.57-62)

<sup>18</sup> Gate na' ble'e Jesús benne' zantę zaj naxéchaje' Le', na' guzre' benne' ca' dxusédenę' gulelague' xechalá'a nísadau' tu lu da dxedá lawe' nisa. <sup>19</sup> Na' bzrin lau Jesús tu benne' dxuxuzájle'e da bdxixruj be'e Dios, na' dxe'e Le':

—Benne' Wesede, dxaca lazra' sálęna' Lue' gáteteze chéaju'.

<sup>20</sup> Na' Jesús guzre' le':

—Beza' zaj zua bluaj cheęba', na' bxinne zaj zria xru'uneba', san neda', Benne' Gulje' Bénneache, ne naga xrua xíchaja' quebe ga zua.

<sup>21</sup> Bzrin xetú benne' naque' benne' ba bsédequeze Jesús, na' guzre' Le':

—Xran, bęna neda' lataj xexá'a nedxu cheę cheajxecacha' xra'.

<sup>22</sup> Nadxa Jesús guzre' le':

—Gudáęen neda'. Be' lataj benne' gate ca' xulucache ljwezre'.

*Dxebeque zri Jesús be' bdunu', ne xejxruga cheę nísadau'*

(Mr. 4.35-41; Lc. 8.22-25)

<sup>23</sup> Nadxa guxú'u Jesús lu da dxedá lawe' nísadau', na' benne' ca' dxusédenę' belunę' Le' tu zren. <sup>24</sup> Na' guzú lau dxaca tu be' bdunu' lawe' nísadau', na' xejxruga cheę nísadau' guxú'u na lu da dxedá lawe' nísadau' na', dxácate dxase Jesús. <sup>25</sup> Nadxa benne' ca' dxusédenę' bulusebanę' Le', na' dxelę'e Le':

—Xránantu'. Bselá netu'. Ba dxázentu' lu nisa.

<sup>26</sup> Jesús guzre' le':

—¿Bizr cheę na' dxezrébele'ęle? Nácale benne' látega dxelejlı lázre' Dios.

Nadxa guxasa Jesús. Gudil-le' be' bdunu', ne nísadau', na' la belebé zrite na. <sup>27</sup> Benne' ca' belexebánęe', gulennę':

—¿Núzraqueze benne' nigá? Dxuluzúa be', ne nísadau' dizra' cheę'.

*Benne' Gadara zaj xu'e be' xriwe'*

(Mr. 5.1-20; Lc. 8.26-39)

<sup>28</sup> Gate bezrin Jesús xechalá'a nísadau' na' lu xezr la xu chee benne' Gadara, na' chupa benne' biu belexedxúaje' lu bluaj chee benne' gate, na' belezrine' lau Jesús. Dxúpatę benne' ca' zaj xu'e be' xriwe', ne zaj naque' benne' sniale'e, na' netú benne' quebe dxexázrene' xedé'e la neza na'. <sup>29</sup> Na' gulezú lawe' dxelebézrexe'e. Dxelenné':

—¿Bizr chee na' za'u naga zúantu', Jesús, Zri'ine Dios? ¿Za'u nigá chee gusaca zi'u netu', ne quebe ne zrin zra?

<sup>30</sup> Tu chi na' zra tu cue' cuche dxeláguba'. <sup>31</sup> Be' xriwe' ca' gulata' xue na Jesús, gulenná na:

—Che Lue' xebéaju' netu' nigá, benne' lataj cheajchú'untu' lu cuche ca'.

<sup>32</sup> Nadxa Jesús guzre' na:

—Le chjaca xca'.

Nadxa be' xriwe' ca' belexedxúaj na lu benne' ca', na' belexú'u na lu cuche ca'. Nadxa xúgute' cuche ca' belelázruba' tu dxu'a xi'a zren, na' xeajlecházeba' lu nísadau' naga gulázeba' nisa, na' guláteba'.

<sup>33</sup> Benne' ca' buluxúe'-ba' belezrebe', na' besá'aca chégüe', ne belexezrine' lu xezre. Buluchálaje' ca guca xúgute' da caní, ne ca guca chee benne' ca', belexedxúaj be' xriwe' zaj xu'e. <sup>34</sup> Nadxa xúgute' benne' zaj zre'e lu xezre na' beledxúaje', ne belezrine' naga zua Jesús. Na' ca belelé'ene' Le', gulata' xuene' Le' kezé'e lu xezr la xu chee'.

## 9

*Dxexún Jesús tu benne' zaj zua zri ni'a ne'e*

(Mr. 2.1-12; Lc. 5.17-26)

<sup>1</sup> Nadxa Jesús guxú'e tu lu da dxedá lawe' nísadau', na' gulague' xechalá'a nísadau', na' bezrine' lázrequeze'. <sup>2</sup> Na' bedajlegu'e tu benne' biu lau Le', zaj zua zri ni'a ne'e, zaj naxrúe' benne' na' tu lu ta'a blaga'. Gate ble'e Jesús ca dxeléajle'e chee', na' gunné', dxę'e benne' we':

—Ben dipa lazru', zri'ina'dau'. Dul-la chiu' dxunite lawa'.

<sup>3</sup> Nadxa bal-la benne' dxuluxuzájle'e da nadxixruj bea Dios gulenné' lu xichaj lázrdawe': "Benne' nigá dxucá'ana dítaje' Dios nen xrtizre'." <sup>4</sup> Lawe' da neze Jesús ca gulenné' lu xichaj lázrdawe', na' dxę'e benne' ca', gunné':

—¿Bizr chee na' dxennale caní lu xichaj lázrdawe'? <sup>5</sup> ¿Bízrala da quebe nácadxa stębe guna? ¿Nnia': "Dul-la chiu' ba bnite lawa'", u che nnia': "Bexasa, guzá?" <sup>6</sup> Chee le' na' gulé'eda' le'e neda', Benne' Gulje' Bénneache, napa' xel-la' dxenná bea lu xezr la xu nigá gunite lawa' dul-la.

Nadxa dxę'e benne' zaj zua zri ni'a ne'e, gunné':

—Bexasa. Becá'a ta'a chiu'. Bexíaj lizru'.

<sup>7</sup> Bénnea' zaj zua zri ni'a ne'e bexase', na' zexíajte' lizre'. <sup>8</sup> Gate belelé'e bénneache da nigá, na' belezrebe', ne belúe lá'ane' Dios lawe' ba bnézruje' xel-la' waca caní chee bénneache.

*Jesús dxuláwizre' Mateo*

(Mr. 2.13-17; Lc. 5.27-32)

<sup>9</sup> Ca bezá Jesús na', na' blé'ene' tu benne' biu le' Mateo, dxę'e lataj naga dxuchízruje' waláz chee xezre Roma, na' dxę'e le', gunné':

6 —Ben neda' tuze.

Nadxa Mateo nigá guxase' zéajlene' Jesús.

<sup>10</sup> Gate na' dxe' Jesús dxawé' xeta lizre Mateo nigá, benne' zante wechizruj, ne benne' dul-la belezrine', ne gulebé'queze' dxelawé' cuita Jesús, ne benne' ca' dxusédene'. <sup>11</sup> Benne' xudau' fariseo ca', gate belelé'ene' da nigá, dxelé'e benne' ca' dxusede Jesús, gulenné':

—¿Bizr chee na' Benne' dxusédene' le'e dxágulene' benne' wechizruj ca', ne benne' wen da zrinnaj ca'?

<sup>12</sup> Jesús benne' da nigá, na' dxé'e benne' ca', gunné':

—Quebe dxelechine benne' chawe' nu benne' dxexuné' bènneache. Benne' we' dxelechínene' le'. <sup>13</sup> Le chjaca, le cheajsede ca da dxenná da naxúaj na lu xiche chee Dios, dxenné': "Neda' dxaca lazra' xexache lázrele le sa' ljwézrele, quegá gútele be xixre'du ca' lu cugu chia'." Bla' neda', quegá chee guláwizra' benne' xrlátaje. Dxuláwizra' benne' dul-la chee xelexebí'i lazre'.

*Jesús dxusédene' ca naca chee gubasa*

*(Mr. 2.18-22; Lc. 5.33-39)*

<sup>14</sup> Nadxa belezrín lau Jesús benne' ca' dxeledálene' Juan, bènnea' dx-uchúe' bènneache nisa, na' gulenábene' Le':

—¿Bizr chee na' quebe dxelún gubasa benne' dxusédenu' Lue', ca dxuntu' netu', ne ca dxelún benne' xudau' fariseo ca'? Tu dxúnzquezentu' gubasa.

<sup>15</sup> Na' Jesús dxé'e benne' ca', gunné':

—¿Ájala chee na' xelezúa ba xácheze benne' zaj zue' laní chee wechaga na' dxácaté zua benne' wechaga na' nen le'? Wazrín zra gate dua benne' wechaga na'. Nadxa xelúnqueze' gubasa.

<sup>16</sup> 'Quegá nu dxudá tu ladxe' cube le'e tu zra lánadxu gula, lawe' da gate cheajxedxé' da cube na', ne xrube xu na da gula na', na' dxézadxa da gula na'. <sup>17</sup> Cá'anqueze quebe nu benne' que'e xrise uva wal-la cube lu bzude xide gula lawe' da che ca'an guné', gate cue' chí'i xrise uva wal-la, na' dxeza bzude xide na', na' xelebía xi' xrise uva wal-la na', ne bzude xide na'. Chee le' na' dxal-la' ca'adxu xrise uva wal-la cube lu bzude xide cube. Che ca'an gundxu, xelegá'ana chawe' dxúpaté na.

Bchalaj Jesús da caní ca naca chee benne' ca' dxelezí' lu ne'e xrtizre'.

*Dxelún Jesús bi nu'ula chee Jairo, ne nu'ula', xeajté'e zra lana Jesús*

*(Mr. 5.21-43; Lc. 8.40-56)*

<sup>18</sup> Dxácaté na' dxuchalaj Jesús da nigá, na' bzrin tu benne' xíchaje chee benne' judío ca', na' bzu zribe' lau Jesús, dxenné':

—Bi nu'ula chia' za gútetebe'. Che Lue' xidu' ne guzé na'u lebe', wexaca banbe'.

<sup>19</sup> Na' guxasa Jesús, guxíajlene' le' nen benne' ca' dxusédene'. <sup>20</sup> Nadxa bzrin tu nu'ula we' cúzrula Jesús, ba naca chazrinnu iza dxé'ene' tu we' dxaque dxen, na' xeajté'e zra lana Jesús. <sup>21</sup> Dxenné' lu xichaj lázrdawé': "Che cheajtaza' zra lané', na' xexaca'."

<sup>22</sup> Jesús guxéchaje', guné'e nu'ula', na' dxé'e le':

—Ben dipa lazru', zrí'ina'dau'. Bache bexacu' lawe' da dxéajle'u chia'.

La bexácaté nu'ula na'.

<sup>23</sup> Gate na' bzrin Jesús lizre benne' xíchaje chee benne' judío ca', na' blé'ene' zaj zra benne' wil-la xulucache' bi nu'ula na', ne benne' zaj zre'e dxelune' zralaj. <sup>24</sup> Gunná Jesús, dxé'e benne' ca':

—Le xedxúaj nigá. Quegá nate bi nú'uladau' nigá. Dxásezebe'.

Na' buluzrizre' chee'. <sup>25</sup> Gudé bebéaje' benne' ca', na' guxú'u Jesús, ne béxrué' na' bi nu'ula na', na' guxásabe'. <sup>26</sup> Du ca naca xezre ca' bzriluj dizra' chee da ben Jesús.

*Dxexún Jesús chupa benne' la chul-la*

<sup>27</sup> Ca bedxúaj Jesús na', na' chupa benne' xjaque' cuzru Le', dxelenné' zizraj:

—Bexache lazre' netu', Lue', Zri'ine David.

<sup>28</sup> Ca guxú'u Jesús lu xu'u naga zúaqueze', na' benne' la chul-la caní gulebigue' lau Le', na' Jesús guzre' benne' ca':

—¿Dxéajlele wazéqueda' xexuna' le'e?

Na' gulé'e Le':

—Awe', Xran.

<sup>29</sup> Nadxa Jesús gudane' xiaj lau benne' ca', dxenné':

—Gaca chee ca dxéajlele.

<sup>30</sup> Belexaca xiaj lawe'. Nadxa Jesús gunné xuene' benne' ca', gunné':

—Le guxúe xanne' chee quebe nu neze da nigá.

<sup>31</sup> Gate beledxúaje', na' buluchálaje' du ca naca xezre ca' ca da ben Jesús chee'.

*Dxexún Jesús tu benne' quebe dxaca nnie'*

<sup>32</sup> Ca bezá' Jesús nen benne' ca', na' belezrín bal-la benne' zaj naché'e tu benne' biu quebe dxaca nnie', benne' xu'e be' xriwe'. <sup>33</sup> Cáteze bebéaj Jesús be' xriwe' nigá, na' benne' quebe dxaca nnie' bezúlawe' dxuchálaje'. Na' benne' ca' belexebánele'e, dxelenné':

—Cabata' ne lé'edxu gaca caní ládujla benne' Israel ca'.

<sup>34</sup> Benne' xudau' fariseo ca' gulenné':

—Benne' nigá dxebéaje' be' xriwe', dxuchínene' xel-la' waca chee da xriwe', da na' dxenná be'e na be' xriwe' ca'.

*Dxexache lazre' Jesús bénneache ca'*

<sup>35</sup> Gudé Jesús tu tu xezre zren, ne tu tu xézredau', dxusédene' benne' ca' lu xu'u ca' naga dxulucá'ana szrene' Dios tu tu lataj ca'. Gulu'e lban chee dizra' chawe' ca nna bea Dios, ne bexunte' bénneache zaj napé' tu tu cue' xízrawe' ca da dxelezaque'. <sup>36</sup> Gate ble'e Jesús bénneache ca', na' bexache lazre' le' lawe' da zaj zré'e xácheze', ne dxelecuán lazre'. Zaj naque' ca zrila' ca' quebe zua benne' guxúe'-ba'. <sup>37</sup> Nadxa guzre' benne' ca' dxusédene':

—Da lí, da zrente de da lápadxu, na' bábaze benne' wen zrin zaj zré'e.

<sup>38</sup> Chee le na' le naba lau Xrana lina nigá, sel-le' benne' wen zrin xelexape' lina chee'.

## 10

*Dxecá'a Jesús chazrinnu benne' xelaque' gubáz chee'*

(Mr. 3.13-19; Lc. 6.12-16)

<sup>1</sup> Nadxa Jesús bláwizre' chazrinnu benne' ca' dxusédene', na' bnézruje' le' xel-la' dxenná bea chee xelexebéaje' be' xriwe' ca', ne chee xelexexune' bénneache zaj xu'e tu tu cue' xízrawe' ca da dxelezaque'.

<sup>2</sup> Caní zaj le chazrinnu benne' gubáz ca' chee Jesús:

Benne' nedxu le' Simón, ne léqueze' Pedro.

Xetúe' naque' benne' biche Pedro, le' Andrés.

Xechupe' zaj le' Jacobo, ne Juan, benne' zaj naque' zri'ine Zebedeo.

<sup>3</sup> Xezícala benne' ca' zaj lẹ' Felipe, ne Bartolomé, ne Tomás.

Xetuẹ' lẹ' Mateo, benne' wechizruj cheẹ xẹzre.

Xetuẹ' lẹ' Jacobo, zri'ine Alfeo.

Xetuẹ' lẹ' Lebeo, benne' léqueze' Tadeo.

<sup>4</sup> Xetuẹ' lẹ' Simón, benne' dxẹ'e gunne xue cheẹ xẹzr la xu Israel.

Xetuẹ' lẹ' Judas Iscariote, bėnnea' gudẹ'e Jesús lu na' benne' dxeledábage' Le'.

*Dxesel-la Jesús benne' gubáz cheẹ' ca' cheajlezenne' bėnneache xrtizre'e*  
(Mr. 6.7-13; Lc. 9.1-6)

<sup>5</sup> Nadxa gusel-la Jesús benne' chazrinnu caní. Guzrẹ' lẹ':

—Quebe cheajle naga zaj zra' benne' quebe zaj naque' judío, ne quebe chu'ule xẹzre ca' zaj nababa Samaria. <sup>6</sup> Le chjaca naga zaj zra' benne' Israel zaj naque' ca zrila' zaj naníteba'. <sup>7</sup> Le chjaca cu'ule lban, xẹle bėnneache ba bžrin gáguze zra nna bea Dios lu xẹzr la xu nigá. <sup>8</sup> Le xexún benne' zaj xu'e wẹ' guzru', ne benne' bila xízrawe' dxelé'ene'. Le gusebán benne' gate. Le xebéaj be' xriwe' da zaj xu'u bėnneache. Cá'aze guzile xel-la' dxenná bea nigá, na' cá'aze le guchine na, quebe bi sile.

<sup>9</sup> 'Quebe gúale dumí oro, ne dumí plata, ne dumí lase. <sup>10</sup> Quebe gúale xixruj xeta da gágule la neza. Quebe gúale xetú cue' zra lánale, ne zrlale, ne xaga da gúxrule. Benne' wen zrin wazrúequeze' da gawe'.

<sup>11</sup> 'Gate na' zrinle le'e tu xẹzre zren u tu xézredau', le quilaj na' tu benne' du lazre', na' le xegá'ana lizre' ca zrindxa zra zeza'ale na'. <sup>12</sup> Gate na' chu'ule lu xu'u na', le xẹ bėnnea' naca lizre' na': "Xela dxebeza zri lazre' suale na le'e." <sup>13</sup> Che benne' ca' zaj naca cheẹ' xezezi'e xel-la' ba lá'ana caní, le gucá'ana cá'aze na. Che quebe zaj naca cheẹ' xezezi'e da nigá, na' quebe gata' cheẹ'. <sup>14</sup> Che quebe lataj dxelune' le'e, ne quebe dxelenne' cheẹle, le xedxúaj lu xu'u na' u lu xẹzre na', na' le xebibe bxrteđu na' zria ní'ale. <sup>15</sup> Da li dxapa' le'e, ca zrin zra guchi'a Dios, Dios gundxe' da ba xa' cheẹ benne' xẹzre na' quez ca da gunẹ' cheẹ benne' Sodoma, ne benne' Gomorra, xẹzre ca' guzríá xi'e.

*Xelebé nawẹ' bi ca' cheẹ Jesús*

<sup>16</sup> Na' gunná Jesús:

—Le na' xque nigá. Neda' dxesel-la' le'e, gácale ca zrila' zaj zra'ba ládujla becu' xi'a ca'. Cheẹ lẹ' na', le gaca sina ca zaj naca bela', san le gaca dxexruj lazre' ca zaj naca bgúgudu ca'. <sup>17</sup> Le guxúe cuínale. Zaj zra' benne' xuludé' le'e lu na' benne' xu'u lawe', ne xuluzálaje' le'e lu xu'u naga dxulucá'ana szrene' Dios. <sup>18</sup> Cá'anqueze welechẹ'e le'e lau benne' xu'u lawe' ca', ne lau benne' dxelenná bea lawe' da nácale chia' neda'. Ca'an gaca guchálajle ca naca chia' neda' lau benne' ca', ne lau benne' quebe zaj naque' judío. <sup>19</sup> Gate na' xuludé' le'e lu na' benne' dxuchi'a da dxaca, quebe gunne xue cue'le ca da nnale u ájala guchálajle, lawe' da gate zrin zra guchálajle, Dios gunne' ca da guchálajle. <sup>20</sup> Quegá le'eze guchálajle, lawe' da Be' Lá'azxa cheẹ Dios guchálajle lu dxú'ale.

<sup>21</sup> 'Xuludé bėnneache benne' bíchequeze' lu na' benne' xelútiẹ' lẹ'. Cá'anqueze xra xrna xuludé' zrí'ine', na' zrí'ine' ca' xeledábage' xra rnáquezebe' cheẹ xelátie'. <sup>22</sup> Xúgute bėnneache xezeze'e le'e lawe' da nácale chia' neda', san bėnnea' guxrúe chache' dizra' cheẹ Dios ca zrin zra cheajsé cheẹ', la bėnnea'. <sup>23</sup> Gate xelebé nawẹ' le'e tu xẹzre, le xuzrunnuj

xetú xezre. Da li neda', Benne' Gulje' Bénneache, dxapa' le'e, xida' nédxula ca quebe ne tache tale xúgute xezre chee benne' Israel.

<sup>24</sup> 'Netú benne' quebe naque' szrendxa ca benne' dxusédene' le'. Cá'anqueze netú benne' wen zrin quebe naque' szrendxa ca xrane'. <sup>25</sup> Tu benne' dxuséde dxal-la' gun zi' lazre' gaque' ca naca benne' dxusédene' le', na' benne' wen zrin dxal-la' gun zi' lazre' gaque' ca naca xrane'. Che benne' naque' xrane xu'u dxelé'e le' Beelzebú, da xriwe', chezradxa xelenné' chee bi chee' ca'.

*¿Núzraqueze dxal-la' zrébedxu?*

*(Lc. 12.2-9)*

<sup>26</sup> Na' gunná Jesús:

—Chee le na', quebe zrébele bénneache. Xúgute da bagácheze gaca béaqueze na, na' xúgute da dxelaca ga nagache gulé'e láuqueze na. <sup>27</sup> Da nigá dxapa' le'e lu da chul-la, le guchalaj na te zra. Da dxapa' le'e bagácheze, le nne zizraj chee xelén xúgute benne'. <sup>28</sup> Quebe zrébele benne' xelúti'e bel-la' dxen chee. Quebe xelezéquene' xelúti'e benne'du xu'ule. Le zrebe Dios. Le' dxezéquene' guzría xi'e bel-la' dxen chee, ne benne'du xu'ule lu lataj ba xa'.

<sup>29</sup> Dxelúti'e chupa bxínnedu ca' nen tu dumídau'. Netuba' quebe gáteba' chee quebe ne güe lataj Xrale. <sup>30</sup> Cá'anqueze xicha xíchajle, xúgute na zaj nababa na. <sup>31</sup> Chee le na', quebe zrébele. Zácadxale le'e quézcala be zan bxínnedu ca'.

*Dxal-la' xechébedxu nácadxu chee Jesucristo*

*(Lc. 12.8-9)*

<sup>32</sup> Na' gunná Jesús:

—Xúgute benne' ca' dxelexechebe' zaj naque' chia' neda' lau bénneache, cá'anqueze neda' wechébequeza' zaj naque' chia' neda' lau Xra' zué' xabáa. <sup>33</sup> Benne' ca' quebe dxelexechebe' zaj naque' chia' lau bénneache, néda'queza' québequeze xechéba' zaj naque' chia' lau Xra' zué' xabáa.

*Da naca Jesús naca na tu da dxun na chupa la'a bénneache*

*(Lc. 12.51-53; 14.26-27)*

<sup>34</sup> Na' gunná Jesús:

—Quebe guéquele bla'a neda' chee guzúa' xel-la' dxebeza zri lazre' ládujla bénneache. Bla'a neda', quegá chee guzúa' xel-la' dxebeza zri lazre', san chee guzúa' wedil-la. <sup>35</sup> Bla'a neda' chee guna' tábaga' tu benne' xre', ne chee guna' tábaga' tu bi nu'ula xrnabe', ne chee guna' tábaga' tu zru'a lizre' tau zrí'ine'. <sup>36</sup> Ca'an gaca, tu tu benne' tíl-lalé xrtía ljwezre' le'.

<sup>37</sup> 'Che tu benne' nazrí'idxene' xra xrne'e quezca neda', quebe naca chee' gaque' chia', na' che nazrí'idxene' bi chee' ca' quezca neda', quebe naca chee' gaque' chia'. <sup>38</sup> Che tu benne' quebe gun cuine' ca tu benne' zéajte'e le'e xaga béguaj, ne gune' neda' tuze, quebe naca chee' gaque' chia'. <sup>39</sup> Benne' dxaca lazre' gapa chi'e xel-la' nabán chee' gunitie' na. Bénnea' zúatequeze gudé'e' xel-la' nabán chee' ne chia' neda', guselé' xel-la' nabán chee'.

*Da gunna Dios dxi'u*

*(Mr. 9.41)*

<sup>40</sup> Na' gunná Jesús:

—Che tu benne' gape' le'e ba lá'ana, néda'queze gape' ba lá'ana, na' bénnea' dxape' neda' ba lá'ana, dxápaqueze' ba lá'ana Dios, Bénnea' gusel-le'

neda'. <sup>41</sup> Che tu benne' gape' ba lá'ana tu benne' dxuchalaje' waláz chee Dios lawe' da ze'e waláz chee Dios, benne' nigá wazí'queze' tuze ca da si' bënnea' dxuchálaje' waláz chee Dios. Na' che tu benne' gape' ba lá'ana tu benne' xrlátaje lawe' da naque' benne' xrlátaje, benne' nigá wazí'queze' tuze ca da si' benne' xrlátaje na'. <sup>42</sup> Núteteze benne' gunézruje' tu zrigá' nisa zaga da xi'aj tu bidu caní lawe' da naque' chia' neda', da líqueze wazí'e da gunezruj Dios le'.

## 11

*Dxeleznín benne' ca' gusel-la Juan lau Jesús  
(Lc. 7.18-35)*

<sup>1</sup> Gate bexuzre Jesús bchálajlene' bënneache, na' bchálajlene' chazrinnu benne' ca' dxusédene'. Bezé'e na' chee cheajsédene', ne cheajchálaje' lban xúgute xezre ca' lu xezr la xu na'.

<sup>2</sup> Juan, bënnea' bchue' bënneache nisa, xu'e lizre xia, na' benne' ca naca da dxun Cristo. Nadxa gusel-le' chupa benne' ca' dxeledálene' le' lau Jesús. <sup>3</sup> Benne' chupe' caní buluchebe' Jesús:

—¿Nacu' Lue' Cristo, Bënnea' dxal-la' xide', u che dxal-la' cuézantu' xelá' xetú benne'?

<sup>4</sup> Na' bechebe Jesús:

—Le chjaca cheajézrele Juan da caní dxelé'ele, ne da dxenle. <sup>5</sup> Le xe'e ca dxaca, dxelexelé'e benne' gulaque' la chul-la. Dxelexedá benne' gulezúa zri ni'a ne'e. Belexexaca benne' gulezaque' we' guzru', ne belexexaca ban benne' ca' gulatie'. Benne' xache' ca' dxelenne' dizra' chawe' chee Dios. <sup>6</sup> Ba neza zrente naca na chee bënnea' quebe xucuán lazre' sálene' neda'.

<sup>7</sup> Ca besí'aca benne' chupa ca', na' guzú lau Jesús dxuchálajlene' benne' zaj zre'e na' ca naca chee Juan. Dxenné':

—¿Bizra xeajna'le le'e le'e xixre' na'? ¿Xeajna'le tu xia da dxuxrize be'? <sup>8</sup> Che cabí, ¿bizra xeajna'le na'? ¿Xeajna'le tu benne' nacue' zra lane' da zaca? Nézqueze benne' ca' zaj nácue' ladxe' zaca, lizre benne' dxelenná be'e zaj zra' benne' caní. <sup>9</sup> ¿Bizraqueze xeajna'le? ¿Xeajna'le tu benne' dxuchálaje' waláz chee Dios? Awe'. Ca'an guca. Bënnea' blé'ele na' nácadxe' blau ca tu benne' dxuchálaje' waláz chee Dios. <sup>10</sup> Lu xiche chee Dios naxúaj na ca naca chee Juan na'. Dxenná na: Neda' dxesel-la' benne' gubáz chia' nédxula ca Lue', chee gucueze' neza naga teu'. <sup>11</sup> Da li dxapa' le'e, ládujla xúgute bënneache quebe nu chilá' benne' nácadxe' blau ca naca Juan, bënnea' bchue' bënneache nisa. Naga dxenná bea Dios, bënnea' nácadxe' benne' dxexruj lazre' nácadxe' blau ca naca Juan na'.

<sup>12</sup> 'Ca lu zra bla' Juan, bënnea' bchue' bënneache nisa, bzrinte na'a zra, zaj zra' benne' dxelune' zi' lazre' xelu'e naga dxenná bea Dios xabáa, na' benne' dxelune' zi' lazre' dxeleznúe'eng' na. <sup>13</sup> Ca da bzruaj Moisés lu xiche chee da nadxixruj bea na, ne ca gulenná xúgute benne' buluchálaje' waláz chee Dios, dxuchalaj na ca naca chee xel-la' dxenná bea chee Dios, bzrinte ca bla' Juan na'. <sup>14</sup> Che le'e dxaca lázrele chéajlele da nigá, Juan na' naque' Elías, bënnea' bchálaje' waláz chee Dios gate nate, na' dxal-la' xelé'e chee guchálaje' waláz chee Dios. <sup>15</sup> Che zua nágale, le xen da nigá.

<sup>16</sup> '¿Ájazra zaj naca benne' zaj zre'e na'a zra? Zaj naque' ca bidu ca' dxelebé'ebe' dxelítajbe' lawe' xi'a, ne dxelennebe' zizraj, dxelé' ljawézrebe' ca': <sup>17</sup> "Bcuézrentu' bchiuj san quebe bxá'ale le'e. Bil-la xáchentu' san

quebe gudxézrele.”<sup>18</sup> Caní zaj naque' lawe' da bla' Juan, quebe dxawe', ne quebe dxi'aje' da zaca, na' le'e dxennale xu'e be' xriwe'.<sup>19</sup> Nadxa bla' neda', Benne' Gulje' Bénneache, dxawa', ne dxi'aja', na' dxennale naca' neda' benne' wagu xrata, ne benne' dxi'aj, ne ljwezre benne' dul-la, ne benne' wechizruj chee Roma. Naca bea nu benne' nape' xel-la' sina chee Dios ne chee da dxun bénnea'.

*Ca gaca chee bénneache quebe dxuluzúe' xrtizra' Dios*  
(Lc. 10.13-15)

<sup>20</sup> Nadxa guzú lau Jesús dxedil-le' bénneache chee xezre ca' naga bene' xel-la' waca ca' chee xabáa, lawe' da quebe belexebí'i lazre' benne' zaj zre'e na'. Na' gunné':

<sup>21</sup> —Baxache' nácale le'e zrale xezre Corazín. Baxache' nácale le'e zrale xezre Betsaida. Caní nácale lawe' da checa' la ba guca lu xezre Tiro, ne lu xezre Sidón ca naca xel-la' waca ca' chee xabáa ca da gulaca ládujla le'e, da zrente ba zeaj gulácu'e' zra lan'e' tuzruj, ne gulegú'e' de xíchaje' da zaj naca bea na belexebí'i lazre'.<sup>22</sup> Neda' dxapa' le'e, lu zra guchi'a Dios, gundxe' da ba xa' chee quez ca da ba xa' gun'e' chee benne' Tiro, ne benne' Sidón.<sup>23</sup> Le'e zrale xezre Capernaum, ¿dxéquele Dios wechise' le'e xabáa? Dios gudé'e' le'e lataj ba xa'. Caní gaca na lawe' da checa' la ba guca lu xezre Sodoma ca naca xel-la' waca ca' chee xabáa ca da gulaca ládujla le'e, nagá'anatequeze xezre na' lu zra na'a zra.<sup>24</sup> Neda' dxapa' le'e, lu zra guchi'a Dios, gundxe' da ba xa' chee quez ca gun'e' da ba xa' chee benne' Sodoma ca'.

*Dxenná Jesús: “Le da naga zua' xezí' lázrele”*  
(Lc. 10.21-22)

<sup>25</sup> Ca lu zra na' gunná Jesús:

—Dxue lá'ana' Lue', Xrae, nacu' Xrana xabáa, ne Xrana xezr la xu nigá. Dxue lá'ana' Lue' lawe' da bcácheu' da caní lau benne' sina ca', ne lau benne' dxeléajni'ine', san blé'enu' na bidu caní.<sup>26</sup> Ca'an naca, Xrae, lawe' da naca na ca dxaca lazru' Lue'.

<sup>27</sup> 'Xra' ba bde'e' lu na'a xúgute' da caní. Quegá nu benne' núnbe'e' neda', Zri'ine Dios, san Xra' Dios núnbe'e' neda'. Quegá nu benne' núnbe'e' Xra', san neda', Zri'ine Dios, núnbe'a Le', ne zaj núnbea benne' ca' Le', benne' ca' dxaca lazra' gulé'eda' le' ca naca Xra'.<sup>28</sup> Le da naga zua', xúgutele le'e dxeajxréquele lu zrin dxunle chee xudau', ne ca naca xua da núale, na' neda' guna' xezí' lázrele.<sup>29</sup> Le gunna lataj xrua' le'e ca nu benne' xrue' bezre xugu' cheeba', ne le gusede chia' lawe' da naca' dxexruj lazre', ne dxe'ene lazre', na' wazrué'ele xezí' lázrele lu bénne'du xu'ule.<sup>30</sup> Da na' naca na ca xugu' chee bezre da xrua' le'e québet'e ca naca na stébe chee gúale na, na' xua da xrua' le'e naca na zraze.

## 12

*Bi ca' dxusede Jesús dxelequ'é'e' dau zrua' xtila gate naca zra dxulupá'ana judío*

(Mr. 2.23-28; Lc. 6.1-5)

<sup>1</sup> Ca lu zra na' xu'u Jesús neza zéaje' ládujla naga de xel-la' zrua' xtila, ne naca zra dxulupá'ana benne' judío. Dxeledún benne' ca' dxusede Jesús, na' gulezú lawe' dxelálaje' dau naga zria zrua' xtila, ne dxelawe' na.<sup>2</sup> Gate belexé'e benne' xudau' fariseo ca' da caní, na' gulé'e' Jesús:



—Guná' xque ca dxelún benne' ca' dxusédenu', dxelunę' zrin da quebe naca cheę' xelunę' lu zra dxupá'anadxu.

<sup>3</sup> Jesús guzre' benne' ca':

—¿Quebe ne gulábale le'e ca ben David gate na' le', ne benne' ljwezre' ca' guledunę'? <sup>4</sup> Guxú'ę' lu xu'u cheę Dios, ne gulawę' xeta xtila lá'azxa, da quebe zaj naca cheę' xelawę', le', ne benne' ljwezre' ca', san tuze bxruze ca' zaj naca cheę' xelawę' na. <sup>5</sup> ¿Quebe ne gulábale da naxúaj na lu da bdxixruj be'e Moisés ca dxelún bxruze ca' lu xudau', dxelunę' zrin cheę xudau' lu zra dxupá'anadxu, ne quebe zaj nabague' zria? <sup>6</sup> Neda' dxapa' le'e, de tu da naca blaudxa ca xudau' nigá. <sup>7</sup> ¿Quebe ne chéajni'ile ca zéaje da naxúaj na lu xiche cheę Dios? Dxenná na: Neda' dxaca lazra' xexache lázrele le sa' ljwézrele, ne quegá gútele be xíxre'du ca' lu cugu chia'. La ba guxéajni'ile da nigá, quebe ne guzría xile bénneache quebe zaj nabague' dul-la. <sup>8</sup> Cheę le na', neda', Benne' Gulje' Bénneache, napa' xel-la' dxenná bea dxuna' zrin chia' lu zra dxupá'anadxu.

*Dxexún Jesús tu benne' zua zri ne'ę*

(Mr. 3.1-6; Lc. 6.6-11)

<sup>9</sup> Nadxa Jesús bezé'ę na', na' guxú'ę tu lu xu'u naga dxelúe lá'anę' Dios. <sup>10</sup> Zua tu benne' zua zri ne'ę ga na'. Benne' judío ca' gulaca lazre' xelezreleń' ájala xelunę' cheę gaca xelagu zrie' cheę Jesús. Cheę le na' gulenábene' Le':

—¿Dxunna Dios lataj xexundxu benne' we' lu zra dxupá'anadxu?

<sup>11</sup> Jesús guzre' benne' ca':

—Núteteze benne' zuę' ládujla le'e, che zua tu zrila' cheę', ne che bixreba' tu xędxu situj lu zra dxupá'anadxu, ¿quebe chéaje' cheajxeléaje'-ba' xca'? <sup>12</sup> Da zrendxa zaca tu benne' quez ca tu zrila'. Ca'an naca dxunna Dios lataj gundxu tu da xrlátaje lu zra dxupá'anadxu.

<sup>13</sup> Nadxa Jesús guzre' benne' we' na':

—Bli na'u.

Ca blí ne'ę, na' bexaca na ca ne'ę xetú. <sup>14</sup> Nadxa beledxúaj benne' xudau' fariseo ca', ne gulezú lawę' dxelílaje' ájala xelunę' xelútię' Jesús.

*Da gunná tu benne' bchálaje' waláz cheę Dios ca dxal-la' gaca cheę Jesús*

<sup>15</sup> Gate gúquebe'e Jesús da nigá, na' bezé'ę na', na' benne' zante zjácálenę' Le'. Bexún Jesús xúgute benne' we' zaj zre'ę ládujla benne' ca'. <sup>16</sup> Jesús gunné xúene' benne' ca' quebe nu xululé'ene' nu naca Le'. <sup>17</sup> Caní guca ca da gunná Isaías, benne' bchálaje' waláz cheę Dios, gunné':

<sup>18</sup> Benne' nigá naque' wen zrin chia', benne' ba gucá'a.

Benne' nigá nazrí'ida', ne dzezaca ba lázreleńa' Le'.

Guzúaqueza' xichaj lázrdawę' Be' Lá'azxa chia'.

Guzenne' bénneache xúgute xęzr la xu ca dxuchi'a da dxaca.

<sup>19</sup> Quebe tíl-lalequeze' bénneache, ne quebe cuézrexe'ę.

Netú benne' quebe xenne' chi'ę la neza.

<sup>20</sup> Quebe quichje' tu xia da ba nachaj,

ne quebe xusul-le' xi' da ba dxaca wexul-la na,

ca zrindxa zra xuzúę' xel-la' dxenná bea chawe' cheę'.

<sup>21</sup> Bénneache xúgute xęzr la xu xuluxrén lázrequeze' Le'.

*Dxelennę' napa Jesús xel-la' dxenná bea cheę da xriwe'*

(Mr. 3.19-30; Lc. 11.14-23; 12.10)

22 Nadxa guleché'e lau Jesús tu benne' la chul-la, benne' quebe dxaca nnie', lawe' da xu'e be' xriwe'. Jesús bexune' benne' nigá, na' belé'ene', ne benné'. 23 Xúgute benne' ca' belexebáne', gulenné':

—¿Naca benne' nigá Zri'ine David zra?

24 Gate belén benne' xudau' fariseo da nigá, na' gulenné':

—Benne' nigá dxebéaje' be' xriwe', dxuchinene' xel-la' dxenná bea chee Beelzebú, xrane be' xriwe' ca'.

25 Dxeque be'e Jesús ca da dxelenné', dxel'é ljwezre', na' guzre' le':

—Lu xu'u lawe' chee gáteteze xezre, che xelaca chupa la'a benne' xu'u lawe' ca', ne bal-le' xeledíl-lalene' xezicadxé', na' wexul-la wenite xel-la' dxenná bea chee benne' ca'. Cá'anqueze che tu xezre benne', u tu cue' xrtía ljwezre xelaque' chupa la'a, ne xeledíl-lalene' le sa' ljwezre', wenítequeze xezre na', u xrtía ljwezre ca'. 26 Cá'anqueze, che Satanás, da xriwe', dxebéaje na ljwezre da xriwe', leze na dxexún na chupa la'a cuina na. ¿Ájazra gácaqueze nna bea na? 27 Le'e dxennale chia' dxebéaja' be' xriwe' ca', dxuchíneda' xel-la' dxenná bea chee Beelzebú da xriwe'. Che naca na ca', ¿Nuzra dxúnnaqueze xel-la' dxenná bea chee benne' ca' zaj naca le'e tuze chee xebebéaje' be' xriwe' ca'? Chee le na' léqueze' dxululé'etene' nanéguale le'e. 28 Che neda' dxebéaja' be' xriwe' ca' dxuchíneda' xel-la' waca chee Be' Lá'azxa chee Dios, da nigá dxunna bea na ba bla' xel-la' dxenná bea chee Dios ládujla le'e.

29 '¿Ájazra gun tu benne' chu'e lizre tu benne' wal-la chee que'e da de chee' che nédxula quebe guchéaje' ni'a na' bénnea'? Che guné' caní, na' wazéquene' que'e da de chee bénnea'.

30 'Nu benne' quebe dxácalene' neda', dxedábage' neda', na' benne' quebe dxexezígalene' neda', dxexúsié' na.

31 'Chee le na' dxapa' le'e, gunite lau Dios chee bénneache xúgute dul-la zaj nabague', ne xúgute da calela da dxelenné', san che xelenné' schanni' chee Be' Lá'azxa, cabata' gunite lau Dios chee'. 32 Núteteze benne', che bi nnie' schaní' chia' neda', Benne' Gulje' Bénneache, Dios gunite lawe' chee', san che tu benne' nnie' schanni' chee Be' Lá'azxa, québequeze gunite lau Dios chee' lu xezr la xu nigá ne cá'anqueze lu xezr la xu da za za'.

*Da dxun tu benne' dxule'e na ca naque'*

*(Lc. 6.43-45)*

33 Na' gunná Jesús:

—Che naca chawe' tu xaga, dxebía na da zixre chawe', na' che naca tu xaga bize, dxebía na da zixre bize. Ca'an naca, tu xaga naca bea na ne chee da zixre da dxebía na. 34 Le'e, be snia ca'. ¿Ájazra gunle le'e nnele da xrlátaje che le'e nácaquezele benne' wen da calela xca'? Ca da dxedxuaj dxú'adxu naca na ca da zua na lu xichaj lázrdaudxu. 35 Benne' xrlátaje dxenné' da naca xrlátaje lawe' da zua da xrlátaje lu xichaj lázrdawe', na' benne' wen da calela dxenné' da calela lawe' da zua da calela lu xichaj lázrdawe'. 36 Neda' dxapa' le'e, lu zra guchi'a Dios, xúgute bénneache xuludé' ca da gulenné', tu tu dizra' xala da gulenné'. 37 Ca naca dizra' da ba gunnú', Dios guchi'e chiu', na' Le' nnáqueze' che xedxúaju' xrlátaje, u che webagu' zria.

*Bénneache wen da calela ca' dxelenábene' Jesús guné' tu xel-la' waca chee xabáa*

*(Mr. 8.12; Lc. 11.29-32)*

<sup>38</sup> Nadxa bal-la benne' xudau' fariseo, ne benne' dxuluxuzájle'e da nadxixruj bea Dios gulé'e Jesús:

—Benne' Wesede, dxaca lázrentu' le'entu' chiu' gunu' tu xel-la' waca da za xabáa.

<sup>39</sup> Na' guzre Jesús benne' ca':

—Bénneache wən da calela, benne' zaj naque' chupa lazre', dxe-lenábene' neda' guna' tu xel-la' waca da za xabáa. Quebe xeledé'equezne' tu xel-la' waca, san tuze ca da dxunna bea na ca da guca chee Jonás, benne' bchálaje' waláz chee Dios. <sup>40</sup> Ca guca chee Jonás, guxú'e lu le'e bela zren chunna zra chunna xela, cá'anqueze gaca chia' neda', Benne' Gulje' Bénneache, waxú'uweza' lu xedxu ba chunna zra chunna xela. <sup>41</sup> Benne' gulezré'e xezre Nínive welexásaqueze' lu zra guchi'a Dios gate guchi'e chee bénneache zaj zre'e na'a, na' benne' Nínive ca' xululé'ene' zaj nabaga zria benne' caní lawe' da belexebí'i lazre' benne' Nínive gate na' bchalaj Jonás dizra' chee Dios lau benne' ca', na' blaudxa ca Jonás na' naca Benne' zue' nigá. <sup>42</sup> Cá'anqueze nu'ula na' gunná be'e chalá'a naga dxedá gubizra beu' zaga ca' wexásaqueze' lu zra guchi'a Dios gate guchi'e chee bénneache zaj zre'e na'a, na' nu'ula na' gulé'ene' zaj nabaga zria benne' caní lawe' da bezé'e naga naca zítu'te chee xezr la xu nigá chee xenne' dizra' sina da bchalaj Salomón, na' blaudxa ca Salomón na' naca Benne' zue' nigá.

*Ca naca chee be' xriwe' da bexú'u na tu benne'*

*(Lc. 11.24-26)*

<sup>43</sup> Na' gunná Jesús:

—Gate tu be' xriwe' dxedxuaj na tu benne', na' dxedá na lataj naga nabizre, dxexilaj na naga xezí' lazre' na, na' che quebe xezrele na, na' dxenná na lu xichaj lázrdau na: <sup>44</sup> “Webi'a xexá'a lizra' naga bedxúaja!” Ca xezrín na, le'e na benne' na', naque' ca tu xu'u da naxíajlbe lu'ule na, ne nalúa na, ne nagá'ana chawe na. <sup>45</sup> Nadxa cheaj na cheajxezrí na xegazre be' xriwe' da zaj naca na xriwedxa ca le na, na' xúgute na dxelú'u na lu bénnea', na' naca chee benne' na' da caléladxa ca guca chee' nedxu. Cá'anqueze gaca chee bénneache wən da calela caní.

*Benne' zaj naque' ca xrna Jesús, ne ca benne' biche' ca'*

*(Mr. 3.31-35; Lc. 8.19-21)*

<sup>46</sup> Jesús ne zue' dxuchálajlene' benne' caní gate belezrín xrne'e ne benne' biche' ca' ga na'. Gulezré'e chalé'ajla, ne dxelaca lazre' xuluchálajlene' Jesús. <sup>47</sup> Nadxa tu benne' guzre' Jesús:

—Xrna'u, ne bi bichu' ca' zaj zre'e chalé'ajla. Dxelaca lazre' xuluchálajlene' Lue'.

<sup>48</sup> Jesús guzre' benne' nigá:

—¿Núnbeale nuzra na' xrna'a, ne bi bícha'dau' ca'?

<sup>49</sup> Nadxa ble'e Jesús benne' ca' dxusédene', dxenné':

—Benne' caní zaj naque' xrna'a, ne bi bícha'dau' ca'. <sup>50</sup> Caní naca na lawe' da núteteze benne' dxune' ca da dxaca lazre' Xra' zue' xabáa, benne' nigá naque' benne' bicha', ne benne' zana', ne xrna'a.

## 13

*Da bsede Jesús ca da ben benne' dxaza*

*(Mr. 4.1-9; Lc. 8.4-8)*

<sup>1</sup> Lu zra na' bdxuaj Jesús xu'u, na' xeajdxé'e dxu'a nísadau'. <sup>2</sup> Na' lawe' da belezraga benne' zante naga zua Jesús, guxú'e tu lu da dxedá lawe'

nísadau', ne gudxé'ē na'. Xúgute benne' ca' belexegá'ane' dxu'a nísadau' na'.  
<sup>3</sup> Nadxa bseḍe Jesús benne' ca' da zante da bchálaje', dxenné':

—Tu benne' dxaza guzé'ē zíaḡe' guza. <sup>4</sup> Dxácate dxaze', bal-la bínneḍu ca' xeajlechaze na dxu'a neza. Na' belelá' bxínneḍu ca', guláguba' bínneḍu ca'.  
<sup>5</sup> Bal-la bínneḍu ca' xeajlechaze na lu xiaḡ naga quebe dxé'teca xu. Bínneḍu caní chadí gulezríá na lawe' da quebe dxé'teca xu. <sup>6</sup> Gate bla' gubizra, na' gulecuade na. Lawe' da quebe dxé'teca xu, na' gulebizre na. <sup>7</sup> Bal-la bínneḍu ca' xeajlechaze na naga bezríale'ē lba xeche', na' lba xeche' ca' belegula na, ne blule na da du ca' naze'. <sup>8</sup> Bal-la bínneḍu ca' xeajlechaze na lu xu beḡe, na' belúnnaḡe'ē na. Bal-la xágadu ca' belunna na tu gaxúa tu tu na, na' xebal-la na belunna na ga xun tu tu na, na' xebal-la na belunna na chi dxua tu tu na. <sup>9</sup> Che zua nágale, le xene.

*Dxenná Jesús bizr cheḡ na' dxuchálaje' da dxululé'e na*  
 (Mr. 4.10-12; Lc. 8.9-10)

<sup>10</sup> Nadxa benne' ca' dxuseḍe Jesús gulebigue' naga zuē' Le', ne bu-lucheḡe' Le':

—¿Bizr cheḡ na' dxuchálajlenu' benne' ca' da dxululé'e na?

<sup>11</sup> Becheḡe Jesús, dxenné':

—Dios dxunne' lataj nézele le'e da nagache ca dxenná bea Le' xabáa, san benne' caní quebe dxu'e lataj. <sup>12</sup> Benne' nape' late', Dios gunézrujdxé' le', na' gápale'ē, san benne' quebe bi nape', Dios wequé'ē ca da du nape'. <sup>13</sup> Cheḡ le' na' dxuchálajlena' benne' caní da dxululé'e na, lawe' da cate' dxelenné'ē quebe dxelélé'ene'. Cate' dxelenne' quebe dxeléajni'ine'.  
<sup>14</sup> Ca naca da dxaca cheḡ benne' caní dxaca na ca gunná Isaías, bénnea' bchálaje' waláz cheḡ Dios, gunné':

Da li wenle. Cate' dxenle quebe dxéajni'ile.

Da li wanná'le. Cate' dxenna'le quebe dxelé'ele.

<sup>15</sup> Caní naca na lawe' da zaj naca lázrdau zide' benne' caní.

Quebe dxelaca lazre' xelenne'.

Dxulugácuē' xiaḡ lawe' cheḡ quebe xelélé'ene'.

Quebe dxelenne', na' quebe dxeléajni'ine'.

Quebe dxelaxilaje' neda' cheḡ xexuna' le'.

<sup>16</sup> 'Ba neza zrente naca na cheḡle le'e lawe' da dxelé'ele nen xiaḡ laule, ne dxenle nen nágale. <sup>17</sup> Da li dxapa' le'e, benne' zante, benne' ca' buluchálaje' waláz cheḡ Dios, ne benne' xrlátaje ca' gulaca lazre' xelélé'ene' da caní dxelé'ele le'e. Quebe belelé'ene' na. Gulaca lazre' xelenne' da caní dxénnele le'e. Quebe belenne' na.

*Jesús dxuzéajni'ine' benne' ca' ca naca cheḡ benne' dxaza*  
 (Mr. 4.13-20; Lc. 8.11-15)

<sup>18</sup> Na' gunná Jesús:

—Le xenne ca zéaje da naca cheḡ benne' dxaza nigá. <sup>19</sup> Benne' dxelenne' ca naca cheḡ Bénnea' dxenná be'e xabáa, ne quebe dxeléajni'ine' zaj naque' ca bínneḍu ca' xeajlechaze na dxu'a neza. Za da xriwe' ne dxugúa na ca naca dizra' da ba gulezí'ē lu xichaj lázrdawe'. <sup>20</sup> Ca naca cheḡ bínneḍu ca' xeajlechaze na lu xiaḡ, da caní dxululé'e na ca naca cheḡ benne' ca' dxelezi'ē dizra' na' du lazre'. <sup>21</sup> Ca na' guca cheḡ bínneḍu ca', quebe guca xuludé lue na, ne quebe guzi'ē bea na, ca'an dxaca cheḡ benne' caní, gate na' bi da dxelezaque', u che nu zeajnáu zi' xuzre' le' lawe' da zaj nazi'ē dizra' nigá, na' dxelaxebigue'. <sup>22</sup> Bínneḍu ca' xeajlechaze na ládujla xeche'

dxululé'e na ca naca chee benne' dxelenne' dizra' nigá, san dxelebé'le'e gunne xue da naca chee xezr la xu nigá, na' ca naca xel-la' gunní'a dxezí xē na benne' ca'. Xúgute da caní dxuluzaga na dizra' nigá, na' quebe dxun na da dxal-la' gun dizra' nigá lu xichaj lázrdawe'. <sup>23</sup> Ca naca chee binnedu ca' da xeajlechaze na lu xu bebe, da caní dxululé'e na ca naca chee benne' ca' dxelenne' dizra' nigá, ne dxelájni'ine' na, na' zaj naque' ca binnedu ca' belúnnale'e na. Bal-la benne' zaj naque' ca binnedu ca' belunna na tu gaxúa tu tu na, na' xebal-le' zaj naque' ca binnedu ca' belunna na ga xun tu tu na, na' xebal-le' zaj naque' ca binnedu ca' belunna na chi dxua tu tu na.

*Da bchalaj Jesús ca naca chee xixre' zrinnaj da dxenná'queze na ca dxenná' xel-la' zrua' xtila*

<sup>24</sup> Nadxa bchalaj Jesús xetú da dxulé'e na, dxenné':

—Ca dxaca ga ni dxenná bea Dios naca na ca da guca gate tu benne' guze' binne cháwe'dau' lu xezr la xu chee'. <sup>25</sup> Gate dxelase xúgute', na' bzrin tu benne' dxezré'e le', ne xeajaze' binne xixre' zrinnaj lávela zrua' xtila, na' bezé'e. <sup>26</sup> Gate na' bgula xel-la' zrua' xtila, ne bla' dau chee na, cá'anqueze bla' xixre' zrinnaj ca'. <sup>27</sup> Nadxa benne' wen zrin ca' xeajleguezre' xrane na, dxelé'e le': "Xran, guzu' binne cháwe'dau' lu xezr la xu chiu'. ¿Gazra guzá xixre' zrinnaj caní?" <sup>28</sup> Gunná xránabe': "Tu benne' dxezré'e neda' bene' da nigá." Nadxa benne' wen zrin ca' buluchebe' le': "¿Dxaca lazru' chéajntu' cheajlépentu' xixre' zrinnaj ca'?" <sup>29</sup> Le' guzre' wen zrin ca': "Quebe gaca na. Gate na' lázrule xixre' zrinnaj ca', walázrutele xel-la' zrua' xtila. <sup>30</sup> Xelegúladx na cháwe'la tu zren ca xecá'adxadxu zrua' xtila. Nadxa nna be'eda' benne' wen zrin ca' xelegué'e nedxu xixre' zrinnaj ca', na' xuluchéaje' xelune' tu xrúnujdu weaj chee guzédexu na. Nadxa xeelape' zrua' xtila na', ne xezrá chawe' na lizra'."

*Da bchalaj Jesús ca naca chee binne mostaza*

*(Mr. 4.30-32; Lc. 13.18-19)*

<sup>31</sup> Nadxa bchalaj Jesús xetú da dxulé'e na, dxenné':

—Da dxaca chee benne' dxelezí' lu ne'e nna be'e Dios le' naca na ca da guca gate tu benne' guze' binne mostaza lu xezr la xu chee'. <sup>32</sup> Da li binne mostaza nigá naca na da bízrujdx lawe' xúgute binne ca'. Gate ba nagula na naca na tu xaga zrendxa lawe' xúgute xixre' cuan. Dxaca na ca tu xaga zren naga dxelezeque' cheajlezría bxinnedu ca' xrú'uneba' lu zruze na.

*Da bchalaj Jesús ca naca chee cua zichaj chee xeta xtila*

*(Lc. 13.20-21)*

<sup>33</sup> Nadxa bchalaj Jesús xetú da dxulé'e na, dxenné':

—Da dxaca chee benne' dxelezí' lu ne'e nna be'e Dios le' naca na ca da guca gate tu nu'ula bchixre cua zichaj chee xeta xtila lawe' chunna xaga cua zrua' xtila, na' dutē na guxasa na bliche.

*Ca bchine Jesús da dxulé'e na caní*

*(Mr. 4.33-34)*

<sup>34</sup> Xúgute da caní bchálajle Jesús benne' ca', dxuchálaje' da dxululé'e na, na' quebe bchálajlene' benne' ca' che quebe bchálaje' da dxululé'e na. <sup>35</sup> Caní guca ca da gunná benne' bchálaje' waláz chee Dios, gunné': Guchálaja' ca naca da dxulé'e na da guchálaja'. Gulé'eda' ca naca da nagache gate guzrete' xezr la xu.

*Jesús dxuzéajni'ine' ca naca chee da dxulé'e na chee xixre' zrinnaj da dxenná'queze na ca dxenná' xel-la' zrua' xtila*

<sup>36</sup> Nadxa Jesús bze' benne' ca' dizra', na' guxú'ē lu xu'u. Benne' ca' dxusede Jesús gulebigue' lau Le', na' gulé'ē Le':

—Bzéajni'i netu' da dxulé'e na ca naca chee xixre' zrinnaj da dxenná'queze na ca dxenná' xel-la' zrua' xtila.

<sup>37</sup> Nadxa Jesús guzre' benne' ca':

—Bénnea' dxaze' binne cháwe'dau' nigá naque' Benne' Gulje' Bénneache.  
<sup>38</sup> Naga dxaze' binne nigá naca na lu xichaj lázrdau bénneache. Binne cháwe'du ca' zaj naca benne' ca' dxenná be'e Dios, na' xixre' zrinnaj ca' zaj naca na benne' ca' zaj naque' chee da xriwe'. <sup>39</sup> Bénnea' dxezré'ē xrane xezr la xu na', ne xeajaze' xixre' zrinnaj naque' da xriwe' ná'queze. Zra xeelape' naca na zra bzebe chee xezr la xu nigá, na' benne' ca' xeelape' zrua' xtila na' zaj naque' gubáz chee xabáa chee Dios. <sup>40</sup> Ca belexequé'ē xixre' zrinnaj ca', ne buluzré'ē na lu xi' chee xelezxe na, ca'an gácaqueze lu zra bzebe na'. <sup>41</sup> Neda', Benne' Gulje' Bénneache, sel-la' gubáz chee xabáa chia' ca' chee xulucuaše' naga nna be'a xúgute' benne' ca' dxuluxrinnajte' benne' xula, ne benne' ca' dxelune' da calela. <sup>42</sup> Nadxa gubáz chee xabáa ca' xuluzré'ē benne' ca' dxelune' da calela lu xi' gabila naga xebezeze', ne xeláguxa'ate' lazxe'. <sup>43</sup> Nadxa benne' ca' dxelune' da xrlátaje ca da dxenná be'e Dios xelácaqueze' ca gubizra naga dxenná bea Dios, Xra benne' ca'. Che le'e zua nágale, le xene.

*Da dxulé'e na ca naca chee tu xel-la' gunní'a da nagache*

<sup>44</sup> Na' gunná Jesús:

—Naga dxenná bea Dios naca na ca tu xel-la' gunní'a da nagache na tu lu xezr la xu. Tu benne' bezrélenē' xel-la' gunní'a nigá, na' bucache' na. Ne zúalē'ē xel-la' dxebe zexíaje' xeajxétie' xúgute' da nape', na' bezi'ē xezr la xu na'.

*Da dxulé'e na ca naca tu bga da zácale'ē na*

<sup>45</sup> Na' gunná Jesús:

—Naga dxenná bea Dios naca na ca tu da dxexilaj tu benne' wete, dxexilaje' bga ca' da zaj zaca na. <sup>46</sup> Gate dxezrélenē' tu da zácale'ē, na' zexíaje' zeajxétie' xúgute' da nape', na' si'ē bga na'.

*Da dxulé'e na ca naca tu xixruj bela*

<sup>47</sup> Na' gunná Jesús:

—Ca naca chee benne' ca' xelexú'ē naga dxenná bea Dios, naca na ca tu xixruj bela, da dxuluzalē' lu nísadau', na' dxelezene' zane' cue' bela. <sup>48</sup> Gate dxezrá xixruj na', na' benne' ca' dxelezene' bela dxelexequé'ē na dxu'a nísadau', na' dxelebé'ē dxelexebé'ē bela ca'. Bela chawe' ca' dxuluxuzré'ē-ba' lu xcuite, na' bela xala ca' dxeledxú'ung'ē-ba'. <sup>49</sup> Ca'an gaca lu zra bzebe na'. Xeledxúaj gubáz chee xabáa ca', xelexebéaje' benne' ca' dxelune' da calela ládujla benne' xrlátaje ca'. <sup>50</sup> Xuluzré'ē benne' ca' dxelune' da calela lu xi' gabila, naga xebezeze', ne xeláguxa'ate' lazxe'.

*Da zaca ca da zaj naca na da cube, ne da zaj naca na da gula*

<sup>51</sup> Nadxa bchebe Jesús benne' ca', dxenné':

—¿Dxéajni'ile le'e xúgute' da caní'?

Benne' ca' gulenné':

—Awe', Xran.

<sup>52</sup> Nadxa guzre' benne' ca':

—Gate tu benne' dxusédene' da nadxixruj bea Dios, ne nazédene' ca dxenná bea Dios, naque' ca tu benne' xrane xu'u nézene' cuéaje' da zaj naca na da cube, ne da zaj naca na da gula ládujla da nuzrá chawe'.

*Jesús dxexezrine' Nazaret*

(Mr. 6.1-6; Lc. 4.16-30)

<sup>53</sup> Gate bexuzre bchalaj Jesús da dxulé'e na caní, na' bezé'e na'. <sup>54</sup> Bezrine' naga naca lazrie'. Na' guzú lawe' dxusédene' benne' ca' zaj zre'e lu xudau' chee xezre na', na' belexebanne benne' ca', gulenné':

—¿Gazra bsede benne' nigá xel-la' sina nigá? ¿Ájazra dxune' xel-la' waca caní? <sup>55</sup> Benne' nigá naque' zri'ine gubizre xaga, na' naca xrne'e María. Naque' bi biche Jacobo, ne José, ne Simón, ne Judas. <sup>56</sup> Bi zane' zaj zue' nigá nen dxi'u. ¿Ájazra na' dxaca dxune' da caní?

<sup>57</sup> Chee le na' buluzúe' Jesús chalá'ala. Jesús guzre' benne' ca':

—Xúgute benne' xula dxelape' ba lá'ana tu benne' dxuchálaje' waláz chee Dios. Benne' lazrie', ne xrtia ljwezre' quebe dxelúne' ca'.

<sup>58</sup> Jesús quebe benteque' na' xel-la' waca ca' lawe' da quebe guléajle'e chee'.

## 14

*Ca gute Juan, bénnea' bchue' bénneache nisa*

(Mr. 6.14-29; Lc. 9.7-9)

<sup>1</sup> Lu zra na' Herodes, benne' dxenná be'e xezre ca' zaj nababa na Galilea, benne' ca naca da dxun Jesús. <sup>2</sup> Na' guzre' bi wen zrin chee' ca':

—Benne' nigá naque' Juan, bénnea' bchue' bénneache nisa. Ba bebané' ládujla benne' gate. Chee le na' nape' xel-la' waca zren nigá.

<sup>3</sup> Caní gunné' lawe' da gudela Herodes nigá Juan na', ne bchéaje' le' du xia, ne gulu'e le' lizre xia. Beñe' caní ne chee Herodías, zru'ula Felipe, biche Herodes na'. <sup>4</sup> Caní beñe' lawe' da guzre Juan le':

—Quebe naca chiu' súalenu' nu'ula nigá.

<sup>5</sup> Herodes guca lazre' gutie' le', san dxezrebe' da xelún bénneache ca' lawe' da dxeléquene' naca Juan benne' dxuchálaje' waláz chee Dios. <sup>6</sup> Gate bzin dra dxezría iza Herodes, na' belune' laní chee', na' bxa'a bi nu'ula chee Herodías na', na' bezaca ba lazre' Herodes na' da dxunbe'. <sup>7</sup> Chee le na' Herodes guchebe lazre' lau benne' ca' gunézruje' ca da naba bi nú'uladu na'. <sup>8</sup> Lawe' da ba guzre xrnabe' lebe', na' gunabe':

—Benna nigá xichaj Juan, bénnea' bchue' bénneache nisa. Gulú'u na tu lu xé'ena.

<sup>9</sup> Nadxa guzúa stebe Herodes, bénnea' dxenná be'e, san lawe' da ba guchebe lazre', na' benne' zaj zre'e dxágulene' le' belenne' ca', chee le na' guzre' tu benne' wen zrin chee' gunézruje' na lebe'. <sup>10</sup> Gunná bé'ene' nu benne' guchugue' xichaj Juan naga xu'e lizre xia. <sup>11</sup> Nadxa xeajlexrí'e xíchaje' tu lu xé'ena, ne bulunézruje' na bi nú'uladu na', na' lebe' bnézruje' na xrnabe'.

<sup>12</sup> Nadxa belezrin benne' ca' bsede Juan, na' belexú'e le', ne xeajlecaché' le'. Nadxa xjaque' xeajleguezre' Jesús.

*Dxugagu Jesús chi xun gaxúa benne' biu*

(Mr. 6.30-44; Lc. 9.10-17; Jn. 6.1-14)

<sup>13</sup> Gate ben Jesús da na', na' bezé'e na', bexu'e tu lu da dxedá lawe' nísadau', na' bzrine' tu naga quebe nu zra' benne'. Gate belén bénneache,

na' gusiá'que' ni'e, na' belezrine' naga zua Jesús. <sup>14</sup> Gate bedxúaj Jesús lu da dxedá lawe' nísadau', na' blé'ene' benne' zante, ne bexache lazre' le', na' bexune' benne' ca' quebe chawe' zaj zue'. <sup>15</sup> Gate ba za xrinne, benne' ca' dxusede Jesús gulebigue' lau Le', dxelenné':

—Lataj nigá quebe bi de, ne ba dxedé zra. Bze benne' caní dizra' chee chjaque' xézredu ca', ne xezezí'e da xelawe'.

<sup>16</sup> Jesús guzre' le':

—Quebe dxun na ba xen chjaque'. Le gunezruj le'e da xelawe'.

<sup>17</sup> Benne' ca' gulé'e Le':

—Gázxuze xeta xtila de cheedxu nigá, ne chúpaze bela.

<sup>18</sup> Jesús guzre' benne' ca':

—Le gunna na nigá.

<sup>19</sup> Nadxa gunná bé'ene' gulebé' benne' zan ca' lawe' zrię. Guquę'e xeta xtila, ne bela ca', na' gunné'e xabaala, ne guzre' Dios: "Xcalenu'." Nadxa bzúzruje' xeta xtila, ne bnézruje' na benne' ca' dxusedene', na' benne' ca' gulisie' na lávela benne' zan ca'. <sup>20</sup> Xúgute' gulawe', ne gulélajene'. Ca gudé na' bulusuzre'e chazrinnu ga' da bízrujdu ca' zaj nagá'ana. <sup>21</sup> Benne' gulawe' na zaj naque' chi xun gaxúa benne' biu, ne quebe nu blaba nu'ula, ne bidu ca'.

*Jesús dxedé' lawe' nisa*

*(Mr. 6.45-52; Jn. 6.16-21)*

<sup>22</sup> Nadxa gunná be'e Jesús benne' ca' dxusedene' xelu'e lu da dxedá lawe' nísadau' chee xelague' nísadau' nédxudxa ca Le' chee xelexezrine' xéchalala' nísadau' na', dxácatę Le' dxuzé benne' zan ca' dizra'. <sup>23</sup> Ca gudé bze' dizra' benne' zan ca', na' guluéne' tu lu xi'a xeajchálajlene' Dios naga zue' tuze'. Gate guxrinne zua Jesús tuze' na'. <sup>24</sup> Dxácatę na' ba zeaj da na' dxedá lawe' nísadau' gachaj lávelte nísadau' na'. Nadxa guxasa xeajxruza chee nísadau' na', da dxutá na da dxedá lawe' nísadau' na', lawe' da dxácale'e be', ne quebe dxue na lataj sa na. <sup>25</sup> Gate gudé dxęla gubiga Jesús naga zaj zre'e, zéaje' lawe' nisa. <sup>26</sup> Gate belelé'e benne' ca' dxedá Jesús lawe' nisa, na' belezrebe', na' lu xel-la' dxelezrebe gulebézrexe'e, gulenné':

—Da dxedá dxęla na'.

<sup>27</sup> Jesús guzre' benne' ca':

—Le gun dipa lázrele. Neda' nigá. Quebe zrébele.

<sup>28</sup> Na' gunná Pedro, dxę'e Jesús:

—Xran, che Lue' na', gunná be'e xida' lawe' nisa naga zu' na'te.

<sup>29</sup> Jesús guzre' le':

—Gudá xca'.

Nadxa Pedro bdxúaje' lu da dxedá lawe' nísadau', ne guzú lawe' dxezė'e lawe' nisa chee zrine' naga zua Jesús. <sup>30</sup> Gate dxęque be'ene' ca dxun be' na', na' bzrebe', ne guzú lau dxazię' lu nísadau' na'. Ca'an guca gudxezre xę'e, gunné':

—Xran, becá'a neda'.

<sup>31</sup> Nadxa becá'a Jesús ne'e, ne guzre' le':

—Látega dxęajlí lazru' neda'. ¿Bizr chee na' ben chupa lazru'?

<sup>32</sup> Gate belexęüene' lu da dxedá lawe' nísadau', na' bebé' zri be' na'.

<sup>33</sup> Nadxa benne' ca' zaj zre'e lu da dxedá lawe' nísadau' na' buluzú zribe' lau Jesús, dxelė'e Le':

—Da li nacu' Zri'ine Dios.



*Jesús dxexunę' benne' wę' ca', benne' zaj zře'ę lu xęzre Genesaret*

*(Mr. 6.53-56)*

<sup>34</sup> Guledęe' xecha la'a nísadau', na' belezrine' lu xęzr la xu cheę benne' Genesaret ca'. <sup>35</sup> Gate benne' ca' zaj zře'ę xęzre na' belexexúnbe'ę Jesús, na' buludęe' dizra' xezícala xęzredu ca', na' guleché'ę xúgutę benne' wę' naga zua Jesús. <sup>36</sup> Gulata' xuene' Jesús gu'ę lataj xulutá benne' ca' zra lanę' naze. Xúgutę benne' buluté' zra lanę' belexexaque'.

## 15

*Da dxuxrinnaj na bėnneache*

*(Mr. 7.1-23)*

<sup>1</sup> Nadxa benne' fariseo ca', ne benne' dxuluxuzájle'ę da bdxixruj be'e Moisés, benne' ca' beledxuaję' lu xęzre Jerusalén, gulebigue' lau Jesús, na' buluchebe' Le', dxelennę':

<sup>2</sup> —¿Bizr cheę na' benne' ca' dxusédenu' quebe dxuluzúę' dizra' ca naca da gulún xra xrtaudxu? Quebe dxelíbequeze ne'ę ca naca da zéajlentü' gate dxelawe'.

<sup>3</sup> Jesús bchebe' benne' ca', gunné':

—¿Bizr cheę na' le'e quebe dxuzuale dizra' da dxenná be'e Dios? Dxunle ca naca da zéajlele. <sup>4</sup> Dios gunné': "Gudapa ba lá'ana xra xrna'u." Cá'anqueze gunné': "Benne' nne' schanni' cheę xra xrne'ę, le gute bėnnea'." <sup>5</sup> Le'e dxennale waca xę tu benne' xra xrne'ę: "Quebe séqueda' bi gunna' le'e lawe' da ba guchebe lazra' gunézruja' Dios xúgutę da de chia'." <sup>6</sup> Dxennale che tu benne' dxunę' caní québedxa dxun na ba xen gácalęne' xra xrne'ę. Caní dxunle le'e, dxuzuale chala'ala da bdxixruj be'e Dios, cheę gunle ca naca da zéajlele. <sup>7</sup> Le'e, láweze dxunle da xrlátaje. Da li naca da gunná Isaías, bėnnea' bchálaje' waláz cheę Dios, ca naca cheeļe le'e, gunné':

<sup>8</sup> Benne' caní dxelape' neda' ba lá'ana nen dxú'aze'.

Quebe dxelape' neda' ba lá'ana dutę lázrdawe'.

<sup>9</sup> Dácheze naca dxelúe lá'ane' neda'.

Da gulenná be'ene' bėnneache naca na da ca' dxulusédene'.

<sup>10</sup> Nadxa Jesús gunné' benne' ca', dxennę':

—Le xene, ne le chėjni'i. <sup>11</sup> Da dxu'u na dxu'a bėnneache quegá le na guxrinnaj na bėnneache. Da dxedxuaj na dxu'a bėnneache naca na da dxuxrinnaj na bėnneache.

<sup>12</sup> Nadxa benne' ca' dxusede Jesús gulebigue' lau Le'. Dxelé'ę Le':

—¿Nézenü' gulaca tula benne' xudau' fariseo ca' gate belenne' da gunnáu'?

<sup>13</sup> Jesús guzře' benne' ca':

—Bíteteze xágadau' da quebe guza Xra' zue' xabáa, welépeda'. <sup>14</sup> Le gusán benne' ca'. La chul-la zaj naque', ne dxulusi'ę neza le sa' ljwezře' la chul-la ca'. Che tu la chul-la che'ę le sa' ljwezře' la chul-la, dxúpatę' xelebixře' tu lu xędxu.

<sup>15</sup> Nadxa Pedro guzře' Jesús:

—Bzėjni'i netu' ca naca cheę da dxulé'e nigá.

<sup>16</sup> Gunná Jesús:

—¿Cá'anqueze le'e quebe dxėjni'ile? <sup>17</sup> ¿Quebe nézele xúgutę da dxu'u na dxú'adxu zeaj na le'ędxu, na' te na' xedxuaj na? <sup>18</sup> Da dxedxuaj na dxú'adxu naca na da za' lu xichaj lázrdaudxu. Da nigá naca na da

dxuxrinnaj na bėnneache. <sup>19</sup> Lu xichaj l azrdau bėnneache dxeledxuaj da dxez lazre' da cale a, ca naca xel-la' wete benne', ne ca naca xel-la' zuale zru'ula benne' xula, ne ca naca da sban da dxel n bėnneache, ne ca naca xel-la' gub n, ne xel-la' wen lazre', ne xel-la' wetupa dizra' bizruj. <sup>20</sup> Da can  dxuluxrinnaj na bėnneache. Che tu benne' quebe dxexibe ne'  ca da z ajle gate dxawe' xeta, da nig  quebe dxuxrinnaj na le'.

*Tu nu'ula zitu' dx ajle'  chee Jes s*

*(Mr. 7.24-30)*

<sup>21</sup> Nadxa bedxuaj Jes s na', zexi je' chala'a naga zaj nababa xezre Tiro, ne xezre Sid n. <sup>22</sup> Tu nu'ula Cana n zu ' na' ze'  dxebezre xe'  c zrela Jes s, dxenn ':

—Xran, Zri'ine David, bexache lazre' neda'. Xu'ube' be' xriwe' zri'ina' nu'ula, ne c titega dxez cabe'.

<sup>23</sup> Quebe bi bechebe Jes s. Nadxa belezr n benne' ca' dxus dene', ne gulata' xuene' Le', gul '  Le':

—Bsel-la nu'ula nig  lawe' da ze'  dxebezre xe'  c zrudxu.

<sup>24</sup> Nadxa gunn  Jes s:

—Dios gusel-le' neda' g caleza' benne' Israel ca' zaj naque' ca zrila'du ca' zaj nan teba'.

<sup>25</sup> Gubiga nu'ula na' naga zua Jes s, ne bzu zribe' lau Le', ne dx '  Le':

—Xran, g cale neda'.

<sup>26</sup> Jes s guzre' le':

—Quebe naca xrl taje c 'adxu da dxelagu zr 'inedxu, chee gun zrujdxu na b cudu ca'.

<sup>27</sup> Nadxa nu'ula na' guzre' Jes s:

—Awe', Xran, san b cudu ca' dxel guezzeba' da b zrujdu ca' dxelexruj zran naga dxelagu xr naba'.

<sup>28</sup> Nadxa Jes s guzre' le':

—N 'uladu, da zrent  naca xel-la' dxeajli lazre' chiu'. Gaca ca dxaca lazru'.

Lu zra n 'queze bexaca zr 'ine' n 'uladu na'.

*Jes s dxexun ' benne' zant  benne' we'*

<sup>29</sup> Jes s guz '  na', gud e' dxu'a n sadau' chee Galilea. Gulu n 'tu lu xi'a, ne gudx '  na'. <sup>30</sup> Benne' zan belezrine' naga zua Jes s, zaj nach '  benne' zrinnaj ca', ne benne' la chul-la ca', ne benne' quebe dxaca xelenn ', ne benne' zan zaj nadxugu ni'a na', ne z nedxa benne' we'. Buluzr '  benne' ca' lau Jes s, na' Le' bexun ' le'. <sup>31</sup> Ca'an guca belexebane benne' ca' gate belel 'ene' dxele n ' benne' ca' quebe guca xelenn ' n dxula, ne belexexaca benne' ca' gulaque' benne' ni'a na' dxugu, ne dxeled  benne' ca' gulaque' benne' zrinnaj, ne dxelel 'e benne' ca' gulaque' benne' la chul-la. Gulez  lawe' dxel e l 'ane' Dios chee benne' Israel ca'.

*Jes s dxugawe' tapa cue' tu gaxi a benne' biu*

*(Mr. 8.1-10)*

<sup>32</sup> Nadxa Jes s gunn ' benne' ca' dxus dene'. Dxe'  le':

—Dxexache lazra' chee benne' can  lawe' da ba zeaj chunna zra zrl n ' neda' nig , ne quebe bi de da xelawe'. Quebe dxaca lazra' xesella' le' chee cheajxaque' l zre' quebe ne xelawe' chee quebe xelate ni'a ne'  la neza.

<sup>33</sup> Nadxa benne' ca' dxus de Jes s gul '  Le':

—¿Ájazra guntu' zrélentu' da xelagu cátiṭe benne' zan caní? Lataj nigá quebe nu chilá' benne' zua lizre' nigá.

<sup>34</sup> Jesús bcheḅe' benne' ca', dxenné':

—¿Bal-la xeta xtila nápa'e?

Benne' ca' belexecheḅe':

—Gazre na, ne xetú chupa béladau'.

<sup>35</sup> Nadxa Jesús gunná bé'ene' benne' zan ca' xelebé'e lu xu. <sup>36</sup> Guqué'e da gazre xeta xtila, ne béladu ca', na' guzre' Dios: “Xcalenu'.” Nadxa bzúzruje' na, ne bnézruje' na benne' ca' dxusédené', na' benne' ca' gulísie' na chee benne' zan ca'. <sup>37</sup> Xúgute' gulawe', ne belélajteṅe'. Gudé na' bulusuzrate' gazre ga' da bízrujdu ca' zaj nagá'ana. <sup>38</sup> Benne' gulagu zaj naque' tapa cue' chi gaxúa benne' biu, ne quebe nu blaba nu'ula, ne bidu ca'. <sup>39</sup> Gudé na' Jesús bze' benne' zan ca' dizra', na' bexu'e lu da dxeda' lawe' nísadau' zexíaje' naga nababa xezre Magdala.

## 16

*Dxelenabe' Jesús guné' tu xel-la' waca chee xabáa*  
(Mr. 8.11-13; Lc. 12.54-56)

<sup>1</sup> Benne' xudau' fariseo ca', ne benne' xudau' saduceo ca' xjaque' naga zua Jesús chee xuluxunéguene' Le'. Chee le' na' gulenabe' Jesús guné' tu xel-la' waca zrente' da za xabáa. <sup>2</sup> Jesús becheḅe' benne' ca':

—Xelate' zua gubizra dxennale le'e: “Gun chawe' wxre lawe' da da' beuj xrna zran xabáa.” <sup>3</sup> Che zílala dxennale: “Quebe chawe' gun na'a zra lawe' da dá'le'e beuj xrna zran xabáa.” Le'e dxulé'e cuinale da quebe nácale. Dxácaqueze dxennale ca naca da gun zran xabáa. Quebe dxaca xuzájla'ale ca sa'yeaj da dxaca na'a zra. <sup>4</sup> Benne' wen da calela caní, benne' zaj nabéaj xíchaje' Dios, dxelenabe' guna' tu xel-la' waca zrente'. Quebe xelelé'ene' xetú xel-la' waca. Welelé'ene' tuze da gaca na ca da guca chee Jonás.

Nadxa bulucá'ana Jesús benne' ca', zjá'aque'.

*Da dxelún benne' xudau' ca' da naca na ca' cua zichaj chee xeta xtila*  
(Mr. 8.14-21)

<sup>5</sup> Gate benne' ca' dxusede Jesús guladé'e xechalá'a nísadau', na' gulal-la lazre' xelu'e chizre'. <sup>6</sup> Jesús guzre' le':

—Le nna'xque. Le guxúe cuinale ca naca chee cua zichaj chee xeta xtila chee benne' fariseo ca', ne chee benne' saduceo ca'.

<sup>7</sup> Benne' ca' dxusede Jesús gulezú lawe' dxelé' ljwezre':

—Caní dxenné' lawe' da quebe núadxu xeta xtila.

<sup>8</sup> Jesús dxeque be'ene', na' guzre' le':

—¿Bizr chee na' dxennale naca na lawe' da quebe núale xeta xtila? Láteze dxéajlele chia'. <sup>9</sup> ¿Quebe ne chéajni'ile, ne quebe dxeajsá lázrele chee da gazxu' xeta xtila da bgawa' gazxu' cue' chi gaxúa benne' biu, ne bal-la ga' becá'ale? <sup>10</sup> ¿Quebe dxeajsá lázrele chee da gazre xeta xtila da bgawa' tapa cue' chi gaxúa benne' biu ca', ne bal-la ga' becá'ale? <sup>11</sup> ¿Ájazra na' quebe dxeque be'ele quegá bchálaja' chee xeta xtila gate gunnía' le guxúe cuinale ca naca chee cua zichaj chee xeta xtila chee benne' fariseo ca', ne chee benne' saduceo ca'?

<sup>12</sup> Nadxa guleque bé'ene' quegá guzre Jesús le' xuluxúe cuine' chee da naca cua zichaj chee xeta xtila, san ca naca da dxulusede benne' fariseo ca', ne benne' saduceo ca'.

*Pedro dxenné' Jesús naque' Cristo*

(Mr. 8.27-30; Lc. 9.18-21)

13 Gate bzin Jesús naga nababa xezre Cesarea da ben Filipino, na' bchebe' benne' ca' dxusédené':

—¿Nuzra na' dxelenná bénneache naca' neda', Benne' Gulje' Bénneache?

14 Na' benne' ca' gulenné':

—Bal-la benne' dxelenné' nacu' Juan, bénnea' bchue' bénneache nisa. Xebal-le' dxelenné' nacu' Elías, na' xebal-le' dxelennáqueze' nacu' Jeremías, u xetú benne' bchálaje' waláz chee Dios.

15 Nadxa guzre Jesús benne' ca':

—¿Gazra le'e? ¿Nuzra na' dxennale naca'?

16 Gunná Simón Pedro:

—Lue' nacu' Cristo, Zri'ine Dios ban.

17 Bechebe Jesús:

—Ba neza zren naca na chiu' Simón, zri'ine Jonás. Netú benne' quebe ne gulé'ene' lue' da nigá, san Xra' zua xabáa, Le' blé'ene' lue'. 18 Neda' dxapa' lue', nacu' Pedro, da zéaje na tu xiaj, na' lawe' xiaj xre nigá guzúa' benne' xeleajlí lazre' neda', na' xel-la' dxenná bea chee da xriwe' quebe seque na gucu'uj na benne' ca'. 19 Neda' gunna' lue' da naca na zren xia chee xel-la' dxenná bea chee xabáa, na' da guchéaju' lue' lu xezr la xu nigá gaca na da ba nadxéajqueze na xabáa, na' da xesezru' lue' lu xezr la xu nigá gaca na da ba naxézrequeze na xabáa.

20 Nadxa Jesús gunná bé'ene' benne' ca' dxusédené' chee quebe nu xelé'ē naca Le' Cristo.

*Jesús dxuchálaje' ca gaca gate gatie'*

(Mr. 8.31—9.1; Lc. 9.22-27)

21 Lu zra ná'queze guzú lau Jesús dxuzéajni'ine' benne' ca' dxusédené' dxal-la' xexíaje' xezre Jerusalén, na' benne' gula ca', ne benne' xíchaje' ca' chee bxruze ca', ne benne' dxuluxuzájle'ē da nadxixruj bea Dios wulusaca zi'ē Le'. Na' guzre' benne' ca' dxusédené' welute benne' Jerusalén ca' Le'. Nadxa gate gaca chunna zra xebané'.

22 Nadxa Pedro guléaje' Jesús chalá'ala, ne guzú lawe' dxdil-le' Le', dxenné':

—Dios quebe gu'ē lataj, Xran. Cabata' gaca chiu' da caní.

23 Jesús bexéchaje', na' guzre' Pedro:

—Gucuasa cuita' neda', lue', da xriwe', lawe' da nacu' tu da dxusunegue na neda'. Quebe dxulaba lazru' ca dxun Dios. Ca dxun bénneache dxulaba lazru'.

24 Nadxa Jesús guzre' benne' ca' dxusédené':

—Che nu benne' dxaca lazre' gaque' neda' tuze, dxal-la' guzúe' chalá'ala da naca chee', ne guzúa cuine' chee' gatie', na' nadxa gaca xídalene' neda'. 25 Bénnea' dxaca lazre' gapa chi'ē xel-la' nabán chee' gunitie' na. Bénnea' gunitie' xel-la' nabán chee' lawe' da dxune' zrin chia', benne' nigá zrué'ene' xel-la' nabán du lazre'. 26 ¿Bízraqueze ba neza naca na chee' tu benne' che gata' chee' xúgute' xel-la' gunní'a da de lu xezr la xu nigá, na' cuía xi'ē lau Dios? Quebe bi gaca quízruj tu benne' chee' la bénne'du xu'e lau Dios. 27 Neda', Benne' Gulje' Bénneache wida' xecha lasa nen xel-la' szren chee' Xra', ne nen gubáz chee' xabáa ca'. Nadxa xuzría chee' tu tu benne' ca naca da zaj nun tu tué'. 28 Da li dxapa' le'e, bal-la benne' zaj

zre'e nigá quebe xelatię' cadxa xeledé'eng' neda', Benne' Gulję' Bénneache, xida' xedajnná be'a.

## 17

*Dios dxuché'e ca dxenná' lau Jesús*

(Mr. 9.2-13; Lc. 9.28-36)

<sup>1</sup> Ca gudé guca xrupa zra, na' Jesús guché'e Pedro, ne Jacobo, ne Juan, bi biche Jacobo, na' bi cá'aze xjácalenę' Le' tu lau xi'a sibe. <sup>2</sup> Na' Dios bche'e ca dxenná' lau Jesús lówela benne' ca'. Lawę' guca tite na ca gubizra, na' zra lanę' guca na da chiche ca xel-la' naxaní'. <sup>3</sup> Na' benne' caní belelé'eng' Moisés, ne Elías, benne' gulezrá' gate nate, dxuluchálajlę' Jesús. <sup>4</sup> Nadxa Pedro guzre' Jesús:

—Xran, cháwe'le'e zúadxu nigá. Che dxaca lazru', guntu' chunna xu'u lágadau', tu chiu', ne tu cheę Moisés, ne tu cheę Elías.

<sup>5</sup> Dxácatę dxenné Pedro, bla' tu beuj da dxaca tite na, da gucu na benne' ca', na' lu beuj na' belenne' chi'i Dios, dxenné':

—Benne' nigá naque' Zri'ina' nazrí'itę lazra', ne cheę Le' dzezaca ba lazra'. Cheę Le' le xene.

<sup>6</sup> Gate belenne' da nigá, na' gulatę' sudxú'ala lu xu. Dxelezrébele'e. <sup>7</sup> Nadxa Jesús gubigue' naga zaj zre'e, na' bte' benne' ca', ne guzre' le':

—Le chasa. Quebe zrébele.

<sup>8</sup> Gate na' belenné'e, québedxa nu belelé'eng'. Tuze Jesús zuę'.

<sup>9</sup> Nadxa gate dxelexexétaję' lu xi'a na', Jesús gunná bé'eng' benne' ca', dxenné':

—Quebe nu guchálajle ca da ble'ele ca zrindxa zra neda', Benne' Gulję' Bénneache, xebana' ládujla benne' gate.

<sup>10</sup> Nadxa benne' ca' dxusede Jesús buluchebe' Le':

—¿Bizr cheę na' dxelenná benne' ca' dxuluxuzájle'e da nadxixruj bea Dios dxun na ba xen xelá' Elías nédxudxa ca xelá' Cristo?

<sup>11</sup> Jesús guzre' benne' ca':

—Da li xelá' Elías nédxudxa, ne gucá'ana chawę' ca naca da dxal-la' gaca. <sup>12</sup> Neda' dxapa' le'e, ba bla' Elías, na' benne' ca' quebe belexúnbe'e le'. Bulusaque' le' cáteze da gulaca lazre'. Cá'anqueze xulusaque' neda', Benne' Gulję' Bénneache.

<sup>13</sup> Nadxa benne' ca' dxusede Jesús guléque be'eng' dxuchalaj Jesús ca naca cheę Juan, bénnea' bchuę' bénneache nisa.

*Jesús dxexunę' tu bi biu dxe'ebe' chuna'*

(Mr. 9.14-29; Lc. 9.37-43)

<sup>14</sup> Gate belezrine' naga zaj zra' benne' zante, na' tu benne' gubigue' naga zua Jesús, ne bzu zribe' lau Le', dxenné':

<sup>15</sup> —Xran, bexache lazre' zri'ina', dxe'ebe' chuna', ne da zrentę da dzezácabe'. Zánetę lasa ba xeajcházebe' lu xi', ne lu nisa. <sup>16</sup> Ba bedajgu'a-be' lau benne' caní dxusédenu', na' quebe guca xelexunę'-be'.

<sup>17</sup> Jesús bechebe':

—Le'e, benne' wen chupa lazre', ne benne' lázrdau zide'. ¿Bátate zúalęna' le'e? ¿Bátate naca' zren lazre' nen le'e? Le cheajxri' bi cuide' na' nigá.

<sup>18</sup> Nadxa Jesús gudil-le' be' xriwę' na', na' bebéaję' na lu beł-la' dxen cheę bi cuide' na', na' zra ná'queze bexácatębe'.

19 Gudé na' benne' ca' dxuséde Jesús gulenné' Lē' chalá'ala, na' buluchebe' Lē':

—¿Bizr chee na' quebe guca netu' xebéajntu' be' xriwe' na'?

20 Jesús guzre' benne' ca':

—Lawe' da naca láteze ca dxéajle chia'. Da li dxapa' le'e, che la nápaie xel-la' dxeajlí lazre', lácala naca na láteze ca naca tu binnedau' chee mostaza, waca xe<sub>le</sub> xi'a nígá: “Gucuasa nígá chéaju' xetú lataj”, na' xi'a na' wacuasa na. Quebe bí de da quebe gaca gunle che nápaie xel-la' dxeajlí lazre'. 21 Ca naca be' xriwe' caní, dxun na ba xen guchálajle Dios, ne gunle gubasa chee séquele xebéajle be' xriwe' caní.

*Jesús dxuchálajé' xecha lasa ca gaca gate gatié'*

(Mr. 9.30-32; Lc. 9.43-45)

22 Dxácatē na' dxeledé' naga nababa Galilea, Jesús guzre' benne' ca':

—Neda', Benne' Gulje' Bénneache wadéa' lu na' bénneache. 23 Xelútie' neda', na' gate gaca chunna zra, xebana'.

Gate belenne' dizra' nígá, na' bewi'ine lázrele'ene'.

*Da dxuluchízruje' bénneache chee xudau'*

24 Gate Jesús ne benne' ca' dxusédene' belezrine' lu xezre Capernaum, na' benne' dxuluchízruje' chee xudau' belezrine' lau Pedro, na' buluchebe' le':

—¿Quebe dxizruj benne' dxusédene' le'e chee xudau'?

25 Pedro bechebe':

—Awe'. Dxízruje' na.

Nadxa, gate na' guxú'u Pedro lu xu'u, guzre Jesús le':

—¿Aja dxéquenu', Simón? ¿Nuzra na' dxuluchizruj lazruj chee xezr la xu benne' ca' dxelenná bea lu xezr la xu nígá? ¿Dxuluchízruje' benne' waláizr chee', u benne' zitu' ca'?

26 Bechebe Pedro:

—Benne' zitu' dxuluchízruje'.

Jesús guzre' le':

—Na' benne' waláizr chee' quebe xelízruje'. 27 Na'a, chee quebe nu guchá'adxu, guxíaj lu nísadau' na', ne guchize da na' dxeláleu' bela lu nisa na', na' bebéaj bela nedxu quēlu'-ba'. Dxú'aba' na' xezrelnu' tu dumí da quízruju' chiu' lue', ne chia' neda'. Bia na, ne xeajtizruj na lau benne' ca'.

## 18

*Nu benne' nácadxa blau xabáa*

(Mr. 9.33-37; Lc. 9.46-48)

1 Tu lasa gulebiga benne' ca' dxuséde Jesús naga zuē', na' buluchebe' Lē':

—¿Nuzra benne' nácadxe' blau naga dxenná bea Dios?

2 Nadxa Jesús gunné' tu bidau', na' bze'-be' lau benne' ca' dxusédene'.

3 Dxenné':

—Da lí dxapa' le'e, che quebe xexácale ca bidu nígá, québequeze chu'ule naga dxenná bea Dios xabáa. 4 Ca'an naca, benne' nácadxe' blau naga dxenná bea Dios xabáa, naca benne' gaque' dxexruj lazre', ne xexaque' ca bidu nígá. 5 Benne' gape' ba lá'ana tu bidau' caní lu La' neda', néda'queza' gape' ba lá'ana.

*Ca naca da dxun na gundxu dul-la**(Mr. 9.42-48; Lc. 17.1-2)*<sup>6</sup> Na' gunná Jesús:

—Nüteteze benne' gunē' gun tu bidu caní dul-la, bi dxeajlí lázrebe' neda', cháwela guchéajladxu lbē'ē tu xiaj zi'i da dxutu, na' cheajchú'unadxu lē' situj lu nísadau'. <sup>7</sup> Edxugúa bēnneache lawe' da délē'ē da dxun na xelún bēnneache dul-la. Tu gátazqueze da caní, na' edxugúa bēnneache dxelunē' xelún bēnneache dul-la. <sup>8</sup> Cheē lē na', che na'u u ni'u dxun na gunu' dul-la, guchugu na, ne gudxú'una na zitu'. Cháwedxa xexú'u lu xel-la' nabán li lazre' nadxugu ni'u u na'u, quézcala xelegú'ē lue' lataj ba xa', zua dxúpatē na'u, ne dxúpatē ni'u. <sup>9</sup> Che xiaj lau' dxun na gunu' dul-la, guleaj na, ne gudxú'una na zitu'. Wenla chu'u lu xel-la' nabán li lazre' nen tuze xiaj lau', quézcala xelegú'ē lue' lu xi' gabila, zua dxúpatē xiaj lau'.

*Da dxulé'e na ca naca cheē zrila' naníteba'**(Lc. 15.3-7)*<sup>10</sup> Na' gunná Jesús:

—Gutu guzú' chalá'ala netú bidu caní. Neda' dxapa' le'e, zaj zra' gubáz cheē xabáa cheē bidu caní lau Xra' xabáa. <sup>11</sup> Neda', Benne' Guljē' Bēnneache, bla'a bedajselá' benne' zaj nanítie'.

<sup>12</sup> '¿Ájazra dxéquele le'e? Che tu benne' nape' tu gaxúa zrila', na' nite tuba', ¿quebe gucá'anē' bē tápalalaj chennu na' le'ē xixre', na' cheajdiljē' zrila' na' naníteba'? <sup>13</sup> Gate ba bezrelne'-ba', wabéle'ēdxene' cheē bē tu na' quézcala cheē bē tápalalaj chennu ca' quebe guleníteba'. <sup>14</sup> Cá'anqueze Xrale le'e, zuē' xabáa, quebe dxaca lazre' nite netú bidu caní.

*Ca dxal-la' gunite laudxu cheē le sa' ljwézredxu**(Lc. 17.3)*<sup>15</sup> Na' gunná Jesús:

—Che bi bichu' dxunbe' chiu' da calela, bchálajlē tuze lebe', chee xúnbeabe' da calela da benbe'. Che xenbe' da dxu'u-be', na' ba bexacu' tuze bi bichu'. <sup>16</sup> Che quebe xenbe' da dxu'u-be', guché' tu chupa benne' cheē gaca chupa u chunna benne' xelexechebē' ca naca da dxu'u-be'. <sup>17</sup> Che quebe xenbe' cheē benne' ca', guzre ca naca benne' dxelezraga lu xudau'. Che quebe xenbe' cheē benne' ca', le guzúa-be' ca tu benne' quebe dxéajlē'ē cheē Dios, u ca tu benne' dxuchízrujē' waláz cheē benne' zitu' ca'.

<sup>18</sup> 'Da li dxapa' le'e, da guchéajle lu xēzr la xu nigá, naca na da ba nadxéajqueze na xabáa, ne da xesézrele lu xēzr la xu nigá naca na da ba nazézrequeze na xabáa.

<sup>19</sup> 'Cá'anqueze dxapa' le'e, che chúpale le'e gácale tuze ca da návale Dios, na' Xra' zua xabáa gunne' na. <sup>20</sup> Naga zaj zra' chúpabe', u chúnname' zaj nazrágabe' lu La' neda', na' zúaqueza' neda' laduj lebe'.

<sup>21</sup> Nadxa Pedro bchebe' Jesús:

—Xran, che bi bícha'dau' gunbe' chia' da calela, ¿bal-la lasa dxun na ba xen gunite lawa' cheēbe'? ¿Gazre lasa?

<sup>22</sup> Bechebe Jesús:

—Dxapa' lue', quegá gazre lasa, san ga xun chi da gazre lasa.

*Benne' wen zrin quebe guca lazre' gunite lawē' cheē le sa' ljwezre'*<sup>23</sup> Na' gunná Jesús:

—Da gaca naga dxenná bea Dios xabáa naca na ca da guca gate tu benne' dxenná bea guca lazre' gucá'ana chawe' da dxelal-la benne' wen zrin chee'. <sup>24</sup> Gate guzú lawe' dxucá'ana chawe' na, na' guleché'e lau le' tu benne' dxebugue' chee' zane' cue' chi gaxúa dumí. <sup>25</sup> Lawe' da quebe de chee' benne' wen zrin na' da quízruje' xrane', na' gunná be'e xrane' ta'u benne' wen zrin na', ne zru'ule', ne zrí'ine' ca', ne ca nácaqueze da nape', chee' gazruj da na' dxebugue'. <sup>26</sup> Nadxa bzu zribe benne' wen zrin na' lau xrane', na' guta' xuene' le', dxenné': "Xran, ben zren lazre' neda', na' quízrujqueza' ca naca na." <sup>27</sup> Na' xrane' bexache lazre' le', ne bnite lawe' da na' dxebugue' chee', ne bsané' le'. <sup>28</sup> Gate benne' wen zrin na' bedxúaje', na' bezrague' xetú benne' wen zrin ljwezre', benne' dxebugue' chee' látedau'. Na' gudéle' lba bénnea', ne guzú lawe' dxusézxuje' chi'i bénnea', dxé'e le': "Gudizruj neda' da dxal-lu' chia'." <sup>29</sup> Nadxa benne' wen zrin ljwezre' na' bzu zribe' lau le', ne guta' xuene' le', dxenné': "Ben zren lazre' neda', na' quízrujqueza' ca naca na." <sup>30</sup> Bénnea' quebe guca lazre', na' guxíaje' xeajlu'e wen zrin ljwezre' na' lizre xia dxácaté quízruje' da na' dxebugue'. <sup>31</sup> Gate benne' wen zrin ca' xezícala guleque bé'ene' da nigá, na' belewí'ine lázrele'ene', na' xjaque' xeajleguezre' xrane' wúgute' da ba guca. <sup>32</sup> Nadxa xrane' na' gunná bé'ene' xeajlenné' benne' wen zrin na', na' guzre' le': "Bi wen zrin caléla. Neda' bnite lawa' chiu' ca naca da na' dxebugu' chia' lawe' da guta' xúenu' neda'. <sup>33</sup> Cá'anqueze lue' dxal-la' xexache lazru' le sa' ljwezru' na' ca bēna' neda' bexache lazra' lue'." <sup>34</sup> Xrane' na' bzrá'ale'e bénnea', na' bdeé' le' xel-la' zi' dxácaté na' quízruje' ca naca da na' dxal-le' chee'.

<sup>35</sup> Nadxa gunná Jesús:

—Cá'anqueze gun Xra' zua xabáa chee'le le'e che quebe gunite laule dute lázrdaule chee' le sa' ljwézrele.

## 19

*Da bchalaj Jesús ca naca chee' benne' dxulusán ljwezre'*

(Mr. 10.1-12; Lc. 16.18)

<sup>1</sup> Ca gudé bchalaj Jesús da caní, na' bezé'e xezre ca' zaj nababa Galilea, na' bezrine' chalá'ala naga nababa Judea, da zua chalá'ala xegu Jordán naga dxalaj gubizra. <sup>2</sup> Benne' zan zjácálene' Le', na' bexune' benne' zante, benne' we'.

<sup>3</sup> Nadxa bal-la benne' xudau' fariseo gulebigue' naga zua Jesús chee' xelebéaje' Le' dizra' chee' gaca xelagu zrié' Jesús, na' buluchebe' Le':

—¿Waca nu benne' gusané' zru'ule' ne chee' bíteteze da gune'?

<sup>4</sup> Bechebe Jesús:

—¿Quebe ne gulábale le'e lu xiche lá'azxa da na' dxenná na: "Bennea' bēne' benne' ca' nédxudauté bēne' le' benne' biu, ne nu'ula"? <sup>5</sup> Cá'anqueze gunné': "Chee' le' na' benne' biu gusané' xra xrne'e chee' gaque' tuze nen zru'ule', na' dxupe' xelaque' ca tuze benne'." <sup>6</sup> Caní naca na, québedxa zaj naque' chupe', san tuze benne' zaj naque'. Chee' le' na' quebe dxal-la' xelá'a bēnneache da na' ba nuchaga Dios.

<sup>7</sup> Nadxa buluchebe' Jesús:

—¿Bizr chee' na' gunná be'e Moisés nu benne' gunézruje' zru'ule' tu xiche da dxulé'e na belexelé'e, na' gusané' le'?

<sup>8</sup> Jesús guzre' benne' ca':



—Caní benē' lawe' da gulaca lazdau zizraj xra xrtaule. Moisés benne' lataj gusanle zrú'ulale, san nédxudaute quebe guca na ca'. <sup>9</sup> Neda' dxapa' le'e, che tu benne' gusanē' zru'ule', ne quebe dxedálenē' benne' biu xula, na' che xezúalēne' nu'ula xula, benne' nigá gune' dul-la súalēne' nu'ula quebe naque' zru'ule', na' che nu benne' biu xequé'e tu nu'ula nusán benne' cheē', cá'anqueze gun dul-la bēnnea' súalēne' nu'ula quebe naque' zru'ule'.

<sup>10</sup> Nadxa benne' ca' dxusede Jesús gulé'e Le':

—Che ca' dxaca cheē benne' zúalēne' nu'ula, quebe dxal-la' súalēntu' nu'ula.

<sup>11</sup> Jesús guzre' benne' ca':

—Quegá xúgute benne' gaca xelezí'e dizra' nigá, san tuze benne' ca' ba nun Dios cheē' xelezí'e na. <sup>12</sup> Zaj zra' benne' quebe dxelezúalēne' nu'ula lawe' da quebe zaj naca xánnie' benne' biu. Na' zaj zra' benne' québedxa zaj naca xánnie' benne' biu lawe' da zaj nun bēnneache naca caní. Na' zaj zra' benne' dxelexegá'ane' cá'aze, quebe nu dxelezúalēne' cheē gaca xelune' zrin cheē Dios, Bēnnea' dxenná be'e xabáa. Benne' gaca si'e dizra' nigá dxal-la' si'e na.

*Jesús dxenabe' gaca chawe' cheē bidu ca'*

*(Mr. 10.13-16; Lc. 18.15-17)*

<sup>13</sup> Nadxa belezrín benne' lau Jesús zaj naché'e bal-la bidau' cheē guzē ne'e bidu ca', ne nabe' Dios gaca chawe' cheēbe', san benne' ca' dxusede Jesús gulezú lawe' dxeledil-le' benne' ca' zaj naché'e bidu ca'. <sup>14</sup> Jesús guzre' le':

—Le güe bidu ca' lataj xelega'be' naga zua'. Quebe guzrúnna-be', lawe' da benne' zaj naque' ca' bidu caní xelu'e naga dxenná bea Dios xabáa.

<sup>15</sup> Nadxa bzē Jesús ne'e lawe' bidu ca', na' gudé na' bezé'e lataj na'.

*Tu benne' cuide' nape' xel-la' gunní'a*

*(Mr. 10.17-31; Lc. 18.18-30)*

<sup>16</sup> Tu benne' cuide' guxíaje' naga zua Jesús, na' bchebe' Le':

—Benne' Wesēde chawe'. ¿Bi da xrlátaje dxal-la' guna' cheē gapa' xel-la' nabán zeajlí canna?

<sup>17</sup> Jesús guzre' le':

—¿Bizr cheē na' dxu'u neda', benne' wesēde chawe'? Quebe nu chilá' benne' naque' chawe', san tuze Dios. Che dxaca lazru' zrué'enu' xel-la' nabán li lazre', bzua dizra' ca' bdxixruj be'e Dios.

<sup>18</sup> Benne' cuide' na' gunné':

—¿Bila na'?

Jesús guzre' le':

—Quebe gutiu' benne'. Quebe súalēnu' zru'ula benne' xula. Quebe cuanu'. Quebe nneu' da wen lazre' cheē benne'. <sup>19</sup> Gudapa ba lá'ana xra xrna'u. Bzri'i le sa' ljwezru' ca nazrí'i cuinu'.

<sup>20</sup> Benne' cuide' na' gunné':

—Xúgute da caní dxuna' nácatea' bídau'te. ¿Bíradxa quebe ne guna'?

<sup>21</sup> Na' guzre Jesús le':

—Che dxaca lazru' gacu' benne' li lazre', bexíaj, xeajēte ca naca da napu', ne bnezruj na benne' xache' ca'. Nadxa gapu' xel-la' gunní'a xabáa. Na' gudátega nen neda'.

<sup>22</sup> Gate benne' cuide' na' benne' da nigá, bezé'e dxexíaje lazre' lawe' da nápalē'e xel-la' gunní'a.

23 Nadxa gunná Jesús, dxé'e benne' ca' dxusédene':

—Da li dxapa' le'e, stébele'e naca chu'u tu benne' gunní'a naga dxenná bea Dios xabáa. 24 Da xula dxapa' le'e, chadidxa gaca te tu bea', be dxebía bénneache lu negue' tu xeche' zriche, quézcala chu'u tu benne' gunní'a naga dxenná bea Dios.

25 Gate belenne' benne' ca' dxuséde Jesús da nigá, na' belexebánele'ene', na' buluchebe ljwezre':

—¿Nuzra la xca'?

26 Jesús guné'e benne' ca', ne guzre' le':

—Da nigá quebe gaca xelún bénneache, san Dios waca guné' ca naca.

27 Nadxa gunná Pedro:

—Xran, netu' ba bcá'anantu' ca naca da nápantu', ne zéajlentu' Lue'. ¿Bizra gápantu' xca'?

28 Bechebe Jesús:

—Da li dxapa' le'e, ca lu zra na' gate na' xúgute xelexada na cube, gate neda', Benne' Gulje' Bénneache, cue'a lataj chawe' chia' naga nna be'a, le'e na' ba gudálele neda' cué'quezle lu chazrinnu lataj naga nna beale, chee guchí'ale chee chazrinnu cue' benne' Israel, benne' judío ca'. 29 Xúgute benne' ca' ba bulucá'ane' lizre', u benne' biche', u nu'ula zane', u xre', u xrne'e, u zru'ule', u zrí'ine', u xezr la xu chee', chee xelune' zrin chia', xelezí'queze' tu gaxúala na, ne xelezí'queze' xel-la' nabán zeajlí canna. 30 Benne' zante zaj naca blau na'a xelaque' benne' bzebe, na' benne' zante zaj naca benne' bzebe na'a xelaque' benne' blau.

## 20

*Da dxulé'e na ca naca chee benne' wen zrin ca'*

1 Na' gunná Jesús:

—Da gaca naga dxenná bea Dios xabáa naca na ca da guca gate tu xrane zánete cue' xezr la xu guzé'e lizre' che zílala, zéaje' zeajtíajé' benne' wen zrin ca' chee cheajlechibe' uva chee'. 2 Bca'ana cháwelené' benne' wen zrin ca' quízruje' tu dumí lazruj chee' tu zra, na' gusel-le' benne' ca' zeajleguene' zrin lu xezr la xu chee'. 3 Ca gudé na' guzé'e lizre' ca dxedá na, na' blé'ene' benne' zaj zre'e lawe' xi'a zaj nalátajze'. 4 Na' guzre' benne' ca': "Cá'anqueze le'e, le chjaca wen zrin lu xezr la xu chia', na' gunna' le'e da naca chawe'." Na' benne' ca' xjaque'. 5 Xrane na' guzé'e da xula wa gubizra, ne cá'anqueze dxexedá' chunna, ne tuze ca bene'. 6 Xetú du dxedá' gazxu' guxíajé' lawe' xi'a, na' blé'ene' zaj zra' na' benne' zaj nalátajzqueze', ne guzre' le': "¿Bizr chee' na' zrale le'e nigá bedú zra quebe bi zrin dxunle?"

7 Gulenné': "Quebe nu ne xe netu' guntu' zrin chee'."

'Na' guzre' benne' ca': "Cá'anqueze le'e, le cheajén zrin lu lina chia', na' gunna' le'e da naca chawe'." 8 Gate gul-la' chizrela, xrane na' guzre' benne' xu'u lu ne'e zrin na': "Gunné benne' wen zrin ca', ne gudízruje', su lau' quízruju' benne' ca' belelá' bzébedxa, na' bzébeté quízruju' benne' ca' belelá' nédxute'." 9 Nadxa belezrín benne' ca' belú'e lu zrin na' gate dxexedadxa gazxu', na' tu tu benne' ca' belezi'e lazruj chee' du naxá' lazruj tu zra wen zrin. 10 Gudé na' gate belezrín benne' ca' gulu'e nédxute lu zrin na', guléquene' xelezí'e da zrendxa, san cá'anqueze gulezí' tu tu benne' ca' lazruj tu zra wen zrin weaj.

<sup>11</sup> 'Gate gulezí'e na, na' gulezú lawe' dxelawe' zria lau xrane zrin na',  
<sup>12</sup> dxelenné': "Benne' caní belelá' bzébedxa, tu chí'idau'ze ga beluné' zrin,  
na' gudízrujquezu' benne' caní ca' gudízruju' netu', na' netu' bedú zra bentu'  
zrin, ne ca naca da la chee zra nigá bchaga launtu'."

<sup>13</sup> 'Bechebe xrane na', dxé'e tu benne' ca': "Ljwézra'dau', quebe bi  
dxuna' chiú' da quebe naca na chawe'. ¿Quebe bca'ana cháweléna' lue'  
quízuja' lue' lazruj tu zra wen zrin? <sup>14</sup> Guzí' lazruj chiu', ne bexíaj.  
Neda' dxaca lazra' gunézruja' chee benne' ca' belú'e bzébedxa ca da  
gudízrujqueza' lue'. <sup>15</sup> ¿Quebe gaca guna' ca da dxaca lazra' nen dumí chia'?  
¿Dxacu' xa lazre' lawe' da naca' neda' benne' xrlátaje?"

<sup>16</sup> Na' gunná Jesús:

—Ca'an naca, benne' ca' zaj naca benne' bzebe xelaque' benne' blau,  
na' benne' blau ca' xelaque' benne' bzebe lawe' da ba gunnía' benne' zan,  
san bábaze benne' ca' xelaque' blau.

*Xecha lasa dxuchalaj Jesús ca gaca gate gatie'*

(Mr. 10.32-34; Lc. 18.31-34)

<sup>17</sup> Gate xu'u Jesús neza, zexíajé' Jerusalén, guléajé' cheeze benne'  
chazrinnu ca' dxusédené', ne guzré' le':

<sup>18</sup> —Dxelé'ele le'e ba zexíajdxu Jerusalén naga neda', Benne' Gulje'  
Bénneache, xuludé benne' ca' neda' lau benne' xíchajé ca' chee bxruze ca',  
ne lau benne' ca' dxuluxuzájle'e da bdxixruj be'e Dios, na' xelechugue'  
chia' gatia'. <sup>19</sup> Xuludé' neda' lu na' benne' zitu' ca' chee xelún le' chia', na'  
xelu'e neda', ne xuludé'e neda' xaga béguaj, san zra guxunne zra xebana'.

*Da gunaba xrna Jacobo ne Juan*

(Mr. 10.35-45)

<sup>20</sup> Nadxa gubiga xrna Jacobo, ne Juan lau Jesús, bi ca' zaj naca be' zri'ine  
Zebedeo, naché'e bi ca', na' bzu zribé' lau Jesús, dxenabe' culuén. <sup>21</sup> Jesús  
bchebe' nu'ula na':

—¿Bi na' dxenabu'?

Nu'ula na' guzré' Jesús:

—Gate zrin zra nna be'u, na' gudxixruj be'e cue' tu zri'ina' caní chalá'a  
xabela chiu', ne xetube' xéglala.

<sup>22</sup> Jesús bechebe', guzré' bi ca':

—Quebe nézele le'e bi na' dxenábale. ¿Waca xí'ajle le'e ca da xí'aja' neda',  
da na' naca na ca xel-la' zi' da tea' neda', ne waca si'le da naca na ca xel-la'  
dxedxúa nisa ca da si'a neda' gate chu'a lu xel-la' gute?

Na' gulenabe':

—Wácantu'.

<sup>23</sup> Nadxa Jesús guzré' bi ca':

—Da li xí'ajle ca da xí'aja' neda', ne si'le da naca ca xel-la' dxedxúa nisa  
na' da si'a neda', san da cue'le chalá'a xabela chia', ne chalá'a xéglala chia'  
quebe naca na chia' gunna' na le'e. Xra' gunézrujé' na chee bi ca' ca da ba  
nucueze'.

<sup>24</sup> Gate xechí benne' ca' dxusede Jesús belenne' ca', na' belezré'e dxupa  
bi chee nu'ula na'. <sup>25</sup> Jesús gunné' benne' ca', ne guzré' le':

—Ba nézele le'e ca dxelún benne' xíchajé chee xezr la xu ca', dxelenná  
bé'ene' benne' ca', na' benne' nácadxe' blau ládujla benne' ca' dxelenná  
be'e, dxuchíne' xel-la' dxenná bea chee'. <sup>26</sup> Le'e quebe dxal-la' gunle  
ca'. Benne' dxaca lazre' gaque' blau ládujla le'e dxal-la' guné' zrin chee

xezicadxale le'e, <sup>27</sup> na' bënnea' dxaca lazre' gaque' xíchaje chee, dxal-la' gaque' wen zrin chee xúgutęle le'e. <sup>28</sup> Dخال-la' gunę' ca bęna' neda', Benne' Gulje' Bënneache, quebe bida' chee nu gun zrin chia' neda', san bla'a chee guna' zrin chee bënneache, ne chee guzúa' xel-la' nabán chia' ca da quızruja' chee guselá' benne' zante.

*Jesús dxexunę' chupa benne' la chul-la*

(Mr. 10.46-52; Lc. 18.35-43)

<sup>29</sup> Gate dxelexdxúaje' xęzre Jericó, na' benne' zante zjácálene' Jesús. <sup>30</sup> Naga dxeledęe' zaj dxę' chupa benne' la chul-la dxu'a neza, na' gate belenne' dxedę Jesús na' gulebezre xę'e, dxelennę':

—Xran, Zri'ine David, bexache lazre' netu'.

<sup>31</sup> Benne' zan ca' guledil-lę' dxúpatę' na' chee xelezúę' zrize, san lę' gulebezre xę'e zızrajdx, dxelennę':

—Xran, Zri'ine David, bexache lazre' netu'.

<sup>32</sup> Nadxa Jesús gulezę', na' gunnę' benne' la chul-la ca', na' bchebe' lę':

—¿Bi dxaca lázrele guna' chee?

<sup>33</sup> Belexechebe benne' ca':

—Xran, dxaca lázrentu' xelé'entu'.

<sup>34</sup> Jesús bexache lazre' benne' ca', ne bte' xiaj lawę'. Na' belexelé'ete benne' la chul-la ca', na' xjácálene' Jesús.

## 21

*Ca da guca gate bexú'u Jesús Jerusalén*

(Mr. 11.1-11; Lc. 19.28-40; Jn. 12.12-19)

<sup>1</sup> Gate belezrín Jesús, ne benne' ca' dxusędene' gagu naga zua xęzre Jerusalén, ne ba belezrine' xęzre Betfagę, da zua na gagu naga zua xi'a naga zaj da' xaga olivo, na' Jesús gusel-lę' chupa benne' ca' dxusędene' chee tu da xelunę'. <sup>2</sup> Dxę'e lę':

—Le chjaca xęzredu na' da zua le nna' nigá. Na' lé'ele tu burro bzrise' da'ba' xaga, na' tu búrrodau' zúaleba' lęba'. Le sezre-ba', ne le chee dxúpatęba' nigá. <sup>3</sup> Che nu benne' bi xę'e le'e, le xę'e: "Xránadxu nachinne' lęba', na' la xesél-la'tęqueze'-ba'."

<sup>4</sup> Da nigá guca na chee guxá ca da gunná benne' bchálaje' waláz chee Dios, gunnę':

<sup>5</sup> Le xę benne' zaj zra' xęzre Sión:

"Le nna', Benne' nna bé'ene' le'e ze'e naga zúale.

Dutę xel-la' dxexruj lazre' zrię' tu burro bzrise'.

Zrię' tu búrrodau', zri'ine tu bę dxua xua."

<sup>6</sup> Nadxa dxupa benne' ca' dxusęde Jesús besiá'que', ne belunę' ca da ba gunná be'e Jesús lę'. <sup>7</sup> Xeajlexrí'e burro bzrise', ne zrí'ineba', na' belezrúę' zra lanę' cúzruba', na' guzría Jesús lęba'. <sup>8</sup> Benne' zan ca' gulechílaje' zra lanę' la neza na', na' xebal-lę' buluchibe' zina' da buluzalę' la neza. <sup>9</sup> Benne' zjaque' lávela, ne benne' zá'aque' bzebe gulezú lawę' dxelebezre xę'e, dxelennę':

—¿Gaca ba lávela Zri'ine wenná bea David! ¿Ba neza zrentę naca na chee bënnea' ze'e waláz chee Xránadxu Dios! ¿Gaca ba lávela Dios!

<sup>10</sup> Gate guxú'u Jesús xęzre Jerusalén, ca naca bënneache zaj zre'e na' beledxé'ena zragę', na' buluchebe ljwezre':

—¿Nuzra benne' nigá?

<sup>11</sup> Bal-la benne' ca' gulennę':

—Benne' nigá naque' Jesús, benne' dxuchálaje' waláz chee Dios, ze'e xezre Nazaret da nababa Galilea.

*Jesús dxuchi'e lu xudau'*

*(Mr. 11.15-19; Lc. 19.45-48; Jn. 2.13-22)*

<sup>12</sup> Ca gudé na' guxú'u Jesús dxale'aj xudau' chee Dios, na' bebéaje' xúgute benne' wete, ne benne' dxelá'awe' na'. Bdxixre' blag ca' chee benne' ca' dxuluché'e dumí, ne bdxixre' da ca' zaj dxe' benne' ca' dxelútie' bgúgudu ca'. <sup>13</sup> Nadxa guzre' benne' ca':

—Lu xiche lá'azxa naxúaj da dxenná Dios: “Lizra' nigá naca na xu'u naga xelenaba bènneache lawa' neda'”, san le'e ba nunle na ca tu lizre gubán.

<sup>14</sup> Lu dxale'aj xudau' na' gulebiga lau Jesús bal-la benne' la chul-la, ne benne' zrinnaj ca', na' Le' bexune' benne' ca'. <sup>15</sup> Belezrá' benne' xíchaje' ca' chee bxruze ca', ne benne' ca' dxuluxuzájle'e da nadxixruj bea Dios, gate na' belenne' ca' dxelebezre xa'a bidu ca' lu xudau', dxelennabe': “¡Gaca ba lá'azxa zri'ine wenná bea David!” <sup>16</sup> Gulé'e Jesús:

—¿Dxennu' ca' dxelenná benne' caní?

Bechebe Jesús:

—Dxenda' na. ¿Quebe ne gulábale le'e lu xiche lá'azxa naga naxúaj na chee da dxaca nigá? Dxenná na caní:

Ba benu' xelúl-la bidu ca', ne bidu dxe'ene ca'.

Da dxelúe lá'anabe' Dios naca na da li.

<sup>17</sup> Nadxa bca'ana Jesús benne' ca'. Bezé'e xezre na', na' bezrine' xezre Betania, naga bejgá'ane' xela na'.

*Jesús dxugu'e de' xaga higo*

*(Mr. 11.12-14, 20-26)*

<sup>18</sup> Che zílala ca' zexíaj Jesús xezre na', na' gudune'. <sup>19</sup> Zítu'la blé'ene' tu xaga higo dxu'a neza, na' gate bzrine' naga zua na, quebe bi da zixre chee na blé'ene'. Lágaze zria na. Nadxa Jesús guzre' xaga higo na':

—Cabata' cuíaquezu' da zixre.

Gubízrete' xaga higo na'. <sup>20</sup> Ca belelé'e benne' ca' dxusede Jesús da nigá, na' belexebánene', ne buluchebe' Jesús:

—¿Ájazra na' chadite' gubizre xaga higo nigá?

<sup>21</sup> Bechebe Jesús:

—Da li dxapa' le'e, che nápa'e xel-la' dxeajlí lazre', ne quebe gun chupa lázrele, quegaze da nigá gaca gunle ca' da bēna' neda' chee xaga higo nigá, san waca xe'e xi'a nigá: Gucuasa nigá, xeajsúa lu nísadau', na' gaca na.

<sup>22</sup> Che dxeajlí lázrele, na' xezi'le bíteteze da nába'e Dios.

*Xel-la' dxenná bea da xu'u lu na' Jesús*

*(Mr. 11.27-33; Lc. 20.1-8)*

<sup>23</sup> Nadxa guxú'u Jesús lu chila xudau', na' dxacate' na' dxusedene' benne' zaj zre'e na', gulebiga naga zua Jesús benne' xíchaje' ca' chee bxruze ca', ne benne' gula chee judío ca', na' buluchebe' Le':

—¿Bi xel-la' dxenná bea napu' dxunu' da caní? ¿Núzraqueze bēna lue' xel-la' dxenná bea nigá?

<sup>24</sup> Bechebe Jesús:

—Cá'anqueze neda' gucheba' le'e tu. Che xechébele da nigá, na' neda' xapa' le'e bi xel-la' dxenná bea napa' dxuna' da caní. <sup>25</sup> ¿Nu benne' gusel-le' Juan dxuchúe' bènneache nisa? ¿Dios, che bènneacheze?

Gulezú lawe' dxuluchálajle ljwezre', dxeleñné':

—Che nnadxu Dios gusel-le' le', na' xe'e dxi'u: “¿Bizr chee na' quebe guxéajlele chee'?” <sup>26</sup> Che nnadxu bènneache gusel-le' le', dxal-la' zrédexu bi xelún benne' zan ca' cheedxu dxi'u, lawe' da dxeleque xúgute bènneache bchalaj Juan na' waláz chee Dios.

<sup>27</sup> Chee le' na' gulé'e Jesús:

—Quebe nézentu'.

Nadxa Jesús guzre' benne' ca':

—Cá'anqueze neda' quebe xapa' le'e bi xel-la' dxenná bea napa' dxuna' da caní.

*Da dxulé'e na ca naca chee chupa bi biu chee tu benne'*

<sup>28</sup> Na' guzre Jesús benne' ca':

—¿Aja dxéquele le'e chee da nigá? Tu benne' zaj zra' chupa zrí'ine' bi biu, na' guzre' tube': “Zrí'ina', guxíaj xeajén zrin lu lina chee uva chia'.”

<sup>29</sup> Zrí'ine' na' bechébebe': “Quebe dxaca lazra'.” Ca gudé na' bexíaje lázrebe', na' guxíajbe' xeajénquezbe' zrin. <sup>30</sup> Cá'anqueze xrabe' na' guxíaje' xeajné'e xetube', ne guzre'-be', na' bi nigá bechébebe': “Waca, xrae. Na'a cha'a.” Quebe guxíajbe'. <sup>31</sup> ¿Núlabé' bi chupa caní benbe' ca da guca lazre' xrabe'?

Gulenná benne' ca':

—Bi nedxu.

Na' gunná Jesús, dxé'e benne' ca':

—Da li dxapa' le'e, benne' wechizruj ca', ne nu'ula dxeledále benne' biu zanté xelexú'e naga dxenná bea Dios nédxudxa ca le'e <sup>32</sup> lawe' da bla' Juan, bedajlé'ene' le'e da naca xrlátaje, na' le'e quebe guxéajlele chee'. Benne' wechizruj ca', ne nu'ula ca' dxeledále benne' biu zanté guléajle'e chee'. Le'e, gate blé'ele da nigá, quebe bexíaje lázrele chee chéajlele chee'.

*Da dxulé'e na ca naca chee benne' wen zrin caléla ca'*

(Mr. 12.1-12; Lc. 20.9-19)

<sup>33</sup> Nadxa gunná Jesús:

—Le xene ca naca da nadxixruj bea nigá. Tu benne' xrane tu xezr la xu guze' lba uva ca', ne bene' le'aj chee na. Bene' tu xedxu naga xelésié' uva ca', ne guchise' tu xu'u sibe chee gaca nu guxúe ca naca na. Na' bca'ane' na lu na' benne' wen zrin ca', ne guze' zéaje' zitu'. <sup>34</sup> Gate bzrin zra xuluchibe' uva ca', na' gusel-le' tu chupa bi wen zrin chee' zeajlexezri'be' da dxal-la' xezí' xrane na'. <sup>35</sup> Benne' wen zrin ca' gulequé'e bi wen zrin chee' ca'. Belúele'e tube', ne belutie' xetube', na' xetube' buluzrie'-be' xiaj. <sup>36</sup> Nadxa xrane na' gusel-ladxé' bi wen zrin chee' bi zandxa ca nedxu. Benne' wen zrin ca' tuz ca bulusaque' bi ca'. <sup>37</sup> Naga xeajché'tequeze na gusel-le' zrí'inequeze' lawe' da dxéquene': Welape' ba lá'ana zrí'ina'. <sup>38</sup> Gate belelé'ene' zrí'ine', na' benne' wen zrin ca' gulé ljwezre': “Bi nigá xezí' lu na'be' ca naca da caní. Du gute-be' chee xegá'ana cheedxu da caní.” <sup>39</sup> Chee le' na' gulele'-be', ne belexebéaje'-be' lu xezr la xu na', na' belutie'-be'.

<sup>40</sup> Nadxa Jesús bchebe' benne' ca':

—Gate xida xrane xezr la xu na', ¿ájazra guné' chee benne' wen zrin ca'?

<sup>41</sup> Gulé'e Le':

—Gutie' benne' ca' dxeleñé' da caléla ne quebe xexache lazre' le'. Nadxa gucá'analene' xezr la xu na' benne' wen zrin xula, benne' xulux-unézruje' da dxal-la' xezí' le' gate zrin zra chee na.

<sup>42</sup> Nadxa Jesús guzre' benne' ca':

—¿Quebe ne gulábale le'e xiche lá'azxa? Caní dxenná na:

Xiaj na' da buluzúa benne' wen xu'u ca' chalá'ala,  
le na' naca na xiaj blau na'a.

Da nigá naca na da ben Xránadxu,  
ne naca na tu da dxexebánedxu.

<sup>43</sup> Chee le na' dxapa' le'e, Dios wequé'e da naca chee le'e naga dxenná be'e, na' gunézruje' na benne' xelune' da naca chee xel-la' dxenná bea chee Dios. <sup>44</sup> Che tu benne' cheajchazie' lawe' xiaj nigá waxúzruje', na' che xexruij na lawe' tu benne', na' guzuzruj na le'.

<sup>45</sup> Gate benne' xíchaje ca' chee bxruze ca', ne benne' xudau' fariseo ca' belenne' da bchalaj Jesús, guleque bé'ene' chee léqueze' bchalaj Jesús da caní. <sup>46</sup> Gate gulaca lazre' xelélé' Le', belezrebe' benne' xezre ca' lawe' da dxeléajle benne' ca' naca Jesús benne' dxuchálaje' waláz chee Dios.

## 22

*Da dxulé'e na ca naca chee laní wechaga na'*

<sup>1</sup> Guzú lau Jesús dxuchálajlene' benne' ca' xecha lasa tu da dxulé'e na, dxé'e le':

<sup>2</sup> —Ca da gaca xabáa naga dxenná bea Dios naca na ca da guca gate tu benne' wenna' bea bene' tu laní wechaga na' chee bi biu chee'. <sup>3</sup> Guselle' benne' wen zrin chee' ca' cheajletupe' benne' ca'an gunné' lizre', san benne' ca' quebe gulaca lazre' xédajgaque'. <sup>4</sup> Nadxa gusel-ladxe' benne' wen zrin chee' ca', benne' xula. Dxe'e le': "Le xe benne' ca' gunniá', ba nucueza' xel-la' wagu. Ba gunná be'eda' xelútie' bezre ca', ne be dxelanne, na' ca naca na bache de. Dxa-la' xelélé'e nigá naga zra' wechaga na'." <sup>5</sup> Benne' ca' gunné' quebe gulaca lazre' xédajgaque'. Tu benne' ca' guxiáje' lu xezr la xu chee', ne xetu' benne' guxiáje' wete. <sup>6</sup> Xebal-la benne' ca' gulele' bi wen zrin ca' chee wenna' bea na', na' bulucháchalene'-be', ne belútete'-be'. <sup>7</sup> Nadxa wenna' bea na' bzrá'ale'e, na' gusel-le' benne' chee' ca', benne' zjaca wedil-la xejleguétie' benne' wete benne' ca', ne xejlezéze'te' lazre' benne' ca'. <sup>8</sup> Nadxa guzre' bi wen zrin chee' ca': "Bal-la bi de ba de chee wechaga na', na' benne' ca' gunniá' quebe zaj naca chee' xelélé'e. <sup>9</sup> Le chjaca neza zri'a ca', ne le nne xúgute benne' lé'ele, chee xelélé'e laní chee wechaga na'." <sup>10</sup> Benne' wen zrin ca' xjaque' la neza ca', na' xejletupe' xúgute bènneache, benne' belelé'ene' zaj naque' benne' calela, ne benne' xrlátaje. Ca'an guca guzrate xu'u na' bènneache. <sup>11</sup> Nadxa wenna' bea na' guxú'e xejné'e benne' ca' gunné', na' blé'ene' tu benne' dxé'e na', quebe nazi'e zra lané' chee laní chee wechaga na'. <sup>12</sup> Guzre' le': "Lue', benne', ¿ájazra guca guxú'u nigá, ne quebe nazi'u zra lanu' chee laní wechaga na'?" Bènnea' gudxe' zrize. <sup>13</sup> Nadxa wenna' bea na' guzre' bi zaj zúabe' ga na', "Le guchéaj ni'a ne'e, ne le guzalé' chalé'ajla naga naca chul-la, naga cuezre', ne xáguxa'ate' lazxe'." <sup>14</sup> Benne' zante gunniá', na' bábaze' zaj naca chee' xelu'e nigá.

*Ca naca chee dumí da dxuluchízruje'*

(Mr. 12.13-17; Lc. 20.20-26)

<sup>15</sup> Nadxa benne' fariseo ca' besiá'que', ne belune' tuze dizra' xelebéaje' Jesús dizra' chee xelezéquene' xelawe' zría chee'. <sup>16</sup> Nadxa gulesel-le' bal-la benne' ca' zaj naque' fariseo ca' tuze, ne bal-la benne' ca' zaj de'e Herodes, chee zeajleguezre' Jesús:

—Benne' wesęde, nézentu' dxenníu' da li, ne dxusédenú' da li da zaj naca cheę Dios, ne quebe dxezrebu' bi xelenná bęnneache, ne quebe dxenná'u ca da zaj napa bęnneache. <sup>17</sup> Gunná xque. ¿Aja dxéquenu' lue'? ¿Dxun na ba xen quízrujdxu da dxuluchizruj benne' ca' nasel-la César, benne' zitu', che cabí?

<sup>18</sup> Jesús ba nézene' ca da dxelaca lazre' xelunę' cheę', na' guzre' benne' ca':

—Le'e, láweze dxunle da xrlátaje. ¿Bizr cheę na' dxuzúale da guzría xi na neda'? <sup>19</sup> Le gulé'e neda' dumí na' da dxízrujle cheę wechizruj.

Nadxa bulunézruję' Le' tu dumí cheę xęzre Roma. <sup>20</sup> Gate blé'ene' na, na' Jesús bchebe' benne' ca':

—¿Nuzra lau ní, ne le' da naxúaj na nigá?

<sup>21</sup> Belexechebe':

—Cheę César na'.

Na' guzre Jesús benne' ca':

—Le gunezruj cheę César da naca cheę César, ne le gunezruj cheę Dios da naca cheę'.

<sup>22</sup> Gate belenne' da nigá, na' belexebánene', ne besía'que' naga zua Jesús.

*Da buluchebe' Jesús cheę benne' xelexebane' ládujla benne' gate*

*(Mr. 12.18-27; Lc. 20.27-40)*

<sup>23</sup> Zra ná'queze belezrín bal-la benne' saduceo ca' naga zua Jesús. Benne' saduceo ca' dxelenné' quebe xelexebán benne' gate. Gulé'e Jesús:

<sup>24</sup> —Benne' wesęde, Moisés gunné' che tu benne' nuchaga ne'e gatię', ne quebe nu bidu cheę chilá', na' bi biche' dxal-la' guchaga na'abe' nen nu'ula gute benne' biu cheę' na' cheę sua tu bi cheę benne' ba gutię'.

<sup>25</sup> Naga zúantu' gulezrá' gazre benne' gulácabe' zri'ine tuze benne'. Bi nedxu bchaga na'abe', na' gútebe'. Bi gudxupe' bchaga na'abe' nen nu'ula na' gute benne' biu cheę' lawe' da quebe nu zri'ine bi nedxu na' gúlajbe'. <sup>26</sup> Cá'anqueze gúcaqueze na cheę bi gudxupe', na' gudé na' cheę bi guxunne', na' cá'anqueze guca cheę xúgute bi gazre ca'. <sup>27</sup> Ca gudé na', na' gute nu'ula na'. <sup>28</sup> Gate xelexebán benne' gate, ¿nula bi gazre caní gácabe' benne' cheę nu'ula na' lawe' da tu tu bi gazre ca' bchaga na'abe' nen nu'ula na'?

<sup>29</sup> Jesús bechebe':

—Le'e dxeque zréajele lawe' da quebe núnbeale da naxúaj na lu xiche lá'azxa, ne ca naca xel-la' waca cheę Dios. <sup>30</sup> Gate zrin zra xelexebán benne' gate, québedxa xuluchaga na' bęnneache, ne québedxa xelútię' bi nu'ula cheę xuluchaga na'abe'. Xelaque' ca zaj naca gubáz cheę xabáa cheę Dios. <sup>31</sup> Ca naca na che dxal-la' xelexebán benne' gate, ¿quebe ne gulábale le'e ca gunná Dios? Gunné': <sup>32</sup> “Neda' naca' Dios cheę Abraham, ne Dios cheę Isaac, ne Dios cheę Jacob.” Dios quebe naque' Dios cheę benne' gate, san naque' Dios cheę benne' ban, benne' ca' ba gulatię' lu xęzr la xu nigá.

<sup>33</sup> Gate belenne' da nigá, na' belexebane benne' ca' ca naca da dxusęde Jesús.

*Da gunná be'e Dios da naca blau*

*(Mr. 12.28-34)*

<sup>34</sup> Gate benne' fariseo ca' guleque bé'ene' ba bzua zri Jesús benne' saduceo ca', na' belezrague'. <sup>35</sup> Tu benne' ca', benne' naque' benne'



dxuxuzájle' da nadxixruj bea na, guca lazre' guxúe' ájala nne Jesús. Bchebe' Le':

<sup>36</sup>—Benne' wesede, ¿bizrla da gunná be'e Dios naca blau?

<sup>37</sup>Bechébe Jesús:

—Dxal-la' zri'inu' Xranu' Dios dutę xichaj lázrda'u, ne dutę bénne'du xu'u, ne dutę xel-la' dxéajni' chiu'. <sup>38</sup>Da nigá naca da nadxixruj bea da blaudxa, ne da dxundxa na ba xen. <sup>39</sup>Da nadxixruj bea da gudxupe' nácaqueze na ca', da dxenná na: Bzri'i le sa' ljwezru' ca nazri'i cuinu'. <sup>40</sup>Che tu benne' dxunę' ca zaj naca chupa da nadxixruj bea caní, dxunę' ca naca xúgutę da nadxixruj bea da bzuaj Moisés, ne ca naca xúgutę da bulusede benne' ca' buluchálaje' waláz cheę Dios.

*¿Nuzra zri'ine naca Cristo?*

*(Mr. 12.35-37; Lc. 20.41-44)*

<sup>41</sup>Dxácatę ne zaj nazraga benne' fariseo ca' na', <sup>42</sup>Jesús bchebe' le':

—¿Ájala dxéquele le'e cheę Cristo? ¿Nuzra zri'ine naque'?

Benne' ca' gulé'e Le':

—Zri'ine David na'.

<sup>43</sup>Nadxa guzre Jesús benne' ca':

—¿Ájazra na' David gate bchálaje' cheę Cristo dxę'e Le': Xran? Gate gunná David da nigá bchálaje' da ble'e Be' Lá'azxa le'. Caní naca da na' gunná David:

<sup>44</sup>Xrana' Dios guzre' Xrana':

“Gudxé'e chalá'a xabela chia'

cadxa guzúa' zran ni'u benne' ca' quebe chawe' dxelelé'eng' Lue'.”

<sup>45</sup>¿Ájazra naca na naca Cristo zri'ine David, che David ná'queze dxę'e Le': “Xrana”?

<sup>46</sup>Quebe nu benne' guca xechébequeze' cheę', na' ze lau zra na' netú québedxa nu bexazre bi guchébedxa Le'.

## 23

*Jesús dxedil-le' benne' xudau' ca'*

*(Mr. 12.38-40; Lc. 11.37-54; 20.45-47)*

<sup>1</sup>Nadxa Jesús guzre' benne' ca' zaj zre'e na', ne benne' ca' dxusédenę', <sup>2</sup>dxenné':

—Benne' ca' dxuluxuzájle' da nadxixruj bea Moisés, ne benne' xudau' fariseo ca' zaj nape' xel-la' dxenná bea xuluxuzájle' da nadxixruj bea Moisés. <sup>3</sup>Cheę le na' le guzúa dizra' cheę benne' caní, ne le gun xúgutę da xelenné'. Quebe gunle ca da dxelún benne' ca', lawe' da dxelenné' da ca' dxal-la' gunle, na' quebe dxelúnqueze' na. <sup>4</sup>Dxelunę' xua zí'ilę' da quebe dxelezeque xelezúe bénneache, ne dxelenná bé'eng' bénneache cheę xelu'e na. Benne' ca' ne quebe dxuluzúe' na netú zrube ne'e cheę da dxuluzúe benne' xubla. <sup>5</sup>Xúgutę da dxelún benne' ca' naca na cheę xeledé'e bénneache. Dxeledánnę' dxelu'e luzxgue', ne ne'e ladxe' laga naga naxúaj dizra' cheę Dios, ne dxelácuę' zra lanę' da zeajzé luzre na tunna. <sup>6</sup>Dxelaca lazre' xelebé'e naga ze láweze naga dxelawe', ne naga naca blau lu xu'u ca' naga dxeledube'. <sup>7</sup>Dxelaca lazre' xelapa bénneache le' ba lá'ana la neza ca', ne xelé'e le': “Benne' wesede.” <sup>8</sup>Na'a le'e, quebe güele lataj nu xę le'e, “Benne' wesede”, lawe' da xúgutęle nácale bi bichele tule xetule, ne tuze Benne' dxusédenę' le'e, neda', Cristo. <sup>9</sup>Quebe nu xęle le'e: Xrae, lu xęzr la xu nigá, lawe' da zua tuze Xrae, Dios na' zuę' xabáa.

10 Quebe güele lataj nu xę le'e: Xran, lawe' da zua tuze Xránale, neda', Cristo. 11 Bénnea' dxunę' zrin cheę zezícadxale le'e nácadxę' blau ládujla le'e. 12 Bénnea' dxucá'ana szren cuinę' wexéxrujla bénnea', na' bénnea' dxaque' dxexruj lazre' wegá'ane' szren.

13 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxusézrujle neza cheę xabáa cheę quebe nu chu'u na. Lé'equeze quebe dxú'ule, ne quebe dxuele lataj benne' dxelaca lazre' xelu'e.

14 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxegúale lizre nu'ula ca' ba gulate benne' biu cheę', na' cheę xulé'ele xrlátaje cuínale, dxuwízrale Dios xcha lu xudau'. cheę le' na' da zrente da guzríá xi na le'e.

15 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Le'e dxedale du ca naca xęzr la xu nigá ne ca naca nísadau' cheę si' tu benne' ca naca da zéajlele cheę Dios, na' gate bache dxunle na, na' dxugápadxale bénnea' dul-la ca da nabágale le'e cheę cuía xi'e lu lataj ba xa'.

16 'Edxugua le'e. La chul-la nácale, ne dxaca lázrele cu'ule benne' neza. Dxennale che tu benne' dxuzétaje' xudau', quebe dxun na le' ba xen, na' che dxuzétaje' oro cheę xudau', da na' dxun na le' ba xen. 17 Nácale benne' xala, ne la chul-la. ¿Nula da naca na blaudxa, oro, che xudau' na' da dxucá'ana na lá'azxa oro na'? 18 Cá'anqueze dxennale le'e che nu dxuzetaj cugu lá'azxa, quebe dxun na le' ba xen, san che dxuzétaje' guna' da zria na lawe' cugu lá'azxa, da na' dxun na le' ba xen. 19 Nácale benne' xala ne la chul-la. ¿Nula da naca na blaudxa, guna' na', u cugu lá'azxa na' da dxucá'ana na lá'azxa guna' na'? 20 Che nu benne' dxuzétaje' cugu lá'azxa, quegaze cugu lá'azxa dxuzétaje', san cá'anqueze dxuzétaje' ca naca da zria lawe na. 21 Bénnea' dxuzétaje' xudau', quegaze xudau' na' dxuzétaje'. Cá'anqueze dxuzétaje' Dios zue' lataj na'. 22 Cá'anqueze benne' dxuzétaje' xabáa, dxuzétaje' lataj naga zria Dios, ne Díósqueze, Bénnea' zrię' lataj na' dxuzétaje'.

23 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxunézrujle cheę xudau' tu cue' cheę da chi cue' cheę xixruj weaj, ne cheę bínnedu ca' cheę anís, ne cheę cumín. Quebe dxunle da zaj naca na blaudxa da zaj zua na lu da nadxixruj bea na, ca naca cheę gácale xrlátaje, ne cheę xexache lázrele le sa' ljwézrele, ne cheę chéajlele cheę Dios. Da caní zaj naca na da dxun na ba xen gunle, ne quebe gusanle da ca' ba dxunle. 24 La chul-la nácale, ne dxaca lázrele cu'ule benne' neza. Dxecá'ale da naca ca tu bé'adau', be zrua lawe' da dxí'ajle, na' quebe dxeque be'ele dxí'ajle da naca ca tu camello, be dxelaga benneache.

25 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca zaj naca zriga', ne xé'ena da dxíbele cúzreze na. Lu'ule na quebe dxíbele. Caní nácale lawe' da lu lázrdaule nácale ca gubán, ne benne' dxucude. 26 Benne' fariseo la chul-la. Nedxu le quibe lu'ule zriga', ne xé'ena, na' cá'anqueze xegá'ana chawe' cúzrela.

27 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca tu ba chiche da nalá na xrtante cúzrela, na' lu'ule na nazratę na zrita cheę benne' gate', ne

xúgute da sgute. <sup>28</sup> Ca'an nácale le'e. Cúzrela nala'le ca benne' xlátaje, na' lu lázrdaule nazrate na da wen lazre', ne da calela da dxunle.

<sup>29</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxucá'anale cháwedau' ba ca' naga zaj nagache benne' ca' buluchálaje' waláz chee Dios, ne dxuele lechítaje lu'a chee benne' xrlátaje ca'. <sup>30</sup> Dxennale: "Chela netu' ba zúantu' gate na' gulezrá' xra xrtantu' ca', quebe gúcalentu' benne' ca' belutię' benne' ca' buluchálaje' waláz chee Dios." <sup>31</sup> Gate dxennale ca', le'e dxexúnbeaquezle nácale zri'ine zre sua benne' ca' belutię' benne' ca' buluchálaje' waláz chee Dios. <sup>32</sup> Dxusexúzrele dxunle ca da gulezú lau belún xra xrtáule ca'.

<sup>33</sup> 'Bę snia nácale, ne xrtia bę snia. ¿Ájazra gunle chee gáchele lu da zi' da xa' chee lataj ba xa'? <sup>34</sup> Chee le na' neda' sel-la' chee benne' ca' xuluchálaje' waláz chee Dios, ne benne' sina ca', ne benne' ca' xulusédenę' le'e. Lé'eqeze gútele, ne gudá'le xaga béguaj bal-la benne' ca', na' xeballe' gunle le' zi' lu xudau' ca', na' gau zi' xúzrele le' tu xezre xetú xezre. <sup>35</sup> Ca'an gaca, le'e bágale zria chee xel-la' gute chee xúgute benne' xrlátaje ca' belute xra xrtáule ca', gate guzú lau na nu bęte Abel, benne' xrlátaje, ne naga bzrintę bétele Zacarías ládujla naga zua lataj lá'azxa chee xudau' ne lataj naga dxuluzezxe' bę xíxre'du ca', bę dxelegú'ę lu cugu chee Dios. <sup>36</sup> Da li dxapa' le'e, bėnneache zaj zre'ę na'a xeleguę' zria chee xúgute da caní.

*Jesús dxebezre' chee xezre Jerusalén*

*(Lc. 13.34-35)*

<sup>37</sup> Nadxa gunná Jesús:

—Jerusalén, Jerusalén, le'e na' dxútele benne' ca' dxuluchálaje' waláz chee Dios, ne dxuzríale xiaj benne' gubáz ca' dxesel-la Dios naga zúale. Zane' lásatę guca lazra' gutupa' zri'inele chia' ca dxun bedxuj, dxutúpaba' be dxé'enedau' zran xrílabá', san quebe guca lázrele. <sup>38</sup> Le nna'xque na'a, lízrele xelexegá'ana na dácheze, <sup>39</sup> lawe' da dxapa' le'e, québedxa lé'ele neda' cadxa zrin zra nnale: La'azxa naca bėnnea' ze'ę waláz chee Xránadxu.

## 24

*Jesús dxenné' wabía xi' xudau'*

*(Mr. 13.1-2; Lc. 21.5-6)*

<sup>1</sup> Nadxa bedxúaj Jesús xudau', na' dxácatę dxexedxúaje' na', gulebiga benne' ca' dxusédenę' lau Jesús, ne gulezú lawe' dxuluchálajlęne' Le' ca naca chee xudau' na'. <sup>2</sup> Bechebe Jesús:

—¿Dxelé'ele xúgute da caní? Da li dxapa' le'e, netú xiaj caní quebe xegá'ana zeajzria cuzru ljwezre na. Ca naca na cuía xi na.

*Ca naca da xelunna bea na ba za zra bzebe*

*(Mr. 13.3-23; Lc. 21.7-24; 17.22-24)*

<sup>3</sup> Nadxa xjaque' lu xi'a naga zaj ze xaga olivo, na' gate dxę' Jesús na', benne' ca' dxusédenę' belezrine' lau Le', ne bagácheze buluchębe' Le':

—Gunná netu'. ¿Bata gaca da na'? ¿Bi gunna bea na gate zrin zra xela'u, ne gate cheajsę chee xezr la xu nigá?

<sup>4</sup> Nadxa Jesús guzre' benne' ca':

—Le guxúe cuínale chee quebe nu si xę le'e. <sup>5</sup> Benne' zan xelexé'ę. Xelún lazre' xelenné' zaj naque' Cristo, na' xelexí xę'ę benne' zan. <sup>6</sup> Wenle le'e dxaca wedil-la, ne waca wedil-la gáteteze na'. Quebe zrébele, lawe'

da dxal-la' xelaca da caní. Da caní quebe zaj naca na chee zra bzebe. <sup>7</sup> Tu cue' xezr la xu tíl-lalę na xetú cue' xezr la xu, ne tu xezre tíl-lalę na xetú xezre. Wata' gubina', ne welata' xízrawe' ca', ne wazrú' gáteteze na'. <sup>8</sup> Xúgute da caní zaj naca na naga dxezú lau ca da xelezaca bėnneache.

<sup>9</sup> Nadxa xuludėe' le'e naga si sácale, na' bál-lale welútequeze'. Ca naca bėnneache xeceuídenę' le'e lawe' da dxunle da naca chia'. <sup>10</sup> Lu zra na' benne' zan quėbedxa xelėajle'e chia', na' xeceuídenę' le sa' ljwezre', ne xuludėe' le sa' ljwezre' lu na' benne' guledábague' le'. <sup>11</sup> Welelá' benne' zan benne' węn lazre'. Xelennė' dxuluchálaje' waláz chee Dios, na' xelezi xę'e benne' zante. <sup>12</sup> Lawe' da gáta'le'e da calęla, benne' zan quėbedxa xelezrí'ine' le sa' ljwezre'. <sup>13</sup> Bėnnea' zua chache' ca zrintę zra bzebe, la bėnnea'. <sup>14</sup> Ca naca dizra' chawe' nigá ca nna bea Dios, zralaj na du gabí'i xezr la xu chee xelén ca naca benne' chee xúgute cue' xezr la xu, na' te na' cheajsė chee xezr la xu nigá.

<sup>15</sup> Benne' gulabe' da nigá dxal-la' chėjni'ine'. Daniel, benne' bchálaje' waláz chee Dios, bzujaje' ca naca chee tu da dxezra' a Dios, da dxuxrinnaj na. Gate lé'ele da nigá zua na lataj lá'azxa chee xudau', <sup>16</sup> nadxa benne' zaj zre'e xezre ca' zaj nababa Judea dxal-la' xuluzrúnnuje', ne chjaque' lu xi'a zren. <sup>17</sup> Che tu benne' ze' chju'u chee', quebe dxal-la' xexétaje' bi cheajxelėaje' lu xu'u. Dxal-la' guzrúnnuje'. <sup>18</sup> Benne' zue' le'e xixre' quebe dxal-la' xezrine' lize' cheajxezri'e xicha chee' da gácue'. <sup>19</sup> Edxugúa nu'ula ca' zaj zre'e lu zra na' zaj zue' zi'i, ne nu'ula ca' zaj nu'e bidau', ne dxelázrebe'. <sup>20</sup> Le naba Dios quebe gun na ba xen guzrúnnuje' beu' zaga, ne quegá lu zra dxupá'anale, <sup>21</sup> lawe' da che ca' gaca na, na' da zréntędxa da xelezi saca bėnneache ca da quebe ne xelezaque' ca guzú laute zua xezr la xu nigá, ne quėbedxa bi xelezaque' caní ca te chee da nigá. <sup>22</sup> Che Dios quebe guzáchie' zra ca', na' netú quebe nu la. Guzáchie' na chee gácalęne' benne' ca' bache nabėaje' chee'.

<sup>23</sup> Chee le na', quebe chėjlele che nu xę le'e: "Le nna'xque, nigá zua Cristo", u che nu xę le'e: "Le nna' xque, na'la zue'." <sup>24</sup> Caní dxapa' le'e lawe' da xelėlá' benne' zan, benne' guzrí xę'e, na' xelennė' zaj naque' Cristo, u zaj naque' benne' dxuluchálaje' waláz chee Dios, na' da zrentę xululė'ene', ne xelunę' xel-la' waca zren ca' chee xelezi xę'e benne' ca' ba nabėaj Dios. Caní xelunę' che xelezėquene'. <sup>25</sup> Ba bchálajlena' le'e caníqueze na'a quebe ne gaca na. <sup>26</sup> Chee le na', che nu xę le'e: "Le nna'xque, na' zue' le'e xixre'", quebe chėjle na', u che nu xę le'e: "Le nna'xque, lu xu'u nigá zue'", quebe chėjlele. <sup>27</sup> Ca dxun tu xesa guziu', dxępe na naga dxalaj gubizra, na' dxelė'edxu na naga dxebía gubizra, ca'an gaca gate xida' neda', Benne' Gulje' Bėnneache. <sup>28</sup> Gáteteze de tu da nate, na' dxelexezraga laba ca'.

*Ca da gaca gate ba zua xelá' Benne' Gulje' Bėnneache*  
(Mr. 13.24-37; Lc. 21.25-33; 17.26-30, 34-36)

<sup>29</sup> Na' gunná Jesús:

—Gate bache guca zra na' gate xelezaca zi' bėnneache, nadxa gubizra chul-la na naga zua na, na' beu' quebe gusení na, na' belaj xelexruj na, na' xelezrízequeze ca naca da zaj naca na szren da dxeledá' lu be'. <sup>30</sup> Nadxa lé'ele zran xabáa da gulė'e na ba zua xelá'a neda', Benne' Gulje' Bėnneache, na' ca naca bėnneache zaj zre'e xezr la xu xelebėzrequeze'. Nadxa xelėlé'ene' neda', Benne' Gulje' Bėnneache, zezá'a lu beuj zran

xabáa, zúale neda' dutē xel-la' dxenná bea, ne da xabáa. <sup>31</sup> Nadxa sé-laqueza' gubáz chee xabáa chia' ca', na' xulucuézre' zizraj lúzuba' chee xuluxutupe' benne' ca' ba nabéaja' chia' dapa saca chee xezr la xu nigá, ne du ca naca xezr la xu nigá.

<sup>32</sup> 'Le gusede ca naca da dxulé'e xaga higo. Gate dxelexedxé'ene zruze na, ne dxezría na laga' dxe'ene, ba nézele ba za xaca beu' la. <sup>33</sup> Cá'anqueze gate lé'ele dxelaca xúgutē da caní, dxal-la' nézele gágutē ba zua cheajsé chee xezr la xu, ne ba zua gaca na. <sup>34</sup> Da li dxapa' le'e, xúgutē da caní xelaca na nédxula gate quebe ne xelate bénneache zaj zre'e lu zra na'. <sup>35</sup> Xabáa ne xezr la xu weledé chee na. Dizra' chia' quebe te chee na.

<sup>36</sup> 'Gate za zra na', ne bila zra na', quebe nu neze, quegá gubáz chee xabáa zaj zre'e xabáa, ne neda', Zri'ine Dios. Tuze Xradxu Dios nézene' gate zrin zra na'.

<sup>37</sup> 'Ca guca lu zra ca' gate zua Noé, cá'anqueze gaca na gate xelá'a neda', Benne' Guljē' Bénneache. <sup>38</sup> Ca lu zra ca' gate quebe ne gun Dios nisa xiuj da guzría xi na bénneache, gulezrá' bénneache ca' dxelé'aj dxelawē', ne dxuluchaga ne'e, ne dxulunézruje' zrí'ine' ca' chee xuluchaga na'be', cadxa bzrin zra guxú'u Noé lu da zren na' dxdad lawe' nísadau' da nazí le na arca. <sup>39</sup> Quebe guleque bé'ene' ca da dxal-la' gaca na, cadxa bzrin zra guca xiuj na', ne bēte na ca naca benne' ca'. Cá'anqueze gaca gate xelá'a neda', Benne' Guljē' Bénneache. <sup>40</sup> Ca lu zra ca' xelezrá' chupa benne' biu le'e xixre'. Tuē' xeché'e, na' xetúē' xegá'ane'. <sup>41</sup> Xelezrá' chupa nu'ula dxelútue'. Tuē' xeché'e, na' xetúē' xegá'ane'.

<sup>42</sup> 'Le sua le'e ban lazre' lawe' da quebe nézele bi zra xelá'a neda', Xránale. <sup>43</sup> Da nigá dxal-la' nézele: Che tu xrane xu'u nézene' bi zra chizrela zrin gubán, waxíchajē' bchigala, ne quebe gu'e lataj xusalaj benne' gubán lizre' chee cuane'. <sup>44</sup> Chee le na', le sua le'e ban lazre' lawe' da xelá'a neda', Benne' Guljē' Bénneache, gate québela dxéquele ca'.

*Benne' wēn zrin li lazre', ne benne' wēn zrin quebe naque' li lazre'*  
(Lc. 12.41-48)

<sup>45</sup> Na' gunná Jesús:

—¿Nuzra na' benne' wēn zrin li lazre' ne dxéajni'ine', bēnea' xranē' dxucá'analēne' le' benne' zaj zre'e lizre' chee gunézruje' da xelawē' gate zrin zra chee na? <sup>46</sup> Ba neza naca na chee benne' wēn zrin na', gate xezrín xranē', lé'ene' le' dxunē' ca naca da nabague'. <sup>47</sup> Da li dxapa' le'e, xranē' gucá'analēne' le' ca naca da nape'. <sup>48</sup> Che benne' wēn zrin na' gaque' benne' wēn da calela, ne guéquene' quebe xelá' ze xranē', <sup>49</sup> ne che su lawe' gusaca zi'e xezícala benne' wēn zrin ca', ne xi'aj gágulēne' benne' dxelezuzre', <sup>50</sup> nadxa xranē' xezrine' zra gate québela dxebeze'. Gaca na zra quebe nézene', <sup>51</sup> na' gusaca zi'le'e le'. Chugue' chee' gaque' tuze benne' ca' dxelunē' láweze da xrlátaje. Cuezre', ne xáguxa'atē lazxe'.

## 25

*Da dxulé'e na ca naca chee chi nu'ula cuide'*

<sup>1</sup> Gunná Jesús:

—Ca gaca chee benne' xelu'e naga dxenná bea Dios xabáa naca na ca da guca chee chi nu'ula cuide' caní. Gulequé'e xi' chee' ca', chee chjaque' laní chee wechaga na', dxelebeze' bátala xelá' benne' wechaga na'. <sup>2</sup> Gazzu' nu'ula caní gulaque' gat lazre', na' xegazxu' nu'ula caní

zaj naque' ban lazre'. <sup>3</sup> Nu'ula ca' quebe zaj naque' ban lazre' belú'e xi' chee' ca', san quebe belú'e da za zxezxe na da zelegué'e lu xi' chee' ca'. <sup>4</sup> Nu'ula ban lazre' ca' belú'e xi' chee' ca', ne da za zxezxe na da zelegué'e na. <sup>5</sup> Lawe' da guzré benne' wechaga na', na' gulaca wase ca zaj naque', na' xúgute' gulasie'. <sup>6</sup> Dxela ben tu chi' benne' dxebezre xe'e, dxenné': "Ba za' wechaga na'. Le dxuaj si' lu na'le le'." <sup>7</sup> Xúgute nu'ula cuide' caní gulase', na' gulezú lawe' bulugale' xi' chee' ca'. <sup>8</sup> Nadxa gazxu' nu'ula ca' quebe zaj naque' ban lazre' gulé'e gazxu' nu'ula ban lazre' ca': "Le gunna late' da za zxezxe na cheentu', lawe' da ba dxelexula xi' cheentu'." <sup>9</sup> Nu'ula ban lazre' ca' belexechebe': "Quebe gaca, lawe' da che gúnnantu' late' cheele, quebe gaca na da dxechínnentu' netu', ne da dxechínnele le'e. Le chjácala naga dxutié' na, ne le cheajxri' cheele." <sup>10</sup> Dxácaté zjaca nu'ula ca' quebe zaj naque' ban lazre', na' bezrín wechaga na'. Nu'ula ban lazre' ca' gulu'e nen le' lu laní chee' wechaga na', na' bsezxuj dxa xu'u na'. <sup>11</sup> Gudé na' belexezrín xegazxu' nu'ula ca', na' gulenné': "Xran, Xran, gusalaj chú'untu'." <sup>12</sup> Le' bechebe': "Cabata'. Da líqueze quebe núnbe'a le'e."

<sup>13</sup> Nadxa Jesús guzre' benne' ca':

—Le sua le'e ban lazre', lawe' da quebe nézele bi zra, u bi xel-la' xel'a neda', Benne' Gulje' Bénneache.

*Da dxulé'e na ca naca chee' benne' gulez'é dumí*

<sup>14</sup> Na' gunná Jesús:

—Ca gaca chee' benne' xelu'e naga dxenná bea Dios xabáa, naca na ca da guca gate tu benne' zue' chee' se'e chéaje' zitu', na' gunné' bi wen zrin chee' ca', ne bcá'analé' bi wen zrin ca' dumí chee'.

<sup>15</sup> "Tu bi ca' bnéruje' gazxu' cue' dumí, na' xetube' bnéruje' chupa cue' dumí, na' xetube' bnéruje' tu cue' dumí. Bnéruje' chee' tu tube' ca da xelezéquebe' xuluchínebe' na. Nadxa guzé'e zéaje' zitu'. <sup>16</sup> Bi wen zrin na' guzi'be' gazxu' cue' dumí bchínebe' dumí na', na' bezi'be' xegazxu' cue' dumí. <sup>17</sup> Cá'anqueze bi wen zrin na' guzi'be' chupa cue' dumí, bezi'be' xechupa cue' dumí. <sup>18</sup> Bi wen zrin na' guzi'be' tu cue' dumí na' guxíajbe', ne bcáchebe' dumí chee' xránabe' tu lu xedxu da benbe' lu xu.

<sup>19</sup> Zane' iza ba guca gate bezrín xrane bi wen zrin ca', na' guzú lawe' dxezi'e da bde'e lu na' bi wen zrin ca'. <sup>20</sup> Nedxu bzrin bi wen zrin na' guzi'be' gazxu' cue' dumí, na' bnérujbe' xránabe' xegazxu' cue' dumí, na' gúzrebe' le': "Xran, bennu' neda' gazxu' cue' dumí. Nigá de xegazxu' cue' da bezi'a nen dumí chiu'." <sup>21</sup> Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zrédxaqueze. Guxú'u naga zua' neda', ne gubélé'e." <sup>22</sup> Gudé na' bzrin bi wen zrin na' guzi'be' chupa cue' dumí, na' gunabe': "Xran, bennu' neda' chupa cue' dumí. Nigá de xechupa cue' da bezi'a nen dumí chiu'." <sup>23</sup> Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zrédxaqueze. Guxú'u naga zua' neda', ne gubélé'e." <sup>24</sup> Gate bzrin bi wen zrin na' guzi'be' tu cue' dumí, na' gúzrebe' xránabe': "Xran, nezda' nacu' benne' dxenné' xue, ne dxezi'u da quebe guzu', ne dxexeca'u da quebe besiu'. <sup>25</sup> Chee' le' na' bzreba', na' guxá'a xeajáchia' dumí chiu' lu xu. Nigá de da naca chiu'." <sup>26</sup> Na' xránabe' guzre' lebe': "Nacu' bi wen zrin calela, ne zrawéde. Ba nézqueznu' dxezi'a da quebe guza', ne dxexecá'a da quebe besia'. <sup>27</sup> Chee' le' na' la xju'u

dumí chia' na' lu na' benne' dxelíruje' chee dumí da dxuluchínene', na' gate za' neda', na' xezi'a da naca chia' nen da belezí'e." <sup>28</sup> Nadxa guzre' benne' ca' zaj zre'e na': "Le xecá'a dumí na' da núxrube', ne le gunezruj na bénnea' nape' chi cue' dumí. <sup>29</sup> Benne' nape' wazidxe' da zrendxa, na' benne' quebe nape', ca late' da du na' nape' wecá'a na. <sup>30</sup> Ca naca bi wen zrin nigá, bi wedegún, le xebéaj-be' chalé'ajla naga naca chul-la, naga cuézrebe', ne xáguxa'ate lázxabe'."

*Ca gun Dios gate guchi'e chee bénneache zaj zre'e xezr la xu*

<sup>31</sup> Na' gunná Jesús:

—Gate xelá'a neda', Benne' Gulje' Bénneache, ne Benne' Wenná Bea, nen ca naca gubáz chee xabáa chia', na' cué'queza' lataj naga nna be'a, da naca na da xabáa. <sup>32</sup> Na' bénneache chee xúgutę cue' xezr la xu xelexezrague' lawa' neda', na' xebéaja' cha chee' ca dxun benne' dxuxúę zrila'. xebéaje' chíbudu ca' ládujla zrila' ca'. <sup>33</sup> Guzrá'a benne' ca' zaj naca zrila' chia' chalá'a xabéla chia', na' benne' ca' zaj naca ca chíbudu ca' guzrá'a le' chalá'a xéglala chia'. <sup>34</sup> Nadxa xapa' benne' ca' zaj zra' chalá'a xabéla chia': "Le da le'e, nácale xrlátaje lau Xra'. Le chu'u naga dxenná bea Xra', lataj na' bcueze' chee gate na' bene' xezr la xu nigá. <sup>35</sup> Caní dxaca lawe' da guduna', na' bgágule neda'. Gubíleda', na' bėnnale da gu'a. Gudá' ca tu benne' xu'e neza, na' gulu'ule neda' lízrele. <sup>36</sup> Bxázzjeda' zra lana' gácu'a, na' bgácu'e neda'. Quebe chawe' guzúa', na' bedajná bale neda'. Guxu'a lizre xia, na' bedajná bale neda'." <sup>37</sup> Nadxa benne' xrlátaje caní xelenné': "Xran, ¿bata blé'entu' Lue' dxedunu', na' bgáguntu' Lue'? ¿Bata blé'entu' Lue' dxebilenu', na' bėnnantu' da gu'u? <sup>38</sup> ¿Bata blé'entu' Lue' ca tu benne' xu'e neza, na' gulú'untu' Lue' lízrentu'? ¿Bata blé'entu' Lue' dxexázzjenu' zra lanu', na' bgácuntu' Lue'? <sup>39</sup> ¿Bata bėnentu' quebe chawe' zu', u xu'u lizre xia, na' bedajná bantu' Lue'?" <sup>40</sup> Neda' xechęba': Da li dxapa' le'e, ca da bęnle chee bėnnedu caní, benne' zaj naca dxexruj lazre', chee néda'queza' bęnle ca'.

<sup>41</sup> 'Nadxa neda', Benne' Wenná Bea, xapa' benne' ca' zaj zra' chalá'a xéglala chia': Le cuasa cuita' neda', le'e, nácale wen da calęla lau Xra'. Le chjaca lu xi' chee lataj ba xa' da nabeza na chee da xriwe', ne chee gubáz chee na ca'. <sup>42</sup> Caní dxaca lawe' da guduna', na' le'e quebe bėnnale da gawa'. Gubíleda', na' quebe bėnnale da xí'aja'. <sup>43</sup> Gudá' ca tu benne' xu'e neza, na' quebe gulu'ule neda' lízrele. Bxázzjeda' zra lana' gacua', na' quebe bgácu'e neda'. Quebe chawe' guzúa' ne guxu'a lizre xia, na' quebe bedajná bale neda'. <sup>44</sup> Nadxa benne' ca' xelęqueze' neda': "Xran, ¿bata blé'entu' Lue' dxedunu', u dxebilenu', u xu'u neza, u dxexázzjenu' zra lanu', u quebe chawe' zu', u xu'u lizre xia, na' quebe gúcalęntu' Lue'?" <sup>45</sup> Neda', benne' wenná bea, xechęba': Da li dxapa' le'e, lawe' da quebe bi bęnle chee bėnnedu caní, benne' zaj naca dxexruj lazre', quebe bi bęnle chee néda'queza'. <sup>46</sup> Benne' caní chjácáqueze' lataj ba xa', na' benne' xrlátaje ca' chjaque' lu xel-la' nabán da zeajlí canna.

## 26

*Dxelíłaje' ájala xelęle' Jesús*

*(Mr. 14.1-2; Lc. 22.1-2; Jn. 11.45-53)*

<sup>1</sup> Gate bexuzre bchalaj Jesús caní, na' guzre' benne' ca' dxusédene':

<sup>2</sup> —Ca ba nézquezle, xechupa zraze na'a súadxu Laní Pascua, da naca na zra dxuluxucube benne' judío ca guca gate Dios bebéaje' bènneache chee' lu xezr la xu Egipto, na' neda', Benne' Gulje' Bènneache, xuludé'e neda' lu na' benne' xuludé'e neda' naga béguaj.

<sup>3</sup> Ca lu zra na' benne' xíchaje ca' chee' bxruze ca', ne benne' dxuluxuzájle'e da bdxixruj Moisés, ne benne' gula sina ca' chee' judío ca', belezrague' chale'aj chee' xu'u zaca chee' Caifás, bxruze blau. <sup>4</sup> Na' belílaje' ájala xeléle' Jesús lu da wen lazre' chee' xelúti'e Le'. <sup>5</sup> Gulenné':

—Quebe gundxu na lu zra laní nigá, chee' quebe xeledábaga benne' ca' dxi'u.

*Tu nu'ula dxegu'e Jesús da dxelá zixre*

*(Mr. 14.3-9; Jn. 12.1-8)*

<sup>6</sup> Zua Jesús xezre Betania lizre Simón, bènnea' gü'é'ene' we' guzru'. <sup>7</sup> Bzrin tu nu'ula naga zua Jesús, nu'e tu zruágadau' da naca na xiaj alabastro, ne nazrate na da dxelá zixre da zácale'e na. Gate na' dxe' Jesús ga dxelawé', na' nu'ula nigá gulu'e na xichaj Jesús. <sup>8</sup> Gate belelé'e benne' ca' dxusede Jesús da nigá, na' belezré'e, ne gulezú lawe' dxelenné':

—¿Bizr chee' na' guzría xi' da nigá? <sup>9</sup> Da nigá waca la gudá'u na sí'adxu da zrente, chee' gácale'dxu benne' xache' ca'.

<sup>10</sup> Jesús benne' da nigá, na' guzre' benne' ca':

—¿Bizr chee' na' dxunle nu'ula nigá zede? Da nigá bene' naca na tu da xrlátaje. <sup>11</sup> Benne' xache' ca' tu zrázqueze' ládujla le'e, na' neda' quegá tu súaleza' le'e. <sup>12</sup> Ca naca da ben nu'ula nigá, gulu'e da zixre na' bel-la' dxen chia', naca na da xucá'ana chawe na neda' chee' zra gachia' lu xedxu ba. <sup>13</sup> Da li dxapa' le'e, gáteteze xuluchálaje' dizra' chawe' chia' nigá du gabí'i xezr la xu, na' zralajqueze ca da ben nu'ula nigá, chee' cheajlesá lazre' bènneache le'.

*Judas dxechebe lazre' gudé' Jesús*

*(Mr. 14.10-11; Lc. 22.3-6)*

<sup>14</sup> Nadxa tu benne' chazrinnu ca' dxusede Jesús, bènnea' le' Judas Iscariote, guxíaje' xeajchálajlene' benne' xíchaje ca' chee' bxruze ca'. <sup>15</sup> Guzre' le':

—¿Ájate' gúnnale neda' che ca' gudéa' Jesús lu na'le?

Nadxa benne' ca' gulízruje' le' chi dxua dumí plata. <sup>16</sup> Ca lu zra na' guzú lau Judas dxexílaje' ájala gune' gudé'e Jesús lu na' benne' ca'.

*Da dxágudxu chee' xucúbedxu ca guca gate gute Xránadxu*

*(Mr. 14.12-25; Lc. 22.7-23; Jn. 13.21-30; 1 Co. 11.23-26)*

<sup>17</sup> Zra nedxu chee' laní na' gate na' dxelawe' xeta xtila da quebe nachixre cua zichaj chee' na, benne' ca' dxusede Jesús belezrine' lau Le', na' buluchebe' Le':

—¿Gazra dxaca lazru' gucuézentu' da gágudxu chee' laní pascua chee' benne' judío?

<sup>18</sup> Jesús guzre' le':

—Le hjaca lu xezre na', naga zua lizre tu benne', na' le xe'e: “Bennea' dxusedene' dxi'u dxenné': Zra chia' gatia' ba zua gágute, na' lizru' lue' gawa' chee' Laní Pascua tu zren nen benne' ca' dxusededa'.”

<sup>19</sup> Benne' ca' dxusede Jesús belune' ca da gunná bé'ene' le', na' bulucueze' da xelawe' chee' Laní Pascua.



<sup>20</sup> Gate gula chizrela, na' gudxé' Jesús ga gawé' tu zren nen benne' ca' dxusédené'. <sup>21</sup> Dxácaté na' dxelawé', guzre Jesús benne' ca':

—Da li dxapa' le'e, tule le'e naca bénnea' gudéé' neda' lu na' benne' ca' dxelune' da calela.

<sup>22</sup> Nadxa benne' ca' belexewí'inele'e, na' gulezú lawé' tu tué' dxu-luchébe' Jesús:

—Xran, ¿quebe naca neda'?

<sup>23</sup> Na' bechébe Jesús:

—Bénnea' dxudé ne'e lu xé'ena tu zren nen neda', benne' na' gudéé' neda'. <sup>24</sup> Neda', Benne' Guljé' Bénneache, waxá'a naga dxal-la' gatia' ca naxúaj na lu xiche cheé Dios, san edxugúa bénnea' gudéé' neda'. Cháwedxa naca la quebe gulaj bénnea'.

<sup>25</sup> Nadxa gunná Judas, bénnea' gudéé' Jesús, dxenné':

—Benne' dxusede, ¿quebe naca neda'?

Na' bechébe Jesús, gunné':

—Awe', lue' na'.

<sup>26</sup> Dxácaté dxelawé', Jesús guqué'e xeta xtila, na' guzre' Dios: "Xcalenu'." Gudé na' bzúzruje' na, na' bnézruje' na benne' ca' dxusédené', dxenné':

—Le gagu. Da nigá naca na bel-la' dxen chia'.

<sup>27</sup> Gudé na' guqué'e tu zriga', na' guzre' Dios: "Xcalenu'", na' bnézruje' na benne' ca', dxenné':

—Le xi'aj xúgutēle da xuzru lu zriga' nigá. <sup>28</sup> Da nigá naca na dxen chia' da guzúa chacha na xel-la' wezria cube da dxun Dios. Dxen nigá lalaj na ne cheé benne' zanté cheé gunite lau Dios dul-la zaj nabaga benne' ca'. <sup>29</sup> Dxapa' le'e, québedxa xí'aja' ca naca xrise uva nigá ca zrindxa zra xí'aja' da cube tu zren nen le'e naga dxenná bea Xra'.

*Jesús dxenné' nna Pedro quebe núnbe'e Le'*

*(Mr. 14.26-31; Lc. 22.31-34; Jn. 13.36-38)*

<sup>30</sup> Ca gudé belul-le' cheé Dios, na' gusiá'que' zjaque' lu Xi'a Xaga Olivo Ca'. <sup>31</sup> Nadxa Jesús guzre' benne' ca':

—Xúgutēle le'e gusán lázrele neda' na'a zre', lawe' da naxúaj na lu xiche cheé Dios, dxenné': "Gutia' benne' dxuxúé' zrila', na' zrila' ca' xelase dínna'ba'." <sup>32</sup> Gate te xebana' neda', cha'a neda' ga nababa Galilea nédxudxa ca le'e.

<sup>33</sup> Nadxa bechébe Pedro:

—Lácala xúgutē benne' caní xulusán lazre' Lue', quebe guna' neda' ca'.

<sup>34</sup> Nadxa Jesús guzre' le':

—Da li dxapa' lue', lu zre' na'a zre' nédxudxa gate cuezre xjeaj, lue' wannáu' chunna lasa quebe núnbe'u neda'.

<sup>35</sup> Pedro guzre' Jesús:

—Lácala gatia' neda' tu zren nen Lue', québequeze nnia' quebe núnbe'a Lue'.

Cá'aqueze gulenná xúgutē benne' ca' dxusede Jesús.

*Jesús dxuchálajlęne' Dios naga zaj zxe' xaga olivo ca' nazí le na Getsemani'*

*(Mr. 14.32-42; Lc. 22.39-46)*

<sup>36</sup> Nadxa bzrin Jesús nen benne' ca' dxusédené' tu lataj nazí le na Getsemani', na' guzre' le':

—Le cue'e nigá dxácaté cha'a neda', guchálajlęna' Dios.

<sup>37</sup> Jesús guché'e Pedro, ne dxúpate zri'ine Zebedeo, na' guzú lawe' bewí'inele'ene' ne guzúale'e stebe. <sup>38</sup> Nadxa guzre' benne' ca':

—Dxewí'ine lázrele'a dxunte na gute na neda'. Le xegá'ana le'e nigá, ne le sua ban lazre' tu zren nen neda'.

<sup>39</sup> Nadxa Jesús guzé'e zéaje' xelate' caníladxa, na' gute' sudxú'ala lu xu, ne bchálajlene' Dios, dxenné':

—Xrae, chela gaca, bde na chalá'ala quebe gaca chia' ca naca xel-la' gute caní da naca na ca tu da sla' da xí'aja'. Quebe gaca na ca dxaca lazra' neda'. Gaca na ca dxaca lazru' Lue'.

<sup>40</sup> Nadxa bezrín Jesús naga zaj zra' benne' ca' dxusédené', na' blé'ene' benne' ca' dxelásie', na' guzre' Pedro:

—¿Quebe gúcale le'e quíchale bchigala nen neda' tu chí'idau'ze? <sup>41</sup> Le nnaze, ne le guchálajle Dios chee' quebe gun zréaje da xriwe' le'e. Da li bénne'du xu'ule dxaca lázre'le'e na, san lu bela' dxen chee'le dxate ni'a na'le.

<sup>42</sup> Da gudxupe' lasa guxíaj Jesús bchálajlene' Dios caní:

—Xrae, che quebe gaca te chalá'ala ca naca da dxal-la' saca', gaca na ca dxaca lazru' Lue'.

<sup>43</sup> Ca gudé na' bezrine', ne belé'ene' benne' ca' dxusédené', dxelásie' lawe' da ba dxeleZRude' lawe' dxelaca wásele'e. <sup>44</sup> Bca'ane' benne' ca', guzé'e zéaje' bchálajlene' Dios da guxunne' lasa, na' gunnáqueze' ca da ba gunné' ca'an bache. <sup>45</sup> Nadxa bezrine' naga zaj zra' benne' ca' dxusédené', na' guzre' le':

—Le gase na'a, ne le xezí' lazre'. Ba bzin zra gate neda', Benne' Gulje' Bénneache, tea' lu na' benne' dul-la ca'. <sup>46</sup> Le chasa, ne le chu'u. Ba za bénnea' dxudé' neda'.

*Dxeleché'e Jesús ca tu benne' wen da zrinnaj*

(Mr. 14.43-50; Lc. 22.47-53; Jn. 18.2-11)

<sup>47</sup> Ne dxuchálajte Jesús na' gate bzin Judas. Naque' tu benne' chazrinnu ca', na' zá'acale benne' zante le', benne' zaj nu'e xia ca' ne xaga ca'. Benne' caní zaj naque' benne' gulesel-la benne' xíchajé ca' chee' bxruze ca', ne benne' gula sina ca' chee' judío ca'. <sup>48</sup> Judas, bénnea' dxudé' Jesús, ba blé'ene' benne' ca' ca tu da gune' da gulé'e na nu na' naca Jesús. Gunné':

—Bénnea' gunupa' neda', Le' na'. Le che'e ca tu benne' wen da zrinnaj.

<sup>49</sup> Nadxa bzin Judas lau Jesús, dxenné':

—Diuzre, Benne' dxuséde.

Na' bnupe' Jesús.

<sup>50</sup> Bechebe Jesús:

—Ljwezra', ¿bi chee' za'u?

Nadxa gulebiga benne' ca', gulele' Jesús, na' beleché'e Le' ca tu benne' wen da zrinnaj.

<sup>51</sup> Tu benne' ca' dxuséde Jesús guléaje' xia chee', ne guchugue' chalá'a naga bi wen zrin chee' bxruze blau. <sup>52</sup> Nadxa Jesús guzre' le':

—Begú'u xia chiu' lu zre na, lawe' da xúguté benne' dxelute benne' nen xia nalá, cá'anqueze gate le'. <sup>53</sup> ¿Quebe nézenu' wazéqueda' neda' naba' Xra', na' Le' sél-late' na'a naga zua' da zandxa ca chazrinnu cue' gubáz chee' xabáa, zaj naque' zánete' tu tu cue'? <sup>54</sup> Na'a che ca'an guna', ¿ájazra gaca gaca na ca da naxúaj na lu xiche chee' Dios, da dxenná na caní dxal-la' gaca na?

<sup>55</sup> Nadxa guzre Jesús benne' ca':

—Le'e bdxuajle nen xia nalá ca', ne nen xaga ca' chee quélale neda', dxunle neda' ca tu benne' gubán. Xúgute zra gudxe'a neda' lu xudau' dxusédeda' le'e, ne quebe gudélale neda'. <sup>56</sup> Xúgute da caní dxaca na chee gaca na ca da gulenná benne' ca' buluchálaje' waláz chee Dios, da na' naxúaj na lu xiche chee Dios.

Nadxa xúgute benne' ca' dxuséde Jesús bulucá'ane' Le' tuzé', buluxu-zrúnnuje'.

*Dxezrín Jesús lau benne' ca' chee xu'u lawe' blau chee judío ca'*  
(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup> Benne' ca' gulele' Jesús guleché'e Le' lau Caifás, bxruze blau, ga na' zaj nazraga benne' ca' dxuluxuzájle'e da bdixruj be'e Moisés, nen benne' gula sina ca'. <sup>58</sup> Pedro zéaje nawe' Jesús zítu'la, na' bzrine' chale'aj chee lizre bxruze blau, na' guxú'e, ne gudxé'e tu zren nen bi xa'aga chee lé'ene' ájala xexuzre da dxaca na'.

<sup>59</sup> Benne' xíchaje ca' chee bxruze ca', ne benne' gula sina ca', ne xúgute benne' ca' chee xu'u lawe' blau chee judío ca' belíajé' ájala xuluzría xi'e Jesús, lácala naca na da wen lazre', chee xezezéquene' xuludé'e Le' gatié'.

<sup>60</sup> Quebe bi belezreñe', lácala belezrín benne' zan benne' gulenné' da wen lazre' chee Jesús. Naga xeajsete na belezrín chupa benne' wen lazre'.

<sup>61</sup> Dxelenné':

—Benne' nigá gunné': “Wazéqueda' neda' guchínnaja' xudau' chee Dios, na' xexuna' na lawe' chunna zraze.”

<sup>62</sup> Nadxa guxasa bxruze blau, na' guzre' Jesús:

—¿Quebe bi dxexechebu'? ¿Bizra da dxelenné' chiu' lue'?

<sup>63</sup> Jesús guzúe' zrize. Nadxa bxruze blau na' guzre' Le':

—Lu La Dios ban dxenná be'eda' lue' nneu' da li. Gunná che nacu' lue' Cristo, Zri'ine Dios.

<sup>64</sup> Jesús guzre' le':

—Nácaqueza' ca dxennáu' lue'. Cá'anqueze dxapa' le'e, walé'ele neda', Benne' Gulje' Bénneache, cue'a chalá'a xabela chee Dios nen xel-la' szren chee', na' xelá'a lu beuj bza chee xabáa.

<sup>65</sup> Nadxa bxruze blau gucheze' zra lane' chee blé'ene' quebe nabague' zria, na' gunné':

—Benne' nigá dxenné' schanni' chee Dios. ¿Nachínnedxadxu benne' xechebe'? Ba bénquezle le'e ca dizra' schanni' dxenné'. <sup>66</sup> ¿Bi dxennale le'e?

Benne' ca' gulenné':

—Nabague' zria, ne dxal-la' gatié'.

<sup>67</sup> Nadxa buluzré'e zrene' lau Jesús, ne belú'e Le', na' xebal-le' belegape' dxu'a lawe'. <sup>68</sup> Na' gulé'e Le':

—¿Nácaquezu' Lue' Cristo? Gunné xa'a nu be Lue'.

*Dxenná Pedro quebe núnbe'e Jesús*

(Mr. 14.66-72; Lc. 22.56-62; Jn. 18.15-18, 25-27)

<sup>69</sup> Dxácate na' dxe' Pedro chalé'ajla, na' tu nu'ula wen zrin bzrine' lau Pedro ne guzre' le':

—Cá'anqueze lue' nacu' Jesús, benne' Galilea na', tuze.

<sup>70</sup> Pedro ben chúchue' xrtizre' lávela xúgute benne' ca', gunné':

—Quebe nezda' nu chee na' dxenníu'.

<sup>71</sup> Nadxa Pedro zexíaje' chee xedxúaje' chale'aj na', na' ble'e xetú nu'ula ca' le', ne guzre' benne' ca' zaj zré'e na':

—Cá'anqueze benne' nigá dxedáleṅe' Jesús, benne' Nazaret na'.

<sup>72</sup>Xecha lasa ben chúchuḗ Pedro xrtizre', na' bzétaje' Dios, gunné':

—Quebe núnbe'a benne' na'.

<sup>73</sup>Xetú chí'idau' guca belezrín benne' zaj zre'ḗ na' lau Pedro, na' gulé'ḗ le':

—Da li, tuze nácaquezu' nen bénnea' lawe' da xel-la' dxenné' chiu' dxunna bea na lue'.

<sup>74</sup>Nadxa guzú lau Pedro dxuzría xi' cuínazqueze', ne dxuzétaje' Dios, dxenné':

—Quebe núnbeaqueza' benne' na'.

Dxácate' na' gudxezre xjeaj. <sup>75</sup>Nadxa xeajsá lazre' Pedro ca da guzre Jesús le': Nédxudxa ca cuezre xjeaj, lue' wannáu' chunna lasa quebe núnbe'u neda'. Bedxúaj Pedro na', na' gudxézrele'ḗ.

## 27

### *Dxelech'ḗ Jesús lau Pilato*

(Mr. 15.1; Lc. 23.1-2; Jn. 18.28-32)

<sup>1</sup>Gate guxaní', xúgutḗ benne' xíchaje ca' cheḗ bxruze ca', ne benne' gula sina ca' cheḗ benne' judío ca' belune' tuze dizra' ájala xelune' cheḗ xelútiḗ Jesús. <sup>2</sup>Nadxa beleché'ḗ Le' nadxéaje', ne xeajlegu'ḗ Le' lau Poncio Pilato, benne' dxenná be'e waláz cheḗ xezr la xu Roma.

### *Ca guca gate gute Judas*

<sup>3</sup>Nadxa Judas, bénnea' bdeḗ Jesús, gate guque bé'ene' ba buluzría xi'e Jesús, bexíajele'ḗ, na' bunézruje' da chi dxua dumí plata lau benne' xíchaje ca' cheḗ bxruze ca', ne benne' gula sina ca'. <sup>4</sup>Dxe'ḗ le':

—Neda' bēna' dul-la lawe' da bdea' tu benne' naque' du lazre' cheḗ gatiḗ.

Belexechebe benne' xíchaje ca':

—¿Bizra naca cheḗntu' da nigá? Chiu' lue' naca da na'.

<sup>5</sup>Nadxa Judas buzale' dumí na' lu xudau', ne bezé'ḗ, na' xeajxelú'u du lbe'ḗ.

<sup>6</sup>Benne' xíchaje ca' cheḗ bxruze ca' buluxutupe' dumí na', dxelenné':

—Quebe gaca cú'udxu dumí nigá naga xu'u dumí cheḗ xudau', lawe' da naca na lazruj cheḗ benne' dxute benne'.

<sup>7</sup>Nadxa belune' tuze dizra' xelá'awe' tu xezr la xu nen dumí na' da nazí le na xezr la xu cheḗ wen xesu' zruaga, cheḗ gaca na tu lataj naga xelegache benne' zitu'. <sup>8</sup>Cheḗ le' na' nazí le xezr la xu na' Xezr La Xu Cheḗ Dxen ca lu zra na'a zra. <sup>9</sup>Caní guca na cheḗ gaca ca da gunná Jeremías, benne' bchálaje' waláz cheḗ Dios, gunné': “Gulequḗ'ḗ chi dxua dumí plata da naca na da zaca Le' da buluzúa benne' Israel. <sup>10</sup>Nen dumí na' belá'awe' xezr la xu cheḗ benne' wen xesu' zruaga, cáteze gunná be'e Xrana' neda'.”

### *Dxezrín Jesús lau Pilato*

(Mr. 15.2-5; Lc. 23.3-5; Jn. 18.33-38)

<sup>11</sup>Guleché'ḗ Jesús lau bénnea' dxenná be'ḗ waláz cheḗ xezr la xu Roma, na' le' bchebe' Jesús:

—¿Nacu' Lue' Wenná Bea cheḗ judío ca'?

Jesús gunné':

—Ca' naca na, ca dxennáu' lue'.

12 Gate benne' xíchaję ca' cheę bxruze ca', ne benne' gula sina ca' gulawę zria cheę Jesús, na' Le' quebe bi bechebę'. 13 Nadxa gunná Pilato, dxę'e Jesús:

—¿Quebe dxennu' ca da dxelenná benne' caní chiu'?

14 Jesús quebe bi bechebę'. Ca'an guca bebanne bėnnea', ne quebe bezrela lazre' ájala nne'.

*Dxelechugę' cheę Jesús gatie'*

*(Mr. 15.6-20; Lc. 23.13-25; Jn. 18.38—19.16)*

15 Gate dxu'u laní na', bėnnea' dxenná be'e na' xu'u lawę' dxusane' tu benne' węn da zrinnaj, nůteteze benne' dxelaca lazre' benne' ca'. 16 Ca lu zra na' xu'u tu benne' lizre xia, benne' wėnle'e da zrinnaj, nazí le' Barrabás. 17 Ca zaj nazraga benne' ca' na', Pilato bchebę' le':

—¿Nuzra dxaca lázrele gusana' neda'? ¿Gusana' Barrabás, che Jesús, bėnnea' le' Cristo?

18 Caní gunné' lawę' da ba nézene' buludęę' Jesús lawę' le' lawę' da dxelaquę' xa lazre' cheę Jesús.

19 Dxácate' na' dxę' Pilato naga dxuchi'e cheę bėnneache, na' zru'ule' gusel-le' tu benne' xeajezre' Pilato: “Quebe guchixre chiu' da naca cheę benne' xrlátaje na', lawę' da guneda' xęla ba dxęle, da bzúale'e na neda' stębe ne cheę Le'.”

20 Benne' xíchaję ca' cheę bxruze ca', ne benne' gula sina ca' belegú'u xęle' benne' ca' cheę xelenabę' la Barrabás, ne gate Jesús. 21 Bėnnea' dxenná be'e bchálajęne' benne' ca' xęcha lasa. Buchębę' le':

—¿Nula benne' chupa caní dxaca lázrele le'e gusana'?

Benne' zan ca' gulennę':

—Barrabás.

22 Pilato bchebę' benne' ca':

—¿Bizra guna' cheę Jesús, benne' le' Cristo?

Xúgute' belexechebę':

—Bde'e xaga bėguaj.

23 Nadxa gunná Pilato, dxę'e benne' ca':

—¿Bizra da calęla nune'?

Benne' ca' gulezú lawę' dxelebezre xę'e, gulennę':

—Bde'e xaga bėguaj. Bde'e xaga bėguaj.

24 Gate Pilato guque bé'ene' quebe bi séquene', na' benne' zan ca' dxeledábage' le', na' gunná bé'ene' bla' nisa, na' gudibe ne'e lówela benne' ca', dxennę':

—Quebe bi dul-la nabaga' cheę xel-la' gute cheę benne' xrlátaje nigá. Naca na cheęle le'e.

25 Xúgute' benne' ca' belexechebę':

—Netu', ne zrí'inentu' nabágantu' ca naca cheę xel-la' gute cheę'.

26 Nadxa Pilato bsane' Barrabás, ne gunná bé'ene' belechę'e Jesús cheę xelu'e Le', na' bdeę' Le' cheę tę'e xaga bėguaj.

27 Nadxa benne' dxjaquę' wedil-la cheę bėnnea' dxenná be'e guleché'e Jesús, ne gulegú'e Le' lu xu'u lawę'. Belexezraga ca naca benne' dxjaquę' wedil-la naga zę Jesús. 28 Belequę'e zra lane', ne bulugácue' Le' tu ladxe' bzawe. 29 Buluzúę' xíchaję' tu da naca na zruze xaga xęche', ne buluguxre' Le' tu xaga ne'e xabęla. Nadxa buluzú zribe' lau Jesús, ne belún le' cheę', dxelennę':

—Gaca xabáa chiu', Wenná Bea cheę judío ca'.

<sup>30</sup> Cá'anqueze buluzré'e Le' zrene', na' gulequé'e xaga da nuxru Jesús, ne guliné' na xíchaje'. <sup>31</sup> Ca gudé belún le' chee Jesús, na' belexegüé' ladxe' bzawe, na' buluxugácué' Le' zra lánaqueze'. Nadxa beleché'e Le' chee te'e xaga béguaj.

*Dxuludé'e Jesús xaga béguaj*

(Mr. 15.21-32; Lc. 23.26-43; Jn. 19.17-27)

<sup>32</sup> Ca gusiá'que' na', belexezrague' tu benne' xezre Cirene, le' Simón, na' gulenná bé'ene' le' bi'e xaga béguaj chee Jesús.

<sup>33</sup> Ca'an guca belezrine' tu lataj nazí le na Gólgota, da dxennadxu, Lataj Chee Zrita Xichaj Benne' Gate. <sup>34</sup> Na' bulunézruje' da xi'aj Jesús xrise uva wal-la da nachixre na da sla', san gate bxue Jesús ca naca na, quebe gu'e na.

<sup>35</sup> Ca bexuzre benne' dxjaca wedil-la buludé'e Le' xaga béguaj, na' gulebéaje' da gaca bea na chee xelexelé'e ca naca zra lana Jesús. Ca'an guca guxá ca da gunná benne' bchálaje' waláz chee Dios, gunné': "Belex-elé'e zra lana' leze'. Gulebéaje' da gaca bea na." <sup>36</sup> Nadxa gulebé'e dxuluzuzre' Jesús. <sup>37</sup> Buluzríe' xichaj Jesús na' tu xiche da naxúaj na da nabague', da dxenná na: Jesús, wenná bea chee judío ca'.

<sup>38</sup> Cá'anqueze buludé'e chupa benne' gubán tu zren nen Jesús le'e xaga béguaj ca', tue' chalá'a xabela, ne xetúe' chalá'a xéglala ga da' xaga béguaj chee Jesús. <sup>39</sup> Benne' dxeledé'e na' dxelún le' chee Jesús. Dxulutá xíchaje', <sup>40</sup> ne dxelenné':

—¿Dxuchínnaju' xudau', na' lawe' chunna zraze xexunu' na? Bselá cuinu'. Che nacu' Zri'ine Dios, bexetaj le'e xaga béguaj na'.

<sup>41</sup> Cá'anqueze belún la chee' benne' xíchaje ca' chee bxruze ca', ne benne' dxuluxuzájle'e da bdxixruj be'e Moisés, ne benne' xudau' fariseo ca', ne benne' gula sina ca'. Dxelé ljwezre':

<sup>42</sup> —Bselé' benne' xula, san quebe dxezéquene' guselá cuine'. Che naque' Wenná Bea Chee Xezre Israel, dxal-la' xexétaje' le'e xaga béguaj, na' chéajledxu chee'. <sup>43</sup> Le' bxren lazre' Dios. Na'a guselá Dios Le' che da li dxaca lazre', lawe' da gunná Le' naque' Zri'ine Dios.

<sup>44</sup> Cá'anqueze gubán ca' zaj da' xaga béguaj ca' nen Jesús gulenné' schanni' chee Jesús.

*Ca guca gate gute Jesús*

(Mr. 15.33-41; Lc. 23.44-49; Jn. 19.28-30)

<sup>45</sup> Nadxa ca naca xezr la xu na' guchul-la na. Guzú lau na wagubizra ca bzrinte na ca dxedá chunna. <sup>46</sup> La ná'queze Jesús gudxezre xe'e, dxenné':

—Elí, Elí, ¿lama sabactani?

(Da nigá zéaje na: Dios chia', Dios chia', ¿bizr chee na' nusán lazru' neda'?)

<sup>47</sup> Bal-la benne' zaj zre'e na' belenne' ca da gunná Jesús, na' gulenné':

—Benne' nigá dxenné' Elías, benne' bchálaje' waláz chee Dios.

<sup>48</sup> Dxácaté na' guzá' chegu tu benne' ca', xeajxrí'e tu da dxezrupe nisa, na' ca bsebisé' na nen nupe zichaj, na' bzue' na lawe' tu xaga, ne bzrigue' na dxu'a Jesús chee xrupe' na. <sup>49</sup> Benne' xezica ca' gulenné':

—Le guxúe xca'. Quebe gunu' ca'. Nná'xquedxu che wida Elías guselé' Le'.

<sup>50</sup> Xecha lasa gudxezre xa'a Jesús, na' gutie'. <sup>51</sup> Lu zra ná'queze ladxe' da ze lu xudau' bdxuaj na chúpala, guzú lau na xíchaje, bedxúajte na dxe'ela. Guzrú' xezr la xu, na' xiaj xre ca' gulúzruqueze na. <sup>52</sup> Gulexalaj ba, na'

belexebán benne' gate ca', benne' guléajle'ë da naca cheë Dios. <sup>53</sup> Ca gudé bebán Jesús, na' benne' caní belexedxúaje' lu xedxu ba, ne belexexú'ë lu xezre lá'azxa Jerusalén, naga benne' zan belelé'ene' benne' ca'.

<sup>54</sup> Nadxa benne' dxenná be'ë lu wedil-la, ne benne' dxjaque' wedil-la, benne' ca' dxuluzuzre' Jesús, gate belelé'ene' guzrú', ne xezicadxa da ca'an gulaca, na' belezrébele'ë, dxelenné':

—Da lítegaze benne' nigá guque' Zri'ine Dios.

<sup>55</sup> Nu'ula zan zaj zre'ë na' dxelenné'ë zítu'la, nu'ula ca' xjácálene' Jesús gate bezé'ë ga nababa Galilea, ne gulácalequeze' Le'. <sup>56</sup> Ládujla nu'ula ca' xu'u María Magdalena, ne María xrna Jacobo ne José, ne xrna zri'ine Zebedeo ca'.

*Dxulucache' Jesús lu xedxu ba*

(Mr. 15.42-47; Lc. 23.50-56; Jn. 19.38-42)

<sup>57</sup> Ca guzú lau dxaca waxrinne, na' bla' tu benne' gunnía le' José, benne' xezre Arimatea, benne' dxéajlequeze' cheë Jesús. <sup>58</sup> Benne' nigá guxíaje' xeajchálajlene' Pilato, na' benabe' bel-la' dxen cheë Jesús. Pilato gunná bé'ene' xulunézruje' le' bel-la' dxen na'. <sup>59</sup> Nadxa José bequé'ë bel-la' dxen na', na' bchelé' na tu ladxe' da naxadxe. <sup>60</sup> Nadxa gulu'ë Le' lu ba da naca na cheéqueze José na', da bene' tu lu xiaj. Gulexrué' tu xiaj blaga zren dxu'a ba cheë Jesús, na' bezé'ë ga na'. <sup>61</sup> Gulezrá' María Magdalena, ne xetú María, zaj dxe'ë le nna' dxu'a ba na'.

*Dxulubia dxuluxue' ba cheë Jesús*

<sup>62</sup> Zeaj zra xula, da naca na zra ca gudé zra bulucueze', na' benne' xíchaje ca' cheë bxruze ca', ne benne' xudau' fariseo ca' belezrine' lau Pilato. <sup>63</sup> Dxelé'ë le':

—Xran, dxeajsá lázrentu' ca naca da gunná benne' wen lazre' na' gate na' zue'. Gunné' gate gaca chunna zra, na' xebane' ládujla benne' gate. <sup>64</sup> Cheë le' na', bdixruj be'ene' benne' ca' xulubia xuluxue' ba cheë' na' cadxa gaca chunna zra, cheë quebe xelélé' benne' ca' bsédené' xedajlexebéaje' bel-la' dxen na' chizrela, na' te na' xuluzenne' bénneache ba bebane' ládujla benne' gate. Che ca'an gaca, na' dizra' wen lazre' bzebe nigá gun na da zrinna' zrendxa ca da nedxu.

<sup>65</sup> Pilato guzre' benne' ca':

—Na' zaj zra' benne' dxjaque' wedil-la xuluzuzre' na. Le chjaca le'e, ne le guxúe xanne' ba na' ca se lau séquele.

<sup>66</sup> Nadxa xjaque', xeajlexúe' ba na'. Buluchiche' tu da gunna bea na che xalaj ba na', na' bulucá'ane' benne' dxjaca wedil-la ga na'.

## 28

*Ca guca gate bebán Jesús*

(Mr. 16.1-8; Lc. 24.1-12; Jn. 20.1-10)

<sup>1</sup> Ca gudé cheë zra dxulupá'ana judío ca', ca za dxaní' zra nedxu, na' María Magdalena, ne xetú María na' xjaque' xeajlenné'ë ba cheë Jesús.

<sup>2</sup> Chadite guzrú'le'ë na lawe' da betaj tu gubáz cheë xabáa cheë Xránadxu, na' bzrine' dxu'a ba na', ne bequé'ë xíajta'a zren na' da zrua na dxu'a ba na', na' gudxé'ë lawe na. <sup>3</sup> Gubáz na' dxácátite legale', ne naca chiche zra lané' ca bezxe'. <sup>4</sup> Gate belelé'ë benne' dxjaque' wedil-la gubáz cheë xabáa na', na' belezrízene' xel-la' dxelezrebe, ne belexegá'ane' ca benne' gate ca'.

<sup>5</sup> Nadxa gunná gubáz cheë xabáa na', dxe'ë nu'ula ca':

—Quebe zrébele. Nezda' dxexílajle Jesús, bérnea' gudé'e xaga béguaj. <sup>6</sup>Quebe zué' nigá lawe' da ba bebane', cáteze na' gunné'. Le da nna'le lu ba naga gulegú'e Le'. <sup>7</sup>Le cheajxáquezega, le cheajezre benne' ca' bsédene' ba bebane' ládujla benne' gate, na' chéajé' ga nababa Galilea nédxudxa ca le'e. Na' lé'ele Le'. Da nigá naca na da nabaga'a xapa' le'e.

<sup>8</sup>Nadxa nu'ula ca' besiá'que' dxu'a ba na', zeajxaca chégüe'. Dxelezrebe', ne dxelebene'. Zjaque' zeajleguezre' benne' ca' bséde Jesús. <sup>9</sup>Dxácate na' Jesús bchague' nu'ula ca', ne bgape' le' diuzre. Belezrine' lau Jesús, dxelúe lá'ane' Le', ne bulunide' ni'a Jesús. <sup>10</sup>Le' guzre' nu'ula ca':

—Quebe zrébele. Le chjaca, le cheajézre bi bícha'dau' ca' dxal-la' chjaque' naga nababa Galilea. Na' xelexelé'ene' neda'.

*Ca da gulenná benne' dxjaque' wedil-la*

<sup>11</sup>Dxácate zjaca nu'ula ca', na' benne' ca' dxjaca wedil-la gulu'e xezre, ne buluchálajlene' benne' xíchaje ca' chee bxruze ca' ca da guca. <sup>12</sup>Benne' xíchaje ca' buluchálajlene' benne' gula sina ca' chee xelune' tuze dizra'. Nadxa bulunézruje' benne' dxjaque' wedil-la dumí zrente. <sup>13</sup>Dxelenné':

—Le nna le'e belelá' benne' ca' bséde Jesús na' chizrela, dxácate dxásele le'e, na' belexexú'e bel-la' dxen chee'. <sup>14</sup>Che benne' dxenná be'e na' xenne' da nigá, netu' guchálajlentu' le', ne gucá'ana cháwentu' chee quebe bi gaca cheele le'e.

<sup>15</sup>Nadxa benne' dxjaque' wedil-la gulezí' lu ne'e dumí na', na' besiá'que' belune' ca bache zaj nézene'. Da nigá naca na ca dxelenná judío ca' zéajte lu zra na'a zra.

*Jesús dxesel-le' benne' gubáz chee' ca'*

*(Mr. 16.14-18; Lc. 24.36-49; Jn. 20.19-23)*

<sup>16</sup>Nadxa xjaca benne' chinéaj ca' bséde Jesús, na' belezrine' lu xi'a naga ba guzre Jesús le'. <sup>17</sup>Gate belelé'ene' Jesús, na' bulucá'ana szrene' Le'. Bal-le' gulaca chupa lazre'. <sup>18</sup>Nadxa Jesús gubigue' naga zaj zra' benne' ca', na' guzre le':

—Neda' ba nazí' lu na'a ca naca xel-la' dxenná bea xabáa, ne lu xezr la xu nigá. <sup>19</sup>Chee le' na' le chjaca, le cheajchálajle benne' zaj zre'e du ca naca xezr la xu nigá, ne le cheajsédene' ca naca da bsédeda' le'e. Le guchúe' le' nisa lu La Xra', ne lu La Zrí'ine', ne lu La Be' Lá'azxa. <sup>20</sup>Le guséde-ne' xelaque' wezúa dizra' ca naca da ba gunná be'eda' le'e, na' neda' tu súalezqueza' le'e xúgute zra cadxa cheajsé chee xezr la xu nigá. ¡Ca'an gaca na!



## DIZRA' CHAWĒ' CA NACA CHEĒ JESUCRISTO DA BZUAJ SAN MARĀOS

*Da bchalaj Juan, benne' bchue' bénneache nisa  
(Mt. 3.1-12; Lc. 3.1-9, 15-17; Jn. 1.19-28)*

<sup>1</sup> Caní guzú lau dizra' chawē' ca naca cheĒ Jesucristo, Zri'ine Dios.

<sup>2</sup> Bzrin lazre' da bzuaj Isaías, benne' bchálajē' waláz cheĒ Dios, ca da gunná Dios:

¡Le nna'xque nigá!

Neda' dxeasel-la' benne' gubáz chia', benne' cuía lawē' lau Lue'.

Bénnea' gupé'e neza naga teu' cheĒ ilúnbe'e bénneache Lue'.

<sup>3</sup> Welénqueze chi'i benne' dxebezre xē'e le'e xixre' lawe' lataj.

Dxenné': "Le gupá'a neza naga te Xránadxu lu xichaj lázrdaule.

Le xebéaj li neza lase cheĒ ca'."

<sup>4</sup> Caní guca lawe' da bla' Juan le'e xixre' lawe' lataj, na' bchálajē' dizra' cheĒ Dios, ne gunné' dxal-la' xeledxúa bénneache nisa, na' bchue' le' nisa, benne' ca' belexebí'i lazre' cheĒ gunite lau Dios dul-la da zaj nabague'. <sup>5</sup> Ca'an guca, guledxúaj bénneache zan lu xēzre Jerusalén, ne xúgutē xēzre ca' zaj nababa Judea, na' xjaque' naga zua Juan, na' Juan nigá bchue' benne' ca' nisa lu xēgu Jordán, benne' ca' gulexrúalēpē' dul-la da zaj nabague'.

<sup>6</sup> Caní guca zra lana Juan. Gucue' zra lanē' ladxe' xicha zra camello, bia dxelebía bénneache, ne tu xpádxue' xide bchela le'e. Dxawē' biche xuaj, ne dxé'ajē' bzrina'dau' cheĒ bēzudau'. <sup>7</sup> Ca dxuchálajē' dizra' cheĒ Dios, dxenné':

—Gate te chia' neda', na' xida xetú benne', bénnea' nápadxē' xel-la dxenná bea ca neda'. Quebe naca chia' xáchua' cheĒ lechja' zrele'. <sup>8</sup> Da lítega, neda' bchua' le'e nisa. Le' gunē' da zéajē' xel-la dxedxúa nisa nigá, guzúē' Be' Lá'azxa lu xichaj lázrdaule.

*Ca da guca gate gudxúa Jesús nisa  
(Mt. 3.13-17; Lc. 3.21-22)*

<sup>9</sup> Ca da guca lu zra ca', guzá' Jesús lu xēzre Nazaret cheĒ ga nababa Galilea, na' bzrinē' lau Juan. Juan nigá bchue' Jesús nisa lu xēgu Jordán.

<sup>10</sup> Gate bdxuaj Jesús lu nisa, la blé'etēne' naxalaj xabáa, ne blé'engē' betaj Be' Lá'azxa. Dxulé'e lawē' ca tu bgúgudu chiche, na' bzrinē' ca lí xichaj Jesús. <sup>11</sup> Ben tu chi'i da za xabáa, da dxenná na:

—Lue' nacu' Zri'ina'. Nazrí'ida' Lue', ne dxezaca ba lázrele'da' Lue'.

*Dxaca lazre' Satanás da xriwē' gun ga бага Jesús dul-la  
(Mt. 4.1-11; Lc. 4.1-13)*

<sup>12</sup> Nadxa Be' Lá'azxa guché'e Jesús le'e xixre' lawe' lataj. <sup>13</sup> Guzúa Jesús le'e xixre' lawe' lataj chua zra chua xēla. Na' bzrin Satanás da xriwē', ne guca lazre' na gun na бага Jesús dul-la. Guzúa Jesús naga zaj zra' bē xixre' bē snia, na' gubáz cheĒ xabáa cheĒ Dios gulácalēne' Jesús.

*Jesús dxezú lawē' dxusédenē' bénneache  
(Mt. 4.12-17; Lc. 4.14-15)*

14 Ca gudé guxú'u Juan lizre xia, na' bzrin Jesús lu xezre ca' zaj nababa Galilea, ne dxuchálajleñe' bèneache dizra' chawe' ca dxenná bea Dios.  
15 Gunná Jesús:

—Ba bzrin zra. Ba zua báguze gate nna bea Dios xezr la xu nigá. Chee le na', le xebí'i lazre', ne le cheajlí lazre' dizra' chawe' nigá.

*Dxenné Jesús tapa benne' wezén bela chee xelaque Le' tuze*  
(Mt. 4.18-22; Lc. 5.1-11)

16 Gate gudá Jesús dxu'a nísadau' chee Galilea, na' blé'ene' Simón, ne Andrés, biche Simón na'. Benne' caní dxuluzale' xixruj bela chee' lu nísadau' lawe' da zaj naque' wezén bela. 17 Na' gunná Jesús:

—Le gun neda' tuze, na' guzúa' le'e gácale wen zrin chia'. Cheajxrile bèneache ca dxunle dxezenle bela.

18 La bulucá'anate' xixruj chee' ca', na' zjácálene' Jesús.

19 Nadxa gudé Jesús xelate' ca na'la, na' blé'ene' Jacobo, ne Juan, benne' ca' zaj naque' zri'ine Zebedeo. Zaj zre'e lu da dxedá lawe' nísadau', dxelexexune' xixruj bela chee' ca'. 20 Ca gunné Jesús Jacobo, ne Juan, na' la bulucá'anate' xre' Zebedeo ne wen zrin chie' ca' zaj zre'e lu da dxedá lawe' nísadau', na' zjácálene' Jesús.

*Tu benne' xu'e be' xriwe'*  
(Lc. 4.31-37)

21 Gate gul-la na gulu'e lu xezre Capernaum, na' gate bzrin zra dxulupá'ana benne' judío ca', guxú'u Jesús lu xu'u naga dxelúe lá'ana judío ca' Dios, ne bsédené' benne' ca' zaj zre'e na'. 22 Belexebánene' ca naca da dxusede Jesús le' lawe' da dxuchálaje' nen duté xel-la dxenná bea, ne quegá ca dxuluchalaj benne' ca' dxuluxuzájle'e da nadxixruj bea Dios. 23 Nadxa bla' tu benne' xu'e be' xriwe' lu xu'u na', na' gudxezre xa'a na lu dxu'a bènea'. 24 Gunná na:

—¿Bizra nápantu' chiu', Jesús, benne' Nazaret? ¿Za'u guzría xi'u netu'? Ba nézquezda' nu nacu'. Benne' Lá'azxa chee Dios nacu'.

25 Jesús gudil-le' na, gunné':

—Zrize guzúa. Bedxúaj lu bel-la' dxen chee benne' nigá.

26 Nadxa be' xriwe' na' bxrízale'e na bènea', ne gudxezre xá'ale'e na, na' bedxúaj na. 27 Belexebánele'e xúgute benne' zaj zre'e na', dxelé ljwezre':

—¿Bizra dizra' cube da nigá? Dute xel-la dxenná bea chee' dxenná be'ene' be' xriwe' ca', na' dxuluzúa na dizra' chee'.

28 La bzrilujte dizra' chee xel-la waca chee Jesús du ca naca xezre ca' zaj nababa Galilea.

*Jesús dxexune' xrna' zru'ula Pedro*  
(Mt. 8.14-15; Lc. 4.38-39)

29 Ca belexedxúaje' lu xu'u na' chee judío ca', na' belezrine' lizre Simón, ne Andrés. Jacobo ne Juan dxelune' Jesús tu zren. 30 Lu xu'u na' de xrna' zru'ula Simón, xu'e da la. La buluchálajlete' Jesús ca dxaca chee nu'ula nigá. 31 Le' la béxruté' ne'e, bechise' le'. La bedxúajte da la da xu'e, na' bseni'e da gulawe'.

*Jesús dxexune' bèneache zan*  
(Mt. 8.16-17; Lc. 4.40-41)

32 Ca gula guzré zra na', ca guzría gubizra, na' guleché'e xúgute benne' we' lau Jesús, ne benne' ca' zaj xu'e be' xriwe'. 33 Ca naca benne' xezre gulebigue' dxa xu'u naga zua Jesús. 34 Jesús hexune' zánete benne' we'

ca zaj naca xízrawe' da xu'u tu tuę', ne bebéaje' zane' be' xriwe' zaj xu'u bénneache ca'. Quebe be'e lataj be' xriwe' ca' xelenné na lawe' da zaj núnbea na Le'.

*Dxuchalaj Jesús lau bénneache zaj zře'e Galilea*

*(Lc. 4.42-44)*

<sup>35</sup> Ca bebán Jesús bál-lala, ne nachúl-late, bedxúaje' guzé'e zéaje' tu lataj naga nadache' bénneache, na' bchálajlene' Dios. <sup>36</sup> Simón Pedro, ne benne' ca' zaj zrálene' le' belexexilaje' Jesús. <sup>37</sup> Ca xeajlexraque' Jesús, na' gulé'e Le':

—Xúgute bénneache dxexexilaje' Lue'.

<sup>38</sup> Na' gunná Jesús:

—Chéajdxu xexre walizre ca' chee guchálajlena' benne' ca' xrtizra Dios. Chee le' na' belja'.

<sup>39</sup> Lu xu'u ca' naga dxelúe lá'ana judío ca' Dios, da ca' zaj zua tu tu xezre ca' chee ga nababa Galilea, bchalaj Jesús dizra' chee Dios, ne bebéaje' xízrawe' xriwe' ca' da zaj xu'u benne' we' ca'.

*Jesús dxexune' tu benne' dxé'ene' xízrawe' guzru'*

*(Mt. 8.1-4; Lc. 5.12-16)*

<sup>40</sup> Nadxa bzin lau Jesús tu benne' dxé'ene' xízrawe' guzru', na' bzu zribe', ne guta' xuene' Le', dxenné':

—Che Lue' dxaca lazru', waca xexunu' neda'.

<sup>41</sup> Jesús bexache lazre' le', na' bli ne'e, gudane' le'. Dxenné':

—Dxaca lazra'. Na'a dxexacu'.

<sup>42</sup> Ca gunné' caní, la becuásate xízrawe' na', na' begá'ane' chawe'. <sup>43</sup> Nadxa Jesús bsízrene' le', na' besel-le' le'. <sup>44</sup> Caní gunné':

—Quebe nu xu'u ca da guca chiu'. Guxíaj lau bxruze xeajlé'e cuinu', ne bnezruj ca naca da gunná be'e Moisés xelún benne' ca' xelexexaque'. Caní gunu' chee xeelé'ene' ba bexacu' na'a.

<sup>45</sup> Nadxa benne' nigá, ca bezé'e, guzú lawe' dxuchálajlene' tu tu benne' ca guca chee' bexaque'. Ca'an guca, québedxa guca chu'u Jesús zaca bal-la lau lu xezre. Begá'ane' le'e xixre' lawe' lataj. Bénneache chee xúgute xezre ca' belezrine' lau Jesús naga zue'.

## 2

*Jesús dxexune' tu benne' quebe gaca se'e*

*(Mt. 9.1-8; Lc. 5.17-26)*

<sup>1</sup> Ca gudé chupa chunna zra, na' guxú'u Jesús xecha lasa lu xezre Capernaum. Belénne bénneache zua Jesús tu lu xu'u. <sup>2</sup> La belezragate benne' zante naga zua Jesús. Ca'an guca, québedxa guque lu xu'u, ne dxa xu'u. Bchalaj Jesús xrtizra Dios. <sup>3</sup> Na' belezrin tapa benne' lu xu'u naga zua Jesús, zaj nu'e tu benne' quebe gaca se'e. <sup>4</sup> Lawe' da quebe gulezéquene' xelezrine' lau Jesús, lawe' da zaj zra' bénneache zante ga na', na' gulesáluje' chju'u chee xu'u naga zua Jesús. Na' bululétaje' da'a da zrua benne' na' quebe gaca se'e. <sup>5</sup> Lawe' da dxequé be'e Jesús ca dxeleajlí lazre' benne' ca' Le', na' gunné', dxé'e bénnea' quebe gaca se'e:

—Zrí'ina'dau', ba nanite lau dul-la da nabagu'.

<sup>6</sup> Zaj dxé'e bal-la benne' ga na', benne' dxuluxuzájle'e da nadxixruj bea Dios, na' gulenné lanze': <sup>7</sup> —¿Bizr chee na' dxuchalaj caní benne' nigá? Dxucá'ana dítaje' Xránadxu Dios. ¿Núzraqueze gaca gunite lau dul-la da

zaj nabaga b́enneache? Tuze Dios na'. <sup>8</sup> Dxeque be'e Jesús lu lázrdawę' ca dxelennę lanę' cheę', na' gunnę':

—¿Bizr cheę na' dxęquele caní? <sup>9</sup> ¿Bizra dizra' quebe naca na stębela xapa' benne' nigá quebe gaca se'ę? ¿Naca na stębe xapa' le', ba nanite lau dul-la nabagu'? Cabí. ¿U che stębe xapa' le', bexasa, becá'a da denu', ne bexíaj? <sup>10</sup> Na'a, cheę nézele le'e neda', Benne' Gulję' B́enneache, napa' xel-la dxenná bea lu xęzr la xu gunite lawa' dul-la da zaj nabaga b́enneache.

Na' gunná Jesús, dxę'ę b́ennea'.

<sup>11</sup> —Lue' dxapa', bexasa, becá'a da'a chiu', ne bexíaj lizru'.

<sup>12</sup> Ca'an guca, la bexásatę', na' bequę'ę da'a cheę', ne bedxúaję' lau xúgutę b́enneache. Ca'an guca, xúgutę benne' ca' belexebánenę', na' belúe lá'ane' Xránadxu Dios. Dxelennę':

—Cabata' ne lé'edxu gaca na ca guca da nigá.

*Dxennę Jesús benne' le' Leví*

*(Mt. 9.9-13; Lc. 5.27-32)*

<sup>13</sup> Ca gudę na' bedxúaj Jesús zęaję' dxu'a nísadau', na' xúgutę b́enneache lu xęzre ca' belezrinę' lau Lę'. Nadxa bsédenę' benne' ca' xrtizra Dios. <sup>14</sup> Ca gudę Jesús na', ble'ene' Leví, zri'ine Alfeo, dxę'ę lataj cheę wechizruj. Na' gunná Jesús, dxę'ę le':

—Ben neda' tuze.

La guxásatę Leví, guxíajlęnę' Jesús.

<sup>15</sup> Ca' guca, gate gudxę' Jesús dxawę' lizre Leví, na' zánetę benne' wechizruj, ne benne' dul-la ca' gulebé'ę dxelágulęnę' tu zren nen Jesús, ne benne' ca' dxusédenę'. Caní naca lawe' da zjácale benne' zantę Jesús.

<sup>16</sup> Nadxa benne' ca' dxuluxuzájle'ę da nadxixruj bea Dios, ne benne' fariseo ca', gate belelé'enę' ca' da dxun Jesús, dxágulęnę' benne' wechizruj ca', ne benne' dul-la ca', na' gulennę', dxelę'ę benne' ca' dxusęde Jesús:

—¿Bizra da nigá? Dxagu dxę'ajlęnę' benne' wechizruj ca', ne benne' dul-la ca'.

<sup>17</sup> Ca ben Jesús da nigá, gunnę':

—Benne' chawę' ca' quebe dxelechínenę' benne' dxexún b́enneache. Benne' wę' ca' dxelechínenę' b́ennea'. Quegá bla'a dxennęa' benne' xrlátaje ca'. Benne' dul-la ca' dxennęa'.

*Ca dxal-la' xelún b́enneache gate dxelunę' gubasa*

*(Mt. 9.14-17; Lc. 5.33-39)*

<sup>18</sup> Ca guca lu zra na', belún gubasa benne' ca' dxusęde Juan, ne benne' ca' dxulusęde benne' fariseo ca'. Na' belezrín benne' ca', bedajleguezrę' Jesús:

—¿Bizr cheę na' dxelún gubasa benne' ca' dxusęde Juan, ne benne' ca' dxulusęde benne' fariseo ca', na' benne' ca' dxusédenu' Lue' quebe dxelunę' gubasa? ¿Bizr cheę na'?

<sup>19</sup> Na' Jesús guzrę' benne' ca':

—¿Waca xelún gubasa benne' zaj zrę'ę laní cheę wechaga na' dxácate na' zua benne' wechaga na' nen le'? Dxácate na' zua wechaga na' nen le' quebe gaca xelunę' gubasa. <sup>20</sup> Wazrín tu zra gate dua benne' wechaga na'. Lu zra na' xelunę' gubasa.

<sup>21</sup> 'Quegá nu benne' xudę'ę tu ladxe' cube le'ę zradxu gula. Che ca'an gunę', ladxe' cube da xudę'ę wazrube xu na da gula, na' wachęzadxu na. <sup>22</sup> Cá'anqueze, quegá nu benne' quę'ę xrise uva wal-la cube lu bzude xide gula. Che ca'an gunę', na' xrise uva wal-la cube na' wacheza na bzude

xide gula, na' walalaj xrise uva wal-la, ne cuía xi bzude xide na'. Xrise uva wal-la cube lu bzude xide cube dxal-la' chuzruj na.

*Benne' ca' dxuséde Jesús dxelíchajé' dau chee zrua' xtila zra dxulupá'ana judío ca'*

(Mt. 12.1-8; Lc. 6.1-5)

<sup>23</sup> Gate gudé Jesús naga ze zrua' xtila zra dxulupá'ana benne' judío ca', ná'ate na' benne' ca' dxuséde Jesús, ca' zaj xu'e neza, gulezú lawé' dxelíchajé' dau naga zria zrua' xtila. <sup>24</sup> Nadxa benne' fariseo ca' gulé'e Jesús:

—Gunná'xque. ¿Bizr chee na' dxelune' zrin da quebe dxal-la' xelune' zra dxupá'anadxu?

<sup>25</sup> Jesús guzre' benne' ca':

—¿Cabata' ne gulábale ca' da ben David gate gudune', ne bxázrjene' da gagu le', ne da gugawé' benne' ca' zaj zrálene' le'? <sup>26</sup> Guxú'e lu xu'u chee Dios gate naca Abiatar bxruze blau, na' David gudawé' xeta xtila da dxelu'e lau Dios, da quebe dxal-la' gagu benne' xula, san tuze bxruze ca' zaj naca chee' xelawé' na. Na' bnézrujte David da gulagu benne' ca' zrálene' le' chee xeta xtila na'.

<sup>27</sup> Cá'anqueze gunná Jesús, dxé'e benne' ca':

—Dios gudíxruje' zra dxupá'anadxu chee gaca ba neza chee bénneache, quegá bene' bénneache chee xelune' zrin chee zra dxupá'anadxu. <sup>28</sup> Chee le' na', neda', Benne' Gulje' Bénneache, naca' xrane zra dxupá'anadxu.

### 3

*Ca guca chee tu benne' nazrinnaj ne'e*

(Mt. 12.9-14; Lc. 6.6-11)

<sup>1</sup> Gate guxú'u Jesús da xula lu xu'u naga dxelúe lá'ana judío ca' Dios, ze tu benne' biu nazrinnaj ne'e ga na'. <sup>2</sup> Judío ca' buluzuzre' Jesús che xexune' benne' we' nigá lu zra dxulupá'ane', chee xelezéquene' xelagu zria Jesús.

<sup>3</sup> Nadxa gunná Jesús, dxé'e benne' biu na' nazrinnaj ne'e:

—Guxasa. Guzé laduj benne' caní.

<sup>4</sup> Nadxa gunaba Jesús lau judío ca', dxé'e le':

—¿Naca chee zra dxupá'anadxu gundxu da xrlátaje, u che gundxu da calela? ¿Waca gupá'adxu xel-la nabán chee nu benne', u che guzría xidxu xel-la nabán chee'?

Na' gulezúa zrize judío ca'. <sup>5</sup> Nadxa Jesús gunná zi'e benne' ca'. Bewí'inene' ca' naca xel-la lázrdau zide' chee'. Nadxa guzre' benne' nazrinnaj ne'e:

—Guchiluj na'u.

Guchiluj ne'e, na' bexaca na. <sup>6</sup> Ca'an guca, belexedxúaj benne' fariseo ca', na' belune' xel-la wezría nen benne' ca' zaj de'e Herodes ájala xelútié' Jesús.

*Bénneache zan dxelezrague' dxu'a nísadau'*

<sup>7</sup> Nadxa gucusasa Jesús laduj benne' ca', na' guxíaje' dxu'a nísadau' nen benne' ca' dxusédené'. Zjácale benne' zan ca' Jesús, benne' chee xezre ca' zaj nababa Galilea. <sup>8</sup> Gate belén bénneache ca' naca da zren ca' da dxun Jesús, belezrín benne' zan lau Le', benne' chee xezre ca' zaj nababa Judea, ne benne' xezre Jerusalén, ne benne' chee xezre ca' zaj nababa Idumea, ne benne' gusá'aque' xechalá'a xegu Jordán, ne benne' gusá'aque' xezre

ca' zaj naxechaj na xezre Tiro, ne xezre Sidón. <sup>9</sup> Chee le na' gunná be'e Jesús benne' ca' dxusédene' xulucueze' tu da dxedá lawe' nísadau' checa xuluchide' bènneache zan Le'. <sup>10</sup> Caní guca lawe' da bexún Jesús benne' zante, na' benne' we' ca' gulebigue' lau le' chee cheajleté' Le'. <sup>11</sup> Gate be' xriwe' ca' zaj xu'u bènneache belelé'e na Jesús, na' buluzú zribe na lau Le', ne gulebezre xa'a na. Dxelenná na:

—Lue' nacu' Zri'ine Dios.

<sup>12</sup> Jesús gudil-le' be' xriwe' ca' chee quebe xululé'e na da naca Le'.

*Jesús dxenné' chazrinnu gubáz chee'*

*(Mt. 10.1-4; Lc. 6.12-16)*

<sup>13</sup> Ca gudé na' guluén Jesús tu lu xi'a, na' gunné' benne' ca' guca lazre'. Na' gulebigue' lau Le'. <sup>14</sup> Bchague' chazrinnu benne' xelune' Le' tuze, benne' sel-le' cheajlechálaje' xrtizra Dios. <sup>15</sup> Bzue' lu na' benne' caní xella dxenná bea chee xelexexune' benne' we' ca', ne chee xelexebéajé' be' xriwe' ca' lu bel-la' dxen chee bènneache ca'. <sup>16</sup> Benne' chazrinnu caní zaj le':

Simón, bènnea' bzua Jesús xetú le' Pedro,

<sup>17</sup> ne Jacobo ne Juan, biche Jacobo, benne' ca' zaj naque' zri'ine Zebedeo. (Benne' chupa caní bzua Jesús le' Boanerges, da zéajé na benne' wal-la ca guziu'.)

<sup>18</sup> Bchague' Andrés ne Felipe, ne Bartolomé, ne Mateo,

ne Tomás, ne Jacobo zri'ine Alfeo, ne Tadeo,

ne Simón, benne' dxue lázrele'e chee lazrié',

<sup>19</sup> ne Judas Iscariote, bènnea' xudéé' Jesús lu na' benne' ca' dxeledábague' Le'.

*Nu benne' dxenné' schanni' chee Be' Lá'azxa*

*(Mt. 12.22-32; Lc. 11.14-23; 12.10)*

Ca gudé na' bzin Jesús tu lu xu'u nen benne' ca' dxusédene'. <sup>20</sup> Xecha lasa gulebiga bènneache zan naga zua Jesús, na' québedxa dxaca lataj xelawe'. <sup>21</sup> Gate belene benne' xrtia Jesús ca da dxun Le', na' belezrine' chee xelexeché'e le'. Dxelenné':

—Quebe zua xrlátaje xichaj lázrdawe'.

<sup>22</sup> Cá'aqueze benne' ca' dxuluxúzajle'e da nadxixruj bea Dios, benne' gusá'aque' Jerusalén, dxelenné':

—Benne' nigá zrague' Beelzebú, xrane be' xriwe' ca', na' ne chee xrane be' xriwe' ca' dxebéajé' be' xriwe' ca'.

<sup>23</sup> Nadxa gunné' Jesús benne' ca', na' bchálajlene' le' tu da dxulé'e na. Dxenné':

—¿Wazeque Satanás da xriwe' xebéaj cuine na? <sup>24</sup> Che benne' dxelenná bea xelexaque' chupa la'a, quebe díaqueze xel-la dxenná bea chee'. <sup>25</sup> Cá'aqueze che benne' zaj zré'e tu lu xu'u xelaque' chupa la'a, quebe xeledíaqueze benne' zaj zré'e lu xu'u na'. <sup>26</sup> Cá'aqueze, che Satanás tábaga cuíaqueze na, ne xexaca na chupa la'a, quebe díaqueze na. Wadéqueze chee na.

<sup>27</sup> Quebe nu seque chu'u lizre benne' wal-la chee cuane' da de chee' che quebe guchéajé' le' nédxula. Nadxa seque' cuane' da de lizre benne' wal-la na'.

<sup>28</sup> 'Da li dxennía', dxapa' le'e: Xúgute' dul-la da dxelún bènneache, ne dizra' schanni' da dxelenné', ájateze zaj naca na, gunite láuqueze Dios

chee'. <sup>29</sup> Na'a, ca naca nüteteze benne' nne' schanni' chee Be' Lá'azxa, cabata' gunite lau Dios chee bénnea'. Webía xí'queze'.

<sup>30</sup> Caní gunná Jesús lawe' da dxelenné':

—Zraga Jesús da xriwe'.

*Nu naca ca xrna Jesús, ne bi biche' ca'*

(Mt. 12.46-50; Lc. 8.19-21)

<sup>31</sup> Ca gudé na' bzrin xrna Jesús nen bi biche' ca'. Gulebeze' chalé'ajla, na' gulesel-le' tu benne' nne' Jesús. <sup>32</sup> Benne' ca' zaj zre'e cuita Jesús gulé'e le':

—Xrna'u ne bi bichu' ca' zaj ze' chalé'ajla, dxelenné' Lue'.

<sup>33</sup> Gunná Jesús, dxé'e benne' ca':

—¿Nézele nuzra na' xrna'a, ne bi bicha' ca'?

<sup>34</sup> Nadxa gunná Jesús benne' ca' zaj zre'e cuita Le', na' gunné':

—Benne' caní zaj zrálene' neda' nigá zaj naque' ca' xrnáqueza', ne bi bicha' ca'. <sup>35</sup> Caní naca na lawe' da xúgute' benne' dxelune' ca' da dxaca lazre' Dios, benne' caní zaj naque' bi bicha' ca', ne bi zana' ca', ne xrna'a.

## 4

*Da dxulé'e na ca naca chee benne' dxaza dxa'ana*

(Mt. 13.1-23; Lc. 8.4-15)

<sup>1</sup> Xetú lasa guzú lau Jesús dxusédene' benne' ca' dxu'a nísadau', na' belezraga bénneache zante naga zue'. Naxánle'e benne', na' ben na ba xen guxú'u Jesús tu lu da dxedá lawe' nísadau' da dxe na', na' gudxé'e lu'lue da dxedá lawe' nísadau', na' bénneache zan ca' gulezre'e dxu'a nísadau'. <sup>2</sup> Nadxa bchalaj Jesús da dxululé'e na, na' bsédene' benne' ca' da zante. Ca dxusédene' benne' ca', na' bchálaje' caní:

<sup>3</sup> —Le xene da nigá. Tu benne' dxaza dxa'ana zéaje' guza. <sup>4</sup> Ca zéaje' dxaze', na' xeajlechaze bal-la bínnedu ca' dxu'a neza. Na' belezrín bxinne, ne guláguba' bínnedu caní. <sup>5</sup> Xezicadxa bínnedu ca' xeajlechaze na lu xiaj naga quebe déteca xu. Bínnedu caní belezría na lawe' da quebe déteca xu. <sup>6</sup> Ca bdxuaj gubizra, na' bzezxe na le na, na' lawe' da quebe zaj nun lue na lu da situj, gulebizre na. <sup>7</sup> Xezicadxa bínnedu ca' xeajlechaze na naga dxelezría xixre' xeche'. Xixre' xeche' caní gulegúlaxa na ca le na, na' bululule na le na, na' quebe gulebía na da gágudxu. <sup>8</sup> Xezicadxa bínnedu ca' xeajlechaze na lu xu bebe. Belezría na cháwedau', na' belegula na, ne gulezriale'e na da gágudxu. Bal-la na gulebía na chi dxua tu tu na. Xebal-la na gulebía na ga xun tu tu na. Xebal-la na gulebía na tu gaxúa tu tu na.

<sup>9</sup> Gunnadxa Jesús, dxé'e benne' ca':

—Che nu benne' zua nague', dxal-la' xenne' da nigá.

<sup>10</sup> Ca gudé na', ca gucuasa Jesús cuita benne' zan ca', na' gulenaba benne' ca' zrálene' benne' ca' dxuséde Jesús bi zéaje' ca' naca da dxulé'e nigá. <sup>11</sup> Na' gunná Jesús, dxé'e benne' ca':

—Dios dxunne' le'e lataj nézele ca' naca chee da nagache chee da dxenná bea Le'. Na'a, ca naca chee benne' ca' zaj zre'e cúzrela, dxuchálajlena' le' dízra'ze da dxulé'e na. <sup>12</sup> Caní dxuna' lawe' da dxelenné'e, na' quebe dxelaca lazre' xelelé'ene'. Dxelenne', na' quebe dxelaca lazre' xeléajni'ine', chee quebe xelexebí'i lazre', na' chu'u xel-la wenite lau chee dul-la da za nabague'.

<sup>13</sup> Na' gunnadxa Jesús:

—¿Quebe dxéajni'ile ca naca da dxulé'e nigá? ¿Ájalaqueze chéajni'ile xezícadxa dizra' ca' da dxululé'e na? <sup>14</sup> Benne' dxaza dxá'ane' naque' benne' dxuchálaje' xrtizra Dios. <sup>15</sup> Bal-la bérneache zaj naque' ca bínneđu ca' xeajlechaze na dxu'a neza. Dxelenne' xrtizra Dios, na' ca dxedé na', dxezrín Satanás, na' dxucuasa na dizra' nigá da zua na xichaj lázrdau benne' ca'. <sup>16</sup> Benne' xula ca' zaj naque' ca bínneđu ca' xeajlechaze na lu xiaj. Ca dxelenne' xrtizra Dios, na' dxelebélé'ene' dxelezi'e na. <sup>17</sup> Tu chí'idauze dxeluné' caní. Gate dxeledé'e xel-la zi', ne zua da dxedábaga le' ne chee xrtizra Dios, na' dxelexecuase' lawe' da quebe guxaze xrtizra Dios lú'ulete xichaj lázrdawe' ca guca chee bínneđu ca' quebe belún lue na lu xu situj. <sup>18</sup> Benne' xula ca' zaj naque' ca bínneđu ca' xeajlechaze na ládujla xixre' xeche' ca'. Dxelenne' xrtizra Dios. <sup>19</sup> Lawe' da dxelebe'dxe' gunne xue da naca chee xezr la xu nigá dxezí xé xel-la gunn'a le', na' dxelezá lazre' da zante da dxelelé'ene'. Xúgute da caní dxelú'u na xichaj lázrdau benne' caní, na' xuluxunite na dizra' da guxú'u xichaj lázrdawe', na' quebe gaca gun na ca da dxal-la' gun dizra' nigá. <sup>20</sup> Zaj zra' benne' dxelenne' xrtizra Dios, ne dxelezí' lu ne'e na. Bal-le' zaj naque' ca bínneđu ca' gulebía na chí dxua tu tu na. Benne' xula zaj naque' ca bínneđu ca' gulebía na ga xun tu tu na. Benne' xula zaj naque' ca bínneđu ca' gulebía na tu gaxúa tu tu na.

*Xúgute da nagache gulé'e lawe na*  
(Lc. 8.16-18)

<sup>21</sup> Cá'anqueze gunná Jesús, dxe'e benne' ca':

—¿Gúadxu xi', ne guzúadxu na zran xi'ina u che zran ga dxásedxu? Quebe gundxu ca', san guzúadxu na sibe chee gusení na. <sup>22</sup> Xúgute da nagache gulé'e lawe na, na' xúgute da xu'u xichaj lázrdaudxu wénqueze na. <sup>23</sup> Che nu benne' zua nague', dxal-la' xenne' da nigá.

<sup>24</sup> Cá'anqueze gunná Jesús:

—jLe xene xanne' ca da dxénele! Ca da dxudxíxrele, nen le na' gudxíxrequeze Dios chee, na' gúnnadxe' le'e dxénele. <sup>25</sup> Caní gaca na, benne' nape' da naca chee xrtizre'e, gunézrujdxé' chee', na' benne' quebe bi nape', ca da dauze da nape' xecá'ate' na.

*Da dxulé'e na ca naca chee binne da dxegula na*

<sup>26</sup> Na' gunnáqueze Jesús:

—Da dxenná bea Dios naca na ca da dxaca gate tu benne' dxaze' bínneđu ca' lu xu. <sup>27</sup> Dxásie' chizrela, dxase' te zra, na' bínneđu caní dxelezrí na, ne dxelegula na, ne quegá nézeng' ájala. <sup>28</sup> Dxaca na caní lawe' da nácaqueze ca da dxun xezr la xu. Nedxu dxebía na xrlgue na, nadxa za dau, na' bzébeté dxebía na bínneđu ca' lu dau. <sup>29</sup> Gate ba gulegula xíxređu caní, na' dxechugue' na lawe' da ba bzrin zra xequé'e na.

*Da dxulé'e na ca naca chee binne mostaza*  
(Mt. 13.31-32; Lc. 13.18-19)

<sup>30</sup> Cá'anqueze gunná Jesús:

—¿Ájala gutil-la lébedxu da dxenná bea Dios, u che bila dizra' da dxulé'e na cá'adxu da gutil-la lébedxu le na? <sup>31</sup> Naca na ca tu binne mostaza da dxázadxu lu xu. Bínneđu nigá nácadxa cuide' ca da zaj nnita lu xezr la xu. <sup>32</sup> Gate ba gúzadxu na dxegula na, na' dxaca na da zrendxa



ca xixre' ca' da zaj naca na ba dagu, na' dxebíá zruze na zren, na' dxácate dxelebía bxínnedu ca' zran zrula chee na.

*Ca bgune Jesús da dxulé'e na caní*

(Mt. 13.34-35)

<sup>33</sup> Caní bsede Jesús benne' ca' xrtizra Dios, na' bchálaje' zánete da dxululé'e na caní, cadite guléajni'ine'. <sup>34</sup> Quebe bchálaje' da xula. Tuze dízra' da dxulé'e na bchálajlene' benne' ca'. Bzájla'adxé' ca' naca na benne' ca' dxusédene'.

*Jesús dxebeche zri'e be' bdunu'*

(Mt. 8.23-27; Lc. 8.22-25)

<sup>35</sup> Lu zra ná'queze, ca gul-la chizrela, na' gunná Jesús, dxé'e benne' ca' dxusédene':

—Chéajdxu xecha la'a nísadau'.

<sup>36</sup> Besá'aque' naga zaj zra' benne' zan ca', na' guleché'e Jesús lu da dxedá lawe' nísadau' naga ba dxé'queze', na' gulennita xezícadxa da ca' dxeledá lawe' nísadau' ca' naga zaj zra' benne', na' xjácalene' Le'. <sup>37</sup> Nadxa guzú lau dxaca tu be' bdunu' lu nísadau' na', na' dxu'ute nisa lu da dxedá lawe' nísadau'. Caní guca guzú lau dxezrá nisa lu da dxedá lawe' nísadau'. <sup>38</sup> Jesús de' dxasi'e lu xcúgü'e naga nácadxa sibe lu da dxedá lawe' nísadau'. Na' bulusebane' Jesús, dxelé'e Le':

—Benne' wesede, ¿quebe dxé'u gunne xue wátedxu nate ca na'a?

<sup>39</sup> Nadxa guxasa Jesús, na' bchálajlene' be' bdunu', ne nísadau'. Dxnéné':

—¡Gudxé zri'! ¡Zrize guzúa!

Gudxé zri' be' bdunu', na' nísadau' guzúa zri na. <sup>40</sup> Nadxa gunná Jesús, dxé'e benne' ca' dxusédene':

—¿Bizr chee na' dxezrébele'e le'e? ¿Quebe dxeajlí lázrele Dios?

<sup>41</sup> Belezrébele'edxe', ne dxelé ljwezre':

—¿Núzraqueze benne' nigá? Dxuluzúa dízra' be' bdunu', ne nísadau' chee'.

## 5

*Tu benne' xezre Gadara, benne' xu'e be' xriwe'*

(Mt. 8.28-34; Lc. 8.26-39)

<sup>1</sup> Bezrín Jesús, tu zren nen benne' ca' dxusédene' xecha la'a nísadau' lu xezr la xu chee benne' Gadara ca'. <sup>2</sup> Ca bedxúaj Jesús lu da dxedá lawe' nísadau', na' bzrin tu benne' xu'e be' xriwe' naga zua Jesús. Bedxúaje' lu bluaj naga zaj nagache benne' gate ca'. <sup>3</sup> Benne' biu nigá zúaqueze' lu bluaj na'. Quebe nu dxezúe guchéaj lebe' chalásaze, lácala nu guchéaj lebe' nen du xia. <sup>4</sup> Zane' lasa buluchéaje' lebe' nen du xia na'abe', ne ní'abe'. Bzúzrujbe' du xia ca', na' quegá nu guzeque nna bé'ene' lebe'. <sup>5</sup> Dxedáquezebe' te zra chizrela lu xi'a ca', ne lu bluaj ca' naga zaj nagache benne' gate. Dxebezre xa'abe', ne dxeajcházebe' lu xiaj ca', dxun we' cuínabe'. <sup>6</sup> Gate ble'ebe' zítu'la ba za Jesús, na' guzá chégube', xeajzú zríbebe' lau Le'. <sup>7</sup> Gunné zizraj be' xriwe' xu'ube', dxé na Jesús:

—¿Bizra dxaca chiu' nen neda', Jesús, Zri'ine Dios szrente? Lu La Xránadxu Dios, dxata' xueda' Lue', quebe gudéu' neda' xel-la zi'.

<sup>8</sup> Caní gunná na lawe' da gunná Jesús, dxé'e na:

—Lue', da xriwe', bedxúaj lu bel-la' dxen chee benne' nigá.

<sup>9</sup> Nadxa gunaba Jesús, dxé'e na:

—¿Bi leu'?

Na' bechebe na:

—Da Zan lea', lawe' da naxantu'.

<sup>10</sup> Guta' xue na Jesús chee quebe xesel-le' na, ne quebe gucuase' na zitu' lu xezr la xu na'. <sup>11</sup> Zaj zra' gagu lu xi'a na' tu cue' cuche zaj zraba' dxeláguba'. <sup>12</sup> Gulata' xue be' xriwe' ca' Jesús, gulenná na:

—Besel-la netu' lu cuche ca'. Benna lataj chú'untu' leba'.

<sup>13</sup> Nadxa Jesús be'e na lataj. Na' be' xriwe' ca' beledxúaj na lu bénnea', na' gulú'u na cuche ca'. Zaj nácaba' ca galaj gaxúa cuche ca', na' buludxixre cuínaba' tu chejéa. Xeajlechásteba' lu nísadau', ne guláteteba' lu nisa na'.

<sup>14</sup> Benne' ca' dxuluxúe' cuche ca' buluxuzrúnnuje', na' xeajlezenne' benne' zaj zre'e lu xezre, ne benne' zaj zre'e le'e xixre'. Na' belezrín benne' ca' naga zua Jesús, benne' ca' belenne' ca da ba guca. <sup>15</sup> Gate belezrín benne' ca' naga zua Jesús, na' belelé'ene' bénnea' guxú'ube' be' xriwe' ca', dxe'ebe' ga zua Jesús, nácube' tu ladze', ne ba bezúa xrlátaje lu xichaj lázrdaube', na' gulezrebe'. <sup>16</sup> Benne' ca' belelé'e ca naca da guca chee benne' guxú'ube' be' xriwe' ca', ne ca guca chee cuche ca' buluchálaje' chee da ba guca. <sup>17</sup> Nadxa benne' xezre ca' gulata' xuene' Jesús xedxúaje' lu xezr la xu chee'.

<sup>18</sup> Ca bexú'u Jesús lu da dxedá lawe' nísadau', na' bénnea' guxú'ube' be' xriwe' ca' guta' xuebe' Jesús gu'e lataj chéajlebe' Le'. <sup>19</sup> Quebe be' Jesús lebe' lataj, san dxe'e lebe', gunné':

—Bexiaj lizru', ne xeajchálaje xrtiu' ca' ca naca da zren ca' da ben Xranu' nen lue', ne ca bexache lazre' lue'.

<sup>20</sup> Nadxa bezá'abe' zexíajbe', ne guzú laube' dxuchálajbe' lu xezre ca' zaj nababa Decápolis ca naca da zren da ben Jesús nen lebe'. Belexebánele'e xúgute benne' zaj zre'e xezre ca'.

*Bi nu'ula chee Jairo, ne nu'ula na' xeajté' zra lana Jesús*

(Mt. 9.18-26; Lc. 8.40-56)

<sup>21</sup> Begüén Jesús lu da dxedá lawe' nísadau', na' bezrine' xecha la'a nísadau'. Belezrín benne' zan naga ze', na' Le' begá'ane' dxu'a nísadau'. <sup>22</sup> Ca'an guca bzrin tu benne' xíchaje chee xu'u naga dxelúe lá'ana judío ca' Dios, benne' le' Jairo. Gate blé'ene' Jesús, na' bzu zribe' zran ni'e. <sup>23</sup> Guta' xuene' Jesús, dxe'e Le':

—¡Bi nu'ula chia' ba dxátebe! ¡Gudá, bze' na'u lebe' chee xexácabe', ne xaca banbe'!

<sup>24</sup> Nadxa guxíajle Jesús bénnea', na' bénneache zan xjácálene' Le', ne dxuluchíte' Le'. <sup>25</sup> Ládujla bénneache ca' za tu nu'ula quebe chawe' zu'e', ba zeaj chazrinnu iza nape' we' dxen. <sup>26</sup> Da zren da bulusaca benne' dxelexún bénneache ca' nu'ula nigá, na' bache ben dítajé' xúgute da nape'. Quegá bi gúcalé na le', san bzáladxá we' chee'. <sup>27</sup> Gate ben nú'ula' dxuluchalaj bénneache ca naca chee Jesús, na' bzrine' cúzrula Jesús ládujla bénneache, na' xeajté' zra lana Jesús. <sup>28</sup> Caní bene' lawe' da gunné' lu xichaj lázrdawe': Cun cheajtaza' zra lana Jesús, na' xexácatea'. <sup>29</sup> La gulézate' xel-la we' chie', ne la guque bé'etene' ba bexaca bel-la' dxen chee' chee xízrawe' na'. <sup>30</sup> Gúquebe'e Jesús ben zrin xel-la waca chee'. Chee le' na' bexéchaje', dxenné'e bénneache ca', na' gunábene' le':

—¿Nuzra bedajtá zra lana'?

<sup>31</sup> Nadxa benne' ca' dxusede Jesús gulé'e Le':

—Dxelé'eqeznu' bénneache zan dxuluchíe' Lue'. ¿Bizr chee na' dx-enabu': "Nuzra bedajtá neda?"

<sup>32</sup> Jesús guzúe' dxenné'e cuité' chee lé'ene' nua' bedajtá Le'.

<sup>33</sup> Nadxa guxíaj nu'ula nigá, dxezrízie' dxezrebe' lawe' da nézene' ca da ba guca chee', na' bzu zribe' lau Jesús, na' gunné' ca naca da li. <sup>34</sup> Nadxa gunná Jesús, dxe'e nu'ula':

—Bi nú'uladau', ba bexacu' lawe' da guxeajlí lazru' neda'. Bexíaj, cútudxa zrebu'. Ba bexácatéquezu' chee xízrawe' da guzxacu'.

<sup>35</sup> Ne dxuchálajte Jesús gate belezrín benne' gusá'aca lizre benne' xíchaje chee xu'u naga dxelúe lá'ana judío ca' Dios, na' gulé'e xra nú'uladau' na':

—Bi nú'uladau' chiu' ba gútebe'. ¿Bizr chee na' dxunu' zédedxa benne' dxusede nigá?

<sup>36</sup> Gate Jesús benne' ca da gulenná benne' caní, dxe'e benne' xíchaje chee xu'u na', gunné':

—Quebe zrebu'. Guxeajlí lazre' neda'.

<sup>37</sup> Quebe be'e lataj chjácale bénneache zan ca' Le'. Tuze be'e lataj gusá'acale Pedro, ne Jacobo, ne Juan, biche Jacobo nigá, nen Le'. <sup>38</sup> Ca belezrine' lizre benne' xíchaje na', na' ble'e Jesús bénneache dxelún schaga. Dxelebezre benne', ne dxelebezre xa'ate'. <sup>39</sup> Nadxa guxú'u Jesús lu xu'u, na' dxe'e benne' ca', gunné':

—¿Bizr chee na' dxunle schaga? ¿Bizr chee na' dxebézrele? Quegá nate bidau' nu'ula. Dxásezebe'.

<sup>40</sup> Belún lala benne' ca' chee'. Nadxa Jesús bebéaje' xúgute benne' ca', na' guché'e xrabe', ne xrna bidau' nigá, ne benne' ca' zjácale' Le', na' guxú'e naga de nú'uladu na'. <sup>41</sup> Béxrue' na'be', ne guzre' lebe':

—Bi nú'uladau', lue' dxapa': ¡Guxasa!

<sup>42</sup> La bexásate nú'uladu na', na' guzátete' lawe' da ba zéajbe' chazrinnu iza. Na' benne' ca' zaj zre'e lu xu'u na' belezrébele'e. <sup>43</sup> Jesús gunná bé'ene' benne' ca' chee quebe nu xelé'e ca da bene'. Nadxa guzré' benne' ca' xulugawe' nú'uladu na'.

## 6

### *Dxezrín Jesús lazrie' da nacan xezre Nazaret (Mt. 13.53-58; Lc. 4.16-30)*

<sup>1</sup> Jesús bezé'e naga zue', ne bezrine' lazrie', na' benne' ca' dxusedene' xjácale' Le'. <sup>2</sup> Ca gula zra dxulupá'ana judío ca', na' bezú lau Jesús dxusedene' benne' ca' zaj zre'e lu xu'u naga dxelúe lá'ana judío ca' Dios. Bénneache zan belenne' chee', ne belexebánene', dxelenné':

—¿Gazra bsede benne' nigá ca nácate? ¿Bizra xel-la sina da nunezruj Le', ne xel-la waca zren caní da dxune'? <sup>3</sup> ¿Quegá benne' nigá gubizre xaga, zri'ine María, na' benne' biche' ca' zaj naque' Jacobo, ne José, ne Judas, ne Simón, na' nu'ula zane' ca' cá'anqueze zaj zralene' dxi'u?

Chee le na' quebe guléajle'e chee Jesús. <sup>4</sup> Na' gunná Jesús, dxe'e benne' ca':

—Xúgute benne' dxelape' ba lá'ana tu benne' dxuchálaje' waláz chee Dios, san benne' walá'z chee' ca', ne benne' xrtie' ca', ne benne' zaj zre'e xu'u lizre' quebe dxelape' le' ba lá'ana.

<sup>5</sup> Chee le na' quebe ben Jesús lazrie' na' netú xel-la waca zren. Tuze bex-une' bál-laze benne' we' gate na' guxrúa ne'e xichaj benne' ca'. <sup>6</sup> Bebane Jesús lawe' da quebe guléajle'e chee'.

*Jesús dxusel-le' benne' ca' dxusédene' cheajlechálaje' xrtizra Dios*

*(Mt. 10.5-15; Lc. 9.1-6)*

Ca gudé na' bedé Jesús xecha lasa xézredu ca' zaj nnita gáguze, na' bsédene' benne' zaj zre'e ga na'. <sup>7</sup> Gunné' benne' chazrinnu dxusédene', ne guzú lawe' dxesel-le' le' chupa weaje', ne bnézruje' le' xel-la waca xulucuase' be' xriwe' ca' lu bel-la' dxen chee' bènneache ca'. <sup>8</sup> Gunná bé'ene' le' quebe bi xelu'e chee' la neza, con tuze xaga da xuluchiche'. Quebe xelu'e xixruj xeta, ne xeta, ne dumí. <sup>9</sup> Waca xululéaje' zrele', ne xelácue' tu cueze zra lane'. <sup>10</sup> Gunnadxa Jesús, dx'e'e benne' ca':

—Gate na' chu'ule le'e tu lu xu'u chee' benne', waca xegá'anatele lizre bènnea' ca' zrindxa zra xezá'ale lu xezre na'. <sup>11</sup> Che zrinle tu lu xezre naga quebe xuluxé lawe' le'e, ne quebe xelénene' cheele, waca xezá'ale, na' cuibetele bxrte xu da dxedá' ní'ale. Da nigá gaca na tu da dxulé'e na zaj nabaga benne' xezre na' zria, benne' dxeledábaga' le'e. Da li dxennéa', lu zra guchi'a Dios chee' bènneache, waxache' gácadxa da ba xa' da xeledé benne' xezre Sodoma, ne benne' xezre Gomorra quézcala da xeledé benne' xezre ca' naga quebe buluzé nague' cheele.

<sup>12</sup> Nadxa gusá'aca benne' ca' dxuséde Jesús, na' buluchálajlene' bènneache chee' xelexebí'i lazre'. <sup>13</sup> Cá'anqueze belexebéaje' zánete' be' xriwe' ca' lu bel-la' dxen chee' bènneache ca', na' gulegü'e da za zane' benne' we', na' belexexaque'.

*Ca gute Juan, benne' bchue' bènneache nisa*

*(Mt. 14.1-12; Lc. 9.7-9)*

<sup>14</sup> Na' ben wenná bea Herodes ca naca da zren ca' da dxun Jesús lawe' da guzé dizra' chee'. Bal-la benne' dxelenné':

—Juan, benne' bchue' bènneache nisa, bache bebane' ládujla benne' gate, na' chee' le' na' nape' xel-la waca zren nigá.

<sup>15</sup> Benne' xula dxelenné':

—Elías, bènnea' bchálaje' waláz chee' Dios benne' nigá.

Benne' xula dxelenné':

—Nácalje' bènnea' dxal-la' xelá' guchálaje' waláz chee' Dios, che nácalje' benne' gulasa, benne' bchálaje' waláz chee' Dios.

<sup>16</sup> Ca ben Herodes da caní, na' gunné':

—Benne' nigá naque' Juan, bènnea' gunná be'eda' neda' gulechugue' xíchaje'. Benne' nigá ba bebane' ládujla benne' gate.

<sup>17</sup> Caní gunná Herodes lawe' da gunná be'e le' buluzúe' Juan na' lizre xia, ne buluchéaje' le' du xia, da na' bene' lawe' da dxezrá'a Herodías le'. Herodías nigá guque' zru'ula Felipe, benne' biche Herodes. Herodes nigá bequ'e nu'ula' chee' guque' zru'ule'. <sup>18</sup> Gunná Juan, dx'e'e Herodes:

—Quebe dxal-la' súałenu' zru'ula bi bichu'.

<sup>19</sup> Chee' le' na' Herodías guzr'e' Juan, ne guca lazre' gútete' le'. Quebe guca chee' <sup>20</sup> lawe' da neze Herodes naca Juan nigá tu benne' xrlátaje, ne benne' naque' tuze nen Dios, na' bezrebe' le'. Chee' le' na' quebe be'e lataj Herodías na' gútete' Juan nigá, na' lácala quebe guxéajni'ing' ca naca xúgute' da bchalaj Juan, Herodes nigá bze nague' chee' du lazre'.

<sup>21</sup> Herodías na' bzrélene' ájala gun'e' ca da dxaca lazre' gate na' guxú'u laní ca gula la Herodes. Gulé'aj gulagu benne' xíchaje ca', ne benne' dxelenná be'e lu wedil-la, ne benne' zaj naque' blau lu xezre ca' zaj nababa Galilea. <sup>22</sup> Nadxa guxú'u bi nu'ula chee' Herodías na' lu xu'u naga dxelé'aj dxelawe', ne bxá'abe' lau benne' ca'. Bezaca ba lazre' Herodes

ca bxá'abe', ne tuze ca belún benne' ca' zaj zra' dxelawę' tu zren nen le'.  
Gunná wenná bea Herodes, dxę'e nu'ula cuide' nigá:

—Gunaba neda' ca da dxedánenu', na' gunna' na chiu'.

<sup>23</sup> Guchebe lazre' Herodes, ne bzétaje' Dios gunézruje' bíteteze da nábabe', lácala nábabe' gáchajte naga dxenná be'e le'.

<sup>24</sup> Nadxa nu'ula cuide' nigá bdxúajbe', xeajchálajlebe' xrnabe', gunabe':  
—¿Bizra naba'?

Gunná xrnabe':

—Gunaba xichaj Juan, bénnea' bchuę' bénneache nisa.

<sup>25</sup> La guxu'ute nu'ula cuide' nigá naga zua wenná bea, na' gunabe', dxę'ebe' le':

—Dxaca lazra' gunnu' neda' na'a tu lu xé'ena xichaj Juan, bénnea' bchuę' bénneache nisa.

<sup>26</sup> Nadxa wenná bea nigá bewí'inele'e, ne lawe' da ba bzétaje' Dios, na' belénete benne' ca' da gunné', quebe guca lazre' guzrunę' ca da gunaba bi nu'ula nigá. <sup>27</sup> Cheę le' na' gusel-la wenná bea tu benne' dxęe' wedilla, ne gunná bé'ene' le' cheajxrí'e xichaj Juan na'. <sup>28</sup> Guxíaj benne' nigá lu xu'u lizre xia, na' bdxixre' xichaj Juan na', ne bexu'e na tu lu xé'ena. Bnézruje' na bi nu'ula na', na' lebe' bnézruje' na xrnabe'.

<sup>29</sup> Gate gulénneze benne' ca' da nigá, benne' ca' bsede Juan, na' xeajlex-exrí'e beł-la' dxen cheę', na' xeajlecáchetę' na.

*Jesús dxugawe' chi xun gaxúa benne' biu*

*(Mt. 14.13-21; Lc. 9.10-17; Jn. 6.1-14)*

<sup>30</sup> Ca gudé na' belexezrín benne' gubáz ca' cheę Jesús naga zua Le', ne buluzenne' Le' xúgute ca da belunę', ne ca da bulusédenę' benne' ca' naga xjaque'. <sup>31</sup> Nadxa gunná Jesús, dxę'e benne' ca':

—Le chu'u. Chéajdxu xezí' lázredxu chadite' naga xu'u lataj.

Gunné' caní lawe' da dxesá'aca benne' dxesá'aca, ne dxellexezrín benne' dxellexezrín, na' quebe dxelu'e lataj xelawę'. <sup>32</sup> Nadxa Jesús ne benne' gubáz cheę' ca' belexexú'e leze' tu lu da dxedá lawe' nísadau', na' belezrine' tu lataj naga quebe nu chilá' benne'. <sup>33</sup> Benne' zan ca' belelé'ene' ca' zjaque', ne belexexúnbe'e Jesús, na' gusá'aca chégüę' xjá'aque' na'. Benne' xúgute xezre ca' belezrine' lataj na' nédxudxa ca Jesús.

<sup>34</sup> Gate bedxúaj Jesús lu da dxedá lawe' nísadau', na' blé'ene' benne' zante, ne hexache lazre' le' lawe' da zaj zre'e ca zrila' ca' quebe zua benne' dxuxú'e leba'. Na' guzú lawę' dxusédenę' benne' ca' da zante. <sup>35</sup> Ca gula guzré', belezrín benne' ca' dxusede Jesús lau Le', na' gulé'e Le':

—Ba dxaca waxrinne, na' quegá nu lizre benne' zua lataj nigá. <sup>36</sup> Besella benne' caní cheę cheajxaque' xezre ca' zaj nnita gálaze cheę xezezí'e xeta xelawę' lawe' da quebe bi de nigá da xelawę'.

<sup>37</sup> Na' gunná Jesús, dxę'e le':

—Le gunezruj le'e da xelawę'.

Na' gulenné', dxelé'e Jesús:

—¿Waca chéajntu' cheajgá'untu' xeta xtila, quízrujntu' lazruj cheę chupa gaxúa zra cheę gugágudxu benne' zan caní?

<sup>38</sup> Na' gunná Jesús, dxę'e le':

—¿Bal-la xeta xtila nápa'e? Le cheajnná'.

Ca gulénzene', na' gulenné', dxelé'e Jesús:

—Gazxu' xeta xtila, ne chupa béladau'.

<sup>39</sup> Nadxa gunná be'e Jesús gulebé'e xúgute bénneache ca' tu cue' weaj lu xrguíe xa'a. <sup>40</sup> Na' gulebé'e tu cue' weaj, du tu gaxúe', du chi xuné'. <sup>41</sup> Nadxa Jesús béxrue' gazxu' xeta xtila ca', ne da chupa béladau'. Na' guchisa lawe' xabaala, gunabe' lau Dios gun la'azxe' na, na' bzúzruje' xeta xtila ca', ne bnézruje' na benne' ca' dxusédene' chee gulísié' na chee benne' ca'. Cá'unqueze gudísié' da chupa béladau' chee xúgute benne' ca'. <sup>42</sup> Na' gulagu xúgute' ne gulélajte'. <sup>43</sup> Nadxa buluxutube' ca da begá'ana chee xeta xtila, ne chee béladu ca', na' guca chazrinnu xcuite xca'a. <sup>44</sup> Benne' ca' gulawe' xeta xtila ca' zaj naque' chi xun gaxúa benne' biu.

*Dxezá Jesús lawe' nísadau'*  
(Mt. 14.22-27; Jn. 6.16-21)

<sup>45</sup> La gunná bé'ete Jesús benne' ca' dxusédene' gulu'e lu da dxedá lawe' nísadau' chee gulelague' nísadau' na' nédxudxa ca Le', chee xelexezrine' lu xezre Betsaida dxácate Le' dxuzé' dizra' bénne' ca'. <sup>46</sup> Ca gudé bze' dizra' benne' ca', na' guzé'e zéaje' lu xi'a zeajchálajlene' Dios. <sup>47</sup> Gate gula guxrínnequeze, ba zeaj da dxedá lawe' nísadau' na' gachaj lawe' nísadau', na' begá'ana Jesús tuze' lu xu dxu'a nísadau'. <sup>48</sup> Gate blé'ene' ca dxelezraga lawe' dxulusé'e da dxedá lawe' nísadau' lawe' da za be' na', dxuzrí'i na da dxedá lawe' nísadau' na', na' gula balá' gubiga Jesús naga zaj zré'e, dxezé'e lawe' nísadau' na', ne guca lazre' té'e lau da dxedá lawe' nísadau' na'. <sup>49</sup> Gate belelé'ene' Le' ze'e lawe' nísadau' na', guléquene' da dxedá dxela, na' gulebezre xe'e. <sup>50</sup> Belelé'e xúgute' ca dxezé'e lawe' nísadau', na' belezrébele'e. Na' gunná Jesús, dxe'e benne' ca' dxusédene':

—Ga zrébele. Neda' nigá. Le gun chuchu lázrele.

<sup>51</sup> Nadxa guluén Jesús lu da dxedá lawe' nísadau' naga zaj zré'e, na' guleza be' na'. Na' guleque zréajene', ne belexebánele'ene', <sup>52</sup> lawe' da quebe ne xelájni'ine' ca naca xel-la waca zren da bene' chee xeta xtila ca', lawe' da ne dxun zide' xichaj lázrdawe'.

*Dxexún Jesús benne' we' ca' lu xezre Genesaret*  
(Mt. 14.34-36)

<sup>53</sup> Gate na' gulelague' nísadau', belezrine' lu xezr la xu chee benne' xezre Genesaret, na' buluchéaje' xaga da dxedá lawe' nísadau' dxu'a nísadau' na'. <sup>54</sup> Ca beledxúaje' lu da dxedá lawe' nísadau', la belexexúnbeate bénneache ca' Jesús. <sup>55</sup> La gusá'aca chégute' zjaque' lu xezre ca' xeajlexrí'e benne' we' ca' tu tu lu ta'a, na' zeajlegüé'e le' naga zaj nézene' xedé Jesús. <sup>56</sup> Gáteteze xézredu ca', ne xezre ca', ne le'e xixre' naga dxedé Jesús, na' buluzúe' benne' we' ca' du la neza, ne gulata' xuene' Jesús gunézruje' lataj cheajletaze' zra lané', na' xúgute' benne' ca' xeajleté' zra lané' belexexácate'.

## 7

*Da dxucá'ana sban bénneache*  
(Mt. 15.1-20)

<sup>1</sup> Benne' fariseo ca' nen bal-la benne' dxuluxuzájle'e da bdxixruj be'e Moisés, benne' gusá'aque' Jerusalén, belezrine' lau Jesús. <sup>2</sup> Benne' caní belelé'ene' ca dxelún bal-la benne' dxuséde Jesús, dxelawe' xeta ne quebe zaj naxibe ne'e ca dxelenná bea benne' xudau' ca'. Chee le' na' gulenná benne' Jerusalén ca':

—Zaj naca sban na' benne' ca' dxuséde Jesús.

Nadxa gulezí tizre' le'.

<sup>3</sup> Caní gulenná benne' ca' lawe' da zjácale benne' xudau' fariseo ca', ne xúgute benne' judío ca' ca naca da belún xra xtau benne' ca', quebe dxelawe' xeta che quebe zaj naxibe ne'e zane' lasa. <sup>4</sup> Gate zjaque' lawe' xi'a wa'u, ca dxelexzrine' quebe dxelawe' xeta che quebe xelibe ne'e ca zaj nadxixruj bea benne' xudau' ca'. Cá'anqueze dēdxá da zante' da zjácalene', ca xexadxē zriga' da dxelé'aje', ne zruaga, ne zriga xé'ena, ne da naga dxelásiē'. <sup>5</sup> Nadxa benne' fariseo ca', ne benne' ca' dxuluxuzájle'e da bdxixruj be'e Moisés gulénabene' Jesús:

—¿Bizr chee na' quebe zjácale benne' ca' dxusédenu' ca naca da gulún benne' gula? Dxelawe' xeta, zaj naca sban ne'e.

<sup>6</sup> Na' bechebe Jesús:

—Láweze dxunle da xrlátaje. Lu lázrdaule xu'ule da calēla. Cháwedau' bchálajqueze Isaías ca nácale le'e gate na' bzuaje' caní:

Bénneache caní dxelúe lánē' neda' nen dxú'aze'.

Xichaj lázrdawe' ca' zaj nacuasa na neda'.

<sup>7</sup> Níteze naca xel-la ba lánana da dxelu'e neda',

lawe' da dxulusédene' da zaj nadxixruj bea bénneacheze.

<sup>8</sup> Caní naca xca', le'e dxuzúale chalá'ala ca da nadxixruj bea Dios, na' zéajlele ca naca da gulún bénneache ca dxíbele zruaga, ne zriga' chee, ne zánete da caní da dxunle.

<sup>9</sup> Na' gunnadxe', dxe'e benne' ca':

—Chalá'ala dxuzúale ca da nadxixruj bea Dios chee zéajlele ca naca da tu dxúnzquezle. <sup>10</sup> Caní gunná Moisés na': "Gudapa ba lánana xra xrna'u." Cá'anqueze gunné': "Che tu benne' nne' schanni' chee xre', che xrne'e, con gátequeze bénnea'." <sup>11</sup> Le'e dxennale, "Che tu benne' xe'e xra xrne'e; Corbán," da zéaje na, quebe gaca gácalēna' le'e lawe' da bache bnézruja' chee Dios ca naca da dē chia'. <sup>12</sup> Che ca'an dxenné', nadxa le'e québedxa dxu'ule le' lataj gácalēne' xra xrne'e. <sup>13</sup> Gate dxunle caní dxuzúale chalá'ala xrtizra Dios, chee gunle ca da zéajlele. Na' zéajquezle dxunle zánete da zaj naca na caní.

<sup>14</sup> Xecha lasa gunné' Jesús bénneache ca', na' gunné', dxe'e le':

—Le guzé nágale xúgutele, ne le chéajni'i. <sup>15</sup> Netú da dxe'aj dxagu benne' quebe seque gucá'ana na le' sban. Da dxedxuaj na lu xichaj lázrdau bénneache, le na' dxucá'ana na le' sban. <sup>16</sup> Le'e zua nágale, le xene.

<sup>17</sup> Gate gucuasa Jesús naga zaj zra' benne' ca', na' guxú'e lu xu'u. Nadxa benne' ca' dxusédene' gulénabene' Le' ca naca chee da dxulé'e nigá.

<sup>18</sup> Nadxa gunná Jesús, dxe'e le':

—¿Cá'anqueze le'e quebe dxéajni'ile? ¿Quebe dxéajni'ile xúgute da dxe'aj dxagu bénneache quebe seque gucá'ana na le' sban <sup>19</sup>lawe' da quebe dxu'u na lu xichaj lázrdawe'. Dxu'u na lu le'e, na' dxedxuaj na?

Cate' gunná Jesús caní blé'ene' zaj naca chawe' xúgute da dxe'aj dxágudxu. <sup>20</sup> Na' gunnadxe':

—Ca naca da dxedxuaj na lu xichaj lázrdau bénneache, le na' dxucá'ana na le' sban <sup>21</sup>lawe' da lu xichaj lázrdau bénnea' dxeledxúaj ca da calēla da dxuwía lazre', ne dul-la da dxucá'ana ditaj xel-la wechaga na', ne dul-la chee da sban, ne wēte benne', <sup>22</sup> ne xel-la gubán, ne da dxezá lazre' gapa da naca chee benne' xula, ne da calēla ca', ne xel-la wezrí xe', ne da dxezá lazre' da sban, ne xel-la zre'e lazre', ne xel-la wechalaj dizra' bizruj, ne

xel-la dxun szren cuina, ne xel-la dxuchalaj bigaze. <sup>23</sup> Xúgute da calela caní dxeledxúaj na lu xichaj lázrdau bénneache, ne dxuluxrinnaj na le'.

*Tu nu'ula quebe naca judío dxeajlí lazre' Jesús  
(Mt. 15.21-28)*

<sup>24</sup> Na' bezá'a Jesús naga zue', guxíaje' lu xezre ca' zaj nababa xezre Tiro, ne xezre Sidón. Guxú'u Jesús tu lu xu'u, ne quegá guca lazre' nu xene. Quebe guca gache'. <sup>25</sup> La gunézetę tu nu'ula zua Jesús na'. Nu'ula nigá zua tu zrí'ine' nu'ula, xu'ube' be' xriwe'. Bla' nu'ula' naga zua Jesús, ne bzu zribe' lawe'. <sup>26</sup> Nu'ula nigá quebe naque' nu'ula judío. Naque' nu'ula cheę tu xezre nababa xezr la xu Sirofenicia. Bzrine' lau Jesús, na' gunabe' Le' xebéaje' be' xriwe' da xu'u zrí'ine' nu'ula. <sup>27</sup> Gunná Jesús, dxe'e' nu'ula':  
—Be' lataj xelagu nedxu zrí'ine benne' lu xu'u, lawe' da quebe naca chawe' cúadxu xeta xtila cheę bidu ca', ne gunézrujdxu na cheę bécudu ca'.

<sup>28</sup> Na' gunná nu'ula':

—Awe', Xran, san bécudu ca' zaj zra' zran ga dxelágube' dxeláguquezba' xeta bizruj da dxuluzexruj bidu ca'.

<sup>29</sup> Nadxa gunná Jesús:

—Nę cheę dizra' da ba gunnéu', bexíaj na'a. Bache bedxúaj be' xriwe' lu beł-la' dxen cheę zri'inu' nu'ula.

<sup>30</sup> Gate bezrín nu'ula' lizre', na' blé'ene' zrí'ine' nu'ula dębe' lu da naga dxásebe', na' be' xriwe' ba bedxúaj na lu beł-la' dxen cheębe'.

*Dxexún Jesús tu benne' nacuézruę', ne quebe dxaca nnie'*

<sup>31</sup> Nadxa bedxúaj Jesús, bezé'e' naga nababa xezre Tiro, na' gudétię' naga nababa xezre Sidón, ne xezre ca' zaj nababa Decápolis, na' bezrine' dxu'a nísadau' cheę xezr la xu Galilea. <sup>32</sup> Nadxa bedajleguá' benne' ca' tu benne' nacuézruę', ne quebe dxaca nnie', na' gulenábe' Jesús xrua ne'e' benne' nigá. <sup>33</sup> Guché Jesús benne' nigá chalá'ala naga zaj zra' benne' ca', na' bdię' zrube ne'e' lu naga bénnea', na' bzre'e' zrene', ne bte' lawe' luzre bénnea'. <sup>34</sup> Nadxa la gunná'te' xabáa, ne gucá'a lazre', gunné':

—Efata.

Dizxa' nigá zéaje na: Bxalaj.

<sup>35</sup> Ca gunné' caní, na' bxalaj naga benne' cuezru nigá, ne bexaca luzre'. Nadxa guca bchálaje'. <sup>36</sup> Na' gunná Jesús, dxe'e' benne' ca' quebe nu xelé'e' ca da bene'. Lácala gunná be'ene' le' caní, buluchílujdxę' dizra' ca da bene'.

<sup>37</sup> Benne' ca' zaj zra' na' belexebánele'ene', dxelenné':

—Xúgute dxune' cháwedau'. Dxexune' benne' cuezru ca', na' dxeléntene', ne dxexune' benne' ca' quebe dxaca nnie', na' dxelennétię'.

## 8

*Dxugagu Jesús chua gaxúa benne' biu  
(Mt. 15.32-39)*

<sup>1</sup> Ca lu zra ca' zaj nazraga benne' zan, na' quebe bi dę da xelawe'. Ca'an guca gunné Jesús benne' ca' dxusédenę', na' guzre' le':

<sup>2</sup> —Neda' dxexache lazra' benne' caní lawe' da bache guca chunna zra zaj zre'e' nigá nen neda', ne quebe bi dę da xelawe'. <sup>3</sup> Che ca' xesel-la' le' lizre' quebe xelawe', na' xelate ni'a ne'e' la neza lawe' da zá'aca bal-le' zitu'.

<sup>4</sup> Na' belexechebe benne' ca' dxuséde Jesús, dxelé'e' Le':



—¿Ájazra gundxu gunézrujdxu da xelawę' nigá, ga quebe nu chilá' benne'?

<sup>5</sup> Jesús bchebe' le':

—¿Bal-la xeta xtila nápa le'e?

Benne' ca' gulenné':

—Gazre na.

<sup>6</sup> Nadxa gunná be'e Jesús xelebé' xúgute bénneache ca' lu xu. Nadxa guquę'e xeta xtila, ne guzre' Dios:

—Xcalenu'.

Nadxa bzúzruje' na, ne bnézruje' na benne' ca' dxusédenę', na' benne' caní gulisie' na lávela xúgute bénneache ca'. <sup>7</sup> Zaj nápaqueze' tu chupa béladau'. Na' Jesús gunabe' Dios gunę' na chawe'. Nadxa gunná bé'ene' gulise benne' ca' le' na. <sup>8</sup> Gulagu xúgute bénneache ca', ne belezúale'ę' chawe'. Ca' gudé na' bulusuzrę'ę' gazre xcuite xca'a nen xeta bizruj da belegá'ana. <sup>9</sup> Benne' ca' gulawę' zaj naque' ca' chua gaxúa benne' biu. Nadxa Jesús bze' benne' ca' dizra'. <sup>10</sup> Nadxa guxú'ę' lu da dxedá lawe' nísadau' nen benne' ca' dxusédenę'. Xjaque' lu xęzr la xu cheę benne' xęzre Dalmanuta.

*Dxelenabe' Jesús gunę' tu xel-la waca*

(Mt. 16.1-4; Lc. 12.54-56)

<sup>11</sup> Nadxa belezrín benne' xudau' fariseo ca' ga na', ne gulezú lawe' dxulutil-le' dizra' nen Jesús. Gulenabe' Jesús gunę' tu xel-la waca da za xabáa, cheę xelenézenę' bi xel-la waca nape'. <sup>12</sup> Nadxa Jesús gucá'a dxgualazre', gunné':

—¿Bizr cheę na' dxelenaba benne' caní guna' tu xel-la' waca da za xabáa? Da li dxapa' le'e, québequeze bi xel-la waca guna' lau le'e.

<sup>13</sup> Nadxa Jesús bca'anę' benne' ca', na' bexu'ę' lu da dxedá lawe' nísadau', dxexiaje' xechelá'a cheę nísadau'.

*Da naca ca' cua zichaj cheę xeta xtila*

(Mt. 16.5-12)

<sup>14</sup> Gulal-la lazre' benne' ca' dxusede Jesús xelu'ę' da xelawę', na' zaj nu'ę' tuze xeta xtila lu da dxedá lawe' nísadau'. <sup>15</sup> Nadxa Jesús gunná bé'ene', dxę'ę' benne' ca':

—¡Le nna'xque nigá! Le guxúe cuínale da naca cua zichaj cheę xeta xtila cheę benne' xudau' fariseo ca', ne ca naca cua zichaj cheę xeta xtila cheę Herodes.

<sup>16</sup> Nadxa benne' ca' dxusede Jesús gulé ljwezre':

—Le' dxenné' caní lawe' da quebe de xeta xtila gágudxu.

<sup>17</sup> Dxeque be'e Jesús da dxelenné', na' guzre' le':

—¿Bizr cheę na' dxennale quebe de xeta xtila gágudxu? ¿Quebe ne chéajni'ile ne quebe dxeque be'ele? ¿Nácale'ę' zide' lázrdaule? <sup>18</sup> ¿Quebe dxelé'ele nen xiaj laule, ne quebe dxenle nen nágale? ¿Quebe dxeajsá lázrele? <sup>19</sup> Gate na' bgawa' chi xun gaxúa benne' biu nen gazxu' xeta xtila, ¿bal-la xcuite xca'a xeta bizruj da becá'ale?

Benne' ca' gulenné':

—Chazrinnu na.

<sup>20</sup> Na' gunná Jesús:

—Na' gate na' bgawa' chua gaxúa benne' biu nen gazre xeta xtila, ¿bal-la xcuite xca'a da zaj zratę becá'ale?

Le' gulenné':

—Gazre na.

<sup>21</sup> Nadxa Jesús guzre' benne' ca':

—¿Ne la gázqueze quebe dxéajni'ile?

*Jesús dxexune' tu benne' la chul-la*

<sup>22</sup> Ca gudé na' Jesús, ne benne' ca' dxusédene' belexezrine' lu xezre Betsaida, na' benne' Betsaida guleché'ē tu benne' la chul-la lau Jesús, na' gulata' xuenē' Le' guté' le'. <sup>23</sup> Jesús gudele' na' benne' la chul-la, ne bebéaje' le' dxu'a xezre. Na' btupe' zrene' lu xiaj lawe', ne guxrúa ne'ē le'. Na' bchebe' le' chete dxelé'ene'. <sup>24</sup> Benne' la chul-la gunné'ē, na' gunné':

—Dxelé'eda' benne' ca', zaj naque' ca weaj xaga, na' dxesí'aque'.

<sup>25</sup> Nadxa Jesús guxrúa ne'ē xiaj lawe' da xula, na' benne' na' gunná' dxgüē'. Na' bexaque', ne xúgute' bache dxelé'ene' cháwedau'. <sup>26</sup> Nadxa Jesús besel-le' le' lizre', dxe'ē le':

—Quebe chu'u lu xezre nigá, ne quebe nu xu'u caní.

*Pedro dxenné' naca Jesús benne' nasel-la Dios*

*(Mt. 16.13-20; Lc. 9.18-21)*

<sup>27</sup> Ca gudé na' Jesús, ne benne' ca' dxusédene' xjaque' lu xézredu ca' zaj nababa xezre Cesarea naga dxenná bea Filipino. Dxácatē zaj xu'ē neza bchebe Jesús benne' ca':

—¿Nuzra na' dxelenná benne' naca' neda'?

<sup>28</sup> Belexechebe':

—Bal-la benne' dxelenné' nacu' Juan, bénnea' bchue' bénneache nisa. Benne' xula dxelenné' nacu' Elías, bénnea' bchálaje' waláz cheē Dios. Benne' xula dxelenné' nacu' tu benne' xula bchálaje' waláz cheē Dios.

<sup>29</sup> Nadxa Jesús bchebe' le':

—¿Gazra le'e? ¿Nuzra dxennale le'e naca' neda'?

Pedro gunné':

—Lue' nacu' Cristo, benne' nasel-la Dios.

<sup>30</sup> Nadxa gunná be'e Jesús benne' ca'. Gunné':

—Quebe nu xēle ca'.

*Dxuchalaj Jesús ca dxal-la' gatie'*

*(Mt. 16.21-28; Lc. 9.22-27)*

<sup>31</sup> Nadxa guzú lau Jesús dxulé'ene' benne' ca' ca dxal-la' sáca'le'ē Le', Benne' Guljē' Bénneache, ne ca xelún benne' gula cheē judío ca', ne benne' xíchaje' ca' cheē bxruze ca', ne benne' dxuluxuzájle'ē da nadxixruj bea Dios, xuluzúē' Le' chalá'ala. Nadxa guzre' le' welútiē' Le', san xebane' zra guxunne zra. <sup>32</sup> Da nigá guzre' le' caníqueze. Nadxa Pedro guché'ē Jesús chalá'ala, ne guzú lawe' dxedil-le' Le'. <sup>33</sup> Jesús bexéchaje', ne gunné'ē benne' ca' dxusédene', na' gudil-le' Pedro, dxe'ē le':

—Gucuasa cuíta' nigá, lue', da xriwe'. Quebe dxéquenu' da nigá ca dxun Dios. Ca dxun bénneache dxunu'.

<sup>34</sup> Nadxa Jesús gunné' benne' ca' dxusédene', ne xúgute' bénneache ca', na' guzre' le':

—Che núlale dxaca lázrele gunle neda' tuze, dxal-la' guzúale chalá'ala xúgute' da dxezá lázrele le'e, ne gácale ca tu benne' zéaje' cheē te'ē xaga béguaj, na' gunle neda' tu zren. <sup>35</sup> Che tu benne' dxaca lazre' guselé' xel-la nabán cheē, benne' nigá gunitiē' xel-la nabán cheē'. Bénnea' gunitiē' xel-la nabán cheē' ne chia' neda', ne ne cheē dizra' chawe' chia', benne' nigá guselé' xel-la nabán cheē'. <sup>36</sup> Che tu benne' gape' xúgute' da naca cheē xezr la xu nigá, na' gunitiē' bénne'du xu'e, ¿bízraqueze da ba neza gaca na

chee b́ennea'? <sup>37</sup> Quebe bi gaca gunezruj tu benne' chee guselé' b́enne' du xu'e. <sup>38</sup> Che tu benne' gapa stu'e chia' neda', ne chee dizra' chawe' chia' lau b́enne' caní, benne' dxulucá'ana Dios, ne dxelún dul-la, la gaze neda', Benne' Gulje' B́enneache, gapa stú'queza' chee b́ennea' gate xida' nen xel-la szren chee Xra', ne nen gubáz chee xabáa lá'azxa ca'.

## 9

<sup>1</sup> Cá'anqueze guzre Jesús benne' ca':

—Da li dxapa' le'e, zaj zra' nigá benne' quebe xelatíe' nédxula ca xelélé'ene' xida xel-la dxenná bea chee Dios nen xel-la waca chee'.

*Ca guca gate bcha ca gunná Jesús*  
(Mt. 17.1-13; Lc. 9.28-36)

<sup>2</sup> Ca gudé xrupa zra, guché Jesús Pedro, ne Jacobo, ne Juan, na' guxíajlene' benne' canize tu lu xi'a sibe. Na' bcha ca gunná Jesús lau benne' ca'. <sup>3</sup> Zra lana Jesús bexaca na chiche ca bezxe' da dxágute' na laudxu. Quegá nu chilá' benne' lu xezr la xu gaca quibe' zra lane' chee xegá'ana na chiche ca guca zra lana Jesús. <sup>4</sup> Na' benne' ca' dxusede Jesús belelé'ene' Elías, ne Moisés, benne' gulate nédxudaute', dxuluchálajlene' Jesús. <sup>5</sup> Pedro guzre' Jesús:

—Benne' wesede, cháwele'e naca zradxu nigá. Guntu' chunna xu'u lágadau', tu chiu', ne tu chee Moisés, ne tu chee Elías.

<sup>6</sup> Caní gunná Pedro lawe' da dxelezrebe benne' ca' dxusede Jesús, na' Pedro quebe nézeng' ca da dxenné'. <sup>7</sup> Nadxa betaj tu beuj naga zaj zre'e, da bcache na le', na' lu beuj na' belenne' tu chi'i benne', gunné':

—Benne' nigá naque' Zri'ina' nazrí'ite' lazra'. Le xen da dxenné'.

<sup>8</sup> Gate gulenné'e, québedxa nu nalá' nen le', san tuze Jesús.

<sup>9</sup> Dxácaté dxelexétaje' lu xi'a na', gunná be'e Jesús benne' ca' quebe nu xuluchálajlene' ca naca da belelé'ene' gate te na' xebán Benne' Gulje' B́enneache ládujla benne' gate. <sup>10</sup> Chee le' na' gulezúe' zrize ca naca da ba guca. Buluchebe ljwezre':

—¿Bizra zéaje da na', xebane' ládujla benne' gate?

<sup>11</sup> Nadxa buluchebe' Jesús:

—¿Bizr chee na' dxelenná benne' ca' dxuluxuzájle'e da nadxixruj bea Dios dxal-la' xelá' Elías nédxula ca Cristo?

<sup>12</sup> Bechebe Jesús, na' guzre' le':

—Da li xelá' Elías nedxu, ne gucá'ana chawe' xúgute. ¿Bizra dxenná da naxúaj na lu xiche chee Dios ca gaca chia' neda', Benne' Gulje' B́enneache? Dxenná na da zan da saca', na' xuluzúa b́enneache neda' chalá'ala. <sup>13</sup> Neda' dxapa' le'e, ba bla' Elías, na' belune' chee' ca naca xúgute da gulaca lazre' ca da dxenná na lu xiche chee Dios ca da dxal-la' gaca chee'.

*Dxexún Jesús tu benne' cuide' xu'ube' be' xriwe'*  
(Mt. 17.14-21; Lc. 9.37-43)

<sup>14</sup> Ca gudé na' belexezrine' naga zaj zra' kezícadxa benne' ca' dxusede Jesús, na' belelé'ene' benne' zan zaj naxéchaje' le', ne zaj zráqueze na' benne' dxuluxuzájle'e da nadxixruj bea Dios, na' dxulutíl-lalene' le' dizra'.

<sup>15</sup> Gate belelé'ene' Jesús, na' xúgute' belexebánene', na' gusí'aca chégüe' naga zua Jesús, ne bulugape' Le' diuzre. <sup>16</sup> Ca'an guca, Jesús bchebe' benne' ca':

—¿Bizra na' dxdíl-lalele benne' ca'?

<sup>17</sup> Nadxa tu benne' ze' ga na' bechebe':

—Benne' wesede, nache'a zri'ina' nigá chee xexunu'-be' lawe' da xu'ube' be' xriwe' da ba nun na lebe' bi quebe dxaca nnebe'. <sup>18</sup> Gáteteze na' dxu'ube' da xriwe', na' dxel-la na lebe', ne dxin na lebe' lu xu. Dxezria bzrina' xú'abe', ne dxagu lázxabe'. Chee le na' ba dxéxrujle'ebe'. Ba gunaba' benne' ca' dxusédenu' xelexebéaje' be' xriwe' na', san quebe gulezéquene'.

<sup>19</sup> Bechebe Jesús:

—Le'e, benne' quebe dxéajlele chia'. ¿Ájate dxal-la' súalena' le'e? ¿Ájate dxal-la' gaca' benne' zren lazre' nen le'e? Le cheajxri' bi cuide' na' nigá.

<sup>20</sup> Na' xeajlexri'e-be'. Gate be' xriwe' na' ble'e na Jesús, na' ben na gudel-la chuna' bi cuide' na', ne gudinna lebe' xu, na' dxeboxre dxetúl-labe' lu xu, ne guzria bzrina' dxú'abe'. <sup>21</sup> Nadxa bchebe Jesús xrabe':

—¿Bátate dxezácabe' caní?

Gunná xrabe':

—Gate nácatébe' bidau'. <sup>22</sup> Zane' lasa be' xriwe' na' dxugú'u na lebe' lu xi', ne lu nisa chee gute na lebe'. Che wazéquenu' bi gunu' cheebe', bexache lazre' netu', ne gúcalé netu'.

<sup>23</sup> Na' guzre Jesús le':

—Che wazéquenu' lue' chéajle'u chia', xúgute wazeque chee benne' dxéajle'e chia'.

<sup>24</sup> Nadxa xra bi cuide' nigá gunné' zizraj:

—Dxéajle'a chiu'. Gúcalé neda' chee chéajle'dxa'.

<sup>25</sup> Gate ble'e Jesús dxelezraga benne' zan, na' gudil-le' be' xriwe' na', dxenné':

—Lue', be' xriwe', dxunu' benne' quebe dxaca nnie', ne cuezru, neda' dxenná be'eda' lue' xedxúaju'. ¡Bsan bi cuide' nigá! ¡Québedxa xexú'u lu bel-la' dxen cheebe'!

<sup>26</sup> Na' be' xriwe' na' gudxezre xa'a na, ne ben na gudel-la chuna' bi cuide' na', na' bedxúaj na. Na' begá'anabe' ca tu benne' gate. Ca'an guca, gulenná benne' zan ca':

—Ba gútebe'.

<sup>27</sup> Nadxa gucá'a Jesús na'be', bechise'-be'. Na' benne' cuide' na' bezebe'.

<sup>28</sup> Nadxa guxú'u Jesús tu lu xu'u, na' benne' ca' dxusédené' buluchebe' Le' naga zue' tuze':

—¿Bizr chee na' quebe guzéquentu' netu' xebéajntu' be' xriwe' na'?

<sup>29</sup> Nadxa Jesús guzre' benne' ca':

—Ca naca be' xriwe' caní séquele xebéajle na che ná bale lau Dios, ne gunle gubasa.

*Jesús dxuchálaje' da xula ca gaca gate gatie'*

*(Mt. 17.22-23; Lc. 9.43-45)*

<sup>30</sup> Gate besí'aque' naga zaj zre'e, na' belexedéé' naga nababa Galilea. Jesús quebe guca lazre' nu neze ga zue', <sup>31</sup> lawe' da dxuzéajni'ine' benne' ca' dxusédené', na' guzre' le':

—Zua tu benne' gudéé' neda', Benne' Gulje' Bénneache, lu na' benne' ca' dxeledábague' neda', na' xelútié' neda', san gate gaca chunna zra natia', na' xebana'.

<sup>32</sup> Benne' ca' quebe guléajni'ine' ca da dxé'e le', ne belezrebe' xuluchebe' Le'.

*Nu benne' naque' blau*

*(Mt. 18.1-5; Lc. 9.46-48)*

<sup>33</sup> Nadxa belezrine' lu xezre Capernaum, na' gate zaj zre'e lu xu'u na', bchebe Jesús benne' ca' dxusédene':

—¿Bizra dizra' dxutíl-laléle ljwézrele za'le la neza?

<sup>34</sup> Gulezré'e zrize lawe' da bulutil-le' dizra' la neza na' che nule' nácadxé' benne' blau. <sup>35</sup> Nadxa Jesús gudxé'e, na' gunné' benne' chazrinnu, benne' ca' dxusédene', na' guzre' le':

—Che núlale dxaca lázrele gácale benne' blau, dxal-la' gácale ca benne' bzebe, ne gunle zrin chee xúgutę bénneache.

<sup>36</sup> Nadxa guqué'e tu bidau', na' bzuę lebe' gachaj lawe' benne' ca'. Na' bnide'-be', ne guzre' benne' ca':

<sup>37</sup> —Benne' na' gape' ba lá'ana tu bidau' ca bidu nigá lawe' da nazrí'ing' neda', bénnea' gape' ba lá'ana neda', na' bénnea' gape' ba lá'ana neda', quegá tuza' neda' gape' ba lá'ana, cá'anqueze gape' ba lá'ana Xra' nasel-le' neda'.

*Benne' quebe dxedábage' dxi'u, dxácalęe' dxi'u*

*(Lc. 9.49-50; Mt. 10.42)*

<sup>38</sup> Nadxa Juan guzre' Jesús:

—Benne' Wesede, blé'entu' tu benne' dxebéaje' be' xriwe' da xu'u bénneache, dxuchínene' Lau' Lue', san bénnea' quebe dxune' dxi'u tu zren. Chee le' na' gúzrentu' le' québedxa gunę' ca'.

<sup>39</sup> Jesús guzre' benne' ca' dxusédene':

—Quebe bi xele le'. Che nu benne' gunę' tu xel-la waca, guchínene' La' neda', benne' nigá quebe gaca nne' schanni' chia'. <sup>40</sup> Caní naca na lawe' da benne' quebe dxedábage' dxi'u, dxácalęe' dxi'u. <sup>41</sup> Núteteze benne' gunęe' le'e tu zriga' nisa ne chee La' neda' lawe' da nácale chia' neda', Cristo, da líqueze dxennía', wazí'queze' da dxal-la' si'e.

*Ca naca da dxun na dxi'u benne' dul-la*

*(Mt. 18.6-9; Lc. 17.1-2)*

<sup>42</sup> Gunnadxa Jesús:

—Núteteze benne' gulé'eng' tu bidau' chee gunbe' dul-la, bidu na' dxéajlebe' chia', cháwedxa guchéajdxu tu xiaj zi'i lba bénnea', ne cheajchú'unadxu le' lu da situj chee nísadau'. <sup>43</sup> Che na'u dxun na gunu' dul-la, wendxa guchugu na'u na'. Cháwedxa xexú'u xabáa naga gaca banu' nen tuze na'u quézcala xexíaju' lataj ba xa' nen dxúpatę na'u, naga quebe xexula xi' da xezacu'. <sup>44</sup> Lataj ba xa' na' quebe xelate bzuga', be dxeláguba' benne' ca' dxelunę' da caleła, na' xi' na' cabata' xexúl-laqueze na. <sup>45</sup> Na' che ni'u dxun na gunu' dul-la, guchugu ni'u na'. Cháwedxa xexú'u xabáa naga gaca banu' nen tu ni'u, quézcala xexíaju' lataj ba xa' nen dxúpatę ni'u, naga quebe xexula xi'. <sup>46</sup> Lataj ba xa' na' quebe xelate bzuga', be dxeláguba' benne' ca' dxelunę' da caleła, na' xi' na' cabata' xexúl-laqueze na. <sup>47</sup> Che xiaj lau' dxun na gunu' dul-la, guleaj xiaj lau' na'. Cháwedxa xexú'u naga dxenná bea Dios nen tuze xiaj lau', quézcala xexíaju' lataj ba xa' nen dxúpatę xiaj lau'. <sup>48</sup> Lataj ba xa' na' quebe xelate bzuga', be dxeláguba' benne' ca' dxelunę' da caleła, na' xi' na' cabata' xexúl-laqueze na.

<sup>49</sup> 'Ca dxundxu gate dxugú'udxu zede' beła' da guzáladxu lu xi' chee xegá'ana chawe' na, ca'an gaca chee xúgutę benne'. Cá'anqueze dxugú'udxu zede' da dxuzézxedxu lau Dios. <sup>50</sup> Zede' na' naca na da chawe', san che xenite xel-la sna'a chee na, ¿ájala gundxu chee guchínedxu zede'

na? Le gaca le'e ca zede' chawe' na', ne le sua lu xel-la zri lázre' tule nen xetule.

## 10

*Ca naca chee benne' dxexelé'e nen zru'ule'*  
(Mt. 19.1-12; Lc. 16.18)

<sup>1</sup> Nadxa bedxúaj Jesús xezre Capernaum, na' guxiáje' naga nababa Judea xechalá'a xegu Jordán naga dxalaj gubizra. Na' belezraga bénneache zan naga zua Jesús, na' xecha lasa na' bsédené' le' cáqueze dxuné'. <sup>2</sup> Nadxa bal-la benne' xudau' fariseo ca' belezrine' lau Jesús, na' buluchebe' Le' chee da gun nne' Le' tu da quebe dxal-la' nne'. Buluchebe' Le':

—¿Waca tu benne' xelé'e nen zru'ule'?

<sup>3</sup> Nadxa bechebe Jesús:

—¿Bizra gunná be'e Moisés le'e?

<sup>4</sup> Na' belexechebe benne' ca':

—Benna Moisés lataj gunézrujdxu zru'uladxu tu xiche da dxenná na dxelá'adxu, na' gusandxu le'.

<sup>5</sup> Nadxa Jesús guzre' le':

—Caní gunná be'e Moisés lawe' da zaj naca zizraj lázrdaule le'e. <sup>6</sup> Gate nédxudau' gate ben Dios xúgute' da dxelé'edxu, na' bene' bénneache benne' biu, ne nu'ula, na' gunné': <sup>7</sup> “Chee le' na' benne' biu na' gusané' xruze xrne'e chee gaque' tuze nen zru'ule', <sup>8</sup> na' dxupe' xelaque' ca tuze benne'.” Ca' naca na, québedxa zaj naca chupe', san tuze benne' zaj naque'. <sup>9</sup> Chee le' na' netú benne' quebe dxal-la' xelé'e da nuchaga Dios.

<sup>10</sup> Gate zaj zra' lu xu'u benne' ca' dxusede Jesús buluchebe' Le' xetú lasa ca naca chee da nigá. <sup>11</sup> Na' Jesús guzre' benne' ca':

—Che tu benne' xelé'e nen zru'ule', ne xezúalene' nu'ula xula, dxíchuje' xrba chee wechaga na' lawe' da dxusebague' zru'ule' nedxu na' dul-la. <sup>12</sup> Cá'anqueze che tu nu'ula gusané' benne' chee', ne xezúalene' benne' xula, la gázqueze dxíchuje' xrba chee wechaga na' da dxusebague' benne' chee' dul-la.

*Jesús dxenabe' Dios gun chawe'e bidu ca'*  
(Mt. 19.13-15; Lc. 18.15-17)

<sup>13</sup> Nadxa bénneache ca' guleché'e bidu chee' ca' lau Jesús chee xrua ne'e lebe', na' benne' ca' dxusede Jesús gulezú lawe' dxeledil-le' benne' ca' zaj naché'e bidu ca'. <sup>14</sup> Gate ble'e Jesús da dxelune', na' bzre'e, ne guzre' le':

—Le güe bidu ca' lataj xeelá'abe' naga zua'. Quebe guzágale-be' lawe' da benne' zaj naque' ca' bidu caní xelu'e naga dxenná bea Dios. <sup>15</sup> Da li dxapa' le'e, che tu benne' quebe gape' ba lá'ana da dxenná bea Dios ca dxelún bidu caní, cabata' chu'u bennea' naga dxenná bea Le'.

<sup>16</sup> Nadxa gucá'a Jesús bidu ca', ne bnide'-be'. Guxrúa ne'e lebe', na' gunabe' Dios gun chawe'e-be'.

*Benne' cuide' nape' da gunní'a dxuchálajlene' Jesús*  
(Mt. 19.16-30; Lc. 18.18-30)

<sup>17</sup> Gate bexú'u Jesús neza, na' guzá chegu tu benne' biu, na' bzu zribe' lau Jesús, ne bchebe' Le':

—Benne' xrlátaje, bi dxal-la' guna' chee gapa' xel-la nabán zeajli canna?

<sup>18</sup> Jesús guzre' le':

—¿Bizr chee na' dxu'u neda' xrlátaje? Québedxa nu chilá' naca xrlátaje. Tuze Dios naque' xrlátaje. <sup>19</sup> Núnbeaquezu' ca da bdxixruj bea Dios gate na' gunné':

Quebe quichju' xrba chee wechaga na'.

Quebe gutiu' benne'.

Quebe cuanu' chee benne'.

Quebe nneu' chee nu benne' da quebe naca na.

Quebe gagu lanu'.

Gudapa ba lá'ana xra xrna'u.

<sup>20</sup> Nadxa bēnnea' bechebe':

—Benne' wesede, xúgute da caní dxuna' nácatea' bidau'.

<sup>21</sup> Na' Jesús gunné'ē le' xrtandau', ne guzre' le':

—Tu da dxexájrjenu'. Guxíaj xeajete xúgute da napu', na' bnezruj benne' xache' ca' dumí chee na. Nadxa gapu' da gunní'a xabáa. Na' gudá, gacu' ca tu benne' zéajē' chee te'ē xaga béguaj, ne ben neda' tuze.

<sup>22</sup> Gate bene' da nigá, na' benne' cuide' na' bewi'ine lázrele'ē, na' bexíajē' dxewí'ine' lawe' da nácale'ē benne' gunní'a.

<sup>23</sup> Nadxa Jesús gunné'ē ni naze, na' guzre' benne' ca' dxusédene':

—Stébetē naca chu'u benne' gunní'a naga dxenná bea Dios.

<sup>24</sup> Belexebánele'ē benne' ca' dxusede Jesús ca naca dizra' gunná Jesús, na' Le' guzre' le' xetú lasa:

—Zrí'ina'dau', stébetē naca xelú'u naga dxenná bea Dios benne' dxu-luxrén lazre' xel-la gunní'a. <sup>25</sup> Chadidxa te tu bea zren lu negue xeche' quézcala chu'u tu benne' gunní'a naga dxenná bea Dios.

<sup>26</sup> Gate belén benne' ca' dizra' nigá, na' belexebánele'ēne', na' buluchebe ljwezre':

—¿Núzraqueze la xca'?

<sup>27</sup> Jesús gunné'ē benne' ca', ne guzre' le':

—Quebe seque' nu bēnne' gune' da nigá, san Dios wazéquene'. Quebe bi de da quebe gaca gun Dios.

<sup>28</sup> Nadxa Pedro guzre' Jesús:

—Xránantu', netu' ba bcá'anantu' xúgute da nápantu', ne zéajlentu' Lue'.

<sup>29</sup> Na' bechebe Jesús:

—Da li dxapa' le'e, núteteze benne' gusane' lizre', u benne' biche', u nu'ula zane', u xre', u xrne'ē, u zru'ule', u zrí'ine', u xezr la xu chee' ne chia' neda', u ne chee dizra' chawe' chia', <sup>30</sup> benne' nigá si'ē na'a lu xezr la xu nigá tu gaxúa cue' ca' da si'ē, xu'u ca', ne benne' biche' ca', ne nu'ula zane' ca', ne xrne'ē ca', ne xezr la xu chee' ca', na' weláu zi' xúzrequeze bēnneache le'. Lu xezr la xu da za za' wazí'queze' xel-la nabán zeajli canna. <sup>31</sup> Zánete benne' zaj naca na'a benne' blau xelaque' ca benne' bzebe, na' zánete benne' zaj naca na'a ca benne' bzebe xelaque' benne' blau.

*Dxuchalaj Jesús xetú lasa ca gaca gate gatie'*

*(Mt. 20.17-19; Lc. 18.31-34)*

<sup>32</sup> Gate zaj xu'ē neza dxelegüene' zjaque' Jerusalén, na' Jesús zria lawe' lau benne' ca' dxusédene'. Dxelezrebe benne' ca', ne lu xel-la dxelezrebe zjácálene' Le'. Na' da xula gucá'a Jesús benne' chazrinnu ca' dxusédene', na' guzú lawe' dxē'ē le' ca naca da dxal-la' gaca chee'. <sup>33</sup> Na' guzre' le':

—¡Le na' xque nigá! Dxegüendxu zéajdxu Jerusalén naga tu benne' gudé' neda', Benne' Gulje' Bēnneache, lu na' benne' xíchaje ca' chee bxruze ca', ne lu na' benne' dxuluxuzájle'ē da nadxixruj bea Dios, na'

xelechugue' chia' chee' gatia', na' wuludee' neda' lu na' benne' zitu' ca'.  
 34 Nadxa xelún le' chia' neda', ne xelu'e neda', ne xuluzré'e neda' zrene',  
 na' xelutie' neda'. Gate gaca chunna zra xebana' ládujla benne' gate.

*Jacobo ne Juan dxelenabe' Jesús bi gune' chee'*

*(Mt. 20.20-28)*

35 Nadxa Jacobo ne Juan, zri'ine Zebedeo, belezrine' lau Jesús, na' gulé'e  
 Le':

—Benne' Wesede, dxaca lázrentu' gunu' cheentu' da nábantu' Lue'.

36 Nadxa bchebe Jesús le':

—¿Bi dxaca lázrele guna'?

37 Na' belexechebe' Le':

—Benna netu' lataj cué'entu', tuntu' chala'a xabela chiu', ne xetuntu'  
 chala'a xéglala chiu' naga nna be'u xabaa chiu'.

38 Na' guzre Jesús le':

—Le'e quebe nézele da dxenábale. ¿Waca xí'ajle le'e da na' xi'aj neda', da  
 zéaj na ca naca da sácadxu? ¿Waca chuale nisa ca chua' neda' nisa lu xel-la  
 gute?

39 Le' belexechebe':

—Wácantu'.

Na' Jesús guzre' le':

—Da li wé'ajle ca naca da na' xi'aj neda', ne chuale nisa ca chua' neda'  
 nisa. 40 Chee' cué'ele chala'a xabela chia' u chala'a xéglala chia', quegá  
 neda' gunna' na. Gaca chee' benne' ca' ba nucueza Dios chee'.

41 Gate xechí benne' ca' dxusede Jesús belenne' na, na' guzre' le':

—Ba nézquezle ca dxelún benne' dxelenná be'e benne' xezr la xu ca'.  
 Dxelún cuine' xrane benne' xezr la xu ca'. Benne' blau ládujla le' dxezi'e  
 ba neza xel-la dxenná bea chee'. 43 Quebe gaca caní ládujla le'e. Che  
 nu benne' dxaca lazre' gaque' benne' blau ládujla le'e, benne' nigá dxal-  
 la' gune' zrin chee' ljwezre', 44 na' che nu benne' ládujla le'e dxaca lazre'  
 gaque' benne' xíchaje, benne' nigá dxal-la' gaque' ca tu benne' nada'u  
 chee' gune' zrin chee' xúgute ljwezre'. 45 Caní gaca na lawe' da cá'aqueze  
 neda', Benne' Gulje' Bénneache, bla'a, quegá chee' xelún bénneache zrin  
 chia' neda'. Bla'a chee' guna' zrin chee' bénneache, ne chee' guzúa' xel-la  
 nabán chia' chee' guselá' benne' zan.

*Dxelún Jesús tu benne' la chul-la le' Bartimeo*

*(Mt. 20.29-34; Lc. 18.35-43)*

46 Nadxa belezrine' xezre Jericó. Gate na' bedxúaj Jesús xezre nigá nen  
 benne' ca' dxusédené', ne nen benne' zante, na' zua tu benne' la chul-la le'  
 Bartimeo, zri'ine Timeo, dxé'e dxu'a neza dxenabe' guna'. 47 Na' ca bénne'  
 dxedé Jesús, benne' Nazaret, ga na', na' benne' la chul-la nigá guzú lawe'  
 dxenné' zizraj:

—¡Jesús, Zri'ine David, bexache lazre' neda'!

48 Benne' zan ca' guledil-le' le' chee' sue' zrize, na' le' zízrajda gunné':

—¡Zri'ine David, bexache lazre' neda'!

49 Nadxa gugá Jesús, na' gunné':

—Le nne' le'.

Na' gulenné' benne' la chul-la na', gulé'e le':

—Bdipa lazru'. Guxasa lawe' da dxenné' lue'.



<sup>50</sup> Nadxa bzale' lazxe' naxrúa cuzre' chalá'ala, na' guxritie' chee zrine' lau Jesús. <sup>51</sup> Nadxa Jesús gunábene' le':

—¿Bizra dxaca lazru' guna' chiu'?

Na' gunná benne' la chul-la:

—Benne' Wesede, dxaca lazra' xexunu' xiaj lawa'.

<sup>52</sup> Na' Jesús guzre' le':

—Waca xexíaju'. Bache bexacu' lawe' da guxéajle'u chia'.

La ble'ete' benne' la chul-la na', na' guxíajlene' Jesús la neza.

## 11

*Dxu'u Jesús xezre Jerusalén*

(Mt. 21.1-11; Lc. 19.28-40; Jn. 12.12-19)

<sup>1</sup> Gate belezrine' gáguze naga dxe' xezre Jerusalén, ne zaj xu'e la neza naga zaj dxe' xezre Betfagé, ne xezre Betania zran xi'a chee xaga olivo ca', na' Jesús gusel-le' chupa benne' ca' dxusédené', <sup>2</sup> na' guzre' le':

—Le chjaca lu xézredau' da dxe' tu chi na', na' gate zrinle na', chea-jxrácale tu burro da'ba' xaga, bea na' netú benne' quebe ne cuie' le'ba'. Le sezre-ba', ne le che'-ba' nigá. <sup>3</sup> Che nu benne' nabe' le'e bizr chee na' dxesézrele-ba', xégale le': “Xránadxu dxechine'-ba'”, na' la xesél-la'te' le'ba'.

<sup>4</sup> Nadxa xjaque', ne xea'jlexraque' burro na' da'ba' xaga dxu'a dxa xu'u cuita neza, na' gulesézre'-ba'.

<sup>5</sup> Nadxa bal-la benne' zaj zre'e na' gulé'e le':

—¿Bizra' dxunle? ¿Bizr chee na' dxesézrele búrrua'?

<sup>6</sup> Nadxa le' gulé'e benne' ca' ca ba gunnáqueze Jesús, na' belúe' le' lataj. <sup>7</sup> La belexeché'ete' búrrua' lau Jesús, na' buluzríe' zra langé' cúzruba', na' guzría Jesús le'ba'. <sup>8</sup> Benne' zante gulechíluje' xicha chee', ne xladxe' la neza, na' benne' xula gulechugue' zina' da gulíxrue' la neza.

<sup>9</sup> Na' benne' ca' zaj zrie' lawe', ne benne' ca' zjaque' bzebe, gulezú lawe' dxelenné' zizraj:

—¡Gaca ba! ¡Lá'azxa naca benne' ze'e, nase-la Xránadxu Dios Le'!

<sup>10</sup> ¡Lá'azxa naca xel-la dxenná bea da za', xel-la dxenná bea chee xradxu David! ¡Gaca ba Dios!

<sup>11</sup> Ca'an guca gate na' guxú'u Jesús xezre Jerusalén, na' guxú'e lu xudau'. Ca gudé gunné'e xúguté da zaj nnita du cuite', na' bezé'e xexíaje' xezre Betania nen benne' chazrinnu ca' dxusédené', lawe' da ba zeaj dxezré'.

*Jesús dxugu'e de' xaga higo*

(Mt. 21.18-19)

<sup>12</sup> Gute xu zra xula gate na' gusá'aque' xezre Betania, gudún Jesús. <sup>13</sup> Na' blé'enge' zítu'la dxe' tu xaga higo zria na laga', na' xea'jnné'e che zria da zixre lu xaga na', san quebe bi zria na. Lágaze zria na lawe' da quebe ne zrin zra cuía na da zixre. <sup>14</sup> Nadxa Jesús guzre' xaga higo na':

—Cabátadxa nu gagu da zixre chiu'.

Benne' ca' dxuséde Jesús belénqueze' na.

*Jesús dxexún lbe'e lu xudau'*

(Mt. 21.12-17; Lc. 19.45-48; Jn. 2.13-22)

<sup>15</sup> Ca gudé na' belexezrine' xezre Jerusalén. Ca guxú'u Jesús lu xudau', guzú lawe' dxulague' lu xudau' benne' zaj zre'e wete, ne benne' zaj zre'e wewa'u na'. Na' bdxixre' blaga chee benne' weche'e dumí chee benne'

zitu', ne bdxixre' naga dxelebé' benne' wete bgúgudu ca'. <sup>16</sup> Quebe be'e lataj nu benne' xudé' xua ca' lu xudau'. <sup>17</sup> Nadxa bsédene' bènneache ca', dxenné':

—Lu xiche lá'azxa dxenná Dios: “Lizra' gaca na tu xu'u naga xuluchálajle Dios benne' zá'aque' xúgute xezre.” Le'e ba nunle lizra' ca tu lizre benne' gubán ca'.

<sup>18</sup> Na' benne' xíchaje ca' chee bxruze ca', ne benne' dxuluxuzájle'e ca da nadxixruj bea Dios belenne', na' gulezú lawe' dxelexíluje' ájala gaca xelútete' Jesús lawe' da dxelezrebe' Le'. Ca'an guca lawe' da dxelexebane xúgute bènneache ca naca da dxusede Jesús le'. <sup>19</sup> Ca gula chizrela, Jesús bezé'e lu xezre.

*Dxebizre xaga higo  
(Mt. 21.20-22)*

<sup>20</sup> Ca gula zra xula che zílala, na' Jesús, ne benne' ca' dxusedene' belexedé'e na', na' belelé'ene' xaga higo na', ba nabizre na duté lue na.

<sup>21</sup> Nadxa xeajsá lazre Pedro, na' guzre' Jesús:

—Benne' wesede, gunná'xque xaga higo nigá da gulú'u na de'. Bache gubizre na.

<sup>22</sup> Jesús gunné':

—Le cheajlí lazre Dios. <sup>23</sup> Da li dxapa' le'e, che nútetezele nnale, xele xi'a nigá: “Cuasa lue' nigá, xeajchú'u lu nísadau'”, ne che quebe dxun chupa lázrele, na' chéajlele waca da ba gunnale, na' gácaqueze na. <sup>24</sup> Chee le na' dxapa' le'e, xúgute da návale Dios gate dxuchálajle Le', che chéajlele ba guzile na, ca'an gácaqueze. <sup>25</sup> Gate na' dxuchálajlele Dios, che dxezrá'ale nu benne', le gunité lau chee bènnea' chee cá'anqueze Xrale zué' xabáa gunité lawe' dul-la da nabágale. <sup>26</sup> Che quebe gunité laule chee bènnea', Xrale zué' xabáa quebe gunité lawe' dul-la da nabágale.

*Ca naca xel-la dxenná bea da napa Jesús  
(Mt. 21.23-27; Lc. 20.1-8)*

<sup>27</sup> Nadxa belexezrine' xezre Jerusalén, na' ca dxedá Jesús le'aj xudau', na' gulebiga lau Le' benne' xíchaje ca' chee bxruze ca', ne benne' dxuluxuzájle'e da nadxixruj bea Dios, ne benne' gula ca'. <sup>28</sup> Na' benne' caní gulenábene' Jesús:

—¿Bizra xel-la dxenná bea napu' dxunu' da caní? ¿Nuzra benna lue' xel-la dxenná bea nigá?

<sup>29</sup> Na' bechebe Jesús:

—Cá'anqueze neda' de tu da nábeda' le'e. Che xechébele chia', nadxa xapa' le'e ca naca xel-la dxenná bea da napa' dxuna' da caní. <sup>30</sup> ¿Nuzra gusel-la Juan bchue' bènneache nisa? ¿Dios che bènneache? Le xechébe na'a.

<sup>31</sup> Nadxa gulezú lau benne' ca' dxuluchálaje' leze', dxelé ljwezre':

—Che xedxu Le', Dios gusel-le' le', na' nnáqueze: “¿Bizr chee na' quebe guxéajlele chee'?” <sup>32</sup> Che nnadxu bènneache gulesel-le' le', dxal-la' zrédexu da xelún benne' xezre ca'.

Caní gulenné' lawe' da xúgute benne' xezre nigá dxeléajle'e guca Juan benne' bchálaje' waláz chee Dios. <sup>33</sup> Ca'an guca, gulenná benne' ca', dxelé'e Jesús:

—Quebe nézentu'.

Nadxa gunná Jesús, dxé'e le':

—Cá'anqueze neda' quebe nnia' ca naca xel-la dxenná bea da napa' dxuna' da caní.

## 12

*Da dxulé'e na ca naca chee benne' wen zrin quebe zaj naque' xrlátaje  
(Mt. 21.33-46; Lc. 20.9-19)*

<sup>1</sup> Nadxa guzú lau Jesús dxuchálajlene' benne' ca' tu da dxulé'e na. Dxe'e le':

—Zua tu benne' bde'e lba uva ca' lu xezr la xu chee', na' bene' le'aj chee na. Bene' tu xiaj lutju naga guchuchuje' uva ca', ne bene' tu bdupa' naga cue' benne' guxúe' da caní.

'Nadxa bde'e' xezr la xu chee' na' lu na' benne' wen zrin ca' chee' xelune' la'a lina chee' na, na' guzé'e zéaje' xezre zitu'. <sup>2</sup> Ca gula zra chee' lina, na' gusel-le' tu bi wen zrin chee' cheajxezri'ibe' lu na' benne' wen zrin ca' ca naca lina da dxal-la' xezi' benne' xranbe'. <sup>3</sup> Na' benne' wen zrin ca' gulel-le'-be', ne buluzalje'-be', na' belexesel-le'-be' dáchezebe'. <sup>4</sup> Nadxa xránabe' gusel-le' bi wen zrin xula, na' bi nigá belú'e-be' xiaj, ne gulelé'e xíchajbe', ne bulucháchalene'-be'. <sup>5</sup> Na' xránabe' na' gusel-le' xetube', na' bi nigá belútete' benne' ca' lebe'. Ca gudé na' xránabe' gusel-le' bi zandxa bi xula, na' cá'anqueze belú'e bál-labe', ne belútete' xebál-labe'.

<sup>6</sup> Xránabe' zua tu zrí'ine' bi biu, bi nazrí'ile'ene', na' naga bzébeté gusel-le' zrí'ine' nigá, dxenné' lu xichaj lázrdawe': Dخال-la' xelape' ba lá'ana zrí'ina'. <sup>7</sup> Benne' wen zrin ca' gulenné', dxelé ljwezre': "Bi nigá gueque cheebe' xezr la xu nigá. Gútetedxu-be' na'a, na' dxi'u xegá'analedxu da nigá." <sup>8</sup> Ca'an guca, gulel-le'-be', ne belútete'-be', na' gulebéaje' bel-la' dxen cheebe' lu xezr la xu na'.

<sup>9</sup> Nadxa Jesús gunábene' benne' xudau' ca':

—¿Ájazra gun xrane xezr la xu nigá? Walé'e, na' gútete' benne' wen zrin ca', na' gudé'e' xezr la xu chee' lu na' benne' xula ca'. <sup>10</sup> Ba blábale da naxúaj na lu xiche chee' Dios. Dxenná na:  
Xiaj na' da quebe buluchine benne' wen xu'u,  
xiaj na' naca na'a xiaj blau chee' xu'u.

<sup>11</sup> Da nigá ben Xránadxu, na' dxexebánedxu chee' na.

<sup>12</sup> Nadxa gulaca lazre' xelel-le' Jesús lawe' da zaj nézene' bchálaje' da dxulé'e nigá chee' gulé'ene' ca' zaj naca le'. Quebe bi gulune' lawe' da gulezrebe' bi xelún benne' xezre ca'. Chee' le' na' bulusané' Jesús, besí'aque'.

*Da bchalaj Jesús chee' da dxuchizruj xu'u lawe'  
(Mt. 22.15-22; Lc. 20.20-26)*

<sup>13</sup> Ca gudé na' gulesel-le' lau Jesús bal-la benne' xudau' fariseo, ne benne' zaj de'e Herodes chee' gulebéaje' Le' dizra' chee' xezezéquene' xelawe' Le' zria. <sup>14</sup> Benne' caní belélé'e lau Jesús, na' gulé'e Le':

—Benne' wesede, ba nézentu' ca dxennáu' da li, ne quebe dxezí'u ca da dxelennaze bénneache, lawe' da quebe dxenná'u Lue' ca zaj naca cúzreze bénneache. Da li naca ca dxusédenu' bénneache da naca chee' Dios. ¿Dxunna da nadxixruj bea Dios lataj quízrujdxu da dxuchizruj benne' dxenná bea Roma dxi'u, che cabí? ¿Dخال-la' quízrujdxu, che quebe quízrujdxu?

<sup>15</sup> Jesús dxéquebe'ene' quegá du lazre' dxelenábene' Le' da nigá, na' guzre' le':

—¿Bizr chee na' dxebéajle neda' dizra'? Le dajguá nigá tu dumí da dxízrujle chee le'eda' na.

<sup>16</sup> Na' bedajlegüé'e na, na' ca ble'e Jesús le na, na' gunábene' le':

—¿Nu lau da' dumí nigá, ne nu la naxúaj na nigá?

Na' gulé'e Le':

—Chee benne' dxenná bea Roma.

<sup>17</sup> Nadxa Jesús guzre' benne' ca':

—Le gunezruj chee benne' dxenná bea Roma da naca chee', na' le gunezruj chee Dios da naca chee Dios.

Na' belexebánene' ca naca da bchalaj Jesús.

*Da bchalaj Jesús ca xelexebán benne' gate*

*(Mt. 22.23-33; Lc. 20.27-40)*

<sup>18</sup> Nadxa belezrín lau Jesús bal-la benne' xudau' saduceo. Benne' caní dxelenné' quebe xelexebán benne' gate. Ca'an guca, gulenábene' Jesús caní:

<sup>19</sup> —Benne' wesede, Moisés bzuaje' cheedxu da nadxixruj bea nigá: “Che tu benne' biu gatié', ne xegá'ana zru'ulé', na' quebe nu zua bi chee bénnea', na' benne' biche' dxal-la' xequé'e nu'ula na' gute benne' chee' chee sua zri'ine bénnea' gutié'.” <sup>20</sup> Gulezrá' gazre benne' biche'. Benne' nedxu bchaga na'abe', na' gútebe' quebe nu zri'inebe' zua. <sup>21</sup> Na' benne' gudxupe' bequé'e nu'ula na', na' cá'anqueze gutié' quebe nu zri'ine' zúaqueze. Cá'anqueze guca chee benne' guxunne'. <sup>22</sup> Ca'an guca, benne' gazre caní gulezúalene' nu'ula na', na' netue' quebe nu zri'ine' guzúa. Naga xejsete na gútete nu'ula'. <sup>23</sup> Na'a xca', gate na' xelexebán benne' gate, ¿nula benne' biu caní gaque' benne' chee nu'ula na', lawe' da gulezúale benne' gazre ca' le'?

<sup>24</sup> Nadxa Jesús guzre' benne' ca':

—Nanítele le'e lawe' da quebe núnbeale da naxúaj na lu xiche chee Dios, ne quebe nézele ca naca xel-la waca chee Dios. <sup>25</sup> Gate na' xelexebán benne' gate, québedxa xuluchaga ne'e, ne québedxa xuluchaga na' bi nu'ula ca'. Xelaque' ca zaj naca gubáz chee xabáa. <sup>26</sup> Na'a, ca naca chee benne' gate che xelexebane', ¿quebe ne gulábale ca da naxúaj na lu xiche chee Moisés ca gunná Dios gate na' bchálajlene' Moisés tu lu xágadau' da dxala xi'? Gunná Dios caní: “Neda' naca' Dios chee Abraham, ne chee Isaac, ne chee Jacob.” <sup>27</sup> Dios naque' Dios, quegá chee benne' gate ca'. Naque' Dios chee benne' ban ca'. Ca'an naca, álega nanítele le'e.

*Da nadxixruj bea Dios da naca blau*

*(Mt. 22.34-40)*

<sup>28</sup> Na' zéqueze tu benne' dxuxuzájle'e da nadxixruj bea Dios, na' benne' da dxuchalaj Jesús, ne nézene' bzri'e dizra' chawe', na' gunábene' Le':

—¿Bizra da nadxixruj be'e Dios naca na da blaudxa?

<sup>29</sup> Na' Jesús guzre' le':

—Da bdxixruj be'e da naca na da blaudxa ca xúgute dxenná na caní: Le xene benne' Israel. Xránadxu Dios tuze naque'. <sup>30</sup> Bzri'i Xranu' Dios du lazru', ne nen duté bénne' du xu'u, ne nen duté xichaj lázrda'u, ne nen duté xel-la wal-la da napu'. Da nigá naca da nadxixruj bea da blaudxa, <sup>31</sup> na' da nadxixruj bea gudxupe' nácaqueze na ca le na, da dxenná na caní: Bzri'i benne' xula ca nazrí'i cuinu'. Quebe zua xetú da nadxixruj bea da naca blaudxa ca da chupa caní.

<sup>32</sup> Nadxa gunná bēnnea' dxuxuzájle'e da nadxixruj bea Dios, dxē'e Jesús:

—Ca'an xanne naca ca bechebu', Benne' dxusede. Da li naca ca dxennáu'. Zua tuze Dios, ne quebe nu zua xetú ca Le', <sup>33</sup> na' che zri'idxu Dios du lázredxu, ne nen dutē xichaj lázrdaudxu, ne nen dutē bēnne'du xú'udxu, ne nen dutē xel-la wal-la da nápadxu, ne che zri'idxu benne' xula ca nazrí'i cuínadxu, da caní zaj zácadxa na ca xúgute be xixre' ca' dxútedxuba' lau Dios, ne ca xúgute da dxuzézxedxu lu cugu chee Dios.

<sup>34</sup> Nadxa Jesús, ca benne' bchálaje' chawe', na' guzre' le':

—Xeláteze ne de na chee nna bea Dios xichaj lázrda'u.

Na' québedxa nu bexazre nábene' Le' dizra' ca'.

*¿Nu zrí'ine' naca Cristo?*

*(Mt. 22.41-46; Lc. 20.41-44)*

<sup>35</sup> Jesús dxusedene' benne' ca' lu xudau', na' gunné':

—¿Bizr chee na' dxelenná benne' dxuluxuzájle'e da nadxixruj bea Dios naca Cristo zri'ine David? <sup>36</sup> David ná'queze ca bzéajni'i Be' Lá'azxa le', gunné':

Xránadxu Dios guzre' Xrana':

“Gudxé'e chalá'a xabela chia,

ca zrin zra ba nuzúa' benne' dxeledábague' lue',

chee na be'enu' le'.”

<sup>37</sup> Che David ná'queze dxenné': “Xrana”, ¿ájala chee na' naque' zrí'ine'?

Benne' zan ca' du lazre' buluzé nague' chee'.

*Jesús dxulé'ene' zaj nachixre benne' ca' dxuluxuzájle'e da nadxixruj bea Dios*

*(Mt. 23.1-36; Lc. 11.37-54; 20.45-47)*

<sup>38</sup> Ca dxusede Jesús benne' ca', na' gunné':

—Le gapa chí'i cuínale chee benne' ca'an dxuluxuzájle'e da nadxixruj bea Dios. Benne' caní dxeledánene' dxelácuē' zra lanē' tunna, ne dxeledánene' xulugapa bēnneache le' diuzre nen dizra' ba lá'ana lau bēnneache ca'. <sup>39</sup> Benne' caní dxeledánene' dxelebé'e lataj blau lu xu'u naga dxelezraga benne' dxelúe lá'ane' Dios, ne dxeledánene' dxelebé'e lataj blau naga dxelawē' xrche'. <sup>40</sup> Benne' caní dxelegü'e lizre xrlataj nu'ula ca' ba gulate benne' chee', na' chee xululú'e cuine' ca benne' xrlátaje, dxelunē' xel-la dxuluwizraj Dios tunna. Le' zaj nabágadxē' zria.

*Dumí da gulu'u nu'ula xache' ba gute benne' chie'*

*(Lc. 21.1-4)*

<sup>41</sup> Tu lasa gate na' dxe' Jesús lu xudau' cuita naga dxelegú'e dumí, na' dxenné'e ca dxelún benne' ca' dxelegú'e dumí, ne ca dxelún benne' gunní'a ca', dxelegú'e dumí zren. <sup>42</sup> Ca'an guca, bzrin tu nu'ula xache' ba gute benne' chie', na' gulu'e chupa dumí lasedau' da quebe zaj zácate can.

<sup>43</sup> Nadxa gunné Jesús benne' ca'an dxusedene', na' guzre' le':

—Da li dxapa' le'e, nu'ula xache' nigá bnézrujdxē' ca xúgute benne' ca'an gulegú'e dumí. <sup>44</sup> Xúgute benne' ca' gulegú'e da québedxa dxelechínne'. Nu'ula xache' nigá gulu'e ca naca da nape', da nunte gawe'.

## 13

*Dxuchalaj Jesús ca gaca gate xrinnaj xudau'*

*(Mt. 24.1-2; Lc. 21.5-6)*

<sup>1</sup> Gate bedxúaj Jesús lu xudau', na' tu benne' dxusédene' guzre' Le':

—Benne' Wesede, gunná'xque ca zren naca xudau', ne xiaj xrtante caní.

<sup>2</sup> Bechebe Jesús:

—¿Dxelé'enu' na'a ca zren naca xudau' nigá? Québedxa xegá'ana tu xiaj cuzru ljwezre nigá. Ca naca xudau' nigá wabía xí'queze na.

*Da xelunna bea na gate cheajsé chee xezr la xu nigá*

*(Mt. 24.3-28; Lc. 21.7-24; 17.22-24)*

<sup>3</sup> Nadxa xjaque' lu xi'a chee xaga olivo ca', da zua na chalá'a ca li dxa xu'u xudau'. Gate dxe' Jesús ga na', na' Pedro, ne Jacobo, ne Juan, ne Andrés gulé'e Jesús leze':

<sup>4</sup> —Dxaca lázrentu' gulé'enu' netu' bata gaca caní. ¿Bizra da ca' xelunna bea na gaca xúgute da caní?

<sup>5</sup> Na' bechebe Jesús:

—Le gapa chí'i cuínale chee quebe nu si xē le'e, <sup>6</sup>lawe' da xeledá' benne' zante xelún lu'a neda', welenné' zaj naque' Cristo, na' welezí xē'e benne' zante.

<sup>7</sup> Le'e, gate xénele gaca wedil-la, ne ba dxaca wedil-la, quebe zrēbele. Cá'queze dxal-la' gaca na, san quegá ne zrin zra cheajsé chee na, <sup>8</sup>lawe' da xeledíl-lalē benne' tu xezr la xu benne' xetú xezr la xu, na' tu xezre benne' tíl-lalē na xetú xezre. Wazrú' zánete xezre, ne wata' gubina', ne wadxé'e na zraga bēnneache. Da caní zaj naca na naga su lauze ca naca da xelezaca zi' bēnneache.

<sup>9</sup> Le guxúe cuínale lawe' da xuludé' le'e lu na' benne' xu'u lawe', na' xuluzalje' le'e lu xu'u naga dxulucá'ana szrene' Dios. Xuludé' le'e lau benne' xu'u lawe' ca', ne lau benne' dxelenná be'e lawe' da nácale chia' neda'. Gate ca'an gaca, na' guchálajle chia' neda' lau benne' ca'.

<sup>10</sup> Nédxudxa ca zrin zra cheajsé chee na, dizra' chawe' chia' gaca lban chee na lau bēnneache zaj zre'e xúgute xezr la xu. <sup>11</sup> Gate xelechē'e le'e chee xuludé' le'e lu na' benne' xu'u lawe' ca', quebe cue'le gunne xue bi nnale, ne quebe quilaj lázrele ájala guchálajle. Nnele ca da gunna Dios le'e zra na' lawe' da quegá le'eze nnele, san Be' Lá'azxa, Le' nne'. <sup>12</sup> Ca xelún bēnneache lu zra na', xuludé' bi biche' ca' lu na' benne' xelútiē' lebe'. Cá'anqueze xelún xruze xrna' ca', xuludé' zrí'inequeze'. Na' zrí'ine' ca' weledábagabe' xruze xrnabe', ne xelunbe' xelátiē'. <sup>13</sup> Xúgute bēnneache xelezré'e le'e lawe' da nácale chia' neda'. Bēnnea' ze tipe' ca zrindxa zra cheajsé chee na, la bēnnea'.

<sup>14</sup> Daniel, bēnnea' bchálajē' waláz chee Dios bzuaaje' ca naca chee da sban da guzrí'a xi na. Gate lé'ele le'e zria da nigá lataj lá'azxa naga quebe dxal-la' cuía na, nadxa benne' zaj zre'e xezre ca' zaj nababa xezr la xu Judea dxal-la' xuluzrúnmuje', ne chjaque' lu xi'a zren. (Benne' dxulabe' da nigá dxal-la' cheajní'ine' da naca chee na.) <sup>15</sup> Nu benne' zria chju'u lizre' lu zra na' quebe dxal-la' xexétaje' chee bi xebéaje' lu xu'u. <sup>16</sup> Benne' ze le'e xixre' quebe dxal-la' xezrine' lizre' chee xequē'e zra lanē'. Dخال-la' xuluzrúnmuje' benne' caní. <sup>17</sup> Baxache' xelaca nu'ula zaj zue' zi'i, ne nu'ula ca' zaj nuxre' bidu dxe'ene lu zra na'. <sup>18</sup> Le naba lau Dios chee quebe gaca beu' zaga gate na' dxal-la' guzrúnmuje', <sup>19</sup>lawe' da xelezaca zídxa bēnneache lu zra ca'an ca da quebe ne xelezácate', gulala ben Xránadxu Dios xezr la xu nigá, ne québedxa xelezácadxē' ca'. <sup>20</sup> Che Xránadxu Dios quebe guzáchiē' zra ca', québedxa nu láqueze', san ba bzachiē' zra ca'an lawe' da nazrí'ine' bi chee' ca', bi ca' ba gucá'a Le'.

<sup>21</sup> 'Lu zra na', che nu benne' dxē'e le'e: "Le na' xque, nigá zua Cristo", u che nne': "Le na' xque, na' zē'", quebe chéajle chee'. <sup>22</sup> Welelá' benne' xezi xē'e, benne' xelunē' lu'a Cristo, ne xelunē' lu'a xel-la waca chee xabáa chee xezi xē'e bi ca' ba gucá'a Dios che xezequene'. <sup>23</sup> Le sua le'e ban lazre'. Neda' ba gucha' le'e xúgute nédxute ca gaca na.

*Ca gaca gate xida Benne' Gulje' Bénneache*

(Mt. 24.29-35, 42-44; Lc. 21.25-36)

<sup>24</sup> Nadxa gunná Jesús:

—Lu zra ca', gate te zra chee xel-la zi' caní, na' chul-la gubizra, ne québedxa gusení' beu'. <sup>25</sup> Belaj ca' xelexruj na zran xabáa, na' ca da zaj nalá' zaj zē tipa zran xabáa welezrízete na. <sup>26</sup> Ca nadxa xelélé'ene' neda', Benne' Gulje' Bénneache, za'a lu beuj bza, napa' xel-la waca zren, ne da xabáa chia'. <sup>27</sup> Na' la sél-latea' gubáz chee xabáa chia' ca' chee xuluchague' benne' ca' gunnía', benne' zaj zre'e dapa saca chee xezr la xu nigá, benne' zitu' zá'aca nila, zá'aca na'la.

<sup>28</sup> 'Le gusede ca naca da dxulé'e na ca naca chee xaga higo. Gate na' dxexedxe'ene zruze na, ne zá'aca xrlegue na, na' ba nézele za beu' la. <sup>29</sup> Cá'anqueze, gate na' lé'ele ba dxelaca da caní, nézele ba zua gáguze zra cheajsé na, ne gácatē na. <sup>30</sup> Da li dxapa' le'e, xúgute da caní gaca na nédxudxa ca xelate bénneache zaj zre'e lu zra na'. <sup>31</sup> Xabáa ne xezr la xu nigá wadé chee na. Xrtizra' nigá quebe te na ca'anze, san waca li na.

<sup>32</sup> 'Ca naca chee zra na', ne chee beu' na' quegá nu neze bata gaca na. Quebe zaj neze gubáz chee xabáa, ne Zrí'inequeze Dios quebe nézene'. Tuze Xradxu Dios nézene'.

<sup>33</sup> 'Chee le na', le sua le'e ban lazre'. Le guxúe, ne le guchálajle Dios lawe' da quebe nézele bátala zrin zra na'. <sup>34</sup> Gaca na ca guca chee tu benne' biu, benne' guz'é zéajē' zitu'. Gate na' za dxúajē' xu'u, na' dxudé' da nape' lu na' bi wēn zrin chee' ca', ne dxunézruje' tu tube' zrin da xelunbe', ne dxusebague' benne' zē' dxa xu'u guxúe xánnie'. <sup>35</sup> Chee le na', le sua le'e ban lazre' lawe' da quebe nézele le'e bátala xelá' xrane xu'u, che dxē xrinneze, che dxēla, che ca cuezre xjeaj, che che zílala, <sup>36</sup> ga gaze xel'é chadí dute, na' cheajxraque' le'e dxásele. <sup>37</sup> Ca da dxennía', dxapa' le'e, dxapa' xúgute benne': ¡Le sua ban lazre'!

## 14

*Dxelexegá'ane' dizra' chee xelēl-le' Jesús*

(Mt. 26.1-5; Lc. 22.1-2; Jn. 11.45-53)

<sup>1</sup> Xechupa zra za zrin chee xelunē' laní chee xulusá lazre' ca naca da ben Dios gate na' bebéajē' benne' Israel ca' lu xezr la xu Egipto, laní na' dxelawe' xeta xtila da quebe nachixre cua zichaj chee na. Na' benne' xíchajē' ca' chee bxruze ca', ne benne' dxuluxuzájle'e da nadxixruj bea Dios belilaj lazre' ájala xelunē' chee xelēl-le' Jesús bagácheze chee xelútie' Le'. <sup>2</sup> Na' gulenné':

—Quegá gundxu na lu laní, chee quebe dxē'ena zraga bénneache.

*Tu nu'ula dxegüé'e da za xichaj Jesús*

(Mt. 26.6-13; Jn. 12.1-8)

<sup>3</sup> Zua Jesús lu xezre Betania, lu lizre tu benne' le' Simón, benne' guzrié' wē' guzru'. Dxácatē zaj dxē'e dxelawe' na', na' bzrin tu nu'ula nu'e tu da dau' da naca na xiaj xrtan da nazí le na alabastro, ne nazratē na da

za da dxelá zixre chee xiaj nardo, da zácále'e na. Na' gulé'e da dau' na, ne blálajé' da za na' xichaj Jesús. <sup>4</sup> Bal-la benne' ca', benne' zaj zré'e na', belezré'e, na' gulenné', dxelé ljwezre':

—¿Bizr chee na' ben ditaj nu'ula nigá da za na'? <sup>5</sup> Waca ta'u da na' chee sídxadxu ca lázrujdxu chee tu iza, chee gácalēdxu benne' xache' ca'. Na' guledil-le' nu'ula'.

<sup>6</sup> Na' Jesús guzre' le':

—Quebe xe'e nu'ula nigá ca'. ¿Bizr chee na' dxunle le' zede? Ca naca da ben nu'ula nigá chia' neda' naca na da cháwele'e. <sup>7</sup> Benne' xache' ca' tu zrázqueze' ládujla le'e. Waca gunle benne' ca' chawe' gate dxaca lázrele, san neda' quegá tu súaleza' le'e. <sup>8</sup> Nu'ula nigá bené' ca da guzéquene', gulu'e da za bel-la' dxen chia' nédxula chee zra gate gachia' lu xēdxu ba. <sup>9</sup> Da li dxapa' le'e, gáteteze na' gaca lban chee dizra' chawe' chia' lu xúgute xezre zaj nnita xezr la xu nigá, cá'anqueze zrálajqueze ca naca da ben nu'ula nigá, chee xulusá lazre' chee'.

*Judas dxexegá'ane' dizra' gudé' Jesús lu na' benne' ca' dxeledábage' Le'*  
(Mt. 26.14-16; Lc. 22.3-6)

<sup>10</sup> Nadxa Judas Iscariote, tu benne' chazrinnu ca' dxusēde Jesús, guxíajé' xeajchálajlēne' benne' xíchajé' ca' chee bxruze ca' chee xelexegá'ane' dizra' ájala guné' gudé' Jesús lu na' benne' ca'. <sup>11</sup> Ca belén benne' ca' ca gunná Judas, gulebéle'ene', na' gulechebe lazre' xulunézruje' le' dumí. Nadxa Judas guzú lawe' dxexíajé' ájala gudé' Jesús lu na' benne' ca'.

*Da dxágudxu chee gusá lázredxu ca gute Jesús*  
(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Zra nedxu chee laní gate dxelawe' xeta xtila da quebe nachixre cua zichaj chee na, ne dxelutié' zríla'dau' chee Laní Pascua, gate na' dxulusá lazre' ca guca gate bebéaj Dios benne' Israel ca' lu xezr la xu Egipto, na' benne' ca' dxusēde Jesús buluchebe' Le':

—¿Gazra dxaca lazru' chéajntu' cheajcuézentu' da gágudxu Laní Pascua?

<sup>13</sup> Nadxa Jesús gusel-le' chupa benne' ca' dxusédene'. Dxe'e le':

—Le chjaca lu xezre Jerusalén, na' cheajxrácale tu benne' biu ze nu'e tu dxe'e nisa. Le chjácālene', <sup>14</sup> na' naga xexu'e, xe'e benne' xrane xu'u na': "Benne' Wesēde cheedxu dxenné': ¿Gazra zua xu'u naga guna' Laní Pascua, chee gawa' tu zren nen benne' ca' dxusédeda'?" <sup>15</sup> Nadxa gulé'ene' le'e tu xu'u zren da naca na gudxupe' cuía sibe da bache nabeza na. Na' gucuézale da gágudxu.

<sup>16</sup> Nadxa benne' ca' dxusédene' belexedxúaje' gusá'aque', na' belezrine' xezre Jerusalén. Na' guca xúgute ca da ba guzre Jesús le', na' bulucueze' da xelawe' lu Laní Pascua.

<sup>17</sup> Ca gula chizrela, na' bzrin Jesús nen benne' chazrinnu ca' dxusédene'. <sup>18</sup> Na' ca zaj dxe'e dxelawe', na' gunná Jesús, dxe'e le':

—Da li dxapa' le'e, tu benne' ládujla le'e, benne' dxawe' tu zren nen neda', gudé' neda' lu na' benne' ca' dxeledábage' neda'.

<sup>19</sup> Nadxa benne' ca' gulezúa xácheze', ne gulezú lawe' dxuluchebe' Jesús tu tue':

—¿Neda' xca'?

Na' xetúe' cá'anqueze guzre' Le':

—¿Neda' xca'?

<sup>20</sup> Nadxa bechebe Jesús, dxe'e le':



—Tu benne' ládujla le'e chazrínule, benne' dxawē' tu zren nen neda' lu xé'ena nigá. <sup>21</sup> Da li gatia' neda', Benne' Gulje' Bénneache, ca da naxúaj na chia' lu xiche cheē Dios. Baxache' naca cheē benne' na' gudéē' neda' lu na' benne' ca' dxeledábague' neda'. Cháwedxa gaca cheē bēnnea' la ca gúlaje'.

<sup>22</sup> Dxácate zaj zre'ē dxelawē', na' gucá'a Jesús xeta xtila, ne guzre' Dios: "Xcalenu'." Ca gudé bzúzruje' na, na' bnézruje' na cheē benne' ca', ne guzre' le':

—Le gagu na. Da nigá dxulé'e na ca gaca cheē bel-la' dxen chia'.

<sup>23</sup> Nadxa guqué'e tu da dxé'ajdxu, ne ca gudé guzre' Dios: "Xcalenu'", na' bnézruje' na benne' ca', na' xúgute' gulé'aje' late' weaj da na'. <sup>24</sup> Nadxa Jesús guzre' le':

—Da nigá zéaje na dxen chia' da dxucá'ana chawe na xel-la wezría cube. Dxen chia' nigá lalaj na ne cheē benne' zan. <sup>25</sup> Da li dxapa' le'e, québedxa xí'aja' xrise uva caní ca zrindxa zra gate na' xí'aja' da cube naga dxenná bea Dios xabáa.

*Dxulé'e Jesús nna Pedro quebe núnbe'ē Jesús*  
(Mt. 26.30-35; Lc. 22.31-34; Jn. 13.36-38)

<sup>26</sup> Ca gudé belul-le' da gaca ba Dios, na' belegüene' lu Xi'a Xaga Olivo Ca'. <sup>27</sup> Nadxa gunná Jesús, dxe'ē le':

—Xúgutele le'e gusán lázrele neda' na'a xēla lawe' da naxúaj na lu xiche cheē Dios, dxenné': "Gutia' benne' dxuxúē' zrila' ca', na' zrila' ca' welase dínnajba'." <sup>28</sup> Gate te xebana' lu xēdxu ba, wexá'a neda' nédxula ca le'e naga nababa Galilea.

<sup>29</sup> Nadxa Pedro guzre' Jesús:

—Láqueze xúgute benne' caní xulusán lazre' Lue', neda' québequeze guna' ca'.

<sup>30</sup> Jesús guzre' le':

—Da li dxapa' lue', lu xēla nigaze, nédxula ca za cuezre xjeaj chupa lasa, nnau' chunna lasa quebe núnbe'u neda'.

<sup>31</sup> Na' dxennáqueze Pedro na', gunné':

—Láqueze gatia' tu zren nen Lue', québequeze nnia' quebe núnbe'a Lue'. Cá'anqueze gulenná xúgute'.

*Jesús dxuchálajlene' Dios tu lataj nazí le na Getsemaní*  
(Mt. 26.36-46; Lc. 22.39-46)

<sup>32</sup> Nadxa belezrine' tu lataj naga nazí le na Getsemaní, na' gunná Jesús, dxe'ē benne' ca' dxusédenē':

—Le cueza nigá dxácate cha'a cheajchálajlena' Dios.

<sup>33</sup> Nadxa Jesús guché'ē Pedro, ne Jacobo, ne Juan, na' guzú lau dxezúa xáche'le'ē. <sup>34</sup> Na' dxe'ē benne' ca', dxenné':

—Ba dxunte na watia' lawe' da zua xáche'le'a. Le xegá'ana le'e nigá, ne le sua ban lazre'.

<sup>35</sup> Nadxa Jesús guzre' zéaje' xelate' ca na'la, na' guzúē' sudxú'ala, gunabe' Dios che gaca, quebe téē' xel-la zi' ca da dxal-la' saque' lu zra na'.

<sup>36</sup> Ca dxuchálajlene' Dios na', gunné':

—Xrae, xúgute wazéquenu' Lue'. Bselá neda' cheē quebe saca zi'a lu da caní. Quebe gaca ca dxaca lázreza' neda', san ca dxaca lazru' Lue' gaca na.

<sup>37</sup> Nadxa bezrine' naga zaj zra' benne' ca'an dxusédenē', ne xea-jxraque' le' dxelásiē. Na' Jesús guzre' Pedro:

—Simón, ¿dxásequezu' nigá? ¿Quebe guzéquenu' gusebán lazru' tu chí'idau'ze? <sup>38</sup> Le sua ban lazre', ne le guchálajle Dios chee quebe gun zréaje da xriwe' le'e. Da li, lu xichaj lázrdaule dxaca lázrele gunle da xrlátaje, san lu belá' dxen cheele dxate ní'a na'le.

<sup>39</sup> Nadxa Jesús guxíajé' da xula zeajchálajlene' Dios, na' tuze ca dxenné'. <sup>40</sup> Nadxa ca bezrine', xecha lasa xeajxraque' benne' ca'an dxusédené', dxelásié' lawe' da xu'u bchigala xiaj lawé'. Benne' caní quebe belexezrela lazre' bi xelé'e Le'. <sup>41</sup> Na' ca bezrín Jesús da guxunne' lasa, na' guzre' benne' ca':

—¡Le gase na'a, ne le xezí' lázre'! ¡Bache na! ¡Ba bzrin zra tea' neda', Benne' Gulje' Bénneache, lu na' benne' dul-la ca'! <sup>42</sup> ¡Le chasa! ¡Le chu'u na'a! ¡Ba za benne' gudé' neda' lu na' benne' ca' dxeledábague' neda'!

*Dxelél-le' Jesús*

(Mt. 26.47-56; Lc. 22.47-53; Jn. 18.2-11)

<sup>43</sup> Dxácaté dxuchalaj Jesús caní, na' bzrin Judas, tu benne' nabábalene' benne' chazrinnu ca' dxuséde Jesús, na' zjácale benne' zan le', zaj nu'e xia nalá, ne xaga ca'. Zaj naque' benne' gulesel-la benne' xíchaje ca' chee bxruze ca', ne benne' ca' dxuluxuzájle'e da nadxixruj bea Dios, ne benne' gula sina ca'. <sup>44</sup> Judas, benne' dxudéé' Jesús lu na' benne' ca' dxeledábague' Le', ba blé'ene' benne' ca' tu da guné' da gaca bea na nulé' naca Jesús, gunné':

—Bénnea' gunupa', benne' na' quél-lale. Le xeché'e, ne le guxúe xanne' chee quebe xelé'.

<sup>45</sup> Na' ca bzrine' na', gubigue' lau Jesús, ne dxé'e Le':

—Benne' Weséde.

Na' bnupe' Le'. <sup>46</sup> Nadxa benne' ca' gulel-le' Jesús, ne belexeché'e Le' ba nadxéaje'.

<sup>47</sup> Tu benne' dxuné' Jesús tu zren guléaje' xia nalá chee', na' guchugue' naga tu bi wen zrin chee bxruze blau. <sup>48</sup> Nadxa Jesús guzre' benne' ca':

—¿Bdxuajle le'e zale nen xia nalá, ne xaga ca' chee quél-lale neda', dxugúnele neda' ca tu benne' gubán? <sup>49</sup> Xúgute zra guzúa' neda' ládujla le'e dxusédeda' le'e lu xudau', na' cabata' gudél-lale neda'. Da nigá dxaca na chee gaca li ca da naxúaj na lu xiche chee Dios.

<sup>50</sup> Nadxa xúgute benne' ca' dxuséde Jesús bulusán lazre' Le'. Buluzrúnnuje'.

*Dxuzrunnuj tu bi cuide'*

<sup>51</sup> Tu bi cuide', bi zéajlebe' Jesús, ne nácube' tu ladxe' laga, gulel-la benne' ca' lebe'. <sup>52</sup> Na' bsanbe' ladxe' laga da nácube', na' bzurúnnuje' gala xídezebe'.

*Dxezrín Jesús lau benne' ca' chee xu'u lawe' blau chee judío ca'*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Nadxa beleché'e Jesús lau bxruze blau, na' belezraga xúgute benne' xíchaje ca' chee bxruze ca' ga na', ne benne' gula sina ca', ne benne' ca' dxuluxuzájle'e da nadxixruj bea Dios. <sup>54</sup> Pedro nawé' Jesús zítu'la, na' bzrine' chale'aj chee lizre bxruze blau, naga begá'ane' tu zren nen zruza ní'a na' benne' xu'u lawe' ca', dxuluxuché'e dxu'a xi'.

<sup>55</sup> Na' bxruze blau, ne xúgute benne' chee xu'u lawe' blau chee judío ca' gulíl-laje' tu da gagu na zria Jesús chee xezezéquene' xuluzría xi'e Le' chee gatié', na' quebe bi belezrélene'. <sup>56</sup> Benne' zanté' belún lazre' chee

Jesús. Quebe bedxúaj dizra' chee' tuze ca dxelenné' tué' ne xetúé'. <sup>57</sup> Bal-le' belase', na' gulagu zría Jesús da wen lazre', dxelenné':

<sup>58</sup> —Netu' ba bennentu' chee', gunné': "Neda' guchínnaja' xudau' nigá da belún bènneache, na' ca gaca chunna zra xechisa' xetú xudau' da quebe xelún bènneache."

<sup>59</sup> Cá'anqueze quebe butil-le ca da dxelenné'.

<sup>60</sup> Nadxa bxruze blau guxase' ládujla xúgutē benne' ca', na' bchebē' Jesús:

—¿Québequeze bi dizra' dxuxuzri'u Lue'? ¿Bizra da nigá dxelenné' chiu' Lue'?

<sup>61</sup> Jesús guzúe' zrize, ne gútuqueze bi dizra' buzri'e. Na' bxruze blau bchebē' Le' xecha lasa, dxenné':

—¿Nacu' Lue' Cristo, Zri'ine Dios Lá'azxa?

<sup>62</sup> Na' gunná Jesús, dxē'ē le':

—Awe', ca' naca'. Walé'ele neda', Benne' Guljē Bènneache, dxē'a chalá'a xabela chee' Dios, nape' dutē xel-la waca. Walé'ele neda' zezá'a lu beuj bza.

<sup>63</sup> Nadxa bxruze blau guchezē' zra lanē', na' gunné':

—¿Núzradxa nachínedxu benne' xelagu zria Le'? <sup>64</sup> Le'e bache bènquezle ca dxenné' schanni' chee' Dios. ¿Bi dxennale le'e xca'?

Xúgutē benne' ca' gulenné':

—Nabía xi'ē dxal-la gatiē'.

<sup>65</sup> Nadxa bal-la benne' ca' gulezú lawē' dxuluzré'ē Le' zrene', na' bulucache' lau Jesús, ne buluzálajē' Le'. Dxelenné':

—Gunné' xa'a nuzra dxue Lue'.

Na' benne' zruza ni'a na' benne' xu'u lawē' belú'ē lau Jesús.

### *Dxenná Pedro quebe núnbe'e Jesús*

(Mt. 26.69-75; Lc. 22.56-62; Jn. 18.15-18, 25-27)

<sup>66</sup> Pedro guzúe' lu chale'aj zri-la, na' bzin tu nu'ula wen zrin chee' bxruze blau, <sup>67</sup> na' ca ble'ebe' Pedro dxē'ē dxu'a xi' dxuxuché'ē, na' gunná'abe' le', ne gúzrebe' le':

—Lue' dxedálequezu' Jesús, benne' Nazaret na'.

<sup>68</sup> Na' bechebe Pedro, dxenné':

—Quebe núnbe'a bènnea', ne quebe nezda' nu chee' na' dxuchálaju'.

Na' bedxúaj Pedro chale'aj naga dxelu'ē. Nadxa gudxezre xjeaj.

<sup>69</sup> Nadxa nu'ula wen zrin chee' bxruze blau na' gunná'abe' Pedro xecha lasa, na' gunabe', dxē'ēbe' benne' ca' zaj zre'ē na':

—Benne' nigá naque' tuze benne' ca'an.

<sup>70</sup> Pedro xecha lasa bzue' Jesús chalá'ala. Xetú chí'idau' benne' ca' zaj zre'ē na' gulé'ē Pedro xecha lasa:

—Da líqueze lue' nacu' tuze benne' ca'an lawe' da nacu' benne' chee' xezre ca' zaj nababa Galilea. Ca dxuchálaju' naca bea na da na'.

<sup>71</sup> Nadxa Pedro guzú lawē' dxuzría xi' cuine', ne ben chúchue' xrtizre', gunné':

—Quebe núnbe'a bènnea' dxennale le'e ca'.

<sup>72</sup> Ca'an ga, gudxezre xjeaj da gudxupe' lasa. Nadxa Pedro xeajsá lazre' ca da guzre Jesús le', gunné': "Nédxudxa ca za cuezre xjeaj chupa lasa, lue' nnau' chunna lasa quebe núnbe'u neda'." Na' ca xeajsá lazre' da nigá, gudxézrele'ē.

## 15

*Dxezrín Jesús lau Pilato**(Mt. 27.1-2, 11-14; Lc. 23.1-5; Jn. 18.28-38)*

<sup>1</sup> Ca guxaní' che zila, na' benne' xíchaję ca' cheę bxruze ca' belexedupe' nen benne' gula sina ca', ne benne' ca' dxuluxuzájle'ę da nadxixruj bea Dios, ne xúgute' benne' cheę xu'u lawe' blau cheę judío ca'. Guleché'ę Jesús nadxéaję', na' buludéę' Le' lu na' Pilato. <sup>2</sup> Pilato gunábene' Jesús:

—¿Nacu' Lue' wenná bea cheę judío ca'?

Na' bechebe Jesús:

—Ca' naca na, ca ba gunnáu' lue'.

<sup>3</sup> Na' benne' xíchaję ca' cheę bxruze ca' gulawę' zria Jesús da zanteę.

<sup>4</sup> Nadxa Pilato gunábene' Jesús xecha lasa:

—¿Quebe bi dizra' dxuzri'u? Gunná'xque ca da záneteę da dxelawę' zria Lue'.

<sup>5</sup> Jesús quebe bi dizra' ca buzri'ę. Ca' guca, bebánele'ę Pilato.

*Dxelichaj be'ę gate Jesús**(Mt. 27.15-31; Lc. 23.13-25; Jn. 18.38—19.16)*

<sup>6</sup> Pilato zua tu da dxúnqueze' tu iza tu iza gate dxaca Laní Pascua. Dxusanę' tu benne' xu'e lizre xia, núteteze benne' xelenaba bénneache ca' le'. <sup>7</sup> Lu xu'u lizre xia na' xu'u tu benne' le' Barrabás, benne' nune' tu zren benne' ca' belutie' benne' ca', gate na' gudíl-lalęne' benne' Roma ca'. <sup>8</sup> Na' belezrín lau Pilato benne' xęzre ca', ne gulezú lawę' dxelenabe' lau Pilato gunę' ca dxúnqueze'. <sup>9</sup> Na' bechebe Pilato:

—¿Dxaca lázrele le'ę gusana' bénnea' naque' wenná bea cheę judío ca'?

<sup>10</sup> Caní gunná Pilato lawe' da dxęque be'ene' buludéę' benne' xíchaję ca' cheę bxruze ca' Jesús lu ne'ę lawe' da dxelaque' zre'ę lazre' Le'. <sup>11</sup> Na' benne' xíchaję ca' cheę bxruze ca' beleché'ę benne' xęzre ca', ne gulegú'u xel-le' le' cheę xelexenabe' lau Pilato gusanę' Barrabás. <sup>12</sup> Nadxa Pilato gunábene' benne' ca':

—¿Bi dxaca lázrele le'ę guna' cheę bénnea' naque' wenná bea cheę judío ca'?

<sup>13</sup> Nadxa belexechebe', gulenné' zizraj:

—Bde'ę xaga béguaj.

<sup>14</sup> Na' Pilato bchebe' benne' ca':

—¿Bizra da caleła nun benne'?

Xecha lasa gulenné' zizraj:

—Bde'ę xaga béguaj.

<sup>15</sup> Nadxa Pilato bsanę' Barrabás lawe' da dxaca lazre' xegá'ane' chawe' nen benne' xęzre ca'. Na' ca gudé na' bsebage' benne' ca' xelínę' Jesús tu xide, na' bdeę' Le' lu na' benne' ca' cheę xuludé'ę Le' xaga béguaj.

<sup>16</sup> Nadxa benne' dxjaque' wedil-la guleché'ę Jesús lu chale'aj xu'u lawe', na' bulutupe' xúgute' ljwezre' benne' dxjaque' wedil-la lataj na'. <sup>17</sup> Na' bulugácue' Jesús tu ladxe' bzawe, ne buluzríę' xíchaję' tu da zaj nune' nen zruze xaga xeche'. <sup>18</sup> Nadxa gulezú lawę' dxelenné' zizraj:

—¿Gaca ba wenná bea cheę judío ca'!

<sup>19</sup> Na' belú'ę xichaj Jesús nen tu xia xtila, ne buluzré'ę Le' zrene'. Na' buluzú zribe' lawę', dxelape' Le' ba lá'ana. <sup>20</sup> Ca gudé bulucá'ana dítaję' Le' caní, na' belexegu'ę ladxe' bzawe, na' buluxugácue' Le' zra lá'anaqueze'. Nadxa belexebéaję' Le' cheę chjaque' naga xuludé'ę Le' xaga béguaj.

*Dxuludé'e Jesús xaga béguaj*

(Mt. 27.32-44; Lc. 23.26-43; Jn. 19.17-27)

<sup>21</sup> Tu benne' chee xezre Cirene le' Simón, xra Alejandro, ne Rufo, zezé'e le'e xixre', na' ca bedé'e na', na' bulusebague' le' gu'e xaga béguaj chee Jesús.

<sup>22</sup> Guleché'e Jesús tu lataj nazí le na Gólgota, da zéaje na "Lataj Chee Zrita Xichaj Benne' Gate." <sup>23</sup> Nadxa bulunézruje' Jesús xrise uva wal-la da nachixre da sla' chee mirra. Jesús quebe gu'e na. <sup>24</sup> Nadxa buludé'e Le' xaga béguaj, na' benne' dxjaque' wedil-la gulebéaje' da gulé'e na nule' xelexalé' zra lana Jesús, na' bila xelexúa tu tue'.

<sup>25</sup> Guca che zílala gate na' buludé'e Jesús xaga béguaj. <sup>26</sup> Buludé'e da naxúaj xichaj xaga béguaj chee Jesús da dxulé'e na da nabague', da naxúaj na caní: "Wenná Bea Chee Judío Ca'." <sup>27</sup> Cuita Jesús buludé'e le'e xaga béguaj ca' chupa benne' gubán, tue' chalá'a xabela chee', ne xetúe' chalá'a xéglala chee'. <sup>28</sup> Ca'an guca, guca li ca da naxúaj na lu xiche chee Dios naga dxenné' caní: "Buluzue' Le' tu zren nen benne' wen da zrinnaj ca'."

<sup>29</sup> Na' benne' dxeledé'e na' gulenné' schanni' chee Jesús, ne buluté' xíchaje', dxelenné':

—Awe'. Guchínnaju' Lue' xudau' cheentu', na' gate gaca chunna zra, na' xechisu' na. <sup>30</sup> Bselá cuinu' na'a, ne bexetaj le'e xaga béguaj na'.

<sup>31</sup> Cá'anqueze belún benne' xíchaje' ca' chee bxruze ca', ne benne' dxuluzájle'e da nadxixruj bea Dios. Belún le' chee Jesús, dxelé' ljwezre':

—Benne' xula bselá benne, san Le' québequeze dxezéquene' guselá cuine'. <sup>32</sup> Lue', Cristo, wenná bea chee benne' Israel, bexetaj le'e xaga béguaj na' chee le'entu', na' chéajlentu' chiu'.

Cá'anqueze belún benne' ca' zaj de'e le'e xaga béguaj ca' tu zren nen Jesús, gulenné' schanni' chee'.

*Dxate Jesús*

(Mt. 27.45-56; Lc. 23.44-49; Jn. 19.28-30)

<sup>33</sup> Ca bzin wagubizra, na' guchul-la duté lu xezr la xu nigá tu chi'i wal-la gula. <sup>34</sup> Ca gudé na', na' gunná Jesús zizraj:

—Eloi, Eloi, ¿lama sabactani?

Da nigá zéaje na: "Dios chia', Dios chia', ¿bizr chee na' nusanu' neda?"

<sup>35</sup> Bal-la benne' ca' zaj zre'e na' belenne' na, na' gulenné':

—Le xene. Dxenné' Elías, bénnea' bchálaje' waláz chee Dios.

<sup>36</sup> Nadxa tu benne' guzá chégüe', na' xeajlá'awaje' lu xrise uva zichaj tu da dxezrupe na nisa, na' bzue' na lawe' tu xia xtila da bcuene' dxu'a Jesús chee xi'aje', na' gunná benne' nigá:

—Cuéxadxu. Guxúexquedxu che wida Elías chee xulétaje' Le'.

<sup>37</sup> Nadxa Jesús gudxezre xe'e, na' gütete'. <sup>38</sup> Ca ná'queze gudxeza ladxe' da ze lu xudau', guca na chúpala. Gucá'a na dxa'la, bedxúajte na zri'la. <sup>39</sup> Na' benne' dxenná be'e lu wedil-la, benne' ze' lau Jesús, gate na' blé'ene' ca gudxezre xe'e, ne ca guca gütete', na' gunné':

—Da líqueze benne' nigá guque' Zri'ine Dios.

<sup>40</sup> Cá'anqueze zaj ze na' bal-la nu'ula dxelenné'e zítu'la. Ládujla nu'ula caní zaj ze María Magdalena, ne Salomé, ne María, xrna Jacobo cuide' ne José. <sup>41</sup> Nu'ula caní gusá'acalene' Jesús, ne gulácalene' Le' gate na' gudé' naga nababa Galilea. Cá'anqueze zaj ze na' zánedxa nu'ula xula, nu'ula cá' belezrine' Jerusalén tu zren nen Jesús.

*Dxulucache' Jesús lu xedxu ba**(Mt. 27.57-61; Lc. 23.50-56; Jn. 19.38-42)*

<sup>42-43</sup> Ca za chizrela bzrin José, benne' Arimatea ga na'. Benne' nigá naque' benne' blau ládujla benne' ca' chee xu'u lawe' blau chee judío ca'. Cá'anqueze le' dxebeze' zra la' Dios chee nna be'e. Lawe' da naca zra dxulucueze', zra nedxu chee zra dxulupá'ane', du lazre' guxú'e lau Pilato, na' gunabe' si'e lataj xexu'e Jesús. <sup>44</sup> Bebánele'e Pilato ca bennene' ba gute Jesús, na' gunné' benne' dxenná be'e lu wedil-la na' chee gunabe' che ba guca ca'. <sup>45</sup> Gate bénnea' dxenná be'e lu wedil-la gunné' ca'an guca, nadxa Pilato bnézruje' José lataj bexu'e Jesús. <sup>46</sup> Nadxa José guzi'e tu ladxe' xtila laga, na' bulétaje' Jesús, ne bulazre' Le' ladxe' xtila na'. Na' gúxrue' Jesús tu lu ba da ba gudene' le'e xiaj xre, na' bséxuje' ba na' nen tu xiaj zren. <sup>47</sup> María Magdalena, ne María, xrna José belelé'equezne' naga bulucache' Jesús.

**16***Dxexbán Jesús ládujla benne' gate**(Mt. 28.1-10; Lc. 24.1-12; Jn. 20.1-10)*

<sup>1</sup> Ca gudé zra dxulupá'ane', na' María Magdalena, ne Salomé, ne María, xrna Jacobo, gulezí'e da dxelá zixre chee cheajlelu'e Jesús. <sup>2</sup> Na' bál-la'la zra nedxu chee da gazre zra belezrine' dxu'a ba gate na' za dxalaj gubizra. <sup>3</sup> Na' gulenné', dxelé' ljwezre':

—¿Nuzra cua xiaj da naxeexuj ba?

<sup>4</sup> Ca gulenné'e, na' belelé'ene' xiaj zren na' da buluséxuje' ba, ba nadúa na. <sup>5</sup> Ca gulu'e lu ba, na' belelé'ene' tu benne' dxe'e chalá'a xabela, nácue' zra lane' tunna da chiche, na' belezrebe'. <sup>6</sup> Na' gunná benne' nigá, dxe'e nu'ula ca':

—Quebe zrébele. Le'e dxexílajle Jesús, benne' Nazaret, bénnea' gudé'e le'e xaga béguaj. Bache bebán bénnea'. Québedxa xu'e nigá. Le nna' lataj naga gulexru'e Le'. <sup>7</sup> Le chjaca na'a, le cheajezre benne' ca' bsédene', ne Pedro cuía lau Jesús chéaje' naga nababa Galilea ca le'e. Na' xelé'equeze Le' ca ba gunnáqueze'.

<sup>8</sup> Nadxa nu'ula ca' buluzrúnnuje', besí'aque' dxu'a ba lawe' da belezrébele'e. Quebe nu gulé'queze' ca da guca na lawe' da dxelezrébele'e.

*Jesús dxulé'e lau María Magdalena**(Jn. 20.11-18)*

<sup>9</sup> Ca gudé bebán Jesús ládujla benne' gate ca guxaní' zra nedxu chee da gazre zra, na' ble'e lawe' zate ca' María Magdalena, nu'ula na' bebéaj Jesús gazre be' xriwe' guxú'e. <sup>10</sup> Nu'ula nigá guxíaje' xeajezre' benne' ca' gulaque' Jesús tuze, zaj zre'e baxácheze, ne dxelebezre'. <sup>11</sup> Gate na' gulenne' nabán Jesús, na' ba ble'e nu'ula nigá Le', quebe guléajle'e.

*Dxulé'e lau Jesús chupa benne' bsédene'**(Lc. 24.13-35)*

<sup>12</sup> Ca gudé na' ble'e lau Jesús nazrala chupa benne' ca' bsédene' zaj xu'e neza le'e xixre'. <sup>13</sup> Benne' caní belexebi'e, na' xeajleguezre' benne' xezícala. Cá'anqueze benne' caní quebe guléajle'e.

*Jesús dxusebague' benne' gubáz chee' ca' da dxal-la' xelune'**(Mt. 28.16-20; Lc. 24.36-49; Jn. 20.19-23)*

<sup>14</sup> Ca gudédxa, na' ble'e lau Jesús chinéaj benne' ca' bsédenē' ca zaj dxe'e dxelawē', na' gudil-le' le' lawe' da quebe guléajle'e ba bebanē', ne lawe' da zaj naque' lázrdau zide' lawe' da quebe guléajle'e chee benne' ca' belexelé'ene' Le' ca gudé bebanē'. <sup>15</sup> Na' gunné', dxe'e benne' ca':

—Le chjaca du ca naca xezr la xu. Le cu'u lban chee dizra' chawe' chia' chee xelénqueze xúgute bēnneache. <sup>16</sup> Benne' chéajle'e, ne chue' nisa, la bēnnea', na' benne' quebe chéajle'e, wabía xi' bēnnea'. <sup>17</sup> Da dxelunna bea caní xululé'e benne' ca' xeléajle'e chia', xuluchínene' La neda' chee xelexebéajē' be' xriwē'. Xuluchálajē' dizra' nazrala. <sup>18</sup> Welúxrue' bēla' ca', ne che xelé'aje' da gute benne', quebe bi xeléquene'. Cá'anqueze wuluxrúa ne'e benne' quebe chawe' zaj zue', na' xelexexaque'.

*Dxexepe Jesús xabáa*  
(Lc. 24.50-53)

<sup>19</sup> Ca gudé bchálaj Xránadxu Jesús nen benne' ca', na' Dios bechise' Le' xabáa, na' gudxe'e chalá'a xabēla chee Dios. <sup>20</sup> Nadxa benne' ca' guledxúajē', xeajlelu'e lban chee dizra' chawe' nigá du ca naca xezr la xu nigá. Léqueze Xránadxu gúcalene' le', na' bdxixruj be'e dizra' chee' ne chee xel-la waca ca' da za xabáa da belune'. ¡Ca'an gaca na!

## DIZRA' CHAWÉ' CA NACA CHEE JESUCRISTO SDA BZUAJ SAN LUCAS

*Dizra' dxuchalaj San Lucas, dxé'ę Teófilo*

<sup>1</sup> Benne' zan ba belunę' ca da gulezéquene' buluzúaje' cáteze naca da guca ládujla dxi'u, <sup>2</sup> cáteze na' gulé benne' ca', benne' belelé'ene' nédxudaute ca naca da guca na, na' buluchálaje' dizra' chawe' na'. <sup>3</sup> Cá'anqueze neda' ba bchi'a xánnia' xúgute da ca' gulaca na nédxudaute, na' dxéqueda' chawe' guzúaja' da nigá chiu' cáteze guca, bi nazrí'ite lazra', lue', Teófilo. <sup>4</sup> Dxuna' caní cheę nézenu' naca na da li ca da ba bululé'ene' lue'.

*Gubáz cheę xabáa dxuzenne' ca galaj Juan, benne' guchúe' bėnneache nisa*

<sup>5</sup> Gate na' naca Herodes wenná bea cheę xezre ca' zaj nababa Judea, na' zua tu bxruze le' Zacarías, benne' nababe' cue' bxruze ca' gunná be'e Abías ca ni'te. Zru'ula Zacarías na' le' Elisabet, na' nácaqueze Zacarías na' zre sua benne' ca' gulebábale bxruze Aarón. <sup>6</sup> Zacarías ne zru'ule' Elisabet gulaque' xrlátaje lau Dios, ne dxelunę' ca zaj naca da bdxixruj bea Xránadxu, ne ca da naxúaj na lu da gunné'. Ca'an guca, quebe nu guzeque gagu zria le' lau Dios. <sup>7</sup> Quebe nu zrí'ine' chilá', lawe' da naca Elisabet na' nu'ula wizre, na' dxúpatę' zaj bezúale'ę gula.

<sup>8</sup> Tu zra, gate belexala bxruze ca' naga nababa Zacarías xelunę' zrin lu xel-la bxruze cheę' lau Dios, <sup>9</sup> cáteze naca da dxelunę' bxruze ca', na' bexala Zacarías chu'e lu lataj lá'azxa cheę Xránadxu lu xudau' cheę guzeze' xala. <sup>10</sup> Dxácatę' na' dzezze xala na', ca naca benne' ca' zaj zra' chalé'ajla dxuluchálajlene' Dios. <sup>11</sup> Nadxa ble'e lau tu gubáz cheę xabáa cheę Xránadxu, zę' chalá'a xabela cheę cugu naga zria xala dzezze na. <sup>12</sup> Ca ble'e Zacarías gubáz cheę xabáa na', guzúe' stebe, ne bzrébele'ę.

<sup>13</sup> Gubáz cheę xabáa na' guzre' le':

—Zacarías, quebe zrebu', lawe' da ba ben Dios dizra' da dxuchálajlenu' Le', na' nu'ula chiu', Elisabet, walaj tu zri'ine', bi na' guzú' labe' Juan. <sup>14</sup> Wabéle'enu', ne gaca chiu' tu da ba neza zrente, na' benne' zan xelebene' lawe' da ba gulaj bidu na'. <sup>15</sup> Ca'an gaca lawe' da gaca zri'inu' szrente lau Dios. Quebe xí'ajbe' xrise uva wal-la, u da dxusuzre na bėnneache, na' gate gálajtebe' tu súalezqueze Be' Lá'azxa nen lebe'. <sup>16</sup> Ne cheę lebe' benne' zan xelexaque' bi cheę Xránadxu Dios. <sup>17</sup> Juan nigá quia laube' lau Xránadxu, na' Be' na', ne xel-la waca da gulezúale na Elías, bėnnea' bchálaje' waláz cheę Dios gate nate, xelezúale na lebe', cheę guzúabe' tuze benne' ca' zaj naque' xra xrna nen zrí'ine', ne cheę gulé'ebe' benne' dxeledábage' Dios cheę xelunę' ca dxenná xrtizra' Dios. Ca'an gaca, gucá'ana cháwebe' bėnneache cheę xezezi' lu ne'ę Xránadxu.

<sup>18</sup> Zacarías na' bchebe' gubáz cheę xabáa:

—¿Ájazra gaca nezda' gaca caní? Neda' ba nagúlale'a, ne cá'anqueze naca nu'ula chia'.

<sup>19</sup> Na' bechebe gubáz cheę xabáa na':

—Neda' naca' Gabriel, ne naca' wen zrin cheę Dios. Le' gusel-le' neda' cheę guchálajlena' lue', ne guzenda' lue' dizra' chawe' nigá. <sup>20</sup> Na'a, lawe'



da quebe guxéajle'u da gucha' lue', xegá'anu' quebe gaca nníu' cadxa galaj zri'inu'. Caní gaca na ca zrinte zra chee na.

<sup>21</sup> Dxácate na' zaj zra' benne' ca' chalé'ajla, dxelebeze' Zacarías, ne dxelexebánene' lawe' da dxezréle'ene', quebe dxedxúaje' lu lataj lá'azxa. <sup>22</sup> Gate bedxúaj Zacarías, québedxa dxaca nnie'. Nadxa guleque bé'ene' ba ble'e Zacarías tu da ble'e Dios le' lu lataj lá'azxa na'. Na' le' bta ná'ase', lawe' da quebe dxaca nnie'.

<sup>23</sup> Ca xeajsé chee zra ca' dxal-la' gun Zacarías zrin chee xudau', na' bezé'e zexíaje' lizre'. <sup>24</sup> Ca gudé na' zru'ule' Elisabet ba zue' zi'i, na' quebe bdxúaje' lataj bchina' chie' ca gazxu' beu', na' dxenné' lu lázrdawe': <sup>25</sup> "Xrana' Dios ba bene' chia' da nigá chee québedxa xuluzúa bènneache neda' chalá'ala."

*Gubáz chee xabáa dxuzenne' ca galaj Jesús*

<sup>26</sup> Ca gudé xrupa beu' gate na' bchálajle gubáz chee xabáa na' Zacarías, na' Dios gusel-le' le' tu xezre nababa Galilea nazí le na Nazaret, <sup>27</sup> chee cheajchálajlene' tu nu'ula cuíde'dau' lebe' María. Lebe' ba zua guchaga na'be' benne' biu na' le' José, benne' naque' zri'ine zre sua wenná bea David.

<sup>28</sup> Gubáz chee xabáa na' guxú'e naga zua María na', na' guzre'-be': —Padiuzre. Dios dxune' lue' tu culuén. Xránadxu zúalene' lue'. Dios ba bene' tu da cháwedxa chiu' quézcala chee xúgute nu'ula ca'.

<sup>29</sup> Gate María na' ble'ebe' gubáz chee xabáa na', bebánebe' ca naca dizra' na', na' gunabe' lu lázrdaube': ¿Bizr chee na' dxugape' neda' diuzre caní?

<sup>30</sup> Nadxa gunná gubáz chee xabáa na':

—María, quebe zrebu' lawe' da ba bzrué'enu' tu culuén da dxun Dios chiu' lue'. <sup>31</sup> Na'a, zua da gunna Dios chiu', na' galaj tu bidu biu chiu', na' guzú' labe' Jesús. <sup>32</sup> Lebe' gácabe' szren, na' xelennáqueze' naque' Zri'ine Dios szrente, na' Xránadxu Dios gune' Le' wenná bea ca guca xra xrtawe' David, <sup>33</sup> chee nna bé'etecaze' xezr la xu Israel, na' xel-la dxenná bea chee' quebe cheajséqueze chee na.

<sup>34</sup> Nadxa María bchébebe' gubáz chee xabáa:

—¿Ájazra gaca da nigá, lawe' da quebe nu benne' biu zúalena'?

<sup>35</sup> Gubáz chee xabáa na' gunné':

—Be' Lá'azxa chee Dios sue' xichaj lázrda'u, na' xel-la waca chee Dios szrente sua na nen lue'. Chee le' na' bidu na' gálajbe' gácaquezebe' chee Dios, na' sí'queze labe' Zri'ine Dios. <sup>36</sup> Cá'anqueze bila ljwezru' Elisabet wálajqueze bidu chee' lácala ba naque' benne' gula. Ca'an naca, nu'ula na' gulenné' naque' wizre, ba zeaj xrupa beu' bnezruj Dios chee'. <sup>37</sup> Quebe bi de da quebe gaca gun Dios.

<sup>38</sup> Nadxa gunná María:

—Neda' nácaqueza' wen zrin chee Xránadxu. Gun Dios chia' ca da ba gunnáu'.

Na' gubáz chee xabáa na' bezé'e naga zua María na'.

*María zeajxúebe' Elisabet*

<sup>39</sup> Ca lu zra na' María guzá'abe' zéajbe' tu xézredau' da zua na laduj xi'a ca' chee ga nababa Judea. <sup>40</sup> Na' guxú'ube' lizre Zacarías, ne bgápabe' diuzre Elisabet. <sup>41</sup> Gate ben Elisabet dizra' da gunné' María, na' bidu na' xú'ube' le'e Elisabet guxrítebe', na' guzúale' Be' Lá'azxa le'.

<sup>42</sup> Nadxa gunné' tu chi'e zizraj:

—Dios ba beṇe' tu da cháwedxa chiu' quézcala chee xúgute nu'ula ca', lawe' da ba zua da beṇna Dios chiu'. <sup>43</sup> ¿Núzraqueze naca' neda', za xrna Xrana' ga zua' neda'? <sup>44</sup> Cáteze benda' dizra' da gunnéu', na' guxrite bidu chia' lu le'a lu xel-la dxebe cheebe'. <sup>45</sup> Ba neza naca na chiu' guxéajle'u lawe' da gaca li ca da gunná Xránadxu.

<sup>46</sup> Nadxa gunná María:

Bénne'du xu'a dxue lá'ana na Xrana'.

<sup>47</sup> Lázdawa' dxebe na ca dxun Dios, weselá chia'.

<sup>48</sup> Lawe' da gudxé' Dios gunne xue chia', nácaqueza' wēn zrin chee'.

Na'a su lau na, xúgute benne' xelenné' nazi'a tu culuen zren chee Dios.

<sup>49</sup> Dios Szrentē ba beṇe' tu da zrentē chia' neda'.

Chee le' na' lá'azxa naca La Le'.

<sup>50</sup> Le' xexache lázrqueze' xúgute benne' ca' dxelezrebe' Le'.

<sup>51</sup> Da zrentē ba beṇ Le'.

Bzue' zrila benne' ca' dxulucá'ana szren cuine'.

<sup>52</sup> Bebéajē' benne' blau ca' lu lataj chee',

ne bechise' benne' dxexruj lazre' ca'.

<sup>53</sup> Bnézrujle'e da gulagu benne' dxeledún,

na' benne' gunní'a ca' bca'ane' le' cá'aze.

<sup>54</sup> Gúcalēnē' benne' Israel, benne' wēn zrin chee' ca'

lawe' da bezrí lázrqueze' le',

<sup>55</sup> ca da guchebe lazre' chee xra xrtáudxu ca',

chee Abraham, ne chee benne' xrtie' ca' chadía chacanna.

<sup>56</sup> María begá'analēbe' Elisabet ca chunna beu', na' ca gude na' bezrinbe' lízrebe'.

*Ca gulaj Juan, benne' bchue' bēnneache nisa*

<sup>57</sup> Ca gude na' guxá' beu' chee Elisabet na' chee galaj bidu chee', na' guzane' tu bi biu chee'. <sup>58</sup> Benne' walízr chee' ca', ne xrtia ljwezre' belezrine' dxelebeṇe' nen le', gate belenne' Dios bezrí lázrele'e le'. <sup>59</sup> Gate guca xrunu' zra, belezrine' chee xelechúgue' lu xpélabē' da gulé'e na naca be' bi chee Dios, na' gulaca lazre' xuluzúe' labe' Zacarías ca le' xrabe'.

<sup>60</sup> Na' gunná xrnabe':

—Quebe gaca. Dخال-la' si' labe' Juan.

<sup>61</sup> Na' gulé'e le':

—¿Bizr chee na'? Quebe nu chilá' xrtia ljwézrele le' ca'.

<sup>62</sup> Na' buluchebe' xra bidu na', bulutá ne'e chee xelenézene' ájazra guzúe' labe'. <sup>63</sup> Na' xrabe' na' gunabe' tu blágadau', na' bzuaie' le'e na: Juan si' labe'. Na' xúgute benne' ca' belexebánene'. <sup>64</sup> Ca' guca Zacarías benné', na' guzú lawe' dxue lá'ane' Dios. <sup>65</sup> Ca belelé'ene' da nigá, xúgute benne' walízr chee' belexebánene', na' ca naca xezre zaj nnita laduj xi'a ca ga nababa Judea, buluchálaje' ca da guca. <sup>66</sup> Xúgute benne' belenne' na, gulezú lawe' dxelenné' lu lázdawe', ne buluchebe ljwezre' tue' xetúe':

—¿Ájazraqueze gun bi nigá?

Naca bea na Xránadxu zúalēnē'-be'.

*Ca da bil-la Zacarías*

<sup>67</sup> Na' Be' Lá'azxa guzúalēnē' Zacarías, xra bidu nigá, na' bchálaje' waláz chee Dios, gunné':

<sup>68</sup> ¡Gaca ba Xránadxu, Dios chee xezre Israel!

Ba blē'e naga zúadxu, bēnneache chee', na' bselé' dxi'u.

<sup>69</sup> Ba gusel-le' tu benne' wál-lale'e, weselá cheedxu.

Bénnea' gulaj ládujla xrtia David, benne' wen zrin chee'.

<sup>70</sup> Ca'an guchebe lazre' Dios lu dxu'a benne' ca' buluchálaję' waláz chee' nédxudaute.

<sup>71</sup> Guchebe lazre' guselé' dxi'u lu na' benne' dxelezzré'ę dxi'u, ne lu na' benne' dxelecuídenę' dxi'u.

<sup>72</sup> Xezrí lazre' xra xrtáudxu ca', ne quebe gal-la lazre' xel-la wezría lá'azxa chee'.

<sup>73</sup> Da nigá naca na da guchebe lazre' Dios da bzua chache' nen xra xrtáudxu Abraham, da naca tu da gunne' cheedxu dxi'u.

<sup>74</sup> Guchebe lazre' guselé' dxi'u lu na' benne' dxelezzré'ę dxi'u chee' gaca gundxu zrin chee', ne quebe zrébedxu,

<sup>75</sup> ne gácadxu xrlátaje lau Le', ne gácadxu bi cheéqueze' xúgute zra naca bandxu.

<sup>76</sup> Lue', zrí'ina'dau', sí'queze lau' bi guchálajqueze waláz chee' Dios szrentę, lawe' da quia lau' lau Xránadxu, salju' neza chee' Xránadxu,

<sup>77</sup> Guzénenu' bénneache chee', Le' gunite lawe' dul-la chee', ne guselé' benne' ca'.

<sup>78</sup> Ca'an gaca lawe' da dxexezrí lazre' Dios dxi'u.

Dxunę' na'a dxalaj tu xi' chee' xabáa da dxusení' cheedxu,

<sup>79</sup> na' gusení' na naga zaj zra' benne' zaj zré'ę lu na' xel-la gute, chee' cu'u na dxi'u lu neza xrtante lau Dios.

<sup>80</sup> Bidu na' bgúlabe', ne bgula bénne'du xu'ube' chawe' lu da naca chee' Dios. Guzúaquezbe' le'ę xixre' lawe' lataj cadxa bzrin zra ble'e laube' xezre Israel.

## 2

### *Ca guca gate gulaj Jesús (Mt. 1.18-25)*

<sup>1</sup> Ca lu zra na' gate dxenná bea Augusto, benne' xezre Roma, benne' dxenná be'ę xúgute cue' xezr la xu, le' gunná bé'ene' xelú'u lu xiche xúgute benne' zaj zré'ę xezr la xu. <sup>2</sup> Da nigá naca da nédxudau' gulú'u bénneache lu xiche. Guca caní gate naca Cirenio benne' zaj xu'u lu ne'ę xezre ca' zaj nababa Siria. <sup>3</sup> Xúgute bénneache dxun na ba xen chjaque' lu xezre naga zaj nababe' chee' xelu'ę lu xiche. <sup>4</sup> Chee' le' na' José guzé'ę lu xezre Nazaret, da nababa Galilea, chee' bzrinę' lu xezre Belén, da nababa Judea, naga gulaj wenná bea David. Bzrin José na' lawe' da naque' xrtia David na'. <sup>5</sup> José guxíaję' Belén chee' chu'ę lu xiche tu zren nen María. María nigá ba nachébebe' guchaga ná'alebe' José, na' ba bnezruj Dios cheebe'. <sup>6</sup> Dxácate na' zaj zré'ę lu xezre Belén, na' bzrin zra san María bidu chee'. <sup>7</sup> Lu xezre na' gulaj bidu nedxu chee', na' bchele'-be' ládxe'du ca', na' gúxruę'-be' xu'u naga dxelún chi'ę da dxelagu bea ca', lawe' da quebe ga bzrela tu lataj lu xu'u naga che'ę.

### *Dxuluchálaję gubáz chee' xabáa benne' ca' dxuluxúę' zrila' ca'*

<sup>8</sup> Gagu cuita xezre Belén zaj zra' benne' ca' dxuluxúę' zrila' ca', dxelexegá'anę' le'ę xixre' chizrela, dxuluxúę' zrila' chee' ca'. <sup>9</sup> Naga zaj zré'ę ble'e lau tu gubáz chee' xabáa chee' Xránadxu. Na' xel-la naxaní' chee' Xránadxu Dios bsaní na naga zaj zré'ę. Ca'an guca, belezrébe'ę. <sup>10</sup> Na' gubáz chee' xabáa na' guzre' le':

—Quebe zrébele, lawe' da dxuzenla' le'e tu dizra' chawe'. Ne chee dizra' nigá xelebéle'e xúgute Bénneache. <sup>11</sup> Na'a, lu xezre chee David, ba gulaj tu bidau' gácabe' weselá chee. Bi nigá naque' Cristo, Xránadxu. <sup>12</sup> Da nigá gaca na tu da gunna bea na chee. Cheajxrácale bidu dxe'ene nigá, dxélabé' ládxe'du ca', ne debe' tu xu'u naga dxelún chi'e da xelagu bea ca'.

<sup>13</sup> Chadí lau, cuita gubáz chee xabáa na' bululé'e lau zandxa gubáz chee xabáa, dxelúe lá'angé' Dios, dxelenné':

<sup>14</sup> ¡Gaca ba Dios na'ala,

na' lu xezr la xu nigá sua xel-la dxebeza zri lazre' chee Bénneache, benne' dxeluné' ca da dxaca lazre' Dios!

<sup>15</sup> Gate besí'aca gubáz chee xabáa ca', zeajxaque' xabáa, nadxa benne' ca' dxuluxúe' zrila' gulezú lawe' dxelé' ljwezre' tue' xetúe':

—Chéajxquedxu lu xezre Belén cheajnnadxu da ba guca, ca da ba gunná Xránadxu Dios, guzre' dxi'u.

<sup>16</sup> Ca'an guca, besí'aca zézxuje', na' xejlexraque' María ne José, ne bidu dxe'ene na', debe' xu'u naga dxelún chi'e da xelagu bea ca'. <sup>17</sup> Gate belélé'ene' bidu na', na' buluchálajlene' benne' ca' ca da gunná gubáz chee xabáa ca da naca chee bidu na'. <sup>18</sup> Na' xúgute benne' ca' belenne' da nigá belexebánele'ene' ca da gulenná benne' caní. <sup>19</sup> María bcaché' da nigá lu xichaj lázrdawe', na' blaba lazre' ca naca da nigá. <sup>20</sup> Ca'an guca besí'aca benne' ca' dxuluxúe' zrila', dxulucá'ana szrene' Dios, ne dxelúe lá'angé' Le' ca naca xúgute da belenne', ne da belélé'ene', lawe' da guca xúgute ca da guzre gubáz chee xabáa na' le'.

*Ca guca gate belú'e bidu Jesús lu xudau'*

<sup>21</sup> Ca guca xrunu' zra, na' gulechugue' tu lu xpela bidu na' ca da nadxixruj bea na chee Dios, na' belú'e La bidu na' Jesús, cáteze naca da gunná gubáz chee xabáa na', guzre' María nédxudxa ca za gu'e bidu na'.

<sup>22</sup> Ca bzrin zra chee xeluné' ca bdxixruj bea Moisés chee xelexexaque' chawe' lau Dios, na' belú'e bidu na' lu xezre Jerusalén chee xuluzúe'-be' lu na' Xránadxu Dios. <sup>23</sup> Beluné' caní lawe' da ba naxúaj lu da nadxixruj bea Xránadxu Dios da dxenná na caní: Xúgute bi biu, bi nedxu gálajbe' dxalla' guzúale-be' chee Xránadxu Dios. <sup>24</sup> Na' xjaque' xejlegu'e dxen chee be xixre'du ca' lau Dios ca da dxenná da nadxixruj bea na chee Xránadxu Dios, da dxenná na: Chupa bgugu, che chupa bxinnedau'.

<sup>25</sup> Ca lu zra na' zua tu benne' biu gula lu xezre Jerusalén, le' Simeón. Naque' tu benne' chawe', na' dxue lá'anaqueze' Dios, ne dxebeze' benne' sel-la Dios chee guselé' Bénneache Israel. Zúale Be' Lá'azxa chee Dios Simeón na'. <sup>26</sup> Be' Lá'azxa ba guzre' Simeón na' quebe gatie' cadxa lé'ene' Cristo, benne' na' sel-la Xránadxu Dios. <sup>27</sup> Simeón nigá guxíaje' lu xudau' lawe' da bsi' Be' Lá'azxa chee Dios le'. Na' gate xra xrna bidu Jesús zaj nu'e-be' lu xudau' chee xeluné' cheebe' ca da bdxixruj be'e Moisés, <sup>28</sup> na' Simeón na' guqu'é' bidu na'. Bnide'-be', ne be lá'angé' Dios, gunné':

<sup>29</sup> Xrana', na'a waca gunnu' lataj gatia' lu xel-la dxebeza zri lazre' lawe' da ba benu' ca da guchébe lazru' chia', naca' wen zrin chiu'.

<sup>30</sup> Nen xiaj láuqueza' ba ble'eda' Benne' Weselá,

<sup>31</sup> Bénnea' ba bzu' chee gácalene' xúgute Bénneache.

<sup>32</sup> Le' naque' tu xi' da gusení na chee benne' quebe zaj nababe' Israel. Ne chee Le' gaca tu da ba neza chee Bénneache chiu', benne' Israel.

<sup>33</sup> José ne xrna Jesús belexebánele'ene' ca da gunná Simeón chee' bidu Jesús. <sup>34</sup> Nadxa Simeón gunabe' lau Dios guné' chee' da chawe', na' guzre' María, xrna Jesús:

—¡Gunná'xque nigá! Bidu nigá, Dios nuzúe' lebe' chee' gunbe' chee' benne' Israel ca', cheajlecházie' benne' zanté lu na' da xriwe', na' benne' zanté xelexexase' lau Dios. Lebe' gácabe' tu da dxunna bea chee' Dios, na' benne' zanté xuluzúe' lebe' chalá'ala. <sup>35</sup> Ne chee' lebe' gulé'e lau ca da dxeajlesá lazre' tu tue'. Na' chiu' lue' da nigá gaca na ca tu xia nalá, da cheajsúa lu lázrda'u.

<sup>36</sup> Cá'anqueze zua na' tu nu'ula dxenné' waláz chee' Dios, le' Ana. Nu'ula nigá naque' zri'ine Fanuel, ne xrtia Aser. Ba naque' nu'ula gúlale'e. Bchaga ne'e gate na' naque' nu'ula cuide'te, na' guzúalene' benne' chee' gazre iza. <sup>37</sup> Na' begá'ane' tuze', ne ba xu'e tapa lalaj tapa iza. Quebe becuase' xudau', na' dxuné' zrin chee' Xránadxu Dios te zra chizrela. Dxuné' gubasa, ne dxuchálajlene' Dios. <sup>38</sup> Ana na' bzrinqueze' na', na' ca gudé guzre' Dios: “Xcalenu”, na' guzú lawé' dxuchálaje' chee' bidu Jesús nen xúgute' benne' ca' dxelebeze' benne' na' sel-la Dios chee' guselé' benne' Jerusalén ca'.

#### *Ca guca gate belexezrine' xezre Nazaret*

<sup>39</sup> Ca beluné' xúgute' ca da dxenná da nadxixruij bea Xránadxu, nadxa besía'que' xjaque' naga nababa Galilea, na' belexezrine' xezre Nazaret da naca lazrie'. <sup>40</sup> Na' bidu Jesús bgúlabe', ne gúcadxabe' chuchu, ne gúcadxabe' bi naxéajni'i, na' Dios bca'ane' lebe' chawe'.

#### *Ca guca gate bzrin bidu Jesús lu xudau'*

<sup>41</sup> Xra xrna' Jesús, tu tu iza dxjá'aque' xezre Jerusalén gate dxu'u laní chee' xulusá lazre' benne' judío ca da ben Dios, bebéaje' xra xrtawe' ca' lu xezr la xu Egipto. <sup>42</sup> Ca guque' Jesús chazrinnu iza, na' xjá'aque' xúgute' Jerusalén, ca dxelúnqueze' ca dxaca laní. <sup>43</sup> Ca gudé laní, na' besía'que', na' bidu Jesús begá'anabe' Jerusalén, ne quebe guleque be'e xrnabe', ne José. <sup>44</sup> Dxeléquene' Jesús zezabe' ládujla benne' zan ca', na' besía'que' tu zra nez. Gate belexilje'-be' ládujla benne' xrtie' ca', ne benne' ca' zaj núnbe'e, <sup>45</sup> quebe belexezréne'-be'. Ca'an guca belexebi'e zeajxá'aque' Jerusalén chee' cheajlexedíje'-be' na'.

<sup>46</sup> Ca gudé guca chunna zra, nadxa belexezréne'-be' lu xudau', dxe'ebe' ládujla benne' ca' dxuluxuzájle'e da nadxixruij bea Dios, na' dxenbe' ca dxelenné', ne dxuchébebe' benne' ca'. <sup>47</sup> Xúgute' benne' ca' dxelenne' dxelexebánene' cheebe' ca naca xel-la sina cheebe', ne ca naca da dxuchálajlebe' le'. <sup>48</sup> Gate belelé'e xra xrnabe' lebe', na' belexebánene'. Na' gunná xrnabe', dxé'e-be':

—Zri'ina', ¿bizr chee' na' benu' caní nen netu'? Cadite stébe ba guzúantu' chiu' dxexíajntu' lue', xrau' ne neda'.

<sup>49</sup> Nadxa Jesús dxé'ebe' le':

—¿Bizr chee' na' dxexíajle neda'? ¿Quebe nézele le'e dxal-la' guna' neda' da naca chee' Xra'?

<sup>50</sup> Xra xrnabe' quebe guléajni'ine' ca da gúzrebe' le'.

<sup>51</sup> Nadxa bezálebe' le' zeajxá'aque' Nazaret, na' gúcaquezebe' bi wezúa dizra' chee' xra xrnabe'. Na' xrnabe' bcache chawe' xúgute' da nigá lu lázrdawe'. <sup>52</sup> Jesús zéajbe' dxegúlabe' lu bel-la' dxen cheebe', ne lu xichaj lázrdaube', na' dxedxúajquezebe' chawe' lau Dios, ne lau bénneache.

## 3

*Juan, benne' dxuchúe' bénneache nisa, dxuchálaje' xrtizra' Dios le'e xixre' (Mt. 3.1-12; Mr. 1.1-8; Jn. 1.19-28)*

<sup>1</sup> Iza chinu' ca dxenná bea Tiberio, benne' dxenná be'e ca naca xezr la xu, na' Poncio Pilato dxenná be'e naga nababa Judea, na' Herodes dxenná be'e naga nababa Galilea, na' Felipe, benne' biche Herodes, dxenná be'e naga nababa Iturea, ne Traconite, na' Lisantias dxenná be'e naga nababa Abilinia. <sup>2</sup> Na' Anás, ne Caifás zaj naque' bxruze blau. Ca lu zra na' Dios bchálajene' Juan, zri'ine Zacarías, naga zua Juan le'e xixre' lawe' lataj. <sup>3</sup> Juan na' gudé'e ca naca xézredu ca' zaj nnitan' chalá'a weaj xegu Jordán, na' dxé'e benne' ca' dxal-la' xelexebí'i lazre', ne xeledxúe' nisa chee gunita lau Dios chee xtul-le'. <sup>4</sup> Caní guca ca na' gunná Isaías, benne' bchálaje' waláz chee Dios, gunné':

Nen tu chí'i bénnea' dxenné' zizraj le'e xixre' lawe' lataj. Dxenné':  
Le gucueza neza naga te Xránadxu.

Le xulí chawe' neza lase chee'.

<sup>5</sup> Ca naca zrítuđu ca' le xuzrá na.

Ca naca xi'a ca', ne xi'adu ca' xelexaca na tu li.

Neza xúca'du ca' xelexelí na.

Neza da quebe nalí xelexaca na tu li.

<sup>6</sup> Ca naca bénneache xeledé'ene' Benne' Weselá sel-la Dios.

<sup>7</sup> Gate benne' ca' belezrine' lau Juan chee xeledxúe' nisa, na' le' dxé'e benne' ca':

—Xrtia beła snia. ¿Be'e nu benne' le'e chee cuásale ca naca xel-la dxezrá'a chee Dios da ba za? <sup>8</sup> Le gun da gulé'e na ba bebí'i lázrele, ne quebe nnale lu lázrdaule: Nácantu' xrtia ljwezre Abraham. Neda' dxapa' le'e, Dios wazéqueñe' xexunge' xiaj caní xrtia Abraham. <sup>9</sup> Xa waga ba de cuásate na chee chugue' xaga ca', na' xúgute xaga da quebe dxelebía na da zixre chawe' welechugue na, na' xuluzré'e na lu xi'.

<sup>10</sup> Nadxa benne' ca' buluchebe' le':

—¿Bi dxal-la' guntu'?

<sup>11</sup> Juan bechebe':

—Benne' de chupa zre' dxal-la' gunézruje' tu na benne' quebe de chee', na' benne' de da dxawe' dxal-la' gunézruje' da gagu bénnea' quebe bi de chee'.

<sup>12</sup> Cá'anqueze belelá' benne' wechizruj ca' chee xeledxúe' nisa, na' buluchebe' Juan:

—Benne' wesede, ¿bi da dxal-la' guntu' netu'?

<sup>13</sup> Juan guzre' le':

—Quebe guchízruje da zrendxa ca da nadxixruj bea na.

<sup>14</sup> Cá'anqueze bal-la benne' dxjaque' wedil-la buluchebe' le':

—¿Gazra netu'? ¿Bi da dxal-la' guntu'?

Juan bechebe':

—Quebe guchébele benne', ne quebe gágule le' zria lu da wen lazre' chee cuale dumí chee', na' le be nen cadite názruje.

<sup>15</sup> Benne' zaj zre'e na' zaj zue' stebe, na' dxuluchebe' lu lázrdawe' che Juan na' naque' Cristo, benne' nase-la Dios. <sup>16</sup> Juan na' gunné':

—Neda', da li dxuchúa' le'e nisa nen nisa. Wida tu benne' gune' da dxulé'e xel-la dxedxúa nisa nigá, guzúe' le'e Be' Lá'azxa, ne xi' chee'. Benne' nigá nápadxe' xel-la dxenná bea ca neda', na' quebe naca chia' cuéaja' xel-la chee' da xu'u ni'e. <sup>17</sup> Ba nuxre' da dxun be' chee', na' guchi'e

naga dxine' zrua' xtila. Na' xutupé' zrua' xtila, guzrá' chawé' na lizre'. Guzezxe' xizre cheé na lu xi' da cabata' xul-la na.

<sup>18</sup> Ca naca dizra' nigá, ne xezicadxa dizra' zan bchálajlene' benne' ca' ca naca dizra' chawe' cheé Dios. <sup>19</sup> Juan gudil-le' Herodes, benne' dxenná be'ê, lawe' da zúalene' Herodías, zru'ula Felipe, benne' biche Herodes na', ne lawe' da ba beñe' da zante' da calela. Nadxa Herodes <sup>20</sup> béndxaqueze' da calela, gulu'ê Juan lizre xia.

*Da guca gate gudxúa Jesús nisa*  
(Mt. 3.13-17; Mr. 1.9-11)

<sup>21</sup> Gate ne dxuchúa Juan na' bénneache nisa, cá'anqueze Jesús gudxúe' nisa, na' gate dxuchálajlene' Dios, na' b'xalaj xabáa, <sup>22</sup> na' betaj Be' Lá'azxa lawe' Jesús. Ble'e lawé' ca tu bgugu chiche, na' ben tu chí'ê xabáa, dxenné':

—Lue' nacu' zri'ina' nazrí'ite' lazra'. Dxezaca ba lázrelena' Lue'.

*Ca naca xra xrtau Jesucristo*  
(Mt. 1.1-17)

<sup>23</sup> Jesús nape' ca chi dxua iza gate guzú lawé' dxune' zrin cheé'. Dxeleque benne' naque' zri'ine José. Naca Jesús zre sua Eli, xra María.

<sup>24</sup> Eli na' guque' zri'ine Matat,  
Matat na' guque' zri'ine Leví,  
Leví na' guque' zri'ine Melqui,  
Melqui na' guque' zri'ine Jana,  
Jana na' guque' zri'ine xetú José.

<sup>25</sup> José nigá guque' zri'ine Matatías,  
Matatías na' guque' zri'ine Amós,  
Amós na' guque' zri'ine Nahum,  
Nahum na' guque' zri'ine Esli,  
Esli na' guque' zri'ine Nagai.

<sup>26</sup> Nagai na' guque' zri'ine Maat,  
Maat na' guque' zri'ine xetú Matatías,  
Matatías nigá guque' zri'ine Semei,  
Semei na' guque' zri'ine xetú José,  
José nigá guque' zri'ine Judá.

<sup>27</sup> Judá na' guque' zri'ine Joana,  
Joana na' guque' zri'ine Resa,  
Resa na' guque' zri'ine Zorobabel,  
Zorobabel na' guque' zri'ine Salatiel,  
Salatiel na' guque' zri'ine Neri.

<sup>28</sup> Neri na' guque' zri'ine xetú Melqui,  
Melqui nigá guque' zri'ine Adi,  
Adi na' guque' zri'ine Cosam,  
Cosam na' guque' zri'ine Elmodam,  
Elmodam na' guque' zri'ine Er,

<sup>29</sup> Er na' guque' zri'ine Josué,  
Josué na' guque' zri'ine Eliezer,  
Eliezer na' guque' zri'ine Jorim,  
Jorim na' guque' zri'ine xetú Matat,

<sup>30</sup> Matat nigá guque' zri'ine xetú Leví,  
Leví nigá guque' zri'ine Simeón,  
Simeón na' guque' zri'ine xetú Judá,

Judá nigá guquē' zri'ine xetú José,  
 José nigá guquē' zri'ine Jonán,  
 Jonán na' guquē' zri'ine Eliaquim,  
<sup>31</sup> Eliaquim na' guquē' zri'ine Melea,  
 Melea na' guquē' zri'ine Mainán,  
 Mainán na' guquē' zri'ine Matata,  
 Matata na' guquē' zri'ine Natán.  
<sup>32</sup> Natán na' guquē' zri'ine David,  
 David na' guquē' zri'ine Isaí,  
 Isaí na' guquē' zri'ine Obed,  
 Obed na' guquē' zri'ine Booz,  
 Booz na' guquē' zri'ine Salmón,  
 Salmón na' guquē' zri'ine Naasón.  
<sup>33</sup> Naasón na' guquē' zri'ine Aminadab,  
 Aminadab na' guquē' zri'ine Aram,  
 Aram na' guquē' zri'ine Esrom,  
 Esrom na' guquē' zri'ine Fares,  
 Fares na' guquē' zri'ine xetú Judá,  
<sup>34</sup> Judá nigá guquē' zri'ine Jacob,  
 Jacob na' guquē' zri'ine Isaac,  
 Isaac na' guquē' zri'ine Abraham,  
 Abraham na' guquē' zri'ine Taré,  
 Taré na' guquē' zri'ine Nacor.  
<sup>35</sup> Nacor na' guquē' zri'ine Serug,  
 Serug na' guquē' zri'ine Ragau,  
 Ragau na' guquē' zri'ine Peleg,  
 Peleg na' guquē' zri'ine Heber,  
 Heber na' guquē' zri'ine Sala,  
<sup>36</sup> Sala na' guquē' zri'ine Cainán,  
 Cainán na' guquē' zri'ine Arfaxad,  
 Arfaxad na' guquē' zri'ine Sem,  
 Sem na' guquē' zri'ine Noé,  
 Noé na' guquē' zri'ine Lamec,  
<sup>37</sup> Lamec na' guquē' zri'ine Matusalén,  
 Matusalén na' guquē' zri'ine Enoc,  
 Enoc na' guquē' zri'ine Jared,  
 Jared na' guquē' zri'ine Mahalaleel,  
 Mahalaleel na' guquē' zri'ine xetú Cainán.  
<sup>38</sup> Cainán na' guquē' zri'ine Enós,  
 Enós na' guquē' zri'ine Set,  
 Set na' guquē' zri'ine Adán,  
 Adán na' guquē' ca zri'inequeze Dios.

## 4

*Satanás da xriwe' dxilaj lazre' na ájala gusebaga na Jesús dul-la*  
 (Mt. 4.1-11; Mr. 1.12-13)

<sup>1</sup> Jesús, zúalē Be' Lá'azxa Le', bezé'e xegu Jordán, na' guché Be' Lá'azxa Le' le'e xixre' lawe' lataj. <sup>2</sup> Na' guzúe' chua zra, na' Satanás da xriwe' gudilaj lazre' na ájala si xe na Le'. Quebe bi gudagu Jesús da chua zra ca', na' ca gude' na' gudunē'. <sup>3</sup> Nadxa gunná da xriwe', guzre na Le':



—Che da li nacu' Lue' Zri'ine Dios, ben xelexaca xiaj caní xeta xtila.

<sup>4</sup> Na' bechebe Jesús:

—Naxúajqueze na lu xiche chee Dios, dxenné': Quegá nen xeta xtílaze gaca ban bènneache, san cá'anqueze nen xrtizra' Dios gaca ban bènneache.

<sup>5</sup> Nadxa da xriwe' guché na Jesús tu xi'a sibe, na' chadite ble'e na Le' xúgute cue' xezr la xu da zaj nnita lu xezr la xu nigá, <sup>6</sup> na' guzre na Le':

—Neda' gunna' Lue' ca naca xel-la dxenná bea nigá, ne xel-la szren chee xúgute xezr la xu caní, lawe' da zaj xu'u da caní lu na'a neda', na' gunézruja' na nu dxaca lazra' gunézruja' na. <sup>7</sup> Gunna' na chiu' che lue' guzú zribu' lawa', ne gucá'ana szrenu' neda'.

<sup>8</sup> Jesús bechebe':

—Gucuasa lue', Satanás, lawe' da dxenná xiche chee Dios, dxé'e bènneache: “Bca'ana szren Xranu' Dios, ne ben zrin chee tuze Le'.”

<sup>9</sup> Nadxa da xriwe' na' guché na Jesús lu xezre Jerusalén, na' bcuén na Le' xichaj ze'e xudau', na' guzre na Le':

—Che da li na' nacu' Zri'ine Dios, guxrite' nigá cheajxezu' lu xu, <sup>10</sup> lawe' da lu xiche chee Dios dxenné':

Dios gusebague' gubáz chee xabáa chee' ca' xuluxue' Lue'.

<sup>11</sup> Xelechísaqueze' Lue' nen ne'e,

chee quebe gaca we' ni'u lawe' xiaj ca'.

<sup>12</sup> Jesús bechebe':

—Cá'anqueze naxúaj na lu xiche chee Dios, dxé'e bènneache: “Quebe guchínenu' ca dxaca lazru' Xranu' Dios.”

<sup>13</sup> Gate da xriwe' québedxa bezrela lazre' na ájala gun zrėjae na Jesús, na' becuasa na tu chí'i.

*Jesús dxunge' zrin chee' naga nababa Galilea*

(Mt. 4.12-17; Mr. 1.14-15)

<sup>14</sup> Na' Jesús bezrine' Galilea, ba nápale'e xel-la waca chee Be' Lá'azxa, na' ca naca xézredu ca' zaj nababa na' buluchálaj bènneache ca naca xel-la waca chee'. <sup>15</sup> Jesús bsédené' benne' ca' tu tu lu xudau' ca', na' xúgute' belúe lá'ané' Le'.

*Jesús dxexezrine' Nazaret*

(Mt. 13.53-58; Mr. 6.1-6)

<sup>16</sup> Nadxa Jesús bezrine' Nazaret, xezre naga bgule'. Lu zra dxulupá'ana benne' judío ca' guxú'e lu xu'u ga na' dxelezraga benne' judío ca', ca xu'u lawe' dxunge', chee gulabe' da naxúaj na lu xiche chee Dios. <sup>17</sup> Buludé' Lu ne'e xiche naga naxúaj dizra' bzuaj Isaías, benne' bchálajé' waláz chee Dios, na' gate gusalajé' na, na' blabe' naga naxúaj da dxenná:

<sup>18</sup> Be' Lá'azxa chee Xránadxu zúaləne' neda',

lawe' da guqu'é' neda' chee guchálajləna' benne' baxache' ca' dizra' chawe' chee'.

Gusel-lə' neda' chee xexuna' benne' ca' quebe chawe' zaj zue',

ne chee guzenda' benne' ba zaj nadxéaje' lu da zrinnaaj, waca xeelé',

ne chee xexuna' lau benne' la chul-la ca',

ne chee guselá' benne' dxelezaca zi'e,

<sup>19</sup> ne chee guzenda' bènneache ba bzrin zra Xránadxu Dios gucá'ané' le' chawe'.

<sup>20</sup> Nadxa Jesús butube' xiche na', na' bde'e na lu na' benne' dxuxúe' xu'u na', na' bebé'e. Xúgute' benne' zaj zré'e lu xu'u na' dxelenné'e Le', <sup>21</sup> na' Jesús guzú lawe' dxé'e benne' ca':

—Na'a zra guca ca da naxúaj na laule le'e.

<sup>22</sup> Xúgute' gulenné' chawe' chee Jesús, ne belexebánene' ca naca dizra' chawe' da dxuchalaje'. Na' buluchebe ljwezre':

—¿Quegá benne' nigá zri'ine José?

<sup>23</sup> Jesús guzre' le':

—Da líqueze le'e wele neda' dizra' nigá: Lue', benne' dxexúnu' benne' we' ca', bexún cuinu', ne xele neda': Ca da bémentu' benu' lu xezre Capernaum, cá'anqueze ben na lázriu' nigá na'a.

<sup>24</sup> Nadxa gunná Jesús:

—Da li dxapa' le'e, tu benne' dxuchálaje' waláz chee Dios, quebe nu dxue le' ba lá'ana lazrie'. <sup>25</sup> Dxapa' le'e, gulezrá' nu'ula zan ba gulate benne' chee' lu xezr la xu Israel ca lu zra guzúa Elías, benne' bchálaje' waláz chee Dios, gate na' quebe guca xiuj chun iza xugachaj, ne gúcale'e gubina' ca naca xezr la xu na'. <sup>26</sup> Dios quebe gusel-le' Elías lau netú nu'ula, nate benne' chee', zué' xezr la xu Israel. Gusel-le' le' lau tu nu'ula, nate benne' chee', zué' lu xezre Sarepta, da zua na gagu naga dx'e xezre Sidón. <sup>27</sup> Cá'anqueze gulezrá' benne' zan benne' dxeledxé'ene' we' guzru' lu xezr la xu Israel ca lu zra guzúa Eliseo, benne' bchálaje' waláz chee Dios, na' netúe' quebe bexaque'. Tuze Naamán, benne' xezr la xu Siria bexaque'.

<sup>28</sup> Gate belén benne' ca' zaj zre'e xu'u na' da nigá, na' belezrá'ale'e. <sup>29</sup> Na' gulase', ne belexebéaje' Jesús xezre na', na' beleché'e Le' dxu'a chjéaj naga zria xezre na', chee xuludxixre' Le' na'. <sup>30</sup> Na' Jesús bedé'e ládujla benne' ca', na' bezé'e zexíaje'.

*Jesús dxexune' tu benne' xu'e be' xriwe'*

*(Mr. 1.21-28)*

<sup>31</sup> Nadxa Jesús bexíaje' Capernaum, tu xezre nababa Galilea, na' guzú lawe' dxusédene' benne' ca' lu zra lá'azxa chee judío ca'. <sup>32</sup> Belexebánene' ca naca da dxusédene', lawe' da dxuchálaje' ca tu benne' nape' xel-la dxenná bea.

<sup>33</sup> Lu xu'u na' zua tu benne' xu'e be' xriwe', na' dxebezre xe'e, <sup>34</sup> dxenné':

—Bsan netu'. ¿Bizr chee na' dxunu' netu' zede, Jesús, benne' Nazaret? ¿Za'u guzría xi'u netu'? Neda' núnbe'a Lue', ne nezda' nacu' benne' lá'azxa chee Dios.

<sup>35</sup> Jesús gudil-le' be' xriwe' na', dxenné':

—Zrize guzúa. Bsan benne' biu nigá.

Nadxa be' xriwe' na' gudín na bénnea' xu lau xúgute' benne' ca', na' bedxúaj na lu xichaj lázrdau bénnea', ne quebe bi ben na chee'. <sup>36</sup> Xúgute' belexebánene', na' gulé' ljwezre':

—¿Bizra dizra' da caní? Benne' nigá dxenná bé'ene' be' xriwe' ca' nen dute xel-la dxenná bea chee', ne nen xel-la waca, na' be' xriwe' ca' dxeledxúaj na.

<sup>37</sup> Na' buluchálaje' ca naca chee Jesús xúgute' lu xezre ca' zaj nababa na'.

*Jesús dxexune' xrna zru'ula Pedro*

*(Mt. 8.14-15; Mr. 1.29-31)*

<sup>38</sup> Nadxa bedxúaj Jesús lu xu'u na', na' guxú'e lizre Simón. Xrna zru'ula Simón na' quebe chawe' zué', xú'ule'e da la, na' gulata' xuene' Jesús xexune' le'. <sup>39</sup> Jesús gubigue'e cuite', na' gudil-le' da la na', na' bedxúaj na. Ca ná'queze bexásate', na' guzú lawe' dxuseni'e da xelawe'.

*Jesús dxexunę' benne' zan quebe chawe' zaj zue'*

*(Mt. 8.16-17; Mr. 1.32-34)*

<sup>40</sup> Ca dxebíá gubizra, benne' ca' zaj nnita' benne' quebe chawe' zaj zue' lizre' belú'ę le' lau Jesús, na' Le' bze ne'ę tu tu benne' ca', ne bexunę le'.

<sup>41</sup> Cá'anqueze zánete be' xriwe' belexedxúaj na lu xichaj lázrdau benne' ca'. Dxelenná na:

—Lue' nacu' Zri'ine Dios.

Jesús gudil-le' be' xriwe' ca'. Quebe be'ę na lataj xelennę na, lawe' da zaj neze na naca Le' Cristo.

*Jesús dxuchálaje' naga nababa Galilea*

*(Mr. 1.35-39)*

<sup>42</sup> Ca dxaní'sise', bdxuaj Jesús xezre na', guxiáje' naga xeajsúe' tuze'. Na' benne' ca' belexexílaje' Le', na' belezrine' xuluzague' Le' cheę quebe xeze'ę. <sup>43</sup> Jesús gunné':

—Dxun na ba xen guzenda' bėnneache xezícadxa xezrdu ca' ca dxenná bea Dios, lawe' da cheę guna' caní gusel-le' neda'.

<sup>44</sup> Ca'an guca gudá Jesús ca naca xezre ca' zaj nababa Galilea, na' bchálaje' lu xu'u naga dxelezraga judío ca' lu xezre ca'.

## 5

*Dxelezene' bela zan*

*(Mt. 4.18-22; Mr. 1.16-20)*

<sup>1</sup> Gate zua Jesús dxu'a nísadau' cheę Genesaret, na' belezrín benne' zan, ne buluchídete' Le', lawe' da dxelaca lazre' xelennę' xrtizra' Dios. <sup>2</sup> Jesús blé'eng' chupa da dxedá lawe' nísadau' lu nísadau' na', zaj zra' gáguze lu xu bizre, lawe' da ba belexedxúaj benne' wezén bela ca' lu'ule da dxedá lawe' nísadau', na' zaj zre'ę dxelexibe' xixruj cheę' ca'. <sup>3</sup> Nadxa guxú'u Jesús tu lu da dxedá lawe' nísadau', da naca na cheę Simón, na' guzre' Simón guzrigue' na xelate' lu nísadau' na'. Jesús gudxé' lu da dxedá lawe' nísadau' na', na' guzú lawe' dxusédenę' benne' ca'. <sup>4</sup> Ca bexuzre bchálaje', na' guzre' Simón:

—Bsa da dxedá lawe' nísadau' chiu' naga nácadxa situj nísadau', na' le guzal-la xixruj cheę na' cheę senle bela.

<sup>5</sup> Simón bechebe':

—Benne' Weséde, bedú xela bęntu' zrin, ne quebe bi bela ne sentu'. Lu dizra' chiu', na'a guzal-la' xixruj nigá.

<sup>6</sup> Ca belunę' ca gunná Jesús, na' bela zante gulezene', na' gúcate wadx-eza xixruj na'. <sup>7</sup> Nadxa bulutá ne'ę gulennę' benne' ljwezre' zaj zre'ę xetú lu da dxedá lawe' nísadau' cheę xelácalęne' le'. Benne' ca' belezrine', na' bulusezrate' dxúpatę da dxedá lawe' nísadau' ca', na' gulácatę na z'i, ne dxácatę welaze na lu nísadau'. <sup>8</sup> Gate ble'e Simón Pedro da nigá, na' bzu zribe' lau Jesús, gunné':

—Gucuasa cuíta' neda', Xran, lawe' da naca' neda' benne' dul-la.

<sup>9</sup> Caní gunná Simón lawe' da dxezrébele'ę ne cheę da guca na, ne cá'anqueze dxelezrebe benne' ljwezre' ca', gate belelé'eng' bela zan ca'. <sup>10</sup> Cá'anqueze belezrebe Jacobo ne Juan, zri'ine Zebedeo, benne' zaj naque' ljwezre Simón na'. Jesús guzre' Simón:

—Quebe zrebu'. Ná'atęla su lau' senu' bėnneache lu da naca cheę Dios.

<sup>11</sup> Nadxa, ca belexebéaje' da dxedá lawe' nísadau' na' dxú'ela nísadau', na' bulucá'ane' ca naca da ca', na' zjácálene' Jesús.

*Jesús dxexunę' tu benne' dxé'ene' wę' guzru'*

*(Mt. 8.1-4; Mr. 1.40-45)*

<sup>12</sup> Gate Jesús zuę' tu xęzre, na' bzrin tu benne' dxé'ene' wę' guzru', na' ca blé'ene' Jesús, bzu zribę', ne gudíxrujtę lawę' lu xu, na' bca'ana szrene' Lę', gunné':

—Xran, che dxaca lazru', waca xexunu' neda'.

<sup>13</sup> Nadxa Jesús bte'-be' nen ne'e, gunné':

—Dxaca lazra'. Bache bexacu'.

Ca gunné' ca', wę' guzru' na' bedxúajtę na. <sup>14</sup> Jesús bsebage' bénnea' quebe nu xe'e da nigá. Nadxa gunné':

—Guxíaj na'a, xeajlé'e cuinu' lau bxruze, ne gulú'u dumí cheę xexádxeu' lau Dios ca da gunná be'e Moisés cheę xeleneze benne' ba bexacu' ca naca xízrawę' chiu'.

<sup>15</sup> Ca naca xel-la waca cheę Jesús bzríludxa na, na' benne' zante belezrague' lau Jesús cheę xelenne' da dxuchálaje', ne cheę xexunę' le' ca naca xízrawę' cheę'. <sup>16</sup> Nadxa Jesús bezé'e na', na' bzrine' naga quebe nu chilá' benne', na' bchálajlene' Dios.

*Jesús dxexunę' tu benne' naxrú'une ni'a ne'e*

*(Mt. 9.1-8; Mr. 2.1-12)*

<sup>17</sup> Tu zra zua Jesús dxusédene', na' bal-la benne' xudau' fariseo ca', ne benne' dxuluxuzájle'e da nadxixruj be'e Moisés, zaj dxę'e na', benne' zá'aque' ca naca xézredu ca' zaj nababa Galilea, ne xęzre ca' zaj nababa Judea, ne cheę xęzre Jerusalén, na' zúale xel-la waca cheę Xránadxu Dios Jesús, na' bexunę' benne' ca' quebe chawe' zaj zuę'. <sup>18</sup> Nadxa belezrin tapa benne' zaj nu'e tu benne' zua zri ni'a ne'e, deę' tu lu blaga', na' gulaca lazre' xelegú'e le' lu xu'u cheę xelíxrue' le' lau Jesús. <sup>19</sup> Quebe guca xelezrine' lau Jesús lawe' da zrále'e benne' zan ga na'. Nadxa gulegúene' chju'ula, ne gulesaluje' chju'u, na' bululétaje' benne' na' de' lu blaga' ládujla benne' zan ca' lau Jesús. <sup>20</sup> Gate ble'e Jesús ca dxelėjle benne' ca' cheę', na' guzre' benne' quebe chawe' zuę':

—Bénne'dau', ba bnite lawa' dul-la chiu'.

<sup>21</sup> Nadxa benne' ca' dxuluxuzájle'e da nadxixruj bea na, ne benne' xudau' fariseo ca' gulezú lawę' dxelenné' lu xichaj lázrdawę': ¿Nuzra benne' nigá, dxenné' schanni' cheę Dios? Quebe nu benne' séquene' gunite lawę' dul-la cheę bénneache. Tuze Dios gaque'.

<sup>22</sup> Jesús dxéquebe'ene' da dxelenné' lu xichaj lázrdawę', na' guzre' benne' ca':

—¿Bizr cheę na' dxéquele le'e caní? <sup>23</sup> ¿Bízrala na quebe naca na stębe guna', che xapa' benne' nigá: Ba bnite lawa' dul-la chiu', u che xapa' le': Guxasa bexíaj? <sup>24</sup> Gulé'eda' le'e neda', Benne' Gulje' Bénneache, napa' xel-la dxenná bea lu xęzr la xu nigá cheę gunite lawa' dul-la cheę bénneache.

Nadxa guzre' benne' na' naxrú'une ni'a ne'e:

—Lue' dxapa', bexasa, bexúa blaga' chiu', ne bexíaj.

<sup>25</sup> Ca gunné' ca', bexásate benne' na' lau xúgute benne' ca', na' bequę'e blaga' cheę', ne bezé'e zexíaje' lizre' zeajxé lá'ane' Dios. <sup>26</sup> Xúgute benne' ca' belexebánene', na' belúe lá'ane' Dios, ne nen xel-la dxelezrebe gulenné':

—Na'a ble'edxu da dxebánequezdxu.

*Jesús dxenné' Levi*

*(Mt. 9.9-13; Mr. 2.13-17)*

27 Ca gude na' bezá'a Jesús, na' blé'ene' tu benne' dxuchizruje' waláz chee xezre Roma, le' Leví. Dxe'e naga dxuchízruje', na' guzre' le':

—Ben neda' tuze.

28 Na' guxasa Leví, bca'ane' ca naca chee' ca', na' guxíajlene' Jesús.

29 Ca gude na', Leví gulu'e tu xrche' zrente lizre' chee bca'ana szrene' Jesús, na' zrále'equeze na' xezícadxa wechizruj ca', ne xezícadxa benne' zaj dxe'e dxágulene' benne' ca'. 30 Na' benne' xudau' fariseo ca', ne benne' ca' dxuluxazájle'e da nadxixruj bea na gulezú lawe' dxelezí tizre' benne' ca' dxusede Jesús, dxelé'e le':

—¿Bizr chee na' dxe'aj dxágulele benne' wechizruj caní, ne benne' dul-la ca'?

31 Jesús bechebe':

—Quebe zaj nachine benne' zaj zua chawe' nu benne' dxexúne' le'. Benne' quebe chawe' zaj zue' dxelechínene' le'. 32 Neda' quegá za'a dxennéa' benne' xrlátaje. Za'a dxennéa' benne' dul-la, chee xelexebí'i lazre'.

*Dxuluchebe' Jesús ca naca chee gubasa*

(Mt. 9.14-17; Mr. 2.18-22)

33 Nadxa buluchebe' Jesús:

—¿Bizr chee na' dxelúnle'e gubasa, ne dxuluchálajle Dios benne' ca' zjácálene' Juan, ne benne' ca' zjácálene' benne' xudau' fariseo ca', san benne' ca' dxusedenu' tu dxelé'aj dxeláguzqueze'?

34 Jesús bechebe':

—¿Wazéquele xe'e benne' zaj zra' laní chee wechaga na' xelune' gubasa dxácaté na' zua benne' wechaga na' nen benne' ca'? 35 Wazrín zra gate wechaga na' na' xecuase' nen benne' ca'. Ca lu zra na' xelune' gubasa.

36 Nadxa bchálajlene' le' ca naca da dxulé'e nigá:

—Quegá nu benne' cheze' tu zre' cube chee xudé'e na tu zre' gula. Che ca' gune', na' guzrí'a xi'e ca naca zre' cube na', na' ládxe'du cube na' quebe gulé'e na cháwedau' nen ladxe' gula na'. 37 Cá'anqueze quebe gaca cá'adxu xrise uva cube lu bzude xide gula, lawe' da che ca' gundxu, xrise uva cube na' gutín na bzude xide gula, na' gaca ditje xrise uva na', ne bzude xide na'. 38 Chee le' na' dxal-la' cá'adxu xrise uva cube lu bzude xide cube, na' dxúpaté na' xegá'ana chawe' na. 39 Che tu benne' xí'aje' xrise uva wal-la gula, québedxa nna na chee' xí'aje' xrise uva cube, lawe' da dxenné': "Nétajdxa da gula na'."

## 6

*Benne' ca' dxusede Jesús dxelálaje' dau zrua' xtila lu zra lá'azxa chee judío ca'*

(Mt. 12.1-8; Mr. 2.23-28)

1 Tu lu zra lá'azxa chee judío ca', gude Jesús naga naxaza zrua' xtila, na' benne' ca' dxusedene' zjaque' dxelálaje' dau zrua' xtila, na' dxelezrube na nen ne'e, ne dxelawe' zrua' xtila na'. 2 Nadxa benne' xudau' fariseo ca' buluchebe' le':

—¿Bizr chee na' dxunle le'e tu zrin da quebe naca na gunle zra lá'azxa cheedxu?

3 Jesús bechebe':

—¿Quebe ne gulábale le'e ca ben David ne benne' ljwezre' ca' gate guledune'? 4 Guxú'u David na' tu lu xudau' chee Dios, ne guqué'e xeta

xtila da gulú'u bxruze lau Dios, na' gudawę' na, ne bnézrujtę' cheę benne' ca' zjácáleń' le', ne quebe naca cheę' xelawe' xeta xtila na'. Tuze bxruze ca' naca cheę' xelawe' na.

<sup>5</sup> Cá'anqueze guzre Jesús benne' ca':

—Neda', Benne' Gulje' Bénneache, nápaqueza' xel-la dxenná bea ca naca cheę zra lá'azxa.

*Jesús dxexunę' benne' nazrinnaj ne'ę*

(Mt. 12.9-14; Mr. 3.1-6)

<sup>6</sup> Xetú lu zra lá'azxa cheę judío ca', guxú'u Jesús tu lu xu'u, na' guzú lawę' dxusédene' benne' zaj nazraguę' ná'. Zua na' tu benne' nazrinnaj ne'ę xabeła. <sup>7</sup> Benne' ca' dxuluxuzájle'ę da nadxixruj bea na, ne benne' xudau' fariseo ca' dxuluzuzre' Jesús cheę xelelé'eng' che xexún Jesús bénnea' lu zra lá'azxa cheę', cheę xelezéquene' xelawe' zria Jesús. <sup>8</sup> Jesús ba nézene' ca da dxelegú'u lazre', na' guzre' bénnea' nazrinnaj ne'ę:

—Guxasa, ne guzé laduj nigá.

Benne' na' guxasę', na' guzé' na'. <sup>9</sup> Nadxa gunná Jesús, guzre' benne' ca':

—Na'a gucheba' le'e tu: ¿Bízrala na' waca gundxu zra lá'azxa cheęle, da xrlátaje che da caleła? ¿Gucache cháwedxu xel-la nabán cheę tu benne', che guzría xidxu na?

<sup>10</sup> Nadxa Jesús gunę'ę benne' ca' zaj naxechaj Le', na' guzre' benne' we' na':

—Bli na'u nigá.

Benne' na' benę' ca', na' bexácate ne'ę na'. <sup>11</sup> Na' benne' ca' zaj zre'ę na' belezrá'alę'ę, na' gulezú lawę' dxuluchebe ljwezre' bi xelezéquene' xelunę' cheę Jesús cheę xuluzría xi'ę Le'.

*Jesús dxequę'ę benne' chazrinnu ca' xelaquę' gubáz cheę'*

(Mt. 10.1-4; Mr. 3.13-19)

<sup>12</sup> Ca lu zra na' Jesús guxíaje' tu lu xi'a xeajchálajlene' Dios, na' guzúę' bedú xęla dxuchálajlene' Dios. <sup>13</sup> Ca guxaní' gunné' benne' ca' dxusédene', ne guquę'ę chazrinnu benne' ca', na' bzre'ę benne' ca' xelaquę' gubáz cheę'. <sup>14</sup> Benne' caní zaj naquę':

Simón, (bénnea' bzue' le' Pedro),

Andrés, (benne' biche Simón na'),

Jacobo, Juan, Felipe, Bartolomé,

<sup>15</sup> Mateo, Tomás,

Jacobo, (zri'ine Alfeo),

Simón, (bénnea' dxedábague' benne' Roma ca')

<sup>16</sup> Judas, (benne' biche Jacobo), ne

Judas Iscariote, (bénnea' gudę'ę Jesús lu na' benne' ca' dxeledábague' Le'.)

*Jesús dxusédene' benne' zante*

(Mt. 4.23-25)

<sup>17</sup> Jesús bdinne' lu xi'a na' nen benne' ca' dxusédene', na' bzrine' tu lache' nen benne' ca'. Benne' zan zaj zre'ę na' zaj nababe' xezre ca' zaj nababa Judea, ne Jerusalén, nen benne' zaj nababe' Tiro, ne Sidón. Benne' caní belelé'ę cheę xelenne' da dxuchalaj Jesús, ne cheę xexún Jesús le' ca naca xízrawę' dxeledxé'eng'. <sup>18</sup> Cá'anqueze benne' ca' zaj xu'ę be' xriwe' belexaquę'. <sup>19</sup> Xúgute' benne' ca' gulaca lazre' xulutę' Jesús lawę' da dxexún Le' xúgute' nen xel-la waca cheę'.

*Benne' ca' naca da ba neza zren cheę', ne benne' ca' zaj naqueę' baxache' (Mt. 5.1-12)*

<sup>20</sup> Nadxa Jesús gunné'e benne' ca' dxusédene', na' guzre' le':

— Ba neza zrente naca na cheęle le'e, dxéquebe'ele nácale benne' xache', lawe' da waxú'ule le'e naga dxenná bea Dios.

<sup>21</sup> 'Ba neza zrente naca na cheęle le'e, dxedunle da dxunna Dios, lawe' da wélajquezle.

'Ba neza zrente naca na cheęle le'e, dxebézrele ne cheę dula, lawe' da guzrízrequezle.

<sup>22</sup> 'Ba neza zrente naca na cheęle le'e, gate xelecuide bénneache le'e, ne gate xelexebéaję' le'e chalé'ajla, ne gate xelenné' schanni' cheęle, ne gate xulucá'ana ditję' lale ca tu da sban lawe' da nácale bi chia' neda', Benne' Gulję' Bénneache. <sup>23</sup> Le béle'e, ne le sua lu da ba neza lu zra na' lawe' da zrué'ele tu da zren lu xabáa cheę Dios. Cá'anqueze benne' xra xrtau benne' caní bulusaca zi'e benne' ca' buluchálaję' waláz cheę Dios.

<sup>24</sup> 'Baxache' nácale le'e, benne' gunní'a, lawe' da ba nápaie xel-la dxebé da naca cheę xęzr la xu nigá.

<sup>25</sup> 'Baxache' nácale le'e, nélajle na'a, lawe' da wadunle le'e.

'Baxache' nácale le'e dxuzrízrele na'a, lawe' da cuezre xáchele.

<sup>26</sup> 'Baxache' nácale le'e gate xúgute bénneache dxelenné' da chawe' cheęle, lawe' da ca' belún xra xrtáule, gulenné' da chawe' cheę benne' węn lazre' ca', benne' gulenné': "Netu' dxuchálajntu' waláz cheę Dios."

*Dxal-la' zrí'idxu benne' ca' dxelecuídene' dxi'u (Mt. 5.38-48; 7.12)*

<sup>27</sup> Na' gunná Jesús:

— Dxapa' le'e dxénele chia', le zri'i benne' ca' dxelecuídene' le'e, ne le gun chawe' cheę benne' ca' dxelezzré'e le'e. <sup>28</sup> Le nne chawe' cheę benne' ca' dxelenné' calela cheęle, ne le naba lau Dios gaca chawe' cheę benne' ca' dxelenné' schanni' cheęle. <sup>29</sup> Che nu benne' cape' xrágale, le guzete xecha la'a, ne che nu benne' que'e xicha cheęle, le güe lataj ca'ate' zrale. <sup>30</sup> Le gunezruj núteteze benne' bi nabe' le'e, ne che nu benne' que'e da naca cheęle, quebe xenábale na. <sup>31</sup> Le gun cheę bénneache cáteze na' dxaca lázrele xelunę' cheęle.

<sup>32</sup> 'Che le'e nazrí'ile tuze benne' ca' zaj nazrí'ine' le'e, ¿bízraqueze da chawe' dxunle? Cá'anqueze dxelún benne' ca' dxelunę' da calęla. <sup>33</sup> Che dxunle chawe' cheę tuze benne' ca' dxelunę' le'e chawe', ¿bízraqueze da chawe' dxunle? Cá'anqueze dxelún benne' węn da zrinnaj ca'. <sup>34</sup> Che bi dxusanle cheę tuze benne' ba nézele wexunne' na, ¿bízraqueze da chawe' dxunle? Cá'anqueze benne' węn da calęla ca' dxulusane' da naca cheę cheę benne' ca' dxelunę' da calęla, lawe' da zaj nézene' wulunęzrujte benne' ca' le na. <sup>35</sup> Dxal-la' zrí'ile le'e benne' ca' dxelezzré'e le'e, ne gunle da chawe' cheę', ne gusanle cheę benne' ca' da xelenabe' le'e, lácala quebe xelexexunne' na. Che gunle ca', da zrendxa da si' lu na'le, ne gácale bi ca' cheę Dios szrente, lawe' da naca Le' zrí'ile lazre' nen benne' ca' quebe dxelexezaca ba lazre', ne benne' węn da calela ca'. <sup>36</sup> Le xezrí lazre' bénneache ca dxun Dios, dxezrí lazre' le'e.

*Quebe guzúale chalá'ala le sa' ljwézrele (Mt. 7.1-5)*

<sup>37</sup> Na' gunná Jesús:

—Quebe guzúale chalá'ala le sa' ljwézrele, na' Dios quebe guzúe' le'e chalá'ala. Quebe bi nnele chee le sa' ljwézrele, na' Dios quebe guchi'e chee le'e. Le gunite lau chee le sa' ljwézrele, na' Dios gunite lawe' chee le'e. <sup>38</sup> Le gunezruj chee bènneache, na' Dios gunne' chee le'e. Dios cu'e lu xcuite chee le xi'ina da nálate, ne da naxí'tequeze, ne guníbeta' na, ne sua dí'atequeze na. Dios gudxírequeze' chee ca da dxudxírele chee bènneache.

<sup>39</sup> Nadxa Jesús bchálajē' da dxul'e nigá, gunné':

—¿Waca tu benne' la chul-la cu'e neza xetú la chul-la? Che ca' gunē', dxúpatē' xelebixre' tu lu xedxu. <sup>40</sup> Netú benne' dxusede gácadxe' szren ca naca bènnea' dxusedene' le', na' gate xuzre gusédie', gaque' ca naca bènnea' bsédene' le'.

<sup>41</sup> ¿Bizr chee na' dxenná'u bébedu na' xu'u na xiaj lau le sa' ljwezru', ne quebe dxéquebe'enu' ca naca da zren da xu'u na xiaj lau' lue'? <sup>42</sup> Che quebe dxéquebe'enu' ca naca da zren na' da xu'u na xiaj lau' lue', ¿ájazra dxunu' dxexázrenu' dxu'u le sa' ljwezru': “Benna lataj xebéaja' bébedu na' xu'u na xiaj lau'?” Lue', benne' dxun láweze xrlátaje, bebéaj zá'teca lue' ca naca da zren da xu'u na xiaj lau', na' nadxa le'enu' cháwedau' xebéaju' bébedu na' xu'u na xiaj lau le sa' ljwezru'.

*Naca bea tu benne' ne chee da dxunē'*

*(Mt. 7.17-20; 12.34-35)*

Nadxa gunná Jesús: <sup>43</sup>—Tu xaga xrlátaje quebe cuía na da zixre calēla, na' xaga da quebe naca chawe' quebe gaca cuía na da zixre chawe'. <sup>44</sup> Tu tu xaga naca bea na ne chee da zixre da dxebía na. Quebe gaca guchíbedxu da zixre chee xaga higo tu lu xaga xeche', ne quebe guchíbedxu da zixre chee lba uva lu xeche' bisigá. <sup>45</sup> Benne' xrlátaje, da xrlátaje dxenné bènnea' lawe' da naxaza da xrlátaje lu xichaj lázrdawe', na' benne' wen da calēla, da calēla dxenné bènnea' lawe' da xu'u da calēla lu xichaj lázrdawe'. Dxu'e na' dxenné na ca naca da xu'u lu xichaj lázrdawe'.

*Dxuchalaj Jesús chee chupa lane xu'u*

*(Mt. 7.24-27)*

Gunná Jesús: <sup>46</sup>—¿Bizr chee na' dxēle neda': “Xran, Xran”, ne quebe dxunle ca da dxapa' le'e? <sup>47</sup> Xapa' le'e aja naca bènnea' zē'e nen neda', ne dxenne' xrtizra'a, ne dxunē' ca da dxapa' le'. <sup>48</sup> Naque' ca tu benne' bene' tu xu'u. Da zren gudēne', na' bzrie' lane na lawe' xiaj xre. Gate bdxuaj xegu, na' xeajchú'ule'e na le'e xu'u na', quebe bi guzeque' gunē na xu'u na' lawe' da zria lane na lawe' xiaj xre. <sup>49</sup> Na' bènnea' dxenne' xrtizra'a, ne quebe dxunē' ca da dxapa' le', naque' ca tu benne' bene' xu'u chee' lawe' xu dxeze, ne quebe guzale' lane na, na' gate bdxuaj xegu na', ne xeajchú'ule'e na le'e xu'u na', na' guché na le na, na' tu chí'izqueze bzria xi na le na.

## 7

*Jesús dxexunē' bi wen zrin chee tu benne' Roma*

*(Mt. 8.5-13)*

<sup>1</sup> Gate bexuzre bchálajle Jesús benne' ca', na' bezē'e zexíajē' Capernaum. <sup>2</sup> Zua tu benne' Roma na', benne' dxenná be'e lu wedil-la, na' zua tu bi wen zrin chee nazrí'ile'ene'-be', na' bi na' quebe chawe' zúabe', ne dxaca wátebe'. <sup>3</sup> Gate ben benne' Roma na' ca da dxun Jesús, na' gusél-le' bal-la benne' gula sina chee judío ca', chee xeajleguezre' Jesús xidē' xexunē'



bi wɛn zrin cheɛ'. <sup>4</sup> Benne' gula ca' belezrine' lau Jesús, na' gulezú lawe' dxelata' xuene' Le', dxelenné':

—Benne' Roma nigá naca cheɛ' gácalenu' le', <sup>5</sup> lawe' da dxape' ba lá'ana xezre cheɛdxu, na' léqueze' beɛɛ' tu xu'u cheɛdxu ga dxezrágadxu.

<sup>6</sup> Nadxa Jesús guxiájleɛ' benne' gula ca'. Gate belezrine' gagu naga zua lizre benne' Roma na', le' gusel-le' bal-la benne' ljwezre' xeaɛlgeuzre' Jesús:

—Xran, quebe senu' gunne xue, lawe' da quebe naca chia' chu'u lizra'. <sup>7</sup> Cheɛ le' na' ne quebe bexazrda' néda'queza' xedajdilja' Lue'. Cun gunnaze, na' xexaca bi wɛn zrin chia'. <sup>8</sup> Néda'queza' zua benne' dxenná bé'ene' neda', na' neda' dxenná be'eda' benne' dxjaca wedil-la. Che xapa' tu bɛnnea': Guxíaj, na' waxíajbe', ne che xapa' xetube': Gudá, na' wídabe', ne che nna be'eda' bi wɛn zrin chia' da gunbe', na' gunbe' na.

<sup>9</sup> Gate ben Jesús da nigá, na' bebánene', na' gunné'e benne' ca' zjácalle Le', gunné':

—Da li, quebe ne cheajxraca' tu benne' xezre Israel dxeajlí lazre' neda' ca dxun benne' nigá.

<sup>10</sup> Gate belexezrín benne' ljwezre benne' Roma na' lizre', na' belelé'eng' ba bexaca bi wɛn zrin na'.

*Jesús dxusebanɛ' bi biu cheɛ tu nu'ula ba gute benne' chiɛ'*

<sup>11</sup> Ca gudé na' Jesús guzɛ'e zéajɛ' tu xezre da nazí le na Naín, na' xjácalle Le' benne' ca' dxusédene', ne benne' zante. <sup>12</sup> Gate bzrine' gáguze naga zua xezre na', blé'eng' benne' zaj nu'e tu bi gate zeajlecache'-be', na' naca be' bi tulicha' cheɛ xrnabe', nu'ula na' ba gute benne' chiɛ'. Benne' zan, benne' lazriɛ' zjácalleɛ' le'. <sup>13</sup> Gate Xránadxu blé'eng' nu'ula na', na' bexache lazre' le', ne guzre' le':

—Québedxa cuesru'.

<sup>14</sup> Nadxa gubiga Jesús dxu'a xi'ina xu'ube', na' bte' na. Na' benne' ca' zeajlexexu'e-be' gulague'. Na' Jesús guzre' bi gate na':

—Bidau', dxapa' lue', guxasa.

<sup>15</sup> Na' bi na' ba nate bexásabe' gudxe'be', na' bezú laube' dxuchálajbe'. Na' Jesús bunézruje'-be' lu na' xrnabe'. <sup>16</sup> Gate belelé'e benne' ca' da nigá, na' belezrebe', ne gulezú lawe' dxelúe lá'ang' Dios, dxelenné':

—Tu benne' zrente, benne' dxenné' waláz cheɛ Dios, ba ble'e ládujla dxi'u.

Cá'anqueze dxelenné':

—Dios ba ble'e dxácalene' xezr cheɛ'.

<sup>17</sup> Ca naca naga nababa Judea, ne xezre walíZR cheɛ na belén bɛnneache ca naca xel-la waca cheɛ Jesús.

*Juan, bɛnnea' bchue' bɛnneache nisa dxesel-le' gubáz cheɛ' lau Jesús*  
(Mt. 11.2-19)

<sup>18</sup> Naga xu'u Juan lizre xia, bɛnene' ca naca cheɛ da nigá lawe' da benne' ca' zjácalleɛ' Juan buluzenne' le' da dxaca na. Juan gunné' chupa benne' ca', <sup>19</sup> na' gusel-le' le' lau Jesús cheɛ cheajlechebe' Le' che da li naque' Cristo, bɛnnea' dxal-la' xide', u che dxal-la' xelebeze' benne' xula. <sup>20</sup> Nadxa benne' ca' gusel-la Juan belezrine' lau Jesús, na' gulé'e Le':

—Juan, bɛnnea' bchue' bɛnneache nisa nasel-le' netu' zedajchébentu' Lue' che Lue' na' nacu' Cristo, bɛnnea' dxal-la' xide', u che dxal-la' cuézantu' benne' xula.

21 Ca lu zra na' Jesús bexuné' benne' zanté benne' wé', ne benne' dxé'ene' xízrawé' da dxedá du zren, ne benne' ca' zaj xu'ē be' xriwé', na' bexuné' benne' la chul-la ca'. 22 Nadxa Jesús guzrē' benne' ca' nasel-la Juan:

—Le cheajxaca, ne le xē Juan ca naca da ba ble'ele, ne da bénele. Benne' la chul-la ca' dxelexelé'ene', na' benne' zrinnaj ca' dxelexedé', na' benne' dxeledxé'ene' wé' guzru' ba belexaque', na' benne' xache' ca' dxelenné' dizra' chawe' cheé Dios. 23 Ba neza zren naca na cheé benne' quebe gusán lazre' neda'.

24 Gate besí'aca benne' ca' gusel-la Juan, na' Jesús guzú lawé' dxuchálajlēne' benne' zaj zrē'ē na' ca naca cheé Juan na', dxenné':

—¿Bizra guxijale le'e xeajjna'le le'ē xixre' lawe' lataj? ¿Tu xia xtila da dxutá be'? 25 Che cabí, ¿bizra xeajjna'le? ¿Tu benne' nacu zra lané' da zácalé'ē? Ba nézquezle le'e benne' ca' dxelacu zra lané' da zácalé'ē, ne dxelé'aj dxelawé' da zácalé'ē zaj zrē'ē lizre benne' blau ca'. 26 Che cabí, ¿bizra xeajjna'le? ¿Tu benne' dxuchálajé' waláz cheé Dios? Awe', ble'ele tu benne' nácadxé' szren ca tu benne' dxuchálajé' waláz cheé Dios. 27 Juan nigá naque' bēnnea' naxúaj na cheé' lu xiche cheé Dios, dxenné': Dxesel-la' gubáz chia' lau Lue',

cheé gucá'ana chawé' neza naga teu'.

28 Dxapa' le'e, ládujla xúgute' benne' quebe nu chilá' benne' dxuchálajé' waláz cheé Dios nácadxé' szren ca Juan nigá. Na'a benne' nácadxé' dxexruj lazre' naga dxenná bea Dios nácadxé' blau ca Juan nigá.

29 Na' gunná Jesús:

—Gate na' benne' dxexruj lazre' ca', ne benne' wechizruj ca' belenné' da dxuchalaj Juan, guleque bé'ene' Dios naque' xrlátaje, na' beledxúé' nisa lu na' Juan. 30 Benne' xudau' fariseo ca', ne benne' ca' dxuluxuzájle'ē da nadxixruj bea na buluzúé' chalá'ala ca naca da dxaca lazre' Dios gune' cheé', na' quebe beledxúé' nisa lu na' Juan.

31 Na' gunná Xránadxu:

—¿Ájazra gutil-la lébeda' benne' zaj zrē'ē na'a zra? ¿ájazra zaj naque'? 32 Zaj naque' ca bidu ca' dxelebe'be' dxelítajbe' lawe' xi'a, ne dxelebezre xa'abe', dxelebe' bidu ljwézrebe': “Bcuézrentu' bchiuj da bénele, san quebe bxá'ale. Bil-la xáchent'u, san quebe gudxézrele.” 33 Caní zaj naca benne' ca' lawe' da bla' Juan, bēnnea' bchué' bēnneache nisa, ne quebe gudawé' xeta, ne quebe gu'ē xrise uva wal-la, na' gulenné' xu'ē be' xriwé'. 34 Nadxa bla'a neda', Benne' Gulje' Bēnneache, dxé'aj dxawa', na' dxelenné' naca' wagu xrata, ne benne' dxé'ajle'ē, ne dxelenné' naca' ljwezre benne' dul-la ca', ne benne' wechizruj ca'. 35 Xel-la sina cheé Dios naca bea na ne cheé da dxelún benne' ca' zaj nape' xel-la sina cheé Dios.

### *Da bchalaj Jesús lizre Simón, benne' xudau' fariseo*

36 Tu benne' xudau' fariseo gunné' Jesús cheajtawe' xeta lizre', na' Jesús guxíajé' lizre bēnnea', na' gudxé'ē dxawé'. 37 Nadxa tu nu'ula dul-la cheé xēzre na', gate benne' bzrin Jesús dxawé' xeta lizre benne' fariseo na', na' bzrin nu'ula na' ga na', nu'ē tu da' naca na xiaj zaca, da nazrátē na da dxelá zixre. 38 Gate bzrin nu'ula na' naga zua Jesús, na' gudxé'ē zran ni'ē dxebezre', ne guzú lawé' dxibe' ni'a Jesús nen nisa dxebezre', ne bsebize' ni'ē nen xicha xíchaje', ne bnupe' ni'a Jesús, na' gulu'ē na da dxelá zixre na'. 39 Na' benne' xudau' fariseo, bēnnea' gunné' Jesús lizre',

gate blé'eng' da nigá, gunné' lu lázrdawé': "Chela benne' nigá da li naque' benne' dxuchálajé' waláz cheé Dios, guéquebe'equeze' aja naca cheé nu'ula nigá dxuté' ni'e, lawe' da naque' nu'ula dul-la." <sup>40</sup> Nadxa Jesús guzre' benne' fariseo na':

—Simón, de tu da guchálajlena' lue'.

Na' bechebe benne' fariseo na':

—Gunná, Benne' Wesede.

<sup>41</sup> Jesús gunné':

—Chupa benne' dxelal-le' dumí cheé tu benne' tu dxusántezqueze' benne' dumí. Tué dxal-le' cheé lazruj cheé chupiza, na' xetúe' dxebague' lazruj cheé chupa beu'. <sup>42</sup> Lawe' da quebe dxelezéquene' xelexézruje' cheé bènea', na' le' bnite lawé' cheé dxúpaté benne' ca' ca naca da dxelebague' cheé'. Na' a gunná, ¿nula benne' caní zrí'idxene' bènea'?

<sup>43</sup> Simón bechebe':

—Dxéqueda' bènea' bnite lawé' cheé' da zrendxa.

Na' Jesús guzre' le':

—Da li dxennáu'.

<sup>44</sup> Nadxa Jesús gunné'e nu'ula na', na' guzre' Simón:

—¿Dxelé'enu' nu'ula nigá? Neda' guxu'a lizru', ne quebe nu gunná be'enu' quibe ni'a, san nu'ula nigá gudibe' ni'a nen nisa dxebezre', ne bsebizre' na nen xicha xíchaje'. <sup>45</sup> Quebe bnupu' neda', san nu'ula nigá, gate guxú'utea', quebe dxusane' dxunúpequeze' ni'a. <sup>46</sup> Quebe gulú'u da za xíchaja', san nu'ula nigá gulu'e ni'a da dxelále'e zixre. <sup>47</sup> Cheé le' na' dxapa' lue', lawe' da nazrí'ile'ene' neda', da nigá naca bea na ba bnite lawa' cheé' ca naca dul-la zan cheé', san bènea' naca bábaze dul-la cheé' da bnite lawa', láteze zrí'ine' neda'.

<sup>48</sup> Nadxa Jesús guzre' nu'ula':

—Dul-la chiu' ba bnite lawa'.

<sup>49</sup> Na' benne' ca' zaj zré'e nen Le', ne zaj dxe'e na' gulezú lawé' dxelenné' lu lázrdawé': "¿Nuzra benne' nigá, dxunite láuqueze' dul-la?"

<sup>50</sup> Jesús guzre' nu'ula na':

—Ba naláu' lawe' da guxéajle'u chia'. Bexíaj duté xel-la dxebeza zri lazre'.

## 8

### *Nu'ula ca' belún zrin cheé Jesús*

<sup>1</sup> Ca gudé da nigá, gudá Jesús zane' xezre, ne xézredu ca', dxusédené', ne dxuchálajé' ca dxenná bea Dios. Benne' chazrinnu gubáz ca' zjácálene' Le'. <sup>2</sup> Cá'anqueze zjácále Le' bal-la nu'ula ca', benne' ca' bexune' le' ca naca xizrawé' cheé', ne bebéajé' be' xriwe' ca' da zaj xu'e. Ládujla nu'ula ca' ziaj María Magdalena, nu'ula na' belexedxúaj gazre be' xriwe' lu xichaj lázrdawé'. <sup>3</sup> Ládujla le' ziajqueze Juana, zru'ula Chuza, benne' na' xu'u lu ne'e da napa Herodes. Cá'anqueze ládujla le' ziaj Susana, na' zjaca nu'ula zandxa na', nu'ula ca' dxelácalene' Jesús nen da zaj nape'.

### *Da dxulé'e na ca naca cheé benne' dxaze' zrua' xtila*

(Mt. 13.1-9; Mr. 4.1-9)

<sup>4</sup> Benne' zan beledxúajé' lu xezre ca' cheé xeledé'eng' Jesús, na' gate belezraga benne' zan naga zue', na' bchálajé' tu da dxulé'e na, dxe'e le':

<sup>5</sup> —Tu benne' dxaze' guzé'e zjaze' zrua' xtila. Ca zéajé' dxaze' na, bal-la bínnedu ca' xeajlechaze na dxu'a neza, na' benne' ca' bululéajé' na, na' belezrín bxínnedau' guláguba' na. <sup>6</sup> Xebal-la bínnedu ca' xeajlechaze na lu

xiaj ca', na' gate binnedu caní belezría na, chadite gulebizre na, lawe' da quebe gudxé' gupa'. <sup>7</sup> Xebal-la binnedu ca' xeajlechaze na naga zaj dxe' lue xeche', na' bululule xeche' ca' le na. <sup>8</sup> Xebal-la binnedu ca' xeajlechaze na lu xu bebe, na' gate belegula na, na' gulezríale'e na. Bal-la na gulezría na tu gaxúa weaj.

Gate bexuzre bchalaj Jesús da nigá, na' gunné' zizraj:

—¡Che le'e zua nágale, le xene!

*Jesús dxenné' bizr chee na' dxuchálaje' da dxululé'e na*

*(Mt. 13.10-17; Mr. 4.10-12)*

<sup>9</sup> Nadxa benne' ca' dxusede Jesús gulenábene' Le' bizra zéaje da dxulé'e nigá. <sup>10</sup> Jesús guzre' le':

—Dios dxuzéajni'ine' le'e ca naca da nagache chee xel-la dxenná bea chee', san benne' xula, dxuchálajlëna' le' da dxulé'e na caní, chee gate dxelelé'ene' xelaque' ca benne' quebe dxelelé'ene', ne gate dxelenne' quebe dxeléajni'ine'.

*Jesús dxuxuzájle'e da dxulé'e na ca naca chee' bënnea' dxaze'*

*(Mt. 13.18-23; Mr. 4.13-20)*

<sup>11</sup> Na' gunná Jesús:

—Da nigá naca ca zéaje da dxulé'e na': Binnedu ca' zéaje na xrtizra' Dios.

<sup>12</sup> Binnedu ca' xeajlechaze na dxu'a neza zéaje na benne' ca' dxelenne' xrtizra' Dios, san za' da xriwe', na' dxegúa na dizra' na' lu xichaj lázrdau benne' ca', chee quebe xeléajle'e, ne quebe xeelé'. <sup>13</sup> Binnedu ca' xeajlechaze na lu xiaj ca' zéaje na benne' ca' dxelenne' dizra' na', ne dxelezi'e na duté xel-la dxelebé, san quebe dxaze na lu xichaj lázrdawe'. Dxeléajle'e tu chí'idau'ze, na' gate dxeledé' lu da zi' da xa', na' dxulusán lazre' na. <sup>14</sup> Binnedu ca' xeajlechaze na naga zaj dxe' lue xeche' zéaje na benne' ca' dxelenne' dizra' na', na' dxeajxaque', na' lawe' da dxelezene' gunne xue da zante, ne dxelezé lazre' xel-la gunní'a, ne da xe'aj xelawe' da zácale'e, na' xúgutë da caní dxulusunite na dizra' na', na' quebe dxun na zrin lu xichaj lázrdawe'. <sup>15</sup> Na' binnedu ca' xeajlechaze na lu xu bebe zéaje na benne' ca' zua chawe', ne du lazre' lázrdawe', na' gate dxelenne' dizra' na', dxuluzúa chache' na, na' dxun zrin dizra' na' lu xichaj lázrdawe'.

*Da dxulé'e na ca naca chee' tu da dxegú'u lení'*

*(Mr. 4.21-25)*

<sup>16</sup> Gunná Jesús:

—Netú benne' che gugale' da dxegú'u lení', quebe gudúsie' na tu xi'ina, u zranle ga dxasie', san guzúe' na sibe, chee cu'u lení' na chee benne' zaj zre'e lu xu'u na'. <sup>17</sup> Quebe bi de da nagache' da quebe gulé'e lau na, ne quebe bi xu'u lu xichaj lázrdau bënneache da quebe gaca bea na, ne lá'tequeze na.

<sup>18</sup> Chee le' na', le xene xanne'. Tu benne' nazi'e xrtizra' Dios, wazidxe', san benne' quebe dxezi'e na, wegá'a ca da du dxéquene' nape'.

*Dxelezn' lau Jesús xrne'e, ne benne' biche' ca'*

*(Mt. 12.46-50; Mr. 3.31-35)*

<sup>19</sup> Nadxa xrna Jesús, ne benne' biche' ca' belezrine' naga zue', san quebe gulezéquene' xelezrine' lau Le', lawe' da zralé'e benne' zan ga na'. <sup>20</sup> Tu benne' na' bzenne' Jesús, gunné':

—Xrna'u, ne bi bichu' ca' zaj zre'e chale'aj nigá, dxelaca lazre' xuluchálajlëne' Lue'.

21 Jesús guzre' le':

—Benne' ca' dxellenne' xrtizra' Dios, ne dxelune' ca dxenná na, benne' caní zaj naque' ca xrna'a, ne benne' bícha'dau' ca'.

*Jesús dxuzúa zrië' be' bdunu', ne xeajxruza cheë nísadau'*

*(Mt. 8.23-27; Mr. 4.35-41)*

22 Tu zra guxú'u Jesús tu lu da dxedá lawe' nísadau' nen benne' ca' dxusédenë', na' guzre' le':

—Cheajdxu xecha la'a nísadau'.

Na' gusiá'que', <sup>23</sup> ne dxácatë zjaque' lu nísadau' na', guse Jesús. Na' guzú lau dxácalë'ë be' bdunu' lu nísadau', na' guzú lau dxu'u nisa lu da dxedá lawe' nísadau' na', ne ba dxácatë waxaze na lu nísadau'. <sup>24</sup> Nadxa bulusebanë' Jesús, dxelé'ë Le':

—¡Benne' Wesëde! ¡Benne' Wesëde! ¡Ba dxázédxu lu nisa nigá!

Nadxa guxasa Jesús, na' gudil-le' be' bdunu' na', ne nisa na', na' ca naca da ca' belezúa zri na. <sup>25</sup> Nadxa Jesús guzre' benne' ca' dxusédenë':

—¿Quebe ne chéajlele cheë Dios?

Benne' ca' belezrebe', ne belexebánenë', na' buluchebe ljwezre':

—¿Núzraqueze benne' nigá, dxenná bé'ene' be', ne nisa, na' dxuluzúa na dizra' cheë'?

*Tu benne' Gadara xu'e be' xriwe'*

*(Mt. 8.28-34; Mr. 5.1-20)*

<sup>26</sup> Nadxa belezrine' xecha la'a nisa lu xëzr la xu cheë xëzre Gadara, chalá'a ca'ala cheë Galilea. <sup>27</sup> Gate bedxúaj Jesús lu da dxedá lawe' nísadau' na', na' bzzin tu benne' xëzre na' lau Le'. Zánëtë iza ba guca xu'u be' xriwe' ca' benne' nigá. Quebe gúcue' zra lane', ne quebe guzúë' netú lu xu'u, san xeajchu'ë tu lu ba ca'. <sup>28</sup> Gate blé'ene' Jesús, na' xeajzú zribe' lau Le', na' gudxëzre xë'e, dxenné':

—¿Bizr cheë na' za'u naga zua', Jesús, Zri'ine Dios szrentë? Dxata' xueda' Lue' quebe gusaca zi'u neda'.

<sup>29</sup> Gunná na caní lawe' da ba gunná be'e Jesús be' xriwe' ca' xelexedxúaj na lu xichaj lázrdau benne' nigá. Zane' lasa be' xriwe' ca' ba gulela na benne' nigá. Benne' xëzre na' gulele' benne' nigá, ne buluchéajë' le' ni'a ne'ë nen du xia, san le' bzúzuxujë' du xia na', na' be' xriwe' ca' guleché na le' le'ë xixre' lawe' lataj. <sup>30</sup> Jesús bchebe' be' xriwe' ca':

—¿Bi lele'?

Na' bechebe le na:

—Neda' lea': Da Zan.

Ca' gunná na lawe' da xu'u be' xriwe' zante benne' na'. <sup>31</sup> Be' xriwe' ca' gulenaba na Jesús quebe sel-le' na lataj chul-la. <sup>32</sup> Lu xi'a naga zua Jesús, na' zralë'ë cuche zan dxeláguba', na' be' xriwe' ca' gulata' xue na Jesús gu'e lataj da ca' cheajxëzra' na lu cuche ca', na' bnezruj Jesús na lataj. <sup>33</sup> Nadxa be' xriwe' ca' belexedxúaj na lu xichaj lázrdau benne' na', na' gulú'u na lu cuche ca', na' xúgütë cuche ca' buluzrúnnujba', ne gulebírëba' dxu'a chjéa, na' xeajlecházëba' lu nísadau', naga gulépeba', guláteba'.

<sup>34</sup> Benne' ca' dxuluxúë' cuche ca', gate belelé'ene' ca da guca, na' buluzrúnnujë' lu xel-la dxelezrebe, na' gulé'ë benne' zaj zre'ë le'ë xixre', ne benne' zaj zre'ë lawe' xëzre ca da guca. <sup>35</sup> Nadxa benne' ca' beledxúajë' xeajlennë'ë ca da guca. Gate belezrine' naga zua Jesús, na' belelé'ene' bënnea' belexedxúaj be' xriwe' ca' lu xichaj lázrdawë', dxe'ë zran ni'a Jesús, ba nácuë' ladxe', ne ba bezúa chawe' xichaj lázrdawë', na' benne' ca'

belezrebe'. <sup>36</sup> Na' benne' belelé'e ca da guca buluchálajlene' benne' xula ca' ca guca gate bexaca bénnea' guxú'e be' xriwe' ca'. <sup>37</sup> Gate belenne' caní, ca naca benne' zaj zře'e lu xezr la xu chee xezre Gadara gulezú lawe' dxelata' xúene' Jesús xezé'e lazrie', lawe' da dxelezrebele'e. Ca'an guca, guxú'u Jesús lu da dxedá lawe' nísadau', chee xezé'e xéaje'. <sup>38</sup> Bénnea' belexedxúaj be' xriwe' ca' lu xichaj lázrdawe' gunabe' lau Jesús gunézruje' lataj chéajlene' Le', san Jesús busebague' le' xegá'ane' lázrie', na' guzre' le':

<sup>39</sup> —Bexiaj lizru', na' bchalaj chee xúgute ca da ba ben Dios chiu'.

Na' benne' na' bezé'e zexíaje', na' bchálajlene' benne' xezre ca' ca da ben Jesús chee le'.

*Jesús dxexune' bí nu'ula chee Jairo, ne tu nu'ula xeajté' zra lane'*

*(Mt. 9.18-26; Mr. 5.21-43)*

<sup>40</sup> Gate bezrín Jesús xecha la'a dxu'a nísadau', benne' ca' zaj zře'e na' gulezú lu ne'e Le' nen duté xel-la dxelebe', lawe' da xúgute' dxelebeze' Le'. <sup>41</sup> Nadxa bzrin tu benne' le' Jairo, benne' blau chee xu'u naga dxelezraga judío ca', na' bzu zribe' lau Jesús, ne guta' xúene' Le' chéaje' lizre', <sup>42</sup> lawe' da zua tuze bi nu'ula chee'. Xu'ube' chazrinnu iza, na' ba dxaca wátebe'. Gate guzá' Jesús zéaje', benne' zanté zjácálene' Le', ne buluchídete ljwezre'.

<sup>43</sup> Ládujla benne' ca' zeaj tu nu'ula quebe chawe' zue', na' chazrinnu iza ba zeaj dxé'ene' we' dxen da dxaca chee nu'ula ca'. Ba gudízruje' benne' dxelexún bénneache ca' xúgute ca da gudape', na' quebe bi gulezéquene' xelune' chee xexaca nu'ula na'. <sup>44</sup> Nu'ula na' gubigue' cúzrula Jesús, na' xeajté' zran ni'a zře', na' la ná'queze bexágate dxen da dxaca nu'ula na'.

<sup>45</sup> Nadxa Jesús bchebe':

—¿Nuzra bta neda'?

Xúgute' gulenné': "Quebe nu ne gutá Lue", na' Pedro, ne benne' ljwezre' ca' gulenné':

—Benne' Wesede, benne' caní dxuluchíde' Lue', ne dxuluzrigue' Lue', na' dxuchébequezu', dxennáu': "¿Nuzra bta neda'?"

<sup>46</sup> Jesús gunné':

—Tu benne' bte' neda' lawe' da gúquebe'eda' ben zrin xel-la waca chia' da bexún na tu benne'.

<sup>47</sup> Gate gúquebe'e nu'ula na' ba neze Jesús da guca, nadxa gudé' dxezrízete', na' bzu zribe' lau Jesús, ne guxrúalepe' lau xúgute' benne' ca' bizr chee na' bte' Jesús, ne ca guca bexácate'. <sup>48</sup> Nadxa gunná Jesús, guzre' nu'ula na':

—Zrí'ina'dau', ba bexacu' lawe' da guxéajle'u chia'. Bexíaj na'a, duté xel-la dxebeza zri lazre'.

<sup>49</sup> Ne dxuchálajte Jesús, bzrin tu benne' naga ze Jesús, benne' guzé'e lizre Jairo, benne' blau chee xu'u ga na' dxelezraga judío ca', na' guzre' Jairo:

—Ba gute bi nu'ula chiu'. Québedxa guzúa xuzru' Benne' Wesede nigá.

<sup>50</sup> Gate ben Jesús ca gunné', na' guzre' Jairo:

—Quebe zrebu'. Con guxeajle. Bi nu'ula chiu' na' xexácabe'.

<sup>51</sup> Gate bzrin Jesús xu'u na', netú quebe be' lataj chú'ule' Le', san tuze Pedro, ne Jacobo, ne Juan, ne xra xrna bi nu'ula na'. <sup>52</sup> Xúgute' benne' zaj zře'e na' dxelebezre', ne dxelebezre xache' chee bi nu'ula na'. Jesús gunné':

—Quebe cuézrele. Bi nú'uladu nigá quebe nátebe'. Dxásezebe' na'.

<sup>53</sup> Na' benne' ca' buluzrizre' chee', lawe' da zaj nézquezne' ba gútebe'.  
<sup>54</sup> Nadxa Jesús guqué'e na' bi na', na' gunné' zizraj:  
 —jBi nu'ula, bexasa!

<sup>55</sup> Na' bebanbe', ne bexásatebe'. Na' Jesús busebague' le' xulunéruje' da gágube'.  
<sup>56</sup> Xra xrnabe' belexebánele'ene'. Jesús busebague' le' quebe nu xelé'e ca da guca.

## 9

*Jesús dxesel-le' benne' chazrinnu ca' xelune' xrchine'*  
 (Mt. 10.5-15; Mr. 6.7-13)

<sup>1</sup> Jesús bchague' benne' chazrinnu ca' dxesédené', na' bnéruje' le' xel-la waca, ne xel-la dxenná bea chee xelxebéaje' xúgute' cue' be' xriwe' ca' da zaj xu'u bénneache, ne chee xellexune' benne' ca' zaj xu'e xízrawe'.  
<sup>2</sup> Na' gusel-le' le' chee xuluzenne' bénneache ca dxenná bea Dios, ne chee xellexune' benne' zaj xu'e xízrawe' ca'.  
<sup>3</sup> Na' guzre' le':

—Quebe bi gúale chee la neza. Quebe gúale xaga da guchíchele, na' xixruj chee, ne da gágule, ne dumí. Le gua' tu cue'ze zra lánale.  
<sup>4</sup> Gáteteze xu'u naga chú'ule, le xegá'ana na' cadxa zrin zra xeza'ale lu xezre na'.  
<sup>5</sup> Naga quebe xelez'íe dizra' guchálajle le', le xedxúaj xezre na', ne le cuibe bxrte xu da da' ní'ale, da gulé'e na zaj nabague' zria lau Dios.

<sup>6</sup> Nadxa beledxúaje', na' ca naca xézredu ca' xea'jlechá'aje' dizra' chawe' chee Dios, ne belexexune' benne' zaj xu'e xízrawe' ca'.

*Ca guca gate gute Juan, benne' bchue' bénneache nisa*  
 (Mt. 14.1-12; Mr. 6.14-29)

<sup>7</sup> Herodes, benne' dxenná be'ene' xezr la xu na', benne' ca naca xúgute da dxun Jesús, na' guzúe' stebe lawe' da dxelenná bal-la benne' ba bebán Juan ládujla benne' gate.  
<sup>8</sup> Xebal-le' dxelenné' Elías, bénnea' bchálaje' waláz chee Dios ba bele'e, na' xebal-le' dxelenné' ba bebán tu benne' ca' buluchálaje' waláz chee Dios ca ni'te.  
<sup>9</sup> Herodes gunné':

—Néda'queza' gunná be'eda' nu gudxugu xichaj Juan. ¿Nuzra benne' nigá xca' da zante dxenda' dxune'?

Nadxa Herodes be'ne' ba xuzre lé'ene' Jesús.

*Jesús dxugawe' chi xun gaxúa benne'*  
 (Mt. 14.13-21; Mr. 6.30-44; Jn. 6.1-14)

<sup>10</sup> Gate belexezrin benne' gubáz ca' chee Jesús lau Le', na' gulé'e Le' ca da ba belune'. Na' Jesús beche'e benne' ca', na' besía'que' zeajxaque' tu lataj da nagá'ana zitu' naga zaj dxe' xezre ca', naga zua lu xezr la xu chee xezre Betsaida.  
<sup>11</sup> Gate benne' xezre na' belenne' zua Jesús na', na' gusiá'que' zjaque' naga zua Le'. Na' Jesús guzi' lu ne'e benne' ca', ne bchálajlene' le' ca dxenná bea Dios, ne bexune' benne' zaj xu'e xízrawe' ca'.

<sup>12</sup> Gate guzú lau zeaj dxezré', na' gulebiga benne' chazrinnu gubáz ca' chee Jesús lau Le', na' gulé'e Le':

—Bze' benne' caní dizra' chee chjaque' naga xelasié', ne xelílaje' da xelawe' xézredu ca' zaj nnita gagu, lawe' da ga zúadxu nigá quebe bi de.

<sup>13</sup> Jesús guzre' le':

—Le gunezruj le'e da xelawe'.  
 Nadxa benne' ca' bele'e Jesús:

—Quebe dēdxā cheēntu' ca gāzxuga xeta xtíladau', ne chúpaga bela, u ¿wacheajxríquezentu' da xelagu catite benne' zan caní?

<sup>14</sup> Zaj zra ca chi xun gaxúa benne' biu ca' ga na'. Nadxa Jesús guzre' benne' ca' dxusédene':

—Le xē benne' ca' xelebé'e chi xun weaje' tu cue' tu cue'.

<sup>15</sup> Ca'an belunē', na' gulebe'e xúgute'. <sup>16</sup> Nadxa Jesús guqué'e da gazxu' xeta xtila ca', ne chupa bela ca'. Na' guchisa lawē' xabaala, ne guzre' Dios “Xcalenu'”, na' ca bexuzre bzúzruje' na, na' bnézruje' na benne' ca' dxusédene' cheē xelisiē' na cheē benne' zan ca'. <sup>17</sup> Xúgute' gulawē', ne belélaje'. Ca gudé na' bulusuzrē'e chazrinnu ga' da bízrujdu ca' belexegá'ana na.

*Pedro dxenné' Jesús naque' Cristo*

(Mt. 16.13-19; Mr. 8.27-29)

<sup>18</sup> Tu zra gate zua Jesús dxuchálajlēne' Dios naga quebe zaj zra benne' zan ca', na' zrale benne' ca' dxusédene' Lē', na' Lē' bchebe' benne' ca':

—¿Nuzra dxelenná benne' naca' neda'?

<sup>19</sup> Lē' belexechebe':

—Bal-lē' dxelenné' nacu' Juan, bēnnea' bchuē' bēnneache nisa, na' xebal-lē' dxelenné' nacu' Elías, bēnnea' bchálaje' waláz cheē Dios, na' xebal-lē' dxelenné' nacu' tu benne' ca' buluchálaje' waláz cheē Dios ca' ni'ite, na' bebane'.

<sup>20</sup> Nadxa Jesús bchebe':

—Na' le'e, ¿nuzra dxennale naca'?

Na' gunná Pedro:

—Nacu' Cristo cheē Dios.

*Jesús dxuzenne' benne' ca' ca gaca gate gatiē'*

(Mt. 16.20-28; Mr. 8.30—9.1)

<sup>21</sup> Jesús bsebage' benne' ca' quebe nu xelē'e ca'. <sup>22</sup> Na' guzre' le':

—Neda', Benne' Gulje' Bēnneache, dxal-la' tēlé'a xel-la zi', na' benne' gula sina ca', ne benne' xíchaje' ca' cheē bxruze, ne benne' ca' dxuluxuzájle'e da nadxiruj bea na xuluzúe' neda' chalá'ala. Xelútiē' neda', san gate gaca chunna zra, na' xebana'.

<sup>23</sup> Ca gudé na' guzre' ca' naca benne' zaj zre'e na':

—Che nu benne' dxaca lazre' gaque' neda' tuze, dxal-la' guzúe' chalá'ala xúgute' da naca cheē', na' gune' neda' tuze xúgute' zra, lácala gate benne' na'. <sup>24</sup> Benne' dxaca lazre' gapa chi'e xel-la nabán cheē', gunítie' na, san benne' gunítie' xel-la nabán cheē' lawe' da naque' chia', wazrué'ene' na.

<sup>25</sup> ¿Bizra da ba neza gaca na cheē tu benne' che gape' ca' naca da dē lu xēzr la xu nigá, san cuía xi' léqueze'? <sup>26</sup> Che nu benne' xedué'ene' chia' neda', ne cheē dizra' chia', cá'anqueze neda', Benne' Gulje' Bēnneache, wedué'eda' cheē bēnnea' gate za'a neda' cheē nna be'a nen xel-la szren cheē Xra', ne cheē gubáz lá'azxa cheē xabáa ca'. <sup>27</sup> Da li dxapa' le'e, bál-lale zrale nigá quebe gátele nédxudxa ca' lé'ele zra nna bea Dios.

*Gate bcha lu'a lesaca Jesús*

(Mt. 17.1-8; Mr. 9.2-8)

<sup>28</sup> Ca guzre xi' gudé gunná Jesús da nigá, na' guluéne' tu lu xi'a cheē guchálajlēne' Dios, na' xjácále Pedro, ne Jacobo, ne Juan Lē'. <sup>29</sup> Dxácate dxuchálajlēne' Dios, na' bcha lu'a lesaca Jesús, na' zra lanē' bexaca na da chiche, ne guca tite na. <sup>30</sup> Nadxa bululé'e lau chupa benne'



dxuluchálajlęne' Jesús. Zaj naque' Moisés ne Elías. <sup>31</sup> Naga zeļę Jesús benne' ca' gúcatite' legala, na' dxuluchálajlęne' Jesús ca gaca gate gatię' Le' xezre Jerusalén. <sup>32</sup> Gulácalę'ę welase Pedro ne benne' lјwezre' ca', san bulusebán lazre', na' belelé'ene' ca naca xel-la szren cheę Jesús, ne chupa benne' ca' zaj zęļęne' Jesús. <sup>33</sup> Gate benne' ca' belexesiá'que' naga zeļę Jesús, na' Pedro gunné':

—Benne' Wesęde, néquega zúadxu nigá. Benna netu' lataj guntu' chunna xu'u lága'dau', tu chiu', ne tu cheę Moisés, ne tu cheę Elías.

Pedro quebe dxęquebe'ene' ca da dxenné'. <sup>34</sup> Dxácatę dxenná Pedro caní, na' bla' tu beuj da gucu na naga zaj zre'ę, na' belezrebe Pedro, ne benne' lјwezre' ca' gate gulezre'ę lu beuj na'. <sup>35</sup> Na' belenne' chi'i nu dxuchalaj lu beuj na', gunná:

—Bi nigá naque' Zri'ina', nazrí'itę lazra'. Le xen da dxuchálajbe'.

<sup>36</sup> Ca gudé belenne' chi'i na', na' belelé'ene' Jesús ba ze' tuzę'. Na' benne' caní gulezúę' zrize, na' quebe nu gulę'ę ca da belelé'ene'.

*Jesús dxexunę' tu bi biu xu'ube' be' xriwe'*

*(Mt. 17.14-21; Mr. 9.14-29)*

<sup>37</sup> Gute xu, gate belexexétaje' lu xi'a na', na' benne' zan zjaque' zea-ļlexrígale' Jesús. <sup>38</sup> Nadxa tu benne' ca' gunné' zizraj, guzre' Jesús:

—Benne' Wesęde, dxata' xueda' Lue' dajxú' bi biu chia' lawe' da tu lícha'tę bi chia' naca, <sup>39</sup> na' tu be' xriwe' dxaze na lebe', ne dxucuezre xa'a na lebe', ne dxudixire dxutula na lebe', na' dxebía bzrina' dxú'abe'. Dxasaca zi na lebe', ne quebe dxaca lazre' na gusán na lebe'. <sup>40</sup> Ba guta' xueda' benne' ca' dxusédenu' cheę xelexebáje' na, san quebe gulezęquene'.

<sup>41</sup> Jesús bechebe':

—Le'e, benne' węn chupa lazre', ne węn da caleļa. ¿Ájatę dxal-la' súalęna' le'e? ¿Ájatę dxal-la' guchaga lawa' nen le'e? Xeajxrí' zri'inu' na' nigá.

<sup>42</sup> Gate bi cuide' na' ba zęajbe' gagu, na' be' xriwe' na' gudín na lebe' xu, ne bdxixre btula na lebe'. Na' Jesús gudil-ļę' be' xriwe' na', ne bexunę' bi cuide' na', na' bdeę'-be' lu na' xrabe'. <sup>43</sup> Xúgutę benne' ca' belexebánene' ca naca xel-la szren cheę Dios.

*Jesús dxuzenne' benne' ca' xecha lasa ca gaca gate gatię'*

*(Mt. 17.22-23; Mr. 9.30-32)*

Dxácatę na' xúgutę benne' ca' dxelexebánene' ca da dxun Jesús, Le' guzre' benne' ca' dxusédene':

<sup>44</sup> —Le xen xanne' da nigá, ne quebe gal-la lázrele na. Neda', Benne' Gulje' Bénneache, wuludęę' neda' lu na' bénneache.

<sup>45</sup> Benne' ca' dxusédene' quebe gulėjni'ine' ca da dxenná Jesús lawe' da quebe ne gunézruij Dios lataj xelėjni'ine', na' belezrebe' xelenabe' Jesús guzėjni'ine' le' ca da na' gunné'.

*¿Nuzra naca blau?*

*(Mt. 18.1-5; Mr. 9.33-37)*

<sup>46</sup> Nadxa benne' ca' dxusęde Jesús gulezú lawe' dxuluchebe lјwezre' núzraqueze naca blau láduļa le'. <sup>47</sup> Jesús gúquebe'ene' ca da dxelenné'. Nadxa guquęę' tu bi biúdau', ne bze'-be' cuitę', <sup>48</sup> na' guzre' benne' ca':

—Benne' gape' ba lá'ana tu bidu caní lawe' da nazrí'ine' neda', néda'queza' dxape' ba lá'ana, na' benne' dxape' ba lá'ana neda', dxápaqueze'

ba lá'ana Dios, Bénnea' nasele-ḷe' neda'. Cá'aqueze bénnea' nácadxe' benne' dxexruj lazre' ládujla le'e, benne' nigá naque' benne' blau.

*Benne' quebe dxedábage' dxi'u zue' gácalene' dxi'u*

(Mr. 9.38-40)

<sup>49</sup> Nadxa Juan guzre' Jesús:

—Benne' Wesede, blé'entu' tu benne' dxuchínene' Lau', dxebéaje' be' xriwe' ca' lu xichaj lázrdau benne' ca', na' gúzrentu' le' quebe guné' ca' lawe' da quebe naque' dxi'u tuze.

<sup>50</sup> Jesús guzre' le':

—Quebe guzágale ca da dxune' lawe' da benne' quebe dxedábage' dxi'u zue' gácalene' dxi'u.

*Jesús dxedil-le' Jacobo ne Juan*

<sup>51</sup> Gate ba za zrin zra dxal-la' xexíaj Jesús xabáa, ben zi' lazre' chéaje' Jerusalén. <sup>52</sup> Na' gusél-le' gubáz chee' ca' xelebía lawe', na' benne' ca' xjaque' tu xézredau' nababa Samaria chee' cheajlecuéze' naga sua Jesús.

<sup>53</sup> Benne' Samaria ca' quebe gulaca lazre' xegá'ana Jesús na', lawe' da guleque' bé'ene' zéaje' Jerusalén. <sup>54</sup> Gate Jacobo ne Juan, benne' ca' dxusede Jesús, belelé'ene' da nigá, na' gulé'e Jesús:

—Xran, ¿dxaca lazru' nna béantu' xetaj xi' da za xabáa chee' guzría xi na benne' caní, ca ben Elías, bénnea' bchálaje' waláz chee' Dios?

<sup>55</sup> Nadxa Jesús guné'e le', ne gudil-le' le', dxenné':

—Le'e quebe nézele nu be' zúale le'e. <sup>56</sup> Caní naca lawe' da bla' neda', Benne' Gulje' Bénneache, quegá chee' guzría xi'a xel-la nabán chee' bénneache, san chee' gucache chawa' le' na.

Nadxa xjaque' xetú xézredau'.

*Benne' dxelaca lazre' chjácalene' Jesús*

(Mt. 8.19-22)

<sup>57</sup> Ca zjaque' lu neza na', tu benne' biu guzre' Jesús:

—Xran, dxaca lazra' sále'na' Lue' gáteteze chéaju'.

<sup>58</sup> Jesús bechebe':

—Beza ca' zaj zua bluaj cheeba', na' bxínnedu ca' zaj zria xrú'neba', san neda', Benne' Gulje' Bénneache, quebe bi de ga xrua xíchaja'.

<sup>59</sup> Na' Jesús guzre' xetú benne':

—Ben neda' tuze.

Benne' nigá gunné':

—Xran, benna neda' lataj cheajcáchea' xra'.

<sup>60</sup> Na' Jesús bechebe':

—Be lataj benne' ca' zaj naque' ca benne' gate xulucache' ljwezre', na' lue', guxíaj, xeajchalaj ca dxenná bea Dios.

<sup>61</sup> Nadxa tu benne' xula guzre' Jesús:

—Xran, dxaca lazra' guna' Lue' tuze, san steca, benna neda' lataj xexá'a cheajzéa' dizra' benne' zaj zra' lizra'.

<sup>62</sup> Jesús guzre' benne' na':

—Benne' dxugá'ane' bezre, na' nne'e cúzrule', quebe gaca chee' bénnea' guné' zrin chee' da dxenná bea Dios.

## 10

*Jesús dxesel-le' benne' gaxún chi ca'*

<sup>1</sup> Ca gudé na', Xránadxu guqué'e xegaxún chi benne' ca', na' gusél-le' chupa weaje' xelebía lawe' lau Le' xúgute xezre, ne xézredu ca' naga dxal-la' chéaje' Le'. <sup>2</sup> Guzre' benne' ca':

—Da li dxennéa', lina da zren naca na, na' benne' wen zrin bábaze zaj naque'. Chee le na' le naba lau Xrane zrin na' sel-le' benne' wen zrin ca' xelexequé'e lina na'. <sup>3</sup> ¡Le chjaca! Le nna'xque, neda' dxelel-la' le'e, gácale ca zríla'du ca' ládujla becu' xi'a ca'. <sup>4</sup> Quebe gúale xixruj, ne dumí, ne zréale, ne quebe gagale la neza nu guchálajlele. <sup>5</sup> Gate chu'ule tu lu xu'u, na' gugápale diuzre, nnale: “Xel-la dxebeza zri lazre' gaca chee benne' zaj zré'e lu xu'u nigá.” <sup>6</sup> Che zaj zra' na' benne' dxelebeza zri lazre', na' da gunábale gaca chee benne' ca', san che quebe nu chilá' naca caní, le naba quebe gaca da ba gunábale. <sup>7</sup> Le xegá'ana lu xu'u ná'queze, na' le xi'aj le gagu ca da xelunne' lawe' da benne' wen zrin quebe te le tune'. Quebe cheajsúale tu xu'u xetú xu'u. <sup>8</sup> Gate zrinle tu xezre naga xelezí' lu ne'e le'e, le gagu ca da xelunne'. <sup>9</sup> Le xexún benne' zaj xu'e xízrawe' zaj zré'e na', na' le xe'e: “Xel-la dxenná bea chee Dios ba zua nen le'e.” <sup>10</sup> Che zrinle tu xezre naga quebe xelezí' lu ne'e le'e, le xedxúaj la neza chee xezre na', na' nnale: <sup>11</sup> “Ca naca bxrte'du' da' ní'antu' dxexebíentu' na chee gaca tu da gulé'e na le'e nabágale zria lau Dios. Dxal-la' nézele ba bla' ládujla le'e xel-la dxenná bea chee Dios.” <sup>12</sup> Dxapa' le'e, ca lu zra guchi'a Dios, da xelezaca benne' zaj zré'e lu xezre nigá gácadxa na xel-la zi' ca da xelezaca benne' xezre Sodoma, xezre na' bzria xi' Dios.

*Da gaca chee xezre naga quebe beluné' ca dxenná xrtizra' Dios  
(Mt. 11.20-24)*

<sup>13</sup> Na' gunná Jesús:

—¡Edxugúa le'e, benne' xezre Corazín! ¡Edxugúa le'e, benne' xezre Betsaida! Chela lu xezre Tiro, ne lu xezre Sidón belelé'eng' ca naca xel-la waca chee xabáa da ba gulaca ládujla le'e, gate na'te ba belexebí'i lazre', belácue' zra lané' tuzruj, ne buluzríe' de xíchaje'. <sup>14</sup> Lu zra guchi'a Dios da dxaca, na' sácadxale le'e xel-la zi' ca da xelezaca benne' Tiro, ne Sidón. <sup>15</sup> Na' le'e, benne' xezre Capernaum, ¿dxéquele waxásale zrinte'le xabáa? ¡Lataj chúl-lala xétajle!

<sup>16</sup> Nadxa guzre' benne' ca' dxusédene':

—Benne' xenne' chee le'e, chia' neda' xenne', na' benne' guzúe' le'e chalá'ala, neda' na' gusaque' ca', na' benne' guzúe' neda' chalá'ala, Dios, Bénnea' gusel-le' neda', guzúe' chalá'ala.

*Dxelexezrín benne' gaxún chi ca'*

<sup>17</sup> Benne' gaxún chi ca' belexezrine' lu xel-la dxelebé, dxelenné':

—Xran, be' xriwe' ca' dxuluzúaqueze na dizra' cheentu' gate dxuchínentu' Lau'.

<sup>18</sup> Jesús guzre' benne' ca':

—Ca' naca, na' neda' ble'eda' da xriwe' bexruj na zran xabáa ca tu xesa da dxeajsúa na lu xu. <sup>19</sup> Neda' ba benna' le'e xel-la dxenná bea chee guléajle be snia ca', ne bexrujni, ne chee guchúchujle duté xel-la dxenná bea chee da xriwe', na' quebe bi seque gune na le'e. <sup>20</sup> Quebe bele lawe' da dxelún be' xriwe' ca dxennale le'e, san le be lawe' da ba naxúaj lale xabáa na'la.

*Jesús dxebene'*

*(Mt. 11.25-27; 13.16-17)*

21 Lu zra ná'queze gubéle'e Jesús, zúale Be' Lá'azxa Le', na' gunné':

—Dxue lá'ana' Lue', Xrae, Xrane xabáa ne xezr la xu, lawe' da ba blé'enu' bénne'du caní da bcácheu' chee benne' sina ca', ne benne' dxeléajni'ine'. ¡Ca' naca, Xrae, lawe' da ca'an guca lazru' Lue'!

22 'Xra' ba benne' neda' xúgute. Quegá nu neze nu na' naca Zrí'ine', san tuze Xrá'queza', ne quegá nu neze nu na' naca Xra', san tuze Zrí'inequeze', ne nu benne' ca' dxaca lazre' Zrí'ine' guzéajni'ine' le' Nu na' naca Xre'.

23 Nadxa guné'e benne' ca' dxusédene', na' guzre' benne' cá'anze:

—Ba neza naca na chee benne' ca' dxelelé'ene' ca da dxelé'ele le'e, 24 lawe' da dxapa' le'e, zánete benne' ca', benne' buluchálaje' waláz chee Dios, ne benne' wenná bea ca' gulaca lazre' xelelé'ene' ca da dxelé'ele le'e, san quebe belelé'ene' na. Gulaca lazre' xelenne' ca da dxenle le'e, san quebe belenne' na.

*Da dxulé'e na ca ben benne' Samaria, benne' naque' chawe'*

25 Nadxa tu benne' dxuxuzájle'e da nadxixruj bea Dios bdxúaje', ne guxíaje' xeajchálajlene' Jesús chee gaca guzúa zrie' Le', na' bchebe' Le':

—Benne' Wesede, ¿bizra dxal-la' guna' chee gata' chia' xel-la nabán da zejlí canna?

26 Jesús bechebe':

—¿Bizra da naxúaj na lu da nadxixruj bea Dios? ¿Aja dxéquenu' da dxulabu'?

27 Bénnea' dxuxuzájle'e da nadxixruj bea Dios bechebe':

—Bzri'i Xranu' Dios dute lárda'u, ne nen dute bénne'du xu'u, ne nen dute xel-la dxun zi' lazre' chiu', ne nen dute xel-la dxulaba lazre' chiu', na' bzri'i le sa' ljwezru' ca nazri'i cuinu'.

28 Nadxa gunná Jesús, guzre' le':

—Cháwe'le'e bechebu'. Che dxunu' caní, na' gapu' xel-la nabán na'.

29 Bénnea' dxuxuzájle'e da nadxixruj bea Dios guca lazre' gucá'ana chawe' cuine', na' guzre' Jesús:

—¿Nuzra na' le sa' lwezra'?

30 Bechebe Jesús:

—Tu benne' guzé'e Jerusalén, bétaje' zíaje' Jericó. Lu neza na' xu'e, na' gulela gubán le', ne gulebane' ca naca da nape', ne zra lané'. Na' buluzálaje' le', ne besía'que' zaj nucá'ane' le' ca benne' gate. 31 Nadxa gudé tu bxruze neza na', na' gate blé'ene' le', gudé'e' chalá'ala. 32 Cá'anqueze gudé na' tu benne' xrtia Levi, benne' dxune' zrin chee xudau', na' gate blé'ene' bénnea', gudé'e' chalá'ala. 33 Nadxa tu benne' Samaria gudé'e' neza na', na' gate blé'ene' le' bexache lazre' le'. 34 Gubigue' cuita benne' na', ne btupe' tu da za lu we' chee', ne xrise uva wal-la, na' bchele' na ladxe'. Nadxa bcuene' le' cuzru bea chee', na' beche'e le' tu lu xu'u naga xegá'ane', ne bxue' le' na'. 35 Zra xula, ca bezá' benne' Samaria na', na' guléaje' chupa dumí da bnézruje' xrane xu'u na', ne guzre' le': “Bxue benne' nigá, na' che ba gucá'adxa xelate' dumí chiu', neda' xexunna' na gate xelá'a.”

36 Nadxa Jesús guzre' benne' dxuxuzájle'e da nadxixruj bea Dios:

—¿Nula benne' chunna caní guque' le sa' ljwezre bénnea' gulela gubán ca'?

37 Na' gunná bénnea' dxuxuzájle'e da nadxixruj bea Dios:

—Bénnea' bexache lazre' le'.

Nadxa Jesús guzre' le':

—Bexíaj lue', na' gúnquezu' ca'.

*Jesús dxezrine' lizre Marta ne María*

<sup>38</sup> Jesús bexu'e neza, na' bezrine' tu xézredau', na' lu xezre na' zua tu nu'ula le' Marta, na' gulu'e Jesús lizre'. <sup>39</sup> Marta na', zua tu bi bile' le' María, na' María na' gudxé'e zran ni'a Jesús chee xenne' da dxuchálaje'. <sup>40</sup> Marta déle'e da dxune', na' bzrine' lau Jesús, ne guzre' Le':

—Xran, ¿quebe dxexache lazru' neda' lawe' da dxucá'ana bi bila' neda' chee guna' tuza' zrin cheentu'? Guzre-be' gácalebe' neda'.

<sup>41</sup> Jesús bechebe':

—Marta, Marta, dxezéle'enu' gunne xue, ne zu' stébe ca naca chee da ca' dxunu', <sup>42</sup> san de tuze da dxun na ba xen nu gun. María ba bezrelne' da cháwedxa, na' netú benne' quebe seque' cue' na.

**11***Ca dxal-la' gundxu guchálajle dxu Dios*

(Mt. 6.9-15; 7.7-11)

<sup>1</sup> Tu zra Jesús bchálajle' Dios tu lataj, na' gate bexuzre bchálajle' Dios, na' tu benne' ca' dxusédene' guzre' Le':

—Xran, bséde netu' guchálajle'ntu' Dios, ca ben Juan, bsédene' benne' ca' zaj de'e le'.

<sup>2</sup> Jesús gunné':

—Gate guchálajlele Dios, na' nnale:

Xrantu' Dios, zu' xabáa,

gaca lá'azxa Lau' Lue'.

Gudá nna be'u.

Gaca ca dxaca lazru' lu xezr la xu, ca da dxaca xabáa.

<sup>3</sup> Benna cheentu' da gáguntu' na'a zra.

<sup>4</sup> Bnite lau dul-la cheentu' ca dxunite launtu' chee benne' ca' dxelune' cheentu' da caléla.

Quebe gu'u lataj da xriwe' cu'u na netu' neza chee na, na' bselá netu' lu na' da caléla.

<sup>5</sup> Nadxa Jesús guzre' benne' ca':

—Che tu benne' ládujla le'e zua tu ljwezre', na' che zrine' lizre benne' ljwezre' na' dxéla, ne xé'e le': “Bi ljwezra', guleaj neda' chunna xeta xtila

<sup>6</sup> lawe' da zua tu bi ljwezra' za belá'tébe' lizra', na' quebe bi de' chia' gugawa'-be'.” <sup>7</sup> ¿Wechebe benne' ljwezre' na', benne' xu'u lu xu'u: “Quebe

gunu' neda' zede. Naxe xuj dxa xu'u chia', na' bi chia' zaj debe' nigá.

Quebe gaca chasa' bi gunna' chiu'?” <sup>8</sup> Neda' dxapa' le'e, lácala quebe chase' bi gunézruje' le' lawe' da naque' ljwezre', san chase' chee québedxa

guné' le' zede, na' gunézruje' le' ca naca da nachínnene'. <sup>9</sup> Caní dxapa' le'e:

Le naba, na' Dios gunné' cheele.

Le xexilaj, na' xezrélele.

Le nne dxu'a dxa xu'u, na' xalaj cheele.

<sup>10</sup> Ca' naca na, lawe' da benne' dxenabe', na' si'e, ne benne' dxexílaje', na' xezrélene', ne benne' dxenné' dxu'a dxa xu'u, na' xalaj chee'.

<sup>11</sup> Che tu benne' ládujla le'e naque' xra xrna', ¿waca gunézruje' zrí'ing' tu xiaj che nábabe' tu xeta xtila? ¿Waca gunézruje'-be' tu belá' che nábabe' tu

bela? <sup>12</sup> ¿Waca gunézruje'-be' tu bexrujni che nábabe' tu zrita? <sup>13</sup> Che le'e nácale benne' wen da caléla, na' nézele gunézrujele da chawe' chee zrí'inele,

¿quebe nácadxa Xrale zua xabáa li lazre' chee gunné' chee nu benne' nabe' Be' Lá'azxa?

*Dxelenné' napa Jesús xel-la dxenná bea cheę da xriwe'*

*(Mt. 12.22-30; Mr. 3.19-27)*

<sup>14</sup> Tu zra Jesús bebéaje' be' xriwe' lu xichaj lázrdau tu benne', da nucá'ana na le' quebe dxaca nnie', na' gate bedxúaj be' xriwe' na', na' benné' bénnea'. Na' benne' ca' belexebánene' cheę da nigá. <sup>15</sup> Na' bal-le' gulenné':

—Benne' nigá dxebéaje' be' xriwe' ca', dxuchínene' xel-la dxenná bea cheę Beelzebú, xrane be' xriwe' ca'.

<sup>16</sup> Xebal-la benne' gulaca lazre' gulé'e Jesús xel-la waca cheę', na' gulenabe' Le' guné' tu xel-la waca da za xabáa. <sup>17</sup> Le' nézene' ca da dxelaca lazre', na' guzre' benne' ca':

—Che benne' zaj zre'e tu xezre xelaque' chupa la'a, ne xeledil-le', wabía xi' xezre na', na' che benne' tu lu xu'u xelaque' chupa la'a, cá'anqueze welebía xi' benne' ca'. <sup>18</sup> Cá'anqueze, che da xriwe' ca' xelaca na chupa la'a, ¿ájazra xegá'ana xel-la dxenná bea cheę na? Da nigá dxapa' le'e lawe' da dxennéle dxebéaja' be' xriwe' ca', dxuchíneda' xel-la dxenná bea cheę Beelzebú da xriwe'. <sup>19</sup> Che caní naca na, ¿nuzra dxunezruj xel-la dxenná bea benne' ca' dxusédele le'e cheę xelexebéaje' be' xriwe' ca'? Cheę le' na', benne' caníqueze dxululé'eng' dxeque zréajele. <sup>20</sup> Na'a che neda' dxebéaja' be' xriwe' ca', dxuchíneda' xel-la dxenná bea cheę Dios, da li xel-la dxenná bea cheę Dios ba bla' na ládujla le'e.

<sup>21</sup> 'Che tu benne' wal-la nape' da guchínene' lu wedil-la, ne dxuxúequeze' lizre', na' da zra lizre' napa chi'e na. <sup>22</sup> Che za' xetú benne' nácadxé' wal-la ca le', ne dxucul-le' le', nádxa que'e ca naca da dxuchínene' lu wedil-la, da na' dxuxrén lazre', na' quisie' da gudapa bénnea'.

<sup>23</sup> 'Benne' quebe zu'e gácalęę' neda', dxedábaguę' neda', na' benne' quebe dxexeque'e nen neda' dxúsela bénnea'.

*Be' xriwe' da dxexezrín na lizre na*

*(Mt. 12.43-45)*

<sup>24</sup> Gunná Jesús:

—Gate tu be' xriwe' dxedxuaj na lu xichaj lázrdau tu benne', dxedá na lataj naga nabizre dxexilaj na naga sua na xezí' lazre' na, na' gate quebe dxezrele na, na' dxenná na: “Wexá'a lizra' naga bezá'a.” <sup>25</sup> Gate xezrín na, na' le'e na bénnea' naque' ca tu xu'u da nalúa lu'ule na, ne nabá'ate na. <sup>26</sup> Nádxa zexiáj na, zeajxezrí na xegazre be' xriwe' da zaj nácadxa na xriwe' ca le' na, na' ca naca da ca' xelú'u na xelezúa na lu xichaj lázrdau bénnea', na' naga cheajsetę cheę benne' na' nácadxa da caleļa cheę' ca da guca cheę' nédxula.

*Da ba neza cheę bénneache da naca na li lazre'*

<sup>27</sup> Dxácate Jesús dxenné' da caní, tu nu'ula ládujla benne' ca' gunné' zizraj:

—Ba neza zrentę naca na cheę nu'ula na' guzane' Lue', ne bsegule' Lue'.

<sup>28</sup> Na' gunná Jesús:

—Ba neza zrendxa naca na cheę benne' ca' dxelenęę' ca da dxenná Dios, ne dxune' ca dxenná dizra' na'.

*Dxelenabe' Jesús guné' tu xel-la waca da za xabáa*

*(Mt. 12.38-42; Mr. 8.12)*

<sup>29</sup> Benne' ca' ne zaj zre'e cuita Jesús, na' Le' guzú lawę' dxuchálajlene' le', gunné':

—Benne' zaj zře'ę lu zra caní zaj naque' benne' wen da caleła, na' dxelenabe' neda' guna' tu xel-la waca da za xabáa, na' québedxa bi xeledé'ene' ca da ble'e Jonás, bénnea' bchálaje' waláz cheę Dios. <sup>30</sup> Ca guca cheę Jonás, guque' tu da ble'e na benne' gulezřé'ę lu xezre Nínive, cá'anqueze neda', Benne' Gulje' Bénneache, gaca' tu da gulé'e na benne' zaj zře'ę lu zra na'a zra. <sup>31</sup> Lu zra guchi'a Dios, gate Dios guchi'ę cheę benne' zaj zře'ę lu zra na'a zra, na' chasa nu'ula na' gunná bé'ene' xęzr la xu da zua chalá'a naga dxedé gubizra beu' zaga ca', na' gulé'ene' zaj nabaga zria benne' caní, lawe' da nu'ula na' guzé'ę zítu'tę cheę xenne' ca naca xel-la sina cheę Salomón, na' nigá zua tu Benne' nácadxę' blau ca Salomón na'. <sup>32</sup> Lu zra guchi'a Dios, gate Dios guchi'ę cheę benne' zaj zře'ę lu zra na'a zra, na' xelase' benne' ca' gulezřé'ę xezre Nínive, na' xululé'ene' zaj nabaga zria benne' caní, lawe' da benne' ca' gulezřé'ę xęzre Nínive belexebí'i lazre' gate Jonás bchálajlene' benne' ca' xrtizra' Dios, na' nigá zua tu Benne' nácadxę' blau ca Jonás na'.

*Da dxusení' lu xichaj lázrdaudxu*  
(Mt. 5.15; 6.22-23)

<sup>33</sup> Gunná Jesús:

—Netú benne' che dxugale' xi' cheę', quebe guzúe' na tu naga nagache, ne quebe gudusie' na tu xi'ina, san guzúe' na sibe cheę xeledé'e benne' ca' xelu'e lu xu'u na'. <sup>34</sup> Xiaj laudxu zaj naca na ca tu xi' da dxusení na lu xichaj lázrdaudxu. Che xiaj lau' zaj naca na chawe', ca naca xichaj lázrda'u xu'u na lení', na' che xiaj lau' quebe zaj naca na chawe', na' xu'u da chul-la lu xichaj lázrda'u. <sup>35</sup> Bxue xanne' ca naca xi' da napu' cheę quebe xexaca na da chul-la. <sup>36</sup> Che ca naca xichaj lázrda'u xu'u na lení', na' quebe bi xu'u da chul-la, na' le'enu' chawe' xúgute ca dxaca gate tu xi' dxusení na lizru'.

*Jesús dxedil-le' benne' xudau' ca'*  
(Mt. 23.1-36; Mr. 12.38-40; Lc. 20.45-47)

<sup>37</sup> Gate beuzre bchalaj Jesús, na' tu benne' xudau' fariseo gunné' Le' cheajtawe' xeta lizre'. Na' guxú'u Jesús, gudxé'ę dxawe'. <sup>38</sup> Na' benne' fariseo na' bebánene' gate blé'ene' Jesús quebe gudibe ne'ę ca da zjácalle benne' judío gate dxelawe' xeta. <sup>39</sup> Xránadxu guzre' le':

—Le'e, benne' fariseo, dxíbele cúzrela zřiga', ne xé'ena, san lu'ule na, nazrátęle ca naca da ba gulanle, ne da caleła da dxunle. <sup>40</sup> Le'e, benne' lázrdau zide', ¿quebe nézele Bénnea' bene' da zua cúzrela bęnqueze' da zua lu'ula? <sup>41</sup> Le gunezruj benne' xache' ca' cheę da nápaie, na' ca nácale xegá'anaie chawe'.

<sup>42</sup> 'jEdxugúa le'e, benne' fariseo ca! Le'e dxunézrujle Dios tu cue' cheę da chi cue' cheę xixru weaj, ne cheę binne cheę ruda, ne cheę xúgute xixre' cuan, san dxuzúale chalá'ala ca naca xel-la wen xrlátaje, ne xel-la zri'i lazre' cheę Dios. Da caní dxal-la' gunle, ne quebe gusanle ca da ba dxunle.

<sup>43</sup> 'jEdxugúa le'e, benne' fariseo ca! Dxaca lázrele gápale lataj blau naga cue'le lu xu'u naga dxezřágale, ne dxaca lázrele xelapa benne' le'e ba lá'ana lawe' xi'a ca'.

<sup>44</sup> 'jEdxugúa le'e, benne' dxuluxuzájla'a da nadxixruj bea na, ne le'e, benne' fariseo ca, benne' dxelúne' láweze da xrlátaje! Nácale ca xędxu ba ca' da quebe zaj nalá', na' benne' ca' dxeledéę' lówela na, ne quebe zaj nézene' da dxululéaje'.

45 Nadxa gunná tu benne' dxuxuzájle'ē da nadxixruj bea na, guzre' Jesús:

—Benne' Wesede, gate dxennáu' da nigá, dxennéteu' ca' cheentu'.

46 Na' Jesús gunné':

—jEdxugúa le'e, benne' dxuluxuzájle'ē da nadxixruj bea na! Dxugúale bēneache xua da quebe xezezuéne', na' le'e netú zrube názele quebe dxaca lázrele gutale na.

47 'jEdxugúa le'e! Dxunle lu'a chee ba ca' chee benne' ca' buluchálaje' waláz chee Dios, benne' ca' belute xra xrtáule. 48 Ca da dxunle dxulé'e na nácale tuze nen da belún xra xrtáule ca'. Benne' ca' belutiē' le', na' le'e dxunle lu'a chee ba chee' ca'.

49 'Chee le' na' gunná Dios lu xel-la sina chee', gunné': "Wasel-la' naga zaj zra' benne' ca' benne' xelenné' waláz chia', ne gubáz chia' ca', na' bal-le' xelútiē', na' xebal-le' xeláu zi' xúzrequeze' le'." 50 Dios gusebague' benne' zaj zre'ē lu zra na' a zra ca naca xel-la gute chee xúgute' benne' ca' gulenné' waláz chee', benne' gulatiē' lu na' benne' ca' zaj zre'ē gate bente' xezr la xu, 51 gate na' tu benne' bētiē' Abel, zri'ine Adán, ca bzrinte zra belutiē' Zacarias gachaj lávela naga zua lucugu, ne naga zua lataj lá'azxa. Ca'an dxapa' le'e, Dios gusebague' benne' zaj zre'ē lu zra na'a zra xel-la gute chee' benne' ca'.

52 'jEdxugúa le'e, benne' dxuluxuzájla'a da nadxixruj bea na! Xu'u lu na'le ca naca zren xia chee dxa xu'u naga za xel-la sina, san le'e quebe dxu'ule, ne quebe dxuele lataj xelú'u benne' dxelaca lazre' xelu'e na'.

53 Gate Jesús guzre' benne' ca' da caní, na' benne' ca' dxuluxuzájle'ē da nadxixruj bea na, ne benne' fariseo ca' belezrá'ale'ē Le', na' gulezú lawe' dxelune' Le' zede, na' da zante da buluchebe' Le', 54 na' buluzuzre' che bi nna Jesús chee xezezéquene' xelagu zrie' Le'.

## 12

*Jesús dxenné' ca naca chee da naca xrlátaje láweze*

1 Ca lu zra na' belezraga zane gaxúa benne' ca', na' dxululéajte ljwezre'. Na' guzú lau Jesús dxē'ē benne' ca' dxusēdenē':

—Le guxúe xanne' cuínale ca naca cua zichaj chee xeta xtila chee benne' xudau' fariseo ca', da naca na da dxulé'e na láweze da xrlátaje chee benne' ca'. 2 Quebe bi de da dxundxu bagácheze da quebe gulé'e lawe', ne quebe bi de da nagache da quebe nu neze. 3 Chee le' na', xúgute' da gunle lu da chul-la, xululé'e lawe' te zra, na' da gunle bagácheze lu xu'u naga naxézxujte dxa xu'u, wénqueze na lau xúgute' bēneache.

*Nu dxal-la' zrébedxu  
(Mt. 10.28-31)*

4 Na' gunná Jesús:

—Dxapa' le'e, bi ljwézra'du ca', quebe dxal-la' zrébele benne' dxelute bēla' dxen chee bēneache, san gate te na', québedxa xezezéquene' bi xelune'. 5 Na'a dxapa' le'e nu dxal-la' zrébele. Le zrebe Bēnea' gate te xequē'e xel-la nabán chee bēneache, nape' xel-la dxenná bea gudē'e bēneache ca' lataj ba xa'. Awe', Le' le zrebe.

6 'jQuebe ta'u gazxu' bxínnedau' lawe' chupa dumí lásedau'? Dios quebe dxal-la lazre' netú bxínnedu ca'. 7 Cá'anqueze xicha xíchajle le'e xúgute' na zaj nababa na lau Dios. Chee le' na' quebe zrébele. Zácadxale le'e ca be zante bxínnedu ca'.



*Benne' dxelexechebe' zaj naque' chee Jesús*

*(Mt. 10.32-33; 12.32; 10.19-20)*

<sup>8</sup> Na' gunná Jesús:

—Dxapa' le'e, xúgute benne' xelexechebe' zaj naque' chia' neda' lau bénneache, cá'anqueze neda', Benne' Gulje' Bénneache, xechébequeza' chee benne' ca' lau gubáz chee xabáa ca' chee Dios, <sup>9</sup> san benne' ca' quebe xelexechebe' chia' lau bénneache, néda'queza' quebe xechéba' chee' lau gubáz chee xabáa ca' chee Dios.

<sup>10</sup> 'Che nu benne' bi nnie' chia' neda', Benne' Gulje' Bénneache, gunite lau Dios chee', na' benne' nnie' chee' Be' Lá'azxa, quebe gunite lau Dios chee' bénnea'.

<sup>11</sup> 'Gate xeleché'e le'e lau benne' xíchaje chee' xudau', u lau benne' dxuchi'e da dxaca, u lau benne' xu'u lawe', quebe cue'le gunne xue bi xechébele u bi nnale, <sup>12</sup> lawe' da gate zrin zra dxal-la' nnele, Be' Lá'azxa gulé'ene' le'e da dxal-la' nnele.

*Da stebe chee' xel-la' gunní'a*

<sup>13</sup> Tu benne' ládujla benne' ca' guzre' Jesús:

—Benne' Wesede, guzre bi bicha' gúnnabe' chia' da xexal-la' chee' da guca chee' xrantu'.

<sup>14</sup> Jesús guzre'-be':

—Benne', ¿zua nu bzua neda' ca benne' dxuchi'e da dxaca u ca benne' le'e xezr la xu?

<sup>15</sup> Nadxa guzre' benne' ca':

—¡Le na' xque! ¡Le guxúe xanne' cuínale chee' quebe gucúdele! Xel-la nabán chee' nu benne' quebe zua na lu da nápalé'e.

<sup>16</sup> Nadxa bchalaj Jesús da dxulé'e nigá, gunné':

—Guzúa tu benne' gunní'a, na' xezr la xu chee' bnézrujle'e na. <sup>17</sup> Na' benne' gunní'a na' guzú lawe' dxenné': ¿Bizra guna'? Québedxa de naga guzrá'a lina chia' nigá. <sup>18</sup> Nadxa dxenné': “¡Ba nezda' ca da guna'! Guchínnaja' naga dxezrá' lina chia', chee' guna' da zrí'adxá, na' guzrá'a na' ca naca lina chia' nigá, ne ca naca da ba napa'. <sup>19</sup> Nadxa nníqueza' néda'queza': Ba délé'e chiu' da zante chee' zane' iza. Bezí' lazre'. Güe'e gudagu, ne gubé.” <sup>20</sup> Na' Dios guzre' bénnea': “Lue', benne' zide', lu zre' na'a zre' gatiu', na' da nuzrá' chawu', quebe nézenu' nu chee' gaca na.”

<sup>21</sup> Ca'an dxaca chee' benne' dxutupe' xel-la gunní'a da gaca cheéqueze'. Naque' ca tu benne' xache' lau Dios.

*Dios dxuxúe' bi chee' ca'*

*(Mt. 6.25-34)*

<sup>22</sup> Ca gudé na', Jesús guzre' benne' ca' dxusédene':

—Dxapa' le'e, quebe cue'le gunne xue ca naca da gágule chee' gaca banle, ne ca naca zra lánale da gácule. <sup>23</sup> Xel-la nabán chee'le zácadxa na ca da gágule, na' bel-la' dxen chee'le zácadxa na ca zra lánale. <sup>24</sup> Le nna'xque ca dxaca chee' bxínnedu ca'. Quebe dxelázaba', ne quebe dxelelápaba', ne quebe zaj zua naga dxuluxuzraba', na' Diósqueze' dxuxi'aj dxugawe'-ba'. Zácadxale le'e ca bxínnedu ca'. <sup>25</sup> ¿Núlale le'e séquele gusetunna cuínale xetú ben lawe' da dxebe'le'ele gunne xue? <sup>26</sup> Che quebe gaca gunle tu da naca da dauze, ¿bizr chee' na' dxebe'le gunne xue chee' da ca' xezícala?

<sup>27</sup> 'Le nna'xque ca dxelegula xiaj xrtandu ca'. Quebe dxelún na zrin, ne quebe dxelún na du ladxe', na' dxapa' le'e, wenná bea Salomón quebe

gucue' da xrtandxa ca tu xiajdu caní. <sup>28</sup> Che Dios dxugacue' caní xixre'du ca', da zaj zua na'a le'e xixre', na' wxre xelezxe na, ¿quegá gundxe' cheele le'e, benne' dxeléajle'e láteze chia'? <sup>29</sup> Chee le na', quebe cue'le gunne xue ca naca da gágule, u ca naca da xí'ajle, ne quebe súaale stebe. <sup>30</sup> Ca' naca na, lawe' da ca naca benne' ca' zaj zre'e xezr la xu dxelxíajle' ca naca da caní, san le'e, zua Xrale xabáa ba nézene' nachínnele ca naca da caní. <sup>31</sup> Le cue' gunne xue nna bea Dios lu xichaj lázrdaule, na' sile ca naca da caní.

*Da gunní'a da dxegú'u cháwedxu xabáa*

*(Mt. 6.19-21)*

<sup>32</sup> Na' gunná Jesús:

—Quebe zr'ébele, zríla'du chia', bábaze nácale le'e. Xrale Dios dxezaca ba lazre' gunne' cheele lataj naga dxenná be'e. <sup>33</sup> Le gute da nácale, na' le gunezruj benne' xache' ca'. Ca'an gaca, guzrale na naga quebe te chee na, na' gápale da gunní'a xabáa da quebe xedú, naga quebe gaca chu'u gubán, ne quebe gaca xelú'u béadu ca' xuluteba' na. <sup>34</sup> Naga nuzúale xel-la gunní'a cheele, na' súaqueze lázrdaule.

*Dxal-la' gupá'a cuínadxu*

<sup>35</sup> Na' gunná Jesús:

—Le gupá'a cuínale, ne le gugala xi' cheele. <sup>36</sup> Le gaca ca benne' wen zrin ca' dxelebeze' xrane' xezrine' lu laní chee wechaga na', na' nne' dxu'a dxa xu'u na'. <sup>37</sup> Ba neza zrente naca na chee benne' wen zrin ca', benne' ca' xedajxraca xrane' le' dxelenaze' gate xezrine'. Da li dxapa' le'e, xrane' na' cueche' benne' ca' xelawe', na' guzúa cuine' chee que'e da xelagu benne' wen zrin ca'. <sup>38</sup> Lácala xezrine' dxela u dxaní'sise', che xedajxraqe' le' dxelennaze', ba neza naca na chee benne' wen zrin ca'. <sup>39</sup> Dxal-la' nézele da nigá, che xrane xu'u gunézene' bi zra zrin gubán, na' quebe gasie' chee quebe gu'e lataj quíduje' lizre' chee cuane' da nape'. <sup>40</sup> Cá'anqueze le'e, le sua ban lazre', lawe' da gate québela nézele, xelá'a neda', Benne' Gulje' Bénneache.

*Benne' wen zrin li lazre', ne benne' wen zrin quebe naque' li lazre'*

*(Mt. 24.45-51)*

<sup>41</sup> Nadxa Pedro bchebe' Jesús:

—Xran, ¿bchálaju' da dxulé'e nigá chee netu'ze, che chee xúgutę benne'?

<sup>42</sup> Xránadxu gunné':

—¿Nuzra naca wen zrin li lazre', bënnea' dxucá'ana xrane' lu ne'e benne' zaj zra' lizre' chee gunézruje' da xelagu benne' ca' gate zrin zra chee na? <sup>43</sup> Ba neza naca na chee benne' wen zrin na', gate xezrín xrane', xedajxraqe' le' dxune' ca da nabague'. <sup>44</sup> Da li dxapa' le'e, xrane' gucá'ane' lu ne'e xúgutę da nape'. <sup>45</sup> Che benne' wen zrin na' dxéquene' wazré xrane' xel'é'e, ne su lawe' gusaca zi'e benne' wen zrin xezica ca', ne nu'ula wen zrin ca', ne su lawe' xi'aj gawe', ne súzrene', <sup>46</sup> nadxa xrane' xel'é'e lu zra quebe dxebeze' le', ne lu zra quebe nézene', na' gusaca zí'le'e le', ne chugue' chee' saque' ca xelezaca benne' ca' quebe zaj naque' chee Dios.

<sup>47</sup> Benne' wen zrin na' nézene' ca da dxaca lazre' xrane' san quebe nucueze', ne quebe dxuzúe' dizra', benne' nigá gudé' le' ba xa'. <sup>48</sup> Benne' wen zrin na' quebe nézene' da na', ne dxune' da dxusebaga na le' zria, benne' nigá té'e láteze xel-la zi'. Che tu benne' dxezí'le'e da dxunezruj

Dios le', Dios wanábale'ē le, na' bēnnea' Dios nuxrén lazre' le' da zrente, Dios wanné xúle'ēne' le'.

*Dxelaca benne' chupa la'a ne chee Jesús*

(Mt. 10.34-36)

<sup>49</sup>Na' gunná Jesús:

—Neda' bla'a guzrena' xi' lu xęzr la xu nigá, na' la guzreda' ba dxala xi' na'. <sup>50</sup>Dxal-la' chu'a lu xel-la gute ca dxu'u tu benne' lu nisa gate dxedxúe' nisa, na' téle'a xel-la zi' cadxa gácatequeze na. <sup>51</sup>¿Dxéquele le'e za' neda' cu'a xel-la dxebeza zri lazre' lu xęzr la xu nigá? Dxapa' le'e: Cabí. Za'a chee guna' benne' chupa la'a. <sup>52</sup>Na'a su lau, gazxu' benne' zaj zre'ē tu xu'u xelaque' chupa la'a. Chunne' xeledábage' chupe', na' chupe' xeledábage' chunne'. <sup>53</sup>Xra tu bi biu tábage' bi biu chee', na' bi biu na' tábagabe' xrabe'. Xrna tu bi nu'ula tábage' bi nu'ula chee', na' bi nu'ula na' tábagabe' xrnabe'. Tau zri'ine tu nu'ula tábage' zru'a lizre', na' zru'a lizre' na' tábage' tau zrí'ine'.

*Da dxululé'e na ca da gaca lu zra na'a zra*

(Mt. 16.1-4; Mr. 8.11-13)

<sup>54</sup>Na' Jesús guzre' benne' ca':

—Gate le'e dxelé'ele da' beuj naga dxebía gubizra, na' dxennale, waca xiuj, ne ca' dxaca. <sup>55</sup>Gate dxaca be' za na chálá'a naga dxedé gubizra beu' zaga ca', na' dxennale waca da la, ne dxaca ca'. <sup>56</sup>Le'e, benne' dxunle láweze da xrlátaje. Le'e nézele nnale ca da gaca zran xabáa, ne lu xęzr la xu nigá, san quebe dxezéquele xuzájla'ale da dxululé'e na ca gaca chee'le lu zra na'a zra.

*Dxal-la' xezúadxu lu xel-la dxebeza zri lazre' nen benne' dxedábage' dxi'u*

(Mt. 5.25-26)

<sup>57</sup>Na' gunná Jesús:

—¿Bizr chee na' quebe dxeque be'ele da naca xrlátaje? <sup>58</sup>Che nu benne' dxaca lazre' guzúe' lue' lau benne' dxuchi'e, na' gate chéajlenu' le' chee zrinle lau bēnnea', ben ba xen xezú' lu xel-la dxebeza zri lazre' nen bēnnea' dxácatē xu'ule neza, chee quebe che'ē lue' lau bēnnea', na' bēnnea' gudé' lue' lu na' benne' gusézxuje' lue' lizre xia. <sup>59</sup>Dxapa' lue' quebe xedxúaju' na' cadxa quízruju' ca da dxebagu'.

## 13

*Dxal-la' xelexebí'i lazre' bēnneache*

<sup>1</sup>Ca lu zra na' belezrín bal-la benne' lau Jesús, na' buluzenne' Le' ca ben Pilato, betiē' bal-la benne' Galilea, na' bchague' dxen chee benne' ca' nen dxen chee be' xixre', bea ca' ba belutiē' chee xuluzríe' dxen chee na lau Dios. <sup>2</sup>Na' Jesús guzre' le':

—¿Dxéquele le'e caní gulezaca benne' ca' lawe' da zaj nácadxe' benne' dul-la ca benne' ca' xezícala zaj zre'ē xęzre ca' zaj nababa Galilea? <sup>3</sup>Dxapa' le'e: Cabí, na' che quebe xebí'i lázrele le'e, xúgutēle le'e cuía xile. <sup>4</sup>¿Dxéquele le'e benne' chinu chunna ca' gulatīe' gate guzríia cha xu'u sibe le' da nazí le na Siloé zaj nabágadxe' dul-la ca xezícala benne' ca' zaj zre'ē xęzre Jerusalén? <sup>5</sup>Dxapa' le'e: Cabí, na' che le'e quebe xebí'i lázrele, cá'anqueze le'e wabía xile.

*Xaga higo da quebe dxebía na da zixre*

<sup>6</sup>Nadxa Jesús bchálajlēne' benne' ca' da dxululé'e nigá, dxenné':

—Tu benne' zua tu xaga higo chee' zua na lu xezr la xu chee', na' xeajné'e na che zria na, na' quebe bi bezrélene'. <sup>7</sup> Nadxa guzre' benne' dxun zrin lu xezr la xu chee': "Gunná'xque, chun ízate ba bida' dxenná'a che zria xaga nigá, ne quebe bi bezréleda'. ¡Guchugu na! ¿Bizra chee' na' nulán na xezr la xu nigá?" <sup>8</sup> Bénnea' dxun zrin chee' xezr la xu na' bechebe': "Xran, bca'ana na xetú iza na'a. Guzúludxa' zran na, ne cua'a na bebe. <sup>9</sup> Nen da na', gúnnalja na, san che cabí, na' chugu' na."

*Jesús dxexune' tu nu'ula nalegu cuzre'*

<sup>10</sup> Gate naca zra dxulupá'ana judío ca', na' zua Jesús tu lu xu'u naga dxelezraga judío ca' dxusédene' benne' ca', <sup>11</sup> na' zua na' tu nu'ula xu'e we' ba guca chinu chunna iza. Tu be' xriwe' nun na le' cuzru legu, na' quebe dxácaqueze' xelíe'. <sup>12</sup> Gate ble'e Jesús le', na' gunné' le', ne guzre' le':

—Nu'ula, ba bexacu' chee' xízrawe' chiu'.

<sup>13</sup> Nadxa guxrúa ne'e nu'ula na', na' la ná'queze nu'ula na' belite', na' guzú lawe' dxue lá'ane' Dios. <sup>14</sup> Na' benne' xíchaje chee' xu'u na' bzre'e lawe' da bexún Jesús nu'ula na' lu zra dxulupá'ane', na' guzre' benne' zaj zre'e na':

—Xrupa zra dxal-la' gundxu zrin. Lu zra ca' waca xídale xexácale, quegá lu zra dxupá'anadxu.

<sup>15</sup> Nadxa Xránadxu bechebe':

—Le'e, benne' dxelún láweze da xrlátaje, ¿quebe dxesézrele le'e bezre chee' u burro chee' lu zra dxupá'anadxu chjua'le-ba' xelé'ajba' nisa? <sup>16</sup> Nú'ula nigá naque' xrtia Abraham, na' da xriwe' nuchéaj na le' lu xízrawe' nigá ba zeaj chinu chunna iza, na' ¿quebe dxal-la' xebéaja' xízrawe' da nuchéaj na le' lu zra dxupá'anadxu?

<sup>17</sup> Gate gunná Jesús da nigá, xúgute benne' dxeledábague' Le' belexe-dué'eng', na' xúgute benne' xezícadxa gulebene' gate belelé'eng' ca naca da zrente da dxun Jesús.

*Da dxulé'e na ca naca chee' binnedau' chee' mostaza*

*(Mt. 13.31-32; Mr. 4.30-32)*

<sup>18</sup> Nadxa gunná Jesús:

—¿Aja naca xel-la dxenná bea chee' Dios, ne bi gutil-le lébeda' na? <sup>19</sup> Naca na ca tu binnedau' chee' mostaza, tu benne' dxaze' na lu xezr la xu chee', na' dxegula na, ne dxácate na ca tu xaga zren, na' bxinnedu ca' dxuluzríaba' xrú'uneba' lu zruze na ca'.

*Da dxulé'e na ca naca chee' cua zichaj chee' xeta xtila*

*(Mt. 13.33)*

<sup>20</sup> Cá'anqueze gunná Jesús:

—¿Bizra gutil-le lébeda' xel-la dxenná bea chee' Dios? <sup>21</sup> Naca na ca cua zichaj chee' xeta xtila tu nu'ula dxuchague' na chunna xaga de xezaj, na' dxuchazra na ca naca cua na'.

*Dxa xu'u lechide'*

*(Mt. 7.13-14, 21-23)*

<sup>22</sup> Dxácate xu'u Jesús neza zexíaje' xezre Jerusalén, dxusédene' bénneache lu xezre ca', ne xézredu ca' naga dxedé'e'. <sup>23</sup> Na' bchebe tu benne' Le':

—Xran, ¿bábaze benne' xeledá?

Bechebe Jesús:

24 —Le gun ba xuzre chu'ule dxa xu'u lechide', lawe' da dxapa' le'e, benne' zan xelaca lazre' xelu'e na', na' quebe chelezéquene'. 25 Ca te na' chasa xrane xu'u, ne guséxuje' dxa xu'u, na' le'e zrале chالé'ajla nnele dxu'a dxa xu'u na', nnale: "Xran, gusalaj ch'untu'." Na' le' xechebe': "Quebe nezda' ga benne' le'e." 26 Nadxa su láuquezele le'e nnale: "Gü'e gudágulentu' lue', na' lue' bsédenu' lu neza cheentu' ca'." 27 Le' xechebe': "Dxapa' le'e, quebe nezda' ga benne' le'e. Le cuasa cuita' neda', xúgutele le'e dxunle da calela." 28 Na' cuézrele, ne xagu xá'ate lázxale gate lé'ele Abraham, ne Isaac, ne Jacob, ne xúgute benne' ca' gulenné' waláz chee Dios, zaj zu'e naga dxenná bea Dios, na' le'e zrале chالé'ajla. 29 Welelá' benne' zaj zre'e dapa saca chee xezr la xu nigá, na' xelebé'e xelawe' naga dxenná bea Dios. 30 Nadxa bal-la benne' zaj naque' bzébedxa na'a xelaque' benne' blau, na' benne' zaj naque' blau na'a xelaque' bzébedxa.

*Dxebezre Jesús chee xezre Jerusalén*

*(Mt. 23.37-39)*

31 Lu zra ná'queze, belezrín lau Jesús bal-la benne' fariseo ca', na' gulé'e Le':

—Bezá' nigá, lawe' da dxaca lazre' Herodes gutie' Lue'.

32 Jesús bechebe':

—Le hjaca cheajguézrele benne' wilaj lazre' calela na': "Na'a, ne wxre xebéaja' be' xriwe' ca' lu xichaj lázrdau benne' ca', ne xexuna' benne' we' ca', na' wizraj sueda'." 33 Dxun na ba xen chéajlena' neza chia' na'a, ne wxre, ne wizraj, lawe' da quebe gaca gate tu benne' dxenné' waláz chee Dios che quebe xelute benne' Jerusalén le'.

34 "Jerusalén, Jerusalén, le'e na' dxútele benne' dxelenné' waláz chee Dios, ne dxuzríale xiaj benne' gubáz ca' dxesel-la Dios. Zane' lasa guca lazra' gutupa' bi chee ca' ca dxun bedxuj, dxutúpaba' bédxujdu ca' zran xrilaba', san quebe guca lázrele. 35 ¡Le nna'xque, na'a! Lízrele le'e xegá'ana na cá'aze. Dxapa' le'e québedxa xelé'ele neda' ca zrindxa zra nnale: ¡Lá'azxa naca Bénnea' zé'e lu La Xránadxu!"

## 14

*Jesús dxexuné' tu benne' de xi' ca naca bel-la dxen chee'*

1 Tu zra dxulupá'ana benne' judío ca' guxíaj Jesús zeajtawe' lizre tu benne' blau chee benne' fariseo ca', na' benne' fariseo ca' dxuluzuzre' Jesús bi guné'. 2 Zúaqueze lau Jesús tu benne' de xi' ca naca bel-la dxen chee'. 3 Nadxa Jesús bchebe' benne' ca' dxuluxuzájle'e da nadxixruj bea na, ne benne' fariseo ca', gunné':

—¿Waca nu benne' xexuné' benne' we' lu zra dxupá'anadxu, che cabí?

4 Benne' ca' gulezúe' zrize. Nadxa Jesús guqu'é' benne' we' na', ne bexuné' le', na' guzre' le' xexíaje'. 5 Nadxa guzre' benne' fariseo ca':

—¿Núllale le'e, che bezre chee u bia chee bíxreba' tu lu xedxu, quebe xebéajle-ba' zra ná'queze lácala naca zra dxupá'anadxu?

6 Quebe bi guca xelexechebe'.

*Benne' zaj zre'e laní chee wechaga na'*

7 Gate ble'e Jesús ca dxelún benne' ca', dxelebé'e lataj blaudxa ga dxelawe', na' bchálaje' da dxulé'e na, dxenné':

8 —Gate tu benne' dxenné' lue' laní chee wechaga na', quebe cue'u lataj blau, lawe' da che wazá tu benne' nácadxe' blau ca lue', 9 na' bénnea'

gunné' dxúpatēle xidē' xē'ē lue': "Bnezruj lataj nigá benne' nigá." Nadxa gun na ba xen xexíaju' lataj bzébedxa lu xel-la stu'. <sup>10</sup> Na'a, gate nu benne' nne' lue', gudxé'e lataj bzébedxa, cheē gate za bēnea' gunné' lue', wanné': "Bi ljwezra', gudé nigala naga nácadxa blau." Ca'an gaca, xegá'anu' szren lau benne' ca' zaj zré'ē dxelágulēne' lue'. <sup>11</sup> Benne' dxucá'ana szren cuine', wexéxrujla bēnea', na' benne' dxucá'ana baxache' cuine' wegá'ana szrénqueze'.

<sup>12</sup> Nadxa Jesús guzre' benne' na' gunné' Lē':

—Gate gunézruju' tu zruē u tu xrche' quebe nneu' bi ljwezru' ca', ne bi bichu' ca', ne xrtia ljwezru', ne benne' walíizr chiu' ca' zaj nape' da gunní'a, lawe' da benne' caní welennéqueze' lue', na' zrué'equeznu' da xelexexunne' chiu'. <sup>13</sup> Gate dxunu' tu laní, gunné benne' xache' ca', ne benne' zaj nadxugu ni'a ne'ē, ne benne' zrinnaj ca', ne benne' la chul-la ca'. <sup>14</sup> Caní gaca tu da ba neza chiu', lawe' da benne' caní quebe gaca xelexexunne' ca' chiu', na' wazrué'enu' lazru' gate xelexebán benne' xrlátaje ca'.

*Da dxulé'e na ca naca cheē tu xrche' zren*

<sup>15</sup> Gate ben tu benne' dxágulē Lē' da na', na' guzre' Jesús:

—Ba neza zrentē naca na cheē benne' gawe' xeta naga dxenná bea Dios.

<sup>16</sup> Jesús guzre' lē':

—Tu benne' gulu'ē tu xrche' zren, na' gunné' benne' zan. <sup>17</sup> Ca bzrin zra xelawē' xrche' na', gusél-lē' wēn zrin cheē' cheē cheajezre' benne' ca' gunné': "Le da, lawe' da ba nuseni'a da gágudxu." <sup>18</sup> Xúgute' gulezú lawē' dxelenabe' gu'ē lē' lataj quebe xelidē'. Benne' nedxu gunné': "Za bezítea' tu cue' xēzr la xu chia', na' dxal-la' cheajnná' na. Dxata' xueda' lue' si zrenu' chia'." <sup>19</sup> Xetúe' gunné': "Za bezítea' gazzu' cue' bezr chia', na' guxúa' aja xelunba'. Dxata' xueda' lue' si zrenu' chia'." <sup>20</sup> Na' xetúe' gunné': "Za bchágatē na'a, na' quebe gaca xida'." <sup>21</sup> Gate bezrín benne' wēn zrin na', guzre' xranē' ca naca da nigá. Nadxa bzra'a xranē' na', na' guzre' wēn zrin na': "Guxíaj na'a la neza ca', ne neza cheē xēzre nigá, na' xejxri' xúgute' benne' xache' ca', ne benne' zaj nadxugu ni'a ne'ē, ne benne' zrinnaj ca', ne benne' la chul-la ca'." <sup>22</sup> Ca gudé na' gunná benne' wēn zrin na': "Xran, ba bēna' ca gunnáu', na' ne dēdxa lataj." <sup>23</sup> Nadxa gunná xranē' na': "Guxíaj na'a la neza ca', ne neza lásedu ca', na' xejjén ba xen xeelé'ē, cheē cha' lizra' nigá. <sup>24</sup> Dxapa' le'e, netú benne' ca' gunnéa' nédxula quebe xelawē' xrche' chia'."

*Xel-la zi' da te benne' chéajlēne' Jesús*

<sup>25</sup> Benne' zan zjácālēne' Jesús, na' Lē' bexéchaje', na' guzre' benne' ca':

<sup>26</sup> —Che nu benne' zē'ē naga zua', ne quebe guzúe' chalá'ala xre', ne xrne'ē, ne zru'ulē', ne zrí'ine' ca', ne bi biche' ca', ne bi zane' ca', ne xel-la nabán cheē', quebe gaca gaque' neda' tuze. <sup>27</sup> Benne' quebe sá'lēne' neda' lácala dxal-la' te'ē xaga béguaj, quebe gaca gaque' neda' tuze. <sup>28</sup> Che tu benne' ládujla le'e dxaca lazre' gunē' tu xu'u sibe, ¿quebe cue'ē nedxu gunē' xrbaba cheē' che wazúene' xuzrte' na? <sup>29</sup> Che quebe gunē' caní, ne che cueche' lane na, na' ca te na' quebe suene' xuzre' na, na' xúgute' benne' xeelé'ēne' na xelezú lawē' xelún lē' cheē bēnea', <sup>30</sup> na' xelenné': "Benne' nigá guzú lawē' dxune' tu xu'u. Quebe guque' gunē' ca naca." <sup>31</sup> Che tu benne' wenná bea dxal-la' cheajtíl-lalēne' xetú benne' wenná

bea, ¿quebe cue'e gunē' xrbaba chee' che wazúene' nen tu gaxúa gaxúa benne' dxjaque' wedil-la cheajtíl-lalene' bēnea' za' nen chupa gaxúa gaxúa benne' dxjaque' wedil-la? <sup>32</sup> Che quebe séquene', gate benne' wenná bea na' xetú ne ze'e zitu', na' sel-le' gubáz chee' ca' xelenabe' gata' xel-la dxebeza zri lazre'. <sup>33</sup> Ca' naca na, nüteteze benne' ládujla le'e, che quebe gusanē' ca naca da nape', quebe gaca gaque' neda' tuze.

*Zede' da québedxa naca na sna'a*

(Mt. 5.13; Mr. 9.50)

<sup>34</sup> Na' gunná Jesús:

—Zede' naca na da chawe', san che québedxa naca na sna'a, ¿ájazra guchínedxu na? <sup>35</sup> Quebe gaca guchínedxu na, quegá chee' gucá'ana cháwedxu xezr la xu, ne quegá chee' guchíredxu bebe, san dxal-la' chū'unadxu na. Benne' ca' zaj zua nague', dxal-la' xelenne'.

## 15

*Ca guca chee' tu zrila' guníteba'*

(Mt. 18.10-14)

<sup>1</sup> Benne' zante benne' wechizruj waláz chee' Roma, ne benne' dul-la ca' gulebigue' naga zua Jesús chee' xelenne' da dxuchálaje'. <sup>2</sup> Chee' le' na' benne' fariseo ca', ne benne' dxuluxuzájle'e da nadxixruj bea na gulezí tizre' Jesús, gulennē':

—Benne' nigá dxune' tu zren benne' dul-la ca', ne dxágulene' le'.

<sup>3</sup> Nadxa bchalaj Jesús da dxulé'e na, gunné':

<sup>4</sup> —Nu benne' ládujla le'e, che nape' tu gaxúa zrila', na' nite tuba', ¿quebe gucá'ane' xetápalalaj chennu zrila' ca', bea ca' zaj zraba' le'e xixre', na' se'e cheajdílaje' bea na' guníteba' cadxa xezrelne'-ba'? <sup>5</sup> Na' gate xezrelne'-ba', bene', na' xequé'e-ba' xexrúe'-ba' xe'a xene'. <sup>6</sup> Na' ca xezrine' lizre', gutupe' ljwezre' ca', ne benne' walizre chee' ca'. Na' xe'e le': "Le be nen neda', lawe' da bezrelda' zrila' chia' guníteba'."

<sup>7</sup> Na' gunná Jesús, dxē'e benne' ca':

—Cá'anqueze zúale'edxa xel-la dxebé xabáa gate tu benne' dul-la dx-exebí'i lazre', quézcala chee' tápalalaj chennu benne' xrlátaje ca' dx-eléquene' quebe dxun na ba xen xelexebí'i lazre'.

*Ca guca chee' tu dumí da gunite*

<sup>8</sup> Nadxa Jesús bchálaje' xetú da dxulé'e na, dxē'e benne' ca':

—Tu nu'ula nape' chí dumí zaca, na' che nite tu na, nadxa guzúe' xi' chee' chee' gusaní na lu xu'u chee'. Nadxa su lawe' gulúe' lu xu'u chee', xexílaje' bínnalu ca xezrelne' dumí chee' da gunite na. <sup>9</sup> Na' ca xezrelne' dumí na', gutupe' nu'ula ljwezre' ca', ne nu'ula walíaz chee' ca', na' xe'e le': "Le be nen neda', lawe' da bache bezrelda' dumí chia' da gunite na."

<sup>10</sup> Na' gunná Jesús, dxē'e benne' ca':

—Cá'anqueze dxelebé gubáz chee' xabáa ca' chee' Dios gate tu benne' dul-la dxexebí'i lazre'.

*Ca guca chee' zri'ine tu benne' gunítebe'*

<sup>11</sup> Nadxa Jesús bchálaje' xetú da dxulé'e na, dxē'e le':

—Tu benne' zaj zra' chupa bi chee'. <sup>12</sup> Na' bi cuide' chee' gúzrebe' xrabe': "Xrae, bēna chia' da dxal-la' si'a chee' da naca chiu'." Nadxa xrabe' bene' gachaj da bnézruje' cha chee'be' tube', ne xetube'. <sup>13</sup> Ca gudé tu chupa zra, bi cuide' chee' bēnea' btúpabe' xúgute' da naca chee'be', na' guzabe'

zitu', na' bzrinbe' xetú xezr la xu. Na' ben dítajbe' dumí cheebe' lu da calela da benbe'. <sup>14</sup> Na' ca gudache xúgute' dumí cheebe', bzrin tu gubina' lu xezr la xu na', na' lebe' gudunbe'. <sup>15</sup> Nadxa guzabe' xeajtíajbe' zrin gunbe' chee' tu benne' lu xezr la xu na'. Benne' na' gusél-le'-be' le'e xixre' chee' chee' cheajxúebe' cuche chee' ca'. <sup>16</sup> Guca lázrebe' gágube' da calela da dxelagu cuche ca'. Netú benne' quebe bi bnézruje' da gágube'. <sup>17</sup> Nadxa xeajsá lázrebe', dxennabe': "Benne' zante, benne' wen zrin zaj zre'e lizre xra', na' déle'e da dxelawe'. Neda' dxátequeza' xel-la dxedún. <sup>18</sup> Webí'iza' xexá'a naga zua xra', na' xapa' le': Xrae, bena' dul-la lau Dios, ne lau lue'. <sup>19</sup> Québedxa naca chia' gaca' zri'ínu'. Bzua neda' ca tu benne' wen zrin chiu'." <sup>20</sup> Nadxa begú'ube' neza, bezrinbe' lizre xrabe'.

"Tu chi na', ble'e xrabe' lebe' ba zezabe', na' bexache lazre'-be'. Na' guzá chégü'e' xeajchague'-be', na' bnide'-be', ne bnúpete'-be'. <sup>21</sup> Nadxa gunabe': "Xrae, bena' dul-la lau Dios, ne lau lue'. Québedxa naca chia' gaca' zri'ínu'." <sup>22</sup> Na' gunná xrabe', dxé'e benne' wen zrin chee' ca': "Le cueaj zra lana' da zaca, ne le gugacu-be'. Le cu'u tu da naca oro zrube nabe', ne le cu'u xel-la ní'abe'. <sup>23</sup> Le cheajzrí' tu bezre be dxanne, na' gútele-ba'. Gágudxu, ne gundxu laní, <sup>24</sup> lawe' da bi chia' nigá guca cheebe' ca tu benne' ba gute, na' bebanbe'. Gunítebe', na' ba bezrágadxu-be'." Na' gulezú lawe' dxelune' laní.

<sup>25</sup> 'Dxácate' na', zrí'ine' bi waca zúabe' le'e xixre' dxunbe' zrin. Na' chizrela' ca bezrinbe' gagu cuita xu'u lizre xrabe', na' benbe' dxaca willa, ne dxaca wexá'a. <sup>26</sup> Nadxa gunnébe' tu bi wen zrin na', dxé'ebe' lebe': "¿Bi dxaca nigá?" <sup>27</sup> Bi wen zrin nigá cúnabe': "Ba belá' bi bichu', na' xrau' gunná bé'enē' nu gute tu bezre be dxanne, lawe' da belabe' zúabe' zri'a chawe'." <sup>28</sup> Bzra'a bi waca na', na' quebe guca lázrebe' xexú'ube'. Nadxa bdxuaj xrabe', ne guta' xuene' lebe' xexú'ube'. <sup>29</sup> Na' cúnabe', dxé'ebe' xrabe': "Nézqueznu' zane' iza ba bena' zrin chiu', ne cabata' bcha'a lue', na' ne tu lasa quebe ne gunnu' chia' tu chíbudau' chee' guna' tu laní nen ljwezra' ca'. <sup>30</sup> Na'a belá' bi chiu' nigá, bi ba ben dítajbe' dumí chiu', guzúalebe' nu'ula dxeledá zraga ca', na' bete lizu' bezre be dxanne ne chee' lebe'." <sup>31</sup> Nadxa gunná xrabe', dxé'e-be': "Zrí'ina', lue' tu zúalezquezu' nen neda', na' xúgute' da de' chia' naca na chiu'. <sup>32</sup> Na'a dxun na ba xen gundxu laní, ne bedxu, lawe' da bi bichu' gúcabē' ca tu benne' ba gute, ne naca banbe'. Gunítebe', na' ba bezrágadxu-be'."

## 16

*Benne' wen zrin blau quebe naque' xrlátaje*

<sup>1</sup> Nadxa Jesús guzre' benne' ca' dxusédenē':

—Guzúa tu benne' gunní'a, na' zua tu benne' wen zrin blau chee'. Na' bal-la benne' xeajleguezre' le' benne' wen zrin blau na' dxun dítajē' da de' chee' xranē'. <sup>2</sup> Nadxa xranē' gunné' le', ne guzre' le': "¿Bizra da nigá dxelenné' chiu'? Blué'e neda' ca naca chee' zrin dxunu', lawe' da québedxa gaca gacu' wen zrin blau chia'." <sup>3</sup> Nadxa benne' wen zrin blau na' guzú lawe' dxenné' lu xichaj lázrdawe': ¿ájazra guna' na'a, lawe' da xebéaj xrana' neda' lu zrin chia'? Quebe suedá' guna' zrin le'e xixre', ne wedué'eda' naba' guna'. <sup>4</sup> Na'a ba nezda' tu da guna' chee' xelezúa benne' xezezí' lu ne'e neda' gate québedxa de' zrin chia'. <sup>5</sup> Nadxa gunné' tu tu benne' dxelal-le' chee' xranē' na'. Na' bchebe' benne' nedxu: "¿ájatē' dxal-lu' chee' xrana'?" <sup>6</sup> Benne' na' bechebe': "Dxal-la' chee' tu gaxúa zruaga



da za.” Nadxa benne' wɛn zrin blau na' guzrɛ' lɛ': “Nigá dɛ xiche chiu'. Gudx'é bexún xetú na, na' bzuaj na dxebagu' chi xun zruaga ca'.” <sup>7</sup> Gudé na' bchɛbɛ' xetú benne' ca': “¿Gazra lue', ájatɛ dxebagu'?” Na' benne' nigá guzrɛ' lɛ': “Dxebaga' tu gaxúa bzude' zrua' xtila.” Nadxa benne' wɛn zrin blau guzrɛ' lɛ': “Nigá dɛ xiche chiu'. Bɛn xetú na, na' bzuaj na dxebagu' tápalalajze.” <sup>8</sup> Xrane' gúquebe' enɛ' nácale'ɛ sina benne' wɛn zrin blau na' ca bɛnɛ' da ca'.

Nadxa gunná Jesús:

—Ca' naca na, benne' zaj zrɛ'ɛ na'a zra zaj nácadxɛ' sina lu da dxelunɛ' nen le sa' ljwezrɛ' ca', ca zaj naca benne' zaj naquɛ' cheɛ Dios.

<sup>9</sup> Neda' dxapa' le'e, le guchine xel-la gunní'a cheɛ xɛzr la xu nigá cheɛ cha benne' ljwézrele, cheɛ gate te cheɛ xel-la gunní'a na', na' sua nu si' lu na' le'e naga gaca banle chadía chacanna.

<sup>10</sup> Benne' dxuchínenɛ' láteze lu dutɛ xel-la li lazre' cheɛ', cá'anqueze guchínenɛ' tu da zrendxa dutɛ xel-la li lazre' cheɛ', na' benne' quebe naquɛ' li lazre' ca dxuchínenɛ' láteze, cá'anqueze quebe gaquɛ' li lazre' ca guchínenɛ' tu da zrendxa. <sup>11</sup> Ca' naca na, che quebe nácale li lazre' ca dxuchínele xel-la gunní'a cheɛ xɛzr la xu nigá, ¿nuzra guxrén lazrɛ' le'e cheɛ guchínele xel-la gunní'a lí? <sup>12</sup> Che quebe nácale li lazre' ca dxuchínele da naca cheɛ benne' xula, ¿nuzra gunna le'e da gaca cheéquezle?

<sup>13</sup> Quebe gaca tu benne' wɛn zrin gunɛ' zrin cheɛ chupa xrane', lawe' da cuídenɛ' tuɛ', na' xetúɛ' zrí'ine', u gaquɛ' li lazre' nen tuɛ', na' xetúɛ' guzúɛ' chalá'ala. Quebe gaca nu gun zrin cheɛ Dios, ne cheɛ da gunní'a da nape'.

<sup>14</sup> Benne' fariseo ca', benne' dxulucúdeɛ' dumí, ne dxuluzé nague' da dxenná Jesús, belún lɛ' cheɛ'. <sup>15</sup> Nadxa gunná Jesús:

—Le'e dxulé'e cuínale xrlátaje lau bɛnneache ca', san Dios núnbe'ɛ lázrdaule. Da dxeleque bɛnneache naca na xrlátaje, naca na da dxuzúa Dios chalá'ala.

*Da nadxixruj bea na, ne xel-la dxenná bea cheɛ Dios*

<sup>16</sup> Na' gunná Jesús:

—Ca bzrin zra zua Juan gulenná bea da nadxixruj bea na, ne da bulul'é benne' ca' buluchálajɛ' waláz cheɛ Dios. Na'a, ca na'tɛ dxendxu dizra' chawe' ca gaca chú'udxu naga dxenná bea Dios, na' xúgutɛ' benne' dxelunɛ' ba xuzre xelu'ɛ na'.

<sup>17</sup> Waca te cheɛ xabáa, ne cheɛ xɛzr la xu nigá, san quebe te cheɛ tu da naxúaj na lu da nadxixruj bea na.

*Benne' biu dxulusánɛ' nu'ula cheɛ'*

*(Mt. 19.1-12; Mr. 10.1-12)*

<sup>18</sup> Na' gunná Jesús:

—Che tu benne' biu gusanɛ' zru'ule', ne súalɛnɛ' nu'ula xula, benne' biu nigá dxunɛ' dul-la dxáchajne' xrba cheɛ xel-la wechaga na', na' benne' biu zúalɛnɛ' tu nu'ula ba bsan benne' cheɛ' lɛ', benne' nigá cá'anqueze dxunɛ' dul-la dxáchajne' xrba cheɛ xel-la wechaga na'.

*Tu benne' gunní'a, ne tu benne' xache'*

<sup>19</sup> Na' gunná Jesús:

—Guzúa tu benne' gunní'a, gúcuɛ' zra lanɛ' da zaca, ne da zri'a xrtan, na' xúgutɛ' zra bɛnɛ' laní zren. <sup>20</sup> Cá'anqueze guzúa tu benne' xache' lɛ' Lázaro, nazratɛ' wɛ' lu bɛl-la' dxen cheɛ', na' dxeajché'ɛ lu xu dxu'a lizre

benne' gunní'a na'. <sup>21</sup> Benne' xache' nigá guzá lazre' gawe' ca da dx-  
 elexrui zranla ga dxelagu benne' gunní'a na', na' bécudu ca' dxelélé'eba'  
 lu we' ca' chee Lázaro. <sup>22</sup> Bzrin zra gute benne' xache' na', na' belexeché'  
 gubáz chee xabáa ca' le' zeajxezúalene' Abraham lu lataj chawe' chee  
 Dios. Cá'anqueze gute benne' gunní'a na', na' bulucache' le'. <sup>23</sup> Gate benne'  
 gunní'a na' dxezaca zi'e lataj chul-la chee benne' gate, na' guchisa lawe',  
 na' blé'ene' Abraham zue' zitu', ne Lázaro zúalene' le'. <sup>24</sup> Nadxa gudxezre  
 xe'e, gunné': "iXrae, Abraham, bexache lazre' neda', ne gusel-la Lázaro,  
 cheajsebise' tu zrube ne'e, na' xide' xucule' luzra' nigá! Dxezaca zi'a lu  
 xi' nigá." <sup>25</sup> Na' Abraham gunné': "Bi chia', bsa lazre' gúcale'e chawe' chiu'  
 lu xezr la xu, san Lázaro gúcale'e da zi' da xa' chee'. Na'a le' dxezi'e da ba  
 neza nigá, na' lue' dxezaca zi'u na'. <sup>26</sup> Xetú da zua, zua tu chejéa zrente  
 laduj netu' ne le'e. Ca' naca na, che nu benne' zua nigá dxaca lazre' chéajé'  
 naga zu', quebe gaca, ne quebe gaca benne' zua naga zu' xide' naga  
 zúantu' netu'." <sup>27</sup> Nadxa gunná benne' gunní'a na': "Dxata' xueda' lue',  
 xrae Abraham, sel-lu' Lázaro lizre xra', <sup>28</sup> naga zaj zra' gazxu' bi bícha'dau',  
 chee cheajchálajlene'-be', chee quebe xeledá' lebe' nigá xelezaca zi'be'  
 ca dxaca chia'." <sup>29</sup> Abraham gunné': "Zaj nape' da buluzúaj Moisés, ne  
 benne' ca' buluchálajé' waláz chee Dios. Djal-la' xelená' xánnie' da na'  
 naxúaj na." <sup>30</sup> Benne' gunní'a na' bechebe': "Awe', xrae Abraham, san  
 che nu benne' ládujla benne' gate chéajé' cheajchálajlene' le', welexebí'i  
 lazre'." <sup>31</sup> Abraham gunné': "Che quebe xelenne' ca da gulenná Moisés,  
 ne benne' ca' buluchálajé' waláz chee Dios, québequeze xeléajle'e che tu  
 benne' xebane' ládujla benne' gate."

## 17

*Ca naca da dxun na ga nabágadxu dul-la*

(Mt. 18.6-7, 21-22; Mr. 9.42)

<sup>1</sup> Jesús guzre' benne' ca' dxusédené':

—Welezúaqueze da xelún na xelebaga bénneache dul-la, na' edxugúa  
 bénnea' guné' da gun na xebaga benne' xula dul-la. <sup>2</sup> Gácadxa chawe' chee  
 bénnea' che nu guchéaj xiaj xiche lbe', na' chu'e lu nísadau' naga gátete'  
 quézcala guné' da gun na xebaga bidu caní dul-la. <sup>3</sup> Le guxúe xanne'  
 cuínale.

<sup>4</sup> Che le sa' ljwezru' guné' chiu' da calela, bzéajni'ine', na' che xebí'i lazre',  
 bnite lau chee'. <sup>4</sup> Lácala guné' chiu' da calela gazre lasa tu zra, na' gazre  
 lasa xide' xe'e lue': "Dxexebí'i lazra'", dxal-la' gunite lau' chee'.

*Xel-la waca chee xel-la dxeajlí lazre'*

<sup>5</sup> Benne' gubáz ca' chee Xránadxu gulé'e Le':

—Ben ga cheajlí lázredxantu' Dios.

<sup>6</sup> Nadxa gunná Xránadxu:

—Che le'e zrué'ele xel-la dxeajlí lazre', lácala naca na láteze ca tu bínnedu  
 chee mostaza, waca xeje xaga zrente nigá: "Gucuasa nigá, ne xeajsúa lu  
 nísadau'," na' xaga na' guzúa na dizra' cheeje.

*Da dxal-la' gun benne' wen zrin*

<sup>7</sup> Che tu benne' ládujla le'e zua tu benne' wen zrin chee', na' xelé'e le'e  
 xixre' gate te gudé'e beze u guxúe' béadu ca', z'we'e benne' wen zrin na':  
 "Gudé nigala, gudxé'e gagu'?" <sup>8</sup> Cabí, san nne': "Bcuesa da gawa', ne gusí'  
 chawe' le'u chee gaca ca'u chia' da xi'aj gawa'. Te na' waca xi'aj gagu'

lue'." <sup>9</sup> ¿We'e benne' wen zrin na': "Xcalenu'", lawe' da bene' da gunná be'e xranē' le'? Cabí. <sup>10</sup> Cá'anqueze le'e, gate xuzre gunle xúgute da gunná be'e Dios le'e, dxal-la' nnale: "Nácantu' benne' wen zrin quebe bi zaj zaca, lawe' da quebe bi ne guntu' da zrēndxala ca naca da nabágantú'."

*Jesús dxexunē' chi benne' zaj de'e we' guzru'*

<sup>11</sup> Ca zexíaj Jesús zéajē' Jerusalén, gudé'e lu xezr la xu chee xezre ca' zaj nababa Samaria, ne xezre ca' zaj nababa Galilea. <sup>12</sup> Gate bzrinē' tu xézredau', bedajlechaga Le' chi benne' zaj de'e we' guzru', na' belezē' zítu'la, <sup>13</sup> ne gulebezre xē'e, dxelenné':

—Jesús, Benne' Wesēde, bexache lazre' netu'.

<sup>14</sup> Gate ble'e Jesús le', na' gunné':

—Le chjaca le cheajlué'e cuínale lau bxruze ca'.

Dxácatē' zjaque' na', na' belexexaque' chee xízrawe' chee'. <sup>15</sup> Nadxa tu benne' ca', gate guque bé'engē' ba bexaque', na' bebi'e, dxue lá'anē' Dios du lazre'. <sup>16</sup> Bzu zribē' lau Jesús, ne gudíxrujtē' lawē' lu xu, dxē'e Le': "Xcalenu'." Benne' nigá naque' tu benne' Samaria. <sup>17</sup> Nadxa gunná Jesús:

—¿Quegá chiē' na' belexexaque' lu xízrawe' na'? ¿Gazra na' xeguē'? <sup>18</sup> ¿Tuze benne' zítu' nigá belá' güe lá'anē' Dios?

<sup>19</sup> Nadxa Jesús guzre' benne' na' bexaque':

—Bexasa, bexíaj. Ba bexacu' lawe' da guxéajle'u chia'.

*Ca la' xel-la dxenná bea chee Dios*

*(Mt. 24.23-28, 36-41)*

<sup>20</sup> Benne' fariseo ca' buluchēbe' Jesús bátala la' xel-la dxenná bea chee Dios, na' bechebe Le':

—Ca la' xel-la dxenná bea chee Dios quebe naca na da lé'ele. <sup>21</sup> Quegá nu nna: "Nigá zua na", u "Na' zua na", lawe' da ba zua lu'ule le'e xel-la dxenná bea chee Dios.

<sup>22</sup> Nadxa guzre' benne' ca' dxusédene':

—Wazrín zra gate le'e gaca lázrele lé'ele tu zra zua' neda', Benne' Gulje' Bénneache, na' quebe lé'ele na. <sup>23</sup> Che xelenná bénneache, xelē'e le'e: "Nigá zue'", u: "Na' zue'", quebe chéajle, ne quebe gaule benne' ca'. <sup>24</sup> Ca dxējajsúa xesa chalá'a zran xabáa, na' nalá'tēqueze na xechalá'a zran xabáa, ca'an gaca gate xelá' neda', Benne' Gulje' Bénneache, lu zra xelá'a neda'. <sup>25</sup> Nédxula dxal-la' tēle'a xel-la zi', na' benne' zaj zre'e lu zra na'a zra xuluzúe' neda' chalá'ala. <sup>26</sup> Ca guca lu zra gate zua Noé, cá'anqueze gaca lu zra gate xelá'a neda', Benne' Gulje' Bénneache. <sup>27</sup> Lu zra na' zua Noé gulé'aj gulawē', ne buluchaga ne'e, ne bulunézruje' bi nu'ula chee' ca' lu xel-la wechaga na', cadxa bzrin zra guxú'u Noé lu da zren na' da dxedá lawe' nísadau', na' gúcale'e xiuj, na' gulate xúgute benne' ca'. <sup>28</sup> Cá'anqueze guca lu zra zua Lot, gulé'aj gulawē', ne gulá'awē', ne belútiē', na' gulazē', ne belunē' lizre', <sup>29</sup> na' gate Lot bedxúajē' lu xezre Sodoma, na' ca dxaca gate dxaca xiuj, ca'an guca bexruj xi', ne da gache da dxuzéxzēle'e zran xabáa, ne bzria xi na ca naca benne' ca'. <sup>30</sup> Ca'an gaca lu zra xelá'a neda', Benne' Gulje' Bénneache.

<sup>31</sup> Lu zra na', che nu benne' zē' chju'u chee', na' da de chee' zra na lu xu'u chee' na', quebe dxal-la' chu'e cuéajē' na, na' che nu benne' zue' le'e xixre', quebe dxal-la' xezrinē' lizre'. <sup>32</sup> Le cheajsá lazre' ca guca chee' zru'ula Lot. <sup>33</sup> Benne' dxaca lazre' gapa chi'e xel-la nabán chee' gunitiē' na, na' bénnea' wdee' na, wazrué'e bénnea' xel-la nabán.

<sup>34</sup> 'Dxapa' le'e, lu zre na', chupa benne' xelatē' tu zren ga dxelase'. Tue' xeché'ē, na' xetúē' xegá'ane'. <sup>35</sup> Chupa nu'ula xelezré'ē dxelútue'. Tue' xeché'ē, na' xetúē' xegá'ane'. <sup>36</sup> Chupa benne' xelezré'ē le'ē xixre'. Tue' xeché'ē, na' xetúē' xegá'ane'.

<sup>37</sup> Gate belén benne' ca' da nigá, na' buluchebe' Jesús:

—¿Gazra gaca ca', Xran?

Le' bechebe':

—Naga de tu da nate, na' xeledúpaqueze laba ca'.

## 18

*Da dxulé'e na ca naca chee tu nu'ula ba gute benne' chee', ne benne' dxuchi'a da dxaca*

<sup>1</sup> Jesús bchálaje' da dxulé'e na ca naca chee' gusédene' benne' ca' dxal-la' xuluwírajtecaze' Dios, ne quebe xelexebigue'. <sup>2</sup> Na' guzre' benne' ca':

—Tu xezre guzúa tu benne' dxuchi'e da dxaca, na' quebe gudape' ba lá'ana Dios, ne cá'aqueze bénneache. <sup>3</sup> Lu xezre ná'queze guzúa tu nu'ula ba gute benne' chee'. Guxíaje' xejnabe' lau benne' dxuchi'e da dxaca chee' guchi'e da dxaca chee' nen tu benne' dxune' chee' da calela. <sup>4</sup> Zane' lásate' benne' dxuchi'e da dxaca quebe guca lazre' guchi'e chee' nu'ula na', san ca gudé na' gunné' lu xichaj lázrdawe': Lácala quebe dxapa' ba lá'ana Dios, ne cá'aqueze bénneache, <sup>5</sup> san lawe' da nu'ula nigá dxune' neda' zede, guchí'a chaza' da dxaca chee' chee' québedxa xide' gúnle'ē neda' zede.

<sup>6</sup> Na' gunná Xránadxu:

—Caní na' gunná benne' wen da calela na', benne' dxuchi'e da dxaca. <sup>7</sup> ¿Quebe guchi'a Dios da dxaca chee' benne' ca' ba guqué'ē, benne' ca' dxelenné' Le' te zra, ne chizrela? ¿Wazrené' xechebe' chee' benne' ca'? <sup>8</sup> Dxapa' le'e, Le' guchi'e da dxaca chee', ne quebe chené'. Gate xelá'a neda', Benne' Gulje' Bénneache, ¿wazréldxada' tu benne' lu xezr la xu nigá, benne' dxéajle'ē chia'?

*Da dxulé'e na ca naca chee tu benne' fariseo, ne tu benne' wechizruj*

<sup>9</sup> Jesús bchálaje' xetú da dxulé'e na, chee' xelene benne' ca' dxeléquene' zaj naque' xrlátaje, san dxuluzúe' chala'ala le sa' ljwezre'. <sup>10</sup> Gunné':

—Chupa benne' xjaque' xudau' chee' xuluchálajlene' Dios. Tue' naque' benne' xudau' fariseo, na' xetúe' naque' wechizruj waláz chee' xezre zitu'. <sup>11</sup> Benne' xudau' na' guzúe' dxuchálajlene' Dios, gunné': “Dios, xcalenu' quebe naca' ca benne' xula ca', zaj naque' gubán, ne benne' ca' dxelune' da calela, ne benne' dxelún dul-la dxeláchajne' xrba chee' wechaga na', ne quegá ca benne' wechizruj nigá. <sup>12</sup> Neda' dxuna' gubasa chupa lasa da gazre zra, ne dxunna' chiu' tu cue' chee' da chi cue' da dxezi'a.” <sup>13</sup> Benne' wechizruj na' guzúe' dxu'a dxa xú'uze, ne quebe bexazrjne' chisa lawe' xabáa. Béle'ē la chu'e, dxenné': “Dios, bexache lazre' neda', naca' benne' dul-la.” <sup>14</sup> Dxapa' le'e, benne' wechizruj na' bezé'ē xexíaje' lizre', ne bexaque' xrlátaje lau Dios, san quegá caní guca chee' benne' xudau' na'. Ca' guca lawe' da benne' dxucá'ana szren cuine' wexéxrujla bénnea', san benne' dxucá'ana baxache' cuine' wegá'ana szrénqueze bénnea'.

*Jesús dxenabe' gaca chawe' chee' bidu ca'*  
(Mt. 19.13-15; Mr. 10.13-16)

<sup>15</sup> Belezrín benne' ca' zaj naché'e bidu ca' lau Jesús chee guzé ne'e lebe'. Gate belelé'e benne' ca' dxusede Jesús da nigá, na' gulezú lawe' dxeledil-le' benne' ca'. <sup>16</sup> Jesús gunné' benne' ca' dxusedene', na' dxé'e le':

—Le güe lataj xeledá' bidu ca' naga zua', ne quebe guzágale-be', lawe' da benne' zaj naque' ca' bidu caní welexu'e naga dxenná bea Dios. <sup>17</sup> Da li dxapa' le'e, benne' quebe si' lu ne'e nna bea Dios le' ca' dxelún bidu caní, québequeze chu'e naga dxenná bea Dios.

*Tu benne' cuide' naque' benne' gunní'a*

*(Mt. 19.16-30; Mr. 10.17-31)*

<sup>18</sup> Tu benne' xíchaje bchebe' Jesús:

—Benne' Wesede xrlátaje, ¿bi da dxal-la' guna' chee zrué'eda' xel-la nabán zeajlí canna?

<sup>19</sup> Jesús guzre' le':

—¿Bizr chee na' dxennáu' naca' xrlátaje? Netú benne' quebe naque' xrlátaje. Tuze Dios naque' xrlátaje. <sup>20</sup> Lue' núnbe'u ca' zaj naca xrba chee Dios:

Quebe gunu' dul-la da dxachaj na xrba chee wechaga na'.

Quebe gutiu' benne'.

Quebe cuanu'.

Quebe nneu' chee le sa' ljwezru' da quebe naca na.

Gudapa ba lá'ana xra xrna'u.

<sup>21</sup> Benne' na' guzre' Jesús:

—Xúgute' da caní dxuna' ne nácatea' bídaute'.

<sup>22</sup> Gate ben Jesús da nigá, na' guzre'-be':

—Ne dxexárzjenu' xetú da dxal-la' gunu'. Bete ca naca da de' chiu', na' bnezruj na chee benne' xache' ca'. Nadxa gapu' xel-la gunní'a lu xabáa chee Dios. Na' gudá sálenu' neda'.

<sup>23</sup> Gate benne' cuide' na' benne' da nigá, bewí'inele'ene' lawe' da nápalé'e da gunní'a. <sup>24</sup> Gate ble'e Jesús ca bewí'ine benne' na', gunné':

—Stébeté naca chee benne' gunní'a ca' xelexú'e naga dxenná bea Dios.

<sup>25</sup> Chadídxala te tu bea zren lu negue' tu xeche' zriche quegala chu'u tu benne' gunní'a naga dxenná bea Dios.

<sup>26</sup> Na' benne' ca' dxelenne' gulenné':

—Che ca' naca na, ¿núzraqueze la?

<sup>27</sup> Jesús guzre' benne' ca':

—Da quebe gaca xelún bénneache, waca Dios gúnqueze' na.

<sup>28</sup> Na' gunná Pedro, guzre' Jesús:

—Xran, ba bsantu' ca da gudápantu' chee zálentu' Lue'.

<sup>29</sup> Nadxa Jesús bechebe':

—Da li dxapa' le'e, núteteze benne' gusané' lizre', u xra xrne'e, u bi biche', bi zane' ca', u zru'ule', u zrí'ine' ca', chee guné' zrin chee xel-la dxenná bea chee Dios, <sup>30</sup> benne' nigá wazi'e da zrendxa lu xezr la xu nigá, na' lu xezr la xu da za' wazi'e xel-la nabán da zeajlí canna.

*Jesús dxuchálaje' xecha lasa ca gaca gate gatie'*

*(Mt. 20.17-19; Mr. 10.32-34)*

<sup>31</sup> Na' Jesús gunné' chalá'ala benne' chazrinnu ca' dxusedene', na' guzre' le':

—Na'a zexíajdxu Jerusalén, naga gaca li ca naca da buluzúaj benne' ca' buluchálaje' waláz chee Dios ca gaca chia' neda', Benne' Gulje' Bénneache.

32 Benne' zaj zre'e Jerusalén xuludé' neda' lu na' benne' zitu' ca', na' xelún le' chia', ne xelennéqueze' schanni' chia', ne wuluzráqueze' neda' zrene'.  
 33 Welúequeze' neda', na' te na' xelútié' neda', na' zra guxunne' zra xebana' ládujla benne' gate.

34 Benne' ca' quebe guléajni'ine' da nigá, ne quebe zaj nézene' bi chee' na' dxuchálajlene' le', lawe' da zaj naca da quebe guca xeléajni'iquezne'.

*Tu benne' la chul-la, benne' zue' xezre Jericó*

*(Mt. 20.29-34; Mr. 10.46-52)*

35 Gate Jesús bzrine' gagu naga zua xezre Jericó, na' dxe' tu benne' la chul-la dxu'a neza dxenabe' guna'. 36 Gate benne' dxeledé benne' zante, na' benne' la chul-la na' bchebe' benne' ca' bizra na' dxaca na. 37 Na' gulé'e le':

—Jesús, benne' Nazaret dxedé' nigá.

38 Nadxa gudxezre xa'a la chul-la na', gunné':

—¡Jesús, Zri'ine David, bexache lazre' neda'!

39 Benne' ca' zaj zria lawe' lau Jesús guledil-le' benne' la chul-la na' chee sue' zrize, san gudxezre xá'adxa le', dxenné':

—¡Zri'ine David, bexache lazre' neda'!

40 Nadxa gugá Jesús, na' gunná bé'ene' xeajlexrí'e le'. Gate ble'e lau Jesús, na' Jesús bchebe' le':

41 —¿Bi dxaca lazru' guna' chiu'?

Bechebe la chul-la na':

—Xran, dxaca lazra' xelé'eda'.

42 Jesús guzre' le':

—Gaca ca dxennáu'. Ba bexacu' lawe' da guxéajle'u chia'.

43 Zra ná'queze belé'e benne' la chul-la na', na' guxíajlene' Jesús, dxue lá'ane' Dios. Xúgute' benne' ca' belelé'ene' da nigá cá'anqueze belúe lá'ane' Dios.

## 19

*Jesús dxuchálajlene' Zaqueo*

1 Nadxa Jesús guxú'e xezre Jericó, ne dxedé' xezre na'. 2 Lu xezre na' zua tu benne' gunní'a le' Zaqueo. Naque' xíchajé chee' benne' wechizruj ca'. 3 Benne' nigá dxaca lazre' gúnbe'e Jesús, san quebe guca lé'ene' Le' lawe' da zaj zra' benne' zante na', na' Zaqueo na' quebe naque' benne' tunna. 4 Nadxa guxíaj chégü'e guzrí'a lawe', ne chee' gaca lé'ene' guluéne' tu lu xaga zren da zua gagu naga dxal-la' te Jesús. 5 Gate gudé Jesús na', gunné'e lu xaga na', ne guzre' le':

—Zaqueo, bexétajche, lawe' da na'a dxun na ba xen xegá'ana' lizru'.

6 Nadxa Zaqueo na' bexétajé' chadí, na' nen duté xel-la dxebé guzi' lu ne'e Jesús. 7 Gate belelé'e benne' ca' da nigá, xúgute' gulezú lawe' dxelezi tizre' Jesús, dxelenné':

—Jesús bzrine' begá'ane' lizre tu benne' dul-la.

8 Nadxa Zaqueo na' guzé', na' guzre' Xránadxu:

—Gunná'xque, Xran, gunézruja' benne' xache' ca' gáchajte ca da de chia', na' che nu benne' bsaca zia' le', xunézruja' tapa cue'la chee'.

9 Na' Jesús guzre' le':

—Na'a bla' xel-la weselá lu xu'u nigá, lawe' da nácaqueze benne' nigá xrtia Abraham. 10 Ca' naca na lawe' da bla' neda', Benne' Gulje' Bénneache, chee' xexíajja', ne guselá' benne' ca' zaj nanítie'.

*Da dxulé'e na ca naca chee chi dumí zaca*

<sup>11</sup> Dxácatę na' dxuluzé naga benne' ca' dxenná Jesús da caní, na' bchálaje' tu da dxulé'e na lawe' da ba zuę' gáguze xęzre Jerusalén, na' benne' ca' dxelęquenę' zra ná'queze nna bea Dios lu xęzr la xu nigá.  
<sup>12</sup> Nadxa guzre' benne' ca':

—Guzúa tu benne' gunní'a xrlátaje, na' dxal-la' chéaje' zitu' chee xuluzé' le' gaque' wenná bea, na' te na' xezrine' lazrie'. <sup>13</sup> Gate za se'e, gunné' chi benne' węn zrin chee', na' bnézruje' tu tu benne' ca' tuwéaj dumí zácalę'e, ne guzre' benne' ca': "Le guchine dumí nigá cadxa xelá'a."  
<sup>14</sup> Benne' zaj zře'e lázrie' dxelecuídenę' le', na' gulesel-le' bal-la benne' gubáz chee' naga zéaje' chee' cheajleguezre' benne' zaj zře'e na': "Quebe dxaca lázrentu' gaca benne' nigá wenná bea cheętu'." <sup>15</sup> Buluzúę' le' gaque' wenná bea, na' bezrine' lázrie'. Gate bezrine' gunné' benne' węn zrin ca' bnézruje' dumí, chee' nézenę' ájate bezí' tu tu benne' ca'. <sup>16</sup> Benne' nedxu bzrine' lawe', na' gunné': "Xran, dumí chiu' ba bezí na chi cue'la."  
<sup>17</sup> Wenná bea na' bechebe': "Chawe' benu'. Nacu' węn zrin xrlátaje. Lawe' da gucu' li lazre' lu late' da benna' lue', na'a guna' lue' benne' nna be'ene' chi xęzre ca'." <sup>18</sup> Na' bzrin xetúę' lawe', na' gunné': "Xran, dumí chiu' ba bezí na gazxu' cue'la." <sup>19</sup> Cá'anqueze guzre' benne' nigá: "Lue' gacu' benne' nna be'ene' gazxu' xęzre ca'." <sup>20</sup> Nadxa xetúę' bzrine', na' gunné': "Xran, nigá de dumí chiu'. Bcache chawa'a na tu lu bazxu, <sup>21</sup> lawe' da bzreba' lue'. Nacu' tu benne' dxuzúa xuzre. Dxexeca'u da quebe guxrú', ne dxexelapu' naga quebe guzu'." <sup>22</sup> Nadxa wenná bea na' guzre' le': "Węn zrin caleła. Ca dizra' da gunnéu' chuga' ca gaca chiu'. Che nézquezenu' naca' benne' dxuzúa xuzre, ne xecá'a da quebe guxrúa', ne dxelapa' naga quebe guza', <sup>23</sup> ¿bizr chee' na' quebe xju'u dumí chia' lu na' benne' xuluchínene' na, chee' xezí' lu na'a neda' dumí chia' nen da gun xíchaje na, gate xezrina' neda' lizra'?" <sup>24</sup> Nadxa guzre' benne' ca' zaj zře'e na': "Le xecá'a dumí na' lu ne'e, na' le gunezruj na benne' nape' chi dumí ca'." <sup>25</sup> Benne' ca' gulę'e le': "Xran, ba nape' chi dumí." <sup>26</sup> Na' bechebe' wenná bea na': "Dxapa' le'e, benne' nape' wazidxe' da zrendxa, na benne' quebe nape', wecá'a ca da du nape'. <sup>27</sup> Na'a, ca naca chee' benne' ca' quebe gulaca lazre' gaca' neda' wenná bea chee', le cheajxri'e nigá, ne le gutię' lawa' neda'."

*Jesús dxexu'e Jerusalén*

(Mt. 21.1-11; Mr. 11.1-11; Jn. 12.12-19)

<sup>28</sup> Ca gudé gunné' da nigá, na' bexú'u Jesús neza zexíaje' Jerusalén.  
<sup>29</sup> Gate ba zua xezrine' xęzre Betfagé, ne xęzre Betania, ne zuę' gáguze naga zua Xi'a Xaga Olivo, na' gusel-le' chupa benne' ca' dxusédenę'.  
<sup>30</sup> Guzre' le':

—Le chjaca xęzredu na' zua gáguze, na' ca zrinle na' lé'ele tu burru da'ba' xaga, be netú quebe nu ne cuía leba'. Le sezure-ba', na' le che'-ba' nigá. <sup>31</sup> Che nu naba le'e bizr chee' na' dxesézrele-ba', le xę'e Xránadxu nachínene'-ba'.

<sup>32</sup> Na' gusiá'ca benne' ca', na' belelé'ene' xúgutę naca na ca ba guzre Jesús le'. <sup>33</sup> Na' gate dxelesezure' búrrua', na' xránaba' buluchebe' le':

—¿Bizr chee' na' dxesézrele búrrua'?

<sup>34</sup> Benne' chupa ca' belexechebe':

—Lawe' da nachine Xránadxu leba'.

<sup>35</sup> Na' beleché'ē-ba' lau Jesús, na' belexrúe' xicha chee' cúzrua', na' buluzríe' Jesús cúzrua'. <sup>36</sup> Ca zeaj Jesús, xu'ē neza zriē' búrruda na', na' dxelechiluj benne' ca' xicha chee' la neza naga téē'. <sup>37</sup> Gate bzrine' gagu naga naca létajla chee' Xi'a Xaga Olivo, xúgute' benne' ca' zaj de'ē Le' gulezú lawe' dxelebezre xe'ē lu xel-la dxelebé, ne dxelúe lá'ane' Dios ca naca xúgute' xel-la waca chee' xabáa da belelé'ene'. <sup>38</sup> Gulenné':

—La'azxa naca wenná bea, benne' za' waláz chee' Xránadxu Dios. Gaca xel-la dxebeza zri lazre' da za xabáa, ne gaca ba Dios.

<sup>39</sup> Nadxa bal-la benne' fariseo ca' zaj zra' ládujla benne' ca' gulé'ē Jesús:

—Benne' Wesede, gudil-la benne' caní zaj de'ē Lue'.

<sup>40</sup> Jesús bechebē':

—Dxapa' le'e, che benne' caní xelezúa zriē', xiaj caní xelebezre xa'a na.

<sup>41</sup> Gate bzrine' gagu xezre Jerusalén, ne ca blé'ene' na, na' gudxezre Jesús ca naca chee' na. <sup>42</sup> Na' gunné':

—La chéajni'ile lu zra chee'le nigá da gaca gunna chee'le xel-la dxebeza zri lazre'. Na'a da na' nagache na, na' quebe gaca lé'ele na. <sup>43</sup> Welezrín zra gaca chee'le da zrinnaj, gate benne' dxelecuídenē' le'e xeléchajē' ze'e dxu'a xezre chee'le, ne xuluzague' le'e gáteteze na', <sup>44</sup> na' xuluchínnajē' xezre chee'le. Na' xelútiē' ca naca benne' zaj zre'ē nigá, na' quebe xuluxucá'ane' tu xiaj cuzru ljwezre na. Caní gaca chee'le lawe' da quebe gúquebe'ele zra bla' Dios chee' gácalēne' le'e.

*Jesús dxucá'ana chawe' chale'aj xudau'*

*(Mt. 21.12-17; Mr. 11.15-19; Jn. 2.13-22)*

<sup>45</sup> Nadxa guxú'u Jesús chale'aj xudau', na' guzú lawe' dxebeájē' na' benne' ca' dxelutiē', ne dxelá'awe' na'. <sup>46</sup> Na' guzre' benne' ca':

—Lu xiche chee' Dios dxenné': “Lizra' naca na xu'u naga guchálajlele neda',” na' le'e nunle na ca tu lizre gubán ca'.

<sup>47</sup> Tu zra tu zra Jesús dxusédene' benne' ca' zaj zra' chale'aj xudau'. Benne' xíchajē' ca' chee' bxruze, ne benne' dxuluxuzájle'ē da nadxixruj bea na, ne benne' xu'u lawe' chee' xezre na' dxelíajē' ájala xelune' xelútiē' Le'. <sup>48</sup> Quebe belezrélenē' ájala xelune', lawe' da dxuluzé naga xanne' xúgute' benne' ca' Jesús, chee' xelenne' ca da dxenné'.

## 20

*Ca naca xel-la dxenná bea napa Jesús*

*(Mt. 21.23-27; Mr. 11.27-33)*

<sup>1</sup> Tu zra gate zua Jesús chale'aj xudau' dxusédene' benne' ca', ne dxuchálajle'ne' le' ca naca dizra' chawe' chee' Dios, na' belezrín na' benne' xíchajē' ca' chee' bxruze ca', ne benne' ca' dxuluxuzájle'ē da nadxixruj bea na, ne benne' gula sina ca', <sup>2</sup> na' gulé'ē Le':

—Gunná bi xel-la dxenná bea napu' dxunu' da caní. ¿Nuzra be'na lue' xel-la dxenná bea nigá?

<sup>3</sup> Na' gunná Jesús:

—Cá'anzeze neda' guche'ba' le'e tu. Le xechebe chia'. <sup>4</sup> ¿Nuzra gusel-la Juan guchúē' bēnneache nisa? ¿Dios che bēnneache?

<sup>5</sup> Na' gulezú lawe' dxelé' ljwezre':

—¿Bizra nnadxu? Che nnadxu gusel-la Dios le', na' guchebe' dxi'u: “¿Bizr chee' na' quebe guxéajlele chee'?” <sup>6</sup> Che xedxu Le', bēnneache



gulesel-le' le', benne' zaj zre'e nigá wuluzríe' dxi'u xiaj, lawe' da zaj neze xánnie' bchalaj Juan waláz chee Dios.

<sup>7</sup> Nadxa belexechebe' quebe zaj nézene' nu gusel-la Juan bchue' bénneache nisa. <sup>8</sup> Na' Jesús guzre' benne' ca':

—Cá'anqueze neda' quebe xapa' le'e bi xel-la dxenná bea napa' dxuna' da caní.

*Da dxulé'e na ca naca chee benne' wen zrin calēla ca'*  
(Mt. 21.33-44; Mr. 12.1-11)

<sup>9</sup> Na' guzú lau Jesús dxuchálajle' benne' ca' zaj zre'e na', dxuchálaje' da dxulé'e na, dxenné':

—Guzúa tu benne' bde'e lba uva lu xezr la xu chee', na' ca gudé na' bca'ané' na lu na' benne' wen zrin ca', na' guzé'e na' zane' iza.

<sup>10</sup> Gate bzrin zra xuluchibe' uva ca', na' gusel-le' tu bi wen zrin chee' zeajxenábabe' tu cue' chee' lina na' da dxal-la' xezi'e, san benne' wen zrin ca' buluzálaje'-be', na' belexesel-le'-be' cá'aze. <sup>11</sup> Nadxa xrane lina na' gusel-le' xetú bi wen zrin chee', na' cá'anqueze bi nigá bulucháchalene'-be', ne buluzálaje'-be', na' belexesel-le'-be' cá'aze. <sup>12</sup> Xrane na' gusel-le' xetú bi wen zrin chee', na' benne' wen zrin ca', cá'anqueze belune'-be' zi', na' belexebéaje'-be' lu lina na'.

<sup>13</sup> Naga xeajche'te na, xrane na' gunné': “¿ájazra guna? Sel-la' zri'ina' nazrí'ite lazra'. Gate xeelé'ene'-be' nalja xelape'-be' ba lá'ana.” <sup>14</sup> Na' gate benne' wen zrin ca' belelé'ene'-be', na' gulé ljwezre': “Bi nigá xezi' lu na'be' da de chee' xránadxu. Gútedxu-be', chee' gácadxu xrane na dxi'unqueze.” <sup>15</sup> Nadxa belexebéaje'-be' lu xezr la xu na', na' belutie'-be'.

Nadxa Jesús bchebe' benne' ca':

—¿Bizra gun xrane na' chee' benne' wen zrin ca'? <sup>16</sup> Xelé'e, na' gutie' benne' wen zrin ca', na' gudé'e xezr la xu na' lu na' benne' xula ca'.

Gate belén benne' ca' ca gunná Jesús, na' gulenné':

—Dios quebe gu'e lataj gaca ca'.

<sup>17</sup> Na' Jesús gunné'e benne' ca', na' gunné':

—¿Bizra zéaje da naxúaj na lu xiche chee' Dios? Dxenné' caní:

Xiaj na' da buluzúa benne' wen xu'u ca' chala'ala, le' na' naca na xiaj blau.

<sup>18</sup> Núteteze benne' cheajchazie' lawe' xiaj na', na' chúzrujqueze bénnea', na' che xiaj na' xexruj na lawe' nu benne', gútute na le'.

*Ca naca chee da dxuchizruj xezre zi'tu'*  
(Mt. 21.45-46; 22.15-22; Mr. 12.13-17)

<sup>19</sup> Benne' xíchaje ca' chee' bxruze ca', ne benne' ca' dxuluxuzájle'e da nadxixruj bea na gulaca lazre' xelee' Jesús zra ná'queze, lawe' da guleque bé'ene' bchalaj Jesús da dxulé'e na ca zaj naca le', san belezrebe' da xelún bénneache ca'. <sup>20</sup> Nadxa gulesel-le' benne' ca' xuluzuzre' Jesús, benne' xululé'e cuine' ca benne' xrlátaje ca'. Benne' caní dxelaca lazre' xelebéaje' Jesús dizra' chee' xelezéquene' xuludé'e Le' lu na' bénnea' dxenná be'e. <sup>21</sup> Chee' xelune' da nigá, buluchebe' Le':

—Benne' Wesede, nézentu' dxennáu', ne dxusédenu' da naca li lazre', ne quebe dxuchi'u chee' bénneache cáteze dxululé'e cuine', san lu da li dxusédenu' da naca chee' Dios. <sup>22</sup> Guzre netu', ¿naca na chawe' quízrujdxu da dxuchizruj César, bénnea' dxenná bé'ene' dute' xezr la xu, che cabí?

<sup>23</sup> Dxeque be'e Jesús ca naca da dxelaca lazre' xelune' chee', na' guzre' benne' ca':

—¿Bizr chee na' dxaca lázrele gun xálele neda'? <sup>24</sup> Le gulé'e neda' tu dumí. ¿Nuzra lu'a na' da na nigá, ne nu la naxúaj nigá?

Benne' ca' belexechebe':

—Chee benne' dxenná bea na'.

<sup>25</sup> Nadxa gunná Jesús:

—Le gunezruj bènnea' da naca chee', na' le gunezruj Dios da naca chee Dios.

<sup>26</sup> Quebe gulezéquene' xelún xálene' Jesús ca naca da bechebe' lau benne' ca'. Belexebánene' ca naca da bechebe', na' gulezúa zrie'.

*Ca gaca gate xelexebán benne' gate*

(Mt. 22.23-33; Mr. 12.18-27)

<sup>27</sup> Ca gudé na' bal-la benne' xudau' saduceo ca' belezrine' lau Jesús. Benne' saduceo ca' dxeléquene' quebe xelexebán benne' gate, na' gulé'e Jesús:

<sup>28</sup> —Benne' Wesede, Moisés bzúaje' cheentu' che tu benne' gatie', ne gucá'ane' zru'ule', ne che quebe nu chilá' zrí'ine', na' bi biche bènnea' dxalla' guchaga na'abe' nen nu'ula na' gute benne' chee' chee galaj tu bidau' gácabe' ca zrí'ine bènnea' ba gútee'. <sup>29</sup> Gulezrá' gazre benne' gulaque' zrí'ine tuze xre'. Bi nedxu bchaga na'abe' nen tu nu'ula, na' gútebe', quebe nu chilá' bi cheebe'. <sup>30</sup> Bi gudxupe' bchaga na'abe' nen nu'ula na', ne cá'anqueze gútebe' quebe nu chilá' bi cheebe'. <sup>31</sup> Nadxa bi guxunne' bchaga na'abe' nen nu'ula na', na' cá'anqueze belún bi ca' xezica, na' bi gazre ca' gulátebe' quebe nu chilá' bi cheebe'. <sup>32</sup> Naga xeajche'te na, na' gute nu'ula na'. <sup>33</sup> Gate xelexebán benne' gate, ¿nula bi ca' gaca zrú'ulabe' nu'ula na', lawe' da ca naca bi gazre ca' buluchaga na'abe' nen nu'ula na'?

<sup>34</sup> Nadxa bechebe Jesús:

—Lu xezr la xu nigá dxuluchaga na' benne' biu ca' nen nu'ula ca'. <sup>35</sup> Na' benne' ca' naca chee' xelexexú'e xezr la xu da za za', ne chee xelexebane' ládujla benne' gate, québedxa xuluchaga ne'e, ne québedxa xulunézruje' zrí'ine' lu xel-la wechaga na'. <sup>36</sup> Ca'an gaca lawe' da quebe nu gátedxa na'. Xelaque' ca zaj naca gubáz chee xabáa ca', ne xelaque' bi chee Dios lawe' da belexebane'. <sup>37</sup> Moisésqueze, gate bzuaje' ca guca chee bisigá da guzúa na' xi', dxulé'ene' dxi'u dxal-la' xelexebán benne' gate. Naga naxúaj da nigá dxenná na ca naca chee Dios, naque' Dios chee Abraham, ne Dios chee Isaac, ne Dios chee Jacob. <sup>38</sup> Dios quebe naque' Dios chee benne' gate ca'. Naque' Dios chee benne' ban ca', lawe' da lau Le' zaj naca ban xúgute bènneache.

<sup>39</sup> Nadxa bal-la benne' ca', benne' dxuluxuzájle'e da nadxixruj bea na gulé'e Jesús:

—Cháwedau' dxennáu', Benne' Wesede.

<sup>40</sup> Québedxa belexájrje' bi xuluchebe' Jesús.

*¿Nu benne' naca Cristo zrí'ine'?*

(Mt. 22.41-46; Mr. 12.35-37)

<sup>41</sup> Jesús guzre' le':

—¿Bizr chee na' dxennale le'e naca Cristo zrí'ine David? <sup>42</sup> Davidqueze gunné' lu xiche naga zaj naxúaj salmo ca':

Xránadxu Dios guzre' Xrana':

“Gudxé'e cuita' xabēla chia',

<sup>43</sup> Cadxa guzúa' benne' dxelecuídenē' lue' ca' zran ni'u.”

44 ¿ájazra chee na' naca Cristo zri'ine David, na' Davidqueze dxé'e Lē': "Xran"?

*Jesús dxenné' chee benne' ca' dxuluxuzájle'e da nadxixruj bea na*  
(Mt. 23.1-36; Mr. 12.38-40; Lc. 11.37-54)

45 Ca naca benne' ca' zaj zra' na' dxuluzé nague' chee Jesús gate guzre' benne' ca' dxusédene':

46 —Le guxúe xanne' cuínale chee benne' ca' dxuluxuzájle'e da nadxixruj bea na, lawe' da dxeledánene' dxeledé' zaj nacue' zre' tunna, ne dxelaca lazre' xelapa bènneache le' ba lá'ana lawe' xi'a ca', ne dxelebé'e lu lataj blau ca' lu xu'u naga dxezragale, ne lataj blau ca' naga dxelawe' zrue.

47 Benne' caní dxelequé'e ca naca lizre nu'ula ca' ba gulate benne' chee', na' chee xulucá'ana cuine' xrlátaje lau bènneache ca' dxululawízrajē' Dios da tunna lu xu'u ca' naga dxezragale. Benne' caní xelezaca zídxaqueze'.

## 21

*Dumí da bnezruj tu nu'ula xache' ba gute benne' chee'*

(Mr. 12.41-44)

<sup>1</sup> Gate zua Jesús chale'aj xudau', blé'ene' benne' gunní'a ca' dxelegú'e dumí lu xí'ina chee xudau'. <sup>2</sup> Na' blé'ene' tu nu'ula naque' benne' xache', ne ba gute benne' chee', gulu'e chupa dumí'au'. <sup>3</sup> Na' gunná Jesús:

—Da li dxapa' le'e, nu'ula xache' nigá gulú'udxe' da zrendxa ca benne' gunní'a caní, <sup>4</sup> lawe' da dxelegú'u benne' ca' chee da dxutínneze na, san nu'ula nigá, lu xel-la baxache' chee' bnézruje' ca naca da nape' da nunte gawe'.

*Jesús dxuchálaje' ca gaca gate cuía xi' xudau'*

(Mt. 24.1-2; Mr. 13.1-2)

<sup>5</sup> Bal-la benne' dxuluchálaje' ca naca chee xudau' na', ne chee xiaj xrtante da zaj zrále'e na ze'e xudau' na', ne chee da xrtan da bulunezruj benne' chee xudau' na'. Nadxa gunná Jesús, dxé'e le':

<sup>6</sup> —Wazrín zra gate xelebía xi' xúgute da caní dxelé'ele, ne quebe xegá'ana netú xiaj cuzru ljwezre na.

*Da xululé'e na gate cheajsé chee xezr la xu nigá*

(Mt. 24.3-28; Mr. 13.3-23)

<sup>7</sup> Nadxa benne' ca' buluchebe' Jesús:

—Benne' Wesede, ¿bata gaca da na'? ¿Bi gulé'e na gate ba za xelaca da caní?

<sup>8</sup> Jesús gunné':

—Le guxúe xanne' cuínale, ne quebe güele lataj nu si xē le'e, lawe' da xeledá' benne' zante benne' xulusí' cuine' La' neda', xelenné' zaj naque' Cristo, ne xelenné' ba bzrin zra. Quebe chéajlele benne' ca'. <sup>9</sup> Gate xénele dxaca wedil-la, ne xeledábague' bènneache xu'u lawe', quebe zrébele, lawe' da dxal-la' gaca da caní nedxu, san quebe ne zrin zra cheajsé chee xezr la xu nigá.

<sup>10</sup> Nadxa guzre' benne' ca':

—Bènneache tu xezr la xu xeledíl-lalē bènneache xetú xezr la xu, na' benne' tu xezre xeledíl-lalē benne' xetú xezre. <sup>11</sup> Wazrú'le'eqeze, ne gácalé'e gubina', ne gáta'le'e xízrawe' du ca nácaqueze, na' zran xabáa lé'ele da guchébequeze na le'e, ne xel-la waca zri'a ca'.

<sup>12</sup> 'Nédxudxa gate quebe ne gaca da caní xelélaqueze' le'e, ne xeláu zi' xúzrequeze' le'e. Xeleché'e le'e lu xu'u ca' ga dxelezrague' chee

xelechugue' ca xelunge' cheele, na' xelegú'e le'e lizre xia, ne xeleché'e le'e lau benne' wenná bea ca', ne lau benne' xu'u lawe' ca' lawe' da nácale neda' tuze. <sup>13</sup> Gate gaca da caní gata' lataj guchálajlele benne' ca' ca naca chia' neda'. <sup>14</sup> Le guzúa chacha lázrdaule, quebe gucuézale nédxula da dxal-la' nnele, <sup>15</sup> lawe' da gunna' neda' le'e dizra', ne xella sina da quebe xezezeque benne' dxeledábague' le'e bi xelenné' chee na. <sup>16</sup> Wuludéqueze bénneache le'e lu na' benne' dxeledábague' le'e. Caní xelúnqueze xra xrnale, ne bi bíchele, ne xrtia ljuwézrele, ne bi ljuwézrele ca'. Welútequeze' bál-lale le'e, <sup>17</sup> na' xúgute' bénneache welecuídené' le'e lawe' da nácale neda' tuze, <sup>18</sup> san quebe nite tu xicha xíchajle lau Dios. <sup>19</sup> Che sua cháchale, na' gápale xel-la nabán.

<sup>20</sup> 'Gate lé'ele zaj naxechaj benne' dxjaque' wedil-la xezre Jerusalén, na' nézele ba za cuía xi' xezre nigá. <sup>21</sup> Lu zra na', benne' zaj zre'e xezre ca' zaj nababa Judea dxal-la' xuluzrúnnuje' chjaque' lu xi'a ca', na' benne' zaj zre'e xezre Jerusalén dxal-la' xeledxúaje' na', na' benne' zaj zre'e le'e xixre' quebe dxal-la' xelexezrine' xezre na'. <sup>22</sup> Lu zra ca' Dios gudée' benne' ca' lu da zi' da xa', na' gaca li ca naca da naxúaj na lu xiche chee Dios ca dxal-la' gaca chee benne' ca'. <sup>23</sup> Edxugúa nu'ula zaj zue' zi'i lu zra ca', ne nu'ula ca' zaj nuxre' bidu dxelázrebe', lawe' da gáta'le'e da xelezaca bénneache ca', na' gaca tu da ba xa' zrente chee benne' ca'. <sup>24</sup> Bal-le' xelatie' lu wedil-la na', na' xebal-le' xeleché'e le' zaj nadxéaje' tu tu xezr la xu ca', na' benne' zitu' ca' xululéaje' xezre Jerusalén cadxa cheajsé chee zra xelenná bea benne' zitu' ca'.

*Ca gaca gate xelá' Benne' Gulje' Bénneache*  
(Mt. 24.29-35, 42-44; Mr. 13.24-37)

<sup>25</sup> Na' gunná Jesús:

—Lu zra na' xelata' da xululé'e na lau gubizra, ne lau beu', ne lau belaj ca', na' lu xezr la xu xelezúa stēbe benne' ca', ne xelezrebe' ca naca schaga' da gun nísadau', ne xeajxruza chee na. <sup>26</sup> Benne' ca' xelate ni'a ne'e ne chee xel-la dxelezrebe gate xulusá lazre' ca da dxal-la' gaca lu xezr la xu, ne ca naca da zaj zra' zran xabáa, da zaj napa xel-la waca xelexrízequeze na. <sup>27</sup> Lu zra na' xeledé'quezne' neda', Benne' Gulje' Bénneache, xelá'a tu lu beuj, nen duté xel-la waca zren, ne da xabáa chia'. <sup>28</sup> Gate su lau gaca da caní, le gun dípa lázrele, ne le chisa xíchajle, lawe' da ba za zrin zra lale lu da dxaca cheele.

<sup>29</sup> Nadxa bchálaj Jesús tu da dxulé'e na, gunné':

—Le nna'xque xaga higo, u bíteteze xaga. <sup>30</sup> Gate lé'ele ba dxezría na laga' dxe'ene, nézquezle le'e ba za xaca beu' la. <sup>31</sup> Cá'anqueze, gate lé'ele gaca da caní, dxal-la' nézele ba zua gagu zra nna bea Dios.

<sup>32</sup> 'Da li dxapa' le'e, xúgute' da caní xelaca na nédxudxa gate quebe ne xelate bénneache zaj zra' lu zra na'a zra. <sup>33</sup> Xabáa, ne xezr la xu weledé chee na, san dizra' chia' quebe te chee na.

<sup>34</sup> Le guxúe xanne' cuínale, quebe güele lataj xelú'u lu xichaj lázrdaule da calēla ca' ca naca xel-la dxagu xrata, ne xel-la dxezuzre, ne xel-la dxezá lazre' da naca chee xezr la xu nigá, chee quebe gácale ca tu benne' nachúl-lene' lu xichaj lázrdawe' gate zrin zra na', <sup>35</sup> ne chee quebe gaca na ca tu da quēla na le'e, lawe' da caní gaca chee xúgute' benne' zaj zre'e lu xezr la xu nigá. <sup>36</sup> Le sua le'e ban lazre', ne le naba lau Dios chee gaca lale lu da dxal-la' gaca lu xezr la xu nigá, ne chee gaca gulé'e cuínale du lázrele lawa' neda', Benne' Gulje' Bénneache.

<sup>37</sup>Jesús bsédene' benne' ca' lu xudau' te zra, na' chizrela dxexíaje' lu Xi'a Xaga Olivo. <sup>38</sup>Xúgute' benne' ca' belezrine' lu xudau' na' xugu' zila chee xelenne' chee Jesús.

## 22

*Dxelune' tuze dizra' xelele' Jesús*

*(Mt. 26.1-5, 14-16; Mr. 14.1-2, 10-11; Jn. 11.45-53)*

<sup>1</sup>Ba zua gagu laní gate dxelawe' xeta xtila da quebe nachixre cua zichaj chee xeta xtila, da naca na Laní Pascua gate dxulusá lazre' ca da ben Dios gate bebéaje' bénneache chee' lu xezr la xu Egipto. <sup>2</sup>Lu zra ca' benne' xíchaje' ca' chee bxruze ca', ne benne' ca' dxuluxuzájle' da nadxixruj bea na belílaje' ájala xelune' xelútie' Jesús bagácheze, lawe' da dxelezrebe' da xelún benne' zan ca'.

<sup>3</sup>Nadxa guxú'u Satanás da xriwe' lu lázrdau Judas, bénnea' cá'aqueze le' Iscariote. Naque' tu benne' chazrinnu gubáz ca' chee Jesús. <sup>4</sup>Judas nigá guxíaje' xeajchálajlene' benne' xíchaje' ca' chee bxruze ca', ne benne' blau ca' chee xudau', na' bchálajlene' benne' ca' ájala guné' gudé'e Jesús lu na' benne' ca'. <sup>5</sup>Benne' caní gulebene', na' gulechebe lazre' xulunézruje' le' dumí. <sup>6</sup>Judas na' guzú' lu ne'e dumí na', na' guzú' lawe' dxílaje' ájala guné' gudé'e Jesús lu na' benne' ca' gate quebe nu chilá' benne'.

*Da dxágudxu chee cheajsá lazrdxu ca gute Xránadxu*

*(Mt. 26.17-29; Mr. 14.12-25; Jn. 13.21-30; 1 Co. 11.23-26)*

<sup>7</sup>Bzrin zra laní gate dxelawe' xeta xtila da quebe nachixre cua zichaj chee xeta xtila, gate dxal-la' xelútie' zrila'dau' ca' chee Laní Pascua. <sup>8</sup>Na' Jesús gusel-le' Pedro ne Juan, na' guzre'-be':

—Le chjaca, ne le gucuéza da gágudxu chee Laní Pascua.

<sup>9</sup>Benne' caní buluchebe' Le':

—¿Ga dxaca lazru' gucuézentu' na?

<sup>10</sup>Na' bechebe Jesusen':

—Gate chu'ule lu xezre, na' xezrágale tu benne' biu zenu'e tu dxe'e nisa. Le chjácálene' xu'u naga xezrine', <sup>11</sup>na' le xe xrane xu'u na': “Benne' Weséde dxé'e lue': ¿Ga zua xu'u naga gágulena' benne' ca' dxusédea' zrila'dau' chee Laní Pascua?” <sup>12</sup>Nadxa gulé'enge' le'e tu xu'u zren da zua chupa cuia sibe, da bache nucá'ana chawe'. Le gucuéza da gágudxu na'.

<sup>13</sup>Benne' ca' xjaque', na' belezrélene' xúgute' ca da ba guzre Jesús le', na' bulucueze' da xelawe' chee Laní Pascua.

<sup>14</sup>Gate bzrin zra, Jesús ne benne' ca' dxusédene' gulezré'e ga xelawe' na. <sup>15</sup>Nadxa gunná Jesús, dxé'e benne' ca':

—Guzá lázrele'a gágulena' le'e chee Laní Pascua nigá nédxudxa ca quebe ne gatia'. <sup>16</sup>Dxapa' le'e québedxa gawa' da nigá cadxa gaca li na naga dxenná bea Dios.

<sup>17</sup>Nadxa guqué'e tu zruágadau', na' guzre' Dios: “Xcalenu”, na' gunné':

—Le xi'aj late' weaj tu tule le'e. <sup>18</sup>Dxapa' le'e québedxa xí'aja' chee nisa uva caní cadxa xida xel-la dxenná bea chee Dios.

<sup>19</sup>Nadxa guqué'e xeta xtila, ne guzre' Dios: “Xcalenu”, na' bzúzruje' na, ne bnézruje' na benne' ca', dxenné':

—Da nigá naca na bel-la' dxen chia', da guzúa' waláz cheele. Le gun da nigá chee cheajsá lázrele chia' neda'.

<sup>20</sup>Cá'aqueze bene' nen zruágadau' na' ca' gudé gulawe' xrche', na' gunné':

—Zruágadau' nigá zéaje na xel-la wezría cube, da guzúa chúchua' nen dxen chia', da gulálaja' waláz cheeje.

<sup>21</sup> 'Na'a, zrua na' benne' biu na' tu zren nen na'a ga zua da dxágadxu, bénnea' gudéje' neda' lu na' benne' dxeledábague' neda'. <sup>22</sup> Neda', Benne' Gulje' Bénneache, waxá'a lu neza da ble'e Dios neda' naga gatia', san edxugúa bénnea' gudéje' neda' chee gatia'.

<sup>23</sup> Nadxa benne' ca' dxusede Jesús gulezú lawe' dxuluchebe ljwezre' nu na' gudé Jesús.

*Dxuluchebe ljwezre' nule' gácadxe' blau*

<sup>24</sup> Cá'anqueze buluchebe ljwezre' nule' gácadxe' benne' blau. <sup>25</sup> Na' Jesús guzre' le':

—Benne' wenná bea chee xezr la xu ca' dxelenná bé'ene' bénneache ca xrane bénneache ca', na' benne' xíchaje chee benne' ca' dxelenné' zaj naque' benne' dxelune' da chawe' chee benneáche ca'. <sup>26</sup> Le'e quebe dxal-la' gunle ca'. Benne' nácadxe' blau ládujla le'e dxal-la' gaque' ca' benne' nácadxe' cuide', na' benne' dxenná be'e dxal-la' gaque' ca' benne' nada'u chee ljwezre' ca'. <sup>27</sup> ¿Nu nácadxa blau, benne' dxe'e dxawe', che benne' dxudéje' xel-la wagu? ¿Quebe naca bénnea' dxe'e dxawe'? Neda' zúaleña' le'e ca' tu benne' dxune' zrin cheeje.

<sup>28</sup> 'Le'e guzúalequezle neda' gate neda' guzú guzaca'. <sup>29</sup> Chee le' na' dxunna' le'e lataj nna beale, ca' ben Xra', benne' na neda', <sup>30</sup> chee xi'aj gágule ga naca chia' naga nna be'a neda', na' cue'le lataj blau ca' chee guchí'ale chee chazrinnu cue' xrtia Israel.

*Jesús dxenné' Pedro nne' quebe núnbe'e Le'*

(Mt. 26.31-35; Mr. 14.27-31; Jn. 13.36-38)

<sup>31</sup> Na' gunnáqueze Xránadxu:

—Simón, Simón, Satanás, da xriwe' ba gunaba na le'e chee seque gudé na le'e lu dul-la ca' dxun tu benne' dxudxixre dxutul-le' xizre za. <sup>32</sup> Neda' guta' xueda' Xra' gácalene' lue' chee quebe guníteu' xel-la dxeajlí lazre chiu'. Na' lue', gate bache bexacu' dipa lazre', gúcale le sa' ljwezru' ca' chee xezele chache'.

<sup>33</sup> Na' gunná Simón, guzre' Jesús:

—Xran, ba zúaqueza' sá'lena' Lue' lizre xia, ne chee gátequeza' nen Lue'.

<sup>34</sup> Jesús guzre' le':

—Pedro, dxapa' lue', ná'atela ne dédxela cuezre xjeaj, lue' wannáu' chunna lasa quebe núnbe'u neda'.

*Ba zua gagu zra si saca Jesús*

<sup>35</sup> Nadxa Jesús bchebe' benne' ca':

—Gate gusel-la' le'e quebe bíale xixruj, ne naga cu'ule dumí, ne zréle, ¿bxázrjele bi da guchínnele?

Benne' ca' belexechebe':

—Gutu bi de.

<sup>36</sup> Nadxa guzre' benne' ca':

—Na'a, benne' nape' xixruj dxal-la' gu'e na, ne naga dxugu'e dumí. Bénnea' quebe nape' xia da dxuluchínene' lu wedil-la, dxal-la' xexutie' xicha chee', na' si'e xia chee'. <sup>37</sup> Dxapa' le'e dxal-la' gaca chia' néda'queza' ca da naxúaj na lu xiche chee Dios, dxenné': "Gubabe' ca tu benne' wen da zrinnaj." Xúgute da naxúaj na chia' dxal-la' gaca li na.

<sup>38</sup> Nadxa benne' ca' gulenné':

—Xran, nigá de chupa xia.

Le' bechebe':

—Da naze.

*Jesús dxuchálajlene' Dios naga nazí le na Getsemani*

(Mt. 26.36-46; Mr. 14.32-42)

<sup>39</sup> Nadxa bedxúaj Jesús xu'u na', na' ca dxúnqueze', guxíaję' lu Xi'a Xaga Olivo, na' benne' ca' dxusédenę' xjácalęne' Le'. <sup>40</sup> Gate belezrine' na', Jesús guzre' le':

—Le naba lau Dios cheę quebe seque da xriwe' cu'u na le'e lu dul-la.

<sup>41</sup> Nadxa Jesús guzė' ca tu legu'una xiaj naga zaj zra' benne' ca', na' bzu zribe' bchálajlene' Dios. <sup>42</sup> Gunne':

—Xrae, che dxaca lazru', bcuasa neda' ca naca da dxal-la' saca', da naca na ca tu da sla' da dxal-la' xí'aja', quegá gaca na ca dxaca lazra' neda', san ca dxaca lazru' Lue'.

<sup>43</sup> Nadxa ble'e lau naga zua Jesús tu gubáz cheę xabáa, na' btipe' lazre' Jesús. <sup>44</sup> Gate ne dxezácale'ę, du lazre' bchálajlene' Dios, na' xesa cheę' guca na ca dxen dxeleznún na lu xu.

<sup>45</sup> Ca bexuzre bchálajlene' Dios, na' bexase', na' bezrine' naga zaj zra' benne' ca' dxusédenę', na' blé'ene' dxelase benne' ca', lu xel-la dxelex-ewi'ine lazre' cheę'. <sup>46</sup> Nadxa guzre' benne' ca':

—¿Dxáselale le'e na'a? Le chasa, ne le naba lau Dios cheę quebe seque da xriwe' cu'u na le'e lu dul-la.

*Dxelele' Jesús*

(Mt. 26.47-56; Mr. 14.43-50; Jn. 18.2-11)

<sup>47</sup> Ne dxuchálajte Jesús gate belelá' benne' zan ca'. Bénnea' le' Judas, tu benne' chazrinnu ca', ze'ę zria lawę' lau benne' ca', na' gubigue' cuita Jesús cheę gunupe' Le'. <sup>48</sup> Nadxa Jesús guzre' le':

—Judas, ¿dxunupu' neda', Benne' Gulje' Bénneache, cheę gudéu' neda' lu na' benne' dxeledábague' neda'?

<sup>49</sup> Benne' ca' zrálene' Jesús, ca belelé'ene' ca da dxaca, na' buluchebe' Jesús:

—Xran, ¿guchínentu' xia?

<sup>50</sup> Tu benne' ca' dxedále Jesús bene' zi' tu bi wen zrin cheę bxruze blau, guchuge' nágabe' zua xabela. <sup>51</sup> Jesús gunné':

—Québedxa gunle ca'. Cá'anze.

Nadxa Jesús bte' naga bi wen zrin na', na' bexune' na.

<sup>52</sup> Na' guzre' benne' xíchaję ca' cheę bxruze, ne benne' blau ca' cheę xudau', ne benne' gula sina ca', benne' zá'aque' xelechė'ę Jesús, gunné':

—¿Blale le'e nen xia, ne xaga cheę quélale neda' ca dxélale tu gubán?

<sup>53</sup> Gate guzúa' neda' lu xudau' nen le'e tu zra tu zra, quebe bi benle le'e chia', san zra nigá naca na zra cheęle, gate dxenná bea da zua na lataj chul-la.

*Pedro dxenné' quebe núnbe'ę Jesús*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Nadxa gulele' Jesús, na' guleché'ę Le' lizre bxruze blau, na' Pedro zíaję' nawę' Le' zítu'la. <sup>55</sup> Na' gulebé'ę guléchaję' xi' na', na' Pedro gudxé'ę ládujla benne' ca'. <sup>56</sup> Nadxa tu nu'ula wen zrin, gate blé'ene' Pedro dxė'ę dxu'a xi' na', guzúę' dxenné'ę le', na' gunné':

—Cá'anqueze benne' nigá guque' tuze len Jesús.

<sup>57</sup> Pedro gunné':

—Nu'ula, quebe núnbe'a bénnea'.

<sup>58</sup>Xetú chí'idau' guca, na' ble'e xetú benne' xula Pedro na', na' gunné':

—Cá'anqueze lue' nacu' tu zren benne' ca'.

Pedro gunné':

—Cabí. Quebe naca ca'.

<sup>59</sup>Xelate gudé na', xetú benne' ben chúchue' xrtizre', gunné':

—Da li, benne' nigá guque' tuze len Jesús, lawe' da naque' benne' Galilea.

<sup>60</sup>Nadxa gunná Pedro:

—Benne', quebe nezda' nu chee na' dxuchálaju'.

Dxácate na' ne dxuchálajte Pedro ca', na' gudxezre xjeaj. <sup>61</sup>Nadxa Xránadxu bzechaj xíchaje', gunné'e Pedro, na' Pedro xeajsá lazre' ca da guzre Xránadxu le', gunné': “Ná'atela ne dédxela cuezre xjeaj, lue' wannáu' chunna lasa quebe núnbe'u neda'.” <sup>62</sup>Nadxa bedxúaj Pedro, na' gudxezre xáche'le'e.

*Dxelún le' chee Jesús*

(Mt. 26.67-68; Mr. 14.65)

<sup>63</sup>Na' benne' ca' zaj nuxre' Jesús belún le' chee', na' buluzalje' Le'.

<sup>64</sup>Bulucache' lawe', na' belegape' xrague', dxel'e Le':

—Gunné xa'a nu be Lue'.

<sup>65</sup>Da zan da gulenné', dxelenné' schanni' chee Jesús.

*Jesús dxezrine' lau benne' ca' chee xu'u lawe' blau chee judío ca'*

(Mt. 26.59-66; Mr. 14.55-64; Jn. 18.19-24)

<sup>66</sup>Gate naca te zra, na' belezraga benne' gula sina ca' chee judío ca', ne benne' xíchaje ca' chee bxruze ca', ne benne' ca' dxuluxuzájle'e da nadxixruj bea na, na' guleché'e Jesús lau benne' ca' chee xu'u lawe' blau chee judío ca'. Na' buluchebe' Le':

<sup>67</sup>—Gunná, ¿nacu' lue' Cristo?

Na' bechebe Jesús:

—Che xapa' le'e: Awe', quebe chéajle, <sup>68</sup>na' che bi gucheba' le'e, quebe xechébele chia', ne quebe gusanle neda'. <sup>69</sup>Ná'atela neda', Benne' Gulje' Bénéache, cue'a chalá'a xabela chee Dios nape' duté xel-la waca.

<sup>70</sup>Nadxa xúgute' buluchebe' Le':

—¿Nacu' Lue' Zri'ine Dios?

Jesús bechebe':

—Naca', ca dxennáqueze le'e.

<sup>71</sup>Nadxa gulenná benne' ca':

—¿Núzradxa chínnedxu bi nne' chee benne' nigá? Dxí'unqueze ba bédedxu ca da gunnáqueze'.

## 23

*Jesús dxezrine' lau Pilato*

(Mt. 27.1-2, 11-14; Mr. 15.1-5; Jn. 18.28-38)

<sup>1</sup>Nadxa gulasa xúgute benne' dxuluchi'e, na' guleché'e Jesús lau Pilato, benne' dxenná be'e waláz chee Roma. <sup>2</sup>Na' gulezú lawe' dxelagu zrie' Jesús, dxelenné':

—Ble'entu' benne' nigá dxegú'u xel-le' bénneache chee xeledábague' xu'u lawe'. Dxenné' quebe dxal-la' quízrujntu' da dxuchizruj César, benne' Roma, na' cá'anqueze dxenné' naque' Cristo, Benne' Wenná Bea.



3 Nadxa Pilato bchebe' Jesús:

—¿Nacu' Lue' Wenná Bea chee judío ca'?

Na' bechebe Jesús:

—Ca' naca na, ca ba gunnáu' lue'.

4 Nadxa gunná Pilato, guzre' benne' xíchaje ca' chee bxruze ca', ne bénneache ca':

—Quebe bi da zrinnaj dxezrelda' nun benne' nigá.

5 Benne' ca' belún chúchue' dizra' chee', gulenné':

—Dxegu'u xel-le' xúgute benne' zaj zre'e xezre ca' zaj nababa Judea chee xeledábage' xu'u lawe'. Guzú lawe' dxune' na naga nababa Galilea, na' na'a dxune' na nigá.

*Jesús dxezrine' lau Herodes*

6 Gate ben Pilato da nigá, na' bchebe' che naca Jesús benne' Galilea.

7 Gate gul'é le' naca Jesús benne' Galilea, na' Pilato gusél-le' Le' lau Herodes, benne' dxenná be'e xezre ca' zaj nababa Galilea, na' lu zra na' zue' Jerusalén. 8 Gate ble'e Herodes Jesús, gubéle'ene', lawe' da bátate dxaca lazre' lé'ene' Le', lawe' da ba benne' dxuluchalaj bénneache chee Jesús, na' guca lazre' lé'ene' gun Jesús tu xel-la waca da za xabáa. 9 Da zante da bchebe' Jesús, na' Le' quebe bi bechebe'. 10 Zráqueze benne' xíchaje ca' chee bxruze ca' na', nen benne' ca' dxuluxuzáje'e da nadxixruj bea na, na' belún chúchue' dizra' chee' da dxelagu zria Jesús. 11 Nadxa Herodes, ne benne' chee' ca' dxjaque' wedil-la buluzúe' Le' chala'ala, na' chee xelún le' chee', bulugácue' Le' ladxe' bzawe ca naca zra tu benne' wenná bea. Nadxa Herodes besel-le' Le' lau Pilato. 12 Lu zra na' Pilato, ne Herodes belexaque' tuze, lawe' da belezrá'a ljwezre' nédxute.

*Dxelechugue' chee Jesús gatie'*

(Mt. 27.15-26; Mr. 15.6-15; Jn. 18.39—19.16)

13 Nadxa Pilato bchague' benne' xíchaje ca' chee bxruze ca', ne benne' xu'u lawe' ca', 14 na' guzre' benne' ca':

—Le'e guchele benne' nigá za'le naga zua', dxennale dxegú'u xel-le' bénneache chee xeledábage' xu'u lawe'. Neda' ba bcheba' Le' laule le'e, na' quebe bi da zrinnaj dxezréleda' nune' ca naca da dxennale chee'.

15 Cá'anqueze Herodes quebe bi da zrinnaj bzrélene' da nun Jesús, na' budée' Le' launtu'. Quebe bi ne gune' chee chuga' chee' gatie'. 16 Gudéa' Le' xel-la zi', na' gusanqueza' Le'.

17 Dxácate dxaca laní na', Pilato dxal-la' gune' tu da dxelezaca ba lazre' bénneache, gusané' tu benne' xu'e lizre xia. 18 Xúgute benne' ca' gulezú lawe' dxelebezre xe'e, dxelenné':

—¡Gate benne' nigá! ¡Bsan Barrabás na'!

19 Barrabás nigá gulegú'e le' lizre xia lawe' da gudábage' xu'u lawe', na' be'tie' tu benne'. 20 Pilato guca lazre' gusané' Jesús, na' bchálajlene' benne' ca' xetú. 21 Na' benne' ca' gulebezre xe'e zízrajdxá, dxelenné':

—¡Bde'e xaga béguaj! ¡Bde'e xaga béguaj!

22 Da guxunne' lasa gunná Pilato:

—¿Bizra da zrinnaj nune'? Quebe bi dxezréleda' da gudé na Le' gatie'. Gudéa' Le' xel-la zi', na' te na' gusana' Le'.

23 Na' benne' ca' belún chúchue' dizra' chee' chee te'e xaga béguaj, ne gulebezre xá'atie', nen benne' xíchaje ca' chee bxruze ca', cadxa guca ca da gulaca lazre'. 24 Nadxa Pilato guchugue' chee Jesús gaca chee' ca da

dxelaca lazre' benne' ca'. <sup>25</sup> Na' bsane' bënnea' belenabe', xu'e lizre xia lawe' da gudábague' xu'u lawe', ne betie' tu benne', na' bdee' Jesús chee gaca chee' ca dxelaca lazre' benne' ca'.

*Dxuludé'e Jesús xaga béguaj*

(Mt. 27.32-44; Mr. 15.21-32; Jn. 19.17-27)

<sup>26</sup> Gate zjaque' zaj naché'e Jesús chee xuludé'e Le' xaga béguaj, na' gulele' tu benne' Cirene, le' Simón, zezé'e le'e xixre', na' bulugu'e le' xaga béguaj chee Jesús, na' zéaje' cuzru Jesús na'.

<sup>27</sup> Na' xjácale Le' benne' zante, ne nu'ula zan dxelebezre', na' dxelebezre xache' ne chee da dxaca chee Jesús. <sup>28</sup> Nadxa Jesús gunné'e nu'ula ca', na' guzre' le':

—Le'e, nu'ula Jerusalén, quebe cuézrele chia' neda'. Le cuezre cheéquezle, ne chee zrí'inele, <sup>29</sup> lawe' da zrin zra gate xelenné': "Ba neza zren naca na chee nu'ula wizre, ne nu'ula ca' cabata' gulezúe' zi'i, ne nu'ula ca' cabata' bulugazre' bidau'." <sup>30</sup> Lu zra na' xelezú lau bënneache xelé'e xi'a ca': "Le gugacu netu' xu." Na' xelé'e xí'adu ca': "Le gucache netu'." <sup>31</sup> Che dxeluné' da caní chia' neda', naca' ca tu xaga ban, zǵázradxa xeluné' cheele le'e, nácale ca xaga bizre ca'?

<sup>32</sup> Cá'anqueze guleché'e chupa benne' wen da zrinnaj chee xelútié' le' tu zren nen Jesús. <sup>33</sup> Gate belezrine' lataj na' nazi le na, Calavera, da zéaje na, Xi'a Zrita Xíchajdxu, na' buludé'e Jesús xaga béguaj, ne cá'anqueze beluné' chee benne' wen da zrinnaj ca', tue' cuite' xabéla, ne xetúe' cuite' xéglala. <sup>34</sup> Ca dxuludé'e Le' xaga béguaj, na' gunná Jesús:

—Xrae, bnite lau chee benne' caní lawe' da quebe zaj nézene' bi na' dxelune'.

Na' benne' dxjaque' wedil-la gulebeje' da dxunna bea' chee xelezi'e late' weaj zra lana Jesús. <sup>35</sup> Benne' ca' zaj zre'e na' dxelenné'e, ne benne' xu'u lawe' ca' belún le' chee', dxelenné':

—Bselé' benne' xula ca'. Na'a dxal-la' guselá cuine' che da li naque' Cristo, Bënnea' Gucá'a Dios.

<sup>36</sup> Cá'anqueze benne' dxjaque' wedil-la belún le' chee', na' gulebigue' cuita Jesús, ne buluxí'aje' Le' nupe zichaj. <sup>37</sup> Gulé'e Le':

—Che lue' nacu' Wenná Bea chee judío ca', bselá cuinu'.

<sup>38</sup> Zua xichaj Jesús tu da naxúaj nen dizra' griego, ne dizra' latín, ne dizra' hebreo, da dxenná na:

—Wenná Bea chee judío ca'.

<sup>39</sup> Tu benne' wen da zrinnaj, bënnea' de'e xaga béguaj ben le' chee Jesús, dxenné':

—Che Lue' nacu' Cristo, bselá cuinu', ne bselate netu'.

<sup>40</sup> Na' xetú benne' wen da zrinnaj na' gudil-le' ljwezre'. Guzre' le':

—ǵQuebe dxezrebu' Dios? Lue' dxezácaquezu' ca da gulechugue' chee' Le'. <sup>41</sup> Dxi'u dxezácadxu ca da dxál-la'queze sácadxu, lawe' da dxaca cheedxu da dxal-la' sidxu ca naca da zrinnaj da nundxu, san benne' nigá quebe bi da zrinnaj nune'.

<sup>42</sup> Nadxa gunné':

—Jesús, xeajsá lazre' neda' gate su lau' nna be'u.

<sup>43</sup> Na' bechebe Jesús:

—Da li dxapa' lue', ná'atęla súaęquezu' neda' lu lataj chawe' chee Dios.

*Ca guca gate gute Jesús*

(Mt. 27.45-56; Mr. 15.33-41; Jn. 19.28-30)

<sup>44</sup> Guca ca wagubizra. Nadxa ca naca lu xezr la xu guchul-la na cadxa bzrinte na dxedá' chunna. <sup>45</sup> Gubizra guchul-la na, na' ladxe' ze lu xudau' bdxuaj na chúpala. <sup>46</sup> Nadxa gudxezre xa'a Jesús, dxenné':

—Xrae, lu na'u dxegu'a be' xu'a.

Ca gunné' ca', na' gutié'.

<sup>47</sup> Gate benne' dxenná bé'ene' benne' dxjaque' wedil-la blé'ene' ca da guca, na' be lá'ane' Dios, gunné':

—Da li, benne' nigá quebe bi da zrinnaj bene'.

<sup>48</sup> Xúgute benne' ca' zaj zre'e na', gate belelé'ene' ca da guca, na' besia'que' na', dxelu'e lachu'e. <sup>49</sup> Xúgute benne' ca' zaj núnbe'e Jesús, ne nu'ula ca' xjácálene' Jesús gate bezé'e Galilea, belexegá'ane' zítu'la dxelenné'e da caní.

### *Dxulucache' Jesús*

(Mt. 27.57-61; Mr. 15.42-47; Jn. 19.38-42)

<sup>50</sup> Zua tu benne' chawe' ne xrlátaje le' José, benne' xezre Arimatea chee xezre ca' zaj nababa Judea. Nababe' xu'u lawe' blau chee judío ca'. <sup>51</sup> José nigá dxebeze' zra nna bea Dios, na' quebe bene' tuze ca da belún benne' xu'u lawe' blau ca'. <sup>52</sup> Benne' nigá guxíaje' xeajchálajlene' Pilato, na' gunabe' latja gucache' Jesús. <sup>53</sup> Ca bexuzre buluxulétaje' Le' xaga béguaj, na' buluxuchele' Le' tu ladxe', na' gulu'e Le' tu lu xedxu ba, da ba gudene' tu le'e xi'a xiaj, naga quebe nu ne gáchequeze. <sup>54</sup> Naca na zra dxulucueze' chee zra dxulupá'ane', da ba zua su lau na.

<sup>55</sup> Nu'ula ca' xjácálene' Jesús gate bezé'e xezre ca' zaj nababa Galilea, xjaque' na', ne belelé'ene' ba na', ne belené'e ájala zaj nagu'e Le' xedxu ba. <sup>56</sup> Gate belexezrine' xu'u naga zaj zre'e, na' bulucueze' da du ca' dxelelále'e zixre, ne da zaj naca na ca za dxelelále'e na zixre. Belexezi' lazre' zra dxulupá'ane' cáteze naca da gunná bea Dios.

## 24

### *Ca guca gate bebán Jesús*

(Mt. 28.1-10; Mr. 16.1-8; Jn. 20.1-10)

<sup>1</sup> Zra nedxu chee da gazre zra, nu'ula ca' belezrine' dxu'a ba na' dxani'sise', zaj nu'e ca naca da ca' dxelelá zixre da bulucueze', na' xebal-la nu'ula xjácálene' le'. <sup>2</sup> Gate belezrine' na', belelé'ene' xiaj da guduse dxu'a ba na', québedxa naduse na naga guduse na. <sup>3</sup> Belú'e lu ba na', san quebe belexezrelne' Xránadxu Jesús na'. <sup>4</sup> Na' belezrébele'e, ne quebe zaj nézene' ájala xelune', na' belelé'ene' chupa benne' zaj ze' cuite', zaj nacue' zra lane' dxácátite na. <sup>5</sup> Nu'ula ca' belezúe' sudxú'ala lu xu, ne belezrébele'e. Na' benne' ca' gulé'e le':

—¿Bizr chee na' dxexílajle le'e tu benne' naca bané' láwela benne' gate?

<sup>6</sup> Quebe zue' nigá, lawe' da ba bebane'. Le gusá lázre' da bchálajlene' le'e gate ne zue' Galilea. <sup>7</sup> Gunné': “Benne' Gulje' Bénneache dxal-la' xuludé' Le' lu na' benne' dul-la ca', na' xuludé'e Le' xaga béguaj, na' zra guxunne' zra xebane'.”

<sup>8</sup> Nadxa nu'ula ca' xeajlesá lazre' ca naca da gunná Jesús. <sup>9</sup> Ca gudé besia'que' dxu'a ba na', na' belexezrine' lu xezre na', na' buluchálajlene' benne' chinéaj gubáz ca' chee Jesús, ne xúgute benne' ca' xezica, ca naca da guca na'. <sup>10</sup> Nu'ula ca' xjaque' xeajlezenne' gubáz ca', zaj naque' María Magdalena, ne Juana, ne María xrna Jacobo, ne xebal-la nu'ula ca'.

11 Benne' gubáz ca' guléquene' da xálaze dxelenná nu'ula caní, na' quebe guléajle'e chee'.

12 Nadxa bdxuaj Pedro, zeaj chégüe' dxu'a ba na', na' gate guné'e lu ba na', blé'ene' ladxe' da bedxela Jesús xu'u na chalá'ala, na' bezé'e zexíaje' xu'u naga guzé'e, dxexebáne' ca naca da guca.

*Da guca lu neza da zeaj xezre Emaús*

*(Mr. 16.12-13)*

13 Lu zra ná'queze, zjaca chupa benne' ca' busede Jesús xezre Emaús, da naca na láte'ze zitu' naga zua Jerusalén. 14 Zjaque' dxuluchálaje' ca naca da guca lu zra ca'. 15 Dxácatę na' dxuluchálaje' caní, na' Jesús ná'queze gubiguę' cuita benne' ca', na' guzú lawę' zéajlene' le'. 16 Quebe belexúnbe'e Jesús, lawę' da guzúa tu da guxúa na xiaj lau benne' ca'. 17 Nadxa bchebe Jesús benne' ca':

—¿Bizra da na' dxuchálajle ljwézrele dxácatę xu'ule neza? ¿Bizr cheę na' zale dxewi'ine lázrele?

18 Tu benne' ca' le' Cleofas bechebe':

—Xúgute benne' zaj nézene' ca da guca xezre Jerusalén lu zra caní. ¿Nacu' lue' benne' zitu' zu' Jerusalén, na' tuze lue' quebe nézenu' ca da guca na'?

19 Nadxa Le' guzre' benne' ca':

—¿Bizra guca na'?

Gulé'e Le':

—Da guca cheę Jesús, benne' Nazaret. Guque' tu benne' bchálaje' waláz cheę Dios, na' xel-la waca zren ca' bene', ne bchálaje' dizra' lau Dios, ne lau xúgute bėnneache. 20 Na' benne' xíchaje ca' cheę bxruze ca', ne benne' xu'u lawę' cheętu' ca' buludé'e Le' cheę gulechugue' cheę gatie', na' buludé'e Le' xaga béguaj. 21 Netu' guleza lázrentu' Le' naque' Benne' dxal-la' guselé' xezr la xu Israel. Na'a, ba zeaj chunna zra guca da ca'. 22 Bal-la nu'ula ca' ládujla netu' buluzúaqueze' netu' lu da stebe, lawę' da xjaque' dxani'sisę' dxu'a ba cheę na', 23 na' gate quebe belexezrelne' Le', na' belexelé'e naga zúantu', ne gulenné' belelé'ene' chupa gubáz cheę xabáa ca' bululé'e lawę' nu'ula ca', na' gulé'e le' nabán Jesús. 24 Nadxa bal-la benne' ljwézrentu' ca' xjaque' dxu'a ba na', na' belelé'ene' cáteze na' gulenná nu'ula ca', san quebe belelé'ene' Jesús.

25 Nadxa gunná Jesús:

—Le'e quebe dxéajni'ile, na' ne naca zide' lázrdaule cheę quebe chéajlele xúgute da gulenná benne' ca' buluchálaje' waláz cheę Dios. 26 ¿Quebe dxal-la' saca Cristo da caní nédxudxa ca xegá'ane' szren?

27 Nadxa guzú lawę' dxuzéajni'ine' benne' ca' ca naca xúgute da naxúaj lu xiche cheę Dios naga dxuchalaj na cheę Le'. Guzú lawę' lu xiche ca' cheę Moisés, na' ne zéajdxaqueze na lu xiche ca' cheę benne' ca' buluchálaje' waláz cheę Dios.

28 Gate belezrine' lu xezre naga zjaque', Jesús bene' ca benne' zeajteze' xu'e neza. 29 Na' benne' ca' buluxucá'ane' Le' xadía, dxelenné':

—Begá'analę netu', lawę' da ba zeaj dxezré', ne ba dxe' xrinnequeze na'a.

Nadxa Jesús guxú'ulęne' benne' ca'. 30 Gate na' dxé'lene' le' dxelawę', guquę'e xeta xtla, ne bzúzruje' na, na' guzre' Dios "Xcalenu'", ne bnézruje' na benne' ca'. 31 La' ná'queze becuasa ca naca da guxúa na xiaj lau benne' ca', na' belexúnbe'e Jesús, san la' ná'queze benite Le' lau benne' ca'. 32 Na' gulé ljwezre':

—¿Quebe guzúa xel-la dxebé lu lázrdaudxu gate ze'e dxuchálajlene' dxi'u tu neza, ne bzéajni'ine' dxi'u ca naca da naxúaj lu xiche chee Dios?

<sup>33</sup> Nadxa, ne québedxa gulezrene', belexegu'e neza, zeajxaque' Jerusalén, naga belelé'ene' zaj nazraga benne' chinéaj gubáz ca', ne benne' ljwezre' ca'. <sup>34</sup> Benne' ca' zaj nazrague' na' gulé'e benne' chupa ca':

—Da li bebán Xránadxu, na' Simón ba blé'ene' Le'.

<sup>35</sup> Nadxa benne' chupa ca' buluzenne' le' ca naca da guca la neza, ne ca belexúnbe'e Jesús gate bzúzruje' xeta xtila na'.

*Jesús dxulé'e lawe' benne' ca' xjácalene' Le'*  
(Mt. 28.16-20; Mr. 16.14-18; Jn. 20.19-23)

<sup>36</sup> Ne dxuluchálajte' caní gate ble'e lau Jesús gachaj lawe' benne' ca', na' bgape' le' diuzre, dxenné':

—Xela dxebeza zri lazre' súale na le'e.

<sup>37</sup> Na' benne' ca' belexruse', ne belezrébele'e. Guléquene' dxelelé'ene' bxinne dxela. <sup>38</sup> Na' Jesús guzre' benne' ca':

—¿Bizr chee na' dxezrébele? ¿Bizr chee na' dxaca chupa lázre? <sup>39</sup> Le na' na'a caní, ne le na' ni'a. Néda'queza' na'. Le gutá neda', ne le guxúe xque neda'. Tu bxinne dxela quebe napa na bēla' zrita, ca dxelé'ele le'e napa' neda'.

<sup>40</sup> Ca dxé'e benne' ca' da nigá, na' blé'ene' le' ne'e, ne ni'e. <sup>41</sup> Benne' ca' québequeze dxeléajlé'e chee' lawe' da dxelebéle'ene', ne dxelexebánele'ene', na' guzre Jesús le':

—¿De late' da gawa' nigá?

<sup>42</sup> Nadxa bulunézruje' Le' late' bēla' guzrúa xi', ne late' da zixre che bēzudau', <sup>43</sup> na' gucá'a Jesús da ca', ne gudawe' na lau benne' ca'. <sup>44</sup> Nadxa guzre' benne' ca':

—Da ba guca chia' naca na ca da gucha' le'e gate ne zúalequeza' le'e, gunnéa' dxal-la' gaca li ca naca xúgute da naxúaj lu da bdxixruj be'e Moisés, ne lu xiche naga zaj naxúaj salmo ca', ne lu xiche ca' chee benne' ca' buluchálaje' waláz chee Dios.

<sup>45</sup> Nadxa bzéajni'ine' benne' ca' ca da naxúaj lu xiche chee Dios, <sup>46</sup> na' guzre' benne' ca':

—Caní naxúaj na dxal-la' gate Cristo, na' zra guxunne' zra dxal-la' xebane' ládujla benne' gate ca', <sup>47</sup> na' lu La Le' dxal-la' xuluchalaj bēnneache lau xúgute xezr la xu ca'. Su lau gunle na lu xezre Jerusalén, xele bēnneache dxal-la' xelexebí'i lazre' chee gunite lau Dios dul-la zaj nabaga benne' ca'. <sup>48</sup> Le'e nácale benne' xelexechebe' da caní. <sup>49</sup> ¡Le nna'xque! Neda' sel-la' cheele ca da guchebe lazre' Xra'. Le xegá'ana nigá lu xezre Jerusalén, cadxa si'le xel-la waca da za xabáa.

*Jesús dxexegüéne' xabáa*  
(Mr. 16.19-20)

<sup>50</sup> Nadxa Jesús beche'e benne' ca', belexedxúaje' Jerusalén, xeajxaque' xezre Betania, na' guchisa na' Jesús, ne gunabe' gaca chawe' chee benne' ca'. <sup>51</sup> Ne dxúnte' ca', na' bezé'e naga zaj zra' benne' ca', begüéne' zexíaje' xabáa. <sup>52</sup> Ca bexuzre belúe lá'ane' Le', besiá'que' zeajxaque' Jerusalén lu duté xel-la dxelebé, <sup>53</sup> na' gulezráqueze' chale'aj xudau' dxelúe lá'ane' Dios. Ca' naca na.

## DIZRA' CHAWE' CA NACA CHEE JESUCRISTO DA BZUAJ SAN JUAÑ

*Bénnea' le' Xrtizra' Dios dxaque' bénneache*

<sup>1</sup> Gate guzú lau zua xúgute da de, ba zúaqueze Bénnea' le' Xrtizra' Dios, da zéaje na Benne' naque' dute da nácaqueze Dios, na' Bénnea' le' Xrtizra' Dios zúalene' Dios, ne nácaqueze' Dios. <sup>2</sup> Nédxudaute Benne' nigá zúalene' Dios. <sup>3</sup> Lu na' Benne' nigá ben Dios xúgute da de. Quebe bi de da quebe nun Le'. <sup>4</sup> Nácaqueze Le' xel-la' nabán, na' xel-la' nabán nigá naca na da dxusení na lu xichaj lázrdau bénneache chee xelaca bane'. <sup>5</sup> Xel-la' naxaní' nigá dxusení na lu da chul-la chee dul-la da zaj nabaga bénneache, na' da chul-la nigá quebe dxezeque na xusula na xel-la' naxaní' nigá.

<sup>6</sup> Guzúa tu benne' le' Juan, gusel-la Dios bennea'. <sup>7</sup> Benne' nigá ble'e chee bchálaje' ca naca chee Bénnea' naque' xel-la' naxaní' nigá, chee xeléajle xúgute bénneache chee Bénnea' ne chee da dxenné'. <sup>8</sup> Juan nigá quebe naque' xel-la' naxaní' na'. Ble'e chee bchálaje' ca naca chee Bénnea' naque' xel-la' naxaní' nigá. <sup>9</sup> Xel-la' naxaní' li, da dxusení na lu xichaj lázrdau xúgute bénneache ba za' la' na lu xezr la xu nigá.

<sup>10</sup> Bénnea' naque' Xrtizra' Dios zue' lu xezr la xu nigá, na' lácala ben Dios xezr la xu lu na' Bénnea', bénneache zaj zre'e lu xezr la xu quebe belaxexúnbe'e Le'. <sup>11</sup> Ble'e naga zua da naca chee, na' benne' lazrie' ca' quebe gulezí' lu ne'e Le'. <sup>12</sup> Benne' ca' gulezí' lu ne'e Le', ne guléajle'e chee', be'e benne' caní lataj xelaque' bi ca' chee Dios. <sup>13</sup> Benne' caní québedxa zaj naque' ca zri'ine bénneacheze, bi ca' dxelálajbe' ne chee bénneache, u ne chee da dxezá lazre' tu benne'. Benne' caní zaj naque' bi ca' chee Dios ná'queze.

<sup>14</sup> Bénnea' naque' Xrtizra' Dios gúlaje' ca tu bénneache, na' guzúe' ládujla dxi'u, zaj zúale xel-la' zri'i lazre', ne da li Le'. Blé'entu' ca naca xel-la' szren chee', tu xel-la' szren da nunezruj Xradxu Dios chee Zrí'ine' tu licha'. <sup>15</sup> Juan bchálaje' ca naca chee Bénnea', gunné':

—Benne' nigá naque' Bénnea' bchálaja' neda' chee' gate gunnéa' Bénnea' ze'e te chia' neda' naque' szrendxa ca neda' lawe' da zúaqueze' nédxute' ca neda'.

<sup>16</sup> Xúgutedxu ba guzidxu xel-la' zri'i lazre' chee' da dxúnnaqueze Le'. <sup>17</sup> Bla' da nadxixruj bea Dios ládujla dxi'u lu na' Moisés, na' xel-la' zri'i lazre', ne da li belelá' na lu na' Jesucristo. <sup>18</sup> Netú benne' quebe ne lé'eng' Dios. Zrí'ine' tu licha', bi nazrí'ite lazre', benne' nigá guque' tuz ca nácaqueze Xre'.

*Juan, benne' bchue' bénneache nisa, dxexechebe' chee Jesús*

*(Mt. 3.11-12; Mr. 1.7-8; Lc. 3.15-17)*

<sup>19</sup> Benne' xíchaje ca' chee judío ca', benne' zaj zre'e Jerusalén, gulesel-le' bxruze ca', ne xrtia Leví, benne' ca' dxelune' zrin chee xudau', na' belezrine' lau Juan chee xuluchebe xánnie' le' nu naque'. <sup>20</sup> Bechebe Juan du lazre', gunné':

—Quebe naca' neda' Cristo. (Dizra' nigá zéaje na Benne' guchebe lazre' Dios sel-le'.)

<sup>21</sup> Nadxa buluchebe' le':

—¿Nuzra nacu'? ¿Nacu' Elías, bénnea' bchálaje' waláz chee Dios?

Bechebe Juan:

—Cabí,

Na' buluchébequeze' le':

—¿Nacu' bénnea' dxal-la' le'e, ne guchalaje' waláz chee Dios, ca da gunná Moisés dxal-la' gaca na?

Le' bechebe':

—Cabí.

<sup>22</sup> Nadxa buluchébedxaqueze' le':

—¿Nuzra nacu'? Dxun na ba xen gata' bi xechébentu' chee benne' gulesel-le' netu'. ¿Bi dxennáquezu' nu nacu'?

<sup>23</sup> Juan bechebe':

—Neda' naca' bénnea' naxúaj na ca naca chee' lu xiche chee Dios, da dxenná: Wen chi'i tu benne' dxebezre xe'e le'e xixre' lawe' lataj, dxenné': "Le salaj tu neza li naga te Xránadxu." Naquen cáteze gunná Isaías, bénnea' bchalaje' waláz chee Dios.

<sup>24</sup> Benne' xudau' fariseo ca' gulesel-le' benne' caní chee chea-jlechálajlene' Juan. <sup>25</sup> Le' buluchébe' le':

—Che lue' quebe nacu' Cristo, ne Elías, ne bénnea' dxal-la' xedajchalaje' waláz chee Dios, ¿bi xel-la' dxenná bea napu' dxuchú' bénneache nisa?

<sup>26</sup> Juan guzre' benne' ca':

—Neda' dxuchúa' bénneache nisa lu nísaze. Zua tu benne' ládujla le'e quebe nézele ca szren naque'. <sup>27</sup> Benne' nigá ze'e ca te chia' neda', na' zúaqueze' nédxudxa ca neda'. Quebe zaca' neda' cuéaja' zrelé' da xu'u ni'e.

<sup>28</sup> Xúguté da caní guca na lu xezr la xu chee xezre Betábara, da zua na chalá'a xegu Jordán naga dxalaj gubizra, naga zua Juan dxuchúe' bénneache nisa.

*Jesús naque' Zríla'dau' chee Dios, be dxelutie' lau Dios ne chee xtul-le'*

<sup>29</sup> Zra xula ble'e Juan dxezrin Jesús naga zue', na' gunné':

—¡Le nna'xque! Benne' nigá naque' Zríla'dau' chee Dios, cue' dul-la zaj nabaga bénneache. <sup>30</sup> Neda' bchálaja' ca naca chee' gate gunnéa': Te chia' neda' za tu benne' naque' szrendxa ca neda' lawe' da zúaqueze' nédxudauté ca neda'. <sup>31</sup> Neda'queza' quebe gunezda' nu naque'. Bla'a dxuchúa' bénneache nisa chee xeleneze xezre Israel nu Benne' naca Le'.

<sup>32</sup> Cá'anqueze gunná Juan:

—Neda' ble'eda' Be' Lá'azxa bétaje' xabáa ca tu bgugu chíchedau', ne begá'analene' Benne' nigá. <sup>33</sup> Neda' quebe ne nezda' nu naque'. Dios na' nasel-le' neda' chee guchúa' bénneache nisa, Le' guzre' neda': "Gate le'enu' Be' Lá'azxa xétaje' xegá'analene' tu benne', Benne' nigá gune' da zéaje xel-la' dxedxúa nisa, guzúe' Be' Lá'azxa lu xichaj lázrdaule." <sup>34</sup> Na'a ba ble'eda' guca da nigá, ne dxexecheba' nácaqueze Benne' nigá Zri'ine Dios.

*Benne' nedxu ca' dxusede Jesús*

<sup>35</sup> Zra xula zúaqueze na' Juan nen chupa benne' ca' dxusedene'. <sup>36</sup> Gate blé'ene' dxedé na' Jesús, na' gunná Juan:

—¡Le nna'xque! ¡Benne' nigá naque' Zríla'dau' chee Dios, bia gáteba' ne chee dul-la nabágadxu!

<sup>37</sup> Dxúpaté benne' ca' dxusede Juan belenne' ca da gunné', na' xjácálene' Jesús. <sup>38</sup> Nadxa bexechaj Jesús, gunné'e cúzrule', ne blé'ene' benne' ca' zá'aque' cúzrule', na' guzre' le':

—¿Bi dxexílajle?

Benne' caní gulé'e Jesús:

—Benne' Wesede, ¿gazra zu'?

<sup>39</sup> Jesús bechebe':

—Le da nna'le.

Nadxa xjácalene' Jesús, ne belelé'ene' naga zué', na' belexegá'analene' Le' zra na' lawe' da bache zeaj du dxedá' tapa.

<sup>40</sup> Tu benne' chupa ca', benne' belenne' ca da gunná Juan, ne xjácalene' Jesús, naque' Andrés, benne' biche Simón Pedro. <sup>41</sup> Andrés nigá la guxíajte' xeajdílaje' bi biche' Simón, na' guzre' le':

—Ba bezréntu' Mesías. (Dizra' nigá zéaje na Cristo, Bénnea' guchebe lazre' Dios sel-le'.)

<sup>42</sup> Nadxa Andrés guché'e Simón naga zua Jesús, na' gate ble'e Jesús Simón na', na' guzre' le':

—Lue' nacu' Simón, zri'ine Jonás. Si' lau' Cefas. (Dizra' hebreo nigá zéaje na: Pedro, da zeaje na: Xiaj.)

*Jesús dxenné' Felipe ne Natanael*

<sup>43</sup> Zra xula guca lazre' Jesús chéaje' naga nababa Galilea, na' bezrague' Felipe, ne guzre' le':

—Ben neda' tuze.

<sup>44</sup> Felipe nigá naque' benne' xezre Betsaida, da naca na lazre Andrés, ne Pedro. <sup>45</sup> Felipe guxíaje' xeajdílaje' Natanael, na' guzre' le':

—Ba bezréntu' Bénnea' bzuj Moisés chee' lu xiche naga zaj naxúaj da nadxixruj bea na, ne cá'anqueze chee' Benne' nigá buluzúaj benne' ca' buluchálaje' waláz chee' Dios. Benne' nigá naque' Jesús, zri'ine José, tu benne' xezre Nazaret.

<sup>46</sup> Na' gunná Natanael:

—¿Waca dxuaj tu da chawe' Nazaret?

Felipe bechebe':

—Gudá le'enu'.

<sup>47</sup> Gate ble'e Jesús za Natanael naga zué', gunné':

—Nigá za' tu benne' naca xánnie' benne' Israel, benne' dxenné'queze' da dxéquene'.

<sup>48</sup> Nadxa Natanael bchebe' Jesús:

—¿Ájazra naca núnbe'u neda'?

Jesús guzre' le':

—Ble'eda' lue' nédxudxa gate za nne' Felipe lue', gate ze'u zran xaga higo.

<sup>49</sup> Nadxa Natanael guzre' Jesús:

—Benne' Wesede, Lue' nacu' Zri'ine Dios. Lue' nacu' Wenná Bea cheentu', benne' Israel.

<sup>50</sup> Bechebe Jesús:

—¿Dxéajle'u chia' lawe' da gucha' lue' ble'eda' lue' zran xaga higo? Walé'enu' da zaj naca na da szrendxa ca da nigá. <sup>51</sup> Da li dxapa' le'e, walé'eqeuzle le'e naxalaj xabáa, na' gubáz chee' xabáa ca' chee' Dios dxelétaje', ne dxelexegüene' naga zua neda', Benne' Gulje' Bénneache.

## 2

*Dxaca laní chee' wechaga na' lu xezre Caná*

<sup>1</sup> Zra guxunne zra, na' guca laní chee' wechaga na' lu xezre Caná da nababa Galilea. Xrna Jesús zué' na', <sup>2</sup> na' zua nu gunné' Jesús, ne benne'



ca' dxusédene' lu laní na'. <sup>3</sup> Bebizre xrise uva wal-la, na' xrna Jesús guzre' Le':

—Québedxa bi de xrise uva wal-la xelé'aje'.

<sup>4</sup> Jesús bechebe':

—Nú'uladau', ¿bizr chee na' dxu'u neda' caní? Quebe ne zrin zra gulé'e lau da naca'.

<sup>5</sup> Xrne'e guzre' benne' wen zrin ca':

—Le gun ca naca da xe'e le'e.

<sup>6</sup> Zaj nnita xrupa xesu' xiaj na', da dxuluchine judío ca' gate dxelibe ni'a ne'e ca naca da zjácálene'. Tu tu xesu' xiaj ca' dxeluzru na chupa u chunna dxe'e nisa. <sup>7</sup> Jesús guzre' benne' wen zrin ca':

—Le gusezrá nisa xesu' xiaj caní.

Gulegué'e nisa na, ne bulusuzrate' tu tu xesu' xiaj ca'. <sup>8</sup> Nadxa Jesús guzre' benne' ca':

—Le ca'a na, na'a, ne le gua na lau benne' ze' dxu'a ga dxelawe'.

Ca'an belune'. <sup>9</sup> Bénnea' zué' dxu'a ga dxelawe' bxue' nisa na' da bexaca na xrise uva wal-la, ne quebe nézene' ga za na. Benne' wen zrin ca' zaj nézene' ga za na lawe' da gulegué'e nisa na'. Nadxa bénnea' zué' dxu'a ga dxelawe' gunné' benne' wechaga na', <sup>10</sup> na' guzre' le':

—Xúgutē benne' dxelebéaje' nedxu xrise uva wal-la nácadxa chawe', na' gate ba gulé'ajle'e benne' ca' zaj zre'e laní, nadxa dxelebéaje' xrise uva wal-la quebe zúateca chawe'. Lue' bcuézaquezu' xrise uva wal-la chawe' na', ne guléaju' na na'a.

<sup>11</sup> Da nigá da ben Jesús lu xezre Caná da nababa Galilea naca na tu xel-la' waca zrentē da bene' nedxu, da ble'e na xel-la' szren chee', na' benne' ca' dxusédene' gulé'ajle'e chee'.

<sup>12</sup> Gudé na' Jesús bezé'e zexíaje' xezre Capernaum, zéajle' xrne'e Le' nen benne' biche' ca', ne benne' ca' dxusédene'. Na' gulezúe' na' zane' zra.

*Jesús dxucá'ana chawe' chale'aj xudau'*

(Mt. 21.12-13; Mr. 11.15-18; Lc. 19.45-46)

<sup>13</sup> Na' Jesús guxíaje' xezre Jerusalén lawe' da ba za Laní Pascua gate benne' judío ca' dxulusá lazre' ca' ben Dios, bebéaje' xra xrtawe' ca' lu xezr la xu Egipto. <sup>14</sup> Lu xezre Jerusalén blé'ene' lu chale'aj xudau' na' zaj zra' benne' dxelexutiē' bezre ca', ne zrila' ca', ne bgúgudu ca', béadu ca' dxelutiē' lau Dios. Cá'anqueze blé'ene' na' benne' dxuluxuché'e dumí chee xezr zitu' ca'. <sup>15</sup> Gate ble'e Jesús da caní, na' bgu'e du ca' da güe'e benne' ca', na' bebéaje' ca naca benne' ca' tu zrentē nen bezre chee' ca', ne zrila' chee' ca'. Na' gudxú'unē' lu xula dumí chee' benne' ca' dxuluxuché'e dumí, ne bdxixre' blaga' ca' chee' benne' ca'. <sup>16</sup> Na' guzre' benne' ca' dxelexutiē' bgúgudu ca':

—¡Le xebéaj da caní! Quebe gunle lizre Xra' ca tu lawe' xi'a.

<sup>17</sup> Nadxa benne' ca' dxusede Jesús xeaglesá lazre' da naxúaj na lu xiche chee' Dios, da dxenná na: Dxácatē zi' lázrdawa' lawe' da dxé'le'a gunne xue chee' lizru'.

<sup>18</sup> Nadxa judío blau ca' buluchēbe' Jesús:

—¿Bi xel-la' waca da za xabáa gulé'enu' netu' da gulé'e na napu' xel-la' dxenná bea dxunu' da caní?

<sup>19</sup> Bechebe Jesús:

—Le guzría xi' xudau' nigá, na' neda', te chunna zra xechisa' na.

<sup>20</sup> Nadxa judío ca' gulé'e Le':

—Xrupe xun iza ba zeaj dxeluneꝯ xudau' nigá, na' Lue', ¿xechisu' na chunna zraze?

<sup>21</sup> Bchalaj Jesús cheꝯ xudau' na' da naca na bel-la' dxen chee'. <sup>22</sup> Chee le na', gate bebán Jesús ládujla benne' gate, na' benne' ca' bsédenꝯ' xeajlesá lazre' ca da gunné', na' guléajle'e cheꝯ da naxúaj na lu xiche cheꝯ Dios ca naca cheꝯ Jesús, ne cheꝯ da guzre Jesús le'.

*Jesús núnbe'e xúgute bénneache*

<sup>23</sup> Gate zua Jesús xezre Jerusalén lu Laní Pascua cheꝯ judío ca', na' benne' zan guléajle'e cheꝯ gate belelé'ene' ca naca xel-la' waca zren ca' da dxune'. <sup>24</sup> Jesús quebe bde cuine' lu na' benne' ca' lawe' da nézquezne' quegá xúgute benne' ca' dxeléajle'e chee'. <sup>25</sup> Quebe guchínene' nu benne' xé'e Le' ca zaj naca bénneache lawe' da nézquezne' ca da zaj xu'u xichaj lázxdau bénneache.

### 3

*Jesús dxuchálajlene' Nicodemo*

<sup>1</sup> Zua tu benne' xudau' fariseo le' Nicodemo. Naque' benne' blau lávela benne' judío ca'. <sup>2</sup> Benne' nigá guxíaje' xeajnné'e Jesús chizrela, na' guzre' Le':

—Benne' Weséde, nézentu' Dios nasel-le' Lue' cheꝯ gusédenu' netu' lawe' da quebe nu benne' gaca gunꝯ' ca zaj naca xel-la' waca zrentꝯ da dxunu' Lue' che quebe zúale Dios le'.

<sup>3</sup> Nadxa Jesús guzre' le':

—Da li dxapa' lue', nu benne' quebe gálaje' xecha lasa quebe gaca gaque' tuze benne' ca' dxenná be'e Dios.

<sup>4</sup> Nicodemo bchebe' Jesús:

—¿Ájazra gaca xexalaj tu benne' ba naque' gula? ¿Waca xexu'e le'e xrne'e cheꝯ gálaje' xetú?

<sup>5</sup> Jesús bechebe':

—Da li dxapa' lue', nu benne' quebe gálaje' ne cheꝯ nisa cheꝯ xrtizra' Dios, ne ne cheꝯ Be' Lá'azxa, quebe gaca chu'e naga dxenná bea Dios. <sup>6</sup> Benne' nálaje' lu ni'a lu na' bénneache, naque' bénneacheze. Nu benne' nálaje' ne cheꝯ Be' Lá'azxa, naca ban bénnea' ne cheꝯ Be' Lá'azxa. <sup>7</sup> Quebe xebánenu' lawe' da dxapa' lue', dxun na ba xen gálaju' xecha lasa. <sup>8</sup> Gáteteze dxaca be'. Dxennu' ca schaga da dxun na, na' quebe nézenu' gala za na, ne gala zeaj na. Cá'unqueze naca cheꝯ benne' zaj nálaje' ne cheꝯ Be' Lá'azxa. Gaca le'enu' da ba nun Be' na' lu xichaj lázxdau bénnea', na' quebe dxelé'enu' ájala dxun Be' na'.

<sup>9</sup> Nadxa Nicodemo bchebe' Jesús:

—¿Ájazra gaca da caní?

<sup>10</sup> Bechebe Jesús:

—Lue' nacu' tu benne' weséde blau ládujla benne' Israel ca', na' ¿quebe nézenu' da caní? <sup>11</sup> Da li dxapa' lue', netu' dxuchálajntu' ca naca da nézentu', ne dxexechébtentu' ca da blé'entu', na' le'e quebe dxéajlele da dxentu' le'e. <sup>12</sup> Che quebe dxéajlele chia' gate dxuchálajlena' le'e ca naca cheꝯ da dxaca lu xezr la xu nigá, ¿ájazra gaca chéajlele chia' che guchálajlena' le'e cheꝯ da dxaca xabáa?

<sup>13</sup> 'Quebe ne cuen tu benne' xabáa cheꝯ lé'ene' ca dxaca na'. Tuzé Bénnea' bétaje' xabáa, Bénnea' naca' neda', Benne' Gulje' Bénneache, naca'

Bénnea' zúaqueze' xabáa. <sup>14</sup> Ca ben Moisés, bde'e tu belá' xia le'e xaga naga zua le'e xixre' lawe' lataj, cá'aqueze neda', Benne' Gulje' Bénneache, wuludá'queze' neda' tu le'e xaga, <sup>15</sup> chee' quebe xelebía xi' nu benne' xelájl'e' chia'. Zrué'e bénnea' xel-la' nabán da zeajlí canna.

*Dios dxezrí'i lazre' bénneache*

<sup>16</sup> Dios dxezrí'i lázrele'ene' bénneache, na' chee' le' na' bdee' Zrí'ine' tu licha' chee' quebe xelebía xi' nu benne' dxelájl'e' chee'. Zrué'e bénnea' xel-la' nabán da zeajlí canna. <sup>17</sup> Dios gusel-le' Zrí'ine' lu xezr la xu nigá, quegá chee' guzrí'a xi'e' bénneache, san chee' guselé' bénneache.

<sup>18</sup> Bénnea' dxéajle'e' chee' Zrí'ine' Dios quebe naca chee' cuía xi'e', san nu benne' quebe dxéajle'e' chee' ba naca chee' cuía xi'e' lawe' da quebe dxéajle'e' chee' Zrí'ine' Dios, bi tu licha' chee'. <sup>19</sup> Benne' ca' quebe dxelájl'e' chee' ba zaj naca chee' cuía xi'e' lawe' da gate bla' xel-la' naxaní' lu xezr la xu nigá, beledánedxené' da chul-la ca xel-la' naxaní', lawe' da dxelune' da calela. <sup>20</sup> Xúgute' benne' dxelune' da calela dxelecuídené' xel-la' naxaní', ne quebe dxelebigue' lu xel-la' naxaní', chee' quebe gaca bea da calela da dxelune'. <sup>21</sup> Benne' ca' dxelune' ca naca da li dxelebigue' lu xel-la' naxaní' chee' gaca bea naca na chee' Dios da dxelune'.

*Da gunná Juan, bénnea' bchue' bénneache nisa*

<sup>22</sup> Gudé na' guxíaj Jesús naga nababa Judea nen benne' ca' dxusédené', na' guzúe' na' zane' zra nen benne' ca', dxuluchúe' bénneache nisa. <sup>23</sup> Cá'aqueze zua Juan lu xezr la xu chee' xezre Enón da zua gáguze naga dxe' xezre Salím, dxuchúe' bénneache nisa lataj na' lawe' da dél'e' na' nisa zila, na' belezrín benne' zan naga zua Juan, na' beledxúe' nisa. <sup>24</sup> Da nigá guca na nédxudxa gate quebe ne xelegú'e' Juan lizre xia.

<sup>25</sup> Nadxa bal-la benne' zaj de'e' Juan gulezú lawe' dxulutil-le' judío ca' dizra' ca naca chee' da dxucá'ana chawe na bénneache lau Dios. <sup>26</sup> Nadxa xeajleguezre' Juan:

—Benne' weséde, bénnea' blé'e' naga zu' chalá'a xegu Jordán naga dxalaj gubizra, bénnea' bchálajlenu' netu' chee', na' dxuchúe' bénneache nisa, na' xúgute' bénneache zjácálené' Le'.

<sup>27</sup> Nadxa Juan guzre' benne' ca':

—Quegá nu benne' gaca bi gape' che quebe gunezruj Dios na chee'. <sup>28</sup> Le'e' bénquezle gunnía' neda' quebe nácaqueza' neda' Cristo, Bénnea' guchebe lazre' Dios sel-le'. Naca' tu benne' nase-la Dios chee' quia lawa' lau Le'. <sup>29</sup> Lu laní chee' wechaga na', bénnea' si'e' nu'ula wechaga na' naque' benne' wechaga na', na' benne' ljwezre benne' wechaga na', bénnea' zue' na', ne dxenne' chee', dxebéle'ene' gate dxenne' da dxuchalaj benne' wechaga na'. Cá'aqueze neda' dxebéle'eda' lawe' da caní naca' ljwezre Cristo. <sup>30</sup> Le' dxal-la' gácadxe' szren, na' neda' dxal-la' gácadxa' cá'aze.

*Ca naca chee' Bénnea' za' xabáa*

<sup>31</sup> Na' gunná Juan:

—Bénnea' za' xabáa nácadxe' blau ca xúgute' bénneache. Benne' naque' chee' xezr la xu nigá naque' bénneacheze, ne dxuchálaje' ca naca chee' da dxaca lu xezr la xu nigáze. Bénnea' ze'e' xabáa nácadxe' szren ca xúgute' bénneache. <sup>32</sup> Le' dxuchálaje' ca naca chee' da ba blé'ene', ne da ba benne' xabaala, na' quebe dxéajle' nu benne' chee' da dxenne'. <sup>33</sup> Che nu benne' dxéajle'e' chee', benne' nigá dxulé'ene' naca li ca da dxenná Dios.

<sup>34</sup> Bénnea' nase-la Dios dxuchálaje' xrtizra' Dios lawe' da dxunna Dios Le' Be' Lá'azxa chee' dutē ca naque'. <sup>35</sup> Xradxu Dios nazrí'ine' Zrí'inequeze', ne ba bdee' lu ne'e xúgutē da de. <sup>36</sup> Nu benne' dxéajle'e chee' Zrí'ine Dios nape' xel-la' nabán da zeajlí canna, na' benne' quebe dxuzúe' dizra' chee' Zrí'ine Dios quebe gape' xel-la' nabán caní. Wadé'e lu da ba xa' da gun Dios.

## 4

### *Dxuchálajle Jesús tu nu'ula chee tu xezre nababa na Samaria*

<sup>1</sup> Benne' fariseo ca' belenne' zjácale benne' zandxa Jesús ca benne' zjácalene' Juan, na' dxuchúa Jesús benne' zandxa nisa ca benne' dxuchúa Juan nisa. <sup>2</sup> Quebe dxuchúaqueze Jesús bénneache nisa. Benne' ca' dxusédene' dxuluchúe' bénneache nisa. <sup>3</sup> Gate guque be'e Jesús da nigá, na' bezé'e naga nababa Judea, xexíaje' naga nababa Galilea.

<sup>4</sup> Ca xu'u Jesús neza, ben na ba xen té'e naga nababa Samaria. <sup>5</sup> Ca'an guca, bzrine' tu xezre naga nababa Samaria nazí le na Sicar, da dxe' gáguze naga zua xezr la xu na' bnezruj Jacob chee' zrí'ine', bi lebe' José. <sup>6</sup> Lu xezr la xu na' gudén Jacob, zre sua Abraham, tu beaj situj. Ba dxeajxreque Jesús xu'e neza, na' gudxé'e dxu'a beaj na'. Naca na zran wagubizra. <sup>7-8</sup> Benne' ca' dxusede Jesús xjaque' lu xezre Sicar, xeajlegá'awe' da xelawe'. Dxácatē na' bzin tu nu'ula Samaria dxu'a beaj na' zeajxri'e nisa, na' Jesús guzre' le':

—Benna nisa xí'aja'.

<sup>9</sup> Nadxa nu'ula na' bechebe':

—¿Ájazra naca, lue', benne' judío, dxenabu' neda' nisa, naca' nu'ula Samaria?

Caní gunné' lawe' da quebe zaj zra' chawe' benne' judío ca' nen benne' Samaria ca'. <sup>10</sup> Nadxa bechebe Jesús:

—Chela nézenu' da dxunna Dios, ne nua' dxenabe' lue' nisa xí'aje', lue' nábenu' neda', na' neda' gunna' lue' nisa da gunna na lue' xel-la' nabán.

<sup>11</sup> Na' nu'ula na' guzre' Le':

—Benne', quebe bi nuxru' cuéaju' nisa, na' beaj nigá nácale'e na situj. ¿Ájazra na' gunu' gunnu' neda' nisa chee' xel-la' nabán? <sup>12</sup> Xra xrtáuntu', Jacob, benne' netu' beaj nigá, naga güé'equeze le' nisa, ne naga gulé'ajqueze zrí'ine', ne be' xixre' chee'. ¿Nácadxu' szrendxa ca le'?

<sup>13</sup> Jesús bechebe':

—Xúgutē benne' dxelé'aje' nisa chee' beaj nigá welexebílequezne' nisa. <sup>14</sup> Nu benne' xí'aje' nisa da gunézruja' neda', québedxa bílene' na, lawe' da nisa na' dxunézruja' neda' galaj na lu xichaj lázrdawe' ca tu beaj nisa da gunna na le' xel-la' nabán da zeajlí canna.

<sup>15</sup> Nadxa nu'ula na' guzre' Le':

—Benne', benna neda' nisa na', chee' québedxa gun na ba xen xida' nigá xedajxrí'a nisa.

<sup>16</sup> Na' Jesús guzre' nu'ula na':

—Guxíaj xeajnné benne' chiu', na' xídale nigá.

<sup>17</sup> Na' bechebe nu'ula na':

—Quebe nu chilá' benne' chia'.

Nadxa Jesús guzre' le':

—Da li dxennáu' quebe nu chilá' benne' chiu', <sup>18</sup>lawe' da ba guzáleṅu' gazxu' benne', na' bēneá' zúaleṅu' na'a quebe naque' benne' chiu'. Ca naca da nigá gunnáu' da li.

<sup>19</sup> Gate nu'ula' benne' da nigá, na' gunné':

—Xran, dxéqueda' nacu' lue' benne' dxuchalaje' waláz chee Dios. <sup>20</sup>Xra xrtáuntu' ca' bulucá'ana szrene' Dios lu xi'a nigá, na' le'e, benne' judío, dxennale dxun na ba xen gucá'ana szrendxu Dios xezre Jerusalén.

<sup>21</sup> Na' bechebe Jesús:

—Guxéajle chia', nu'ula. Ba za zra gate le'e gucá'ana szrenle Xradxu Dios, ne quebe gun na ba xen xídale lu xi'a nigá, ne quebe gun na ba xen chéajle Jerusalén. <sup>22</sup> Le'e, benne' Samaria, quebe núnbeale nua' dxucá'ana szrenle. Netu' núnbeantu' Nua' dxucá'ana szrentu', lawe' da za' benne' weselá ládujla benne' judío ca'. <sup>23</sup> Wazrín zra, ne ba dxezrín zra na', gate benne' ca' da li dxulucá'ana szrene' Xradxu Dios, xelune' na ne chee Be' Lá'azxa, ne ne chee da li, lawe' da dxaca lazre' Xradxu Dios xulucá'ana szren bēneache Le' caní. <sup>24</sup> Dios naque' Be', na' benne' dxulucá'ana szrene' Le', dxun na ba xen xulucá'ana szrene' Le' ne chee Be' Lá'azxa, ne ne chee da li.

<sup>25</sup> Na' nu'ula na' guzre' Le':

—Neda' nezda' walá' benne' Mesías (da zéajle na Cristo), na' gate la' Le', na' guzéajni'ine' dxi'u ca naca xúgute.

<sup>26</sup> Jesús guzre' le':

—Neda' naca' Bēneá', dxuchálajle' lue'.

<sup>27</sup> Ca gunné' ca', na' belexezrín benne' ca' dxusedene', na' belexebánene' lawe' da dxuchálajle Jesús tu nu'ula Netúe' quebe bexárzjene' guchebe' Le' bi da dxaca lazre', u bizra cheen dxuchálajle' nu'ula na'. <sup>28</sup> Nadxa nu'ula na' bca'ane' dxe'e chee' dxu'a beaj na', na' bezé'e zexiáje' xezre na' naga xeajezre' benne' ca':

<sup>29</sup> —Le da lé'ele tu benne' guzre' neda' xúgute da ba bēna'. ¿Quegá benne' nigá Cristo, Bēneá' sel-la Dios?

<sup>30</sup> Nadxa beledxúaj benne' ca' xezre na', zjaque' naga zua Jesús.

<sup>31</sup> Dxácatē na', benne' ca' dxusede Jesús gulata' xuene' Le', gulenné':

—Benne' Wesede, gudagu late'.

<sup>32</sup> Jesús guzre' benne' ca':

—De da dxawa', da quebe núnbeale le'e.

<sup>33</sup> Nadxa benne' ca' dxusede Jesús gulezú lawe' dxuluchebe ljwezre', dxelenné':

—¿Núteca bedajgú'e da gudawe'?

<sup>34</sup> Jesús guzre' le':

—Xela wagu chia' naca na chee guna' da dxaca lazre' Xra', Bēneá' nasele' neda', ne chee gusexuzra' guna' zrin chee'. <sup>35</sup> Le'e dxennale: "Xetapa beu' xelápadxu." Neda' dxapa' le'e, le nna' bēneache zaj naque' ca tu lina, da bache naca na xelápadxu. <sup>36</sup> Benne' dxelape' dxezi'e lazruj chee', na' da dxelape' naca na chee xelapa bēneache xel-la' nabán da zeajlí canna, chee sua xel-la' dxebe' benne' dxaza tu zren nen benne' ca' dxeleape'. <sup>37</sup> Da li naca ca da dxelenná bēneache: Tu benne' dxaze', na' xetúe' dxelape'. <sup>38</sup> Neda' gusel-la' le'e xelápale naga quebe gúzale. Ca' naca na, benne' xula belune' zrin gulaze', na' le'e dxezile ba neza zrin da belún benne' ca'.

<sup>39</sup> Benne' zan, benne' xezre na' naga nababa Samaria, guléajle'e chee Jesús ne chee xrtizra' nu'ula na', gunné': "Guzre' neda' xúgute da ba bene'." <sup>40</sup> Gate belelá' benne' Samaria ca' naga zua Jesús, na' gulata' xuene' Le' xegá'ane' nen le', na' begá'ane' na' chupa zra. <sup>41</sup> Benne' zandxa guléajle'e chee Jesús gate belenne' ca da dxenná Le'. <sup>42</sup> Nadxa gulé'e nu'ula na':

—Na'a dxéajlentu' chee' quegá tuze ne chee da guzru' lue' netu', na' cá'aqueze lawe' da bénquezentu' netu' chee', na' nézentu' da li naque' Cristo, Bénnea' guselé' ca naca bénneache.

*Jesús dxexuné' zri'ine tu benne' wen zrin blau chee xu'u lawe'*

<sup>43</sup> Gudé chupa zra bezá' Jesús xezre ca' zaj nababa Samaria, na' guzé'e zéaje' naga nababa Galilea. <sup>44</sup> Guxíaje' na' lawe' da gunnáqueze Jesús, gunné': "Tu benne' dxuchalaje' waláz chee Dios, quebe dxelapa benne' lazrie' le' ba lá'ana." <sup>45</sup> Gate bezrine' naga nababa Galilea, benne' zaj zre'e na' belezí' lu ne'e Le' du lazre', lawe' da xjácaqueze le' Laní Pascua da guca na Jerusalén, na' belelé'ene' xúgute da ben Jesús lu laní na'.

<sup>46</sup> Nadxa bezrín Jesús xezre Caná naga nababa Galilea naga bene' bexaca nisa xrise uva wal-la. Zua lu xezre Capernaum tu benne' wen zrin blau chee xu'u lawe', zua tu zri'ine' bi biu quebe chawe' zúabe'. <sup>47</sup> Gate ben benne' wen zrin blau nigá ba bezá' Jesús naga nababa Judea, ne ba bezrine' naga nababa Galilea, na' guxíaje' xejnné'e Jesús, na' gutá' xuene' Le' chéaje' lizre' xexuné' bi biu chee', bi na' ba zua gátebe'. <sup>48</sup> Nadxa Jesús guzre' le':

—Le'e quebe chéajle'le chia' che quebe lé'ele xel-la' waca chee xabáa da dxulé'eda'.

<sup>49</sup> Benne' wen zrin blau na' gunné':

—Xran, gudázega na'a quebe ne gate zri'ina'.

<sup>50</sup> Nadxa guzre Jesús le':

—Bexíaj lizru'. Naca ban bi chiu'.

Benne' wen zrin blau na' guxéajle'e chee da guzre Jesús lé', na' bezé'e zexíaje'. <sup>51</sup> Gate ba zua xezrine' lizre', na' benne' wen zrin chee' xejlex-ezrígalé' le', na' gulé'e le':

—Naca ban zri'inu'.

<sup>52</sup> Nadxa bchébe' benne' ca' bátala guzú lau bexácabe', na' gulé'e le':

—Ná'aqueze dxedé wagubizra bedxúaj da la da xu'ube'.

<sup>53</sup> Nadxa benne' wen zrin blau na' bexúnene' guca na la' ná'queze gate guzre Jesús le': "Naca ban zri'inu'." Ca'an guca, le', ne xúgute benne' zaj zra' lizre' guléajle'e chee Jesús.

<sup>54</sup> Da nigá naca na xel-la' waca zren da gudxupe' da ben Jesús gate bezrine' naga nababa Galilea.

## 5

*Jesús dxexuné' tu benne' biu naga nazí le na Betesda*

<sup>1</sup> Ca gudé na' guxú'u tu laní chee judío ca', na' bezrín Jesús xezre Jerusalén. <sup>2</sup> Lu xezre na', gáguze naga zua dxa xu'u chee xezre da nazí le na Dxa Xu'u Chee Zrila' Ca', dxe' tu cue'la nisa nazí le na Betesda lu dizra' hebreo, na' dxu'a nisa na' zaj nnita gazxu' lachila. <sup>3</sup> Lachila ca' zaj de benne' zan zaj xu'e we', benne' la chul-la ca', ne benne' zaj zua zri ni'a ne'e, ne benne' zrinnaj ca'. Dxebeze' ca bixre nisa na'. <sup>4</sup> Ca'an naca lawe' da dxetaj tu gubáz chee xabáa bata gala, ne dxunibe' nisa na',

na' benne' nedxu dxeajchu'e lu nisa na' ca dxedé dxunibe' na, dxexaque' chee' bíteteze xel-la' we' xu'e. <sup>5</sup> Zua tu benne' na' ba guca chinu chunne dxua iza xu'e we'. <sup>6</sup> Gate ble'e Jesús benne' nigá, ne dxeque bé'ene' ba guca zane' iza xu'e we' na', na' bchebe' le':

—¿Dxaca lazru' xexacu'?

<sup>7</sup> Benne' we' na' bechebe':

—Benne', quebe nu chilá' benne' cu'e neda' lu nisa na' ca dxedé dxebixre na. Tu tu lasa gate dxaca lazra' chu'a, benne' xula dxu'e nédxudxa.

<sup>8</sup> Jesús guzre' le':

—¡Guxasa! Becá'a da'a chiu', ne bexíaj.

<sup>9</sup> La' ná'queze bexaca benne' we' na', na' bequ'e da'a chee', ne guzú lawe' dxedé'. Zra na' naca zra dxulupá'ana judío ca', <sup>10</sup> na' benne' judío ca' gulé'e bénnea' bexaque':

—Na'a naca na' zra dxupá'anadxu. Quebe naca na' gu'u da'a chiu'.

<sup>11</sup> Na' benne' na' bechebe':

—Bénnea' bexune' neda' guzre' neda': "Becá'a da'a chiu', ne bexíaj."

<sup>12</sup> Nadxa buluchebe' le':

—¿Nuzra na' guzre' lue': Becá'a da'a chiu', ne bexíaj?

<sup>13</sup> Benne' na' quebe nézene' nu bénnea' bexune' le' lawe' da ba zexíaj Jesús lávela benne' zan ca' zaj zre'e na'. <sup>14</sup> Ca gudé na' Jesús bezrague' bénnea', dxedé' chale'aj xudau', na' guzre' le':

—¡Gunná'xque! Ba bexacu' na'a. Québedxa gunu' dul-la, chee' quebe bi sacu' xetú da wál-ladxa.

<sup>15</sup> Nadxa benne' na' bezé'e zexíaje', na' bzenne' judío ca' bexún Jesús le'. <sup>16</sup> Chee' le' na' benne' judío ca' guláu zi' xuzre' Jesús, ne gulaca lazre' xelúti'e Le' lawe' da dxune' da caní lu zra dxulupá'ane'. <sup>17</sup> Jesús guzre' benne' ca':

—Dios, Xra', tu dxúnqueze' zrin, na' neda' dxuna' zrin.

<sup>18</sup> Chee' le' na' benne' judío ca' gulaca lázredxe' xelúti'e Jesús lawe' da quegá tuze dxuzúe' chalá'ala da nadxixruj bea na' chee' zra dxulupá'ane', na' cá'anqueze dxun cuine' ca' Dios gate gunné' Dios nácaqueze' Xre'.

### *Xel-la' dxenná bea da napa Zri'ine Dios*

<sup>19</sup> Nadxa Jesús guzre' benne' judío ca':

—Da li dxapa' le'e, neda', Zri'ine Dios, quebe gaca bi guna' cheézqueza'. Tuze dxuna' da dxelé'eda' dxun Xra'. Xúgute da dxun Xra', cá'anqueze dxuna' neda', Zri'ine'. <sup>20</sup> Dios, Xra', nazri'ine' neda', Zri'ine', ne dxulé'ene' neda' xúgute da dxúnqueze' Le', na' gulé'ene' neda' da zaj nácadxa szren ca da ca' dxuna', na' xebánequezle le'e ca' xelaca na. <sup>21</sup> Ca dxun Xradxu Dios, dxusebané' benne' gate, ne dxuxunézruje' xel-la' nabán chee', cá'anqueze neda', Zri'ine', dxuxunézruja' xel-la' nabán chee' benne' ca' dxaca lazra' xunézruja' na. <sup>22</sup> Xradxu Dios quebe dxuchi'e nu benne', san ba benne' neda', Zri'ine', xel-la' dxenná bea guchi'a da dxelún tu tu bénneache, <sup>23</sup> chee' xelapa xúgute benne' neda', Zri'ine', ba lá'ana, cáteze na' dxelape' ba lá'ana Dios, Xra'. Nu benne' quebe dxape' ba lá'ana neda', Zri'ine', cá'anqueze quebe dxape' ba lá'ana Xradxu Dios nasele' neda'.

<sup>24</sup> Da li dxapa' le'e, benne' dxenne' da dxennéa' neda', ne dxéajle'e chee' Dios nasele' neda', benne' nigá nape' xel-la' nabán da zexíj canna, na' quebe cuía xi'e lawe' da ba bedxúaje' lu na' xel-la' gate, ne ba zue' lu xel-la' nabán. <sup>25</sup> Da li dxapa' le'e, wazrín zra, ne ba dxezrín zra na' gate benne'

gate ca' xelenne' chi'a neda', Zri'ine Dios, na' benne' xuluzúa xrtizra' welaca bánqueze'. <sup>26</sup> Xráqueza' nape' xel-la' dxenná bea xunézruje' xel-la' nabán da naca na li lazre' chee' bènneache, ne cá'anqueze ba benne' neda', Zri'ine', xel-la' dxenná bea xunézruja' bènneache xel-la' nabán caní, <sup>27</sup> ne ba benne' neda' xel-la' dxenná bea guchi'a chee' bènneache lawe' da naca' Benne' Gulje' Bènneache. <sup>28</sup> Quebe xebánele chee' da nigá lawe' da zrin zra gate xúgute benne' gate xelenne' chi'a <sup>29</sup> xelexedxúaje' lu xedxu ba. Benne' ca' belune' da xrlátaje xelexebane' chee' xelape' xel-la' nabán da zeajlí canna. Benne' ca' belune' da calęla xelexebane' chee' xelebía xi'e.

*Da dxelunna bea na napa Jesús xel-la' dxenná bea*

<sup>30</sup> Na' gunná Jesús:

—Neda' quebe bi gaca guna' cheézqueza'. Neda' dxuchi'a chee' bènneache ca gunná bea Dios, Xra', neda', na' ca dxuchi'a naca na xrlátaje lawe' da quebe dxuna' ca da dxaca lázrequeza' neda'. Dxuna' ca da dxaca lazre' Xra', nasele' neda'. <sup>31</sup> Che neda' dxexecheba' da nácaze cheéqueza', da dxennéa' quebe naca na da dxunna bea na. <sup>32</sup> Zua tu benne' xula dxexechebe' da nácaqueze chia', na' da dxenne' naca na da dxunna bea na. <sup>33</sup> Le'e gusel-lale benne' xeajlechebe' Juan, na' ca da bechebe' naca na da li. <sup>34</sup> Da dxunna bea na da dxuxrén lazra' neda' quebe naca na chee' bènneacheze. Dxapa' le'e da nigá chee' lale le'e. <sup>35</sup> Juan na' guque' ca tu xi' da gula na, ne bsení na, na' le'e bezaca ba lázrele lu xi' na' tu chí'idau'. <sup>36</sup> Zua tu da dxunna bea na chia' neda', da nácadxa szren ca da bchalaj Juan. Da ca' dxuna' neda', da bsebaga Xra' neda' dxuna'. Da caní dxelunna bea na da li Dios, Xra', gusel-le' neda'. <sup>37</sup> Cá'anqueze Xra' nasele' neda' dxexechebe' chia'. Lácala ba bchalaj Le', le'e quebe ne xénele chi'e, ne quebe ne le'ele Le', <sup>38</sup> ne quebe nuzúale dizra' chee' xichaj lázrdaule lawe' da quebe dxéajlele chia' neda', nasele' Xra' neda'. <sup>39</sup> Le'e dxusédele du lázrele da naxúaj na lu xiche chee' Dios lawe' da dxéquele xezrélele xel-la' nabán da zeajlí canna lu xiche na', na' da naxúaj na lu xiche chee' Dios dxuchalaj na ca naca chia' neda'. <sup>40</sup> Le'e quebe dxaca lázrele xídale naga zua' neda' chee' gápale xel-la' nabán na'.

<sup>41</sup> 'Neda' quebe dxezi'a xel-la' ba lá'ana ca da dxelunna bènneache, da quebe naca na li lazre'. <sup>42</sup> Neda' núnbe'a le'e, ne nezda' quebe nazrí'ile Dios. <sup>43</sup> Bla'a neda' waláz chee' Dios, Xra', na' le'e quebe dxezi' lu na'le neda'. Che za' tu benne' lu da naca cheézqueze', benne' na' wazí' lu na'le. <sup>44</sup> ¿Ájazra gaca chéajlele le'e chia' che dxunle zrin chee' xelapa ljuwézele le'e ba lá'ana, ne quebe dxue lázrele sile xel-la' ba lá'ana da dxunna Dios tu licha'? <sup>45</sup> Quebe guéquele néda'queza' gusebaga' le'e zria lau Dios, Xra'. Da gusebaga le'e zria naca na da ba gunná Moisésqueze, da na' dxuxrén lázrele guselá na le'e. <sup>46</sup> Che da li guxéajlele le'e chee' da gunná Moisés, cá'anqueze chéajlele chia' neda' lawe' da bzuaj Moisés ca naca chia' neda'. <sup>47</sup> Na'a, che quebe dxéajlele chee' da bzuaj le', ¿ájazra gaca chéajlele chee' da dxapa' le'e?

## 6

*Jesús dxugawe' chi xun gaxúa benne' biu*  
(Mt. 14.13-21; Mr. 6.30-44; Lc. 9.10-17)

<sup>1</sup> Ca gudé na' guxíaj Jesús xecha la'a dxu'a nísadau' chee' Galilea, da nazíqueze le na nísadau' chee' Tiberias. <sup>2</sup> Benne' zante zjácálene' Jesús



lawe' da ba belelé'ene' xel-la' waca zren ca' da dxun Le', dxexune' benne' we' ca'. <sup>3</sup> Nadxa Jesús guluéne' tu lu xi'a, na' gudxé'e na' nen benne' ca' dxusédené'. <sup>4</sup> Ba zua gagu Laní Pascua chee judío ca'. <sup>5</sup> Gate ble'e Jesús benne' zan ca' zá'aque' zeaj nawe' Le', na' guzre' Felipe:

—¿Gazra cheajxridxu da xelagu benne' zan caní?

<sup>6</sup> Gunná caní Jesús chee la' bi nna Felipe, lawe' da ba neze Jesús ca da gune'. <sup>7</sup> Nadxa bechebe Felipe:

—Che sidxu xeta xtila lazruj da sidxu chee chupa gaxúa zra, quebe gueque na xelezí' benne' caní late' weaj.

<sup>8</sup> Nadxa Andrés, xetú benne' ca' dxuséde Jesús, ne naque' bi biche Simón Pedro, guzre' Jesús:

<sup>9</sup> —Ze tu bi cuide' nigá nápabe' gazxu' xeta xtila zrua' cebada, ne chupa bela. ¿Ajzra gun da nigá gueque na chee xúgute' benne' caní?

<sup>10</sup> Nadxa gunná Jesús:

—Le xe xúgute' xelebé'e.

Naca lu daca lataj na', na' gulebé' ca du chi xun gaxúa benne' biu. <sup>11</sup> Nadxa gucá'a Jesús xeta xtila ca', na' ca gudé guzre' Dios “Xcalenu”, bnézruje' na benne' ca' dxusédené', na' benne' caní gulísie' na láwele benne' zan ca' zaj dxé'e na'. Cá'anqueze ben Jesús chee bela ca', na' bnézruje' ca da gulaca lazre' benne' ca'. <sup>12</sup> Gate gulélaje benne' ca', na' Jesús guzre' benne' ca' dxusédené':

—Le xutupa da bízrujdu ca' da dxelexegá'ana na, chee quebe bi gaca dítaje.

<sup>13</sup> Belexequé'e na, na' buluzré'e chazrinnu xcuite da bizruj ca' zaj nagá'ana na chee da gazxu' xeta xtila zrua' cebada ca'. <sup>14</sup> Nadxa benne' zan ca', gate belelé'ene' xel-la' waca zren nigá da ben Jesús, gulenné':

—Da li benne' nigá naque' bènea' guchálaje' waláz chee Dios, bènea' dxal-la' le'e.

<sup>15</sup> Guque bé'ene' Jesús dxelaca lazre' xeleché'e Le' xadía chee xuluzúe' Le' ca benne' wenná bea, na' bezé'e na', ne begüéne' lu xi'a sibe na' chee sue' leze'.

*Jesús dxedé' lawe' nísadau'*

*(Mt. 14.22-27; Mr. 6.45-52)*

<sup>16</sup> Gate ba za xrinne, benne' ca' dxuséde Jesús belétaje' dxu'a nísadau', <sup>17</sup> na' gulu'e lu da dxedá lawe' nísadau', ne gulezú lawe' zjaque' xeledé' xechalá'a nísadau' chee xelezrine' xezre Capernaum. Ca guxrinne, quebe ne xezrín Jesús na'. <sup>18</sup> Nadxa guzú lau dxaca tu be' bduu' lawe' nísadau' na', na' xeajxruza chee nísadau' na' guxásale'e na. <sup>19</sup> Gate ba guledé' lu nísadau' na' catite sadxu tu chi'i zren, na' belelé'ene' Jesús ba dxezrine' naga ziaj da dxedá lawe' nísadau', dxezé'e lawe' nísadau', na' belezrebe'.

<sup>20</sup> Nadxa Jesús guzre' benne' ca':

—Neda' na'. Quebe zrébele.

<sup>21</sup> Nadxa lu duté xel-la' dxelebé gulezí' lu ne'e Le' lu da dxedá lawe' nísadau' na', na' chadite belezrine' lu xezr la xu naga zjaque'.

*Benne' zan ca' dxelexíaje' Jesús*

<sup>22</sup> Zra xula benne' zan ca', benne' belexegá'ana xecha la'a nísadau', guleque bé'ene' ba zeajxaca benne' ca' dxuséde Jesús lu da dxedá lawe' nísadau' tu licha' da dxé' chalá'a na', na' Jesús quebe guxíajlene' benne' ca'. <sup>23</sup> Dxácaté na' xezícala da dxeledá lawe' nísadau', da ca' beledxúaj na

xezre Tiberias, belezrín na tu lataj da zua gáguze naga gulawę' xeta xtila na' ca gudę guzre Xránadxu Dios: "Xcalenu'." <sup>24</sup> Cheę le' na' gate benne' zan ca' guleque bé'ene' québedxa zua Jesús na', ne cá'aqueze benne' ca' dxusédene', na' gulu'ę lu da dxeledá lawe' nísadau', ne xjaque' xezre Capernaum zeajlexedílaje' Jesús.

*Jesús naque' xeta xtila da dxunna na xel-la' nabán li lazre'*

<sup>25</sup> Gate benne' zan ca' belezrine' xecha la'a dxu'a nísadau', na' belexzrague' Jesús, ne buluchebe' Le':

—Benne' Wesęde, ¿bata bla'u nigá?

<sup>26</sup> Jesús guzre' benne' ca':

—Da li dxapa' le'e, dxexílajle le'e neda' lawe' da gudágule, ne béljele, ne quegá lawe' da ble'ele xel-la' waca ca' da ble'eda' le'e. <sup>27</sup> Quebe cue'le gunne xue sile da gágule da te cheę na. Le cue' gunne xue sile da gágule da zeajlí canna, da na' gunna na le'e xel-la' nabán da zeajlí canna. Da nigá naca na xel-la' wagu da gunna' neda', Benne' Gulje' Bénneache, le'e, lawe' da bzua Xra' Dios nen neda' da dxunna bea na naca' Zrí'ine'.

<sup>28</sup> Nadxa buluchebe' Le':

—¿Bi dxal-la' guntu' cheę gaca ca da dxaca lazre' Dios guntu'?

<sup>29</sup> Jesús bechebe':

—Da dxaca lazre' Dios gunle naca na chéajlele chia' neda', naca' Bénnea' gusel-la Dios.

<sup>30</sup> Nadxa buluchebe' Le':

—¿Bizra xel-la' waca gunu' cheę le'entu' na, na' chéajlentu chiu'? ¿Bizra dxunu'? <sup>31</sup> Xra xrtauntu' ca' gulawę' xeta maná le'ę xixre' lawe' lataj, ca naxúaj na lu xiche cheę Dios, dxenná na: Dios bgawę' benne' ca' xeta xtila da za xabáa.

<sup>32</sup> Bechebe Jesús:

—Da li dxapa' le'e, quegá Moisés na' bnézruje' benne' ca' xeta xtila da za xabáa. Dios, Xra', dxunne' le'e xeta xtila da za xabáa da naca na li lazre'. <sup>33</sup> Xeta xtila na' da dxunna Dios le'e naca na Bénnea' bétaje' xabáa, ne dxunézruje' cheę bénneache xel-la' nabán li lazre'.

<sup>34</sup> Nadxa benne' ca' gulę'ę Le':

—Xran, tu bénnazqueze cheęntu' xeta xtila caní.

<sup>35</sup> Jesús guzre' benne' ca':

—Neda' naca' xeta xtila da dxunna na xel-la' nabán li lazre'. Benne' xide' naga zua' neda' cabátadxa tune', na' benne' chéajle'ę chia' cabátadxa bílene'. <sup>36</sup> Naca na ca ba gucha' le'e. Le'e na' quebe dxéajlele chia', lácala ba ble'ele neda'. <sup>37</sup> Xúgute' benne' ca' dxunna Xra' neda', xelélé'ę lawa', na' benne' ca' xelélé'ę naga zua', quebe guzúa' benne' ca' chala'ala. <sup>38</sup> Neda' guzá'a xabáa, quegá cheę guna' ca dxaca lázrequeza' neda'. Bla'a cheę guna' ca da dxaca lazre' Xra', gusel-le' neda'. <sup>39</sup> Da dxaca lazre' Xra', nasel-le' neda', naca na cheę quebe gunitia' netú benne' ca' ba benne' chia'. Nacan cheę gusebana' benne' ca' lu zra bzębe. <sup>40</sup> Da dxaca lazre' Xra', nasel-le' neda', naca na cheę xelapa bénneache xel-la' nabán da zeajlí canna, xúgute' benne' ca' xelenné'ę neda', Zrí'ine Dios, ne xelęajle'ę chia' neda', na' cheę gusebana' neda' benne' ca' lu zra bzębe na'.

<sup>41</sup> Gate belenne' da nigá, na' judío ca' gulezú lawe' dxelezí tize' Jesús lawe' da gunné': "Neda' naca' xeta xtila da betaj xabáa." <sup>42</sup> Nadxa gulenné':

—¿Quegá benne' nigá zri'ine José? Dxi'u núnbeadxu xra xrne'e. ¿Bizr chee na' dxenné' bétajé' xabáa?

<sup>43</sup>Nadxa Jesús guzre' benne' ca':

—Québedxa si tízrale. <sup>44</sup>Quebe nu benne' gaca xide' naga zua' neda', che quebe xedajgúa Xra' nasele' neda' bènnea', na' neda' gusebana' bènnea' lu zra bzebe na'. <sup>45</sup>Lu xiche ca' naga naxúaj da gulenná benne' ca' buluchalaje' waláz chee Dios, dxenná na: Dios gusedene' xúgute bènneache. Ca' gaca na, xúgute benne' ca' dxuluzé nague' ca da dxusede Xra', dxelelé'e naga zua'.

<sup>46</sup>'Quebe ne le'e nu benne' Xra'. Benne' tu licha', bènnea' blé'ene' Le', naca bènnea' guzé'e naga zua Dios. <sup>47</sup>Da li dxapa' le'e, nu benne' dxéajlé'e chia' neda' nape' xel-la' nabán da zeajlí canna. <sup>48</sup>Neda' naca' xeta xtila da dxunna na xel-la' nabán li lazre'. <sup>49</sup>Xra xrtáule ca' gulawe' xeta maná le'e xixre' lawe' lataj, na' gudé na' xúgute benne' ca' gulate'. <sup>50</sup>Xeta xtila nigá naca na da za xabáa, na' che nu benne' gawe' na, quebe gatie' tu chí'ize. <sup>51</sup>Néda'queza' naca' xeta xtila da dxunna na xel-la' nabán da za xabáa. Benne' gawe' xeta xtila nigá waca bánqueze' chadía chacanna. Xeta xtila na' da dxunna' neda' naca na belá' dxen cheézqueza', da gunna' chee xelaca bánqueze bènneache.

<sup>52</sup>Nadxa benne' judío ca' gulezú lawe' dxuluchébe ljwezre', dxelenné':

—¿Ájazra gun benne' nigá, gunne' dxi'u belá' dxen cheézqueze' chee gágudxu na?

<sup>53</sup>Jesús guzre' benne' ca':

—Da li dxapa' le'e, che le'e quebe gágule belá' dxen chia' neda', Benne' Gulje' Bènneache, ne che quebe xí'ajle dxen chia', quebe gápale xel-la' nabán li lazre'. <sup>54</sup>Benne' dxawe' belá' dxen chia', ne dxí'aje' dxen chia' nape' xel-la' nabán da zeajlí canna, na' neda' gusebana' bènnea' lu zra bzebe na'. <sup>55</sup>Belá' dxen chia' naca na xel-la' wagu li lazre' chee bènne'du xu'ule, na' dxen chia' naca na da xele'aj bènneache da naca na li lazre'. <sup>56</sup>Benne' dxawe' belá' dxen chia', ne dxí'aje' dxen chia', naque' neda' tuze, na' néda'queza' naca' bènnea' tuze. <sup>57</sup>Xra' nasele' neda' xu'u lu ne'e xel-la' nabán li lazre', na' neda' naca bana' ne chee Le'. Cá'anqueze bènnea' dxawe' da naca chia' neda' gaca bánqueze' ne chia' neda'. <sup>58</sup>Da nigá naca na xeta xtila da za xabáa. Xeta xtila nigá quebe naca na ca xeta maná da gulagu xra xrtáule ca', na' gudé na' gulate xúgute'. Benne' dxawe' xeta xtila nigá waca bánqueze' chadía chacanna.

<sup>59</sup>Bsede Jesús ca naca da caní naga zaj zra' benne' zan ca' lu xu'u naga dxelezraga bènneache chee xezre Capernaum.

*Ca naca dizra' na' da dxunna na xel-la' nabán da zeajlí canna*

<sup>60</sup>Gate belén benne' zan ca' da nigá dxusede Jesús, na' benne' ca' zjácate Jesús gulenné':

—Dizra' caní dxenná Jesús zaj nácale'e na stebe sidxu. ¿Nuzra gaca gun caní?

<sup>61</sup>Guque bé'ene' Jesús dxelenné' chee xrtizre', na' bchebe' benne' ca':

—¿Dxuzúa dizra' nigá le'e stebe? <sup>62</sup>¿Ájazra gunle checa' lé'ele neda', Benne' Gulje' Bènneache, xegüéna' xabáa naga zua' nédxute? <sup>63</sup>Be' naca na da dxunna xel-la' nabán li lazre'. Da naca na belá' dxen quebe bi zaca na. Dizra' ca' da ba gucha' le'e zaj naca na chee Be', ne zaj naca na da dxelunna na xel-la' nabán li lazre'. <sup>64</sup>Bál-lale le'e quebe dxéajlé'e chia'.

Caní gunná Jesús lawe' da nézenē' nédxudaute nu benne' ca' quebe dxeléajle'e chee', ne nua' gudé Le' lu na' benne' guledábage' Le'. <sup>65</sup> Nadxa gunná Jesús:

—Chee le na' gucha' le'e, quebe nu benne' gaca xide' naga zua' neda' che quebe xedajgúa Xra' bēneea'.

<sup>66</sup> Lu zra ná'queze benne' zan ca', benne' xjácálene' Jesús, québedxa xjácálene' Le'. <sup>67</sup> Nadxa Jesús bchebe' benne' chazrinnu ca' dxusédene', gunné':

—¿Cá'anqueze le'e dxaca lázrele xexíajle?

<sup>68</sup> Bechebe Simón Pedro:

—Xran, ¿nuzra chéajlentu'? Dizra' chiu' naca na da dxunna na xel-la' nabán da zeajlí canna. <sup>69</sup> Netu' dxéajlentu' chiu', ne nézentu' nacu' Cristo, Zri'ine Dios ban.

<sup>70</sup> Jesús bechebe':

—Neda' gucá'a le'e, benne' chazrinnu, na' tu benne' ládujla le'e xu'e da xriwe'.

<sup>71</sup> Da nigá gunná Jesús, bchálaje' ca naca chee Judas Iscariote, zri'ine tu benne' le' Simón, lawe' da gudé Judas nigá Jesús lu na' benne' guledábage' Le'. Naque' tu benne' chazrinnu ca' dxusede Jesús.

## 7

*Benne' biche Jesús quebe dxeléajle'e chee'*

<sup>1</sup> Gudé na' gudé Jesús naga nababa Galilea. Quebe guca lazre' tee' naga nababa Judea lawe' da dxelaca lazre' judío blau zaj zre'e na' xelútie' Le'. <sup>2</sup> Ba za laní gate judío ca' dxelezúe' lu xu'u laga' ca'. <sup>3</sup> Chee le na' bi biche Jesús gulé'e Le':

—Quebe xegá'anu' nigáze. Bexíaj Judea, chee cá'anqueze benne' ca' dxeléajle' chiu' zaj zre'e na' gaca xeledé'ene' ca da dxunu'. <sup>4</sup> Che nu benne' dxaca lazre' xelúnbe'e bēneache le', quebe dxune' da ca' bagácheze. Lawe' da dxunu' Lue' da caní, ben na lau xúgute bēneache.

<sup>5</sup> Caní gulenné' lawe' da quebe dxeléajle' benne' biche' ca' chee Jesús. <sup>6</sup> Nadxa Jesús guzre' benne' ca':

—Quebe ne zrin zra cha'a na'. Chee le'e bíteteze zra waca chéajle. <sup>7</sup> Benne' ca' zaj naca chee xezr la xu nigá quebe gaca xelecuídenē' le'e. Dxelecuídenē' neda' lawe' da dxulé'eda' neda' naca da calela da dxelún benne' ca'. <sup>8</sup> Le chjaca le'e laní na'. Quebe sa'a neda' na'a lawe' da quebe ne zrin zra cha'a.

<sup>9</sup> Ca gudé guzre Jesús benne' ca' da nigá, na' begá'ane' naga nababa Galilea na'.

*Jesús dxezrine' laní gate judío ca' dxelezúe' xu'u laga' ca'*

<sup>10</sup> Ca gudé besía'aca benne' biche Jesús, na' cá'anqueze Le' guxíaje' laní na'. Bagácheze guxíaje' chee quebe nu le'e Le'. <sup>11</sup> Benne' xíchaje' chee judío ca' belexíajle' Jesús lu laní na'. Dxelenné':

—¿Gazra zua bēneea'?

<sup>12</sup> Ládujla benne' zan ca', benne' zan buluchálaje' ca naca chee Jesús. Bal-le' gulenné': “Naque' benne' xrlátaje.” Xebal-le' gulenné': “Quebe naque' xrlátaje lawe' da dxezi xe'e bēneache.”

<sup>13</sup> Quebe nu benne' bchálaje' caníqueze ca naca chee' lawe' da dxelezrebe' da xelún benne' xíchaje' ca' chee judío ca'.

<sup>14</sup> Ba zeaj gachaj laní na' gate guxú'u Jesús lu chale'aj xudau', na' guzú lawe' dxusédene' benne' zaj zre'e na'. <sup>15</sup> Belexebane benne' judío ca', dxelenné':

—¿Ájazra na' benne' nigá da zante nézene', ne quebe bsédie' chee xudau'?

<sup>16</sup> Bechebe Jesús:

—Da dxusédeda' neda' le'e quebe naca na cheézqueza'. Naca na chee Xra' nasele' neda'. <sup>17</sup> Che nu benne' dxaca lazre' guné' ca da dxaca lazre' Dios, na' wanézene' che da dxusédeda' naca na chee Dios, u che dxennéa' ca da naca cheézqueza'. <sup>18</sup> Benne' dxuchálaje' da naca cheézqueze' dxuné' na chee xelapa bénneache le' ba lá'ana. Bénnea' dxue lazre' xelapa bénneache ba lá'ana bénnea' gusel-le' le', benne' nigá dxenné' da li, ne quebe bi dxenné' da naca na da wen lazre'.

<sup>19</sup> 'Moisésqueze benne' le'e da nadxixruj bea na, na' netule le'e quebe dxuzúale dizra' chee da nadxixruj bea na na'. ¿Bizr chee na' dxaca lázrelej gútele neda'?

<sup>20</sup> Belexechebe benne' zan ca':

—Xu'u lue' be' xriwe'. ¿Núzraqueze dxaca lazre' gutie' lue'?

<sup>21</sup> Jesús guzre' benne' ca':

—Tu xel-la' waca bēna' lu zra dxupá'anale, na' xúgutele le'e dxebénele.

<sup>22</sup> Moisés benne' da zéajlele, dxechúgule late' weaj bēla' chee bēl-la' dxen chee zri'inele bi biudu ca' chee xelexegá'anabe' xrlátaje lau Dios. Da nigá da dxunle quebe guzú lau na gate na' zua Moisés. Guzú lau na gate zaj zra' xra xrtau Moisés cá'ante. Chee le' na' le'e dxechúgule late' bēla' chee bēl-la' dxen chee tu bi biúdau' chee xegá'anabe' xrlátaje lau Dios lácala naca zra dxupá'anale. <sup>23</sup> Che caní dxunle lu zra dxupá'anale chee quebe gusanle ca naca da bdxixruj be'e Moisés, ¿bizr chee na' dxezrá'ale neda' lawe' da bexuna' dutē bēl-la' dxen chee tu benne' gate naca zra dxupá'anale?

<sup>24</sup> Quebe guchí'ale le'e chee tu da dxun benne' ca naca da dxelé'ezele. Gate bi da guchí'ale, le gun na lu da naca xrlátaje.

*Jesús dxuchálaje' chee naga ze'e*

<sup>25</sup> Nadxa bal-la benne' ca' zaj zre'e Jerusalén gulezú lawe' dxuluchebe ljwezre':

—¿Quegá benne' nigá bēnnea' dxelexílaje' chee xelútie' le'? <sup>26</sup> Nigá zué' dxuchálaje' lówela bēnneache, na' quebe nu bi dxē Le'. ¿Zaj neze benne' xíchaje ca' da li naca benne' nigá Cristo, Bénnea' nasele-la Dios? <sup>27</sup> Netu' nézentu' ga za' benne' nigá. Gate xida Cristo, quegá nu neze ga ze'e.

<sup>28</sup> Jesús zué' dxusédene' benne' ca' chale'aj xudau', na' gate benne' da nigá, na' gunné' zizraj:

—Dxennale núnbeale neda', ne dxennale nézele ga za'a. Bla'a nigá, quegá cheézqueza'. Bénnea' nasele' neda' naque' li lazre', na' Bénnea' quebe núnbeale le'e. <sup>29</sup> Neda' núnbe'a Le' lawe' da za'a naga zua Le', na' Le' gusel-le' neda'.

<sup>30</sup> Nadxa gulaca lazre' xelēl-le' Jesús. Quebe nu gudēla Le' lawe' da quebe ne zrin zra chee xelútie' Le'. <sup>31</sup> Benne' zan guléajle'e chee Jesús, na' gulenné':

—Gate xida Cristo, ¿gúnljadxē' xel-la' waca zrentē ca da dxun benne' nigá?

*Benne' fariseo ca' dxelesel-le' xra'aga wen zrin chee' chee xelēl-le' Jesús*

<sup>32</sup> Benne' fariseo ca' belenne' ca da dxelenná bënneache ca naca chee Jesús, na' le', ne benne' xíchaję ca' chee bxruze ca' gulesel-le' xra'aga wën zrin chee xudau' chee xełel-le' Jesús. <sup>33</sup> Nadxa gunná Jesús:

—Wazúalęna' le'e xetú chí'idau', na' xezrínqueza' naga zua Bénnea' gusél-le' neda'. <sup>34</sup> Le'e wexilajle neda', na' quebe xezrélele neda', lawe' da quebe gaca sa'le naga sua' neda'.

<sup>35</sup> Nadxa benne' judío ca' gulezú lawe' dxuluchębe ljwezre':

—¿Gazra cheaj benne' nigá, naga quebe gaca xezreldxu Le'? ¿Waxíaję' naga zaj zra' benne' judío ca' zaj nase dinnaję' ládujla benne' xezr la xu ca' chee gusédenę' benne' quebe zaj naque' judío? <sup>36</sup> ¿Bizra zéaję da nigá guzre' dxi'u: Wexilajle neda', na' quebe xezrélele neda' lawe' da quebe gaca sa'le naga sua' neda'?

*Jesús dxuchálaję' chee xegu nisa da dxunna xel-la' nabán li lazre'*

<sup>37</sup> Zra bzebe chee laní na' naca na zra blaudxa. Lu zra na' guzę Jesús, na' gunné' zizraj:

—Che nu benne' dxeбіłene', dxal-la' xide' naga zua' neda', na' xí'aję'. <sup>38</sup> Naca na ca naxúaj na lu xiche chee Dios, dxennę': "Benne' dxéajle'e chia', lu lázrdawę' galaj xegu nisa da gunna na xel-la' nabán."

<sup>39</sup> Da nigá gunná Jesús ca naca chee Be' Lá'azxa, Bénnea' xezezí' benne' ca' xeléajle'e chee Jesús, lawe' da quebe ne la' Be' Lá'azxa lawe' da quebe ne xegá'ana szren Jesús naga zua Xre'.

*Bënneache dxelaque' chupa la'a*

<sup>40</sup> Bal-la bënneache, gate belenne' da nigá, gulennę':

—Da li benne' nigá naque' Bénnea' guchalaję' waláz chee Dios, Bénnea' dxal-la' xide'.

<sup>41</sup> Xebal-le' gulennę':

—Benne' nigá naque' Cristo, Benne' guchebe lazre' Dios sel-le'.

Xebal-le' gulennę':

—¿Waca Cristo benne' Galilea? <sup>42</sup> Lu da naxúaj na lu xiche chee Dios dxenná na gaca Cristo zri'ine zre sua David, ne gaque' benne' xezre Belén, xezre na' naga gulaj David.

<sup>43</sup> Ca'an guca, gulaca benne' ca' chupa la'a ne chee Jesús. <sup>44</sup> Bal-le' gulaca lazre' xełel-le' Jesús, na' quebe nu bexazre gunę' na.

*Benne' xíchaję ca' chee judío ca' quebe dxeléajle'e chee Jesús*

<sup>45</sup> Xra'aga wën zrin ca' chee xudau' belexezrine' naga zaj zra' fariseo ca', ne benne' xíchaję ca' chee bxruze ca', na' benne' caní buluchębe' xra'aga wën zrin ca':

—¿Bizr chee na' quebe guchele bënnea'?

<sup>46</sup> Belexechebe xra'aga wën zrin ca':

—Quebe ne guchalaj nu bënneache ca dxuchalaj benne' nigá.

<sup>47</sup> Nadxa fariseo ca' gulę'e xra'aga wën zrin ca':

—¿Cá'anqueze le'e bele lataj guzí xe'e le'e? <sup>48</sup> Quebe nu ne chéajle chee bënnea', benne' xíchaję caní, ne cá'anqueze benne' fariseo ca'. <sup>49</sup> Benne' ca' dxeléajle'e chee bënnea' quebe zaj núnbe'e da nadxixruj bea na, ne zaj nabía xi'e.

<sup>50</sup> Nicodemo, bënnea' guxíaję' xeajnnę'e Jesús chizrela naque' tu benne' fariseo ca', na' guzre' benne' ca':

51 —Cateze dxenná da nadxixruj bea cheedxu quebe gaca guzría xidxu tu benne' che quebe ne xénedxu xechebe' chee nézedxu che bi da nabague'e.

52 Nadxa belexechebe benne' ca':

—¿Nácaquezu' lue' benne' Galilea? Gunná' xanne' da naxúaj na lu xiche chee Dios, na' le'enu' netú benne' dxuchalaje' waláz chee Dios quebe ne gálaje' naga nababa Galilea, naga zaj zra' bènneache quebe zaj naca xánnie' judío.

53 Nadxa tu tu benne' ca' xeajxaque' lizre'.

## 8

1 Na' Jesús guzé'e zéaje' lu Xi'a Xaga Olivo.

*Jesús dxuchálajlene' tu nu'ula dxune' dul-la dxíchaje' xrba chee xel-la' nuchaga na'*

2 Zra xula, gate guxaní', na' bezrín Jesús chale'aj xudau' na'. Xúgute benne' ca' gulebigue' naga zua Jesús, na' Le' gudxé'e, ne guzú lawe' dxusédené' benne' ca'. 3 Nadxa benne' ca' dxuluxuzájle'e da nadxixruj bea Dios, ne benne' fariseo ca' guleché'e tu nu'ula naga zua Jesús, belelé'ene' le' dxune' dul-la dxíchaje' xrba chee xel-la' nuchaga na'. Buluzé' nu'ula na' laduj benne' zaj zre'e na', 4 na' gulé'e Jesús:

—Benne' Wesede, nu'ula nigá blé'entu' le' dxune' dul-la dxíchaje' xrba chee xel-la' nuchaga na'. 5 Da bdxixruj be'e Moisés dxenná be'e netu' gútentu' nu'ula caní, güentu' le' xiaj. ¿Bizra dxennáu' Lue'?

6 Caní gulenná benne' ca' chee xuludxixre' Jesús chee xelezéquene' xelagu zria Le'. Nadxa gudxé' luche Jesús, ne guzú lawe' dxuzúaje' lu xu nen zrube ne'e. 7 Benne' ca' buluchébequeze' Jesús, na' Le' bezé' dxé'e benne' ca':

—Nútetezla le'e quebe nabágale dul-la, waca su laule güele nu'ula nigá xiaj.

8 Na' bebé' luche Jesús, ne bzúajqueze' lu xu. 9 Benne' ca', gate belenne' da nigá, quebe bzua xichaj lázrdawe' le' zrize, na' belexedxúaje' tu weaje'. Belexedxúaj za'a benne' gúlaxa, na' ca' belexedxúaj xúgute benne' ca' dxelagu zrie' nu'ula', na' begá'ana Jesús tuze' nen nu'ula na', ze' laduj benne' ca' dxuluzé nague' chee'. 10 Nadxa bezé' Jesús, ne gate québedxa nu benne' ca' ble'e Jesús, benne' dxulagu zrie' nu'ula na', nadxa guzre' le':

—Nu'ula, ¿gazra na' benne' ca' gulagu zrie' lue'? ¿Quebe nu chilá' benne' guzría xi'e lue'?

11 Nu'ula na' gunné':

—Quebe nu chilá', Xran.

Nadxa Jesús guzre' nu'ula na':

—Cá'anqueze neda', quebe guzría xi'a lue'. Bexíaj, ne québedxa gunu' dul-la.

*Jesús dxusení'e lu xichaj lázxdau bènneache*

12 Bchálajle Jesús benne' ca' xecha lasa, gunné':

—Neda' naca' xel-la' naxaní' chee lu xichaj lázxdau bènneache. Benne' dxedálene' neda' gape' xel-la' naxaní' nigá da gunezruj na le' xel-la' nabán li lazre', na' cabata' tadxé' lu da chul-la chee dul-la da zaj nabague'.

13 Nadxa benne' fariseo ca' gulé'e Le':

—Lue' dxexechebu' cheézquezu', na' da dxexechebu' quebe bi zaca na.

14 Bechebe Jesús:

—Da dxexecheba' zaca na lácala néda'queza' dxexecheba' cheézqueza'. Neda' nezda' gala za'a, ne gala cha'a. Le'e quebe nézele gala za'a, ne gala cha'a. <sup>15</sup> Le'e dxuchi'ale cáteze dxenná xichaj lázrdaule. Bla'a neda', quegá chee guchi'a ca da dxun nu benne'. <sup>16</sup> Che dxuchi'a, dxuchi'a cáteze naca na, lawe' da quebe dxuchi'a néda'za'. Xra' nasele-łe' neda' dxuchi'e tu zren nen neda' ca naca da dxelún bénneache. <sup>17</sup> Lu da nadxixruj bea chee le'e naxúaj gate zaj zra' chupa benne' dxelechebe' tuz ca dxelenné', naca da li xrtizra' benne' ca'. <sup>18</sup> Néda'queza' dxexecheba' da naca cheézqueza', na' Xra' nasele-łe' neda', cá'anqueze dxexechebe' chia'.

<sup>19</sup> Nadxa benne' ca' buluchebe' Jesús:

—¿Ga na' Xrau'?

Jesús bechebe':

—Le'e quebe núnbeale da nácaqueza' neda', ne quebe núnbeaquezle Xra'. Chela da li núnbeale neda', cá'anqueze núnbeale Xra'.

<sup>20</sup> Da caní bchalaj Jesús dxácate na' dxusédené' bénneache chale'aj xudau' naga zaj nnita xi'ina dumí chee xudau'. Quebe nu gudela Le' lawe' da quebe ne zrin zra chee'.

*Dxenná Jesús: "Naga cha'a neda' quebe gaca sa'le le'e"*

<sup>21</sup> Nadxa Jesús guzre' benne' ca':

—Wexá'a neda', na' le'e xexilajle neda', na' wátele lu dul-la nabágale, lawe' da naga cha'a neda', le'e quebe gaca sa'le.

<sup>22</sup> Nadxa benne' judío ca' gulé ljwezre':

—¿Gute cuine', ne chee łe na' dxenné' quebe gaca chéajdxu naga cheaj Le'?

<sup>23</sup> Nadxa Jesús guzre' benne' ca':

—Le'e nácale chee zran xabáa nigá. Neda' naca' chee xabáa na'la. Le'e nácale chee xezr la xu nigá. Neda' quebe naca' chee xezr la xu nigá.

<sup>24</sup> Chee łe na' gucha' le'e wátele lu dul-la nabágale, lawe' da che quebe dxéajlele zúaqueza' neda', wátele lu dul-la nabágale.

<sup>25</sup> Nadxa benne' ca' buluchebe' Jesús:

—¿Nuzra nacu' Lue'?

Bechebe Jesús:

—Nácaqueza' ca ba gucha' le'e nédxudaute. <sup>26</sup> Déle'e da dxal-la' nnia' chee le, ne da dxal-la' guchi'a ca naca da dxunle. Bénnea' gusél-łe' neda' dxenné' da li, na' da dxapa' bénneache naca na da ba benda' gunné Le', lácala quebe dxezaca ba lázrelele na.

<sup>27</sup> Benne' ca' quebe guléajni'ine' dxuchálajle Jesús łe' ca naca chee Dios, Xre'. <sup>28</sup> Nadxa Jesús guzre' benne' ca':

—Gate le'e chísale sibe neda', Benne' Gulje' Bénneache, nadxa xúnbeale zúaqueza' neda', ne quebe bi dxuna' da naca cheézqueza'. Tuze dxenné' ca da ba ble'e Xra' neda'. <sup>29</sup> Bénnea' gusél-łe' neda' zúalequeze' neda'. Xra' quebe nucá'ane' neda' tuza' lawe' da tu dxúnzqueza' ca da dxezaca ba lazre' Le'.

<sup>30</sup> Ca gunná Jesús da caní, guléajle benne' zan chee'.

*Benne' zaj naque' chee Dios, ne benne' ca' nuxru dul-la łe'*

<sup>31</sup> Nadxa Jesús guzre' benne' judío ca', benne' dxeléajle'e chee':

—Che le'e se típale lu da dxapa' le'e, da li nácale neda' tuze. <sup>32</sup> Gúnbeale da li, na' da li na' guselá na le'e.



<sup>33</sup> Belexechebe benne' zan ca':

—Netu' nácantu' xrtia Abraham, ne quebe ne chú'untu' lu na' nu benne' ca benne' zaj nada'u. ¿Bizr chee na' dxennáu' Lue' lantu'?

<sup>34</sup> Jesús guzre' benne' ca':

—Da li dxapa' le'e, xúgute benne' dxelúnqueze' dul-la, dúl-laqueze na' nuxru na benne' ca'. <sup>35</sup> Nu benne' xu'e lu na' tu benne' ca benne' nada'u quebe tu súazqueze' xu'u na'. Zrí'inequeze bénnea' wazúatequezebe'. <sup>36</sup> Chee le na', che neda', Zrí'ine Xra', guselá' le'e, da li láqueze le'e. <sup>37</sup> Nezda' nácale le'e xrtia Abraham. Na'a dxaca lázrele gútele neda' lawe' da quebe dxezi' lu na'le da dxapa' le'e. <sup>38</sup> Neda' dxuchálaja' ca naca da ble'e Xra' neda', na' le'e dxunle ca da guzre xráqueze le'e.

<sup>39</sup> Belexechebe benne' ca':

—Xra xrtauntu' naca Abraham.

Na' Jesús guzre' benne' ca':

—Chela nácale da li xrtia Abraham, na' gunle ca da ben Abraham. <sup>40</sup> Lácala gucha' le'e da li da ble'e Xra' neda', le'e dxaca lázrele gútele neda'. Abraham cabata' bene' da caní. <sup>41</sup> Le'e dxúnqueze ca da dxun xráqueze.

Nadxa benne' ca' gulé'e Jesús:

—Netu' quebe nácantu' bi lan. Zua tuze Xrantu', Dios.

<sup>42</sup> Nadxa Jesús guzre' benne' ca':

—Chela naca Dios da li Xrale, le'e wazrí'ile neda' lawe' da za'a neda' naga zua Dios, ne zúaqueza' nigá. Quebe za'a da naca cheézqueza'. Dios nasele' neda'. <sup>43</sup> ¿Bizr chee na' quebe dxezéquele chéajni'ile da dxennéa'? Naca na lawe' da quebe dxaca lázrele xénele dizra' chia'. <sup>44</sup> Xráqueze le'e naca da xriwe'. Le'e nácale chee da na', ne dxaca lázrele gunle ca da dxaca lazre' le na. Da xriwe' na' naca na wete benne' nédxudauté. Cabata' dxenné na da li lawe' da quebe bi zua da li nen le na. Gate dxun lazre' na, dxenné na cáteze naca na, lawe' da tu dxun lázrequeze na, ne naca na da guzú lau na ben lazre' na. <sup>45</sup> Lácala dxapa' le'e da li, le'e quebe dxéajlele chia'. <sup>46</sup> ¿Núla le'e séquele gulé'ele nabaga neda' tu dul-la? Che dxennéa' da li, ¿bizr chee na' quebe dxéajlele chia'? <sup>47</sup> Benne' naque' chee Dios dxenne' dizra' chee Dios. Le'e quebe nácale chee Dios. Chee le na' quebe dxaca lázrele xénele chee Dios.

*Cristo ba zúaqueze' nédxudxa ca Abraham*

<sup>48</sup> Nadxa benne' judío ca' gulé'e Jesús:

—Da li dxennantu' gate dxennantu' nacu' benne' Samaria, ne xu'u be' xriwe'.

<sup>49</sup> Jesús bechebe':

—Quebe xu'a be' xriwe'. Neda' dxapa' ba lá'ana Xra' Dios, na' le'e dxuzúale neda' chala'ala. <sup>50</sup> Quebe dxe'a gunne xue chee gápale neda' ba lá'ana, ne si' lu na'le neda'. Zua Benne' xabáa dxezá lazre' gápale neda' ba lá'ana, ne Le' dxuchi'e ca da dxunle. <sup>51</sup> Da li dxapa' le'e: Benne' dxune' ca naca dizra' chia', cabata' gátequeze bénnea'.

<sup>52</sup> Nadxa benne' judío ca' belexechebe':

—Na'a nézquezentu' xu'u be' xriwe'. Ba gulátequeze Abraham, ne xúgute benne' ca' buluchálaje' waláz chee Dios, na' lue' dxennáu' benne' guné' ca naca dizra' chiu' cabata' gátequeze'. <sup>53</sup> ¿Nácadxu' szrendxa ca xra xrtáudxu Abraham? Gútequeze Le', ne cá'aqueze gulate benne' ca' buluchálaje' waláz chee Dios. ¿Bízraqueze dxugune cuinu'?

<sup>54</sup> Bechebe Jesús:

—Che neda' dxucá'ana cuina' ba lá'ana, quebe bi zaca na. Benne' dxape' neda' ba lá'ana naque' Xra', Bénnea' dxennale le'e naque' Xrale.  
<sup>55</sup> Le'e quebe núnbeale Le'. Neda' núnbeaqueza' Le'. Chela dxennéa' quebe núnbe'a Le', naca' wen lazre' ca nácale le'e. Neda' da li núnbe'a Le', ne dxuna' ca da dxenné'.  
<sup>56</sup> Xra xrtáule Abraham, bénnea' gutie' nédxudauté, gubéle'ene' lawe' da dxal-la' lé'ene' zra zua neda'. Blé'ene' na, na' gubéle'ene'.

<sup>57</sup> Nadxa benne' judío ca' gulé'e Jesús:

—Québequeze ne su' chi xun iza, na' ¿dxennáu' blé'enu' Abraham?

<sup>58</sup> Jesús bechebe':

—Da li dxapa' le'e, nédxudauté gate quebe ne sua Abraham, báchequeze zua' neda'.

<sup>59</sup> Nadxa gulequé'e xiaj chee xelu'e Jesús, na' Le' bcache cuine'. Bdeé' ládujla benne' ca', na' bedxúaje' chale'aj xudau', ne bezé'e.

## 9

*Jesús dxexune' tu benne' gúlaje' la chul-la*

<sup>1</sup> Gate gudé Jesús tu lataj, na' blé'ene' tu benne' gúlaje' la chul-la. <sup>2</sup> Benne' ca' dxusede Jesús buluchebe' Le':

—Benne' Wesede, ¿bizr chee na' gulaj benne' nigá la chul-la? ¿Naca na lawe' da belún xra xrne'e dul-la, che lawe' da ben lé'queze' dul-la?

<sup>3</sup> Jesús guzre' benne' ca':

—Quebe naca na lawe' da ben le' dul-la, ne quebe naca na lawe' da belún xra xrne'e dul-la. Naca na chee gulé'e lau xel-la' szren chee Dios ne chee benne' nigá. <sup>4</sup> Dxácaté naca te zra dxal-la' guna' zrin chee Bénnea' nasele' neda' lawe' da ba za da chul-la gate netú benne' quebe seque' guné' zrin. <sup>5</sup> Dxácaté ne zua' neda' xezr la xu nigá, naca' xel-la' naxaní' chee bénneache.

<sup>6</sup> Ca gudé gunná Jesús da nigá, na' bzre'e zrene' lu xu, ne bene' guna' nen zrene' na', na' btupe' na xiaj lau benne' la chul-la na'. <sup>7</sup> Nadxa guzre' le':

—Guxíaj xeajtibe lau' lu beaj nisa nazí le na Siloé. (Dizra' nigá zéaje na: Da Nasel-la Na.)

Benne' la chul-la na' guxíaje' xeajtibe lawe', na' gate bezrine' ba dxelé'ene'. <sup>8</sup> Nadxa benne' walíZR chee' ca', ne benne' ca' belelé'ene' le' nédxula, naque' la chul-la, gulenné':

—¿Quegá benne' nigá bénnea' dxebé'e dxenabe' guna'?

<sup>9</sup> Bal-le' gulenné':

—Le' na'.

Xebal-le' gulenné':

—Quegá le' na', na' ca'an ca dxenné'e.

Benne' ná'queze gunné':

—Neda' na'.

<sup>10</sup> Nadxa buluchebe' le':

—¿Ájazra na' ba dxelé'enu'?

<sup>11</sup> Bechebe bénnea':

—Bénnea' le' Jesús bene' guna', ne btupe' na xiaj lawa', na' gunné': “Guxíaj beaj nisa nazí le na Siloé, xeajtibe lau'.” Guxá'a na', na' gate gudiba' lawa', guca ble'eda'.

<sup>12</sup> Nadxa buluchebe' le':

—¿Ga na' zua bénnea'?

Lẹ' guzre' benne' ca':

—Quebe nezda'.

*Benne' fariseo ca' dxuluchebe' bénnea' guque' la chul-la*

<sup>13</sup> Nadxa benne' ca' guleché'e bénnea' guque' la chul-la lau benne' fariseo ca'. <sup>14</sup> Naca na zra dxulupá'ana judío ca' gate ben Jesús guna, ne btupe' na xiaj lau benne' la chul-la na'. <sup>15</sup> Chee le na' benne' fariseo ca' buluchebe' bénnea' guque' la chul-la ájazra guca dxelé'ene'. Lẹ' guzre' benne' ca':

—Bzrie' guna' xiaj lawa', na' bexiba' na, ne dxelé'eda'.

<sup>16</sup> Nadxa bal-la benne' judío ca' gulenné':

—Bénnea' bene' da nigá quebe naque' chee Dios lawe' da quebe dxape' ba lá'ana zra dxupá'anadxu.

Na' xebal-le' gulenné':

—¿Ájazra na' dxune' xel-la' waca zrentę caní che naque' benne' dul-la?

Ca'an guca, gulaca chupa la'a benne' fariseo ca'. <sup>17</sup> Xecha lasa buluchebe' bénnea' guque' la chul-la:

—¿Bi dxennáu' lue' chee bénnea' bexune' lue'?

Lẹ' gunné':

—Neda' dxennéa' naque' benne' dxuchalaje' waláz chee Dios.

<sup>18</sup> Benne' judío ca' quebe guléajle'e guque' la chul-la, ne na'a dxelé'ene', na' gulenné' xra xrna bénnea' bexaque'. <sup>19</sup> Na' buluchebe' xra xrna bénnea':

—¿Nácaqueze benne' nigá zrí'inele, dxennale le'e gúlaje' la chul-la? ¿Ájazra na' dxaca dxelé'ene'?

<sup>20</sup> Belexechebe xra xrne'e:

—Nézentu' benne' nigá naque' zrí'inentu', ne gúlaje' la chul-la. <sup>21</sup> Quebe nézentu' aja guca dxelé'ene' na'a, ne quebe nézentu' nu bexún xiaj lawe'. Le guchebe le'. Ba nápaqueze' iza, ne waca xechébequeze'.

<sup>22</sup> Caní gulenná xra xrne'e lu xel-la' dxelezrebe lawe' da ba zaj nun benne' xíchaje chee judío ca' tuze dizra' xelexebéaje' xu'u na' núteteze benne' xechébe' Jesús naque' Cristo. <sup>23</sup> Chee le na' gulenná xra xrne'e: "Le guchebe le'. Ba nápaqueze' iza."

<sup>24</sup> Nadxa benne' judío ca' belenné' bénnea' guque' la chul-la, na' gulé'e le':

—¡Gunné da li lau Dios! Nézentu' naca benne' nigá benne' dul-la.

<sup>25</sup> Lẹ' bechebe':

—Quebe nezda' che naque' benne' dul-la, che cabí. Tuze da nezda'. Neda' guca' la chul-la, na' na'a dxelé'eda'.

<sup>26</sup> Na' buluchébequeze' le':

—¿Bizra bene' chiu? ¿Ájazra bene' chee bexune' xiaj lau'?

<sup>27</sup> Na' bechebe bénnea':

—Ba gucha' le'e, ne quebe dxénele chia'. ¿Bizr chee na' dxaca lázrele nnia' xetú? ¿Cá'aqueze le'e dxaca lázrele gácale Lẹ' tuze?

<sup>28</sup> Nadxa benne' judío ca' gulenné' schanni' chee bénnea' guque' la chul-la, dxelenné':

—Lue' da'u bénnea', na' netu' da'ntu' Moisés. <sup>29</sup> Netu' nézentu' Dios bchálajlene' Moisés. Quebe nézentu' ga benne' benne' nigá.

<sup>30</sup> Nadxa bénnea' bechebe':

—Da nigá naca na da dxebáneda'. Le'e quebe nézele ga bénnea', na' bexuné' xiaj lawa'. <sup>31</sup> Nézquezdxu Dios quebe dxenne' chee benne' dul-la. Tuze dxenne' chee benne' ca' dxulucá'ana szrene' Le', ne dxeluné' ca da dxaca lazre' Le'. <sup>32</sup> Quebe ne xendxu che nu benne' xexuné' tu benne' gúlaje' la chul-la. <sup>33</sup> Chela benne' nigá quebe naque' chee Dios, quebe gaca bi guné'.

<sup>34</sup> Nadxa gulé'e le':

—Ca gúlajquezu' dxulé'e na nabagu' dul-la. Na'a, ¿dxaca lazru' guzéajni'inu' netu'?

Nadxa belexebéaje' le' lu xu'u na'.

*Benne' zaj naque' la chul-la lu xichaj lázrdawé'*

<sup>35</sup> Jesús benne' belexebéaje' bénnea' guque' la chul-la, na' gate bezrague' le', guzre' le':

—¿Dxéajle'u lue' chee Zri'ine Dios?

<sup>36</sup> Benne' na' guzre' Jesús:

—Xran, guzre neda' Nu na', chee chéajle'a chee'.

<sup>37</sup> Bechebe Jesús:

—Ba blé'equenzu' Le'. Neda', dxuchálajlena' lue' naca' Bénnea'.

<sup>38</sup> Nadxa benne' na' bzu zribe' lau Jesús, na' gunné':

—Dxéajle'a chiu', Xran.

<sup>39</sup> Nadxa gunná Jesús:

—Neda' bla'a lu xezr la xu nigá chee guchi'a ca da dxelún bénneache, chee xeledé'e la chul-la ca', ne chee xelexaca ca la chul-la benne' ca' dxelenné' dxeledé'ene'.

<sup>40</sup> Nadxa bal-la benne' fariseo ca', benne' zaj zre'e nen Jesús, gate belenne' da nigá gunná Jesús, buluchébe' Le':

—¿Cá'aqueze netu' nácantu' la chul-la?

<sup>41</sup> Jesús bechebe':

—Chela nácale le'e la chul-la quebe nabágale ca naca dul-la da benle. Dxennale dxelé'ele, na' chee le' na' nabágale dul-la.

## 10

*Dxuchalaj Jesús da dxulé'e na ca naca chee le'aj chee zrila' ca'*

<sup>1</sup> Na' gunná Jesús:

—Da li dxapa' le'e, bénnea' quebe dxu'e dxu'a dxa xu'u chee le'aj chee zrila' ca', na' dxu'e naga xula, naque' gubán, ne tu dxebánzqueze'.

<sup>2</sup> Bénnea' dxu'e dxu'a dxa xu'u na' naque' benne' dxuxúequeze' zrila' ca'.

<sup>3</sup> Bénnea' zue' dxu'a dxa xu'u dxesálaje' chee chu'u bénnea' dxuxúequeze'-ba', na' zrila' ca' dxelexúnbeaba' chi'e. Benne' nigá dxu'e la tu tu zrila' ca', ne dxebéaje'-ba' lu le'aj cheeba'. <sup>4</sup> Ca dxedé dxebéaje' xúguteba', na' dxebía lawe' lauba', na' zrila' ca' zjácáleba' Le', lawe' da dxelexúnbeaba' chi'e. <sup>5</sup> Quebe zjácáleba' tu benne' quebe zaj núnbeaba'. Dxuluzrúnmuja' lau benne' na' lawe' da quebe dxelexúnbeaba' chi'i benne' quebe zaj núnbeaba'.

<sup>6</sup> Bchálajle Jesús benne' ca' da dxulé'e nigá, na' benne' ca' quebe guléajni'ine' bi zéaje da guzre Jesús le'.

*Jesús naque' benne' chawe' dxuxúe' zrila' ca'*

<sup>7</sup> Nadxa Jesús guzre' benne' ca' da xula:

—Da li dxapa' le'e, neda' naca' dxa xu'u naga dxelú'u bēnneache zaj naque' ca zřila' chia' ca'. <sup>8</sup> Xúgute' benne' dxuluxúe' zřila' benne' belelé'e nédxudxa ca neda', gulaque' gubán, ne tu gulebáanzqueze'. Zřila' ca' quebe beléneba' chee' benne' ca'. <sup>9</sup> Neda' naca' dxa xu'u. Bēnnea' chu'e ne chia' neda', láqueze bēnnea'. Gaque' ca tu zřila' dxu'uba', ne dxuajba' le'aj cheęba', na' dxezřeľeba' zřieđu dxáguba'.

<sup>10</sup> 'Benne' gubán ze'e tuze chee cuane'-ba', ne chee gúteťe'-ba, ne chee guzřia xi'te'-ba'. Neda' bla'a chee gápale xel-la' nabán, ne chee gapa xánnele na. <sup>11</sup> Neda' naca' benne' chawe' dxuxúa' zřila' ca'. Benne' chawe' dxuxúe' zřila' ca' dxuzúe' xel-la' nabán chee' chee guselé' zřila' ca'. <sup>12</sup> Benne' dxuxúe'-ba' lawe' da dxezi'e lazruj, gate dxelé'ene' za becu' xi'a, na' dxusané' zřila' ca', ne dxuzrúnnuje', lawe' da quebe nácaqueze' benne' dxuxúe' ľeba', na' zřila' ca' quebe zaj náca'ba' be cheézqueze'. <sup>13</sup> Benne' nigá dxuzrúnnuje' lawe' da dxunze' zřin chee si'e lázruje', na' quebe dxe'e gunne xue cheęba'.

<sup>14-15</sup> 'Neda' naca' benne' chawe' dxuxúa' zřila' ca'. Cáteze núnbea Xra' neda', na' neda' núnbe'a Xra', cá'anqueze neda' núnbe'a zřila' chia' ca', na' ľeba' zaj núnbeaba' neda'. Neda' dxuzúa' xel-la' nabán chia' chee guselá' zřila' ca'. <sup>16</sup> Cá'anqueze zaj zra' zřila' chia' quebe zaj zřaba' lu le'aj nigá. Dxa-la' cheajxexri'a-ba'. Zřila' ca' xelunba' ca dxenná xřtizra', ne xelácaba' tu cueze, na' tuze benne' guxúe' ľeba'.

<sup>17</sup> 'Xra' nazří'ine' neda' lawe' da dxuzúa' xel-la' nabán chia', na' xecá'a na. <sup>18</sup> Quebe nu seque' cua xel-la' nabán chia'. Neda' xuzúa' na cáteze dxaca lázrequeza' neda'. Napa' xel-la' dxenná bea guzúa' na, ne chee xecá'a na. Da nigá naca na da gunná be'e Xra' neda' guna'.

<sup>19</sup> Gate benne' judío ca' belenne' dizra' caní, na' gulaque' chupa la'a xetú. <sup>20</sup> Benne' zan benne' ca' gulenné':

—¿Bizr chee na' dxuzé' nágale chee benne' nigá? Xu'e be' xřiwe', ne nadá xichaj lázřdawe'.

<sup>21</sup> Xebal-ľe' gulenné':

—Tu benne' xu'e be' xřiwe' quebe séquene' guchálaje' caní. ¿Waca tu be' xřiwe' xexún na xiaj lau tu benne' la chul-la?

### *Dxuluzúa benne' judío ca' Jesús chalá'ala*

<sup>22</sup> Naca na beu' zaga, na' lu xezre Jerusalén zaj zue' laní gate dxulusá lazre' ca guca gate gulegú'e xudau' na' lu na' Dios. <sup>23</sup> Jesús dxedé' chale'aj xudau' na' naga naca lachila chee Salomón. <sup>24</sup> Nadxa benne' judío ca' guléchaje' Le', ne gulé'e Le':

—¿Bátalaqueze québedxa gunu' lue' chupa lázrentu'? Che lue' nacu' Cristo, Bēnnea' sel-la Dios, gunnáteľala.

<sup>25</sup> Bechebe Jesús:

—Ba gucha' le'e, na' quebe guxéajlele chia'. Ca naca da dxuna' neda', ne dxuchíneda' xel-la' dxenná bea chee Xra', dxululé'e na nu naca' neda'. <sup>26</sup> Le'e quebe dxéajlele chia' lawe' da quebe nácale zřila' chia', ca ba gucha' le'e nédxula. <sup>27</sup> Zřila' chia' dxelexúnbeaba' chi'a, na' neda' núnbe'a-ba', na' ľeba' dxelauba' neda'. <sup>28</sup> Benne' zaj naque' zřila' chia', dxunézruja' chee benne' ca' xel-la' nabán da zeajlí canna, ne cabáta'quezdxa xelebí'a xi'e, na' quebe nu seque' xecá'a ľe' lu na' neda'. <sup>29</sup> Xra' bēnne' neda' benne' caní, na' Le' nácadxe' szren ca xúgute' bēnneache, na' quebe nu seque' xecá'a benne' ca' lu na' Xra'. <sup>30</sup> Neda', ne Xra' tuze nácantu'.

<sup>31</sup> Nadxa benne' judío ca' gulequé'e xiaj xetú chee xelútię' Jesús.

<sup>32</sup> Nadxa Jesús guzre' benne' ca':

—Ba bėnqueza' da zan da chawe' laule le'e, dxuchineda' xel-la' waca chee Xra'. ¿Nula chee da chawe' caní güele neda' xiaj?

<sup>33</sup> Belexechebe benne' judío ca':

—Quebe güentu' lue' xiaj lawe' da nunu' da chawe'. Dxuntu' na lawe' da gunnéu' schanni' chee Dios. Lue' nacu' bėnneache, na' dxun cuinu' Dios.

<sup>34</sup> Nadxa Jesús guzre' benne' ca':

—Lu da nadxixruj bea chee le'e naxúaj xrtizra' Dios, dxenná na: Le'e nácale dios ca'. <sup>35</sup> Quebe gaca tábagadxu ca da naxúaj na lu xiche chee Dios, na' Diósqueze' gunné' chee benne' ca' gulezi'e xrtizre' zaj naque' dios ca'. <sup>36</sup> Che Dios bzue' neda', ne gusél-le' neda' lu xezr la xu nigá, ¿bizr chee na' dxennale le'e gunnéa' schanni' chee Dios lawe' da gunnéa' naca' Zri'ine Dios? <sup>37</sup> Che quebe dxuna' ca naca da dxun Xra', quebe chéajlele chia'. <sup>38</sup> Che dxuna' na, lácala quebe dxéajlele chia' ne chee da dxennéa', le chéajle chia' ne chee da ca' dxuna', chee nézele Xra' zúalene' neda', na' neda' zúalena' Xra'.

<sup>39</sup> Xetú lasa gulaca lazre' xelēl-le' Jesús, na' Le' gulé' lu na' benne' ca'.

<sup>40</sup> Nadxa bezrin Jesús dxu'a xegu Jordán chalá'a naga dxalaj gubizra, na' begá'ane' na', naga guzúa Juan nédxute dxuchúe' bėnneache nisa.

<sup>41</sup> Benne' zan xjaque' xeajlenné'e Jesús, na' gulenné':

—Juan, da li quebe bi xel-la' waca zren bēne', na' xúgute da gunné' ca naca chee benne' nigá naca na da li.

<sup>42</sup> Benne' zan guléajle'e chee Jesús lataj na'.

## 11

### *Ca guca gate gute Lázaro*

<sup>1</sup> Zua tu benne' dxé'ene' le' Lázaro, benne' xezre Betania, da naca na lazre María, ne bi bile' le' Marta. <sup>2</sup> María nigá, bi zan Lázaro, benne' dxé'ene' na', naque' nu'ula na' gulu'e ni'a Jesús da na' dxelále'e zixre, ne bsebizre' na nen xicha xíchaje'. <sup>3</sup> Dxúpatę nu'ula caní gulesel-le' benne' xeajezre' Jesús:

—Xran, bėnnea' nazrí'inu' quebe chawe' zue'.

<sup>4</sup> Ca ben Jesús da nigá, na' gunné':

—Da dxé'ene' quebe naca na da gúteę na le'. Naca na chee gulé'e lau na xel-la' szren chee Dios, ne cá'anqueze chee gulé'e lau na xel-la' szren chia' neda', Zri'ine Dios, ne chee xel-la' we' na'.

<sup>5</sup> Lácala nazrí'i Jesús Marta, ne bi bile', ne Lázaro, <sup>6</sup> gate benne' quebe chawe' zua Lázaro na', begá'ane' naga zue' xechupa zra. <sup>7</sup> Ca gudé na' guzre' benne' ca' dxusédene':

—Le chu'u naga nababa Judea xetú.

<sup>8</sup> Nadxa benne' ca' gulé'e Le':

—Benne' Wesede, ná'asca benne' judío ca' zaj zre'e na' gulaca lazre' xelútię' Lue' nen xiaj. ¿Dxaca lazru' chéajju' na' xetú?

<sup>9</sup> Jesús guzre' benne' ca':

—¿Quebe nun Dios dute te zra gate dxelún bėnneache zrin? Che nu benne' dxedé' te zra, quebe cheajchazię' lu da stebe lawe' da dxelé'ene' xel-la' naxaní' da nuzúa Dios lu xezr la xu nigá. <sup>10</sup> Che nu benne' dxedé' chizrela, dxechégüe' lawe' da quebe zúale xel-la' naxaní' le'.

<sup>11</sup> Ca gudé na' guzre Jesús benne' ca':

—Benne' l'jwézredxu Lázaro ba dxásie'. Cha'a neda' cheajsebana' le'.

<sup>12</sup> Nadxa benne' ca' gulé'e Jesús:

—Xran, che dxásie', wexaque'.

<sup>13</sup> Da nigá da gunná Jesús zéaje na ba gute Lázaro. Benne' ca' dxusedene' guléquene' gunná Jesús dxáseze'. <sup>14</sup> Nadxa Jesús bzéajni'ine' benne' ca', gunné':

—Ba gútequeze Lázaro. <sup>15</sup> Dxebeda' lawe' da quebe zua' na'. Caní gácadxa chawe' chee'le le'e, chee' chéajle'le chia'. Le chu'u cheajnnadxu Lázaro.

<sup>16</sup> Nadxa Tomás, bénnea' léqueze' bilide', guzre' xezícala benne' ca':

—Le chú'uqueze dxi'u chee' gátedxu tu zren nen Jesús.

*Jesús naque' benne' dxusebané' benne' gate ca', ne benne' dxunne' dxi'u xel-la' nabán li lazre'*

<sup>17</sup> Gate belezrine' xezre Betania, na' bene Jesús gudapa zra bulucache' Lázaro. <sup>18</sup> Betania dxe' na gáguze naga dxe' Jerusalén, ca cadite sadxu tu chí'idau'ze zrindxu na', <sup>19</sup> na' benne' zan benne' judío ca' xjaque' xeajlenné'e Marta ne María, na' xulunézruje' le' xel-la' zren lazre' lawe' da gute bi zane'. <sup>20</sup> Gate ben Marta ba za' Jesús, na' guzé'e zeajxrígalé' Le', na' María begá'ane' xu'u. <sup>21</sup> Marta guzre' Jesús:

—Xran, chela zu' nigá, quebe gute bi zana'. <sup>22</sup> Neda' nezda' Dios gunné' Lue' bíteteze da nabu'.

<sup>23</sup> Jesús gunné':

—Webán bi zanu'.

<sup>24</sup> Nadxa Marta guzre' Le':

—Nezda' webané' lu zra xelexebán benne' gate ca', zra bzebe na'.

<sup>25</sup> Nadxa gunná Jesús:

—Neda' naca' benne' dxusebané' benne' gate ca', ne benne' dxunne' xel-la' nabán li lazre'. Nu benne' dxéajle'e chia', lácala gatié', webané', <sup>26</sup> na' xúgute benne' zaj naca bané', ne dxeléajle'e chia', québequeze xelatie' tu chí'ize. ¿Dxéajle'u da nigá?

<sup>27</sup> Marta guzre' Jesús:

—Awe', Xran. Neda' dxéajle'a nacu' Cristo, Zri'ine Dios, Bénnea' guchebe lazre' Dios sel-le'.

*Jesús dxebezre' lawe' da zaj zua baxache' nu'ula ca'*

<sup>28</sup> Ca gudé gunná Marta da nigá, na' guxíaje' xeajzenne' bi bile' María, na' guzre' le' zrize:

—Ba bla' Benne' dxusede, ne dxenné' lue'.

<sup>29</sup> Ca ben María da nigá, na' guxase' guzé'e, xeajnné'e Jesús. <sup>30</sup> Jesús quebe ne chu'e xezre na', na' zue' naga bezraga Marta Le'. <sup>31</sup> Benne' judío ca' zaj zra' xu'u na' dxulunézruje' María xel-la' zren lazre', gate belelé'ene' guxasa María, ne chadí bdxúaje', na' xjácále benne' caní le', dxeléquene' zéaje' dxu'a ba zeajchezre' na'.

<sup>32</sup> Gate bzrin María naga zua Jesús, na' bzu zribe' zran ni'a Jesús, gunné':

—Xran, chela zu' nigá, quebe gute bi zana'.

<sup>33</sup> Gate ble'e Jesús dxebezre María, ne cá'aqueze dxelebezre judío ca', benne' zjácále'ne' María, na' bexíajele'ene', ne guzúe' stebe lu lázrdawe'.

<sup>34</sup> Na' bchebe' benne' ca':

—¿Ga bcáchele bénnea'?

Na' gulé'e Le':

—Xran, gudá le'enu'.

<sup>35</sup> Na' gudxezre Jesús. <sup>36</sup> Nadxa gulenná benne' judío ca':

—Le nna'xque cátiṭe nazrí'ine' le'.

<sup>37</sup> Bal-la benne' ca' gulenné':

—Benne' nigá bexune' benne' la chul-la. La zuṭe' nigá, ¿quebe guzéquene' ájala gune' cheṭe quebe gute Lázaro?

*Jesús dxusebane' Lázaro*

<sup>38</sup> Jesús guzúe' stebe xetú, na' bzrine' dxu'a ba. Ba na' naca na tu blauj, na' da' tu xiaj ta'a dxu'e na. <sup>39</sup> Gunná Jesús:

—Le xecá'a xiaj nigá.

Marta, bi zan benne' gate na' guzre' Jesús:

—Xran, ba dxelá bénnea' tula, lawe' da ba guca tapa zra na'a gutie'.

<sup>40</sup> Na' Jesús gunné':

—¿Quebe gucha' lue' che chéajle'u chia', walé'enu' xel-la' szren cheṭe Dios?

<sup>41</sup> Nadxa belexequé'e xiaj ta'a na'. Jesús guné'e xabáa, gunné':

—Xrae, dxapa' Lue' "Xcalenu'" lawe' da ba bennu' chia'. <sup>42</sup> Neda' nezda' tu dxénzquezenu' chia'. Dxennéa' da nigá cheṭe gaca tu da ba neza cheṭe benne' caní, cheṭe xeláajle'e chiu' nasel-lu' neda'.

<sup>43</sup> Ca gudé gunné' da nigá, na' gunné' zizraj:

—¡Lázaro, bedxúaj nigá!

<sup>44</sup> Bedxúaj benne' gate na', nadxéaj ni'a ne'e nen ládxe'dau' da buluchele' ni'a ne'e, na' lawe' dxela na ladxe'. Jesús guzre' benne' ca':

—Le xesezre', ne le gusane' xexíaje'.

*Benne' dxeledábaque' Jesús dxelune' tuze dizra' xelṭe-le' Le'*  
(Mt. 26.1-5; Mr. 14.1-2; Lc. 22.1-2)

<sup>45</sup> Nadxa guléajle benne' zan cheṭe Jesús, benne' judío ca' xjácale María, ne belelé'ene' ca da ben Jesús. <sup>46</sup> Bal-la benne' ca' xjaque' xeajlechálajlene' benne' fariseo ca', na' buluzenne' le' ca da ben Jesús. <sup>47</sup> Nadxa fariseo ca', ne benne' xíchaje ca' cheṭe bxruze ca' belezrague' nen benne' xu'u lawe' blau cheṭe judío ca', na' gulenné':

—¿Ájazra gundxu? Benne' nigá dxúnle'e xel-la' waca da za xabáa. <sup>48</sup> Che ca' güedxu Le' lataj, xúgute' bēnneache xeleajlé'e cheṭe' cheṭe xuluzúe' Le' ca wenná bea, na' xelélé' benne' Roma ca', benne' zjaque' wedil-la, na' xuluzría xi'e xudau' cheṭdxu, ne xezr la xu cheṭdxu.

<sup>49</sup> Nadxa tu benne' le' Caifás, bxruze blau iza na', guzre' benne' ca':

—Le'e québequeze bi nézele, <sup>50</sup> ne quebe dxeque be'ele gácadxa chawe' cheṭdxu gate' tuze benne' ne cheṭe xezre nigá, ne quegala ca naca xezr la xu nigá cuía xi na.

<sup>51</sup> (Quegá gunná Caifás da nigá cheézqueze'. Lawe' da naque' bxruze blau iza na', bchálaje' waláz cheṭe Dios, gunné' gate' Jesús ne cheṭe xezr la xu judío. <sup>52</sup> Quegá gatiṭe' tuze ne cheṭe xezr la xu naze. Cá'anqueze cheṭe xutupe' lu na' Dios xúgute' benne' zaj naque' cheṭe Dios, benne' zaj nase dínnaje', benne' ca' zaj nababe' xúgute' cue' xezr la xu.) <sup>53</sup> Ca'an guca, ca lu zra na'te benne' judío wenná bea ca' belune' tuze dizra' xelútiṭe' Jesús.

<sup>54</sup> Cheṭe le' na' Jesús québedxa gudé' naga zaj zra' benne' wenná bea ca' cheṭe judío ca', na' guzé'e naga nababa Judea, na' guxíaje' xezre Efraín naga zua gáguze tu le'e xixre' lawe' lataj. Begá'ane' xezre na' nen benne' ca' dxusédené'.



<sup>55</sup> Ba zua gáguze zrin Laní Pascua chee judío ca', na' benne' zan chee xezre ca' xjaque' Jerusalén chee xulucá'ana chawe' cuine' nédxudxa ca zrin Laní Pascua. <sup>56</sup> Guledé' dxelexilaje' Jesús, na' gate zaj zre'e chale'aj xudau' na', buluchebe ljwezre':

—¿'Ajazra dxéquele? ¿Widé' laní, che quebe xide'?

<sup>57</sup> Benne' fariseo ca', ne benne' xíchaje ca' chee bxruze ca' ba gulebéaje' dizra' che nu benne' ca' nézene' ga zua Jesús, na' xelé'e benne' ca' chee gaca xelél-le' Le'.

## 12

*María dxugu'e da dxelá zixre ni'a Jesús*

(Mt. 26.6-13; Mr. 14.3-9)

<sup>1</sup> Xrupa zra nédxudxa gate za chu'u Laní Pascua chee judío ca', guxíaj Jesús xezre Betania naga zua Lázaro, bénnea' bsebán Jesús ládujla benne' gate'. <sup>2</sup> Lu xezre na' beluné' tu xrche', chee gulape' ba lá'ana Jesús. Marta bdee' xel-la' wagu, na' Lázaro dxé'lene' benne' ca' dxelágu'ene' Jesús. <sup>3</sup> Nadxa María guqu'é' tu xia da za da dxelále'e zixre, da naca na chee dusén lase, da zácale'e na, na' gulu'e da za na' ni'a Jesús, ne bsebizre' na nen xicha xíchaje'. Ca naca benne' zaj zra' xu'u na' gulelé'ene' ca dxelá da zixre na'. <sup>4</sup> Nadxa Judas Iscariote, zri'ine Simón, tu benne' ca' dxusede Jesús, ne naque' bénnea' gudé' Jesús lu na' benne' guledábage' Le', gunné':

<sup>5</sup> —¿Bizr chee na' quebe gudá'u da zixre na', na' sidxu na dumí lazruj chee chunna gaxúa zra chee gácale' dxu benne' xache' ca'?

<sup>6</sup> Quebe gunná Judas da nigá lawe' da dxe'e gunne xue chee benne' xache' ca'. Naque' gubán, ne nu'e bzude dumí chee benne' ca' dxusede Jesús, ne dxebane' late' weaj dumí na' da dxuluzré'e lu bzude na'. <sup>7</sup> Nadxa Jesús guzre' Judas na':

—Be lataj nu'ula nigá lawe' da bene' da nigá chee dxucá'ana chawe' neda' chee gate xulucache' neda' lu xedxu ba. <sup>8</sup> Benne' xache' ca' tu zrázqueze' ládujla le'e. Neda' quebe tu súazqueza' nen le'e.

*Dxeluné' tuze dizra' xelútie' Lázaro*

<sup>9</sup> Zane' benne' judío ca' belenne' zua Jesús xezre Betania, na' xjaque' na', quegá tuze zeajlenné'e Jesús. Cá'anqueze zeajlenné'e Lázaro, bénnea' bsebán Jesús ládujla benne' gate ca'. <sup>10</sup> Nadxa benne' xíchaje ca' chee bxruze ca' beluné' tuze dizra' cá'anqueze xelútie' Lázaro, <sup>11</sup> lawe' da ne chee Lázaro benne' zan benne' judío ca' dxelebéaj xíchaje' bxruze ca' chee xealejlé'e chee Jesús.

*Dxexú'u Jesús Jerusalén*

(Mt. 21.1-11; Mr. 11.1-11; Lc. 19.28-40)

<sup>12</sup> Benne' zan ba zjaca Jerusalén, zjaque' Laní Pascua na', na' zra xula belenne' ba za' Jesús lu xezre na'. <sup>13</sup> Nadxa gulechugue' zina', na' xjaque' xeajlexrígale' Jesús, ne dxelenné' zizraj:

—¡Gaca ba lá'azxa Dios! ¡Ba neza zrenté naca na chee Benne' ze'e waláz chee Xránadxu Dios! ¡Ba neza zrenté naca na chee Wenná Bea chee xezre Israel!

<sup>14</sup> Jesús xeajxraque' tu burro, na' guzríe'-ba', ca naxúaj na lu xiche chee Dios, dxenná na:

<sup>15</sup> Quebe zrēbele le'e, benne' zre'e xezre Sión. Le nna'xque, ba za' Wenná Bea chee.

Zrië' tu burro.

<sup>16</sup>Nédxutë benne' ca' dxusede Jesús quebe guléajni'ine' da na' dxaca na. Ca gude' na', gate begá'ana szren Jesús lau Dios, na' xejlesá lazre' xúgute da caní zaj naxúaj na lu xiche cheë Dios ca naca cheë Jesús, na' ca'an guca cheë'.

<sup>17</sup>Benne' ca' zaj zre'ë nen Jesús gate gunné' Lázaro lu xedxu ba, ne bsebanë' le' ládujla benne' gate, buluzenne' bënneache Jerusalén ca da guca na'. <sup>18</sup>Cheë le' na' benne' caní xejlexrígalë' Jesús lawe' da belenne' ca naca xel-la' waca zrentë da bene'. <sup>19</sup>Nadxa benne' fariseo ca' gulé ljwezre':

—Ba dxelé'ele quebe séquedxu bi gundxu. Ca naca bënneache dxelune' Le' tuze.

*Dxelxilaj benne' griego ca' Jesús*

<sup>20</sup>Zaj zra' bal-la benne' griego ca' ládujla benne' ca' belezrine' Jerusalén cheë xulucá'ana szrene' Dios lu laní na'. <sup>21</sup>Benne' caní belezrine' lau Felipe, benne' Betsaida cheë ga nababa Galilea, ne naque' Jesús tuze, na' gulata' xuene' le', dxelenné':

—Benne', dxaca lázrentu' le'entu' Jesús.

<sup>22</sup>Felipe guxíajë' xejezre' Andrés caní, na' xjaca dxupe' xejleguezre' Jesús ca'. <sup>23</sup>Nadxa Jesús guzre' benne' dxupa ca':

—Ba bzrin zra xegá'ana szrena' neda', Benne' Guljë' Bënneache. <sup>24</sup>Da li dxapa' le'e, tu binne zrua' xtila wegá'ana na tuze na che quebe xexruj na lu xu, ne gacu na xu. Che gacu na xu, na' gunna na lina. Caní dxal-la' gaca chia' neda'. <sup>25</sup>Benne' dxë'e gunne xue gapa chi'e xel-la' nabán cheë' gunitie' na. Bënnea' dxuzúë' chalá'ala xel-la' nabán cheë' lu xezr la xu nigá, gapa chi'e na, ne zrué'ene' xel-la' nabán da zeajlí canna. <sup>26</sup>Che nu benne' dxaca lazre' gunë' zrin chia', dxal-la' gaque' neda' tuze, na' gáteteze sua' neda', na' súaqueze benne' dxune' zrin chia'. Che nu benne' dxune' zrin chia', Xra' gape' le' ba lá'ana.

*Jesús dxuchálajë' ca gaca gate gatie'*

<sup>27</sup>Gunná Jesús:

—Na'a stébele'e zua'. ¿Bizra nnia'? ¿Nnia': Xrae, bselá neda' lu da dxal-la' gaca chia' na'a? Belájqueza' cheë gaca chia' da caní. <sup>28</sup>Xrae, bca'ana szren lau'.

Nadxa ben tu chi'i benne' dxenné' xabáa:

—Ba bca'ana szrena' na, ne gucá'ana szrena' na xetú.

<sup>29</sup>Benne' ca' zre'ë na' dxelenne' gulenné' guziu' gunné. Xebal-le' gulenné':

—Tu gubáz cheë xabáa bchálajlëne' Le'.

<sup>30</sup>Nadxa Jesús guzre' benne' ca':

—Quegá gunné chi'e na' ne chia' neda'. Gunné na ne cheele le'e. <sup>31</sup>Na'a ba bzrin zra guchi'a Dios cheë bënneache zre'ë xezr la xu nigá, na' na'a cueaj Dios chalá'ala da xriwe', da na' dxenná bea na lu xezr la xu nigá, cheë québedxa nna bea na. <sup>32</sup>Gate xelechise' neda' lu xezr la xu nigá le'e xaga béguaj, na' neda' nnia' xúgute bënneache cheë xelaque' neda' tuze.

<sup>33</sup>Gate gunné' caní, ble'e Jesús ca gatie'. <sup>34</sup>Nadxa benne' zan ca' gulé'e Jesús:

—Netu' bënentu' ca da naxúaj na lu xiche cheë da nadxixruj bea na da dxenná na waca bánqueze Cristo chadía chacanna. ¿Bizr cheë na'

dxennáu' Benne' Gulje' Bénneache xelechise' Le'? ¿Nuzra na' Benne' Gulje' Bénneache?

<sup>35</sup> Nadxa Jesús guzre' benne' ca':

—Xetú chí'idauze xel-la' naxaní' sua na ládujla le'e. Le ta na'a dxácate ne zua xel-la' naxaní' nen le'e, chee quebe xrínnele, lawe' da benne' dxedé' lu da chul-la quebe nézengé' ga zéaje'. <sup>36</sup> Le cheajlé chee xel-la' naxaní' da naca' neda' dxácate zua xel-la' naxaní' nen le'e, chee gácale tuze xel-la' naxaní' na'.

Ca gudé gunná Jesús da nigá, na' bezé'e bcache cuine' lau benne' ca'.

*Benne' judío ca' quebe dxeajlé'e chee Jesús*

<sup>37</sup> Lácala ble'e Jesús zane' xel-la' waca zrentę lau benne' judío ca', quegá xúgute' guleajlé'e chee', <sup>38</sup> lawe' da ben na ba xen guca ca da gunná Isaías, benne' bchálaje' waláz chee Dios, gunné':

Xran, ¿nuzra guxeajlé chee dizra' cheedxu?

¿Nuzra na' ble'e Xránadxu xel-la' waca chee'?

<sup>39</sup> Ca'an guca, quebe guca xeajlé'e chee' lawe' da caní gunnáqueze Isaías na':

<sup>40</sup> Dios bene' benne' ca' la chul-la, ne bene' zide' lázrdawe', chee quebe xeelé'ene' nen xiaj lawe',

ne quebe xeléajni'ine' lu xichaj lázrdawe',

ne quebe xeelé'e lawa' neda' chee xexuna' le'.

<sup>41</sup> Isaías na' gunné' da nigá lawe' da blé'ene' xel-la' szren chee Jesús, ne bchálaje' ca naca chee'.

<sup>42</sup> Zane' benne' judío ca' guléajlé'e chee Jesús, ne cá'anqueze bal-la benne' xíchaje ca'. Quebe belexechebe' lávela bénneache lawe' da belezrebe' da xelún benne' fariseo ca', chee quebe xelexebéaje' le' xu'u naga dx-elezrague'. <sup>43</sup> Caní belunę' lawe' da beledánedxene' xel-la' ba lá'ana da dxelúe bénneache le' ca xel-la' ba lá'ana da dxue Dios le'.

*Dizra' chee Jesús guchi'a na chee da dxelún bénneache*

<sup>44</sup> Jesús gunné' zizraj:

—Benne' dxéajlé'e chia', quegá cheeza' dxéajlé'e, cá'anqueze dxéajlé'e chee Xra' nasele' neda'. <sup>45</sup> Bénnea' dxelé'ene' neda', dxelé'equenze' Xra' nasele' neda'. <sup>46</sup> Neda', xel-la' naxaní', bla'a lu xęzr la xu nigá chee québedxa xelexegá'ana benne' dxeléajlé'e chia' lu da chul-la. <sup>47</sup> Che nu benne' dxenne' dizra' chia', ne quebe dxunę' ca naca na, quegá neda' guzría xi'a le', lawe' da quebe bla'a neda' chee guzría xi'a bénneache. Bla'a chee guselá' benne' ca'. <sup>48</sup> Benne' dxuzúe' neda' chalá'ala, ne quebe dxunę' ca naca dizra' chia', ba zua da guzría xi na le'. Dizra' da ba gunnéa' naca na da guzría xi na bénnea' lu zra bzebe na'. <sup>49</sup> Caní gaca na lawe' da quebe dxuchálaja' cheézqueza', lawe' da Xra' nasele' neda' ba gunná bé'ene' neda' bi dxal-la' nnia', ne bi dxal-la' gusededa'. <sup>50</sup> Neda' nezda' gunná be'e Xra' neda' caní chee xezezeque bénneache xelape' xel-la' nabán da zeajlá canna. Ca'an naca, da dxennéa' neda', dxennéa' na ca gunná be'e Xra' neda'.

## 13

*Jesús dxibe' ni'a benne' ca' dxusédene'*

<sup>1</sup> Naca na zra nedxu gate za chu'u Laní Pascua chee judío ca'. Jesús ba nézene' ba bzrin zra xezé'e lu xęzr la xu nigá chee xexíaje' naga zua Xre'.

Nazrí'iquezñe' benne' zaj naca chee', benne' zaj zře'ę xęzr la xu, na' na'a ba zua gulé'ęne' benne' ca' tu da zrendxa da gulé'e na nazrí'ine' le'.

<sup>2-4</sup> Da xriwe' ba nagú'u na xichaj lázxdau Judas Iscariote, zri'ine Simón, ca dxal-la' guné' chee' gudé'ę Jesús lu na' benne' guledábage' Le'. Nézqueze Jesús ze'ę naga zua Dios, ne dxal-la' xezrine' naga zua Dios, na' Xre' ba bnézruje' Le' dutę xel-la' dxenná bea. Chee' le' na', gate dxelawe' xrche', guxasa Jesús, na' gudúe' ladxe' naxrúa cuzre', ne bnase' tu ladxe' dxu'a le'ę. <sup>5</sup> Nadxa gudé'ę nisa tu zriga xia zren, ne guzú lawe' dxibe' ni'a benne' ca' dxusédenę', na' bsebizre' ni'ę nen ladxe' na' da nunase' dxu'a le'ę.

<sup>6</sup> Ca bzrine' chee' quibe' ni'a Simón Pedro, le' guzre' Jesús:

—Xran, ¿Lue' quibequezu' ni'a?

<sup>7</sup> Jesús bechebe':

—Na'a quebe dxéajni'inu' da dxuna'. Te na'a chéajni'inu' na.

<sup>8</sup> Pedro guzre' Le':

—Cabata' quibu' ni'a.

Jesús guzre' le':

—Che quebe quiba' ni'u, quebe gaca gacu' neda' tuze.

<sup>9</sup> Na' Simón Pedro guzre' Jesús:

—Xran, quegá tuze ni'a quibu'. Cá'anqueze na'a, ne xíchaja'.

<sup>10</sup> Jesús guzre' le':

—Benne' ba bexuzrte' guzje', tuze ni'ę dxal-la' chadxe lawe' da ba naxádxeequeze'. Le'e ba naxádxele, san quegá xúgutęle.

<sup>11</sup> Gunná Jesús: “Quegá xúgutęle”, lawe' da nézene' nu na' gudé'ę Le' lu na' benne' dxeledábage' Le'.

<sup>12</sup> Ca gudé gudibe Jesús ni'a benne' ca', na' bexrúe' ladxe' chee' cuzre', ne bebe'ę ga dxelawe', na' guzre' benne' ca':

—¿Dxéajni'ile le'e da ba be'na'? <sup>13</sup> Le'e dxele neda': Benne' Weséde, ne: Xran, na' caní dxal-la' nnale lawe' da caní naca'. <sup>14</sup> Che neda', Benne' Weséde cheęle, ne Xránale, ba gudiba' ní'ale, cá'anqueze le'e dxal-la' quíbele ni'a ljwézrele tule xetule. <sup>15</sup> Neda' ba ble'eda' le'e tu da dxulé'e na, chee' gunle le'e ca da be'na' neda'. <sup>16</sup> Da li dxapa' le'e, tu benne' wen zrin quebe nácadxe' szren ca xranę', na' tu benne' gubáz quebe nácadxe' szren ca benne' nase'le' le'. <sup>17</sup> Che dxéajni'ile da caní, ne dxunle ca zaj naca na, gaca cheęle tu da ba neza.

<sup>18</sup> 'Quebe dxuchálaja' chee' xúgutęle le'e. Neda' núnbe'a benne' ca' gucá'a, san dxal-la' gaca ca naxúaj na lu xiche chee' Dios, dxenná na: Benne' dxágule' neda' ba gudábage' neda' chee' gudé'ę neda'. <sup>19</sup> Dxapa' le'e da nigá na'a, nédxula gate quebe ne gaca na, chee' gate gaca na, na' chéajlele le'e zúaqueza' neda'. <sup>20</sup> Da li dxapa' le'e: Benne' dxezí' lu ne'ę Bénnea' dxusel-le' neda', neda' na' dxezí' lu ne'ę, na' benne' dxezí' lu ne'ę neda', dxezí' lu ne'ę Xra' nase'le' neda'.

*Dxenná Jesús gudé Judas Le' lu na' benne' dxeledábage' Le'*

*(Mt. 26.20-25; Mr. 14.17-21; Lc. 22.21-23)*

<sup>21</sup> Ca gudé gunná Jesús da nigá, na' guzúe' stębe lu xichaj lázrdawe', na' bzéajni'ine' benne' ca', gunné':

—Da li dxapa' le'e, tu benne' ládujla le'e gudé'ę neda' lu na' benne' ca' dxeledábage' neda'.

<sup>22</sup> Nadxa benne' ca' dxuséde Jesús gulezú lawe' dxelenná' ljwezre', ne quebe zaj nézene' nu chee' na' dxuchalaj Jesús. <sup>23</sup> Tu benne' ca' dxuséde Jesús, bénnea' nazrí'ile'ę Jesús le', zue' cuíta Jesús naga dxelawe' xrche',

<sup>24</sup> na' Simón Pedro beñe' tu da dxunna bea lau bënnea' chee guchebe' Jesús nu chee na' dxenné' caní. <sup>25</sup> Nadxa bënnea' de'e cuita Jesús bchebe' Le':

—Xran, ¿nuzra na'?

<sup>26</sup> Bechebe Jesús:

—Gusebisa' late' xeta xtila, na' bënnea' gunézruja' na, benne' ná'queze'.

Nadxa Jesús bsebise' late' xeta xtila, na' bnézruje' na chee Judas Iscariote, zri'ine Simón. <sup>27</sup> Ca gucá'a Judas xeta xtila na', na' da xriwe' guxú'ute na lu xichaj lázrdawe'. Nadxa Jesús guzre' le':

—Da dxal-la' gunu', bëntega na.

<sup>28</sup> Benne' ca' zaj zre'e dxelawe' na' quebe guléajni'ine' bizr chee na' guzre' Judas na' caní. <sup>29</sup> Lawe' da nua Judas bzude' dumí, bal-le' guléquene' Jesús guzre' le' bi si'e chee laní na', u bi gunézruje' benne' xache' ca'. <sup>30</sup> Ca gudé gudagu Judas xeta xtila na', na' bdxúaje'. Ba guxrinne.

### *Da nadxixruj bea cube*

<sup>31</sup> Ca gudé bdxuaj Judas, gunná Jesús:

—Na'a gulé'e lau xel-la' szren chia' neda', Benne' Gulje' Bénneache, na' xegá'ana szren Dios ne chia' neda'. <sup>32</sup> Che neda', Benne' Gulje' Bénneache, dxulé'eda' ca naca xel-la' szren chee Dios, na' Dios gulé'ene' ca naca xel-la' szren chia' neda', ne la gúnte'queze' na. <sup>33</sup> Le'e, bidu chia' ca', québedxa sua' scha' nen le'e. Le'e wexílajle neda', san ca gucha' benne' judío ca', dxapa' le'e na'a, quebe gaca sa'le le'e naga cha'a neda'. <sup>34</sup> Tu da cube dxixruj be'eda' le'e. Le zri'i le sa' ljuwézrele tule xetule ca neda' nazrí'ida' le'e. Caní dxal-la' zri'i ljuwézrele tule xetule. <sup>35</sup> Che nazrí'i ljuwézrele tule xetule, na' xúgute bënneache xeleque bé'ene' nácale neda' tuze.

*Jesús dxenné' nna Pedro quebe núnbe'e Le'*

*(Mt. 26.31-35; Mr. 14.27-31; Lc. 22.31-34)*

<sup>36</sup> Simón Pedro bchebe' Jesús:

—Xran, ¿gazra chéaju'?

Bechebe Jesús:

—Naga cha'a neda', quebe gaca sá'le'nu' neda' na'a. Te na'a wadéquezu' naga tea' neda'.

<sup>37</sup> Nadxa gunná Pedro:

—Xran, ¿bizr chee na' quebe gaca sá'lena' Lue' na'a? Zúaqueza' guzúa' xel-la' nabán chia' chee guna' Lue' tuze.

<sup>38</sup> Jesús bechebe':

—¿Zúaquezu' guzú' xel-la' nabán chiu' chee gacu' neda' tuze? Da li dxapa' lue', nédxudxa ca cuezre xjeaj, lue' wannáquezu' chunna lasa quebe núnbe'u neda'.

## 14

*Jesús naque' neza da dxezrín na naga zua Xradxu Dios*

<sup>1</sup> Gunná Jesús:

—Quebe cuele le'e gunne xue. Le guxrén lazre' Dios, ne le guxrén lazre' neda'. <sup>2</sup> Lizre Xra' déle'e lataj naga súale. Chela quebe naca na caní, neda' ba gucha' le'e. Wexá'a cheajxecueza' lataj cheele. <sup>3</sup> Ca te xexá'a cheajxecueza' lataj chee, na' wexelájqueza' xetú chee xedajhezri'a le'e

súalēle neda', chee súaale le'e naga súaqueza' neda'. <sup>4</sup>Le'e nézele naga cha'a, ne núnbeale neza na'.

<sup>5</sup>Tomás guzre' Jesús:

—Xran, quebe nézentu' ga chéaju'. ¿Ájazra guntu' gúnbeantu' neza na'?

<sup>6</sup>Jesús bechebe':

—Neda' naca' neza na', ne naca' da li, ne naca' xel-la' nabán. Tuze ne chia' neda' waca zrinle naga zua Xra'. <sup>7</sup>Chela núnbeale neda', cá'unqueze núnbeale Xra'. Ná'atēla núnbeale Le' lawe' da ba dxel'é'ele Le'.

<sup>8</sup>Nadxa Felipe guzre' Jesús:

—Xran, ble'e netu' Xrau', xetú da ná'teze.

<sup>9</sup>Bechebe Jesús:

—Felipe, scha' ba guzúalēna' le'e, na' ¿quebe ne gúnbe'u neda'? Benne' dxel'é'eng' neda', dxel'é'equenezē' Xra'. Chee le na', ¿bizr chee na' dxenabu' neda' gulé'eda' le'e Xra'? <sup>10</sup>¿Quebe dxéajle'u zúalēna' Xra', na' Xra' zúalēne' neda'? Da dxapa' le'e, quegá dxennéa' na cheézqueza'. Xra', Bénnea' zúalēne' neda', Léqueze' na' dxunē' zrin chee' lu na'a neda'. <sup>11</sup>Le chéajlele zúalēna' Xra', na' Xra' zúalēne' neda', u che cabí dxéajlele ca da dxennéa', le chéajle chia' ne chee da ca' dxuna'. <sup>12</sup>Da li dxapa' le'e, benne' dxéajle'e chia', gúnqueze' ca da dxuna' neda', na' gunē' da zaj nácadxa zren ca da caní dxuna' lawe' da xexá'a neda' naga zua Xra'. <sup>13</sup>Xúgute da nábale le'e lu La' neda', neda' guna' na, chee gulé'eda' neda' xel-la' szren chee Xra'. <sup>14</sup>Néda'queza' guna' bíteteze da nábale lu La' neda'.

*Jesús dxechebe lazre' sel-le' Be' Lá'azxa*

<sup>15</sup>Gunná Jesús:

—Che le'e nazrí'ile neda', le guzúa dizra' ca naca da dxixruj be'eda' le'e. <sup>16</sup>Neda' gata' xueda' Xra' sel-le' chee xetú Benne' gácalequeze' le'e, ne súalētecaze' le'e. <sup>17</sup>Benne' nigá naque' Be' Lá'azxa gulé'eng' le'e ca naca da li. Benne' zaj naca chee xezr la xu nigá quebe xelezéquene' xelezí' lu ne'e Le' lawe' da quebe gaca xelelé'eng' Le', ne quebe zaj núnbe'e Le'. Le'e núnbeale Le' lawe' da zúalēne' le'e, ne súaqueze' lu xichaj lázrdaule. <sup>18</sup>Quebe gucá'ana' le'e ca bi wezebe ca'. Welá'queza' súalēna' le'e. <sup>19</sup>Xetú chí'idau' bénneache ca' québedxa xelelé'eng' neda', san le'e welé'ele neda'. Le'e tu gaca bánzquezle lawe' da tu naca bánzqueza' neda'. <sup>20</sup>Lu zra na' guéquebe'ele neda' zúalēna' Xra', na' le'e zúalēle neda', na' neda' zúalēna' le'e. <sup>21</sup>Benne' nézeng' ca naca da nadxixruj bea na nuna' neda', ne dxunē' na, dxulé'eng' nazrí'iqueze' neda'. Xra' zrí'ing' benne' nazrí'ing' neda', na' cá'unqueze neda' zri'ida' bénnea', ne gulé'e lawa' le'.

<sup>22</sup>Judas, quegá bénnea' le' Iscariote, guzre' Jesús:

—Xran, ¿bizr chee na' gulé'e lau' netu', ne quegá gulé'e lau' lau' bénneache zaj zre'e xezr la xu nigá?

<sup>23</sup>Jesús bechebe':

—Benne' nazrí'ing' neda' dxunē' ca naca da dxennéa', na' Xra' zrí'ing' bénnea', na' neda' ne Xra' xedajsúalēntu' le'. <sup>24</sup>Benne' quebe nazrí'ing' neda' quebe dxunē' ca da dxennéa'. Ca naca dizra' da dxénele quebe zaj naca na cheézqueza'. Zaj naca na chee Xra' nasel-le' neda'.

<sup>25</sup>'Dxapa' le'e xúgute da caní dxácatē ne zúalēna' le'e, <sup>26</sup>na' Be' Lá'azxa, Bénnea' sel-la Xra' lu La' neda' chee gácalēne' le'e, Le' gulé'eng' le'e xúgute, ne gusá'queze' lázrele ca naca xúgute da ba gucha' le'e.

<sup>27</sup> 'Xel-la' dxebeza zri lazre' dxuca'ana' cheęle. Dxunna' le'e xel-la' dxebeza zri lazre' chia'. Quebe cuele gunne xue, ne quebe zrébele. <sup>28</sup> Ba bénele gunnéa' wexá'a, ne welá'a súaleña' le'e xetú. Chela da li nazrí'ile neda', suale xel-la' dxebé, lawe' da xexá'a naga zua Xra', na' nácadxa Le' szren ca neda'. <sup>29</sup> Da nigá dxapa' le'e na'a nédxula gate quebe ne gaca na, cheę gate gaca na, na' chéajle cheę da dxennéa'.

<sup>30</sup> 'Québedxa guchálajleca' le'e da zren lawe' da ba za' da xriwe', da na' dxenná bea na lu xęzr la xu nigá. Da na' quebe seque na bi gune na neda'. <sup>31</sup> Caní dxal-la' gaca cheę xeleneze bėnneache neda' nazrí'ida' Xra', ne dxuna' ca da gunná bé'ene' neda'. ¡Le chasa! ¡Le xebú'u nigá!

## 15

*Jesús dxuchálaje' cheę lba uva ne cheę zruze na ca'*

<sup>1</sup> Gunná Jesús:

—Neda' naca' ca tu lba uva da naca na li lazre', na' Xra' naque' ca tu benne' dxá'ang' na. <sup>2</sup> Le' dxechugue' zruze na ca' da quebe dxelebía na da zixre, ne dxun chí'e zruze na ca' da dxelebía na da zixre cheę xelebíadxa na. <sup>3</sup> Le'e nácale ca zruze na ca' da ba nun chí'e, ne cheę dizra' da ba gucha' le'e. <sup>4</sup> Le súaqueze gácale neda' tuze ca neda' tu zúalezqueza' le'e. Tu zruze xaga quebe gaca cuía na da zixre cheézqueze na che quebe súalequeze na xaga na'. Cá'anqueze le'e quebe bi gaca gunle che quebe tu gácazqueze neda' tuze.

<sup>5</sup> 'Neda' naca' bzrigu lba uva, na' le'e nácale zruze na ca'. Bėnnea' naque' neda' tuze, na' neda' naca' le' tuze, naque' ca tu zruze na da dxebíale'e na da zixre, lawe' da quebe bi seque' gunle che quebe gácale neda' tuze. <sup>6</sup> Benne' quebe súatequeze' nen neda' gaque' ca tu zruze na da dxugu na, na' bizre na. Xuluxutupe' zruze na bizre ca', ne xuluzré'e na lu xi'.

<sup>7</sup> 'Che le'e súatequezele neda' tuze, ne quebe gusanle dizra' chia', waca nácale ca da dxaca lázrele, na' sile na. <sup>8</sup> Xra' dxegá'ana szrenę' gate nácale ca zruze na ca' da dxelebíale'e na da zixre, ne caní gaca bea na nácale neda' tuze. <sup>9</sup> Neda' nazrí'ida' le'e ca nazrí'i Xra' neda'. Cheę le na' le súaquezele lu xel-la' zri'i lazre' chia'. <sup>10</sup> Che gunle ca da dxixruj be'eda' le'e, na' súatequezele lu xel-la' zri'i lazre' chia', ca dxuna' neda', dxuna' ca bdxixruj be'e Xra' neda', ne zúatequeza' lu xel-la' zri'i lazre' cheę'.

<sup>11</sup> 'Neda' dxuchálajleña' le'e caní cheę súale lu xel-la' dxebé chia', ne cheę gaca du lazre' xel-la' dxebé cheęle. <sup>12</sup> Caní naca da dxixruj be'eda' le'e: Le zri'i le sa' ljwézrele tule xetule ca neda' nazrí'ida' le'e. <sup>13</sup> Xel-la' zri'i lazre' da naca szrendxa naca bea na che tu benne' guzúe' xel-la' nabán cheę cheę gácalęne' bi ljwezre' ca'. <sup>14</sup> Le'e nácale bi ljwezra' che dxunle ca da dxixruj be'eda' le'e. <sup>15</sup> Québedxa xapa' le'e nácale bi wen zrin chia' lawe' da quebe neze bi wen zrin bi da gun xránabe'. Dxapa' le'e nácale bi ljwezra' lawe' da ba bzenda' le'e xúgute da guzre Xra' neda'. <sup>16</sup> Le'e quebe gunnéle neda'. Neda' gunnéa' le'e, ne ba nuzúa' le'e cheę gácale ca zruze lba na' da dxelebíale'e na da zixre, na' tu súazqueze da zixre na'. Che gunle caní, na' Xra' gunné' le'e xúgute da nácale lu La' neda'. <sup>17</sup> Da nigá naca na da dxixruj be'eda' le'e: Le zri'i le sa' ljwézrele tule xetule.

*Bėnneache cheę xęzr la xu nigá dxelecuídenę' Jesús, ne cá'anqueze benne' cheę' ca'*

<sup>18</sup> Nadxa gunná Jesús:

—Che bēnneache dxelecuídene' le'e, dxal-la' cheajsá lázrele belecuídequeze' neda' nédxute. <sup>19</sup> Chela nácale le'e chee xezr la xu nigá, na' xelexrí'i bēnneache le'e ca zaj nazrí'ine' le sa' ljwezre' ca'. Neda' ba gucá'a le'e ládujla bēnneache chee xezr la xu nigá, na' chee le na' dxelecuíde bēnneache le'e lawe' da québedxa nácale xezr la xu nigá tuze. <sup>20</sup> Le gusá lázrele da gucha' le'e, gunnéa': Netú benne' wen zrin quebe nácadxe' szren ca xrane'. Che guláu zi' xuzre' neda', cá'anqueze xelau zi' xuzre' le'e, na' che belune' ca dxenná dizra' chia', cá'anqueze xelune' ca dxenná dizra' chee le'e. <sup>21</sup> Xúgute' da caní xelune' chee le'e lawe' da nácale chia', ne lawe' da quebe zaj núnbe'e Xra' nasel-le' neda'.

<sup>22</sup> 'Chela quebe bla'a neda', ne bchálajlena' benne' ca', quebe bi dul-la zaj nabague'. Na'a zaj nabágaqueze' dul-la <sup>23</sup> lawe' da nu benne' dxecuídene' neda', cá'anqueze dxecuídene' Xra'. <sup>24</sup> Chela quebe bēna' neda' xel-la' waca zren ca' lálwela benne' ca' ca da netú benne' quebe ne guné', na' quebe bi dul-la xelebágué'. Lácala ba belelé'ene' da ca', dxelecuídene' neda', ne dxelecuídene' Xra'. <sup>25</sup> Da nigá dxaca na chee gaca li ca naxúaj na lu da nadxixruj bea na da zjácále benne' ca'. Dxenná na: Belecuídene' neda' ne quebe bi da calela bēna' chee benne' ca'.

<sup>26</sup> 'Gate xida Bēnea' gácalene' le'e, Bēnea' naque' Be' Lá'azxa, ne dxulé'ene' da li, Bēnea' sel-la' neda' waláz chee Xra', Léqueze' xechebe' ca naca chia' neda'. <sup>27</sup> Cá'anqueze le'e wechébequezle ca naca chia' neda' lawe' da zúalele neda' nédxudaute.

## 16

### <sup>1</sup> Gunná Jesús:

—Dxapa' le'e da caní chee quebe gusán lázrele da naca chia'. <sup>2</sup> Welexebéaje' le'e lu xu'u naga dxelezrague', na' zrin zra gate nüteteze benne' gutie' le'e guéqene' guné' zrin chee Dios. <sup>3</sup> Caní xelune' lawe' da quebe ne xelúnbe'e Xra', ne neda'. <sup>4</sup> Dxapa' le'e da nigá chee gate zrin zra na', na' cheajsá lázrele ba gucha' le'e da nigá.

### *Da dxun Be' Lá'azxa* Nadxa gunná Jesús:

—Quebe gucha' le'e da nigá nédxute lawe' da zúalequeza' le'e. <sup>5</sup> Na'a wexá'a cheajxezúalena' Xra' nasel-le' neda', na' netule le'e quebe dxuchébele neda' ga cha'a. <sup>6</sup> Dxewí'ine lázrele lawe' da gucha' le'e da caní. <sup>7</sup> Na'a dxapa' le'e da li: Cháwe'dxa gaca chee le'e che xexá'a neda' lawe' da che quebe xexá'a, quebe xida Be' Lá'azxa xedajsúalene' le'e, Bēnea' gácalene' le'e. Che xexá'a neda', sel-la' Le' chee. <sup>8</sup> Gate xida Le', na' gulé'ene' bēnneache zaj naque' benne' dul-la, ne quebe dxelune' da xrlátaje, na' Dios guzría xi'e benne' caní. <sup>9</sup> Zaj naque' benne' dul-la lawe' da quebe dxelájle' chia' neda'. <sup>10</sup> Xeleque bé'ene' quebe dxelune' da xrlátaje lawe' da xexá'a neda' naga zua Xra', na' le'e québedxa lé'ele neda'. <sup>11</sup> Xeleque bé'ene' Dios guzría xi'e le' lawe' da ba guchugue' chee da xriwe', da na' dxenná bea na lu xezr la xu nigá.

<sup>12</sup> 'Ne déle'e da dxal-la' xapa' le'e, san le'e quebe gaca chéajni'ile na na'a. <sup>13</sup> Gate xida Be' Lá'azxa, Bēnea' dxulé'ene' da li, Le' gulé'ene' le'e ca naca xúgute' da li lawe' da quebe guchálaje' cheézqueze'. Wanné' xúgute' da xéne'ne', na' guzéajni'ine' le'e ca da dxal-la' gaca na. <sup>14</sup> Le' gucá'ana szrene' neda' lawe' da wazi'e chee da naca chia' neda', na' guzéajni'ine' na le'e.



<sup>15</sup> Xúgute da napa Xra', cheéqueza' naca na, na' chee le na' gunnéa', wazí' Be' Lá'azxa da naca chia', na' guzéajni'ine' na le'e.

*Xel-la' dxelewí'ine lazre' chee benne' ca' xexaca na xel-la' dxelebé*

<sup>16</sup> Gunná Jesús:

—Xetú chí'idau', na' le'e québedxa lé'ele neda', na' xetú chí'i, na' xel'é'ele neda' lawe' da xexá'a neda' naga zua Xra'.

<sup>17</sup> Nadxa bal-la benne' ca' dxusede Jesús buluchébe ljwezre':

—¿Bizra zéaje da nigá? Dxe'e dxi'u, xetú chí'idau' québedxa lé'edxu Le', na' xetú chí'i, na' xel'é'edxu Le' lawe' da xexíaje' naga zua Xre'. <sup>18</sup> ¿Bi zéaje da na', xetú chí'idau'? Quebe dxéajni'idxu bi chee dxuchálaje'.

<sup>19</sup> Guque be'e Jesús dxelaca lazre' xuluchébe' Le', na' guzre' benne' ca':

—Neda' gucha' le'e, xetú chí'idau' québedxa lé'ele neda', na' xetú chí'i, na' xel'é'ele neda'. ¿Da nigá na' dxuchébe ljwézrele? <sup>20</sup> Da li dxapa' le'e, wabézrele le'e, ne xewí'ine lázrele, san bénneache chee xezr la xu nigá xelebene'. Lácala le'e xewí'ine lázrele, xel-la' dxewí'ine lazre' chee xexaca na xel-la' dxebé. <sup>21</sup> Gate tu nu'ula zua sané' bidau' zue' stébe lawe' da ba bzrin zra sua xel-la' dxudía chee'. Gate te galaj bidu na', na' québedxa dxeajsá lazre' da guzaque' lawe' da dxebéle'ene' chee' bidu na' ba gúlajbe'. <sup>22</sup> Cá'anqueze le'e zúale stébe na'a, san neda' welá'queza' xedajxenná'a le'e, na' lu xichaj lázrdaule súatequeze xel-la' dxebé, da naca na tu xel-la' dxebé da quebe nu seque' cua.

<sup>23</sup> Lu zra na' québedxa bi guchébele neda'. Da li dxapa' le'e, Xra' gunné' le'e xúgute da nábale lu La' neda'. <sup>24</sup> Nédxula quebe bi gunábale lu La' neda'. Na'a le naba, na' si'le, chee súale'ele xel-la' dxebé.

*Jesús guchuchuj guléaje' da dxaca lu xezr la xu nigá*

<sup>25</sup> Gunná Jesús:

—Ba gucha' le'e da caní nen dizra' ca' da dxululé'e na. Wazrín zra gate québedxa guchálajlena' le'e da naca da dxulé'e na. Guchálajlena' le'e caníqueze da naca chee Xra'. <sup>26</sup> Lu zra na' nábale Xra' lu La' neda', na' quebe dxennéa' neda' gata' xueda' Xra' waláz chee, <sup>27</sup> lawe' da Xrá'queze nazrí'ine' le'e. Nazrí'ine' le'e lawe' da nazrí'ile le'e neda', ne dxéajlele chia' za'a naga zua Dios. <sup>28</sup> Guzá'a lau Xra' chee bla'a lu xezr la xu nigá chee xexá'a naga zua Xra'.

<sup>29</sup> Nadxa benne' ca' dxusede Jesús gulé'e Le':

—Na'a dxuchálajlenu' netu' caníqueze. Quebe dxuchínenu' dizra' ca' da dxululé'e na. <sup>30</sup> Na'a dxeque bé'entu' nézenu' xúgute da ca', na' quebe dxalla' nu guchébe Lue'. Chee le na' dxéajlentu' chiu' za'u naga zua Dios.

<sup>31</sup> Jesús guzre' benne' ca':

—¿Dxéajlele chia' na'a? <sup>32</sup> Za' zra, ne ba naca zra ná'queze gate le'e gase dínnajle ca'ale xrneza cha chee, na' gucá'anale neda' tuza'. Quebe zúaqueza' tuza' lawe' da zúale Xra' neda'. <sup>33</sup> Dxapa' le'e da nigá chee gápale xel-la' dxebeza zri lazre' lawe' da nácale neda' tuze. Lu xezr la xu nigá dxun na ba xen si sácale. Le gun chuchu lázrdaule, lawe' da ba bchuchuj bléaja' da dxaca lu xezr la xu nigá.

## 17

*Jesús dxenabé' Dios xucá'ana chawé'e benne' ca' dxeléajle'e chee'*

<sup>1</sup> Ca gudé gunné' da nigá, na' Jesús gunné'e xabáa, dxenné':

—Xrae, ba bzin zra. Bca'ana szren neda', Zri'inu', chee cá'anqueze neda', Zri'inu', gucá'ana szrena' Lue'. <sup>2</sup> Lue' ba bennu' neda', Zri'inu', xel-la' dxenná bea chee nna be'eda' xúgute bénneache, chee gunézruja' xel-la' nabán da zeajlí canna naca na chee xelúnbe'e Lue', nacu' Dios tu licha', ne li lazre', na' chee xelúnbe'e neda', Jesucristo, Bénnea' gusel-lu' Lue'.

<sup>4</sup> 'Neda' ba bca'ana szrena' Lue' lu xezr la xu nigá, ne ba bexuzre bēna' da bdxixruj be'enu' neda'. <sup>5</sup> Na'a, Xrae, bēnna neda' xel-la' szren lau Lue', da naca na xel-la' szren na' da guca na chia' naga zu' Lue' nédxudaute gate za gata' xezr la xu nigá.

<sup>6</sup> 'Benne' ca' guca'u Lue' ládujla bēnneache, benne' ca' bennu' neda', neda' ba bzéajni'ida' le' Nu nacu' Lue'. Gulaque' chiu', na' Lue' bennu' neda' benne' ca', na' ba belune' ca dxenná xrtizru'. <sup>7</sup> Na'a zaj nézene' xúgute da bennu' neda' za na naga zu' Lue'. <sup>8</sup> Ba bnézruja' chee benne' caní dizra' chiu' da bennu' neda', na' benne' caní ba gulezí' lu ne'e na. Ba guleque bé'ene' da li neda' za'a naga zu' Lue', ne ba guléajle'e chiu', gusel-lu' neda'.

<sup>9</sup> 'Neda' dxata' xueda' Lue' gaca chawe' chee benne' caní. Quebe dxata' xueda' Lue' ne chee benne' ca' zaj naque' chee xezr la xu nigá. Dxenaba' Lue' ne chee benne' ca' bennu' neda', lawe' da zaj naque' chiu'. <sup>10</sup> Xúgute da naca chia' naca na chiu', na' da naca chiu' naca na chia' neda', na' xel-la' szren chia' dxulé'e lawe' na ne chee benne' caní.

<sup>11</sup> 'Neda' québedxa sua' lu xezr la xu nigá, san benne' caní xelexegá'ane' lu xezr la xu nigá, na' neda' wezá'a nigá, ne xedajxezúalequeza' Lue'. Xrae Lá'azxa, lu xel-la' dxenná bea chiu' bxue benne' caní, benne' ca' bennu' neda', chee xelácaqueze' tuze ca nácadxu dxi'u tuze, Lue' ne neda'. <sup>12</sup> Gate ne zua' neda' lu xezr la xu nigá, bxua' benne' caní nen xel-la' dxenná bea chiu', benne' caní bennu' neda', ne bcache chawa' le'. Netú benne' caní quebe gunite, san tuze bēnnea' ba nanítequeze', na' caní guca na chee guca li ca naxúaj na lu xiche chiu'.

<sup>13</sup> 'Na'a ba zezá'a naga zu' Lue'. Dxácatē ne zua' lu xezr la xu nigá dxennéa' da caní chee xelápale'e benne' caní xel-la' dxebe' ca da nápaqueza' neda'. <sup>14</sup> Neda' bnézruja' benne' caní dizra' chiu'. Bēnneache chee xezr la xu nigá dxelecuídenē' benne' caní lawe' da québedxa zaj naque' tuze nen benne' ca' chee xezr la xu nigá, ca na' neda' quebe naca' tuze nen da naca chee xezr la xu nigá. <sup>15</sup> Quebe dxenaba' Lue' xeca'u benne' caní lu xezr la xu nigá. Dxenaba' guzrá chawu' benne' caní chee quebe seque' da xriwe' bi gun na chee' le'. <sup>16</sup> Ca neda' quebe naca' chee xezr la xu nigá, cá'anqueze benne' caní quebe zaj naque' chee xezr la xu nigá. <sup>17</sup> Bzua benne' caní chee xelaque' cheéquezu' Lue' ne chee da li. Dizra' chiu' naca na da li. <sup>18</sup> Ca gusel-lu' Lue' neda' ládujla bēnneache zaj naque' chee xezr la xu nigá, cá'anqueze neda' dxusel-le' benne' caní ládujla bēnneache zaj naque' chee xezr la xu nigá. <sup>19</sup> Ne chee benne' caní nuzúa cuina' cheéquezu' Lue', chee cá'anqueze benne' caní xelaque' cheéquezu' Lue' ne chee da li.

<sup>20</sup> 'Dxata' xueda' Lue', quegaze chee benne' caní, san cá'anqueze chee benne' ca' xeléajle'e chia' gate xelenne' da xuluchalaj benne' caní. <sup>21</sup> Dxenaba' Lue' chee xelaca xúgute benne' caní túzqueze, ca Lue', Xrae, nácaquezu' neda' tuze, ne neda' nácaqueza' Lue' tuze, ne chee xelaca benne' caní tuze nen dxi'u, chee xeléajle' bēnneache zaj naca chee xezr la

xu nigá Lue' gusel-lu' neda'. <sup>22</sup> Neda' ba bnézruja' chee benne' caní xel-la' szren na' da bennu' neda' chee xelaque' tuze ca nácaquezdxu tuze dxi'u. <sup>23</sup> Neda' súaləna' benne' caní, na' Lue' súalənu' neda', chee xelácaqueze benne' caní tuze, na' caní xeleeque be'e bəneache Lue' gusel-lu' neda', ne nazrí'inu' benne' caní cáteze nazrí'inu' neda'.

<sup>24</sup> Xrae, Lue' bennu' neda' benne' caní, na' dxaca lazra' xelezúaləne' neda' naga sua' neda', chee xelee'eng' xel-la' szren da ba bennu' neda', lawe' da nazrí'inu' neda' nédxudautə gate quebe ne gunu' xəzr la xu nigá. <sup>25</sup> Xrae chawe', benne' zaj naque' chee xəzr la xu nigá quebe zaj núnbe'ə Lue', san neda' núnbe'a Lue', na' benne' caní ba zaj nézene' Lue' gusel-lu' neda'. <sup>26</sup> Neda' bzéajni'ida' benne' caní Nu nacu' Lue', ne zúaqueza' dxuzéajni'ida' le' chee sua xel-la' zri'i lazre' dxéquenu' Lue' neda' lu xichaj lázrdau benne' caní, ne chee súalə néda'queza' le'.

## 18

### *Dxelel-le' Jesús*

(Mt. 26.47-56; Mr. 14.43-50; Lc. 22.47-53)

<sup>1</sup> Ca gudé gunná Jesús da caní, na' bdxúaje' nen benne' ca' dxusédene' chee chjaque' xecha la'a xegu Cedrón. Lataj na' zéle'ə xaga olivo naga guxú'u Jesús nen benne' ca'. <sup>2</sup> Cá'anqueze Judas, bəneea' dxudé' Jesús lu na' benne' ca' dxeledábague' Le', núnbe'ə lataj na' lawe' da zane' lasa guxíaj Jesús na' nen benne' ca' dxusédene'. <sup>3</sup> Ca' guca, bzrin Judas na' nen tu cue' benne' ca' dxjaque' wedil-la, ne nen bal-la benne' xra'aga wən zrin chee xudau', benne' ca' gulesel-la benne' xichaje' ca' chee bxruze ca', ne benne' fariseo ca'. Zaj nu'e xaga, ne xia ca', ne xi' ca', ne xi' xedxe. <sup>4</sup> Jesús ba nézene' ca da gaca chee', na' chee le' na' bdxúaje' lau benne' ca', na' bchebe' le':

—¿Nuzra dxexílajle?

<sup>5</sup> Belexechebe benne' ca':

—Jesús, benne' Nazaret.

Jesús bechebe':

—Neda' na'.

Judas, bəneea' dxudé' Jesús lu na' benne' ca' zúaqueze' ládujla benne' ca'. <sup>6</sup> Gate gunná Jesús: Neda' na', na' benne' ca' belexebigue' lau Jesús, ne xeajlechazte' lu xu. <sup>7</sup> Nadxa Jesús bchebe' benne' ca' da xula:

—¿Nuzra dxexílajle?

Gulenná benne' ca':

—Jesús, benne' Nazaret.

<sup>8</sup> Nadxa guzre Jesús benne' ca':

—Ba gucha' le'e neda' na'. Che dxexílajle neda', le güe benne' caní lataj cheajxaque'.

<sup>9</sup> Ca guca da nigá guca li ca gunná Jesús, gunné': "Benne' ca' benna Xra' neda', netue' quebe bnitia'." <sup>10</sup> Nadxa Simón Pedro, ne nu'e xia, guléaje' na, na' guchugue' naga da zua xabəla chee Malco, wən zrin chee bxruze blau. <sup>11</sup> Jesús guzre' Pedro:

—Begú'u xia chiu' lu zre na. Ca da ba nun Xra' si' saca' neda', ¿quebe dxal-la' saca' na?

### *Jesús dxezrine' lau bxruze blau*

(Mt. 26.57-58; Mr. 14.53-54; Lc. 22.54)

12 Nadxa benne' dxjaca wedil-la, ne benne' dxenná be'ene' le', ne benne' xra'aga wen zrin chee judío ca' gulel-le' Jesús, ne buluchéaje' Le'.  
 13 Nadxa guleché'e Jesús lizre Anás. Anás nigá naque' xrtau zri'ine Caifás, bënnea' naque' bxruze blau iza na'. 14 Caifás nigá naque' bënnea' guzre' judío blau ca' gácadxa chawe' gate tuze benne' waláz chee xezi la xu chee'.

*Pedro dxenné' quebe núnbe'e Jesús*

(Mt. 26.69-70; Mr. 14.66-68; Lc. 22.55-57)

15 Simón Pedro, ne xetú benne' ca' dxusede Jesús zjaque' zeajnawe' Jesús. Benne' ljwezre Pedro nigá núnbea bxruze blau le'. Ca'an guca, benne' nigá guxú'ulene' Jesús chale'aj lizre bxruze blau na'. 16 Pedro begá'ane' dxu'a dxa xu'u da zua chale'aj na'. Chee le' na' bdxuaj bënnea' núnbea bxruze blau le', na' bchálajlene' nu'ula zua dxu'a dxa xu'u na', na' gulu'e Pedro chale'aj na'. 17 Nadxa nu'ula na' zua dxu'a dxa xu'u bchebe' Pedro:

—¿Quebe nacu' lue' tuze nen benne' Nazaret na'?

Pedro bechebe':

—Quebe naca'.

18 Lawe' da dxun na zaga, benne' wen zrin ca', ne benne' xra'aga wen zrin chee bxruze ca' ba zaj nabeque' xi', ne zaj ze' dxu'a xi' na' dxelexezré'ene'. Pedro ze' nen benne' ca', dxexezré'ene' dxu'a xi' na'.

*Bxruze blau dxuchebe' Jesús*

(Mt. 26.59-66; Mr. 14.55-64; Lc. 22.66-71)

19 Bxruze blau guzú lawe' dxuchebe' Jesús nuca benne' ca' zaj naque' benne' dxusedene', ne bi da dxusedene' le'. 20 Jesús guzre' le':

—Neda' ba bchálajqueza' lówela xúgute bënneache. Bsédequeza' lu xu'u ca', ne lu xu'u naga dxelezraga xúgute benne' judío ca'. Quebe bi bchálaja' bagácheze. 21 ¿Bizr chee na' dxuchebu' neda'? Bchebe benne' ca' ba belenne' chia', na' le' xelenné' bi da bchálajlena' le'. Benne' ca' zaj nézene' da ba gunnéa'.

22 Gate gunná Jesús da nigá, na' tu benne' xra'aga wen zrin chee xudau', benne' ze' na', gudape' xraga Jesús, na' gunné':

—¿Caní dxexechebu' lau bxruze blau nigá?

23 Jesús bechebe':

—Che gunnéa' tu da calela, gunná ájala naca na. Che da gunnéa' naca na xrlátaje, ¿bizr chee na' dxu'u neda'?

24 Nadxa Anás gusél-le' Jesús, zaj nadxéaj ne'e, lau Caifás, bxruze blau.

*Pedro dxenné' xecha lasa quebe núnbe'e Jesús*

(Mt. 26.71-75; Mr. 14.69-72; Lc. 22.58-62)

25 Dxácaté na' ze' Pedro dxu'a xi' na' dxexezré'ene', na' gulé'e le':

—¿Quebe nacu' lue' tu benne' ca' zaj naque' tuze nen bënnea'?

Na' Pedro gunné':

—Quebe naca'.

26 Nadxa tu benne' wen zrin chee bxruze blau, benne' naque' xrtia bënnea' guchugu Pedro nague', bchebe' le':

—¿Quegá ble'eda' lue' nen bënnea' naga zaj ze' xaga olivo ca'?

27 Pedro gunné' xecha lasa:

—Quebe núnbe'a bënnea'.

La' ná'queze gudxezre xjeaj.

*Jesús dxezrine' lau Pilato**(Mt. 27.1-2, 11-14; Mr. 15.1-5; Lc. 23.1-5)*

<sup>28</sup> Nadxa belexebéaje' Jesús lizre Caifás, na' guleché'e Le' xu'u lizre benne' xu'u lu ne'e xezr la xu na' waláz chee Roma. Ba dxezú lau dxani'sise', na' benne' judío ca' quebe gulu'e xu'u na' chee quebe xelexegá'ane' sban, lawe' da che xelu'e na', quebe gaca xelawe' xrche' chee Laní Pascua. <sup>29</sup> Chee le na' bdxuaj Pilato bchálajlene' benne' ca', na' guzre' le':

—¿Bizra da zria dxágule benne' nigá?

<sup>30</sup> Belexechebe benne' ca':

—Chela ca naque' tu benne' wen da zrinnaj, quebe gudentu' le' lau'.

<sup>31</sup> Nadxa Pilato guzre' benne' ca':

—Le xeché'e, ne le guchi'a chee' cáteze naca da nadxixruj bea chee. Belexechebe benne' judío ca':

—Netu', benne' judío, quebe naca cheentu' nu gútentu'.

<sup>32</sup> Ca'an guca, guca li ca naca da ba gunná Jesús ca gatie'. <sup>33</sup> Pilato bexu'e xu'u na', na' gunné' Jesús, ne bchebe' Le':

—¿Nacu' Lue' Wenná Bea chee judío ca'?

<sup>34</sup> Jesús gunné':

—¿Dxenabu' da nigá lue'zqueze, u lawe' da nu guzre lue' ca naca chia'?

<sup>35</sup> Pilato bechebe':

—¿Naca' neda' judío? Benne' xezr la xu chiu', ne benne' xíchaje ca' chee bxruze ca' buludé'e lue' lawa' neda'. ¿Bizra benu'?

<sup>36</sup> Nadxa bechebe Jesús:

—Naga dxenná be'a quebe naca na chee xezr la xu nigá. Chela naca na chee xezr la xu nigá, na' benne' ca' zaj naque' neda' tuze welásaquez'e chee quebe tea' neda' lu na' benne' judío caní. Naga dxenná be'a quebe naca na nigá.

<sup>37</sup> Nadxa guzre Pilato Jesús:

—¿Nacu' Lue' wenná bea?

Bechebe Jesús:

—Naca' wenná bea, cáteze dxennáu' lue'. Neda' gúlaja', ne bla'a lu xezr la xu nigá chee nnia' da lí. Xúgute benne' ca' dxelune' ca dxenná dizra' chee da li dxelenne' da dxennéa' neda'.

<sup>38</sup> Pilato gunné':

—¿Bizra na' da lí?

*Dxelechugue' chee Jesús gatie'**(Mt. 27.15-31; Mr. 15.6-20; Lc. 23.13-25)*

Ca gudé bchebe Pilato Jesús caní, na' bdxúaje' xetú. Bchálajlene' benne' judío ca', na' guzre' le':

—Neda' quebe bi da caléla dxezrelda' nun benne' nigá. <sup>39</sup> Le'e zua tu da zéajle. Gusana' neda' tu benne' xu'u lizre xia lu Laní Pascua nigá. ¿Dxaca lázrele gusana' wenná bea chee judío ca'?

<sup>40</sup> Nadxa xúgute' gulenné' zizraj:

—¡Quegá benne' nigá! ¡Bsan Barrabás!

Barrabás na' naque' gubán.

**19**

<sup>1</sup> Nadxa Pilato guqu'é Jesús, na' bdxixruj bé'ene' xelu'e Le' xide'.

<sup>2</sup> Benne' dxjaque' wedil-la buluzrí'e xichaj Jesús tu da' belune' zruze

xaga xeche', ne bulugácue' Le' tu ladxe' bzawe. <sup>3</sup> Nadxa guléchajë' Le', dxelenné':

—¡Gaca ba lue', wenná bea cheë judío ca'!

Nadxa belú'ë dxu'a lau Jesús.

<sup>4</sup> Nadxa bdxuaj Pilato da xula, ne guzre' benne' ca':

—¡Le nna'xque! Dxebéaja' benne' nigá cheë nézele quebe dxezrelda' bi da zrinnaj nabague'.

<sup>5</sup> Bdxuaj Jesús zria xíchajë' da naca zruze xaga xeche', ne nacue' ladxe' bzawe na'. Nadxa Pilato guzre' benne' ca':

—Nigá zua bënnea'.

<sup>6</sup> Gate benne' xíchajë ca' cheë bxruze ca', ne xra'aga wen zrin cheë' ca' belelé'ene' Jesús, na' gulezú lawë' dxelenné' zizraj:

—¡Bde'ë xaga béguaj! ¡Bde'ë xaga béguaj!

Pilato guzre' benne' ca':

—Le che'ë, ne le gudé'ë xaga béguaj lé'ëqueze, lawë' da quebe dxezrelda' bi da zrinnaj nabague'.

<sup>7</sup> Na' benne' judío ca' belexechebe':

—Netu' ná pantu' tu da nadxixruj bea na, ne ca dxenná na dxal-la' gatië' lawë' da dxun cuine' Zri'ine Dios.

<sup>8</sup> Gate ben Pilato da nigá, na' bezrébedxe'. <sup>9</sup> Bexu'ë xu'u na', na' bchebe' Jesús:

—¿Gazra benne' Lue'?

Quebe bi bechebe Jesús.

<sup>10</sup> Nadxa guzre Pilato Le':

—¿Quebe dxexechëbu' chia'? ¿Quebe nézenu' Lue' napa' neda' xel-la' dxenná bea gudá'a Lue' xaga béguaj, ne napa' xel-la' dxenná bea gusana' Lue'?

<sup>11</sup> Bechebe Jesús:

—Quebe bi xel-la' dxenná bea napu' bi gunu' chia' chela ca bënna Dios lue' xel-la' dxenná bea nigá. Cheë le na', bënnea' bdeë' neda' lu na'u dul-la zrendxa nabague' ca lue'.

<sup>12</sup> Lu zra na'të gudilaj lazre' Pilato ájala gunë' gusanë' Jesús, san benne' judío ca' gulenné' zizraj:

—Che gusanu' benne' nigá, quebe nacu' César tuze, bënnea' dxenná bea Roma. Nu benne' dxun cuine' wenná bea dxedábague' César.

<sup>13</sup> Nadxa Pilato, gate benne' da nigá, bdxixruj bé'ene' xelexebéajë' Jesús, na' gudxé'ë lataj blau cheë', da zua lataj na' nazí le na Gabata nen dizra' hebreo, da zéajë na chale'aj xiaj ta'a. <sup>14</sup> Naca na zra za zrin Laní Pascua, ca du wagubizra. Nadxa Pilato guzre' benne' judío ca':

—Nigá zua wenná bea cheële.

<sup>15</sup> Na' benne' ca' gulenné' zizraj:

—¡Gatië'! ¡Gatië'! ¡Bde'ë xaga béguaj!

Pilato guzre' benne' ca':

—¿Gudá'a wenná bea cheële xaga béguaj?

Belexechebe benne' xíchajë ca' cheë bxruze ca':

—Netu' zua tuze wenná bea cheëntu'. ¡César! <sup>16</sup> Nadxa Pilato bdeë' Jesús lu na' benne' ca' cheë te'ë xaga béguaj, na' guleché'ë Jesús.

*Jesús dxedé'ë xaga béguaj*

*(Mt. 27.32-44; Mr. 15.21-32; Lc. 23.26-43)*

<sup>17</sup>Na' bdxuaj Jesús nu'e xaga béguaj chee chéajé' lataj na' nazí le na Zrita Xichaj Benne' Gate, na' nen dizra' hebreo nazí le na Gólgota. <sup>18</sup>Buludé'e Jesús xaga béguaj lataj na', na' tu zren nen Jesús buludé'e xechupa benne' xaga béguaj ca' chalá'a weaj naga da' Jesús. <sup>19</sup>Pilato bdxixruj bé'ene' buluzúe' le'e xaga béguaj xichaj Jesús da dxenná na: Jesús, Benne' Nazaret, Wenná Bea Chee Judío Ca'. <sup>20</sup>Zane' benne' judío ca' bululabe' da na' lawe' da zua lataj na' naga buludé'e Jesús xaga béguaj gáguze naga dxe' xezre na', na' da na' naxúaj na nen dizra' hebreo, ne nen dizra' griego, ne nen dizra' latín. <sup>21</sup>Chee le na' benne' xíchajé ca' chee bxruze chee judío ca' gulé'e Pilato:

—Quebe guzúaju' na: Wenná Bea Chee Judío Ca'. Bzuaj na: Le' Gunné' Naque' Wenná Bea Chee Judío Ca'.

<sup>22</sup>Bechebe Pilato:

—Da bzuaja', ba naxúajqueze na.

<sup>23</sup>Ca gudé buludá' benne' dxjaque' wedil-la Jesús xaga béguaj, na' belexequé'e zra lané', ne belebeque' na tapa cue', tu cue' weaj chee tu tu benne' dxjaque' wedil-la. Belecá'aqueze' ladxe' dxexrúa cuzre' da quebe nadía na. Tu ca nácheze na. <sup>24</sup>Chee le na' benne' dxjaque' wedil-la gulé ljwezre':

—Quebe chézadxu na. Cwéajdxu da gunna bea na chee la' nu xala le na.

Ca'an guca, guca li da naxúaj na lu xiche chee Dios, da dxenná na: Belexelé'e zra lana', ne guléajé' da gunna bea na chee le na. Caní belún benne' dxjaque' wedil-la.

<sup>25</sup>Gáguze naga zua xaga béguaj chee Jesús ze xrna Jesús nen bi bila xrne'e, ne María, zru'ula Cleofas, ne María Magdalena. <sup>26</sup>Gate ble'e Jesús xrne'e, ne cuita xrne'e na' ze Juan, benne' bsede Jesús, bénnea' nazri'idxé', na' guzre' xrne'e:

—Nú'uladau', na' ze zri'inu'.

<sup>27</sup>Nadxa guzre Jesús bénnea':

—Na' ze xrna'u.

Zra na'te benne' nigá beche'e nu'ula na' lizre'.

### *Dxate Jesús*

(Mt. 27.45-56; Mr. 15.33-41; Lc. 23.44-49)

<sup>28</sup>Ca gudé gunná Jesús da nigá, lawe' da nézene' xúgute na ba guca li, ne chee guca li ca naxúaj na lu xiche chee Dios, gunné':

—Dxebíleda'.

<sup>29</sup>Zua na' tu dxe'e nupe zichaj, na' bulusubise' tu da dxezrupe na nupe zichaj na', ne buluzúe' na lawe' tu xia tunna, na' buluzúe' na dxu'a Jesús.

<sup>30</sup>Na' Jesús guzrupe' nupe zichaj na', na' gunné':

—Ba guca li ca naca na.

Nadxa bse dxu'a xíchajé', gutié'.

### *Tu benne' dxeje' wedil-la dxechizie' xia lachú'u Jesús*

<sup>31</sup>Naca na zra za zrin Laní Pascua, na' judío ca' quebe gulaca lazre' xelexegá'ana benne' ca' le'e xaga béguaj ca' lu zra dxulupá'ang' lawe' da naca zra na' tu zra blau. Chee le na' gulenabe' lau Pilato dxixruj bé'eng' xelíchajé' ni'a benne' ca' zaj de'e xaga béguaj ca', ne xelexequé'e le' le'e xaga béguaj ca'. <sup>32</sup>Nadxa tu benne' ca' dxjaque' wedil-la gudíchajé' ni'a benne' nedxu na', ne cá'anqueze chee benne' xetú de'e cuita Jesús. <sup>33</sup>Gate bzrine' naga da' Jesús, blé'ene' ba gutié', na' chee le na' quebe gudíchajé' ni'e.

<sup>34</sup> Tu benne' ca' dxjaque' wedil-la guchízię' xia cheę' lachú'u Jesús, na' bdxuaj dxen, ne nisa na'. <sup>35</sup> Benne' dxuchalaj da nigá naque' benne' blé'ene' na, ne dxuchálaje' da li, ne nézene' dxenné' da li, cheę' cá'anqueze le'e chéajlele cheę' Jesús. <sup>36</sup> Da caní guca na cheę guca li ca da naxúaj na lu xiche cheę Dios, da dxenná na: Quebe gulíchaje' netú zrita cheę'. <sup>37</sup> Xetú da naxúaj na lu xiche cheę Dios dxenná na: Welelé'ene' bénnea' belune' we'.

### *Dxulucache' Jesús*

(Mt. 27.57-61; Mr. 15.42-47; Lc. 23.50-56)

<sup>38</sup> Ca gudé na' José, benne' xezre Arimatea, xeajnabe' Pilato gu'e le' lataj xexu'e Jesús. José naque' tu benne' guque' Jesús tuze, san bagácheze lawe' da bzrebe' judío blau ca'. Pilato be'e le' lataj, na' bexu'e Jesús. <sup>39</sup> Cá'anqueze Nicodemo, bénnea' xeajchálajlene' Jesús chizrela, bzrine' na', nu'e tu gaxúa xiaj nedxe, ne tu da dxelále'e zixre. <sup>40</sup> Nadxa José, ne Nicodemo belexequé'e Jesús, na' buluchele' Le' ladxe' nen nedxe na' ca naca da zjácale benne' judío ca' da dxelune' cheę benne' gate', gate na' dxulucache' le'. <sup>41</sup> Lataj na' naga buludé'e Jesús xaga béguaj zua tu lataj naga zaj zę xaga ca', na' lávela lataj na' zua tu ba cube le'e xiaj na', naga quebe nu ne chú'ukeze benne' gate'. <sup>42</sup> Lu ba na' belegu'e Jesús lawe' da zua ba na' gáguze, ne lawe' da ba dxebía gubizra, ne ba zua su lau zra dxulupá'ana judío ca'.

## 20

### *Jesús dxexebane' ládujla benne' gate*

(Mt. 28.1-10; Mr. 16.1-8; Lc. 24.1-12)

<sup>1</sup> Zra nedxu, guxíaj María Magdalena dxu'a ba na' dxani'sise', gate ne nachúl-late, na' blé'ene' québedxa naduse xiaj dxu'a ba na'. <sup>2</sup> Nadxa bexíaj chégüe' naga zua Simón Pedro nen xetú benne' bsede Jesús, bénnea' bzri'idxe' Jesús, na' guzre' benne' ca':

—Ba belequé'e Xránadxu lu ba na', ne quebe nézentu' ga xeajlelú'e Le'.

<sup>3</sup> Nadxa Pedro, ne bénnea' xetú beledxúaje' zjaque' dxu'a ba na'. <sup>4</sup> Dxúpatę' zjaca chégüe' tu zren, san bénnea' xetú guzá chégudxe' ca Pedro, ne bzrine' nédxudxa dxu'a ba na'. <sup>5</sup> Na' xeajsé' su dxú'ala xeajnné'e lu ba na', na' blé'ene' ladxe' da buluchele' Jesús xu'u na na', san quebe guxú'e lu ba na'. <sup>6</sup> Ca gudé na', bzrin Simón Pedro, na' guxú'e lu ba na'. Cá'anqueze le' blé'ene' ladxe' na' xu'u na na', <sup>7</sup> ne blé'ene' ladxe' da buluchele' xichaj Jesús, quebe xu'u na tu zren nen ladxe' da bedxela na le'. Nadube na, dxę' na chalá'ala. <sup>8</sup> Nadxa cá'anqueze guxú'u bénnea' xetú, bénnea' bzrin nedxu dxu'a ba na', na' blé'ene' ladxe' ca', ne guxéajle'e. <sup>9</sup> Quebe ne xeléajni'ine' da naxúaj na lu xiche cheę Dios da dxenná na xebán Jesús ládujla benne' gate'. <sup>10</sup> Nadxa benne' ca' bsede Jesús belexezrine' xu'u naga zaj zre'e.

### *Jesús dxulé'e lawe' María Magdalena*

(Mr. 16.9-11)

<sup>11</sup> María begá'ane' dxu'a ba na', dxebezre'. Ca dxebezre' na', na' gulégüe' dxenné'e lu ba na', <sup>12</sup> na' blé'ene' chupa gubáz cheę xabáa zaj nácuę' zra lanę' chiche, zaj dxę'e naga guxú'u Jesús. Tue' dxę'e naga guzrúa xichaj Jesús, na' xetúe' dxę'e zeaj zranle ga guzrúa ni'a Le'. <sup>13</sup> Na' buluchębe gubáz cheę xabáa ca' María na':

—Nu'ula, ¿bizr cheę na' dxebezru'?



Lē' guzre' gubáz chee xabáa ca':

—Lawe' da belú'ē Xrana', ne quebe nezda' ga xeajlelú'ē Lē'.

<sup>14</sup> Caní dxenné', na' bzéchaj xíchajé', ne blé'eng' Jesús zē' ca'ala, san quebe nézene' che Jesús na'. <sup>15</sup> Nadxa Jesús bchebe' María na':

—Nú'uladau', ¿bizr chee na' dxebezru'? ¿Nu dxexílaju'?

María gúquene' naque' benne' dxá'ane' xaga ca' zaj zē na', na' guzre' Lē':

—Benne', che lue' bi'u Lē', gunná ga xeajlú'u Lē', chee cheajxezri'a Lē'.

<sup>16</sup> Nadxa Jesús guzre' nu'ula na':

—María.

María na' bexéchajé', ne guzre' Lē' nen dizra' hebreo:

—¡Raboni!

Dizra' nigá zéajē na: Benne' Dxusēde.

<sup>17</sup> Jesús guzre' María na':

—Bsan neda' lawe' da quebe ne xegüéna' naga zua Xra'. Bexíaj, xeajxēzre bi' bícha'dau' ca', benne' ca' bsédeda', xegüéna' naga zua Xra', ne nácaqueze' Xrale. Naque' Dios chia', ne Dios cheele.

<sup>18</sup> Nadxa bexíaj María Magdalena, xeajzenne' benne' ca' bsēde Jesús ba blé'eng' Jesús, na' Lē' guzre' le' da caní.

*Jesús dxul'é lawe' benne' ca' bsédenē'*

(Mt. 28.16-20; Mr. 16.14-18; Lc. 24.36-49)

<sup>19</sup> Lu zra ná'queze, da naca na zra nedxu chee da gazre zra, na' chizrela zaj nazraga benne' ca' bsēde Jesús, ne zaj nusézxujē' dxa xu'u ca' lawe' da dxelezrebe' judío blau ca'. Na' guxú'u Jesús, guzē' laduj benne' ca', na' bgape' benne' ca' diuzre, dxenné':

—Le gapa xel-la' dxebeza zri lazre'.

<sup>20</sup> Ca gudé gunná Jesús da nigá, na' blé'eng' benne' ca' ne'e, ne le'e naga gudé xia na'. Benne' ca' bsēde Jesús gulebéle'eng' gate belelé'eng' Xránadxu. <sup>21</sup> Nadxa Jesús guzre' benne' ca' xecha lasa:

—Le gapa xel-la' dxebeza zri lazre'. Cáteze gusel-la Xra' neda', cá'anqueze dxusel-la' neda' le'e.

<sup>22</sup> Nadxa blube' lau benne' ca' ne guzre' le':

—Le si' Be' Lá'azxa chee Dios. <sup>23</sup> Benne' ca' dxunite laule le'e chee dul-la zaj nabague' ba bnite lau Dios chee', na' benne' ca' quebe dxunite laule le'e chee dul-la zaj nabague', quebe bunité lau Dios chee'.

*Tomás dxelé'eng' Xránadxu ba bebane'*

<sup>24</sup> Tomás, tu benne' chazrinnu ca' bsēde Jesús, bénnea' le' Bi Lide', quebe zue' nen benne' ca' xezícadxa gate ble'e lau Jesús. <sup>25</sup> Ca gudé na' gulé'ē Tomás na':

—Ba blé'entu' Xránadxu.

Gunná Tomás:

—Che quebe le'eda' ne'e naga guledé bdiduj ca', ne gudéa' zrube na'a lu xēdxu chee bdiduj ca', ne gudéa' na'a le'e naga gudé xia na', québequeze chéajle'a.

<sup>26</sup> Ca guca xrunu' zra, benne' ca' bsēde Jesús zaj nazrágaqueze' lu xu'u na' xetú lasa, na' zua Tomás nen benne' ca'. Nadxa, lácala zaj naxezxuj dxa xu'u ca', ble'e lau Jesús lau benne' ca', ne guzē' laduj le', na' bgape' le' diuzre, gunné':

—Le gapa xel-la' dxebeza zri lazre'.

<sup>27</sup> Nadxa Jesús guzre' Tomás:

—Bde zrube na'u nigá, ne gunná' na'a nigá. Benna na'u, bde na le'a nigá. Québedxa gun chupa lazru', san guxéajle.

<sup>28</sup> Nadxa bechebe Tomás:

—Xrana', ne Díos chia'.

<sup>29</sup> Jesús guzre' le':

—Tomás, na'a dxéajle'u lawe' da ba blé'enu' neda'. Ba neza zrente naca na chee benne' ca' dxeléajle'e chia' lácala quebe ne xelelé'eng' neda'.

*Da dxaca lazre' Juan gun xiche nigá*

<sup>30</sup> Jesús bene' da zandxa xel-la' waca zrente lau benne' ca' bsédene' da quebe zaj naxúaj na lu xiche nigá. <sup>31</sup> Da caní zaj naxúaj na chee chéajlele le'e chee Jesús, naque' Cristo nasel-la Díos, ne Zri'ine Díos, ne chee gápale xel-la' nabán lawe' da dxéajlele chee'.

## 21

*Jesús dxulé'e lawe' gazre benne' ca' bsédene'*

<sup>1</sup> Ca gudé na' Jesús ble'e lawe' lau benne' ca' bsédene' dxu'a nísadau' chee Tiberias. Caní guca na. <sup>2</sup> Zaj nazraga Simón Pedro, ne Tomás, bènnea' léqueze' Bi Lide', ne Natanael, benne' xezre Caná da nababa Galilea, ne chupa zri'ine Zebedeo, ne xechupa benne' ca' bséde Jesús. <sup>3</sup> Simón Pedro guzre' benne' ca':

—Cheajsendxa' bela.

Benne' ca' gulenné':

—Cá'anqueze netu' wazá'entu' lue'.

Nadxa xjaque', na' gulu'e tu lu da dxedá lawe' nísadau'. Xela na' quebe nu bela gulezénqueze'. <sup>4</sup> Ca guzú lau dxaní'sise', ble'e lau Jesús dxu'a nísadau' na'. Benne' ca' bsédene' quebe zaj nézene' che Jesús na'. <sup>5</sup> Nadxa Jesús guzre' benne' ca':

—Bénne'dau', ¿quebe nu bela ne senle?

Belexechebe benne' ca':

—Quebe bi ne sentu'-ba'.

<sup>6</sup> Nadxa guzre Jesús benne' ca':

—Le guzala xixruj na' chalá'a xabēla chee da dxedá lawe' nísadau' na', na' senle bela.

Ca' belunē', na' ca dxelexequé'e xixruj na' quebe dxelexegué'eng' na lawe' da nazrate na bela zan. <sup>7</sup> Nadxa bènnea' nazrí'idxa Jesús guzre' Pedro:

—Xránadxu na'.

Ca ben Simón Pedro naca Xránadxu, na' bexázie' ladxe' dxexrúa cuzre' lawe' da nagüē' na, na' bexétaje' lu nisa. <sup>8</sup> Xezícadxa benne' ca' belexezrine' dxu'a nísadau' na', zaj zre'e lu da dxedá lawe' nísadau', dxelexezrube xue' xixruj na' nazrate na bela ca' lawe' da dxe' da dxedá lawe' nísadau' na' lu nísadau' ca tu le gu'una xiaj. <sup>9</sup> Gate belexétaje' lu xu bizre, na' belelé'eng' ba dxe' xi', ne ba zrua tu bela lawe' xi' na', na' de na' xeta xtila. <sup>10</sup> Nadxa Jesús guzre' benne' ca':

—Le cheajxri' tu chupa bela ca', be za guzéntele.

<sup>11</sup> Begüén Simón Pedro lu da dxedá lawe' nísadau' na', ne bezrube xue' xixruj na' dxu'a nísadau' na'te, nazrate na bela zri'a, tu gaxúa chi'inu xunba', na' lácala naca tu cá'antēba' quebe gudxeza xixruj na'. <sup>12</sup> Nadxa guzre Jesús benne' ca':

—Le da gágule xrsila.

Netú benne' ca' quebe dxelexázreng' xuluchēbe' Lē' nu Lē', lawe' da zaj nézene' naque' Xránadxu. <sup>13</sup> Nadxa Jesús guquē'e xeta xtila na', na' bnézrujē' na benne' ca', ne cá'anqueze beñē' chee' bela ca'.

<sup>14</sup> Da nigá naca na da guxunne' lasa ble'e lau Jesús lau benne' ca' bsédenē' ca gudé bebane' ládujla benne' gate.

*Jesús dxuchálajlēnē' Simón Pedro*

<sup>15</sup> Ca gudé gulawē' xrsila, na' Jesús bchebe' Simón Pedro:

—Simón, zri'ine Jonás, ¿nazrí'idxenu' neda' ca benne' caní'?

Bechebe Pedro:

—Awe', Xran, nézenu' dxelé'eda' Lue' chawe'.

Na' Jesús guzre' le':

—Bxue zrila'du chia' ca'.

<sup>16</sup> Nadxa Jesús bchebe' le' da xula:

—Simón, zri'ine Jonás, ¿nazrí'inu' neda'?

Pedro bechebe':

—Awe', Xran, Lue' nézenu' dxelé'eda' Lue' chawe'.

Jesús guzre' le':

—Bxue zrila' chia' ca'.

<sup>17</sup> Da guxunne' lasa Jesús bchebe' le':

—Simón, zri'ine Jonás, ¿dxelé'enu' neda' chawe'?

Pedro bewi'ine lazre' lawe' da bchebe Jesús le' da guxunne' lasa che dxelé'enē' Lē' chawe', na' guzre' Jesús:

—Xran, Lue' nézquezenu' xúgute. Lue' nézenu' dxelé'eda' Lue' chawe'.

Na' Jesús guzre' le':

—Bxue zrila' chia' ca'. <sup>18</sup> Da li dxapa' lue', gate ne nacu' benne' cuide' gucu' zra lanu', ne guxíaju' naga dxaca lazru'. Gate bache nacu' benne' gula, chilju' na'u, na' benne' xula gugácuē' lue', ne che'e lue' naga quebe gaca lazru' chéaju'.

<sup>19</sup> Gate gunná Jesús da nigá, dxuzéajni'ine' benne' ca' ca dxal-la' gate Pedro chee' gucá'ana szreng' Dios. Ca gudé na' Jesús guzre' le':

—Ben neda' tuze.

*Da gaca chee' bēnnea' nazrí'idxa Jesús*

<sup>20</sup> Gate bexechaj Pedro, blé'enē' bēnnea' nazrí'idxa Jesús zéaje nawē' le', naque' bēnnea' dxe'e cuita Jesús gate na' gulawē' xrche' na', ne bchebe' Jesús: “Xran, ¿nuzra na' gudé Lue' lu na' benne' ca' dxeledábague' lue'?”

<sup>21</sup> Gate Pedro blé'enē' bēnnea', na' bchebe' Jesús:

—Xran, ¿gazra benne' nigá? ¿Aja gaca chee'?

<sup>22</sup> Jesús bechebe':

—Che neda' dxaca lazra' xegá'angē' nigá ca zrindxa zra xelá'a neda', ¿naca na chiu' lue' nézenu'? Lue', beñ neda' tuze.

<sup>23</sup> Belén benne' ca' zaj de'e Jesús quebe gate benne' na'. Jesús quebe guzre' le' quebe gatiē'. Guzre' le': “Che neda' dxaca lazra' xegá'angē' ca zrindxa zra xelá'a neda', ¿naca na chiu' lue' nézenu'?”

<sup>24</sup> Benne' nigá naque' benne' dxexechēbe' chee' da nigá, ne ba nuzúaje' na. Nézentu' dxenné' da li.

<sup>25</sup> Cá'anqueze ne zaj dedxa da zante da beñ Jesús, na' chela xuaj tu tu na, dxéqueda' quebe gueque lu xezr la xu nigá cha' xiche ca' dxal-la' guzúajdxu. Ca' naca na.

## DA CA' BELÚN BENNE' GUBÁZ CHEE CRISTO

*Dios nachebe lazre' sel-le' Be' Lá'azxa*

<sup>1</sup> Lue', Teófilo, bzuaja' chiu' lu xiche nedxu ca naca xúgute da guzú lau Jesús dxune', ne dxusédenē' nédxudaute, <sup>2</sup> cadxa begüéne' xabáa. Gate za xezé'e xexíaje' xabáa guqué'e gubáz chee' ca', na' zúale Be' Lá'azxa Le' guzre' benne' ca' ca da dxal-la' xelune'. <sup>3</sup> Ca gudé gutie', Jesús ná'queze ble'e lawe' benne' ca', ne lawe' chua zra ble'e lawe' benne' ca', na' blé'ene' da zan da dxelunna bea na naca banē', ne bchálajlene' benne' ca' ca dxal-la' nna bea Dios.

<sup>4</sup> Gate ne zúale Jesús benne' gubáz ca', gunné xuene' le' quebe xesí'aque' xezre Jerusalén. Na' guzre' benne' ca':

—Le cueza ca da guchebe lazre' Xra' gunne' cheele, ca gunníqueza' neda'. <sup>5</sup> Da li Juan bchuē' bēnneache nisa, san lu zra caní gaca cheele ca da zéaje xel-la' dxedxúa nisa, xida Be' Lá'azxa xedajsúe' lu xichaj lázrdaule.

*Jesús dxegüéne' xabáa*

<sup>6</sup> Gate na' zaj nazrague' nen Jesús, na' buluchebe' Le':

—Xran, ¿güe Dios lataj nna béaqueze xezre Israel lu zra caní?

<sup>7</sup> Na' bechebe Jesús:

—Quebe naca cheele nézele bátala, u bi zra gun Dios da ca' tuze Le' nape' xel-la' waca gune'. <sup>8</sup> Gate xida Be' Lá'azxa súalene' le'e, sile xel-la' waca, na' chéajle cheajchálajle da naca chia' lu xezre Jerusalén, ne ca naca naga nababa Judea, ne naga nababa Samaria, ne ca náaqueze xezr la xu nigá.

<sup>9</sup> Ca gudé gunné' da nigá, ne dxácatē dxelenná' benne' ca' Le', begüén Jesús xabáa, na' ca bexu'e tu lu beuj benite Jesús lau benne' ca'. <sup>10</sup> Ne zaj zra' benne' ca' dxelenné'e dxácatē dxegüén Jesús, beledá' chupa benne' zaj nácuē' ladxe' chiche lau benne' ca', <sup>11</sup> na' gulé'e benne' gubáz ca':

—Le'e, benne' Galilea, ¿bizr chee na' zele dxenna'le xabáa? Jesús nigáqueze begüéne' zexíaje' xabáa, bezé'e ládujla le'e, welé'e xetú cáqueze ble'ele Le' zexíaje'.

*Dxeleque'e Matías chee xedé'e waláz chee Judas*

<sup>12</sup> Nadxa besí'aca benne' gubáz ca' lu Xi'a Xaga Olivo, ne belexezrine' Jerusalén, da quebe naca na zitu', san dxe' cátițeze da dxunna da nadx-ixruj bea na lataj xesí'aque' lu zra dxulupá'anē'. <sup>13</sup> Gate belexezrine' lu xezre na', belexegüéne' xu'u sibe naga zaj zue'. Benne' caní zaj naque' Pedro, ne Jacobo, ne Juan, ne Andrés, ne Felipe, ne Tomás, ne Bartolomé, ne Mateo, ne Jacobo zri'ine Alfeo, ne Simón, bēnnea' dxedábague' benne' Roma ca', ne Judas, zri'ine Jacobo. <sup>14</sup> Xúgute benne' caní tu dxelezrágazqueze' nen benne' biche Jesús, ne María xrna Jesús, ne xebal-la nu'ula ca', chee xuluchálajlene' Dios.

<sup>15</sup> Lu zra ca' Pedro guzé' laduj bi bíchedxu ca', zaj naque' ca tu gaxúa galaj bēnneache, na' guzre' le':

<sup>16</sup> —Le'e, bi bícha'dau', bēn na ba xen guca li ca da gunná Be' Lá'azxa lu xiche chee Dios, da na' gunná David waláz chee Dios ca naca da dxal-la' gaca chee Judas, bēnnea' guché'e benne' ca' gulel-le' Jesús. <sup>17</sup> Judas nigá guzúalene' dxi'u tu zren, ne guque' dxi'u tuze lu zrin nigá. <sup>18</sup> Bxa'u tu cue' xezr la xu ca naca lazruj chee Judas, da guzú' lu ne'e chee da calela da

bene'. Na' benne' nigá xeajcházię' suxíchajla, ne gutín le'e, na' bdxuaj ca naca zrájluę'. <sup>19</sup> Xúgute benne' zaj zře'e Jerusalén belenne' da nigá, na' buluzúę' la xežr la xu na' Acéldama, da zéaje na: Xežr La Xu Cheę Dxen. <sup>20</sup> Guca li ca da dxal-la' gaca cheę' lawe' da naxúaj lu xiche lá'azxa naga zaj naxúaj salmo ca', da dxenná na:

Xegá'ana cá'aze lizre',

ne quebe nu chilá' sua na'.

Cá'anqueze dxenná na:

Xetú benne' téę' waláz cheę'.

<sup>21</sup> 'Zaj zra' nigá benne' ca' gusá'acalęne' dxi'u ca naca dxácate guzúale Jesús dxi'u. <sup>22</sup> Guzú lau na gate bchua Juan Jesús nisa, cadxa bzrin zra begüene' xabáa. Dxun na ba xen tu benne' caní gaque' dxi'u tuze cheę xechebę' ca guca gate bebán Jesús lu xel-la' gute.

<sup>23</sup> Nadxa gulebéaje' chupa benne' ca', José ne Matías. José na' léqueze' Barsabás ne léqueze' Justo. <sup>24</sup> Buluchálajęne' Dios, gulenné':

—Xran, Lue' nézqueznu' ca naca da xu'u lu xichaj lázxdau xúgute bėnneache. Ble'e netu' nula benne' chupa caní ba nabéaju' Lue', <sup>25</sup> cheę gaque' gubáz chiu', ne xedéę' waláz cheę Judas, bėnnea' bnitie' da naca cheę' lawe' da bene' dul-la, na' bexíaje' lataj naga naca cheę'.

<sup>26</sup> Nadxa gulebéaje' da gaca bea na, na' bexala Matías, na' gúcate' tuze benne' chinéaj gubáz ca'.

## 2

### *Ca guca gate bla' Be' Lá'azxa*

<sup>1</sup> Ca bzrin zra Pentecostés, xúgute benne' ca' dxelėjle'e cheę Jesús zaj nazrague' tuze lataj. <sup>2</sup> Ca' guca, belenne' tu schaga da za' lu be' zran xabáa, ca dxun tu be' bdunu', na' belén na xúgute benne' zaj zře'e lu xu'u naga zaj dxe'e. <sup>3</sup> Nadxa belelé'ene' lu be' xi' ca', da dxelala, na' xeajlezúa na xíchaj tu tu benne' ca'. <sup>4</sup> Nadxa guzúaletequeze Be' Lá'azxa xúgute benne' ca', na' tu tue' gulezú lawe' dxuluchálaje' dizra' nazrala cáteze dxuchine Be' Lá'azxa le'.

<sup>5</sup> Ca lu zra ca' zaj zra' xežre Jerusalén benne' judío ca' dxulucá'ana szrėnqueze' Dios. Benne' caní zá'aque' xúgute xežr la xu zaj dxe' lu xežr la xu nigá. <sup>6</sup> Ca belenne' bėnneache ca naca schaga na' da dxaca na, na' belexezrague', ne quebe zaj nézene' bi na', lawe' da dxelén tu tu benne' ca' dizra' cha cheę' da dxuluchalaj benne' ca' dxelėjle'e cheę Jesús. <sup>7</sup> Na' belexebánele'ęne', ne belexruse', ne gulé ljwezre' tue' xetúe':

—Zaj naca benne' Galilea xúgute benne' caní dxuluchálaje'. <sup>8</sup> ¿Ájazra na' dxendxu dxuluchálaje' dizra' cha cheędxu dxi'u? <sup>9</sup> Zradxu dxi'u nigá, nácadxu benne' xežr la xu Partia, ne benne' xežr la xu Media, ne benne' xežr la xu Elam, ne benne' xežr la xu Mesopotamia, ne benne' cheę xežre ca' zaj nababa Judea, ne benne' cheę naga nababa Capadocia, ne benne' cheę naga nababa Ponto, ne benne' cheę naga nababa Asia, <sup>10</sup> ne benne' cheę naga nababa Frigia, ne benne' cheę naga nababa Panfilia, ne benne' xežr la xu Egipto, ne benne' cheę xežr la xu Africa da zua dédedxa cheę xežre Cirene. Cá'anqueze zaj zra' benne' xežr la xu Roma nigá. Bal-la benne' Roma ca' zaj naque' benne' judío, benne' gulálaje' ca', ne benne' zaj nazi'e ca naca da nadxixruj bea cheę benne' judío ca'. <sup>11</sup> Cá'anqueze nácadxu benne' xežr la xu Creta, ne benne' xežr la xu Arabia. Xúgutedxu

dxendxu lu dizra' cha cheedxu dxuluchalaj benne' caní ca naca da zren ca' da dxun Dios.

<sup>12</sup> Xúgute' belexebánene', ne quebe zaj nézene' bi da dxaca na', na' gulenaba ljwezre' tuę' xetúe':

—¿Bizra zéaje da nigá?

<sup>13</sup> Benne' xula ca' belún le', gulenné':

—Dxelezuzre benne' caní.

*Da bchalaj Pedro lau benne' ca'*

<sup>14</sup> Nadxa guxasa Pedro nen benne' chinéaj gubáz cheę Cristo, na' zizraj bchálajlene' bénneache zaj zra' na'. Dxe'e le':

—Le'e, benne' Judea, ne xúgutele le'e nazrágale xezre Jerusalén. Dxalla' nézele le'e da nigá. Le xen xanne' ca naca da xapa' le'e. <sup>15</sup> Netu' quebe dxezúzrentu' ca dxéquele le'e. Za gudete xrsila na'a. Netú benne' quebe dxezúzrene' ca ná'queze. <sup>16</sup> Da nigá naca da gunnáqueze Joel, bénnea' bchálaje' waláz cheę Dios gate na' gunné':

<sup>17</sup> Caní dxenná Dios: “Lu zra bzębe wasél-laqueza'

Be' Lá'azxa chia' cheę súalene' xúgute bénneache.

Zrí'inele bi biu ne bi nu'ula welennéquezebe' waláz chia' neda'.

Bi cuide' ca' welelé'equezebe' ca da gulé'eda'-be'.

Na' benne' gula ca' welennéquezene' xęla.

<sup>18</sup> Ca lu zra na' guzuáqueza' Be' Lá'azxa chia'

nen bi wen zrin chia' ca', benne' biu ne nu'ula ca',

na' guchálajquezebe' waláz chia' neda'.

<sup>19</sup> Lu be' zran xabáa gulé'equezda' xel-la' waca chia',

na' lu xezr la xu dxe'ela gulé'eda' da xelunna bea na,

dxen, ne xi', ne zren da naca ca beuj gasaj.”

<sup>20</sup> Gubizra xechul-la na,

na' beu' xexaca na xrna ca dxen

nedxu ca za zrin zra xelá' Xránadxu.

Zra na' gaca na tu zra cheę da xebánedxu

ne zra na' walé'equezdxu xel-la' szren cheę Dios.

<sup>21</sup> Nadxa xelélé xúgute benne' ca'

xelenné' Xránadxu lu xel-la' dxeleajlí lazre' cheę'.

<sup>22</sup> 'Cheę le' na', le'e, benne' Israel, le xen ca da xapa' le'e. Jesús, benne' Nazaret, guquę' tu benne' bedxúaje' xrlátaje lau xúgutele le'e ne cheę da ben Dios laule le'e. Lu na' Jesús Dios blé'ene' da zan da dxebánedxu, ne xel-la' waca ca', ne da dxelunna bea na ca ba nézquezle le'e. <sup>23</sup> Gate Dios be'e lataj tu benne' bdeę' Le' lu na'le le'e cáteze bache núnqueze' nedxu,

nadxa le'e gudél-lale Le', na' bętele Le' gate na' bdele Le' lu na' benne' ca' dxelune' da calela, benne' ca' buludé'e Le' xaga bęguaj naga gutię'. <sup>24</sup> Nadxa Dios bsebane' Le', bebéaje' Le' lu xel-la' gute. Quebe guxú'u ájala xegá'ane' chalásaze lu xel-la' gute na'. <sup>25</sup> Ca naca da nigá bchalaj wenná bea David ca naca cheę Jesús na', gate gunné':

Belé'equezda' Xrana' lawa' nigá.

Le' zuę' cuita' xabęla, cheę quebe bi guchebe na neda'.

<sup>26</sup> Cheę le' na' gubéle'eda', ne bil-la' lu xel-la' dxebe' chia'.

Cheę le' na' guxrén lázrequeza' Le' gate gatia',

<sup>27</sup> lawe' da quebe xucá'anaquezu' neda' lu lataj cheę benne' gate. Quebe güéquezu' lataj guzru beł-la' dxen chia' neda',

naca' benne' wen zrin chiu', ne benne' nazrí'inu'.

28 Blé'equezenu' neda' ca dxal-la' guna' chee zrué'eda' xel-la' nabán, na' gúnnalé'u neda' xel-la' dxebé lawe' da zúalenu' neda'.

29 'Le'e, bi bícha'dau'. Naca bea na gute xra xrtáudxu David, na' bulucaché' le' lu xedxu ba chee' da zúaqueze na na'a nagá zúadxu. 30 David na' guque' tu benne' bchálaje' waláz chee Dios, ne gunézene' ca da nachebe lázrequeze Dios guné'. Gunné lié' tu benne' zri'ine zre sua David na' gaque' Cristo, Bénnea' nna béaqueze', xeque'e lawe' chee David. 31 Ca' guca, David nigá belé'equezne' nedxu ca naca da dxal-la' gaca chee Cristo, na' bchálaje' ca guca gate bebán Cristo, gunné': "Benne' nigá quebe xegá'anaqueze' lataj chee benne' gate, ne quebe gúzruqueze bel-la' dxen chee'." 32 Caní guca, Dios bsebané' Jesús nigá, na' netu' dxexeché'entu' da li ca guca da nigá. 33 Ca' guca, Dios bzue' Jesús lu xabáa chee' nen xel-la' waca chee', na' be'e Le' lataj gusel-le' Be' Lá'azxa chee' nigá ca nachebe lázrequeze' nedxu guné', na' xúgutę da caní dxelé'ele le'e, ne dxenle zaj naca na da dxun Be' Lá'azxa na'. 34 David na' quebe begüéne' xabáa, san léqueze' guné':

Xránadxu Dios guzre' Xrana':

"Gudxe'e cuita' xabela nigá

35 ca zrindxa zra guzúa' benne' dxedábague' lue' chee nna be'enu le'."

36 'Xúgutęle le'e, benne' Israel, dxal-la' nézquezle da nigá: Jesús nigá, bénnea' bda'le le'e xaga béguaj, Dios ba nune' Le' Xránale ne Cristo chee, Benne' guselé' le'e.

37 Gate benne' ca' belenne' da nigá, na' belexewí'ine lazre', na' buluchębe' Pedro, ne benne' gubáz ca' chee Jesús, dxelé'e le':

—Benne' bíchentu', ¿ájazra dxal-la' guntu' xca'?

38 Nadxa gunná Pedro:

—Le xebí'i lazre' lau Dios, ne le chua nisa tu tule chee gácale Jesucristo tuze, chee gunité lau Le' chee le'e ca naca dul-la da nabágale. Ca' gaca, nadxa Dios sél-laqueze' Be' Lá'azxa chee' chee súalene' le'e. 39 Da nigá nachebe lazre' Dios naca na chee le'e, ne chee zrí'inele, ne chee xúgutę benne' zaj zre'e zitu', xúgutę benne' ca' dxaca lazre' Dios nne'.

40 Ca naca dizra' nigá, ne xezícaladxa dizra' da bchalaj Pedro, bzéajni'ine' benne' ca', na' gunné':

—Le la ládujla benne' wen da calela caní.

41 Ca'an guca, benne' ca' guléajle'e chee da bchalaj Pedro belexedxúe' nisa, na' lu zra na' belaca tuze ca chi dxua gaxúa benne' nen benne' ca' ba dxeléajle'e chee Jesús. 42 Na' xúgutę benne' ca' gulezúa típaqueze' ca da dxulusede benne' gubáz chee Jesús le', na' gulezúe' tuze nen le sa' ljwezre' chee bululáwizre' Dios, ne buluzrague' chee xelawe' da dxusá lázredxu ca guca gate gute Cristo.

*Ca belún benne' nedxu ca', benne' guleajlí lazre' Cristo*

43 Xúgutę benne' ca' gulezrebe' gate belelé'ene' xel-la' waca zante, ne da dxelunna bea na da dxelún benne' gubáz chee Jesús. 44 Xúgutę benne' ca' dxeléajle'e chee Jesús gulaque' tuze, ne bulunézruje' da de chee' tue' xetúe'. 45 Belutie' xúgutę da zaj nape', ne bulunézruje' dumí na' chee benne' ca' ca da dxelexázrjene'. 46 Xugu' zra belexezrague' lu xudau', ne cá'aqueze lu lizre cha chee', chee xelawe' da dxusá lázredxu ca guca gate gute Cristo. Gulawe' tu zrentę lu xel-la' dxelebé, ne dutę xel-la' dxelexruj lazre' chee'. 47 Belúe lá'ane' Dios, na' xúgutę bénneache guléquene' benne'

ca' ba lá'ana. Tu zra tu zra Xránadxu bzane' benne' ca' chee Cristo ca dxelezí' lu ne'e tu tue' Cristo.

### 3

#### *Dxexaca tu benne' zrinnaj*

<sup>1</sup> Tu zra xjaque' Pedro ne Juan lu xudau' dxexedá' chunna, da naca na gate dxululáwizraj bèneache Dios lu xudau'. <sup>2</sup> Tu zra tu zra zua tu benne' na' naque' zrinnaj ca nálajte'. Dxeleché' benne' ljwezre' le' xudau' na', ne dxelebeche' le' dxu'a dxa xu'u na' nazí le na: Da Xrtante, chee nabe' guna' chee benne' dxelu'e na'. <sup>3</sup> Gate benne' zrinnaj nigá blé'ene' Pedro ne Juan, dxelu'e xudau', na' gunabe' guna' lau benne' caní. <sup>4</sup> Nadxa Pedro ne Juan gulenné'e le', na' Pedro guzre' benne' na':

—Gunná' netu'.

<sup>5</sup> Benne' na' gunná' xánnie' le' lawe' da dxéqueñe' bi xulunezruje' le'. <sup>6</sup> Pedro guzre' le':

—Quebe bi de chia' dumí plata ne dumí oro. Da napa' gunna' lue'. Lu La Jesucristo, benne' Nazaret, guxasa gudá.

<sup>7</sup> Nadxa Pedro guque'e na' benne' zrinnaj na' da zua xabeła, ne bechise' le', na' ca bene' caní, belexezúa chacha ni'e, ne béchajdu chee' ca'. <sup>8</sup> Nadxa benne' zrinnaj na' guxrítie' tu, na' guzé', ne guzú lawe' dxedé'. Guxú'e nen benne' ca' xudau', dxedé', dxexrítie', ne dxue lá'ane' Dios. <sup>9</sup> Xúgute' benne' zaj zre'e na' belelé'ene' le' dxedé', ne dxue lá'ane' Dios. <sup>10</sup> Belexebáne', ne belezrebe' ca da belelé'ene' guca na, lawe' da zaj núnbe'e benne' zrinnaj na', ne zaj nézene' naque' bènnea' dxebé'e dxenabe' guna' ga dxelexú'u bènneache xudau', da na' nazí le na Da Xrtante.

#### *Da bchalaj Pedro la chila da nazí le na La Chila Chee Salomón*

<sup>11</sup> Benne' zrinnaj na', benne' ba bexaque', quebe bsane' na' Pedro ne Juan, na' xúgute' benne' dxelexebánene', ne xjaque' naga nazí le na La Chila Chee Salomón, naga zaj zra' Pedro ne Juan. <sup>12</sup> Gate ble'e Pedro da nigá, na' guzre' benne' ca':

—Le'e, benne' Israel, ¿bizr chee na' dxebánele le'e? ¿Bizr chee na' dxenná'le netu' caní, ne dxéquele netu' bexuntu' benne' nigá, na' dxexedé' ne chee xel-la' waca cheentu', u ne chee xel-la' benne' xudau' cheentu'? <sup>13</sup> ¡Cabí! Dios chee xra xrtáudxu Abraham, ne Isaac, ne Jacob bca'ana szrene' Zrí'ine', Jesús, Bènnea' bdele le'e lu na' benne' xu'u lawe'. Gate guca lazre' Pilato gusané' Le', le'e quebe guca lázrele. <sup>14</sup> Bzúale chalá'ala Benne' na' naque' lá'azxa ne xrlátaje, na' gunábale la tu benne' wen da zrinnaj. <sup>15</sup> Ca'an guca, bétele le'e Bènnea' dxunne' bènneache xel-la' nabán, san Dios bsebane' Le' ládujla benne' gate, na' netu' dxexeché'entu' chee da nigá. <sup>16</sup> Guca lu La Jesús nigáqueze, u nnadxu guca na lawe' da guxéajle chee La Jesús, chee bezí' le dipa benne' nigá dxelé'ele, ne núnbeale le'. Lawe' da guxéajle'e chee Jesús, ba bexácate'queze' ca dxelé'ele le'e xúgutele.

<sup>17</sup> Le'e, Bi bicha', nezda' gate le'e, ne benne' xíchaje ca' chee bétele Jesús, quebe guque be'ele ca da dxunle. <sup>18</sup> Dios bene' guca caní chee guca li ca da ba gunné' nédxute' gate buluchalaj waláz chee' benne' ca', na' gulenné' dxal-la' si' saca Cristo chee Dios. <sup>19</sup> Chee le na', le xebí'i lázrele, ne le xexaca Dios tuze, chee xusule' dul-la nabágale. Nadxa Xránadxu Dios gunne' le'e lataj xexaca chawe' xichaj lázrdaule. <sup>20</sup> Sel-le' cheele Jesús,



Bénnea' guchebe lazre' sel-le' chee ne dxudaute. <sup>21</sup> Lu zra caní Jesucristo dxal-la' xegá'ane' xabáa cadxa gucá'ana chawe' Dios xúgute da dxaca, ca na' gunné' lu dxu'a benne' ca' buluchálaje' waláz chee' nédxudaute. <sup>22</sup> Ca' naca na, lawe' da gunná Moisés, guzre' xra xrtáudxu ca': "Sel-la Xránadxu Dios chee tu benne' guchálaje' waláz chee'. Gaque' tu benne' ládujla bi bíchele ca', na' sel-le' le' chee ca gusel-le' neda'. Le xen xanne' xúgute da xe'e le'e, <sup>23</sup> lawe' da welebía xi' xúgute benne' quebe xelapa Le' ba lá'ana, na' cuase' benne' ca' ládujla xezre Israel."

<sup>24</sup> Xúgute benne' ca', benne' buluchálaje' waláz chee Dios, guzú lau na gate zua Samuel, ne zeaj na, buluchálaje' chee zra caní. <sup>25</sup> Le'e dxezile ca da gulenná benne' ca' buluchálaje' waláz chee Dios, ne nácale tuze lu xel-la' wezría da ben Dios nen xra xrtáule ca', ca guzre' Abraham: "Lu na' benne' zri'ine zre su' gaca chawe' chee xúgute bènneache zaj zre'e lu xezr la xu." <sup>26</sup> Gate Dios bsebané' Zrí'ine', gusel-le' Le' nedxu laule le'e chee gaca chawe' chee, chee gusanle tu tule le'e da calela da dxunle.

## 4

### *Pedro ne Juan dxelezrine' lau benne' xu'u lawe' ca'*

<sup>1</sup> Pedro ne Juan ne dxuluchálajlene' benne' ca' gate belezrín na' bxruze ca', ne benne' xu'u lu ne'e bi xra'aga chee xudau, ne benne' saduceo ca'. <sup>2</sup> Dxelezre'e lawe' da dxulusede Pedro, ne Juan benne' ca', dxelenné' welexebán benne' gate lawe' da bebán Jesús. <sup>3</sup> Nadxa gulel-le' Pedro ne Juan, na' guleché'e le' lizre xia ca zrindxa zra xula lawe' da ba dxezre' zra na'. <sup>4</sup> Guléajle' benne' zan ládujla benne' ca' belénne' da bchalaj Pedro, na' cáttite benne' ca' dxeléajle'e chee Jesús zaj naque' ca gazxu' cue' chi gaxúa benne' biu.

<sup>5</sup> Zra xula na' benne' xíchaje ca' chee judío ca', ne benne' gula sina ca', ne benne' ca' dxuluxuzájle'e da nadxixruj bea na, belezrague' lu xezre Jerusalén <sup>6</sup> nen Anás, bxruze blau, ne Caifás, ne Juan, ne Alejandro, ne xúgute benne' xrtia bxruze blau ca'. <sup>7</sup> Nadxa gulenná be'e xeajlexrí'e Pedro ne Juan, na' buluzé' le' laduj naga zaj zre'e, na' buluchebe' le':

—¿Bi xel-la' dxenná bea, u nu lu La dxunle da caní?

<sup>8</sup> Nadxa Pedro, zúalequeze Be' Lá'azxa le', guzre' benne' ca':

—Le'e, benne' xíchaje ca' chee bxruze, ne benne' gula sina ca', <sup>9</sup> le'e dxuchébele netu' chee tu da chawe' da guca chee tu benne' we', chee nézele ájala guca bexaca bènnea'. <sup>10</sup> Dxuzentu' xúgutele le'e chee xeleneze xúgute benne' Israel, benne' nigá ze' lau xúgutele le'e, ba bexaque' lu La Jesucristo, Benne' Nazaret, Bénnea' bda'le le'e le'e xaga béguaj, na' Dios bsebané' Le' ládujla benne' gate. <sup>11</sup> Jesús nigá naque' xiaj na', le'e, benne' wen xu'u bzúale chalá'ala, san na'a Léqueze' naque' xiaj blau chee xu'u. <sup>12</sup> Quebe nu chilá' bènneache seque' guselé' dxi'u lawe' da quebe ne gunna Dios xetú La bènneache lu xezr la xu nigá, benne' séquene' guselé' dxi'u.

<sup>13</sup> Gate benne' xu'u lawe' belelé'ene' Pedro ne Juan dxuluchálaje' du lazre', ne dxeleque bé'ene' quebe zaj nazédie' lu na' bxruze ca', san zaj naque' benne' zre'e cá'aze, na' belexebáne benne' xíchaje ca', san guleque bé'ene' zaj naque' benne' guledálene' Jesús. <sup>14</sup> Cá'aqueze bènnea' bexaque' ze' na' nen Pedro ne Juan, na' chee le' na' quebe gulezé'quene' bi xelenné' chee'. <sup>15</sup> Nadxa gulenná be'e belexedxúaj benne' gubáz ca' ládujla le'. Cate' belexegá'ana leze' buluchebe ljwezre', <sup>16</sup> dxelenné':

—¿Ájazra gundxu chee benne' caní? Xúgute benne' zaj zře'e Jerusalén zaj nézene' belune' xel-la' waca zren nigá, na' quebe gaca tábagadxu na. <sup>17</sup> Na'a, chee québedxa zriluj da nigá láwela bèneache, guxrúsadxu benne' caní chee québedxa nu xuluchálajlene' lu La Jesús.

<sup>18</sup> Nadxa gulenná be'e belexezrin Pedro ne Juan, na' gulenná bé'ene' le' québedxa nu xuluchálajlene', ne quebe nu xulusédene' lu La Jesús. <sup>19</sup> Pedro ne Juan belexechebe':

—Le nna' le'e che naca xrlátaje lau Dios guzúazrantu' xrtízrale le'e, quézcala xrtizra' Dios. <sup>20</sup> Netu' quebe gaca gusantu' gucháljantu' ca naca da blé'entu', ne da bémentu'.

<sup>21</sup> Nadxa benne' xu'u lawe' ca' buluxruse' Pedro ne Juan, san bulusane' le'. Quebe belezrelne' ájala xelune' xuluzaca zi'e le' lawe' da dxelúe lá'ana xúgute bèneache Dios ca naca da ba guca. <sup>22</sup> Bénnea' bexaque' ne chee xel-la' waca zren nigá ba gudée' chua iza.

*Benne' ca' dxeléajle'e chee Jesús dxelenabe' lau Dios gunézruje' le' xel-la' dxuluxrén lazre'*

<sup>23</sup> Gate bulusane' Pedro ne Juan, benne' caní xjaque' naga zaj zra' benne' ljwezre', na' buluzenne' le' ca naca xúgute da gulenná benne' xíchaje ca' chee bxruze ca', ne benne' gula sina ca'. <sup>24</sup> Gate belenne' da caní, xúgute' buluchálajlene' Dios, gulenné':

—Xránantu', Lue' nacu' Dios. Benu' xabáa, ne xezr la xu, ne nísadau', ne xúgute da zaj nnita lataj ca'. <sup>25</sup> Lue', lu na' Be' Lá'azxa, ne lu dxu'a David, benne' wen zrin chiu', gunnáu':

¿Bizr chee na' dxelasa bèneache xezr la xu ca', na' bèneache dxelegú'u lazre' da quebe bi zaj zaca?

<sup>26</sup> Benne' wenná bea ca' chee xezr la xu gulune' tuz, na' benne' blau ca' chee xezr ca' belezrague' chee xeledábage'e Xránadxu Dios, ne Cristo chee'.

<sup>27</sup> Da li, Herodes. ne Poncio Pilato belezrague' lu xezre nigá nen benne' zitu' ca', ne nen benne' Israel ca', na' guledábage' Zri'inu' Lá'azxa, Jesús, Bénnea' bzúaquezu' Lue'. <sup>28</sup> Ca'an guca, benne' ca' belune' xúgute ca da ba núnquezu' Lue' dxal-la' gaca na. <sup>29</sup> Na'a, Xran, gunná' ca dxuluxruse' netu', ne benna netu', wen zrin chiu' ca', xel-la' dxuxrén lazre' chee guchálajntu' xrtizru', ne quebe zrébentu', <sup>30</sup> ne benna netu' xel-la' waca chiu' chee gaca xexuntu' benne' we' ca', ne chee guntu' xel-la' waca chee xabáa lu La Zri'inu' Lá'azxa Jesús. ¡Ca'an gaca!

<sup>31</sup> Gate bexuzre buluchálajlene' Dios, lu lataj naga zaj nazrague' guzrú', na' xúgute' guzúale Be' Lá'azxa le', na' buluchálaje' xrtizra' Dios duté xel-la' dxuluxrén lazre' chee'.

*Xúgute' dxelune' tuze ca naca da zaj nape'*

<sup>32</sup> Benne' zan ca', benne' dxeléajle'e chee Jesús gulaque' tuze lu xichaj lázrdawe'. Netúe' quebe gunné' cheeze' naca da nape'. Xúgute da zaj nape' zaj nune' tuze. <sup>33</sup> Benne' gubáz ca' chee Jesús, nen duté xel-la' dxelenná bea buluchálajqueze' ca guca gate bebán Xránadxu Jesús, na' Dios bene' guca chawe' chee xúgute benne' ca'. <sup>34</sup> Quebe nu guzúa ládujla benne' ca' bi bxáizrjene' lawe' da caní belún xúgute benne' zaj nape' xezr la xu ca' u xu'u ca'. Belutié' na, na' belú'e dumí na', <sup>35</sup> ne xeajlenézruje' na lu na' benne' gubáz ca', chee xelexele'e na tu tu benne' ca' ca da dxelechínene'. <sup>36</sup> Zua ládujla benne' ca' tu benne' xrtia Leví le' José, benne' gúlaje' Chipre

da naca tu xęzr la xudau' naxechaj nısadau' lę na. Benne' nigá, buluzúa gubáz ca' lę' Bernabé, da zéaje na benne' dxexúe zrene'. <sup>37</sup> Benne' nigá betię' tu xęzr la xu da nape', na' bi'ę dumí na', ne bnézruje' na lu na' benne' gubáz ca'.

## 5

### *Dul-la da belún Ananías ne Safira*

<sup>1</sup> Xetú benne' lę' Ananías nen zru'ule' Safira, betię' tu xęzr la xu cheę'. <sup>2</sup> Benne' nigá bequę'ę late' dumí na', na' da begá'anaze bi'ę lau benne' gubáz ca', ne gunnę' ca naca na'. Zru'ule' ca naca na nézene'. <sup>3</sup> Nadxa guzre Pedro lę':

—Ananías, ¿bizr cheę na' be'u lataj Satanás guxú'u na lu xichaj lázrda'u cheę si xę'u Be' Lá'azxa, na' beca'u late' chiu' ca naca da guzi'u cheę xęzr la xu na'? <sup>4</sup> ¿Quebe guca xęzr la xu na' chiu'? Na' gate betiu' na, ¿quebe guca dumí na' chiu'? ¿Ájazra guca benu' da nigá? Dios guzi xę'u, quegá bęnneache.

<sup>5</sup> Ca ben Ananías da nigá, na' guzré'ę gútete'. Xúgute benne' belén da nigá belezrébe'ę. <sup>6</sup> Nadxa gulebiga bal-la bi cuide' ca', ne buluchélabę' lę' tu ladxe', na' belúabe' lę' cheajlecáchebe' lę' lu ba.

<sup>7</sup> Ca guca chunna hora gudé na', guxú'u zru'ula Ananías na', ne quebe nézene' bi ba guca. <sup>8</sup> Pedro bchębe' lę':

—Gunná, ¿bętele le'e xęzr la xu na' ca dxennale guzile na?

Gunná Safira na':

—Awe', ca naca na'.

<sup>9</sup> Nadxa Pedro guzre lę':

—¿Bizr cheę na' benle le'e tuze dizra' gúquele si xe'le Be' Lá'azxa? Chale'aj na' ba zesi'aca bi ca' xęajlecáchebe' benne' chiu', na' na'a xelúatequezebe' lue'.

<sup>10</sup> La' ná'queze nu'ula na' guzré'ę gútete' zran ni'a Pedro. Gate belú'u benne' cuide' ca', na' belelé'ebe' lę' ba gutię', na' belexebéajbe' lę' xęajlecáchebe' lę' cuita ba cheę benne' cheę'. <sup>11</sup> Xúgute benne' ca' zaj nazraguę' na', ne xúgute bęnneache, benne' belén da caní belezrébe'ę.

### *Benne' gubáz ca' dxelúnle'ę xel-la' waca cheę xabáa*

<sup>12</sup> Benne' gubáz ca' belúnle'ę xel-la' waca cheę xabáa, ne da dxelunna bea na lau benne' ca', na' xúgute' belezraguę' La Chila Cheę Salomón, da naca na cheę xudau'. <sup>13</sup> Netú benne' ca', benne' quebe dxeléajle'ę cheę Jesús, quebe belexázrene' gunę' benne' ca' tuze, san xúgute bęnneache belape' benne' caní ba lánana. <sup>14</sup> Benne' zandxa gulezú lawę' dxeléajle'ę cheę Xránadxu, benne' biu ne nu'ula ca'. <sup>15</sup> Ca' guca na, belebéaję' benne' wę' ca', zaj de' lu da dxeláta'ne', ne da'a cheę', na' gulíxrue' lę' la neza ca' cheę gate te Pedro na', na' te zru'ula cheę' lawe' benne' ca'. <sup>16</sup> Cá'anqueze benne' xęzre walizre ca' belelé'ę lu xęzre Jerusalén, zaj nu'ę benne' wę' cheę' ca', ne benne' ca' zaj xu'ę be' xriwę' ca', na' xúgute' belexexaęe'.

### *Benne' gubáz ca' dxelu'ę lizre xia*

<sup>17</sup> Nadxa bxruze blau, ne benne' saduceo ca' zaj zúalęne' lę', gulaque' xa lazre', <sup>18</sup> na' gulel-le' benne' gubáz ca', ne buluzré'ę lę' lizre xia. <sup>19</sup> Na' tu gubáz cheę xabáa cheę Xránadxu gusalaje' dxa xu'u cheę lizre xia na' chizrela, na' bebéaję' benne' ca', ne dxę'e lę':

20 —Le chjaca, ne le cheajsé lu xudau', ne le guzén benne' ca' ca naca chee xel-la' nabán cube nigá.

21 Ca belenne' da nigá, zra xula belú'ē chila xudau' che zílala, na' gulezú lawe' dxulusédene' benne' zaj zre'ē na'.

Dxácatē na', bxruze blau na', ne benne' zrálēnē' lē', buluchagūē' benne' ca' chee xu'u lawe' blau, ne benne' gula sina ca' chee xezre Israel, na' gulenná be'ē xelexebáje' gubáz ca' zaj xu'ē lizre xia. 22 Gate belezrín bi xra'aga chee xudau' na', quebe nu belelé'ēne' lu xu'u lizre xia, na' belexezrine', ne buluzenne' benne' ca', 23 dxelenné':

—Gate bzrintu' lizre xia na', naxezxuj tipa na, na' benne' dxjaque' wedil-la zaj zre'ē dxu'a dxa xu'u na', ne dxuluxúē' na, san gate gusalajntu' na, quebe nu bezrélentu' lu xu'u na'.

24 Gate bxruze blau, ne benne' xíchaje ca' chee bxruze ca', ne xíchaje chee bi xra'aga ca', belenne' da nigá, na' buluchebe ljwezre' ga cheajsé da nigá. 25 La' ná'queze bzrin tu benne' guzre' lē':

—Benne' ca' bzra'le le'e lizre xia zaj zre'ē lu chila xudau', dxulusédene' bēneache.

26 Nadxa benne' xíchaje chee bi xra'aga chee xudau' guxíajlēnē' bi xra'aga ca', na' xeajlexrí'ē gubáz ca'. Quebe bi belúnene' lē' lawe' da belezrebe' bi xelún benne' ca' dxelenne' chee gubáz ca', lawe' da dx-eléquene' xelu'ē lē' xiaj. 27 Gate xeajlexrí'ē gubáz ca', na' buluzré'ē lē' lau benne' xu'u lawe' blau, na' gunná bxruze blau na', dxē'ē benne' gubáz ca':

28 —Netu' bzrúnantu' le'e quebe guchálajlēdxale bēneache lu la bēneea'. ¿Bizra na' bēnle? Ba bzenle ca naca benne' zaj zre'ē xezre Jerusalén ca naca da dxusédele, ne dxaca lázrele gusebágale netu' xel-la' gute chee benne' na'.

29 Nadxa belexechebe Pedro, ne xezícadxa benne' gubáz ca':

—Dxala' guzántu' xrtizra' Dios, quegá xrtizra' bēneache. 30 Dios chee xra xrtáudxu ca' bsebanē' Jesús, Bēneea' bētele le'e bda'ale Lē' xaga béguaaj. 31 Dios bca'ana szrenē' Lē' chalá'a xabēla chee', ne bene' Lē' Benne' Blau, ne Weselá, chee gata' lataj chee benne' Israel xelexebí'i lázre' chee gunitē lau Dios dul-la chee'. 32 Chee lē' na' netu' dxexechébentu', ne cá'anqueze dxun Be' Lá'azxa. Dios dxunézruje' Be' Lá'azxa benne' dxuluzúē' dizra' chee'.

33 Gate belenne' da nigá, na' belezré'ē, ne gulaca lazre' xelútie' gubáz ca'. 34 Ládujla benne' xu'u lawe' ca' zua tu benne' fariseo lē' Gamaliel. Naque' benne' dxuxuzájle'ē da nadxixruj bea na, na' dx-elápale'ē bēneache lē' ba lá'ana. Benne' nigá guzé', na' gunná bé'ēne' xelexebáje' gubáz ca' chalé'ajla tu chí'idau'. 35 Nadxa guzre' benne' xu'u lawe' ca':

—Le'e, benne' Israel, le guxúe xanne' ca gunle chee benne' caní. 36 Le gusá lazre', bache guca zane' iza, gudábaga Teudas xu'u lawe', gunné' naque' tu benne' blau, na' xjácale ca tapa gaxúa benne' biu lē'. Na' belutie' lē', na' xúgute benne' ca' gulaca lē' tuze belexase dinnaje' ca', na' gudé chee da na'. 37 Gudé na', lu zra gate belú'u bēneache xiche, na' bla' Judas, benne' Galilea, na' benne' zan xjácále'ē lē'. Cá'anqueze belutie' bēneea', na' xúgute benne' gulede'ē lē' belexase dinnaje'. 38 Chee lē' na', le gusán benne' caní, ne quebe guchixire chee le nen benne' ca'. Che da nigá naca na da dxun beneácheze, wadé chee na. 39 Che naca na da dxun Dios,

quebe séquele le'e guzría xile na. Le guxúe xanne' chee quebe tíl-laléle Dios.

<sup>40</sup> Xúgute' belexaque' tuze. Nadxa gulenná be'e belú'u gubáz ca' da xula, na' ca belú'u benne' ca', na' buluzruné' le' québedxa nu xuluchálajle benne' ca' lu La Jesús. Gudé na' bulusané' le'. <sup>41</sup> Na' benne' gubáz ca' belexedxúaje' naga zaj zra' benne' xu'u lawe' ca', dxelebéle'ene' lawe' da be' Dios lataj guledé' xel-la' zi' lawe' da zaj naque' Jesús tuze. <sup>42</sup> Quebe bulusané' dxuluchálajle', ne dxulusédené' bènneache ca naca chee Jesu-cristo xúgute' zra, lu chila xudau', ne lu xu'u ca'.

## 6

### *Dxuluzúe' gazre benne' xeluné' zrin chee benne' zaj de'e Cristo*

<sup>1</sup> Lu zra ca', gate zaj dxan benne' ca' zaj de'e Jesús, na' benne' ca' dxelenné' dizra' griego gulawé' zria benne' ca' dxelenné' dizra' hebreo. Dxelenné' quebe nu dxunezruj xanne' da xeláw nu'ula ba gulate benne' chee' zaj zre'e ládujla le' gate dxelísie' xel-la' wagu tu zra tu zra. <sup>2</sup> Nadxa benne' gubáz ca' buluchague' ca naca benne' ca' dxeléajle'e chee Jesús, na' gulé'e le':

—Quebe naca xrlátaje gusantu' guchálajntu' xrtizra' Dios chee gudentu' xel-la' wagu. <sup>3</sup> Chee le' na', biche ljwézrentu', le quilaj gazre benne' lálwela le'e, benne' zaj naque' du lazre', ne dxeléajni'ine', ne zúale Be' Lá'azxa le', na' le gusebague' zrin nigá. <sup>4</sup> Netu' tu guchálajlezquezentu' Dios, ne gusédentu' bènneache xrtizra' Dios.

<sup>5</sup> Xúgute' gulaza lazre', na' gulequé'e Esteban, tu benne' dxéajle'e dute lázrdawé' chee Jesús, ne zúale Be' Lá'azxa le'. Cá'anqueze gulequé'e Felipe, ne Prócoro, ne Nicanor, ne Timón, ne Parmenas, ne Nicolás, tu benne' xezre Antioquía, benne' nédxute' bexaque' tuze benne' judío ca'. <sup>6</sup> Na' guleché'e benne' caní lau benne' gubáz ca', na' le' bululáwizre' Dios, ne buluzé ne'e lawe' benne' gazre caní.

<sup>7</sup> Xrtizra' Dios zeaj dxezriluj na, na' benne' ca' dxeléajle chee Jesús guxánle'e lu xezre Jerusalén, na' bxruze zan chee judío ca' guléajle'e chee'.

### *Dxelel-le' Esteban*

<sup>8</sup> Esteban, tu benne' nápale'e xel-la' waca, ne naque' chawe' lau Dios, bene' xel-la' waca ca' chee xabáa, ne da dxelunna bea na chee da ca' lau bènneache ca'. <sup>9</sup> Nadxa bal-la benne' chee xu'u naga dxelezraga bènneache ca', nazí le na Xu'u Chee Benne' Québedxa Zaj Nada'u, benne' xezre Cirene ca', ne benne' xezre Alejandría ca', ne benne' chee ga nababa Cilicia, ne Asia, gulezú lawe' dxulutíl-laléne' Esteban dizra'. <sup>10</sup> Quebe gulezéquene' bi xelenné' chee xrtizra' Esteban lawe' da bchálaje' nen dute xel-la' sina chee Be' Lá'azxa. <sup>11</sup> Nadxa gulízruje' bal-la benne' ca' chee xelenné' belenne' gunné Esteban dizra' schanni' chee Moisés, ne chee Dios. <sup>12</sup> Caní beluné', ne gulu'e xel-le' bènneache ca', ne benne' gula sina ca', ne benne' dxuluxúzajle'e da nadxixruj bea na, na' gulebía di'e Esteban. Gulel-le' le', ne guleché'e le' lau benne' xu'u lawe' blau. <sup>13</sup> Cá'anqueze gulílajle' benne' wen lazre' xelenné' chee Esteban, na' gulenné':

—Benne' nigá quebe dxusané' dxenné' schanni' chee xudau' lá'azxa nigá, ne chee da bdxixruj bea Dios. <sup>14</sup> Ba bentu' gunné' ca gun Jesús, benne' Nazaret, dxenné' guzría xi'e xudau' nigá, ne guché'e ca naca da zéajledxu da bca'ana Moisés.

15 Nadxa benne' xu'u lawe' ca', ne xúgute benne' zaj zre'e na', gate gulenné'e Esteban, belelé'ene' lawe', naca na ca lau tu gubáz chee xabáa.

## 7

*Dxexechebe Esteban lau benne' xu'u lawe' ca'*

<sup>1</sup> Nadxa bxruze blau bchebe' Esteban:

—¿Zaj naca da li da caní?

<sup>2</sup> Na' Esteban bechebe':

—Le'e, benne' gula, ne le'e biche ljwezra', le xene. Xradxu zue' xabáa ble'e lawe' lau xra xrtáudxu Abraham gate ne zue' lu xezr la xu Mesopotamia, nédxudxa gate quebe ne xezé'e cheaxzezúe xezre Harán. <sup>3</sup> Dios guzre' le': "Bsan lázriu' ne xúgute xrtia ljwezru', na' guxíaj lu xezr la xu da gulé'eda' lue'." <sup>4</sup> Nadxa Abraham guzé'e lu xezr la xu Caldea, xeajsúe' xezre Harán. Ca gudé gute xra Abraham, Dios guché'e Abraham lu xezr la xu nigá, naga zrale le'e na'a. <sup>5</sup> Dios quebe bi bnézruje' chee Abraham naga sue' lu xezr la xu nigá, ne naga guné' lizre', san guchebe lazre' gunézruje' le' xezr la xu nigá, na' gate te gate le', na' gaca na chee zrí'ine', lácala lu zra na' quebe ne galaj nu zrí'ine Abraham. <sup>6</sup> Cá'anqueze Dios guzre' le' xelezúa zrí'ine zre sue' ca benne' zitu' tu lu xezr la xu chee benne' xula, ne xelaque' benne' zaj nada'u, na' xuluzálaje' le' tapa gaxúa iza. <sup>7</sup> Cá'anqueze guzre Dios le': "Neda' chuga' ca gaca chee xezr la xu na' guchine na zrí'ine zre su', na' te na' xelixedxúaje' ga na', ne xelúe lá'ane' neda' lu xezr la xu nigá." <sup>8</sup> Dios bene' tu xel-la' wezria nen Abraham, na' gunná bé'ene' le' chugu látedu weaj belá' chee benne' biu ca' lu bel-la' dxen chee, tu da guzúa chuchu na xel-la' wezria na'. Chee le' na' gate gulaj Isaac, zrí'ine Abraham, guchugue' látedau' belá' chee bel-la' dxen chee Isaac gate gúquebe' xrunu' zra, na' cá'anqueze ben Isaac chee zrí'ine', Jacob, ne cá'anqueze ben Jacob chee zrí'ine' ca', benne' ca' gulaque' xra chazrinnu cue' benne' Israel.

<sup>9</sup> Zrí'ine Jacob na', benne' ca' zaj naque' xra xrtáudxu, gulaque' xa lazre' chee bi biche' José, na' belutie-be' chee chu'ube' lu na' benne' guchíne'be' lu xezr la xu Egipto. Dios guzúalene' José, <sup>10</sup> na' bselé'-be' lu xúgute da zi' da xa'. Bnézruje'-be' xel-la' dxéajni'i, na' ben Dios bezaca ba lázrele Faraón José na'. Faraón nigá guque' wenná bea lu xezr la xu Egipto, na' bzue' José gácabe' benne' xu'u lu ne'e xezr la xu Egipto na', ne benne' walizre Faraón na'.

<sup>11</sup> Nadxa guca gubina' du ca naca xezr la xu Egipto, ne ca naca xezr la xu Canaán, na' xra xrtáudxu ca' quebe bi belezréne' da xelawe'. <sup>12</sup> Gate ben Jacob de' zrua' xtila lu xezr la xu Egipto, na' gusel-le' na' zrí'ine' ca', benne' ca' zaj naque' xra xrtáudxu. Da nigá guca na da nedxu lasa xjaque' Egipto. <sup>13</sup> Da gudxupe' lasa xjaque' na', José ble'e lawe' benne' biche' ca', na' ca'an guca gunenze wenná bea chee Egipto ga benne' José na'. <sup>14</sup> Nadxa José gunná bé'ene' xeajlexrí'e xre', ne ca naca xrtia ljwezre', zaj naque' ga xun chíne'. <sup>15</sup> Ca'an guca, Jacob xeajsúe' Egipto naga gutie', ne naga gulátequeze xra xrtáudxu ca'. <sup>16</sup> Ca gudé na' belú'e bel-la' dxen gate chee benne' ca' lu xezre Siquem, naga bulucache' le' lu ba da zua na lu xezr la xu na' da guzú' Abraham nen dumí da gudízruje' bi ca' zrí'ine Hamor lu xezre Siquem na'.

<sup>17</sup> Gate ba zua gagu zra gaca li da guchebe lazre' Dios da na' ben chúchue' lau Abraham, na' benne' Israel zaj zre'e xezr la xu Egipto

gulánlë'e. <sup>18</sup> Nadxa guzú lau dxenná bea tu wenná bea lu xęzr la xu Egipto, benne' quebe núnbe'e José. <sup>19</sup> Wenná bea nigá guzú xę'e benne' ljwézredxu, ne bzálaje' xra xrtáudxu ca', na' gunná bé'ene' le' cheajlecá'ane'-be' bidu dxe'ene chee' ca' chee xelátebe'. <sup>20</sup> Lu zra ca' gulaj Moisés, ne gúcabe' tu bidau' bezaca ba lazre' Dios chee'be', na' xra xrnabe' bu-lusegule'-be' lizre' chunna beu'. <sup>21</sup> Gate bzrin zra zxal-la' cheajlega'ane'-be', na' bi nu'ula chee wenná bea na' bequé'e-be', ne bsegule'-be' ca zrí'inequeze'. <sup>22</sup> Chee le' na', Moisés guzédebe' ca naca xel-la' sina chee Egipto, na' gúcabe' tu benne' nape' xel-la' dxenná bea ca naca da gunné', ne da bene'.

<sup>23</sup> 'Gate bzrie' chua iza, Moisés guca lazre' cheajnné'e benne' ljwezre', benne' Israel ca'. <sup>24</sup> Blé'ene' tu benne' Egipto dxu'e tu benne' Israel. Chee gúcalene' benne' na', ne chee bebéaj lazre' bënnea', be'ie' benne' Egipto na'. <sup>25</sup> Moisés gúquene' benne' lazrie', benne' Israel ca', xeleque bé'ene' Dios guselé' benne' ca' ne chee le'. Benne' ca' quebe guleque bé'ene' na'. <sup>26</sup> Zra xula Moisés blé'ene' chupa benne' Israel dxeledil-le', na' lawe' da guca lazre' xelezrá zrie' benne' ca', na' guzre' le': "Le'e nácale biche ljwézrele. ¿Bizr chee na' dxue ljwézrele?" <sup>27</sup> Nadxa benne' na' dxu'e benne' ljwezre' bzrigue' Moisés, na' guzre' le': "¿Nu bzua lue' ca benne' xíchaje cheentu' chee guchi'u ca da dxuntu?" <sup>28</sup> ¿Dxaca lazru' gutiu' neda' ca benu' neaje, be'iu' benne' Egipto na'?" <sup>29</sup> Ca ben Moisés da nigá, na' bzrúnnaje' zexíaje' lu xęzr la xu chee benne' Madián ca'. Na' guzúe' ca tu benne' zitu', na' bchaga ná'lene' nu'ula, na' gulaj chupa zrí'ine'.

<sup>30</sup> 'Ca gudé chua iza, gate zu'e le'e xixre' lawe' lataj da zua na gagu lu xi'a Sinaí, na' ble'e lau tu gubáz chee xabáa le' tu lu xi' da dxe' lu xeche' bisigá. <sup>31</sup> Moisés bzrebe' ca naca da blé'ene', san gate gubigue' chee le'e xánnene', benne' chi'i Xránadxu, dxenné': <sup>32</sup> "Neda' naca' Dios chee xra xrt'a' ca', Dios chee Abraham, ne Dios chee Isaac, ne Dios chee Jacob." Nadxa Moisés guzú lau dxezrízie' lu xel-la' dxezrebe, na' quebe bexázrjene' nne'e. <sup>33</sup> Xránadxu guzre' le': "Guleaj zrelu' xu'u ni'u lawe' da naca lá'azxa lataj naga dxeléaju'. <sup>34</sup> Neda' ba ble'eda' ca naca da dxelezaca zi' bënneache chia' zaj zre'e lu xęzr la xu Egipto. Dxenda' ca dxelebezre xache', ne ba bla'a chee guselá' benne' ca'. Gudá lue', sel-la' lue' lu xęzr la xu Egipto."

<sup>35</sup> 'Lácala benne' ca' buluzúe' Moisés chalá'ala, gulé'e le': "¿Nu bzua lue' ca benne' xíchaje cheentu' chee guchi'u ca da dxuntu?" Dios gusel-le' le' ca benne' xíchaje, ne benne' guselá le', ne chee gubáz chee xabáa na' ble'e lawe' le' lu xeche' bisigá. <sup>36</sup> Moisés na' bebéaje' xra xrtáudxu ca' lu xęzr la xu Egipto, ne bene' xel-la' waca ca', ne da gulunna bea na da bene' lu xęzr la xu na', ne lu nísadau' Xrna, ne le'e xixre' lawe' lataj da chua iza na'. <sup>37</sup> Moisés nigáqueze guzre' benne' Israel ca': "Dios sel-le' tu benne' guchálaje' waláz chee', benne' gálaje' ládujla xrtia ljwézrele le'e, ca gusel-le' neda'. Chee Le' le xen." <sup>38</sup> Cá'anqueze Moisés nigá, bënnea' guzúale' benne' ca' le'e xixre' lawe' lataj, tu zren nen gubáz chee xabáa na' bchálajle' le' lu xi'a Sinaí, guzúalene' xra xrtáudxu ca', ne guzi'e dizra' chee xel-la' nabán chee bdee' na cheentu'.

<sup>39</sup> 'Xra xrtáudxu ca' quebe gulaca lazre' xuluzúa dizra' chee Moisés, san buluzúe' le' chalá'ala, ne gulaca lazre' xelexezrine' Egipto. <sup>40</sup> Gate cabí zue' Moisés ga na' gulé'e Aarón: "Dxaca lázrentu' gunu' dios ca' chee xelebía lawe' launtu', lawe' da quebe nézentu' bi guca chee Moisés, bënnea' bebéaje' netu' lu xęzr la xu Egipto." <sup>41</sup> Nadxa belune' tu bedáu'

guca na ca tu bézredau', ne belutię' bę xíxre'du ca' lau bedáu' na', ne gulebene' cheę da zaj nunge'. <sup>42</sup> Nadxa Dios becuase' nen benne' ca', na' bę'e le' lataj belúe lá'ane' belaj zaj zria zran xabáa. Ca'an naxúaj na lu xiche cheę benne' ca' buluchálaje' waláz cheę Dios. Dxeleńne':

Le'e, benne' Israel ca', ¿guzríale-ba' chia' neda' bę xíxre'du ca' bętele dute' chua iza gate na' guzúale le'e xixre' lawe' lataj?

<sup>43</sup> ¡Cabí! Bíale xudau' xide zra bę xixre' cheę dios cheęle, Moloc, ne xudau' cheę belaj nazí le na Renfán, dios cheęle, bedáu' ca' bęnquezle le'e cheę bę lá'anale na. Cheę le' na' cuéaja' le'e lu xęzr la xu cheęle, ne sel-la' le'e dédedxa ca naga dxe' Babilonia.

<sup>44</sup> Le'e xixre' lawe' lataj na' xra xrtáudxu ca' belune' tu xudau' xide naga buluzrá chawe' blaga' xiaj naga naxúaj da nadxixruj bea na. Belune' na ca naca da ble'e Dios Moisés, gate guzre' le' gunę' na ca naca da na' ba blé'ene'. <sup>45</sup> Zri'ine xra xrtáudxu ca' belexaca lu ne'e xudau' xide na', na' belú'e na gate belezrine' lu xęzr la xu nigá nen Josué, cheę belequę'e xęzr la xu nigá lu na' benne' xęzr la xu ca' zaj zre'e nigá, benne' ca' Dios bebéaje' le' cheę bnézruje' xęzr la xu nigá cheę xra xrtáudxu ca'. Ca'an guca ca bzrintę' zra ca' zua David. <sup>46</sup> Wenná bea David na', Dios bezaca ba lazre' cheę, na' guca lazre' David gunę' tu xudau' naga sua Dios cheę Jacob. <sup>47</sup> Salomón, zri'ine David, bęne' lizre Dios na'. <sup>48</sup> Dios szrentę' quebe zue' lu xudau' ca' da zaj nun bęnneache. Caní gunná tu benne' bchálaje' waláz cheę Dios, gunné':

<sup>49</sup> Xabáa naca lataj naga dxe'a, na' xęzr la xu naca na naga nuléaj ni'a.

¿Ájazra naca xu'u gunle le'e chia'? dxenná Xránadxu.

¿Ájazra naca lataj naga dxal-la' xezí' lazra'?

<sup>50</sup> ¿Quegá neda' bęnqueza' da ca'?

<sup>51</sup> Nadxa gunná Esteban:

—Le'e nácaquezle lázxdau zide', ne zria nágale, ne lázrdaule ca zaj naca cheę benne' quebe zaj núnbe'e Dios, quebe dxezile xrtizre'. Dxedábagaquezle Be' Lá'azxa. Nácale ca gulaca xra xrtáule ca'. <sup>52</sup> Xra xrtáule ca' buluzría xi'e xúgute' benne' ca' buluchálaje' waláz cheę Dios. Belutię' benne' ca' buluchálaje' nédxudautę ca dxal-la' gaca cheę benne' xrlátaje nigá, na' gate blę'e, lé'equezle bdele Le' lu na' benne' ca' guledábague' Le', ne bętele Le'. <sup>53</sup> Le'e guzile da nadxixruj bea na da bęnna gubáz cheę xabáa dxi'u, san quebe dxuzúale dizra' cheę na.

### *Dxelutię' Esteban*

<sup>54</sup> Gate belén benne' ca' da caní, na' gulagu lazxe' lu xel-la' dxelezá'a Esteban. <sup>55</sup> Nadxa Esteban, zúale Be' Lá'azxa le', gunné'e xabáa, ne blé'ene' xel-la' szren cheę Dios, na' Jesús ze' chalá'a xabęla cheę Dios. <sup>56</sup> Nadxa gunné':

—Le nna'xque, dxelé'eda' naxalaj xabáa, na' Benne' Gulje' Bęnneache ze' chalá'a xabęla cheę Dios.

<sup>57</sup> Benne' ca' bulusęxuje' nague', na' gulebezre xe'e, ne xeajlechía che'e Esteban na'. <sup>58</sup> Na' belebéaje' le' lu xęzre na', naga belú'e le' xiaj. Na' benne' ca' gulennę' cheę Esteban bulucá'ane' zra lanę' lu na' tu benne' cuide' le' Saulo. <sup>59</sup> Dxácatę dxuluzríe' le' xiaj, Esteban na' bláwizre' Dios, gunné':



—Xrana' Jesús, bezí' lu na'u be' nácaqueza'.

<sup>60</sup> Gudé na' bzu zribe', na' gunné' zizraj:

—Xran, quebe gusebagu' benne' caní dul-la nigá.

Ca bexuzre gunné' ca', na' gutiē'.

## 8

*Saulo dxenáu zi' xuzre' benne' ca' dxeléajle'ē chee Jesús*

<sup>1</sup> Saulo guque' tuze nen benne' ca' belutie' Esteban.

Lu zra ná'queze gulezú lawe' dxelau zi' xuzre' benne' ca' dxeléajle'ē chee Jesús, benne' ca' zaj zre'ē xezre Jerusalén. Xúgute' belexase dinnaje' ca naca xezre ca' zaj nababa Judea, ne xezre ca' zaj nababa Samaria. Benne' gubáz ca' belexegá'ang' xezre Jerusalén na'. <sup>2</sup> Bal-la benne' ca' zaj naque' chee Dios bulucachē' Esteban na', ne gulebézrele'ē chee'. <sup>3</sup> Dxácatē na' Saulo dxenáu zi' xuzre' benne' ca' dxeléajle'ē chee Jesús, na' guxú'ē tu tu xu'u chee cheajxrube xue' benne' ca', ne cheajlu'ē le' lizre xia.

*Dxuluchálaje' dizra' chawe' chee Jesús naga nababa Samaria*

<sup>4</sup> Benne' ca' chee Cristo, benne' buluzrúnnuje' Jerusalén, buluchálaje' dizra' chawe' chee Jesús gáteteze na' zjaque'. <sup>5</sup> Felipe, tuē' benne' ca', guxíaje' tu xezre naga nababa Samaria, na' guzú lawe' dxuchálajlene' benne' ca' ca naca chee Cristo. <sup>6</sup> Benne' ca' zaj nazrague' belén xánnene' ca da dxuchalaj Felipe, ne belelé'equezne' ca naca xel-la' waca ca' da dxunē'. <sup>7</sup> Benne' zan, benne' zaj xu'ē be' xriwe' belexexaque', na' be' xriwe' ca' belexedxúaj na lu xichaj lázrdau benne' ca', dxelebezre xa'a na, na' benne' zan benne' zaj zua zri ni'a ne'ē, ne benne' zrinnaj ca' belexexaque'. <sup>8</sup> Ca'an guca, gulebéle'ē xúgute' benne' ca' lu xezre na'.

<sup>9</sup> Zua na' tu benne' le' Simón, nédxute' guque' benne' wazrá', ne guzú xe'ē benne' Samaria ca', dxenné' naque' tu benne' szren. <sup>10</sup> Xúgute' belén xánnene' chee', benne' cazraze ca', ne benne' blau ca', gulenné':

—Benne' nigá nape' xel-la' szren chee Dios.

<sup>11</sup> Gulape' le' ba lá'ana lawe' da lu xel-la' wazrá' chee' na' guzú xe'ē benne' ca' zane' iza. <sup>12</sup> Gate guléajle'ē chee dizra' chawe' da dxuchalaj Felipe ca dxenná bea Dios, ne ca naca chee La Jesucristo, xúgute', benne' biu, ne nu'ula ca', beledxúe' nisa. <sup>13</sup> Cá'anqueze Simón na' guxéajle'ē chee Jesús, ne gudxúe' nisa, na' guzú lawe' zéajlene' Felipe, na' dxexebánene' ca naca xel-la' waca da za xabáa da dxun Felipe.

<sup>14</sup> Gate benne' gubáz ca' chee Jesús, benne' zaj zre'ē Jerusalén, belenne' gulezú' lu na' benne' Samaria ca' xrtizra' Dios, na' gulesel-le' Pedro ne Juan na'. <sup>15</sup> Gate belezrine' na', na' belenabe' law Dios chee benne' Samaria ca' dxeléajle'ē chee Jesús chee xezezi'ē Be' Lá'azxa. <sup>16</sup> Quebe ne xida Be' Lá'azxa súalene' netú benne' ca'. Tuze beledxúaze' nisa lu La Xránadxu Jesús. <sup>17</sup> Nadxa Pedro ne Juan buluzé ne'ē lawe' benne' ca', na' gulezú'ē Be' Lá'azxa.

<sup>18</sup> Gate ble'e Simón bla' Be' Lá'azxa gate gubáz ca' buluzé ne'ē benne' ca', na' guca lazre' gunézruje' gubáz ca' dumí, <sup>19</sup> gunné':

—Le gunna neda' xel-la' waca nigá chee gate guzéa' na'a lawe' núteteze benne', na' si'ē Be' Lá'azxa.

<sup>20</sup> Nadxa guzre Pedro le':

—Wabía xi' dumí chiu' na' nen lue' lawe' da dxéquenu' wazéquenu' ga'u nen dumí ca da dxúnnaze Dios. <sup>21</sup> Quebe naca chiu', ne quebe napu' lataj

lu da nigá lawe' da quebe naca xrlátaje xichaj lárda'u lau Dios. <sup>22</sup> Bsan ca naca da calela chiú' nigá, ne guta' xue Dios chee gunite lawe' chiú' ca da gúquenu' lu xichaj lárda'u. <sup>23</sup> Dxeque be'eda' nazrate xichaj lárda'u da calela, na' da calela na' nuchéaj na lue'.

<sup>24</sup> Na' bechebe Simón:

—Le gata' xue Xránadxu chia' neda', chee quebe gaca chia' ca da gunnú'.

<sup>25</sup> Ca gudé belexechebe' chee Jesús, ne buluchálaje' dizra' chee Dios, na' benne' gubáz ca' buluzenne' bènneache dizra' chawe' chee Jesús lu xézredu ca' zaj nababa Samaria, na' ca gudé na' belexezrine' Jerusalén.

*Felipe dxuchálajene' tu benne' chee xezr la xu Etiopía*

<sup>26</sup> Gudé na' guzre tu gubáz chee xabáa chee Xránadxu Felipe:

—Guxasa, guxíaj chalá'a naga dxedé gubizra beu' zaga ca', naga zrua neza chee Jerusalén da zeaj xezre Gaza, da dxedé na le'e xixre' lawe' lataj.

<sup>27</sup> Felipe guxase', na' guzé'e zéaje', na' la neza na' bezrague' tu benne' Etiopía. Benne' nigá naque' wizre, ne naque' benne' szren xu'u lu ne'e xel-la' gunní'a chee Candace, nu'ula na' dxenná bé'ene' xezr la xu Etiopía. Ba guxíaj benne' nigá Jerusalén chee bē'lá'ane' Dios. <sup>28</sup> Na' a zexíaje' Etiopía na', dxe'e lu carreta chee' da dxelecá'a bzrina', ne dxulabe' xiche naga zaj naxúaj xrtizra' Isaías, benne' bchálaje' waláz chee Dios. <sup>29</sup> Nadxa gunná Be' Lá'azxa, guzre' Felipe:

—Gubiga gagu cuita carreta na'.

<sup>30</sup> Gate gubiga Felipe na' benne' dxulaba bènnea' xiche chee Isaías, na' bchebe' le':

—¿Dxéajni'inu' ca naca da dxulabu'?

<sup>31</sup> Benne' biu na' guzre' le':

—¿Ájazra gaca chéajni'ida' che quebe nu chilá' guzéajni'i neda'?

Na' guzre' Felipe cuene' cué'lene' le'.

<sup>32</sup> Naga dxulabe' lu xiche chee Dios dxenná na caní:

Beleché'e Le' naga gatié' ca tu zrila'dau', na' ca zrila' na' dxátaba' zrize lau benne' ca' dxuluchibe' zraba', ca' bènqueze Le', quebe bi gunné'.

<sup>33</sup> Bulucá'ana ditje' Le', ne quebe belú'e lataj nu guchi'a chee', ne quebe nu gaca guchálaje' ca naca chee zri'ine zre sue', lawe' da belutie' Le'.

<sup>34</sup> Na' benne' Etiopía na' bchebe' Felipe:

—Gunná, ¿muzra chee dxenná benne' nigá, cheéqueze' na', che chee xetú benne' xula?

<sup>35</sup> Nadxa guzú lau Felipe bzéajni'ine' le' ca naca naga dxulabe', ne bchálajene' le' dizra' chawe' ca naca chee Jesús. <sup>36</sup> Gate guledé' tu naga de nisa, na' gunná benne' Etiopía na':

—Nigá de nisa. ¿Quebe gaca chua' nisa, zra?

<sup>37</sup> Felipe guzre' le':

—Che dxéajle'u duté lárda'u, waca.

Benne' na' bechebe':

—Dxéajle'a naca Jesucristo Zri'ine Dios.

<sup>38</sup> Nadxa gunná bé'ene' guleza carreta na', na' dxúpate' gulu'e lu nisa, na' Felipe bche'e le' nisa. <sup>39</sup> Gate belexedxúaje' lu nisa na', na' Be' chee Xránadxu bche'e Felipe naga xula. Benne' Etiopía na' québedxa blé'ene' le', na' bexu'e neza chee' duté xel-la' dxebe'. <sup>40</sup> Felipe na' guque bé'ene' ba

zue' xezre Azoto, na' gudé' tu tu xezre dxuchálajé' dizra' chawe' ca naca chee Jesús cadxa bezrine' Cesarea.

## 9

*Saulo dxexaque' benne' chee Jesús*  
(Hch. 22.6-16; 26.12-18)

<sup>1</sup> Dxácatē na' Saulo quebe dxusanē' dxunē' ba xuzre gutiē' benne' ca' dxelájle'e chee Xránadxu. Chee gunē' caní guxíajē' xeajchálajlene' bxruze blau. <sup>2</sup> Gunabē' xiche da dxulé'e na nape' xel-la' dxenná bea da gu'e chéajē' xudau' ca' zaj nnita xezre Damasco, chee séquenē' cheajxedílajē' benne' ca' dxelájle'e chee dizra' chawe' chee Jesús, ne che'e le', benne' biu, ne nu'ula ca', chee guzré'e le' lizre xia lu xezre Jerusalén. <sup>3</sup> Na' gate ne xu'e neza zéajē', ne ca ba zua zrine' xezre Damasco, na' bsaní' tu xi' naga zéajē' da za' xabáa. <sup>4</sup> Saulo xeajcházie' lu xu, na' benne' chi'i tu benne' dxé'e le':

—Saulo, Saulo, ¿bizr chee na' nau zi' xuzru' neda'?

<sup>5</sup> Nadxa Saulo bchebe':

—¿Nuzra Lue', Xran?

Na' bēnnea' bechebe':

—Neda' naca' Jesús, benne' na' nau zi' xuzru'. Lue'ze dxun zi' cuinu', ca dxun bezre gate dxulíbeba' lawe' xágala da dxáduē'-ba'.

<sup>6</sup> Nadxa Saulo dxezrizque' dxezrebe', gunné':

—Xran, ¿bi dxaca lazru' guna'?

Na' Xránadxu guzre' le':

—Guxasa, guxú'u lu xezre, na' xeléqueze' lue' da dxal-la' gunu'.

<sup>7</sup> Benne' ca' zjácalē Saulo belezrébelē'e lawe' da belenne' chi'i benne' na', san quebe nu belelé'ene'. <sup>8</sup> Nadxa Saulo bexase' lu xu na', na' gate guxá' lawē', quebe guca lé'ene'. Ca' guca, belequē'e ne'e, ne guleché'e le' lu xezre Damasco. <sup>9</sup> Guzúe' na' chunna zra quebe dxelé'ene', ne quebe bi güe'e gudawe'.

<sup>10</sup> Lu xezre Damasco na' zua tu benne' dxéajle'e chee Jesús le' Ananías, na' Xránadxu ble'e lawe' le' tu lu da ble'e le', na' guzre' le':

—Ananías.

Na' le' bechebe':

—Nigá zua', Xran.

<sup>11</sup> Nadxa gunná Xránadxu, dxé'e le':

—Guxasa, guxíaj neza da nazí le na: Neza Li, na' lizre Judas guchēbu' chee tu benne' Tarso, le' Saulo. Benne' nigá dxuláwizre' Dios. <sup>12</sup> Tu lu da blé'ene', ba blé'ene' tu benne' le' Ananías chu'e guzē' ne'e le' chee xelé'ene'.

<sup>13</sup> Gate benne' da nigá, na' gunná Ananías:

—Xran, benne' zan ba buluzenne' neda' chee benne' nigá, ne chee xúgutē da calēla da dxunē' chee benne' ca' dxelájle'e chiu' Lue' lu xezre Jerusalén. <sup>14</sup> Na'a blē'e nigá nape' xel-la' dxenná bea chee benne' xíchajē ca' chee bxruze ca', chee che'e lizre xia xúgutē benne' dxeleñné' Dios lu Lau' Lue'.

<sup>15</sup> Na' Xránadxu guzre' le':

—Guxíaj. Neda' ba gucá'a benne' na' chee cheajzenne' benne' xezr la xu ca', ne benne' wenná bea ca', ne benne' Israel ca', ca naca chia' neda'. <sup>16</sup> Neda' gulé'eda' le' ca naca da zantē da saque'e ne chia' neda'.

<sup>17</sup> Nadxa Ananías guzē'e zéajē' xu'u naga zua Saulo. Gate guxú'e na', guxrúa ne'e lawe' le', na' guzre' le':

—Saulo, bicha'. Xránadxu Jesús, Bénnea' ble'e lawe' lue' la neza naga za'u, nasel-le' neda' chee xelé'enu', ne chee súale Be' Lá'azxa lue'.

<sup>18</sup> Ca' guca beléxrujte' lu xiaj lawe' da zaj naca ca xrlacu bela, na' belé'ene'. Na' bexasa Saulo, ne gudxúate' nisa. <sup>19</sup> Gudé na' gudawe', ne bedipe'. Begá'ane' tu chupa zra nen benne' Damasco ca' dxeléajle'e chee Jesús.

*Saulo dxuchálaje' chee Jesús lu xezre Damasco*

<sup>20</sup> Nadxa guzú lau Saulo dxuchálaje' chee Jesús lu xu'u ga dxelezraga judío ca' zaj nnite' Damasco, dxenné' Jesús naque' Zri'ine Dios. <sup>21</sup> Xúgute benne' beléne' chee' belexebáne', dxelenné':

—¿Quegá benne' nigá bénnea' gudáu zi' xuzre' benne' ca' zaj zre'e Jerusalén, benne' ca' dxelenné' Dios lu La Jesús? ¿Quegá léqueze' na' blé'e nigá chee che'e benne' ca' xezre Jerusalén chee gudé' le' lu na' benne' xíchaje ca' chee bxruze ca'?

<sup>22</sup> Saulo bchálajdxé' du lazre' chee Jesús, ne dxulé'ene' Jesús naque' Cristo chee Dios, na' bzua zrie' benne' judío ca' zaj zre'e Damasco.

*Saulo dxelé' lu na' benne' judío ca'*

<sup>23</sup> Ca' gudé zane' zra, benne' judío ca' belune' tuze dizra' xelútie' Saulo. <sup>24</sup> Gunezne' le' da nigá. Te zra ne chizrela gulebeza benne' judío ca' dxu'a dxa xu'u ca' naga dxelexedxúaj bénneache xezre na', chee xelútie' le'. <sup>25</sup> Nadxa benne' ca' dxeléajle'e chee Jesús gulegú'e Saulo tu lu xcuite lba zren, na' buluxuléajle' le' chizrela le'e ze'e da naxechaj na xezre. Ca' guca, gulá Saulo.

*Saulo dxezrine' Jerusalén*

<sup>26</sup> Gate bezrín Saulo Jerusalén, guca lazre' gune' tuze benne' ca' dxeléajle'e chee Jesús, san benne' ca' dxelezrebe' le' lawe' da quebe dxeléajle'e ba dxéajle'e Saulo chee Jesús. <sup>27</sup> Bernabé guché'e Saulo, ne bze' le' lau benne' gubáz ca' chee Jesús. Na' bchálajle Bernabé gubáz ca' ca ble'e Saulo Xránadxu la neza, ne ca ben Xránadxu bchálajlene' Saulo, ne ca bchalaj Saulo du lazre' lu xezre Damasco nen xel-la' dxenná bea chee La Jesús. <sup>28</sup> Nadxa Saulo begá'ane' Jerusalén, dxedálene' benne' ca'. <sup>29</sup> Bchalaj Saulo du lazre' lu La Xránadxu, dxuchálajlene' benne' ca' dxelenné' dizra' griego, san benne' caní gulaca lazre' xelútie' le'. <sup>30</sup> Gate guleque be'e biche ljwézredxu da caní, na' guleché'e Saulo lu xezre Cesarea, na' lu xezre na' gulesel-le' le' xezre Tarso.

<sup>31</sup> Nadxa benne' ca' dxelezrague' lu La Jesús tu tu xezre zaj nababa Judea, ne Galilea, ne Samaria, gulebeza zri lazre', ne beledipa lazre'. Xel-la' dxelezrebe gulaque' Xránadxu tuze, na' lawe' da gúcale Be' Lá'azxa le', gulané'.

*Pedro dxexune' Eneas*

<sup>32</sup> Gate dxedá Pedro dxejanné'e biche ljwézredxu ca', na' guxíajqueze' xejanné'e benne' ca' dxeléajle'e chee Jesús lu xezre Lida. <sup>33</sup> Na' bezrague' tu benne' le' Eneas, bache guca xrunu' iza de' lu da'a lawe' da naque' benne' zrinnaj. <sup>34</sup> Na' gunná Pedro, dxé'e le':

—Eneas, Jesucristo ba bexune' lue'. Bexasa, ne butube da'a chiu'.

Na' bexasate Eneas na'. <sup>35</sup> Belelé'e xúgute benne' le', benne' zaj zre'e xezre Lida, ne xezre Sarón, na' belexaque' chee Xránadxu.

*Dorcax dxexebane' ládujla benne' gate*

<sup>36</sup> Lu zra na' zua tu nu'ula le' Tabita lu xezre Jope. Dxéajle'e chee Jesús. Lu dizra' griego le' Dorcas. Nu'ula nigá dxúnqueze' da xrlátaje, ne dxácalene' benne' xache' ca'. <sup>37</sup> Lu zra ca' guxú'u Dorcas xel-la' we', na' gutiē'. Na' bulugazje' le', ne belexruē' le' tu lu xu'u naga zua gudxupe' cuía dxala. <sup>38</sup> Xezre Jope na' zua na gagu naga zua xezre Lida naga zua Pedro, na' lawe' da zaj neze benne' Jope ca' zue' na', na' gulesel-le' chupa benne' biu cheajleguezre' le':

—Gudázega xezre Jope.

<sup>39</sup> Nadxa Pedro guxíajlene' benne' ca'. Gate bzrine' na', na' belechē'e le' naga zrua Dorcas na', na' xúgutē nu'ula ca' ba zaj nate benne' chie' zaj naxéchaje' Pedro dxelebezre', ne dxululé'ene' le' zra nu'ula, ne zra benne' biu, da ca' ben Dorcas na' gate ne zue' nen benne' ca'. <sup>40</sup> Nadxa guleaj Pedro xúgutē benne' ca', na' bzu zribe' bchálajlene' Dios. Na' gunné'e nu'ula gate na', gunné':

—Tabita, bexasa.

Nadxa nu'ula na' bexá' lawe', na' gate blé'ene' Pedro, bexasē' gudxé'e. <sup>41</sup> Na' Pedro bequē'e ne'e, bechise' le'. Nadxa gunné' biche ljwézredxu ca', ne nu'ula ca' ba gute benne' biu chee', na' blé'ene' benne' ca' le' naca banē'. <sup>42</sup> Ca guca da nigá belén ca naca benne' zaj zre'e xezre Jope, na' benne' zan guléajle'e chee' Xránadxu. <sup>43</sup> Pedro begá'ane' zane' zra lu xezre na' lizre Simón, tu benne' dxucá'ana chawe' xide zra be xixre'.

## 10

### *Pedro ne Cornelio*

<sup>1</sup> Zua lu xezre Cesarea tu benne' le' Cornelio, benne' dxenná be'e lu wedil-la tu cue' benne' nazí le na Benne' Italia Zjaque' Wedil-la. <sup>2</sup> Benne' nigá, ne benne' zaj zre'e lizre' dxulucá'ana szrene' Dios, ne dxelezrebe' Le'. Cá'aqueze dxunézrujle' dumí dxácalene' benne' judío ca', ne tu dxuchálajlezqueze' Dios. <sup>3</sup> Tu zra gate dxexedá chunna ble'e Cornelio tu da ble'e Dios le', na' blé'ene' cátequeze guxú'u tu gubáz chee xabáa naga zue', na' guzre' le':

—Cornelio.

<sup>4</sup> Cornelio guzúe' dxenné'e gubáz chee xabáa na' dutē xel-la' dxezrebe, na' bchebe' le':

—¿Bizra na', Xran?

Nadxa gunná gubáz chee xabáa, guzre' le':

—Dios ba benne' da dxuláwizru' Le', ne nézene' ca da dxunu' dxácalenu' benne' xache' ca'. <sup>5</sup> Gusel-la benne' chjaque' xezre Jope, cheajlenné' Simón, bénnea' léqueze' Pedro. <sup>6</sup> Zue' lizre xetú benne' le' Simón, benne' dxucá'ana chawe' xide zra be xixre', na' zua lizre' dxu'a nísadau'. Pedro na' xe'e lue' ca da dxal-la' gunu'.

<sup>7</sup> Gate bezá' gubáz chee xabáa na' bchálajlene' le', na' gunné' Cornelio chupa bi wen zrin chee', ne tu benne' dxeje' wedil-la, ne dxape' Dios ba lá'ana, ne zúaqueze' lizre Cornelio na'. <sup>8</sup> Na' bchálajlene' benne' ca' ca naca da ba guca, na' ca gudé na' gusel-le' le' chjaque' xezre Jope.

<sup>9</sup> Zra xula, dxácatē zaj xu'e benne' ca' neza, ne ba dxezrine' gagu naga dxe' Jope, na' guluén Pedro chju'u sibe du wagubizra chee guchálajlene' Dios. <sup>10</sup> Ba dxedúnle'e, ne guca lazre' gawe', na' dxácatē ne dxulucueze' da gawe', blé'ene' tu da ble'e Dios le'. <sup>11</sup> Blé'ene' naxalaj xabáa, ne dxetaj lu xezr la xu da naca na ca tu ladxe' zren nadxéaj na dápatē lá'a chee' na. <sup>12</sup> Lawe' ladxe' na' zaj zria xúgutē cue' be xixre', be zria tapa ni'a na'ba',

ne be snia ca', ne be zua xrila ca'. <sup>13</sup> Nadxa benne' tu chi'i benne' dxę'e le':

—Guxasa, Pedro. Bęte tu bea ca' cheę gagu'-ba'.

<sup>14</sup> Pedro bechebe':

—Cabí, Xran. Neda' cabata' ne gawa' da quebe nun Dios gagu benneache, ne quegá da naca na sban.

<sup>15</sup> Benne' na' bchálaje' da xula, dxę'e le':

—Da ba nucá'ana chawe' Dios, quebe nnau' lue' naca na sban.

<sup>16</sup> Da nigá guca na chunna lasa, na' ladxe' na' begüén na xabáala.

<sup>17</sup> Dxácatę dxę' Pedro dxulaba lazre' bi zéaje ca naca da blé'ene', na' belezrín benne' ca' nasel-la Cornelio dxu'a dxa xu'u, dxuluchębe' ga zua lizre Simón. <sup>18</sup> Gate belezrine' lizre Simón na', na' gulenné' zizraj, dxelenabe' che zua xu'u na' tu benne' le' Simón, bėnnea' léqueze' Pedro. <sup>19</sup> Gate Pedro ne dxulaba lazre' ca naca da blé'ene', na' Be' Lá'azxa guzre' le':

—Gunná'xque, chunna benne' dxelexíaje' lue'. <sup>20</sup> Guxasa, bexetaj. Guxíaję benne' ca', ne quebe gun chupa lazru' lawe' da nasel-la' neda' benne' ca'.

<sup>21</sup> Nadxa Pedro bexétaje' naga zaj zra' benne' ca' nasel-la Cornelio, na' guzre' le':

—Neda' na' dxexíaję le'e. ¿Bizra cheę za'le?

<sup>22</sup> Benne' ca' belexechebe':

—Za'ntu' waláz cheę Cornelio, benne' dxenná be'e lu wedil-la. Naque' benne' xrlátaje, ne dxezrebe' Dios, na' xúgutę benne' judío ca' dxelape' le' ba lá'ana, ne zaj nazrí'ine' le'. Tu gubáz cheę xabáa cheę Dios guzre' le' dxal-la' sel-le' benne' xedajlenné' lue' xidu' lizre' cheę xenne' ca da dxal-la' xu'u le'.

<sup>23</sup> Nadxa Pedro bzre'e benne' ca' xu'u na', na' belexegá'ane' nen le' xęla na'. Zra xula guxíaję Pedro benne' ca', na' xjácale bal-la biche ljwézredxu le', benne' zaj zre'e Jope.

<sup>24</sup> Zra gudxupe' zra belezrine' xęzre Cesarea naga zua Cornelio dxe-beze' le', ne zrale bal-la benne' xrtie' le', ne xezícadxa benne' ljwezre', benne' ca' gunné'. <sup>25</sup> Gate bzrin Pedro chale'aj, bdxuaj Cornelio guz' lu ne'e le'. Bzu zribe' lau Pedro cheę gucá'ana szrene' le'. <sup>26</sup> Pedro bechise' le', dxenné':

—Guzé. La gázqueze neda' naca' bėnneache ca lue'.

<sup>27</sup> Dxácatę dxuchálaję Pedro Cornelio, gulu'e lu xu'ula, na' blé'ene' benne' zan zaj nazrague' na'. <sup>28</sup> Nadxa gunná Pedro, dxę'e le':

—Nézqueze le'e quebe dxunna da nadxixruj bea cheę judío ca' neda' lataj gaca' tuze nen benne' quebe zaj naque' judío u chu'a lizre'. Na'a Dios ba blé'ene' neda' quebe dxal-la' nnia' cheę netú benne', quebe nnia' naque' sban, u naque' benne' quebe gapa' ba lá'ana. <sup>29</sup> Cheę le' na', gate gulenné' neda', la guzá'tea', ne quebe bęn chupa lazra'. Dxaca lazra' nezda' bi cheę na' gunnele neda'.

<sup>30</sup> Nadxa bechebe Cornelio:

—Ba zeaj tapa zra ca zúadxu na'a, zua' lizra' nigá dxuna' gubasa, ne dxuchálajęna' Dios, gate ble'e lau tu benne' neda', nacu'e zra lanę' da dxácatite na. <sup>31</sup> Benne' na' guzre' neda': “Cornelio, Dios ba benne' da dxuchálajęnu' Le', na' nézene' ca da dxunu' dxácalenu' benne' xache' ca'. <sup>32</sup> Gusel-la benne' chjaque' xęzre Jope, cheajlexri'e Simón, bėnnea' léqueze' Pedro. Zue' lizre xetú benne' le' Simón, benne' dxucá'ana chawe'

xide zra be xixre' ca, na' zua lizre' dxu'a nísadau'. Gate xide' nigá, na' guchálajlene' lue'." <sup>33</sup> Ca'an guca, gusel-latea' benne' ca' bedajlexedilaje' lue', na' benu' da chawe' bla'u nigá. Na'a xúgutentu' zrantu' nigá lau Dios, ne dxaca lázrentu' xénentu' xúgute ca da gunná be'e Xránadxu lue' guchálajlenu' netu'.

### *Da bchalaj Pedro lizre Cornelio*

<sup>34</sup> Nadxa guzú lau Pedro dxuchálaje', dxenné':

—Na'a dxéajni'ida' Dios quebe dxebéaje' bál-laze bénneache, <sup>35</sup> Na' xúgute xezr la xu Dios dxezí' lu ne'e benne' ca' dxelezrebe Le', ne dxelune' da xrlátaje. <sup>36</sup> Dios bchálajlene' zri'ine zre sua Israel ca', ne bchálaje' dízra' chawe' chee xel-la' dxebeza zri lazre', da dxezidxu ne chee Jesucristo, Bénnea' naque' Xrana xúgute bénneache. <sup>37</sup> Le'e ba nézquezle ca naca da guca du ca naca lu xezr la xu chee benne' judío ca', da guzú lau na naga nababa Galilea ca gudé bchalaj Juan xrtizra' Dios, ne bchue' bénneache nisa. <sup>38</sup> Nézele ca ben Dios, bnézruje' Jesús, benne' Nazaret, xel-la' waca chee Be' Lá'azxa, ne ca gudá Le' dxune' da chawe', ne dxexune' xúgute benne' dxelezaca zi'e lu na' da xriwe'. Da nigá bene' lawe' da guzúale Dios Le'. <sup>39</sup> Netu' dxexechébentu' chee da caní, xúgute da ben Jesús naga nababa Galilea, ne da bene' lu xezre Jerusalén. Gudé na' belutie' Le', gate buludé'e Le' xaga béguaj, <sup>40</sup> na' Dios bsebane' Le' gate guca chunna zra, na' be'e lataj ble'e lau Jesús netu'. <sup>41</sup> Quebe ble'e lawe' xúgute bénneache, san launtu' nétu'ze, nácantu' benne' ca' guleaj Dios nédxudate chee xechébentu' chee da caní. Netu' güe'e gudáguntu' nen Le' gate gudé bebane' ládujla benne' gate. <sup>42</sup> Gusel-le' netu' guchálajlentu' bénneache, ne xechébentu' ca da nun Dios, nuzúe' Jesús nigá chee guchi'e chee benne' ban ca', ne chee benne' gate ca'. <sup>43</sup> La gázqueze nédxudate gulenná xúgute benne' ca' buluchálaje' waláz chee Dios, buluchálaje' ca dxal-la' gaca chee Jesús, gulenné' xúgute benne' xeláje'e chee Jesús, na' ne chee Le' Dios gunite lawe' xtul-la benne' ca'.

### *Benne' quebe zaj naque' judío dxelezi'e Be' Lá'azxa*

<sup>44</sup> Ne dxuchalaj Pedro gate bzin Be' Lá'azxa bedajsúalene' xúgute benne' ca' dxelenne' da dxuchalaj Pedro. <sup>45</sup> Benne' judío ca' dxeláje'e chee Jesús, benne' ca' zá'acalene' Pedro, belexebánene' gate guleque bé'ene' ba zúale Be' Lá'azxa benne' ca' quebe zaj naque' judío. <sup>46</sup> Dxeleque bé'ene' na lawe' da belenne' dxuluchalaj benne' ca' dízra' chee benne' xula, ne dxelúe lá'ane' Dios. <sup>47</sup> Nadxa gunná Pedro:

—¿Waca nnadxu quebe dxal-la' xeledxúa benne' caní nisa, benne' ca' bache gulezi'e Be' Lá'azxa ca bentu' netu'?

<sup>48</sup> Nadxa gunná bea Pedro xeledxúa benne' ca' nisa lu La Jesucristo. Gudé na', benne' ca' gulata' xuene' Pedro xegá'ane' nen le' tu chupa zra.

## 11

### *Pedro dxuzenne' benne' gubáz ca' zaj zre'e Jerusalén ca naca da bene'*

<sup>1</sup> Benne' gubáz ca', ne biche ljwézredxu ca' zaj zre'e Jerusalén belenne' ba gulezi' lu na' benne' quebe zaj naque' judío dízra' chee Dios. <sup>2</sup> Gate bezrin Pedro xezre Jerusalén, gulezi' tizra' benne' ca' le', benne' ca' dxelenné' dxal-la' chugu late' bela' chee benne' ca' zaj naque' chee Dios.

<sup>3</sup> Benne' caní buluchebe' Pedro:

—¿Bizr chee na' guxíaju' xeajsúalenu' benne' ca' quebe zaj naque' judío, ne gudágulenu' le'?

<sup>4</sup> Nadxa Pedro bzenne' benne' ca' xúgute da guca cha chee na, gunné':

<sup>5</sup> —Neda' zua' lu xezre Jope, na' gate dxuchálajlena' Dios, ble'eda' tu da ble'e Dios neda'. Ble'eda' tu ladxe' zren nadxéaj dápaté la'a chee na, da dxetaj na xabáa, ne bedajsé na lawa'. <sup>6</sup> Gate gunná' xánnia' chee ble'eda' bi na' zaj zria na lawe', ble'eda' be' xixre', be' zria tapa ni'a na'ba', ne be snia ca', ne bea ca' zaj zua xrílabá'. <sup>7</sup> Na' benda' tu chi'i benne' guzre' neda': “Guxasa Pedro, bete tu bea ca', na' gagu'-ba'.” <sup>8</sup> Neda' gunnéa': Cabí, Xran, lawe' da cabata' ne gawa' neda' tu da quebe nun Dios gagu bénneache, ne quegá da naca sban. <sup>9</sup> Nadxa bénnea' dxenné' xabáa gunné' neda' da xula, na' guzre' neda': “Da ba nucá'ana chawe' Dios, quebe nnau' lue' naca na sban.” <sup>10</sup> Da nigá guca na chunna lasa, na' ca gudé na' xúgute da ca' belexegúén na xabáa. <sup>11</sup> Lu zra ná'queze belelá' chunna benne' lu xu'u naga zua', benne' ca' gusel-la tu benne' zua Cesarea chee zedajlexedilaj neda'. <sup>12</sup> Be' Lá'azxa gunná' bé'ene' neda' chéajlena' benne' ca', ne quebe gun chupa lazra'. La gázqueze gusiá'cale xrupa benne' biche ljuwézredxu caní neda'. Xúgutentu' guxú'untu' lizre tu benne'. <sup>13</sup> Le' bchálajlene' netu' ca blé'ene' lizre' tu gubáz chee xabáa, ze ni'e, ne guzre' le': “Gusel-la benne' chjaca xezre Jope chee cheajlenné' Simón, benne' léqueze' Pedro. <sup>14</sup> Benne' nigá xe'e lue' aja gunu' chee lau' lue', ne xelélé xúgute benne' zaj zre'e lizru'.” <sup>15</sup> Gate guzú' lawa' dxuchálajlena' benne' ca', na' bzin Be' Lá'azxa guzú'alene' benne' ca', ca ble'e guzú'alene' dxi'u nédxudaute. <sup>16</sup> Nadxa xeajsá lazra' ca gunná' Xránadxu, gunné': “Da li Juan bchue' bénneache nisa, na' gaca chee da zéaje xel-la' dxedxúa nisa, súale Be' Lá'azxa le'e.” <sup>17</sup> Che Dios bnézruje' chee benne' ca' ca benne' dxi'u, guxéajledxu chee Xránadxu Jesucristo, ¿nuzra naca' neda' chee tábaga' Dios?

<sup>18</sup> Nadxa gate biche ljuwézredxu ca' zaj zre'e Jerusalén belenne' da caní, na' gulezúa zrie', ne gulezú lawe' dxelúe lá'ane' Dios, dxelenné':

—Ca' naca, la gázqueze dxunna Dios lataj benne' quebe zaj naque' judío xelexebi' lazre' chee xezezi'e xel-la' nabán zeajlí canna.

*Benne' dxelájl'e chee Jesús zaj zre'e xezre Antioquía*

<sup>19</sup> Gate belutié' Esteban, na' belau zi' xuzre' xezícala benne' dxelájl'e chee Jesús, na' bal-le' buluzrúnnaje', xjaque' xezre Fenicia, ne lu xu Chipre, ne xezre Antioquía. Gate belezrine' lataj ca', na' buluchálaje' dizra' chee Jesús lau benne' judío cá'aze, ne quegá lau benne' quebe zaj naque' judío. <sup>20</sup> Nadxa bal-la benne' dxelájl'e chee Jesús, benne' Chipre, ne benne' Cirene, belelé'e xezre Antioquía, na' buluchálajlene' benne' ca' quebe zaj naque' judío, ne buluzenne' le' dizra' chawe' ca naca chee Xránadxu Jesús. <sup>21</sup> Xel-la' waca chee Xránadxu guzú'ale na benne' ca', na' ca'an guca, benne' zan belexexaque' chee Xránadxu.

<sup>22</sup> Gate belén benne' ca' da nigá, benne' dxelájl'e chee Jesús zaj zre'e Jerusalén, na' gulesel-le' Bernabé xezre Antioquía. <sup>23</sup> Gate bzin Bernabé na', blé'ene' ca da chawe' da dxun Dios chee benne' ca', na' gubéle'ene'. Na' bsízrene' xúgute benne' ca' chee xezezúa chúchue' lu da naca chee Xránadxu. <sup>24</sup> Bernabé naque' benne' xrlátaje, na' zúale Be' Lá'azxa le', ne duté lázrdawe' dxéajle'e chee Jesús. Ca'an guca, ne chee le' guléajle benne' zan chee Xránadxu.



<sup>25</sup> Gudé na' guxíaj Bernabé xezre Tarso, zeajxedíajé' Saulo, na' gate bezrelne' le', beche'e le' Antioquía. <sup>26</sup> Gulezúe' na' tu iza naxá' nen benne' ca' dxeléajle'e chee Jesús, na' bulusédene' benne' zan. Lu xezre Antioquía na' guca na da nedxu gulé'e benne' ca' dxeléajle'e chee Xránadxu, Benne' Cristiano.

<sup>27</sup> Ca lu zra ca', bal-la benne' dxelenné' waláz chee Dios besía'que' Jerusalén, xjaque' Antioquía. <sup>28</sup> Tu benne' ca' le' Agabo guzé' lávela biche ljuwézredxu ca', na' ca da bnezruj Be' Lá'azxa le', gunné' waca tu gubina' zren du ca naca xezr la xu, na' gubina' nigá guca na gate naca Claudio benne' dxenná bé'ene' ca naca xezr la xu Roma. <sup>29</sup> Nadxa benne' ca' dxeléajle'e chee Jesús, benne' zaj zre'e Antioquía belún zi' lazre' xelesel-le' da gácale na biche ljuwézredxu zaj zre'e xezre ca' zaj nababa Judea, ca da xezezeque' tu tue' xulunézruje'. <sup>30</sup> Ca'an belune', na' belesel-le' tu guna' lau benne' gula ca' chee Cristo zaj zre'e Judea, na' Bernabé ne Saulo belú'e na na'.

## 12

### *Dxelutie' Jacobo ne dxelegú'e Pedro lizre xia*

<sup>1</sup> Lu zra ca' guzú lau wenná bea Herodes nau zi' xuzre' bal-la benne' ca' dxeléajle'e chee Jesús. <sup>2</sup> Gunná bé'ene' belutie' Jacobo, biche Juan nen xia nalá. <sup>3</sup> Gate ble'e Herodes dxelexezaca ba lazre' benne' judío ca' ca naca da bene', na' gudel-le' Pedro. Da nigá guca na lu zra laní ca' gate dxelawe' xeta xtila da quebe nachixre na cua zichaj chee xeta xtila. <sup>4</sup> Ca gudé gudel-le' Pedro, na' gulu'e le' lizre xia naga buluxúe tapa cue' benne' dxjaca wedil-la le', zaj naca tapa benne' zeje' wedil-la tu cue' tu cue'. Herodes guca lazre' guzúe' Pedro lau benne' xezre ca' te laní. <sup>5</sup> Ca'an guca xu'u Pedro lizre xia naga dxuluxúe xánnie' le', na' benne' biche ljuwézredxu ca' buluchálajlequeze' Dios du lazre'.

### *Dios dxuselé' Pedro lizre xia*

<sup>6</sup> Dxeła xanne' ca za chaní' zra xula gate dxal-la' guzúa Herodes le' lau benne' xezre ca', Pedro de' dxásie' laduj chupa benne' dxjaque' wedil-la, nadxéajé' chupa du xia, na' xebal-la benne' dxjaca wedil-la zaj zre'e dxu'a dxa xu'u dxuluxúe' lizre xia na'. <sup>7</sup> Nadxa ble'e lau tu gubáz chee xabáa chee Xránadxu, na' ca naca lizre xia na' guxaní'. Na' gubáz chee xabáa na' bte' le'e Pedro, ne bsebané' le', na' guzre' le':

—Guxásache.

Ca'an guca, du xia ca' belexexezre na na' Pedro. <sup>8</sup> Na' gunná gubáz chee xabáa na', guzre' le':

—Besí le'u, ne buléaj zrelu'.

Gate bexuzre ben Pedro da na', na' guzre gubáz chee xabáa na' le':

—Guxrúa xicha chiu' cuxru', ne gudále neda'.

<sup>9</sup> Pedro bedxúaje' cuzru gubáz chee xabáa na', ne quebe nézene' che naca da li che cabí ca da dxun gubáz chee xabáa na'. Dxéquene' dxelé'ene' tu da dxulé'e Dios le'. <sup>10</sup> Belexedé'e naga zaj zra' benne' dxjaque' wedil-la nedxu ca', ne naga zaj zra' benne' gudxupe' benne' dxjaque' wedil-la, na' gate belexezrine' dxu'a dxa xu'u xia da dxedxuaj zeaj la nézala, dxa xu'u na' leze na bxalaj na. Belexedxúaje', na' ca gudé besía'que' belezrine' xetú neza xula chee xezr na', na' bca'ana gubáz chee xabáa na' leze'. <sup>11</sup> Nadxa guque be'e Pedro ba bedxúaje', na' guzá' lazre', gunné': Na'a dxelé'eda'

naca na da li. Xrana' gusel-le' gubáz chee xabáa chee' chee bselé' neda' lu na' Herodes, ne lu xúgute da gulaca lazre' judío ca' xelune' chia'.

<sup>12</sup> Da nigá dxulaba lazre' Pedro gate bzrine' lizre María, xrna Juan, bi na' léquezebe' Marcos, na' lu xu'u na' zaj nazraga benne' zan dxelenabe' Dios gácalene' Pedro. <sup>13</sup> Gate gunné Pedro dxu'a dxa xu'u na', bzrin na' tu bi nu'ula lēbe' Rode zeajnabe' nu na'. <sup>14</sup> Gate bexúnbeabe' chi'i Pedro, quebe gusalajbe' dxa xu'u. Xel-la' dxebé cheebe' zexíaj chégube' naga zaj nazraga benne' ca' chee zeajézrebe' benne' ca' ze Pedro dxu'a dxa xu'u. <sup>15</sup> Nadxa benne' ca' gulé'e bi nu'ula na':

—Nadá xichaj lázrda'u.

Bi nu'ula na' ben chúchube' xrtízrabe'. Benne' ca' gulenné':

—Quebe le' na'. Be' guxu'e na'.

<sup>16</sup> Dxácatē na' ze Pedro tu dxennézqueze' dxu'a dxa xu'u. Na' gate gulesálaje', ne belelé'ene' Pedro, na' belexebánene'. <sup>17</sup> Pedro guchisa ne'e chee xelezúa benne' ca' zrize, na' bchálajlene' benne' ca' ca ben Xránadxu bebéaje' le' lizre xia. Na' guzre' benne' ca':

—Le guzén Jacobo, ne biche ljwézredxu ca' ca naca da nigá.

Nadxa bezé'e zexíaje' naga xula.

<sup>18</sup> Gate guxaní', gulezúale'e stebe benne' dxjaque' wedil-la ca' lawe' da quebe zaj nézene' aja guca chee Pedro. <sup>19</sup> Herodes gunná bé'ene' xelexilaj benne' dxjaca wedil-la Pedro, na' lawe' da quebe belexezrelne' le', na' gunáb xánnie' benne' dxjaque' wedil-la bi guca, na' gudé na' gunná bé'ene' xelate benne' ca' dxjaque' wedil-la. Ca gudé na' guzá' Herodes xezre ca' zaj nababa Judea, guxíaje' xeajsúe' xezre Cesarea.

### *Dxate Herodes*

<sup>20</sup> Herodes dxezré'e benne' ca' zaj zré'e xezre Tiro, ne xezre Sidón. Benne' chee xezre ca' belune' tuze dizra' chee cheajlelé'e cuine' lau Herodes na'. Belune' Blasto benne' ljwezre'. Naque' tu benne' blau chee wenná bea Herodes, na' gulesel-le' le' lau Herodes na' chee nabe' le' sua zri ca naca da dxaca chee Herodes nen benne' ca'. Caní belune' lawe' da nédxute dxelagu benne' xezre Tiro, ne Sidón da guzá' xezre Cesarea naga zua Herodes. <sup>21</sup> Nadxa Herodes bzue' tu zra xelezrín benne' ca' lawe'. Lu zra na' Herodes gucue' zra lané' da zácale'e, na' gudxé'e lataj blau chee', ne bchálajlene' benne' zan ca'. <sup>22</sup> Nadxa benne' zan ca' gulezú lawe' dxelenné' zizraj:

—¡Benne' nigá dxuchálaje' quebe naque' beniácheze! ¡Dios na'!

<sup>23</sup> Zra na'te tu gubáz chee xabáa chee Xránadxu gulu'e Herodes tu xízrawe' lawe' da guzi'e xel-la' ba lá'ana da dxal-la' si' Dios, na' guzré'e bzuga', ne gútete'.

<sup>24</sup> Bzriluj dizra' chawe' chee Xránadxu, na' benne' ca' buluchálaje' ca naca na gáteteze na'.

<sup>25</sup> Gate belezúe Bernabé, ne Saulo zrin dxelune' lu xezre Jerusalén, besía'que' xezre na', zaj naché'e Juan, bi na' léquezebe' Marcos.

## 13

### *Bernabé ne Saulo dxelezú lawe' dxeledé' dxuluchálaje' dizra' chee Dios*

<sup>1</sup> Ládujla benne' ca' zaj nazraga chee Cristo lu xezre Antioquía zaj zra' benne' ca' dxelenné' waláz chee Dios, ne benne' ca' dxulusédene' bēnneache xrtizra' Dios. Ládujla benne' caní zaj zua Bernabé, ne Simón, bēnnea' léqueze' benne' gasaj, ne Lucio, benne' xezre Cirene, ne Manaén,

benne' gúalabe' Herodes, benne' xu'u lu ne'e xezr la xu Galilea na', ne Saulo. <sup>2</sup>Tu zra gate benne' caní zaj zre'e dxelúe lá'ane' Dios, ne dxelune' gubasa, Be' Lá'azxa gunné':

—Le cueaj Bernabé, ne Saulo chee xelune' zrin na' da gunnéa' le' xelune'.

<sup>3</sup>Chee le na', ca gudé buluchálajene' Dios, ne belune' gubasa, na' buluzé ne'e lawe' benne' ca', ne buluzé le' dizra'.

*Dxupa benne' gubáz ca' dxuluchálaje' dizra' chee Dios lu xezr la xu Chipre*

<sup>4</sup>Gudé na', ca gusel-la Be' Lá'azxa le', na' Bernabé, ne Saulo xjaque' xezre Seleucia naga gulu'e tu lu da dxedá lawe' nísadau' chee chjaque' lu xezr la xu da naxechaj nísadau' da nazí le na Chipre. <sup>5</sup>Gate belezrine' na', na' belexedxúaje' lu da dxedá lawe' nísadau' naga zua xezre Salamina, na' gulezú lawe' dxuluchálaje' dizra' chee Dios lu xudau' ca' chee benne' judío ca'. Juan zéajlequezebe' gubáz ca' chee gácalebe' le'. <sup>6</sup>Na' guledé' xúgute xézredu ca' da zaj nnita lu xezr la xu na', na' belezrine' xezre Pafos. Na' belexezrague' tu benne' judío le' Barjesús, naque' benne' wazrá'. Naque' tu benne' wen lazre' dxenné' dxuchálaje' waláz chee Dios. <sup>7</sup>Benne' wazrá' nigá zue' nen Sergio Paulo, benne' xu'u lu ne'e xezr la xu na', ne naque' benne' sina. Benne' xu'u lu ne'e xezr la xu na' gusel-le' benne' xeaíjné' Bernabé, ne Saulo lawe' da dxaca lazre' xenne' dizra' chee Dios. <sup>8</sup>Na' benne' wazrá' na', léqueze' Elimas gudábage' gubáz ca' lawe' da guca lazre' quebe chéajle chee Jesús benne' xu'u lu ne'e xezr la xu na'. <sup>9</sup>Nadxa Saulo, bénnea' léqueze' Pablo, zúale Be' Lá'azxa le', gunná' dxugüe' le', <sup>10</sup>na' guzre' le':

—Guzrí xe, benne' wen da calela. Zri'ine da xriwe', ne benne' dxusezxuj xrneza xúgute bénneache. ¿Bizr chee na' quebe dxusanu' dxusézxuju' neza chee benne' ca' dxelaca lazre' chjácalene' Xránantu'? <sup>11</sup>Na'a, Xránantu' gudé' lue' ba xa'. Xegá'anu' la chul-la, na' tu chí'iqueze quebe le'enu' xel-la' naxaní' chee gubizra.

Benne' na' guzúe' lu da chul-la, na' guzú lawe' dxílaje' nu xecá'a ne'e lawe' da québedxa dxel'éene'. <sup>12</sup>Gate ble'e benne' xu'u lu ne'e xezr la xu na' da nigá, na' guxéajle'e chee Jesús lawe' da bebáne' ca naca da dxusede Pablo ca naca chee Xránadxu.

*Pablo ne Bernabé dxelezrine' xezre Antioquia da nababa xezr la xu Pisidia*

<sup>13</sup>Pablo ne benne' ljwezre' ca' belú'e tu lu da dxedá lawe' nísadau' lu xezre Pafos na', na' belezrine' xezre Perge da nababa na xezr la xu Panfilia. Lu xezre na' Juan bsanbe' gubáz ca', na' bexíajbe' xezre Jerusalén. <sup>14</sup>Gudé na' gubáz ca' besiá'que' Perge, na' belezrine' xezre Antioquia da nababa na xezr la xu Pisidia. Lu xezre na', gate naca zra dxulupá'ana judío ca', gulu'e xudau' chee judío ca', na' gulebé'e. <sup>15</sup>Nadxa, ca gudé bululabe' lu xiche naga naxúaj da bdxixruij bea Moisés, ne da gulenná benne' ca' buluchálaje' waláz chee Dios, na' benne' xíchaje ca' chee xudau' na' gulesel-le' benne' xeaize' Pablo, ne Bernabé:

—Le'e, biche ljwézrentu', che nápaie dizra' da guzéajni'ile netu', waca nnele na na'a.

<sup>16</sup>Nadxa Pablo guxase', na' guchisa ne'e chee xelezúa zri benne' ca', na' gunné':

—Le xene le'e, benne' Israel, ne le'e dxezrébele Dios. <sup>17</sup>Dios chee xezre Israel guqu'é'e xra xrtáudxu ca', na' bene' benne' ca' tu cue' benne' zante

gate ne zaj zre'e ca benne' zitu' ca' lu xezr la xu Egipto, na' ca gudé na' bebéaje' le' lu xezr la xu na' duté xel-la' waca chee'. <sup>18</sup> Dios bchaga lawe' benne' ca' chua iza le'e xixre' lawe' lataj, <sup>19</sup> na' bzria xi'e gazre cue' bénneache gulezúa la xezr la xu Canaán, chee' bnézruje' xra xrtáudxu ca' xezr la xu chee' benne' ca'. <sup>20</sup> Gudé na', lawe' tapa gaxúa xra gachaj iza gunná be'e Dios benne' ca' lu na' benne' ca' buluchi'e chee', cadxa bzrin zra zua Samuel, benne' bchálaje' waláz chee' Dios. <sup>21</sup> Nadxa benne' ca' gulenabe' Dios sua tu benne' gaque' wenná bea chee', na' Dios bzu'e wenná bea tu benne' le' Saúl, zri'ine Cis, tu benne' chee' tu cue' benne' judío zaj naque' zri'ine zre sua Benjamín. Saúl nigá guque' wenná bea lawe' chua iza. <sup>22</sup> Gudé na' Dios begüe' Saúl lataj chee', na' bzu'e David gaque' wenná bea chee', na' chee' benne' nigá gunné': "Nezda' David, zri'ine Isai, naque' tu benne' dxuné' da dxezaca ba lazra', ne gune' xúgute da dxaca lazra'." <sup>23</sup> Tu benne' zri'ine zre sua David nigá naca Jesús, bénnea' bzua Dios chee' guselé' benne' Israel ca', ca ba guchebe lazre' chee' David. <sup>24</sup> Nédxudxa gate za xida Jesús, Juan bchálajlene' ca' naca benne' Israel ca', guzre' benne' ca' dxal-la' xelexebí'i lazre', ne xelexedxúe' nisa. <sup>25</sup> Na' gate ba za cheajsé chee' Juan, na' gunné': "Neda' quebe naca bénnea' dxéquele naca', san ca te chia' neda' za xetú benne' quebe naca chia' neda' cuéaja' zrele' da xu'u ni'e."

<sup>26</sup> 'Le'e, biche ljwezra', zri'ine zre sua Abraham, ne le'e dxezrébele Dios. Dios nasel-le' chee'le dizra' nigá chee' lale. <sup>27</sup> Benne' ca' gulezra' Jerusalén, ne benne' blau chee' ca', quebe belexúnbe'e nu na' Jesús, ne quebe guléajni'ine' dizra' da buluchalaj benne' ca' buluchálaje' waláz chee' Dios da dxellené' xúgute zra dxulupá'ane'. Ca' guca, benne' ca' belún líqueze' ca' naca da naxúaj na chee' Jesús gate gulechugue' chee' gatie'. <sup>28</sup> Lácala quebe belezrelne' tu da nabaga Jesús chee' xelútie' Le', gulenabe' lau Pilato nna bé'ene' gatie'. <sup>29</sup> Nadxa, gate gudé belune' xúgute da naxúaj na lu xiche chee' Dios ca' naca da dxal-la' gaca chee' Jesús, na' buluxulétaje' Le' xaga béguaj, ne bulucache' Le'. <sup>30</sup> Nadxa Dios bsebané' Le' ládujla benne' gate. <sup>31</sup> Lu zane' zra Jesús ble'e lawe' benne' ca' guledálene' Le' gate bezé'e Galilea dxeaje' Jerusalén, na' na'a, benne' caní dxelexechebe' ca' naca chee' lau bénneache.

<sup>32</sup> 'Cá'aqueze netu' dxuzénetu' le'e dizra' chawe' ca' naca da guchebe lazre' Dios lau xra xrtáudxu ca'. <sup>33</sup> Ben lie' ca' naca da guchebe lazre' cheedxu dxi'u, nácadxu zri'ine zre sua benne' ca', gate bsebané' Jesús, ca' naxúaj gudxupe' salmo, dxenné': "Lue' nacu' zri'ina'. Neda' bzua' Lue' na'a." <sup>34</sup> Dios blé'ene' gusebané' Le' ládujla benne' gate, chee' quebe guzru bel-la' dxen chee' gate gunné' lu xiche chee': "Gunna' le'e da chawe' da guchebe lazra' lau David." <sup>35</sup> Cá'aqueze dxenné' xetú lu salmo: "Quebe gu'u lataj guzru bel-la' dxen chee' wen zrin chiu', bi nazri'ite' lazru'." <sup>36</sup> Da li David bene' zrin chee' benne' ca' zaj zre'e gate zua le', ca' gunná be'e Dios le', san ca gudé na' gutie', na' bulucache' le' naga belegache xra xrtawe' ca', na' guzru bel-la' dxen chee'. <sup>37</sup> Quebe guzru bel-la' dxen chee' Bénnea' bsebán Dios Le'. <sup>38</sup> Biche ljwezra', dxuzenda' le'e, dxal-la' nézele Dios gunite lawe' chee' dul-la' chee'le ne chee' Jesús. <sup>39</sup> Ne chee' Le', xúgute benne' dxeajlí lazre' Le', Dios dxunite lawe' chee' benne' ca' ca' naca xúgute da quebe guca gunite lawe' chee' lácala belune' ca' naca da bdxixruj be'e Moisés. <sup>40</sup> Le' guxúe xanne' cúnale chee' quebe gaca chee'le ca' naca da buluzúaj benne' ca' buluchálaje' waláz chee' Dios, gate

gulenné':

<sup>41</sup> Le nna', le'e, benne' wen la, ne le xebane, ne le xenite, lawe' da guna' neda', Dios chee, lu zra chee, lu da naca da zrente, da quebe chéajle lácala nu guzén le'e.

<sup>42</sup> Gate Pablo ne benne' ljwezre' ca' belexedxúaje' lu xudau' chee judío ca', na' benne' ca' quebe zaj nálaje' judío gulenabe' le' guchálajlene' le' chee da caní gate zrin xetú zra dxulupá'ane'. <sup>43</sup> Gate belexedxúaje' lu xudau' na', benne' zan benne' judío ca', ne benne' ca' belexaque' judío, ne dxelune' da naca chee Dios, xjácalene' Pablo ne Bernabé. Gubáz caní buluzéajni'ing' benne' ca' dxal-la' xelezúa chache' lu xel-la' zri'i lazre' chee Dios.

<sup>44</sup> Guledé xrunu' zra gate naca zra dxulupá'ane', belezraga ca nácaqueze benne' zaj zre'e xezre na' chee xelenne' dizra' chee Dios. <sup>45</sup> Gate benne' judío ca' belelé'ene' benne' zante zaj nazrague' na', na' belaque' xa lazre' ne gulezú lawe' dxelenné' chee da dxenná Pablo, ne gulenné' schanni' chee'. <sup>46</sup> Nadxa Pablo ne Bernabé gulenné' du lazre', gulé'e benne' judío ca':

—Ben na ba xen bzéentu' le'e nedxu dizra' chee Dios, le'e nácale judío, san lawe' da quebe dxaca lázrele xénele, ne da dxunle dxulé'e na quebe naca chee gápale xel-la' nabán zeajlí canna, chee le na' chéajntu' na'a chálajntu' benne' quebe zaj naque' judío. <sup>47</sup> Caní guntu' lawe' da caní gunná bea Xránadxu gate gunné':

Bzua' Lue' ca tu xi' da gusení na benne' xezr la xu ca',

ne chee gacu' weselá chee bénneache zaj zre'e ca naca xezr la xu.

<sup>48</sup> Gate belenne' da nigá, benne' quebe zaj naque' judío gulebéle'ene', na' gulezú lawe' dxelenné' xrlátaje naca dizra' chee Xránadxu, na' guléajle xúguté benne' ca' ba nabéaj Dios chee xelape' xel-la' nabán zeajlí canna. <sup>49</sup> Ca' guca, bzriluj dizra' chee Dios du ca naca lu xezre ca' zaj nababa na'. <sup>50</sup> Benne' judío ca' buluchálajlene' bal-la nu'ula blau ca' zjácalene' da dxulusédene' chee Dios, ne benne' biu blau ca' chee xezre, na' gulegú'u xel-le' benne' ca' chee xeláu zi' xuzre' Pablo, ne Bernabé, ne chee xuluxulague' le' naga nababa na'. <sup>51</sup> Nadxa gubáz ca' belexebibe' bxrte xu da zeajzria na zrele' da dxulé'e na zaj nabaga benne' ca' zria, na' xjaque' lu xezre Iconio. <sup>52</sup> Gulebéle'e benne' zaj zre'e Antioquia na', benne' dxeléajle'e chee Jesús, zúale Be' Lá'azxa le'.

## 14

*Da belún Pablo ne Bernabé lu xezre Iconio*

<sup>1</sup> Gate belezrin Pablo ne Bernabé xezre Iconio, na' belú'e tu zrente lu xudau' chee judío ca', na' ca buluchálaje' dizra' chee Dios, benne' zante guléajle'e chee Jesús, benne' judío ca', ne benne' quebe zaj naque' judío.

<sup>2</sup> Nadxa benne' judío ca', benne' quebe dxeléajle'e chee Jesús belegú'u xel-le' benne' quebe zaj naque' judío chee xelecuídene' biche ljwézredxu ca'. <sup>3</sup> Lácala belune' caní, benne' gubáz ca' gulezúaqueze' na' zane' zra, ne du lazre' buluchálaje' dizra' chee Dios, dxuluxrén lazre' Xránadxu, na' Xránadxu bzua chúchue' ca da dxelenná benne' gubáz ca' ca naca xel-la' zri'i lazre' chee Dios, na' Le' bnézruje' gubáz ca' xel-la' dxenná bea xelune' xel-la' waca ca' chee xabáa ne da dxelunna bea na naca da li da dxelenné'. <sup>4</sup> Benne' ca' zaj zre'e xezre na' gulaque' chupa la'a. Bal-le' beledé'e judío ca', na' xebal-le' beledé'e gubáz ca' chee Jesús. <sup>5</sup> Nadxa

benne' judío ca', ne benne' quebe zaj naque' judío belune' tuze dizra' nen benne' xu'u lawe' ca' chee gulenné' schanni' chee benne' gubáz ca', na' gulaca lazre' xuluzríe' le' xiaj. <sup>6</sup> Pablo ne Bernabé, gate belenne' ca', buluzrúnajé' zjaque' naga zaj dxe' xezre Listra, ne xezre Derbe, da zaj nababa Licaonia, na' guledé' ca' naca xézredu ca' chee xezre ca' zaj nababa na', <sup>7</sup> na' buluchálaje' na' ca' naca dizra' chawe' chee Jesús.

*Dxuluzríe' Pablo xiaj lu xezre Listra*

<sup>8</sup> Lu xezre Listra zua tu benne' nazrinnaj ni'e. Dxe'e na' lawe' da gúlaje' nazrinnaj ni'e, ne quebe dxácaqueze se'e. <sup>9</sup> Benne' nigá dxenne' da dxuchalaj Pablo, na' Pablo gunné'e benne' zrinnaj na', na' guque bé'ene' napé' xel-la' dxeajlí lazre' chee xexaque'. <sup>10</sup> Nadxa Pablo gunné' zizraj:

—Guzé ni'u.

Benne' na' guxase' guzete', na' guzú lawe' dxedé'. <sup>11</sup> Gate belelé'e benne' ca' da ben Pablo, na' gulezú lawe' dxelenné' zizraj nen dizra' walazre' chee benne' Licaonia, dxelenné':

—Dios ca' zaj naca ca' bènneache ba belelé'e naga zúadxu.

<sup>12</sup> Dxelenné' naca Bernabé dios Júpiter, ne naca Pablo dios Mercurio lawe' da dxuchálajqueze Pablo. <sup>13</sup> Na' bxruze chee dios Júpiter, zua xudau' chee na' ca' dxú'udxu xezre na', guché'e bezre ca' ne xiaj zaj nuzé'e na' du, na' bxruze na', ne benne' zan ca' gulaca lazre' xuluxucá'ana szrene' benne' gubáz ca', ne xelútié' bejr ca' lau benne' gubáz ca' ca' dxelúnqueze benne' xezre Listra na' chee dios chee'. <sup>14</sup> Gate guleque be'e Bernabé ne Pablo, benne' gubáz ca', na' gulecheze' zra lane' da dxulé'e na' dxelezrebe' bi gun Dios, na' gulu'e lálwela benne' ca', dxelenné' zizraj:

<sup>15</sup> —Le'e, benne', ¿bizr chee na' dxunle da nigá? Netu' nácantu' bènneache ca' lé'equeze, ne za'ntu' nigá chee xentu' le'e dxal-la' gusanle québedxa gunle da caní da quebe bi zaca na, ne chéajle chee Dios ban, Bénnea' bene' xabáa ne xezr la xu, ne nísadau', ne xúgute' da de' lu'ule na. <sup>16</sup> Lu iza da ba guledé Dios be'e lataj xúgute' bènneache guledé' lu xrneza cha chee', na' belune' ca' da gulaca lazre', <sup>17</sup> lálcala blé'equezne' benne' ca' nu naca Le' ne chee da chawe' da dxune' chee benne' ca'. Le' dxusel-la' xiuj cheedxu ne ca' naca lina xrtante, ne dxunne' da dxechínedxu da gágudxu, ne chee bedxu.

<sup>18</sup> Lálcala gulenná gubáz ca' da nigá, gúcale'e na' stebe buluzague' benne' ca' chee quebe xelútié' bejr ca' lau le' chee xuluxucá'ana szrene' le'.

<sup>19</sup> Gudé na' belezrín bal-la benne' judío, benne' Antioquia, ne benne' Iconio, na' belegú'u xel-le' bènneache ca', na' buluzríe' Pablo xiaj. Guléquene' ba belutié' Pablo, na' gulezrube xue' le' belebéajé' le' xezre na'. <sup>20</sup> Gate benne' ca' dxeléajle'e chee Jesús belezrague' zaj naxéchajé' naga de' Pablo, na' bexasa le', ne bexu'e xezre na', na' zra xula bezá'lene' Bernabé, zjaque' xezre Derbe.

<sup>21</sup> Ca' gudé bchálaje' dizra' chawe' chee Jesús lu xezre Derbe, naga benne' zante gulezí' lu ne'e dizra' chee Dios, na' gubáz ca' belexedé' xezre Listra, ne xezre Iconio, ne xezre Antioquia. <sup>22</sup> Lu xezre caní belún chache' lázrdau benne' ca' dxeléajle'e chee Jesús, ne bulusízrene' le' chjálalene' da naca chee Dios, dxelé'e le':

—Benne' xelu'e naga dxenná bea Dios, xel-la' zi' zrente xeledé'.

<sup>23</sup> La gázqueze buluzúe' benne' gula ca' chee xuluxúe' tu tu cue' benne' ca' dxeléajle'e chee Jesús, na' ca' gudé na' buluzré'e benne' ca' lu na' Xránadxu, Bénnea' ba guléajle'e chee'.

*Pablo ne Bernabé dxelexezrine' lu xezre Antioquía da nababa Siria*

<sup>24</sup> Ca gudé na' belexedé' naga nababa Pisidia, na' belezrine' naga nababa Panfilia. <sup>25</sup> Buluchálaje' dizra' chee Dios lu xezre Perge, na' ca gudé na' xjaque' xezre Atalia. <sup>26</sup> Na' belexú'e da dxedá lawe' nísadau', na' belexezrine' xezre Antioquía, naga zaj zra' benne' belegu'e gubáz ca' lu na' Dios chee xelune' zrin na', da ba belezueñe' na'a. <sup>27</sup> Gate belezrine' Antioquía na', na' bulutupe' benne' ca' dxeléajle'e chee Jesús, ne buluzenne' benne' ca' xúgute da ba ben Dios, bchínene' gubáz ca', ne ca ben Xránadxu, be'e benne' quebe zaj naque' judío lataj xeléajle'e chee Jesús. <sup>28</sup> Na' Pablo, ne Bernabé belexegá'ane' na' zane' beu' nen benne' ca' dxeléajle'e chee Jesús.

## 15

*Gubáz ca' chee Jesús dxelexezrague' Jerusalén*

<sup>1</sup> Ca lu zra ca', bal-la benne' gusiá'que' xezre ca' zaj nababa Judea, ne belezrine' xezre Antioquía na', na' gulezú lawe' dxelé'e biche ljwézredxu ca' dxal-la' chugu late' weaj belá' chee bel-la' dxen chee benne' biu ca' chee xeelé', ca gunná bea Moisés. <sup>2</sup> Pablo ne Bernabé bulutíl-lalé'e le' dizra', na' naga xeajche'te na, biche ljwézredxu ca' buluzú' Pablo, ne Bernabé, ne xezícala benne' ca' chee chjaque' Jerusalén chee cheajlechálaje' chee da nigá nen benne' gubáz ca', ne benne' gula ca' chee cue' benne' dxeléajle'e chee Jesús zaj zre'e Jerusalén.

<sup>3</sup> Benne' dxeléajle'e chee Jesús, benne' zaj zre'e Antioquía, belexegu'e benne' caní neza, na' belexedé' xezre ca' zaj nababa Fenicia, ne xezre ca' zaj nababa Samaria, na' dxuluzenne' benne' xézredu ca' ca belún benne' quebe zaj naque' judío, ba belexexaque' chee Dios, na' xúgute biche ljwézredxu belebéle'ene' gate belenne' da nigá.

<sup>4</sup> Gate Pablo ne Bernabé belexezrine' Jerusalén, na' benne' ca' dxeléajle'e chee Jesús ne benne' gubáz ca', ne benne' gula ca' gulez'í lu ne'e le', na' Pablo ne Bernabé buluzenne' le' ca naca da ben Dios lu na' le'. <sup>5</sup> Bal-la benne' fariseo ca', benne' ba guléajle'e chee Jesús, gulez'é gulenné':

—Dxun na ba xen chugu late' weaj belá' chee bel-la' dxen chee benne' biu ca', benne' ba guléajle'e chee Jesús, benne' quebe zaj naque' judío, ne nna be'edxu le' xuluzú'e dizra' da bdxixruj be'e Moisés.

<sup>6</sup> Nadxa belezruga benne' gubáz ca' ne benne' gula ca', benne' dxeléajle'e chee Cristo, chee xulucá'ana chawe' da na' dxaca. <sup>7</sup> Ca gudé buluchálajle ljwezre' chee da nigá, na' Pedro guxase', ne guzre' benne' ca':

—Biche ljwezra', nézquezle le'e Dios guqu'é'e neda' nédxute ládujla le'e chee guzenda' benne' quebe zaj naque' judío dizra' chawe' ca naca chee Jesús, chee xeléajle benne' ca' chee Le'. <sup>8</sup> Dios nézene' ca naca da xu'u lu xichaj lázxdau béneache, na' blé'ene' dxezí' lu ne'e benne' ca', lawe' da bnézruje' benne' ca' Be' Lá'azxa ca bene' cheedxu dxi'u. <sup>9</sup> Dios quebe dxuché'e ca zrí'ing' tudxu xetudxu lawe' da bca'ana cháwequeze' lázxdau benne' ca' guleajlí lazre' Jesús. <sup>10</sup> Na'a, ¿bizr chee na' dxaca lázrele le'e guchale ca da ba ben Dios, dxuzúale tu xua' lawe' benne' ca' dxeléajle'e chee Jesús, da quebe gaca gúadxu dxi'u, ne quebe guca xelúa xra xrtáudxu na? <sup>11</sup> Na'a, dxéajledxu dxi'u bache naládxu ne chee xel-la' zrí'i lazre' chee Xránadxu Jesús, ne cá'anqueze zaj nalá benne' ca'.

12 Nadxa xúgute' gulezúa zrie', ne buluzé nague' dxácaté dxuchalaj Pablo ne Bernabé ca naca da ben Dios, bene' da zan da dxelunna bea na naca li xrtizre' nen xel-la' waca ca' da za xabáa, da ca' bene' lu na' Pablo ne Bernabé lálwela benne' ca' quebe zaj naque' judío. 13 Gate bexuzre buluchálaje', na' gunná Jacobo:

—Biche ljwezra', le xene chia'. 14 Simón Pedro bzenne' dxi'u ca ben Dios, be'e lataj benne' ca' quebe zaj naca judío xelexexaque' chee' da nedxu lasa, beque'e ládújla benne' ca' bènneache xelexexaque' chee'. 15 Da na' guca naca na tuze nen da buluzúaj benne' ca' buluchálaje' waláz chee Dios, da na' naxúaj na lu xiche chee Dios, dxenné':

16 Te nigá xelá'a

na' xechisa' ca naca lizre David da nazre'e.

Gucá'ana chawa' da nagá'ana chee na,

na' xechísaqueza' na,

17 chee xelexílaj xúgute' benne' xezica ca' Xrané' Dios,

ne cá'anqueze xelún xúgute' benne' zaj zra' xezr la xu ca',

benne' ca' xelenne' chee La' neda'.

18 Ca' dxenná Xránadxu, blé'ene' da nigá nédxudaute.

19 'Chee le' na' dxapa' le'e quebe dxal-la' gunle zede benne' quebe zaj naque' judío, benne' ca' dxelexexaque' chee Dios. 20 Dخال-la' guzúajntu' chee benne' ca' dxal-la' xulusane' da naca chee bedáu' xaga ca' u bedáu' xiaj, ne quebe dxal-la' xelune' dul-la chee da dxucá'ana sban bènneache, ne quebe dxal-la' xelawe' belá' chee be xixre', be quebe bdxuaj dxen, ne quebe dxal-la' xelawe' dxen cheeba'. 21 Caní dxal-la' xelune' lawe' da ca ni'i zaj zra' benne' tu tu xezre, benne' dxuluzenne' bènneache ca naca da bdxixruj bea Moisés, da na' dxululabe' lu xudau' ca' chee benne' judío ca' tu tu zra ca' dxulupá'ane'.

22 Nadxa benne' gubáz ca', ne benne' gula ca', ne xúgute' benne' dx-eléajle'e chee Jesús belune' tuze dizra' xeleque'e bal-la benne' ca' ládújla le' ne xelesel-le' le' xezre Antioquía nen Pablo, ne Bernabé. Beleque'e Judas, bènnea' léqueze' Barsabás, ne Silas. Chupa benne' caní zaj naque' benne' blau ládújla biche ljwézredxu ca'. 23 Bulugüé'e benne' ca' tu xiche da dxenná na: "Netu', benne' gubáz zrantu' nigá, ne benne' gula zrantu' nigá, ne biche ljwézrele zrantu' nigá, dxugápantu' le'e diuzre, biche ljwézrentu' quebe nácale judío, zrale xezre Antioquía, ne le'e zrale xezre ca' zaj nababa Siria, ne xezre ca' zaj nababa Cilicia. 24 Ba bènentu' bal-la benne' ba besiá'que' nigá, ne quebe nasél-lantu' netu' le', na' belune' le'e zede nen dizra' da buluchálaje', ne belún zréajene' le'e, dxelenné' dxal-la' chugu late' weaj belá' chee bel-la' dxen chee, benne' biu ca', ne chéajlele ca naca da bdxixruj be'e Moisés. 25 Chee le' na' dxéquentu' naca xrlátaje cá'antu' bal-la benne' ládújla netu' chee xeelé'e xedajlenné'e le'e nen biche ljwézredxu Bernabé ne Pablo, benne' ca' nazri'i lázre'gentu'.

26 Benne' caní belune' zrin chee Xránadxu Jesucristo, xjaque' lu da stebe naga gulaca lazre' bènneache xelútié' le'. 27 Ca' naca na, dxesél-lantu' naga zúale Judas ne Silas, na' benne' caní xuluchálajlene' le'e ca naca chee da nigá. 28 Guque Be' Lá'azxa xrlátaje, ne cá'anqueze netu' gúquentu' xrlátaje quebe bi xua' guzúantu' lawe' le'e, san da canize dxun na ba xen gunle. 29 Dخال-la' gusanle da naca chee bedáu' xaga, ne bedáu' xiaj ca', ne quebe dxal-la' gunle dul-la chee da dxucá'ana sban bènneache, ne quebe dxal-la' gágule belá' chee be xixre', be quebe bdxuaj dxen, ne quebe dxal-la' gágule



dxen cheeba'. Che gunle ca naca da nadxixruj bea caní, gunle xrlátaje. Dxenábantu' lau Dios gaca chawe' cheele."

<sup>30</sup> Nadxa benne' ca' gulesel-le' xjaque' xezre Antioquia. Na' buluchague' benne' ca' zaj naque' chee Dios, ne bulunézruje' le' xiche na'. <sup>31</sup> Gate biche ljwézredxu ca' bululabe' na, na' gulebéle' ene' lawe' da dxue zren na le'. <sup>32</sup> Judas ne Silas zaj naque' benne' dxelenné' waláz chee Dios. Chee le' na' buluchálajlene' biche ljwézredxu ca', belúe zrene' le', ne bulutipe' lazre' le'. <sup>33</sup> Gate gudé guca tu chi'i zaj zre'e na', na' benne' bíchedxu ca' buluzé' benne' ca' dizra', ne gulenabe' Dios sua xel-la' dxebeza zri lazre' nen benne' ca', chee xesí'aque' xelexezrine' naga zaj zra' benne' ca' gulesel-le' le'. <sup>34</sup> Silas gúquene' xrlátaje xegá'ane' na'. <sup>35</sup> Cá'aqueze Pablo, ne Bernabé belexegá'ane' lu xezre Antioquia, na' tu zren nen benne' zandxa gulezúe' dxulusédené' bénneache, ne dxuluchálaje' ca naca dizra' chee Xránadxu.

*Dxezú lau Pablo zéaje' zitu' da gudxupe' lasa guchálaje' chee Jesús*

<sup>36</sup> Ca gudé na', Pablo guzre' Bernabé:

—Xu'u xecha lasa cheajnnadxu biche ljwézredxu ca' zaj zre'e xúgute xezre ca' naga xeajchálajdxu dizra' chee Xránadxu, chee cheajnnadxu aja dxaca zaj zre'e.

<sup>37</sup> Bernabé guca lazre' che'e Juan nen le', bi na' léquezebe' Marcos, <sup>38</sup> san Pablo quebe guxáza lazre' che'e-be' lawe' da bsanbe' benne' ca' gate zaj zre'e xezre ca' zaj nababa Panfilia, ne québedxa guxíajlebe' le' lu zrin chee Xránadxu. <sup>39</sup> Na' Pablo, ne Bernabé bulutil-la ljwezre' dizra'. Ca'an guca, belexela'a cha chee'. Bernabé guché'e Marcos, na' gulu'e tu lu da dxedá lawe' nísadau', na' xjaque' Chipre. <sup>40</sup> Na' Pablo guqué'e Silas, na' ca gudé biche ljwézredxu ca' belegü'e Pablo ne Silas lu na' Xránadxu chee gune' da chawe' chee benne' ca', <sup>41</sup> na' gusiá'que', ne guledé'e xezre ca' zaj nababa Siria, ne xezre ca' zaj nababa Cilicia, na' bulutipe' lazre' bi bíchedxu ca'.

## 16

*Timoteo dxéajlebe' Pablo ne Bernabé*

<sup>1</sup> Pablo ne Silas belezrine' xezre Derbe, ne xezre Listra naga belexezrage' tu benne' cuide' dxéajlebe' chee Jesús, lebe' Timoteo, zri'ine tu nu'ula judío dxéajle'e chee Jesús, san xrabe' naque' benne' griego. <sup>2</sup> Bi bíchedxu zaj zre'e xezre Listra, ne xezre Iconio dxelenné' xrlátaje dxgua dxunbe'. <sup>3</sup> Pablo guca lazre' chéajle Timoteo le', na' guchugue' late' belá' chee bel-la' dxen cheebe' ca dxenná bea da bdxixruj be'e Moisés, chee quebe xelezrá'a benne' judío ca' zaj zre'e naga nababa na lawe' da zaj neze xúgute benne' ca' naca xra Timoteo benne' griego. <sup>4</sup> Lu xúgute xezre naga dxeledé'e buluzenne' benne' bíchedxu ca' ca naca da zaj nadxixruj bea na belún benne' gubáz ca', ne benne' gula ca' zaj zre'e Jerusalén. <sup>5</sup> Ca'an guca bi bíchedxu ca' gulezúa chúchue' ca dxeajlíl lazre' Jesús, na' benne' ca' dxeléajle'e chee', tu zra tu zra zeajte dxelane'.

*Dxele'e Pablo tu da ble'e Dios le', dxelé'ene' tu benne' Macedonia*

<sup>6</sup> Be' Lá'azxa quebe be'e benne' gubáz ca' lataj xuluchálaje' dizra' chee Dios naga nababa Asia. Chee le' na' guledé'e naga nababa Frigia, ne xezre ca' zaj nababa Galacia. <sup>7</sup> Belezrine' naga nazraga xezre ca' zaj nababa Misia. Gulaca lazre' chjaque' naga nababa Bitinia, san Be' Lá'azxa

chee Jesús quebe be'e le' lataj. <sup>8</sup> Nadxa guledé'e naga nababa Misia, na' belezrine' xezre Troas. <sup>9</sup> Lu xezre na' Pablo blé'ene' tu da ba ble'e Dios le' chizrela, blé'ene' tu benne' biu chee ga nababa Macedonia, ze' dxata' xuene' Pablo, dxenné': "Gudá Macedonia nigá, gácalenu' netu'." <sup>10</sup> Gate ble'e Pablo da nigá, na' benne' ca', ne neda', Lucas, la gudíajtentu' ájala guntu' chee chéajntu' ga nababa Macedonia lawe' da gúquequezentu' Dios dxenné' netu' chee cheajchálajntu' benne' ca' dizra' chawe' ca naca chee Jesús.

*Pablo ne Silas dxelezrine' ciudad Filipos*

<sup>11</sup> Lu xezre Troas na' guxú'untu' tu lu da dxedá lawe' nísadau', na' guxéajntu' tu xezr la xu da naxechaj nísadau', nazí le na Samotracia, na' zra xula bzrintu' xezre Neápolis. <sup>12</sup> Beza'ntu' Neápolis, na' bzrintu' xezre Filipos, da naca tu xezre naga zaj zra' benne' Roma, ne naca xezre blau ga nababa Macedonia. Lu xezre na' guzú'antu' tu chupa zra. <sup>13</sup> Gate naca zra dxulupá'ana judío ca', na' bdxúajntu' dxu'a xezre na', ne bzrintu' dxu'a xegu naga zaj nabéaje' dxeajlechálajlene' Dios. Gudxe'ntu' na' ne bchálajntu' nu'ula ca' zaj nazrague' na' ca naca dizra' chawe' ca naca chee Jesús. <sup>14</sup> Tu nu'ula ca' le' Lidia, naque' nu'ula chee xezre Tiatira, nu'ula dxute' ladxe' zaca da naca bzawe. Nu'ula nigá zéajlene' da naca chee Dios, na' benne' cheentu', na' Xránadxu bzani'e' lázrdawe' chee guzú' lu ne'e da dxuchalaj Pablo. <sup>15</sup> Na' bdxue nisa nu'ula nigá nen benne' zaj zre'e lizre'. Gudé na' guta' xuene' netu', gunné':

—Che le'e dxéquele da li dxeajlí lazra' Xránadxu, le da súale lizra'.

Na' bene' ba xuzre begá'anantu' na'.

<sup>16</sup> Tu zra gate zéajntu' naga zeajchálajntu' Dios, bezragantu' tu bi nu'ula cuide' xu'ube' be' xriwe', ne dxenné' xa'abe' ne chee be' xriwe' na'. Bi nu'ula nigá xú'ube' lu na' benne' ca' dxuluchíne' lebe' xadía, na' xránabe' ca' dxelezíle'e dumí da dxezibe', dxenné' xa'abe'. <sup>17</sup> Bi nu'ula nigá guzú' laube' za'be' cuzru Pablo ne netu', dxennabe' zizraj:

—Benne' caní dxelune' zrin chee Dios szrente, ne dxuluzenne' le'e ájala gunle lale.

<sup>18</sup> Zane' zra benbe' caní cadxa guque Pablo zede, na' bexéchaje', ne guzre' be' xriwe' da xu'ube':

—Lu La Jesucristo dxenná be'eda' lue' xedxúaju' lu bel-la' dxen chee bi nu'ula nigá.

Na' be' xriwe' na' bedxúajte na.

<sup>19</sup> Gate benne' ca' dxuluchíne' -be' xadía guleque bé'ene' québedxa bi xelexezi'e ne cheebe', na' gulel-le' Pablo ne Silas, na' guleché'e benne' caní lau benne' xu'u lawe' naga zua chale'aj xu'u lawe' blau. <sup>20</sup> Na' buluzúe' benne' caní lau benne' xu'u lawe' ca', na' gulenné':

—Benne' caní zaj naque' judío ne dxelún zrájene' benne' zaj zre'e xezre cheedxu, <sup>21</sup> ne dxulusédené' ca naca da zjácálene', da quebe gaca sidxu, ne quebe gaca gundxu na lawe' da nábabadxu Roma.

<sup>22</sup> Nadxa benne' zaj zre'e xezre na' guledábague' Pablo ne Silas, na' benne' xu'u lawe' na' gulenná be'e xelexéchaje' zra lana Pablo ne Silas, ne xelu'e le' zrise. <sup>23</sup> Ca gudé belúele'e le', na' buluzré'e le' lizre xia, ne gulenná bé'ene' benne' xu'u lu ne'e lizre xia na' guxúe xánnie' benne' ca'. <sup>24</sup> Gate benne' ca' gulenná be'e, na' bzre'e le' zane' lézxdxa ne bzre'e ni'a benne' ca' lu xedxu chee cuaga da dxuxru na ni'e.

<sup>25</sup> Gate gula dxela Pablo ne Silas dxuluchálajlene' Dios, ne dxelul-le' da dxelúe lá'ane' Dios, na' xezícadxa benne' zaj zre'e lizre xia dxuluzé nague' chee'. <sup>26</sup> La' na'te guzrú'le'e da bxrize na ca naca lizre xia, na' belexalaj xúgute dxa xu'u ca', ne belexeze du xia da zaj nadxéaj ni'a xúgute benne' ca' zaj zre'e lizre xia. <sup>27</sup> Na' benne' xu'u lu ne'e lizre xia na' bebane', ne gate blé'ene' zaj naxalaj dxa xu'u ca' chee lizre xia, gúlaje' xia chee xute cuine' lawe' da dxéquene' ba buluxuzrúnna' benne' ca' zaj zre'e lizre xia. <sup>28</sup> Pablo gudxezre xe'e, guzre' le':

—Quebe bi gune cinu'. Xúgute'ntu' zúantu' nigá.

<sup>29</sup> Nadxa benne' na' xu'u lu ne'e lizre xia gunabe' tu xi', na' guxú'u chégüe', dxezrízequeze' xel-la' dxezrebe, na' bzu zribe' lau Pablo ne Silas.

<sup>30</sup> Nadxa guléaje' benne' ca' ne bchebe' le':

—Le'e, benne', ¿bizra dxal-la' guna' chee la'?

<sup>31</sup> Benne' ca' belexechebe':

—Guxéajle chee Xránadxu Jesucristo, na' lau', ne cá'aqueze benne' zaj zre'e lizru'.

<sup>32</sup> Na' buluchálajlene' le', ne xúgute benne' zaj zre'e lizre' ca naca dizra' chee Xránadxu. <sup>33</sup> Lu xela ná'queze benne' na' xu'u lu ne'e lizre xia gudibe' we' chee Pablo ne Silas, na' ca gudé na', le' ne xúgute benne' zaj zre'e lizre' guledxúe' nisa. <sup>34</sup> Ca gudé na' beche'e Pablo ne Silas lizre', na' bnézruje' da gulawe', na' le' ne benne' zaj zre'e lizre' gulebé'ene' lawe' da ba guléajle' chee Dios.

<sup>35</sup> Che zílala benne' xu'u lawe' ca' gulesel-le' bi xra'aga lau benne' na' xu'u lu ne'e lizre xia, ne gulenná bé'ene' le' gusané' Pablo ne Silas.

<sup>36</sup> Nadxa benne' na' xu'u lu ne'e lizre xia guzre' Pablo:

—Benne' xu'u lawe' ca' gulenná bé'ene' neda' gusana' le'e. Na'a waca xedxúajle du lázrele.

<sup>37</sup> Pablo guzre' bi xra'aga ca':

—Netu' nabáantu' Roma, na' belú'e netu' lávela benne' xezre ca', ne quebe ne xuluchí'e cheentu', na' buluzré'e netu' lizre xia. Na'a ¿dxeléquene' xulusane' netu' bagácheze? Quebe gaca. Xelída léqueze' xelexebéaje' netu'.

<sup>38</sup> Bi xra'aga ca' xeajlexezénnebe' benne' xu'u lawe' ca', na' benne' caní belezrebe' gate guleque bé'ene' Pablo ne Silas zaj nababe' Roma.

<sup>39</sup> Na' xjaque' lizre xia na', ne gulenabe' Pablo ne Silas xelezí zrene' chee'. Nadxa belexebéaje' le', ne gulata' xuene' le' xelexedxúaje' xezre na'.

<sup>40</sup> Gate Pablo ne Silas belexedxúaje' lizre xia na', na' xjaque' lizre Lidia, na' ca gudé buluchálajlene' biche ljwézredxu ca', ne bulutipe' lazre', na' besía'que'.

## 17

### *Benne' zaj zre'e xezre Tesalónica dxeledábage' Pablo*

<sup>1</sup> Nadxa Pablo ne Silas guledé' xezre Anfípolis, ne xezre Apolonia, na' belezrine' xezre Tesalónica, naga zua tu xudau' chee judío ca'. <sup>2</sup> Pablo guxíaje' xudau' na', na' ca dxúnqueze' bchálajlene' benne' ca' tu tu zra dxulupá'ane' du chunna da gazre zra. <sup>3</sup> Ca da naxúaj na lu xiche chee Dios, bzéajni'ine' le' ben na ba xen Cristo guz' guzaque', ne gutie', na' ca gudé na' ben na ba xen bebane' ládujla benne' gate. Na' guzre' benne' ca':

—Jesús nigáqueze, bénnea' dxuzenda' le'e chee', naque' Cristo, Bénnea' guchebe lazre' Dios sel-le'.

<sup>4</sup> Nadxa bal-la benne' judío ca' guléajlë'e cheë Jesús, ne gulaque' tuze Pablo ne Silas. La gázqueze guléajlë benne' zan benne' griego, ne nu'ula zan zaj naque' nu'ula blau. <sup>5</sup> Benne' judío ca', benne' quebe dxeléajlë'e cheë Jesús gulaque' xa lazre' cheë Pablo, na' buluchague' bal-la benne' ca' dxelune' da calela dxeledaze', ne bulutupa ljwezre', na' buluzúe' stebe ca naca benne' xezre. Gulu'e xadía lizre Jasón, dxelexílajë' Pablo ne Silas, cheë xelebéajë' le', ne xuludéë' le' lu na' benne' xezre ca'. <sup>6</sup> Gate quebe belexezrelne' Pablo ne Silas lu xu'u na', nadxa beleché'e xadía Jasón ne xebal-la biche ljwézredxu ca' lau benne' xu'u lawe' ca' cheë xezre, na' dxelebezre xe'e, dxeleenne':

—Benne' ca', benne' ba belún zréajene' ca naca benne' zaj zré'e xezr la xu, cá'aqueze ba belelé'e nigá. <sup>7</sup> Jasón nigá ba gulu'e benne' ca' lizre'. Ca naca benne' ca' dxeledábague' da bdxixruij bea César lawe' da dxeleenne' zua xetú wenná bea, tu benne' le' Jesús.

<sup>8</sup> Gate belenne' da caní, na' benne' xezre ca', ne benne' xu'u lawe' ca' gulezúe' stebe. <sup>9</sup> Jasón, ne biche ljwézredxu ca' bulucá'ane' dumí cheë gulezú'e lataj, na' benne' xu'u lawe' ca' bulusanë' le'.

*Pablo ne Silas dxelezrine' xezre Berea*

<sup>10</sup> Nadxa biche ljwézredxu gulé'e Pablo ne Silas cheë xesí'aque' chizrela, cheë chjaque' xezre Berea. Gate belezrine' na', na' belú'e lu xudau' cheë judío ca'. <sup>11</sup> Benne' judío caní zaj nácadxe' zren lazre' ca benne' Tesalónica ca' lawe' da du lazre' gulezú'e dizra' cheë Dios, na' tu zra tu zra dxululabë' lu xiche cheë Dios cheë xuluxúe' che naca da li da dxelé'e le'. <sup>12</sup> Ca'an guca, benne' zan benne' judío ca' guléajlë'e cheë Jesús, ne cá'aqueze benne' griego. Benne' zan guléajlë'e, nu'ula blau ca', ne benne' biu ca'. <sup>13</sup> Gate benne' judío ca' zaj zré'e xezre Tesalónica guleque bé'ene' dxuchalaj Pablo dizra' cheë Dios lu xezre Berea, na' belezrine' na', ne gulegú'u xel-le' bënneache cheë xeledábague' Pablo ne Silas. <sup>14</sup> Biche ljwézredxu ca' la gulesél-la'te' Pablo chéajë' dxu'a nísadau', na' Silas ne Timoteo belexegá'ane' lu xezre Berea. <sup>15</sup> Benne' ca' zjácälene' Pablo beleché'e le' lu xezre Atenas. Nadxa benne' ca' belexezrine' lazrie', ne gulé'e Silas, ne Timoteo chjácazegue' naga zua Pablo.

*Da dxun Pablo lu xezre Atenas*

<sup>16</sup> Dxácatë' na' Pablo dxebeze' Silas ne Timoteo naga zue' lu xezre Atenas, na' guzúale'e stebe gate blé'ene' ca naca xezre na', ni' naze nítale'e bedáu' xiaj. <sup>17</sup> Cheë le' na' bchálajë' lu xudau' cheë judío ca' nen benne' judío ca', ne xezícala benne' ca' zjácälene' da naca cheë Dios, na' tu zra tu zra bchálajlëne' benne' ca' zaj zré'e lawe' xi'a. <sup>18</sup> Bal-la benne' zjácälene' ca naca da dxulusede benne' ca' zaj le' benne' epicureo, ne benne' estoico gulezú lawe' dxuluchálajlëne' Pablo. Bal-le' gulenné':

—¿Bizra xega benne' wechalaj nigá dxi'u?

Na' xebal-le' gulenné':

—Dxéquentu' naque' benne' dxuse dizra' cheë dios zitu' ca'.

Ca'an gulenné' lawe' da dxuchalaj Pablo dizra' chawe' ca naca cheë Jesús, ne ca naca cheë xel-la' dxexebán. <sup>19</sup> Nadxa guleché'e Pablo lu lataj nazí le na Areópago, naga dxelezzrágagueze' bi xuluzén ljwezre'. Na' buluchebe' Pablo:

—¿Waca guzénenu' netu' ca naca da cube nigá da dxusédenu' bënneache?

<sup>20</sup> Lue' dxuchálajju' dizra' da quebe ne xénentu', na' dxaca lázrentu' nézentu' bi zéajë ca naca da caní.

<sup>21</sup> Caní gulenné' lawe' da dxuluzé nágaze, ne dxuluchálajze ca naca tu dizra' cube xúgute benne' Atenas, ne benne' zitu' ca' zaj zre'e xezre na'.

<sup>22</sup> Nadxa Pablo guzé' laduj benne' ca' zaj zre'e Areópago na', na' guzre' le':

—Le'e, benne' Atenas, ca naca xúgute da dxelé'eda', dxulé'e na dxápale'ele ba lá'ana dios chee'le ca', <sup>23</sup> lawe' da gate gudá' neda' gunná'a ca zaj naca xudau' ca' naga dxue lá'anale dios chee'le ca', na' ble'eda' tu xudáudau' naga naxúaj dizra' caní: Chee Dios Quebe Nu Núnbea. Na'a, Dios na' dxue lá'anale le'e, ne quebe núnbeale Le', chee Dios na' dxuchálajlena' le'e.

<sup>24</sup> 'Naque' Dios na' bene' xezr la xu nigá, ne xúgute da de lawe na. Naque' Xrane xabáa, ne Xrane xezr la xu nigá. Quebe zue' xudau' da nun ni'a na' bènneache. <sup>25</sup> Quebe nachíne' bi da gaca xelún bènneache chee Le' lawe' da dxunna Dios ná'queze xúgutedxu xel-la' nabán, ne be' da dxeca'adxu, ne xúgute da de.

<sup>26</sup> 'Tuze benne' bene' naque' xra xúgute cue' xezr la xu ca' chee che'e du gabí'i xezr la xu, na' blé'ene' zra, ne lataj naga dxal-la' xelexré'e, <sup>27</sup> chee xelexé'íajé Dios chee ájala xelexezrelne' Le' lácala quebe xelúnbea xánnie' Le', san da li Dios quebe zue' zitu' naga zua tu tudxu dxi'u. <sup>28</sup> Ne chee Dios nigá naca bandxu, ne dxedadxu, ne zradxu. Naca ca gulenná bal-la benne' wila chee'le, gulenné': "Nácadxu xrtia Dios." <sup>29</sup> Che nácadxu xrtia Dios, quebe dxal-la' gué'quedxu naca Dios ca tu bedáu' oro, u tu bedáu' plata, u tu bedáu' xiaj, da zaj nun bènneache cáteze dxululaba lázrequeze'. <sup>30</sup> Dios bzue' chalá'ala da belún bènneache ca ni'te lu xel-la' quebe zaj neze chee', san na'a dxenná bé'ene' xúgute benne' gáteteze zaj zre'e xelexebí'i lazre'. <sup>31</sup> Dios ba nuzúe' tu zra gate guchi'e chee xúgute bènneache lu da xrlátaje chee' lu na' tu benne' ba gucá'a Le', na' chee da nigá bzue' tu da dxunna bea na gate bsebané' bènnea' ládujla benne' gate.

<sup>32</sup> Gate benne' ca' belenne' dizra' nigá ca naca chee tu benne' bebane' ládujla benne' gate, na' bal-le' belún le' chee', ne xebal-le' gulenné':

—Waca guchálajlenu' netu' ca naca da nigá xetú zra.

<sup>33</sup> Nadxa Pablo bezé'e naga zaj zra' benne' ca'. <sup>34</sup> Bal-la benne' ca' guléajle'e chee Jesús, na' gulaque' Pablo tuze. Ládujla benne' caní zua Dionisio, benne' naque' tuze nen benne' dxelezrague' Areópago na', ne tu nu'ula le' Dámaris, ne xebal-la benne' ca'.

## 18

### *Pablo dxezrine' xezre Corinto*

<sup>1</sup> Gudé na' bezá' Pablo xezre Atenas, bexíajé' xezre Corinto. <sup>2</sup> Lu xezre na' xeajxraque' tu benne' judío le' Aquilo, naque' benne' nababe' tu xezre nababa Ponto. Láteze ba guca belexezrín Aquilo, ne zru'ule' Priscila ga na'. Benne' caní besía'que' xezr la xu Italia lawe' da gunná bea César Claudio xelexedxúaj xúgute benne' judío ca' xezre Roma. Pablo guxíajé' xeajnné'e Aquilo ne Priscila, <sup>3</sup> na' lawe' da tuze ca naca zrin da dxelún Pablo ne Aquilo, dxelune' xu'u xide zra be xixre' da dxelúti'e chee benne' dxjaca wedil-la, na' begá'ana Pablo nen benne' caní chee xelune' tu zren zrin. <sup>4</sup> Tu zra tu zra gate naca zra dxulupá'ana judío ca', Pablo zéaje' lu xudáudau' chee judío ca' naga bchálajé', ne blé'ene' benne' ca', benne' judío, ne benne' quebe zaj naque' judío, Jesús naque' Cristo, Bènnea' guchebe lazre' Dios sel-le'.

<sup>5</sup> Gate belezrín Silas, ne Timoteo ga na', gudé belexesí'aque' xezre ca' zaj nababa Macedonia, na' Pablo tu dxuchálajzqueze' dizra' chee' Dios, ne dxulé'ene' benne' judío ca' da li Jesús naque' Cristo, bènnea' nase-la Dios, bènnea' dxelebeza judío ca'. <sup>6</sup> Benne' judío ca' gulezú lawe' dxeledábague' Pablo, ne dxelenné' schanni' chee'. Nadxa Pablo guzribé' gabán chee' da dxulé'e na dxebéaj xíchajé' benne' ca', dxenné':

—Le'e nabágale chee' xel-la' gute chee' bènne'du xu'ule. Québedxa nabaga' neda' chee' na lawe' da ba bzenda' le'e dizra' chawe' chee' Cristo. Ná'atēla guchálajlēna' benne' quebe zaj naque' judío.

<sup>7</sup> Bezé'ē lu xudáudau' na', na' bezrine' lizre tu benne' lē' Justo, benne' dxucá'ana szrené' Dios ne zua lizre' cuita xudáudau' chee' judío ca'. <sup>8</sup> Na' Crispo, benne' xíchajé chee' xudáudau' chee' judío ca', ne ca naca benne' zaj zre'ē lizre' guléajlē'ē chee' Xránadxu. Cá'anqueze benne' zan benne' Corinto, gate belenne' dizra' chee' Dios, guléajlē'ē ne guledxúé' nisa. <sup>9</sup> Nadxa Xránadxu ble'e lawe' Pablo tu zre' tu lu da ble'e Dios lē', ne guzre' lē':

—Quebe zrebu'. Bchálajteze, ne quebe sua zriu'. <sup>10</sup> Neda' zúalēna' lue', na' quebe nu seque' bi gune lue' lawe' da zaj zrálē'ē benne' zaj naque' chia' lu xezre nigá.

<sup>11</sup> Ca'an guca, begá'ana Pablo tu iza xugachaj lu xezre Corinto, dxusédene' benne' ca' dizra' chee' Dios.

<sup>12</sup> Lu zra ca' gate naca Galión benne' xu'u lu ne'e xezr la xu na' naga nababa Acaya, waláz chee' Roma, na' benne' judío ca' guledábague' Pablo. Beleché'ē lē' xu'u lawe', <sup>13</sup> ne gulé'ē benne' xu'u lu ne'e xezr la xu na':

—Benne' nigá dxedé' dxegú'u xel-lē' bènneache chee' xelúe lá'ang' Dios, ne xeluné' tu da dxedábaga da nadxixruj bea cheent'u.

<sup>14</sup> Pablo ba zué' guchálajé' gate Galión guzre' benne' judío ca':

—Chela naca na chee' tu da dxuzúa chalá'ala da bdxixruj bea César u chee' tu da zrinnaj zren, na' gun na ba xen xenda' ca da dxennale le'e, benne' judío. <sup>15</sup> Lawe' da naca na chee' dízra'ze, ne chee' la tu benne', ne chee' da nadxixruj bea na cheézele, le gucá'ana chawe' na lé'equeze, lawe' da quebe dxaca lazra' neda' guchi'ē da dxaca chee' da ca'.

<sup>16</sup> Nadxa bebéajé' benne' ca' lu xu'u lawe' na'. <sup>17</sup> Nadxa xúgute benne' griego gulél-lē' Sóstenes, benne' xíchajé chee' xudáudau' chee' judío ca', ne belú'ē lē' lau benne' xu'u lu ne'e xezr la xu na', lē' Galión. Galión na' quebe be' lazre'e chee' da na'.

*Pablo dxezrine' xezre Antioquía, na' dxezú lawe' zéajé' da guxunne' lasa zéajé' wen zrín chee' Cristo*

<sup>18</sup> Pablo begá'ane' xezre na' xezane' zra. Gudé na' bze' biche ljwézredxu ca' dizra', na' guxú'ē tu lu da dxedá lawe' nísadau' zéajé' naga nababa Siria tu zren nen Priscila ne Aquilo. Lu xezre Cencrea nédxudxa gate za chu'ē lu da dxedá lawe' nísadau', Pablo bzuatē' xídeze xíchajé', da dxunna bea na zua tu da nachebe lazre' guné' lau Dios. <sup>19</sup> Gate belezrine' lu xezre Efeso, Pablo bsané' Priscila ne Aquilo, na' guxíajé' lu xudáudau' chee' judío ca', ne bchálajlēné' judío ca' zaj nazrague' na'. <sup>20</sup> Benne' ca' gulata' xuene' lē' xegá'anadxé' xetú' ch'i, na' lē' quebe guca lazre'. <sup>21</sup> Nadxa Pablo bze' benne' ca' dizra', dxenné':

—Dxun na ba xen xezrina' sua' Jerusalén chee' súaqueza' lu laní da ba za'. Welá'aqueza' xedajnná'a le'e che gunna Dios lataj.

Na' guxú'ē lu da dxedá lawe' nísadau', ne bezé'ē Efeso na'. <sup>22</sup> Gate bezrine' xezre Cesarea, Pablo guxíajē' Jerusalén xeajape' diuzre benne' ca' dxeléajlē'ē cheē Jesús, na' gudé na' guxíajē' xezre Antioquía. <sup>23</sup> Ca gudé guzúē' na' tu chí'i, na' bezé'ē na', gudéē' tu tu xézredu ca' zaj nababa Galacia, ne xezre ca' zaj nababa Frigia, dxutipe' lazre' benne' ca' dxeléajlē'ē cheē Jesús.

*Apolos dxuchálajē' dizra' cheē Dios lu xezre Efeso*

<sup>24</sup> Ca lu zra ca' tu benne' judío lē' Apolos bzrine' lu xezre Efeso, naque' benne' xezre Alejandría, lu xu Egipto. Naque' tu benne' nupá'ale'ē xrtizre', ne núnbeale'ē da naxúaj na lu xiche cheē Dios. <sup>25</sup> Naxéajni'ile'ene' ca naca cheē Xránadxu, ne dutē lázrdawē' dxuchálajē', dxusédenē' cáteze naca cheē Jesús, lácala dxusédezenē' xel-la' dxuchúa nisa ca ben Juan. <sup>26</sup> Apolos guzú lawē' dxusédenē' benne' ca' zaj zre'ē xudáudau' cheē judío ca' du lazre'. Gate belén Priscila, ne Aquilo cheē', na' guleché'ē lē' chalá'ala, ne buluzéajni'idxenē' lē' cáteze naca dizra' cheē Dios. <sup>27</sup> Ca gudé na', gate guca lazre' Apolos chéajē' naga nababa Acaya, bi bíchedxu ca' bulutipe' lazre', ne buluzajē' tu xiche cheē benne' ca' dxeléajlē'ē cheē Jesús zaj zre'ē xezre ca' zaj nababa Acaya na' cheē xelezí' lu ne'ē Apolos na'. Gate bzrin lē' naga nababa Acaya, gúcalelē'ene' benne' ca', na' Dios be'ē lē' lataj guléajlē'ē cheē Jesús. <sup>28</sup> Apolos blé'ene' lau xúgute' benne' ca' ca dxeleque zrēja benne' judío ca', ne blé'ene' ne cheē da naxúaj na lu xiche cheē Dios Jesús naque' Cristo, Bénnea' nase-la Dios, Bénnea' dxelebeza judío ca'.

## 19

*Pablo dxezrine' xezre Efeso*

<sup>1</sup> Dxácate zua Apolos lu xezre Corinto, na' gudé Pablo xézredu ca' zaj dxe' laduj xi'a ca', na' bzrine' lu xezre Efeso naga xeajxraque' bal-la benne' dxeléajlē'ē cheē Jesús. <sup>2</sup> Na' bchebe' benne' ca':

—¿Guzi'le le'e Be' Lá'azxa gate guxéajlē'ē?

Belexechebe':

—Ne quebe xénentu' che zua Be' Lá'azxa.

<sup>3</sup> Nadxa Pablo bchebe' benne' ca':

—¿Bi xel-la' dxedxúa nisa guzi'le le'e?

Benne' ca' belexechebe':

—Xela dxuchúa nisa ca ben Juan.

<sup>4</sup> Na' gunná Pablo, guzre' benne' ca':

—Awe', Juan bchue' nisa benne' ca' belexebí'i lazre', san guzre' benne' ca' dxal-la' xeléajlē'ē cheē Bénnea' xide' ca te cheē lē', da zéajē na, cheē Jesús, Bénnea' naque' Cristo, nase-la Dios.

<sup>5</sup> Gate belenne' da nigá, na' beledxúē' nisa lu La Xránadxu Jesús. <sup>6</sup> Gate bzē na' Pablo benne' ca', na' guzúale' Be' Lá'azxa lē', na' gulennē' dizra' cheē benne' zitu' da quebe bulusedē', ne buluchálajē' waláz cheē Dios. <sup>7</sup> Benne' caní zaj naca chazrínnue'.

<sup>8</sup> Lawe' chunna beu' dxeaj Pablo lu xu'u ca' naga buluzraga judío ca' naga bchálajlē'ē benne' ca' dizra' cheē Dios, ne blé'ene' benne' ca' naca da li da dxuchálajē' ca naca xel-la' dxenná bea cheē Dios. <sup>9</sup> Bal-lē' belún zide' lázrdawē', ne quebe gulaca lazre' xeléajlē'ē cheē Jesús, na' gulennē' schanni' cheē dizra' chawe' ca naca cheē Jesús lówela benne' ca'. Nadxa Pablo bezé'ē naga zaj zra' benne' ca', ne guché'ē benne' ca' dxeléajlē'ē cheē

Jesús lu xu'u ga dxusede tu benne' le' Tiranno, na' lu xu'u na' bchálajlene' benne' ca' tu zra tu zra. <sup>10</sup> Ca' bené' lawe' chupa iza, na' ca'an guca xúgute benne' zaj zre'e xezre ca' zaj nababa Asia belenne' dizra' chee Xránadxu Jesús, benne' judío ca', ne benne' quebe zaj naque' judío. <sup>11</sup> Dios bené' xel-la' waca zri'a ca' lu na' Pablo lu zra ca'. <sup>12</sup> Ca'an guca, gulequ'e ladxe' ca' da dxuchéaj xichaj Pablo, ne ladxe' ca' da bde'e lachu'e, na' belú'e na naga zaj de benne' we' ca', na' benne' caní belexexaque' ca naca xízrawe' da zaj nape', na' be' xriwe' ca' belexedxúaj na lu bel-la' dxen chee benne' ca'.

<sup>13</sup> Bal-la benne' judío ca', benne' dxeledé' dxelexebéaje' be' xriwe' ca' lu xichaj lázxdau benne' ca', gulaca lazre' xuluchínene' La Xránadxu Jesús chee xelexebéaje' na, na' gulé'e be' xriwe' ca':

—Dxenná bé'entu' le'e xedxúajle lu xichaj lázxdau benne' nigá lu La Jesucristo, Bénnea' dxuchalaj Pablo chee'.

<sup>14</sup> Caní belún gazre benne' zaj naque' zri'ine tu benne' judío le' Esceva, naque' tu benne' xíchaje chee bxruze ca'. <sup>15</sup> Gate belune' caní, be' xriwe' na' bechebe na chee':

—Núnbe'a Jesús, ne nezda' nua' Pablo, san le'e, ¿nuzra le'e?

<sup>16</sup> Gate gunná na da nigá, na' benne' biu na' xu'e be' xriwe' na', guxritie' guzria che'e benne' ca', na' dute xel-la' wal-la chee' bucule' xúgute benne' ca', na' bé'le'e benne' ca' cadxa buluzrúnnuje' lu xu'u na' gala' xízeze, ne dxelaque' dxen. <sup>17</sup> Xúgute benne' zaj zre'e xezre Efeso, benne' judío ca', ne benne' quebe zaj naque' judío, belenne' ca guca da nigá, na' chee le' na' belezrébelé'e, ne bulucá'ana szrene' La Xránadxu Jesús.

<sup>18</sup> Cá'anqueze benne' zan lówela benne' ca' dxeléajle'e chee Jesús belelé'e dxelexrúalepe' da caléla da belune', <sup>19</sup> na' benne' zan, benne' belúne' xel-la' wazrá', zaj nu'e xiche chee wazrá', na' buluzezxe' na lau xúgute benne' ca'. Gate bululabe' ca gulezaca xiche ca', na' gulénézene' gulezaca na ca gazxu gaxúa cue' tu gaxúa dumí plata. <sup>20</sup> Ca'an guca, guxiáj bzriluj dizra' chee Xránadxu, ne ble'e na xel-la' waca chee na.

<sup>21</sup> Gudé na' Pablo guca lazre' té'e xézredu ca' zaj nababa Macedonia, ne Acaya, na' te na' chéaje' xezre Jerusalén. Gunné' ca te chéaje' Jerusalén, na' dxal-la' cheajte' xezre Roma. <sup>22</sup> Nadxa gusel-le' chupa benne' dxelácale le', Timoteo ne Erasto, naga nababa Macedonia, dxácate begá'ana le' xetú chi'i naga nababa Asia.

### *Benne' xezre Efeso dxeledábage' Pablo*

<sup>23</sup> Ca lu zra na' benne' zan guledábage' dizra' chawe' ca naca chee Jesús, <sup>24</sup> da na' guca na ne chee tu benne' le' Demetrio, benne' gubizre plata. Benne' nigá dxune' níchudu ca' da zaj naca plata ca xudau' chee dios nu'ula le' Diana, na' benne' ca' dxelúnlene' le' zrin nigá dxelezí'le'e dumí. <sup>25</sup> Demetrio na' bhague' benne' caní tu zren nen xezica benne' dxelune' zrin caní, na' guzre' benne' ca':

—Le'e, benne', nézquezle lu zrin nigá dxaca cheedxu da cháwewé'e, <sup>26</sup> na' ca dxelé'equezle le'e ne dxenle, Pablo nigá dxedé' dxenné' dios ca' da zaj nun bènneache quebe zaj naca na dios, na' caní ba bsédené' benne' zan, quegá Efeso nigáze, san du ca nababa Asia. <sup>27</sup> Da nigá nácale'e na stebe cheedxu, lawe' da ca naca zrin cheedxu nigá nazruzre cuía xi na, ne la gaze xudau' chee dios nu'ula Diana nazruzre nite xel-la' nuzé chee na, na' caní xegá'ana dítaj ca naca xel-la' szren chee dios nu'ula, bènnea' dxelúe



lá'ana ca naca benne' zaj zre'e ga nababa Asia, ne du ca naca bènneache zaj zre'e xezr la xu.

<sup>28</sup> Gate belenne' da nigá, na' belezrá'ale'e benne' ca', ne gulebezre xe'e, dxelenné':

—jGa'ana szren Diana, dios cheedxu, benne' Efeso!

<sup>29</sup> Na' ca naca benne' zaj zre'e xezre na' guleque zréajene'. Gule'e Gayo, ne Aristarco, benne' Macedonia dxeledálene' Pablo, na' gulezrube xue' benne' caní chale'aj xu'u lawe'. <sup>30</sup> Pablo guca lazre' chu'e na' chee guchálajlene' benne' ca', san bi bíchedxu ca' quebe gulegú'e le' lataj. <sup>31</sup> Cá'anqueze bal-la benne' xu'u lawe' chee xezre ca' zaj nababa Asia gulesel-le' benne' xeajezre' Pablo quebe dxal-la' chu'e na'. <sup>32</sup> Dxácatē na', naga zaj nazraga benne' ca', bal-le' gulebezre xe'e, tu da dxelenné', na' xebal-le' dxelebezre xe'e, dxelenné' da xula, lawe' da beledxé'ena zraga benne' zan, na' benne' zante quebe zaj nézene' bizr chee na' zaj nazrague' na'. <sup>33</sup> Nadxa benne' judío ca' buluzúe' Alejandro lau benne' ca' chee guzėjni'ine' le' ca naca da nigá, na' le' guchisa ne'e chee xelezúa zri benne' ca' lawe' da guca lazre' guchálajlene' benne' zan ca' da gácale na judío ca'. <sup>34</sup> Gate benne' zan ca' guleque bé'ene' naque' benne' judío, na' gulebezre xa'a xúgute' ca chupa hora, dxelenné':

—jGa'ana szren Diana, dios cheedxu, benne' Efeso!

<sup>35</sup> Nadxa benne' dxuzúaje' ne chee xezre na', gate ba bzua zrie' benne' zan ca', gunné':

—Le'e, benne' Efeso. Ca naca bènneache zaj zra' xezr la xu nigá zaj nézene' benne' zaj zre'e xezre Efeso nigá zaj nabague' xuluxúe' xudau' chee dios nu'ula Diana, ne bedáu' chee' da bexruj na zran xabáa. <sup>36</sup> Quebe nu seque' tábaga' da nigá. Chee le' na' le sua zrize, ne quebe bi gunle da quebe ne guxúe xánnele. <sup>37</sup> Benne' caní nache'le nigá quebe bi da calela ne xelune', ne quebe bi schanni' ne xelenné' chee dios nu'ula chee. <sup>38</sup> Che Demetrio, ne benne' ca' dxelune' zrin nen le' dxelaca lazre' xelagu zria chee tu benne', zaj zra' benne' dxuluchi'e da dxaca, ne zaj zua xu'u lawe' ca' naga gaca xelawe' zría chee benne' ca'. <sup>39</sup> Na' che le'e bi xetú da nábale, dxal-la' nábale na naga zaj nazraga benne' xu'u lawe' ca dxenná bea da bdxixruj bea César. <sup>40</sup> Na'a zúadxu štebe ga gaze nu gagu zria cheedxu ca naca da bēndxu, xelenné' dxedábagadxu xu'u lawe' lawe' da quebe seque' bi xechébedxu che nu gagu zria dxi'u ne chee da guca na'a.

<sup>41</sup> Ca gudé gunné' da nigá, na' bze' benne' zan ca' dizra'.

## 20

### *Pablo dxedé' ga nababa Macedonia ne Grecia*

<sup>1</sup> Gate gudé guca da štebe na' lu xezre Efeso, na' Pablo btupe' benne' ca' dxelėjle'e chee Jesús chee guzėjni'ine' le'. Nadxa bze' benne' ca' dizra', ne bnide' le', na' guzėj'e zėjje' xezre ca' zaj nababa Macedonia. <sup>2</sup> Xeajne'e bíchedxu ca' zaj zre'e xúgute' xezredu ca', ne btípale'e lazre' benne' ca' ne chee dizra' da bchálajlene' le'. Ca gudé na' bezrine' naga nababa Grecia. <sup>3</sup> Begá'anē' na' chunna beu', na' gudé na' gate ba zuate' chu'e tu lu da dxedá lawe' nísadau' chėjje' xezre ca' zaj nababa Siria, guque bé'ene' ba zaj nun judío ca' ca da xelune' chee'. Chee le' na' gulú'u bi'e xezé'e ni'e té'e naga nababa Macedonia. <sup>4</sup> Belún le' tuze Sópater, benne' xezre Berea, ne Aristarco, ne Segundo, benne' xezre Tesalónica na', ne Gayo, benne' xezre Derbe, ne Timoteo, ne Tíquico, ne Trófimo, benne' ca' chee xezre ca'

zaj nababa Asia. <sup>5</sup> Bi bíchedxu caní gulebía lawe' launtu', neda', Lucas, ne xezícadxa ljwezre Pablo, na' gulebeze' netu' lu xezre Troas. <sup>6</sup> Netu', gate gudé laní gate dxelagu benne' judío xeta xtila da quebe nachixre cua zichaj chee na, guxú'untu' tu lu da dxedá lawe' nísadau', na' beza'ntu' xezre Filipos. Zra gazxu' zra na' xeajzrentu' bi bíchedxu ca' lu xezre Troas, naga guzúantu' gazre zra.

*Da ben Pablo lu xezre Troas*

<sup>7</sup> Zra nedxu chee da gazre zra bezrágantu' chee gáguntu' da dxusá lázredxu ca guca gate gute Xránadxu, na' Pablo bsédené' bi bíchedxu ca'. Ben na ba xen xeza'ntu' zra xula, na' chee le' na' bchálajqueze Pablo cadxa bzrinte dxela. <sup>8</sup> Nazrágantu' tu xu'u da zua chunna cuía sibe, na' zaj zéle'e xi' da dxulusení na. <sup>9</sup> Tu bi cuide' zríabe' ga dxu'u lení', na' gate Pablo bsetúnnadxe' xrtizre', na' guca wásele'e bi cuide' na', na' naga xeajchete' na, na' dxásete'be' gubíxrebe' chunna cuía sibe, na' xeajlechise'-be' ba nátebe'. <sup>10</sup> Nadxa betaj Pablo, na' gulégüe' beque'e-be', ne bnide'-be'. Nadxa guzre' bi bíchedxu ca':

—Quebe zrébele. Nabanbe'.

<sup>11</sup> Nadxa Pablo begüene' bezrine' chunna cuía sibe na'. Na' bzúzruje' xeta xtila gudawe', na' bezú lawe' dxuchálaje' cadxa guxani'te. Zra na' bezé'e na'. <sup>12</sup> Nadxa bíchedxu ca' belexeché'e bi na' gubíxrebe' ba bexaca banbe', na' xúgute' gulezúe' lu xel-la' dxelezerén lazre'.

*Pablo dxexeze'e xezre Troas xezrine' xezre Mileto*

<sup>13</sup> Netu' guzría launtu' lau Pablo, na' guxu'untu' lu da dxedá lawe' nísadau', na' bzrintu' xezre Asón naga xezrágantu' Pablo ca ba nun le' lawe' da guca lazre' zéaje' ní'aze'. <sup>14</sup> Gate bezrágantu' le' lu xezre Asón, na' guxú'e lu da dxedá lawe' nísadau' naga xu'untu', na' guxíajntu' xezre Mitilene. <sup>15</sup> Beza'ntu' na', na' zra xula bedentu' le nna' xezre Quío, na' xetú zra, zra xula bzrintu' lu xezre Samos. Na' guzúantu' xezre Trogilio naga bezí' lázrentu', na' zra xula bzrintu' xezre Mileto. <sup>16</sup> Ca' bentu' chee quebe guzré'tecantu' naga nababa Asia. Chee le' na' Pablo quebe guca lazre' chéaje' Efeso lawe' da guca lazre' xezrinze' lu xezre Jerusalén chee sue' na' lu zra Pentecostés che ba guca.

*Pablo dxuchálajlene' benne' gula dxeléajle'e chee Jesús, benne' zaj zre'e Efeso*

<sup>17</sup> Ca zrantu' lu xezre Mileto, Pablo gusel-le' tu benne' cheajnné' benne' gula ca' dxeléajle'e chee Jesús zaj zre'e xezre Efeso. <sup>18</sup> Gate belelá' benne' ca', Pablo guzre' le':

—Le'e nézquezle ca bēna' neda' xúgute zra ca gudé bla'a ga nababa Asia.

<sup>19</sup> Xúgute zra guzúa' lávela le'e dxuna' zrin chee Xránadxu duté xel-la' dxexruj lazre', ne zane' lasa gudxezra', na' gudéa' lu zane' da guzxaca' ca naca da gulaca lazre' benne' judío ca' xelune' chia'. <sup>20</sup> Bchálajlena' le'e xúgute da naca na xrlátaje, ne bsédeda' le'e lávela benne' zan, ne lízrquezle. <sup>21</sup> Benne' zaj naque' judío, ne benne' quebe zaj naca judío, gúchequeza' benne' ca' dxal-la' xelexebí'i lazre' lau Dios, ne xeléajle'e chee Xránadxu Jesucristo. <sup>22</sup> Na'a zexá'a Jerusalén, ca dxenná be'e Be' Lá'azxa neda', ne quebe nezda' bi gaca chia' na'. <sup>23</sup> Tuze da nezda', lu xúgute xezre ca' naga dxedéa', Be' Lá'azxa dxé'e neda' dxal-la' chu'a lizre xia, ne tea' zane' xel-la' zí'. <sup>24</sup> Quebe dxebe'a gunne xue chee da nigá, ne quebe bi zaca xel-la' nabán chia', san tuze che gaca chéajlena' ca naca da dxuna',

ne chee gusexúzrqueza' guna' ca naca da nusebaga Xránadxu Jesús neda', guchálaja' dizra' chawe' ca nazrí'i Dios dxi'u.

<sup>25</sup> 'Nézquezda' netule le'e, ba bchálajlëna' le'e ca dxenná bea Dios, québedxa lé'ele neda'. <sup>26</sup> Chee le na', dxaca lazra' xapa' le'e na'a, quebe nabaga' zria ne chee tule le'e, <sup>27</sup> lawe' da ba bzenda' le'e ca naca da dxaca lazre' Dios gunë', ne quebe bi bcá'ana' da quebe bzéajni'ida' le'e. <sup>28</sup> Chee le na', le guxúe cuínale, ne le guxúe ca naca benne' ca' nácale tuze, benne' ca' Be' Lá'azxa ba nuzúë' le'e ládujla le' chee chu'u lu na'le guxuele benne' ca' zaj nazrague' chee Xránadxu, benne' ca' naxá'aweng' nen dxen cheéqueze'. <sup>29</sup> Nezda' gate xezá'a neda' xeledá' bal-la benne' xelaca lazre' guzrí'a xi'e benne' zaj nazraga chee Xránadxu ca dxelún becu' xi'a, be snia ca' dxuluzrí'a xiba' zrila' ca'. <sup>30</sup> Ládujla le'e weledá' bal-la benne' xulusédene' da wen lazre', ne quegá da lí, chee chjácale benne' ca' dxeléajle'e chee Jesús le'. <sup>31</sup> Chee le na', le guxúe cuínale. Le gusá' lázrele ca bëna' chun iza, te zra ne chizrela quebe bsana' bzéajni'ida' le'e tu tule le'e, ne gudxézrete'a.

<sup>32</sup> 'Na'a, biche ljwezra', dxuzúa' le'e lu na' Dios, ne lu dizra' chee xel-la' zri'i lazre' chee', da napa na xel-la' waca chee gun na le'e benne' chuchu lazre', ne chee guzúa na le'e lávela xúgute benne' ca' ba guleaj Dios cheéqueze'. <sup>33</sup> Quebe guca lazra' neda' si'a chia' dumí ne zra lana nu benne'. <sup>34</sup> Nézquezle le'e ca bëna', bëna' zrin nen ni'a ná'queza' chee guta' da guchínneda' neda', ne da gulechinne benne' ca' gulaque' neda' tuze. <sup>35</sup> Blé'equzda' le'e, ca'an dxal-la' gunle zrin chee séquele gácalele benne' dxelexazrje. Bsa lázrele xrtizra' Xránadxu Jesús, gate gunné': "Ba neza zrendxa naca na chee benne' dxunexruz, quézcala chee benne' si' lu ne'e."

<sup>36</sup> Ca gudé gunná Pablo da nigá, na' bzu zribe', ne bchálajlëne' Dios nen xúgute benne' ca'. <sup>37</sup> Xúgute' gulebezre', na' bulunide', ne bulunupe' Pablo. <sup>38</sup> Belexewí'inelë'ene' lawe' da guzre' le' québedxa xeledé'ene' le'. Na' xjácälëne' le' naga bexu'e lu da dxedá lawe' nísadau'.

## 21

### *Pablo dxezrine' xezre Jerusalén*

<sup>1</sup> Gate beza'ntu' naga zaj zra' bi bíchedxu ca', na' bexú'untu' lu da dxedá lawe' nísadau', na' bexíajteczentu' naga dxe' xezre Cos, na' zra xula gudentu' naga dxe' xezre Rodas, na' gudé na' bzrintu' xezre Pátara. <sup>2</sup> Lu xezre Pátara xeajxrácantu' tu da dxedá lawe' nísadau' da zeaj na naga nababa Fenicia. Na' guxu'untu' lu da dxedá lawe' nísadau' nigá, na' beza'ntu' na'. <sup>3</sup> Gate gudentu' naga dxe' xezr la xu Chipre, blé'entu' na chala'a xéglala, na' bexíajteczentu', bzrintu' lu xezre ca' zaj nababa Siria. Lu xezre Tiro ben na ba xen xuluxulétaje' xua' da nua da dxedá lawe' nísadau' na', na' chee le na' bzrintu' na'. <sup>4</sup> Na' bezrágantü' benne' ca' dxeléajle'e chee Jesús, benne' zaj zre'e xezre Tiro na', na' begá'anantu' nen benne' ca' gazre zra. Benne' caní, lawe' da bzéajni'i Be' Lá'azxa le' da gaca, gulé'e Pablo quebe dxal-la' chéajë' Jerusalén. <sup>5</sup> Gate gudé guca gazre zra ca', na' zua xeza'ntu' na'. Xúgute benne' ca' dxeléajle'e chee Xránadxu, ne zru'ule' ca', ne bidu chee' ca' gusá'acalëne' netu' bedxúajtentu' xezre na', na' dxu'a nísadau' na' bzu zríbentu' bchálajlentu' Dios. <sup>6</sup> Nadxa bze ljwézrentu' dizra', ne bnídate ljwézrentu'. Nadxa bexú'untu' lu da dxedá lawe' nísadau', na' bi bíchedxu ca' belexezrine' lizre'.

7 Beza'ntu' Tiro, gudentu' lu nísadau', ne bźrintentu' xezre Tolemaida, naga bgápantu' bi bíchedxu ca' diuzre, ne begá'anantu' nen benne' ca' tu zra. 8 Zra xula Pablo, ne netu' zralentu' le' bezá'ntu' na', na' bźrintu' xezre Cesarea. Na' bźrintu' lizre Felipe, benne' dxedá dxuchálaje' dizra' chee Dios. Naque' tu benne' gazre, benne' ca' buluzúa gubáz ca' xelune' zrin chee Jesús. Begá'anantu' nen benne' nigá. 9 Felipe na' zaj zra' tapa zrí'ine' nu'ula quebe ne xuluchaga na'abe', ne dxuluchálaje' waláz chee Dios. 10 Guzúantu' na' zane' zra gate bla' tu benne' le' Agabo chee xezre ca' zaj nababa Judea. Naque' benne' dxuchálaje' waláz chee Dios. 11 Agabo na' bide' bedajnné'e netu'. Guqué'e bazxu dxu'a le'e chee Pablo, na' bchéaje' na ní'a na' cuine', dxenné':

—Be' Lá'azxa dxenné' judío ca' lu xezre Jerusalén xuluchéaj caní benne' xrane bazxu dxu'a le'e nigá, na' xuludé'e le' lu na' benne' zitu' ca'.

12 Gate bentu' netu', ne benne' Cesarea da nigá, na' guta' xuentu' Pablo quebe chéaje' Jerusalén. 13 Pablo bechebe':

—¿Bizr chee na' dxebézrele, ne dxuzúale neda' xel-la' dxewí'ine lazre'? Ba zúaqueza', quegá tuze xuluchéaje' neda', san la gázqueze zua' chee gatia' lu xezre Jerusalén ne chee Xránadxu Jesús.

14 Gate guque bé'entu' quebe séquentu' guzágantu' Pablo, na' québedxa bi gúzrentu' le', dxennantu':

—Gaca ca dxaca lazre' Xránadxu.

15 Gudé na' bseni'antu' cheentu', na' guxíajntu' Jerusalén. 16 Na' gusiá'acale bal-la benne' netu', benne' Cesarea dxeléajle'e chee Jesús, na' ládujla benne' ca' zua tu benne' Chipre le' Mnasón, zane' iza ba zeaj dxéajle'e chee Jesús, na' lizre benne' nigá dxal-la' zrintu' súantu'.

### *Pablo zeajnné'e Jacobo*

17 Gate bźrintu' Jerusalén, bi bíchedxu ca' belezí' lu ne'e netu' duté xel-la' dxelebé. 18 Zra xula Pablo guxíajlene' netu' xeajnná'ntu' Jacobo, na' zaj zrá'queze na' xúgute benne' gula ca' dxeléajle'e chee Jesús. 19 Pablo bgape' le' diuzre, na' bzenne' benne' ca' tu tu da ben Dios lu na' le' ládujla benne' quebe zaj naque' judío. 20 Gate belenne' ca', na' belúe lá'ané' Dios. Nadxa gulé'e Pablo:

—Chawe' naca na, bi bícha'dau'. Dxelé'equezenu' zane gaxúa benne' judío dxeléajle'e chee Jesús, na' xúgute' dxelenné' dxun na ba xen chéajledxu da bdxixruj bea Moisés. 21 Zaj zra' benne' ba gulé'e benne' judío caní lue' dxusédenu' xúgute benne' judío zaj zre'e zitu' québedxa xelune' ca da gunná be'e Moisés, ne quebe xelechugue' late' béla'dau' chee bel-la' dxen chee bidu biu chee' ca', ne quebe chjácalene' ca naca da zéajledxu dxi'u dxundxu. 22 ¿Ájala dxal-la' gundxu? Benne' judío caní welezrague' gate xelenne' ba bla'u. 23 Cháwedxa gunu' da caní: Zaj zra' tapa benne' lówela dxi'u dxal-la' xelune' tu da zaj nachébe lazre' lau Dios. 24 Guché benne' caní chjá'acalene' lue', ne bca'ana chawe' cuinu' lau Dios nen benne' caní, na' gudizruj ca naca da dxal-la' xelízruje' benne' guchibe' xicha xichaj benne' caní. Ca'an gaca, xúgute benne' xeleque bé'eng' quebe naca da li ca da gulenné' chiu', san la gázqueze lue' dxunu' xúgute ca da dxenná da nadxixruj bea na. 25 Ca naca chee benne' ca' quebe zaj naque' judío, ba bzúajntu' chee' quebe dxun na ba xen xelune' da caní, san tuze dxal-la' xulusane' da naca chee bedáu' xiaj xaga ca', ne quebe xelawe' dxen chee be xixre' ca', ne quebe xelawe' bela' chee be xixre', be quebe bdxuaj dxen, ne quebe xelune' dul-la chee da dxucá'ana sban bénneache.

*Dxelele' Pablo lu xudau'*

<sup>26</sup> Nadxa Pablo guché'e tapa benne' ca', na' zra xula bca'ana chawe' cuine' lau Dios nen benne' ca', na' belexú'e lu xudau' chee buluzenne' bxruze ca' gate xexuzre zra ca' chee da dxulucá'ana chawe' cuine' lau Dios, gate na' tu tue' dxal-la' xelegú'e guna'.

<sup>27</sup> Gate ba zua xuzre da gazre zra, na' bal-la judío ca', benne' zá'aca xezre ca' zaj nababa Asia, belelé'ene' Pablo lu xudau' na', na' buluchague' ca naca benne' ca' zaj zre'e na', na' gulebía che'e Pablo. <sup>28</sup> Dxelelé' zizraj:

—Benne' Israel, le gácale netu'. Benne' nigá dxedé' gáteteze dxusédené' xúgute béneache xuluzúe' chalá'ala xezr la xu cheedxu, ne da bdxixruj be'e Moisés, ne xudau' nigá, ne ba guzre'e lu xudau' nigá bal-la benne' griego. Dxucá'ana dítaje' lataj lá'azxa nigá.

<sup>29</sup> Caní gulenné' lawe' da ba belelé'ene' Pablo lu xezre na' nen Trófimo, tu benne' xezre Efeso, na' dxeléquene' gulú'u Pablo le' lu xudau'.

<sup>30</sup> Ca naca benne' zaj zre'e xezre na' beledxé'ena zrague', ne zá'aca chégüe'. Nadxa gulel-le' Pablo, ne gulezrube xue' le' chale'aj xudau' na', na' bulusézxuje' dxa xu'u chee na. <sup>31</sup> Ba zuate xelúti'e Pablo gate benne' Roma dxenná be'e lu wedil-la benne' ba dxeledxé'ena zraga ca naca benne' zaj zre'e xezre Jerusalén. <sup>32</sup> Nadxa benne' nigá bchague' benne' dxjaque' wedil-la nen benne' dxenná bé'ene' le', na' xjaca chégüe' naga zaj nazraga benne' zan ca'. Gate benne' ca' belelé'ene' benne' na' dxenná be'e lu wedil-la, na' bulusane' québedxa buluzálaje' Pablo. <sup>33</sup> Nadxa gubiga' benne' na' dxenná be'e lu wedil-la, na' gudel-le' Pablo, ne gunná bé'ene' xuluchéaje' le' chupa du xia. Gudé na' bchebe' benne' ca' nua' benne' nigá, ne bi ba bene'. <sup>34</sup> Benne' ca' gulebezre xe'e da zan da gulenné'. Ca'an guca benne' dxenná be'e lu wedil-la quebe bi guxéajni'ine' lawe' da dxelúnle'e schaga'. Nadxa gunná bé'ene' xeleché'e Pablo xu'u naga zaj zra' benne' dxjaque' wedil-la, benne' zan ca'. <sup>35</sup> Gate belezrine' dxa xu'u naga zaj zra' benne' dxjaque' wedil-la, na' benne' dxjaque' wedil-la belexú'e Pablo lu na'ze' lawe' da dxelúele'e benne' zan ca' Pablo, <sup>36</sup> na' xúgute' zá'aque' cuzre na' dxelelé' zizraj:

—Gate bènea'.

*Pablo dxexechebe' lau benne' zan ca'*

<sup>37</sup> Gate dxelegú'e Pablo lu xu'u naga zaj zra' benne' dxjaque' wedil-la, le' guzre' benne' na' dxenná bé'ene' le':

—¿Waca bi nnia'?

Na' bchebe bènea' le':

—¿Waca nneu' dizra' griego? <sup>38</sup> ¿Quebe nacu' lue' benne' Egipto na' ba zeaj tu chupa iza btupe' benne' ca' guledábage' xu'u lawe', na' guché'e tapa gaxúa benne' dxelutie' benne', xeajzre'e le' le'e xixre' lawe' lataj?

<sup>39</sup> Nadxa Pablo guzre' benne' na':

—Neda' naca' benne' judío, ne nababa' tu xezre blau chee ga nababa Cilicia. Ben culuén gunu' neda' lataj guchálajlena' benne' zan caní.

<sup>40</sup> Benne' na' be'e le' lataj, na' Pablo guzé' lachila chee xu'u na', na' guchisa ne'e chee xelezúa zri benne' zan ca'. Gate gudxé' zri, na' bchálajlene' le' dizra' hebreo, dxenné':

## 22

1 —Le'e, benne' gula, ne le'e, bi bicha', le xen ca da xapa' le'e da dxexecheba' chee.

2 Gate belenne' dxuchálajle Pablo le' dizra' hebreo, na' gulezúadxē' zrize, na' Pablo guzre' le':

3 —Neda' naca' judío. Gúlaja' xezre Tarso naga nababa Cilicia, na' bgula' Jerusalén nigá, na' Gamaliel bsédenē' neda' cáteze naca da nadxixruj bea na chee xra xrtáudxu ca'. Tu dxue lázrezqueza' dxuna' da naca chee Dios cáteze dxunle le'e na'a. 4 Nédxutē' gudáu zi' xuzra' benne' ca' dxelájle'e chee Jesús, ne bêtequeza' bal-le', ne guchē'a benne' biu, ne nu'ula chee, na' bzra'a le' lizre xia. 5 Bxruze blau, ne xúgutē' benne' gula sina waca xelexechébequeze' belunne' neda' xiche chee bi'a na lau bi bíchedxu judío ca' zaj zre'e xezre Damasco. Guxá'a na' xeajxedilja' naga zaj zra' benne' ca' dxelájle'e chee Jesús chee che'a benne' ca' Jerusalén nigá, chee xeledé' ba xa'.

6 'Gate zexá'a xu'a neza, ne ba zua zrina' Damasco, ca du wagubizra gúcatite' tu xi' naga zexá'a da za' xabáa. 7 Na' xeajchazia' lu xu, ne benda' chí'i tu benne' guzre' neda': "Saulo, Saulo, ¿bizr chee na' nau zi' xuzru' neda'?" 8 Nadxa bcheba' le': ¿Núzraqueze lue', Xran? Na' guzre' neda': "Neda' naca' Jesús, benne' Nazaret, bénnea' nau zi' xuzru' lue'." 9 Benne' ca' zralēne' neda' belelé'ene' xi' na', ne belezrebe', san quebe belenne' chí'i bénnea' gunné' neda'. 10 Nadxa gunnéa': ¿Bi dxal-la' guna', Xran? Na' Xránadxu gunné': "Guxasa, ne guxíajteze Damasco, ga na' zua benne' xelé'e lue' ca da dxal-la' gunu'." 11 Benne' ca' zjácālēne' neda' belequē'e na'a zeauntu' Damasco lawe' da bca'ana xi' na' neda' la chul-la.

12 'Zua na' tu benne' le' Ananías, benne' dxunē' du lazre' ca naca da bdxixruj be'e Moisés, na' xúgutē' benne' judío zaj zre'e Damasco dxelenné' cháwewē'e ca dxunē'. 13 Ananías na' ble'e naga zua' neda', na' guzre' neda': "Bicha' Saulo, na'a xe'e'enu'." Lu zra ná'queze belé'etēda', ne ble'eda' benne' na'. 14 Nadxa guzre' neda': "Dios chee xra xrtáudxu guquē'e lue' nédxutē' chee gúnbe'u ca naca da dxaca lazre' Le', ne chee le'enu' Benne' xrlátaje chee Dios, ne xennu' chí'i Bénnea'. 15 Lue' guchálaju' da naca chee Le' lau ca naca bénneache zaj zre'e lu xezr la xu, ne guzennu' benne' ca' ca naca da blé'enu', ne da bennu'. 16 Na'a, ¿bizr chee na' dxezrenu'? Guxasa, gudxúa nisa, ne bxren lazre' chee Xránu' Dios chee cuee' dul-la chiu'."

17 'Gate bezrina' Jerusalén, guxá'a lu xudau' xeajchálajlena' Dios, na' ble'eda' tu da ble'e Dios neda'. 18 Ble'eda' Xránadxu, na' guzre' neda': "Bdxuajche Jerusalén nigá lawe' da quebe xelezí'e ca naca da guchálaju' chia'." 19 Nadxa gucha' Le': Xran, zaj nézquezne' guxá'a neda' xúgutē' xu'u naga dxelezraga judío ca', ne xeajxri'a benne' ca' dxelájle'e chiu', na' bzra'a le' lizre xia, ne bzálajqueza' benne' ca', 20 na' gate belútiē' Esteban, benne' wen zrin chiu', na' zéqueza' neda' naca' tuze nen benne' ca' belútiē' le'. 21 Xránadxu guzre' neda': "Guxíaj, lawe' da sel-la' lue' zitu' naga zaj zra' benne' quebe zaj naque' judío."

*Da ben benne' dxenná be'e lu wedil-la*

22 Dizra' caní belenne', san lu dizra' nigá gulezú lawe' dxelebezre xe'e, dxelenné':

—¡Gate benne' nigá! ¡Québedxa dxal-la' gaca banē'!

<sup>23</sup> Na' gulebezre xá'aqueze', ne buluzale' sibe zra lanë', ne belequë'e bxrte xu da buluzale' sibe. <sup>24</sup> Cheë le na' benne' na' dxenná be'ë lu wedil-la gunná bé'ene' xelegú'ë Pablo lu xu'ula, ne xelu'ë le' cheë nne' da li, bizr cheë na' gulebezre xa'a benne' zan ca' cheë le'. <sup>25</sup> Gate bexuzre buluchéajë' na' Pablo, cheë xelu'ë le', Pablo guzre' tu benne' dxeajë' wedil-la zue' na':

—¿Naca cheë le'e güele tu benne' nababe' Roma, ne quebe ne guchí'ale aja naca cheë'?

<sup>26</sup> Gate ben benne' dxeajë' wedil-la da nigá, na' guxíajë' xeajëzre' benne' dxenná be'ë lu wedil-la:

—Guxúe xánniu' bi na' gunu', lawe' da nababa Roma benne' nigá.

<sup>27</sup> Nadxa benne' nigá gubigue' naga zë Pablo, na' bchebe' le':

—¿Da li na' nababu' Roma?

Pablo bechebe':

—Awe'.

<sup>28</sup> Na' benne' dxenná be'ë lu wedil-la gunné':

—Neda' da zrentë gudízruja' cheë gubaba' Roma.

Na' Pablo gunné':

—Neda' nabábaqueza' Roma gate gúlajtea'.

<sup>29</sup> Gate belenne' da nigá, na' benne' ca' ba zaj zë' xelu'ë Pablo belexe-cuase' cuita le', na' la gaze benne' na' dxenná be'ë lu wedil-la, gate guque bé'ene' nababa Pablo Roma, bzrebe' lawe' da nuchéajë' le' du xia.

*Pablo dxezrë' lau benne' xu'u lawe' blau ca' cheë judío ca'*

<sup>30</sup> Zra xula, benne' na' dxenná be'ë lu wedil-la guca lazre' nézene' bi cheë na' dxelagu zria judío ca' Pablo, na' bequë'ë du xia na' nadxéaj na' Pablo, na' gunná bé'ene' xelezraga benne' xíchajë ca' cheë bxruze, ne xúgute benne' xu'u lawe' blau. Nadxa guléajë' Pablo, na' bzë' le' lau benne' ca'.

## 23

<sup>1</sup> Pablo gunné'ë benne' xu'u lawe' blau ca', na' guzre' le':

—Le'e, bi bicha', ca naca xúgute da ba be'na' neda', zua zri xichaj lázrdawa' lau Dios.

<sup>2</sup> Nadxa Ananías, bxruze blau, gunná bé'ene' benne' zaj zë' na' xelegape' dxu'a Pablo. <sup>3</sup> Na' Pablo bechebe':

—Dios güe'ë lue', benne' dxun láweze da xrlátaje. Dxe'u na' cheë guchi'u chia' neda' ca dxenná bea da nadxixruj bea Dios. ¿Bizr cheë na' dxunu' da dxedábaga da bdxixruje', dxenná be'enu' xelu'ë neda'?

<sup>4</sup> Benne' ca' zaj zre'ë na' gulé'ë Pablo:

—¿Caní schanni' dxennáu' cheë bxruze blau cheë Dios?

<sup>5</sup> Pablo gunné':

—Le'e, bi bicha', quebe gunezda' che benne' nigá naque' bxruze blau lawe' da dxenná lu xiche cheë Dios: Quebe nneu' schanni' cheë benne' dxenná be'ë lázriu'.

<sup>6</sup> Nadxa guque bé'ene' Pablo bal-le' benne' xu'u lawe' zaj naque' benne' saduceo ca', na' xebal-le' zaj naque' benne' fariseo ca', na' gunné' zizraj:

—Le'e, bi bicha', neda' naca' fariseo, ne xrtia' zaj naue' fariseo ca', na' dxuchí'ale ca naca chia' lawe' da dxebeza lazra' xelexebán benne' gate.

<sup>7</sup> Gate gunná Pablo da nigá, na' benne' fariseo ca', ne benne' saduceo ca' gulezú lawë' dxulutil-la ljwezre' dizra', na' gulaca chupa la'a ca naca benne' ca'. <sup>8</sup> Ca'an guca lawe' da dxelenná saduceo ca' quebe xelexebán

benne' gate, ne quebe nu chilá' gubáz chee xabáa ca', ne quebe nu chilá' bènne'du xu'u bènneache, san benne' fariseo ca' dxeléajle'e dxata' xúgute da ca'. <sup>9</sup>Xúgute' gulebezre xe'e, na' gulezé bal-la benne' dxuluxuzájle'e da nadxixruj bea na, benne' zaj naque' fariseo, na' gulenné':

—Benne' nigá quebe bi da calèla ne gune'. Che nu bènnedu xu'u bènneache, u tu gubáz chee xabáa ba gunné' le', quebe dxal-la' nneđxu chee Dios.

<sup>10</sup>Na' bulutíl-lalé'e ljwezre' dizra', na' benne' na' dxenná be'e lu wedil-la bzrebe' xełeł-le' Pablo xuluzúzruje' le'. Chee le' na' gunná bé'ene' benne' dxjaca wedil-la xelexebéaje' le' lówela benne' ca', ne xelexeché'e le' lu xu'u na' naga zaj zra' benne' dxjaque' wedil-la.

<sup>11</sup>Xela xula, Xránadxu ble'e lawe' Pablo, na' guzre' le':

—Ben dipa lazru', Pablo, lawe' da ca bchálajquezu' chia' Jerusalén nigá, ca'an dxál-la' queze guchálaju' chia' lu xezre Roma.

*Zaj nun benne' judío ca xeluné' xelútié' Pablo*

<sup>12</sup>Zra xula bal-la benne' judío ca' beluné' tuze dizra' xelútié' Pablo. Gulenné':

—Dios cu'e dxi'u de' che bi xi'aj gágudxu, ne quebe ne gútedxu Pablo.

<sup>13</sup>Nadé chua benne' biu ca' zaj nachébe lazre' xeluné' da nigá. <sup>14</sup>Benne' caní xjaque' lau benne' xíchaje ca' chee bxruze ca', ne benne' gula sina ca', na' gulenné':

—Netu' ba guchebe lázrentu' lau Dios cu'e netu' de' che bi gáguntu', ne quebe ne gútentu' Pablo. <sup>15</sup>Na'a, le'e, ne xezícadxa benne' xu'u lawe' blau ca' dxal-la' nábale benne' dxenná be'e lu wedil-la xedajlegü'e Pablo wxre zila laule le'e, xełe bènnea' dxaca lázrele guchébe xánnele Pablo, na' netu' se cuásantu' gútentu' le' québela ne xide' nigá.

<sup>16</sup>Zri'ine bi zan Pablo benbe' ca naca da nigá, na' guxíajbe' naga zua Pablo cheajézebe' le'. <sup>17</sup>Nadxa Pablo gunné' tu benne' xu'u lu ne'e benne' ca' dxjaque' wedil-la, na' guzre' le':

—Guché' bi cuide' nigá lau benne' xíchaje chiu' lawe' da de da dxal-la' xebe' le'.

<sup>18</sup>Na' benne' na' xu'u lu ne'e benne' ca' dxjaque' wedil-la guché'e-be' lau xrane', na' guzre' le':

—Pablo, bènnea' nadxéaje' gunné' neda', na' gunabe' xedajgu'a bi cuide' nigá naga zu' lawe' da de da dxal-la' xebe' lue'.

<sup>19</sup>Benne' xíchaje na' guqu'e na' bi cuide' na', na' guché'e-be' chalá'ala, ne bchebe'-be':

—¿Bi dxaca lazru' xu'u neda'?

<sup>20</sup>Na' gunná bi cuide' na', gúzrebe' le':

—Benne' judío ca' ba zaj nune' tuze dizra' xelenabe' lue' che'u Pablo wxre zila lau benne' xu'u lawe' blau ca', xelenné' dxelaca lazre' xu-luchebe xánne' le'. <sup>21</sup>Quebe chéajle'u chee benne' ca' lawe' da nadé chua benne' ca' xebeze' le' bagácheze, ne ba gulechebe lazre' lau Dios Le' cu'e benne' ca' de' che bi xełe'aj xelawe', ne quebe ne xelútié' Pablo. Na'a ba zaj zue' dxebeze' xrtizru'.

<sup>22</sup>Nadxa benne' xíchaje na' bze' bi cuide' na' dizra', na' guzre'-be' quebe nu xebe' ba xeajézebe' le' caní.

*Dxelesel-le' Pablo lau Félix, benne' xu'u lu ne'e xezr la xu na'*

<sup>23</sup>Benne' xíchaje na' gunné' chupa benne' chee', benne' xu'u lu ne'e benne' ca' dxjaque' wedil-la, na' gunná bé'ene' le' xulucueze' chupa gaxúa



benne' dxjaque' wedil-la, benne' sa'aca ni'e, ne ga xun chi benne' dxjaque' wedil-la, benne' xelebía bzrina', ne chupa gaxúa benne' dxjaque' wedil-la, benne' xelu'e xia tunna, chee chjaque' lu xezre Cesarea dxedá' ga chizrela. <sup>24</sup> La gázqueze gunná bé'ene' xulucueze' bzrina' cuía Pablo, ne gunná bé'ene' xelech'e le' cháwedau' lau Félix, benne' xu'u lu ne'e xezr la xu na' waláz chee Roma. <sup>25</sup> Gusel-le' tu xiche da belúa benne' dxjaque' wedil-la. Caní naxúaj na:

<sup>26</sup> Neda' Claudio, dxugapa' lue' diuzre Félix, benne' xu'u lu na'u xezr la xu nigá. <sup>27</sup> Benne' judío ca' gulél-le' benne' nigá ná'tega na'a chee xelútie' le'. Gate gunezda' neda' nababe' Roma, na' guxíajlena' benne' chia' ca', benne' dxjaque' wedil-la, xeajselá' le'. <sup>28</sup> Guca lazra' nezda' bi dxelagu zria le', na' guche'a le' lau benne' xu'u lawe' ca' chee judío ca'. <sup>29</sup> Na' gunezda' dxelagu zria le' da naca chee da nadxixruj bea chee judío ca', san quebe naca na chee xelútie' le', ne chee chu'e lizre xia. <sup>30</sup> Gate benda' ca ba zaj nun judío ca' chee xelútie' le', na' dxusel-la' le' naga zu', ne ba gucha' benne' ca' dxelagu zria le' waca xelawe' le' zria lau lue'. Gaca xrlátaje chiu'.

<sup>31</sup> Nadxa benne' dxjaque' wedil-la belun'e ca gunná be'e benne' xíchaje chee', na' beleché'e Pablo chizrela, na' belezrine' xezre Antípatris. <sup>32</sup> Zra xula benne' dxjaca wedil-la, benne' ca' dxeledá' ní'aze, belexezrine' Jerusalén, na' benne' dxjaque' wedil-la zaj zrie' bzrina' beleché'e Pablo naga dxal-la' zrine'. <sup>33</sup> Gate belezrine' xezre Cesarea, na' bulunézruje' benne' xu'u lu ne'e xezr la xu na' xiche na', ne buludé'e Pablo lu ne'e. <sup>34</sup> Ca bexuzre blabe' xiche na', na' benne' xu'u lu ne'e xezr la xu na' bchebe' ga benne' Pablo. Gate benne' naque' benne' chee xezre nababa Cilicia, <sup>35</sup> na' guzre' le':

—Guchi'a chee da dxaca chiu' gate xeledá' benne' ca' dxelagu zria lue'.

Nadxa gunná bé'ene' cha benne' dxjaca wedil-la xuluxúe' Pablo naga zua xu'u lawe' chee Herodes.

## 24

### *Pablo dxuzri'e dizra' da dxácale na le' lau Félix*

<sup>1</sup> Ca gudé gazxu' zra, Ananías, bxruze blau, bzrine' xezre Cesarea nen bal-la benne' gula sina ca', ne tu benne' dxenné' waláz chee benne' ca', le' Tértulo. Benne' caní belezrine' lau benne' xu'u lu ne'e xezr la xu na' chee xelagu zria Pablo. <sup>2</sup> Gate xeajlexrí'e Pablo, na' guzú lau Tértulo dxawe' xria Pablo, dxe'e Félix:

—Xcalenu' lue', benne' xu'u lu na'u xezr la xu nigá, lawe' da zúantu' xel-la' dxebeza zri lazre', na' da chawe' dxgua dxaca na cheentu', na' ca dxenná be'enu' netu' lu xel-la' sina chiu' dxexedxúaj na chawe'. <sup>3</sup> Xúgute da nigá dxezí'queze lu na'ntu' gáteteze na', ne dxentu' lue' xcalén cuinu', Félix. <sup>4</sup> Chee québedxa guntu' lue' zédete, dxata' xueda' lue' gun zren lazru' xennu' cheentu' tu chí'idau'. <sup>5</sup> Dxenná'antu' benne' nigá dxúnle'e da calela, ne gáteteze na' lu xezr la xu nigá dxune' benne' judío chupa la'a, ne naque' benne' xíchaje chee benne' ca' zaj da' tu benne' Nazaret. <sup>6</sup> Benne' nigá guca lazre' guzúe' chalá'ala xudau' cheentu', na' netu' gudél-lantu' le', ne guca lázrentu' guchí'antu' da naca chee' ca nadxixruj bea na cheentu'. <sup>7</sup> Na' Lisias, benne' dxenná be'e lu wedil-la, bequix'e le' lu na'ntu' xadía. <sup>8</sup> Na' gunné' che zaj zra benne' xelagu zrie' Le', dxal-la'

xelélé'e lau lue'. Lue' gaca guchebu' benne' nigá, na' nézenu' naca da li zria dxáguntu' le'.

<sup>9</sup> Benne' judío ca' zaj zře'e na' gulenné' naca da li xúgute da ca'. <sup>10</sup> Nadxa benne' xu'u lu ne'e xezr la xu na' guchisa ne'e chee guchalaj Pablo, na' gunná Pablo:

—Dxebélé'eda' dxunu' neda' lataj xecheba' lau lue', lawe' da nezda' naca xrlátaje ca dxuchi'u da dxaca chee xezr la xu cheentu' ba zeaj zane' iza. <sup>11</sup> Lué'queze waca chéajni'inu' ba zeaj chazrinnu zraze bla'a Jerusalén chee güe lá'ana' Dios. <sup>12</sup> Quebe belelé'ene' neda' nu gutil-la' dizra', ne quebe nu benne' guché'ena' zraga lu xudau' blau, ne lu xezícala xu'u ca', ne lu neza ca' chee xezre na'. <sup>13</sup> Benne' caní quebe xelezéquene' xululé'ene' naca da li ca zaj naca da dxelawe' neda' zria. <sup>14</sup> Tu da dxexecheba', dxucá'ana szrena' Dios chee xra xrtáudxu ca', dxuna' ca da dxelenná benne' caní naca na da wen lazre', lawe' da dxéajle'a xúgute da naxúaj na lu xiche chee da nadxixruj bea na, ne chee benne' ca' buluchálaje' waláz chee Dios. <sup>15</sup> Neda' dxebeza lázrqueza' ca da gun Dios, ca dxebeza lazre' benne' caní, dxebeza lázrentu' Dios gusebané' benne' gate ca', benne' xrlátaje, ne benne' ca' dxelune' da caléla. <sup>16</sup> Chee le' na' dxue lazra' sua zri xichaj lázrdawa' lau Dios, ne lau bèneache ca'.

<sup>17</sup> 'Ca gudé gudá' xezre xula ca' zane' iza, na' bezrina' lazria' chee gunézruja' da gácale na benne' xache' ca', ne cu'a guna' lau Dios. <sup>18</sup> Da nigá dxuna' neda' gate bal-la benne' judío chee xezre ca' zaj nababa Asia belexezrague' neda' lu xudau' ca gudé bca'ana chawe' cuina' cáteze naca da zéajlentu', san quebe nu benne' bchaga', ne quebe nu benne' guché'ena' zraga. <sup>19</sup> Benne' caní dxal-la' xelélé'e nigá chee xelawe' neda' zria che bi zua dxelaca chee' nen neda', <sup>20</sup> san che quebe bi de, na' benne' caní zaj zře'e nigá dxal-la' xelenné' che bi belezrélene' da dxebaga' gate zua' lau benne' xu'u lawe' blau ca' chee judío ca'. <sup>21</sup> Tuze da bēna' gate zua' lau benne' ca', gunnéa' zizraj: Na'a dxuchí'ale chia' lawe' da dxeajlí lazra' xelxebán benne' gate.

<sup>22</sup> Gate Félix benne' da nigá, na' bca'ane' na cá'aze lawe' da neze xanne' le' ca naca chee benne' ca' dxeléajle'e chee Jesús, na' guzre' benne' ca':

—Gate xida Lisias, benne' dxenná be'e lu wedil-la, na' chéajni'idxeda' chee da nigá dxaca chee.

<sup>23</sup> Nadxa Félix gunná bé'ene' benne' dxenná be'e lu wedil-la, ne benne' ca' dxenná be'ene' xelxegu'e Pablo lu xu'u lawe' na', na' xelu'e le' lataj bi gune', ne xelu'e lataj benne' ljwezre Pablo cheajlenné'e le', ne bi xelune' chee'.

<sup>24</sup> Gudé tu chupa zra Félix belé'e xetú nen zru'ule' Drusila, nu'ula judío, na' gunná bé'ene' bzrin Pablo chee guchálajlene' le' ca naca xel-la' dxeajlí lazre' chee' chee Jesucristo. <sup>25</sup> Gate Pablo bchálajlene' le' ca dxal-la' gundxu da xrlátaje, ne nna be'e cuínadxu, na' zrin zra guchi'a Dios cheedxu gate cheajsé chee xezr la xu, na' bzrebe Félix, ne guzre' Pablo:

—Bexíaj na'a. Gate nalátaja', na' nnéqueza' lue'.

<sup>26</sup> La gaze dxaca lazre' Félix gunezruj Pablo le' dumí chee gusané' le'. Chee le' na' gunnéle'e Pablo chee guchálajlene' le'. <sup>27</sup> Ca' guca, gudé chupa iza, na' Félix bedxúaje' xrlátaje' ga xu'u lu ne'e xezr la xu na', na' bedé tu benne' le' Porcio Festo waláz chee Félix. Félix bca'ane' Pablo lizre xia lawe' da guca lazre' xegá'ane' chawe' lau judío ca'.

## 25

*Pablo dxexechebe' lau Festo*

<sup>1</sup> Nadxa Festo bzrine' xezre Cesarea chee si' lu ne'e gaque' benne' xu'u lu ne'e xezr la xu na', na' gate guca chunna zra, guxiáje' Jerusalén. <sup>2</sup> Lu xezre na' belezrin benne' xíchaje ca' chee bxruze ca', ne benne' judío blau ca' lau le', ne gulawe' zria Pablo. <sup>3</sup> Gulata' xuene' benne' xu'u lu ne'e xezr la xu na' sel-le' benne' cheajlexezri'e Pablo chee xezrine' Jerusalén. Benne' judío ca' ba zaj nune' xelúti'e Pablo la neza gate zezé'e na'. <sup>4</sup> Bechebe Festo ba xu'u Pablo lizre xia lu xezre Cesarea, na' léqueze' ba nune' chéajje' na' xetú chupa zra. <sup>5</sup> Na' guzre' benne' ca':

—Benne' ca' zaj zre'e lávela le'e, benne' zaj nape' xel-la' dxenná bea, dxal-la' chjácálene' neda' Cesarea, na' che benne' na' zua bi da caléla da bene', waca gágule le' zria.

<sup>6</sup> Festo begá'ane' Jerusalén ca du xrunu' ga chi zraze, na' bezrine' Cesarea. Zra xula gudxé'e lataj blau chee', ne gunná bé'ene' xeajlexri'e Pablo. <sup>7</sup> Gate bzrin Pablo lau benne' xu'u lu ne'e xezr la xu na', na' gulebiga judío ca' zá'aca Jerusalén, ne gulágule'e zria Pablo, san quebe guca xululé'ene' naca na da li. <sup>8</sup> Nadxa Pablo bechebe' waláz chee', gunné':

—Neda' quebe bi da caléla ne guna', quegá chee da nadxixruj bea chee judío ca', ne quegá chee xudau' chee', ne quegá chee César.

<sup>9</sup> Festo guca lazre' xegá'ane' xrlátaje lau benne' judío ca', na' bchebe' Pablo:

—¿Dxaca lazru' chéaju' Jerusalén chee guchi'a neda' ca naca chiu' na'?

<sup>10</sup> Pablo bechebe':

—Zua' lau xu'u lawe' da nuzúa César naga dxal-la' zri'a ca naca chia'. Lue' nézqueznu' quebe bi da zrinnaj ne guna' chee benne' judío ca'. <sup>11</sup> Che ba be'na' tu da zrinnaj da dxun na gútele neda', waca gútele neda'. Che quebe bi de' naca na da li ca naca zria da dxelawe' neda', quebe nu napa xel-la' dxenná bea gudé'e neda' lu na' benne' ca'. Dxenaba' zri'a chia' lau César.

<sup>12</sup> Ca gudé bchálajlene' benne' dxuluzéajni'i le', na' Festo guzre' Pablo:

—Ba gunabu' zri'a chiu' lau César. Chéaju' lau César.

*Pablo dxezrine' lau Agripa, benne' wenná bea*

<sup>13</sup> Ca gudé zane' zra Agripa, benne' wenná bea, ne bi zane' belezrine' Cesarea chee xulugape' Festo diuzre. <sup>14</sup> Gulezúe' na' tu chupa zra, na' Festo bzenne' Agripa, benne' wenná bea na' ca naca chee Pablo. Guzre' le':

—Zua tu benne' nigá, benne' bca'ana Félix lizre xia. <sup>15</sup> Gate guzúa' xezre Jerusalén, na' benne' xíchaje ca' chee bxruze ca', ne benne' gula sina ca' chee judío ca' gulenné' chee benne' nigá, ne gulenabe' neda' chuga' chee' gati'e. <sup>16</sup> Neda' becheba' benne' ca', gunnía' benne' xu'u lawe' chee Roma quebe nu benne' dxelechugue' chee' gati'e che quebe zrine' lau benne' ca' dxelawe' le' zria chee xechébe' waláz chee'. <sup>17</sup> Chee le' na', gate belelá' benne' ca' nigá, quebe guzreda', na' zra xula gudxe'a lataj blau chia', ne gunná be'eda' bla' benne' na'. <sup>18</sup> Benne' ca' gulawe' le' zria quebe bi gulenné' chee' ca da gúqueda' neda'. <sup>19</sup> Laze láweze da gulenné' chee' naca na ca naca da dxeléajle'e chee Dios, ne chee tu benne' le' Jesús, benne' gute, san dxenná Pablo naca bane'. <sup>20</sup> Quebe bezréleda' ájala guna' chee da na', na' bcheba' Pablo che dxaca lazre' chéajje' Jerusalén chee zri'a ca

naca chee' na'. <sup>21</sup> Nadxa le' gunabe' zri'a chee' lau César Augusto, na' gunná be'eda' xegá'ane' lizre xia cadxa séqueda' sel-la' le' lau César.

<sup>22</sup> Nadxa gunná Agripa, dxee' Festo:

—La gaze neda' dxaca lazra' xenda' chee' benne' nigá.

Na' bechebe Festo:

—Wxre xennu' chee'.

<sup>23</sup> Zra xula, gate belezrin Agripa, ne Berenice ga na', belú'e lu duté xel-la' szren nen benne' dxenná be'e lu wedil-la, ne benne' blau ca' chee xezre. Na' Festo gunná bé'ene' xeajlexrí'e Pablo, <sup>24</sup> na' gunné':

—Agripa, benne' wenná bea, ne le'e, nazrágale nigá nen netu'. Nigá zua benne' na'. Benne' zan, benne' judío zaj zre'e Jerusalén, ne benne' zaj zre'e Cesarea nigá, gulenné' chee' benne' nigá, na' tu gulézqueze' neda' dxal-la' gati'e. <sup>25</sup> Neda' dxéqueda' quebe bi bene' da gudé na le' gati'e, san léqueze' gunabe' zri'a chee' lau César. Chee' le' na' ba nuna' chee' sel-la' le' lau César. <sup>26</sup> Quebe bi de' da guzúaja' chee' Xrana' César ca naca chee' benne' nigá. Chee' le' na' dxuzúa' benne' nigá laule le'e, ne da naca bláuqueze, dxuzúa' le' lau lue', wenná bea Agripa, chee' guchebu' le' chee' gata' late' da guzúaja' ca naca chee'. <sup>27</sup> Dxéqueda' quebe naca chawe' sel-la' tu benne' nadxéaje' du xia, ne quebe nnia' bi da zria nape'.

## 26

*Pablo dxexechebe' lau Agripa, benne' wenná bea*

<sup>1</sup> Nadxa gunná wenná bea Agripa, guzre' Pablo:

—Waca xechebu'.

Na' Pablo guchisa ne'e, ne guzú lawe' dxuchálaje', dxenné':

<sup>2</sup> —Dxebéle'eda' dxunu' neda' lataj dxuchálaja' lau lue', wenná bea Agripa, chee' xecheba' ca da gulenná benne' judío chia' neda', <sup>3</sup> ne da naca blaudxa, lawe' da nézqueznu' lue' ca naca da zéajlentu' netu', benne' judío ca', ne ca naca dizra' dxutil-la ljuwézrentu'. Chee' le' na' dxenaba' lue' xennu' chia' duté xel-la' zren lazre' chiu'.

<sup>4</sup> 'Xúgute' benne' judío ca' zaj nézene' ca bēna' lazria', ne lu xezre Jerusalén gate nácatea' bidau'te. <sup>5</sup> Zaj nézqueze benne' ca', ne waca xelexechebe' che dxelaca lazre', ca nácatea' benne' cuíde'te, naca' fariseo. Benne' fariseo ca' zjácaledxe' ca naca chee' da dxeléajle' judío ca' chee' Dios. <sup>6</sup> Na'a lawe' da dxebeza lazra' gusebán Dios benne' gate ca', ca guchēbe lazre' chee' xra xrtáuntu' ca', benne' ca' buluzúje' neda' lau xu'u lawe'. <sup>7</sup> Dxelebeza lazre' chazrinnu' cue' zri'ine zre sua Israel xeelé'ene' gaca ca naca da nigá guchēbe lazre' Dios, na' chee' le' na' dxulucá'ana szrene' Dios, ne dxelunē' zrin chee' te zra ne chizrela. Na'a, wenná bea Agripa, benne' judío ca' dxelawē' neda' zria lawe' da dxebeza lazra' ca naca da caníqueze da nachēbe lazre' Dios. <sup>8</sup> ¿Quebe dxéajle'u gusebán Dios benne' gate ca'?

<sup>9</sup> 'Néda'queza' nédxute' gúqueda' da zan da dxal-la' guna' chee' benne' ca' dxeléajle'e chee' Jesús, benne' Nazaret. <sup>10</sup> Caní bēna' lu xezre Jerusalén. Lu xel-la' dxenná bea chee' benne' xíchaje' ca' chee' bxruze ca', benne' zan bzra'a lizre xia, benne' dxeléajle'e chee' Jesús, na' gate belútie' benne' ca' neda' bēnqueza' tuze benne' ca' belútie' le'. <sup>11</sup> Zane' lásate' bdea' benne' ca' ba xa' chee' xulusane' xel-la' dxeleajlí lazre' chee'. Caní bēna' xúgute' lu xu'u ca' naga dxelezraga judío ca', na' lu xel-la' dxezrá'a chia' benne' ca', gudáu zi' xuzra' benne' ca' zaj zre'e lu xezre zitu' ca'.

12 'Chee guna' da nigá zexá'a xezre Damasco, zaj nasel-la benne' xíchaje ca' chee bxruze ca' neda' nen xel-la' dxenná bea chee'. 13 Ca zexá'a xu'a neza na', du wagubizra ble'eda' tu xi' da za' xabáa da nácadxa ca xel-la' dxenná' chee' gubizra, na' gusení na naga zexá'a neda' nen benne' zjácalene' neda'. 14 Nadxa xúgute<sub>ntu</sub>' xeajcházentu' lu xu, na' benda' chi'i tu benne' gunné' dizra' hebreo, guzre' neda': "Saulo, Saulo, ¿bizr chee na' nau zi' xuzru' neda'? Lue'ze dxun zi' cuinu' ca dxun bezre gate dxulíbeba' lawe' xágala da dxádue'-ba'." 15 Nadxa gunnéa': ¿Nuzra Lue', Xran? na' Xránadxu guzre' neda': "Neda' naca' Jesús, bénnea' nau zi' xuzru'. 16 Bexasa, guzé, lawe' da ble'e lawa' lue' chee' gunu' zrin chia', ne chee' xechebu' ca naca da ba blé'enu', ne ca naca da za le'enu' gate te na'a. 17 Guselá' lue' lu na' benne' judío ca', ne lu na' benne' zitu' ca' naga dxusel-la' lue' na'a. 18 Dxusel-la' lue' lau benne' ca' chee' sálaju' xiaj lau benne' ca' chee' xulusane' da naca chee' da chul-la, na' xelune' da naca chee' xel-la' naxaní', ne chee' xelixedxúaje' lu na' da xriwe', ne xelxú'e lu na' Dios, ne chee' xeléajle'e chia' neda', na' xunite lau Dios ca naca dul-la chee', ne gaca chee' tu da xelape' lálwela benne' ca' ba gucá'a Dios."

19 'Ca' guca, wenná bea Agripa. Bzua' dizra' ca naca da ble'e Dios neda' da naca chee' xabáa. 20 Nedxu bchálaja' dizra' chee' Dios lau benne' zaj zre'e xezre Damasco, na' gudé na' lau benne' zaj zre'e Jerusalén, ne ca naca naga nababa Judea, ne lau benne' ca' quebe zaj naque' judío. Gucha' benne' ca' dxal-la' xelxebí'i lazre', ne xelexexaque' chee' Dios, na' xelune' da xelunna bea na ca da ba zaj naque'. 21 Chee' le' na' benne' judío ca' gulél-le' neda' lu xudau', ne gulaca lazre' xelútie' neda'. 22 Dios dxácalene' neda', na' ze' chúchuqueza' lu zra na'a zra, dxuchálajlena' xúgute benne' ca naca chee' Dios, benne' cá'aze ca', ne benne' blau ca'. Dxapa' benne' ca' tuze ca naca da gulenná benne' ca' buluchálaje' waláz chee' Dios, ne da gunná Moisés dxal-la' gaca. 23 Gulenné' Cristo dxal-la' si' saque', na' ca te gatie' dxal-la' xebane' ládujla benne' gate nédxudxa ca xúgute benne' ca', na' gulenné' xelén benne' judío ca', ne benne' quebe zaj naque' judío ca naca chee' xel-la' naxaní' chee' Dios, da dxulé'e na le' ca gaca xelelé'.

*Pablo dxaca lazre' guzéajni'ine' Agripa gaque' benne' chee' Cristo*

24 Gate gunná Pablo da caní, na' gunná zizraj Festo:

—Nadá xichaj lázrda'u, Pablo. Lawe' da dxusédele'u, na' nadá xichaj lázrda'u.

25 Pablo bechebe':

—Quebe nadá xichaj lázrdawa', dxapa' cuinu' Festo. Da dxennéa' naca na da gaca chéajledxu, ne da li. 26 Nigá zua wenná bea Agripa. Nézele'ene' ca naca chee' da caní, na' chee' le' na' dxuchálaja' duté xel-la' dxuxrén lazre' chia' lawe'. Nézquezda' le' nézene' ca naca da nigá lawe' da dxuchálaja' ca naca chee' da quebe guca na bagácheze. 27 ¿Dxéajle'u lue', wenná bea Agripa, ca naca da gulenná benne' ca' buluchálaje' waláz chee' Dios? Nezda' dxéajle'u.

28 Nadxa gunná Agripa:

—Xeláteze guzéajni'inu' neda' gaca' chee' Cristo.

29 Nadxa gunná Pablo:

—Che xeláteze u che da zrendxa dxenaba' gun Dios, quegá lue'ze, san cá'anqueze xúgute benne' dxellenne' chia' na'a, xelaque' ca néda'queza', san quebe xeledxéaje' du xia.

<sup>30</sup> Ca gudé gunná Pablo da nigá, na' gulexasa wenná bea, ne benne' xu'u lu ne'e xezr la xu na' tu zren nen Berenice, ne xúgute benne' ca' zaj dxe'e na'. <sup>31</sup> Belexedxúaje' cheeze' chee xuluchálajle ljwezre' ca naca chee da nigá. Na' gulenné', dxelé ljwezre':

—Benne' nigá quebe bi da calela ne guné' da gudé na le' gatie', ne quebe dxal-la' chu'e lizre xia.

<sup>32</sup> Na' gunná Agripa, guzre' Festo:

—Waca gusandxu benne' nigá chela quebe gunabe' zri'a chee' lau César.

## 27

### *Dxelesel-le' Pablo lu xezre Roma*

<sup>1</sup> Gate ba zaj nune' xelesel-le' netu' lu xezr la xu Italia, na' Pablo, ne xezcala benne' ca' zaj zre'e lizre xia, buludé' le' lu na' tu benne' dxenná bé'ené' lu wedil-la le' Julio, benne' yu'u lu ne'e tu cue' benne' dxjaque' wedil-la nazí le na Benne' Chee Augusto Dxjaque' Wedil-la. <sup>2</sup> Na' guxú'untu' tu lu da dxedá lawe' nísadau' chee xezre Adramitio, da ba zua te na xézredu ca' chee ga nababa Asia. Zúalequeze Aristarco netu', tu benne' xezre Tesalónica chee ga nababa Macedonia. <sup>3</sup> Zra xula bzrintu' xezre Sidón, naga Julio bénle'e da chawe' chee Pablo, na' be'e le' lataj xejnné'e bi bíchedxu ca' chee bi belune' chee'. <sup>4</sup> Gate beza'ntu' xezre Sidón, na' gudentu' naga dxe' xezr la xu Chipre da naxechaj nísadau'. Blé'entu' na chala'a xéglala lawe' da dxaca be' da quebe dxue na da dxedá lawe' nísadau' lataj cheaj na lizra lidau'. <sup>5</sup> Gudentu' lu nísadau' le nna' xezre ca' zaj nababa Cilicia, ne Panfilia, na' bzrintu' xezre Mira da nababa Licia.

<sup>6</sup> Lu xezre na' benne' dxenná be'e lu wedil-la bezrague' tu da dxedá lawe' nísadau' chee xezre Alejandría da zeaj na xezr la xu Italia, na' bzre'e netu' lawle chee zeajntu' Italia na'. <sup>7</sup> Zane' zra zéajntu' chawe' lazre', na' stébele'e bzrintu' le nna' xezre Gnido. Lawe' da ne za be' na' dxedábaga na da dxedá lawe' nísadau', na' gudentu' le nna' Salmón, ne guxéchajntu' naga dxe' xezr la xu Creta da naxechaj nísadau'. <sup>8</sup> Stébele'e gudentu' chala'ala naga dxe' Creta na', na' bzrintu' tu xézredau' nazí le na Buenos Puertos, da zua gagu naga zua xezre Lasea.

<sup>9</sup> Záne'te zra bnítentu' xu'untu' da dxedá lawe' nísadau' na', na' ba naca stebe zéajntu' lu nísadau' na' lawe' da ba dxexú'udxu beu' zaga. Chee le' na' bzéajni'i Pablo benne' ca'. <sup>10</sup> Dxenné':

—Le'e, benne', dxelé'eda' wácalé'e stebe naga zéajdxu na'a, na' wabía xi' da dxedá lawe' nísadau' nigá ne xua da nua na, na' zrúzrete' cuía xidxu dxi'u.

<sup>11</sup> Benne' dxenná be'e lu wedil-la guxéajlédxe' chee xrane da dxedá lawe' nísadau' na', ne chee benne' xu'u na lu ne'e, ca chee Pablo. <sup>12</sup> Na' lawe' da quebe naca lataj na' chawe' súadxu na' beu' zaga ca', na' xúgute' guléquene' nácadxa chawe' xezá' da dxedá lawe' nísadau' na' chee xexéaj na Fenice, tu xezre chee Creta na', da dxe' chala'a chee xezr la xu Creta naga dxebía gubizra, na' xegá'anadxu na' beu' zaga ca'.

### *Dxaca be' bdunu' lu nísadau'*

<sup>13</sup> Nadxa guzú' lau dxaca lase be' da za' chala'a naga dxedé' gubizra beu' zaga, na' guléquene' waca chéajtezentu' lu nísadau', na' gudentu' gáguze lu xezr la xu Creta na'. <sup>14</sup> Nadxa chíteze guca guzú' lau dxácalé'e be' bdunu'

da za' chalá'a ga za' be' zaga. <sup>15</sup> Be' na' guzú lau dxuzriga na chalá'ala da dxedá lawe' nísadau' na', na' lawe' da québedxa guca chéajdxantu' naga za' be' na' ben na ba xen bēntu' lataj bzriga na da dxedá lawe' nísadau' na'. <sup>16</sup> Na' gudentu' cúzrela tu xēzr la xudau' naxechaj nísadau' da nazí le na Claudia, naga québedxa dxácatē na be' na' wal-la, na' stēbele'ē gúquentu' bcuentu' da dau' da dxedá lawe' nísadau' da nazrube xu da zren na' xu'untu', na' bzuantu' na lu da zren da dxedá lawe' nísadau' na'. <sup>17</sup> Ca gudé bulucuenē da dau' na', na' buludé' du zri'a ca' zran da dxedá lawe' nísadau' na' da xeluxru chacha na. Nadxa, lawe' da belezrebe' chaze da dxedá lawe' nísadau' na' lu xuzre' naga nazí le Sirte, na' bululétajē ladxe' ca' da dxelecá'a be' lu da dxedá lawe' nísadau' na', na' belúe lataj be' na' bzriga na len. <sup>18</sup> Zra xula, lawe' da ne dxácalē'ē be' bđunu', gulezú lawē' dxeledxú'unē' xua ca' lu nísadau', da nua da dxedá lawe' nísadau' na'. <sup>19</sup> Zra guxunne' zra nen ná'quezentu' gudxú'unantu' lu nísadau' da dxuluchínene' cheē da dxedá lawe' nísadau' na'. <sup>20</sup> Zane' zra quebe blé'entu' gubizra ne belaj ca', ne ca naca be' bđunu' zren na' ne dxuzriga na da dxedá lawe' nísadau' na', na' québedxa guleza lázrentu' láquezentu'.

<sup>21</sup> Zane' zra gudentu' quebe náguntu', na' guzē Pablo lávela benne' ca', ne gunné':

—Le'e, benne', cháwedxa la guca cheedxu la benle da gucha' le'e, na' quebe bedxúajdxu lu xēzr la xu Creta, ne quebe bi guque da dxedá lawe' nísadau' nigá, na' xua' da nua na quebe guzría xi'. <sup>22</sup> Na'a, quebe guchebe lázrele. Netudxu dxi'u quebe cuía xidxu, lácala cuía xi' da dxedá lawe' nísadau' nigá. <sup>23</sup> Ba dxēle ble'e lau tu gubáz cheē xabáa cheē Dios neda'. Naca' cheē Dios nigá ne dxuna' zrin cheē'. <sup>24</sup> Gubáz na' guzre' neda': “Quebe zrebu', Pablo, lawe' da dxun na ba xen zrinu' lau César, na' ne chiu' lue' Dios guselē' lu xel-la' gute xúgute' benne' zaj zra' nen lue' lu da dxedá lawe' nísadau' nigá.” <sup>25</sup> Cheē lē na', benne', le gun dipa lázrele, lawe' da dxuxrén lazra' Dios, ne nezda' waca ca gunná gubáz cheē xabáa na' bchálajlēnē' neda'. <sup>26</sup> Na'a dxun na ba xen cheajchaze da dxedá lawe' nísadau' nigá tu lu xēzr la xu da naxechaj nísadau'.

<sup>27</sup> Ca gudé chinu' zra gate naca chizrela, ne zrantu' lu nísadau' nazí le na Adria, na' be' na' dxaca dxuzriga na da dxedá lawe' nísadau' quela ca'ala, na' dxēla guleque be'e benne' ca' dxulusá da dxedá lawe' nísadau' na' ba dxezrín na dxu'a xu bizre. <sup>28</sup> Na' buludxixre' cátite situj dxe' nisa na', na' dxe' na galaj esa. Na' xetú chí'idau' gudé buludxixre' da xula, na' dxe' na chinu' ésaze. <sup>29</sup> Belezrebe' cheajtá da dxedá lawe' nísadau' na' xiaj, na' buluzalē' tapa xia da nácalē'ē zi'i zran nisa zeaj zranla da dxedá lawe' nísadau' na', na' gulebeze' chaní' dudxuze dxelezrebe'. <sup>30</sup> Nadxa benne' ca' dxulusá da dxedá lawe' nísadau' na' guléquene' xelexedxúajē' lu da dxedá lawe' nísadau' na', na' gulezú lawē' dxululétajē' da dau' na' zria lawe' da zren na' dxedá lawe' nísadau', dxelunē' ca benne' xuluzáladxa xia da guxru na da dxedá lawe' nísadau' zren na' da zeaj laula na. <sup>31</sup> Pablo bzenne' benne' dxenná be'ē lu wedil-la, ne benne' dxjaque' wedil-la, dxenné':

—Che quebe xelegá'ana benne' caní lu da dxedá lawe' nísadau', quebe lalē le'e.

<sup>32</sup> Nadxa benne' dxjaque' wedil-la gulechugue' du zri'a da nadxéaj da dau' na', na' belúe' na lataj bexruj na lu nísadau'.

<sup>33</sup> Ca guxaní'sise' bzéajni'i Pablo xúgute' benne' ca' dxal-la' xelawē' xeta, gunné':

—Ba zeaj chinu' zra quebe dxásele ne quebe dxágule. <sup>34</sup> Dxata' xueda' le'e gágule. Da nigá dxun na ba xen chee' lale. Netudxu dxi'u quebe cuía xi' netú xicha xíchajdxu.

<sup>35</sup> Ca gunné' caní, Pablo guqu'é'e tu xeta xtila, na' guzre' Dios: "Xcalenu'", lau xúgute' benne' ca'. Nadxa bzúzruje' na, na' guzú lawe' dxawe'. <sup>36</sup> Nadxa xúgute' belún dipa lazre', na' gulezú lau dxelawe'. <sup>37</sup> Cátite netu' zrantu' lu da dxedá lawe' nísadau' na' nácantu' chupa gaxúa ga xun chinu' tuntu'. <sup>38</sup> Ca gudé gulawe' cátite guléljeng', na' buluzale' zrua' xtila lu nísadau' chee' bezrá' da dxedá lawe' nísadau' na'.

*Dxebía xi' da zren da dxedá lawe' nísadau'*

<sup>39</sup> Gate guxani', benne' ca' dxulusá da dxedá lawe' nísadau' na' quebe belexúnbe'e xezr la xu na' da zua na le nna' naga zaj zre'e. Belelé'ene' naga dxexú'u nísadau' gachaj lówela xezr la xu na', na' dxu'e na' naca lache'. Na' gulaca lazre' xuluxudé'e da dxedá lawe' nísadau' laduj na'. <sup>40</sup> Gulechugue' du zri'a ca' zaj nacá'a xia ca', ne bulucá'ane' xia ca' lu nísadau'. Gulesezre' du zri'a da nadxéaj ne'e xaga da dxuzechaj na da dxedá lawe' nísadau'. Nadxa gulechise' ladxe' da dxecá'a be' da zeaj lówela da dxedá lawe' nísadau', na' da dxedá lawe' nísadau' na' guzú lau dxebiga na naga naca lache'. <sup>41</sup> Bzrin na naga dxezraga nisa na' dxupa la'a, na' da dxedá lawe' nísadau' na' guxaze na lu xuzre' da dxe' zran nisa na'. Zeaj lówela da dxedá lawe' nísadau', na' begá'ana na chalásaze lu xuzre' na', ne québedxa gulezéquene' xuluté' na. Da zeaj zranla guzú lau dxuzruj na lawe' da dxeajéle'e xeajxruza chee' nísadau' na' zran da dxedá lawe' nísadau' na'. <sup>42</sup> Benne' dxjaque' wedil-la gulaca lazre' xelúti'e benne' zaj nadxéaj'e chee' quebe xuluxuzrúnnuje' xelezrú'e lawe' nisa na'. <sup>43</sup> Benne' dxenná be'e lu wedil-la guca lazre' guselé' Pablo, na' quebe be'e lataj benne' dxjaque' wedil-la xelúti'e benne' ca'. Na' gunná bé'ene' benne' ca' dxelaque' dxelezrú'e nisa cheajlexexritie' lu nisa na' chee' xelexezrine' lu xu bizre. <sup>44</sup> Benne' ca' xezícala, bal-lé' gulequ'é'e blaga', ne xebal-lé' gulequ'é'e blaga' bizruj chee' da dxedá lawe' nísadau' na', na' caní guca, xúgute' belexezrine' lu xu bizre.

## 28

*Da ben Pablo lu xezr la xu na' nazí le na Malta*

<sup>1</sup> Ca gulá xúgutentu', na' gunézentu' xezr la xu na' da naxechaj nísadau' nazí le na Malta. <sup>2</sup> Benne' zaj zre'e na' belúnle'e netu' cháwedau'. Gulebéche'le'e xi' lawe' da dxúnle'e zaga, ne dxaca xiuj, na' gulenné' netu' cheajsentu' dxu'a xi' chee' xezré'entu'. <sup>3</sup> Nadxa Pablo guqu'é'e tu xrunu zruze xaga, na' ca dxuzré'e na lu xi', bedxúaj tu belá' da na' dxuzrúnnujba' lu da la na', na' gudagu xa'aba' na' Pablo. <sup>4</sup> Gate belelé'e benne' ca' zaj zre'e lu xezr la xu na', nal-la' belá' na' na' Pablo, na' gulé' ljwezre':

—Benne' nigá naque' wete benne' lawe' da lácala gulé' lu nísadau', quebe dxue lataj dios na' nazí'i le' Xrlátaje gaca ban le'.

<sup>5</sup> Pablo guzribe' belá' na' lu xi', ne quebe bi gúquene'. <sup>6</sup> Xúgute' gulebeze' chee' gata' xi' na' Pablo u che'e gatie'. Ca gudé gulebeze' tu chi'i wal-la, ne belelé'ene' quebe bi gúquene', na' buluché'e ca da dxeléquene', ne gulezú lawe' dxelenné' naca Pablo tu dios.

<sup>7</sup> Gágute' naga zrantu' de xezr la xu chee' benne' blau chee' xezr la xu na', le' Publio. Benne' nigá guzú' lu ne'e netu', ne bxúele'e netu' cháwedau' lawe' chunna zra. <sup>8</sup> Xra Publio deze', quebe chawe' zue', na' xu'e da



la, ne dxaque' xízrawe' dxen. Pablo guxíaje' xeajnné'e le', na' ca gudé bchálajlene' Dios, bzē ne'e lawe' le', na' bexaque'. <sup>9</sup> Gate belenne' da nigá, na' benne' ca' xezicadxa, benne' we' ca' zaj zre'e xezr la xu na', belezrine' lau Pablo, na' belexaque'. <sup>10</sup> Gulápale'e netu' ba lá'ana, na' ca gudé na', gate ba zua chú'untu' da xula tu lu da dxedá lawe' nísadau', belunne' xúgute da nachínnentu'.

*Pablo dxezrine' xezre Roma*

<sup>11</sup> Ca gudé guca chunna beu' zúantu' lu xezr la xu na', na' bexú'untu' tu lu da dxedá lawe' nísadau' da gudxé' na' na' dxácatę naca beu' zaga ca'. Naca na tu da dxedá lawe' nísadau' chee xezre Alejandria, na' luzrgue da dxedá lawe' nísadau' na' zaj da bedáu' chee dios bi lide' ca' zaj le' Cástor ne Pólux. <sup>12</sup> Bzrintu' dxu'a xezre Siracusa naga begá'anantu' chunna zra. <sup>13</sup> Gate beza'ntu' na', na' gudentu' dxu'a xezr la xu na', ne bzrintu' xezre Regio. Zra xula dxaca be' da za' chalá'a naga dxedé gubizra beu' zaga ca', na' zra gudxupe' zra bzrintu' xezre Puteoli. <sup>14</sup> Lu xezre na' bezrágantu' bal-la bi bíchedxu, benne' gulenné' netu' lizre' xegá'analentu' le' xrunu' zra, na' ca gudé na' guza'ntu' ní'antu' zéajntu' Roma. <sup>15</sup> Bi bíchedxu zaj zra' Roma ba belenne' cheentu', na' beledxúaje' xezre na', bedajlechague' netu' tu xézredau' nazí le na Xi'a Chee Apio, na' xebal-le' belexezrague' netu' tu lataj nazí le na Chunna Xú'udau'. Gate ble'e Pablo bi bíchedxu ca', na' guzre' Dios: "Xcalenu'", ne ben dipa lazre'. <sup>16</sup> Gate bzrintu' Roma, benne' dxenná be'e lu wedil-la bde'e benne' zaj nadxéaje' lu na' benne' xíchaje chee bi xra'aga ca', san be'e lataj Pablo sue' cheeze' nen tu benne' dxéaje' wedil-la, benne' guxúe' le' chee quebe xuzrúnnuje'.

*Pablo dxuchálaje' chee Jesús lu xezre Roma*

<sup>17</sup> Ca gudé chunna zra Pablo gusel-le' benne' xeajnné' benne' judío blau ca' zaj zre'e Roma, na' gate belezrague', guzre' benne' ca':

—Le'e, bi bicha'. Neda' quebe gudábaga' judío ca', ne quebe gudábaga' da xjácale xra xrtáudxu ca', san benne' judío ca' zaj zre'e Jerusalén buludé'e neda' lu na' benne' Roma ca'. <sup>18</sup> Gate benne' Roma zaj zre'e na' buluchebe' neda', gulaca lazre' xulusane' neda' lawe' da quebe belezrelne' bi da beña' da gun na xelechugue' chia' gatia'. <sup>19</sup> Judío ca' guledábage', na' ben na ba xen gunaba' neda' zri'a chia' lau César. Quebe nacan chee gawa' zria benne' lázredxu. <sup>20</sup> Chee le' na' gunnéa' le'e chee le'eda' le'e, ne guchálajlena' le'e lawe' da naca ne chee da dxebeza lázredxu dxi'u, benne' Israel, zua' nigá nadxéaja' xia.

<sup>21</sup> Nadxa gulé'e le':

—Netu' quebe bi xiche ne si' lu na'ntu' da za na Judea ca naca chiu' lue', na' netú bi bíchedxu, benne' judío, benne' ba bele'e nigá bezé'e Judea, quebe bi da calela dxenné' benu'. <sup>22</sup> Dxaca lázrentu' xénentu' ca da dxéquenu' lue' lawe' da nézentu' gáteteze na' dxelenné' chee benne' ca' dxelájle'e dizra' cube nigá.

<sup>23</sup> Buluzúe' tu zra gate xelexezrague', na' lu zra na' benne' zan belezrague' naga zua Pablo. Bchálajlene' benne' ca' ca naca xel-la' dxenná bea chee Dios che zilatęla guxrínnelete. Benge' ba xuzre guzéajni'ing' benne' ca' ca naca chee Jesús ne chee da bdxixruj be'e Moisés, ne ne chee da buluzúaj benne' ca' buluchálaje' waláz chee Dios. <sup>24</sup> Bal-le' gulezú'e xrtizra' Pablo, san xebal-le' quebe guléajle'e. <sup>25</sup> Quebe belune' tuze dizra', na' gulezú lawe' dxelexedxúaje'. Nadxa gunná Pablo:

—Da li naca da gunná Be' Lá'azxa, guzre' xra xrtáudxu ca' lu dxu'a Isaías, bēnea' bchalaje' waláz chee Dios, gunné':

<sup>26</sup> Guxíaj, xeajezre benne' ca':

Da li wenle le'e san quebe chéajni'ile.

Da li walé'ele, ne quebe gueque be'ele.

<sup>27</sup> Zaj naca zide' lázxdau benne' caní,

ne quebe dxelenne' chawe'.

Zaj naxezxuj xiaj lawe'

chee quebe xelexé'ene' nen xiaj lawe',

ne quebe xelénene' nen nague',

ne quebe xeléajni'ine' nen lázrdawe',

ne quebe xelexelé'e lawa' neda' chee xexuna' neda' le'.

<sup>28</sup> 'Dxal-la' nézele le'e, na'a ne da za za' xel-la' weselá chee Dios guchálajentu' benne' quebe zaj naque' judío, na' benne' ca' xelezí'e na.

<sup>29</sup> Gate gunná Pablo da nigá, na' besiá'aca judío ca', dxuluchébele'e ljwezre'.

<sup>30</sup> Pablo guzúe' chupa iza lu xu'u da dxízruje', ne dxezí' lu ne'e xúgute benne' dxedajlenné'e le'. <sup>31</sup> Du lazre' bchálaje' ca naca xel-la' dxenná bea chee Dios, ne bsédené' ca naca chee Xránadxu Jesucristo, na' netú quebe nu blale' le'.

## DA BZUAJ SAN PABLO CHEE BI CHEE CRISTO ZAJ ZRABE' XEZRE ROMA

*Pablo dxugape' diuzre bi chee Cristo zaj zrabe' Roma*

<sup>1</sup> Neda', Pablo, naca' wen zrin chee Jesucristo. Dios bláwizre' neda' chee gaca' gubáz chee', ne guqué'e neda' chee guzenda' bénneache dizra' chawe' chee'.

<sup>2</sup> Dios guchebe lazre' sel-le' dizra' chawe' nigá gate nate lu dizra' lá'azxa chee' lu na' benne' ca' buluchálaje' waláz chee'. <sup>3</sup> Dizra' chawe' nigá dxulé'e na ca naca chee Xránadxu Jesucristo, Zri'ine Dios. Lu bela' dxen chee' naque' zri'ine zre sua wenná bea David. <sup>4</sup> Lu be' nácaqueze' da naca na lá'azxa, naque' Zri'ine Dios. Dios blé'ene' naca caní gate bsebané' Le' ládujla benne' gate ne chee xel-la waca chee'. <sup>5</sup> Ne chee Zri'ine' Dios nunne' netu' lataj nácantu' gubáz chee' chee xelezrá' benne' ládujla xúgute cue' xezr la xu, benne' xelejli lazre' Cristo, ne xuluzúe' dizra' chee' chee gaca ba La Le'. <sup>6</sup> Ládujla benne' caní zrale le'e chee gácale bi chee Jesucristo.

<sup>7</sup> Dxuzúaja' chee xúgutele le'e dxéajle chee Cristo, zrale xezre Roma. Dios nazri'ine' le'e, ne bláwizre' le'e chee gácale bi cheéqueze'. Dxenaba' Xradxu Dios, ne Xránadxu Jesucristo guné' chawe' chee, ne gunne' le'e xel-la dxebeza zri lazre'.

*Pablo dxaca lazre' chéaje' xezre Roma*

<sup>8</sup> Da naca blaudxa, ne chee Jesucristo dxapa' Dios chia' xcalene' ca naca chee xúgutele lawe' da dxezralaj ca dxeajli lázrele Cristo du gabí'i xezr la xu. <sup>9</sup> Duté lázrdawa' dxuna' zrin chee Dios, dxuzenda' bénneache dizra' chawe' chee Zri'ine'. Le' nézquezne' dxeajsá lázrqueza' le'e gate dxuchálajlena' Le'. <sup>10</sup> Dxata' xúeda' Dios, che naca da dxaca lazre' Le', chee ajala gunne' neda' lataj xedajnná'a le'e <sup>11</sup> lawe' da dxaca lazra' le'eda' le'e ne gunna' le'e lataj si'le da naca chee Be' Lá'azxa, chee se cháchadxale. <sup>12</sup> Caní gutipa lázredxu tudxu xetudxu lu xel-la dxeajli lazre' cheedxu.

<sup>13</sup> Bi bícha'dau', dxaca lazra' nézele zane' lasa guca lazra' xida' xedajnná'a le'e, san dxácaté ca' dxecuasa na. Dxaca lázrele'a xida' chee guna' zrin gusédeda' da naca chee Cristo ládujla le'e, cáteze ba bēna' ládujla xezícadxa bénneache zaj zre'e lu xezr la xu nigá. <sup>14</sup> Nabaga' guna' zrin caní ládujla xúgute bénneache, che zaj naque' benne' blau u ca zaj naque', u che zaj naque' benne' zaj naxéajni'i u ca zaj naque'. <sup>15</sup> Chee le' na', neda' ba zúaqueza' guzenda' le'e zrale xezre Roma dizra' chawe' chee Cristo.

*Xel-la waca chee dizra' chawe' chee Cristo*

<sup>16</sup> Quebe dxedué'eda' chee dizra' chawe' chee Cristo lawe' da napa na xel-la waca chee Dios chee guselá na xúgute benne' dxelejli lazre' le' na, nédxula benne' judío ca', san cá'aqueze benne' quebe zaj naque' judío. <sup>17</sup> Dizra' chawe' nigá dxulé'e na dxi'u nagá'anadxu chawe' lau Dios che dxeajli lázredxu le' na, chee cheajli lázredxu Le' ca naxúaj na lu dizra' lá'azxa, da dxenná na: Benne' nagá'ane' chawe' lau Dios gata' chee' xel-la nabán li lazre' che dxeajli lazre' Le'.

*Dul-la da zaj nabaga bénneache*

18 Ba ble'e Dios lu xabáa chee' ca gungé', gudéé' xel-la zi' xúgute' benne' dxuluzúé' chalá'ala Dios, ne benne' wen da calela, benne' dxuluzague' da li ne chee' da calela da dxeluné'. 19 Zaj nézquezne' ca gaca xelúnbea bénneache da naca chee' Dios lawe' da Léqueze Dios na' bache blé'ene' na zaca ba lau. 20 Da quebe gaca lé'edxu chee' Dios gaca gúnbeadxu na ne chee' da ca' da ben Dios. Gate bente' xezr la xu dxunna bea na nácaqueze Dios, ne nápaqueze' xel-la waca. Chee' le' na' quebe bi de xuludé'ene'. 21 Lácala zaj núnbe'e ca naca Dios, quebe ne xelape' Le' ba lá'ana ca Dios, ne quebe ne xelé'e Le'; Xcalenu', san dxuludé' lazre' da níteze, na' gulechulla xichaj lázrdawe' lawe' da zaj naque' benne' zide'. 22 Lácala dxeléquene' zaj naxéajni'ine', da li zaj naque' benne' xala, 23 lawe' da buluzúé' chalá'ala Dios xabáa, Bénnea' quebe dxedé' chee', ne dxelúe' lá'ane' bedáu' xiaj xaga zaj naca na lu'a bénneache dxelate, ne lu'a bea ca' zaj zua xrila, ne lu'a be snia, ne lu'a be xixre' be zria tapa ni'a na'ba'.

24 Chee' le' na' Dios ba guleaj xíchaje' benne' ca' chee' xeluné' xúgute' da sban da dxelezá lazre', na' bulucá'ana ditaj cuine' tue' xetue', 25 lawe' da buluzúé' chalá'ala xel-la li chee' Dios, na' gulezí' lu ne'e da wen lazre', ne belúe' lá'ane', ne belecá'ana szrene' da ca' nun Dios, ne quegá Diosqueze, Bénnea' dxal-la' güe' lá'anaquezdxu. ¡Ca'an gaca na!

26 Chee' le' na' Dios ba guleaj xíchaje' benne' ca' chee' xeluné' da dxelezá lazre' da ca' xedué'edxu. Cá'anqueze nu'ula buluzúé' chalá'ala xel-la zúale' benne' chee', ne dxeluné' da quebe zaj naca chee' xeluné'. 27 Cá'anqueze belún benne' biu, buluzúé' chalá'ala xel-la zúale' zru'ule', ne dxeluné' da sban da dxelezá lazre' tue' xetue', ne dxeluné' da ca' xedué'edxu tue' xetue', na' dxeledéé' xel-la zi' lu bel-la' dxen chee' ne chee' da sban da dxeluné'.

28 Lawe' da québedxa gulaca lazre' xelexúnbe'e Dios, Le' guleaj xíchaje' benne' ca' chee' xuludé' lazre' da calela, ne chee' xeluné' da quebe dxal-la' xeluné'.

29 Dxeluné' xúgute' da calela.  
Dxulucá'ana ditje' bénneache.  
Dxeluné' da quebe naca xrlátaje.  
Zaj naque' benne' wecude'.  
Dxeluné' da zrinnaj.

Zaj naque' benne' xa lazre'.

Dxelutie' benne'.

Dxelílaje' da ba xa'.

Dxelezí' xe'e.

Dxeledanne' da xálaze.

Dxuluchálaje' dizra' bizruj.

30 Dxelenné' schanni' chee' ljwezre'.

Dxelecuídene' Dios.

Zaj naque' benne' wenné' wal-la.

Dxulucá'ana szren cuine'.

Zaj naque' benne' wezé' cua.

Dxelalaj lazre' bícala da sban.

Quebe dxuluzúé' dizra' chee' xra xrne'e.

31 Zaj naque' benne' lázrdau zide'.

Dxulunitie' xrtizre'.

Quebe zaj naque' zri'i lazre'.

Quebe dxulunite lawe' chee' ljwezre'.

Quebe dxelexache lazre' chee ljwezre'.

<sup>32</sup> Zaj nézene' Dios guzría xi'e bénneache,  
na' benne' dxelune' da caní dxal-la' xelátie'.

Benne' caní tu dxelúnzqueze' na,  
ne dxelexezaca ba lazre' nen benne' dxelune' da caníqueze.

## 2

*Dios dxuchi'e chee bénneache cáteze da zaj nune'*

<sup>1</sup> Chee le na' québedxa bi de da gudé'enu', lue' dxuchi'u da dxun benne' xula, núteteze nacu'. Gate dxuchi'u da dxun benne' xula, na' dxule'enu' nabagu' zria, lawe' da dxuchi'u da dxun benne' xula, ne cá'anqueze dxunu' lue'. <sup>2</sup> Nézquezdxu dxuchi'a Dios cáteze da naca na gate dxenné' zaj nabaga zria benne' ca' dxelún da caní. <sup>3</sup> ¿Dxéquenu' lue' wadé gun ca'aze chiu' gate Dios nne' zaj nabaga zria bénneache, lue' na' dxennáu' zaj nabaga zria benne' dxelún da caní, ne cá'anqueze dxunu' lue'? <sup>4</sup> ¿Dxuzú' chalá'ala xel-la zri'i lazre', ne xel-la zren lazre' zren chee Dios, ne quebe nézenu' lu xel-la zri'i lazre' chee' dxunne' lue' lataj xebi'i lazru'? <sup>5</sup> Nacu' lázrdau zide', ne quebe dxexebí'i lazru'. Chee le na' dxuzanu' da si sacu' lu zra na' gate Dios nne' zaj nabaga zria benne' ca' dxelune' da calela. Naca xrlátaje guné' da caní. <sup>6</sup> Lu zra na' gunne' ca da dxal-la' si' tu tudxu cáteze naca da bendxu. <sup>7</sup> Xel-la nabán zeajlí canna gunna Le' xúgute' benne' dxelaca lazre' xelezí'e lu na' Dios da xabáa, ne xel-la ba lá'ana, ne da zaj naca na da chadía chacanna ne chee da chawe' da tu dxelúnzqueze'. <sup>8</sup> Lu xel-la dxezrá'a chee' nne' zaj nabaga zria xúgute' benne' zre'e lazre' ca', benne' quebe dxuluzúe' dizra' da lí, san dxuluzúe' dizra' da wen lazre'. <sup>9</sup> Gusaca zi'e, ne gudé' lu da ba xa' xúgute' benne' dxelune' da calela. Ga su lau guné' caní chee' benne' judío ca', ne cá'anqueze guné' chee' benne' quebe zaj naque' judío. <sup>10</sup> Da xabáa, ne da ba lá'ana, ne xel-la dxebeza zri lazre' gunne' xúgute' benne' dxelune' da chawe'. Ga su lau guné' caní chee' benne' judío ca', ne cá'anqueze guné' chee' benne' quebe zaj naque' judío.

<sup>11</sup> Dios tuze ca dxuchi'e da dxelún xúgute' bénneache, <sup>12</sup> na' benne' dxelune' dul-la, ne quebe zaj núnbe'e da bdxixruj be'e Moisés welebía xi'e lácala quebe belúnbe'e da nadxixruj bea na, na' benne' dxelune' dul-la lácala zaj núnbe'e da bdxixruj be'e Moisés welebía xi'e ne chee da nadxixruj bea na na'. <sup>13</sup> Quebe zaj nagá'ana chawe' lau Dios benne' dxelénzene' da nadxixruj bea na, san zaj nagá'ana chawe' lau Dios benne' dxuluzúe' dizra' da nadxixruj bea na. <sup>14</sup> Benne' zitu' ca', benne' quebe zaj núnbe'e da bdxixruj be'e Moisés, gate dxelune' ca dxenná da nadxixruj bea na na', lácala quebe zaj núnbe'e da nadxixruj bea na, naca chee' cáteze zua da nadxixruj bea na lu xichaj lázrdawe'. <sup>15</sup> Caní naquen lawe' da ca dxelune' dxulé'e na zua xichaj lázrdawe' ca naca da nadxixruj bea na, na' naca na ca naca da bdxixruj be'e Moisés. Xichaj lázrdawe' dxunna bea na chee da nigá, na' da dxelegú'u lazre' guzría xi na le', u xecá'a na le' <sup>16</sup> lu zra na' gate Dios guchi'e xúgute' da nagache' chee' xúgute' bénneache lu na' Jesucristo cáteze dxenná dizra' chawe' na' da dxuzenda' bénneache.

*Ca naca chee' benne' judío ca' ne da bdxixruj be'e Moisés*

<sup>17</sup> Dxennáu' nacu' judío, ne dxenné'enu' da bdxixruj be'e Moisés, ne dxucá'ana szren cuinu' lawe' da núnbe'u Dios chiu'. <sup>18</sup> Nézenu' da dxaca lazre' Dios, na' da gunná bé'ene' dxulé'e na lue' gunu' da nácadxa chawe'. <sup>19</sup> Dxuxrén lazru' cuinu' waca gulé'enu' ca da xelún benne' zaj naque' ca

lo chul-la, ne guseni'u benne' zaj zra' lu da chul-la. <sup>20</sup> Dxéquenu' waca guzéajni'inu' benne' quebe zaj naxéajni'e, ne gusédenu' benne' quebe ne cheajni'e lawe' da naca da nadxixruj bea na da napu' tu da dxulé'e na dxi'u chee gúnbeadxu da li. <sup>21</sup> Lue' dxusédenu' benne' xula. ¿Bizr chee na' quebe dxusede cuinu'? Lue' dxuzennu' benne' quebe dxal-la' cuandxu. ¿Bizr chee na' dxebanu' lue'? <sup>22</sup> Lue' dxennáu' quebe dxal-la' súałedxu zru'ula benne' xula. ¿Bizr chee na' dxunu' lue' ca'? Lue' dxecuídenu' bedáu' xiaj xaga. ¿Bizr chee na' dxebanu' lue' da gunní'a da de lu xudau' ca' chee bedáu' xiaj xaga ca'? <sup>23</sup> Dxucá'ana szren cuinu' lawe' da núnbe'u da nadxixruj bea na, san dxucá'ana ditju' Dios lawe' da quebe dxunu' lue' ca da dxenná bea da nadxixruj bea na. <sup>24</sup> Naxúaj lu dizra' lá'azxa da dxenná na: Benne' quebe zaj naque' judío dxelenné' schanni' chee Dios ne chee da caleła da dxunle le'e.

<sup>25</sup> Da li da nadxugu lu bēla' chiu' da dxulé'e na nacu' bi chee Dios, naca na tu da quebe' che dxunu' ca da dxenná bea da bdxixruj be'e Moisés, san che quebe dxunu' ca dxenná na, nacu' ca tu benne' quebe nadxugu lu bēla' chee' da na' dxulé'e na. <sup>26</sup> Che benne' quebe nadxugu lu bēla' chee' dxuné' ca nadxixruj bea na, naque' ca tu benne' nadxúguqueze lu bēla' chee' da na', lácala quebe naca caní chee'. <sup>27</sup> Benne' quebe nadxugu lu bēla' chee' da na' dxulé'e na, san dxuné' da nadxixruj bea na, da na' dxuné' dxulé'e na nabagu' zria lue', lawe' da quebe dxunu' da dxenná bea da nadxixruj bea na, lácala zua lu na'u da nadxixruj bea na, ne nadxugu lu bēla' chiu' da na'. <sup>28</sup> Quebe naca xanne' judío bēneea' naque' caní cúzreze, ne quebe naca xanne' da nadxugu na lu bēla' chee benne' da naca na cúzreze, lu bēla'ze. <sup>29</sup> Benne' naca xánni'e' judío naque' bēneea' naque' judío lu xichaj lázrdawe', ne da naca xanne' da nadxugu lu bēla' chee benne' naca na da zua na lázrdawe'. Quebe nácaqueze na nen dízra'ze san naca na chee be' chee'. Benne' caní dxelezi'e xel-la ba lá'ana, quegá chee bēneache, san chee Dios.

### 3

<sup>1</sup> ¿Bizra da ba neza naca na chee benne' lawe' da nadxugu lu bēla' chee' da na' dxulé'e na? <sup>2</sup> Nácalē'e na, ne zánete ca naca na. Da nédxute, Dios bdeę' dizra' chee' lu na' benne' judío ca'. <sup>3</sup> ¿Bizra xca'? Che bal-la benne' judío ca' quebe zaj naque' li lazre', ¿nnadxu chee da na' quebe naca Dios li lazre'? <sup>4</sup> ¡Cabata! Dios dxúnqueze' ca naca da li lácala xúgute bēneache zaj naque' wen lazre', lawe' da naxúaj lu dizra' lá'azxa da dxenná Dios. Dxenné':

Nacu' xrlátaje ca da dxennáu',

na' wegá'anaquezu' xrlátaje gate xuluchí'e ca da dxunu'.

<sup>5</sup> Che da caleła da dxundxu dxulé'e na naca Dios xrlátaje, ¿Bízraqueze nnadxu? (Dxuchálaja' ca da dxuluchalaj bēneache.) ¿Naca Dios benne' quebe naca xrlátaje lawe' da dxudé' dxi'u xel-la zi'? <sup>6</sup> ¡Cabata! Chela naca Dios Benne' quebe dxun da xrlátaje, ¿ájazra guné' guchi'e ca da dxelún bēneache?

<sup>7</sup> Che da wen lazre' da dxuna' gun na chee xegá'ana zrendxa da li da dxun Dios, ¿bizr chee na' dxuchi'e chia' neda', dxenné' naca' benne' dul-la? <sup>8</sup> Che naca na caní, ¿bizr chee na' quebe gundxu da caleła chee gulé'e laudxa da xrlátaje? Da nigá naca na da dxelenná bal-la benne' dxundxu, benne' ca' dxelún da caleła, ne dxelenné' schanni' cheedxu. Xrlátaje naca Dios nne' zaj nabaga zria benne' caní.

*Xúgute dxu nabágadxu dul-la*

<sup>9</sup> ¿Bizra xca? Dxi'u, benne' judío, ¿nácadxadxu xrlátaje ca xezícadxa benne' ca'? ¡Cabata! Bache blé'entu' zaj nabaga dul-la benne' judío, ne cá'anqueze xezícadxa benne' ca'. <sup>10</sup> Naxúaj lu xiche lá'azxa da dxenná na: Quebe nu chilá' benne' xrlátaje, netú gue'.

<sup>11</sup> Quebe nu chilá' benne' dxéajni'ing'.

Quebe nu chilá' benne' dxexílaje' Dios.

<sup>12</sup> Xúgute' dxeledé' calela. Xúgute' zaj nanítie'.

Quebe nu chilá' benne' dxuné' da xrlátaje, netú gue'.

<sup>13</sup> Da dxelennéqueze' naca na ca tu da sgute, ca tu ba da naxálaje.

Nen luzre' ca' dxelezí xe'e.

Xrtizre' zaj naca na ca nisa snia chee bela' da dxe na zran lázxaba'.

<sup>14</sup> Tu dxelennézqueze' dizra' schanni', ne dizra' zi'.

<sup>15</sup> Chadite dxelútie' bénneache.

<sup>16</sup> Gáteteze dxeledé' dxuluzría xi'e, ne dxulusaca zi'e.

<sup>17</sup> Quebe zaj nézene' ájala xebeza zri lazre'.

<sup>18</sup> Quebe dxelezrebe' Dios.

<sup>19</sup> NezdXu xúgute' ca da dxenná da nadxixruj bea gula na' da bzuaj Moisés, dxé na benne' ca' zaj xu'e lu na' da nadxixruj bea na na', chee xelezúa zri xúgute', ne chee xelexúnbea xúgute' bénneache zaj nabague' zria lau Dios. <sup>20</sup> Netú benne' quebe xegá'ané' xrlátaje lau Dios lawe' da nune' da dxenná bea da nadxixruj bea na, lawe' da dxulé'eze da nadxixruj bea na dxi'u nácadXu benne' dul-la.

*Xelélá bénneache che xeléajle'e chee Cristo*

<sup>21</sup> Na'a, dxunna bea na ca gaca xegá'anadXu xrlátaje lau Dios, da quebe naca na ne chee da nadxixruj bea na, lácala lu da nadxixruj bea na, ne lu da buluzúaj benne' ca' gulenné' waláz chee Dios dxuluchalaj na ca naca chee da nigá. <sup>22</sup> Nagá'anadXu xrlátaje lau Dios caní che dxeajlí lázredXu Jesucristo, ne cá'anqueze gaca chee xúgute' bénneache xeaeajlí lazre' Le'. Tuz ca naca chee bénneache <sup>23</sup>lawe' da zaj nun xúgute' bénneache dul-la, ne quebe zaj naca chee' xelexú'e lu xabáa chee Dios. <sup>24</sup> Lu da chawe' chee Dios, cá'aze nune' chee xegá'anadXu xrlátaje lau Le' lawe' da bexa'u Jesucristo dxi'u lu dul-la da nabágadXu. <sup>25</sup> Dios bzue' Jesucristo gutie' ne chee xtúl-ladXu chee xegá'anadXu xrlátaje lau Le' che dxeajlí lázredXu da ben Le'. Da nigá guca na chee ble'e Dios naque' xrlátaje lácala lu xel-la zren lazre' chee' bdeé' cá'aze ca naca dul-la da bendXu nédxute. <sup>26</sup> Gúcaqueze da nigá chee gulé'e lawe' naca Dios xrlátaje na'a, ne gácaqueze' xrlátaje gate gucá'ané' xrlátaje benne' ca' dxeaeajlí lazre' Jesús.

<sup>27</sup> Na'a, ¿waca gucá'ana szren cuínadXu? ¡Cabata! ¿Bizr chee na'? Naca na lawe' da nagá'anadXu xrlátaje, quegá lawe' da bendXu ca nadxixruj bea na, san lawe' da guxeajlí lázredXu Cristo. <sup>28</sup> Ca'an naca, dxunna bea na nagá'ana xrlátaje tu benne' lau Dios lawe' da dxeajlí lazre' Cristo, ne quegá lawe' da nune' ca da nadxixruj bea na.

<sup>29</sup> ¿Naca Dios cheeze benne' judío ca'? ¿Quegá nácaqueze' Dios chee benne' ca' quebe zaj naque' judío? Da li nácaqueze' Dios chee benne' ca' <sup>30</sup>lawe' da zua tuze Dios, na' Le' gucá'ané' xrlátaje benne' ca' zaj nadxugu lu bela' chee' da na' dxunna bea na che dxeaeajlí lazre' Cristo, ne cá'anqueze gucá'ané' xrlátaje benne' ca' quebe zaj nadxugu lu bela' chee' da na', che dxeaeajlí lazre' Cristo. <sup>31</sup> Na'a che dxucá'ana Dios xrlátaje benne' dxeaeajlí lázreze', ¿naca da nadxixruj bea na tu da québedxa zaca?

¡Cabata! Che dxéajlédxu chee Cristo dxúnquezdxu ca dxenná da nadxixruj bea na.

## 4

### *Da dxulé'e da guca chee Abraham*

<sup>1</sup> ¡Bízraqueze nnadxu chee da ba neza da guca na chee xra xrtáudxu Abraham? <sup>2</sup> Che Abraham bega'ane' xrlátaje lau Dios ne chee tu da bene', waca gucá'ana szren cuine' san quegá lau Dios. <sup>3</sup> ¡Bízraqueze naxúaj na lu dizra' lá'azxa? Dxenná na: Abraham guxeajlí lazre' Dios, na' Dios guzi' lu ne'e le' ca tu benne' xrlátaje. <sup>4</sup> Che nu benne' dxune' zrin, lazruj da si'e quebe naca na tu da dxunézrujzedxu, san naca na tu da nabágaquezdxu chee'. <sup>5</sup> Che nu benne' quebe bi nune', san dxeajlí lázreze' Dios, Bénnea' dxucá'ane' xrlátaje benne' dul-la, nacan lawe' da dxezí' lu na' Dios xel-la dxeajlí lazre' chee' chee xuca'ane' le' xrlátaje. <sup>6</sup> Cá'anqueze bchalaj David ca naca chee benne' naca da ba neza chee' lawe' da dxucá'ana Dios le' xrlátaje lácala quebe bi nune' chee xegá'ane' xrlátaje. <sup>7</sup> Gunná David:

Ba neza zrenté naca na chee benne' ca'  
ba bunte lau Dios chee' da zrinnaj da zaj nune',  
ne gudé'e cá'aze dul-la da belún benne' ca'.

<sup>8</sup> Ba neza zrenté naca na chee benne' ca'  
quebe dxusebaga Xránadxu le' dul-la da belune'.

<sup>9</sup> ¡Naca ba neza nigá cheeze benne' ca' zaj nadxugu lu belá' chee' da na' dxulé'e na, u che nácaqueze na chee benne' ca' quebe zaj nadxugu lu belá' chee' da na'? Bache blé'entu' bca'ana Dios Abraham xrlátaje lawe' da guxeajlí lazre' Le'. <sup>10</sup> ¡Bátazra bca'ane' le' xrlátaje? ¡Guca na ca gudé gudxugu lu belá' chee Abraham da na' dxulé'e na, u che nédxula? Quebe guca na ca gudé na', san nédxula guca na. <sup>11</sup> Gudxugu da na' lu belá' chee Abraham ca tu da dxunna bea na chee gulé'e na nagá'ane' xrlátaje lau Dios lawe' da guxeajlí lazre' Dios gate na' quebe ne chugu da na' lu belá' chee'. Ca'an guca, naca Abraham xra xúgute benne' dxeleajlí lazre' Dios, ne quebe zaj nadxugu da na' lu belá' chee'. Cá'anqueze dxucá'ana Dios le' xrlátaje lawe' da dxeleajlí lazre' Le'. <sup>12</sup> Da li naca Abraham xra benne' ca' zaj nadxugu da na' lu belá' chee', na' cá'anqueze dxeleajlí lazre' Dios ca ben xradxu Abraham gate na' quebe ne chugu lu belá' chee' da na'.

### *Dxezidxu da guchebe lazre' Dios che dxeajlí lázredxu Cristo*

<sup>13</sup> Dios guchebe lazre' chee Abraham, ne chee zri'ine zre sue' gaca chee benne' ca' xezr la xu nigá. Quebe guchebe lazre' na chee' lawe' da nune' ca dxenná bea da nadxixruj bea na, san lawe' da bega'ane' xrlátaje lau Dios gate guxeajlí lazre' Le'. <sup>14</sup> Che xezr la xu nigá gaca na tuze chee benne' ca' dxelune' ca da dxenná bea da nadxixruj bea na, dácheze nagá'ana xel-la dxeajlí lazre', ne québedxa zaca da guchebe lazre' Dios. <sup>15</sup> Lu da nadxixruj bea na xelebía xi' benneache, san naga quebe ne zrin da nadxixruj bea na, quebe bi zaj nabaga benneache chee da nadxixruj bea na na'.

<sup>16</sup> Ca' naca na, dxezí' lu nnadxu da guchebe lazre' Dios ne chee xel-la dxeajlí lazre' cheedxu Le', chee gaca na tu da sidxu cá'aze, ne chee gaca na tu da súdequeze chee xúgute zri'ine zre sua Abraham. Ca' naca na, quegá naca na cheeze benne' ca' dxelune' ca da nadxixruj bea na, san cá'anqueze naca na chee benne' ca' dxeleajlí lazre' Dios ca ben Abraham.



Ca' naca na, le' naque' xra xúgute<sup>17</sup> dxu lau Dios, Bénnea' guxeajlí lazre' Abraham Le'. Naca na ca da naxúaj na lu dizra' lá'azxa, dxenná na:

Nuna' lue' xra bénneache zánete cue' xezr la xu.

Dios na' dxu'e xel-la nabán chee benne' ca' zaj nate, ne dxuchálaje' chee da quebe ne sua ca dxuchálaje' chee da ba zua.

<sup>18</sup> Abraham guxeajlí lazre' Dios, ne guleza lazre' si'e da guchebe lazre' Dios, lácala ba gudé chee si'e da dxebeza lazre'. Ca'an guca, guque' xra bénneache zánete cue' xezr la xu cáteze ba guzre Dios le', gunné': "Canite chan zri'ine zre su'." <sup>19</sup> Abraham ba zué' ca tu gaxúa iza, san quebe gute ni'a ne'e lu xel-la dxeajlí lazre' chee' gate xeajsá lazre' zaj naque' ca benne' ba zaj nate, le' ne zru'ule' Sara, ne naca Sara nu'ula wizre. <sup>20</sup> Quebe ben chupa lazre', san bxren lazre' da guchebe lazre' Dios chee', na' gudápadxe' xel-la dxeajlí lazre', ne bxren lázredxe'. Bca'ana szrene' Dios, <sup>21</sup> ne bentequeze' neza napa Dios xel-la waca guné' xúgute ca da guchebe lazre'. <sup>22</sup> Chee le' na' Dios guzi' lu ne'e xel-la dxeajlí lazre' chee' chee bca'ane' le' xrlátaje.

<sup>23</sup> Gate dxenná na: "Dios guzi' lu ne'e xel-la dxeajlí lazre' chee'", quebe guxuaj na chee tuze Abraham <sup>24</sup> san cá'anqueze cheedxu dxi'u lawe' da si' lu na' Dios xel-la dxeajlí lazre' cheedxu che dxeajlí lázredxu Bénnea' bsebané' Xránadxu Jesucristo ládujla benne' gate, <sup>25</sup> na' naca Jesús Bénnea' bde Dios Le' chee gutié' ne chee dul-la da nabágadxu dxi'u, ne bsebané' Le' chee xegá'anadxu xrlátaje lau Dios.

## 5

### *Da naca cheedxu lawe' da nagá'anadxu xrlátaje lau Dios*

<sup>1</sup> Che nagá'anadxu xrlátaje lau Dios lawe' da dxeajlí lázredxu Cristo zúadxu xrlátaje nen Dios ne chee Xránadxu Jesucristo. <sup>2</sup> Cá'anqueze lawe' da dxeajlí lázredxu Cristo, ne chee Le' dxezidxu da xrlátaje chee Dios da tu dxeajlézquezdxu, ne dxebéle'edxu lawe' da dxebeza lázredxu sidxu da xabáa chee Dios. <sup>3</sup> Quegaze da nigá, san cá'anqueze dxebéle'edxu gate dxededxu xel-la zi', lawe' da nézedxu xel-la zi' da dxededxu dxun na dxi'u zren lazre', <sup>4</sup> na' xel-la zren lazre' dxucá'ana na dxi'u xrlátaje lau Dios, na' gate nagá'anadxu xrlátaje dxebeza lázredxu. <sup>5</sup> Quebe naca tu da dácheze da na' dxebeza lázredxu lawe' da ba nuzúa Dios lu lázrdaudxu xel-la zri'i lazre' chee' ne chee Be' Lá'azxa, Bénnea' ba nunna Dios dxi'u.

<sup>6</sup> Gate na' quebe guzéquedxu guselá cuínadxu, lu zra blé'eqeze Dios, gute Cristo waláz chee benne' wen da zrinnaj ca'. <sup>7</sup> Stébele'e naca che nu benne' gatié' waláz chee tu benne' xrlátaje, lácala wexázrelja tu benne' gatié' waláz chee tu benne' naque' duté li lazre'. <sup>8</sup> Dios dxulé'eng' dxi'u ca nazrí'ile'eng' dxi'u lawe' da gute Cristo waláz cheedxu gate ne nácadxu benne' dul-la. <sup>9</sup> Na'a nagá'anadxu xrlátaje lau Dios lawe' da gute Cristo waláz cheedxu, ne ba nácaqueze cheedxu ladxu ne chee Le' lu da zi' da xa', da za za' lu zra ni'. <sup>10</sup> Gate na' ne dxecuédexu Dios, Le' bexuné' dxi'u tuze nen Le' lawe' da gute Cristo waláz cheedxu, na' na'a lawe' da nácadxu tuze nen Dios ba nácaqueze cheedxu ladxu ne chee xel-la nabán chee Cristo da zúale na dxi'u. <sup>11</sup> Quegá tuze da nigá, san cá'anqueze dxebéle'edxu lu da naca chee Dios ne chee Xránadxu Jesucristo, ne ne chee Le' nácadxu tuze nen Dios.

*Da nun Adán, na' da nun Cristo*

<sup>12</sup> Ca guca, guxú'u dul-la lu xezr la xu nigá ne chee da ben tuze benne', na' bla' xel-la gute ne chee dul-la, ca'an guca gulú'u bénneache lu na' xel-la gute lawe' da zaj nun xúgute' dul-la. <sup>13</sup> Nédxula ca bla' da nadxixruj bea na, ba zaj nun bénneache dul-la lu xezr la xu nigá, lácala quebe dxusebaga Dios bénneache dul-la gate quebe ne zrin da nadxixruj bea na. <sup>14</sup> Ca guzú lau lu zra zua Adán ca bzrin zra zua Moisés, gulú'u bénneache lu na' xel-la gute, benne' ca' zaj nune' dul-la, lácala quebe belune' dul-la ca da ben Adán, bénnea' gudichje' da gunná be'e Dios, na' Adán na' naque' tu da dxulé'eze na ca naca Bénnea' dxal-la' xide', Le' Cristo.

<sup>15</sup> Da zrinnaj da ben Adán quebe gaca dí-lalébe na ca da dxunna Dios dxi'u. Ne chee da zrinnaj da ben tuze benne', gulate benne' zante, san xel-la weselá da nunna Dios dxi'u cá'aze ne chee xetuze benne', Jesucristo, naca na da zrédxaqueze, ne naca na da ba neza chee benne' zante. <sup>16</sup> Da zrinnaj na' da ben tuze benne' quebe gaca dí-lalébe na ca da dxunna Dios dxi'u lawe' da ne chee tuze da zrinnaj, zaj nabaga zria bénneache, san da dxunna Dios dxi'u naca na chee xelexegá'ana xrlátaje benne' zante benne' zaj nune' da zrinnaj. <sup>17</sup> Ne chee da zrinnaj da ben tuze benne' gulú'u bénneache lu na' xel-la gute, na' benne' ca' zaj nazí lu ne'e da dxunna Dios cá'aze, ne zaj nagá'ané' xrlátaje lau Le' ba zaj nalé' lu na' dul-la, ne dxelezéque' xelenná be'e cuine' lu xel-la nabán chee' ne chee da nun xetuze benne', Jesucristo.

<sup>18</sup> Ca guca zaj nabaga zria xúgute' bénneache ne chee da zrinnaj da ben tuze benne', Adán, cá'anqueze ne chee da xrlátaje da ben xetuze benne', Jesucristo, belexexaca bénneache xrlátaje chee xelaca bané'. <sup>19</sup> Ca guca belexexaca bénneache zante benne' dul-la lawe' da quebe bzua dizra' tuze benne', cá'anqueze lawe' da bzua dizra' xetuze benne', xelexegá'ana benne' zante xrlátaje lau Dios.

<sup>20</sup> Bzua Dios da nadxixruj bea na chee gunná béadxa na da naca dul-la, na' gate dul-la guxánle'e na, ca' guzrendxa xel-la zri'i lazre' chee Dios. <sup>21</sup> Ca naca zua lu na' dul-la gute na bénneache, cá'anqueze zua lu na' xel-la zri'i lazre' chee Dios gucá'ana na dxi'u xrlátaje lau Dios chee gaca bandxu chadía chacanna ne chee Xránadxu Jesucristo.

## 6

*Nácadxu ca benne' gate ca' chee québedxa gundxu dul-la, na' naca bandxu nen Cristo*

<sup>1</sup> ¿Bízraqueze nnadxu? ¿Gúndxadxu dul-la chee gulé'e láwedxa xel-la zri'i lazre' chee Dios? <sup>2</sup> ¡Cabata! Ba nácadxu ca benne' gate chee québedxa gundxu dul-la. ¿Ájazra gúndxadxu dul-la? <sup>3</sup> ¿Quebe nézele le'e, xúgutedxu dxi'u ba nadxúadxu nisa chee gácadxu tuze nen Jesucristo, naca na ca ba nátedxu tu zren nen Le' lu da nadxúadxu nisa? <sup>4</sup> Ca' naca na, ne chee da nadxúadxu nisa naca ca bgáchedxu tu zren nen Le', ne nátedxu chee xebandxu, ne súadxu tu lu xel-la nabán cube cáteze guca chee Cristo, bebane' ládujla benne' gate ne chee xel-la waca xabáa chee Xre'.

<sup>5</sup> Che gúcadxu tuze nen Cristo lu xel-la gute, cá'anqueze gácadxu tuze nen Le' lu xel-la dxexebán chee'. <sup>6</sup> NezdXu da gúcadxu gate nate ba gudá na le'e xaga béguaj tu zren nen Le' chee cuía xi' benne' dul-la da gúcadxu chee québedxa gundxu zrin chee dul-la ca benne' zaj nada'u cheen. <sup>7</sup> Tu benne' ba nate, ba bedxúaje' lu na' dul-la. <sup>8</sup> Che ba gútedxu tu zren nen Cristo, dxuxrén lázredxu gaca bánquezdxu tu zren nen Le' <sup>9</sup> lawe' da

nezdXu quebe gate Cristo da xula lawe' da ba bebanę' ládujla benne' gate, na' québedxa xu'e lu na' xel-la gute. <sup>10</sup> Gate gute Cristo, tu lásaze gutię' ne cheę dul-la waláz cheę xúgute bėnneache, san na'a naca banę', na' lu na' Dios naca banę'. <sup>11</sup> Cá'anqueze le'e, le gueque nácale benne' gate cheę québedxa gunle dul-la, san naca banle lu na' Dios tu zren nen Xránadxu Jesucristo.

<sup>12</sup> Cheę le na' québedxa güele lataj nna be'e dul-la bela' dxen cheęle da dxal-la' gate, cheę québedxa gun na gunle da dxezá lazre' belá' dxen cheęle. <sup>13</sup> Quebe guzúa cuínale lu na' dul-la cheę guchine na le'e lu da calęla, san le guzúa cuínale lu na' Dios, gácale ca benne' belexebán ládujla benne' gate, cheę guchínene' le'e lu da xrlátaje. <sup>14</sup> Québedxa gaca dul-la nna be'e na le'e lawe' da québedxa xu'ule lu na' da nadxixruj bea na, san xu'ule lu na' xel-la zri'i lazre' cheę Dios.

*Tu da dxulé'e na ca naca cheę benne' zaj nada'u*

<sup>15</sup> ¿Bizra xca? ¿Gundxu dul-la lawe' da québedxa xú'udxu lu na' da nadxixruj bea na, san xú'udxu lu na' xel-la zri'i lazre' cheę Dios? ¡Cabata'! <sup>16</sup> Ba nézquezle che guzúa cuínale lu na' tu xránale ca benne' zaj nada'u cheę guzúale dizra' cheę', nadxa nácale benne' zaj nada'u cheę xránale, ne dxun na ba xen guzúale dizra' cheę'. Cá'anqueze naca cheęle le'e che guzúale dizra' cheę dul-la, da gunna na le'e xel-la gute, u che guzúale dizra' cheę Dios, cheę gácale xrlátaje. <sup>17</sup> Xcalén Dios, lácala gúcale ca benne' zaj nada'u lu na' dul-la, na'a du lázrele dxuzúale dizra' cheę dizra' li na', lu da na' bzua cuínale. <sup>18</sup> Gate bedxúajle le'e lu na' dul-la, bexácale wen zrin cheę da xrlátaje. <sup>19</sup> (Dxuchálajlena' le'e ca dxuluchalaj bėnneache lawe' da lu belá' dxen cheęle quebe gaca chėjni'ile ca naca da nigá.) Cáteze benle gate na' bzua cuínale lu na' da sban, ne lu na' da zrinnaj cheę gunle da zrinnaj, cá'anqueze le gun na'a, le guzúa cuínale lu na' da xrlátaje cheę gácaquezle bi cheę Dios.

<sup>20</sup> Gate ne nácale ca benne' zaj nada'u lu na' dul-la, quebe ben na ba xen gunle da xrlátaje. <sup>21</sup> Na'a ¿bizra da ba neza guca cheęle da ca' dxexedué'ele cheęn na'a? Da ca' benle nédxutę guchę na le'e lu xel-la gute. <sup>22</sup> Na'a nadxúajle lu na' dul-la, ne ba nácale wen zrin cheę Dios cheę gácaquezle bi cheę Dios da nachę na le'e lu xel-la nabán da zeajlí canna. <sup>23</sup> Benne' dxunę' dul-la dzezi'e lazruj cheę' da naca na xel-la gute, san da dxúnnaze Dios dxi'u naca na xel-la nabán da zeajlí canna tu zren nen Xránadxu Jesucristo.

## 7

*Tu da dxulé'e na ca naca cheę xel-la wechaga na'*

<sup>1</sup> Bi bícha'dau', le'e núnbeale da nadxixruj bea na, zaj xu'u lu na' da nadxixruj bea na bėnneache tuze dxácatę ne zaj naca banę'. <sup>2</sup> Ca naca da nigá, tu nu'ula nuchaga na' xu'e lu na' benne' cheę' ne cheę da nadxixruj bea na dxácatę zuę' nabanę', san che gate benne' cheę', na' xedxúaj zru'ulé' lu na' da nadxixruj bea na na'. <sup>3</sup> Ca' naca na, che nu'ula na' súalęne' benne' xula dxácatę ne nabán benne' cheę', gunę' dul-la gáchajne' xrba cheę xel-la nuchaga na', san che benne' cheę' na' gatię', xedxúaj zru'ulé' lu na' da nadxixruj bea na na', na' waca xuchaga ná'lene' benne' xula, ne quebe gunę' dul-la da gáchajne' xrba cheę xel-la nuchaga na'.

<sup>4</sup> Cá'anqueze naca chee le'e, bi bícha'dau', le'e zrágale bel-la' dxen chee Cristo, ba nácale ca benne' gate, ne québedxa xu'ule lu na' da bdxixruj be'e Moisés, chee gácale ca zru'ula benne' xula. Na'a nácale ca zru'ula Cristo, Bénnea' bebanē' ládujla benne' gate, chee gácadxu bi guchine Dios. <sup>5</sup> Dxácate na' bēndxu da naca chee bel-la' dxen cheedxu, da nadxixruj bea na ble'e na dxi'u naca dul-la da bēndxu ca da dxezá lazre' bel-la' dxen cheedxu, na' da na' guché na dxi'u lu xel-la gute. <sup>6</sup> Na'a ba nácadxu ca benne' zaj nate, na' ba bedxúajdxu lu na' da nadxixruj bea na da gunná be'e na dxi'u, chee gaca gundxu zrin chee Dios lu xel-la nabán cube da dxunna Be' Lá'azxa dxi'u, ne quegá gundxu zrin na' lu da nadxixruj bea gula da naxúaj na.

*Dul-la da zúale neda'*

<sup>7</sup> ¿Bizra nnadxu xca'? ¿Dxun da nadxixruj bea na nácadxu benne' dul-la? ¡Cabata! Quebe gunezda' da naca na dul-la chela ca ble'e da nadxixruj bea na neda'. Quebe gunezda' naca dul-la sa lazra' da naca chee nu benne' chela ca gunná da nadxixruj bea na: Quebe sa lazru' da naca chee nu benne'. <sup>8</sup> Ble'e da nadxixruj bea na neda' da naca dul-la, na' guque be'eda' zúale' zánete' da calela lu xichaj lázrdawa' da guzá lazra', lawe' da gate quebe ne gúnbe'a da nadxixruj bea na, guca dul-la chia' tu da nagache lawa' neda'. <sup>9</sup> Guzúa tu zra gate quebe ne la' da nadxixruj bea, na' gúqueda' naca bana' neda', san gate bēnda' da na' gunná be'e na neda', bēnbe'a da naca dul-la, na' guque be'eda' nabaga' zria, ne dxal-la' gatia'. <sup>10</sup> Ca'an guca, da nadxixruj bea na' naca na chee gunna na neda' xel-la nabán, san guca na chia' ca tu da bēte neda' <sup>11</sup> lawe' da ble'e da nadxixruj bea na' neda' da naca na dul-la, da na' guzí xē na neda', na' ne chee da nadxixruj bea na' guque be'eda' nabaga' zria, ne dxal-la' gatia'.

<sup>12</sup> Ca' naca na, da li naca lá'azxa da nadxixruj bea na. Da nadxixruj bea na' naca na lá'azxa, ne xrlátaje, ne chawe'. <sup>13</sup> ¿Ájazra naca da nigá? ¿Bēte da nadxixruj bea xrlátaje na' neda'? ¡Cabata! Dul-la na' bēte na neda', na' caní guque be'eda' naca na dul-la. Da nigá guque be'eda' ne chee da nadxixruj bea xrlátaje na', na' caní ble'e da nadxixruj bea na' da sbánle'e naca dul-la.

<sup>14</sup> NezdXu da nadxixruj bea na naca na da bēnna Be' Lá'azxa chee Dios dxi'u, san lu bel-la' dxen chia' naca' ca tu benne' nada'u, na' da naca' dxun na guna' dul-la. <sup>15</sup> Neda' quebe dxéajni'ida' da dxaca chia' lawe' da quebe dxuna' da dxaca lazra' guna', san da dxecuída' naca na da dxuna'. <sup>16</sup> Che dxuna' da calela da quebe dxaca lazra' guna', da na' dxenná da nadxixruj bea na naca na dul-la, na' nezda' xrlátaje naca da nadxixruj bea na. <sup>17</sup> Ca' naca na, quegá neda' dxuna' da na', san dul-la da zúale neda', le na' dxun na ca'. <sup>18</sup> Nezda' quebe bi zúale bel-la' dxen chia' da naca xrlátaje, lawe' da dxezá lazra' guna' da xrlátaje, san quebe dxezéqueda' guna' na. <sup>19</sup> Quebe dxuna' da xrlátaje da dxaca lazra' guna', san dxuna' da calela da quebe dxaca lazra' guna'. <sup>20</sup> Chee le na', che dxuna' da quebe dxaca lazra' guna', quebe naca neda' dxuna' na, san dul-la da zúale neda' dxun na ca'.

<sup>21</sup> Caní naca da dxaca chia': Gate dxaca lazra' guna' da xrlátaje, dxulé'e lawe zúale da calela neda'. <sup>22</sup> Lu xichaj lázrdawa' dxedáneda' da nadxixruj bea Dios, <sup>23</sup> san dxeque be'eda' lu bel-la' dxen chia' zua tu da dxedábaga na ca da dxaca lazra', da naca da nadxixruj bea dul-la da zúale bel-la' dxen chia', na' dxenná be'e na neda'.

<sup>24</sup> ¡Edxugúa neda! ¿Nu guselá neda' lu belá' dxen chia' da naché na neda' lu xel-la gute? <sup>25</sup> Xcalén Dios, Le' guné' na ne chee Xránadxu Jesucristo. Ca' naca, lu xichaj lázrdawa' dxuzúa cuina' lu na' Dios, san lu belá' dxen chia' naca' ca tu benne' nada'u lu na' da nadxiruj bea dul-la.

## 8

### *Xel-la nabán da dxunna Be' Lá'azxa chee Dios dxi'u*

<sup>1</sup> Na'a, quebe zaj nabía xi' benne' ca' zaj naque' tuze nen Jesucristo, benne' ca' québedxa dxeluné' da calela cáteze dxenná bea belá' dxen chee', san dxeluné' da xrlátaje cáteze dxenná bea Be' Lá'azxa. <sup>2</sup> Da nadxiruj bea na da dxunna Be' Lá'azxa, Bénnea' dxunne' dxi'u xel-la nabán lawe' da nácadxu tuze nen Jesucristo, ba bselá na neda' lu na' da bdxiruj be'e Moisés da dxulé'e na neda' naca' benne' dul-la, ne nabaga' zria, ne dxal-la' gatia'. <sup>3</sup> Ba ben Dios da quebe guca gun da bdxiruj be'e Moisés, ba gudúe' dul-la da zaj nabaga bénneache. Da nadxiruj bea na quebe guca gun na gundxu da xrlátaje lawe' da nate ni'a na' belá' dxen cheedxu. Chee le' na' Dios gusel-le' Zrí'inequeze', na' guque' bénneache ca naca belá' dxen cheedxu da xu'u na lu na' dul-la, chee gutie' ne chee dul-la cheedxu, lawe' da nabágadxu zria gátedxu ne chee dul-la da zúale belá' dxen cheedxu. <sup>4</sup> Caní bene' chee gaca gundxu da nadxiruj bea na, dxi'u québedxa dxundxu ca dxenná bea belá' dxen cheedxu, san dxundxu ca dxenná bea Be' Lá'azxa.

<sup>5</sup> Benne' dxeluné' ca dxenná bea belá' dxen chee' zaj dxe'e gunne xue da naca chee belá' dxen chee', san benne' dxeluné' ca dxenná bea Be' Lá'azxa zaj dxe'e gunne xue da naca chee Be' Lá'azxa. <sup>6</sup> Benne' zaj dxe'e gunne xue da naca chee belá' dxen chee' welátequeze', san benne' ca' zaj dxe'e gunne xue da naca chee Be' Lá'azxa xelaca bané', ne xelebeza zri lazre'. <sup>7</sup> Benne' zaj dxe'e gunne xue chee belá' dxen chee' dxelecuídené' Dios, lawe' da quebe dxelaca lazre', ne quebe gaca xuluzúa cuine' lu na' da nadxiruj bea Le'. <sup>8</sup> Chee le' na' benne' dxeluné' ca da dxezá lazre' belá' dxen chee' quebe gaca xeluné' da dxezaca ba lazre' Dios.

<sup>9</sup> Le'e quebe dxunle ca dxenná bea belá' dxen chee, san dxunle ca dxenná bea Be' Lá'azxa, lawe' da ba zúale Be' Lá'azxa chee Dios le'e. Benne' quebe zúale Be' Lá'azxa le', Be' da nasel-la Cristo, quebe naque' bi chee Cristo. <sup>10</sup> Lácala zua Cristo lu xichaj lázrdaule, lu belá' dxen chee dxal-la' gátele, san lu xichaj lázrdaule ba xu'ule tu xel-la nabán cube lawe' da bca'ana Dios le'e xrlátaje. <sup>11</sup> Che zúale Be' Lá'azxa le'e, Be' chee Dios, Bénnea' bsebané' Jesucristo ládujla benne' gate, Léqueze Dios na', Bénnea' bsebané' Le', gunne' xel-la nabán cube chee belá' dxen chee da gátequeze na. Da nigá guné' ne chee Be' Lá'azxa chee Dios, Bénnea' zue' xichaj lázrdaule.

<sup>12</sup> Ca' naca na, bi hícha'dau', nabágadxu tu da gundxu, san quegá chee gundxu ca dxenná bea belá' dxen cheedxu. <sup>13</sup> Che gundxu ca dxenná bea belá' dxen cheedxu, gátequezdxu, san che ne chee Be' Lá'azxa guzúadxu chalá'ala da dxun belá' dxen cheedxu, na' gaca bandxu.

<sup>14</sup> Xúgute benne' ca' dxelún ca dxulé'e Be' Lá'azxa le', benne' caní zaj naque' bi chee Dios. <sup>15</sup> Be' Lá'azxa da guzú' lu na'le quebe dxugu'e le'e lu xel-la dxezrebe ca benne' zaj nada'u, san dxune' nácale bi chee Dios. Ne chee Be' Lá'azxa nigá dxennedxu: "Xrae", gate dxuláwizredxu Dios. <sup>16</sup> Léqueze Be' Lá'azxa nigá dxexchébelene' be' nácadxu, dxenné' nácadxu

bi chee Dios. <sup>17</sup> Che nácadxu bi chee' ca', gácaqueze cheedxu da naca chee Dios. Gaca cheedxu da dxal-la' gaca chee Cristo che gudedxu xel-la zi' tu zren nen Le', chee xegá'ana szrendxu tu zren nen Le'.

<sup>18</sup> Dxéqueda' ca xel-la zi' da dxededxu na'a quebe gutíl-lelebe na ca da xabáa da sidxu lu zra da za za'. <sup>19</sup> Da dxelezá lazre', ne da dxelebeza xúgutę da nun Dios naca na chee gulé'e Dios bi zaj naca be' bi chee' ca'. <sup>20</sup> Ca naca da nun Dios belexaca na dácheze, quegá ca gulaca lazre' le na, san lawe' da núnqueze Dios gaca na ca'. Beņe' zua da dxelebeza lazre na <sup>21</sup> lawe' da xeledxúaj ca da nun Dios lu na' da dxuzría xi' le na, chee gaca ba neza chee na tu zren nen bi ca' zaj naca bi ca' chee Dios lu xel-la weselá cheebe' da naca xabáa. <sup>22</sup> Nézquezdxu, ca zrin na'a zra, xúgutę da nun Dios dxelebezre we' na, ne dxeledé na xel-la zi' ca tu nu'ula zue' xel-la dxudía chee sanę' bidau'. <sup>23</sup> Quegá tuze da na' nun Dios dxedé na xel-la zi', san cá'anqueze dxi'u dxededxu xel-la zi', dxi'u na' ba zúale Be' Lá'azxa dxi'u, da naca cheedxu tu da dxunna bea na da dxal-la' sidxu. Cá'anqueze dxi'u dxebezre lázredxu dxácatę na' dxebezádxu zra gulé'e Dios nácadxu bi chee' ca', gate na' gunņe' cheedxu tu bela' dxen cbe. <sup>24</sup> Lu da dxebeza lázredxu guládxu, san che gaca lé'edxu da dxebeza lázredxu, québedxa naca na tu da dxebeza lázredxu. Tu da ba dxelé'edxu, québedxa dxun na ba xen cueza lázredxu na. <sup>25</sup> Che da dxebeza lázredxu naca na tu da quebe gaca lé'edxu, dxun na ba xen cuézadxu na lu dutę xel-la zren lazre' cheedxu.

<sup>26</sup> Cá'anqueze Be' Lá'azxa dxácalęne' dxi'u lu xel-la nate ni'a na' cheedxu. Quebe nezdxu guchálajleđxu Dios ca dxal-la' gundxu, san Léqueze Be' Lá'azxa dxue lazre' lau Dios waláz cheedxu, ne dxebezre lazre' ca da quebe dxezeque' nu nne. <sup>27</sup> Dios, Bénnea' dxenné'e da zua xichaj lázrdaudxu nézene' da dxaca lazre' nne Be' Lá'azxa lawe' da dxue lazre' Be' Lá'azxa lau Dios cáteze naca da dxaca lazre' Dios waláz chee bi zaj naca be' chee'.

*Nácadxadxu wal-la ca tu benne' dxezrué'ene'*

<sup>28</sup> Nezdxu dxuchine Dios xúgutę da dxaca cheedxu chee gucá'ana na dxi'u chawe', dxi'u na' nazri'idxu Le', na' Le' bláwizre' dxi'u ca naca da nune' gune'. <sup>29</sup> Benne' ca' bënbea Dios nédxudaute, ben Le' nédxudaute xelaque' ca naca Zrí'inequeze', chee gaca Zrí'ine' na' Benne' blau ládujla zánete bi biche'. <sup>30</sup> Benne' ca' ben Dios nédxudaute ca xelaque', cá'anqueze bláwizre' le', na' benne' ca' bláwizre', cá'anqueze bca'ane' le' xrlátaje, na' benne' ca' bca'ane' xrlátaje, cá'anqueze bca'ana szrénqueze' le'.

<sup>31</sup> ¿Bizra nnadxu chee da caní? Che caní dxácale Dios dxi'u, ¿nuzra benne' seque' tábague' dxi'u? <sup>32</sup> Dios quebe bezúene' zi' gunņe' dxi'u Zrí'inequeze', san bdee' Le' chee gútię' waláz cheedxu. ¿Quebe gunņe' cheedxu xúgutę da ca' tu zren nen Zrí'ine'? <sup>33</sup> ¿Nuzra seque' bi nne chee benne' ca' ba gucá'a Dios le'? Léqueze Dios na' bca'ane' benne' ca' xrlátaje. <sup>34</sup> ¿Nuzra benne' seque' nne' zaj nabaga zria benne' ca'? Léqueze Cristo gutię' waláz cheedxu, ne da naca na blaudxa, naque' Bénnea' bebán ládujla benne' gate, na' zue' chalá'a xabela chee Dios, ga dxue lazre' lau Le' waláz cheedxu. <sup>35</sup> ¿Nuzra seque' xecá'a dxi'u lu na' Cristo, Bénnea' nazrí'ine' dxi'u? ¿Wazeque' xel-la zi', u xel-la xache', u da nau zi' xuzre na dxi'u, u xel-la dxedún, u da dxugúa zra lánadxu, u da stebe, u xel-la gute?

<sup>36</sup> Naca na ca da naxúaj na lu dizra' lá'azxa, dxenná na:

Lawe' da nácantu' bi chiu' zúaquezentu' gátentu' xúgutę zra.  
Dxelune' netu' ca zríla'dau' ba zaj zúaba' chee xelútię'-ba'.

<sup>37</sup> Lu xúgute da caní nácadxadxu szren ca benne' dxelezrué'eng', ne chee Bénnea' bzri'ine' dxi'u. <sup>38</sup> Chee le na' dxuxrén lazra' quebe bi de da seque' gucuasa na dxi'u lu na' Dios, Bénnea' nazrí'ine' dxi'u.

Ne xel-la gute, ne xel-la nabán,  
ne gubáz chee xabáa ca', ne be' xriwe' dxelenná bea,  
ne xel-la waca chee be' xriwe' ca',  
ne da dxaca na'a, ne da za za',

<sup>39</sup> ne da zua xabáa, ne da zua lu xezr la xu,  
ne xetú da nun Dios,  
quebe seque' xecá'a na dxi'u lu xel-la zri'i lazre' chee Dios,  
da blé'eng' dxi'u gate bdee' Xránadxu Jesucristo waláz cheedxu.

## 9

### *Dios guqué'ē benne' Israel ca'*

<sup>1</sup> Dxennía' da li ca bi chee Cristo, ne quebe dxun lazra', na' xichaj lázrdawa' ne chee Be' Lá'azxa dxē na neda' naca na da li. <sup>2</sup> Dxexíaje lázrele'ēda', ne tu zúazqueze xel-la dxudía lu lázrdawa', <sup>3</sup> na' dxexá lázrtea' cuía xí'a neda', ne xecuasa' nen Cristo, la naca da nigá da gácale na bi bícha'dau' ca', benne' waláwr chia', benne' judío. <sup>4</sup> Benne' caní zaj naque' zri'ine zre sua Israel, na' Dios guz'í' lu ne'ē benne' caní ca bi chee' ca'. Dios guzúé' ládujla benne' ca' lu da xabáa chee', ne bene' tu xel-la wezrí'a nen benne' ca', ne bnézruje' le' da nadxixruj bea na da bzuaj Moisés, ne xel-la wil-la chee xudau', ne da nachebe lazre'. <sup>5</sup> Zaj naque' zri'ine zre zua xra xrtáudxu ca', na' ládujla benne' waláwr chee' ca', lu bela' dxen chee' bla' Cristo, Bénnea' naque' Dios lawe' xúgute da de, ne gaca báqueze' chadía chacanna. ¡Ca' gaca na!

<sup>6</sup> Quebe nnadxu quebe dxun Dios da dxenná xrtizre', san da naca na, quegá xúgute zri'ine zre sua Israel zaj nababa benne' Israel ca' chee Dios. <sup>7</sup> Quegá xúgute zri'ine zre sua Abraham zaj naca xánnie' zri'inequeze', san naca na ca guzre Dios le', gunné': "Lu zri'ine zre sua Isaac xelaca zri'ine zre su'." <sup>8</sup> Da nigá dxulé'e na dxi'u quebe nu naca bi chee Dios cáteze nálajbe', san zaj naca bi chee' benne' ca' zaj nálaje' ca naca da guchebe lazre' Dios. <sup>9</sup> Ca naca da guchebe lazre' Dios da gunné' chee Abraham naca na da nigá: Lu zra da ba gunní'a xida', na' Sara chiu' sanē' tu zri'inu'.

<sup>10</sup> Quegá tuze da nigá, san cá'anqueze gate Rebeca guzrá' chupa zri'ine' naca tuze xrabe', Isáac, xra xrtáudxu, <sup>11-13</sup> ne gate bi ca' quebe ne xelálajbe', ne quebe ne xelunbe' da xrlátaje u da calela, Dios guzre' Rebeca: "Bi waca chiu' gácabe' wen zrin chee bi cuide'." Da nigá naca na tuze nen da naxúaj lu dizra' lá'azxa, da dxenná na: Bzri'ida' Jacob, ne quegá Esaú. Ca' guca na, begá'ana chawe' da xu'u lu na' Dios chee gudxéé' ca naca da núnqueze', benne' ca' dxaca lazre' guláwizre', ne quebe dxuché'ē ca da zaj nune'.

<sup>14</sup> ¿Bízaqueze nnadxu? ¿Naca Dios Benne' quebe dxun da xrlátaje? ¡Cabata! <sup>15</sup> Guzre' Moisés: "Wezrí lazra' benne' dxaca lazra', ne wexache lazra' benne' dxaca lazra'." <sup>16</sup> Ca' naca na, quebe naca lawe' da dxaca lázredxu, ne quegá lawe' da dxun zi' lázredxu, san naca na lawe' da dxexache lazre' Dios dxi'u. <sup>17</sup> Lu dizra' lá'azxa Dios dxé'ē wenná bea chee xezr la xu Egipto: "Bēna' lue' wenná bea chee gulé'eda' ne chiu' lue' xel-la waca chia', ne chee xelúnbea bēneache La neda' du gabí'i xezr la xu." <sup>18</sup> Ca' naca na, Dios dxexache lazre' benne' dxaca lazre', ne cá'anqueze

dxu'e lataj gaque' zizraj lazre' benne' dxaca lazre' gu'e lataj gaque' zizraj lazre'.

<sup>19</sup> Na'a xi'u neda': Che caní naca na, ¿bizr chee na' dxugapa Dios bènneache dul-la? ¿Núzraqueze seque' tábaga ca da dxaca lazre' Le'? <sup>20</sup> Lue', benne', ¿nuzra nacu' lue' chee gutil-lu' Dios dizra'? ¿Waca tu xesu' xe na benne' bene' le na: ¿Bizr chée na' benu' neda' caní? <sup>21</sup> Benne' wen xesu' zruaga na' wazéquene' gune' chee guna' na' ca dxaca lazre'. Wazéquene' gune' chee guna' ná'queze tu xesu' da zácadxa, ne tu xesu' da xálaze. <sup>22</sup> ¿Bizra nnáquezdxu che Dios guca lazre' gulé'ene' dxi'u ca dxuzría xi'e bènneache, ne ca naca xel-la waca chee', na' lu xel-la zren lazre' chee' bchaga lawe' chee' benne' ca' lácala dxal-la' xeledé' le' xel-la zi', ná' xelebía xí'tequeze'?

<sup>23</sup> Bene' na chee blé'ene' ca naca xel-la szren chee da xabáa chee' lu da naca cheedxu dxi'u, nácadxu benne' dxexache lazre' Le', ne bequ'é dxi'u nédxute chee gaca cheedxu xabáa na' da nucueza Le'. <sup>24</sup> Dios bláwizre' dxi'u ládujla benne' judío, ne ládujla benne' quebe zaj naque' judío. <sup>25</sup> Naca na ca naxúaj na lu dizra' lá'azxa ca gunná Oseas, gunné':

Benne' ca' quebe zaj naque' bi chia', xapa' le' bi chia', na' benne' quebe bzri'ida', xapa' le' bi nazri'ite lazra'.

<sup>26</sup> Lu lataj naga gucha'-be': Quebe nácale bi chia', ná'queze xapa' le' bi chee Dios ban.

<sup>27</sup> Ca naca chee benne' Israel ca', Isaías dxenné': "Lácala zaj naxán zri'ine zre sua Israel ca naxán xuzre' dxe' dxu'a tu xegu zren, bábaze benne' ca' xelexegá'ane' chee xeledé'", <sup>28</sup> lawe' da gun Xránadxu ca dxenná xrtizre', guzría xi'e zezr la xu nigá lu da naca xrlátaje, ne chadite. <sup>29</sup> Naca na ca gunná léqueze Isaías na' gate nate, gunné':

Chela Xránadxu, Xrana zánete gubáz chee xabáa, quebe bca'ane' zri'ine zre súadxu ca',

na' xenítedxu ca guca chee xezre Sodoma, ne chee xezre Gomorra.

*Benne' judío ca', ne dizra' chawe'*

<sup>30</sup> ¿Bizraqueze nnadxu? Benne' quebe zaj naque' judío, ne quebe belexexílaj lazre' xelexegá'ane' xrlátaje lau Dios, zaj naque' benne' belexegá'ane' xrlátaje lau Dios, da zéaje na, belexegá'ane' xrlátaje lawe' da guleajlí lazre' Cristo. <sup>31</sup> Benne' Israel ca', benne' belune' ca dxenná da nadxixruj bea na da dxal-la' xucá'ana na le' xrlátaje lau Dios, quebe gulezéquene' xelexegá'ane' xrlátaje lawe' Le'. <sup>32</sup> ¿Bizr chee na'? Naca na lawe' da quebe belune' ba xuzre xelexegá'ane' xrlátaje ne chee xel-la dxeajlí lazre' chee', san gulaca lazre' xelexegá'ane' xrlátaje ne chee da belúnqueze' le'. Chee le na' xeajlecházie' lawe' xiaj da dxelechegu bènneache, da na' naca Cristo <sup>33</sup> ca da dxenná Dios lu dizra' lá'azxa chee', dxenné':

Neda' dxuzúa' lu xezre Sión tu benne' naque' xiaj da dxelechegu bènneache.

Nu benne' cheajlí lazre' Le' quebe xedu'é'equenze'.

## 10

<sup>1</sup> Le'e, bi bícha'dau', da dxezá lazra', ne da dxenaba' Dios gune' chee benne' Israel ca' naca na chee xeledé'. <sup>2</sup> Ca naca chee benne' ca', da li dxelebile lazre' da naca chee Dios, san quebe naca na chee xel-la sina li. <sup>3</sup> Quebe zaj nézene' ca xrlátaje dxucá'ana Dios bènneache, san dxelaca lazre' xulucá'ana xrlátaje cuine', ne quebe dxelezí' lu ne'e ca xrlátaje



dxucá'ana Dios bēnneache. <sup>4</sup> Cristo dxunē' da dxaca lazre' Dios gun da nadxixruj bea na, lawe' da dxucá'ana Cristo xrlátaje xúgute bēnneache dxeajlí lazre' Le'.

<sup>5</sup> Ca naca cheē da dxucá'ana xrlátaje bēnneache lau Dios da naca na ne cheē da nadxixruj bea na, bzuaj Moisés caní: Benne' dxunē' ca naca da dxenná da nadxixruj bea na gaca banē' ne cheē le na. <sup>6</sup> Ca naca cheē da dxucá'ana xrlátaje bēnneache lau Dios da naca na ne cheē xella dxeajlí lazre' dxenná na caní: Quebe nnau' lu lazrda'u: “¿Núzraqueze benne' cuéne' xabáa?” (da naca na cheē gulétaje' Cristo), <sup>7</sup> ne quebe nnau': “¿Núzraqueze benne' xétaje' lataj chul-la cheē benne' gate ca'?” (da naca na cheē xebéaje' Cristo ládujla benne' gate.) <sup>8</sup> ¿Bizra da na' dxenná na: Dizra' na' zua na gágute naga zu', lu dxu'u ne lu lazrda'u? Dizra' nigá naca na dizra' chawe' da dxuzénentu' bēnneache cheē xeléajle'e cheē Cristo. <sup>9</sup> Che nen dxu'u dxennáu' naca Cristo Xranu', ne che lu lazrda'u dxeajlí lazru' Dios bsebanē' Le' ládujla benne' gate, nadxa lau'. <sup>10</sup> Lu lázrdaudxu dxeajlí lázredxu cheē xegá'anadxu xrlátaje lau Dios, ne nen dxú'adxu dxexechébedxu nácadxu cheē Cristo cheē ladxu.

<sup>11</sup> Lu dizra' lá'azxa dxenná na: Nu benne' dxeajlí lazre' Le' quebe xedué'ene'. <sup>12</sup> Dios quebe dxebé'e benne' judío ca', u benne' quebe zaj naque' judío lawe' da Léqueze Xránadxu na' naque' Xrana xúgute bēnneache, na' dxunézrujle'e xúgute benne' ca' dxululáwizre' Le'. <sup>13</sup> Naca na ca da dxenná na: Xúgute benne' dxululáwizre' La Xránadxu xelélé'. <sup>14</sup> Na'a ¿ájazra xululáwizre' Le' che quebe ne xeléajle'e cheē? ¿Ájazra xeléajle'e cheē' che quebe ne xelenne' nu dxuchalaj cheē? ¿Ájazra xelenne' che quebe nu chilá' benne' guzenne' le'? <sup>15</sup> ¿Ájazra xuluzenne' bēnneache che quebe nu nase-la le'? Naca na ca dxenná dizra' lá'azxa, dxenná na: Xrtante naca lau Dios da dxelún benne' dxeledé' dxuluzenne' bēnneache dizra' cheē xel-la dxebeza zri lazre', ne dizra' chawe'.

<sup>16</sup> Quegá xúgute bēnneache dxelezí' lu ne'e dizra' chawe' nigá. Naca na ca gunná Isaías, gunné': “Xran, ¿zua nu benne' ba guxéajle'e ca da dxuchálajntu'?” <sup>17</sup> Ca' naca na, dxéajledxu cheē' gate dxénedxu, na' da dxal-la' xénedxu naca na da gunná Cristo.

<sup>18</sup> Na'a dxenaba': ¿Quebe ne xelenne'? Da li ba belenne'. Lu dizra' lá'azxa dxenná na:

Da dxuluzén benne' caní bache belén bēnneache du ca naca xezr la xu nigá.

Dizra' cheē benne' caní bache belén bēnneache du gabí'i xezr la xu.

<sup>19</sup> Xecha lasa dxenaba': ¿Quebe ne xeleque be'e benne' Israel ca da gunná Dios? Za'a Moisés bzuajē' ca gunná Dios, gunné':

Neda' guna' gácale benne' se lazre' cheē tu xezre benne' quebe ne xelaque' tu xezre.

Guna' zrá'ale tu xezre benne' quebe ne xeléajni'ing'.

<sup>20</sup> Gudé na' bzuaj Isaías ca gunná Dios, gunné':

Benne' quebe belexílaje' neda' belexezrelene' neda'.

Ble'e lawa' benne' ca' quebe bululáwizre' neda'.

<sup>21</sup> Ca naca cheē benne' Israel, gunná Dios: “Tu dxuláwizrazqueza' benne' quebe dxuluzúe' dizra', ne dxeledábague' xrtizra'.”

## 11

*Nu benne' Israel ca' zaj nalé'*

<sup>1</sup> Na'a dxenaba': ¿Ba bzua Dios chalá'ala xezre chee', benne' Israel ca', tu chí'izqueze? ¡Cabata! Néda'queza' naca' benne' Israel. Neda' nabábalena' zri'ine zre sua Benjamín. <sup>2</sup> Gate nate Dios guzi' lu ne'e benne' Israel ca', na' na'a quebe nuzúe' benne' ca' chalá'ala. ¿Quebe nézele le'e da dxenná dizra' lá'azxa ca naca chee Elías, bénnea' bchálaje' waláz chee Dios, gate na' gudawe' zria benne' Israel ca' lau Dios? Gunné': <sup>3</sup> "Xran, ba belútie' benne' buluchálaje' waláz chiu', ne buluzría xi'e lataj lá'azxa chiu' ca', na' tuza' neda' nagá'ana', na' cá'anqueze neda' dxelaca lazre' xelútie'." <sup>4</sup> Dios bechebe', guzre' Elías: "Ba gucá'a chia' ga xun chí gaxúa benne' quebe ne xuluzúa zribe' lau bedáu' xiaj xaga le' na Baal." <sup>5</sup> Cá'anqueze na'a ba begá'ana tu cue' benne' ca', benne' ba gucá'a Dios chee' lu xel-la zri'i lazre' chee'. <sup>6</sup> Na'a, che naca na ne chee xel-la zri'i lazre' chee Dios, quebe naca na ne chee da gaca gun nu benne', lawe' da la guca na ca', na' xel-la zri'i lazre' chee Dios quebe naca na xel-la zri'i lazre'.

<sup>7</sup> ¿Bizra xca'? Benne' Israel ca' quebe belezrué'eng' da dxelexíaje', san benne' ca' gucá'a Dios le' belezrué'eng' na, san xezícadxa benne' ca' gulaque' benne' zide'. <sup>8</sup> Naca ca dxenná dizra' lá'azxa, dxenná na: Dios be'e lataj gulaca benne' ca' lázrdau zide'. Be'e le' lataj gulaque' ca benne' la chul-la, ne ca benne' cwezru' ca', na' caní zaj naque' na'a. <sup>9</sup> Cá'anqueze gunná David, gunné':

Ca naca laní chee benne' ca' ben xelaca na ca tu xralaj,  
u ca tu da que'la na le'

chee cheajlecházie', na' gudé Dios le' lu da ba xa'.

<sup>10</sup> Xiaj lawe' xelechul-la na chee québedxa xeledé'eng',  
na' xeledégüe' chadía chacanna zran xua da naca na dul-la chee'.

*Ca zaj nalá benne' quebe zaj naque' judío*

<sup>11</sup> Na'a dxenaba': ¿Tu chí'ize belenite benne' judío ca' gate xea-jlecházie'? ¡Cabata! Gate benne' judío ca' guledábage' xrtizra Dios, guta' lataj xeledá benne' quebe zaj naque' judío, chee xelezúa benne' judío ca' lu xel-la dxezá lazre'. <sup>12</sup> Na'a, che da zrinnaj da belún benne' judío ca' ben na guca tu da ba neza chee xúgute bénneache, ne che gate belenitie' guca na tu da ba neza chee benne' quebe zaj naque' judío, gaca na tu da ba neza zrendxa gate xelexú'u xúgute benne' judío ca' lu na' Dios.

<sup>13</sup> De tu da dxal-la' xapa' le'e, núlale quebe nácale benne' judío. Lawe' da gusel-la Dios neda' chee guzenda' benne' quebe zaj naque' judío xrtizre', dxé'le'a gunne xue chee zrin nabaga' guna'. <sup>14</sup> Dxaca lazra' guna' xelezúa lu xel-la dxezá lazre' bal-la benne' waláxr chia' chee xeledé'. <sup>15</sup> Che gate bzua Dios chalá'ala benne' judío ca', belexaca tuze nen Dios benne' quebe zaj naque' judío, ¿ájazra gaca gate xelexaca benne' judío ca' tuze nen Dios? Gaca na ca xelexaca bané' ládujla benne' gate. <sup>16</sup> Che guzúadxu lau Dios xeta nedxu chee cua, na' nácaqueze chee' duté cua na'. Na' che naca chee Dios lue xaga, zaj nácaqueze chee' ca naca zruze xaga na'.

<sup>17</sup> Benne' judío ca' zaj naque' ca zrúzequeze tu xaga olivo, san bal-la zruze guledxugu na, na' lue' beda'u waláz chee zruze ca', ne nacu' ca tu zruze xaga olivo xixre'. Ca'an guca, gucu' tuze nen lue xaga olivo chawe' na', ne dxezi'u ba neza xel-la nabán chee xaga olivo na'. <sup>18</sup> Quebe gucá'ana szren cuinu' lawe' zrúzequeze xaga olivo na'. Che dxucá'ana szren cuinu', naca be'e quebe dxugagu' lue' lue xaga na', san luéqueze na' dxugagu na lue'.

<sup>19</sup> Wanná'u: Awe', guledxugu zruze ca' chee cheaxxedá'a neda' le'e xaga olivo na'. <sup>20</sup> Ca'an naca, san guledxugu na lawe' da quebe guléajle'e chee Dios, na' lue' bedá'azu' le'e xaga na' lawe' da dxéajle'u. Ca'an naca, quebe gucá'ana szren cuinu', san bxue xanne' cuinu'. <sup>21</sup> Che Dios quebe bnite lawe' chee benne' ca' zaj naque' ca zruzequeze xaga na', na' bebéajle' le', cá'anqueze quebe gunite lawe' chiu' lue', na' xebéajle' lue'. <sup>22</sup> Le nna'xque ca xrlátaje naca Dios, na' cá'anqueze ca snia naque'. Guque' snia nen benne' ca' xejlecházie', na' naque' chawe' nen lue'. Dxun na ba xen tu gúnzquezu' ca dxal-la' gunu' chee tu sí'zquezu' da chawe' chee', lawe' da che quebe gunu' caní, cá'anqueze wegü'e' lue'. <sup>23</sup> Che benne' judío ca' xelexexéaj lazre', na' xelexaque' tuze nen xaga olivo na', lawe' da napa Dios xel-la waca xuné' le' tuze. <sup>24</sup> Lue' quebe nacu' judío, san guchugue' lue' le'e tu xaga olivo xixre', na' bexuné' lue' tuze nen xaga olivo chawe' na', da quebe nu dxun. Benne' judío ca', benne' zaj naque' ca zruzequeze xaga olivo chawe' na', gácadxa chawe' xexuné' le' tuze nen xaga olivo cheéqueze' na'.

*Ca xelexú'u benne' judío lu na' Dios*

<sup>25</sup> Le'e, bi bícha'dau', dxaca lazra' chéajni'ile chee da nagache nigá, chee quebe guéquele nácale benne' sina. Benne' Israel ca' zaj naque' benne' lázrdau zide' tu chí'idauze, ca zrin zra xelexú'u lu na' Dios xúgute' benne' quebe zaj naque' judío. <sup>26</sup> Gate gaca na, nadxa xeledá xúgute' benne' Israel ca' lawe' da naxúaj lu dizra' lá'azxa da dxenná na:

Benne' weselá ze'e Sión,

na' cué' da calela da zaj nabaga zri'ine zre sua Jacob.

<sup>27</sup> Da nigá gaca xel-la wezría guna' nen benne' ca', gate neda' cua' dul-la chee'.

<sup>28</sup> Ca naca chee dizra' chawe' chee Cristo, zaj naca benne' judío ca' ca benne' dxelecuídene' Dios chee gaca da ba neza chee le'e, san Dios ne nazrí'ine' benne' ca' lawe' da guqué'e xra xrtawe' ca'. <sup>29</sup> Ca da dxunna Dios, quebe xequé'e na, ne quebe dxuzúe' chalá'ala nu ba bláwizre'. <sup>30</sup> Le'e nédxute' gudábagale xrtizra Dios, san na'a, lawe' da guledábaga benne' judío ca' xrtizre', Dios dxexache lazre' le'e. <sup>31</sup> Cá'anqueze na'a, benne' judío ca' dxeledábague' xrtizra Dios, san naca na chee xexache lazre' Dios le' ca dxexache lazre' le'e. <sup>32</sup> Dios be' lataj xúgute' guledábague' xrtizre' chee gaca xexache lazre' xúgute'.

<sup>33</sup> Szrenté naca xel-la gunní'a chee xel-la sina, ne xel-la dxéajni'i chee Dios. Quebe séquedxu chéajni'idxu ca da dxuchi'e, ne quebe gaca gúnbea xánnedxu da dxuné'. <sup>34</sup> ¿Núzraqueze gaca chéajni'i ca da xu'u xichaj lázrdau Xránadxu? ¿Núzraqueze gaca guzéajni'i Le'?' <sup>35</sup> ¿Núzraqueze benne' bi bnézruje' chee Xránadxu, chee gun na ba xen bi xuzri'e chee bènea'? <sup>36</sup> Xúgute' da dxelé'edxu zá'aca na lu na' Dios, na' Le' bene' da ca', ne zaj naca na chee Léqueze'. ¡Gaca ba Dios chadía chacanna! ¡Ca'an gaca na!

## 12

*Da dxal-la' gun benne' naque' bi chee Dios*

<sup>1</sup> Ca'an naca, bi bícha'dau', lu xel-la dxexache lazre' chee Dios, dxata' xúeda' le'e guzáa cuínale lu na' Dios ca tu guna' ban, da naca na lá'azxa, ne da xezaca ba lazre' Dios. Da nigá naca na tu da gucá'ana szrene Dios da dxal-la' gunle. <sup>2</sup> Québedxa gunle ca dxelún bénneache chee xezr la xu

nigá, san le guchá cuínale chee caní zra dutę ca naca lu xichaj lázrdaule. Ca'an gaca, gúnbeale da dxaca lazre' Dios gunle, da na' naca xrlátaje, ne da dxezaca ba lazre' Dios, ne da naca na li lazre'.

<sup>3</sup> Ne chee da nusebaga Dios neda' lu da chawe' chee' dxapa' xúgutele le'e quebe nu benne' dxal-la' gucá'ana cuine' szrendxa ca dxal-la' gunę', san dxal-la' guxúę' ca da naque' lu xel-la dxexruj lazre', cáteze naca xel-la dxeajlí lazre' da nunezruj Dios le'. <sup>4</sup> Ca naca chee bel-la' dxen cheedxu, zánete da napa na, na' xúgute da ca' quebe dxelún na tuze zrin, <sup>5</sup> cá'anqueze dxi'u, láqueze naxandxu, nácadxu ca tuze bel-la' dxen chee Cristo, ne nácadxu tuze tudxu xetudxu ca zaj naca da ca' napa tu bel-la' dxen chee nu benne'.

<sup>6</sup> Dios nunne' dxi'u cha cheedxu ca da gaca gundxu ca da dxaca lazre' gunne' tu tudxu. Dخال-la' guchine xánnedxu ca da nunne' dxi'u.

Che nunne' dxi'u chee guchálajdxu waláz chee', dxal-la' gundxu na dutę xel-la dxeajlí lazre' da nápadxu.

<sup>7</sup> Che nunne' dxi'u chee gundxu zrin chee ljwézredxu, dxal-la' gundxu na cháwe'dau'.

Che nunne' dxi'u chee gusededxu bėnneache, dxal-la' gusede xánnedxu le'.

<sup>8</sup> Che nunne' dxi'u chee gutipadxu lazre' bėnneache, dxal-la' gutipa xánnedxu lazre' le'.

Che nunne' dxi'u chee bi gunézrujdxu, dxal-la' gundxu na du lázredxu.

Che nunne' dxi'u chee nne xuedxu, dxal-la' guxúe xánnedxu ca dxundxu na.

Che nunne' dxi'u gácaleđxu benne' xache' ca', dxal-la' gundxu na dutę xel-la dxebe cheedxu.

<sup>9</sup> Le zri'i ljwézrele du lázrele tule xetule.

Le guzúa chalá'ala da caleła, ne le gun da xrlátaje.

<sup>10</sup> Dخال-la' zri'i ljwézrele tule xetule ca nazri'ile bi bíchequezle.

Le gapa ba lá'ana ljwézrele, ne le güe lataj tule xetule.

<sup>11</sup> Le gun zi' lázrele, ne quebe gácale zrawęde, na' le gun zrin chee Xránadxu dutę lázrdaule.

<sup>12</sup> Le sua xel-la dxebe lu da dxebeza lázrele. Le gaca dxexruj lazre' gate dxedele xel-la zi'.

Le guchálajleteze Xránadxu.

<sup>13</sup> Le gunezruj da dxelexazrje benne' ca' zaj naque' bi chee Dios.

Le si' lu na'le du lázrele benne' ca' zá'aque' dxelenabę' le'e.

<sup>14</sup> Le naba da chawe' chee benne' ca' zaj nau zi' xuzre' le'e.

Le naba da xrlátaje chee', ne quebe ná bale da caleła chee benne' ca'.

<sup>15</sup> Le be nen benne' dxelebé, ne le xexache lazre' benne' ca' dxelebezre xache'.

<sup>16</sup> Le gaca tuze nen ljwézrele tule xetule.

Quebe gucá'ana szren cuínale, san le gaca tuze nen benne' dxexruj lazre' ca'.

Quebe guéquele ba ná pale dutę xel-la sina.

<sup>17</sup> Quebe xebi'ile da caleła chee benne' nunę' chee da caleła.

Le gun ba xuzre gunle da xrlátaje lau xúgute bėnneache.

<sup>18</sup> Che naca chee, le gun naga zę lau séquele cueza zri lázrele nen xúgute bėnneache. <sup>19</sup> Bi bícha'dau' nazri'ite lazra', quebe xebéaj lázrele, san

le güe lataj Dios xebéaj lazre', lawe' da naxúaj lu dizra' lá'azxa da dxenná na: Chia' neda' naca xebéaj lazra'. "Neda' xebi'a chee bènneache," dxenná Xránadxu. <sup>20</sup> Cá'anqueze dxenná na: Che dxedún benne' dxecuídene' lue', bnezruj da gawe', na' che dxebílene', bnezruj da xí'aje', lawe' da gate dxunle caní, xedué'e bènnea'. <sup>21</sup> Quebe gu'u lataj da calela nna be'e na lue', san gunná be'e da calela ne chee da xrlátaje da dxunu'.

## 13

<sup>1</sup> Xúgute dxu dxal-la' guzúadxu dizra' chee benne' xu'u lawe', lawe' da quebe nu chilá' benne' xu'u lawe' che quebe nunna Dios le' xel-la dxenná bea chee'. Benne' xu'u lawe' ca' zaj naque' benne' nuzúa Dios. <sup>2</sup> Chee le na' nu benne' dxedábague' benne' xu'u lawe' dxedábague' ca da nun Dios. Benne' dxeledábague' caní zaj nabague' zria, na' Dios xuzri'e chee' da xexal-le'. <sup>3</sup> Benne' ca' dxelenná be'e quebe nuzúa Dios le' chee xuluchebe' benne' dxelune' da xrlátaje, san chee xuluchebe' benne' dxelune' da calela. ¿Dxaca lazru' quebe zrebu' benne' xu'u lawe'? Ben da xrlátaje, na' benne' xu'u lawe' ca' xelape' ba lá'ana lue' <sup>4</sup> lawe' da zaj naque' wen zrin chee Dios chee xelune' chiu' da xrlátaje. Che dxunu' da calela, dxal-la' zrebu' lawe' da quegá dácheze zaj nape' xel-la dxenná bea xelxebi'e chee bènneache lawe' da zaj naque' wen zrin chee Dios chee xuluzúe' lu da ba xa' benne' ca' dxelune' da calela. <sup>5</sup> Chee le na', dxun na ba xen guzúadxu dizra' chee benne' xu'u lawe', quegá tuze chee quebe xuluzúe' dxi'u lu da ba xa', san lawe' da nezdxu naca na da nadxixruj bea Dios. <sup>6</sup> Chee le na' dxízruje da dxebágale chee xu'u lawe', lawe' da zaj naca benne' xu'u lawe' wen zrin chee Dios, ne dxelún xánnie' zrin chee' na'.

<sup>7</sup> Le quizruj xúgute bènneache ca da nabágale chee'.

Da nabágale chee benne' wechizruj, le quizruj da nabágale.

Da nabágale chee xu'u lawe', le quizruj na.

Benne' dxal-la' gápale ba lá'ana, le gape' ba lá'ana.

Benne' dxal-la' gucá'ana szrenle, le gucá'ane' szren.

<sup>8</sup> Quebe dxal-la' cue zria chee le nen nu benne' san tuze chee zri'ile le' ca dxal-la' gunle chee le sa' ljwezrele tule xetule. Che gunle da nigá, na' gunle da nadxixruj bea na. <sup>9</sup> Naga zaj naxúaj da nadxixruj be'e Dios dxenná na: Quebe súalenu' zru'ula benne' xula.

Quebe gutiu' benne'.

Quebe cuanu'.

Quebe gun lazru' chee benne'.

Quebe sa lazru' da naca chee benne'.

Xúgute da nadxixruj bea caní, ne xúgute da nadxixruj bea xezícadxa dxun bènnea' dxuzúe' dizra' da nadxixruj bea na' dxenná na: Bzri'i le sa' ljwezru' ca nazrí'i cuinu'. <sup>10</sup> Bènnea' nazrí'ine' le sa' ljwezre' quebe dxune' da calela chee le sa' ljwezre' na'. Ca'an naca, bènnea' nazrí'ine' le sa' ljwezre' dxuzúe' dizra' chee da nadxixruj bea na.

<sup>11</sup> Ca naca da caní, le guxúe xanne' ca naca zra zúadxu na'a lawe' da ba bzin zra xebandxu lu bchigala lawe' da ba zua gágudxa zra ladxu lu da nácadxu ca guzúa na gate na' guzú lau dxéajledxu. <sup>12</sup> Ba dxedé chee da chul-la, ne ba za te zra. Chee le na' dxal-la' gusandxu da dxelún bènneache lu da chul-la, na' gácadxu ca tu benne' zeje' wedil-la dxacu zra lané' xia, chee tadxu lu xel-la naxaní' chee Dios.

<sup>13</sup> Dخال-la' tadxu li lazre' ca dxal-la' tadxu te zra.

Quebe dxal-la' xí'ajdxu da dxuzuzre na bènneache,

ne quebe gagu xrátadxu.  
 Quebe gundxu da sban, ne da calela.  
 Quebe tíl-lalëdxu le sa' ljuézredxu,  
 ne quebe gácadxu xa lazre'.

<sup>14</sup> Xránadxu Jesucristo gácaqueze' ca zra lánadxu xia, na' quebe gundxu da dxezá lazre' bëla' dxen cheëdxu.

## 14

### *Quebe si tizru' biche ljwezru'*

<sup>1</sup> Che tu bi bíchedxu quebe ne se cháchabe' lu xel-la dxeajlí lazre', le si' lu na'le lebe', san quegá cheë gutíl-lalele lebe' dizra' ca naca da quebe dxun na ba xen. <sup>2</sup> Ca naca na, zaj zra' benne' dxeleajlí lazre' naca cheë' xelawe' bal-la bi de, san zaj zra' benne' xezícadxa quebe ne xelezé chache' lu xel-la dxeajlí lazre', na' dxeléquene' waca xelawe' tuze xixre' cuan. <sup>3</sup> Benne' dxawe' xúgute' da ca' quebe dxal-la' guzúe' chalá'ala bënnea' nadxúaj nadxeze da dxawe', na' benne' nadxúaj nadxeze da dxawe' quebe dxal-la' si tizre' bënnea' dxawe' bal-la bi de, lawe' da nazi' lu na' Dios bënnea'. <sup>4</sup> ¿Nuzra nacu' lue' dxezí tizru' wen zrin cheë Xránadxu? Che xegá'ane' xrlátaje, u che quegá, naca na da nabaga Xránadxu. Xegá'ane' xrlátaje lawe' da napa Xránadxu xel-la waca cheë gucá'ane' le' xrlátaje.

<sup>5</sup> Caní naca xetú. Zaj zra' benne' dxulupá'anadxé' tu zra ca xetú zra, na' zaj zra' benne' dxeléquene' tuz ca zaj naca xúgute' zra. Tu tudxu dxal-la' se cháchadxu lu xichaj lázrdaudxu ca naca da caní. <sup>6</sup> Benne' dxupá'ane' tu zra dxune' na cheë gape' ba lá'ana Xránadxu, na' bënnea' quebe dxupá'ane' zra na' dxune' ca' cheë gape' ba lá'ana Xránadxu. Benne' dxawe' bal-la bi de dxune' na cheë gape' ba lá'ana Xránadxu lawe' da dxé'ë Dios: Xcalenu', na' bënnea' nadxúaj nadxeze da dxawe' dxune' na cheë gape' ba lá'ana Xránadxu, na' cá'anqueze dxé'ë Dios: Xcalenu'.

<sup>7</sup> Netudxu dxi'u naca bandxu cheë gundxu da naca cheézedxu, ne quegá gátedxu lu da naca cheézedxu. <sup>8</sup> Che naca bandxu, naca na cheë gaca ba Xránadxu. Ca' naca na, che gaca bandxu, u che gátedxu nácadxu bi cheë Xránadxu. <sup>9</sup> Cristo gutië', ne bebanë' cheë gaque' Xrana benne' gate ca', ne Xrana benne' ban ca'.

<sup>10</sup> Na'a lue', ¿bizr cheë na' quebe dxelé'enu' chawe' ca da dxun le sa' ljwezru', bi bíchedxu? ¿Bizr cheë na' dxuzú' le' chalá'ala? Xúgutedxu dxal-la' zrindxu lau Cristo cheë guchi'ë ca da nundxu tu tudxu. <sup>11</sup> Naxúaj lu xiche lá'azxa da dxenná:

Dxenná Xránadxu: "Dxuzetaj cuina' dxennía':

Xúgute' bënneache xuluzú zribe' lawa'.

Xúgute' xelexechebe' lawe' lau naca' Dios."

<sup>12</sup> Ca'an naca, tu tudxu dxi'u dxun na ba xen gulé'edxu ca da nundxu lau Dios.

<sup>13</sup> Cheë le' na' québedxa dxal-la' si tízradxu tudxu xetudxu. Le gun ba xuzre quebe bi gunle da gun na ga chegu bi bíchele, u da gun na cheajcházie' lu dul-la. <sup>14</sup> Dxuxrén lazra' Xránadxu Jesús, ne nezda' quebe bi da dxágudxu nácaqueze sban, san che tu bi bíchedxu dxéquebe' de tu da dxágudxu da naca na sban, cheë lebe' naca na da sban. <sup>15</sup> Che ne cheë da dxagu' lue', dxunu' dxeajchaze bi bichu', quebe dxunu' da naca cheë xel-la zri'i lazre'. Quebe gunu' cuía xi' tu benne', bënnea' gute Cristo waláz cheë', lawe' da dxaca lazru' lue' gagu' bi xel-la wagu. <sup>16</sup> Quebe bi gunle

da güe lataj nu nne schanní' chee da dxéquele naca na da xrlátaje. <sup>17</sup> Chee súadxu naga dxenná be'e Dios dxi'u quebe naca na chee da dxágudxu, u chee da dxí'ajdxu, san naca na chee xegá'anadxu xrlátaje lau Dios, ne chee gápadxu xel-la dxebeza zri lazre', ne chee súadxu xel-la dxebé, da ca' nápadxu ne chee Be' Lá'azxa. <sup>18</sup> Nu benne' dxuné' zrin chee Cristo caní dxuné' da dzezaca ba lazre' Dios, na' dxelapa bénneache le' ba lá'ana.

<sup>19</sup> Ca' naca na, dxal-la' gundxu da dxulusá na xel-la dxebeza zri lazre', ne da dxuluzúa chacha na dxi'u. <sup>20</sup> Quebe guzríá xi'u da nun Dios lu xichaj lázrdau le sa' ljwezru' ne chee da dxagu'. Da li xúgute da dxágudxu zaj naca na xrlátaje, san quebe naca xrlátaje bi gágudxu da gun na cheajchaze benne' xula lu dul-la. <sup>21</sup> Xrlátaje naca quebe gágudxu bēla', ne quebe xí'ajdxu xrise uva wal-la, ne quebe bi gundxu da gun na cheajchaze bi bíchedxu lu dul-la, u da guzríá xi na xel-la dxeajlí lazre' chee'. <sup>22</sup> Che napu' xel-la dxeajlí lazre' bi gaca gunu', dxal-la' gunu' na lué'queze lau Dios. Ba neza naca na chee benne' quebe guzríá xi' cuine' ne chee da dxéquene' naca na da xrlátaje gune'. <sup>23</sup> Bénnea' dxawe' da dxéquene' quebe dxal-la' gawe', nabague' zria gate dxawe' na lawe' da dxawe' da quebe dxeajlí lazre' naca chee' gawe'. Xúgute da dxundxu zaj naca dul-la che quebe dxuxrén lázredxu zaj naca na xrlátaje.

## 15

*Ben da dzezaca ba lazre' bi bichu', ne quegá da dzezaca ba lázrezu' lue'*

<sup>1</sup> Dxi'u ba ze cháchadxu lu xel-la dxeajlí lazre' dxal-la' gácalēdxu benne' quebe ne se chache' lu xel-la dxeajlí lazre', ne quebe gundxu da dzezaca ba lázredxu dxí'uze. <sup>2</sup> Tu tudxu dxal-la' gundxu da dzezaca ba lazre' bi bíchedxu lu da gun na chawe' cheebe', ne lu da gusegula na lebe' lu xel-la dxeajlí lazre' cheebe'. <sup>3</sup> Crístoqueze quebe bene' da dzezaca ba lazre' leze', san guca chee' ca naxúaj na lu dizra' lá'azxa, dxenná na: Benne' ca' gulenné' schanní' chiu' Lue', Dios, guca na ca gulenné' schanní' chia' neda'. <sup>4</sup> Xúgute da naxúaj nédxudaute lu dizra' lá'azxa zaj naxúaj na chee guzéajni'i na dxi'u, chee gápadxu xel-la dxebeza lazre' ne chee xel-la zren lazre', ne xel-la dxexúe zren, da ca' nápadxu ne chee da ca' zaj naxúaj na. <sup>5</sup> Dxenaba' lau Dios, Bénnea' dxunne' dxi'u xel-la zren lazre', ne dxexúe zrene' dxi'u, chee gácalēne' le'e chee gácale tuze tule xetule ne chee Jesucristo, <sup>6</sup> chee gunle xúgutele tu zren güe lá'anale Dios, Xra Xránadxu Jesucristo.

*Dxelén benne' quebe zaj naque' judío dizra' chawe'*

<sup>7</sup> Ca'an naca, chee gaca ba Dios, le si' lu na'le ljwézrele tule xetule ca ben Cristo, guz' lu ne'e dxi'u. <sup>8</sup> Ca da dxennéa' neda', dxennéa' bla' Cristo, ne bene' zrin chee benne' judío ca', chee bene' ca da guchebe lazre' Dios lau xra xrtáudxu ca', ne caní blé'ene' naca Dios li lazre'. <sup>9</sup> Cá'anqueze blé'e chee xelúe lá'ana Dios benne' ca' quebe zaj naque' judío lawe' da dxexache lazre' bénneache, ca da naxúaj na caní chee Cristo lu dizra' lá'azxa, dxenné':

Güe lá'ana' lue', Dios, lau benne' xezr la xu ca',  
ne tu gul-lazqueza' da xelapa ba lá'ana Lue'.

<sup>10</sup> Cá'anqueze dxenná na:

Le be, le'e, bénneache dute xezr la xu  
nen benne' zaj naque' bi chee Dios.

11 Cá'anqueze dxenná na:

Le güe lá'ana Xránadxu,  
le'e, bénneache chee xúgute xezr la xu,  
ne le guchalaj chee xel-la szren chee',  
le'e, xúgute bénneache.

12 Cá'anqueze bchalaj Isaías ca naca chee Cristo, gunné':

Welá'queze tu zri'ine zre sua Isaí,  
Bénnea' nna bé'ene' xúgute cue' xezr la xu,  
na' benne' ca' xebeza lazre' Le'.

13 Dxenaba' Dios, Bénnea' dxunne' dxi'u xel-la dxebeza lazre', chee gúnna'le'e le'e xel-la dxebé, ne xel-la dxebeza zri lazre' lawe' da dxeajlí lázrele Le', chee gápale'equezle xel-la dxebeza lazre' ne chee xel-la waca chee Be' Lá'azxa.

14 Le'e, bi bícha'dau', dxuxrén lazra' nápa'le'e da chawe', ne núnbeale xúgute chee gaca guzėjni'ile ljwézrele tule xetule. 15 Lu xiche nigá bechugu lazra' guzúaja' chee da caní chee quebe gal-la lázrele na. Dxuna' na ne chee da bsebaga Dios neda' lu da chawe' chee'. 16 Caní guna' zrin chee Jesucristo ládujla benne' quebe zaj naque' judío. Zrin dxuna' naca na chee guzenda' bénneache dizra' chawe' chee Dios chee guzrá'a benne' quebe zaj naque' judío lau Dios ca tu guna' da dxezaca ba lazre' Le'. Xelaque' benne' lá'azxa ne chee Be' Lá'azxa.

17 Lu da naca' chee Jesucristo waca xezaca ba lazra' lu zrin dxuna' chee Dios 18 lawe' da quebe dxedxugu lazra' guchálaja', san tuze ca naca da nun Cristo ne chia' neda', chee guna' xuluzúa benne' quebe zaj naque' judío xrtizra Dios. Da nigá be'na' ne chee da bchálaja', ne da be'na', 19 ne ne chee xel-la waca chee da ble'e Dios, nen xel-la waca chee xabáa, ne ne chee xel-la waca chee Be' Lá'azxa. Caní bchálaja' dizra' chawe' chee Cristo du ca naca xezr la xu. Guzú lawa' dxuna' na xezre Jerusalén, bzrintea' naga nababa Ilírico. 20 Caní naca, be'na' ba xuzre bchálaja' dizra' chawe' naga quebe ne xelenne' La Cristo, chee quebe guna' zrin naga ba zaj nun zrin xezicadxa benne', 21 na', ca dxenná dizra' lá'azxa:

Xelelé'e benne' ca' quebe ne zrin nu benne' guzenne' le' chee Cristo,  
na' benne' ca' quebe ne xelén chee Le' xelėjni'ine da naca chee'.

*Pablo dxugú'u be'e chéaje' xezre Roma*

22 Chee guzenda' le'e da caní, da zan lasa guca lazra' xedajnná'a le'e zrale xezre Roma, san quebe guca chia'. 23 Na'a, ba bexuzre be'na' zrin nigá, ne lawe' da zánete iza ba guca lazra' xida' súalena' le'e, 24 dxebeza lazra' tea' xedajnná'a le'e gate cha'a lu xezr la xu España. Gate te sua' xel-la dxebé nen le'e dxebeza lazra' xusi'ile neda' neza, na' cha'a ná'ala. 25 Na'a cha'a Jerusalén, gu'a late' da gácale na bi bíchedxu zaj zre'e na', 26 lawe' da bi bíchedxu zaj zre'e xezre ca' zaj nababa Macedonia, ne xezre ca' zaj nababa Acaya guléquene' naca xrlátaje bulutube' dumí da xelesel-le' chee bi bíchedxu zaj naque' baxache', zaj zrabe' Jerusalén. 27 Guléquene' naca xrlátaje xelune' da nigá, na' caní naca na lawe' da dxelebague' chee benne' ca', lawe' da benne' judío ca', benne' dxelėjle'e chee Cristo, bulunézruje' chee benne' quebe zaj naque' judío chee da zaj nape' chee Dios, na' benne' caní dxal-la' xulunézruje' chee benne' judío ca' chee da zaj nape' chee xezr la xu nigá. 28 Caní naca, gate xexuzre guna' da nigá, ne ba bnézruja' le' dumí nigá, na' cha'a lu xezr la xu España, na' ca teza'



xedajnná'a le'e. <sup>29</sup> Dxuxrén lazra' gate xida' naga zrale le'e, gúalę'a da chawe' cheę dizra' chawe' cheę Cristo.

<sup>30</sup> Le'e, bi bícha'dau', dxata' xúeda' le'e ne cheę Xránadxu Jesucristo, ne ne cheę xel-la zri'i lazre' da dxunna Be' Lá'azxa dxi'u, cheę gácale tuze nen neda' guchálajlędxu Dios cheę gácalęne' neda'. <sup>31</sup> Le naba Dios cheę guselę' neda' lu na' benne' quebe dxelęajlę'e cheę Cristo naga nababa Judea, ne cheę xezezi' du lazre' bi bíchedxu zaj zřę'e Jerusalén dumí nigá da nu'a, <sup>32</sup> na' che naca da dxaca lazre' Dios, la'a lu dutę xel-la dxebé xedajnná'a le'e, ne cheę xezi' lazra' naga zrale le'e. <sup>33</sup> Dxenaba' Dios, Bénnea' dxunne' dxi'u xel-la dxebeza zri lazre', súalęne' xúgutele le'e. ¡Ca'an gaca na!

## 16

### *Pablo dxugape' diuzre bi bíchedxu ca'*

<sup>1</sup> Dxegu'a lu na'le nu'ula zandxu Febe, nu'ula na' ba bęne' zrin cheę Cristo ládujla bi bíchedxu zaj zřę'e xezre Cencrea. <sup>2</sup> Le si' lu na'le lę' cháwedau' lu La Xránadxu, ca dxal-la' gaca ládujla bi bíchedxu dxelęajlę'e cheę Cristo, na' le gácalęne' bíteteze da dxexájrjene', lawe' da ba gúcalę lę' benne' zan, ne neda'queza'.

<sup>3</sup> Le gugapa diuzre Priscila ne Aquilo, benne' belún zrin cheę Jesucristo tu zren nen neda'. <sup>4</sup> Benne' caní buluzúę' xel-la nabán cheę' lu da stebe cheę gúcalęne' neda'. Ca' naca na, dxapa' benne' ca' xcalenle, ne quegaze neda', san cá'anqueze dxelún xúgute bi bíchedxu quebe zaj naque' judío. <sup>5</sup> Le gugapa diuzre bi bíchedxu ca' dxeleżrágabe' lizre Priscila, ne Aquilo. Le gugapa diuzre Epeneto, benne' ljwezra' nazri'ite lazra'. Le' guque' benne' nedxu naga nababa Acaya guxęajlę'e cheę Cristo. <sup>6</sup> Le gugapa diuzre María, nu'ula na' ba bęnle'e zrin ládujla le'e. <sup>7</sup> Le gugapa diuzre benne' waláżr chia', Andrónico, ne Junias, benne' ca' gulaque' ljwezra' lizre xia. Zaj naque' benne' blau ládujla benne' gubáz ca' cheę Cristo, na' gulęajlę'e cheę Cristo nédxudxa ca neda'.

<sup>8</sup> Le gugapa diuzre Amplias, benne' ljwezra' nazri'ite lazra' lu La Xránadxu. <sup>9</sup> Le gugapa diuzre Urbano, benne' ljwezra' lu zrin cheę Jesucristo, ne le gugapa diuzre Estaquis, benne' nazri'ite lazra'. <sup>10</sup> Le gugapa diuzre Apeles, benne' blé'ene' da zan lasa ca dxeajlí lazre' Cristo. Cá'anqueze le gugapa diuzre Aristóbulo, benne' xrtia'. <sup>11</sup> Le gugapa diuzre Herodión, benne' waláżr chia', ne Narciso, benne' xrtia', benne' dxelęajlę'e cheę Xránadxu. <sup>12</sup> Le gugapa diuzre Trifena ne Trifosa, nu'ula ca' dxelune' zrin cheę Xránadxu, ne le gugapa diuzre Pérsida, bi zandxu nazri'ite lazrdxu, nu'ula na' ba bęnle'e zrin cheę Xránadxu. <sup>13</sup> Le gugapa diuzre Rufo, benne' blau dxęajlę'e cheę Xránadxu, ne xrne'e, nu'ula na' naque' ca xrnáqueza'. <sup>14</sup> Le gugapa diuzre Asíncrito, ne Flegonte, ne Hermas, ne Patrobas, ne Hermes, ne bi bíchedxu ca' zralęne' lę'. <sup>15</sup> Cá'anqueze le gugapa diuzre Filólogo, ne Julia, ne Nereo, ne nu'ula zane', ne Olimpas, ne xúgute bi bíchedxu dxeleajlí lazre' Cristo, benne' zralęne' benne' caní.

<sup>16</sup> Le gugapa diuzre ljwézrele tule xetule, gunídate ljwézrele. Xúgute cue' bi bíchedxu dxulugape' le'e diuzre.

<sup>17</sup> Le'e, bi bícha'dau', dxata' xúeda' le'e, nna' xánnele benne' ca' dxelune' chupa la'a bi bíchedxu ca', ne dxelune' dxeajlecházie' benne' ca', na' dxulusędene' da dxedábaga na ca da nusędele. Le cuasa naga zaj zra' benne' ca' <sup>18</sup> lawe' da quebe dxelún benne' ca' zrin cheę Xránadxu Jesucristo.

Dxelune' ca da dxezaca ba lazre' bela' dxen cheequeze', ne dxelezí xē'e benneáchedu ca' quebe ne xeleneze xánnie' ca naca dizra' chawe'. Benne' wen lazre' ca' cadite zaj nupé'e, ne zaj nézene' da dxuluchálaje'. <sup>19</sup> Xúgute benneache zaj nézene' ca ba bzúale xtizra' Dios. Chee le na' dxebeda', ne dxaca lazra' gácale ban lazre' gunle da xrlátaje, na' quegá gunle da calela. <sup>20</sup> Dios, Bénnea' dxunne' dxi'u xel-la dxebeza zri lazre' ba zúaqueze' gácalene' le'e, chee guchúchujle Satanás da xriwe'. Dxenaba' lau Xránadxu Jesucristo gunē' gaca chawe' chee.

<sup>21</sup> Bi bíchedxu Timoteo dxugápabe' le'e diuzre. Nácabe' ljwezra' lu zrin chee Cristo. Cá'aqueze dxulugape' le'e diuzre benne' walázr chia' Lucio, ne Jasón, ne Sosípater.

<sup>22</sup> Neda', Tercio, dxuzúaja' xtizra' Pablo caní, dxugapa' le'e diuzre lu La Xránadxu.

<sup>23</sup> Gayo dxugape' le'e diuzre, bennea' zua' lizre', na' dxunne' lizre' naga dxelezraga xúgute benne' bíchedxu caní. Cá'aqueze dxulugape' le'e diuzre Erasto, benne' xu'u lu ne'e dumí chee xezre, ne bi bíchedxu Cuarto.

<sup>24</sup> Dxenaba' Xránadxu Jesucristo gunē' gaca chawe' chee xúgutele le'e. ¡Ca'an gaca na!

*Pablo dxue lá'ane' Dios*

<sup>25</sup> Na'a, dxue lá'anantu' Dios, Bénnea' séquene' guzé cháchadxe' le'e lu dizra' chawe' da dxuzenda' benneache, ne lu da dxusédeda' ca naca chee Jesucristo. Da nigá naca na tuze nen da ble'e Dios chee da nagache da gulú'u chawe' bagácheze nédxudaute, <sup>26</sup> san na'a ba ble'e lawe' na ne chee dizra' lá'azxa da buluzúaj benne' ca' buluchálaje' waláz chee Dios, ca da bdxixruj be'e Dios chadía chacanna. Ba ble'e lau dizra' chawe' nigá na'a lau benne' xúgute xezr la xu chee xeléajle'e chee na, ne xuluzúe' dizra' chee na.

<sup>27</sup> Dios, Benne' tu licha', ne Benne' sina, gaca ba Le' chadía chacanna ne chee Jesucristo. ¡Ca'an gaca na!

## DIZRA' NEDXU DA BZUAJ SAN PABLO CHEE BI CHEE CRISTO ZAJ ZRE'E XEZRE CORINTO

*Pablo dxuzúaje' chee bíchedxu zaj zre'e xezre Corinto*

<sup>1</sup> Neda', Pablo, naca' benne' bláwizra Dios chee gaca' gubáz chee Jesucristo. Naca na da guca lazre' Dios gaca'. Tu zren nen bíchedxu Sóstenes <sup>2</sup> dxuzúaja' da nigá chee le'e, bi bicha', zrágale chee Dios lu xezre Corinto. Nácale bi chee Dios lawe' da nácale tuze nen Jesucristo. Dios ba bláwizre' le'e chee gácale bi cheequeze' tu zren nen xúgutē benne' ca' zaj zre'e du ca naca xezr la xu, ne dxululáwizre' La Xránadxu Jesucristo, Bénnea' naque' Xrane benne' ca', ne Xránadxu dxi'u. <sup>3</sup> Dxenaba' Xradxu Dios, ne Xránadxu Jesucristo gunne' le'e xel-la dxebeza zri lazre', ne gun chawe'e le'e.

*Da chawe' da nápadxu ne chee Cristo*

<sup>4</sup> Dxápequeza' Dios: Xcalenu', ca naca chee da chawe' da benna Dios le'e ne chee Jesucristo. <sup>5</sup> Lawe' da nácale tuze nen Cristo, Dios ba benne' le'e xel-la gunní'a zante da naca chee Be' Lá'azxa chee', lu da dxuchálajle, ne lu da nézele. <sup>6</sup> Ca' naca na, da dxuchálajdxu ca naca chee Cristo ba guca na li chee le'e. <sup>7</sup> Ca' naca na, quebe bi dxexárzjele ca da dxunna Dios dxi'u dxácatē dxebéxadxu zra xelá' Xránadxu Jesucristo. <sup>8</sup> Le' guxru chache' le'e ca zrin zra bzebe, chee quebe nu benne' gaca gusebáguē' le'e zría gate xelá' Xránadxu Jesucristo. <sup>9</sup> Dios tu dxúnzqueze' ca da nachebe lazre', naque' Bénnea' bláwizre' le'e chee gácale tuze nen Zrí'ine', Xránadxu Jesucristo.

*Dxaca chupa la'a bi chee Cristo*

<sup>10</sup> Bi bicha', dxata' xúeda' le'e lu La Xránadxu Jesucristo, chee gácale tuze, ne quebe gácale chupa la'a. Le gaca xanne' tuze, ne tuze da cu'u xichaj lázrdaule, ne da gunle. <sup>11</sup> Da nigá dxapa' le'e, bi bicha', lawe' da buluzén benne' xrtia Cloé neda' dxutíl-lale dizra'. <sup>12</sup> Da nigá zéaje na nácale chupa la'a, na' bál-lale dxennale: Netu' da'ntu' Pablo. Xezícale' dxennale: Netu' da'ntu' Apolos. Xezícale' dxennale: Netu' da'ntu' Pedro. Xezícale' dxennale: Netu' da'ntu' Cristo. <sup>13</sup> ¿Dxéquele naca Cristo chupa la'a? ¿Dxéquele gudá'a neda', Pablo, le'e xaga béguaj waláz chee le'e? ¿Bedxúale le'e nisa lu la Pablo? <sup>14</sup> Xcalén Dios quebe núlale le'e bchua' nisa san tuze Crispo, ne Gayo <sup>15</sup> lawe' da quebe nu gaca nna: Lu la Pablo gudxúa' nisa. <sup>16</sup> Cá'anqueze bchua' nisa benne' xrtia Estéfanos, san quebe dxeajsá lazra' che nu xetú bchua' nisa. <sup>17</sup> Cristo quebe gusel-le' neda' nu guchúa' nisa, san chee guzenda' benneache dizra' chawe' chee', quegá nen dizra' sina, chee quebe gaca dácheze da ben Cristo gate gutie' le'e xaga béguaj.

*Cristo naque' xel-la waca, ne xel-la sina chee Dios*

<sup>18</sup> Dizra' ca gute Cristo le'e xaga béguaj naca na ca tu da xálaze lau benne' xelebía xi'e, san cheedxu dxi'u, nápadxu xel-la weselá, dizra' nigá napa na xel-la waca chee Dios. <sup>19</sup> Naca na ca naxúaj na lu dizra' lá'azxa. Dxenná Dios: Guzria xi'a xel-la sina chee benne' sina ca', ne guzúa' chalá'ala xel-la naxéajni'i chee benne' dxeléajni'ine'.

20 ¿Gazra nagá'ana benne' sina na'a? ¿Waca guselá cuine? ¿Gazra nagá'ana benne' dxusédene' bénneache? ¿Gazra nagá'ana benne' dxuchálaje' ca naca da dxaca lu xezr la xu nigá? Ca naca xel-la sina chee xezr la xu nigá, Dios ba nune' na tu da xálaze lawe' da tuze Le' gaca guselé' bénneache. 21 Dios nézene' xúgute. Quebe be'e lataj bénneache xelúnbe'e Le' ne chee xel-la sina chee bénneache. Bezaca ba lazre' Dios ne chee dizra' nigá bselé' benne' ca' dxuluxrén lazre' Le', lácala zaj zra' benne' dxeléquene' naca dizra' nigá tu da xálaze.

22 Benne' judío ca' dxelaca lazre' xelélé'ene' xel-la waca da za xabáa, na' benne' griego ca' dxelexílaje' xel-la sina, 23 san dxi'u dxuzendxu bénneache ca naca chee Cristo, ca gutie' le'e xaga béguaj. Benne' judío dxelexedué'ene' chee dizra' nigá, na' benne' quebe zaj naque' judío dxeléquene' naca na tu da ca zeaje na. 24 Na'a, benne' ca' ba bláwizra Dios, benne' judío ca', ne benne' quebe zaj naque' judío, Cristo nácaqueze' xel-la waca, ne xel-la sina chee Dios. 25 Da dxeleque bénneache naca tu da xálaze chee Dios nácadxa na sina ca xel-la sina chee bénneache, na' da dxeleque bénneache naca na tu da naca bea nate ni'a na' Dios nápadxa na xel-la waca ca xel-la waca chee bénneache. 26 Le'e, bi bicha', dxal-la' gueque be'ele ba bláwizra Dios le'e lácala bábaze le'e nácale sina lau bénneache chee xezr la xu nigá, ne bábaze le'e nácale xel-la dxenná bea, u nácale xrtia benne' zaj naque' blau. 27 Dios ba guqu'é' benne' ca' dxeleque bénneache zaj naque' benne' xálaze, chee xelxedué'e benne' sina ca', ne ba guqu'é' benne' ca' dxeleque bénneache zaj nate ni'a ne'e, chee xelxedué'e benne' wal-la ca'. 28 Dios ba guqu'é' benne' ca' quebe zaj naque' blau, ne benne' ca' zaj nuzúa bénneache chalá'ala, benne' ca' quebe nu zaj naque', chee guzague' naze benne' zaj naque' blau, 29 chee quebe nu seque' gucá'ana szren cuina lau Dios. 30 Díósqueze ba nune' le'e tuze nen Jesucristo, ne nune' naca Cristo Benne' dxunna dxi'u xel-la sina, ne Benne' gucá'ana dxi'u xrlátaje, ne Benne' dxuzúe' dxi'u lu na' Dios, ne benne' dxexá'awe' dxi'u. 31 Ca' naca na ca da naxúaj na lu dizra' lá'azxa, da dxenná na: Che nu benne' dxaca lazre' nu gucá'ana szrene', dxal-la' gucá'ana szrene' Xránadxu.

## 2

*Dizra' ca naca chee Cristo, gudé'e xaga béguaj*

1 Na'a, bi bicha'dau', gate bedajchálajlena' le'e da li chee Dios, quebe bchíneda' dizra' sina, ne dizra' zaca. 2 Gate ne zúalena' le'e quebe guca lazra' guchálaja' chee bila da xetú san tuze chee Jesucristo, Bénnea' gudé'e xaga béguaj. 3 Gate guzúalena' le'e ne nátete' ni'a na'a, ne guzrízetea' lawe' da bzreba' quebe guca guna' da nusebaga' Cristo neda'. 4 Gate bchálajlena' le'e, ne bzenda' le'e dizra' chawe', quebe guca lazra' guna' chéajlele chee' nen dizra' sina chee bénneache da guchálaja', san bena' guxéajlele chee' ne chee Be' Lá'azxa, ne ne chee xel-la waca chee Dios 5 chee gápale xel-la dxeajlí lazre' da naca na ne chee xel-la waca chee Dios, ne quegá ne chee xel-la sina chee bénneache.

*Dios dxulé'e cuine' ne chee Be' Lá'azxa*

6 Dxuchálajntu' dízra' sina lau benne' ca' ba zaj ze chache' lu xel-la dxeleajlí lazre' chee'. Xel-la sina nigá quebe naca na xel-la sina chee xezr la xu nigá, ne chee benne' dxelenná be'e lu xezr la xu nigá, benne' ca' xeledé' chie'. 7 Dxuchálajntu' xel-la sina nagache chee Dios, da na' bzua Dios néxdudate' ca bene' xezr la xu nigá, chee ladxu chadia

chacanna. <sup>8</sup> Netú benne' ca', benne' dxelenná be'e lu xezr la xu nigá, quebe guléajni'ine' da nigá, lawe' da la guléajni'ine' na quebe buludé'e Xránadxu, Benne' xabáa, le'e xaga béguaj. <sup>9</sup> Naca na ca da naxúaj na lu dizra' lá'azxa, dxenná na:

Dios ba nucueze' chee benne' ca' zaj nazrí'ine' Le'  
da ca' quebe nu ne le'e, ne quebe nu ne xen,  
ne da quebe nu ne cu'u lazre'.

<sup>10</sup> Da caní zaj naca na da ble'e Dios dxi'u ne chee Be' Lá'azxa nasel-la Le', lawe' da dxelé'e Be' Lá'azxa xúgute da de, ne duté da xu'u na lu xichaj lázrdau Diósqueze.

<sup>11</sup> Ládujla bènneache, ¿nu seque' neze da xu'u lu xichaj lázrdau xetú benne', san tuze be' da nacaqueze'? Cá'aqueze, tuze Be' Lá'azxa chee Dios nézene' da xu'u lu xichaj lázrdau Dios. <sup>12</sup> Be' Lá'azxa da xú'udxu quebe naca na chee xezr la xu nigá. Nazidxu Be' Lá'azxa da dxunna Dios dxi'u chee chéajni'idxu da ca' ba nunna Dios dxi'u. <sup>13</sup> Dxuchálajntu' ca naca da caní nen dizra' da bséde Be' Lá'azxa chee Dios netu', ne quegá nen dizra' da bsédentu' lu xel-la sina cheentu'. Ca' naca na, dxuzéajni'intu' benne' zaj nazi'e Be' Lá'azxa chee Dios da nusede Be' Lá'azxa nigá dxi'u.

<sup>14</sup> Nu benne' quebe nazi'e Be' Lá'azxa chee Dios quebe dxezí' lu ne'e da zaj naca na chee Be' Lá'azxa chee Dios, lawe' da dxéquene' zaj naca na tu da xálaze. Quebe dxezeque' chéajni'ine' na lawe' da zaj naca na da dxéajni'idxu tuze ne chee Be' Lá'azxa. <sup>15</sup> Bènnea' nazi'e Be' Lá'azxa chee Dios dxezéquene' chéajni'ine' xúgute da dxulé'e Be' Lá'azxa le'. Benne' quebe zúale Be' Lá'azxa le', quebe séquene' chéajni'ine' da dxuséde Be' Lá'azxa dxi'u. <sup>16</sup> Naxúaj lu dizra' lá'azxa da dxenná na: ¿Nuzra ba guxéajni'i da xu'u xichaj lázrdau Xránadxu? ¿Nuzra benne' séquene' guzéajni'ine' Dios? Dxi'u nazidxu ca da xu'u xichaj lázrdau Cristo.

### 3

#### *Benne' dxelune' tu zren Dios lu zrin chee'*

<sup>1</sup> Na'a, le'e, bi bícha'dau', quebe guca guchálajlëna' le'e ca dxuchálajlëna' benne' ca' zúale Be' Lá'azxa chee Dios le', san bchálajlëna' le'e ca dxuchálajlëna' benne' ca' quebe zúale Be' Lá'azxa le', lawe' da ne nácale ca bidu ca' lu da naca chee Cristo. <sup>2</sup> Bsédeda' le'e da quebe zaj naca na stebe da naca na ca da dxugágudxu bidu dxe'ene, bidu ne dxázrebe', ne quebe gaca gágube' xel-la wagu da naca na zibaj, lawe' da quebe ne séquele chéajni'ile da zaj naca na stebe. Cá'aqueze na'a quebe ne séquele chéajni'ile na <sup>3</sup> lawe' da ne nácale ca zaj naca benne' cun ca nálaje'. Dxácate ne xu'ule xel-la zre lazre', ne dxutil-la ljwézrele dizra' ne nácale chupa la'a, ne nácale ca zaj naca benne' cun ca nálaje', ne dxunle cáteze dxelún xúgute bènneache. <sup>4</sup> Dxácate ne dxennale: Netu' da'ntu' Pablo, na' xezícale dxennale: Netu' da'ntu' Apolos, ne dxunle ca dxelún benne' cun ca nálaje'.

<sup>5</sup> Na'a, ¿nuzra na' Pablo? ¿Nuzra na' Apolos? Nácantu' wen zrin chee Dios, na' ne chee netu' guxéajlele chee Xránadxu. Tu tuntu' bentu' zrin chee Xránadxu da blé'ene' netu'. <sup>6</sup> Neda' guza' bínnedu ca' lu xichaj lázrdaule, bchálajlëna' le'e xrtizra Dios, na' Apolos gudile' na, san Dios bsegule' na. <sup>7</sup> Ca' naca na, ne benne' dxaze', ne benne' dxilé' na, quebe bi zaque', san Dios na' dxune' xúgute, lawe' da dxusegule' da du ca'. <sup>8</sup> Benne' dxelaze', ne benne' dxelile' zaj naque' lébete, san Dios quízruje' tu tu

benne' caní ca naca zrin da beluné'. <sup>9</sup> Nácantú' wén zrin tu zren nen Dios, na' le'e nácale ca tu xezr la xu naga dxun Dios zrin.

Cá'anqueze nácale ca tu xu'u da dxun Dios. <sup>10</sup> Neda' naca' ca tu wén xu'u blau, na' Dios benne' neda' lataj gulecha' lane na, na' benne' xula dxusegulé' ze'e na'. Tu tu benne' dxal-la' guxúe xánnié' ca dxusegulé' na. <sup>11</sup> Québedxa nu seque' cueche' xetú lane ca da ba dxe', da na' naca na Jesucrístoqueze, <sup>12</sup> san waca nu benne' gusegulé' lawe' na da zaca na ca oro, ne plata, ne xiaj da zaj zaca, u waca gusegulé' lawe' na da quebe zaca na ca blaga', ne xizre, ne luaj laga'. <sup>13</sup> Zrin da nun tu tu benne' gulé'equeze lawe na lu zra guchi'a Dios, lawe' da lu zra na' la' tu xi', na' lu xi' na' gulé'e lawe na ca naca zrin nun tu tudxu. <sup>14</sup> Che nu benne' nune' tu zrin da quebe chezxe na lu xi', na' wazi'e lazruj chee'. <sup>15</sup> Che chezxe zrin na', ca naca na nite na, san léqueze' walé', ca tu benne' dxexedxúaje' lu xi'.

<sup>16</sup> ¿Quebe nézele le'e nácale xudau' chee' Dios, na' Be' Lá'azxa chee' Dios zue' lu xichaj lázrdaule? <sup>17</sup> Che nu benne' gucá'ana dítaje' xudau' nigá chee' Dios, Dios guzría xi'e bénnea' lawe' da naca lá'azxa xudau' chee' Dios, na' lé'eqeuzle nácale xudau' na'.

<sup>18</sup> Quebe si xe cuínale. Che núlale dxéquele nácale benne' sina lu da naca chee' xezr la xu nigá, dxal-la' xun cuínale ca tu benne' quebe bi dxaque', chee' gunna Dios le'e xel-la' sina li. <sup>19</sup> Xel-la' sina chee' xezr la xu nigá naca na tu da xálaze lau Dios. Naxúaj lu dizra' lá'azxa da dxenná na: Dios dxun zrėjane' benne' sina ca' lu xel-la' sina da zaj nápaqueze'. <sup>20</sup> Cá'anqueze dxenná na: Xránadxu nézene' quebe bi zaca da dxululaba lazre' benne' sina ca'. <sup>21</sup> Chee' le' na' quebe nu benne' dxal-la' gun szren cuine' lawe' da de'e tu benne', lawe' da Dios dxunne' le'e xúgute' da ca' dxechínnele. <sup>22</sup> Pablo, ne Apolos, ne Pedro, ne xezr la xu nigá, ne xel-la' nabán, ne xel-la' gute, ne na'a zra, ne da za za', ne xúgute' da ca' zaj naca na chee' gaca da chawe' chee'le, <sup>23</sup> na' lé'eqeuzle xu'ule lu na' Cristo, na' Cristo xu'e lu na' Xradxu Dios.

## 4

### *Zrin dxelún benne' gubáz chee' Cristo*

<sup>1</sup> Ca' naca na, dxal-la' guéquele nácazentu' wén zrin chee' Cristo, ne nabágantu' gusédentu' bénneache da zaj nagache chee' Dios. <sup>2</sup> Na'a, benne' nabague' tu zrin, dxun na ba xen gaque' li lazre'. <sup>3</sup> Neda' quebe dxe'a gunne xue bi dxéquele naca' neda', u bi dxeleque bénneache naca'. Quebe gaca nnia' xrlátaje u quegá chee' da nuna' <sup>4</sup> lawe' da lácala quebe dxagu na nria neda' lázrdawa', da nigá quebe dxulé'e na quebe nabaga' zria. Xránadxu naque' Benne' dxuchi'e ca da dxuna'. <sup>5</sup> Ca' naca na, quebe guchi'ale chee' da ca' che quebe ne zrin zra. Le cueza zra xelá' Xránadxu, na' xebéaje' lu xel-la' naxaní' ca naca da nagache lu da chul-la. Xránadxu gulé'engé' ca naca da dxulaba lázredxu, na' Dios gulé'engé' chawe' tu tudxu ca da dxal-la' sidxu.

<sup>6</sup> Le'e, bi bicha', dxuchálajlena' le'e da caní chee' gaca chawe' chee'le, dxuzúa' ca tu da gulé'e na le'e Apolos, ne néda'queza'. Dxennía' da nigá chee' gusédele ne chee' netu' chee' quebe gundxale ca da dxue lataj dizra' lá'azxa le'e, ne chee' quebe gucá'ana szren cuínale, ne chee' quebe guzúale chalá'ala le sa' ljwézrele. <sup>7</sup> ¿Nuzra nun lue' blaudxa ca xezícadxa benne'? ¿Bizra napu' da quebe nunna Dios lue'? Che Le' benne' chiu' da na', ¿bizr chee' na' dxucá'ana szren cuinu', dxéquenu' lué'queze gudilju' da na'?

<sup>8</sup> ¿Nácale le'e benne' gunní'a? ¿Nápale xúgute da dxechínele? ¿Dxequele nácale wenná bea lácala quebe nácantu' netu' wenná bea? Xrlátaje dxgua la nácaqueze wenná bea chee guntu' netu' le'e tu zren lu xel-la dxenná bea chee. <sup>9</sup> Dxéqueda' Dios nuzúe' netu', benne' gubáz chee, lu lataj bzebe. Nácantu' ca benne' ba zaj nabía xi' chee gátentu'. Nácantu' ca tu da dxuzé na lau bénneache, na' dxelenná' gubáz chee xabáa ca', ne bénneache netu'. <sup>10</sup> Dxeleque bénneache nácantu' netu' tu da xálaze lawe' da dxuntu' zrin chee Cristo, san le'e dxéquele dxéajni'i xánnele da zaj naca chee Cristo. Dxeleque bénneache nate ni'a na'ntu' netu' san le'e dxéquele nácale le'e benne' wal-la. Dxuluzúa bénneache netu' chalá'ala, san dxelape' le'e ba lá'ana. <sup>11</sup> Ga bzrinte lu zra na'a zra dxeduntu', ne dxebíentu', ne nácantu' gala xídeze, na' bénneache dxulucháchalene' netu', ne quebe zua lízrentu'. <sup>12</sup> Dxexedú lázrentu' dxuntu' zrin. Dxelenné bénneache schanni' cheentu', san netu' dxexechéentu' dizra' chawe'. Zaj nau zi' xuzre' netu' san dxuchaga launtu'. <sup>13</sup> Dxelenné' schanni' cheentu', san netu' dxuchálajentu' le' da li dute xel-la zren lazre' cheentu'. Dxeluné' netu' ca tu xizre bebe, ne ca tu da ba guca ditaj chee bénneache ca lu zra na'a zra.

<sup>14</sup> Quegá dxuzúaja' cheele da nigá chee xedu'é'ele, san chee guzéajni'ida' le'e, nácale ca bi chia' nazri'ite lazra'. <sup>15</sup> Lácala zaj zúale le'e gaxúa gaxúane benne' dxulusédené' le'e ca naca chee Cristo, quebe nu zua xetú xrale. Néda'queza' naca' xrale lu xel-la dxejlí lazre' cheele Cristo lawe' da bzenda' le'e dizra' chawe' chee Jesucristo. <sup>16</sup> Ca' naca na, dxata' xúeda' le'e gunle ca dxuna' neda'.

<sup>17</sup> Chee le na' dxusel-la' Timoteo xedajná'abe' le'e, nácabe' ca bi li lazre' chia' nazri'ite lazra', lu da naca chee Xránadxu. Lebe' gusá'abe' lázrele ca dxuna' lu da naca chee Cristo, ne ca naca da dxusédeda' bénneache gáteteze na', ne lau xúgute cue' bi chee Cristo. <sup>18</sup> Bál-lale le'e ba nucá'ana szren cuínale lawe' da dxéquele quebe xida' xedajnnaba' le'e, <sup>19</sup> san dxebeza lazra' xídazequeza' xedajnná'a le'e che gunna Xránadxu lataj. Nadxa le'eda' da dxelezeque' xelún benne' ca' dxulucá'ana szren cuine', ne quegá tuze da dxelenné'. <sup>20</sup> Che dxenná be'e Dios dxi'u quebe naca na chee tu da dxuchálajzedxu. Lécaze' ba nunne' dxi'u xel-la waca chee'. <sup>21</sup> ¿Bizra dxaca lázrele le'e? ¿Dxaca lázrele gun na ba xen gudéa' le'e xel-la zi', u che xida' xedajnná'a le'e lu xel-la zri'i lazre', ne xel-la dxexruj lazre'?

## 5

### *Pablo dxuchi'e chee tu da shan*

<sup>1</sup> Ba benda' zua tu benne' ládujla le'e nune' ca zru'ule' xrna zie'. Da nigá naca na tu da sbánle'e da quebe ne xelún benne' quebe zaj núnbe'ene' Dios. <sup>2</sup> Ca naca da na' le'e ne dxucá'ana szren cuínale. Dxal-la' cuezre xáchele. Bénnea' nune' da nigá dxal-la' xebéajle le' ládujla le'e. <sup>3</sup> Quebe zua' neda' naga zúale lu be'la' dxen chia', san naca cáteze zúalena' le'e lu be' nácaqueza', na' ba bchi'a chee bénnea' nune' dul-la nigá ca tu benne' zúaletequeze le'e. <sup>4</sup> Le zraga le'e lu La Xránadxu Jesucristo, na' gaca na cáteze neda' súalena' le'e lu be' nácaqueza', na' xel-la waca chee Xránadxu Jesús suale na le'e. <sup>5</sup> Nadxa dxal-la' xudele bénnea' lu na' Satanás da xriwe', na' lácala cuía xi' be'la' dxen chee' na' be' nácaqueze' la na lu zra xelá' Xránadxu Jesús.

<sup>6</sup> Quebe dxal-la' gucá'ana szren cuínale ca naca da dxunle. ¿Quebe núnbeale dizra' na' dxenná na: Láteze cua zichaj dxuchazra na ca naca

cua na'? <sup>7</sup> Le xebéaj chalá'ala cua zichaj gula na' da dxuxrinnaj na le'e, chee gácale ca tu xeta xtila da dxágudxu Laní Pascua, da dxundxu nen cua cube da quebe nachixre na cua zichaj, ca da li nácale le'e. Crístoqueze gutië' waláz cheedxu. Naque' cheedxu zrila', be dxelutië' laní pascua. <sup>8</sup> Ca' naca na, dxal-la' gupá'adxu Laní Pascua cheedxu lu da naca du lazre', ne lu da li, da ca' zaj naca na ca xeta xtila da quebe nachixre na cua zichaj. Quebe gupá'adxu na lu da calela, ne lu da zrinnaj, da ca' zaj naca na ca cua zichaj gula na'.

<sup>9</sup> Lu da bzuaja' chee neédxudxa gucha' le'e quebe guchixre chee nen benne' ca' dxelunë' da sban. <sup>10</sup> Quebe gucha' le'e xecuásatequezele chee benne' zaj zre'e xezr la xu nigá, benne' dxelunë' da sban, ne benne' wecude' ca', ne benne' gubán ca', ne benne' dxelúe lá'anë' bedáu' xiaj xaga ca', lawe' da chee quebe guchixre chee nen benne' caní, dxun na ba xen xedxúajle xezr la xu nigá. <sup>11</sup> Da guca lazra' xapa' le'e naca na chee quebe guchixre chee nen netú benne' dxennë' naque' bíchedxu, san dxunë' da sban, u naque' benne' wecude', u dxue lá'anë' bedáu' xiaj xaga, u dxutupe' dizra' bizruj, u dxí'aje', u naque' gubán. Quebe dxal-la' gágulele benne' caní. <sup>12-13</sup> Quegá naca chia' guchi'a chee benne' dxeledá cúzrela. Dios guchi'e chee benne' ca'. Le'e dxal-la' guchí'ale chee benne' zaj naque' bi bíchedxu. Chee le na' le xebéaj benne' dul-la na' ládujla le'e.

## 6

### *Zria da dxelagu ljwezre bi ca' chee Cristo*

<sup>1</sup> Gate tule le'e zua da dxaca chee nen xetule le'e, ¿bizr chee na' dxeajle lau benne' dxuchi'e da dxaca, na' quebe dxéajle'e chee Cristo, ne quebe dxeajle lau bi bíchele? <sup>2</sup> ¿Quebe nézele le'e, benne' zaj naca bi chee Dios xuluchí'e ca da dxelún bënneache chee xezr la xu nigá? Che le'e guchí'ale chee bënneache lu xezr la xu nigá, ¿quebe naca chee guchí'ale chee tu da dauze? <sup>3</sup> ¿Quebe nézele le'e guchí'adxu chee gubáz chee xabáa ca'? Cá'anqueze dxal-la' guchí'adxu da naca chee xezr la xu nigá. <sup>4</sup> Che le'e zua da dxaca chee lu xezr la xu nigá, ¿bizr chee na' dxeajle lau benne' ca' quebe nu zaj naque' ládujla bi bíchedxu ca' chee xuluchí'e chee da na'? <sup>5</sup> Da nigá dxapa' le'e chee gapa stu'le. ¿Quebe nu chilá' ládujla le'e nu bíchedxu, benne' naxéajni'ine' chee guchi'e tu da dxaca chee bi bíchedxu ca'? <sup>6</sup> ¿Dxun na ba xen tu bi bíchedxu cheajtágube' zria da dxaca chee' nen benne' ljwézrebe' lau tu benne' dxuchi'e da dxaca, na' quebe naque' bi chee Dios?

<sup>7</sup> Che zua da dxedíl-lalele biche ljwézrele, naca na tu zria da ba nabágale. ¿Bizr chee na' quebe dxucá'anale na cá'aze? ¿Bizr chee na' quebe dxuele lataj nu benne' cuanë' chee? <sup>8</sup> Le'e dxunle da quebe naca na xrlátaje, ne dxebanle, na' dxunle caní chee bi bíchele.

<sup>9-10</sup> ¿Quebe nézele le'e, quebe xelexú'u benne' wen da calela naga dxenná bea Dios? Quebe güele lataj nu si xe le'e. Quebe xelexú'u naga dxenná bea Dios benne' ca' dxelunë' da sban, ne benne' ca' dxelúe lá'anë' bedáu' xiaj xaga, ne benne' ca' dxelezúalënë' zru'ula benne' xula, ne benne' ca' dxeledálënë' ljwezre biue', ne benne' gubán ca', ne benne' wecude' ca', ne benne' ca' dxel'é'aje', ne benne' ca' dxulutupe' dizra' bizruj, ne benne' ca' dxulucache lane'. <sup>11</sup> Caní gücale bál-lale le'e, san na'a bache bexadxele lu xichaj lázrdaule, ne nuzúa cuínale lu na' Dios, na' nazí' lu ne'e le'e lu La Xránadxu Jesús ne chee Be' Lá'azxa chee Dios cheedxu.



*Naca lá'azxa belá' dxen cheedxu*

<sup>12</sup> Da li naca da dxelenné': Nápadxu lataj gundxu da dxaca lazre' tu tudxu. Quegá xúgute na naca na da ba neza. Awe', napa tu benne' lataj guné' da dxaca lazre', san quebe dxal-la' gu'e lataj bi da nna be'e na le'.

<sup>13</sup> Naca da li da dxelenné': Xela wagu naca na chee le'edxu, na' le'edxu naca na chee xel-la wagu, san Dios gusexuzre' dxúpaté na. Quebe naca belá' dxen cheedxu chee gun na da sban. Belá' dxen cheedxu naca na da gunézrujdxu chee Xránadxu, na' Xránadxu naque' Bénnea' guchínene' belá' dxen cheedxu lu da xrlátaje. <sup>14</sup> Ca ben Dios bsebané' Xránadxu ládujla benne' gate ca', cá'anqueze gusebané' dxi'u nen xel-la waca chee'.

<sup>15</sup> ¿Quebe nézele le'e belá' dxen chee naca na chee Cristo? ¿Wacá'a tu da naca na belá' dxen chee Cristo, ne guchaga' na nen belá' dxen chee tu nu'ula wen da sban? ¡Cabata! <sup>16</sup> ¿Quebe nézele le'e gate tu benne' biu dxuchague' tu nu'ula wen da sban dxúpaté' zaj naque' ca tuze belá' dxen? Naxúaj lu dizra' lá'azxa da dxenná na: Dxúpaté' xelexaque' tuze belá' dxen. <sup>17</sup> Gate tu benne' dxuchague' Xránadxu, dxexeque' tuze be'.

<sup>18</sup> Le guzrunnaj chee da sban. Zaj nita dul-la xula da dxun benne' da quebe dxulucá'ana dítaj na belá' dxen chee', san benne' dxuchague' nu'ula quebe naca zru'ulé' dxuné' dul-la lu belá' dxen cheequeze'.

<sup>19</sup> ¿Quebe nézele le'e naca belá' dxen chee xudau' chee Be' Lá'azxa, Bénnea' nunna Dios le'e, na' Be' Lá'azxa zué' xichaj lárdaule? Quebe nácale xrana belá' dxen chee, <sup>20</sup> lawe' da guzí' Dios le na nen tu lazruj zrente'. Chee le na', dxal-la' gápale ba lá'ana Dios nen belá' dxen chee, ne nen be' nácaqueze, lawe' da dxúpaté na' zaj naca na chee Dios.

**7***Ca naca chee xel-la dxuchaga na'*

<sup>1</sup> Na'a xechéba' ca zaj naca da bchébele neda'. Da li naca xrlátaje quebe guchaga na' tu benne'. <sup>2</sup> Lawe' da dxácale'e da sban naga zúale, tu tu benne' biu dxal-la' súalene' nu'ula cheequeze', na' tu tu nu'ula dxal-la' súalene' benne' biu cheequeze'. <sup>3</sup> Benne' biu dxal-la' guné' nen zru'ulé' da nabague' chee zru'ulé', na' cá'anqueze nu'ula dxal-la' guné' nen benne' biu chee' da nabague' chee benne' chee'. <sup>4</sup> Nu'ula na' quebe naque' xrana belá' dxen chee', san naca na chee benne' biu chee'. Cá'anqueze benne' biu quebe naque' xrana belá' dxen chee', san naca na chee zru'ulé'. <sup>5</sup> Quebe dxal-la' xeledábaga ljwezre', san tuze gate xelexúe' xel-la wezria tu chí'idauze chee xuluzúa cuine' lau Dios chee xuluchálajlene' Le'. Te na' dxal-la' xuluchaga ljwezre' chee quebe seque' Satanás nna be'e na le' che quebe xelexéquene' xelenná be'e cuine'.

<sup>6</sup> Da nigá dxapa' le'e naca na tu da dxue le'e lataj. Quebe naca na tu da nadxixruj bea na. <sup>7</sup> Neda' dxezá lazra' súale xúgutele ca zua' neda', san Dios ba nunne' tu tudxu da gaca gundxu. Tu da nunne' tudxu, na' da xula xetudxu.

<sup>8</sup> Dxapa' benne' wegu', ne nu'ula wezebe, naca xrlátaje xelexegá'ane' cá'aze ca zua' neda'. <sup>9</sup> Che quebe xelexéquene' xelenná be'e cuine', waca xuluchaga ne'e, lawe' da nácadxa xrlátaje xuluchaga ne'e quézcala xeledé' ba xa' lu belá' dxen chee'.

<sup>10</sup> Benne' zaj nuchaga ne'e dxapa' nu'ula quebe gusané' benne' biu chee'. Quebe naca cheeza' da nadxixruj bea nigá, san naca na da dxun Xránadxu. <sup>11</sup> Che nu nu'ula gusané' benne' biu chee', dxal-la' xegá'ane'

cá'aze, u xexaque' tuze nen benne' biu chee' na'. Cá'anqueze benne' biu quebe dxal-la' gusanē' zru'ule'.

<sup>12</sup> Dxapa' xezícadxa benne' néda'queza', quegá Xránadxu, che zru'ula tu bi bíchedxu quebe dxéajle'e chee Xránadxu, dxéquene' xrlátaje zúalene' benne' chee', bi bíchedxu na' quebe dxal-la' gusanē' le'. <sup>13</sup> Che benne' biu chee' tu nu'ula zandxu quebe dxéajle'e chee Xránadxu, san dxéquene' xrlátaje zúalene' zru'ule', nu'ula zandxu na' quebe dxal-la' gusanē' benne' biu chee' na'. <sup>14</sup> Benne' biu na' quebe dxéajle'e chee Xránadxu naque' ca tu bi chee Dios lawe' da nuchague' zru'ule' dxéajle'e chee Xránadxu, na' nu'ula na' quebe dxéajle'e chee Xránadxu naque' ca tu bi chee Dios lawe' da nuchague' benne' biu chee' dxéajle'e chee Xránadxu. La quebe naca na caní, zrí'inele le'e xelácabe' ca zrí'ine benne' quebe zaj naque' chee Dios, san da li zaj nácabe' ca bi chee Dios. <sup>15</sup> Che benne' biu na' u zru'ule', benne' quebe dxéajle'e chee Xránadxu, dxaca lázrtequeze' gusanē' ljwezre', waca na. Che caní dxaca chee tu bi bíchedxu u chee tu bi zandxu, nape' lataj lawe' da gunné Dios dxi'u chee cueza zri lázredxu. <sup>16</sup> Che quebe gaca caní, quebe nézenu' lue', nu'ula, che wazéquenu' cu'u benne' biu chiu' lu na' Cristo, na' lue', benne' biu, quebe nézenu' che wazéquenu' cu'u zru'ulu' lu na' Cristo.

<sup>17</sup> Ájateze naca, tu tudxu dxal-la' gundxu ca naca da nunna Xránadxu dxi'u, ne xegá'anadxu cáteze nácadxu gate gunné Dios dxi'u. Caní dxapa' xúgute cue' bi chee Cristo. <sup>18</sup> Che Dios dxenné' tu benne' biu nadxugu lu bēla' chee' da dxul'e na naque' bi chee Dios, benne' nigá dxal-la' xegá'ane' ca', na' che dxenné Dios tu benne' quebe nadxugu lu bēla' chee' da na', quebe dxal-la' chugu lu bēla' chee' da na'. <sup>19</sup> Quebe bi naca che nadxugu da na' lu bēla' cheedxu, u quebe. Da dxun na ba xen naca gundxu da dxaca lazre' Dios. <sup>20</sup> Tu tudxu dxal-la' xegá'anadxu cáteze nácadxu gate Dios dxenné' dxi'u chee gácadxu bi chee'. <sup>21</sup> Che gucu' benne' nada'u gate Dios gunné' lue', quebe cue'u gunne xue, san che gapu' lataj gacu' benne' quebe nada'u, dxal-la' guchínenu' na. <sup>22</sup> Bénnea' guque' benne' nada'u gate gunné Xránadxu le' naque' ca benne' quebe nada'u chee gunē' zrin chee Xránadxu, na' cá'anqueze bénnea' quebe naque' benne' nada'u gate gunné Xránadxu le', naque' ca benne' nada'u chee Xránadxu. <sup>23</sup> Dios ba ná'awe' le'e nen tu lazruj zrente. Quebe güele lataj nu benne' gunē' le'e benne' zaj nada'u. <sup>24</sup> Ca' naca na, bi bicha', tu tudxu dxal-la' xegá'anadxu lau Dios cáteze nácadxu gate gunné' dxi'u.

<sup>25</sup> Ca naca chee benne' ca' quebe zaj nuchaga ne'e quebe bi gunná be'e Xránadxu neda', san dxapa' le'e ca da dxéqueda', na' waca guxrén lázrele neda' lawe' da bexache lazre' Xránadxu neda'. <sup>26</sup> Dxéqueda' neda' dxal-la' xegá'ana tu benne' biu cáteze naque' lawe' da zúadxu zra stébele'e. <sup>27</sup> Che nuchagu' nu'ula quebe cuasu' le', na' che quebe nuchagu' nu'ula, quebe guchaga na'u. <sup>28</sup> Che guchaga na'u, quebe gunu' dul-la, na' che tu nú'uladau' guchaga na'abe', quebe gunbe' dul-la. Benne' ca' dxuluchaga ne'e welezúe' stēbe lu zra caní, na' dxaca lazra' quebe súale stēbe caní.

<sup>29</sup> Bi bícha'dau', da nigá dxaca lazra' xapa' le'e. Xelátega ne de súadxu lu xezr la xu nigá. Ná'atēla benne' zaj nuchaga ne'e dxal-la' gunē' da naca chee Cristo ca dxelún benne' quebe zaj nuchaga ne'e. <sup>30</sup> Benne' dxelebezre xache' dxal-la' xelunē' da naca chee Cristo ca dxelún benne' quebe zaj naque' baxache'. Benne' zaj zra' laní dxal-la' xelunē' da naca chee Cristo ca dxelún benne' quebe zaj zue' xel-la dxebé, na' benne'

dxelá'awé' dxal-la' xeluné' da naca chee Cristo ca dxelún benne' quebe zaj napé' da na' dxelá'awé'. <sup>31</sup> Benne' dxelezi'e ba neza lu xezr la xu nigá dxal-la' xeluné' da naca chee Cristo ca dxelún benne' quebe dxelezi'e ba neza na, lawe' da ba dxexzre lazre' xezr la xu nigá.

<sup>32</sup> Dxaca lazra' quebe bi cue'le gunne xue. Gate tu benne' biu nácabe' wegu' dxe'ebe' gunne xue da naca chee Xránadxu chee gunbe' da dxezaca ba lazre' Xránadxu. <sup>33</sup> Gate ba nuchaga ne'e, dxe'e gunne xue da naca chee xezr la xu nigá chee guné' da dxezaca ba lazre' zru'ulé'. <sup>34</sup> Cá'anqueze dxaca chee nu'ula zua benne' biu chee', ne nu'ula wegu'. Nu'ula wegu' dxe'ebe' gunne xue da naca chee Xránadxu chee chu'ube' lu na' Dios duté bēla' dxen cheebe', ne duté be' cheebe', san nu'ula zua benne' biu chee' dxe'e gunne xue da naca chee xezr la xu nigá chee guné' da xezaca ba lazre' benne' chee'.

<sup>35</sup> Dxapa' le'e da nigá chee gaca chawe' cheele, ne quebe chee nna be'eda' le'e, san chee gunle da xrlátaje, ne da li, chee chu'ule du lázrele lu na' Xránadxu.

<sup>36</sup> Che nu benne' dxéquene' nácadxa xrlátaje guchaga na' zrí'ine' nu'ula lawe' da ba dxedé xel-la cuide' cheebe', ne naca da dxal-la' gunbe', dxal-la' guné' da dxéquene' naca xrlátaje. Waca guchaga na'abe'. Quebe naca na dul-la. <sup>37</sup> Che nu benne' quebe dxéquene' dxun na ba xen, ne che napé' lataj guné' da dxaca lazre', ne che ba nune' lu xichaj lázrdawé' xegá'ana zrí'ine' nu'ula wegu', dxune' da xrlátaje. <sup>38</sup> Ca' naca na, benne' dxu'e lataj guchaga na'abe' zrí'ine' nu'ula, dxune' da xrlátaje, na' bēneea' quebe dxu'e lataj dxune' da nácadxa xrlátaje.

<sup>39</sup> Nu'ula zua benne' biu chee' nuchague' bēneea' ne chee da nadxixruij bea na dxácaté ne zué' nabane', san che gate benne' chee', de lataj nu'ula na' guchaga ne'e nen núteteze benne' biu, san dxun na ba xen dxéajle'e chee Xránadxu. <sup>40</sup> Gácadxa chee' da ba neza che xegá'ane' cá'aze. Caní dxéqueda' neda', ne dxéqueda' dxun Be' Lá'azxa chee Dios neda' tuze.

## 8

### *Xel-la wagu da zaj nuzúa bēneache lau bedáu' xiaj xaga*

<sup>1</sup> Na'a guchálaja' ca naca chee xel-la wagu da zaj nuzúa bēneache lau bedáu' xiaj xaga. Da li xúgute dxun nápadxu xel-la dxéajni' ca naca da nigá. Xel-la dxéajni'i dxun na dxi'u benne' dxulucá'ana szren cuina, san xel-la zri'i lazre' dxusegula na dxi'u lu xel-la dxeajli lazre' cheedxu. <sup>2</sup> Che nu benne' dxéquene' napé' duté xel-la dxéajni'i, quebe ne chéajni'ine' ca dxal-la' chéajni'ine'. <sup>3</sup> Che nu benne' nazrí'ine' Dios, Dios ba nazí' lu ne'e bēneea'.

<sup>4</sup> Na'a, ca naca chee xel-la wagu da zaj nuzúa bēneache lau bedáu' xiaj xaga, nezdxu quebe bi naca tu bedáu' xiaj xaga lu xezr la xu nigá, ne tuze Bēneea' naque' Dios. <sup>5</sup> Lácala zaj zra' xabáa, ne xezr la xu nigá da zanté da dxeleque bēneache zaj naca na díos, ne chee benne' caní zanté díos zaj zra na, ne zanté xrané' zaj zra na, <sup>6</sup> cheedxu dxi'u che nácadxu chee Cristo, tuze Bēneea' naque' Dios, Bēneea' naque' Xradxu. Xradxu Dios bēne' xúgute da de, na' dxi'u zúadxu chee guchínene' dxi'u. Cá'anqueze tuze Bēneea' naque' Xránadxu, Jesucristo. Ne chee Le' guzrá' xúgute da de, na' zúadxu dxi'u ne chee Le'.

<sup>7</sup> Quegá xúgute bi chee Cristo zaj nézene' da nigá. Bal-la benne' caní gulú'u lawé' belúe lá'ane' bedáu' xiaj xaga, na' gate dxelawe' xel-la wagu na', dxeléquene' naca na tu da naca na chee bedáu', na' lawe' da quebe

zaj zę chache' lu xichaj lászrdawe', dxeléquene' zaj nabague' zria ne chee da dxelawe'. <sup>8</sup> Da na' dxágudxu quebe dxucá'anadxna na dxi'u xrlátaje lau Dios, lawe' da quebe nácadxadxu xrlátaje che dxágudxu, ne quebe nácadxadxu calęla che quebe dxágudxu. <sup>9</sup> Le guxúe xanne' cuínale ca naca lataj da nápale bi gágule chee quebe guzría xile tu benne' quebe zę chache' lu xel-la dxeajlı lazre' chee'. <sup>10</sup> Ca' naca na, che lue' nézenu' da nigá, na' che cue'u gagu' tu naga zra' bedáu' xiaj xaga, na' che tu bi bíchedxu, benne' quebe zę chache' lu xel-la dxeajlı lazre' chee', lé'ene' lue' dxe'u dxagu' na', na' bi bíchedxu na' wexázrquezne' cue'e gawe' da na' zaj nuzúa bėnneache lau tu dios quebe bi naca. <sup>11</sup> Ca' naca na, lue', lawe' da napu' xel-la dxėajni'i, guzría xi'u tu bi bichu' quebe zę chache' lu xel-la dxeajlı lazre' chee', na' naque' benne' gute Cristo waláz chee'. <sup>12</sup> Ca' naca na, gate dxuzría xile bi bíchedxu quebe zaj zę chache' lu xel-la dxeajlı lazre' chee', dxunle dul-la da dxuzúa Crístoqueze chalá'ala. <sup>13</sup> Chee le' na', che guzría xi'a tu bi bicha' ne chee da dxawa', nácadxna chawe' cabátadxna gawa' bęla' chee quebe guzría xi'a le'.

## 9

### *Da naca chee tu benne' gubáz chee Cristo*

<sup>1</sup> Naca chia' naca' gubáz chee Cristo, ne napa' lataj bi guna' lawe' da ble'eda' Xránadxu Jesús, na' nácale le'e bi chee Cristo ne chee zrin bęna' chee'. <sup>2</sup> Che dxeleque xezícadxna benne' quebe naca' gubáz chee Cristo, san dxun na ba xen guéquele le'e naca' gubáz chee' lawe' da dxunna bea da nácale chee Xránadxu da li naca' gubáz chee'.

<sup>3</sup> Da nigá naca na da dxapa' benne' ca' dxelezı tizre' neda': <sup>4</sup> Naca chia' si' lu na'a da xi'aj gawa' ne chee zrin da dxuna'. <sup>5</sup> Cá'anqueze naca chia' guchaga na'a tu nu'ula zandxu chee chėajlene' neda' ca dxelún xezícadxna benne' gubáz chee Cristo, ne benne' bíchequeze Xránadxu, ne Pedro. <sup>6</sup> ¿Dxėquele tuze Bernabé, ne neda' dxal-la' guntu' zrin chee gata' da xi'aj gáguntu' gate dxuzėnentu' bėnneache dizra' chawe'? <sup>7</sup> ¿Nuzra benne' gaque' benne' zeje' wedil-la che quebe nu quizruj le'? ¿Nuzra benne' dxaze' lba uva che quebe gawe' na'? ¿Nuzra benne' gusegule' zrila' che quebe xequė'e xicha zraba'? <sup>8</sup> Quebe dxal-la' guéquele dxapa' le'e da nigá néda'queza', lawe' da canıqueze dxenná na lu da bdxixruj be'e Moısés. <sup>9</sup> Naxúaj lu da nadxixruj bea na da dxenná Dios: Quebe cu'ule xixruj dxu'a bęzre, bę dxıchuba' zrua' xtila. Quebe gunná Dios da nigá lawe' da dxue lazre' chee bęzre cá'aze. <sup>10</sup> Gunné' na ne cheedxu dxi'u. Naxúaj da nadxixruj bea nigá chee gaca da ba neza cheedxu, lawe' da benne' dxugá'ane' bęzre, ne benne' dxine' dxal-la' xelebeza lazre' xelexezi'e ca naca da gunna lina da xelaze'. <sup>11</sup> Na'a, che netu' ba gúzantu' lu xichaj lászrdau da naca na chee Be' Lá'azxa, ¿quebe dxal-la' si' lu na'ntu' latedauze da naca chee lu xezr la xu nigá? <sup>12</sup> Che xezícadxna benne' naca chee' xelezi' lu ne'e da naca chee, ¿gáhradxa netu'?

Quebe ne guchınentu' da nigá naca na cheentu'. Bchaga launtu' xúgute chee quebe guzágantu' ca naca dizra' chawe' chee Cristo. <sup>13</sup> Ba nézele benne' dxelune' zrin chee xudau' dxelawe' chee da xu'u lu xudau' na', na' benne' dxelune' zrin chee lu cugu naga dxelutie' bę xıxre'du ca' lau Dios dxelawe' bęla' chee bėadu ca'. <sup>14</sup> Cá'anqueze ba nun Xránadxu chee benne' dxuluchalaje' dizra' chawe', xelezi'e ba neza zrin da dxelune'. <sup>15</sup> Cabata' guchıneda' netú da canı zaj naca na chia', ne quebe dxuzúaja' da nigá chee

gúnnale neda' late'. Gaca lázredxa' gatia' quézcala nu gucuasa da ba neza da napa'.

<sup>16</sup> Quebe dxal-la' gucá'ana szren cuina' lawe' da dxuzenda' bénneache dizra' chawe' chee Cristo, lawe' da dxun na ba xen guna' na. Baxache' naca' che quebe guzenda' bénneache dizra' chawe' nigá. <sup>17</sup> Chee le na', che dxuna' na lawe' da naca na da dxaca lazra' guna', ba de lazruj chia'. Na'a, che dxuna' na xadíaze, naca na tu da nusebaga Dios neda'. <sup>18</sup> Ca' naca na, lazruj da dxezi'a naca na da ba neza napa' gate dxuzenda' bénneache dizra' chawe' chee Cristo, ne quebe bi dxuchízruja' benne' ca'. Ca' naca na, quebe dxuchíneda' da naca na chia' lawe' da dxuna' zrin nigá.

<sup>19</sup> Lácala quebe naca' benne' nada'u chee nu benne', ba nun cuina' ca tu benne' nada'u chee xúgute bénneache, chee séqueda' cu'a benne' zandxa lu na' Cristo. <sup>20</sup> Gate zua' ládujla benne' judío ca', dxun cuina' benne' judío chee cu'a le' lu na' Cristo. Ca' naca na, ládujla benne' zaj xu'e lu na' da nadxixruj bea na dxun cuina' ca tu benne' xu'e lu na' da nadxixruj bea na, chee cu'a le' lu na' Cristo lácala da li quebe xu'a lu na' da nadxixruj bea na na'. <sup>21</sup> Xetú na'a, chee séqueda' cu'a lu na' Cristo benne' ca' quebe zaj xu'e lu na' da nadxixruj be'e Moisés, dxun cuina' ca tu benne' quebe xu'e lu na' da nadxixruj bea na na', lácala da li xu'a lu na' da nadxixruj bea na chee Dios lawe' da xu'a lu na' da nadxixruj bea na chee Cristo. <sup>22</sup> Gate zua' ládujla benne' ca' quebe zaj ze chache' lu xel-la dxeajli lazre' chee dxun cuina' ca zaj naca benne' ca' chee séqueda' cu'a le' lu na' Cristo. Ca' naca na, dxun cuina' ca naca tu tu benne' ca' chee ájatezla séqueda' cu'a bal-la benne' ca' lu na' Cristo. <sup>23</sup> Dxuna' xúgute da nigá ne chee dizra' chawe' chee Cristo chee gapa' tu da ba neza chee na.

<sup>24</sup> Ba nézquezele le'e tu lu da huitaj benne' zan dxesí'aca chégüe' na' tuze' dxezrué'eng' lataj blau. Le sa'aca chegu le'e chee zrué'ele da dxunna Cristo. <sup>25</sup> Xúgute benne' ca' dxulupá'a cuine' chee xelu'e da huitaj, dxuluzúe' chalá'ala xúgute da dxun na calela chee'. Benne' caní dxelune' da caní chee xelezi' lu ne'e tu da guzúe' xíchaje' da naca na laga' da québequeze si bea, san dxi'u dxundxu zrin chee zrué'edxu da zeajli canna. <sup>26</sup> Neda' quebe dxezá chégua' ájatezla, ne quebe dxedil-la' ca tu benne' dxu'e lu be'ze gate dxedil-le'. <sup>27</sup> Neda' dxudéa' xel-la zi' be'la' dxen chia', ne dxenná be'eda' na, chee quebe gunitia' neda' da naca chia' lu zrin nigá, ca te na' ba bsédeda' benne' xula ca'.

## 10

*Da dxuzéajni'i na dxi'u ca naca chee bedáu' xiaj xaga ca'*

<sup>1</sup> Dxaca lazra' nézele, bi bícha'dau', ca guca chee xra xrtáudxu ca' xjácálene' Moisés. Dios guché'e xúgute benne' ca' ne chee beuj bza na', na' xúgute' guledé'e ládujla nísadau' da nazí le na Xrna. <sup>2</sup> Ca' naca na, waca nnadxu xúgute' beledxúe' nisa lu nísadau' na', ne gulaque' tuze nen Moisés gate guledálene' beuj bza na'. <sup>3</sup> Cá'anqueze xúgute' gulawe' tuze xel-la wagu da bnezruj Dios le', <sup>4</sup> ne gule'aj xúgute' tuze nisa da bnezruj Dios le', lawe' da gulé'aje' nisa na' bedxúaj na xiaj xre na'. Xiaj xre nigá dxulé'e na ca naca Crístoqueze, Bénnea' guxéajlene' benne' ca' le'e xixre' lawe' lataj na'. <sup>5</sup> Benne' zan benne' ca' quebe belune' da bezaca ba lazre' Dios, na' chee le na' gultatie' le'e xixre' lawe' lataj.

<sup>6</sup> Xúgute da caní guca na chee guzéajni'i na dxi'u chee quebe sa lázredxu da calela ca', ca belún benne' ca'. <sup>7</sup> Chee le na' quebe gucá'ana szrenle

bedáu' xiaj xaga ca' ca belún bal-la benne' ca', ca naxúaj na lu dizra' lá'azxa, dxenná na: Bénneache gulebé'e, ne gule'aj gulawé' lau bedáu' xiaj xaga, na' belexasé' chee buluxé'e. <sup>8</sup> Quebe dxal-la' gundxu da sban ca belún bal-la benne' ca', na' tu zraze gulate chupa gaxúa chi dxua gaxue'. <sup>9</sup> Quebe dxal-la' guchínedxu xel-la zren lazre' chee Xránadxu chee gundxu da calēla ca belún bal-la benne' ca', na' gulatiē', gate gulí'ina belá' lē'. <sup>10</sup> Quebe nnele chee Dios ca gulenné bal-la benne' ca', na' gubáz chee xabáa chee xel-la gute bēte' benne' ca'.

<sup>11</sup> Xúgute da caní gulezaca xra xrtáudxu, na' zaj naxúaj na lu dizra' lá'azxa chee guzėjni'i na dxi'u, zúadxu lu zra bzebe caní. <sup>12</sup> Ca' naca na, nu benne' dxéquene' zē chache' lu da naca chee Dios dxal-la' guxúe xanne' cuine' chee quebe cheajcházie'. <sup>13</sup> Da dxelún zréaje le'e naca na tuze ca da dxelún zréaje xúgute bénneache, na' waca guxrén lázrele Dios lawe' da quebe gu'e lataj bi gun zréaje le'e da quebe séquele guchaga laule, na' gate gaca tu da gun zréaje na le'e, Dios gunne' le'e ájala gunle chee lale lu da na', chee séquele guchaga laule na.

<sup>14</sup> Chee lē na', bi bicha' nazri'ite lazra', québedxa gucá'ana szrenle bedáu' xiaj xaga ca'. <sup>15</sup> Dxuchálajlēna' le'e ca dxuchálajlēna' benne' dxelėjni'ine', na' lé'eeuze waca guchí'ale chee da dxapa' le'e. <sup>16</sup> Gate dxágadxu da dxucube na ca guca gate gute Xránadxu, dxápadxu ba lá'ana Dios. Gate dxí'ajdxu xrisa uva lá'azxa, da nigá dxulé'e na dxezidxu ba neza dxen chee Cristo da gulalaj na le'e xaga béguaj. Xeta xtila na' da dxuzúzrujdxu dxulé'e na xezidxu ba neza belá' dxen chee Cristo da bdee' waláz cheedxu le'e xaga béguaj. <sup>17</sup> Lácala naxandxu, xúgutedxu dxágudxu tu xeta xtilaqueze da naca na tuze, da na' dxulé'e na nácadxu ca tuze belá' dxen chee Cristo.

<sup>18</sup> Le nna'xque ca zaj naca benne' Israel ca'. Benne' caní, benne' dxelawe' da dxuluzré'e lu cugu chee Dios dxelezi'e ba neza lu cugu na'. <sup>19</sup> Quebe dxennía' naca tu bedáu' xiaj xaga tu da zaca, na' belá' da dxuluzría bénneache lau bedáu' xiaj xaga quebe zácadxu ca bíteteze xetú belá'. <sup>20</sup> Dxennía' da dxuluzría lau bedáu' xiaj xaga benne' ca' quebe zaj núnbe'e Dios, dxuluzrié' na lau be' xriwe' ca' ne quegá lau Dios, na' quebe dxaca lazra' gunle tuze be' xriwe' ca'. <sup>21</sup> Quebe gaca xí'ajle da na' dxulé'e na nácale Xránadxu tuze, ne xí'ajtele da gulé'e na nácale tuze be' xriwe' ca', ne quebe gaca gágule da naca na chee Xránadxu, ne gágutele da naca na chee be' xriwe' ca'. <sup>22</sup> ¿Dxaca lázrele xewine lazre' Xránadxu lawe' da dxusandxu Le'? ¿Dxéquele le'e nácadxu benne' wáladxa ca Le'?

*Da naca cheedxu gundxu, ne ca naca xel-la zri'i lazre'*

<sup>23</sup> Da li naca da na' dxelenná bénneache, dxelenné': Naca chia' guna' da dxaca lazra'. Quegá xúgute naca na da sidxu ba neza. Naca chee nu benne' gunē' ca dxaca lazre' san quegá xúgute gusegula na lē' lu xel-la dxeajlí lazre' chee'. <sup>24</sup> Dخال-la' gundxu da gaca chawe' chee benne' xula, ne quegá da gaca na chawe' cheézedxu.

<sup>25</sup> Le gagu le'e ca naca da dxeda'u lawe' xi'a, ne quebe naba xúzrele chee na chee quebe sua stēbe xichaj lázrdaule, <sup>26</sup> lawe' da zaj naca chee Xránadxu xēzr la xu nigá, ne xúgute da ca' zaj zra' lu xēzr la xu.

<sup>27</sup> Che nu benne', benne' quebe dxéajle'e chee Xránadxu, dxenné' le'e gágule xeta, na' che dxaca lázrele chéajle, le gagu xúgute da guzrié' laule, ne quebe naba xúzrele chee na chee quebe sua stēbe xichaj lázrdaule.

28 Che nna nu benne' zúale le'e, na' xe'e le'e: "Bela' nigá bache guzría na lau bedáu' xiaj xaga", quebe gágule na, chee quebe guzúale stebe bénnea' gunné' ca', ne chee quebe sua stebe xichaj lázrdau. 29 Dxennía' da nigá chee xichaj lázrdau benne' zúalene' lue', ne quegá chee xichaj lázrdau' lúé'queze.

Waca naba xuzre tu benne': "¿Bizr chee na' dxuchi'u da naca chia' lawe' da sua stebe xichaj lázrdau benne' xula? 30 Che dxapa' Dios: Xcalenu' chee da dxawa', ¿bizr chee na' xezezi tizre' neda' chee da dxawa'?" 31 Chee le na', che dxágule u dxí'ajle, u bíteteze da dxunle, le gun xúgute chee gaca ba Dios. 32 Quebe bi gunle da guzúa na stebe benne' xula, quegá benne' judío ca', ne quegá benne' quebe zaj naque' judío, ne quegá nu benne' naque' bi chee Dios. 33 Neda' dxuna' ba xuzre guna' da xezezaca ba lazre' xúgute bénneache ca naca xúgute da dxuna'. Quebe dxuna' da gaca chawe' cheeza' san da gaca chawe' chee xezícadxa bénneache chee xeelé'.

## 11

1 Le gun ca dxuna' neda', ca neda' dxúnqueza' ca ben Cristo.

*Da dxelún nu'ula naga zaj nazraga bi chee Cristo*

2 Bi bicha', dxapa' le'e ba lá'ana lawe' da dxajsá lázrequezele neda', ne dxunle ca naca da bzéajni'ida' le'e. 3 Na'a dxaca lazra' chéajni'ile naca Cristo xíchaje chee tu tu benne' biu, na' benne' biu naque' xíchaje chee zru'ule', ca naca Dios, naque' xíchaje chee Cristo. 4 Che tu benne' biu gugácue' xíchaje' gate dxuchálajlene' Dios naga zaj nadupa bi chee Cristo, u gate dxuchálaje' waláz chee Dios, naca na tu xel-la stu' chee Bénnea' naque' xíchaje'. 5 Che tu nu'ula quebe gugácue' xíchaje' gate dxuchálajlene' Dios, u gate dxuchálaje' waláz chee Dios, naca na tu xel-la stu' chee', lawe' da dxun cuine' ca tu benne' biu. Lébezqueze naca na chugue' xíchaje'. 6 Che tu nu'ula quebe gugacu xíchaje', nácadxa xrlátaje chugue' tu chi'ize ca naca xicha xíchaje'. Na' che naca na tu xel-la stu' chee nu'ula che chugue' xíchaje', u che guzúe' zrígaze xíchaje' ca dxun tu benne' biu, dxalla' gugacu xíchaje' naga zaj nazraga bi chee Cristo. 7 Benne' biu quebe dxal-la' gugacu xíchaje' lawe' da naque' lu'a le saca Dios, na' da naque' dxulé'e na ca naca xel-la szren chee Dios. Da naca nu'ula dxulé'e na ca naca xel-la szren chee benne' biu. 8 Gate ben Dios benne' biu, quebe bi guléaje' le' lu bela' dxen chee nu'ula, san guléaje' lu bela' dxen chee benne' biu da na' bexune' nu'ula na'. 9 Dios bene' nu'ula na' chee nna be'e benne' biu le', ne quegá bene' benne' biu chee nna be'e nu'ula le'. 10 Chee le na' nu'ula dxal-la' guzúe' xíchaje' tu da dxulé'e na zua nu dxenná be'e le' chee quebe gun zrójene' gubáz chee xabáa ca' chee Dios. 11 Lu da nácadxu chee Cristo, benne' biu dxechinne' nu'ula, ne cá'aqueze dxechín nu'ula benne' biu. 12 Da li Dios guléaje' nu'ula na' lu bela' dxen chee benne' biu, na' cá'aqueze benne' biu dxálaje' chee nu'ula, na' xúgutedxu zadxu lu na' Dios.

13 Le nna'xque le'e che naca xrlátaje che tu nu'ula guchálajlene' Dios, ne quebe gugacu xíchaje'. 14 Da nácaquezdxu dxulé'e na dxi'u naca tu xel-la stu' che benne' biu se tunna xicha xíchaje', 15 na' naca tu da ba lá'ana chee nu'ula se na tunna, lawe' da nunna Dios le' xicha xíchaje' tunna chee gugacu na xíchaje'. 16 Na'a che nu benne' dxaca lazre' gutil-le' dizra' ca naca da nigá, dxal-la' nézene' quegá dxi'u ne quegá benne' zaj nazraga chee Cristo quebe núnbeadxu xetú da xula.

*Da dxelún benne', gate dxelawe' da naca chee Xránadxu*

<sup>17</sup> Ca naca chee da nigá quebe dxapa' le'e ba lá'ana lawe' da dxaca da calëla chee gate nazrágale, ne quegá da chawe'. <sup>18</sup> Da nédxuteca, dxulé'e neda' gate dxezrágale chee güe lá'anale Dios nácale chupa la'a. Dxéqueda' naca da li da dxelenné'. <sup>19</sup> Dxál-la'queze gácale chupa la'a chee gulé'e lawe' nu benne' ládujla le'e da li naque' bi chee Cristo. <sup>20</sup> Chee le na' gate dxezrágale le'e chee gágule da naca chee Xránadxu, da li québedxa naca na chee Xránadxu. <sup>21</sup> Gate dxezrín zra dxágule, tu tule le'e dxebía lau chee dxecá'ale xel-la wagu cha chee, na' bál-lale le'e dxegá'anale dxedunle, na' xezícadxale dxezúzele. <sup>22</sup> ¿Quebe bi de chee naga xi'aj gágule? Ca'an dxunle, dxuzúale chalá'ala bi ca' chee Dios, ne dxugu'ule xel-la stu' benne' ca' quebe bi de chee'. ¿Bízraqueze xapa' le'e? ¿Dxal-la' gapa' le'e ba lá'ana? ¡Cabata'!

*Da dxágudxu da naca chee Xránadxu*

(Mt. 26.26-29; Mr. 14.22-25; Lc. 22.14-20)

<sup>23</sup> Xránaquezdxu bzéajni'ine' neda' da nigá bsédeda' le'e: Lu zre' ná'queze gate Judas bde' Xránadxu Jesús lu na' benne' guledábague' Le', na' Jesús guqu'é xeta xtila, <sup>24</sup> na' gudé guzre' Dios: Xcalenu', bzúzruje' na, na' gunné': "Le gagu. Xeta xtila nigá dxulé'e na ca gaca chee bel-la' dxen chia' lu da na' saca zi'a waláz chee. Le gun da nigá chee cheajsá lázrele neda'." <sup>25</sup> Cá'anqueze, gudé gulawe', guqu'é xrisa uva, na' gunné': "Xrisa uva nigá dxulé'e na ca naca da dxuzé chacha na xel-la wezría cube da naca na dxen chia'. Tu tu lasa xí'ajle na, le gun na chee cheajsá lázrele neda'." <sup>26</sup> Ca' naca na, ca zrin zra xelá' Xránadxu, gulé'ele ca guca gate gute Xránadxu tu tu lasa gate gágule xeta xtila nigá, ne xi'ajle xrisa uva nigá.

*Ca dxal-la' gágudxu da naca chee Xránadxu*

<sup>27</sup> Ca' naca na, núteteze benne' gawe' xeta xtila nigá, u xí'ajle xrisa uva chee Xránadxu, ne quebe dxape' ba lá'ana na, na' dxuné' dul-la da dxuzúa belá' dxen chee Xránadxu chalá'ala. <sup>28</sup> Chee le na' tu tudxu dxal-la' guxúe xánnedxu xichaj lázraudxu gate za gágudxu xeta xtila nigá, ne za xí'ajdxu xrisa uva nigá, <sup>29</sup> lawe' da che xi'aj gágudxu, ne quebe dxéqedxu dxulé'e na ca naca belá' dxen chee Xránadxu, na' da xi'aj gágudxu gun na bágadxu zria. <sup>30</sup> Chee le na' benne' zan ládujla le'e ba gulate'. <sup>31</sup> Che guxúe xanne' cuínadxu, quebe gun na ba xen guchi'a Xránadxu cheedxu caní. <sup>32</sup> Gate Xránadxu dxuchi'e cheedxu, dxudé' dxi'u xel-la zi' chee quebe cuía xidxu nen benne' zaj zre'e xezr la xu nigá.

<sup>33</sup> Ca' naca na, bi bicha'. Gate dxezrágale chee gágule da naca chee Xránadxu, le cueza ljwézrele tule xetule chee bi gágule. <sup>34</sup> Che núlale dxedunle, le gagu lu xu'u lizrqueze, chee quebe gun na ba xen guzría xi' Dios le'e gate na' nazrágale. Xezícadxu da ca' dxelaca chee gucá'ana' chawe' gate xida' xedajnná'a le'e.

## 12

*Xel-la waca ca' da dxunna Be' Lá'azxa tu tudxu dxi'u*

<sup>1</sup> Bi bicha', zaj de da dxaca lazra' chéajni'ile ca naca chee xel-la waca ca' da dxunna Be' Lá'azxa tu tudxu dxi'u.

<sup>2</sup> Ba nézqueze gate na' quebe ne chéajle chee Xránadxu, be'ele lataj gulezrube xue' le'e chee xeajé lá'anale bedáu' xiaj xaga ca', da quebe



dxelenné na. <sup>3</sup> Chee le na' dxaca lazra' nézele che zua nu benne' nne': Nabía xi' Jesús, quebe dxuchálaje' ne chee Be' Lá'azxa chee Dios. Na' netú benne' gaca nne': Jesús naque' Xrana', che quebe dxuchálaje' ne chee Be' Lá'azxa.

<sup>4</sup> Zaj nazrá' xel-la waca ca' da gaca si' lu nnadxu, q san tuze naca Be' Lá'azxa, Bénnea' dxunne' dxi'u na.

<sup>5</sup> Zaj nazrá' ca gaca gundxu zrin, san tuze naca Xránadxu, Bénnea' dxundxu zrin chee'.

<sup>6</sup> Zaj nazrá' ca da gaca gundxu, san tuze naca Dios, Bénnea' dxunne' dxi'u xel-la waca gundxu na.

<sup>7</sup> Dios dxunne' cha cheedxu tu xel-la waca chee Be' Lá'azxa chee gaca da ba neza chee xúgutedxu.

<sup>8</sup> Ne chee Be' Lá'azxa dxunne' bal-la benne' xel-la waca xuluchálaje' dute xel-la sina, na' xebal-le' ne chee Be' ná'queze dxunne' le' xel-la waca xuluchálaje' dute xel-la naxéajni'i.

<sup>9</sup> Xebal-le' dxelezi'e xel-la dxeajlí lazre' ne chee Be' ná'queze, na' xebal-le' dxelezi'e xel-la waca chee xelexuné' benne' we' ca'.

<sup>10</sup> Xebal-le' dxelezi'e xel-la waca xeluné' xel-la waca ca' chee xabáa, na' xebal-le' dxelezi'e xel-la waca chee xuluchálaje' waláz chee Dios.

Xebal-le', Dios dxunne' le' xel-la waca xelenézene' nu be' dxuchalaj na lu dxu'a bénneache.

Xebal-le' dxelezi'e xel-la waca xuluchálaje' dizra' nazrá', da quebe naca xrtíizrqueze',

na' xebal-le' dxelezi'e xel-la waca xuluxuzájle'e dizra' nazrá' na'.

<sup>11</sup> Xúgute da caní dxun tuze Be' ná'queze, Bénnea' dxunne' cha cheedxu xel-la waca caní cáteze da dxaca lázrequeze'.

*Xúgutedxu nuchágadxu tuze bēla' dxen*

<sup>12</sup> Zua cheedxu tu bēla' dxen da napa na zánete cue'. Dxi'u, dxéajledxu chee Cristo, nácadxu ca tuze bēla' dxen chee Cristo. <sup>13</sup> Xúgutedxu dxi'u, che nácadxu benne' judío, u benne' quebe nácadxu judío, ne che nácadxu benne' zaj nada'u, u benne' quebe zaj nada'u, gate gudxúadxu nisa da dxulé'e na nácadxu Cristo tuze, cá'anqueze bexácadxu ca tuze bēla' dxen, da na' ben tuze Be' Lá'azxa, na' Diosqueze benne' dxi'u lataj sídxu tuze Be' ná'queze.

<sup>14</sup> Tu bēla' dxen quebe naca na tu cue'ze, san naca na zane' cue'. <sup>15</sup> Che ní'adxu nna na: Quebe naca' na'u, ne chee le na' quebe naca' chee bēla' dxen chiu', quegá da ni gun na québedxa naca na chee bēla' dxen na'.

<sup>16</sup> Na' che nágadxu nna na: Quebe naca' lau', ne chee le na' quebe naca' chee bēla' dxen chiu', quegá da ni gun na québedxa naca na chee bēla' dxen na'.

<sup>17</sup> Che dute bēla' dxen cheedxu naca na laudxu, ¿ájazra gundxu xendxu? Che dute bēla' dxen cheedxu naca na nágadxu, ¿ájazra gundxu lé'edxu?

<sup>18</sup> Dios nuzúe' cha chee cue' bēla' dxen na' naga dxaca lazre' Le'.

<sup>19</sup> Che dute na' naca na tuze cue', ¿gazra zúaqueze bēla' dxen na'? <sup>20</sup> Ca naca na, lácala naca na zane' cue', tuze bēla' dxen naca na.

<sup>21</sup> Xia laudxu quebe dxal-la' xe na nadxu: Quebe nachinda' lue', ne quebe dxal-la' nna xíchajdxu, xe na ní'adxu: Quebe nachinda' le'e.

<sup>22</sup> Da naca na, da zaj naca chee bēla' dxen cheedxu da dxéquedxu quebe zaj nácateca na blau, zaj naca na da dxechínedxadxu, <sup>23</sup> Da zaj naca na chee bēla' dxen cheedxu da quebe dxápadxu ba lá'ana zaj naca na da dxugacu

xánnedxadxu. Da ca' dxéquedxadxu quebe dxal-la' gulé'edxu zaj naca na da dxucáchedxu, <sup>24</sup> da quebe dxun na ba xen gundxu chee da ca' gaca gulé'edxu. Ca' naca na, Dios bene' bela' dxen cheedxu chee gápadxadxu ba lá'ana da ca' dxéquedxu quebe nácateca na da gápadxu ba lá'ana, <sup>25</sup> chee quebe gaca chupa lá'a bela' dxen cheedxu. Tu tu cue' chee bela' dxen cue' na gunne xue chee ljwezre na. <sup>26</sup> Che dxedé xel-la zi' tu da naca na chee bela' dxen cheedxu, xúgute da ca' dxeledé na xel-la zi', na' che tu da na' gaca da ba neza chee na, na' xúgute da ca' dxelebé na tu zren.

<sup>27</sup> Ca' naca na, le'e nácale bela' dxen chee Cristo, na' tu tule nácale ca tu tu cue' chee bela' dxen chee' na'. <sup>28</sup> Ca' naca na, Dios nunézruje' lataj blau chee bal-la benne' ládujla bi chee Cristo. Lu lataj blau nuzré'e benne' gubáz chee' ca', na' lu lataj gudxupe' nuzré'e benne' dxuluchálaje' waláz chee', na' lu lataj guxunne' nuzré'e benne' dxulusédene' bi chee' ca', na' gudé na' nuzré'e benne' dxeluné' xel-la waca da za xabáa. Gudé na' nuzré'e benne' ca' dxelexuné' benne' we' ca', ne benne' ca' dxelácalene' bi chee' ca', ne benne' ca' dxelenná be'e, ne benne' ca' dxuluchálaje' dizra' nazrá' da quebe zaj nézene'. <sup>29</sup> ¿Zaj naca xúgute' benne' gubáz chee'? ¿Dxuluchalaj xúgute' waláz chee'? ¿Dxulusede xúgute' bi chee' ca'? ¿Dxelún xúgute' xel-la waca chee xabáa? <sup>30</sup> ¿Dxelexún xúgute' benne' we' ca'? ¿Dxuluchalaj xúgute' dizra' nazrá' da quebe naca xrtizre'? ¿Dxuluxuzájla'a xúgute' dizra' nazrá' na'? ¡Cabí! <sup>31</sup> Le gun ba xuzre si' lu na'le chee Dios xel-la waca ca' da nácadxa chawe'. Na'a gulé'eda' le'e tu da cháwedxa.

## 13

### *Xel-la zri'i lazre' li*

<sup>1</sup> Che dxuchálaja' dizra' chee benne', ne chee gubáz chee xabáa ca', san quebe napa' xel-la zri'i lazre' li, quebe nácadxa' ca tu xide da dxenné na, u ca tu xia da dxenné na. <sup>2</sup> Che dxuchálaja' waláz chee Dios, ne che nezda' xúgute da zaj nagache, ne dxéajni'ida' xúgute da dxelaca, ne napa' xel-la dxeajlí lazre' chee séqueda' gucuasa' xi'a ca', san che quebe napa' xel-la zri'i lazre' li, quebe nu nácaqueza'. <sup>3</sup> Che quísia' xúgute da de chia', ne che guzúa' bela' dxen chia' chee chezxe na, san che quebe napa' xel-la zri'i lazre' li, quebe bi da ba neza naca na chia'.

<sup>4</sup> Bénnea' nape' xel-la zri'i lazre' li:

Naque' zren lazre'.

Naque' zri'i lazre', ne quebe naque' xa lazre'.

Quebe dxucá'ana szren cuine', ne quebe dxuzé'cu'e.

<sup>5</sup> Quebe dxuné' da calela,

ne quebe naque' zre'e lazre'.

Quebe dxezré'e, ne quebe dxu'u lazre'.

<sup>6</sup> Quebe dxebene' gate nu benne' dxeajcházie' lu dul-la,

san dxebene' lu da li.

<sup>7</sup> Dxuchaga lawé' xúgute da dxaca nen duté xel-la dxeajlí lazre' chee',

ne duté xel-la dxebeza lazre' chee',

ne duté xel-la zren lazre' chee'.

<sup>8</sup> Xel-la zri'i lazre' li quebe te chee na. Wazrín zra gate québedxa chínedxu nu benne' guchálajlene' dxi'u waláz chee Dios, ne benne' dxéajni'ine' xúgute. <sup>9</sup> Na'a dxéajni'idxu látedauze, ne látedauze dxuchálajdxu waláz chee Dios. <sup>10</sup> Zrin zra gate na' chéajni'idxu duté ca naca, na' te chee da na' naca na látedauze.

<sup>11</sup> Gate ne naca' bidau' bchálaja' ca bidau', ne gulaba lazra' ca bidau', ne bchi'a ca bidau', san gate guca' benne' waca, bzua' chalá'ala da zaj naca chee bidau'. <sup>12</sup> Cá'anqueze na'a quebe dxelé'edxu cátequeze, ne da dxelé'edxu ze zrul-la, san lu zra na' lé'edxu cátequeze. Na'a látedauze núnbe'a, san lu zra na' gúnbe'a cátequeze ca dxun Dios, núnbe'tequeze' neda'. <sup>13</sup> Ca' naca na, xel-la dxeajlí lazre', ne xel-la dxebeza lazre', ne xel-la zri'i lazre' li xezezáqueze na chadía chacanna, san da blaudxa chee da caní naca na xel-la zri'i lazre' li.

## 14

*Ca naca chee nu benne' dxuchálaje' dizra' nazrá' da quebe naca na xrtizre'*

<sup>1</sup> Le gun ba xuzre gápale xel-la zri'i lazre' li, ne cá'anqueze le naba Dios gunne' le'e xel-la waca ca' chee Be' Lá'azxa, ne da naca blaudxa, chee gaca guchálajle waláz chee Dios. <sup>2</sup> Bénnea' dxuchálaje' dizra' nazrá' da quebe naca na xrtizre' dxuchálajle' Dios, quegá nen bénneache, lawe' da quegá nu dxéajni'i da dxenné'. Dxuchálaje' ne chee Be' Lá'azxa da zaj nagache. <sup>3</sup> Bénnea' dxuchálaje' waláz chee Dios dxuchálajle' bénneache chee gusegule' benne' ca' lu da naca chee Dios, ne chee ne xúene'-be', ne chee xue zrene'-be'. <sup>4</sup> Bénnea' dxuchálaje' dizra' nazrá' na' dxusegula cuine', san bénnea' dxuchálaje' waláz chee Dios dxusegule' bi ca' chee Cristo lu da naca chee Dios.

<sup>5</sup> Dxaca lazra' gapa xúgutele xel-la waca guchálajle dizra' nazrá', san dxaca lázredxa' gaca guchálajle waláz chee Dios, lawe' da nácadxa chawe' guchálajle waláz chee Dios quézcala guchálajle dizra' nazrá', che quebe zua nu benne' xuzájle'e dizra' nazrá' na' chee xelegula bi chee Cristo lu da naca chee Dios. <sup>6</sup> Chee le na', bi bícha'dau', che xida' xedajnná'a le'e, ne guchálajle' le'e dizra' nazrá', ¿bizra da ba neza gaca na chee che quebe guchálajle' le'e tu da ba ble'e Dios neda', u tu da bzéajni'ine' neda', u tu da guchálaja' waláz chee Dios, u tu da guzéajni'ida' le'e?

<sup>7</sup> Nná'xquedxu ca da ca' dxelenné na da quebe zaj naca bane na ca bchiuj, ne bihuel-la. Che quebe gaca chéajni'idxu da dxelenné na, quebe gaca nezdxu ca da dxelul-la na. <sup>8</sup> Gate dxaca wedil-la, che quebe dxebezre luzu da dxulucueze' cátequeze, quebe nu se lu wedil-la. <sup>9</sup> Cá'anqueze dxaca chee le'e. Che quebe guchálaja' dizra' da dxéajni'ile, ¿ájazra gaca nézele da dxennía'? Guchálaja' lu be'. <sup>10</sup> Da zanté dizra' nazrá' zaj de lu xezr la xu nigá, ne da li xúgute na zaj zéaje na. <sup>11</sup> Na'a che quebe dxéajni'ida' dizra' dxuchálajle tu benne' neda', gaca' ca tu benne' zitu' lau bénnea', na' le' gaque' ca tu benne' zitu' lawa' neda'. <sup>12</sup> Chee le na', lawe' da dxaca lázrele si' lu na'le xel-la waca ca' da dxunna Be' Lá'azxa dxi'u, le gun ba xuzre si' lu na'le da ca' xulusegula na bi ca' chee Cristo lu da naca chee Dios.

<sup>13</sup> Ca' naca na, bénnea' dxuchálaje' dizra' nazrá' dxal-la' naba lau Dios gunne' le' xel-la waca xuzájle'e dizra' nazrá' na'. <sup>14</sup> Che guchálajle' Dios tu dizra' nazrá'la, da li dxuchálajle' Le' lu be' nácaqueza', san quebe bi da ba neza naca na chee xel-la dxéajni'i chia'. <sup>15</sup> ¿Bizra da dxal-la' guna' xca'? Dxal-la' guchálajle' Dios lu be' nácaqueza', ne cá'anqueze nen xel-la dxéajni'i chia'. Dxal-la' gul-la' chee Dios lu be' nácaqueza', ne cá'anqueze nen xel-la dxéajni'i chia'. <sup>16</sup> Che dxue la'anú' Dios tuze lu be' nácaquezu', na' benne' ljwezru' dxenne' chiu' quebe gaca guné' tu zren

lue' gate dxu'u Dios: Xcalenu', lawe' da quebe dxéajni'ine' da dxennáu'.  
 17 Da dxuchálajlenu' Dios nácale'e na chawe', san bènnea' dxenne' quebe dxegule' lu da naca chee' Dios. 18 Dxapa' Dios: Xcalene' lawe' da dxuchálajdxa' dizra' nazrá' ca xúgutele le'e, 19 san naga zaj nazraga bi chee' Cristo dxaca lázredxa' guchálaja' gázxuze dizra' da xeléajni'ibe' chee' gusededa'-be', quézcala guchálaja' chi mila dizra' nazrá' da quebe gaca xeléajni'ibe'.

20 Bi bícha'dau'. Quebe gulaba lázrele ca bidau'. Le gaca ca bidau' chee' quebe gunle da calela, san le gaca benne' wal-la chee' gulaba lázrele cháwe'dau'. 21 Naxúaj lu xiche lá'azxa chee' da dxenná bea Dios, da dxenná na: Guchálajlenu' benne' xezr la xu nigá nen dizra' nazrá', ne lu dxu'a benne' zitu' ca', san ne caní quebe xelenne' chia'. Caní dxenná Xránadxu. 22 Ca' naca na, xel-la waca chee' guchálajdxu dizra' nazrá' naca na tu da dxulé'e na lau benne' quebe dxeléajle'e chee' Dios, ne quegá lau benne' dxeléajle'e chee'. 23 Na'a, gate nazrágale, che xúgutele dxuchálajle dizra' nazrá', na' che xelexú'u benne' quebe zaj nazédené', u benne' quebe dxeléajle'e chee' Dios, ¿quebe xelenné' zaj nadá xichaj lázrdaule? 24 Na'a che dxuchalaj xúgutele waláz chee' Dios, na' che chu'u tu benne' quebe dxéajle'e chee' Dios, u tu benne' quebe nazédené', na' guéquene' nabague' dul-la, na' léqueze' guchi'a cuine' gate xenne' da dxennale xúgutele. 25 Ca' gaca na, da zaj nagache xichaj lázrdawe' xululé'e lau na, na' guzúa zribe', ne güe lá'ane' Dios, na' nne' da li zúale Dios le'e.

26 Ca' naca na, bi bícha'dau', gate dxezrágale, bál-lale le'e nápaie salmo ca', ne xebál-lale nápaie da gusedele ljwézrele, ne xebál-lale nápaie tu da ble'e Dios le'e, ne xebál-lale nápaie tu dizra' nazrá' na'. Cháwe'dau' naca na, san xúgute da ca' dxal-la' xulusegula na bi ca' chee' Cristo lu da naca chee' Dios. 27 Gate guchálajle dizra' nazrá', waca xuluchalaj chupa benne', u chunna benne', ne tuwéaj tuwéajle, na' tu benne' dxal-la' xuzájle'e da dxennale. 28 Na'a che quebe nu chilá' benne' xuzájle'e dizra' nazrá' na', gácadxa chawe' quebe bi da nne' naga nazrágale. Tu tule dxal-la' nnale lé'equeze, ne nen Dios. 29 Cá'anqueze benne' dxuluchálaje' waláz chee' Dios waca xelenné' chupa chúnnaze', na' xezicadxale dxal-la' guchí'ale da na' dxenné'. 30 Che dxulé'e Dios xetú benne' dxe'e na' tu dizra', na' bènnea' dxuchálaje' dxal-la' gusané' ca da dxuchálaje'. 31 Xúgutele le'e waca guchálajle waláz chee' Dios tuwéaj tuwéajle chee' chéajni'i xúgutele, ne sile da gun chacha na le'e. 32 Benne' ca' dxuluchálaje' waláz chee' Dios dxun na ba xen nna bé'ene' be' nácaqueze', 33 lawe' da naca Dios Bènnea' dxunne' dxi'u xel-la dxebeza zri lazre', ne quebe dxun zr'éajene' bènneache.

Ca zaj xu'u lau xúgute cue' bi bíchedxu, bi chee' Dios, 34 dxal-la' xelezúa zrize nu'ula ca' naga nazrágale, lawe' da quebe naca chee' xuluchálaje'. Dخال-la' xuluzúe' dizra' ca naxúaj na lu da nadxixruj bea Dios. 35 Che dxelaca lazre' bi xeléajni'ine', dxal-la' xuluchebe' benne' cha chee' lizre tu tue' lawe' da quebe dxulé'e na chawe' tu nu'ula guchálaje' naga nazrágale.

36 Dخال-la' gueque be'ele quebe guzú lau xrtizra Dios sua na ládujla le'e, ne quegá le'eze nazi' lu na'le na. 37 Che nu benne' dxéquene' naque' benne' dxuchálaje' waláz chee' Dios, u zúale Be' Lá'azxa le', dxal-la' gueque bé'ene' da nigá dxuzúaja' cheele naca na tu da gunná be'e Xránadxu. 38 Che quebe dxaca lazre' gueque bé'ene' da nigá, quebe dxal-la' si' lu na'le bènnea'.

<sup>39</sup> Ca' naca na, bi bícha'dau', le gun ba xuzre guchálajle waláz chee Dios, ne quebe guzágale bënnea' dxuchálaje' dizra' nazrá'la. <sup>40</sup> Xúgute da caní dxal-la' gunle dutę ba lá'ana, ne ca dxal-la' gaca na.

## 15

### *Ca bebán Cristo ládujla benne' gate*

<sup>1</sup> Na'a, bi bícha'dau', dxuzenda' le'e dizra' chawe' da ba bzenda' le'e, da na' guzı' lu na'le, ne da da'le le'e. <sup>2</sup> Ne chee dizra' chawe' nigá nalale che dxéajle chee da bzenda' le'e, ne che quebe guca dácheze xel-la dxeajlı lazre' cheele.

<sup>3</sup> Da naca blaudxa, bzéajni'ida' le'e da guzı' lu na'a, gute Cristo ne chee dul-la da nabágadxu ca naxúaj na lu dizra' lá'azxa, <sup>4</sup> na' bulucache' Le', na' bebane' zra guxunne' zra ca naxúajqueze na lu dizra' lá'azxa, <sup>5</sup> na' ble'e lawe' lau Pedro, na' gudé na' ble'e lawe' lau benne' gubáz chee' ca'. <sup>6</sup> Gudé na' ble'e lawe' lau bi bíchedxu zaj nácadxe' ca gazxu' gaxúa benne' zaj nazrague' tu zren, na' benne' zan, benne' ca' ne zaj naca banę, láqueze benne' zan, benne' ca' ba gulate'. <sup>7</sup> Gudé na' ble'e lawe' lau Jacobo, na' gudé na' ble'e lawe' lau xúgute benne' gubáz chee' ca'.

<sup>8</sup> Bzébedxa, ca gudé chee xúgute da na', ble'e lawe' lawa' neda', lálala neda' naca' ca tu bidau', bi gúlajbe' ba gudé beu' cheębe'. <sup>9</sup> Neda' naca' benne' bzébedxa chee xúgute benne' gubáz chee Cristo, ne quebe naca chia' si' la' gubáz chee Cristo lawe' da gudáu zi' xuzra' bi ca' chee Dios. <sup>10</sup> Naca' da naca' lawe' da guca Dios zri'i lazre' nen neda', na' quebe guca dácheze xel-la zri'i lazre' chee' nen neda', lawe' da ba nundxa' zrin ca xúgute benne' gubáz ca', láqueze quegá neda' nuna' na, san Dios bchinene' neda'. <sup>11</sup> Quebe zácadxa na che naca neda', u che naca benne' ca', da nigá naca na dizra' bzénentu' bënneache, ne naca na da guxéajle.

### *Ca xelexebán benne' gate*

<sup>12</sup> Che da dxuzéentu' bënneache dxenná na bebán Cristo ládujla benne' gate, ¿ájazra naca na bál-lale le'e dxennale quebe xelexebán benne' gate? <sup>13</sup> Che quebe xelexebán benne' gate, Cristoqueze quebe bebane' ládujla benne' gate, <sup>14</sup> na' che quebe bebán Cristo ládujla benne' gate, dácheze naca da dxuzéentu' bënneache, ne dácheze naca da dxeajlı lázrele chee Cristo. <sup>15</sup> Che canı naca na dxexechéentu' chee Dios da wen lazre' lawe' da dxennantu' bsebán Dios Cristo, na' che quebe xelexebán benne' gate, quebe bsebán Dios Cristo. <sup>16</sup> Che quebe xelexebán benne' gate, Cristoqueze quebe bebane', <sup>17</sup> na' che quebe bebán Cristo, dácheze naca da dxeajlı lázrele chee', na' ne nabágale dul-la. <sup>18</sup> Che canı naca na, cá'aqueze benne' zaj nate, benne' ca' guleajlı lazre' Cristo zaj nanítequeze'. <sup>19</sup> Che da dxebeza lázrentu' da naca chee Cristo naca na cheeze xęzr la xu nigá, nácadxu baxáchedxa ca xúgute bënneache.

<sup>20</sup> Na'a da li bebán Cristo ládujla benne' gate. Le' naque' benne' nedxu bebane' ládujla benne' gate quézcala xúgute benne' ca' dxal-la' xelexebane'. <sup>21</sup> Ca guca, bla' xel-la gute lu xęzr la xu nigá ne chee tuze benne', cá'aqueze ne chee tuze benne' bla' xel-la dxexebán chee benne' gate. <sup>22</sup> Ca naca dxelate xúgute bënneache lawe' da zaj naque' tuze nen Adán, cá'aqueze xúgute benne' zaj naca tuze nen Cristo xelape' xel-la nabán li lazre'. <sup>23</sup> Xelexebán tu tuę' gate xelexexale', nédxula bebán Cristo ca tu lina nedxu, na' gudé na', gate xelá' Cristo xelexebán benne' zaj

naque' bi chee' ca'. <sup>24</sup> Nadxa cheajsé chee xezr la xu nigá gate guzría xi' Cristo xúgute da dxelenná bea, ne xúgute da dxelixruj bea na, ne xúgute da zaj napa xel-la waca, na' gudéé' xel-la dxenná bea chee' lu na' Xradxu Dios. <sup>25</sup> Dxun na ba xen nna bea Cristo ca zrin zra ba nuzúa Dios zran ni'e xúgute benne' guledábague' Le', <sup>26</sup> na' da bzébedxa da cuía xi' naca na xel-la gute. <sup>27</sup> Ba nuzúa Dios xúgute zran ni'a Cristo, san gate dxenná na nuzúé' xúgute zran ni'e, dxaca bea na quebe zua Dios ládujla da ca', lawe' da Léqueze' naque' Bénnea' bzue' xúgute zran ni'a Cristo. <sup>28</sup> Gate ba zua xúgute lu na' Cristo, nadxa Cristoqueze, Bénnea' naque' Zrí'inequeze Dios guzúa cuine' lu na' Dios, Bénnea' bdeé' xúgute lu na' Le'. Ca' naca na, Dios gaque' blau lawe' xúgute da de.

<sup>29</sup> Xetú da dxaca, zaj zua benne' dxeledxúé' nisa waláz chee benne' zaj nate. ¿Bizr chee na' dxeluné' caní che quebe xelexebán benne' gate? ¿Bizr chee na' dxeledxúé' nisa waláz chee benne' gate?

<sup>30</sup> Cá'aqueze, ¿bizr chee na' zúatequezdxu dxi'u lu da stébe? <sup>31</sup> Xúgute zra zua' lu da stébe chee xel-la gute. Dxapa' le'e, bi bicha', da li naca da nigá ne chee da ba neza da napa' ne chee lu da nácadxu nen Xránadxu Jesucristo. <sup>32</sup> Che ca tu bénneacheze gudíl-laléna' benne' zaj naca ca be snia ca' lu xezre Efeso ¿bizra da ba neza naca na chia'? Che quebe xelexebán benne' gate dxal-la' gundxu ca dxelenná bénneache, dxelenné': "Xi'aj gágudxu lawe' da wxre gátedxu."

<sup>33</sup> Quebe güele lataj nu si xé le'e. Naca cáteze dxenná na:

Che gácadxu tuze benne' ca' dxeluné' da caléla,

tu zrénqueze gundxu da caléla.

<sup>34</sup> Le guxúe xanne' cuínale, ne quebe gunle dul-la, lawe' da bál-lale le'e quebe núnbea xánnele Dios. Da nigá dxapa' le'e chee gápale xel-la stu'.

<sup>35</sup> Guchebe nu benne' neda': Ájazra xelexebán benne' gate? ¿Ájazra gaca belá' dxen chee'? <sup>36</sup> Da nigá naca na tu da xálaze, lawe' da gate dxázadxu tu binne, dxun na ba xen cuía xi' bínnedu na' chee gaca na tu xágadau'.

<sup>37</sup> Da na' dxázadxu quebe naca na da xelá', san tu bínnedauze naca na, che naca na zrua' xtila u xetú bínnedau'. <sup>38</sup> Te na' gun Dios chee bínnedu na' tu xágadau' cáteze dxaca lázrequeze', na' chee tu tu bínnedau' dxuné' tu tu xágadau' cáteze zaj naca bínnedu ca'. <sup>39</sup> Quegá xúgute belá' dxen tuz ca zaj naca na. Tuze ca naca belá' dxen chee bénneache, ne xetuze ca naca belá' dxen chee be xixre' ca', na' xetuze ca naca belá' dxen chee bxínnedu ca', ne xetuze belá' dxen chee bela ca'. <sup>40</sup> Cá'aqueze zaj naca belá' dxen chee xabáa, ne belá' dxen da zaj naca na chee xezr la xu nigá. Xel-la xrtan chee da zaj naca chee xabáa nazrá' ca xel-la xrtan chee da zaj naca chee xezr la xu. <sup>41</sup> Xel-la naxaní' chee gubizra nazrá' ca xel-la naxaní' chee beu', ne cá'aqueze nazrá' ca xel-la naxaní' chee belaj ca', na' ládujla belaj ca', xel-la naxaní' chee tu belaj nazrá' ca xel-la naxaní' chee xetú belaj. <sup>42</sup> Cá'aqueze dxaca chee benne' ca' xelexebané' ládujla benne' gate. Dxucáchedxu lu ba tu da guzru', na' xebán tu da québedxa gate. <sup>43</sup> Dxucáchedxu tu da xálaze, na' xebán tu da xabáa. Dxucáchedxu tu da nate ni'a na', na' xebán tu da wál-lalé'e. <sup>44</sup> Dxucáchedxu tu belá' dxen chee beniácheze, na' xebán tu belá' dxen da naca na chee be' nácaquezdxu. Che zua tu belá' dxen da naca na bénneacheze, cá'aqueze zua tu belá' dxen da naca na chee be' nácaquezdxu.

<sup>45</sup> Cá'aqueze caní naxúaj lu dizra' lá'azxa da dxenná na: Benne' nedxu Adán guque' bénneache ban, na' Adán, benne' bzebe, naque' Be' da

dxunna xel-la nabán. <sup>46</sup> Bénnea' naque' Be' quebe ble'e nedxu, san bénnea' naque' bénneacheze. Gudé na' bla' Bénnea' naque' Be'. <sup>47</sup> Benne' nedxu guque' xu bxrte, ne guque' chee xezr la xu nigá, na' Benne' gudxupe' naque' Xránadxu, Benne' chee xabáa. <sup>48</sup> Bēla' dxen ca' chee xezr la xu nigá zaj naca na ca guca bénnea' guque' xu bxrte, na' bēla' dxen ca' da zaj naca na chee xabáa zaj naca na ca Bénnea' naque' chee xabáa. <sup>49</sup> Ca naca, nácadxu ca bénnea' guque' xu bxrte, cá' anqueze gácadxu ca Bénnea' naque' chee xabáa.

<sup>50</sup> Dxaca lazra' xapa' le'e, bi bícha'dau', bēla' dxen cheedxu da naca na xu bxrte quebe gaca chu'u na naga dxenná bea Dios lawe' da na' guzru quebe gaca zraga na da na' si bea chadía chacanna. <sup>51</sup> Dxapa' le'e tu da nagache nédxute: Quégá xúgutedxu gátedxu, san xúgutedxu sídxu tu bēla' dxen cube. <sup>52</sup> Chadite gaca na, ca dxun benne' guchudie' xexrate lawe', gate xendxu chi'i luzu da dxulucuezre' da bzebe. Cuézrequeze luzu da dxulucuezre', na' xelexebán benne' gate naga cabátadxu xelatie', na' dxi'u sídxu tu bēla' dxen cube. <sup>53</sup> Bēla' dxen cheedxu da guzru dxal-la' xexaca na tu da québedxa guzru, na' bēla' dxen cheedxu da gate dxal-la' xexaca na tu bēla' dxen da québedxa gate. <sup>54</sup> Gate bēla' dxen cheedxu da guzru ba bexaca na da québedxa guzru, ne bēla' dxen cheedxu da gate ba bexaca na tu da québedxa gate, nadxa gaca li da naxúaj na lu dízra' lá'azxa, da dxenná na: Ba beladxu lu na' xel-la gute.

<sup>55</sup> Lue', xel-la gute, ¿ga na' xel-la waca chiu' chee gunu' netu' we'?

Lue', xel-la gute, ¿ga na' da zrué'enu'?

<sup>56</sup> Da dxunna xel-la gute xel-la waca chee gun na dxi'u we' naca na dul-la, na' da nadxixruj bea da gula na' naca na da dxunna na dul-la xel-la waca chee gudé na dxi'u lu xel-la gute. <sup>57</sup> Na'a, xcalén Dios, Bénnea' dxunne' dxi'u xel-la waca chee zrué'edxu lu dul-la, ne lu xel-la gute ne chee Xránadxu Jesucristo.

<sup>58</sup> Chee le na', bi bícha' nazri'ite lazra', le se chacha, ne le súateze lu zrin dxúndxale chee Xránadxu lawe' da nézele quebe naca dácheze zrin dxunle tu zren nen Xránadxu.

## 16

### *Dumí da gutúpale chee gácalele bíchedxu ca'*

<sup>1</sup> Ca naca chee dumí gutúpale chee gácalele bi bíchedxu ca', le gun na cáteze bzéajni'ida' xúgute cue' bi chee Cristo zaj zra' xezre ca' zaj nababa Galacia. <sup>2</sup> Tu tu zra nedxu chee da gazre zra tu tule le'e dxal-la' gúnnale late' weaj ca da dxezile, na' cu'u cháwele na chee quebe gun na ba xen gúnnale dumí gate xida'. <sup>3</sup> Gate na' xelá'a, sel-la' xezre Jerusalén benne' ca' cuele, na' gunézruja' le' tu xiche chee xelu'e dumí na' chee bi bíchedxu zaj zre'e na'. <sup>4</sup> Che gata' lataj cha'a, na' sá'acalequeze' neda'.

### *Da dxugú'u bea Pablo gune'*

<sup>5</sup> Lu neza chia' dxun na ba xen tea' naga nababa xezr la xu Macedonia, na' xelá'a xezre Corinto ca te na'. <sup>6</sup> Wegá'analja' nen le'e tu chi'i, u che ba guca, na' sua' nen le'e dutē beu' zaga ca', na' le'e waca gácalele neda' lu neza chia' naga dxal-la' cha'a. <sup>7</sup> Quebe dxaca lazra' xedajnná'a le'e ca teza', san dxebeza lazra' súaqueza' tu chi'i nen le'e, che gunna Xránadxu lataj. <sup>8</sup> Na'a xegá'ana' lu xezre Efeso nigá ca zrin zra Pentecostés, <sup>9</sup> lawe' da napa' lataj guna' tu zrin zren chee Xránadxu da gulé'ete lawe na, lácala naxán benne' ca' dxeledábage'.

<sup>10</sup> Che ba bla' Timoteo, le gun ba xuzre suabe' xel-la dxebé nen le'e, ne quebe bi cué'ebe' gunne xue, lawe' da dxunbe' zrin chee Xránadxu cáteze dxun neda'. <sup>11</sup> Chee le na' netule le'e quebe guzúale-be' chalá'ala, san le gácale-be' chee xexu'ube' neza lu xel-la dxebeza zri lazre' chee xedajnná'abe' neda', lawe' da dxebeza'-be' tu zren nen bi bíchedxu caní.

<sup>12</sup> Ca naca chee bíchedxu Apolos, guta' xúle'eda' le' chee chéajlene' bi bíchedxu ca' xedajlenné'e le'e, san quebe guca lazre' se'e na'a. Wíde' gate gape' lataj.

*Dxulugapa ljwezre' diuzre*

<sup>13</sup> Le sua ban lazre'. Le se chacha lu xel-la dxeajlí lazre' cheele. Le se ca ze benne' biu. Le gaca benne' wal-la. <sup>14</sup> Dute' xel-la zri'i lazre' le gun xúgute' da dxunle.

<sup>15</sup> Na'a, bi bícha'dau', ba nézquezle gulaca xrtía Estéfanos benne' nedxu naga nababa Acaya gulezí' lu ne'e dizra' chawe' chee Cristo, na' buluzúa cuíne' chee xelácalene' bi bíchedxu ca', bi chee Cristo. <sup>16</sup> Dxaca lazra' guzúa cuínale lu na' benne' caní, ne lu na' xúgute' benne' dxelácale ljwézredxu, ne dxelún zrin chee Cristo. <sup>17</sup> Zua' xel-la dxebé lawe' da belelá' Estéfanos, ne Fortunato, ne Acaico, lawe' da belune' chia' da quebe guzéquele gunle le'e lawe' da zrale zitu'. <sup>18</sup> Belún chúchu'e' be' nácaqueza', ne be' nácaquezele le'e. Dxun na ba xen si' lu na'le benne' caní.

<sup>19</sup> Xúgute' cue' bi chee Cristo naga nababa xezr la xu Asia dxulugapa le'e diuzre. Aquilo ne Priscila, ne bi bíchedxu ca' dxelezraga lu xu'u lizre' dxulugápalé'e le'e diuzre lu La Xránadxu. <sup>20</sup> Xúgute' bíchedxu nigá dxulugape' le'e diuzre. Le gugapa diuzre ljwézrele tule xetule, ne le gunida ljwézrele.

<sup>21</sup> Neda', Pablo, dxuzúaja' da dxugapa' le'e diuzre nen ná'aqueza'.

<sup>22</sup> Che nu benne' quebe nazrí'ine' Xránadxu Jesucristo, cuía xi' bénnea'. ¡Gudá Xránantu'!

<sup>23</sup> Dxenaba' Xránadxu Jesucristo gun cháwe'e le'e. <sup>24</sup> Dxusel-la' chee xúgutele xel-la nazrí'i chia' lu La Jesucristo. ¡Ca'an gaca na!



## DIZRA' GUDXUPE' DA BZUAJ SAN PABLO CHEE BI CHEE CRISTO ZAJ ZRE'E CORINTO

*Pablo dxuzúaje' chee bi bíchedxu zaj zre'e xezre Corinto*

<sup>1</sup> Neda', Pablo, naca' gubáz chee Jesucristo lawe' da naca na da dxaca lazre' Dios. Tu zren nen bíchedxu Timoteo dxuzúaja' da nigá chee le'e, bi bícha'dau', zrágale chee Dios lu xezre Corinto. Cá'anqueze dxuzúaja' da nigá chee xúgute bi chee Dios zaj zre'e xezre ca' zaj nababa xezr la xu Acaya. <sup>2</sup> Dxenaba' Xradxu Dios, ne Xránadxu Jesucristo gun chawe'e le'e, ne gunne' le'e xel-la dxebeza zri lazre'.

*Da ca' guz' guzaca' Pablo*

<sup>3</sup> Dxue lá'anantu' Dios, Xra Xránadxu Jesucristo, lawe' da naque' Xradxu dxexache lazre' dxi'u, ne Dios dxexúe zrene' dxi'u. <sup>4</sup> Dios dxexúe zrénqueze' dxi'u ca naca xúgute xel-la zi' da dxededxu, chee cá'anqueze dxi'u gaca xexúe zrendxu benne' ca' dxeledé'e xel-la zi', na' xue zrendxu le' cáteze da ba nun Dios cheedxu dxi'u. <sup>5</sup> Lawe' da dxededxu xel-la zi' zren ca da gudé Cristo, cá'anqueze ne chee Cristo zua Nu dxexúe zrénqueze dxi'u, Léqueze Dios. <sup>6</sup> Chee le' na', che dxedentu' netu' xel-la zi', naca na chee sua Nu xexúe zren le'e, ne chee lale, na' caní gaca guchaga laule lu duté xel-la zren lazre' chee xel-la zi' ca' da dxededxu dxi'u. <sup>7</sup> Dxuxrén lázrele'entu' le'e, lawe' da nézentu' ca dxedele xel-la zi' tu zren nen netu', cá'anqueze sua Nu xexúe zren le'e tu zren nen netu', Léqueze Dios.

<sup>8</sup> Bi bicha', dxaca lázrentu' nézele ca naca xel-la zi' zren da gudentu' naga nababa Asia. Guca na tu xel-la zi' zrendxa ca da gaca guchaga launtu', na' québedxa guleza lázrentu' lantu'. <sup>9</sup> Gúquentu' ba zua gagu xelute benne' ca' netu'. Guca cheentu' da nigá chee bzéajni'i na netu' guxrén lázrentu' Dios, ne quegá guxrén lazre' cuñantu'. <sup>10</sup> Dios bselé' netu', na' ne dxuselé' netu' lu da stébe zren nigá chee xel-la gute, na' dxebeza lázrentu' Le' guseláqueze' netu' <sup>11</sup> che le'e gácale netu', nábadxu Dios gácale netu'. Che benne' zan xelenabe' Dios gácale netu', na' benne' zan xelé'e Dios: Xcalenu', chee da chawe' ca' da gun Dios cheentu'.

*Bizr chee na' Pablo guzrene' chéaje' Corinto*

<sup>12</sup> Naca tu da ba neza da nápantu' da zua na lawe' da dxe xichaj lázrdauntu' netu' ba gudantu' lu da lá'azxa, ne du lázrentu', lu xezr la xu nigá, ne ládujla le'e. Dios lu xel-la zri'i lazre' chee' gúcale netu' chee bentu' caní, ne quebe bentu' na lu xel-la sina cheézquezentu'. <sup>13</sup> Lu da dxuzúajntu' chee quebe bi de da quebe gaca gulábale, ne chéajni'ile, na' dxaca lazra' chéajni'i xánnele <sup>14</sup> ca ba guxéajni'ile late', chee lu zra xelá' Xránadxu Jesús, gácantu' netu' tu da ba neza chee le'e, ca le'e gácale tu da ba neza cheentu'.

<sup>15</sup> Lawe' da dxuxrén lazra' gaca caní, bechugu lazra' xida' nédxula xedajnná'a le'e chee gaca tu da ba neza chee, na' xedajnná'a le'e chupa lasa, <sup>16</sup> lawe' da bechugu lazra' xedajnná'a le'e gate tea' cha'a xezre ca' zaj nababa Macedonia, na' te na', gate zezá'a lu xezre ca' zaj nababa Macedonia, xedajnná'a le'e xetú. Ca' gaca na, le'e gaca gácale neda' cha'a xezre ca' zaj nababa Judea. <sup>17</sup> ¿Quebe naca' du lazra' gate dxechugu lazra' caní? ¿Dxéquele le'e naca' ca tu benne' chee xezr la xu nigá, na'

dxennía': Awe', cabí, gate dxechugu lazra' da guna'? <sup>18</sup> Dios nézquezne' neda', ne Silvano, ne Timoteo, quebe dxentu' le'e: Awe', cabí. <sup>19</sup> Naca na caní lawe' da Jesucristo, Zri'ine Dios, Bénnea' bzéntenú' le'e ca naca chee', cabata' gunné': Awe', cabí. Nen Cristo nácaqueze da li xrtizra Dios, <sup>20</sup> lawe' da ne chee Le' dxelaca li xúgute' da guchebe lazre' Dios. Chee le na', gate dxue lá'anantu' Dios, dxennantu': ¡Ca'an naca na! ne chee Jesucristo. <sup>21</sup> Dios naque' Bénnea' ba nuzé chúchue' netu', ne le'e lu da naca chee Cristo, ne ba guqu'é dxi'u, <sup>22</sup> ne ba nuzúe' cheedxu tu da dxulé'e na nácadxu bi chee Le', lawe' da ba nuzúe' Be' Lá'azxa lu xichaj lázrdaudxu, da dxunna bea na sidxu da naca chee'.

<sup>23</sup> Che quebe ne xida' Corinto ca bechugu lazra', neze Dios naca na chee gaca' zren lazre' nen le'e, ne che quebe naca caní, dxenaba' Dios xequ'é xel-la nabán chia'. <sup>24</sup> Quebe naca na lawe' da dxaca lázrentu' nna bé'entu' le'e da dxal-la' chéajlele, lawe' da ba ze cháchale lu da dxéajlele. Dxacá lázrentu' bédxale lu da naca chee Cristo.

## 2

<sup>1</sup> Chee le na' bechugu lazra' quebe xida' xedajnná'a le'e lu da baxache'. <sup>2</sup> Che neda' guzúa' le'e lu da baxache', ¿núzraqueze guzúa neda' lu xel-la dxebé? Tuze le'e, benne' ca' ba bzua' lu da baxache'. <sup>3</sup> Chee le na' bzuaja' chee ca da bēna' lawe' da quebe guca lazra' xida' chee guzúale neda' lu da baxache', le'e na' dxal-la' guzúale neda' lu xel-la dxebé. Bxren lazra' che neda' zua' lu xel-la dxebé, cá'anqueze le'e súale lu xel-la dxebé. <sup>4</sup> Gate bzuaja' chee da na' guzúle'eda' gunne xue, ne guzúa' lu da zi' da xa', ne cá'anqueze gudxézrel'e'queza', san quebe bzuaja' da na' chee guzúa' le'e lu da baxache', san chee nézele nazrí'ile'eda' le'e.

### *Ca dxal-la' xulunite lawe' chee bénnea' bene' da calela*

<sup>5</sup> Che nu benne' ba bzué' neda' lu da baxache', quegá chia' néda'ze bene' na, san cá'anqueze waca nnadxu, bzué' xúgutele lu da baxache'. Dxennía': Waca nnadxu, chee quebe gácatēca' snia. <sup>6</sup> Ca xel-la zi' da bdele bénnea' gate na' bzragale, ba nácale'equeze da na'. <sup>7</sup> Ca' naca na, na'a dxal-la' gunité laule chee bénnea', ne xue zrenle le', chee quebe gunitie' xel-la dxebeza lazre' chee' ne chee da baxache' zren da dxedé'. <sup>8</sup> Chee le na' dxata' xueda' le'e gul'é'ele le' xecha lasa ca nazrí'ile'ele le'. <sup>9</sup> Bzuaja' nédxula chee ca naca da níga chee gul'é'lawe' che nácale wezúe dizra' lu xúgute da dxaca. <sup>10</sup> Na'a, nu benne' dxunite laule chee', cá'anqueze neda' dxunite lawa' chee'. Ca da bnite lawa' neda', che naca na tu da dxal-la' gunité lawa', ba bnite lawa' na ne chee le'e lau Cristo <sup>11</sup> chee quebe seque' Satanás nna be'e na dxi'u, na' ba nézquezdxu ca da dxun na.

### *Pablo dxezé' gunne xue lu xezre Troas*

<sup>12</sup> Gate bzrina' xezre Troas chee guzenda' bénneache dizra' chawe' chee Cristo, gutá'le'e lataj chia' guna' zrin chee Xránadxu. <sup>13</sup> Guzúale'a gunne xue lawe' da quebe bezrelda' bi bíchedxu Tito ga na'. Chee le na' bzea' dizra' benne' ca' zaj zre'e na', na' guxá'a xezr la xu Macedonia.

### *Dxezrué'edxu ne chee Cristo*

<sup>14</sup> Xcalén Dios, Bénnea' dxeché'tequeze' dxi'u lu neza guxú'u Jesucristo lu da bzrué'ene', ne dxulé'e lawe' ne cheedxu dxi'u dizra' chee' ca tu da dxelá zixre da dxezriluj gáteteze na. <sup>15</sup> Dxi'u nácadxu ca da dxelá zixre da dxuzúa Cristo lau Dios, ne dxezriluj na ládujla benne' ca' xeledé', ne

ládujla benne' ca' xelebía xi'ē. <sup>16</sup> Lau benne' ca' xelebía xi'ē da dxelá nigá naca na ca tu da dxute bénneache, san lau benne' ca' xelelé naca na tu da dxunezruj na bénneache xel-la nabán. ¿Nu benne' naca chee' gaque' caní? <sup>17</sup> Netu' quebe dxedantu' dxútentu' dizra' chee' Dios, ne quebe dxuchantu' na ca dxelún benne' zante. Lawe' da dxen Dios, dxuchálajntu' du lázrentu', ca benne' nase-la Dios, ne ca wen zrin chee' Cristo.

### 3

#### *Dizra' chee' xel-la wezría cube*

<sup>1</sup> Gate dxennantu' da nigá, ¿dxéquele dxezú launtu' xecha lasa dxennentu' chawe' da naca cheézquezentu'? ¿Dxun na ba xen gulé'entu' le'e tu xiche da dxulé'e na nácantu' xrlátaje, u nábantu' chee'le tu xiche caní, ca dxelún bal-la benne'? <sup>2</sup> ¡Cabí! Lawe' da nácaquezle le'e ca tu xiche da dxulé'e na nácantu' xrlátaje, da naxúaj na lu xichaj lázrdauntu', na' xúgute bénneache gaca xelexúnbe'ē na, ne xululabe' na. <sup>3</sup> Le'e nácale ca tu xiche da nuzúaj Cristo, ne da dxulé'e launtu' netu'. Nácale ca tu da naxúaj na da quebe naca na tu lu xiche, san ne chee' Be' Lá'azxa chee' Dios ban, tu da quebe naxúaj na lu blaga xiaj, san lu lázrdaudxu.

<sup>4</sup> Ne chee' Cristo dxuxrén lázrentu' Dios, <sup>5</sup> quegá chee' bi gaca guntu' da naca cheézquezentu', san, ca naca da gaca guntu' naca na chee' Dios. <sup>6</sup> Le' ba nunne' netu' guntu' zrin chee' ne chee' tu xel-la wezría cube da quebe naca na ne chee' tu da naxúaj na, san da naca na ne chee' Be' Lá'azxa chee'. Da nadxixruj bea na da naxúaj na dxuzría xi na dxi'u, san Be' Lá'azxa na' dxunna dxi'u xel-la nabán.

<sup>7</sup> Da bdxixruj be'e Moisés na' bxuaj na le'e xiaj blaga, ne bla' nen tu da bsení'le'e, na' québedxa belezúe benne' Israel ca' xelené'ē lau Moisés, lawe' da gúcatite legala le'e dxu'a lawe', na' xel-la naxaní' na' bexul-la na chawe lazre'. Che lu xel-la naxaní' zren bla' da nadxixruj bea na, da dxuzría xi na dxi'u, <sup>8</sup> da zrénle'ēdxá naca xel-la naxaní' chee' dizra' chawe' na' da nusá Be' Lá'azxa chee'dxu. <sup>9</sup> Che da nadxixruj bea na da dxuzría xi na dxi'u guca na tu da xabáa zrente, na' tu da xabáa zrénle'ēdxá naca dizra' chawe' na' da dxucá'ana na dxi'u xrlátaje lau Dios. <sup>10</sup> Lácala che da nadxixruj bea na nédxula guca na tu da xabáa, na'a quebe bi naca xabáa chee' na lau dizra' chawe' nigá da naca na tu da xabáa zrénle'ēdxá. <sup>11</sup> Che guca tu da xabáa chee' da na' guzí bea na tu chí'idauze, napa na tu da xabáa zrénle'ēdxá da na' si bea na chadía chacanna.

<sup>12</sup> Lawe' da dxuxrén lázrentu' naca na caní, du lázrentu' dxuchálajntu' dizra' chawe' na'. <sup>13</sup> Quebe dxuntu' ca ben Moisés, bgacu lawe' tu ladxe' chee' quebe xelelé'e benne' Israel ca' xexul-la xel-la naxaní' na' da quebe guzí bea na. <sup>14</sup> Benne' Israel ca' quebe guléajni'ine'. Ne na'a zra, gate dxululabe' xel-la wezría gula na', ladxe' ná'queze quebe dxue na le' lataj xeléajni'ine', lawe' da quebe ne xedúa na, na' gaca xedúa na tuze ne chee' Cristo. <sup>15</sup> Na'a zra, gate dxululabe' dizra' chee' Moisés, zua ca tu ladxe' da dxucache na xichaj lázrdawe'. <sup>16</sup> Gate tu benne' xexaque' chee' Xránadxu, xedúa ladxe' na' lu xichaj lázrdawe', <sup>17</sup> lawe' da naca Xránadxu Be' na', na' naga zua Be' chee' Xránadxu, na' de xel-la weselá lu na' da nadxixruj bea na chee' Moisés na'. <sup>18</sup> Chee' le' na' xúgutedxu dxi'u, lawe' da quebe da' laudxu tu ladxe', nácadxu ca tu wana' da dxulé'e na da xabáa chee' Xránadxu, na' dxi'uqueze, tu tu lasa gate dxelé'edxu da xabáa chee' dxexácadxadxu ca naca Cristo, lawe' da tu tu lasa na' nápadxadxu da

xabáa chee'. Da nigá dxun Be' chee Xránadxu, na dxuché'e dxi'u lu xichaj lázrdaudxu.

#### 4

<sup>1</sup> Ca' naca na, cabata' dxate ni'a nantu' lawe' da lu xel-la dxexache lazre' chee', Dios ba nusebague' netu' zrin nigá chee Cristo da dxuntu'. <sup>2</sup> Ba nuzúantu' chalá'ala da dxelún bénneache bagácheze, ne da dxedué'entu' ca zaj naca na. Quebe bi dxuntu' da wen lazre', ne quebe dxuchantu' dizra' chee Dios, san dxennentu' tuze da li, na' caní dxuzúa cuínantu' lu na' xichaj lázrdau xúgute bénneache lau Dios. <sup>3</sup> Che dizra' chawe' da dxuzéntenutu' bénneache ne nagache na, naca na caní tuze lau benne' ca' xelebía xi'e. <sup>4</sup> Lawe' da quebe dxeléajle'e chee Cristo, na' da xriwe', da na' naca na dios chee xezr la xu nigá ba nun chul-la na xichaj lázrdawe' chee quebe xeelé'ene' xel-la naxaní' chee dizra' chawe' chee xabáa chee Cristo, Bénnea' naque' lu'a lesaca Dios. <sup>5</sup> Quebe dxuzéntenutu' bénneache ca naca cheézquezentu', san ca naca chee Jesucristo. Dxennantu' naque' Xránadxu, na' ca naca cheentu' dxennantu' nácantu' wen zrin chee lawe' da nazrí'intu' Jesús. <sup>6</sup> Dios ná'queze, Bénnea' gunná be'e guxaní' xi' na' lu da chul-la, naque' Benne' ba bene' guxaní' xi' chee' lu xichaj lázrdaudxu, chee gaca gúnbeadxu da xabáa chee Dios da dxácatite legala na dxu'a lau Jesucristo.

#### *Dxundxu xúgute ne chee xel-la dxeajlí lazre' cheedxu*

<sup>7</sup> Da xabáa nigá nápantu' lu bela' dxen cheentu', da naca na ca tu xesu' xu, chee gaca bea za xel-la waca zren nigá lu na' Dios, ne quegá cheézquezentu'. <sup>8</sup> Chee le na':

Láqueze zúantu' lu da stébele'e, quebe dxezentu' gunne xue.

Láqueze dxezentu' gunne xue, tu dxebeza lázrezquezentu' gácale Dios netu'.

<sup>9</sup> Láqueze zaj nau zi' xuzre' netu', quebe dxusán Dios netu'.

Láqueze dxeline' netu' xu, quebe dxebíá xintu'.

<sup>10</sup> Gáteteze dxéajntu' naca tuze bela' dxen cheentu' nen xel-la gute chee Jesús chee gulé'e lau lu bela' dxen cheentu' xel-la nabán chee Jesús.

<sup>11</sup> Dxácate naca bantu' zúantu' chee gátentu' xúgute zra ne chee Jesús, chee gulé'e lau xel-la nabán chee Jesús lu bela' dxen cheentu' da gate. <sup>12</sup> Ca' naca na, lácala tu zúazquezentu' lu da stébe chee xel-la gute da nigá, dxun na sua tu xel-la nabán cube chee.

<sup>13</sup> Naxúaj lu dizra' lá'azxa da dxenná na: Guxéajle'a, na' chee le na' bchálaja', na' cá'anqueze netu', lu xel-la dxeajlí lazre' caníqueze, dxéajle'entu', ne dxuchálajntu', <sup>14</sup> lawe' da nézentu' Dios, Bénnea' bsebane' Xránadxu Jesús ládujla benne' gate, cá'anqueze gusebane' dxi'u tu zren nen Jesús, na' tu zren nen le'e, xeché'e dxi'u lau Le'. <sup>15</sup> Xúgute da nigá guzaca zintu' chee gaca tu da ba neza chee, chee gaca na, gate xelezí' benne' zante xel-la xrlátaje chee Dios, cá'anqueze benne' zante xelé'e Le': Xcalenu', chee gaca ba chee Dios.

<sup>16</sup> Chee le na', cabata' dxate ni'a nadxu. Láqueze dxexru bela' dxen cheedxu, Dios dxuxucube' be' nácaquezdxu tu zra tu zra. <sup>17</sup> Da dxezácadxu lu xezr la xu nigá naca na tu da dauze, da teze chee na, na' nusá na cheedxu tu xabáa chadíá chacanna da szrente, ne da cháwedxa. <sup>18</sup> Quebe nná'adxu ca da dxelé'edxu, san nná'adxu da quebe nalá', lawe' da quebe

dxelezi bea da ca' dxeléd'edxu, san da ca' quebe dxeléd'edxu dxelezi bea na chadía chacanna.

## 5

<sup>1</sup> Bèla' dxen cheédxu naca na ca tu xu'u lizre be' nácaquezdXu. Bèla' dxen cheédxu naca na ca tu xu'u da quebe si bea na, na' gate gátedxu Dios ba nucueze' cheédxu xabáa tu xu'u da zea jlí canna, da nun Diósqueze, ne quegá bènneache. <sup>2</sup> Da li dxácatę naca bandxu lu bèla' dxen nigá dxebezre wę'dxu lawe' da dxaca lázredxu cheajchú'udxu bèla' dxen cube na' da gunna Dios dxi'u xabáa. <sup>3</sup> Quebe xegá'ana cá'aze be' nácaquezdXu xabáa. Cheajchú'u na bèla' dxen cube na'. <sup>4</sup> Dxácatę ne naca bandxu lu xu'u nigá da naca na bèla' dxen cheédxu, dxebezre wę'dxu, ne dxededxu xel-la zi'. Quebe nácaze na lawe' da dxaca lázredxu gusandxu bèla' dxen gula cheédxu nigá. Dxaca lázredxu cheajchú'udxu bèla' dxen cube, na' ca'an gaca xenite bèla' dxen cheédxu da dxal-la' gate, na' la' bèla' dxen cube cheédxu da gaca ban na chadía chacanna. <sup>5</sup> Bénnea' ba nune' dxi'u chee gaca cheédxu caní naque' Dios, Bénnea' ba nunę' dxi'u Be' Lá'azxa ca tu da dxunna bea na dxal-la' sidxu tu bèla' dxen cube xabáa.

<sup>6</sup> Ca' naca na, dxuxrén lázretequezdXu Dios. Ba nezdXu dxácatę naca bandxu lu bèla' dxen nigá zúadxu zítu'la naga zua lízredxu, da naca na, quebe zúalędXu XránadXu, <sup>7</sup> na' dxedadxu ne chee xel-la dxeajlí lazre' cheédxu, quegá ne chee da dxeléd'edxu. <sup>8</sup> Dxuxrén lázredxu Dios, ne dxaca lázredxadXu gusandxu xel-la nabán cheédxu lu bèla' dxen nigá chee chéajdxu cheajsúalędXu XránadXu. <sup>9</sup> Chee le na' dxundxu ba xuzre gúntęquezdXu da xezaca ba lazre' XránadXu, che nagá'anadXu lu bèla' dxen cheédxu nigá, u che cheajchú'udxu bèla' dxen cube, da zua na xabáa, <sup>10</sup> lawe' da xúgutedxu dxun na ba xen xezrindxu lau Cristo chee guchi'e ca da nundxu tu tudxu, chee si' lu nadxu ca da xáladxu, cáteze naca da xrlátaje, u da calela da ba bęndxu gate ne zúadxu lu bèla' dxen cheédxu nigá.

### *Dizra' da dxexún dxi'u tuze nen Dios*

<sup>11</sup> Chee le na', lawe' da núnbeantu' ca dxal-la' zrébedxu XránadXu, dxuntu' ba xuzre guntu' xeledá bènneache. Dios ba nézene' da nácantu', na' dxebeza lazra' cá'anqueze le'e nézele na. <sup>12</sup> Quegá dxennentu' xrlátaje cheézquezentu', san dxúnnantu' le'e lataj gápale netu' ba lá'ana, chee gaca xechébele chee benne' ca' dxulucá'ana szren cuine' ca naca da zaj naque' cúzreze, ne quegá ca naca da zaj naque' lu xichaj lázrdawe'. <sup>13</sup> Che dxeleque bènneache nadá xichaj lázrdauntu' naca na chee guntu' zrin chee Dios, na' che quebe nadá xichaj lázrdauntu' naca na chee gaca tu da ba neza chee le'e. <sup>14</sup> Xel-la zri'i lazre' chee Cristo dxusebaga na netu' lawe' da nézentu' che tu benne' gutie' waláz chee xúgute bènneache, na' ba gulate xúgute'. <sup>15</sup> Cristo gutie' waláz chee xúgute bènneache, chee benne' ca' zaj naca banę' québedxa xelaca banę' cheézqueze', san chee Le', Bénnea' gutie', ne bebanę' waláz chee benne' ca'. <sup>16</sup> Chee le na', québedxa nna'ntu' ca naca da nácaqueze tu benne' lu xęzr la xu nigá, na' láqueze nédxula gunna'ntu' Cristo cáteze gúcaqueze' lu xęzr la xu nigá, na' a québedxa nna'ntu' Le' caní. <sup>17</sup> Ca' naca, che tu benne' naque' tuze nen Cristo, naque' tu benne' cube. Da gula ca' chee benne' nigá ba guledę chee na, na' xúgute na zaj naca na cube.

<sup>18</sup> Xúgute da caní dxun Dios, Bénnea' bexune' dxi'u tuze nen Léqueze' ne chee Cristo, na' bsebage' dxi'u guzendxu bénneache ca gaca xelexaque' tuze nen Dios. <sup>19</sup> Gate gute Cristo, Dios guzúalequeze' Le', ne bexune' bénneache chee xezr la xu nigá tuze nen Le', ne quebe gunné'e ca zaj naca dul-la zaj nabaga bénneache ca', na' bsebage' dxi'u guzendxu bénneache dizra' da dxexún dxi'u tuze nen Dios. <sup>20</sup> Ca' naca na, nácantu' gubáz chee Dios ne chee Cristo, na' naca na cáteze Diósqueze dxata' xuene' le'e lu dxúa'antu', na' dxata' xuentu' le'e lu La Cristo, le xexaca tuze nen Dios. <sup>21</sup> Cristo netú dul-la ca bene', san ne cheedxu dxi'u, Dios bdee' Le' chee gutié' le'e xaga béguaj ca tu benne' dul-la, chee xexácadxu benne' xrlátaje lau Dios ne chee da ben Cristo.

## 6

<sup>1</sup> Ca' naca na, ca wen zrin tu zren nen Dios dxata' xuentu' le'e chee quebe guzúale chalá'ala xel-la zri'i lazre' chee Dios, <sup>2</sup> lawe' da lu dizra' lá'azxa dxenné':

Tu zra dxezaca ba lazra' benda' chiu',  
na' lu zra chee xel-la weselá gúcalena' lue'.

Na'a naca na zra dxezaca ba lazre' xenne' cheele, ne guselé' le'e.

<sup>3</sup> Quebe bi dxuntu' da gun na quebe xeléajle bénneache chee Cristo, chee quebe nu nne calēla chee zrin dxuntu'. <sup>4</sup> Ca naca xúgute da dxuntu', dxaca lázrentu' gulé'entu' bénneache nácantu' wen zrin chee Dios, ne chee xel-la dxebeza zren lazre' cheentu' gate dxuchaga launtu' da dxezácantu',

ne da dxexázejentu', ne da zaj naca stēbe cheentu',

<sup>5</sup> ca buluzálaje' netu', ne gulegu'e netu' lizre xia.

Guledábage' netu' san bēnle'entu' zrin.

Zane' lasa quebe gúsentu', ne quebe bi gudáguntu'.

<sup>6</sup> Cá'anqueze blé'entu' da nácantu'

ne chee tu xel-la nabán li lazre' cheentu',

ne ne chee da li da núnbeantu',

ne ne chee xel-la zren lazre' cheentu',

ne xel-la zri'i lazre' cheentu',

ne ne chee Be' Lá'azxa, Bénnea' zúalene' netu',

ne ne chee xel-la nazrí'i cheentu' da naca na du lazre',

<sup>7</sup> ne ne chee dizra' li da dxuzénentu' bénneache,

ne ne chee xel-la waca chee Dios da zúale na netu'.

Bchínentu' da zaj naca ca xia chee wedil-la chee da xrlátaje chee gudíl-lantu', ne chee gudentu' chalá'ala da zaj naca ca xia chee wedil-la chee benne' ca' dxeledábage' netu'.

<sup>8</sup> Zua gate dxelape' netu' ba lá'ana',

ne zua gate dxuluzúe' netu' chalá'ala.

Zua gate dxelenné' cheentu' da xrlátaje,

ne zua gate dxelenné' cheentu' da calēla.

Zua gate dxelenné' nácantu' wen lazre',

ne zua gate dxelenné' dxennentu' da li.

<sup>9</sup> Zua gate quebe nu dxuzé naga netu',

ne zua gate dxuluzé naga xánnie' netu'.

Zua gate zúantu' lu da stēbe chee xel-la gute, san ne naca bantu'.

Zua gate dxuludé' netu' xel-la zi', san quebe ne xelutie' netu'.

<sup>10</sup> Láqueze zúantu' lu da baxache', zúatequezentu' lu xel-la dxebe.

Lácala nácantu' benne' xache', ba nuntu' benne' zan benne' gunní'a.  
Láqueze quebe bi núantu', xúgute nápantu'.

<sup>11</sup> Bi bíchentú', benne' Corinto, ba bchálajntu' du lázrentu'. Ba blé'entu' le'e ca nazrí'i lázrentu' le'e. <sup>12</sup> Tu zúazqueze xel-la zrí'i lazre' cheentu', na' le'e na' quebe nazrí'ile netu' du lázrele. <sup>13</sup> Dxata' xueda' le'e ca dxun tu benne' dxata' xuene' bi cheéqueze' chee gulé'ele neda' du lázrele xel-la nazrí'i da zua na lu xichaj lázrdaule cáteze bena' neda'.

*Nácadxu xudau' chee Dios ban*

<sup>14</sup> Quebe gunle tuze nen benne' quebe dxelájle'e chee Cristo, da gaca na ca chacué' bezre gu'una, be quebe zaj nadíl-leba'.

¿Ájazra gun da xrlátaje gaca na tuze nen da calela?

¿Ájazra gun xel-la naxaní' gaca na tuze nen da chul-la?

<sup>15</sup> ¿Ájazra gun Cristo gaque' tuze nen Satanás?

¿Ájazra gun benne' dxéajle'e chee Cristo gaque' tuze nen benne' quebe dxéajle'e chee'?

<sup>16</sup> ¿Ájazra gun xudau' chee Dios gaca na tuze nen bedáu' xiaj xaga?

Lé'eqeaze nácale xudau' chee Dios ban cáteze gunná Diósqueze:

Súalena' le', ne tálena' benne' ca'.

Gaca' Dios chee benne' ca', na' le' xelaque' benne' xezre chia'.

<sup>17</sup> Chee le na', cá'aqueze gunné':

Le xedxúaj ládujla benne' ca', ne le cuasa na', dxenná Xránadxu.

Quebe gutale da sban.

Nadxa si' lu na'a le'e <sup>18</sup> ne gaca' Xrale le'e,

na' le'e gácale zrí'ina' bi biu, ne zrí'ina' bi nu'ula.

Caní dxenná Xránadxu, Bénnea' nape' duté xel-la waca.

## 7

<sup>1</sup> Ca' naca na, bi bícha'dau' nazrí'ite lazra', da caní zaj naca na da guchebe lazre' Dios cheedxu. Chee le na' dxal-la' guxúe xanne' cuínadxu chee quebe güedxu lataj netú da sban gudxén na dxi'u lu be'la' dxen cheedxu, ne lu be' nácaquezdXu, na' lawe' da dxezrébedxu Dios dxal-la' guzúa cuínadxu lu na' Dios duté ca nácadxu.

*Ca belexebí'i lazre' benne' Corinto*

<sup>2</sup> Le si' lu na'le netu'. Quebe bi da calela ne guntu' chee nu benne' ládujla le'e, ne quebe nu ne guchántu', ne quebe nu ne si xentu'. <sup>3</sup> Quebe dxennía' da nigá chee gusebaga' le'e zria, san naca na ca ba gucha' le'e nédxula, le'e zúale lu lázrdawa' che gaca bana', u che gatia' tu zrenté nen le'e. <sup>4</sup> Du lazra' dxuchálajlena' le'e, ne zua' lu da ba neza ne chee le'e. Lu xúgute da dxezácantu' zua da dxexúe zréne'le'e neda', na' dxebéle'eda'.

<sup>5</sup> Da li, gate bzrintu' naga nababa Macedonia, quebe bezí' lázrentu'. Guzúantu' lu da stébe gáteteze, lawe' da gáteteze gudentu' guledábaga bénneache netu', na' lu lázrdau' bezrébentu'. <sup>6</sup> Nadxa Dios, Bénnea' dxexúe zrene' benne' zaj nate ni'a ne'e, bexúe zrene' netu' ne chee Tito lawe' da bezrinbe' naga zúantu', <sup>7</sup> ne quegá tuze lawe' da bla'be', san cá'aqueze lawe' da bexúe zrenle lebe'. Gúzrebe' netu' ca dxezá lázrele lé'ele netu', ne bzenbe' netu' ca lu da baxache' zúale, ne ca gunne xue dxezele neda', na' chee le na' gubéle'edxeda'.

<sup>8</sup> Láqueze da bzuaja' chee bzua na le'e lu da baxache', quebe dxebezre lazra' chee da na'. Láqueze gudxezre lazra' nédxula gate guque be'eda'

bzua na le'e lu da baxache' tu chí'idau', <sup>9</sup> na'a dxebeda', quegá lawe' da guzúale lu da baxache', san lawe' da ben da baxache' na' bexíaje lázrele. Le'e bchaga laule da baxache' na' ca da bezaca ba lazre' Dios, na' da bzuaja' cheełe quebe bi da caleła ben na cheełe. <sup>10</sup> Da baxache' da dxuchaga laudxu ca da dxezaca ba lazre' Dios dxun na dxexebí'i lázredxu chee ladxu, na' quebe dxal-la' cuezre lázredxu chee na. Che xegá'anadxu lu da baxache' ca dxelún bénneache chee xezr la xu nigá, na' tu chí'ize gátedxu. <sup>11</sup> Le'e bchaga laule da baxache' da guca na cheełe ne chee da bzuaja', ne benle ca da dxezaca ba lazre' Dios, na' le nna'xque na'a:

Bzua na le'e gunne xue ca naca da guca,

ne ben na ble'ele ca da benle.

Bcha'a na le'e, ne bchebe na le'e.

Nadxa guzé lázrele lé'ele neda',

ne guzúale gudele xel-la zi' bénnea' ben da caleła na'.

Ca naca xúgute da nigá ble'ele quebe nabágale zria chee dul-la nigá. <sup>12</sup> Ca' naca na, gate bzuaja' cheełe da na', quebe guca na lawe' da gudxe'a gunne xue chee bénnea' bene' da caleła na', ne quegá lawe' da gudxe'a gunne xue chee bénnea' guca na chee', san bena' na chee gueque be'ele lau Dios ca dxele gunne xue cheentu'. <sup>13</sup> Chee le na' guca da bexúe zren na netu'.

Da naca tu da zrendxa, gubéle'entu' gate blé'entu' zúale Tito xel-la dxebe, lawe' da xúgutele le'e bexúe zrenle-be'. <sup>14</sup> Láqueze bca'ana szrena' le'e lau Tito, quebe dxedué'eda', lawe' da cáteze naca da li ca naca xúgute da bchálajlena' le'e, cá'aqueze guca da li da bena' gate bca'ana szrena' le'e lau Tito. <sup>15</sup> Nazrí'idxabe' le'e gate dxajsá lázrebe' ca benle xúgutele le'e, benle cáteze gunábabe' le'e, ne ca guzú' lu na'le lebe' lu duté xel-la dxexruj lazre', ne lu xel-la dxezrebe. <sup>16</sup> Dxebeda' lawe' da dxuxrén lazre' xánnia' le'e.

## 8

### *Da dxunézrujdxu du lázredxu*

<sup>1</sup> Na'a, bi bicha', dxaca lazra' guzenda' le'e ca ble'e lau xel-la zri'i lazre' chee Dios ne chee xúgute cue' bi chee Cristo zaj nnita' lu xezr la xu Macedonia. <sup>2</sup> Láqueze guledé' tu xel-la zi' zren gulebéle'equezne', na' láqueze zaj nácale'e benne' xache', du lazre' bulunézruje' da zaj de chee', na' belune' ca benne' gunní'a ca'. <sup>3</sup> Dxexecheba' du lazre' bulunézruje' xúgute da gulezéquene', ne da zrendxa ca da gulezéquene'. <sup>4</sup> Gulata' xuene' netu' güentu' le' lataj xelune' tu zren bénneache dxelácalene' bi bíchedxu ca' dxelexázejene'. <sup>5</sup> Belundxe' ca da guleza lázrentu', lawe' da belunna cuínaqueze', nédxula chee Xránadxu, na' gudé na' cheentu' netu', cáteze dxaca lazre' Dios. <sup>6</sup> Ca' naca na, guta' xúentu' Tito gusexuzre' gutupe' da gunézrujle le'e, da na' guzú lawe' dxutupe' gate nate. <sup>7</sup> Le'e dxúnle'ele ca naca da dxunle, ca dxejlí lázrele Dios, ne ca dxusédele bi chee Cristo, ne ca naca da naxéajni'ile, ne ca du lázrele dxunle xúgute, ne ca nazri'ile netu'. Ca' naca na, cá'aqueze dxal-la' gúnle'ele ca gunle zrin chawe' nigá.

<sup>8</sup> Quebe dxapa' le'e da nigá ca tu da dxenná be'eda' le'e. Dxaca lazra' nézele ca du lazre' dxelún xezícadxa bénneache zrin nigá, dxulunézruje' dumí, chee gueque be'ele che naca li lazre' xel-la zri'i lazre' chee. <sup>9</sup> Ba nézquezele ca naca xel-la zri'i lazre' chee Xránadxu Jesucristo. Naque' benne' gunní'a, san ben cuine' benne' xache' lawe' da bzri'ine' le'e, chee



gácale le'e benne' gunní'a lu da naca chee Cristo lawe' da gudé Le' lu xel-la xache'.

<sup>10</sup> Chee gaca da ba neza chee dxapa' le'e da dxéqueda' ca naca da nigá. Gudú iza guzú laule, quegá dxúnzele, san du lázrele dxunle da nigá, dxunézrujle dumí. <sup>11</sup> Na'a, le gúnteze na chee xexuzrte gunle na, gunle na du lázrele cáteze guzú laule dxunle nédxute, gunézrujle ca da du de chee. <sup>12</sup> Che da li dxaca lazre' tu benne' gunézruje', Dios xezaca ba lazre' na chee gunézruje' ca da nape', ne quegá dxenabe' da quebe napa bénnea'.

<sup>13</sup> Quebe dxenní'a da nigá chee xexácale le'e xache' chee gácalele benne' xula. <sup>14</sup> Naca na chee gápale lébete. Na'a nápane chee gunézrujle ca da dxexaxzrje benne' xula ca', na' xetú lasa xelapa benne' ca' da xelunne' chee gate bi xázrjele le'e. Caní gápale lébete <sup>15</sup> cáteze naxúaj na lu dizra' lá'azxa, dxenná na: Bénnea' nápalé'e quebe bi begá'ana chee', na' bénnea' nape' láteze quebe bi bexázrjene'.

### *Tito ne bi ljwezre' ca'*

<sup>16</sup> Xcalén Dios, Bénnea' bzue' lu lázrdau Tito sue' gunne xue chee le'e ca zua' neda'. <sup>17</sup> Guzú' lu ne'e da bsebaga' le', na' lawe' da zúaqueze' gunne xue chee le'e, ba bezé'e chee xide' xedajnné'e le'e lawe' da dxaca lázrequeze le'.

<sup>18</sup> Tu zren nen Tito nasél-lantu' tu bi bíchedxu, tu benne' dxelenné chawe' chee' xúgute cue' bi chee Cristo, ca naca zrin xrlátaje da nune' chee dizra' chawe' chee Cristo. <sup>19</sup> Quegá tuze da nigá, san xúgute cue' bi chee Cristo gulequ'e' bi bíchedxu níqueze chee sálene' netu' chee gácalene' netu' lu zrin nigá da dxuntu' dxutúbentu' dumí da gácale na benne' xache' ca' chee gaca ba Xránadxu, ne chee gulé'e lau du lázrele dxunle zrin chawe' nigá. <sup>20</sup> Caní dxuntu' chee quebe nu benne' si tizre' netu' ca dxuchínentu' dumí zrente nigá da dxulunezruj bi bíchedxu ca'. <sup>21</sup> Dxuntu' ba xuzre guntu' zrin nigá lu duté xel-la li lazre' cheentu', quegá tuze lau Xránadxu, san cá'anqueze lau xúgute bénneache.

<sup>22</sup> Tu zren nen benne' caní nasél-lantu' xetú bi bíchedxu, tu benne' da zánete lasa ba blé'eng' netu' du lazre' dxune' zrin chee Cristo, na' na'a du lázredxe' dxune' zrin nigá lawe' da dxuxrén lazre' le'e. <sup>23</sup> Che nu benne' guchebe le'e ca naca chee Tito, le xe'e nácabe' bi ljwezra', ne dxunbe' zrin tu zren nen neda' chee gunbe' zrin chee. Che nu guchebe le'e ca naca chee xezícadxa bi bíchedxu ca' zeajzrague' Tito, le xe'e zaj naque' benne' gulesel-la xúgute cue' bi chee Cristo, ne dxelape' ba lá'ana Cristo. <sup>24</sup> Chee le na', chee xeleneze xúgute cue' bi chee Cristo, le gulé'e le' nazri'ile le', na' naca cheentu' xucá'ana szrentu' le'e.

## 9

### *Da dxulunézruje' chee bi bíchedxu ca'*

<sup>1</sup> Ca naca chee dumí da gunézrujle chee bi ca' chee Cristo, quebe dxun na ba xen guzáaja' chee, <sup>2</sup> lawe' da ba nezda' ca dxaca lázrele gunle na. Dxezaca ba lazra' dxapa' bi bíchedxu zaj zre'e xezre ca' zaj nababa xezr la xu Macedonia, le'e zrale xezre ca' zaj nababa Acaya, gudú iza ba zúatequezle bi gunézrujle, na' benne' zante benne' Macedonia du lazre' dxulunézruje' lawe' da dxunézrujle le'e du lázrele. <sup>3</sup> Dxusel-la' bi bíchedxu caní chee quebe gaca tu da wen lazre' ca da chawe' da ba gunní'a ca dxunle le'e da nigá, ne chee súatezle bi gunézrujle, ca ba gucha' benne' caní, <sup>4</sup> ne che sa'aca bal-la benne' Macedonia tu zren nen neda' chee

quebe xelélé'eng' quebe zúatequezle le'e bi gunézrujle. Chela gaca na caní xedué'entu' lawe' da bxren lázrentu' le'e caní, na' da zrendxa ca dxal-la' xedué'ele le'e. <sup>5</sup> Chee le na' gúqueda' dxun na ba xen naba' bi bíchedxu ca' xelide' xedajlennabe' le'e nédxula, ne chee xelácalene' le'e gutúpale da guchebe lázrele nédxula gunézrujle. Ca' gaca na, dumí da gutúpale watá'queze na chee gulé'e na naca tu da dxaca lázrele gunle, ne quegá tu da gunne xúentu' le'e.

<sup>6</sup> Le nna'xque da nigá: Bénnea' dxaze' láteze, cá'anqueze láteze xezi'e, na' bénnea' dxázale'e, cá'anqueze xezí'ile'e. <sup>7</sup> Tu tu benne' dxal-la' gunézruje' cáteze da ba nune' lu lázrdawe', quegá ca tu benne' quebe dzezaca ba lazre', u xadíaze, lawe' da nazrí'i Dios benne' dxunézruje' duté xel-la dxebé. <sup>8</sup> Wazeque' Dios gúnna'le'e le'e ca naca xúgute da chawe', chee gata' chee'le xúgute da nachínele, ne gápale bi gunézrujle chee gunle xúgute zrin xrlátaje. <sup>9</sup> Naxúaj lu dizra' lá'azxa da dxenná na:

Du lazre' bnézruje' chee benne' xache' ca'.

Ca zaj naca zrin xrlátaje nune' xelegá'anatequeze na.

<sup>10</sup> Dios, Bénnea' dxunézruje' bínnedu ca' da dxázadxu, ne dxunne' da dxi'aj dxágudxu, gunne' le'e xúgute da nachínele chee gázale, na' gusegule' na chee gúnna'le'e queze na lina chee zrin chawe' da gunle. <sup>11</sup> Ca' gaca na, gáta'le'e chee'le xel-la gunní'a ca' chee séquele gunézrujle du lázrele, na' dumí na' sél-lale lu na'ntu' netu' gun na xelé bi bíchedxu ca' Dios: Xcalenu'. <sup>12</sup> Ca' naca na, gate gunézrujdxu bi bíchedxu ca' dumí nigá da gácale na le', quegá tuze dxunézrujdxu tu da dxelechínnene' san cá'anqueze dxundxu xelé'e Dios: Xcalenu'. <sup>13</sup> Xelúe lá'ane' Dios lawe' da da nigá dxunézrujle gulé'e na dxuzúale dizra' chee dizra' chawe' chee Cristo. Cá'anqueze xelúe lá'ane' Dios ne chee da gunézrujle du lázrele da gácale na le', ne xúgute cue' bi chee Cristo. <sup>14</sup> Chee le na' benne' ca' xelenabe' chee'le lau Dios, ne xelezrí'ile'eng' le'e ne chee xel-la zri'i lazre' zren da gulé'e lau Dios ne chee'le le'e. <sup>15</sup> Xcalén Dios lawe' da nunne' dxi'u tu da zrente da quebe séquedxu xuzájla'adxu.

## 10

*Xel-la dxenná bea napa Pablo lawe' da naque' gubáz chee Cristo*

<sup>1</sup> Neda', Pablo, dxuzenda' le'e da nigá ne chee xel-la dxexruj lazre', ne xel-la zri'i lazre' chee Cristo. Dxeleonné' naca' benne' zren lazre' gate zúalena' le'e, na' gate zua' zitu' nácale'a benne' snia. <sup>2</sup> Dxata' xueda' le'e quebe gunle, gate xida' xedajnná'a le'e, gaca' benne' snia nen bal-la benne' ládujla le'e, benne' ca' dxeleonné' dxuntu' zrin chee Cristo lu bela' dxenze cheentu', na' zúaqueza' tíl-laqueza' benne' ca'. <sup>3</sup> Láqueze nácantu' bela' dxen quebe dxedíl-lantu' lu bela' dxenze cheentu', <sup>4</sup> lawe' da quebe zaj naca chee bela' dxenze da dxuchímentu' lu wedíl-la cheentu', san zaj napa na xel-la waca chee Dios chee séquentu' guzrí'a xintu' da wal-la ca' chee nu na' dxedábaga' netu'. <sup>5</sup> Ca'an naca, dxuzrí'a xintu' da dxusebaga bénnea' dxi'u, ne da dxuzúe' lu xel-la dxucá'ana szren cuina chee quebe xelúnbea bénneache Dios. Xúgute da zaj xu'u lu xichaj bénneache dxuzúantu' lu na' Cristo chee xuluzúe' dizra' chee'. <sup>6</sup> Zúatequezentu' gudentu' xel-la zi' xúgute benne' ca' quebe dxuluzúe' dizra' chee' gate na' ba dxuzúale dizra' chee' du lázrele.

<sup>7</sup> Le'e dxenna'le benne' ca' cáteze da zaj naque' cúzreze. Che nu benne' dxéquene' da li naque' bi chee Cristo, dxal-la' gueque bé'eng' cáteze na'

naca le' bi chee Cristo, cá'aqueze nácantu' netu' bi chee Cristo. <sup>8</sup> Láqueze dxuchínedxada' ca dxal-la' guna' xel-la dxenná bea cheentu', quebe dxe-dué'eda' lawe' da nunna Cristo netu' xel-la dxenná bea na' chee séquentu' gusegúlantu' le'e lu da naca chee Dios, ne quegá chee guzria xintu' le'e. <sup>9</sup> Quebe dxaca lazra' guéquele le'e dxaca lazra' gucheba' le'e ne chee da dxuzúaja' chee. <sup>10</sup> Dxelenné' xiche ca' da dxusél-la' zaj naca na snia, ne wal-la, san néda'queza' naca' benne' nate ni'a na', ne ca dxuchálaja' quebe zácateca. <sup>11</sup> Bénnea' dxenné' da nigá dxal-la' gueque bé'ene' cáteze naca' lu dizra' dxuzúaja' gate ne zua' zitu', cá'aqueze gaca' lu da guna' gate na' súalena' le'e.

<sup>12</sup> Quebe dxexázrentu' gutil-le lébentu', u gulé'e cuínantu' ca zaj naca bal-la benne' ca' dxulucá'ana szren cuine'. Dxelune' tu da xálaze gate dxelenné'e ca da zaj nácaqueze', ne dxulutil-le lebe ljwezre'. <sup>13</sup> Quebe gucá'ana szren cuínantu' lu da quebe naca cheentu'. Dios naque' Bénnea' gulé'ene' netu' naga ze lau guntu' zrin, na' Le' benne' netu' lataj blantu' naga zrle le'e lu xezre Corinto. <sup>14</sup> Chee le' na' quebe dxedxúajntu' naga ze lau cheentu', cáteze gaca na che quebe ne zrintu' naga zrle le'e nédxute. Netu' nácantu' benne' nedxu blantu' naga zrle le'e núantu' dizra' chawe' chee Cristo. <sup>15</sup> Quebe dxucá'ana szren cuínantu' lu zrin da zaj nun benne' xula, san dxebeza lázrentu' cáteze gula xel-la dxeajlí lazre' chee, waca gúndxantu' zrin ládujla le'e gusegúlantu' xel-la dxeajlí lazre' chee, san guntu' na lu'ule da naca cheentu'. <sup>16</sup> Te na' dxebeza lázrentu' tédxantu' ca naga zrle chee guzénentu' bénneache zaj zre'e ga na' dizra' chawe' chee Cristo, ne quebe chú'untu' naga ba zaj nun zrin xezícadxa benne' ca', chee quebe gucá'ana szren cuínantu' lu da ba zaj nune'.

<sup>17</sup> Che nu benne' dxaca lazre' nu gucá'ana szrene', dxal-la' gucá'ana szrene' Xránadxu. <sup>18</sup> Bénnea' dxexedxúaj xrlátaje, quebe naque' benne' dxucá'ana szren cuine', san naque' bénnea' dxucá'ana szren Xránadxu le'.

## 11

*Ca naca chee Pablo, ne benne' gubáz ca' quebe nase-la Cristo le'*

<sup>1</sup> Le guchaga lau neda' chee nnia' late' da ca zeaje na. Ájateze naca na, le guchaga lau neda', <sup>2</sup> lawe' da dxé'le'a gunne xue chee le'e lu da nusebaga Dios neda', ne lawe' da ba nachebe lazra' chee gácale zru'ula Cristo, dxaca lazra' gudéa' le'e lau Le' ca tu nu'ula cúide'dau' du lazre' súalebe' benne' chee. <sup>3</sup> Ca ben be'la' gula na' guzí xe'ba' Eva nen xel-la neze cheeba', dxezreba' güele lataj nu si xe le'e, na' cuásale lu xichaj lázrdaule chee québedxa gácale du lázrele chee Cristo. <sup>4</sup> Le'e dxuchaga laule benne' ca' zá'aque' dxuluchálaje' chee tu Jesús, benne' nazrá' ca Bénnea' bzénentu' le'e chee Le', ne du lázrele dxezí' lu na'le tu be' da nazrá' ca Be' na' da ba guzí' lu na'le, ne dxezí' lu na'le tu dizra' da nazrá' ca naca dizra' chawe' da ba guzí' lu na'le. <sup>5</sup> Dxéqueda' quebe zaca' neda' látezdxa ca benne' gubáz zren ca', benne' ca' zéajle le'e. <sup>6</sup> Láqueze quebe gaca guchálaja' xrtándau', dxéajni'ida' da na' dxuchálaja' chee na, na' blé'entu' caní naca na lu xúgute da ba bentu'.

<sup>7</sup> ¿Bena' tu da caléla gate bzenda' le'e dizra' chawe' chee Cristo, ne quebe bi bhízruja' le'e, na' ben' cuina' dxexruj lazre' chee xegá'ana szrenle le'e? <sup>8</sup> Guca na ca gudawa' dumí chee xezícadxa cue' bi chee Cristo gate guzí'a da belunne' neda' chee bena' zrin ga zúale le'e. <sup>9</sup> Gate na' guzúalena' le'e, ne bxázrjeda', quebe bi guzí' lu na'a da naca chee, san bi

bíchedxu zá'aque' xęzr la xu Macedonia belunne' neda' ca da guchínneda'. Bena' ba xuzre quebe bi gunábeda' le'e, na' cá'anqueze guna'. <sup>10</sup> Lawe' da núnbe'a da li chee Cristo, quebe zua nu benne' naga nababa xęzr la xu Acaya gaca guzague' neda' chee québedxa gucá'ana szren cuina' chee da nigá dxuna'. <sup>11</sup> ¿Bizr chee na' dxennía' caní? ¿Naca na lawe' da quebe nazrí'ida' le'e? Nézqueze Dios nazrí'ida' le'e.

<sup>12</sup> Gúnqueza' ca dxuna' chee quebe gata' lataj chee benne' ca' dxelaca lazre' xulucá'ana szren cuine' lawe' da dxeléquene' dxelune' zrin cáteze dxuntu' netu'. <sup>13</sup> Benne' caní zaj naque' gubáz quebe nase-la Cristo. Dxelezi xę'e bénneache, ne dxululé'e cuine' ca gubáz chee Cristo. <sup>14</sup> Quebe naca da nigá da xebánedxu lawe' da Satanásqueze dxululé'e cuina na ca tu gubáz chee xabáa zue' lu xel-la naxaní' chee Dios, <sup>15</sup> na' chee le na' dxululé'e cuine' ca benne' dxelún da xrlátaje. Benne' caní xelebía xi'e ca ba naca chee benne' dxelún da caní.

*Da guzaca Pablo lawe' da naque' gubáz chee Cristo*

<sup>16</sup> Xecha lasa dxapa' le'e, quebe nu benne' dxal-la' guéquene' nadá xichaj lázrdawa'. Che ca'an dxéquele le'e, le gunna neda' lataj guchálajlena' le'e ca tu benne' nadá xichaj lázrdawe', chee gaca gucá'ana szren cuina'. <sup>17</sup> Quebe dxapa' le'e da nigá lu xel-la dxenná bea chee Xránadxu. Guchálaja' ca tu benne' nadá xichaj lázrdawe', nnia' tu da gucá'ana szren cuina'. <sup>18</sup> Lawe' da zaj zra' benne' zante dxulucá'ana szren cuine' lu da zaj naque' chee xęzr la xu nigá, cá'anqueze neda' gucá'ana szren cuina'. <sup>19</sup> Lawe' da nácale'ele benne' sina dxuchaga laule du lázrele benne' zaj nadá xichaj lázrdawe'. <sup>20</sup> Dxuchaga laule benne' ca' dxelexune' le'e ca benne' zaj nada'u, ne benne' ca' dxuluchínene' le'e, ne benne' ca' dxeleenná bé'ene' le'e, ne benne' ca' dxuluzúe' le'e chalá'ala, ne benne' ca' dxelegape' xraga laule. <sup>21</sup> Láqueze dxedué'eda' dxennía' da nigá, quebe guca' benne' dxechugu lazre' chee guna' ca dxelún xezícadxa benne'. Na'a gaca' lazre' dxugu guna' caní.

Ba dxelechugu lazre' benne' xezícadxa dxulucá'ana szren cuine'.

Cá'anqueze neda' xechugu lazra' guna' na, láqueze naca tu da ca zeaje da dxennía'.

<sup>22</sup> ¿Zaj naque' benne' hebreo?

Cá'anqueze neda' naca' benne' hebreo.

¿Zaj naque' benne' Israel? Cá'anqueze neda'.

¿Zaj naque' zri'ine zre sua Abraham? Cá'anqueze naca' neda'.

<sup>23</sup> ¿Zaj naque' wen zrin chee Cristo?

Nácadxa' neda' wen zrin chee' ca benne' ca', lácala dxuchálaja' ca tu benne' nadá xichaj lázrdawe' gate dxennía' da nigá.

Ba bęndxa' zrin ca benne' ca'.

Ba buluzálajdxa bénneache neda' ca nu bzálaj benne' ca'.

Ba gulegu'udxa bénneache neda' lizre xia ca belune' chee benne' ca', na' zane' lásate ba guzúa' lu da stębe chee xel-la gute.

<sup>24</sup> Gazxu' lasa ba belúe benne' judío ca' neda' xide chęnnu dxua weaj.

<sup>25</sup> Chunna lasa beline' neda' xaga. Tu lasa belú'e neda' xiaj.

Chunna lasa guxaze da dxedá lawe' nísadau' da xu'a lu nisa.

Tu lasa, tu zra tu xela guxu'a lu nísadau'.

<sup>26</sup> Zane' lásate guxu'a neza, ne guzúa' lu da stębe:

Chee xegu ca', ne chee gubán ca'.

Cheę benne' waláwr chia' ca', ne cheę benne' zitu' ca'.  
Guzúa' lu da stebe lu xezre, ne le'e xixre', ne lu nísadau',  
ne ládujla benne' wen lazre' dxelenné' zaj naque' bi bíchedxu.

<sup>27</sup> Benle'a zrin, ne guzúa' lu da zi' da xa'.

Zane' lásate quebe gusia' dxela.

Gudúnle'a, ne gubílele'eda', na' zane' lásate bena' gubasa.

Catite bexaga', ne bexáwrjeda' zra lana' gacua'.

<sup>28</sup> Da zrendxa ca da caní, ne xezícadxa da guzraca'.

Xúgute zra dxéqueda' zi' lawe' da zua' gunne xue cheę  
xúgute cue' bi cheę Cristo.

<sup>29</sup> Che nu benne' nate ni'a ne'e lu xel-la dxeajlí lazre' cheę',  
cá'anqueze neda' dxéqueda' nate ni'a ná'aqueza'.

Che nu benne' dxelune' dxeajchaze', néda'queze dxaca' tul-la.

<sup>30</sup> Che dxun na ba xen gucá'ana szren cuina',

gucá'ana szren cuina' cheę da ca' dxululé'e na nate ni'a na'a.

<sup>31</sup> Dios, Xra Xránadxu Jesucristo, Bénnea' naca cheę' güe lá'atequezdxu  
Le', nézene' dxennía' da li. <sup>32</sup> Gate guzúa' xezre Damasco, benne' wnná  
bea na' dxune' zrin cheę wenná bea Aretas bzre'e benne' dxuluxúe' dxa  
xu'u cheę xezre na', cheę xelexe' neda'. <sup>33</sup> Na' bi bíchedxu ca' bululetje'  
neda' tu lu xcuite xia ga dxu'u lení' cheę xu'u lu ze'e da naxechaj na xezre  
na'. Ca' guca na, gulá' lu na' benne' ca'.

## 12

### *Da ca' Dios blé'eng' Pablo*

<sup>1</sup> Da li quebe dxal-la' gucá'ana szren cuina', san guchálaja' cheę da ca'  
blé'e Xránadxu neda', ne da ca' blé'eda' ca naca cheę'. <sup>2</sup> Neda', ca tu benne'  
dxéajle cheę Cristo, ba zeaj chidá' iza guché Dios neda' xabáa guxunne'.  
Quebe nezda' che guxá'a na' dutę bęla' dxen chia', u che cabí. Dios nézene'.  
<sup>3</sup> Nezda' néda'queza', che zua' lu bęla' dxen chia', u che cabí, quebe nezda',  
tuzę Dios nézene'. <sup>4</sup> Guché Dios neda' tu xabáa cheę', naga benda' dizra'  
bagache da quebe naca cheę bénneache xelenné' ca zaj naca na. <sup>5</sup> Waca  
gucá'ana szrena' tu benne' caní, san quebe gucá'ana szren cuínaqueza', che  
quebe naca na cheę xel-la nate ni'a na' chia'. <sup>6</sup> Láqueze che gaca lazra'  
gucá'ana szren cuina' quebe gaca na tu da xálaze, lawe' da gaca na tu da  
li. Quebe guna' na cheę quebe nu guéquene' nácadxa' ca da gaca lé'eng'  
naca', u ca da gaca xenne' da dxennía'.

<sup>7</sup> Da caní blé'e Xránadxu neda' gulaca na da xebánele'edxu, na' cheę  
quebe gucá'ana szren cuina', guca chia' ca tu xeche' naxaze lu bęla' dxen  
chia' da dxuchine Satanás cheę guzalaj na neda'. <sup>8</sup> Chunna lasa guta'  
xueda' Xránadxu gucuase' da dzezaca'. <sup>9</sup> Xránadxu guzre' neda': "Xela zri'i  
lazre' chia' naca na dutę da dxechínenu' lawe' da dxulé'edxa lau xel-la  
waca chia' nen benne' nate ni'a ne'e." Ca' naca, dxebeda' lawe' da nate  
ni'a na'a cheę gulé'e lau lu bęla' dxen chia' xel-la waca cheę Cristo. <sup>10</sup> Cheę  
le' na' dxebeda' ca naca xel-la nate ni'a na' chia', ne ca naca dca' dxexáwrjeda',  
ne gate zaj nau zi' xuzre' bénneache neda', ne ca naca da ba xa' ca' da dxedéa' ne cheę  
Cristo, lawe' da gate nátedxa ni'a na'a, dxéqueda' nácadxa' benne' wál-la.

### *Pablo dxe'e gunne xue cheę bi cheę Cristo zaj zře'e Corinto*

<sup>11</sup> Guca' ca tu benne' nadá xichaj lázrdawe' gate bca'ana szren cuina'  
caní, san le'e benle bena' na. Le'e na' dxal-la' gucá'anale neda' szren lawe'

da quebe zaca' látezdxá ca benne' gubáz zren ca', benne' ca' dxéajlele, láqueze quebe bi zaca' neda'. <sup>12</sup> Zrin bena' ládujla le'e lu duté xel-la zren lazre' chia' ble'e na da li naca' gubáz chee Cristo ne chee da dxelunna bea na, ne xel-la waca ca' chee xabáa, ne da ca' dxexebánedxu. <sup>13</sup> ¿Dxéquele le'e nácale látezdxá blau ca xezícadxa cue' bi chee Cristo lawe' da guzú' lu na'a da belunne' chia', na' quebe guzú' lu na'a da zaj naca chee? Le gunite lau neda' che naca tu da calela quebe benna' le'e lataj bi gúnnale chia'.

<sup>14</sup> Na'a ba zua' xida' xedajnná'a le'e da guxunne' lasa, ne quebe si' lu na'a da zaj naca na chee. Quebe dxexílaja' da nápaie, san lé'equeze, lawe' da dxal-la' xulucude xruze xrna' dumí da xulunézruje' zrí'ine', ne quegá xulucude zrí'ine' da xulunézrujbe' xra xrnabe'. <sup>15</sup> Du lazra' guchíneda' dumí chia' chee gaca chawe' chee bénne'du xu'ule, láqueze dxéqueda' gate nazrí'idxeda' le'e, látezdxá nazrí'ile le'e neda'.

<sup>16</sup> Bal-la benne', láqueze zaj nézene' quebe bi guzú' lu na'a da zaj naca na chee, dxelenné' gudél-la' le'e lu da wen lazre'. <sup>17</sup> ¿Guzú' xe'a le'e lu na' tu benne' gusel-la' chee? <sup>18</sup> Guta' xueda' Tito xídabe' xedajnná'abe' le'e, ne gusel-la' nen lebe' xetú' bi bíchedxu. ¿Guzú' xe Tito le'e? ¿Quebe bentu' tuze ca bentu' ládujla le'e neda', ne Tito, na' nen tuze Be' Lá'azxa?

<sup>19</sup> Bi bicha' nazrí'ite lazra', ¿dxéquele dxucá'ana cuínantu' xrlátaje laule le'e? Dxuchálajlentu' le'e lau Dios, ne lu La Xránadxu Jesucristo. Xúgute da caní dxennantu' chee gúlale lu da naca chee Dios. <sup>20</sup> Dxezreba' gate xida' xedajnná'a le'e, walé'eda' le'e quebe nácale cáteze dxaca lazra' gácale, na' le'e walé'ele neda' quebe naca' da dxaca lázrele gaca'. Dxezreba' dxedíl-lalele ljwézrele, ne nácale xa lazre', ne dxezrá'ale ljwézrele, ne nácale zide lazre', ne nácale wetupa dizra' bizruj, ne dxezí tízrale ljwézrele, ne dxucá'ana szren cuínale, ne dxunle da calela. <sup>21</sup> Dxezreba' gate xida' xedajnná'a le'e, Dios guné' xedué'eda' ne chee le'e, da gucuezre na neda' ne chee zánele le'e, benne' ca' dxelúntequeze' dul-la, ne quebe dxulusane' dxeluné' da sban, ne da dxulucá'ana sban ljwezre', ne da calela da tu dxelúnzqueze'.

## 13

### *Dizra' bzebe*

<sup>1</sup> Da nigá naca na da guxunne' lasa xida' xedajnná'a le'e. Xúgute dxulé'e lawe na naca na da li ne chee dizra' chee chupa u chunna benne' xelexechebe'. <sup>2</sup> Benne' ca' belune' dul-la nédxula, ne xúgutele le'e, dxácate ne zua' zitu' naga zrle, dxuzenda' le'e da xula ca da gucha' le'e gate bedajnná'a le'e da gudxupe' lasa, che xida' xedajnná'a le'e da xula quebe gudéa' cá'aze ca da ba nunle. <sup>3</sup> Nadxa lé'ele da gulé'e na dxenné Cristo lu dxu'a neda', na' Le' quebe nate ni'a ne'e lu da guné' chee, san naque' benne' wal-la ládujla le'e. <sup>4</sup> Da li gudé'e xaga béguaj ca tu benne' nate ni'a ne'e, san naca bané' ne chee xel-la waca chee Dios. Cá'anqueze netu' nate ni'a nantu' ca da guca chee', san lawe' da nácantu' tuze nen Le' gaca bantu' ne chee xel-la waca chee Dios chee guntu' zrin chee le'e.

<sup>5</sup> Le guxúe xanne' cuínale chee gueque be'ele che da li dxeajlí lázrele Cristo. Le guxúequeze cuínale. ¿Quebe dxeque be'ele zua Jesucristo xichaj lázrdaule, che da li dxeajlí lázrele Le'?' <sup>6</sup> Dxebeza lazra' gueque be'ele quebe naca' neda' benne' wen lazre' lu da naca' chee Cristo. <sup>7</sup> Dxenábantu' lau Dios chee quebe bi da calela gunle, quegá chee gulé'entu' dxennantu' da li, san chee gunle le'e da xrlátaje, láqueze

dxéquele le'e quebe dxennantu' da li. <sup>8</sup> Quebe bi gaca guntu' da dxedábaga na da li, san tuze da dxácale na da li. <sup>9</sup> Chee le na' dxebentu' gate nate ni'a nantu', che le'e nácale benne' wal-la, na' nábaquezentu' Dios chee gácale dutę da dxal-la' xelaca bi chee Dios. <sup>10</sup> Dxuzúaja' chee da nigá nédxula ca xida' xedajnná'a le'e, chee quebe gun na ba xen gate xida', gácale'a benne' snia ca guchíneda' xel-la dxenná bea chia', da benna Xránadxu neda' chee séqueda' gusegula' le'e lu da naca chee Dios, ne quegá chee guzríia xi'a le'e.

<sup>11</sup> Na'a, bi bicha', le sua xel-la dxebé. Le gaca dutę da dxal-la' xelaca bi chee Dios. Le xue zren ljuwézrele. Le gaca tuze tule xetule, ne le sua xel-la dxebeza zri lazre', na' Dios, Bénnea' dxunne' dxi'u xel-la dxebeza zri lazre', ne nazrí'ine' dxi'u súalęne' le'e. <sup>12</sup> Le gugapa diuzre ljuwézrele tule xetule, ne le gunida ljuwézrele. <sup>13</sup> Xúgute bi bíchedxu, bi chee Cristo dxulugape' le'e diuzre.

<sup>14</sup> Dxaca lazra' gucá'ana Xránadxu Jesucristo le'e chawe', ne zri'i Dios le'e, ne sua tuze Be' Lá'azxa nen le'e. ¡Ca'an gaca na!

## DIZRA' BZUAJ SAN PABLO CHEE BI CHEE CRISTO ZAJ ZRE'E XEZR LA XU GALACIA

*Dizra' da bzuaj Pablo chee bi chee Cristo zaj zre'e xezr la xu Galacia*

<sup>1</sup> Neda', Pablo, naca' gubáz chee Cristo. Quebe gulesel-la bènneache neda', ne quegá buluzúa bènneache neda' gaca' gubáz. Caní bènqueze Jesucristo chia', ne Xradxu Dios, Bènnea' bsebane' Jesús ládujla benne' gate. <sup>2</sup> Xúgute benne' bíchedxu zráleñe' neda' zaj naque' neda' tuze. Neda' dxuzúaja' dizra' nigá chee xúgute cue' benne' bíchedxu zaj zre'e xezre ca' zaj nnita' xezr la xu Galacia. <sup>3</sup> Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'. <sup>4</sup> Jesucristo bzane cuine' chee gutie' ne chee dul-la da nabágadxu, chee bselé' dxi'u lu da naca chee xezr la xu nigá da naca na da calela. Bene' da guca lazre' Xradxu Dios. <sup>5</sup> ¡Gaca báqueze Dios chadía chacanna! ¡Ca'an gaca na!

*Quebe de xetú dizra' chawe' chee Dios*

<sup>6</sup> Dxexebánele'eda' cheele le'e lawe' da dxebéaj xíchajtēle Dios, Bènnea' gunné' le'e chee si' lu na'le da dxunna Cristo, na' dxezi' lu na'le tu dizra' nazrala ca naca dizra' chawe' chee Cristo. <sup>7</sup> Da li quebe bi de xetú dizra' chawe', san zaj zra' bal-la benne' dxelún zréajene' le'e, ne dxelaca lazre' xuluchuque' dizra' chawe' chee Cristo. <sup>8</sup> Che nu benne' dxuzenne' le'e xetú dizra' da nazrala ca naca dizra' chawe' da ba bzénentu' le'e, dxenaba' lau Dios cue'e bènnea' de', lácala naca neda', u naca tu gubáz chee xabáa. <sup>9</sup> Báchequeze bzenda' le'e, ne dxuzenda' le'e da xula, che nu benne' guzenne' le'e tu dizra' da nazrala ca naca dizra' chawe' da ba guzi' lu na'le, dxenaba' lau Dios cue'e bènnea' de'.

<sup>10</sup> Gate dxennia' da nigá, ¿Dxaca lazra' xegá'ana' xrlátaje lau bènneache, u che lau Dios? ¿Dxaca lazra' guna' da xelezaca ba lazre' bènneache? Che ca'an dxaca lazra' guna' da dxelezaca ba lazre' bènneache, quebe naca' wen zrin chee Cristo.

*Ca bexaca Pablo gubáz chee Cristo*

<sup>11</sup> Dxuzéajni'ida' le'e, bi bicha', dizra' chawe' da dxuzenda' bènneache, na' quebe naca na tu da gulaj na lu xichaj lázrdau bènneache. <sup>12</sup> Quebe nu benne' benne' na neda', ne quegá nu benne' bsédenē' neda' le na, san Léqueze Jesucristo bzenne' na neda'.

<sup>13</sup> Ba bènquezle ca bēna' neda' nédxula gate na' nazí' lu na'a xel-la benne' xudau' chee judío ca', ca gudáu zi' xuzra' bi chee Dios zaj nácabe' bi chee Cristo, ne ben zi' lazra' guzría xi'a-be'. <sup>14</sup> Lu xel-la benne' xudau' chee judío ca', neda' ba bzrué'edxeda' ca xúgute bi waláxr chia', bi ljwezra' ca', lawe' da be lázredxa' gapa' ca da xjácále xra xrtawa' ca'. <sup>15</sup> Dios guqu'é neda' nédxula gate za gálaja', na' lu xel-la zri'i lazre' chee gunné' neda'. Nadxa gate guca lazre' Le', <sup>16</sup> blé'ene' neda' Zrí'ine', chee guzenda' benne' ca' quebe zaj naque' judío ca naca chee Zrí'ine'. Gate guca da nigá, quebe nu benne' gunábeda', <sup>17</sup> ne quebe guxá'a Jerusalén cheajnábeda' benne' zaj naque' gubáz chee Cristo nédxudxa ca neda'. Guxá'a naga nababa xezr la xu Arabia, na' gudé na' bezrina' xezre Damasco.



<sup>18</sup> Gudé chun iza guxá'a Jerusalén, chee xeajchálajlena' Pedro, na' begá'analena' le' xta' gubizra. <sup>19</sup> Quebe nu ble'eda' xetú benne' gubáz chee Cristo, san tuze Jacobo, bi biche Xránadxu. <sup>20</sup> Ne chee La Dios dxapa' le'e, da li naca da nigá dxuzúaja' chee le'e.

<sup>21</sup> Ca gudé na' guxá'a xezre ca' zaj nababa xezr la xu Siria, ne xezre ca' zaj nababa xezr la xu Cilicia. <sup>22</sup> Benne' bíchedxu ca', bi chee Cristo zaj zre'e xezr la xu Judea quebe zaj nunbe'e neda'. <sup>23</sup> Belénzené' nu dxenná: "Bénnea' nédxula gudáu zi' xuzre' dxi'u, na'a dxuchálaje' dizra' chawe' chee xel-la dxeajlí lazre' Cristo, da na' guca lazre' guzríia xi'e nédxute." <sup>24</sup> Na'a dxelúe lá'ane' Dios ca da belenne' ca naca chia'.

## 2

### *Benne' gubáz ca' dxelezí' lu ne'e Pablo*

<sup>1</sup> Ca gudé chidá' iza guxá'a xecha lasa Jerusalén nen Bernabé, na' ben bi Tito neda' tu zren. <sup>2</sup> Guxá'a na' lawe' da ble'e Dios neda' dxal-la' cha'a na'. Na' cheézela bchálajlena' benne' ca' zaj naque' blau ládujla bi chee Cristo, ne bzenda' le' dizra' chawe' da dxuchálaja' ládujla benne' ca' quebe zaj naque' judío. Bena' caní chee nezda' quebe guca dácheze zrin da ba bēna', ne da dxuna'. <sup>3</sup> Gulezí' lu ne'e zrin nuna', na' quebe nu gunná be'e Tito, bi zálebe' neda', chugu lu belá' cheebe' da gulé'e na nácabe' bi chee Dios, lácala quebe nácabe' judío. <sup>4</sup> Bal-la benne' quebe zaj naque' du lazre' benne' bíchedxu, benne' gulu'e ládujla dxi'u lu da wen lazre', gulaca lazre' chugu da gulé'e na lu belá' chee Tito. Benne' caní gulu'e ládujla dxi'u chee xelenézene' ájala xelegúe' lataj da nazidxu lu na' Jesucristo, chee xuluxuzúe' dxi'u ca benne' zaj nada'u lu da bdxixruj bea Moisés. <sup>5</sup> Ne chíteze quebe bentu' le' lataj xelegú'u xel-le' netu' lawe' da guca lázrentu' xegá'analē le'e da li dizra' chawe' chee Cristo.

<sup>6</sup> Benne' ca' zaj naque' blau quebe bi da cube bulusebague' netu'. Da zaj naque' quebe bi naca na chia' lawe' da quebe xuchí'a Dios ca da nalá' láweze chee bēneache. <sup>7</sup> Quebe bi bulusebague' neda', lawe' da belexúnbe'e Diósqueze bsebage' neda' guzenda' benne' ca' quebe zaj naque' judío dizra' chawe', cáteze bsebage' Pedro guzenne' benne' judío ca' dizra' chawe'. <sup>8</sup> Léqueze Dios na', Bénnea' bzue' Pedro gubáz chee' ládujla benne' judío ca', cá'aqueze bzue' neda' gaca' gubáz chee' ládujla benne' quebe zaj naque' judío.

<sup>9</sup> Chee le' na', Jacobo, ne Pedro, ne Juan, benne' zaj naque' blaudxa, belexúnbe'e ben Dios neda' culuén nigá, na' gulezí' lu ne'e neda', ne Bernabé, na' belune' tuze dizra' cheajzentu' netu' benne' ca' quebe zaj naque' judío dizra' chawe', dxácatē na' le' xuluzenne' na benne' judío ca'. <sup>10</sup> Túteze da gulénábene' netu' xexache lázrentu' benne' xache' ca', da na' dxue lazra' dxuna'.

### *Pablo dxedil-le' Pedro lu xezre Antioquia*

<sup>11</sup> Gate bla' Pedro xezre Antioquia gudil-la' le' caníqueze lawe' da gunegue lazre'. <sup>12</sup> Nédxute gudágulene' benne' ca' quebe zaj naque' judío cadxa belelá' bal-la benne' gusel-la Jacobo. Nadxa bebigue'e chalá'ala, ne bsane' québedxa gudágulene' benne' ca' lawe' da bzrebe' judío ca', benne' ca' zaj nadxugu lu belá' chee' da dxulé'e na. <sup>13</sup> Nadxa xezícadxa judío ca' zaj naque' bi chee Cristo belune' tu zren Pedro lu da dxune' láweze. Caní belune', na' ca' bente Bernabé tu zren benne' ca' lu da na' dxelune' láweze. <sup>14</sup> Gate ble'eda' neda' quebe dxelune' cáteze naca chee da li chee dizra'

chawe' chee Cristo, na' gucha' Pedro lau xúgutę benne' ca': Lue' nacu' judío, na' benu' ca tu benne' quebe naque' judío, ne quebe benu' ca tu benne' judío. ¿Bizr chee na' dxenná be'enu' benne' quebe zaj naque' judío xelune' ca dxelún benne' judío?

*Benne' judío xelelé' che dxeajlí lazre' Cristo ca dxaca chee xezícadxa benne'*

<sup>15</sup> Cá'anqueze gucha'-ne': Dxi'u nácadxu benne' judío lawe' da nálajdxu ca', ne quebe nácadxu benne' dul-la ca benne' zaj nababa xezícadxa xęzr la xu ca'. <sup>16</sup> Nézedxu netú benne' quebe xegá'ang' xrlátaje lau Dios lawe' da nune' da bdxixruj be'e Moisés, san tuze che dxeajlí lazre' Jesucristo. Chee le na' cá'anqueze dxi'u dxeajlí lázredxu Cristo chee xegá'anadxu xrlátaje lau Dios ne chee xel-la dxeajlí lazre' cheedxu Cristo, ne quegá lawe' da bęndxu ca nadxixruj bea na. Netú benne' quebe xegá'ang' xrlátaje lau Dios lawe' da nune' da nadxixruj bea na.

<sup>17</sup> Na'a, che dxi'u dxuxrén lázredxu nagá'anadxu xrlátaje lau Dios ne chee Cristo, ne che zua da dxulé'e na ne nácadxu benne' dul-la, ęnnadxu Cristo dxunne' dxi'u lataj gundxu dul-la lawe' da québedxa dxenná be'e da bdxixruj be'e Moisés dxi'u? ¡Cabata! <sup>18</sup> Che dxuchínnaja' tu, na' che te na' xexuna' na, na' nabaga' zria. <sup>19</sup> Ba naca' ca tu benne' gate lu da naca chee da nadxixruj bea na. Da nadxixruj béaqueze ble'e na neda' naca' ca tu benne' gate, chee gaca bana' ne chee da nun Dios. <sup>20</sup> Ba naca' ca tu benne' gate lawe' da naca chia' ca naca chee tu benne' gudá' xaga béguaj tu zren nen Cristo. Chee le na', québedxa naca bana' neda'. Cristo naca banę' lu xichaj lázrdawa'. Xel-la nabán da napa' lu beła' dxen chia', napa' na ne chee xel-la dxeajlí lazre' chia' Zri'ine Dios, Bénnea' bzri'ine' neda', ne bzane cuine', gutie' waláz chia' neda'. <sup>21</sup> Quebe dxaca lazra' guzúa' chalá'ala xel-la zri'i lazre' chee Dios. Che nu benne' gaca xegá'ang' xrlátaje lau Dios lawe' da nune' da nadxixruj bea na, na' dácheze guca da bęn Cristo gate gutie'.

### 3

*Dxezidxu Be' Lá'azxa ne chee xel-la dxeajlí lazre'*

<sup>1</sup> Bi bicha', zrale Galacia, nácale le'e benne' xala ca'. ¿Zua nu benne' dxezi xe'e le'e chee québedxa guzúale dizra' chee da li? Ba blé'entu' le'e caníqueze Jesucristo, ca gudé'e le'e xaga béguaj. <sup>2</sup> Le xęxque neda': ¿Guzile Be' Lá'azxa lawe' da bęnle da bdxixruj be'e Moisés, u lawe' da guxéajlele chee da bęnnele? <sup>3</sup> ¿Ájala chee na' nácale benne' xala? ¿Dxéquele gunle gácale dutę da na' guzú laule gácale ne chee Be' Lá'azxa? <sup>4</sup> ¿Dácheze gudele zánete xel-la zi' ca'? Dxaca lazra' quebe guca na níteze. <sup>5</sup> Gate Dios dxunne' le'e Be' Lá'azxa chee', ne dxunę' xel-la waca ca' chee xabáa ládujla le'e, ¿dxunę' na lawe' da dxunle ca nadxixruj bea na, u lawe' da guxéajlele chee dizra' chawe' da bęnnele?

<sup>6</sup> Abraham guxeajlí lazre' Dios, na' Dios guzí' lu ne'e da nigá ca tu da bca'ana le' xlátaje. <sup>7</sup> Chee le na' dxal-la' nézele, benne' ca' da li zaj naque' zri'ine zre sua Abraham zaj naque' benne' dxeleajlí lazre' Dios. <sup>8</sup> Naxúaj na lu dizra' lá'azxa ca naca da nigá. Lawe' da neze Dios nédxutę gucá'ang' xlátaje benne' quebe zaj naque' judío, benne' xeleajlí lazre' Le', na' guzre' Abraham nédxutę dizra' chawe' nigá, gunné': "Gaca chawe' chee benne' dutę xęzr la xu ne chiu' lue'." <sup>9</sup> Ca'an naca, dxaca chawe' chee benne' dxeleajlí lazre' Dios tu zren nen Abraham, bęnnea' guxeajlí lazre' Dios.

<sup>10</sup> Benne' ca' dxuluxrén lazre' zaj nagá'ane' xrlátaje lau Dios lawe' da zaj nune' ca da nadxixruj be'e Moisés zaj xu'e de' lawe' da naxúaj lu dizra' lá'azxa da dxenná na: Zaj xu'u de' xúgute benne' quebe dxelúnqueze' xúgute da nadxixruj bea na, da na' naxúaj na lu xiche lá'azxa. <sup>11</sup> Dxunna bea na netú benne' quebe xegá'ane' xrlátaje lau Dios lawe' da nune' da nadxixruj bea na lawe' da naxúaj lu xiche lá'azxa da dxenná na: Bénnea' nagá'ane' xrlátaje lau Dios gata' chee' xel-la nabán li lazre' che dxeajlí lazre' Dios. <sup>12</sup> Bénnea' dxune' ca bdxixruj be'e Moisés quebe dxune' na ne chee' xel-la dxeajlí lazre' chee' lawe' da naxúaj da dxenná na: Benne' dxune' xúgute da caní gaca bané' ne chee' le na.

<sup>13</sup> Cristo bselé' dxi'u lu de' da xu'u nu quebe dxun da nadxixruj bea na lawe' da guxú'uqueze' de' waláz cheedxu cáteze naxúaj lu dizra' lá'azxa da dxenná na: Xu'u de' bénnea' de'e le'e xaga. <sup>14</sup> Da nigá guca na chee' gaca gun Dios xrlátaje benne' ca' quebe zaj naque' benne' judío, da na' guchebe lazre' guné' lau Abraham ne chee' Jesucristo, na' chee' si' lu nnadxu xúgutedxu Be' Lá'azxa ne chee' xel-la dxeajlí lazre' cheedxu ca da guchebe lazre' Dios.

*Da naca chee da nadxixruj bea na, ne da naca chee da guchebe lazre' Dios*

<sup>15</sup> Bi bicha', dxulé'eda' le'e ca da dxaca chee bénneache. Gate tu benne' dxune' tu xel-la wezría, ne ba bzuajte' láqueze' lawe na, netú benne' quebe gaca guchínnaje' na, ne quebe bi gaca gudé'e chee na. <sup>16</sup> Dios guchebe lazre' da guné' chee Abraham, ne chee zri'ine zre sue'. Quebe dxenná na: Chee zri'ine zre sue' ca', da naca na chee benne' zan, san dxenná na: Chee zri'ine zre su', da naca na chee tuze benne', bénnea' naque' Cristo. <sup>17</sup> Da dxennia' naca na da nigá: Dios bene' tu xel-la wezría nen Abraham, ne bca'ana chawe' na. Chee le na', da bdxixruj be'e Moisés da bla' na ca gudé tapa gaxúa chí dxua iza quebe gaca guchínnaj na xel-la wezría na', u xucá'ana na dácheze da guchebe lazre' Dios. <sup>18</sup> Che dxezidxu da dxunna Dios che dxundxu ca da bdxixruj be'e Moisés, quebe naca na tu da nachebe lazre' Dios, san da li Dios guchebe lazre' gunézruje' na cá'aze chee Abraham.

<sup>19</sup> Na'a xca', ¿bizra dxun da bdxixruj be'e Moisés? Dios bnézruje' da na' gudé na' chee gulé'e na ca naca xtul-la bénneache cadxa xelá' zri'ine zre sua Abraham na', Bénnea' guchebe lazre' Dios guné' da xrlátaje chee'. Dios gusel-le' da gunná bé'ene' lu na' gubáz chee xabáa chee', na' Moisés guque' benne' dxudé dizra' cheen. <sup>20</sup> Quebe dxun na ba xen nu benne' gudé dizra' gate naca na chee tuze benne', na' Dios naque' tuze, Bénnea' guchebe lazre' chee Abraham ca da guné'.

*Da dxun da bdxixruj be'e Moisés*

<sup>21</sup> ¿Nnadxu dxedábaga da bdxixruj be'e Moisés da na' guchebe lazre' Dios? ¡Cabata! Che da nadxixruj bea na da bnezruj Dios gaca gunna na xel-la nabán chee bénneache, na' gaca xegá'ana xrlátaje lau Dios tu benne' che guné' ca da nadxixruj bea na na'. <sup>22</sup> Dxenná na lu dizra' lá'azxa, xúgute bénneache zaj nabague' dul-la chee gaca xezezí' lu ne'e da guchebe lazre' Dios gunne' benne' ca' xeaeajlí lazre' Jesucristo.

<sup>23</sup> Nédxudxa ca bzrin zra gaca nu cheajlí lazre' Cristo, ne chee da nadxixruj bea na, xúgutedxu, benne' judío, gúcadxu ca benne' zaj xu'e lizre xia, lawe' da xadíaze bendxu ca dxenná da nadxixruj bea na, na' gulézadxu ca bzrin zra guca cheajlí lázredxu Cristo. <sup>24</sup> Da nadxixruj bea

na gunná be'e na dxi'u, ca dxun tu benne' dxusegule' bidau' chee benne' xula cadxa bzrin zra bla' Cristo, chee xegá'anadxu xrlátaje lau Dios gate guxeajlí lázredxu Cristo. <sup>25</sup> Na'a lawe' da ba bzrin zra gaca cheajlí lázredxu Cristo, québedxa xú'udxu lu na' da nadxixruj bea na da naca na cheedxu ca tu benne' dxusegule' bidau'.

<sup>26</sup> Xúgutele na' dxeajlí lázrele Jesucristo nácale tuze nen Le'. Chee le na' nácale bi chee Dios. <sup>27</sup> Xúgutele le'e na' gudxúale nisa chee gácale tuze nen Cristo, Le' naque' chee ca tu ladxe' nácale. <sup>28</sup> Québedxa dxelé'e Dios le'e ca benne' judío, u benne' quebe naque' judío, u ca benne' nada'u, u benne' quebe nada'u, u ca benne' biu, u nu'ula. Dxelé'ene' le'e, naca xúgutele ca tuze bel-la' dxen lawe' da nácale tuze nen Jesucristo. <sup>29</sup> Che nácale bi chee Cristo, da li nácale zre sua Abraham, na' gaca chee da guchebe lazre' Dios guné'.

## 4

<sup>1</sup> Da dxaca lazra' nnia' naca na da nigá: Dxácatę ne naca bidau' bi na' gaca cheebe' da naca chee xrabe', nácabe' ca bi nada'u xu'ube' lu na' xránabe', lácala da li gácabe' xrane xúgute da de lizre xrabe'. <sup>2</sup> Xu'ube' lu na' benne' dxulusédené'-be', ne lu na' benne' ca' xu'u lu ne'e da naca cheebe', cadxa zrin zra gulé'e xrabe' da li nácabe' zrí'ine'. <sup>3</sup> Cá'anqueze dxaca cheedxu. Gate ne nácadxu ca bidau', xú'udxu lu na' xúgute da dxelenná bea na lu xęzr la xu nigá. <sup>4</sup> Gate bzrin zra ba ble'e lau Dios, na' gusel-le' Zrí'ine', gúlajbe' ne chee tu nu'ula, na' guxú'e lu na' da bdxixruj be'e Moisés. <sup>5</sup> Ble'e bselé' benne' zaj xu'e lu na' da nadxixruj bea na, chee gaca si' lu na' Dios dxi'u ca zrí'inequeze'.

<sup>6</sup> Lawe' da ba nácale bi chee Dios, Le' gusel-le' Be' Lá'azxa chee Zrí'ine' lu xichaj lázrdaule, na' dxenná Be' na': "Abba", da zéaje na: Xrae. <sup>7</sup> Ca'an naca, ba nácadxu bi chee Dios, ne québedxa nácadxu ca benne' zaj nada'u lu na' da bdxixruj be'e Moisés. Na' lawe' da nácadxu bi chee', Dios gunne' dxi'u da de cheen'. Cani naca lawe' da nácadxu Cristo tuze.

### *Pablo dxe'e gunne xue chee bi ca' chee Cristo*

<sup>8</sup> Da líqueze, gate quebe ne gúnbeale Dios, gúcale benne' zaj nada'u chee dios ca', da' quebe zaj nácaqueze dios. <sup>9</sup> Na'a gate ba núnbeale Dios, u nnadxu, Dios na' núnbe'e le'e, ¿ájazra gunle xexú'ule xecha lasa lu na' da dxelenná bea na lu xęzr la xu nigá, da ca' quebe zaj zaca? <sup>10</sup> Le'e ne dxapa ba lánale bal-la zra ca', ne bal-la beu' ca', ne tu tu iza ca'. <sup>11</sup> Dxezrébele'a bęna' zrin níteze ládujla le'e gate bzenda' le'e dizra' chawe' chee Cristo.

<sup>12</sup> Bi bícha'dau', dxata' xúeda' le'e gácale ca naca' neda', québedxa xu'a lu na' da nadxixruj bea na, lawe' da gúcaqueza' neda' ca nácale le'e. Quegá bi da calela bęnle chia' neda'. <sup>13</sup> Ba nézquezle gate nédxudau' bzenda' le'e dizra' chawe' chee Cristo. Guca na gate na' guxu'a tu xízrawe'. <sup>14</sup> Xízrawe' na' guca na da gusegute na le'e, san le'e quebe begútele neda', ne quebe bzúale neda' chalá'ala, san guz' lu na'le neda' ca tu gubáz chee xabáa chee Dios, u ca nácqueza' Jesucristo. <sup>15</sup> ¿Bizra guca chee xel-la dxebé da guzúale? Waca nnia' tu da xecá'ana le'e chawe', la naca da guzéquele gunle, bebéajtele xiaj láuquezele, chee gúnnae na neda'. <sup>16</sup> Na'a, ¿bexaca' ca tu benne' dxecuídenę' le'e lawe' da gucha' le'e da li?

<sup>17</sup> Benne' ca' dxelaca lazre' chugu lu belá' chee da na' dxulé'e na, dxe'e gunne xue chee le'e, san quegá chee xegá'anale chawe'. Da dxelaca lazre' naca na xulucase' le'e nen netu' chee cuele gunne xue chee

le'. <sup>18</sup> Naca chawe' cuedxu gunne xue chee benne' xula chee xegá'ang' chawe', ne quegaze gate zúaləna' le'e. <sup>19</sup> Zrí'ina'dau', naca chia' ca zua' lu xel-la dxudía ne chee ca dxaca chee tu nu'ula ba zua sanə' bidau', ne wabédxequeza' gunne xue chee cađxa gulé'e lau da li dxenná bea Cristo lu xichaj lázrdaule. <sup>20</sup> Dxezé' lazra' súałəna' le'e ná'aqueze chee gaca guchálajləna' le'e xezícaxa dizra' lawe' da dxezí'alə'a gunne xue.

*Da dxusede dxi'u ca guca chee Sara, ne chee Agar*

<sup>21</sup> Le'e na', dxaca lázrele chu'ule lu na' da bdxixruj be'e Moisés, le xechébxque da nigá: ¿Quebe ne xénnele ca dxenná da nadxixruj bea na? <sup>22</sup> Dxenná na gulezrá' chupa zri'ine Abraham. Tube' gúcabe' zri'ine zrí'ulaqueze', nu'ula quebe nada'u. <sup>23</sup> Zri'ine nu'ula nada'u gúlajbe' cáteze dxelalaj xúgute' bidau', na' zri'ine nu'ula quebe nada'u gúlajbe' chee guca li ca da guchebe lazre' Dios. <sup>24</sup> Da nigá naca na ca tu da dxulé'e na. Dxúpatə' nu'ula caní dxululé'eng' ca zaj naca chupa xel-la wezría. Tu xel-la wezría nigá naca na da bnezruj Dios Moisés lu xi'a Sinaí, da na' dxulé'e Agar. Benne' ca' zaj xu'ə lu na' xel-la wezría nigá dxelálajə' ca benne' zaj nada'u. <sup>25</sup> Cá'anqueze dxulé'e Agar da naca chee xi'a Sinaí da zua na ga nababa Arabia, Cá'anqueze xi'a nigá dxulé'e na ca naca Jerusalén lu zra na'a zra lawe' da zaj naca benne' chee xezre nigá ca benne' zaj nada'u tu zren nen zrí'ine' ca'. <sup>26</sup> Benne' zaj nababə' Jerusalén chee xabáa quebe zaj naque' benne' zaj nada'u, na' dxi'u nácadxu ca zri'ine benne' ca'. <sup>27</sup> Lu dizra' lá'azxa, naxúaj na ca naca chee benne' zaj nababa Jerusalén chee xabáa na', da dxenná na: Gubé lue', nu'ula wizre, lue' quebe nu chilá' zri'inu'. Gudxezre xa'a lu xel-la dxebe, lue' quebe núnbe'u xel-la dxudía chee xel-la dxezán bidau'.

Nu'ula quebe guzán bidau' gate guque' cuide' waxandxa zri'ine' quézcala zri'ine nu'ula zúaləne' benne' chee'.

<sup>28</sup> Le'e, bi bícha'dau', nácadxu ca Isaac. Nácadxu zri'ine Abraham, bi ca' guchebe lazre' Dios gunézruje' le'. <sup>29</sup> Na'a ca guca lu zra na', Ismael, zri'ine Abraham na', bi gúlajbe' ca dxelalaj xúgute' bidau', gudáu zi' xúzrebe' Isaac, zri'ine Abraham na', bi gúlajbe' ne chee Be' chee Dios, cá'anqueze dxaca na na'a. <sup>30</sup> Na'a ¿bizra dxenná dizra' lá'azxa? Dxenná na: Bebéaj chalá'ala nu'ula nada'u tu zren nen zrí'ine' lawe' da quebe gaca chee zri'ine nu'ula nada'u sibe' da dxal-la' si' zri'ine nu'ula quebe nada'u. <sup>31</sup> Ca' naca na, bi bicha', quebe nácadxu ca Ismael, zri'ine nu'ula nada'u, san nácadxu ca Isaac, zri'ine zru'ula Abraham, nu'ula quebe nada'u.

## 5

*Le sua chuchu lu xel-la weselá*

<sup>1</sup> Cristo bselé' dxi'u lu na' da nadxixruj bea na chee gácadxu ca benne' quebe zaj nada'u. Le sua chuchu lu xel-la weselá da ba guzile, ne québedxa xexú'ule lu na' da na' dxun na le'e benne' zaj nada'u.

<sup>2</sup> Le xene da dxapa' le'e. Neda', Pablo, dxapa' le'e, che güele lataj chugu lu belá' chee da na' dxulé'e na, quebe bí da ba neza gaca chee da naca chee Cristo. <sup>3</sup> Dxaca lazra' xapa' le'e xecha lasa, che nu benne' chugu lu belá' chee' da na' dxulé'e na, dxun na ba xen gun bəneə' xúgute' da bdxixruj be'e Moisés. <sup>4</sup> Le'e na' dxéquele nagá'anale xrlátaje lau Dios lawe' da nunle ca nadxixruj bea na, ba bcá'anale da naca chee Cristo, ne dxexebéaj cúinale lu xel-la zri'i lazre' chee Dios. <sup>5</sup> Dxi'u, ne chee Be'

Lá'azxa, ne lawe' da dxeajlí lázredxu Cristo, dxuxrén lázredxu nagá' anadxu xrlátaje lau Dios. <sup>6</sup> Che nácadxu tuze nen Cristo, quebe bi da ba neza gaca na cheedxu che chugu lu belá' cheedxu da na' dxulé'e na, u che quebe chugu na. Da ba neza naca na cheedxu che dxeajlí lázredxu Cristo, na' xel-la dxeajlí lazre' cheedxu dxuzúa na dxi'u lu xel-la zri'i lazre'.

<sup>7</sup> Da xrlátaje bénquezle. ¿Nuzra gulú'u xel-la le'e chee québedxa guzúale dizra' da li? <sup>8</sup> Quegá Dios bene' da na'. Nácaqueze Le' Bénnea' bláwizre' le'e. <sup>9</sup> Quebe gal-la lázrele da dxenná na: Láteze cua zichaj dxuchazra na ca naca cua. <sup>10</sup> Dxuxrén lazra' Xránadxu ca naca chee le'e, quebe guzúale chalá'ala da nigá dxuchálaja'. Dios gudé'e lu da ba xa' bennea' dxun zréajene' le'e, núteteze naque'.

<sup>11</sup> Da naca chia', bi bicha', la xapa' neda' benneache dxal-la' chugu lu belá' chee' da na' dxulé'e na, quegá weláu zi' xuzre benne' judío neda' lawe' da che dxuna' da caní quebe xelaque' tula che cu'a lban chee xaga béguaj chee Cristo. <sup>12</sup> Na'a ca naca chee benne' ca', benne' dxelún zréajene' le'e, ne dxelenné' dxal-la' chugu lu belá' chee le da na' dxulé'e na, dxaca lazra' chugu ca da zaj naca benne' ca' chee québedxa xelún zréajene' le'e.

<sup>13</sup> Bi bícha'dau', Dios bláwizre' le'e chee gácale benne' quebe zaj nada'u, ne québedxa xu'ule lu na' da bdxixruj be'e Moisés. Quebe guchínele da nácale chee gunle ca da dxezá lázrele. Le gun cuínale ca benne' zaj nada'u, chee gunle zrin chee le sa' ljwézrele tule xetule lu xel-la zri'i lazre' chee le. <sup>14</sup> Xúgute da nadxixruj bea na dxun bennea' dxuzúe' dizra' da na' dxenná na: Bzri'i le sa' ljwezru' cáteze nazrí'i cuinu'. <sup>15</sup> Che dxunle ca dxelún be xixre' ca', ne dxun zi' ljwézrele, ne dxasa ljwézrele tule xetule, le guxúe ga guzria xi' cuínale.

*Da dxundxu cáteze dxezá lazre' belá' dxen cheedxu, ne da dxundxu cáteze dxezá lazre' Be' Lá'azxa*

<sup>16</sup> Da nigá dxapa' le'e: Le gun cáteze dxulé'e Be' Lá'azxa le'e, na' quebe gunle cáteze dxezá lazre' belá' dxen chee le. <sup>17</sup> Da dxezá lazre' belá' dxen cheedxu dxedíl-lalę na da dxezá lazre' Be' Lá'azxa, na' da dxezá lazre' Be' Lá'azxa dxedíl-lalę na da dxezá lazre' belá' dxen cheedxu. Dxúpatę da caní dxeledíl-lalę ljwezre na, na' chee le na' quebe gaca gunle da dxaca lázrele gunle. <sup>18</sup> Che dxunle ca da dxulé'e Be' Lá'azxa le'e, québedxa xu'ule lu na' da nadxixruj bea na.

<sup>19</sup> Zaj nulé'e láuqueze da dxelún benne' ca' dxelunę' cáteze da dxezá lazre' belá' dxen chee':

Deledálęne' nu'ula xula.

Dulucá'ana dítaje' le sa' ljwezre'

Dxelunę' da sban, ne da schanni'.

<sup>20</sup> Dxelúe szrene' bedau' xiaj xaga, ne dxelunę' xel-la wazrá'.

Dxelecuídenę' le sa' ljwezre', ne dxelezzré'ę.

Dxelaque' wide', ne dxelezzrá'a xíchaje'.

Dxelenné' chee ljwezre'.

Dxelebéaj xichaj ljwezre' tuę' xetue', ne dxelaque' chupa la'a.

<sup>21</sup> Dxelaque' xa lazre', ne dxelutię' benne'.

Dxelezzre'ne', ne dxeledanne' da calęla da dxelunę' lu laní ca'.

Zánete da dxelundxe' bi chee da caní. Che le na' dxapa' le'e ca bénqueza' nédxute, benne' dxelunę' da caní quebe xelexú'ę naga dxenná bea Dios.

<sup>22</sup> Da dxelún benne' ca' dxelunę' cáteze da dxulé'e Be' Lá'azxa le' zaj naca na caní:

Zaj nazri'ine' le sa' ljwezre', ne zaj nape' xel-la dxebé.

Dxelebeza zri lazre', ne zaj naque' zren lazre'.

Zaj naque' zri'i lazre', ne dxelune' da zri'a chawe'.

Zaj naque' li lazre'.

<sup>23</sup> Zaj naque' dxexruij lazre', ne dxelenná be'e cuine'.

Quebe de' da nadxixruij bea na da dxé na dxi'u quebe gundxu da caní.

<sup>24</sup> Benne' ca' zaj naque' bi chee Cristo ba buludé'e le'e xaga béguaj bela' dxen chee' nen xúgute' da dxezá lazre na. <sup>25</sup> Che naca bandxu ne chee' Be' Lá'azxa, dxal-la' gundxu ca da dxulé'e Be' Lá'azxa dxi'u.

<sup>26</sup> Quebe dxal-la' gucá'ana szren cuínadxu, ne quebe gácadxu wide' tudxu xetudxu, ne quebe sua da xa lazre' ládujla dxi'u.

## 6

### *Le gácale le sa' ljwézrele tule xetule*

<sup>1</sup> Bi bícha'dau', che nu benne' ládujla le'e nune' dul-la, le'e na' dxedálele Be' Lá'azxa dxal-la' gácalele bénnea' chee xezé chúchue'. Dخال-la' gácale dxexruij lazre' gunle da nigá chee quebe güele lataj da xriwe' cu'u xel-la na le'e. <sup>2</sup> Le gácale le sa' ljwézrele tule xetule lu da naca xua chee, na' caní gunle ca nadxixruij be'e Cristo.

<sup>3</sup> Che nu benne' dxéquene' naque' benne' blau, ne quebe nu naque', dxezi xézqueze cuine'. <sup>4</sup> Tu tu benne' dxal-la' na' xánnie' da dxúnqueze', na' che nagá'ana xrlátaje da dxune', waca xape' ba lá'ana da dxúnqueze', ne quegá da ben xetú benne'. <sup>5</sup> De' tu xua da nabágadxu chee Cristo, da dxal-la' gua tu tu benne'.

<sup>6</sup> Benne' zua nu dxusede le' ca naca xrtizra Dios dxal-la' gunézruje' late' da naca chee' chee' bénnea'.

<sup>7</sup> Quebe si xe' cuínale: Netú benne' gaca quítajlene' Dios. Da dxaza bénneache, léqueze na xelape'. <sup>8</sup> Che dxune' da dxezá lazre' bela' dxen chee', da xezi'e naca na xel-la gute, na' che dxune' da dxezá lazre' Be' Lá'azxa, da xezi'e naca na xel-la nabán zeajlí canna. <sup>9</sup> Ca' nacan xca', quebe gusandxu gundxu da xrlátaje lawe' da che quebe gate lazrdxu, lu zra na' quizruij Dios dxi'u, na' xezidxu lazruj cheedxu. <sup>10</sup> Chee le' na', gate nazidxu lataj, dxal-la' gundxu da xrlátaje chee le sa' ljwézredxu, ne da dxundxa na ba xen, gundxu da xrlátaje chee le sa' ljwézredxu dxeleajlí lazre' Cristo.

### *Da bzuaaj Pablo nen ná'queze'*

<sup>11</sup> Le nna'xque cadite da zri'a naca da nigá dxuzúaja' chee nen ná'queza'. <sup>12</sup> Benne' ca' dxelaca lazre' chugu lu bela' chee da na' dxulé'e na, dxelune' na chee xelexegá'ane' chawe' lau bénneache, ne chee quebe xeláu zi' xuzre' le' lawe' da dxuluchálaje' dizra' chee da ben Cristo le'e xaga béguaj. <sup>13</sup> Benne' caní, benne' zaj nadxugu lu bela' chee' da na' dxulé'e na quebe dxelune' xúgute' ca da nadxixruij bea na. Dxelaca lazre' chugu lu bela' chee da na' dxulé'e na chee gaca xulucá'ana szren cuine' ca naca da belune' chee. <sup>14</sup> Quebe dxaca lazra' xucá'ana szren cuina' chee tu da bena', san tuze chee da ben Xránadxu Jesucristo le'e xaga béguaj. Ne chee Le' naca xezr la xu nigá ca tu da gate chia' neda', na' neda' naca' ca tu benne' gate. Québedxa dxezá lazra' da naca chee xezr la xu. <sup>15</sup> Che nácadxu tuze nen Cristo, quebe bi da ba neza gaca na cheedxu che nadxugu lu bela' cheedxu da na' dxulé'e na, u che quebe nadxugu

na. Da ba neza naca na cheedxu che nácadxu benne' cube lu xichaj lázrdaudxu. <sup>16</sup> Dxenaba' lau Dios gunézruje' xel-la dxebeza zri lazre' chee xúgute benne' ca' zaj naque' benne' cube caní, ne xexache lazre' benne' ca' da li zaj naque' bi chee'.

<sup>17</sup> Lawe' da zaj zria lu bēl-la' dxen chia' xizra' da dxululé'e na naca' wen zrin chee Cristo quebe nu benne' dxal-la' gulálene' neda' na'a, ne lu da za za'.

<sup>18</sup> Le'e, bi bícha'dau', dxenaba' lau Xránadxu Jesucristo gunē' chawe' chee xúgutele. Ca'an gaca na.



## DIZRA' BZUAJ SAN PABLO CHEĒ BI CHEĒ CRISTO ZAJ ZRE'E XEZRE ĒFESO

*Pablo dxugape' diuzre bi cheĒ Cristo zaj zre'e xezre Efeso*

<sup>1</sup> Neda', Pablo, naca' gubáz cheĒ Jesucristo lawe' da guca lazre' Dios gaca' caní. Dxuzúaja' da nigá cheĒle le'e, nácale bi cheĒ Dios, ne dxeajlí lázrele Jesucristo, na' zrale xezre Ēfeso. <sup>2</sup> Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'.

*Ca naca da chawe' da dxezi' lu nnadxu ne cheĒ Cristo*

<sup>3</sup> Dxue lá'anadxu Dios, Xra Xránadxu Jesucristo lawe' da ba bene' cheedxu ca naca xúgute da chawe' cheĒ Be' Lá'azxa da zá'aca xabáa lawe' da nácadxu bi cheĒ Cristo. <sup>4</sup> Dios guqu'é dxi'u cheĒ gácadxu bi cheĒ Cristo gate quebe ne gunte' xezr la xu, cheĒ gácadxu benne' lá'azxa, ne du lazre' lau Le'. <sup>5</sup> Lawe' da bzri'ine' dxi'u, bene' cheedxu gate nate si' lu ne'e dxi'u ca bi cheéqueze' ne cheĒ Jesucristo, cáteze da guca lazre' guné'. <sup>6</sup> CheĒ le na', tu dxue lá'anazquezdXu Dios ne cheĒ xel-la xrlátaje cheĒ' da naca na szrente. Lu xel-la xrlátaje cheĒ' na' gúcalene' dxi'u lawe' da nácadxu tuze nen Zrí'ine', bi nazri'ite lazre'. <sup>7</sup> Ne cheĒ Zrí'ine' na' naxá'awene' dxi'u nen dxen cheéqueze', na' lu xel-la zri'i lazre' zren cheĒ' bnite lawe' cheedxu dxi'u ca naca dul-la da nabágadxu. <sup>8</sup> Dios nazrí'ile'ene' dxi'u, ne dxunne' dxi'u xel-la sina, ne xel-la dxéajni'i, <sup>9</sup> na' bzéajni'ine' dxi'u ca naca da dxaca lazre' da bgache na, da na' lu xel-la zri'i lazre' cheĒ' ba núnqueze' guné' ne cheĒ Cristo. <sup>10</sup> Nuchague' xúgute da zaj zua na xabáa, ne xezr la xu, cheĒ xelú'u na lu na' Cristo, da gusexúze' guné' gate zrin zra cheĒ na.

<sup>11</sup> Ne cheĒ Cristo Dios guqu'é dxi'u cheĒ' gate nate, cheĒ si' lu nnadxu da xáladxu da gunna Le', ca da ba núnqueze Dios, Bénnea' dxune' xúgute da dxeque Le' xrlátaje. <sup>12</sup> Caní bene' cheĒ gácadxu tu da gucá'ana szren na xel-la szren cheĒ', nácadxu dxi'u benne' nedxu dxebeza lázredxu Cristo. <sup>13</sup> Cá'anqueze le'e, gate benle dizra' li, da naca na dizra' chawe' cheĒ da ben Cristo, bselé' le'e. Guxeajlí lázrele Le', na' Dios bzue' Be' Lá'azxa lu xichaj lázrdaule ca tu da dxunna bea na nácale bi cheĒ', ca guchebe lazre' guné'. <sup>14</sup> Be' Lá'azxa na' naque' da dxunna bea na sidxu da xáladxu da gunna Dios dxi'u, gate zrin zra da ba nune' guselé' bi cheĒ' ca', cheĒ güe lá'anaquezdXu Le' ca naca xel-la szren cheĒ'.

*Dxenaba Pablo gunezruj Dios xel-la sina cheĒ bi ca' cheĒ Cristo*

<sup>15</sup> CheĒ le na' gate benda' ca dxeajlí lázrele Cristo, ne ca nazri'ile xúgute bi ca' cheĒ Dios, <sup>16</sup> dxápaqueza' Dios; Xcalenu', ca naca cheĒle le'e gate dxuchálajlena' Dios, ne dxeajsá lázrqueza' le'e. <sup>17</sup> Dxenaba' Dios cheĒ Xránadxu Jesucristo, naque' Xradxu zue' xabáa, gunne' le'e xel-la sina lu be' nácaquezle da gulé' na le'e gúnbea xánnele Le'. <sup>18</sup> Dxenaba' lau Dios guzéajni'ine' xichaj lázrdaule le'e cheĒ nézele ca naca da dxebeza lázredxu da bláwizre' dxi'u sidxu, ne ca naca xel-la gunní'a cheĒ xel-la szren da gunezruj Dios bi cheĒ ca', <sup>19</sup> ne ca naca xel-la waca zrente cheĒ' da dxun na zrin lu xichaj lázrdaudxu dxi'u dxeajlí lázredxu Le'. Xel-la waca nigá bchine Dios lu dute xel-la dxenná bea zren cheĒ' <sup>20</sup> gate bsebane' Cristo

ládujla benne' gate ca', ne guleche' Le' chalá'a xabêla chee' xabáa, <sup>21</sup> ne bzue' Le' chee' nna bé'ene' xúgute benne' blau xabáa, ne xúgute benne' dxelenná bea xabáa, ne xúgute benne' zaj napa xel-la waca, ne xúgute benne' zaj naca xrane, ne xúgute da dxelenná bea na lu zra na'a zra, ne lu da za za'. <sup>22</sup> Bzue' xúgute da zaj zua lu na' Cristo, ne bzue' Le' gaque' benne' xíchaje chee' bi chee' ca' ca naca xúgute da dxelune'. <sup>23</sup> Benne' caní zaj naque' ca belá' dxen chee' Cristo, da dxulé'e na dute ca nácaqueze Le', Bénnea' dxusexuzre' dxucá'ana chawe' ca naca xúgute da zaj zua.

## 2

### *Naca bandxu lawe' da nazrí'i Dios dxi'u*

<sup>1</sup> Gate nate gúcale ca benne' gate lu xichaj lázrdaule ne chee' da calela ca', ne dul-la ca' <sup>2</sup> da benle gate ne dxunle ca dxelún bénneache zaj zre'e xezr la xu nigá, benne' dxelune' ca dxenná da xriwe', be' na' da dxenná bea na lu be', ne dxun na zrin lu xichaj lázrdau benne' ca' quebe dxuluzúe' dizra' chee' Dios. <sup>3</sup> Cá'anqueze dxi'u, xúgutedxu bendxu caní gate nate, gate bendxu cáteze da guzá lázredxu, ne bendxu ca da gunná belá' dxen cheedxu, ne ca da gunná xichaj lázrdaudxu. Chee' le' na' guca na cheedxu sidxu da zi' da xa' chee' Dios ca gune' chee' xezícadxa benne' ca', <sup>4</sup> san Dios bexache lázrele'e dxi'u, ne bzrí'ile'ene' dxi'u, <sup>5</sup> na' benne' dxi'u xel-la nabán tu zren nen Cristo gate ne nátedxu lu xichaj lázrdaudxu ne chee' dul-la da nabágadxu. Naladxu ne chee' xel-la xrlátaje chee' Dios. <sup>6</sup> Cá'anqueze bsebán Dios dxi'u tu zren nen Jesucristo, ne guleche' dxi'u tu zren nen Le' xabáa. <sup>7</sup> Bene' caní chee' gulé'ene' lu zra da za za' ca nazrí'ile'ene' dxi'u, ne ca naca da cháwele'e bene' cheedxu ne chee' Jesucristo. <sup>8</sup> Lu xel-la xrlátaje chee' Dios bselé' le'e lawe' da guxeajlí lázrele Cristo. Quebe naca na ne chee' bi da benle le'e, san naca na tu da ben Dios cá'aze ne chee'. <sup>9</sup> Quebe nalá nu benne' ne chee' bi da dxúnqueze', chee' quebe nu benne' gucá'ana szren cuine'. <sup>10</sup> Dios bene' dxi'u, na' bexune' dxi'u tuze nen Jesucristo chee' gundxu da xrlátaje ca' da ba nun Le' gundxu gate nate.

### *Nácadxu tuze ne chee' Cristo*

<sup>11</sup> Le gusá lázrele ca gúcale le'e gate nate. Quebe nácale benne' judío, benne' ca' dxelechugue' lu bel-la' dxen chee' da na' dxulé'e na zaj nababe' chee' Dios, ne zaj nazí le' benne' zaj nadxugu, na' dxelenné' chee'le nácale benne' quebe zaj nadxugu. <sup>12</sup> Lu zra ca' quebe guzúale Cristo le'e. Quebe benle tuze benne' Israel ca', ne quebe benbeale ca naca xel-la wezría da ben Dios, ne ca naca da guchebe lazre' Dios. Guzúale lu xezr la xu nigá, ne quebe bi guleza lázrele, ne quebe benbeale Dios. Gate nate guzrale zítu'la naga zua Dios. <sup>13</sup> Na'a ne chee' Cristo Dios ba bzue' le'e gágute lawe' da gute Cristo waláz chee'. <sup>14</sup> Léqueze Cristo benne' dxi'u xel-la dxebeza zri lazre', ne bexune' dxi'u tuze, netu', benne' judío ca', ne le'e, benne' quebe zaj naque' judío, ne bzria xi'e xel-la dxezrá'a da ben na dxi'u chupa la'a, da guca na ca tu ze'e. <sup>15</sup> Gate gute Jesús waláz cheedxu guchugue' da nadxixruj bea na da naca na da gunná Dios gundxu, ne da ca' dxelenná bea na, na' bexune' dxúpaté xezre ca' tuze xezre cube da nababa na chee'. Caní gudíxruje' xel-la dxebeza zri lazre' cheedxu. <sup>16</sup> Caní guca ne chee' xel-la gute chee' Cristo le'e xaga béguaj, guchugue' naze xel-la dxezrá'a ljwezre chee' dxúpaté xezr ca', na' bexune' dxúpaté tuze bel-la' dxen, ne bexune' le' tuze nen Dios.

<sup>17</sup> Bla' Cristo, ne bzenne' le'e dizra' chawe' chee', le'e quebe nácale judío, na' guzrale zitu' naga zua Dios, ne le'e nácale judío, na' guzrale gagu naga zua Dios, <sup>18</sup> na' ne chee' Cristo, xúgute dxu, benne' judío ca', ne benne' quebe zaj naque' judío, dxebigadxu lau Xradxu Dios ne chee' Be' Lá'azxa. <sup>19</sup> Chee' le' na' le'e, benne' quebe nácale judío, québedxa nácale ca benne' zitu' tu lu xezr la xu da quebe naca na chee', san nácale benne' walazre' ca xúgute benne' ca' zaj nababa chee' Dios. Nabábale Zri'ine Dios. <sup>20</sup> Nácale ca tu xu'u zren da zria na lawe' lane da gulixruj benne' gubáz ca' chee' Cristo, ne benne' ca' buluchálaje' waláz chee' Dios, na' Jesucristo nácaqueze' xiaj blau chee' lane xu'u na'. <sup>21</sup> Lawe' lane nigá da naca Cristo, dute xu'u na' dxegula na tu li chee' gaca na tu xudau' lá'azxa chee' Xránadxu. <sup>22</sup> Cá'anqueze' le'e, lawe' da nácale Cristo tuze, xu'ule lu xu'u na' naga zua Dios ne chee' Be' Lá'azxa chee'.

### 3

#### *Pablo dxuzenne' benne' quebe zaj naque' judío dizra' chawe'*

<sup>1</sup> Chee' le' na' neda', Pablo, dxuzú zriba' lau Dios. Xu'a lizre xia lawe' da dxuna' zrin chee' Jesucristo chee' gaca chawe' chee' le'e, quebe nácale judío. <sup>2</sup> Ba nézele ca ben Dios lu xel-la xrlátaje chee', bsebague' neda' guchálaja' dizra' chawe' chee' Cristo ládujla le'e. <sup>3</sup> Lu da ble'e Dios neda' bzéajni'ine' neda' tu da nagache chee' ca da bzuaja' chee' nedxu. <sup>4</sup> Gate gulábale na weque bé'equezele núnbe'a da nagache ca naca chee' Cristo. <sup>5</sup> Guca na tu da nagache gate nate. Dios quebe bzéajni'ine' na bénneache, san na'a ne chee' Be' Lá'azxa chee' ba blé'ene' na benne' gubáz lá'azxa ca', na' benne' ca' dxuluchálaje' waláz chee'. <sup>6</sup> Caní naca da nagache na': Ne chee' dizra' chawe' chee' Cristo benne' quebe zaj naque' judío welezí'queze' da gunezruj Dios le' ca da xelezí' benne' judío ca', ne zaj naque' tuze bel-la' dxen, ne xelezí'queze' tu zren da nachebe lazre' Dios ne chee' Jesucristo.

<sup>7</sup> Dios bene' neda' wen zrin chee' dizra' chawe' na' ne chee' tu da bennaze' neda', bchíne' xel-la waca zren chee'. <sup>8</sup> Neda' nácadxa' benne' baxáche ca xúgute benne' zaj naca bi chee' Dios. Bene' neda' tu culuén zren chee' guzenda' benne' quebe zaj naque' judío dizra' chawe' ca naca xel-la gunní'a zrente chee' Cristo. <sup>9</sup> Bsebague' neda' guzéajni'ida' xúgute bénneache ca da nun Dios gune' da bgache gate nate, na' naca Dios Bénnea' bene' xúgute da zaj zua, <sup>10</sup> chee' xelúnbea na'a benne' dxelenná be'e, ne zaj nape' xel-la szren xabáa ca naca xel-la sina zrente chee' Dios. Xelúnbe'e na ne chee' benne' ca' zaj naca bi chee' Cristo. <sup>11</sup> Da nigá ben Dios ca da nuné' gate nate gusexuzre' ne chee' Xránadxu Jesucristo. <sup>12</sup> Ne chee' Cristo waca bigadxu lau Dios du lázredxu, ne dute xel-la dxuxrén lazre' cheedxu lawe' da dxejlí lázredxu Le'. <sup>13</sup> Chee' le' na' dxata' xúeda' le'e quebe gate ni'a na'le lawe' da dxedéa' xel-la zi' ne chee' le'e. Xel-la zi' da dxedéa' neda' gaca na chee' tu da ba neza.

#### *Xel-la zri'i lazre' chee' Cristo*

<sup>14</sup> Chee' le' na' dxuzú zriba' lau Xra Xránadxu Jesucristo, <sup>15</sup> Bénnea' dxuzúe' la cha chee' benne' zaj zre'e xabáa, ne xezr la xu. <sup>16</sup> Dxenaba' lau Xradxu, ca naca xel-la gunní'a zrente chee' guzé tipe' le'e nen xel-la waca chee' lu xichaj lázrdaule ne chee' Be' Lá'azxa chee', <sup>17</sup> chee' sua Cristo lázrdaule ne chee' xel-la dxejlí lazre' chee', ne se cháchale lu xel-la zri'i lazre', ca tu xaga da nudé lue na sítuja, <sup>18</sup> chee' seque' chéajni'ile

tu zren nen xúgute bi chee' ca nazriluj, ne ca natunna, ne ca nasituj, ne ca nasibe xel-la zri'i lazre' chee' Cristo. <sup>19</sup> Dxenaba' lau Dios gúnbeale xel-la zri'i lazre' na', lácála cabata' séquedxu gúnbeadxu duté ca naca na. Caní dxenaba' Le' chee' suale le'e duté da nácaqueze Dios.

<sup>20</sup> Na'a, gaca báqueze Dios, Bénnea' nape' xel-la waca gúnle'eqeuzé' da zrendxa ca da dxenábadxu, u ca da dxéquedxu, ne chee' xel-la waca chee' da dxun na zrin lu xichaj lázrdaudxu. <sup>21</sup> Gaca ba Dios ládujla benne' zaj naque' bi chee' Cristo ne chee' Jesucristo xúgute iza chadía chacanna. ¡Ca'an gaca na!

## 4

*Nácadxu tuze ne chee' Be' Lá'azxa*

<sup>1</sup> Chee' le' na' dxata' xúeda' le'e, neda', xu'a lizre xia lawe' da dxuna' zrin chee' Xránadxu, chee' gunle da xrlátaje ca dxal-la' xelún bénneache ba gucá'a Dios le', ca gucá'aquezé' le'e. <sup>2</sup> Le gaca dxexruj lazre', ne zri'i lazre'. Le cueza lazre', ne le cue' gunne xue chee' tule xetule lu xel-la zri'i lazre' chee'. <sup>3</sup> Le gun ba xuzre gácaquezle tuze, guchínele xel-la waca chee' Be' Lá'azxa lu xel-la dxebeza zri lazre' da na' dxun na le'e tuze.

<sup>4</sup> Tuze naca be'la' dxen chee' Cristo da nácadxu.

Tuze naca Be' Lá'azxa, Nu na' zúalene' tu tudxu.

Tuze da dxuxrén lázredxu, da na' sidxu lu na' Dios.

<sup>5</sup> Tuze Bénnea' naque' Xránadxu.

Tuze da dxeajlí lázredxu.

Tuze ca dxedxúadxu nisa.

<sup>6</sup> Tuze Bénnea' naque' Dios, ne Xra xúgutedxu.

Le' naque' Benne' xíchaje xúgutedxu.

Dxulé'e cuine' lu da dxundxu xúgutedxu.

Zúaquezé' lu xichaj lázrdau xúgutedxu.

<sup>7</sup> Tu tudxu nasidxu tu xel-la waca cha cheedxu

ca da nunna Cristo dxi'u.

<sup>8</sup> Naca na ca naxúaj na lu dizra' lá'azxa, dxenná na:

Begüéne' xabáa, gate gudé bzétaje' benne' guledábague' Le'.

Na' bnézruje' bénneache xel-la waca ca'.

<sup>9</sup> ¿Bi zéaje na, dxenná na: Begüéne'? Zéaje na nédxula bétaje' lu xezr la xu nigá. <sup>10</sup> Bénnea' bétaje' nácaquezé' Bénnea' begüéne' lu da blaudxa lu xabáa chee' gaca bea na xu'u lu ne'e xúgute da de, <sup>11</sup> na' benne' cha cheedxu xel-la waca chee':

Gaca bál-ladxu benne' gubáz chee'.

Gaca guzendxu xezícadxu bénneache dizra' chawe' chee'.

Gácadxu xezícadxu benne' dxuxúedxu bi chee' ca'.

Na' gusédedxu-be' xezícadxu.

<sup>12</sup> Ca'an bene' chee' bpa'adxé' bi chee' ca' chee' xelunbe' zrin xulucá'anabe' xrlátaje bénneache ca' zaj naque' zruza ni'a na' Cristo:

<sup>13</sup> Chee' gácadxu tuze ca dxéajledxu,

ne ca núnbeadxu Zri'ine Dios,

chee' gácadxu benne' du lazre',

chee' gácadxu cáteze nácaqueze Cristo.

<sup>14</sup> Caní nacan chee' québedxa gácadxu ca bidu ca', bi ca' dxelezibe' bíteteze dizra' da zaj naca na ca tu be' da zeaj na nila na'la, ne québedxa güedxu lataj xelún zrédaje benne' wen da zrinnaj ca' dxi'u, chee' quebe xelezi xé'e dxi'u chee' gundxu da calela. <sup>15</sup> Lu xel-la zri'i lazre' dxal-la' guchálajdxu da

li chee gácadxu cáteze nácaqueze Cristo, Bénnea' naque' xichaj bel-la' dxen da nácadxu dxi'u. <sup>16</sup> Le' dxune' tuze xúgute ni'a na' zaj zria bel-la' dxen chee' chee gaca na tu bel-la' dxen nazá'ate chee na, ne chee xelún zrin xúgute ni'a na' ca' chee gula bel-la' dxen na', ne gaca na chawe' lu xel-la zri'i lazre'.

*Xel-la nabán cube da dxunna Cristo dxi'u*

<sup>17</sup> Da nigá dxapa' le'e, ne dxusebaga' le'e waláz chee Xránadxu chee québedxa gunle ca dxelún bénneache quebe zaj núnbe'e Dios, benne' ca' dxelune' cáteze dxeléquene' xrlátaje, <sup>18</sup> benne' ca' zaj nachul-la xichaj lázrdawe'. Benne' caní quebe zaj nape' xel-la nabán li lazre' da dxunna Dios bénneache:

Zaj nachul-la nanítene', ne zaj naca zide' lázrdawe'.

<sup>19</sup> Québedxa dxelexedué'ene'.

Belezanne cuine' dxelune' da schanni'.

Du lazre' dxelune' xúgute da sban.

<sup>20</sup> Quegá caní nazédele le'e chee Cristo, <sup>21</sup> che da li xca' bénnele da dxuchalaj Le', ne nusédené' le'e ca naca da li da zúale Jesús. <sup>22</sup> Ca naca da benle nédxula, le guzúa chalá'ala da gúcale lawe' da guzrinnajle lu da sban da guzá lázrele.

<sup>23</sup> Dxal-la' gácale benne' cube lu xichaj lázrdaule.

<sup>24</sup> Dxal-la' gunle da naca chee benne' cube na' da ben Dios le'e chee gunle da naca na xlátaje, ne da li da naca na lá'azxa.

<sup>25</sup> Chee le na' québedxa gun lázrele.

Le nne da li tule xetule lawe' da nácadxu ni'a na' tuze bel-la' dxen chee Cristo.

<sup>26</sup> Che dxezrá'ale, quebe dxal-la' gunle dul-la, ne quebe zrá'ale scha'.

<sup>27</sup> Quebe güele da xriwe' lataj guchixre chee na le'e.

<sup>28</sup> Bénnea' guque' gubán québedxa dxal-la' cuane'. Dxal-la' guné' tu zrin chawe' nen ni'a ná'queze' chee gape' da gunézruje' benne' dxelexázejene'.

<sup>29</sup> Quebe nnele dizra' calela. Le guchalaj da naca na xrlátaje chee xelezé tipa benne' xelenne', ne xelezí'e na ba neza. <sup>30</sup> Quebe guzúa xáchele Be' Lá'azxa chee Dios, lawe' da zúale Be' le'e chee gaca bea na nácale bi chee Dios ca zrindxa zra xezi' lu ne'e dxi'u.

<sup>31</sup> Le guzúa chalá'ala:

Xel-la dxeuide', ne xel-la dxezrá'a, ne xel-la xichaj zra'a, ne xel-la wetil-la dizra', ne xel-la wechacha, ne xúgute da zrinnaj.

<sup>32</sup> Dxal-la' gácale du lazre', ne xache lázrele tule xetule,

ne gunite laule chee tule xetule ca ben Dios, bnite lawe' chee le'e lawe' da nácale bi chee Cristo.

## 5

*Ca dxal-la' xelaca bi ca' chee Dios*

<sup>1</sup> Lawe' da nácale bi cheequeze Dios, bi nazri'ine', le gun ba xuzre gácale cáteze nácaqueze Le'. <sup>2</sup> Le zri'i le sa' ljwézrele tule xetule cáteze ben Cristo, bzri'ine' dxi'u, ne bzanne cuine' waláz cheedxu ca tu zríla'dau', béadu dxelute benne' lau Dios chee xedúa xtul-le'. Gate gute Cristo le'e xaga béguaj, guca ca tu da dxelá xizre lau Dios da dxelegú'u bénneache lau Le'.

<sup>3</sup> Lawe' da nácale bi chee Dios, québedxa dxal-la' guchálajle chee da dxucá'ana ditaj na bénneache, ne chee da sban ca', ne chee xel-la wecude' da de. <sup>4</sup> Quebe guchálajle dizra' schanni', ne dizra' bize, ne dizra' calela,

da quebe dxulucá'ana na chawe' bènneache, san dxal-la' xéquezele Dios: "Xcalenu'." <sup>5</sup> Ba nézquezle quebe chu'u naga dxenná bea Cristo nen Dios netú benne' dxucá'ana dítajé' bènneache, u tu benne' dxuné' da sban, u tu benne' dxucúdié' da de, da naca na ca dxucá'ana szrene' bedau' xiaj xaga. <sup>6</sup> Quebe güele lataj nu si xé le'e nen dizra' xala, lawe' da ne cheé da nigá dxesel-la Dios da dxusaca zi na benne' ca' quebe dxuluzúé' dizra' cheé'. <sup>7</sup> Quebe gunle tu zren benne' dxeluné' da caní.

<sup>8</sup> Nédxute guzúale lu da chul-la, na' na'a zrágale xel-la naxaní' lawe' da nácale bi cheé Xránadxu. Cheé le na', le gun da naca na cheé xel-la naxaní', <sup>9</sup> da na' naca xel-la dxucá'ana chawe' ljuwézredxu, ne da xlátaje, ne da li. <sup>10</sup> Le gun zi' lázrele nézele gunle da dxezaca ba lazre' Xránadxu. <sup>11</sup> Quebe gunle tu zren benne' dxeluné' da caléla, da ca' naca cheé da chul-la, san le til-la da ca' <sup>12</sup> lawe' da naca na tu da xedué'edxu guchálajzedxu cheé da dxelún benne' ca' bagácheze. <sup>13</sup> Gate dxeledxúaj da caní lu da chul-la, ne zaj xu'u na lu xel-la naxaní', gulé'e lawe' ca zaj naca xúguté da caní, lawe' da dxulé'e lawe' xel-la naxaní' xúguté. <sup>14</sup> Ca naca da caní dxenná na:

Bebán, lue' dxásiu'.

Bexasa ládujla benne' gate,  
na' gusení' Cristo lu xichaj lazrda'u.

<sup>15</sup> Cheé le na', le guxúe xanne' ca da dxunle. Quebe gunle ca dxelún benne' zaj nachul-la nanítene', san le gun ca dxelún benne' zaj naxéajni'ine'. <sup>16</sup> Le guchine chawe' zra caní lawe' da dxácale'é da zrinnaj lu zra na'a zra. <sup>17</sup> Quebe gácale benne' xala, san le gun zi' lázrele chéajni'ile da dxaca lazre' Xránadxu gundxu. <sup>18</sup> Quebe súzrele, da na' dxuxrinnaj na bènneache, san du lázrele le si' Be' Lá'azxa. <sup>19</sup> Le guchálajle le sa' ljuwézrele tule xetule nen Salmo ca', ne nen da dxúl-lale, ne nen da du dxúl-lale da dxunna Be' Lá'azxa le'e. Du lázrele le gul-la, ne le güe lá'ana Xránadxu. <sup>20</sup> Le xéqueze Xradxu Dios: "Xcalenu'", cheé xúguté lu La Xránadxu Jesucristo.

*Ca dxal-la' xelún bi cheé Cristo nen lwézrebe'*

<sup>21</sup> Le gaca dxexruj lazre' tule xetule, ne le gapa ba lá'ana Dios.

<sup>22</sup> Nu'ula dxal-la' gaque' dxexruj lazre' lau benne' cheé', cáteze dxal-la' gaque' lau Xránadxu, <sup>23</sup> lawe' da naca benne' biu xíchaje cheé zru'ulé', cáteze naca Cristo xíchaje cheé bi cheé' ca'. Cristo naque' Benne' weselá cheé bi cheé' ca', bi zaj naca be' ca bel-la' dxen cheéqueze'. <sup>24</sup> Cáteze zaj naca dxexruj lazre' bi cheé' ca' lau Cristo, cá'anqueze nu'ula dxal-la' gaque' dxexruj lazre' lau benne' cheé' lu xúguté.

<sup>25</sup> Benne' biu dxal-la' zrí'ine' zru'ulé' cáteze ben Cristo, bzri'ine' bi cheé' ca', ne bzánene' xel-la nabán cheé' ne cheébe'. <sup>26</sup> Caní bene' cheé' bebéajé'-be' cheéqueze', ne ben chí'e-be' ne cheé dizra' cheé', da guca na ca dxun benne' dxexibe' bi cheé' nen nisa, <sup>27</sup> cheé guzúé'-be' lau Le', xelácabe' bi xabáa, ne quebe bi da sban zaj nápabe', ne netú da zrinnaj, ne netú da naca na ca da ca', san xelácabe' lá'azxa, ne du lazre'. <sup>28</sup> Cá'anqueze benne' biu dxal-la' zrí'ine' zru'ulé' cáteze nazri'ine' bel-la' dxen cheéqueze'. Benne' nazri'ine' zru'ulé' nazrí'i cuine'. <sup>29</sup> Netú benne' quebe dxecuídene' bel-la' dxen cheéqueze', san dxugawe' na, ne dxuxúé' na, ca dxúnqueze Cristo cheé bi cheé' ca' <sup>30</sup> lawe' da zaj nácabé' ca bel-la' dxen cheéqueze', na' dxi'u nácadxu ca ni'a na' bel-la' dxen cheé', ne nácadxu ca bel-la' dxen cheé', ne zrita cheé'. <sup>31</sup> Cheé le na' tu benne' biu dxal-la' gusané' xra xrné'é cheé gaque' tuze nen zru'ulé', na' dxúpaté' xelaque' ca tuze benne'. <sup>32</sup> Da nigá naca na tu da zren da nagache, na'

dxennía' da caní ca naca chee Cristo nen bi chee' ca'. <sup>33</sup> Cá'anqueze tu tule le'e dxal-la' zri'ile zrú'ulale cáteze nazrí'i cuínale, na' nu'ula dxal-la' gape' ba lá'ana benne' chee'.

## 6

<sup>1</sup> Le'e, bi cuide', lawe' da nácale bi chee Xránadxu, dxal-la' guzúale dizra' xruze xrna chee, da naca na xlátaje. <sup>2</sup> Da nadxixruj bea nedxu da zraga na tu da guchebe lazre' Dios naca na da dxenná na: Gudapa ba lá'ana xra xrna'u, <sup>3</sup> chee gaca chawe' chiu', ne chee su' scha' lu xezr la xu.

<sup>4</sup> Le'e, xruze xrna', quebe guchá'ale zrí'inele. Le gusegula-be' lu xel-la dxenná bea chee Xránadxu, ne le gusina-be' da naca chee Le'.

<sup>5</sup> Le'e, benne' nada'u, le guzúa dizra' chee benne' zaj naque' xránale lu xezr la xu nigá, ne le gapa le' ba lá'ana, ne le zrebe le', ne du lázrele le gaca chee', cáteze dxuzúale dizra' chee Cristo. <sup>6</sup> Le gun zrin chee xránale ca', quegaze gate dxelenná'te' le'e, ca dxelún benne' ca' dxelaca lazre' xelezaca ba lazre' bènneache chee'. Le gun zrin na' cáteze dxunle zrin chee Cristo, gunle du lázrele da dxaca lazre' Dios. <sup>7</sup> Le gun zrin chee xránale du lázrele, cáteze dxunle zrin chee Xránadxu, ne quegaze chee bènneache. <sup>8</sup> Ba nézquezle tu tu benne', benne' nada'u, ne benne' quebe nada'u, wazi'e lu na' Xránadxu ca naca da xrlátaje da nune'.

<sup>9</sup> Le'e, xrana benne' ca', cá'anqueze le gun le'e nen benne' wen zrin chee ca', ne quebe guzálajle le' lawe' da nézele zua Bènnea' xabáa naque' Xrana benne' ca', ne Xránale le'e, na' Le' quebe dxebéaje' cha chee bènneache.

### *Zra lana bi chee Cristo da dxácale lebe' lu wedil-la*

<sup>10</sup> Na'a, bi bícha'dau', le gaca chuchu ne chee Xránadxu nen xel-la wala zren chee'. <sup>11</sup> Le gaca ca benne' zjaque' wedil-la zaj nácu'e zra lan'e xia da na' dxunna Dios le'e, chee gaca se chúchule lau xúgut'e da dxuzé da xriwe' laule chee si xe na le'e. <sup>12</sup> Quegá dxedíl-lalédxu bènneache zaj naque' belá' dxen. Dxedíl-lalédxu xel-la dxenná bea chee da xriwe' da dxeledá na lu be', ne dxedíl-lalédxu be' xriwe' ca', da dxelenná bea na, ne be' xriwe' ca' dxé na ljwezre ca' da xelún na, ne be' xriwe' ca' xu'u lu na' na xezr la xu chul-la nigá. <sup>13</sup> Chee le na', le gaca ca benne' zjaque' wedil-la zaj nacue' zra lan'e xia da dxunna Dios le'e, chee séquele súale wedil-la lu zra che da xriwe', na' ca te na' xegá'ana chúchule. <sup>14</sup> Le se chuchu xca', suale le'e da li ca tu bazxu da nacá'a na le'ele, ne suale le'e da xlátaje ca tu xia da da' lachu'le. <sup>15</sup> Le gaca sina chee guchálajle dizra' chawe' chee xel-la dxebeza zrilazre', da gaca na chee ca tu cue' zréale. <sup>16</sup> Da dxun na ba xen, le gapa xel-la dxeajlí lazre', da gaca na chee ca tu da xegapa na, da xusula na xúgut'e da zaj nalá na zaj zua na xi' da dxuzala da xriwe'. <sup>17</sup> Xel-la weselé gaca na chee ca tu lapa xia da gucache xíchajle, na' xrtizra Dios gaca na chee ca tu xia da gunna Be' Lá'azxa le'e. <sup>18</sup> Gate ne dxunle da caní dxal-la' guchálajlele Dios, gata' xúele, ne nábale lau Le' ne chee Be' Lá'azxa. Chee gaca gunle da caní dxal-la' súale ban lazre', ne quebe gate ni'a na'le, na' nábale Dios chee gácalene' xúgut'e bi chee' ca'. <sup>19</sup> Cá'anqueze le naba Le' waláz chia' neda' chee gunne' neda' dizra' da guchálaja', chee xazrda' guzenda' bènneache dizra' chawe' chee'. <sup>20</sup> Dios bene' neda' gubáz chee dizra' chawe' chee', na' chee le na' xu'a lizre xia na'a. Le naba Le' gácalene' neda' chee xazrda' guchálaja' dizra' chawe' chee' ca dxal-la' guna'.

*Pablo dxugape' diuzre le sa' ljwezre'*

<sup>21</sup> Tíquico, bi bíchedxu nazri'ite lazrdxu, bi li lazre' lu zrin chee Xránadxu, guzenbe' le'e da dxaca chia' nigá, ne da dxuna'. <sup>22</sup> Chee le na' dxusel-la-be' lau le'e chee guzenbe' le'e ca zúantu', ne chee gutípabe' lázrele.

<sup>23</sup> Dxenaba' lau Xradxu Dios, ne lau Xránadxu Jesucristo gunézruje' bi bíchedxu ca' zaj zre'e na' xel-la dxebeza zri lazre', ne xel-la zri'i lazre', ne xel-la dxeajlí lazre', <sup>24</sup> na' gunē' chawe' xúgutē benne' ca' du lazre' zaj nazri'ine' Xránadxu Jesucristo. Ca'an gaca na.



## DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE FÍLIPOS

*Pablo dxugape' diuzre bi bíchedxu ca' zaj zre'e xezre Filipos*

<sup>1</sup> Neda' Pablo, ne Timoteo nácantu' wen zrin chee Jesucristo. Dxuzúaja' da nigá chee le'e, bi bíchentu', ne chee le'e, dxuxúele bi chee Cristo, ne le'e, zaj xu'u lu na'le bi chee Cristo, ne zrale xezre Filipos. Nabábale chee Dios, ne nácale tuze nen Jesucristo. <sup>2</sup> Dxenábantu' lau Xradxu Dios, ne lau Xránadxu Jesucristo guné' chee da xrlátaje, ne gunné' le'e xel-la dxebeza zri lazre'.

*Da dxenaba Pablo gun Dios chee bi ca' chee Cristo*

<sup>3</sup> Tu tu lasa dxajsá lazra' le'e dxapa' Dios chia': Xcalenu'. <sup>4</sup> Gate dxuchálajlena' Dios, duté xel-la dxebe dxenábaqueza' bi gun Le' chee xúgutele le'e. <sup>5</sup> Caní dxuna' lawe' da dxundxu zrin tu zren chee dizra' chawe' chee Cristo gate guzú lau núnbe'tu' na bzrinte lu zra na'a zra. <sup>6</sup> Dxuxrén lazra' Dios, Bénnea' guzú lawe' dxuné' tu zrin chawe' lu xichaj lázrdaule le'e, gúnqueze' na ca zrinte zra xelá' Jesucristo. <sup>7</sup> Naca xrlátaje dxéqueda' neda' caní chee xúgutele le'e, lawe' da nazrí'ile'eda' le'e, ne dxezidxu tu zren da chawe' ca' dxunna Dios dxi'u. Dxácate ne xu'a lizre xia nigá, ne gate na' gudíl-lalena' bénneache ca' dizra', benne' ca' guledábague' dizra' chawe' chee Cristo, ba ble'eda' benne' ca' naca na da li. <sup>8</sup> Dios nézquezené' nazrí'ile'eda' le'e, lu duté xel-la zri'i lazre' da dxunna Jesucristo neda'. <sup>9</sup> Dxenaba' lau Dios guné' zrí'idxa ljwézrele, ne gápale'eqezele xel-la sina, ne xel-la dxéajni'i lu xúgute da dxunle, <sup>10</sup> chee nézele cuele da cháwedxa, chee gácale du lazre', ne quebe bi gata' da gagu na zria chee lu zra na' xelá' Cristo. <sup>11</sup> Caní gaca, da ca' dxunle xululé'e na da xrlátaje da dxun Jesucristo lu xichaj lázrdaule, chee gaca ba lá'ana Dios, ne xegá'ana szrénqueze'.

*Dxenná Pablo: Che naca bana', Cristo dxuchínene' neda'*

<sup>12</sup> Le'e, bi bícha'dau', dxaca lazra' nézele ca da ca' guzraca' gulácale na neda' chee bchálaja' dizra' chawe' chee Cristo. <sup>13</sup> Caní guca, xúgute benne' xra'aga xu'u lawe', ne xezícadxa benne' ca' zaj zre'e xu'u lawe' na' zaj nézene' xu'a lizre xia lawe' da dxuna' zrin chee Cristo. <sup>14</sup> Lawe' da xu'a neda' lizre xia nigá, chaze xúgute bi bíchedxu ca' dxuluxrén lázredxe' Xránadxu, na' dxuluchálaje' du lazre' dizra' chee Dios, ne quebe dxelezrebe'.

<sup>15</sup> Da li bal-la benne' ca' dxuluchálaje' ca naca chee Cristo lawe' da zaj naque' zre'e lazre', ne zaj naque' wil-la dizra'. Xezícadxa benne' caní dxuluchálaje' na duté xel-la li lazre' chee'. <sup>16</sup> Benne' nedxu ca' dxuluchálaje' da naca chee Cristo chee xulucá'ana szren cuingé', ne quegá du lazre', lawe' da dxelaca lazre' súadx da guzúa na neda' stebe dxácate xu'a lizre xia nigá. <sup>17</sup> Xezícadxa benne' ca' dxelune' na duté xel-la zri'i lazre' chee', lawe' da zaj nézene' nuzúa cuina' guzéajni'ida' benne' ca' dxeledábague' dizra' chawe' chee Cristo. <sup>18</sup> ¿Bizra xca'? Ájatezla dxelune', che dxuluchálaje' du lazre', u quebe dxuluchálaje' du lazre', dxuluchálaje' chee Cristo, na' dxebeda', ne wabéquezda' <sup>19</sup> lawe' da nezda' lu xúgute da caní wedxúaj na chawe' chia' neda', lawe' da dxenábale le'e lau

Dios chia' neda', na' gácale Be' Lá'azxa neda', Bénnea' gusel-le' Jesucristo cheedxu. <sup>20</sup> Dxaca lazra', ne dxuxrén lazra' quebe xedué'eda' neda', séqueda' guchálaja' du lazra' chee xeledé'e bénneache zúaledxa xel-la szren chee Cristo neda' na'a, ca zúalequeze na neda', che gaca bana', u che gatia'. <sup>21</sup> Chia' neda', che naca bana', Cristo dxuchínené' neda', ne che gatia' wazrue'eda' da cháwedxa. <sup>22</sup> Che xedxúaj na chawe' chee zrin chee Xránadxu che naca bana', quebe nezda' bila na ca'a. <sup>23</sup> Naca na stébe chia' neda' bila da caní ca'a. Dxaca lazra' gatia' chee cheajsúalena' Cristo, da gácadxa chawe' chia' neda', <sup>24</sup> san che naca bana' nácadxa chawe' chee le'e. <sup>25</sup> Lawe' da nuxrén lazra' naca caní, nezda' wazúaledxa' le'e chee se cháchadxale lu da naca chee Cristo, ne chee béquezdxale. <sup>26</sup> Chee le na' bédxale lu da naca chee Cristo ne chia' neda' gate súalena' le'e.

<sup>27</sup> Dxun na ba xen gunle da dxuzéajni'i dizra' chawe' chee Cristo le'e, na' che xedajnná'a le'e, u che sua' zitu', wenda' ze cháchale, ne nácale tuze, dxunle tu zren zrin chee Cristo chee xeleajlí lazre' bénneache dizra' chawe' chee'. <sup>28</sup> Quebe zrébele benne' ca' dxeledábague' le'e. Ca dxunle gulé'e na le' xelebía xi'e, na' nalale le'e lawe' da bselá Dios le'e. <sup>29</sup> Tu da zrenté naca da dxunna Dios le'e gate gunle zrin chee Cristo, gageze chéajlele chee', na' cá'anqueze che tele xel-la zi' ne chee Le'. <sup>30</sup> Le'e dxunle neda' tu zren dxedíl-lalédxu da zaj naca da calela. Blé'equezle gate nate ca gudíl-lalena' na, na' na'a dxenle ca dxedíl-lalena' na.

## 2

### *Xel-la dxexruj lazre', ne xel-la szren chee Cristo*

<sup>1</sup> Cristo dxutipe' lázrele, na' xel-la zri'i lazre' chee' dxuzúa na le'e lu da ba neza, na' Be' Lá'azxa chee' zúalene' le'e, na' nápaie xel-la zri'i lazre', ne xel-la dxexache lazre' chee'. <sup>2</sup> Chee le na' le gun ga béle'eda', gaca tuze ca da dxéquele, ne gácale tuze lu xel-la zri'i lazre' chee, ne gunle tuze lu xichaj lárdaule. <sup>3</sup> Quebe bi gunle chee xulucá'ana szren bénneache le'e, ne chee gaca gucá'ana szren cuínale, san duté xel-la dxexruj lazre' chee dxal-la' guéquele nácadxa blau le sa' ljwézrele ca le'e. <sup>4</sup> Netule le'e quebe dxal-la' gunle ca da gácalen le'eze. Le gun da gácalen na xezícadxa bénneache.

<sup>5</sup> Dخال-la' si' lu na'le da gaca na chee ca ben Jesucristo. <sup>6</sup> Lácala naque' ca nácaqueze Dios, quebe gúquene' dxal-la' gune' ba xuzre xegá'anaqueze' ca Dios. <sup>7</sup> Bzue' chalá'ala da nápaqueze', ne ben cuine' ca tu benne' nada'u, guque' bénneache. <sup>8</sup> Gate ba naque' bénneache, guque' dxexruj lazre', na' bzue' dizra' chee Dios ca bzrinté gutie', lácala gutie' ca tu benne' wen da calela le'e xaga béguaj. <sup>9</sup> Chee le na' Dios bca'ana szréné'e Le', ne bzue' tu Le' da naca szrendxa ca xúgute' la xezícadxa, <sup>10</sup> chee gate xelenne' La Jesús, na' xuluzú zribe lau Le' xúgute' benne' zaj zré'e xabáa, ne xezr la xu nigá, ne zran xezr la xu nigá, <sup>11</sup> ne chee xelexechebe xúgute' naca Jesucristo Xránadxu, chee gaca ba lá'ana Xradxu Dios.

### *Bi chee Cristo zaj nácabe' ca xi' da dxulusení na*

<sup>12</sup> Chee le na', le'e, bi bicha' nazri'ite lazra', ca na' benle le'e, bzúaquezle dizra' chee Dios gate na' zúalena' le'e, le guzúadxa dizra' chee Dios na'a gate zua' zitu'. Duté xel-la dxexruj lazre', ne duté xel-la dxezrebe le gun zrin chee zrué'ele duté ca naca xel-la weselá chee, <sup>13</sup> lawe' da dxun Dios zrin lu xichaj lárdaule chee sa lázrele gunle da xrlátaje da dxaca lazre' Le', ne chee séquele gunle na.

<sup>14</sup> Le gun xúgute da dxunle, ne quebe gáchajele, ne quebe gutil-la dizra' ljuwézrele <sup>15</sup> chee gácale li lazre', ne quebe nu nne chee. Gácale bi chee Dios du lazre' ládujla bémneache zaj naque' benne' dxelún da calela, ne gácale ca belaj ca' dxulusení na lu xezr la xu naga nachul-la na, <sup>16</sup> ne guchálajlele benne' ca' dizra' da nua na xel-la nabán. Che gunle caní, neda' wezaca ba lazra' chee gate xelá' Cristo, lawe' da wanezda' quebe ben zi' lazra' dácheze, ne quebe bena' zrin níteze. <sup>17</sup> Béle'eda' lácala gun na ba xen gatia' chee gaca li lazre' xel-la dxeajlí lazre' chee lau Dios. Bzua cuínale lu na' Dios ca tu guna' da gúnnale chee', na' chee le na' béle'equezda' tu zren nen xúgutele le'e. <sup>18</sup> Le béqueze le'e, ne le gun tuze neda' lu xel-la dxebe' chia'.

*Ca naca chee Timoteo, ne Epafrodito*

<sup>19</sup> Che naca da dxaca lazre' Xránadxu Jesús, dxebeza lazra' sél-lazequeza' Timoteo xedajnná'abe' le'e, chee beda' gate xelabe', ne guzenbe' neda' chee le'e. <sup>20</sup> Quebe nu chilá' xetú benne' guéqueñe' chee ca da dxéqueda' neda'. Tuze Timoteo dxe'ebe' gunne xue chee gaca chawe' chee le'e. <sup>21</sup> Xúgute benne' ca' xezícala zaj dxe'e gunne xue da zaj naca cheeze', ne quebe zaj dxe'e gunne xue da naca chee Jesucristo. <sup>22</sup> Le'e nézqueze ca da xrlátaje dxun Timoteo, ne ca benbe' zrin tu zren nen neda'. Dxuchálajntu' dizra' chawe' chee Cristo, na' dxunbe' ca dxun tu bi dxácalebe' xrabe'. <sup>23</sup> Caní naca, dxebeza lazra' sel-la'-be' gate nezda' ca gaca chia'. <sup>24</sup> Dxuxrén lazra' Xránadxu, néda'queza' xida' xedajnná'a le'e.

<sup>25</sup> Cá'anqueze dxéqueda' dxun na ba xen sel-la' Epafrodito, bi bichedxu. Dxunbe' zrin tu zren nen neda', dxdíl-lalentu' da calela. Lé'equeze gusél-lale bi nigá chee gácalenbe' neda', ne xu'a lizre xia nigá. <sup>26</sup> Dxezá lázrele'ebe' xedajnná'abe' le'e, ne zúale'ebe' stébe lawe' da nézebe' bénele quebe chawe' guzúabe'. <sup>27</sup> Da li quebe chawe' guzúabe', ne bache gátebe', san Dios bexache lazre' lebe', ne quegá tuze lebe', cá'anqueze neda' chee quebe xewine lázredxa' ca da dxaca chia' na'a. <sup>28</sup> Chee le na' dxezá lázredxa' sel-la' lebe' chee bele le'e gate xel'é'ele lebe', ne chee québedxa xewine lazra' neda'. <sup>29</sup> Le xezí' lu na'le lebe' duté xel-la dxebe', ca bi bíchele lu da naca chee Xránadxu, ne le gápaqueze ba lá'ana benne' ca' zaj naque' ca lebe', <sup>30</sup> lawe' da guzúa gátebe' dxunbe' zrin chee Cristo. Bzuabe' lu da stébe xel-la nabán chee' chee gunbe' zrin chia' da quebe guzéquele le'e gunle.

### 3

*Da naca chawe' da naca na du lazre'*

<sup>1</sup> Na'a, bi bicha', le be lu da naca chee Xránadxu. Quebe naca na zede chia' neda' guzúaja' chee xecha lasa ca da ba bzúajqueza', lawe' da dxun na ba xen guna' da nigá chee. <sup>2</sup> Le guxúe cuínale chee benne' ca' dxeluné' da calela, ne zaj naque' ca becu', benne' ca' dxelechugue' lu bel-la' dxen da na' naca bea na benne' zaj naque' chee Dios. <sup>3</sup> Dxi'u nácadxu benne' nápaquezdxu da dxunna bea na nácadxu chee Dios, ne dxue lá'anadxu Dios ne chee Be' Lá'azxa, ne dxebedxu lawe' da nácadxu bi chee Jesucristo. Quebe dxuxrén lázredxu da dxundxu, <sup>4</sup> lácala neda' wazéqueda' guxrén lazra' da ca' nuna'. Che nu benne' dxéqueñe' waca guxrén lazre' ca da ba nune', wazéquedxa' neda'. <sup>5</sup> Gate gúqueda' xrunu' zra gulechugue' lu bel-la' dxen chia' da na' dxulé'e na naca' chee Dios lawe' da naca' benne' Israel, ne xrtia Benjamín. Naca' da li benne' hebreo.

Guca' benne' fariseo ca buzájla'a da bdxixruj be'e Moisés. <sup>6</sup> Gudxéle'a gunne xue da naca chee Dios ca bzrinte gudáu zi' xuzra' benne' ca' zaj nácabé' bi chee Jesús. Ca naca da xlátaje da napa tu benne' dxune' ca dxenná da nadxixruj bea na, quebe nu benne' guzéquene' bi nnie' chia'. <sup>7</sup> Xúgute da ca' gúqueda' gate nate zaj zácale'e na, na'a dxéqueda' da ca' quebe bi zaj zaca na, lawe' da nazrí'idxeda' Cristo. <sup>8</sup> Da li dxéqueda' xúgute da ca' ca tu da nite lawe' da zácadxa Xrana' Jesucristo. Lawe' da nazrí'ida' Le' ba bzua' chalá'ala xúgute da gudapa', ne dxéqueda' da ca' ca tu da níteze chee si'a da ba neza da dxunna Cristo, <sup>9</sup> chee gaca' tuze nen Le', quegá lawe' da guca' xlátaje ne chee da nadxixruj bea na na', san lawe' da ble'e Dios neda' xlátaje lawe' da dxeajlí lazra' Cristo, na' Dios dxelé'ene' xlátaje xúgute benne' dxeajlí lazre' Cristo. <sup>10</sup> Da dxaca lazra' naca na gúnbeadxá' Cristo, ne súale xel-la waca neda' da bsebán na Le', ne tea' xel-la zi' ca da gudé'e Le', ne gudé' cuina' lu na' Dios lácala dxal-la' gatia' ca gute Cristo, <sup>11</sup> na' dxebeza lazra' xebana' ládujla benne' gate ca'.

*Pablo dxun zi' lazre' gusexuzre' gune' zrin chee Cristo*

<sup>12</sup> Quebe dxennía' ba bzrué'eda' xúgute da caní, u ba naca' dute xlátaje, san dxun zi' lazra' chee zrué'eda' da na' bláwizra Jesucristo neda' chee zrué'eda'. <sup>13</sup> Le'e, bi bicha', quebe dxennía' ba bzrué'eda' da nigá, san tuze da dxuna', dxuzúa' chalá'ala da ba gudé, ne dxun zi' lazra' chee zrué'eda' da za za', <sup>14</sup> chee gusexuzra' guna' zrin da dxuna', chee zrué'eda' da na' bláwizra Dios dxi'u sidxu lu xabáa chee' lawe' da nácadxu bi chee Jesucristo.

<sup>15</sup> Caní dxal-la' guéquedxu dxi'u, ze cháchadxu ca naca da dxeajlí lázredxu. Che quebe dxétele caní chee bíteteze da caní, Dios guzéajni'ine' le'e ca naca chee na. <sup>16</sup> Tuze ca dxal-la' guéquedxu, ne tuze ca dxal-la' gundxu lu da ca' ba bzrué'edxu.

<sup>17</sup> Le'e, bi bícha'dau', le gun ca dxuna' neda', ne le nna' ca dxelún benne' ca', dxelune' ca da blé'entu' le'e. <sup>18</sup> Zane' lasa ba gucha' le'e, ne na'a dxebézrtea' dxapa' le'e, zrále'e bi bíchedxu dxelune' ca dxelún benne' dxuluzúe' chalá'ala da ben Cristo le'e xaga béguaj. <sup>19</sup> Ca gaca chee benne' ca' lu zra bzebe, xelebía xi'e. Zaj nune' dios chee da dxelé'aj dxelawe', ne dxulucá'ana szren cuine' chee da na' dxal-la' xelapa stu'e. Zaj dxe'e gunne xue da naca chee xezr la xu nigaze. <sup>20</sup> Dxi'u nácadxu benne' zaj nababe' xabáa, ne dxebézadxu zra xelá' benne' weselá cheedxu, Xránadxu Jesucristo, ze'e xabáa. <sup>21</sup> Le' xegüe' bel-la' dxen cheedxu da dxeledé chee na, ne guné' na ca naca bel-la' dxen xabáa chee', guchínene' xel-la waca chee' da nape' chee nna bé'ene' xúgute da zaj zua.

## 4

*Dxal-la' béquezdxu lu da naca chee Xránadxu*

<sup>1</sup> Chee le na' le'e, bi nazri'ite lazra', le se chacha lu da naca chee Xránadxu. Le'e, bi bícha'dau' nazri'ite lazra', dxezá lázrele'a le'eda' le'e, lawe' da dxebeda' ca nácale le'e, na' lawe' da bena' neda' nácale bi chee Cristo dxal-la' si'a tu da gunna Dios neda'.

<sup>2</sup> Dxata' xueda' Evodia, ne Síntique xelaque' tuze, lawe' da zaj naque' bila ne chee Xránadxu. <sup>3</sup> Na'a lue', bi ljwezra' li lazre', dxata' xueda' lue' gácalenu' nu'ula zandxu caní, nu'ula belúnlene' neda' zrin chee dizra' chawe' chee Cristo. Belune' zrin na' tu zren nen Clemente, ne xezícadxa

benne' ca' belúnleṅe' neda' zrin. La benne' caní zaj naxúaj na lu xiche cheḡ xel-la nabán zeajlí canna.

<sup>4</sup> Le béqueze lu da naca cheḡ Xránadxu. Xecha lasa dxennía': Le be.

<sup>5</sup> Dxaca lazra' xeleguḡ be'e xúguṡe bēneache nácale zren lazre'. Ba zua bagu zra xelá' Xránadxu.

<sup>6</sup> Quebe bi cuele gunne xue, san le guchálajlequeze Dios ca naca cheḡ da ca'. Le naba na lau Dios, na' le xē'e: Xcalenu'. <sup>7</sup> Nadxa gunna Dios le'e xel-la dxebeza zri lazre', da naca na szrendxa ca da seque' gúnbea bēneache, na' guzúa chuchu na xichaj lázrdaule ne cheḡ Jesucristo.

*Le gulaba lazre' ca naca da xrlátaje*

<sup>8</sup> Na'a, bi bicha', le gulaba lazre' ca naca

xúguṡe da zaj naca li, ne

xúguṡe da zaj napa na ba lá'ana, ne

xúguṡe da zaj naca na li lazre', ne

xúguṡe da zaj naca na du lazre', ne

xúguṡe da dxezaca ba lazre' Dios, ne

xúguṡe da dxulucá'ana na bēneache xrlátaje.

Che zua tu da naca xrlátaje, u da dxal-la' gucá'ana szrendxu, le gulaba lazre' da caní.

<sup>9</sup> Le gun ca naca da bsédeda' le'e, ne da bzéajni'ida' le'e, ne da bzenda' le'e, ne da ble'eda' le'e, na' súale Dios le'e, Bēne' dxunne' dxi'u xel-la dxebeza zri lazre'.

*Da gulese-la benne' Filipos ca' cheḡ Pablo*

<sup>10</sup> Dxebéle'eda' ne cheḡ Xránadxu, lawe' da dxajsá lázrele neda'. Quebe dxennía' ba gul-la lázrele neda', san quebe guta' lataj gácalele neda'.

<sup>11</sup> Quebe dxennía' da nigá lawe' da bi dxexázejda', lawe' da ba bsede Xránadxu neda' sua' xel-la dxebé ájateze dxaca chia'. <sup>12</sup> Ba gudéa' xel-la xache', ne cá'anqueze xel-la gunní'a. Nazédia' dxuchaga lawa' xúguṡe

da dxaca chia', che néljada', u che dxeduna', che nápalé'a, u che quebe bi napa'. <sup>13</sup> Xúguṡe wazéqueda' guchaga lawa' lawe' da dxuzé tipa Cristo neda'. <sup>14</sup> Benle da xrlátaje, gúcalele neda' ne cheḡ da gusél-lale chia'.

<sup>15</sup> Ba nézquezle le'e, benne' Filipos, ca guca gate guzú lawa' dxuchálaja' dizra' chawe' cheḡ Cristo nigá. Gate bezá'a xezre ca' zaj nababa xezr la xu Macedonia, le'eze gusél-lale chia' dumí cheḡ da guzí' lu na'le. <sup>16</sup> Gate

guzúa' xezre Tesalónica, chupa chunna lasa gusél-lale dumí chia' cheḡ quebe bi xázejda'. <sup>17</sup> Quebe dxennía' da nigá lawe' da dxaca lazra' bi

gúnnae chia', san dxaca lazra' gácadxa da ba neza cheḡle le'e lau Dios. <sup>18</sup> Ba guzi'a xúguṡe da gusél-lale, na' dele'e chia'. Ca naca da gusélal-le chia'

lu na' Epafrodito, da zrendxa guca na ca da bexázejda'. Da na' gusél-lale naca na ca tu guna' da dxelá zixre na lau Dios, u tu da bzúale lau Dios

da dxezaca ba lazre'. <sup>19</sup> Dios chia' gunne' le'e xúguṡe da dxexázejle, cheḡ xel-la gunní'a cheḡ xabáa cheḡ ne cheḡ Jesucristo. <sup>20</sup> Gaca ba Xradxu Dios

chadía chacanna. ¡Ca'an gaca na!

*Pablo dxuzé dizra' benne' Filipos ca'*

<sup>21</sup> Waláz chia' neda' le gugapa diuzre lu La Jesucristo xúguṡe benne' zaj nababe' cheḡ Dios. Bi bíchedxu ca' zaj zúale neda' dxulugape' le'e

diuzre. <sup>22</sup> Xúguṡe bi bíchedxu zaj zre'e nigá, benne' zaj nababe' cheḡ Dios, ne bi bíchedxu zaj zre'e lizre bēne' dxenná bé'ene' xezr la xu Roma, dxulugape' le'e diuzre.

<sup>23</sup> Dxenaba' lau Xránadxu Jesucristo gunē' da chawe' chee xúgutēle le'e.  
Ca'an gaca na.

## DIZRA' BZUAJ SAN PABLO CHEE' BI CHEE' CRISTO ZAJ ZRE'E XEZRE COLOSAS

*Pablo dxugape' diuzre bi bíchedxu zaj zre'e xezre Colosas*

<sup>1</sup> Neda', Pablo, naca' gubáz chee' Jesucristo lawe' da naca da dxaca lazre Dios, na' zúale bi bíchedxu Timoteo neda'. <sup>2</sup> Dxuzúaja' da nigá chee' le'e zrale xezre Colosas, ne nabábale chee' Dios, ne dxeajlí lázrele Cristo. Dxenaba' Xradxu Dios gunę' da chawe' chee' le'e, ne gunnę' le'e xel-la dxebeza zri lazre'.

*Da dxenaba Pablo lau Dios chee' bi bíchedxu ca'*

<sup>3</sup> Dxéquezentu' Dios, Xra Xránadxu Jesucristo: Xcalenu' ca naca chee' gate dxuchálajlentu' Le'. <sup>4</sup> Ba bémentu' ca dxeajlí lázrele Cristo, ne ca nazrí'ile xúgute' bi ca' chee' Dios. <sup>5</sup> Caní dxunle lawe' da dxebeza lázrele da nucueza Dios chee' xabáa, na' guzú laule dxunle ca naca da nigá gate guzile dizra' chawe' da naca na da li. <sup>6</sup> Dizra' chawe' nigá bla na ládujla le'e ca bla na dute' xezr la xu nigá, na' dxezriluj na, ne dxun na zrin dute' xezr la xu ca dxun na ládujla le'e, gate bénte'le ca nazrí'i Dios bénneache, ne gunézele naca na da li. <sup>7</sup> Da nigá ble'e Epafras le'e. Naque' bi bíchedxu nazrí'i lázredxu, ne ba bénqueze' zrin nen netu', ne naque' chee' le'e tu benne' wen zrin li lazre' chee' Cristo. <sup>8</sup> Epafras nigá bzenne' netu' ca dxaca chee' le'e, ne ca nazrí'i ljwézrele ne chee' Be' Lá'azxa.

<sup>9</sup> Chee' le' na', zra gunézentu' da nigá, dxuchálajlequezentu' Dios chee' le'e, ne dxenábantu' Le' guzėjni'ing' le'e ca naca da dxaca lazre', ne gunnę' le'e dute' xel-la sina, ne dute' xel-la dxėjni'i da dxunna Be' Lá'azxa dxi'u. <sup>10</sup> Caní dxenábantu' Le' chee' gaca gunle ca dxal-la' xelún bi ca' chee' Xránadxu, ne gunle ca da dxezaca ba lazre' Le', gunle xúgute' da naca da xrlátaje, ne gúnbeadxaquezle Dios. <sup>11</sup> Dxenábantu' Le' guzúa chache' le'e lu xel-la waca da naca chee' xel-la szren chee' chee' séquele guchaga laule xúgute' da dxaca chee' lu dute' xel-la zren lazre' chee' le'e, ne dute' xel-la dxebé. <sup>12</sup> Dخال-la' xe'le Dios: Xcalenu', lawe' da bzua Dios dxi'u chee' sidxu da nucueze' cheedxu, chee' súadxu lu xel-la naxaní' chee', lawe' da nácadxu bi chee' Le'. <sup>13</sup> Dios bselé' dxi'u lu xel-la dxenná bea chee' da chul-la, na' bzue' dxi'u naga dxenná bea Zrí'ing' nazrí'ite lazre'. <sup>14</sup> Zrí'ing' nácaqueze' Bénnea' bselé' dxi'u gate gutie' waláz cheedxu, chee' bnite lau Dios dul-la gubágadxu.

*Bexácadxu tuze nen Dios lawe' da gute Cristo*

<sup>15</sup> Ca naca Jesús, dxulé'e na dxi'u ca nácaqueze Dios, Bénnea' quebe gaca lé'edxu, ne naque' chee' Dios ca tu bi nedxu chee' bénneache, bi nácadxabe' blau ca xúgute' da ben Dios. <sup>16</sup> Ne chee' Le' ben Dios xúgute' da zaj zua xabáa, ne da zaj zua xezr la xu nigá, da ca' dxelé'edxu, ne da ca' quebe gaca lé'edxu, che zaj naca na be' ca' zaj naca na blau, u be' ca' dxelenná bea na, u be' ca' zaj napa na xel-la szren, u be' ca' zaj napa na xel-la waca, xúgute' na ben Dios ne chee' Le', na' chee' Le' zaj naca na. <sup>17</sup> Cristo ba zúaqueze' nédxute' ca xúgute' da zaj zua, na' ne chee' Le' xúgute' da ca' dxelún na ca zaj naca chee' na. <sup>18</sup> Xúgute' benne' zaj naque' bi chee' Cristo zaj naque' ca tuze be'la' dxen, na' Crístoqueze naque' xichaj be'la' dxen na' da nácadxu. Le' bzue' be'la' dxen na', ne Le' naque' Benne' bebán nédxute' ládujla benne'

gate ca' chee gaque' Benne' blau lu xúgute da zaj zua. <sup>19</sup> Caní naca na lawe' da guca lazre' Dios súale Cristo dutē da nácaqueze Dios. <sup>20</sup> Cá'anqueze guca lazre' Dios ne chee Cristo xexune' tuze nen Le' xúgute da zaj zua, ca da zaj zua na lu xezr la xu, ne da zaj zua na xabáa. Bexune' dxi'u tuze nen Le' ne chee xel-la gute chee Cristo le'e xaga béguaj.

<sup>21</sup> Nédxute le'e gúcale ca benne' zitu' lau Dios, ne bzrá'ale Dios lu xichaj lázrdaule, ne benle xúgute da calela, san na'a Dios ba bexune' le'e tuze nen Le', <sup>22</sup> ne chee da ben Cristo gate gutie' le'e xaga béguaj lu bela' dxen chee'. Da nigá ben Le' chee gaca guzúe' le'e lau Le', gácale benne' lá'azxa, ne du lazre', ne quebe bi nabágale da calela. <sup>23</sup> Chee gaca caní dxal-la' se cháchale, ne sua típale ca dxeajlí lázrele Cristo, ne quebe gusanle ca da dxebeza lázrele, da na' nápale lawe' da dxéajlele dizra' chawe' chee Cristo. Dizra' chawe' nigá nene na dutē xezr la xu, na' nuzúa Dios neda', Pablo, benne' wen zrin chee', chee guchálaja' dizra' chawe' nigá.

### *Zrin dxun Pablo chee bi ca' chee Cristo*

<sup>24</sup> Na'a dxebeda' lu xel-la zi' da dxedéa' ne chee le'e, lawe' da dxuzá lawa' lu bel-la' dxen chia' ca da dxezaca Cristo ne chee bi chee' ca', benne' ca' zaj naque' ca bel-la' dxen cheéqueze'. <sup>25</sup> Bzua Cristo neda' ca benne' wen zrin chee bi chee' ca', ne chee da bláwizra Dios neda' guna', gácalena' le'e, na' guchálaja' dútequeze da naca dizra' chee Dios, <sup>26</sup> ne chee guzėjni'ida' bénneache ca da nagache, da na' nagache nédxute, san na'a Dios ba blé'ene' bi chee' ca' ca naca na. <sup>27</sup> Guca lazre' Dios gulé'ene' benne' ca' ca naca xel-la gunní'a zren chee da na' nagache nédxute, da gunézruje' benne' ca' quebe zaj naque' judío. Da na' nagache nédxute naca na caní: Cristo zue' xichaj lázrdaule, na' chee le' na' dxebeza lázredxu súadxu xabáa chee'.

<sup>28</sup> Netu' dxuchálajntu' ca naca chee Cristo. Dxuzėjni'intu' xúgute bénneache, ne dxusédentu' xúgute', chee xeleajni'i xánnene' chee xelaca xúgute bénneache du lazre' lau Dios ne chee Jesucristo. <sup>29</sup> Chee gaca caní dxuna' neda' zrin, dxuchíneda' dutē xel-la waca chee Cristo, da dxun na zrin lu xichaj lázrdawa'.

## 2

<sup>1</sup> Dxaca lazra' nézele le'e dxúnle'a zrin, dxe'a gunne xue len Dios da naca chee le'e, ne da naca chee bi bíchedxu ca' ca' zaj zre'e Laodicea, ne da naca chee xúgute bi bíchedxu ca' quebe ne xelelé'ene' neda' caníqueze. <sup>2</sup> Dxaca lazra' xeledipa lazre', ne xelaque' tuze lu xel-la zri'i lazre', ne xelaque' benne' gunní'a lu xichaj lázrdawe', chee xelúnbe'e da nagache chee Xradxu Dios da nácaqueze Cristo. <sup>3</sup> Lu na' Le' zaj de ca naca xel-la gunní'a chee xel-la sina, ne xel-la dxéajni'i. <sup>4</sup> Dxapa' le'e da nigá chee quebe xelezí xe le'e benne' ca' zaj neze xrgúe' ca dxuluchálaje'. <sup>5</sup> Lácala quebe zúaletea' le'e caníqueze, naca na cáteze zúalena' le'e lu be' nácaqueza', na' dxebéle'eda' dxenda' dxunle da xlátaje, ne ze cháchale ca dxeajlí lázrele Cristo.

<sup>6</sup> Chee le' na', ca benle, guzí' lu na'le Xránadxu Jesucristo, cá'anqueze dxal-la' gunle súalele Le'. <sup>7</sup> Dخال-la' gácale ca tu xaga da dxudé lue na sítuja lu da naca chee Cristo. Cá'anqueze dxal-la' gácale ca tu xu'u da dxe' lane lu da naca chee' Le', chee se cháchale ca dxeajlí lázrele Le', ca blé'entu' le'e, na' dxál-la'queze xe le Dios: Xcalenu'.

*Xel-la nabán cube da dxunna Cristo dxi'u*



<sup>8</sup> Le guxúe cuínale. Quebe güele lataj xelezí xę benne' ca' le'e, xuluchíneņę' xel-la sina cheę bénneache, ne dizra' caleļa, ca naca da dxulusédequeze bénneache, ne ca zaj naca da ca' dxácaqueze lu xęzr la xu nigá, ne quegá ca naca cheę Cristo.

<sup>9</sup> Dute ca naca Dios nácaqueze Cristo.

<sup>10</sup> Nápaie le'e xúgute da naca cheę' lawe' da nácaquezle bel-la' dxen cheę Le'. Le' dxenná be'ene' xúgute be' da dxelenná bea na, ne xúgute be' da zaj napa na xel-la waca.

<sup>11</sup> Cá'aqueze, lawe' da nácale tuze nen Cristo nácale bi cheę Dios. Quebe guca cheęle ca da na' belúnqueze benne' judío ca', gulechugue' late' bel-la' dxen cheę bi biu cheę' ca', da na' dxulé'e na zaj nácabe' cheę Dios. Bedúa dute da naca cheę bela' dxen cheęle da naca sban, da guca na ne cheę da ben Cristo lu xichaj lázrdaule. Beņę' nácale bi cheę Dios. <sup>12</sup> Gate gudxúale nisa guca cheęle ca guca cheę Cristo gate bgache' lu xędxu ba, na' cá'aqueze guca cheęle ca guca cheę Le' gate bebane' ládujla benne' gate. Caní guca cheęle lawe' da guxeajlí lázrele xel-la waca cheę Dios, Bénnea' bsebane' Cristo ládujla benne' gate ca'. <sup>13</sup> Gate nate gúcale le'e ca benne' gate lu dul-la da gubágale, ne lu bela' dxen sban cheęle da quebe ne xedúa na. Na'a Dios ba nunne' le'e xel-la nabán tu zren nen Cristo, ne ba bnite lawe' xúgute dul-la da gubágale. <sup>14</sup> Dios bzria xi'e ca naca da nabágadxu cheę xúgute da nadxixruij bea na da gula da buluzría xi na dxi'u. Bebáje' na chalá'ala, ne bde'e na le'e xaga béguaj ca tu da gubaga' Cristo. <sup>15</sup> Gate gute Cristo le'e xaga béguaj begüe' ca naca xel-la dxenná bea, ne xel-la waca cheę be' xriwe' ca', na' blé'ene' da ca' lávela gubáz cheę xabáa ca' lawe' da gunná bé'ene' na.

*Le sa lazre' da ca' zaj de na xabáa*

<sup>16</sup> Cheę le' na', quebe nu dxal-la' si tizra' le'e ca naca da dxe'aj da dxágule, ne ca zaj naca zra laní, ne ca naca laní cheę beu' dxe'ene, ne ca zaj naca zra dxupá'anale. <sup>17</sup> Xúgute da caní zaj naca na ca tu zrúl-laze cheę da zaj zéaje da ca'. <sup>18</sup> Quebe güele lataj nu cua da nucueza Dios cheęle le'e, ne cheę da dxululé'e benne' ca', benne' dxeléquene' zaj naque' dxexruij lazre' lawe' da dxulucá'ana szrene' gubáz cheę xabáa ca', ne dxuluchálaje' cheę da quebe ne xeelé'ene', ne dxulucá'ana szren cuine' ca naca xel-la sina cheę bénneacheze da zaj nape'. <sup>19</sup> Quebe zaj de'e Cristo, Bénnea' naque' xichaj bel-la' dxen da nácadxu dxi'u, na' Le' dxusegule' dute bel-la' dxen na', ne dxugawe' na, ne dxune' na tuze du ca naca na, cheę gaca na ca dxaca lazre' Dios.

<sup>20</sup> Naca cheęle ca naca cheę tu benne' ba nate lawe' da nácale bel-la' dxen cheę Cristo, cheę québedxa gunle ca zaj naca da ca' dxácaqueze lu xęzr la xu nigá. Na'a, zbizr cheę na' dxedale ca benne' ne zaj nácaqueze' cheę xęzr la xu nigá, ne dxunle ca da dxelenná bea bénneache. <sup>21</sup> Dxelenné': Quebe guchínenu' da nigá. Quebe gagu' da ca'. Quebe chajtáu' da na'. <sup>22</sup> Xúgute da nadxixruij bea caní dxuluchalaj na cheę da ca' dxeledé cheę na gate dxuchínedxu na, ne zaj nácaze na da dxelenná bea bénneache, ne da dxulusede bénneache. <sup>23</sup> Da li dxeleque bénneache zaj naca na sina da nadxixruij bea caní, lawe' da dxulusede na bénneache xelúe lá'ane' Dios, ne xelaque' dxexruij lazre', ne xelenná be'ene' bel-la' dxen cheę'. Quebe bi culuén zaj napa na cheę xelenná be'e na xel-la dxezá lazre' sban ca' cheę bénneache.

## 3

<sup>1</sup> Le'e nácale ca benne' ba belexebán tu zren nen Cristo. Chee lẹ na' le sa lazre' da zaj zua xabáa, naga dxe' Cristo chalá'a xabela chee Dios. <sup>2</sup> Le gulaba lazre' chee da zaj de xabáa, quegá chee da zaj de lu xezr la xu. <sup>3</sup> Nácale ca benne' ba zaj nate, na' xel-la nabán chee le nuzúa chawe' Dios naga zua Cristo. <sup>4</sup> Cristo nácaqueze xel-la nabán cheedxu, na' gate xelá' Lẹ', cá'anqueze le'e gunle tu zren Lẹ' lu xel-la szren chee'.

*Xel-la nabán gula ne xel-la nabán cube*

<sup>5</sup> Chee lẹ na', le xebéaj ca tu da nate xúgute da zaj zua lu xichaj lázrdaule da zaj naca na chee xezr la xu nigá, ca naca xel-la dxichaj na xrba chee xel-la nuchaga na', ne da sban, ne xel-la dxezá lazre' da sban ne da calẹla ca', ne xel-la dxucude', lawe' da naca da dxucude bėnneache ca dios cheequeze'. <sup>6</sup> Xúgute da caní dxelún benne' quebe dxuluzúe' dizra' chee Dios, na' chee lẹ na' gudé Dios benne' ca' lu da ba xa'. <sup>7</sup> Cá'anqueze le'e bėnle xúgute da caní gate nate. <sup>8</sup> Na'a, québedxa gunle xúgute da caní: Xel-la dxezrá'a, ne xel-la xichaj zra'a, ne xel-la dxecuide ljwezre.

Québedxa nnele dizra' schanni'.

Québedxa gucháchale ljwézrele.

<sup>9</sup> Quebe si xẹ ljwézrele tule xetule, lawe' da ba bzúale chalá'ala da gúcale nédxute, ne ca naca da bėnle. <sup>10</sup> Nácale ca benne' cube, lawe' da dxuxu-cube Dios le'e chee gácale ca nácaqueze Dios, Bėnnea' bėne' le'e, ca zrindxa gúnbea xánnele Lẹ'. <sup>11</sup> Lau Dios québedxa bi zaca che nácadxu benne' griego, che benne' judío, u che nácadxu benne' zaj nadxugu lu bẹl-la' dxen chee' da dxulé'e na zaj nababe' chee Dios, che benne' quebe zaj nape' da na' dxulé'e na, u che nácadxu benne' zitu', che benne' ca' zaj zre'e xi'a xegu ca', u che nácadxu benne' zaj nada'u, che benne' quebe zaj nada'u. Da zaca na naca na che naca Cristo benne' xíchajdxu, ne che zue' lu xichaj lázrdaudxu.

<sup>12</sup> Dios nazri'inẹ' le'e, ne guqué'e le'e chee gácale bi chee' ca'. Chee lẹ na' le gaca:

Benne' dxexache lazre', ne benne' zri'i lazre',  
ne benne' dxexruj lazre', ne benne' chawe' lazre',  
ne benne' zren lazre'.

<sup>13</sup> Le gácale ljwézrele tule xetule,  
ne le gunite lau chee tule xetule,  
che núlale dxezrá'a ljwézrele.

Ca bėn Cristo, bnite lawe' chee,  
cá'anqueze le gun le'e chee ljwézrele.

<sup>14</sup> Da dxundxa na ba xen, le zri'i ljwézrele lawe' da naca xel-la zri'i lazre' da dxun na dxi'u tuze, ne li lazre'. <sup>15</sup> Xel-la dxebeza zri lazre' da dxunna Dios dxi'u dxal-la' nna bea na lu xichaj lázrdaudxu, lawe' da bláwizra Dios le'e chee súale lu xel-la dxebeza zri lazre' chee', ne gácale ca tuze bẹl-la' dxen. Cá'anqueze dxal-la' xe le Dios: Xcalenu'.

<sup>16</sup> Dizra' chee Cristo dxal-la' guzúa xánnele lu xichaj lázrdaule chee séquele guzėjni'ile, ne gusízre ljwézrele nen dutẹ xel-la sina chee Dios. Lu dutẹ xel-la dxezaca ba lazre' le gul-la lau Dios salmo ca', ne da dxue lá'anale Dios, ne da ca' dxuzúa Be' Lá'azxa xichaj lázrdaule. <sup>17</sup> Bíteteze da gunle, u da nnale, le gun xúgute na lu La Xránadxu Jesús, ne xe le Xradxu Dios: Xcalenu', ne chee Lẹ'.

*Ca dxal-la' xelún benne' ca' zaj naque' bi chee Cristo*

<sup>18</sup> Le'e, nu'ula, le guzúa dizra' chee benne' chee chee, lawe' da naca na da dxal-la' xelún benne' dxeajlí lazre' Xránadxu.

<sup>19</sup> Le'e, benne' biu, le zrí'i zrí'ulale, ne quebe xexitaj lázrele le'.

<sup>20</sup> Le'e, bi cuide', le guzúa dizra' chee xra xrnale lu xúgute da dxelenné', chee gunle da dxezaca ba lazre' Xránadxu.

<sup>21</sup> Le'e, xruze xrna', quebe tételale xel-la snia nen zrí'inele, chee quebe xelate ní'a na'be'.

<sup>22</sup> Le'e, benne' zaj nada'u, le guzúa dizra' xúgute da xelenná xránale lu xezr la xu nigá, quegaze gate dxelenná'tee', chee xeléquene' le'e xrlátaje, san le gun da ca' du lázrele, ne le zrebe Dios. <sup>23</sup> Bíteteze da gunle, le gun na du lázrele, ca nu benne' dxune' zrin chee Xránadxu, ne quegá zrin chee beniácheze. <sup>24</sup> Lácala dxunle zrin nigá chee bénneache, nézele gunna Xránadxu lazruj chee da dxal-la' sile lu zra na', lawe' da dxunle zrin chee Cristo, Bénnea' nácaqueze' Xránale. <sup>25</sup> Nu benne' dxune' da calela, wazi'e lazruj chee da calela nune' lawe' da quebe dxuchá Dios ca da dxune' chee tu xetú benne'.

## 4

<sup>1</sup> Le'e, benne' nácale xrane bénneache, dxal-la' gácale xlátaje, ne li lazre' ca dxuchínele benne' ca' ná'ule. Le gusá lázrele, cá'anqueze le'e, zua Xránale xabáa.

<sup>2</sup> Le'e, bi bícha'dau', le guchálajlequeze Dios, súale ban lazre', ne xe le Dios: Xcalenu'. <sup>3</sup> Cá'anqueze, le naba lau Dios waláz cheentu', chee gácale Xránadxu netu' chee séquentu' guchálajntu' xrtizre', ne guzéajni'intu' bénneache ca naca da nagache ca naca chee Cristo. Lawe' da dxuna' da caní ne xu'a lizre xia nigá. <sup>4</sup> Le naba lau Dios chee séqueda' guzéajni'i xánnea' bénneache ca dxal-la' guna'.

<sup>5</sup> Le gaca sina ca dxunle chee benne' ca' quebe dxelejli lazre' Cristo, guchine xánnele zra ca' dxunna Dios le'e. <sup>6</sup> Dizra' dxuchálajle dxal-la' gaca na xrlátaje, ne da xelexezaca ba lazre' bénneache, na' dxal-la' nézele ca xechébele chee tu tu benne' ca' gate bi dxelenábene' le'e.

### *Dxulugapa diuzre bi bíchedxu ca' ljwezre'*

<sup>7</sup> Tíquico, bi bíchedxu nazrí'i lázredxu guzenbe' le'e ca naca da dxaca chia'. Nácabe' tu bi li lazre' dxácalenbe' neda', ne dxunbe' zrin chee Xránadxu tu zren nen neda'. <sup>8</sup> Chee le na', dxusel-la'-be' naga zúale, chee guzenbe' le'e ca dxaca cheentu', ne chee gutípabe' lázrele. <sup>9</sup> Cá'anqueze zéajle Onésimo lebe', naque' bíchedxu li lazre', benne' nazrí'i lázredxu, ne naque' benne' waláxr chee. Benne' caní xuluzenne' le'e ca naca da dxaca nigá.

<sup>10</sup> Aristarco, benne' xú'ulene' neda' lizre xia, dxugape' le'e diuzre, ne cá'anqueze dxun Marcos, bí xrtia Bernabé. Ba bzéajni'ida' le'e ca dxun Marcos. Che waza'be' xedajnná'abe' le'e, le si' lu na'le lebe' cháwe'dau'.

<sup>11</sup> Cá'anqueze bénnea' le' Jesús dxugape' le'e diuzre, bénnea' léqueze' Justo. Benne' zan benne' judío dxelejli lazre' Cristo, san benne' canize ládujla benne' judío ca' dxelune' zrin tu zren nen neda', na' dxuzéuentu' bénneache ca xelezéquene' xelu'e naga dxenná bea Dios, na' dxuluzé' neda' tu lu da ba neza zrente'. <sup>12</sup> Dxugapa Epafras le'e diuzre. Naque' wen zrin chee Cristo, ne benne' waláxr cheequezele. Dxenábaqueze' lau Dios chee le'e chee se cháchale, ne guzúa cuínale du lázrele chee gunle da dxaca lazre' Dios. <sup>13</sup> Neda' dxexecheba' chee Epafras, dxe'e gunne

xue chee le'e, ne chee bi bíchedxu zaj zre'e xezre Laodicea, ne xezre Hierápolis. <sup>14</sup>Dxugapa le'e diuzre Lucas, bénnea' dxexune' benne' we' ca', ne naque' benne' nazrí'i lazra'. Cá'aqueze dxugapa Demas le'e diuzre.

<sup>15</sup> Le gugapa diuzre bi bíchedxu zaj zre'e xezre Laodicea. Cá'aqueze le gugapa diuzre Ninfas, ne bi bíchedxu ca' dxelezrague' lizre'. <sup>16</sup> Ca te gulábale le'e xiche nigá, le sel-la na chee xululaba bi bíchedxu ca' zaj zre'e Laodicea na. Cá'aqueze le gulaba le'e xiche da ze za na Laodicea. <sup>17</sup> Le xe Arquipo da nigá: Bxue xanne' gunu' cháwe'dau' ca naca zrin chee Xránadxu da bzue' lu na'u.

<sup>18</sup> Neda' Pablo dxuzúaja' da nigá nen ná'aqueza'. Dxugapa' le'e diuzre. Le gusá lázrele xu'a lizre xia. Dxenaba' lau Dios guné' chee da chawe'. ¡Ca'an gaca na!

## DIZRA' NEDXU BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA

*Pablo dxugape' diuzre bi bíchedxu ca'*

<sup>1</sup> Neda', Pablo, ne Silvano, ne Timoteo dxugá pantu' le'e diuzre. Dxuzú aja' da nigá chee le'e, bi bicha', nazrágale chee Cristo lu xezre Tesalónica, ne nabábale chee Xradxu Dios, ne chee Xránadxu Jesucristo. Dxenaba' lau Xradxu Dios ne lau Xránadxu Jesucristo gunē' chee le da xrlátaje, ne gunne' le'e xel-la dxebeza zri lazre'.

*Ca dxelejli lazre' benne' Tesalónica Cristo*

<sup>2</sup> Dxeqezentu' Dios xcalenu' ca naca chee xúgute le'e, ne dxenábantu' gaca da chawe' chee le'e gate dxuchálajentu' Le'. <sup>3</sup> Lau Xradxu Dios dxeajsá lázrentu' ca benle zrin dute lu xel-la dxeajli lazre' chee, ne ca benle zrin chee Cristo lu dute xel-la zri'i lazre' chee, ne ca ze cháchale ca dxebeza lázrele súalele Xránadxu Jesucristo. <sup>4</sup> Le'e, bi bicha', Dios nazri'ine' le'e, na' nézentu' gucá'a Le' le'e. <sup>5</sup> Gate bchálajntu' dizra' chawe' chee Cristo naga zúale, quebe bentu' na nen dízra'ze, san nen dute xel-la waca chee Be' Lá'azxa bchálajntu', ne lu dute xel-la dxuxrén lazre' cheentu'. Nézquezle ca bentu' zrin nigá ládujla le'e lawe' da nazrí'ile'entu' le'e.

<sup>6</sup> Le'e bénquezle ca bentu' netu', ne ca ben Xránadxu, na' guzile dizra' na' lu dute xel-la dxebe' chee da benna Be' Lá'azxa le'e, lácala gudéle'ele xel-la zi'. <sup>7</sup> Caní guca, nácale tu da dxulé'e na ca dxal-la' xelaca xúgute benne' dxelejli lazre' Cristo naga nababa Macedonia, ne naga nababa Acaya. <sup>8</sup> Caní guca, bzenle le'e benne' ca' dizra' chee Xránadxu. Na'a quegá tuze benne' zaj zre'e Macedonia, ne Acaya, san cá'anqueze benne' ca' zaj zre'e xúgute xezre zaj nézene' ca dxeajli lázrele Dios, na' québedxa dxun na ba xen guzénentu' le'. <sup>9</sup> Benne' caníqueze dxuluchálaje' ca guca gate bedajnná'antu' le'e ne ca guzí' lu na'le netu', ne ca bsanle bedau' xiaj xaga ca' chee bábale chee Dios, na' guzú laule dxunle zrin chee Dios ban, Benne' li. <sup>10</sup> Cá'anqueze dxuluchálaje' ca dxebézale zra xelá' Jesús, ze'e xabáa. Le' naque' Zri'ine Dios, na' Dios bsebanē' Le' ládujla benne' gate ca'. Léqueze' guselé' dxi'u lu da ba xa' zrentē da za' da sel-la Dios lu dute xel-la dxezrá'a chee'.

## 2

*Zrin ben Pablo lu xezre Tesalónica*

<sup>1</sup> Le'e, bi bicha', ba nézquezle le'e da bentu' gate na' bedajnná'antu' le'e quebe guca na zrin nite. <sup>2</sup> Nézquezle ca belún benne' zaj zre'e xezre Filipos, bulucháchalēne' netu', ne buluzalje' netu' gate na' za xedajnná'antu' le'e, na' Dios bexru chache' netu' chee bchálajntu' dizra' chawe' chee Cristo naga zúale, lácala buluzaga benne' zan netu'. <sup>3</sup> Quebe guque zrējajntu' ca bchálajntu', ne quegá bi da calela guca lázrentu' guntu', ne quegá guca lázrentu' si xentu' le'e. <sup>4</sup> Dxuchálajquezentu' ca dxaca lazre' Dios lawe' da bxren lazre' netu', ne bsebage' netu' guchálajntu' dizra' chawe' chee Cristo. Caní dxuchálajntu', quegá chee xelexezaca ba lazre' bēnneache san chee xezaca ba lazre' Dios, Bēnnea' dxenná'teē da zua

xichaj lázrdauxu. <sup>5</sup> Nézquezle le'e cabata' ne xentu' le'e dizra' gúladau' da gucá'ana szren na le'e, ne quegá bi gunnantu' chee bi gúnnale netu'. Dios nézquezené' naca na da li. <sup>6</sup> Cabata' ne gaca lázrentu' xelapa béneache netu' ba lá'ana, le'e u benne' xula, lácala wazéquentu' nna bé'entu' le'e bi gúnnale netu' lawe' da nácantu' gubáz chee Cristo. <sup>7</sup> Bentu' le'e xrtandau' ca dxun tu nu'ula dxusegule' zrí'ine'. <sup>8</sup> Nazrí'ile'entu' le'e, la guzréntu' gúnnatentu' le'e, quegaze dizra' chee Dios, san cá'anqueze xel-la nabán cheentu'. Caní nazrí'ile'entu' le'e. <sup>9</sup> Le'e, bi bicha', nézquezle ca bentu' zrin du lázrentu' chee gata' da xe'aj gáguntu'. Bentu' zrin te zra ne chizrela chee quebe bi gusaca zi'ntu' le'e dxácaté bchálajentu' le'e dizra' chee Dios.

<sup>10</sup> Le'e dxexechébequeze, ne cá'anqueze Dios nézene' ca bentu' gate na' zúalentu' le'e, gúcantu' li lazre', ne xlátaje, na' quebe nu guzeque' nu nne cheentu'. <sup>11</sup> Cá'anqueze nézquezle ca bentu', bsízrentu' tu tule le'e, ne btípantu' lázrele ca dxun tu xra bidau' chee zrí'ine'. <sup>12</sup> Gunná bé'entu' le'e gunle ca dxal-la' xelún benne' zaj naque' bi chee Dios, Bénnea' dxuláwizre' le'e chee chu'ule naga dxenná be'e lu duté xel-la szren chee'.

<sup>13</sup> Chee le na' dxéquezentu' Dios xcalenu' lawe' da benle ca naca dizra' chee Dios da bchálajntu', ne guzile na ca dizra' chee Dios, ne quegá ca dizra' chee benneácheze. Da li naca na dizra' chee Dios, ne dxun na zrin lu xichaj lázrdaule le'e, na' dxeajlí lázrele Le' chee gácale chee Dios duté ca nácale. <sup>14</sup> Le'e, bi bicha', gate gudele xel-la zi' chee da belún benne' waláwr chee, guca chee ca guca chee benne' zaj nababa chee Dios naga nababa Judea, benne' ca' zaj naque' bi chee Cristo, lawe' da cá'anqueze guledé' xel-la zi' chee da belún benne' waláwr chee' ca', benne' judío. <sup>15</sup> Benne' judío caní belutie' Xránadxu Jesús, ca belún benne' judío ca' gate nate, belutie' benne' ca' gulenné' waláz chee Dios, na' benne' caní gulebeaje' netu' lázrentu'. Quebe dxeluné' da dxezaca ba lazre' Dios, ne dxeledábagu' xúgute' benneache, <sup>16</sup> na' gate dxaca lázrentu' guchálajentu' benne' quebe zaj naque' judío chee xeelé', quebe dxelunne' netu' lataj. Caní dxeluné', dxuluzandxe' dul-la da zaj nabague'. Na'a, ba be' Dios lataj dxaca da ba xa' zrenté chee benne' ca'.

*Pablo dxezá lazre' cheajnné'e bíchedxu zaj zre'e xezre Tesalónica*

<sup>17</sup> Le'e, bi bicha', gate becuásentu' naga zúale tu chi'i, lácala québedxa blé'entu' le'e, nuzúaquezentu' le'e lu lázrdauntu', ne guzá lázrele'entu' xedajnná'antu' le'e. <sup>18</sup> Guca lázrentu' xídanu', na' neda', Pablo, guca lazra' xida' tu chupa lasa, na' bzaga Satanás neda'. <sup>19</sup> ¿Bizra da na' dxunna na netu' xel-la dxebeza lazre', ne xel-la dxebe', ne da dxuzúa na netu' lu da ba neza, ne da dxunna bea na zua da si'ntu' lu na' Dios? Lé'eequeze gácale da caní lu zra xelá' Xránadxu Jesucristo. <sup>20</sup> Awe'. Da nácale le'e gun na si'ntu' da xabáa lau Dios, ne súantu' lu da ba neza.

### 3

<sup>1</sup> Nadxa gate québedxa guca guchaga launtu' lawe' da quebe bi benentu' ca dxaca chee, na' gúquentu' xegá'ana chúpantu' lu xezre Atenas, <sup>2</sup> na' sél-lantu' bi bíchedxu Timoteo xedajnná'abe' le'e, lawe' da naca lebe' tu bi wen zrin chee Dios, ne ba benbe' zrin tu zren nen netu', bchálajntu' dizra' chawe' chee Cristo, na' wazéquebe' guzé cháchabe' le'e, ne gutípabe' lázrele ca dxeajlí lázrele Cristo, <sup>3</sup> chee quebe gate ni'a na'le lawe' da dxedentu' lu da štebe caní. Le'e nézquezle dxal-la' tedxu xel-la zi' caní. <sup>4</sup> Gate ne zúalentu' le'e bzéajni'intu' le'e wadéquezdxu lu da zi' da xa', na' ca'an guca,

ca ba nézquezle. <sup>5</sup> Chee le na', gate québedxa bzúeda' guchaga lawa' lawe' da quebe bi benda' cheele, na' gusel-la' nu bedajnaba le'e ájala dxaca cheele lu xel-la dxeajlí lazre' cheele Cristo, lawe' da bzreba' ga gaze xucuasa da xriwe' le'e lu neza chee Dios, na' gaca níteze zrin bentu' ga na'.

<sup>6</sup> Na'a ba belá' Timoteo ga ni zúantu', ze zabe' Tesalónica, ne ze núabe' dizra' chawe' ca naca xel-la dxeajlí lazre', ne xel-la zri'i lazre' cheele. Dxebe' netu' dxeajsá lázrquezle le'e netu' nen dutę xel-la zri'i lazre', ne dxezá lázrele'ele lé'ele netu', ca netu' dxaca lázrentu' le'entu' le'e. <sup>7</sup> Chee le na', bi bicha', dxacate dxedentu' lu da stebe caní, ne lu da zi' da xa', zúantu' xel-la dxebé lawe' da nézentu' ze cháchale ca dxeajlí lázrele Cristo. <sup>8</sup> Na'a naca cheentu' ca naca chee tu benne' bezúatee' chawe' lawe' da nézentu' ze cháchale lu da naca chee Xránadxu. <sup>9</sup> ¿Ájazra guntu' xéle'entu' Dios: Xcalenu' ca dxal-la' guntu' waláz cheele le'e, ne ca naca xel-la dxebé nápantu' lau Dios ne cheele le'e? <sup>10</sup> Te zra, ne chizrela dxata' xúentu' Dios gunne' netu' lataj xedajnná'quezentu' le'e, chee gácadxale li lazre' ca dxeajlí lázrele Cristo.

<sup>11</sup> Dxenábantu' lau Xradxu Dios, ne lau Xránadxu Jesucristo gácaleņe' netu' chee séquentu' xedajnná'antu' le'e. <sup>12</sup> Dxenábantu' Le' chee zrí'idxa ljwézrele tule xetule, ne chee zrí'idxale xúgutę bénneache ca nazrí'intu' netu' le'e. <sup>13</sup> Dxenábantu' Le' guzúa chúchue' lázrdaule, chee gácale benne' li lazre', ne benne' lá'azxa lau Xradxu Dios lu zra na' gate xelá' Xránadxu Jesús nen xúgutę bi chee Le'.

## 4

### *Dxal-la' gundxu da dzezaca ba lazre' Dios*

<sup>1</sup> Le'e, bi bicha', dxata' xúentu' le'e, ne dxusebágantu' le'e da nigá lu La Xránadxu Jesús. Le gúndxaqueze da blé'entu' le'e gunle, da na' dzezaca ba lazre' Dios.

<sup>2</sup> Nézquezle le'e da bzéajni'intu' le'e ne chee Xránadxu Jesús. <sup>3</sup> Da dxaca lazre' Dios naca na guzúa cuínale lu na' Le', ne québedxa gunle da sban, <sup>4</sup> na' súalele zrí'ulaquezle tu tule le'e lu xel-la lá'azxa chee Xránadxu, ne gápale le' ba lá'ana, <sup>5</sup> ne quebe súale lu xel-la dxezá lazre' chee da sban ca dxelún benne' quebe zaj nunbe'e Dios. <sup>6</sup> Ca naca chee da nigá, netule le'e quebe dxal-la' si xele bi bíchele, quebe gunle da sban chee', lawe' da xebéaj lazre' Xránadxu chee xúgutę benne' dxelune' da caní, ca ba bzéajni'intu' le'e. <sup>7</sup> Dios bláwizre' dxi'u chee gundxu da xrlátaje, ne quegá gundxu da sban. <sup>8</sup> Caní naca, che nu benne' dxuzúe' chalá'ala ca naca da nigá, quegá tuze bénneache dxuzúe' chalá'ala, san Diósqueze dxuzúe' chalá'ala, Bénnea' nunne' dxi'u Be' Lá'azxa.

<sup>9</sup> Ca dxal-la' zri'i ljwézrele quebe dxun na ba xen guzúaja' cheele, lawe' da ba blé'equeze Dios le'e chee zri'i ljwézrele tule xetule. <sup>10</sup> Caníqueze dxal-la' zri'ile xúgutę bi bíchedxu zaj zre'e xezre ca' zaj nababa xezr la xu Macedonia. Dxata' xuentu' le'e, bi bicha', chee zrí'idxa ljwézrele. <sup>11</sup> Le gun ba xuzre súale lu xel-la dxebeza zri lazre', ne gunle da naca cheézquezle, ne gunle zrin nen ni'a na'le ca ba guzrentu' le'e, <sup>12</sup> chee xelapa benne' xula le'e ba lá'ana, ne chee quebe bi xázrjele le'e.

### *Ca gaca zra xelá' Xránadxu*

<sup>13</sup> Le'e, bi bicha', dxaca lázrentu' nézele ca naca chee bi bíchele zaj nate, chee quebe xewine lázrele ca dxelún xezícadxa benne' ca' quebe bi

dxelebeza lazre'. <sup>14</sup> Dxéajlédxu gute Jesús, ne bebané' ládujla benne' gate, ne cá'anqueze dxéajlédxu Dios gusebané' benne' gate ca' guleajlí lazre' Jesús, cheé xelexúaleñe' Le'.

<sup>15</sup> Cheé le na' dxéntu' le'e da na' ble'e Xránadxu, gunné': Dxi'u naca bandxu gate xelá' Xránadxu, quebe cheajsúalédxu Le' nédxula ca benne' ca' zaj nate. <sup>16</sup> Xránaquezdxu ze'e xabáa, na' cuezre xe'e nen dute xella dxenná bea cheé', na' xendxu chi'i gubáz blau cheé xabáa, ne chi'i luzu da dxulucuezre' waláz cheé Dios. Nadxa benne' gate ca', benne' guléajle'e cheé Cristo xelexebánqueze' za'a le'. <sup>17</sup> Te na', dxi'u na' naca bandxu xeché'e dxi'u tu zren nen benne' ca' ládujla beuj cheé xezrágadxu Xránadxu lu be'. Ca'an gaca súalédxu Xránadxu chadía chacanna. <sup>18</sup> Cheé le na' le gutipa lázrele tule xetule nen dizra' caní.

## 5

<sup>1</sup> Na'a, ca naca cheé bi zra, u bi iza xelá' Xránadxu, quebe dxun na ba xen guzúaja' cheele, bi bicha'. <sup>2</sup> Ba nézquezle le'e zrin zra xelá' Xránadxu gate québela nu dxebeza Le', ca za tu benne' gubán chizrela. <sup>3</sup> Gate dxeleenná bénneache: Cháwele'e dxaca cheédxu, ne quebe bi dxuchixre cheé, nadxa za da guzríá xi na benne' ca', ca za xel-la dxudía cheé tu nu'ula gate zué' zi'i, ne quebe xelexé' lu da na'. <sup>4</sup> Le'e, bi bicha', quebe zúale lu da chul-la, cheé quebe gaca cheele lu zra na' xelá' Xránadxu ca dxaca cheé tu benne' dxu'u gubán lizre'. <sup>5</sup> Xúgutele le'e dxunle xrlátaje, da naca cheé xel-la naxani', ne cheé te zra. Quebe dxundxu da caléla, da naca cheé chizrela, ne cheé da chul-la. <sup>6</sup> Cheé le na' quebe dxal-la' gácadxu ca benne' la wase' ca dxelún benne' xula, san dxal-la' gácadxu ban lazre', ne guzéajni'i cuínadxu. <sup>7</sup> Benne' dxelase, chizrela dxelásié', ne benne' dxelezuzre, chizrela dxelezúzrequeze'. <sup>8</sup> Nácadxu dxi'u cheé te zra, na' dxal-la' guzéajni'i cuínaquezdxu. Che dxeajlí lázredxu Xránadxu, ne zri'idxu Le', da nigá gaca na cheédxu ca tu zra lana benne' zeje' wedilla da naca na xia. Cá'anqueze che dxebeza lázredxu ladxu, da nigá gaca na cheédxu ca tu lapa xia ca da dxuzúa tu benne' zeje' wedil-la xíchaje'. <sup>9</sup> Dios quebe beñe' cheédxu tedxu lu da ba xa' da sel-le' lu xel-la dxezrá'a cheé. Beñe' cheédxu zrué'edxu xel-la weselá ne cheé Xránadxu Jesucristo. <sup>10</sup> Jesucristo gutie' waláz cheédxu cheé gaca bandxu tu zren nen Le', che naca bandxu, u che ba nátedxu gate zrin zra na'. <sup>11</sup> Cheé le na' le gutipa lázrele, ne le guzé chacha ljwézrele tule xetule, ca ba dxúnquezle.

### *Pablo dxuzéajni'ine' bi bíchedxu ca'*

<sup>12</sup> Le'e, bi bicha', dxata' xúentu' le'e gápale ba lá'ana benne' dxelune' zrin ládujla le'e, benne' ca' gucá'a Xránadxu cheé xelenná be'ene' le'e, ne xulusédené' le'e. <sup>13</sup> Dخال-la' gápale benne' ca' ba lá'ana, ne zri'ile le' lawe' da dxelune' zrin cheé Dios. Le sua lu xel-la dxebeza zri lazre' tule xetule.

<sup>14</sup> Cá'anqueze dxusebágantu' le'e, bi bicha', gusízrele benne' ca' quebe dxelaca lazre' xelune' zrin, ne gutipa lázrele benne' ca' dxelate ni'a ne'e, ne gácalele benne' quebe zaj ze' chacha, ne gácale zren lazre' nen xúgute bénneache.

<sup>15</sup> Le guxúe xanne' cuínale cheé quebe gunle da caléla cheé nu benne' dxune' cheele da caléla, san le gun ba xuzre gúnquezle da xrlátaje, tule xetule, ne cheé xúgute bénneache.

<sup>16</sup> Le béquezle.

<sup>17</sup> Le guchálajlequezle Dios.



18 Le xę Dios: Xcalenu' ca naca xúgute da dxaca cheęle.

Dxal-la' gunle da nigá lawe' da naca na da dxaca lázrqueze Dios gunle le'e, lawe' da nácale bi cheę Jesucristo.

19 Quebe guzágale da dxun Be' Lá'azxa.

20 Quebe guzúale chalá'ala dizra' da nunezruj Be' Lá'azxa nu bi bíchedxu ca'.

21 Le guchi'a xanne' xúgute da ca', na' le si' da naca na xrlátaje.

22 Le cuasa lu xúgute da quebe naca na xrlátaje.

23 Dios dxunne' dxi'u xel-la dxebeza zri lazre'. Dxenaba' lau Le' gunę' le'e benne' lá'azxaqueze, ne guxúę' be' nácaquezle, ne bėnne'du xu'ule, ne bel-la' dxen cheęle cheę gácale du lazre' lu zra na' xelá' Xránadxu Jesucristo. 24 Bėnnea' bláwizre' le'e naque' li lazre', na' Le' gunę' xúgute da caní.

*Pablo dxuzé dizra' bi bíchedxu ca'*

25 Le'e, bi bicha', le naba lau Dios gácal-lene' netu'.

26 Le gugapa diuzre xúgute bi bíchedxu ca', ne gunídale le'.

27 Lau Xránadxu dxusebaga' le'e gulábale xiche nigá lávela xúgute bi bíchedxu ca'.

28 Dxenaba' lau Xránadxu Jesucristo gunę' cheęle da chawe'. ¡Ca'an gaca na!

## DIZRA' GUDXUPE' BZUAJ SAN PABLO CHEE' BI CHEE' CRISTO ZAJ ZRE'E XEZE' TESALÓNICA

*Pablo dxugape' diuzre bi bíchedxu ca'*

<sup>1</sup> Neda', Pablo, nen Silvano, ne Timoteo, dxugápantu' le'e diuzre. Dxuzúaja' da nigá chee'le le'e, bi bícha'dau', nazrágale chee' Cristo lu xezre Tesalónica, ne nácale bi chee' Xradxu Dios, ne chee' Xránadxu Jesucristo. <sup>2</sup> Dxenaba' lau Xradxu Dios, ne lau Xránadxu Jesucristo guné' chee'le da chawe', ne gunné' le'e xel-la dxebeza zri lazre'.

*Dios guchi'e da belún benne' dul-la ca' gate xelá' Cristo*

<sup>3</sup> Le'e, bi bícha'dau', dxal-la' xéquezentu' Dios: Xcalenu' ca naca chee'le, da dxal-la' guntu' lawe' da ba dxegula xel-la dxeajlí lazre' chee'le, ne ba zúadxa xel-la nazrí'i lazre' len l'jwézrele tule xetule. <sup>4</sup> Chee' le na' dxuchálajntu' ca naca chee'le le'e l'áwela bi ca' chee' Cristo. Dxuchálajntu' ca dxuchaga laule da dxelún benne' ca' zaj nau zi' xuzre' le'e, ne ca naca xel-la zi' da dxedele, san nácale zren lazre', ne dxeajlí lázrele Dios. <sup>5</sup> Da nigá dxulé' na xlátaje naca Dios ca dxuchi'e da dxelún bénneache, dxenné' naca chee'le chu'ule naga dxenná bea Le' lawe' da dxedele xel-la zi' chee' la' xel-la dxenná bea chee'.

<sup>6</sup> Xlátaje naca gudé Dios benne' ca' xel-la zi', benne' ca' dxuludé' le'e xel-la zi' na'a, <sup>7</sup> na' guzúe' le'e naga xezí' lázrele chee' xel-la zi' da dxedele na'a. Xezí' lázrele tu zren nen netu' gate xelá' Xránadxu Jesús, ze'e xabáa nen gubáz blau ca' chee' xabáa chee'. <sup>8</sup> Ze'e nu'e xi' chee' gudé' lu da ba xa' benne' ca' quebe dxelexúnbe'e Dios, ne quebe dxuluzúe' dizra' ca dxenná dizra' chawe' chee' Xránadxu Jesucristo. <sup>9</sup> Benne' caní xeleguase' naga zua Xránadxu lu xel-la szren chee', ne xel-la dxenná bea chee', na' xeledé' xel-la zi' chee' da ba xa' chadía chacanna. <sup>10</sup> Caní gaca gate xelá' Xránadxu lu zra na' chee' xulucá'ana szren benne' chee' ca' Le', na' benne' ca' dxeajlí lazre' Le' xelape' Le' ba l'ána. Le'e gunle benne' ca' tu zren lawe' da guxéajle chee' da bechébentu'.

<sup>11</sup> Chee' le na' tu dxuchálajlequezentu' Dios ca naca chee'le, ne dxenábantu' Le' gaca chee'le sile da na' bláwizre' le'e sile. Cá'anqueze dxenábantu' lau Dios guchínene' xel-la waca chee' chee' gaca gunle ca naca xúguté da xrlátaje da dxezá lázrele, ne xúguté zrin dxunle ne chee' xel-la dxeajlí lazre' chee'le. <sup>12</sup> Caní gunle, gucá'ana szrenle La Xránadxu Jesucristo, na' Le' gapé' le'e ba l'ána ne chee' xel-la xrlátaje chee' Dios cheedxu, ne chee' Xránadxu Jesucristo.

## 2

*Benne' xriwe'*

<sup>1</sup> Le'e, bi bícha', ca naca chee' zra xelá' Xránadxu Jesucristo chee' xutupe' dxi'u chee' Le', dxata' xúentu' le'e <sup>2</sup> chee' quebe guchale ca dxéquele, ne quebe súale stebe chee' bi dizra' xuluchalaj bénneache lácala xelenné' naca na da dxunenzruj Be' L'ázxa le', u chee' xetú bila dizra' énele, u chee' bi xiche xelenné' naca na da gusél-lantu' netu', che dxenná na ba belá' Xránadxu. <sup>3</sup> Quebe güele lataj nu si xé le'e, lawe' da xeledá' bénneache

xelebéaj xíchajé' Dios, ne la' bénnea' dxedábague' Dios nédxula gate zrin zra xelá' Xránadxu. Bénnea' dxedábague' Dios, na' ba naca chee' cuía xíqueze',<sup>4</sup> na' tábague' xúgute' da naca chee' Dios, ne xúgute' da dxulucá'ana szren bénneache. Gucá'ana szren cuine' ca zrinte' cheajché'e lu xudau' chee' Dios, ne gun cuine' ca Diósqueze.

<sup>5</sup> ¿Quebe dxeajsá lázrele gúchequeza' le'e da nigá gate na' zúalena' le'e? <sup>6</sup> Le'e ba nézele Nu Benne' nuzague' bénnea' dxedábague' Dios chee' quebe le'e gate quebe ne zrin zra le'e. <sup>7</sup> Ba dxun zrin xel-la waca da nagache chee' da calëla, san zua Nu Benne' nuzague' le' na na'a, ca zrin zra xecuasa Bénnea' nuzague' le' na. <sup>8</sup> Nadxa la' bénnea' dxedábague' Dios, na' Xránadxu Jesús gutie' le', guchínene' be' da dxuaj na dxu'e, ne guzríá xi'e le', guchínene' xel-la naxaní' chee' zra ze'e. <sup>9</sup> Benne' xriwe' na' ze'e ne chee' xel-la dxenná bea chee' Satanás, na' lu dutë xel-la waca chee' na gunë' da ca' xelunna bea na, ne xel-la waca ca' da zaj naca na wen lazre', <sup>10</sup> ne guchínene' xúgute' da calëla ca' chee' si xe'e benne' ca' xelebía xi'e, benne' ca' quebe gulaca lazre' xelezí'e da li chee' xelélé'. <sup>11</sup> Chee' le' na' Dios dxu'e lataj si xe' da calëla benne' ca' chee' xeléajle'e chee' da wen lazre', <sup>12</sup> chee' xelebía xi' xúgute' benne' ca' quebe gulaca lazre' xeléajle'e chee' da li, san dxeledánedxene' da naca da calëla.

### *Dios guqué'e dxi'u chee' ladxu*

<sup>13</sup> Netu' tu dxál-la'queze xentu' Dios: Xcalenu' ca naca chee'le le'e, bi bícha'dau', nazrí'i Xránadxu le'e, lawe' da gucá'a Dios le'e nédxute' chee' lale. Be' Lá'azxa ba nune' le'e chee' Dios lawe' da dxéajle'le chee' da li. <sup>14</sup> Chee' gaca chee'le da nigá Dios ba bláwizre' le'e ne chee' dizra' chawe' da dxuchálajntu', chee' zrué'ele xel-la szren chee' Xránadxu Jesucristo.

<sup>15</sup> Chee' le' na', bi bícha'dau', le se' chacha, ne quebe gal-la lázrele da ca' bzéajni'intu' le'e caníqueze, ne cá'anqueze lu xiche. <sup>16</sup> Dxenaba' lau Xránadxu Jesucristo, ne lau Xradxu Dios, Bénnea' lu dutë xel-la xrlátaje chee' bzri'ine' dxi'u, ne ba benne' dxi'u xel-la dxexúe zren chee' tu chí'i gaze, ne tu xel-la dxebeza lazre' li. <sup>17</sup> Dxenaba' Le' gutipe' lázrele, ne guzé chúchue' le'e chee' nnale, ne gunle xúgute' da xrlátaje.

## 3

### *Pablo dxenné xúene' bíchedxu ca' xelenabë' Dios gácalene' le'*

<sup>1</sup> Na'a, bi bícha'dau', le naba Dios gácalene' netu', chee' zrínzega dizra' chee' Xránadxu xúgute' xezre ca', ne chee' xelezí'e na dutë lu xel-la ba lá'ana, ca guca ládujla le'e. <sup>2</sup> Le nábaquezle chee' ladxu lu na' benne' ca' dxelune' da calëla, ne lu na' benne' sban ca', lawe' da quegá xúgute' benne' dxeleajlí lazre' Cristo. <sup>3</sup> Xránadxu naque' li lazre', na' Le' guzé chache' le'e, ne guxúe' le'e chee' quebe bi da calëla gaca na chee'le. <sup>4</sup> Dxuxrén lázrentu' Xránadxu gácalene' le'e chee' gunle ca da dxénentu' le'e, ca ba dxúnquezle. <sup>5</sup> Dxenábantu' lau Xránadxu gácalene' le'e chee' gápale xel-la zri'i lazre' da gunna Dios le'e, ne gápale xel-la zren lazre' da gunna Cristo le'e.

### *Dxal-la' gundxu zrin*

<sup>6</sup> Le'e, bi bícha'dau', lu La Xránadxu Jesucristo dxénentu' le'e quebe gunle tuze núteteze bi bíchedxu quebe dxaca lazre' gunë' zrin, ne quebe dxune' ca da bsédentu' le'e. <sup>7</sup> Ba nézele dxal-la' gunle zrin ca bentu' netu' gate na' zúalentu' le'e. <sup>8</sup> Quebe nu chee' gudáguntu' cá'aze che nadxu quebe gudízrujntu' na. Bënle'equezentu' zrin te zra, ne chizrela chee'

quebe bsaca zi'ntu' le'e da gáguntu'. <sup>9</sup> Nácaqueze cheentu' nábantu' le'e da gáguntu', san bentu' zrin chee blé'entu' le'e dxal-la' gunle ca bénquezentu' netu'. <sup>10</sup> Gate na' zúalentu' le'e, bdentu' lu na'le da nadxixruj bea nigá: Benne' quebe dxaca lazre' gunę' zrin ca'an gunę' quebe gawe'. <sup>11</sup> Ba bémentu' bál-lale le'e quebe dxunle zrin, na' dxedázele dxuchixre cheęle da dxaca cheę benne' xula. <sup>12</sup> Benne' caní dxixruj be'entu', ne dxusebágantu' le' lau Xránadxu Jesucristo cheę xelune' zrin du lazre' cheę gata' da xele'aj xelawe'.

<sup>13</sup> Le'e, bi bicha', le gun da xrlátaje, ne quebe cheajtá lázrele. <sup>14</sup> Che nu benne' quebe dxuzúę' dizra' ca da dxennantu' lu xiche nigá, le nna' nu bénnea', ne quebe gunle le' tuze, cheę gapa stuę'. <sup>15</sup> Quebe zrá'ale le', san le guzėjni'i le' ca bi bíchele.

*Pablo dxuzę' dizra' bi bíche dxu ca'*

<sup>16</sup> Xránadxu naque' Bénnea' dxunne' dxi'u xel-la dxebeza zri lazre'. Dxenaba' lau Le' gúnnaqueze' le'e xel-la dxebeza zri lazre' lu xúgutę da dxunle, ne súalęne' xúgutęle le'e.

<sup>17</sup> Neda', Pablo nen ná'aqueza' dxuzúaja' cheęle da nigá. Da nigá dxunna bea na xúgutę xiche da dxuzúajqueza' neda'. Caní dxuzúaja'. <sup>18</sup> Dxenaba' lau Xránadxu Jesucristo gunę' da chawe' cheę xúgutęle le'e. Ca'an gaca na.

## DIZRA' NEDXU BZUAJ SAN PABLO CHEE TIMOTEO

*Pablo dxugape' diuzre Timoteo*

<sup>1</sup> Neda', Pablo, naca' gubáz chee Jesucristo lawe' da caní bdxixruj bea Dios, Xra Xránadxu Jesucristo, weselá cheedxu, Bénnea' dxebeza lázredxu xelá'tee'. <sup>2</sup> Dxuzúaja' da nigá chiu' lue', Timoteo, nacu' ca zrí'inequeza' lawe' da dxeajlí lazru' Cristo. Dxenaba' Xradxu Dios, ne Xránadxu Jesucristo gune' chiu' da chawe', ne xexache lazre' lue', ne gunne' lue' xel-la dxebeza zri lazre'.

*Pablo dxusízrene' Timoteo ca naca chee benne' ca' dxulusédene' da wen lazre'*

<sup>3</sup> Ca ba guta' xúeda' lue' gate na' bezá'a naga zu', ne bexá'a naga nababa xezr la xu Macedonia, begá'ana lu xezre Efeso chee nne xúenu' benne' ca' zaj zre'e na' québedxa xulusédene' da wen lazre', <sup>4</sup> ne québedxa xululapa ne'e dizra' dxuluzaze benne' ca' ca zaj naca zánete' xra xrtawe' ca'. Dizra' caní dxulutil-la na bénneache. Quebe naca na da xelácale na bénneache chee xelezé chache' ca dxeleajlí lazre' Dios. Caní dxenné xúeda' lue' xecha lasa.

<sup>5</sup> Dxenné xúeda' lue' gunu' caní chee xelezrí'i ljwezre' duté lázrdawe', chee quebe bi sua da gagu na zria lázrdawe' ca', ne gaca du lazre' ca dxeleajlí lazre' Cristo. <sup>6</sup> Bal-la benne' ca' belexeuase' lu da caní, na' ba zaj nazi'e dizra' xálaze. <sup>7</sup> Dxelaca lazre' xuluxuzájle'e da nadxixruj bea Dios, ne quebe dxeléajni'ine' da dxuluchálajqueze', ne ca naca da ca' dxuluxrén lazre'.

<sup>8</sup> NezdXu da nadxixruj bea na naca na xrlátaje che nu benne' dxuchínene' na ca naca chee na. <sup>9</sup> Dخال-la' gusá lázredxu quebe bzua Dios da nadxixruj bea na chee nna be'e na benne' xrlátaje ca', san chee nna be'e na benne' ca' dxelune' da calela, ne benne' ca' quebe dxuluzúe' xrtizre'e, ne benne' ca' dxelune' da zrinnaj, ne benne' wen dul-la ca', ne benne' ca' quebe dxelape' Dios ba lá'ana, ne quebe dxelapa ba lá'ana da naca chee Dios, ne benne' ca' dxelute xra xrna', ne benne' ca' dxelutie' benne', <sup>10</sup> ne benne' ca' dxelune' da sban, ne benne' biu ca', benne' dxulugune' ljwezre biue' ca nu'ula, ne benne' dxelebane' benne' ca' chee xelutie' le' lu na' benne' xula, ne benne' ca' dxelún lazre', ne benne' ca' dxelexechebe' da wen lazre', ne benne' ca' dxuluchuque' da li. <sup>11</sup> Caní naca da dxulé'e dizra' chawe' da bsebagá Dios neda'. Naque' Dios xabáa, Benne' szrente.

*Pablo dxé'e Dios: Xcalenu'*

<sup>12</sup> Dxapa' Xránadxu Jesucristo: Xcalenu'. Naque' Bénnea' benne' neda' xel-la waca chee guna' da nigá, lawe' da dxelé'ene' neda' xlátaje, na' nuzúe' neda' lu zrin chee'. <sup>13</sup> Xúgute' da caní ba bene' chia' lácala gunnía' schanni' chee Cristo gate nate, ne gudáu zi' xuzra' bi chee' ca', ne ben la' chee benne' ca'. Dios bexache lazre' neda' lawe' da quebe ne cheajlí lazra' Cristo, ne quebe guxéajni'ida' da na' bena'. <sup>14</sup> Chee le' na' Xránadxu, duté lu xel-la zri'i lazre' zren chee' bnite lawe' chia', ne benne' neda' xel-la dxeajlí lazre', ne xel-la zri'i lazre' da nápadxu lawe' da nácadxu bi chee Jesucristo.

<sup>15</sup> Da nigá naca na da li, na' xúgute bēnneache dxal-la' xeléajle'e chee na. Caní dxenná na: Jesucristo blé'e lu xezr la xu nigá chee guselé' benne' dul-la ca', na' neda' nácadxa' benne' dul-la ca xúgute benne' ca'. <sup>16</sup> Chee le na' Dios bexache lazre' neda' chee gulé'e Cristo ca szren naca xel-la zren lazre' chee' nen neda', nácale'a benne' dul-la, chee gaca' neda' tu da gulé'e na lau xúgute benne' ca' xeleajlí lazre' Cristo, na' xelape' xel-la nabán chadía chacanna. <sup>17</sup> Chee le na' dxal-la' gápadxu ba lá'ana, ne güe lá'anadxu Bénnea' nna béaqueze' chadía chacanna. ¡Cabata' gatie', ne quebe gaca lé'edxu Le', ne naque' Dios tu licha', ne sina! ¡Gaca ba Le' chadía chacanna! ¡Ca'an gaca na!

<sup>18</sup> Lue', bi chia', Timoteo, dxusebaga' lue' su' wedil-la chee tíl-lalenu' da naca chee da calela, ca da buluchalaj nédxute benne' ca', benne' gulenné' waláz chee Dios ca dxal-la' gunu' lue'. <sup>19</sup> Bexru tipa xel-la dxeajlí lazre' chiu', chee quebe bi sua da gulale na lu xichaj lazrda'u. Bal-la benne' ca' quebe belune' caní, na' buluzúe' chalá'ala xel-la dxeajlí lazre' chee'. <sup>20</sup> Caní guca chee Himeneo, ne chee Alejandro, benne' ca' bdea' neda' lu na' Satanás chee xulusédie' quebe xelenné' schanni' chee Dios.

## 2

### *Ca dxal-la' guchálajle dxu Dios*

<sup>1</sup> Da dxundxa na ba xen dxenné xúeda' lue', dxal-la' nábale lau Dios gácalene' bēnneache, ne guchálajlele Dios, ne gucá'ana szrenle Le', ne nábale Dios gunne' le'e da dxexárjele, ne xele Dios: Xcalenu'. Dخال-la' gunle caní, guchálajlele Dios da naca na chee xúgute bēnneache. <sup>2</sup> Cá'anqueze dxal-la' nábale Le' gácalene' benne' xichje ca', benne' dxe-lenná be'ene' bēnneache, ne benne' xu'u lawe' ca' chee chadxu chawe', ne súadxu lu xel-la dxebeza zri lazre', ne guzúa cuínadxu lu na' Dios du lázredxu, ne gápadxu ba lá'ana bēnneache. <sup>3</sup> Da nigá naca na xrlátaje, ne da dxezaca ba lazre' Dios, weselá cheedxu, <sup>4</sup> lawe' da dxaca lazre' Le' xelélé xúgute bēnneache, ne xelúnbe'e da li. <sup>5</sup> Zua tuze Dios, ne zua tuze wenaba chee bēnneache lau Dios, Bénnea' naque' Jesucristo, ne cá'anqueze ben cuine' bēnneache. <sup>6</sup> Jesucristo bzua cuine' lu xel-la gute chee bexá'awe' xúgute bēnneache, na' blé'ene' da na' ca bzrin zra chee na. <sup>7</sup> Chee le na' bzue' neda' gubáz chee' chee cu'a lban, ne gulé'eda' benne' ca' quebe zaj naque' judío dxal-la' xeleajlí lazre' Cristo, ne xelune' ca naca da li. Lau Cristo dxexecheba', ne quebe dxun lazra'.

<sup>8</sup> Chee le na' dxaca lazra' xuluchálajle xúgute bēnneache Dios gáteteze na', ne xelechisa ne'e duté xel-la li lazre' chee' lau Dios, ne quebe xelezré'e ljwezre', ne quebe xeledíl-lalene' ljwezre' ca'. <sup>9</sup> Nu'ula ca' dxal-la' xelácue' da naca xlátaje, ne ca naca chee da dxelúe lechítaje cuine' dxal-la' gaca na xel-la dxexruj lazre', ne xel-la du lazre', ne quegá ca dxulupá'a xíchaje', ne quegá lechítaje da naca na oro, ne quegá bga ca', ne quegá zra lane' da zácale'e na. <sup>10</sup> Dخال-la' xelune' da gácale na bēnneache, ca dxal-la' xelún nu'ula ca' ba zaj nuzúa cuine' lu na' Dios. <sup>11</sup> Nu'ula ca' duté lu xel-la dxexruj lazre' chee' dxal-la' xuluzé nague' gate nu dxusede xrtizra Dios, ne quebe xelenné' chee na. <sup>12</sup> Quebe dxunna' lataj nu'ula gusédené' benne' biu ca', ne quebe nna be'ene' le', san dxal-la' sue' zrize. <sup>13</sup> Caní naca na lawe' da ben Dios teca Adán, na' gudé na' bene' Eva, nu'ula chee Adán na'. <sup>14</sup> Adán, quebe guzú xé da xriwe' le', san guzú xé na Eva, nu'ula na', na' gudé guzú xé na le', na' bene' dul-la. <sup>15</sup> Tu nu'ula gape' xel-la

weselá che dxezangé' bidu ca', ne cheajlí lazre' Dios, ne nazri'ine' Le', ne nuzúa cuine' lu na' Dios, ne gaque' dxexruj lazre'.

### 3

*Ca dxal-la' xelaca benne' ca' dxulusédene' bi ca' chee Cristo*

<sup>1</sup> Da líqueze naca da nigá: Che nu benne' dxezá lazre' gaque' benne' gusédene' bi ca' chee Cristo, tu zrin xrlátaje dxaca lazre' guné'. <sup>2</sup> Tu benne' dxusédene' bi ca' chee Cristo:

Dxal-la' gaque' benne' quebe bi zua da dxunite na le'.

Dxal-la' súalene' tuze nu'ula.

Dxal-la' gaque' benne' dxuzéajni'i cuine',

ne benne' dxenná be'e cuine',

ne benne' nape' ba lá'ana.

Dxal-la' si' lu ne'e benne' xelezrine' lize'.

Dxal-la' gaque' benne' dxaca dxusédene' bénneache.

<sup>3</sup> Quebe dxal-la' xé'aje' da guzuzre na le',

ne quebe gutil-le' nu benne',

ne quebe sa lazre' dumí.

Dxal-la' gaque' benne' dxexruj lazre', ne zren lazre'.

<sup>4</sup> Dxal-la' nézene' nna be'ene' benne' zaj zre'e lize',

ne gulé'ene' zrí'ine' ca' xelácabe' wezúa dizra',

ne xelápabe' ba lá'ana xra xrnabe'.

<sup>5</sup> Che nu benne' quebe nézene' ájala nna be'ene' benne' zaj zre'e lize',

¿ájazra guné' gusédene' bi ca' chee Dios? <sup>6</sup> Benne' dxusédene' bi ca' chee Cristo quebe dxal-la' gaque' benne' za dxúnbeate dizra' chee Cristo, chee quebe gucá'ana szren cuine', chee quebe cuía xi'e ca guzría xi' da xriwe'.

<sup>7</sup> Cá'anqueze dxal-la' gaque' benne' nape' ba lá'ana lávela benne' quebe zaj naque' chee Cristo, chee quebe gata' lataj nu guzúa le' chalá'ala, na' chee quebe chu'e lu na' da xriwe'.

*Ca dxal-la' xelaca benne' dxelácalene' bi ca' chee Cristo*

<sup>8</sup> Cá'anqueze benne' ca' dxelácalene' bi ca' chee Cristo:

Dxal-la' xelaque' benne' zaj nape' ba lá'ana, ne benne' li lazre'.

Quebe dxal-la' xelé'aje' da guzuzre na le',

ne quebe xelaque' benne' dxulucudee'.

<sup>9</sup> Dxal-la' xelapa xánnie' da zácále'e chee da dxeajlí lázredxu,

ne quebe bi sua da gagu na zría chee' lu xichaj lázrdawe'.

<sup>10</sup> Dxal-la' guxúe xánnele ca dxeledé'.

Te na', che quebe bi zua da dxagu na zria chee', waca xelácalene' bi ca' chee Cristo. <sup>11</sup> Zru'ula benne' caní:

Dxal-la' xelaque' benne' zaj nape' ba lá'ana,

ne quebe xelaque' wetupa dizra' bizruj.

Dxal-la' xelaque' du lazre', ne li lazre' ca naca xúgute da dxelune'.

<sup>12</sup> Tu benne' dxácalene' bi ca' chee Cristo dxal-la' súalene' tuze nu'ula, ne dxal-la' nézene' nna be'ene' zrí'ine' ca', ne benne' zaj zre'e lize'. <sup>13</sup> Benne' ca' dxelácalene' bi ca' chee Cristo, che dxelune' cháwedau' zrin chee',

welezrué'ene' xel-la ba lá'ana, na' xelezéquedxene' xuluchálaje' du lazre' ca dxeajlí lázredxu Jesucristo.

*Tu da ble'e Dios dxi'u ca naca da zéajledxu*

<sup>14</sup> Dxebeza lazra' xídazequeza' xedajnná'a lue', na' dxuzúaja' chiu' da nigá <sup>15</sup> chee chéajni'inu' che dxezreda', ca dxal-la' gunu' ládujla benne'

ca' zaj nababe' chee Dios, benne' ca' ba bláwizra Dios ban, ne zaj nuxru chache' da li, ne dxuluxúe xánnie' na. <sup>16</sup> Da li tu da zrente naca da nigá ble'e Dios dxi'u ca naca da zéajlëdxu:

Dios blë'e nigá, ne guque' bënneache.

Be' Lá'azxa blé'ene' naque' xlátaje.

Belelé'e gubáz chee xabáa ca' Le'.

Benne' dutë xëzr la xu belenne' ca naca chee'.

Guleajlí lazre' benne' zaj zre'e dutë xëzr la xu nigá Le'.

Dios bezi'e Le' xabáa.

## 4

*Ca naca chee benne' ca' dxuluzúe' chala'ala xel-la dxeajlí lazre' chee'*

<sup>1</sup> Be' Lá'azxa ba bdxixruj lië' wazrin zra xulusán bal-la benne' xel-la dxeajlí lazre' chee', na' chjácalene' be' ca' xelezi xë na le', ne xelezi'e ca da xululé'e be' xriwe' ca'. <sup>2</sup> Xuluzé' naque' ca da xulusede benne' wen lazre' ca', benne' dxelún láweze da xrlátaje, ne québedxa zaj zua xel-la dxeléquebe'e xichaj lázrdawe', ne zaj naque' lázrdau zizraj, na' quebe zaj nape' xel-la stu' gate dxelún lazre'. <sup>3</sup> Benne' caní quebe dxelu'e latja nu guchaga na', ne cá'aqueze nu xe'aj gagu bal-la da dxágudxu, lácala ben Dios da ca' chee xelagu benne' ca' dxeajlí lazre' Le', ne benne' ca' zaj núnbe'e da li, ne xelé'e Le'; Xcalenu'. <sup>4</sup> Xúgute' da ben Dios naca na chawe', ne quebe dxal-la' bi guzúadxu chala'ala, san dxal-la' sidxu na, ne xëdxu Dios; Xcalenu', <sup>5</sup> lawe' da naca chawe' lau Dios bíteteze da dxágudxu che dxundxu ca dxenná xrtizre', ne che nábadxu Le' gunë' gaca na da chawe'.

*Benne' wen zrin xrlátaje chee Jesucristo*

<sup>6</sup> Che dxusédenu' bi bíchedxu ca' da caní, nacu' bi wen zrin chawe' chee Jesucristo, na' nazí lu na'u dizra' chee Dios, ne ca naca da dxusédedxu, da na' zéajlënu'. <sup>7</sup> Quebe gulapa na'u da dxuluzaze bënneache, ne dizra' xálaze. Bzazraj cuinu' lu da naca chee Dios. <sup>8</sup> Che dxuzazraj cuinu' ca naca lu bel-la' dxen chiu' wácalequeze na lue' late', san che dxuzazraj cuinu' lu da naca chee Dios, wácale na lue' lu xúgute' da dxunu', na' naca na da sidxu ba neza lu xëzr la xu nigá, ne cá'aqueze lu xëzr la xu da za za'. <sup>9</sup> Da li naca da nigá, na' xúgute' bënneache dxal-la' xelëajle'e chee na. <sup>10</sup> Chee le' na' dxudé xel-la zi' cuínadxu dxundxu zrin lawe' da dxebeza lázredxu Dios ban, Bénnea' naque' weselá chee xúgute' bënneache, na' dxuselé' benne' ca' dxeajlí lazre' Le'.

<sup>11</sup> Da caní dxal-la' gusédenu' bënneache, ne nne xuenu' le' xelune' na. <sup>12</sup> Quebe gu'u lataj nu guzúa lue' chala'ala lawe' da nacu' benne' cuide', san dxal-la' gacu' tu da gulé'e na benne' ca' dxeajlí lazre' Cristo ca dxal-la' xelune'. Gulé'e na le':

Në chee da dxuchálaju',

ne në chee da dxunu',

ne ca nazri'inu' le sa' ljwezru',

ne ca naca Be' Lá'azxa zúalene' lue',

ne ca dxeajlí lazru' Cristo,

ne ca nacu' du lazre'.

<sup>13</sup> Dxácatë xida' neda', ben zi' lazru' gulabu' xiche lá'azxa lávela bënneache, ne gutipu' lazre' bi bíchedxu ca', ne guzëajni'inu' le'. <sup>14</sup> Quebe gusanu' xel-la waca da benna Dios lue' gate buluzé' na' benne' gula ca' xichju', ne



gulenné' ca da ble'e Be' Lá'azxa le' ca naca zrin chee Xránadxu da dxal-la' gunu'.

<sup>15</sup> Ben da caní du lazru' chee xelexé'e xúgute bénneache nápaquezu' da naca chee Dios. <sup>16</sup> Bxue xanne' cuinu', ne ca da dxusédenu', ne guzé chacha lu zrin chiu'. Che gunu' da caní, na' guseláqueze cuinu', ne guseláquezu' benne' ca' xelenné' da guchálaju'.

## 5

### *Ca dxal-la' xelaca benne' ca' dxeajlí lazre' Cristo*

<sup>1</sup> Quebe cun til-lu' tu benne' gula, san bzéajni'i le' ca xráquezu'. Gúcale benne' cuide' ca' ca bi bíchequezu'. <sup>2</sup> Gúcale nu'ula gula ca' ca xrnáquezu'. Gúcale nu'ula cuide' ca' ca bi zánquezu', duté lu xel-la dxapa ba lá'ana chiu'.

<sup>3</sup> Gúcale nu'ula ba nate benne' chee', nu'ula' quebe nu xrtie' zradxa. <sup>4</sup> Che tu nu'ula ba gute benne' chee' ne zaj zra' zrí'ine', u zre sue', lebe' dxal-la' xelunbe' ca da zaj nabágabe' chee' xelácalebe' benne' zaj naca xrtíaquezbé', ne xelunbe' ca da zaj nabágabe' chee' xra xrnabe', lawe' da naca na xrlátaje, ne da dzezaca ba lazre' Dios. <sup>5</sup> Nu'ula da li québedxa nu chilá' chee' dxebeza lazre' Dios, ne dxuchálajlene' Dios te zra, ne chizrela. <sup>6</sup> Nu'ula caní, che dxune' ca da dzezaca ba lazre' léqueze', naque' ca benne' ba nate. <sup>7</sup> Bdxixruj be'e benne' ca' xelune' caní, chee' quebe gun na ba xen nu til-la le'. <sup>8</sup> Che nu benne' quebe dxebe'gunne xue chee' benne' ca' zaj naque' tuze, ne da dxun na ba xen che quebe dxácalene' xrtíaqueze', ba bsane' xel-la dxeajlí lazre' chee', ne nácadxe' benne' wen da zrinnaj ca tu benne' quebe ne chéajle'e chee' Dios.

<sup>9</sup> Lu xiche naga zria la nu'ula ca' quebe nu chilá' chee', benne' dxácale, dxal-la' guzúajle la nu'ula caní, nu'ula na' ba gudé'e ga xun iza, ne guzúa tuze benne' chee'. <sup>10</sup> Dخال-la' gaque' nu'ula ba bñle'e da xrlátaje ca da caní:

Che ba bsegule' zrí'ine' ca'.

Che ba guzi' lu ne'e benne' bíchedxu belezrín lizre'.

Che ba gúcalene' benne' caní duté lu xel-la dxexruj lazre' chee'.

Che ba gúcalene' benne' dxedé'e xel-la zi'.

Che bi xetú da xrlátaje ba bene'.

<sup>11</sup> Quebe guzriale lu xiche na' nu'ula caní che quebe ne xelezri'e ga xun iza lawe' da gagaze xucuaa xel-la dxelezá lazre' chee' le' lu da naca chee' Cristo, na' xelaca lazre' xuluchaga ne'e xecha lasa, <sup>12</sup> na' xelegage' zria lawe' da bulusané' ca da gulechebe lazre' chee' Cristo. <sup>13</sup> Cá'anqueze che dxeledé' tu tu xu'u, xelaque' zrawede, ne quegaze zrawede, san cá'anqueze xelaque' wetupa dizra' bizruj, na' xuluchixre chee' lu xúgute da xelenné', ne xelenné' da quebe dxal-la' xelenné'. <sup>14</sup> Chee' le' na' dxaca lazra' xuluxuchaga ne'e che ne zaj naque' nu'ula cuide', ne xelezrá zrí'ine', ne xuluxúe' lizre', chee' quebe xelezi lataj xelezi tizra benne' ca' dxelezre'e dxi'u. <sup>15</sup> Bal-la nu'ula caní ba belexecuase' chee' Cristo, ne zjácálene' da xriwe'.

<sup>16</sup> Che nu benne' dxeajlí lazre' Cristo, benne' biu, u nu'ula, che zua xrtie' naque' nu'ula ba gute benne' chee', dxal-la' gácalene' le' chee' quebe xelegaga bi ca' chee' Cristo da nigá, na' benne' caní welezeque' xelácalene' nu'ula caní québedxa nu chilá' chee'.

<sup>17</sup> Che zaj zra' benne' gula ca' dxulusédene' cháwedau' bi ca' chee' Cristo, dxal-la' gápale'e benne' ca' ba lá'ana, na' dxundxa na ba xen gápale

ba lá'ana benne' gula ca' dxuluchálajlequeze' le'e dizra' chee Dios, ne dxulusédene' le'e. <sup>18</sup> Lu xiche lá'azxa dxenná na: Quebe cu'ule xixruj dxu'a bezre, be dxíchujba' zrua' xtila. Cá'anqueze dxenná na: Benne' wen zrin dxal-la' si'e xrlázruje'.

<sup>19</sup> Quebe guzé nagu' che nu gagu zria chee tu benne' gula chee xudau' che quebe xelexé chupa u chunna benne' xelexechebe'. <sup>20</sup> Benne' ca' dxelúnqueze' dul-la, dxal-la' til-lu' benne' ca' lávela xúgute bi ca' chee Cristo, chee xelezrebe xezícadxa benne' ca'. <sup>21</sup> Lau Dios, ne lau Xránadxu Jesucristo, ne lau gubáz blau ca' chee xabáa chee', dxusebaga' lue' chee gunu' da caní. Dxenné xueda' lue' quebe cueu' ca' zaj naca benne', ne quebe gucha'u ca' gunu' chee tu tu benne'. <sup>22</sup> Quebe xexúbenu' nu la guzúateu' lu zrin chee Cristo chee quebe bagu' dul-la chee benne' xula. Quebe gulapa na'u ne tu da calela.

<sup>23</sup> Lawe' da quebe chawe' zua le'u, ne tu lize dxaca na, québedxa xé'aju' nísaze, san güe'e late' xrise uva wal-la.

<sup>24</sup> Zaj nalá' dul-la chee bal-la benne' gate quebe nu ne guchi'a ca da zaj nune', san dul-la da zaj nun xezícadxa benne' ca' xululé'e lawe na te na'. <sup>25</sup> Cá'anqueze zaj nalá' da xrlátaje da zaj nun bal-la benne', ne che zra da xrlátaje da quebe zaj nalá', quebe gaca tu xelegáchequeze na.

## 6

<sup>1</sup> Benne' zaj nada'u dxal-la' xelápale'e ba lá'ana xrané' ca' chee quebe nu nne schanni' chee Dios, ne chee da dxusédedxu. <sup>2</sup> Che benne' zaj nada'u, zaj zra' xrané' ca' dxelejli lazre' Cristo, quebe dxal-la' xuluzúe' le' chalá'ala lawe' da zaj naque' benne' biche', san dxal-la' xelune' zrin da nácadxa xrlátaje chee xrané' ca' dxelezi'e ba neza zrin na', lawe' da dxelejli lazre' Cristo, ne zaj naque' benne' biche' zaj nazri'ine'. Bzėjni'i benne' ca' da nigá ne bsizre le'.

*Da calela da dxuluséde benne', ne xel-la gunní'a li*

<sup>3</sup> Che nu benne' dxusédene' da zaj naca calela da quebe zaj naca na tuze ca da bsede Xránadxu Jesucristo, ne ca da dxuséde da dxéajledxu chee Dios, <sup>4</sup> benne' nigá dxucá'ana szren cuine', ne quebe bi nézene'. Dxezá lázrele'e gutil-le' benne' dizra' ca naca chee tu tu dizra' ca'. Benne' dxelún caní:

Dxelaque' benne' xre lazre', ne dxeledil-le',

ne dxulucháchale ljwezre',

ne dxeléquene' dxun le sa' ljwezre' da calela,

<sup>5</sup> ne tu lize dxulutl-la dizra' ljwezre',

ne zaj naque' benne' zaj nazrinnaj lu xichaj lázrdawe',

ne quebe zaj nunbe'e da li.

Dxeléquene' zrin dxundxu chee Cristo naca na tu da waca xuluchínene' chee xelaque' benne' gunní'a. Quebe gunu' tuze benne' caní. <sup>6</sup> Da li da zéajledxu chee Cristo naca na tu da gunní'a zren, na' caní nácaqueze chee tuze bénnea' dxezaca ba lazre' ca da nape'. <sup>7</sup> Quebe bi núadxu gate gúlajdxu lu xezr la xu nigá, ne quebe bi xexúadxu gate xezá'adxu nigá, <sup>8</sup> san che de da gágudxu, ne zra lánadxu, dxal-la' xezaca ba lázredxu nen da ca'. <sup>9</sup> Benne' ca' dxelaca lazre' xelaque' gunní'a, cheajlecházie' lu na' da xriwe', na' cheajlechu'e lu xralaj chee le na, chee xelexá lazre' da xálaze, da dxulucá'ana ditaj na bénneache, ne dxelegú'u na bénneache lu da ba xa' naga xelebía xi'e. <sup>10</sup> Benne' nazri'ine' dumí dxune' xúgute da calela, na'

zaj zra' bal-la benne' gulezá lazre' na, na' bulusanę' xel-la dxelejlı lazre' cheę', na' ba gulezí' lataj xel-la dxudía lu lázrdawe'.

*Da dxusizre Pablo Timoteo*

<sup>11</sup> Lue', węn zrin cheę Dios, gucuasa lu da caní. Bęn da naca xlátaje, ne bzua cuínu' lu na' Dios, ne guxeajlı lazre' Cristo, ne bzri'i Le', ne guca zren lazre', ne dxexruj lazre'. <sup>12</sup> Gudıl-lale da xriwe', guchínenu' xel-la dxeajlı lazre' chiu'. Bęxru tipa xel-la nabán da chadía chacanna lawe' da bláwizra Dios lue' cheę gapu' da nigá, na' ba blé'enu' ca dxeajlı lazru' Cristo lówela zane' benne' dxelexechebe' cheę na. <sup>13</sup> Na'a, lau Dios, Bénnea' nuzúę' xel-la nabán cheę xúgutę da naca ban, ne lau Jesucristo, Bénnea' cá'anqueze blé'ene' da naque', ne bechebe' cheę na lau Poncio Pilato, dxennę xueda' lue'. <sup>14</sup> Guzú' dizra' ca da dxapa' lue', ne quebe gucha'u na. Dخال-la' gunu' na cheę quebe nu seque' bi nne' chiu' ca zrin zra xelá' Xránadxu Jesucristo. <sup>15</sup> Ca zrin zra cheę na Dios sel-le' Le'. Naque' Dios tu licha', na' Benne' Lá'azxa dxenná be'e. Naque' Wenná bea, Benne' dxenná be'ene' wenná bea ca', ne naque' Xrana xúgutę benne' zaj naque' xrana bęnneache. <sup>16</sup> Tuze Dios quebe gatie', ne zuę' lu xel-la naxaní' naga quebe nu seque' cheaj. Netú bęnneache quebe ne lé'ene' Le', ne quebe nu gaca le'e Le'. Cheę Le' naca xel-la ba lá'ana, ne xel-la dxenná bea chadía chacanna. ¡Ca'an gaca na!

<sup>17</sup> Gunnę xue benne' zaj naque' gunní'a lu xezr la xu nigá cheę quebe xulucá'ana szren cuine', ne quebe xuluxrén lazre' xel-la gunní'a cheę', lawe' da quebe naca na da chadía chacanna. Dخال-la' xuluxrén lazre' Dios ban, Bénnea' dxúnnale'e dxi'u xúgutę da dxechinedxu cheę sidxu da ba neza. <sup>18</sup> Gunnę xue benne' caní xelune' da xrlátaje, ne xelaque' benne' gunní'a lu da xrlátaje da xelune', ne bi xulunézruje' benne' xache' ca', ne xulunézrujle'e na. <sup>19</sup> Caní gaca, xelezrué'ene' xel-la gunní'a da gaca na tu da guzúa chacha na le' lu zra da za za', ne xelape' xel-la nabán da zeajlı canna.

<sup>20</sup> Lue', Timoteo, bxue xanne da nuzúa Dios lu na'u. Quebe guzé nagu' dizra' xálaze cheę xezr la xu nigá, da na' dxelenná bal-la benne' naca na xel-la sina. Da nigá naca na da węn lazre'. <sup>21</sup> Bal-la benne' gulezí'e na, na' bulusanę' xel-la dxelejlı lazre' cheę'. Dxenábeda' Dios gunę' da chawe' chiu'. ¡Ca'an gaca na!

## DIZRA' GUDXUPE' DA BZUAJ SAN PABLO CHEE TIMOTEO

### *Pablo dxugape' diuzre Timoteo*

<sup>1</sup> Neda', Pablo, naca' gubáz chee Jesucristo lawe' da guca lazre' Dios gaca' caní, chee cu'a lban ca naca xel-la nabán da guchebe lazre' Dios gunne' chee benne' ca' zaj naque' bi chee Jesucristo. <sup>2</sup> Dxuzúaja' da nigá chiu' lue' Timoteo, bi chia' nazrí'i lazra', na' dxenaba' Xradxu Dios, ne Xránadxu Jesucristo gune' da chawe' chiu', ne xexache lazre' lue', ne gunne' chiu' xel-la dxebeza zri lazre'.

### *Pablo dxusízrene' Timoteo chee gunbe' zrin chee Cristo*

<sup>3</sup> Te zra ne chizrela gate dxuchálajlëna' Dios, ne dxeajsá lazra' lue', dxápequeza' Dios: Xcalenu', Bénnea' dxuna' zrin chee', ne quebe bi zua da dxagu na zria lu xichaj lázrdawa'. Dxuna' zrin na' ca belúnqueze xra xrtawa' ca'. <sup>4</sup> Dxeajsá lázrqueza' ca gudxezru' gate na' bezá'a naga zu', ne dxaca lázrelë'a xelé'eda' lue' chee gápale'a xel-la dxebé. <sup>5</sup> Cá'anqueze dxeajsá lazra' xel-la dxeajlí lazre' li da napu'. Xrna'u gula, Loida, ne xrna'u, Eunice gulape' xel-la dxeajlí lazre' caní, na' nuxrén lazra' lue' nápaquezu' na.

<sup>6</sup> Chee le' na' dxuzéajni'ida' lue' guchínenu' ca da benna Dios lue' gate na' bzea' na'a xichju', ne gunaba' gun Dios da chawe' chiu'. <sup>7</sup> Be' Lá'azxa benna Dios dxi'u quebe dxune' dxi'u bi zra chebe, san dxunne' dxi'u xel-la wal-la, ne xel-la zri'i lazre', ne dxune' dxi'u benne' dxenná be'e cuina. <sup>8</sup> Chee le' na' quebe gapa stu' ca naca chee Xránadxu, ne cá'anqueze ca naca chia' neda', xu'a lizre xia nigá lawe' da dxuna' zrin chee Cristo, san bchaga lau lue' xel-la zi' da dxeledé benne' ca' dxuluchálajë' dizra' chawe' chee Jesús, na' Dios gutípaqueze' lazru'. <sup>9</sup> Dios bselé' dxi'u, ne bláwizre' dxi'u chee guzúa cuínadxu lu na' Le', quegá lawe' da bendxu tu da xrlátaje, san lawe' da guca lázrequeze Le' gaca na caní, ne lawe' da bzri'ine' dxi'u, nazrágadxu chee Cristo. Dios bzri'ine' dxi'u gate quebe ne gunte' xezr la xu nigá, <sup>10</sup> na' blé'ene' xel-la zri'i lazre' nigá na'a, lawe' da gusel-le' Jesucristo, weselá cheedxu, na' bzria xi'e xel-la dxenná bea chee xel-la gute, ne blé'ene' bénneache ca gaca xelezí' lu ne'e xel-la nabán chadía chacanna, ca dxennáqueze dizra' chawe' da dxuchálajdxu.

<sup>11</sup> Dios bzue' neda' chee guchálaja' ca naca dizra' chawe' nigá, ne bene' neda' benne' gubáz chee' chee gusédeda' benne' quebe zaj naque' judío. <sup>12</sup> Chee le' na' dxedéa' xel-la zi' caní. Quebe dxapa stu'a ne chee da nigá, lawe' da núnbe'a Bénnea' nuxrén lazra', ne nezda' napë' xel-la waca cu'u chawe' da nuzúa' lu ne'e ca zrindxa zra na'.

<sup>13</sup> Bexru tipa ca naca dizra' da bsédeda' lue', ne quebe gusanu' xel-la dxeajlí lazre', ne xel-la zri'i lazre' da nápadxu lawe' da nácadxu bi chee Jesucristo. <sup>14</sup> Ne chee xel-la waca chee Be' Lá'azxa, Bénnea' zuë' xichaj lázrdaudxu, bexru tipa da na' nuzúa Dios lu na'u.

<sup>15</sup> Ba nézenu' ca belún xúgutë bi bíchedxu zaj zre'e naga nababa Asia. Gulebéaj xíchajë' neda'. Cá'anqueze Figelo, ne Hermógenes belunë' tu zren benne' ca'. <sup>16</sup> Dxenaba' Xránadxu xexache lazre' benne' zaj zre'e lizre Onesíforo. Gúcale le' neda' zane' lásaqueze, ne quebe gudapa stue'

chia' neda', xu'a lizre xia. <sup>17</sup> Gate blẹẹ xẹzre Roma, bexílajẹ' neda', na' bezrélenẹ' neda'. <sup>18</sup> Dxenaba' Xránadxu xexache lazrẹ' lẹ' lu zra ná' gate xelá' Lẹ'. Ba nézenu' ca gúcalelẹ'ẹnẹ' dxi'u lu xẹzre Efeso.

## 2

### *Benne' wẹn zrin du lazre' chee Jesucristo*

<sup>1</sup> Lue', zri'ina', guzẹ tipa nẹ chee da xrlátaje da nápadxu lawe' da nácadxu bi chee Jesucristo. <sup>2</sup> Ca da bennu' bchálaja' lówela benne' zan, benne' belexechebe' naca na da li, bzua na lu na' benne' zaj naque' li lazre', benne' xelezéquene' xulusédene' na benne' xula.

<sup>3</sup> Lue' dxal-la' gacu' benne' wẹn zrin du lazre' chee Jesucristo, guchaga lau' xel-la zi' ca tu benne' zeje' wedil-la. <sup>4</sup> Netú benne' zeje' wedil-la, benne' xu'ẹ lu zrin chee xranẹ', quebe dxunẹ' zrin xula, lawe' da dxaca lazrẹ' xezaca ba lazre' xranẹ' chie'. <sup>5</sup> Cá'anqueze, benne' xu'ẹ lu witaj quebe zruẹ'ene' da xexalẹ' che quebe quitajẹ' ca naca chee na. <sup>6</sup> Cá'anqueze benne' dxaza dxa'ana, benne' dxúnlẹ'ẹ zrin, dxal-la' xezí' lu nẹ'ẹ lina chee'. <sup>7</sup> Blaba lazre' ca da dxapa' lue', na' Xránadxu guzẹajni'ine' lue' xúgute na.

<sup>8</sup> Bsa lazre' ca naca chee Jesucristo, guque' xrtia David, ne bebanẹ' ládujla benne' gate, ca dxenná dizra' chawe' da dxuchálaja' neda'. <sup>9</sup> Nẹ chee dizra' chawe' nigá dxedéa' xel-la zi', ne xu'a lizre xia nigá ca tu benne' wẹn da zrinna, san dizra' chee Dios quebe nu seque' cu'u lẹ na lizre xia. <sup>10</sup> Chee lẹ na' xúgute da ca' dxuchaga lawa' nẹ chee benne' ca' ba gucá'a Dios lẹ', chee cá'anqueze benne' ca' xelelẹ' nẹ chee Jesucristo, ne xellexú'ẹ lu xabáa chadía chacanna.

<sup>11</sup> Da nigá naca na da li:

Che nuzúa cuínadxu gátedxu ca bzua cuina Lẹ',  
cá'anqueze waca bandxu nen Lẹ'.

<sup>12</sup> Che dxededxu xel-la zi',  
na' nna béaquezdxu tu zren nen Lẹ'.

Che quebe xechébedxu nácadxu bi chee Lẹ',  
cá'anqueze Lẹ' quebe xechébe' nácadxu bi chee'.

<sup>13</sup> Che dxi'u quebe nácadxu li lazre',  
Lẹ' nácaqueze' li lazre'.

Dios québequeze guchẹ'ẹ ca naque'.

### *Tu benne' wẹn zrin du lazre'*

<sup>14</sup> Bsa lazre' bi bíchedxu ca', ne bsizre lẹ' lu La Xránadxu québedxa xulutil-la dizra' ljwezrẹ'. Xel-la dxutil-la dizra ljwezre quebe bi culuén napa na, san dxuxrinna na xichaj lázrdau benne' ca' dxelénne' na. <sup>15</sup> Bẹn ba xuzre gacu' wẹn zrin du lazre' lau Dios, na' quebe gaca xel-la stu' chiu', lawe' da dxuchínenu' xrlátaje dizra' li. <sup>16</sup> Quebe gulapa na'u dizra' xálaze, ne dizra' sban da dxuluchálajze bénneache, da ca' dxulucuasa na bénneache lu da naca chee Dios. <sup>17</sup> Dizra' sban caní dxuluxrinna na xichaj lázrdau bénneache ca dxun tu wẹ' da dxuzru na lu bẹl-la' dxen cheedxu. Caní guca chee Himeneo, ne Fileto, <sup>18</sup> benne' ca' gulecuase' lu xel-la li, na' dxelenné' ba belexebán benne' gate, na' dxuluxrinna' xel-la dxeajlí lazre' chee bal-la benne'. <sup>19</sup> Dios ba gudixruj bi'ẹ xrtizre' da naca na ca tu lane xu'u chee xel-la dxeajlí lazre' cheedxu, da dxenná caní: Xránadxu núnbe'ẹ bi chie' ca'

Cá'anqueze dxenná na: Xúgute bi ca' chee Cristo québedxa dxal-la' xelune' da calela.

<sup>20</sup> Tu lu xu'u zaca, quegá zra' tuze zriga xé'ena da zaj naca na oro ne plata, san cá'anqueze zaj zra' da zaj naca na xiaj ne xu. Dxuluchínene' da ca' zaj zácadxa lu da zaca, na' xezícadxa da ca' dxuluchínene' ájateze.

<sup>21</sup> Nácadxu ca zriga xé'ena ca'. Che nu benne' dxaca lazre' gaque' ca tu da zaca, chee gaque' benne' guchine Xránadxu lu zrin xrlátaje chee', dxal-la' xexadxé' ca naca da calela ca'.

<sup>22</sup> Bxue xanne' cuinu' ca zaj naca da ca' dxelezá lazre' benne' cuide' ca', ne quebe gusanu' da xrlátaje da dxunu', ne ca dxeajlí lazru' Cristo, ne ca nazri'inu' Le', ne ca dxebeza zri lazru', da ca' dxunu' tu zren nen xúgute benne' ca' du lazre' dxululáwizre' Xránadxu. <sup>23</sup> Quebe gulapa na'u dizra' xálaze, ne dizra' quebe zeaj xrlátaje, lawe' da nézenu' dxuluzúa na bènneache lu da ba xa'.

<sup>24</sup> Benne' wen zrin chee Xránadxu:

Quebe dxal-la' tíl-lalene' benne'.

Dxal-la' gaque' zri'i lazre' nen xúgute bènneache.

Dxal-la' gaque' benne' dxezeque' gusédene' bènneache.

Dxal-la' gaque' zren lazre',

<sup>25</sup> ne dute xel-la dxexruj lazre' gusízrene' benne' dxelune' da calela.

Caní dxal-la' gune' che ba benla Dios xelexexéaje lazre' benne' ca chee xelúnbe'e da li, <sup>26</sup> na' xelelé' lu xralaj chee da xriwe', naga nuzrá na le', na' dxelune' ca da dxenná le' na.

### 3

#### *Ca xelaca bènneache lu zra bzebe*

<sup>1</sup> Cá'anqueze dxal-la' nézele lu zra bzebe ni' gaca na stebe chee bènneache.

<sup>2</sup> Bènneache ca' xelaque':

Benne' xelezrí'ize cuina, ne xelezrí'ine' dumí.

Xulucá'ana szren cuine',

ne xulucá'ana cuine' ca benne' blau ca'.

Xelenné' schanni' chee Dios,

ne quebe xuluzúe' dizra' chee xra xrne'e.

Xelaque' benne' quebe dxelezí le',

ne benne' quebe dxelapa ba lá'ana Dios.

<sup>3</sup> Quebe xelaque' zri'i lazre',

ne quebe xelexexache lazre' ljwezre'.

Xelenné' chee ljwezre', ne quebe xelenná be'e cuine'.

Xelaque' benne' snia ca', ne xuluzúe' chalá'ala da naca xrlátaje.

<sup>4</sup> Quebe xelaque' li lazre' nen ljwezre'.

Xelaque' benne' dxelexube.

Xeléquene' zaj naque' benne' szrente.

Xelexezaca ba lázredxene' da ca' dxeledánene' quézcala da naca chee Dios.

<sup>5</sup> Lácala xululé'e cuine' ca benne' zaj naque' chee Dios,

quebe súale le' xel-la waca chee Dios.

Quebe gunu' tu zrén benne' ca'. <sup>6</sup> Ca zaj naca benne' caní zaj naca benne' ca' zjaque' tu tu xu'u, ne dxelezí xe'e nu'ula quebe zaj zie' du lazre', ne zaj zua da dxagu na zria lázrdawe' da naca chee xtul-le'. Xel-la dxelezá lazre' chee nu'ula caní nazrube xu na le'. <sup>7</sup> Lácala tu dxulusédezqueze' chee xel-la li, cabata' dxeléajni'iquezne' na. <sup>8</sup> Ca belún Janes ne Jambres, benne' wazrá' ca', benne' ca' guledábague' Moisés, cá'anqueze dxelún benne' caní,

dxeledábage' xel-la li. Zaj nazrinnaj xichaj lázrdawé', ne belexecuase' lu xel-la dxeajlí lazre' chee Dios. <sup>9</sup> Quebe bi xelezrué'e benne' caní, lawe' da xeleque bé'equeze xúgute bēneache zaj naque' benne' xálaze, ca gulaca benne' chupa ca' guledábage' Moisés.

*Da bzebe da dxusebaga Pablo Timoteo*

<sup>10</sup> Ba benu':

Ca da bzéajni'ida' bēneache, ne blé'equeznu' ca bēnqueza'.

Nézenu' da dxaca lazra' guna', ne ca dxeajlí lazra' Cristo.

Bchaga lawa' da guzaca', ne nazrí'ida' xúgute bēneache.

Nézenu' ca naca xel-la zren lazre' chia'.

<sup>11</sup> Blé'enu' ca guláu zi' xuzre' neda', ne ca gudéa' xel-la zi'.

Nézenu' xúgute da guzraca' lu xezre Antioquía, ne xezre Iconio, ne xezre Lистра.

Guláu zi' xuzre benne' ca' neda', na' Xránadxu bselé' neda' lu xúgute da ca'.

<sup>12</sup> Xúgute benne' ca', benne' dxelaca lazre' xelúnqueze' ca da dxenná Jesucristo, weláu zi' xúzrequeze bēneache le'. <sup>13</sup> Benne' ca' dxeluné' da calela, ne benne' dxelezí xē'e welúndaqueze' da calela. Xelezí xē'e bēneache, na' benne' xula xelezí xē'e benne' caní.

<sup>14</sup> Lue', guzé chacha ca da ba naxéajni'inu', da na' nuxrén lazru'. Nézqueznu' nu bsede lue', <sup>15</sup> na' ne nácateu' bídau'te ba núnbe'u da dxenná lu xiche lá'azxa, da dxezeque na guzéajni'i na lue', chee lau' lawe' da dxeajlí lazru' Jesucristo. <sup>16</sup> Xúgute da naxúaj na lu xiche lá'azxa naca na da bzéajni'i Dios benne' ca' zaj naque' bi chee Le', ne naca na da dxuzéajni'i na dxi'u, ne da dxedil-la na benne' dxeluné' da calela, ne da dxusizre na dxi'u, ne da dxulé'e na dxi'u ca dxal-la' gundxu da xrlátaje, <sup>17</sup> chee gaca du lazre' bi chee Dios, na' gácabe' bi nazede xanne chee gunbe' xúgute da xrlátaje.

## 4

<sup>1</sup> Lau Dios, ne lau Xránadxu Jesucristo, Bēneea' guchi'e chee benne' ban ca', ne chee benne' gate ca' gate ze'e xedajnná be'e, dxusebaga' lue' <sup>2</sup>guchálaju' dizra' chee Dios, ne gunu' ba xuzre guchálaju' che xuluzé naga bēneache, ca xuluzé nague'. Bzéajni'i benne' ca' duté xel-la zren lazre' chiu', ne ble'e le' ca da zaj nabague'. Gudil-la, ne bsizre benne' ca'. <sup>3</sup> Caní dxal-la' gunu' lawe' da wazrín zra québedxa xuluzé naga bēneache chee xel-la li da dxusédedxu. Ca dxelezá lázrqueze le', xulunné' zane' benne' xulusédené' le' ca da dxelaca lázreze le' xelenne'. <sup>4</sup> Québedxa xuluzé nague' da li. Wuluzé nague' dizra' da dxuluzaze bēneache. <sup>5</sup> Na' lue', bzéajni'i cuinu' lu xúgute da caní. Bchaga lau xel-la zi' da teu'. Bzua cuinu' chee guchálaju' dizra' chawe' chee Cristo, ne ben zrin da nabagu' chee Cristo.

<sup>6</sup> Ba bzrin zra guzúa' xel-la nabán chia' lu na' Dios, lawe' da ba zua bagu xelutie' neda'. <sup>7</sup> Du lazra' gudábaga' benne' ca' guledábage' da naca chee Cristo. Tu bēnzqueza' ca naca da li chee', ne ba bexuzre bēna' da bsebaga Cristo neda' guna'. <sup>8</sup> Lawe' da bēna' da xrlátaje, na'a ba dxebeza da dxexala' neda', da na' gunna Xránadxu neda' lu zra na', ne quegá tuza' neda' gunne' na. Cá'anqueze gunézruje' na chee benne' ca' duté xel-la zri'i lazre' chee' dxelebeze' zra xelé'e.

*Pablo dxulé'ene' Timoteo ca dxal-la' gunbe'*

<sup>9</sup> Ben ba xuzre xídazeu' xedajnná'u neda'. <sup>10</sup> Ba guleaj xichaj Demas neda' lawe' da dxedánedxabe' da naca chee xezr la xu nigá, ne ba zexíajbe' Tesalónica. Crescente ba gusel-la'-be' zexíajbe' naga nababa Galacia, na' Tito gusel-la'-be' naga nababa Dalmacia. <sup>11</sup> Tuze Lucas zúalebe' neda'. Bexilaj Marcos, na' guché'-be' tu zrén len lue', lawe' da wazéquebe' gácalebe' neda' lu zrin chee Cristo. <sup>12</sup> Tíquico gusel-la'-be' lu xezre Éfeso. <sup>13</sup> Gate xidu', gúagu' gabán chia' da nucá'ana' xezre Troas lizre Carpo. Cá'anqueze gu'u xiche ca' bcá'ana' ga na', ne da dxunte na ba xen gu'u xiche ca' zaj naca na xide.

<sup>14</sup> Alejandro, benne' gubizre xia bsaca' zí'le'e neda'. Xránadxu gunézruje' lazruj chee' ca da bene'. <sup>15</sup> Bxue xanne cuinu' chee benne' nigá lawe' da ba gudábagale'e dizra' da dxuchálajdxu.

<sup>16</sup> Da nedxu lasa gate becheba' ca naca chia' lau benne' xu'u lawe' ca', netú benne' quebe gúcalene' neda'. Xúgute' buluzá' xíchaje' neda'. <sup>17</sup> Gúcale Xránadxu neda', ne btipe' lazra' chee guzéqueda' bchálaja' dizra' chawe' lau xúgute' benne' ca' quebe zaj naque' judío. Ca'an guca bselá Xránadxu neda' lu na' benne' ca', ca dxun benne' dxuselé' béadu ca' lu dxu'a bezre xixre', <sup>18</sup> na' guseláqueze' neda' lu xúgute' da caléla, ne guxúequeze' neda' ca zrin zra xezrina' xabáa naga dxenná' bea Le'. ¡Gaca báqueze Le'! ¡Ca'an gaca na!

*Benne' chee Cristo dxulugapa diuzre ljwezre'*

<sup>19</sup> Dxugapa' diuzre Priscila, ne Aquilo, ne benne' zaj zra' lizre Onesíforo. <sup>20</sup> Erasto begá'anabe' xezre Corinto, na' bcá'ana' Trófimo lu xezre Mileto lawe' da quebe chawe' zúabe'. <sup>21</sup> Ben ba xuzre xidu' nigá dxácate' quebe ne chú'udxu beu' zaga. Eubulo, ne Pudente, ne Lino, ne Claudia, ne xúgute' bi bíchedxu zaj zre'e nigá dxulugape' lue' diuzre.

<sup>22</sup> Dxenaba' Xránadxu Jesucristo súalene' lue', ne dxenaba' Dios guné' da chawe' chee xúgutele le'e. ¡Ca'an gaca na!



## DIZRA' DA BZUAJ SAN PABLO CHEE TITO

*Pablo dxugape' Tito diuzre*

<sup>1</sup> Neda', Pablo, naca' wen zrin chee Dios, ne gubáz chee Jesucristo chee guzéajni'ida' benne' ca' ba gucá'a Dios chee xeleaǵlǵ lazre' Cristo, ne xelúnbe'e da naca li lazre' chee da naca chee Dios, <sup>2</sup> ne chee xelebeza lazre' xel-la nabán chadía chácanna, da guchebe lazre' Dios gunne' cheedxu gate za gunte' xezr la xu nigá. Dios quebe dxun lazre', <sup>3</sup> na' na'a, ca ba bzrin zra chee na, ba bzéajni'ine' dxi'u ca naca xrtizre' ne chee da bxrize' Dios neda' cu'a lban chee na. Dios nácaqueze' weselá cheedxu. <sup>4</sup> Dxuzúaja' da nigá chiu', Tito. Nacu' ca zri'inequeza' lawe' da dxeajlǵ lázredxu Cristo. Dxenaba' lau Xradxu Dios, ne lau Xránadxu Jesucristo, Benne' weselá cheedxu, guné' chiu' da cháwedau', ne xexache lazre' lue', ne gunne' lue' xel-la dxebeza zri lazre'.

*Zrin da dxun Tito lu xezr la xu Creta*

<sup>5</sup> Bcá'ana' lue' lu xezr la xu Creta da naxechaj nisa chee gucá'ana chawu' da quebe begá'ana chawe' láduǵla bíchedu ca', ne chee gunnitu' benne' gula chee xudau' tu tu xézredu ca', cáteze bxríseda' lue' gunu'. <sup>6</sup> Tu benne' gula chee xudau':

Dxal-la' gaque' benne' quebe bi zua da gagu na chie'.

Dxal-la' súalene' tuze nu'ula.

Zri'ine' dxal-la' xelácabe' bi ba dxéajlǵ lázrebe' Cristo.

Quebe bi da zrinnaj dxelún zri'ine' ca',

ne quebe gaca nu gagu zria chee da dxelunbe'.

<sup>7</sup> Lawe' da xu'u lu ne'e zrin chee Dios, tu benne' dxuxúe' benne' zaj nababe' chee Cristo:

Dxal-la' gaque' benne' quebe bi zua da gagu na zria chee'.

Quebe dxal-la' gaque' benne' dxucá'ana szren cuine'.

Quebe dxal-la' gaque' benne' xichaj zra'a.

Quebe dxal-la' gaque' benne' dxé'aje' da dxuzuzre na le'.

Quebe dxal-la' gaque' benne' dxedíl-lalene' bénneache.

Quebe dxal-la' gaque' benne' dxucúdee'.

<sup>8</sup> Dxal-la' súateze' si' lu ne'e benne' zjaque' lizre'.

Dxal-la' guné' da naca cháwedau'.

Dxal-la' gaque' benne' nna be'e cuine'.

Dxal-la' gaque' benne' xrlátaje.

Dxal-la' gaque' benne' nuzúa cuine' chee Dios.

Dxal-la' gaque' benne' dxuzéajni'i cuine'.

<sup>9</sup> Dxal-la' gaque' benne' nuzúa cuine' chee dizra' li.

Dizra' li naca na da bsede nu benne' le' chee séquene' gusízrene' benne' xubla ne chee da li da dxusédene', ne chee séquene' guzexruje' lazre' benne' ca' dxelenné' chee da li na'.

<sup>10</sup> Caní dxal-la' guné' lawe' da zrále'e benne' dxelenné' chee dizra' li, benne' dxelezí xe'e benne' xubla lu da xala da dxlenné'. Zane' benne' Israel dxelune' caní. <sup>11</sup> Dxal-la' guzúa zriu' benne' dxelune' da caní lawe' da dxuluxrinnaje' xichaj lázxdau xúgute' benne' zaj zra' tu tu xu'u naga dxelú'e chee xulusédene' da quebe naca xrlátaje. Dxelune' caní chee xelezí' lu ne'e dumí. Da nigá da dxelune' naca na da calela.

<sup>12</sup> Tu benne' Creta naga zu', benne' gunné' waláz chee xudau' chee benne' ca', gunné': "Benne' Creta zaj nácaqueze' wen lazre', ne zaj naque' ca be snia ca', ne zaj naque' benne' wagu xrata', ne zrawede." <sup>13</sup> Da li gunné'. Chee le na' gudil-laqueze benne' ca' chee xelaque' li lazre' ca dxelaajlí lazre' Cristo, <sup>14</sup> ne chee quebe xuluzé naque' dizra' da dxuluzaze benne' Israel ca', ne ca naca da nadxixruj bea ca' da dxelún benne' ca' dxuluzé' chalá'ala dizra' li.

<sup>15</sup> Xúgute naca na xrlátaje chee benne' ca' zaj naca xrlátaje xichaj lázrdawe', san chee benne' ca' dxelune' da sban, ne québedxa dxeléajle'e chee Cristo, quebe bi de da naca xrlátaje. Zaj nazrinnaj xichaj lázrdawe'. <sup>16</sup> Benne' caní dxelenné' zaj núbbe'ene' Dios, san da dxelune' dxulé'e na quebe naca da li da dxelenné'. Zaj naque' benne' wen da sban, ne benne' wen da calela, ne quebe xelezéquene' xelune' tu da xrlátaje.

## 2

<sup>1</sup> Dxal-la' guchálaju' da ca' dxusede na dxi'u da naca li.

<sup>2</sup> Benne' gula chee xudau':

Dxal-la' xelaque' benne' dxelenná bé'e cuine'.

Dxal-la' xelaque' benne' du lazre'.

Dxal-la' xelaque' benne' dxuluzéajni'i cuine'.

Dxal-la' xelaque' li lazre' ca dxelaajlí lazre' Cristo,

ne ca zaj nazrí'ine' Le',

ne ca naca xel-la zren lazre' chee'.

<sup>3</sup> Cá'aqueze nu'ula gula ca' chee xudau':

Dxal-la' dxelapa ba lá'ana Dios ca naca xúgute da dxelune'.

Quebe dxal-la' xelaque' benne' dxulutupe' dizra' bizruj.

Quebe dxal-la' xelaque' benne' dxelé'aje' da xuzuzre na le'.

Dxal-la' xulusédene' da naca xrlataje

<sup>4</sup> chee gaca xulusédene' nu'ula cuide' ca'

chee xelezrí'ine' benne' chee' ca', ne zrí'ine' ca',

<sup>5</sup> ne chee xelenná be'e cuine',

ne xelaque' du lazre',

ne xulupe'e lizre',

ne xuluzé' dizra' chee benne' chee'.

Caní dxal-la' xelune' chee quebe nu nne' schanní' chee xrtizra' Dios.

<sup>6</sup> Cá'aqueze bsizre bi cuide' ca' chee xelenná be'e cuínabe'. <sup>7</sup> Ca naca

da xrlátaje dxunu' lue' dxal-la' gulé'e na benne' ca' ca dxal-la' xelune'.

Gate dxusedenu' benne' ca' dxal-la' gacu' li lazre', ne du lazre'. <sup>8</sup> Dxal-la'

guchálaju' da naca li lazre' chee quebe nu seque' si tizra le na. Che gunu'

caní, na' che nu benne' nnie' chee, wedué'equenze', lawe' da quebe sua

tu da calela da dxunle.

<sup>9</sup> Bzéajni'i benne' ca' zaj nada'u chee xuluzé' dizra' chee xrane' ca

naca xúgute da xelé xrane' le'. Dxal-la' xelune' da xelexezaca ba lazre'

xrane', ne quebe xelexenné' lau xrane'. <sup>10</sup> Quebe dxal-la' xelexane' da

naca chee xrane', san dxal-la' xelaque' li lazre', chee xelélé'e benne' ca da

dxelún benne' caní, na' xelenné' chawe' chee xrtizra' Dios, Benne' weselé

cheedxu.

<sup>11</sup> Dios ba blé'ene' ca naca da chawe' chee' chee xelélé xúgute bénneache.

<sup>12</sup> Da xrlátaje chee Dios dxusede na dxi'u chee québedxa gundxu da calela,

ne ca naca xel-la dxezá lazre' da calela, san chee nna be'e cuínadxu, ne

gácadxu du lazre', ne gápadxu ba lá'ana Dios lu xezr la xu nigá <sup>13</sup> dxácate

ne dxebézadxu zra xelá' Dios szren, ne weselá cheędxu Jesucristo nen xel-la szren cheę', da na' dxebeza lázredxu. <sup>14</sup> Lę' bzua cuine' lu na' benne' ca' belútię' Lę' waláz cheędxu dxi'u cheę bselé' dxi'u lu xúgute' da zrinnaj, na' bca'ana chawę' dxi'u cheę gácadxu bi cheęqueze', ne cheę gundxu da xrlátaje du lázredxu.

<sup>15</sup> Da caní dxal-la' gusédenu' benne' ca'. Gudil-la benne' ca', ne bsizre-ņę' dute' xel-la dxenná bea chiu'. Quebe bi da calęla gunu' cheę quebe nu si tizra lue'.

### 3

#### *Da dxal-la' xelún benne' zaj nababę' cheę Cristo*

<sup>1</sup> Bsa lazre' benne' bíchedxu ca' cheę xelune' ca dxuluchixruj benne' ca' dxelenná bé'engę', ne benne' xu'u lawe', ne cheę xuluzúę' dizra' cheę benne' ca', ne cheę xelezúę' xelune' xúgute' da xrlátaje. <sup>2</sup> Quebe dxal-la' xelennę cheę nu benne', san dxal-la' xelaque' zren lazre', ne zri'i lazre', ne dxexruj lazre' lau xúgute' bęnneache. <sup>3</sup> Cá'anqueze dxi'u gate nate gúcadxu benne' xala, ne quebe bzúadxu dizra' cheę Dios. Gudadxu calęla, na' gunná be'e bela' dxen cheędxu dxi'u, cheę bęndxu ca naca xúgute' da guzá lázredxu, ne da bezaca ba lázredxu. Bęndxu da zrinnaj, ne gúcadxu xa lazre'. Belecuide bęnneache dxi'u, na' bzrá'adxu ljwézredxu tudxu xetudxu. <sup>4</sup> Gate Dios, weselá cheędxu, blé'engę' da naca chawę' cheę', ne xel-la zri'i lazre' cheę', <sup>5</sup> na' bselé' dxi'u, quegá lawe' da bęndxu dxi'u tu da xrlátaje, san lawe' da bexache lazre' dxi'u. Bselé' dxi'u ne cheę da gudibe na dxi'u gate na' bexálajdxu, na' bucube Be' Lá'azxa cheę' dxi'u. <sup>6</sup> Ne cheę Jesucristo, weselá cheędxu, Dios ba núnnalę'ę dxi'u Be' Lá'azxa cheę', <sup>7</sup> cheę ne cheę da naca chawę' cheę' gácadxu xrlátaje lau Lę', ne zrué'edxu xel-la nabán chadıá chacanna da dxebeza lázredxu. <sup>8</sup> Da caní zaj naca na da li. Dxaca lazra' guszrequeznü' benne' ca' ca naca da caní cheę xelebé' gunne xue xelún benne' ca' da chawę', benne' ca' dxelęajlę'ę cheę Dios. Da caní zaj naca na da xrlátaje, ne da gaca xuluchine xúgute' bęnneache. <sup>9</sup> Quebe gulapa na'u dizra' xala ca', ne dizra' dxuluzaze bęnneache ca naca cheę zra xrtawę', ne dizra' da dxun na bęnneache chupa la'a, ne da dxulutil-la bęnneache da naca cheę da bchixruj be'e Moisés. Da caní quebe culuén zaj napa na. Dácheze naca na.

<sup>10</sup> Che nu benne' dxunę' le'e chupa la'a, bsizre-ņę' tu chupa lasa, ne che quebe dxenne' ca dxu'u lę', bebéaję' ládujla le'e <sup>11</sup> lawe' da nézenu' nazrinnaj xichaj lázxdau benne' caní, na' dul-la dxelúnqueze' ba nuzría xi na lę'.

#### *Da dxal-la' gun Tito*

<sup>12</sup> Gate sel-la' Artemas u Tíquico naga zu', bęn baxuzre xidu' xedajna'u neda' lu xęzre Nicopolis lawe' da bache nuna' sua' nigá beu' zaga ca'. <sup>13</sup> Gúcalę Zenas, benne' wedé dizra', ne Apolos, ca da séquenu'. Bnezruj benne' ca' ca da zaj nachínene' cheę chjaque' lu neza cheę', na' quebe bi xelęázrjene'. <sup>14</sup> Cá'anqueze benne' zaj nabábalęne' dxi'u dxal-la' xulúsędie' xelune' da chawę', cheę xelácalęne' benne' dxelexázrjene', cheę xelaque' benne' guchine Cristo.

#### *Pablo dxuzé' Tito dizra'*

<sup>15</sup> Xúgute' benne' zráłene' neda' dxulugape' lue' diuzre. Bgape diuzre benne' ca' zaj nazri'ine' dxi'u lu da naca cheę Cristo. Dxenaba' Dios gun chawę'ę xúgutele le'e. ¡Ca'an gaca na!

## DIZRA' BZUAJ SAN PABLO CHEE FILEMÓN

*Pablo dxugape' diuzre Filemón*

<sup>1</sup> Neda', Pablo, xu'a lizre xia lawe' da dxuna' zrin chee Jesucristo, nen bi bíchedxu Timoteo. Dxugápantu' lue' diuzre, Filemón, benne' nazrí'ite lázrentu'. Nacu' bi ljwézrentu' lu zrin chee Cristo. <sup>2</sup> Dxugapa' diuzre benne' bíchedxu ca' dxelezrague' lizru', ne nu'ula zandxu Apia, ne Arquipo, bi ljwézredxu nácabe' benne' zeje' wedil-la chee Cristo. <sup>3</sup> Dxenaba' Xradxu Dios ne Xránadxu Jesucristo gunē' da chawe' chee, ne gunne' le'e xel-la' dxebeza zri lazre'.

*Ca naca chee Filemón*

<sup>4</sup> Dxápequeza' Dios xcalenu' gate dxuchálajlęna' Le' ne dxeajsá lázrqueza' lue', <sup>5</sup> lawe' da ba benda' ca nazri'inu' Xránadxu Jesucristo ne ca dxeajlí lazru' Le', ne ca nazri'inu' xúgute' bi ca' chee Dios. <sup>6</sup> Dxenaba' lau Dios guzėjni'ine' benne' ca' dxelejli lazre' Le' ne chee xel-la' dxeajli lazre' chiu', ca naca xúgute' da chawe' ca' da nápaxu ne chee Jesucristo. <sup>7</sup> Xel-la' zri'i lazre' chiu', bi bicha', dxúnnale'e na neda' xel-la' dxebé, ne dxutipa na lazra', ca dxutipa na lazre' xúgute' bi chee Dios.

*Pablo dxenabe' Filemón tu da gunē' chee Onésimo, bi na'u Filemón*

<sup>8</sup> Chee le' na', lácala xu'u lu na'a nna be'eda' lue' ca dxal-la' gunu' lawe' da naca' gubáz chee Cristo, <sup>9</sup> dxata' xúeda' lue' lu xel-la' zri'i lazre' cheedxu, neda', Pablo, benne' gula, ne xu'a lizre xia lawe' da dxuna' zrin chee Cristo. <sup>10</sup> Dxata' xúeda' lue' tu da gunu' chee Onésimo, bi nácabe' ca zri'inequeza' lu da naca chee Cristo, neda', xu'a lizre xia nigá.

<sup>11</sup> Gate nate Onésimo, bi na'u lue' gúcabe' tu bi wen da calela, san na'a nácabe' wen zrin li lazre' chiu' lue', ne chia' neda'. <sup>12</sup> Dxesel-la'-be' naga zu'. Bezi' lu na'u-be', nácabe' bi nazrí'ite lazra'. <sup>13</sup> Guzá lazra' neda' xegá'analebe' neda' nigá chee gunbe' zrin chia' neda' waláz chiu' lue' dxácatę ne xu'a lizre xia lawe' da dxuna' zrin chee dizra' chawe'. <sup>14</sup> Quebe dxaca lazra' bi guna' che quebe naca na da nnau' lue', chee gácalęnu' neda' lawe' da naca na ca dxaca lazru' lue', ne quegá lawe' da dxenná be'eda' lue'. <sup>15</sup> Becuasa Onésimo nen lue' tu chí'idau', san na'a súaletequezebe' lue', <sup>16</sup> quegá ca tu bi na'u lue', san gácabe' tu bi cháwedxa ca tu bi na'u lue', da zéaję na, gácabe' tu bi bichu' nazrí'ite lazru'. Neda' nazrí'ilę'eda'-be', san lue' dxal-la' zri'idxenu'-be', quegaze ca bėnneacheze, san cá'anqueze ca bi bíchedxu, bi chee Cristo.

<sup>17</sup> Chee le' na', che dxéquenu' neda' ca bi ljwezru', bezi' lu na'u-be' ca dxezi' lu na'u neda'. <sup>18</sup> Che bi da calela ba benbe' chiu', u che bi dxál-labe' chiu', neda' quízruja' na. <sup>19</sup> Neda', Pablo, dxuzúaja' da nigá nen ná'aqueza': Neda' quízruja' na, lácala neda' la gusá'a lazru' lue' dxál-laquezu' chia' cuínquezu'. <sup>20</sup> Lue', bi bicha', dxata' xúeda' lue' lu La Xránadxu, ben da guzúa na neda' lu da ba neza.

<sup>21</sup> Dxuzúaja' chiu' lawe' da nuxrén lazra' gunu' ca da dxapa' lue', ne nezda' gundxu' ca da dxenaba' lue'. <sup>22</sup> Cá'anqueze bcueza latja naga sua' neda' lawe' da dxebeza lazra' gun Dios da dxenábale Le', gunne' neda' lataj xida' xedajnná'a le'e.

*Bi chee Cristo dxulugápabe' diuzre Filemón*

<sup>23</sup> Epafra, bi ljwezra', xú'ulēbe' neda' lizre xia lawe' da dxunbe' zrin chee Jesucristo, <sup>24</sup> ne Marcos, ne Aristarco, ne Demas, ne Lucas, bi ca' dxelácalebe' neda' lu zrin chee Cristo dxulugápabe' lue' diuzre.

<sup>25</sup> Dxenaba' lau Xránadxu Jesucristo gunē' da chawe' chee le'e. Ca'an gaca na.

## DIZRA' DA NAZÚAJ CHEE BENNE' HEBREO CA'

*Dios ba bchálajlene' dxi'u lu dxu'a Zrí'inequeze'*

<sup>1</sup> Dios bchálajlene' xra xrtáudxu ca' gate nate zane' lasa, ne zane' ca bchálaje' lu dxu'a benne' ca' buluchálaje' waláz chee'. <sup>2</sup> Na'a, lu zra caní, Dios ba bchálajlene' dxi'u lu dxu'a Zrí'inequeze'. Dios bene' xezr la xu nigá lu na' Zrí'ine' nigá, ne ba bene' naca chee' xúgute' da ca' bene'. <sup>3</sup> Zrí'ine Dios nigá naque' Benne' dxulé'ene' ca naca xel-la' szren chee' Dios, ne naque' ca da nácaqueze Dios, na' nuxre' xúgute' da ca' nune', dxuchínene' dizra' chee' da nápalé'ē na xel-la' waca. Gate ba gudúē' dul-la da nabágadxu xeaixedxé'ē chalá'a xabēla chee' lataj blau chee' Dios xabáa.

*Zrí'ine Dios nácadxe' blau ca gubáz chee' xabáa ca'*

<sup>4</sup> Zrí'ine Dios nácadxe' blau ca gubáz chee' xabáa ca' chee' Dios, ca naca La Cristo da bzua Dios, nácadxa na blau ca la gubáz chee' xabáa ca'. <sup>5</sup> Dios cabata' guzre' tu gubáz chee' xabáa ca guzre' Cristo, gunné':

Lue' nacu' Zrí'ina'.

Neda' nácaqueza' Xrau' na'a zra.

Cá'anqueze cabata' guzre' tu gubáz chee' xabáa ca gunné' chee' Cristo:

Neda' gaca' Xre',

na' Le' gaque' Zrí'ina'.

<sup>6</sup> Gate bzue' Zrí'ine' lu xezr la xu nigá, gunné':

Xúgute' gubáz chee' xabáa ca' xelue lá'ane' Le'.

<sup>7</sup> Ca naca chee' gubáz chee' xabáa ca', Dios gunné':

Dsesel-le' gubáz chee' ca' ca tu be' da dxaca,  
ne dxuchínene' gubáz wen zrin chee' ca' ca tu xi'.

<sup>8</sup> Ca naca chee' Zrí'ine', gunná Dios:

Lataj blau chiu' lue', Dios, zúatequeze.

Xel-la' dxenná bea chiu' naca na xlátaje.

<sup>9</sup> Nazri'inu' da xlátaje, ne dxezra'u da calēla.

Chee' le' na' Dios chiu' ba bénnadxe' Lue'  
xel-la dxebé ca da bnézruje' bi ljwezru' ca'.

<sup>10</sup> Cá'anqueze guzre' Le':

Lue', Xran, nédxudaute' benu' xezr la xu.

Nen xel-la' waca chiu' benu' xabáa.

<sup>11</sup> Da caní weledé chee' na, san Lue' súatequezu'.

Xúgute' da caní welaca gula ca zra lana bēneache.

<sup>12</sup> Na' xutubu' na ca tu ladxe',

ne gucha'u na ca dxun tu benne' dxuché'ē zra lanē'.

Lue' zúaquezu' chadía chacanna,

na' xel-la' nabán chiu' quebe téqueze chee' na.

<sup>13</sup> Dios cabata' guzre' tu gubáz chee' xabáa ca guzre' Zrí'ine', gunné':

Gudxe'e chalá'a xabēla chia',

cadxa guzúa' benne' ca' dxeledábague' Lue' zran ni'u.

<sup>14</sup> Xúgute' gubáz chee' xabáa ca' zaj naque' be' ca' dxelún zrin chee' Dios, na' dxesel-le' gubáz chee' xabáa ca' chee' xelácalēne' benne' ca' dxelezi'ē xel-la' weselá.

## 2

*Quebe dxal-la' guzúadxu chalá'ala xel-la' weselá*

<sup>1</sup> Chee lē na' dxal-la' nna' xánnedxu dizra' da ba bendxu chee quebe cuásadxu lu neza chee xel-la' li. <sup>2</sup> Dizra' da gusel-la Dios gate nate lu na' gubáz chee xabáa ca' guca na li lazre', na' xúgute benne' ca' buluzúe' na chalá'ala, ne quebe buluzúe' dizra' ca da gunná Dios, Dios bdee' lē' xel-la' zi' ca da dxal-la' xelezí'e. <sup>3</sup> ¿Ájazra gaca ladxu che guzúadxu chalá'ala tu xel-la' weselá zren caní? Xránaquezdxu bchálaje' chee xel-la' weselá nigá nédxute, na' gudé na' buluchálaj benne' ca' belenne' na, na' gulenné' naca na da li laudxu dxi'u. <sup>4</sup> Cá'anqueze ba bzua chacha Dios na ne chee da dxelunna bea na, ne ne chee da zren ca' ben Dios, ne ne chee xel-la' waca zan ca', ne ne chee Be' Lá'azxa, Bénnea' benne' dxi'u xel-la' waca ca', ca da guca lázrequeze Lē'.

*Jesucristo ben cuine' ca nácadxu dxi'u*

<sup>5</sup> Dios quebe bzue' lu na' gubáz chee xabáa ca' xezr la xu da za za', chee da na' dxuchálajdxu na'a. <sup>6</sup> Naca na ca naxúaj na lu xiche lá'azxa, ca da gunná tu benne':

¿Ájazra naca bénneache che Lue', Dios, dxeajsá lazru' chee'?

¿Ájazra naca bénneache, che Lue' dxe'u gunne xue chee lē'?

<sup>7</sup> Tu chí'idau'ze bzu' bénneache látezdxu ca gubáz chee xabáa ca'.

Nunu' chee' si'e xel-la' szren, ne xel-la' ba lá'ana, ne bzu' lu ne'e xúgute da benu'.

<sup>8</sup> Xúgute ba bzu' na zran ni'a lē'.

Caní naca, gate Dios bzue' xúgute zran ni'a bénneache, quebe bi de da quebe guzúa na dizra' chee bénneache, na' quebe ne xuluzúa ca naca da ca' dizra' chee'. <sup>9</sup> Na'a dxelé'edxu Jesús, Bénnea' bzua Dios guque' tu chí'idau' látezdxu ca gubáz chee xabáa ca'. Dios gúnene' gate Jesús waláz chee xúgute bénneache lawe' da nazri'ine' bénneache, na' na'a nunézruje' Lē' xel-la' szren, ne xel-la' ba lá'ana lawe' da gudé' lu xel-la' gute zi xa'.

<sup>10</sup> Dios bene' xúgute da zaj zua, na' zaj zua na chee gaca ba Lē'. Lē' dxaca lazre' xelezí' xúgute bi chee' ca naca xel-la' szren chee'. Chee lē na' ben na ba xen ben Dios naca Jesucristo dutē weselá cheedxu, ne chee da zi' da xa' da gudé' chee séquene' guselé' bénneache chadía chacanna. <sup>11</sup> Benne' caní dxegúa Jesús dul-la da zaj nabague', na' benne' caní, ne Lé'queze' zaj naque' bi ca' chee tuze Xradxu. Chee lē na' quebe dxedué'e Jesús nne' chee benne' ca', zaj naque' bi biche'. <sup>12</sup> Naca na ca dxenná lu xiche lá'azxa: Guchálajqueza' da naca chiu' Lue' lálwela bicha' ca', na' gúl-laqueza' da güe lá'ana' Lue' ládujla benne' ca' zaj nazrague' lau Lue'.

<sup>13</sup> Cá'anqueze dxenná xiche lá'azxa:

Neda' guxrén lazra' Dios.

Cá'anqueze dxenná na:

Nigá zua' nen bi chia' ca', bi ca' benna Dios neda'.

<sup>14</sup> Lawe' da zaj naca belá' dxen benne' ca' zaj naque' bi chee', Lē' ben cuine' belá' dxen chee guzéquene' gutie', ne caní bene' chee séquene' guzría xi'e da xriwe', da na' napa na xel-la' dxenná bea gute na bénneache.

<sup>15</sup> Caní guca bselé' xúgute benne' gulaque' ca benne' zaj nada'u xúgute iza zaj naca bane' lawe' da belezrebe' xel-la' gute. <sup>16</sup> Da li quebe ble'e nigá chee gácalene' gubáz chee xabáa ca', san naca na ca dxenná xiche lá'azxa: Ble'e chee gácalene' benne' zaj naque' zri'ine zre sua Abraham.

17 Chee lē na' bēn na ba xen guque' dutē ca zaj naca bi biche' ca', chee séquene' gaque' lau Dios tu bxruze blau naque' li lazre', ne dxexache lazre' bēnneache, ne chee séquene' gun cuine' tu da dxegúa na dul-la zaj nabaga bēnneache. 18 Lawe' da gudéqueze Le' xel-la' zi' gate guca lazre Satanás gun zréaje Le', dxezéquene' na'a gácalēne' benne' ca' dxun zréaje da xriwe' lē'.

### 3

#### *Jesús nácadxe' blau ca Moisés*

1 Le'e, benne' bícha'dau', nácale bi chee Dios, lawe' da nácale benne' ca' ba gunné Dios, le nna' xanne' Jesucristo, Bēnnea' gusel-la Dios chee gaque' bxruze blau chee da dxéajlēdxu. 2 Jesús nigá guque' li lazre' lau Dios, Bēnnea' bzue' Le' lu zrin na' da ba bēne', ca guca Moisés, guque' li lazre' lu zrin na' bēne' lau benne' ca' gulaque' bi chee Dios. 3 Jesús dxalla' sidxe' xel-la' ba lá'ana ca da si' Moisés, ca dxaca chee benne' dxune' tu xu'u, dxezidxe' xel-la' ba lá'ana ca da dxezi' xu'u ná'queze. 4 Tu tu xu'u naca na da bēn benne', san Dios nune' xúgute' da zaj zua. 5 Ca wēn zrin chee Dios guca Moisés li lazre' lu zrin na' bēne' lau benne' ca' gulaque' bi chee Dios, na' bchálaje' ca naca da nne' Dios ca te na'. 6 Cristo naque' li lazre' ca Zri'inequeze Dios laudxu dxi'u. Nácadxu ca lizre Dios che se cháchadxu lu da dxuxrén lázredxu ca zrindxa zra cheajsé cheedxu, ne dxebéledxu lu da dxebeza lázredxu.

#### *Bi ca' chee Dios xelexezi' lazre' naga zua Dios*

7 Caní naca, naca na ca da dxenná Be' Lá'azxa lu xiche lá'azxa, dxenné': Na'a, che le'e dxenle ca da dxenná Dios,

8 quebe gácale lázrdau zide' ca gulaca benne' ca' guledábague' Dios, na' belune' Dios zede lē'e xixre' lawe' lataj.

9 Belún xra xrtaule ca' neda' zede chee guna' ca gunnía', lácala belelé'ene' da bēna' lávela chua iza.

10 Chee lē na' bzra'a xichja' benne' ca',

na' gunnía': Tu dxelebéaj xíchajzqueze benne' caní neda', ne dxeledábague' ca naca da bdxíxruja'.

11 Chee lē na' bzra'a xichja' benne' ca', ne bzua chúchua' da gucha' benne' ca',

gunnía' quebe xelexú'e naga xelexezi' lazre' naga zúaqueza' neda'.

12 Le'e, benne' bícha'dau', le guxúe cuínale chee quebe gaca lázrdau zide' netule le'e, quebe cuásale lau Dios ban lawe' da quebe dxéajlele chee Le'.

13 Le gutipa lázrele tule xetule tu zra tu zra, dxácatē ne zúadxu lu zra da nunna Dios dxi'u, chee quebe si xē dul-la netule le'e, na' gácale lázrdau zide'.

14 Che se cháchadxu ca zrin zra cheajsé cheedxu ca naca da dxuxrén lázrequezdxu nédxute, na'a nácadxu bi chee Cristo.

15 Naca na ca dxenná na lu xiche lá'azxa:

Na'a, che le'e dxenle ca da dxenná Dios,

quebe gácale lázrdau zide' ca gulaca benne' ca' guledábague' Dios.

16 ¿Nuzra benne' ca' belenne' dizra' chee Dios, na' ca gudé na' guledábague' Dios? Zaj naca xúgute' benne' ca' bebéaj Moisés lu zēzr la xu Egipto.

17 ¿Nuzra benne' ca' bzra'a Dios lē' lávela chua iza? Zaj naca benne' ca' belún dul-la, na' gulátie' lē'e xixre' lawe' lataj. 18 ¿Nuzra benne' ca' bzua chuchu Dios xrtizre' gate guzre' lē' quebe xelexú'e naga xelexezi' lazre'



naga zua Le'? Zaj naca benne' ca' guledábage' xrtizra Dios. <sup>19</sup> Na'a dxelé'edxu quebe guca xelexú'e lawe' da quebe guléajle'e chee Le'.

#### 4

<sup>1</sup> Caní naca, dxácate ne zua cheedxu da nachebe lazre' Dios chee xexú'udxu naga xezí' lázredxu naga zua Dios, dxal-la' guxúe cuínadxu gagáze nule le'e quebe xexú'ule. <sup>2</sup> Cá'anqueze dxi'u ba bendxu dizra' chawe' chee Dios ca da belén benne' ca', san benne' ca' quebe bi da ba neza gulezí'e chee dizra' da belenne' lawe' da quebe guléajle'e chee na. <sup>3</sup> Dxi'u ba guxéajledxu, na' chú'udxu naga xezí' lázredxu, ca da gunná Dios gate gunné':

Chee le na' bzra'a xichja' benne' ca',

na' bzua chúchua' da gucha' benne' ca', gunnía':

Quebe xelexú'e naga xelexezí' lazre' naga zua neda'.

Caní gunná Dios lácala ba bsexuzre' zrin chee' gate na' bente' xezr la xu, <sup>4</sup> lawe' da naxúaj na lu xiche lá'azxa ca naca chee zra gazre', dxenná na:

Lu zra gazre bezí' lazre' Dios lu zrin da bene'.

<sup>5</sup> Xetú dizra' da naxúaj na lu xiche lá'azxa dxenná na:

Quebe xelexú'e naga xelexezí' lazre' naga zua neda'.

<sup>6</sup> Benne' ca' belenne' dizra' chawe' nigá chee Dios nédxute quebe belexú'e lawe' da quebe buluzúe' dizra' ca naca da gunná Dios. Na'a ne zaj zra' benne' dxal-la' xelexú'ueze' naga xelexezí' lazre'. <sup>7</sup> Chee le na' Dios ba guléajle' xetú zra, gunné': Na'a zra. Caní naca lawe' da dxuchálajle Dios dxi'u dxuchínene' dizra' da gunná David gudé na', da naxúaj na lu xiche lá'azxa naga dxenná na:

Na'a, che le'e dxenle ca da dxenná Dios,

quebe gácale lázrdau zide'.

<sup>8</sup> Chela belexezí' lazre' benne' ca' be Josué lataj gulu'e xezr la xu na', quegá guchálajdxa Dios chee xetú zra. <sup>9</sup> Caní naca na, de lataj xelú'u bi ca' chee Dios naga xelexezí' lazre' naga zua Dios, <sup>10</sup> lawe' da xezí' lazre' lu zrin dxun nu benne' chu'e naga xezí' lazre' naga zua Dios, ca ben Dios, bezí' lazre' lu zrin ben Le'. <sup>11</sup> Dخال-la' gun zi lázredxu séquedxu chú'udxu naga xezí' lázredxu gagáze nu benne' gune' ca belún benne' ca' quebe guléajle'e.

<sup>12</sup> Dizra' chee Dios naca na da bane, ne napa na xel-la' waca. Naládxa na ca tu xia da nalá na dxupa la'ate, ne dxaze na naga dxelezraga bénne'du xú'udxu, ne be' nácaquezdxu, ne dxaze na lu xichaj lázrdau bénneache, na' dxuchi'a na ca naca da dxugú'u bea bénneache ne ca da dxéquene' gune'.

<sup>13</sup> Quebe bi de da ben Dios da seque' gucache cuina na lau Dios. Xúgute zaj nalá' na, ne zaj naxalaj na lau Bénnea' dxal-la' xulé'edxu Le' ca da bendxu.

#### *Jesús naque' bxruze blau zrente*

<sup>14</sup> Jesús, Zri'ine Dios naque' bxruze blau zrente cheedxu, Bénnea' ba bexu'e lau Dios. Chee le na' dxal-la' se típadxu lu da dxéajledxu chee Dios.

<sup>15</sup> Bxruze blau cheedxu wazéquene' xexache lazre' dxi'u che dxi'u dxate ni'a nadxu lu xel-la' dxeajlí lazre' cheedxu, lawe' da gudéqueze Le' lu xel-la' zi' ca' gate guca lazre da xriwe' gun zréaje na Le', ca da dxededxu dxi'u na'a, na' Le' quebe bene' dul-la. <sup>16</sup> Chee le na' dxal-la' bígadxu du lázredxu lu lataj blau chee Dios cheedxu, Bénnea' nazri'ine' dxi'u, chee xexache lazre' dxi'u, ne duté xel-la' xrlátaje chee' gácalene' dxi'u gate nachínedxu nu gácale dxi'u.

## 5

<sup>1</sup> Tu tu bxruze blau dxecá'a Dios ládujla bénneache, ne dxuzúe' le' chee guné' zrin lau Dios waláz chee bénneache ca', ne cu'e guna' lau Dios, ne gutié' béadu ca' ne chee dul-la zaj nabaga' bénneache. <sup>2</sup> Cá'anqueze bxruze blau nigá dxate ni'a ne'e lu da ca' dxune' ca da dxaca cheedxu dxi'u. Chee le' na' wape' xel-la' zren lazre' chee benne' ca' quebe dxeléajni'ingé', ne dxelune' da calela, <sup>3</sup> na' lawe' da dxate ni'a ne'e, dxal-la' gutié' béadu ca' ne chee dul-la da nabáaqueze', cáteze dxune' ne chee dul-la da zaj nabaga xezicadxa bénneache.

<sup>4</sup> Quebe nu gaca gun cuina bxruze blau, san Diósqueze dxenné' bénnea', ne dxunézruje' le' xel-la' szren na', ca bene' chee Aarón. <sup>5</sup> Cá'anqueze naca na chee Cristo, quebe bzua cuine' bxruze blau, san Dios be'e Le' xel-la' szren na' ca da guzre' Le':

Lue' nacu' Zri'ina'.

Neda' nácaqueza' Xrau' na'a.

<sup>6</sup> Cá'anqueze naxúaj na lu xiche lá'azxa ca guzre' Le':

Lue' nacu' bxruze blau chadía chacanna

ca gúcaqueze Melquisedec.

<sup>7</sup> Gate zua Cristo lu xezr la xu nigá, bchálajlene' Dios, ne guta' xuene' Dios nen chi'e zizraj, ne gudxézrelé'e, lawe' da napa Dios xel-la' waca guselé' Le' lu xel-la' gute, na' Dios benne' chee' lawe' da gudape' Xre' ba lá'ana.

<sup>8</sup> Ca'an guca, lácala naca Cristo Zri'ine Dios, bsédie' guque' wezúa dizra' ne chee xel-la' zi' da gudé'e, <sup>9</sup> na' gate guque' dute' Weselá cheedxu ne chee da caní, nadxa guzéquene' bselé' bénneache chadía chacanna, benne' ca' dxuluzúe' dizra' chee', <sup>10</sup> na' Dios bzue' Le' bxruze blau ca gúcaqueze Melquisedec.

*Quebe dxal-la' gusandxu xel-la' dxeajlí lazre' cheedxu*

<sup>11</sup> Déle'e da dxal-la' guchálaja' ca naca chee da nigá, san naca na štebe guzéajni'ida' le'e na'a, lawe' da quebe ne gaca chéajni'ile na. <sup>12</sup> Zane' iza ba guca dxéajlele chee Cristo, na' ba gul-la' gusédele benne' xula ca naca chee Le', san dxun na ba xen nu guzéajni'i le'e da xula da quebe nácatęca štebe ca naca dizra' chee Dios. Ne nácale ca bidau' ne dxázrebe' nizre'. Quebe ne gaca gágule xel-la' wagu chee benne' waca. <sup>13</sup> Benne' ca' zaj naca ca bidau' ne dxázrebe' nizre' zaj naque' benne' ca' quebe ne xuluchínene' dizra' chee xel-la' li. <sup>14</sup> Xel-la' wagu chee benne' waca naca na chee benne' ca' ba zaj nézene' xelexúnbe'e da naca da xrlátaje, ne da naca da calela.

## 6

<sup>1</sup> Chee le' na' québedxa dxal-la' gusédedxu ca da bsédedxu nédxute' ca naca chee Cristo, san chéajtezedxu gusédedxu da naca chee' chee gácadxu benne' waca. Québedxa bi dxal-la' guchálajdxu chee da du ca' da bsédedxu nédxute', ca dxal-la' xexéaje lázredxu chee da ca' bendxu da zaj nua na xel-la' gute, ne ca dxal-la' chéajledxu chee Dios, <sup>2</sup> ne ca dxal-la' xedxúadxu nisa, ne ca dxal-la' xuluzé ne'e xíchajdxu, ne ca xelexebán benne' gate, ne ca gun Dios, guchi'e da nun tu tu bénneache chee gudé'e benne' ca' dxelune' da calela lu lataj ba xa' chadía chacanna. <sup>3</sup> Chee le' na' chéajtedxu lu da naca chee Cristo, che Dios gunne' dxi'u lataj.

<sup>4</sup> Benne' ca' ba gulezi'e ca naca xel-la' naxani' chee Dios, ne ba gulezú lawe' xelúnbe'e da dxunna Dios, ne ba gulezi'e Be' Lá'azxa, <sup>5</sup> ne ba gulezú lawe' xelúnbe'e da xrlátaje ca' chee Dios ca naca da xezezi'e lu xezr la xu da

za za', <sup>6</sup> na' te na' che xuluzúe' Dios chalá'ala, québedxa gaca xelexéaje lazre' lawe' da gaca na ca xuludé'e Cristo le'e xaga begúaj da xula, ne dxelún le' chee' lówela xúgute bénneache. <sup>7</sup> Zaj naque' ca xezr la xu da dxezí na nisa xiuj. Che xezr la xu na' dxunna lina chawe' chee' benne' dxelune' na zrin, naca na da dxun chawe' Dios, <sup>8</sup> san che dxachuj na xeché', ne xixre' da quebe bi culuén napa na, quebe bi zaca xezr la xu na', san naca na tu da xu'u de', na' naga chéajsete chezxe na.

*Xel-la' dxebeza lazre' da nápadxu*

<sup>9</sup> Le'e, benne' bícha'dau', lálala dxuchálajntu' caní, dxuxrén lázrentu' ca naca chee' le'e wazile le'e da chawe' chee' xel-la' weselá. <sup>10</sup> Dios dxune' da xlátaje, ne quebe gal-la lazre' ca naca zrin da ba benle, ne ca bzri'ile Le' gate gúcale' benne' bíchedxu ca', ne ca da tu dxúnzquezle. <sup>11</sup> Dxaca lázrentu' chéajteze tu tule gunle da caní duté lázrdaule ca zrin zra cheajsé chee', chee' zrué'ele da dxebeza lázrele. <sup>12</sup> Quebe dxaca lázrentu' xewédele. Dxaca lázrentu' gunle le'e ca belún benne' ca' guleajlí lazre' Dios, ne gulaque' zren lazre', na' gulezí'e ca da guchebe lazre' Dios gunézruje' chee'.

<sup>13</sup> Gate guchebe lazre' Dios bi gunézruje' chee' Abraham, na' bzétajqueze cuine' lawe' da québedxa nu zua nácadxa szren ca Le', nu guzétaje', <sup>14</sup> gunné': "Da li gúnqueza' da chawe' chiu' lue', ne guzánqueza' zri'ine zre su'." <sup>15</sup> Abraham guleze' duté xel-la' zren lazre', na' chee' le' na' guzi'e da guchebe lazre' Dios gunézruje' chee'. <sup>16</sup> Gate nu dxuluzetaj bénneache, dxuluzétaje' benne' nácadxe' szren ca léqueze', ne gate bi dxuluzúa chúchué', ne dxuluzétaje' Dios, québedxa bi de' da bi xelenné'. <sup>17</sup> Chee' le' na' Dios bzua chúchué' da guchebe lazre', ne bzetaj cuine', lawe' da guca lazre' gulé'ene' benne' ca' xelezí'e da guchebe lazre', Le' gune' ca naca da guchebe lazre', ne quebe guché'e ca gune'. <sup>18</sup> Caní naca, da chupa caní quebe gaca cha na, na' lu da caní Dios quebe gaca gun lazre', ne ne chee' da ca' Dios ba nunne' dxi'u tu da gun na dxi'u dípa lazre', dxi'u na' ba nézedxu dxuxúe Le' dxi'u, ne nuxrén lázredxu si' lu nnadxu da dxebeza lázredxu ca naca da gunne' dxi'u. <sup>19</sup> Da nigá dxebeza lázredxu nuxru chacha na bénne'du xú'udxu ca dxun tu xia da dxuxru chacha na tu da dxedá lawe' nísadau' gate zria na lawe' nísadau'. Da na' dxebeza lázredxu zúale na Cristo cuzru ladxe' da ze' lu xudau' da zua xabáa, <sup>20</sup> naga guxú'u Jesús waláz cheedxu chee' gusalaje' neza naga tedxu, na' Le' naque' tu bxruze blau chadía chacanna ca guca Melquisedec.

## 7

*Jesús naque' bxruze blau ca guca Melquisedec*

<sup>1</sup> Melquisedec nigá guque' wenná bea chee' xezre Salem, ne bxruze chee' Dios szrenté. Gate ze za' Abraham lu wedil-la gate bzétaje' benne' wenná bea ca', na' Melquisedec nigá xeajchague' le', ne gunabe' lau Dios gune' da chawe' chee' Abraham, <sup>2</sup> na' Abraham bnézruje' chee' le' tu cue' chee' da chi cue' ca' ca naca da bzrué'ene' lu wedil-la na'. La Melquisedec zéaje na wenná bea xlátaje, ne lawe' da guque' benne' wenná bea chee' xezre Salem, da zéaje na xel-la' dxebeza zri lazre', le' zéajequeze na wenná bea chee' xel-la' dxebeza zri lazre'. <sup>3</sup> Quebe naxúaj na zua xre', ne xrne'e, ne xra xrtawe', ne quebe naxúaj na che gúlaje', ne che gutié'. Caní naca na, da guca Melquisedec dxulé'e na ca naca chee' Zri'ine Dios, naque' bxruze blau chadía chacanna.

<sup>4</sup> Le na' xque na'a ca szren guca Melquisedec, che bnezruj xra xrtáudxu Abraham chee le' tu cue' chee da chi cue' chee da guqué'e lu na' wenná bea ca' lu wedil-la na'. <sup>5</sup> Ca naca da bdxixruj bea Moisés, bxruze ca', benne' ca' zaj naque' xrtia Leví dxal-la' xelezí'e tu cue' chee da chi cue' ca' da xelizruj benne' Israel ca', benne' zaj naque' xrtia ljwezre', lácala zaj naque' zri'ine zre sua Abraham ca' zaj nácaqueze benne' ca'. <sup>6</sup> Melquisedec, benne' quebe naque' xrtia Leví guzi'e tu cue' chee da chi cue' ca' da gudizruj Abraham, bënnea' dxal-la' si'e da guchebe lazre' Dios. Cá'anqueze Melquisedec gunabe' lau Dios guné' da chawe' chee Abraham, <sup>7</sup> na' dxeleenná xúguté bënneache nácadxa blau bënnea' dxenabe' lau Dios guné' chawe' chee benne' xula ca' quézcala bënnea' si'e da chawe' na' dxenabe'. <sup>8</sup> Na'a benne' ca' dxelezi'e tu cue' chee da chi cue' ca' zaj naque' benne' dxelate, san ca naca chee Melquisedec, naque' ca tu benne' naca bánqueze' lawe' da quebe naxúaj na lu xiche lá'azxa che gutié'. <sup>9</sup> Ca naca chee Leví, ne ca naca chee xúguté bxruze ca' zaj naque' zri'ine zre sua Leví na', benne' ca' dxelezí'e na'a tu cue' chee da chi cue' ca', wácaqueze nnadxu cá'anqueze benne' caní gulízruje' chee Melquisedec tu cue' chee da chi cue' gate na' bezrague' Abraham, <sup>10</sup> lawe' da wazeque' nnadxu ne zaj zua zri'ine zre sua Abraham lu bel-la' dxen chee', benne' quebe ne xelalaj gate na' bdxuaj Melquisedec xeajchague' Abraham na'.

<sup>11</sup> Benne' Israel ca' gulezí' lu ne'e da bdxixruj bea Dios lu na' bxruze ca' zaj naque' xrtia Leví. Chela guzeque' da belún bxruze ca' gun na li lazre' benne' ca' buluzúe' dizra' chee da bdxixruj bea Dios na', na' quebe ben na ba xen la' xetú bxruze ca' guca Melquisedec, ne quegá ca' guca Aarón. <sup>12</sup> Che xezrá' ca dxal-la' gaca bxruze na', na' dxál-la'queze xezrá' da nadxixruj bea na'. <sup>13</sup> Xránadxu, Bënnea' naxúaj na chee' gaque' bxruze ca' guca Melquisedec, nababe' xetú cue' xrtia Israel ca', benne' ca' netue' quebe ne gaque' bxruze. <sup>14</sup> Naca bea na nababa Xránadxu xrtia Judá, na' Moisés quebe gunné' xelaca benne' caní bxruze.

<sup>15</sup> Da nigá naca béadxa na che bxruze cube na' dxal-la' gaque' ca' guca Melquisedec, <sup>16</sup> ne bxruze cube nigá quebe gaque' bxruze ne chee tu da nadxixruj bea da dxenná na nu xrtia dxal-la' gaque'. Gaque' bxruze lawe' da nape' xel-la' waca chee tu xel-la' nabán da quebe te chee na. <sup>17</sup> Naca chee' ca da dxenná Dios:

Lue' nacu' bxruze chadía chacanna  
ca da guca Melquisedec.

<sup>18</sup> Caní guca, bedxúaj chalá'ala da bdxixruj bea Dios gate nate lawe' da quebe guzeque' bi gun na, ne quebe bi culuén gudapa na, <sup>19</sup> lawe' da quebe guca da gunná bea Moisés gun na bënneache li lazre'. Na'a nápadxu tu xel-la' dxebeza lazre' da cháwedxa, na' ne chee na dxebigadxu lau Dios.

<sup>20</sup> Gate Dios bene' Jesús bxruze, bzetaj cuine'. <sup>21</sup> Quebe bzetaj cuine' gate bzué' xezícadxa bxruze ca'. Gate bene' Jesús bxruze bzetaj cuine' ca da naxúaj na lu xiche lá'azxa, dxenná na:

Xránadxu Dios bzetaj cuine', ne quebe guché'e xrtizre'.

Gunné': "Lue' nacu' bxruze chadía chacanna  
ca da guca Melquisedec."

<sup>22</sup> Chee le na' Jesús dxun chúchué' tu xel-la' wezría da nácadxa chawe' ca da nedxu. <sup>23</sup> Xezícadxa bxruze ca', benne' gulezrá' nédxula ben na ba xen gulaque' benne' zan lawe' da gulate tu tue', na' quebe guca xeledié'. <sup>24</sup> Jesús naque' tu bxruze chadía chacanna lawe' da quebe gatié'. <sup>25</sup> Chee

le na' dxezéquene' guselé' chadía chacanna benne' ca' xelebigue' lau Dios ne chee Le', lawe' da naca ban Le' chadía chacanna chee gudé' dizra' chee benne' ca' lau Dios.

<sup>26</sup> Jesús naque' bxruze blau, bxruze na' dxechínedxu. Naque' lá'azxa, ne quebe bi da calela bene', ne quebe nabague' dul-la. Quebe naque' tuze ca zaj naca benne' dul-la, na' Dios nucá'ana szrendxe' Le' ca xúgute da zaj zua xabáa. <sup>27</sup> Quebe naque' ca xezícadxa bxruze ca', benne' ca' ben na ba xen belutie' béadu ca' tu zra tu zra, béadu ca' buluzúe' nedxu ne chee xtúl-laqueze', na' ca gudé na' buluzúe' béadu xula ca' ne chee xtul-la bèneache. Jesús tu lásaze bzua cuine' ne chee dul-la zaj nabaga xúgute bèneache. <sup>28</sup> Da bdxixruj bea Moisés dxuzúa na bxruze blau ca' zaj naque' benne' quebe zaj naque' li lazre'. Gate Dios bzetaj cuine' ca gudé bla' da nadxixruj bea na', bzué' tu bxruze blau naque' Zrí'inequeze', Bénnea' ben Dios naque' tu bxruze blau li lazre' chadía chacanna.

## 8

### *Jesús naque' bxruze blau cheedxu*

<sup>1</sup> Da naca blaudxa chee da caní dxennantu' naca na da nigá: Zua tu bxruze blau cheedxu caní, Bénnea' dxe'e chalá'a xabela chee lataj blau chee Dios xabáa, <sup>2</sup> ne naque' bxruze blau dxune' zrin lu lataj lá'azxa li, da ben Xránadxu, quegá bèneache. <sup>3</sup> Xúgute bxruze blau nuzúa Dios le' chee xelegú'e guna' lau Dios, ne xelútie' béadu ca' lau Dios. Chee le na' dxun na ba xen bi guzúa Cristo lau Dios. <sup>4</sup> La zua Cristo xezr la xu nigá, quebe gaque' bxruze lawe' da ne zaj zra' bxruze ca' dxelegú'e guna' ca nadxixruj bea da bde Moisés. <sup>5</sup> Zrin dxelún bxruze caní naca na ca tu da dxulé'eze na, ne ca tu zrúlaze chee da na' zua xabáa. NezdXu naca na tu da dxulé'eze lawe' da gunná Dios, guzre' Moisés gate ba zue' guné' lataj lá'azxa: "Bxue xanne' gunu' xúgute na cáteze naca da ble'eda' lue' lu xi'a na'." <sup>6</sup> Na'a bxruze blau cheedxu nigá dxune' tu zrin zácadxa lawe' da naque' wedé dizra' chee tu xel-la' wezría cháwedxa, da nun Dios ne chee da ca' guchebe lazre' da zaj naca na cháwedxa.

<sup>7</sup> La guca li lazre' xel-la' wezría da bene' nedxu, quebe ben na ba xen guné' xel-la' wezría gudxupe' na'. <sup>8</sup> Gate Dios gudil-le' benne' ca' zaj naque' bi che, gunné':

Dxenná Xránale: Wazrín zra gate guna' tu xel-la' wezría cube nen benne' Israel ca', ne benne' Judá ca'.

<sup>9</sup> Quebe gaca na ca guca xel-la' wezría da bena' nen xra xrtaule ca' gate becá'a ne'e, ne bebéaja' benne' ca' lu xezr la xu Egipto.

Caní guna' lawe' da quebe buluzúe' dizra' xel-la' wezría da nuna', na' chee le na' guleaj xichja' benne' ca'.

Da ni dxenná Xránale.

<sup>10</sup> Xel-la' wezría guna' nen benne' Israel ca' ca te chee lu zra caní gaca na caní, dxenná Xránale: Guzúa' da gudxixruj be'a lu xichaj lázrdau benne' ca', ne guzúaja' na lu lázrdawe'.

Nadxa gaca' neda' Dios chee benne' ca', na' le' xelaque' bi chia' ca'.

<sup>11</sup> Quebe gun na ba xen xulusede ljwezre',  
ne quegá nu benne' xe'e bi biche': Benbea Xránadxu.  
Xúgute' xelúnbe'e neda',  
benne' cá'aze, ne benne' blau.

<sup>12</sup> Gunite lawa' chee benne' ca'  
ca naca da calela da zaj nune',  
ne québedxa cheajsá lazra' chee dul-la da zaj nune'.

<sup>13</sup> Gate dxuchalaj Dios chee tu xel-la' wezría cube, naca na lawe' da ba  
gunné' chee da nedxu naca na da gula, na' da ba dxaca na da gula, ne da  
gulasa la xenítete na.

## 9

*Lataj lá'azxa da zua lu xezr la xu, ne da zua xabáa*

<sup>1</sup> Gate ne zua xel-la' wezría nedxu, zaj de da nadxixruj bea ca dxal-la'  
xelún bxruze ca' tu lu xudau' da zua xezr la xu nigá. <sup>2</sup> Xudau' nedxu  
caní guca na tu xu'u xide zren. Lu lataj nedxu chee xudau' na' da nazí  
le na Lataj Lá'azxa zaj zua da dxusa'ní', ne tu ta'a naga zria xeta xtila  
lá'azxa. <sup>3</sup> Cuzre naga ze ladxe' gudxupe' zua xetú lataj da nazí le na Lataj  
Lá'azxa Blau. <sup>4</sup> Lu lataj nigá zaj zua tu tá'adau' naga xezxe xala, ne tu  
xi'ina chee xel-la' wezría da nun Dios, da nacu na oro du ca nácaqueze  
na. Lu'ule xi'ina na' xu'u tu zruágadau' xu'u na xeta maná. Cá'anqueze  
lu'ule na xu'u xágadau' da bexru Aarón da na' bezría na, ne zaj xu'u na  
xiaj ca' naga zaj naxúaj dizra' chee xel-la' wezría. <sup>5</sup> Lawe' xi'ina nigá zaj  
zua gubáz chee xabáa ca' zaj naca na oro, da dxululé'e na zua Dios na',  
na' zaj nugacu xrile na naga dxuluzríe' dxen ne chee dul-la zaj nabaga  
bénneache. Québedxa séquentu' guchálajntu' ca naca chee da caní na'a.

<sup>6</sup> Gate ba nagá'ana chawe' da caní, na' bxruze ca' dxelú'unqueze' lu lataj  
nedxu chee lataj lá'azxa chee xelune' zrin chee xel-la' bxruze chee'. <sup>7</sup> Lu  
lataj gudxupe' dxu'u tuze bxruze blau tu lásaze tu tu iza, na' gate dxu'e  
na' dxun na ba xen gu'e dxen chee béadu ca' da guzríe' ne chee dul-la  
nabágaqueze', ne ne chee dul-la zaj nabaga bénneache ca'. <sup>8</sup> Be' Lá'azxa  
dxuzéajni'ine' dxi'u quebe naxalaj neza chee chú'udxu Lataj Lá'azxa Blau  
na' dxácaté dxelune' zrin chee xel-la' bxruze chee' lu lataj nedxu chee  
lataj lá'azxa na'. <sup>9</sup> Xúgute' da caní zaj naca na da dxululé'eze, da dxaca  
lu zra na'a zra, lawe' da guna' ca', ne dxen chee béadu ca' da dxuluzúa  
bxruze ca' lau Dios quebe gaca xelún na bénneache duté li lazre'. <sup>10</sup> Da  
caní zaj naca na chee da dxelé'aj dxelawe', ne chee da dxulucá'ana chawe'  
cuine', ne chee da nadxixruj bea ca naca chee bela' dxen chee bénneache,  
da ca' bzua Dios ca zrindxa zra guché'e da ca'.

<sup>11</sup> Na'a ba bla' Cristo, ne naca Le' bxruze blau chee da xrlátaje ca' da ba  
belelá'. Lataj Lá'azxa naga dxun Le' zrin ca bxruze blau naca na blaudxa,  
ne da li lászredxa. Quebe naca na tu da zaj nun bénneache, da zéaje na,  
quebe naca na chee xezr la xu nigá. <sup>12</sup> Cristo ba guxú'e Lataj Lá'azxa  
Blau, quegá chee guzúe' dxen chee béadu ca', ne chee medu ca', san chee  
guzúe' dxen cheéqueze', na' guxú'e ga na' tu lásaze lawe' da ba bene' xel-  
la' weselá chadía chacanna cheedxu dxi'u. <sup>13</sup> Da li dxen chee bezre, ne  
chee béadu ca', ne de chee bézredu ca', bea ca' dxuluzezxe' lu ta'a chee  
Dios, da ca' dxuluzré'e xichaj benne' ca' zaj naque' sban, zaj napa na xel-  
la' waca xelibe na benne' ca' cúzreze, ne chee xulucá'ana chawe' lau  
Dios. <sup>14</sup> Che caní naca na, wazéquedxa dxen chee Cristo, Bénnea' bzua

cuine' lau Dios ne chee Be' Lá'azxa dutē xel-la' li lazre' chee', na' dxen chee' na' dxibe na xichaj lárdaudxu chee da bendxu da nua na xel-la' gute, chee séquedxu gundxu zrin chee Dios ban.

<sup>15</sup> Chee lē na' naca Jesucristo wedé dizra' chee tu xel-la' wezría cube. Xel-la' gute chee Cristo dxun na zrin chee gaca gunitē lau Dios cheedxu ca naca dul-la da bendxu gate ne zúadxu lu xel-la' wezría nedxu, na' na'a benne' ca' ba gunné Dios waca xelezí'e ca naca da ca' guchebe lazre' Dios, da zaj naca na chadía chacanna. <sup>16</sup> Gate tu benne' dxunē' tu xiche da dxelá'a na da dē chee', dxun na ba xen gulé'edxu ba nate bēneea' chee gundxu ca dxenná xiche na'. <sup>17</sup> Xiche na' quebe bi seque na dxácate ne naca ban benne' bēne' na, san gate ba gute bēneea', na' seque na. <sup>18</sup> Chee lē na', xel-la' wezría nedxu na' guzúa chuchu na ne chee dxen da buluzríe' na. <sup>19</sup> Moisés blabe' xúgute da nadxixruj bea da zaj naxúaj na lu dizra' chee Dios lau xúgute bēneache, na' ca gudé na' guqué'e zrila' da nadxé na da xrna, ne tu zruze xaga hisopo, na' gusebise' na dxen chee među ca', ne dxen chee béadu ca', ne nisa, na' bzre'e na lawe' xiche naga naxúaj xtizra Dios, ne bzre'e na bēneache ca'. <sup>20</sup> Nadxa guzre' benne' ca': "Dxen nigá naca na da dxuzúa chuchu na xel-la' wezria da nun Dios nen le'e." <sup>21</sup> Cá'anqueze bzra Moisés dxen lu lataj lá'azxa, ne lu xúgute da dxuluchíneng' lu zrin da dxelún bxruze ca'. <sup>22</sup> Ca naca da bdxixruj bea Dios, dxal-la' xulucá'ana chawe' xúgute da ca' nen dxen, na' che quebe nu gulalaj dxen, Dios quebe gunitē lawe' chee bēneache ca naca dul-la da zaj nabague'.

### *Dxen chee Jesucristo dxegúa na dul-la*

<sup>23</sup> Caní ben na ba xen xulucá'ana chawe' da ca' zaj naca na da dxululé'eze na ca zaj naca da zaj zua xabáa, na' da ca' zaj zua xabáa dxun na ba xen xulucá'ana chawe' na nen tu da zácadxa. <sup>24</sup> Cristo quebe guxú'e lu lataj lá'azxa da zaj nun bēneache, da na' naca na tu da dxululé'eze ca naca lataj lá'azxa li da zua xabáa, san guxú'e xabáqueze, naga zue' na'a lau Dios, dxudé' dizra' cheedxu dxi'u. <sup>25</sup> Bxruze blau chee benne' judío ca' dxu'e lu lataj lá'azxa blau tu iza tu iza chee guzúe' ga na' dxen da quebe naca cheéqueze'. Na'a Cristo quebe dxuzúa cuine' zane' lasa. <sup>26</sup> La ben na ba xen guzúa cuine' zane' lasa, cá'anqueze zane' lasa gatie' ca gudé bēne' xezr la xu nigá. Na'a, gate ba bzrin zra dxaca li ca da guchebe lazre' Dios, Cristo ba ble'e tu lásaze, na' bzua cuine' chee cue' dul-la zaj nabaga bēneache. <sup>27</sup> Ca dxun na ba xen xelate xúgute bēneache tu lásaze, na' te na' Dios guchi'e da zaj nun tu tue', <sup>28</sup> cá'anqueze Cristo bzua cuine' chee gutie' tu lásaze chee gudúe' dul-la zaj nabaga' benne' zante. Te nigá xelé'e da gudxupe', quegádxa chee cue' dul-la, san chee xedajselé' xúgute benne' dxelebeze' Le'.

## 10

<sup>1</sup> Da nadxixruj bea da bde Moisés guca na ca tu zrúl-laze chee da chawe' ca' da dxal-la' xelélé', ne quegá naca na léqueze na. Chee lē na' da ca' buluzúa bxruze ca' lau Dios ca nadxixruj bea na', da ca' buluzúe' tu iza tu iza, quebe gulezeque na xelún na benne' ca' li lazre', benne' ca' gulebigue' lau Dios. <sup>2</sup> La guzeque' da nadxixruj bea na' gun na benne' ca' li lazre', québedxa nu guzúa da ca' lau Dios lawe' da la guladxe benne' ca' lu dul-la zaj nabague', québedxa zaj nabague' dul-la. <sup>3</sup> Na'a da ca' buluzúe' lau Dios tu iza tu iza bulusá na lazre' chee dul-la da zaj nabague', <sup>4</sup> lawe' da

quebe guzeque' dxen chee bezre ca', ne dxen chee béadu ca' cua na dul-la zaj nabaga bēnneache.

<sup>5</sup> Chee le na', gate bla' Cristo lu xezr la xu nigá, guzre' Dios: Quebe dxaca lazru' guna', ne béadu ca' nu gute leba' lau'. Na'a ba benu' bel-la' dxen chia' nigá.

<sup>6</sup> Quebe dzezaca ba lazru' béadu ca' dxuluzexe' lau', ne béadu ca' dxelutiē' lau' chee cua na dul-la zaj nabague'.

<sup>7</sup> Nadxa gunnía': "Nigá za'a neda' chee guna' ca da nnau' Lue', Dios, ca naxúaj na chia' neda' lu xiche lá'azxa."

<sup>8</sup> Nédxula gunné': "Quebe dxaca lazru', ne quebe dzezaca ba lazru' guna', ne béadu ca' nu gute leba' lau', ne béadu ca' dxuluzexe' lau', ne béadu ca' dxelutiē' lau' chee cua na dul-la zaj nabaga bēnneache." Caní gunné' lácala zaj naca na da nadxixruj bea na xuluzúe' na lau Dios. <sup>9</sup> Ca gudé na' gunné': "Nigá za'a neda' chee guna' ca da nnau' Lue', Dios." Da nigá zéajē na gudé' lu waláz chee da ca' buluzúa bxruze ca' lau Dios, gate bzua cuine' lau Dios ne chee dul-la zaj nabaga bēnneache. <sup>10</sup> Dios ba bca'ana chawe' dxi'u lu dul-la nabágdaxu lawe' da ben Cristo ca da gunná Dios gate bde cuine' lau Dios tu lásaze gate gutie' le'e xaga begúaj.

<sup>11</sup> Xúgute' bxruze judío dxeluné' zrin lau Dios tu zra tu zra, ne zane' lasa dxuluzríe' lau Dios da cá'anqueze lácala da ca' cabata' xezeque na xelegúa na dul-la chee bēnneache. <sup>12</sup> Jesucristo bzrie' lau Dios tuze da dxugúa na dul-la, na' gudé na' gudxé'e chalá'a xabela chee Dios. <sup>13</sup> Zue' na'a dxebeze' zra gate guzúa Dios benne' ca' dxeledábague' chee' zran ni'e. <sup>14</sup> Caní dxune' lawe' da bca'ana chawe' chadía chacanna benne' ca' zaj naque' bi chee Dios. Caní bene' gate bzua cuine' lau Dios tu lásaze.

<sup>15</sup> Caníqueze dxenná Be' Lá'azxa lawe' da gunné' nédxula:

<sup>16</sup> Caní naca xel-la' wezría guna' nen benne' Israel ca' ca te chee lu zra caní, dxenná Xránale: Guzúa' da nadxixruj bea na' lu xichaj lázrdau benne' ca', ne guzúaja' na lu lázrdawe'.

<sup>17</sup> Ca gudé na' dxenné': Cabátadxa cheajsá lazra' chee dul-la da zaj nabague', ne chee da calela ca' da zaj nune'.

<sup>18</sup> Ca'an naca, gate Dios ba bnite lawe' chee bēnneache ca naca dul-la da zaj nabague', québedxa dxun na ba xen bi xuluzúe' lau Dios chee cua na dul-la ca'.

### *Dxal-la' bígdaxu lau Dios*

<sup>19</sup> Chee le na', benne' bícha'dau', waca chú'udxu lu lataj lá'azxa blau dute lázrdaudxu ne chee dxen chee Jesucristo da blajē'. <sup>20</sup> Dxezrindxu lau Dios, dxededxu tu neza cube, da quebe naca na ca da xjácale' bxruze ca' lu lataj lá'azxa. Dxededxu neza da naca Crístoqueze, Bēnnea' zúale' Dios xabáa.

<sup>21</sup> Jesús naque' bxruze blau cheedxu, ne zaj xu'u lu ne'e bēnneache chee Dios. <sup>22</sup> Chee le na' dxal-la' bígdaxu lau Dios dute lázrdaudxu ne dute xel-la' dxeajlí lazre' li, lawe' da bca'ana chawe' Le' lázrdaudxu chee québedxa sua da stebe lu xichaj lázrdaudxu ca naca chee dul-la, ne naca cheedxu cáteze ba gudibe' bel-la' dxen cheedxu nen da naca ca tu nisa chawe'.

<sup>23</sup> Dxal-la' sua cháchadxu ca naca da dxebeza lázredxu chee da dxéajlēdxu, ne quebe guchadxu ca dxundxu, lawe' da gun Dios ca da guchebe lazre' gunē' cheedxu. <sup>24</sup> Dxal-la' quilaj lázredxu ca gundxu gácale' ljwézredxu tudxu xetudxu chee zri'i ljwézredxu, ne gundxu da xrlátaje. <sup>25</sup> Quebe



dxal-la' gusandxu xezrágadxu lau Dios ca dxelún bal-la benne'. Dخال-la' gutipa lazre' ljuwézredxu tudxu xetudxu, na' gúndxadxu caní na'a lawe' da dxelé'edxu ba za bagu zra xelá' Xránadxu.

<sup>26</sup> Che núnbeadxu ca naca xel-la' li chee Dios, ne chéajdxadxu gundxu dul-la, québedxa bi de da cua na dul-la bágadxu. <sup>27</sup> Lu xel-la' dxezrebe súadxu da naca chee zra guchi'a Dios, ne chee xi' da guzría xi na benne' ca' dxeledábague' chee Dios. <sup>28</sup> Gate nu benne' bzuę' chalá'ala da gunná bea Mnoisés, ne gulezrá' chupa u chunna benne' belexechebe' chee da ben bénnea', na' belutię' bénnea', ne quebe belexache lazre' le'. <sup>29</sup> Tu da stebe zrendxa dxal-la' xelezi' benne' ca' dxuluzúę' chalá'ala Zri'ine Dios, ne dxulucá'ana dítaje' dxen chee', da blalje', dxen na' dxuzúa chuchu na xel-la' wezría chee Dios, ne dxucá'ana chawe na benne' ca', na' dxelenné' schanni' chee Be' Lá'azxa chee Dios, Bénnea' nazri'ing' le'. <sup>30</sup> Ba núnbeadxu Xránadxu, Bénnea' gunnáqueze': "Neda' xebéaj lazra' bénneache. Neda' gunézruja' lazruj chee benne' ca'." Cá'anqueze gunné': "Xránale guchi'e chee bénneache chee'." <sup>31</sup> Da dxal-la' xelezrebe bénneache naca da stebe da gun Dios benne' ca'. <sup>32</sup> Le gusá lázrele le'e iza da ba guledé, gate za guzítele xel-la' naxaní' chee Dios, na' dutę xel-la' zren lazre' bchaga laule xel-la' zi' da gudele. <sup>33</sup> Bál-lale le'e bulucháchalęę', ne belú'e le'e lówela bénneache, na' xebál-lale le'e guzáca'le gate guná'ale benne' ca' guledéę' xel-la' zi' caní. <sup>34</sup> Bexache lázrele benne' gulezrá' lizre xia, ne dutę xel-la' dxebé bchaga laule da belunę' gate gulequę'e ca da nápaie, lawe' da nézele nápaie xabáa da zácadxa na, ne da naca na da chadía chacanna. <sup>35</sup> Quebe gusanle ca da dxuxrén lázrele, lawe' da nusá xel-la' dxuxrén lazre' chee tu da zren da síle. <sup>36</sup> Le'e dxal-la' gácale zren lazre' chee gunle ca da nna Dios, na' síle ca da guchebe lazre' Dios gunne' chee. <sup>37</sup> Naca na ca dxenná xiche lá'azxa:

Xátedauze de,

na' xelá' Bénnea' dxal-la' xelá', ne quebe chene'.

<sup>38</sup> Benne' naque' xlátaje lawa' neda',

gata' chee' xel-la' nabán li lazre' lawe' da dxéajle'e chia',

na' che cueaj xíchaje' neda' quebe xezaca ba lazra' nen bénnea'.

<sup>39</sup> Na'a dxi'u quebe nácadxu tuze nen benne' ca' dxelebéaj xíchaje' Dios, ne xelebíá xi'e. Nácadxu tuze nen benne' dxeléajle'e chee Dios, na' xelelá bénne'du zaj xu'e.

## 11

### *Xel-la' dxeajlí lazre'*

<sup>1</sup> Che nápadxu xel-la' dxeajlí lazre' dxuxrén lazrdxu sidxu da dxebézadxu, ne nézquezdxu naca da li da quebe dxelé'edxu. <sup>2</sup> Xra xrtáudxu ca' belexegá'anę' xrlátaje lau Dios lawe' da guléajle'e chee'.

<sup>3</sup> Lu xel-la' dxeajlí lazre' cheedxu nezdXu ben Dios xezr la xu nigá, bchínene' dizra' chee', na' ca naca da dxelé'edxu na'a ben Dios le na nen da quebe nalá' gate nate.

<sup>4</sup> Abel, lu xel-la' dxeajlí lazre' chee', bzuę' lau Dios tu guna' da zácadxa na ca da bzua Caín, na' chee le na' Dios gunné' naca xlátaje Abel, ne guzi'e guna' chee'. Ca'an naca, lácala ba gute Abel, ne dxusédene' dxi'u ne chee da bene' lawe' da gudape' xel-la' dxeajlí lazre'.

<sup>5</sup> Enoc, lu xel-la' dxeajlí lazre' chee', Dios beche'e le'. Quebe gutie', na' québedxa nu ble'e le' lawe' da beché Dios le'. Naxúaj na lu xiche lá'azxa da

dxenná na, gate quebe ne xeché Dios le', ben Enoc ca da bezaca ba lazre' Dios. <sup>6</sup> Quebe gaca nu gun da xezaca ba lazre' Dios che quebe dxeajlí lazre' Le'. Bénnea' dxebigue' lau Dios, dxun na ba xen chéajle'ē zua Dios, ne xunézruje' chee benne' ca' dxelexíajle' Le'.

<sup>7</sup> Noé, lu xel-la' dxeajlí lazre' chee', gate Dios guzre' le' nédxula ca da dxal-la' gaca, bzue' dizra' chee' Dios, ne bene' tu da zren da dxedá lawe' nísadau' chee' xeledá xrtie' ca'. Guxeajlí lazre' Noé Dios, san gulebía xi' bénneache zaj zre'ē xezr la xu na', lawe' da quebe guleajlí lazre' Dios. Dios bca'ane' Noé xrlátaje lawe' da guxeajlí lazre' Le'.

<sup>8</sup> Abraham, lu xel-la' dxeajlí lazre' chee', gate Dios gunné' le', bzue' dizra', ne guzé'ē zéaje' tu lu xezr la xu da guchebe lazre' Dios gunézruje' chee'. Bdxuaje' lázrie', ne quebe nézene' naga zéaje'. <sup>9</sup> Lawe' da guxeajlí lazre' Dios, guzúa Abraham lu xezr la xu na' da guchebe lazre' Dios gunézruje' chee', naga naca xezr la xu chee' benne' zitu' ca'. Guzúe' tu lu xu'u ladxe', ne cá'aqueze ben Isaac, ne Jacob, benne' ca', cá'aqueze Dios guchebe lazre' xelezí'ē da na' gunezruj Dios le'. <sup>10</sup> Caní ben Abraham lawe' da guleza lazre' chu'ē lu xezre na' da quebe te chee' na, da na' guleche Dios, ne da ben Léqueze'.

<sup>11</sup> Cá'aqueze Sara, lácala ba nácale'ē benne' gula, ne quebe nu bi chee' dxalaj, san xel-la' dxeajlí lazre' chee' guque' xrna bidau'. Guzúa tu bi biu chee' lawe' da guxeajlí lazre' Dios guné' ca da guchebe lazre'. <sup>12</sup> Caní guca, Abraham, lácala ba gúxrulé'e, guxánle'ē zri'ine zre sue' ca naxán xuzre' da zaj dxe' dxu'a tu yegu zren, da quebe nazeque' gulábadxu.

<sup>13</sup> Xúgute benne' caní gultatie', ne quebe ne xelezí'ē da ca' nachebe lazre' Dios, san lawe' da guleajlí lazre' Dios, belelé'ene' na zítu'la, na' belexezaca ba lázrelene' na. Caní bululé'ene' gulaque' ca benne' zitu', benne' guledeze lu xezr la xu nigá. <sup>14</sup> Benne' dxuluchálaje' caní dxululé'ene' dxeledé' dxelexíajle' tu lazrie'. <sup>15</sup> La buluwía lazre' ca naca xezr la xu naga gusá'aque', na' waca xelexezrine' na'. <sup>16</sup> Gulaca lazre' tu lazrie' da naca na cháwe'dxa, da na' naca na lazrie' da zua xabáa. Chee' le' na' Dios quebe dxexedué'ene' gate dxelenná benne' ca' naque' Dios chee', na' nucueze' tu xezre naga xelezúa benne' ca'.

<sup>17</sup> Gate guca lazre' Dios nézene' ca naca xel-la' dxeajlí lazre' chee' Abraham, na' lu xel-la' dxeajlí lazre' chee' guché'ē Isaac chee' gutie'-be' lau Dios. Ba zue' gutie' bi tu licha' chee' lácala ba nachebe lazre' Dios, gunné': <sup>18</sup> "Ne chee' Isaac wazrále'ē zri'ine zre su'." <sup>19</sup> Abraham bxren lazre' Dios wazéquene' gusebané' benne' gate, na' waca nnadxu bezí' lu ne'ē zri'ine' Isaac ládujla benne' gate.

<sup>20</sup> Isaac, lu xel-la' dxeajlí lazre' chee', guchebe lazre' xelezí' zri'ine' Jacob, ne Esaú da xrlátaje ca'. <sup>21</sup> Jacob, lu xel-la' dxeajlí lazre' chee', gate zua gatie', guchebe lazre' xelezí' tu tu zri'ine José da xrlátaje ca', ne be lá'ane' Dios, nuchiche tipe' xágadu nuxre'. <sup>22</sup> José, lu xel-la' dxeajlí lazre' chee', gate ba zua gatie' gunné' welexedxúaj benne' Israel ca' lu xezr la xu Egipto, ne bdxixruj be'ē ca dxal-la' xelune' chee' zrita xu'ē.

<sup>23</sup> Gate gulaj Moisés, xra xrne'e, lu xel-la' dxeajlí lazre' chee' bu-lucache' lebe' lawe' chunna beu', lawe' da belelé'ene' naca bidu na' xrtanle'ē, ne quebe belezrebe' benne' wenná bea, bénnea' bdxixruj be'ē xelate bidu ca'. <sup>24</sup> Moisés, lu xel-la' dxeajlí lazre' chee', gate guque' benne' waca, quebe guca lazre' gaque' zri'ine nu'ula zri'ine benne' wenná bea chee' xezr la xu Egipto, <sup>25</sup> san guca lázredxe' té'e' xel-la' zi' nen bi ca'

chee Dios quézcala sue' tu chí'idau' lu da ba neza chee da naca dul-la.  
 26 Gúquene' nácadxa chawe' gate belún lala bénneache chee' ca da guca  
 chee Cristo, quézcala gape' ca naca da gunní'a chee xezr la xu Egipto,  
 lawe' da dxenné'e da gunezruj Dios le'. 27 Moisés, lu xel-la' dxeajlí lazre'  
 chee', bedxúaje' lu xezr la xu Egipto, ne quebe bezrebe' xel-la' dxezrá'a  
 chee' benne' wenná bea, na' guzúa chúchue' ca tu benne' dxelé'ene' Dios,  
 Bénnea' quebe gaca nu le'e.

28 Moisés, lu xel-la' dxeajlí lazre' chee', bene' Laní Pascua gate na'  
 bdxixruj be'e xuluzrá benne' Israel ca' dxen le'e xaga dxa xu'u chee  
 quebe gute gubáz chee xabáa chee xel-la' gute netú zri'ine benne' Israel  
 ca', bi biu nedxu. 29 Benne' Israel ca', lu xel-la' dxeleajlí lazre' chee',  
 beledé' lu Nísadau' Xrna ca benne' dxeledé lu xu bizre, san gate gulú'u  
 benne' Egipto ca' naga ba guledé benne' ca', na' bezraga nisa na', na'  
 gulebé' chí'i benne' Egipto ca', na' gulate'.

30 Benne' Israel ca', lu xel-la' dxeleajlí lazre' chee', guzré'e ze'e da  
 naxechaj na xezre Jericó ca' gudé guledé benne' Israel ca' bezúate xezre  
 na' tu tu lasa du da gazre zra. 31 Rahab, nu'ula dxezí' lu ne'e benne' zaj xu'e  
 neza, lu xel-la' dxeajlí lazre' chee', quebe gutie' tu zren nen benne' Jericó  
 ca', benne' quebe buluzúa dizra' chee Dios, lawe' da gudapa le' ba lá'ana  
 benne' Israel ca', benne' xeajlenná' lané' xezre na'.

32 ¿Bíradxa nnia'? Québedxa bi lataj napa' guchálaja' ca ben Gedeón, ne  
 ca ben Barac, ne ca ben Sansón, ne ca ben Jefté, ne ca ben David, ne ca  
 ben Samuel, ne ca belún benne' ca' gulenné' waláz chee Dios. 33 Benne'  
 ca' lu xel-la' dxeleajlí lazre' chee' gulezí'e xezr la xu ca' chee' benne' xula,  
 ne gulenná' be'ene' cháwe'dau' benne' waláxr chee' ca', na' gulezí'e da  
 guchebe lazre' Dios, lawe' da gúcalene' le'.

Belelé' lu dxu'a bezre xixre' ca'.

34 Buluxusule' xi' da dxéneaca.

Belelé' lu xia nalá.

Benne' ca' zaj nate ni'a na' belexaque' dipa lazre'.

Gulaque' benne' wala lu wedil-la, ne gulaca lu ne'e

da guta' chee' benne' ca' guledábage' le'.

35 Nu'ula ca' belezí' lu ne'e benne' gate chee' ca', benne' belexebáne'.

Xebal-le' gulátie' gate buludé' le' ba xa',

lawe' da quebe belú'e lataj nu gusán le',

chee' xelezrué'ene' xel-la' dxexebán

chee' xezezi'e xetú xel-la' nabán da naca na da li.

36 Xebal-le' belún le' chee',

na' xebal-le' belú'e le',

na' xebal-le' buluchéaje' le' du xia ne gulegu'e le' lize xia.

37 Belutie' xebal-le' nen xiaj,

na' xebal-le' gulecheze' le' nen xia.

Xebal-le' buludé' le' lu da stebe ca',

na' xebal-le' belutie' nen xia nalá.

Xebal-le' guledé' nila na'la,

zaj nacue' zra zrila' ne zra béadu ca'.

Baxache' gulaque', na' guledé' lu da zi' da xa',

na' buluzalje' le'.

38 Bénneache zaj zra' lu xezr la xu nigá quebe zaj naca chee' xezezi'e  
 ba neza chee' benne' caní. Tu guledázqueze' le'e xixre', ne lu xi'a ca', ne  
 lu bluaj ca', ne lu bluaj xu ca'. 39 Xúgute' benne' ca' bca'ana chawe' Dios

le' lawe' da guleajlí lazre' Le', san quebe ne xezezi'e ca naca da guchebe lazre' Dios, <sup>40</sup> lawe' da nucueza Dios tu da nácadxa chawe' cheedxu dxi'u, chee xelexaca benne' ca' li lazre' tu zren nen dxi'u.

## 12

### *Dxal-la' nna'dxu Jesús*

<sup>1</sup> Lawe' da zaj naxéčaj benne' zante dxi'u, benne' ca' ba bululé'eng' ca guléajle'e chee Dios, dxal-la' guzúadxu chalá'ala xúgute da dxulalale na dxi'u, ne dul-la da naxel-la na dxi'u, na' lu dute xel-la' zren lazre' cheedxu gundxu zrin chee Dios, da naca na ca dxezá' chéğudxu chee zrué'eledxu da dxelé'edxu tu chi na'. <sup>2</sup> Dxal-la' nna'dxu Jesús, Bénnea' dxune' nápadxu xel-la' dxeajlí lazre', ne dxune' li lazre' xel-la' dxeajlí lazre' na'. Jesús gudé'e xel-la' zi' le'e xaga begúaj, ne quebe bedué'eng' lawe' da guné'e xel-la' dxebé na' da dxebeza na Le', na' gudxé'e chalá'a xabēla chee lataj blau chee Dios.

<sup>3</sup> Le nna' xanne' ca da ben Jesús, gudéle'e xel-la' zi' da bulusaca benne' dul-la ca' Le'. Chee le na' quebe chajxréquele gunle zrin chee', ne quebe gute lázrele. <sup>4</sup> Ba gudíl-lalēle dul-la, na' quebe ne gátele lu wedil-la na'. <sup>5</sup> Quebe gal-la lázrele le'e ca dxun Dios, dxuzéajni'ing' le'e ca zrí'inequeze', gate dxenné':

Zrí'ina', quebe guzú' chalá'ala da dxun Xranu' gate dxusízrene' lue', ne quebe gate lazru' gate dxedil-le' lue'.

<sup>6</sup> Xránadxu dxusízrene' bi ca' nazrí'ing', na' xúgute bi dxezi' lu ne'e ca zrí'inequeze' dxudé'e-be' xel-la' zi'.

<sup>7</sup> Le guchaga lau le'e xel-la' zi' da dxedele, lawe' da dxuxúe Dios le'e ca zrí'inequeze'. ¿Zra bi quebe dxusizre xra'be' lebe'? <sup>8</sup> Che Dios quebe dxusízrene' le'e ca dxusízrene' xúgute bi chee' ca', quebe nácale zrí'inequeze Le'. Nácale ca bi lan ca'. <sup>9</sup> Gate ne nácadxu bidau', bulusizre xra xrnadxu dxi'u, na' gudápadxu le' ba lá'ana. Dxal-la' guzúadxadxu dizra' Xradxu zue' xabáa, na' gaca bandxu. <sup>10</sup> Xra xrnadxu bulusízrene' dxi'u tu chí'idauze ca da guléquene' chawe', san Dios dxusízrene' dxi'u chee gaca tu da ba neza cheedxu da naca na li lazre', chee gácadxu lá'azxa ca naca lá'azxa Léqueze'. <sup>11</sup> Da li quebe dxedánnedxu da dxusizre xradxu dxi'u, san dxéquedxu zi', na' dxedé na', che dxéajni'idxu ca da dxusízrene' dxi'u, na' gundxu da xrlátaje ca', ne cueza zri lázredxu lau Dios.

### *Quebe dxal-la' guzúadxu chalá'ala da dxenná Dios*

<sup>12</sup> Chee le na' le guzazraj na'le, ne zríbele da ba dxelate ni'a na', <sup>13</sup> ne le sa' lu neza da zaj naca na li, chee quebe chegu ní'ale da quebe zaj zua chacha, ne chee xelexaca chacha na.

<sup>14</sup> Le gun ba xuzre suale lu xel-la' dxebeza zri lazre' nen xúgute bénneache, ne le gaca li lazre' lau Dios. Che quebe gunle caní, quebe gaca lé'elele Xránadxu. <sup>15</sup> Le guxúe xanne' chee quebe gusanle da chawe' ca' dxunna Dios le'e, ne chee quebe gaca netule le'e ca tu xixre' sla' da dxulala na, ne dxuxrinnaj na da xezícala. <sup>16</sup> Le guxúe xanne' chee quebe gunle da sban, ne quebe guzúale chalá'ala ca da dxunna Dios, ca ben Esaú, bénnea' bsané' xúgute da gunezruj xre' le' chee guzi'e tu cueze xel-la' wagu. <sup>17</sup> Ba nézele ca da guca gudé na', gate guca lazre' Esaú na' si'e da chawe' da naba xre' lau Dios, na' xre' bzue' le' chalá'ala, ne lálcala gudxzérelé'e, quebe guca xuché'e ca da ba bene'.

<sup>18</sup> Quebe dxaca chee ca da guca chee benne' Israel ca', gulebigue' naga zua tu xi'a, da na' wazeque' nu guchiche, ne naga dxala na xi', naga zua da chul-la, ne dxe' zren, ne dxaca be' bduunu'. <sup>19</sup> Belenne' gudxezre luzu da dxulucuezre', ne chi'i Dios bchálajlene' le'. Benne' ca' belenne' chi'i Dios na' gulata' xúene' québedxa guchálajlene' le'. <sup>20</sup> Ca'an guca lawe' da quebe gulezéquene' xuluchaga lawe' ca naca da bdxixruj be'e Dios, gunné': "Che tu béadauze guléajba' lu xi'a na', dxal-la' xelúti'e'-ba' nen xiaj u nen tu xia nalá xéche'ze." <sup>21</sup> Da na' belelé'ene' bchébele'e na le', na' Moisés gunné': "Dxezrizetea' xel-la' dxezrebe."

<sup>22</sup> Na'a le'e ba nabígale naga zua xi'a lá'azxa da nazí le na Sión, ne lu xezre chee Dios ban, da naca na Jerusalén da zua xabáa, ne naga zaj zra' gáxzue gáxzue gubáz chee xabáa, <sup>23</sup> ne naga zaj nazraga benne' ca' gulaca bi chee Dios nédxute, benne' ca' ba zaj naxúaj le' xabáa, ne lau Dios, Bénnea' guchi'e chee xúgute bénneache, ne naga zaj zra' be' gulácaqueze benne' ca' ba nun Dios le' li lazre', <sup>24</sup> ne lau Jesús, Benne' wedé dizra' chee xel-la' wezría cube, ne naga bzre'e dxen da dxuchalaj na da cháwedxa ca da bchalaj dxen chee Abel.

<sup>25</sup> Chee le na', le guxúe xanne' cuínale chee quebe guzúale chalá'ala Bénnea' dxuchálajlene' dxi'u. Quebe belegache benne' ca' buluzúe' chalá'ala Dios gate na' bchálajlene' le' lu xezr la xu nigá, ne quebe gáchedxu dxi'u che guzúadxu chalá'ala Bénnea' dxuchálajlene' dxi'u, zue' xabáa. <sup>26</sup> Lu zra na' gate gunná Dios, na' guzrú' xezr la xu nigá. Na'a dxenné': "Xetú lásaze guniba' quegaze xezr la xu nigá, san cá'aqueze xabáa." <sup>27</sup> Gate gunné': "Xetú lásaze", zéajje na xecá'a Dios ca naca da dxeledá, da ca' bene', na' xegá'ana da quebe seque' nu gutá. <sup>28</sup> Dخال-la' xedxu Dios: Xcalenu' lawe' da gunne' dxi'u tu lataj naga dxenná bea Le' da quebe seque' nu gutá. Dخال-la' güe lá'anadxu Dios du lázredxu ne dute xel-la' ba lá'ana, ca da dxezaca ba lazre', <sup>29</sup> lawe' da naca Dios cheedxu ca tu xi' da guzría xi na da sban.

## 13

### *Da dxezaca ba lazre' Dios*

<sup>1</sup> Quebe gusanle ca nazrí'i ljwézrele tule xetule ca bíchequeze. <sup>2</sup> Le gusá lázrele dxal-la' si' lu na'le benne' zá'aque' lízrele, lawe' da gate belún caní bal-la benne', gulezí' lu ne'e gubáz chee xabáa ca', ne quebe guleque be'ene'.

<sup>3</sup> Le gusá lázrele gácalele benne' zaj xu'e lizre xia, gun cuínale ca benne' xú'aqueze lizre xia nen benne' ca'. Le gusá lázrele gácalele benne' ca' dxeledé'e xel-la' zi', gun cuínale ca benne' dxeledé'queze' xel-la' zi'.

<sup>4</sup> Xúgutele dxal-la' gápale ba lá'ana xel-la' wechaga na', ne gunle da xlátaje lu xel-la' wechaga na' chee, lawe' da guchi'a Dios chee benne' ca' dxuluzúe' chalá'ala xel-la' wechaga na' chee', ne chee benne' ca' dxelune' da sban.

<sup>5</sup> Quebe sa lázrele xel-la' gunní'a. Le xezaca ba lázrele ca da nápane lawe' da ba gunná Dios: "Cabata' gusana' lue', ne quebe cueaj xíchajqueza' lue'."

<sup>6</sup> Caní naca, du lázredxu waca nnadxu:

Xrana' Dios dxácale' neda'.

Quebe zreba' bi da gusaca bénneache neda'.

7 Le gusá lázrele gácale benne' ca' dxuluxúe' le'e, ne dxuluchálajlene' le'e dizra' chee Dios. Le na' xque ca da dxelúne', ne le chéajle chee Dios ca dxelún benne' ca'.

8 Túzqueze ca naca Jesucristo neaje, ne na'a zra, ne chadía chacanna. 9 Quebe sile ca da dxuluchalaj benne' dxulusédene' da quebe naca na ca da naxúaj na lu xiche lá'azxa chee Dios. Cháwedxa naca guzúa chuchu lázrdaudxu lu xel-la' zri'i lazre' chee Dios, ne quebe chéajledxu da dxeledxixruj bea benne' ca naca da dxal-la' xi'aj gágudxu, lawe' da benne' ca' zjácálene' da ca' cabata' ne xelezí' ba neza ne chee da ca'.

10 Bxruze judío ca' gulawe' béadu ca' belutie' lataj lá'azxa. Quebe zaj naca chee' xelawe' guna' da dxugú'udxu dxi'u chee Dios. 11 Bxruze blau judío bzrie' dxen chee béadu ca' lu lataj lá'azxa blau ca tu guna' da dxegúa na dul-la. Buluzexxe' da nagá'ana chee béadu ca' cúzrela xezre. 12 Cá'anqueze gute Jesús cúzrela xezre na' chee bca'ana chawe' bénneache ne chee dxen cheéqueze'. 13 Le dxuaj, gundxu tu zren Cristo, lácala xuluzúa bénneache dxi'u chalá'ala ca belune' chee Le'. 14 Lu xezr la xu nigá quebe de cheedxu tu xezre da súatequeze. Dxebézadxu tu da za za'. 15 Chee le na' tu dxál-lazqueze güe lá'anadxu Dios nen dxú'aquezdxu ne chee Jesucristo, da naca na ca tu guna' da dxugú'udxu chee Dios. 16 Dخال-la' gusá lázredxu gundxu da xrlátaje, ne bi gunézrujdxu chee benne' ca' quebe bi zaj nape', lawe' da dzezaca ba lazre' Dios le na.

17 Le guzúa dizra' chee benne' ca' dxuluxúe' le'e, ne le gun ca da dxelenné'. Benne' caní dxuluxúe' bénne'du xu'ule, ne xuluxudé'e' lau Dios ca da zaj nune'. Che gunle caní, na' benne' caní welune' zrin chee' du lazre', ne quebe xelezúa xache', lawe' da che quebe gunle caní, quebe bi da ba neza gaca na chee.

18 Le naba lau Dios gaca chawe' cheentu'. Quebe bi zua lu lázrdauntu' da dxagu na zria netu' lawe' da dxun zi' lázrentu' guntu' da xrlátaje ca naca xúgute' da dxuntu'. 19 Dxenaba' le'e ná bale lau Dios gunne' neda' lataj xídazega' súalena' le'e naga zúale.

20 Dxenaba' lau Dios, Bénnea' dxunne' dxi'u xel-la' dxebeza zri lazre', ne bsebane' Xránadxu Jesucristo ládujla benne' gate. Léqueze' naque' Benne' Blau Dxuxúe' Dxi'u, nácadxu zri'la' chee', na' caní naque' lawe' da blalje' dxen chee' da bzua chuchu na xel-la' wezría chadía chacanna da bene'. 21 Dxenaba' Dios guné' le'e li lazre' chee séquele gunle da xrlátaje ca da dxaca lazre' Le', ne guné' cheentu' ca da dxaca lazre' ne chee Jesucristo. ¡Gaca ba Cristo chadía chacanna! ¡Ca'an gaca na!

22 Le'e, benne' bícha'dau', dxata' xueda' le'e gácale zren lazre' ca naca dizra' caní, da dxulusizre na le'e, na' láttega da du nigá dxuzúaja' chee. 23 Dxuzenda' le'e ba bedxúaj bi bíchedxu Timoteo lizre xia, ne che xelá' zé'ebe', na' che'a-be' gate xedajnná'a le'e.

24 Le gugapa diuzre xúgute' benne' ca' dxuluchálajlene' le'e dizra' chee Dios, ne le gugapa diuzre xúgute' benne' bíchedxu ca'. Benne' zaj zre'e xezr la xu Italia nigá dxulugape' le'e diuzre.

25 Dxenaba' lau Dios guné' da chawe' chee xúgutele le'e. ¡Ca'an gaca na!

## DIZRA' CHEE DIOS DA BZUAJ SANTIAGO

*Santiago dxuzuaje' chee benne' ca' zaj nadxúaje' lazrie'*

<sup>1</sup> Neda', Jacobo, naca' wen zrin chee Dios, ne chee Xránadxu Jesucristo. Dxugapa' le'e diuzre. Nácale chazrinnu cue' zri'ine zre sua Israel, ne nase dínnajle du gabí'i xezr la xu nigá.

*Xel-la' sina da za lu na' Dios*

<sup>2</sup> Benne' bícha'dau', dxal-la' béle'ele gate dxedele zane cue' da stēbe ca', <sup>3</sup>lawe' da nézele gate dxedé xel-la' dxeajlí lazre' cheele lu da stēbe, da nigá dxundxa na le'e zren lazre'. <sup>4</sup> Le gun ba xuzre gaca li lazre' xel-la' zren lazre' cheele chee gácale benne' xrlátaje ne li lazre', ne quebe bi xáxrjele.

<sup>5</sup> Che núlale le'e dxexáxrjele xel-la' sina, le naba na lau Dios, na' Le' gunne' na le'e, lawe' da dxunézrujle' Dios chee xúgutē bēnneache, ne quebe dxexezúene' zi'. <sup>6</sup> Dخال-la' nábale nen dutē xel-la' dxeajlí lazre' cheele, ne quebe gun chupa lázrele. Benne' dxun chupa lazre' naque' ca xeajxruza chee nísadau' da dxua be' nila na'la. <sup>7-8</sup> Benne' dxune' caní, ne quebe zrize dxezúa lázrdawe', ne quebe tuz ca dxun xichaj lázrdawe' quebe dxal-la' guéquene' bi da xunezruj Xránadxu chee'.

<sup>9</sup> Tu benne' bíchedxu naque' baxache' dxal-la' bene' lawe' da guzúa Dios le' ca tu benne' zaca. <sup>10</sup> Benne' nape' xel-la' gunní'a dxal-la' bene' gate gun Dios le' dxexruj lazre' lawe' da naca benne' gunní'a ca tu xiaj xixre' da quebe dxezí béateca na. <sup>11</sup> Gate dxalaj gubizra, ne dxennále'e na, na' dxebizre xixre' na', na' dxexruj xiaj chee na, na' dxedé xel-la' xrtan chee na. Cá'anqueze gaca chee benne' gunní'a, xenitiē' dxácatē na' dxezí' lu ne'e xel-la' gunní'a.

*Ca naca chee da stēbe ca' da dxededxu*

<sup>12</sup> Ba neza naca na chee benne' dxuchaga lawe' da stēbe ca' dutē xel-la' zren lazre' chee', lawe' da che ba bedxúaje' chawe' lu da stēbe da dxedé', na' si' lu ne'e da nachebe lazre' Dios gunézruje' chee benne' ca' zaj nazri'ine' Le'. <sup>13</sup> Gate nu benne' zua da dxegú'u xel-la' na le' chee' gunē' da calela, quebe dxal-la' guéquene' dxuzúa Dios da na' dxegú'u xel-la' na le', lawe' da quebe bi de da seque' xegú'u xel-la' na Dios chee' gunē' da calela, ne quebe bi guzúa Dios da xegú'u xel-la' na dxi'u chee' gundxu da calela. <sup>14</sup> Tu benne' zua da dxegú'u xel-la' na le' chee' gunē' da calela gate xel-la' dxezá lazre' da calela chee' dxecá'a na le', ne dxenná be'e na le'. <sup>15</sup> Nadxa ca naca xel-la' dxezá lazre' da calela caní dxuluzán na dul-la, na' gate ba guzeque' zua dul-la na', na' dxute na bēnnea'.

<sup>16</sup> Benne' bícha'dau' nazri'ite' lazra', quebe güele lataj nu si xē le'e. <sup>17</sup> Xúgutē da zaj naca xrlátaje ne da zaj naca li lazre' da dxezidxu zá'aca na xabáa lu na' Dios, Bēnnea' bene' da ca' dxulusení na zran xabáa. Dios quegá dxuchá cuine', ne quebe dxuché'e ca dxune'. <sup>18</sup> Ca naca da guca lazre' Dios, ba benne' dxi'u xel-la' nabán. Bchíne' dizra' li chee', chee' gácadxu ca tu lina nedxu chee', chee' da ba ben Le'.

*Xel-la' dxucá'ana szren Dios da naca na li lazre'*

<sup>19</sup> Chee' le' na', benne' bícha'dau' nazri'ite' lazra', tu tule le'e dxal-la' gácale ban lazre' chee' xénele, san dxal-la' cueza lázrele ca da nnele ne quebe la' zrá'atele. <sup>20</sup> Tu benne' xichaj zra'a quebe dxune' da dxezaca ba lazre'

Dios. <sup>21</sup> Chee le na', le gusán xúgute da sban ne ca naca da calela da dxanle'e na, na' dutē xel-la' dxexruj lazre' cheele le si' ca naca dizra' chee Dios da ba naxaza na lu xichaj lázrdaule, lawe' da wazeque' dizra' na' guselá na bēnne'du xu'ule.

<sup>22</sup> Le gun ca da dxul'é e dizra' na' le'e, ne quegá xénezele na. Benne' dxénzene' na dxezi xēze cuine'. <sup>23</sup> Bénnea' dxénzene' dizra' na', ne quebe dxunē' ca dxenná na, naque' ca tu benne' dxenné'e lawe' tu lu wana'. <sup>24</sup> Dxenné'e ca naque', na' gate ze xeajze' na', na' dxal-la lazre' ca naque'. <sup>25</sup> Benne' dxenná' xánnie' ca da bdxixruj be'e Dios da naca na li lazre', ne da dxuselá na dxi'u, ne dxusédie' ca naca na, ne quegá dxénzene' na, quebe dxal-la lazrte' na. Che dxunē' ca naca na, benne' nigá gaca tu da ba neza chee' lu xúgute da dxunē'.

<sup>26</sup> Che nu benne' dxéqueñe' naque' benne' dxucá'ana szren Dios, ne quebe dxezéqueñe' nna be'ene' luzre', benne' nigá dxezi xēze cuine', na' ca naca xel-la' dxucá'ana szren Dios chee' dácheze naca na. <sup>27</sup> Xel-la' dxucá'ana szren Dios da naca na du lazre', ne da naca na da dxezaca ba lazre' Xradxu Dios naca na cani: Gácale dxu bidu ca' zaj nazebe, ne nu'ula ca' ba zaj nate benne' biu chee' gate zaj zuē' lu da zí' da xa', ne quebe gundxu ca naca da sban chee' xēzr la xu nigá.

## 2

### *Quebe guchale ca gunle chee tu tu benne'*

<sup>1</sup> Benne' bícha'dau', le'e dxéajlele chee Xránadxu, Benne' xabáa Jesucristo, quebe dxal-la' guchale ca gunle chee tu tu benne'. <sup>2</sup> Che chu'u tu benne' naga nazrágale, ne nácuē' zra lanē' da zaca, ne xu'u da naca na oro lu xrube ne'e, na' cá'anqueze che chu'u tu benne' xache', ne nácuē' zra lanē' tuzruj, <sup>3</sup> na' che dxelé'ele cháwedau' bénnea' nácuē' zra lanē' da zaca, ne dxele le': "Gudxe'e nigala naga nácadxa na chawe'", na' dxele benne' xache' na: "Xeajsé na'la, u gudxe'e lu xu ná'teze." <sup>4</sup> Che dxunle caní, dxuchale ca dxunle chee tu tu benne', ne dxuchí'ale ca zaj naca bēnneache, quebe naca xrlátaje xichaj lázrdaule.

<sup>5</sup> Benne' bícha'dau' nazri'ite' lazra', le xen da nigá: Dios ba guqué'e benne' ca' zaj naque' benne' xache' lu xēzr la xu nigá chee xelaque' benne' gunní'a lu xel-la' dxeajlí lazre', ne chee xelezí' lu ne'e da nucueza Dios naga dxenná bea Le', da na' guchebe lazre' Le' gunézruje' chee benne' ca' zaj nazri'ine' Le'. <sup>6</sup> Le'e dxuzúale chalá'ala benne' xache' ca'. ¿Quegá benne' gunní'a ca' benne' dxuluchínene' le'e, ne dxeleché'e le'e lau benne' xulawe' ca'? <sup>7</sup> ¿Quegá benne' gunní'a ca' benne' dxelenné' schanni' chee da xrlátaje ca nazi' lale, dxennale nácale bi chee Cristo?

<sup>8</sup> Che da li dxunle ca dxenná da nadxixruj be'e Dios, da nácadxa blau ca da naxúaj na lu xiche lá'azxa, dxenná na: Bzri'i biche ljwezru' ca nazri'i cuinu', xrlátaje dxunle. <sup>9</sup> Na'a che dxuchale ca dxunle chee tu tu benne', dul-la dxunle, ne nabágale zria lawe' da quebe dxunle du ca bdxixruj be'e Dios. <sup>10</sup> Che tu benne' dxunē' ca zaj naca da nadxixruj be'e Dios, san che dxenéguene' ca naca tuze da nadxixruj be'ene', naca na cáteze nabague' zria ca zaj naca xúgute da nadxixruj be'e Dios. <sup>11</sup> Léqueze Dios gunné': "Quebe gunle dul-la da dxichaj na xrba chee xel-la' wechaga na'", cá'anqueze gunné': "Quebe gútele benne'." Caní naca, che tu benne' quebe dxunē' dul-la da dxichaj na xrba chee xel-la' wechaga na', san che dxutie' benne', ba gunéguene' ca da nadxixruj be'e Dios. <sup>12</sup> Le'e dxal-la' guchálajle,



ne gunle ca dxal-la' xelún benne' ca' guchi'a Dios ca da dxelunę', benne' ca' zaj nalá lu na' da gunná bea Le'. <sup>13</sup> Benne' ca' quebe dxelexexache lazre' cheę benne' xula, Dios guchi'e ca da dxelún benne' ca', ne quebe xexache lazre' cheę benne' ca', san benne' ca' dxelexexache lazre' cheę benne' xula quebe bi zria xelebague' gate Dios guchi'e ca da zaj nun benne' caní.

*Ca naca cheę xel-la' dxeajlí lazre', ne cheę zrin dxundxu*

<sup>14</sup> Le'e, benne' bícha'dau', ¿bizra culuén gapa na che tu benne' dxenné' dxeajlí lazre' Cristo, na' quebe bi dxunę' da dxácalen nu benne' dx-exázrjengę'? ¿Wazeque' xel-la' dxeajlí lazre' na' guselá na le'? <sup>15</sup> Che zra' benne' bíchedxu u nu'ula zandxu, benne' quebe bi zaj de zra lanę' u da xelawę', <sup>16</sup> na' che núlale le'e xele benne' ca': "Bexiajzé cháwedau'. Nazré'enu', ne gágugu' szri'", san che quebe bi gunézrujle ca da dx-exázrjengę', ¿bizra culuén gapa da na' gunnále? <sup>17</sup> Caní naca na cheę xel-la' dxeajlí lazre'. Che quebe bi zaj de da chawe' da xululé'e na che dxeajlí lazre' bennea' Cristo, xel-la' dxeajlí lazre' cheę naca na ca tu da gate.

<sup>18</sup> Wannalja nu benne': Lue' dxennáu' dxéajle'u cheę Cristo, na' neda' dxuna' da chawe' ca'. Ble'e neda' dxéajle'u cheę Cristo ne quebe dxunu' da chawe' ca', na' neda' gulé'eda' lue' dxeajlí lazra' Cristo ne cheę da chawe' ca' da dxuna'. <sup>19</sup> Dxéajle'u lue' zua tuze Dios. Nácaqueze na ca'. Cá'anqueze da xriwe' ca' dxeléajle' na, ne dxelezrize na lu xel-la' dxelezrebe. <sup>20</sup> Lue', benne' xala, ¿dxaca lazru' gulé'eda' lue' naca xel-la' dxeajlí lazre' ca tu da gate che nu benne' dxeajlí lazre' Cristo na' quebe bi zaj de da chawe' da xelunna bea na? <sup>21</sup> ¿Ájazra guca cheę xra xrtáudxu Abraham guque' benne' xrlátaje lau Dios? Guca na ne cheę da bene' gate guxúe' zri'ingę' Isaac lu bdupa xiaj cheę guzezxe'-be'. <sup>22</sup> ¿Quebe dxele'enu'? Ca da ben Abraham dxulé'e na guxeajlí lazre' Dios, na' xel-la' dxeajlí lazre' cheę guca na du lazre' ne cheę da bene'. <sup>23</sup> Caní guca li ca da dxenná na lu xiche lá'azxa: Abraham guxéajle'e cheę Dios, na' Dios blé'ene' le' benne' xrlátaje. Na' bchálaje' ca naca cheę Abraham, gunné': "Bi zrágaqueza', Abraham."

<sup>24</sup> Na'a dxelé'ele Dios dxezi' lu ne'e tu benne' ne cheę da chawe' da dxunę', ne quegá tuze lawe' da dxeajlí lazre' Le'. <sup>25</sup> Cá'anqueze guca cheę Rahab, nu'ula wen da sban. Nu'ula nigá gulu'e lizre' benne' ca' gusel-la Josué, na' bsi'e benne' ca' neza xula cheę belelé' lu na' benne' ca' dxjaque' wedil-la, na' ne cheę da bene', Dios guzi' lu ne'e nu'ula na'. <sup>26</sup> Ca naca cheę bela' dxen cheędxu, che ba bedxúaj be' cheę na, ba nate na, cá'anqueze naca cheę xel-la' dxeajlí lazre' cheędxu. Che quebe bi zaj de da chawe' da xululé'e na dxeajlí lazrdxu Cristo, naca na ca tu da gate.

### 3

*Ca naca cheę lúzredxu*

<sup>1</sup> Benne' bícha'dau', quebe dxal-la' gun cuínale benne' dxulusede dizra' cheę Dios, lawe' da nézele ca gun Dios, guchi'a xánnedxe' cheę da dxundxu dxi'u, dxuchálajdxu xrtizre'. <sup>2</sup> Xúgutedxu dxúnle'edxu da calela. Che nu benne' quebe bi da calela dxunę' ca naca da dxuchálaje', naque' benne' li lazre', na' wazéquene' nna be'ene' ca nácaqueze bela' dxen cheę'. <sup>3</sup> Gate dxugú'udxu xia dxu'a bzrina' cheę gunba' da dxaca lazrdxu, wazéquedxu nna be'edxu duteba'. <sup>4</sup> Le na' xque ca naca cheę da ca' dxeledán lawe' nísadau'. Lácala zaj naca na da zri'a, na' be' da dxuzriga na le na dxácale'e na, benne' dxusé'e na dxuchínene' tu xágadauze, na' dxenná be'ene' na

chee cheaj na naga dxaca lazre' le'. <sup>5</sup> Cá'anqueze naca chee lúzredxu. Naca na tu da dauze da naca chee bela' dxen cheedxu, na' da zrente da dxenná na. Tu xí'dauze waca guzezxe na tu xi'a zren. <sup>6</sup> Lúzredxu naca na ca tu xi'. Lúzredxu naca na ca tu xezr la xu sban da zua lu bela' dxen cheedxu, ne dxuxrinnaj na du ca nácadxu. Zúale ca tu xi' lúzredxu da za' lataj ba xa', ne naca na ca tu da dxegú'u na xi' ca naca xúgute da dxundxu. <sup>7</sup> Wazeque' nu benne' nna bé'ene' xúgute be xixre' ca', ne be zaj zua xrila, ne be snia ca', ne be zaj zra' lu nísadau', ne ba gunná bé'ene'-ba'. <sup>8</sup> Quebe nu benne' dxezéque' nna bé'ene' dute da dxenná luzre'. Naca na tu da calela da quebe dxue na lataj nu nna be'e le na, ne naca na ca tu be snia, be dxúteba' bènneache ca'. <sup>9</sup> Nen lúzredxu níqueze dxue lá'anadxu Xradxu Dios, ne nen le na dxennéquezdXu da calela chee bènneache, benne' ca' nun Dios na' lu'a le saca Léqueze'. <sup>10</sup> Lu dxú'adxu ná'queze dxeledxúaj da xrlátaje ne da calela. Benne' bícha'dau', da nigá quebe dxal-la' gaca na ca'. <sup>11</sup> ¿Waca galaj nisa chawe' ne nisa sla' lu tuze beaj? <sup>12</sup> Benne' bícha'dau', ¿waca tu xaga higo cuía na da zixre chee xaga olivo? ¿Waca tu lba uva cuía na da zixre chee xaga higo? Cá'anqueze, tu beaj quebe gaca gunna na nisa xene', ne nisa zri lazre'.

*Xel-la' sina da naca li lazre'*

<sup>13</sup> Che zua tu benne' ládujla le'e naque' benne' sina, ne dxéajni'ine', dxal-la' gulé'ene' na ne chee da chawe' da dxune' dute xel-la' dxexruj lazre' chee' da dxunezruj xel-la' sina le'. <sup>14</sup> Che zua lu lárdaule xel-la' zre'e lazre' ne xel-la' xa lazre', quebe dxal-la' gucá'ana szren cuínale ca naca xel-la' sina chee le lawe' da caní nnele da wen lazre' chee da naca da li. <sup>15</sup> Xel-la' sina caní quebe naca na chee Dios. Naca na chee xezr la xu nigá, ne chee bènneache, ne za na lu na' da xriwe'. <sup>16</sup> Naga zua xel-la' zre'e lazre' ne xel-la' xa lazre', na' zaj zra' benne' wechacha ca', ne dxelune' xúgute da calela. <sup>17</sup> Benne' zaj nape' xel-la' sina da dxunna Dios zaj naque' du lazre', ne zren lazre', ne dxe'ene lazre', ne dxexruj lazre'. Dxelexache lazre' ljwezre', ne dxelune' da chawe'. Zaj naque' li lazre' ne quebe dxelune' cúzreze da chawe'. <sup>18</sup> Benne' dxelebeche zrie' da ba xa' dxelune' tu zrin da naca ca tu binne da dxunna na da chawe'.

## 4

*Ca naca chee benne' zaj nazri'ine' da zaj naca chee xezr la xu nigá*

<sup>1</sup> ¿Bizr chee na' dxedíl-lale ne dxe' da ba xa' ládujla le'e? Dxaca caní lawe' da dxezá lázrele da zaj naca chee da calela, da dxuluzúa na le'e lu da ba xa'. <sup>2</sup> Le'e dxaca lázrele bi gápale, na' lawe' da quebe dxezrué'ele na, na' dxútele benne'. Dxezá lázrele tu da sile, na' lawe' da quebe dxezéquele sile na, na' dxedíl-lale ljwézrele, ne dxebéquele da ba xa'. Quebe dxezile ca da dxezá lázrele lawe' da quebe dxenábale na lau Dios. <sup>3</sup> Che dxenábale na, quebe dxezile na lawe' da dxenábale na calela, lawe' da dxedánele na chee guchínele na ca da dxaca lázrele. <sup>4</sup> Le'e, benne' quebe nácale li lazre', ¿quebe nézele che nu benne' dxedánnene' da calela da de lu xezr la xu nigá, benne' nigá dxecuídenē' Dios? Núteteze benne' dxaca lazre' si'e ba neza ca da dxaca lu xezr la xu nigá naque' benne' dxecuídenē' Dios. <sup>5</sup> Chee le na' dxenná xiche lá'azxa: Be' da nuzúa Dios lárdaudxu cadite dxe'e gunne xue cheedxu. <sup>6</sup> Dios dxácalēdxene' dxi'u lu xel-la' xrlátaje chee', ca dxenná xiche lá'azxa: Dios dxezré'e benne' ca' dxulucá'ana szren cuina, na' dute xel-la' xrlátaje chee' dxácalēne' benne' dxexruj lazre' ca'.

7 Le guzúa dizra' chee Dios.

Le til-la da xriwe', na' le na xuzrunnuj na naga zrale.

8 Le biga lau Dios, na' Le' bigue' naga zúale le'e.

Le'e, benne' dul-la, le gupá'a cuínale chee dul-la da nabágale.

Le'e, benne' quebe nazri'ile Dios du lázrele, le gaca benne' du lazre'.

9 Le guzua ba xa' lázre'le.

Le cuezre, ne le gaca xache' lazre'.

Québedxa guzrízrele, na' le cuezre.

Québedxa bele, ne le xewine lazre'.

10 Le gaca dxexruj lazre' lau Xránadxu, na' Le' gucá'ana szrene' le'e.

*Quebe dxal-la' guchí'adxu ca da dxun tu benne' bíchedxu*

11 Le'e, benne' bícha'dau', quebe nnele chee ljwézrele tule xetule. Benne' dxenné' chee tu benne' bíchedxu, u dxuchi'e ca da dxun bénnea', naque' benne' dxenné' calela chee da bdxixruj be'e Dios, ne dxebé'e ca zaj naca da bdxixruj be'e Dios. Che dxebé'u ca zaj naca da bdxixruj be'e Dios, dxun cuinu' ca benne' dxuchi'e da dxaca, ne quebe dxuzú' dizra' da bdxixruj be'e. 12 Zua tuze Dios, Bénnea' bdxixruj be'e da ca', ne dxuchi'e da dxaca, na' Léqueze' wazéquené' guselé' dxi'u, ne guzría xi'e dxi'u. Lue', ¿núzraqueze nacu', dxuchi'u da dxun benne' xula?

*Quebe nezdxu bi gaca wxre*

13 Na'a, le xene da nigá, le'e dxennale: Na'a u wxre chéajdxu tu xezre ne cheajsúadxu na' tu iza. Gá'udxu, ne gútedxu chee gucúdedxu dumí.

14 Quebe nézele ca da gaca wxre. ¿Ájazra naca chee xel-la' nabán cheedxu? Naca na ca tu beuj da dxebé' tu chi'i, na' chadí dxenite na. 15 Da dxal-la' guchálajle naca caní: Che Xránadxu dxaca lazre', gaca bandxu ne gundxu da nigá u da na'. 16 Le'e dxucá'ana szren cuínale ca da dxuchálajle. Xel-la' dxucá'ana szren cuina caní naca na da calela. 17 Che nu benne' ba nézeng' ca da chawe' da dxal-la' guné', na' quebe dxuné' na, na' bágale'e dul-la.

## 5

*Santiago dxusízrene' benne' gunní'a ca'*

1 Le xene da nigá, le'e, benne' gunní'a. Le cuezre ne le xewine lazre' ca naca da zi' da xa' da lé'ele. 2 Ca naca xel-la' gunní'a chee ba zaj nuzru na, na' zra lánale zaca ba zaj nagu béadu ca' le na. 3 Ca naca oro chee ne plata chee, ba gulezén xrche'e na, na' lawe' da quebe bchínele da gunní'a chee lu da xrlátaje, da caní dxululé'e na nabágale zria lau Dios, na' Le' gudé'e le'e lu da ba xa'. Caní gaca chee lawe' da btúbele xel-la' gunní'a chee gápale na gate ba dxéxrule. 4 Quebe gudízrujle ca naca chee na benne' ca' belexelape' lina chee, na' dxelawe' zria chee da quebe gudízrujle, na' Xránadxu, Bénnea' nape' duté xel-la' dxenná bea, ba benne' ca naca zria da dxelagu benne' ca' chee le'e. 5 Lu xezr la xu nigá ba guzile ba neza xel-la' gunní'a chee ne xúguté da zaca ca', ne guzrenle ca tu bezre dxánnele'e, na' ba dxezrín zra xelútie'-ba'. 6 Le'e ba bzria xile, ne ba bêtele benne' quebe bi da calela zaj nune', na' benne' ca' quebe guledábage' le'e.

*Dxal-la' gácadxu benne' zren lazre' ne guchálajledxu Dios*

7 Chee le na', benne' bícha'dau', le gaca zren lazre' ca zrindxa zra xelá' Xránadxu. Benne' dxaza dxa'ana dxal-la' cueze' duté xel-la' zren lazre' chee' ca zrindxa zra xelá' xiuj ba ne xiuj lina, chee xezi' lu ne'e lina

chawe' chee'. <sup>8</sup> Cá'anqueze le gaca zren lazre', ne quebe gute lázrele, lawe' da ba zua gagu zra xelá' Xránadxu. <sup>9</sup> Le'e, benne' bícha'dau', quebe gágule zria chee ljawézele, chee quebe guchi'a Dios chee da dxunle, lawe' da zua gágute zra xelá' Dios, Bénnea' dxuchi'e da dxaca. <sup>10</sup> Le'e, benne' bícha'dau', le gusá lázrele ca guca chee benne' ca' gulenné' waláz chee Dios, gulaque' zren lazre' lácala guledée' xel-la' zi'. <sup>11</sup> Dxennadxu guca da ba neza zren chee benne' ca' buluchaga lawe' xel-la' zi' ca'. Le'e ba benle ca benne' zren lazre' guca Job, ne ba nézele ca da chawe' ben Dios chee' ca gudé na'. Xránadxu naque' zri'i lazre', ne dxexache lazre' dxi'u.

<sup>12</sup> Da dxundxa na ba xen, benne' bícha'dau', quebe guzétajle xabáa, ne quebe guzétajle da zua xezr la xu nigá, ne quebe bi da xula guzétajle. Gate nnale: Awe', le nnaze: Awe', ne gate nnale: Cabí, le nnaze: Cabí, chee quebe guzríá xi' Dios le'e.

<sup>13</sup> Che núlale dxedele lu da zi' da xa', dxal-la' guchálajle Dios. Che nu benne' zue' xel-la' dxebé, dxal-la' gul-le' da güe lá'ané' Dios. <sup>14</sup> Che nu benne' quebe chawe' zue', dxal-la' nne' benne' gula ca' dxuluxúe' bi chee Cristo, chee xelenabe' lau Dios xexuné' benne' we' na', ne xelegú'e le' da za lu La Xránadxu. <sup>15</sup> Gate dxuluchálajle Dios dute xel-la' dxeleajlí lazre' chee', na' xexaca benne' we' na', na' Xránadxu xechise' le', ne che bi dul-la nune', na' gunite lau Dios chee bénnea'. <sup>16</sup> Chee le' na', le xrúalepe lau ljawézele tule xetule dul-la da nunle, ne le guchálajle Dios chee tule xetule, chee xexuné' le'e. Da dxenaba benne' xrlátaje du lazre' lau Dios wazrué'ene' na'. <sup>17</sup> Elías, bénnea' gunné' waláz chee Dios, guque' tu bénneache ca dxi'u, na' gate gunabe' lau Dios chee quebe gaca xiuj, na' quebe guca xiuj lu xezr la xu dute chun iza xugachaj. <sup>18</sup> Gudé na', gate gunabe' lau Dios da xula, na' belá' xiuj, na' xezr la xu na' benna na lina.

<sup>19</sup> Le'e, benne' bícha'dau', che nu benne' ládujla le'e dxecuase' lu da li, na' che núlale le'e xegu'ule le' lu xel-la' li, <sup>20</sup> dxal-la' nézele, núteteze benne' xucuase' tu benne' dul-la lu neza calela da zeajlene', guselé' benne'du xu'u benne' dul-la na' lu xel-la' gute, na' xunite lau Dios dul-la zan da nabaga bénnea'.

## DÍZRA'DAU' NEDXU DA BZUAJ SAN PEDRO

*Dizra' gusel-la Pedro chee benne' ca' gucá'a Jesús, ne zaj nase dínnaje'*

<sup>1</sup> Neda', Pedro, naca' benne' gubáz chee Jesucristo. Dxuzúaja' da nigá chee le'e nadxúajle lázrele, ne zrale xezre ca' zaj nababa Ponto, ne xezre ca' zaj nababa Galacia, ne xezre ca' zaj nababa Capadocia, ne xezre ca' zaj nababa Asia, ne xezre ca' zaj nababa Bitinia. <sup>2</sup> Xradxu Dios ba guqué'e le'e ca da gunné' gate nate. Ne chee Be' Lá'azxa ba gucá'a Dios le'e chee guzúale dizra' chee', ne chee chádxele lu dxen chee Jesucristo. Dxenaba' lau Dios gúnnal'e le'e da chawe', ne xel-la' dxebeza zri lazre'.

*Ca da dxebeza lázredxu*

<sup>3</sup> Dxue lá'anadxu Dios, Xra Xránadxu Jesucristo. Lawe' da dxexache lázrele'e dxi'u ba bene' cheedxu bexálajdxu lawe' da bebán Jesucristo ládujla benne' gate. Da nigá nuzaga na dxi'u chee cueza lázredxu, <sup>4</sup> ne gun na sile ca da nucueza Dios chee xabáa, da na' quebe cuia xi na, ne quebe xexúe na, ne quebe te chee na. <sup>5</sup> Lawe' da dxéajlele chee Dios, Le' guxré' le'e nen xel-la' waca chee' ca zrindxa zra na' sile du ca naca xel-la' weselá da nucueze' cheedxu, na' gulé'eng' na lu zra bzebe ni'.

<sup>6</sup> Chee le na' dxebéle'ele lácala dxun na ba xen tele xel-la' zi' tu chí'idau'. <sup>7</sup> Xel-la' dxeajlí lazre' chee gaca chee na ca dxaca chee oro da dxedé na lu xi' chee xegá'ana chawe' na. Caní naca chee xel-la' dxeajlí lazre' chee, gate ba gudé na lu xel-la' zi', na' xegá'ana na da zácadxa chee sile xel-la' szren, ne xel-la' ba lá'ana lu zra na' gate xelá' Jesucristo.

<sup>8</sup> Le'e nazri'ile Jesucristo lácala quebe ne lé'ele Le', na' lawe' da nuxrén lázrele Le' lácala quebe ne xelé'ele Le', dxebéle'ele. Ca naca xel-la' dxebé chee naca na da zrenté da quebe séquentu' xuzájla'antu' <sup>9</sup> lawe' da nalá bénne'du xu'ule lawe' da dxéajlele chee Dios. <sup>10</sup> Lu iza da ba guledé gate nate, benne' ca' gulenné' waláz chee Dios buluxúe xánnie', ne belexebéajni'e ca naca chee xel-la' weselá nigá, na' buluchálaje' ca naca xel-la' chawe' chee Dios da gunné' le'e. <sup>11</sup> Be' Lá'azxa, Bénnea' gusel-la Cristo, bzéajni'ing' benne' ca' buluchálaje' waláz chee Dios gate nate ca da saca Cristo, ne ca naca xel-la' szren da si'e te na', na' benne' ca' belexexílaje' nuzra benne' nigá, ne bátala gaca da dxenná Be' Lá'azxa, Bénnea' zúale le'. <sup>12</sup> Dios bzéajni'ing' benne' ca' ca naca chee da na' dxuluchálaje', gunné' quebe naca na chee léqueze', san naca na cheedxu dxi'u. Na'a, da nigá naca dizra' chawe' da ba bénquezele, da buluchalaj benne' ca' ne chee Be' Lá'azxa, Bénnea' ze'e xabáa. Da caní gulaca lazre' gubáz chee xabáa xeléajni'ing'.

*Dios dxenné' dxi'u chee gácadxu bi lá'azxa chee'*

<sup>13</sup> Chee le na', le guxúe xanne' ca da gunle. Tu dxál-lazqueze gunle da xrlátaje. Dute lázrdaule le guxrén lazre' xel-la' chawe' chee Dios, ne le cueza da gunné' le'e lu zra na' gate xelá' Jesucristo. <sup>14</sup> Lawe' da nácale bi chee Dios, le guzúa dizra' chee', ne québedxa gunle ca da guzá lázrele gate quebe ne gúnbeale Dios. <sup>15</sup> Na'a, le ta lu xel-la' lá'azxa chee' lawe' da naca Dios lá'azxa, Bénnea' gunné' le'e. <sup>16</sup> Cá'anqueze naxúajqueze na lu xiche lá'azxa chee', dxenné': "Le gaca lá'azxa, lawe' da naca' neda' lá'azxa."

17 Che dxennale le'e naca Dios Xrale, na' Le' dxuchi'e ca da dxelún bënneache, dxal-la' zrêbele Le' dxácate ne zúale lu xezr la xu nigá. 18 Dios ba bselé' le'e lu da benle gate na' guxíajlele ca da belún xra xrtaule, da calela, na' ba nézquezle quebe guca na ne chee tu da dxuzru na ca oro, ne plata. 19 Bselé' le'e ne chee dxen zácale'e chee Cristo, Bénnea' bzua cuine' lau Dios ca tu zríla'dau' du lazre', ne quebe nadxenba', be dxelutie' chee xunite lau Dios dul-la' zaj nabague'. 20 Cristo ba nácaqueze chee' gate nate saque' da nigá, na' ble'e lu zra caní chee gaca chawe' chee. 21 Ne chee Cristo dxéajlele chee Dios, Bénnea' bsebane' Le' ládujla benne' gate, ne bca'ane' Le' szren. Chee le na' dxéajlele chee Dios, ne dxuxrén lázrele Le'.

22 Na'a, ba bzúale dizra' chee xel-la' li ne chee Be' Lá'azxa, chee zri'ile duté lázrdaule benne' zaj nababe' dxi'u. Chee le na' dxal-la' zri'ile ljwézrele tule xetule duté lázrdaule, ne duté xel-la' wala chee. 23 Caní naca na lawe' da ba bexálajle, quegá chee bënneache, benne' dxelate. Nálajle ne chee dizra' chee Dios, da naca ban na, ne da zua na chadía chacanna. 24 Caní naca na lawe' da naxúaj na lu xiche lá'azxa, da dxenná na:

Xúgute bënneache zaj naque' ca xixre',  
na' xel-la' szren chee' naca na ca xiaj chee xíxre'du ca'.  
Xixre' na' dxebizre na, na' xiaj chee na dxexruj na.

25 Dizra' chee Xránadxu zúatequeze na chadía chacanna.  
Dizra' nigá ba benle le'e ne chee dizra' chawe' da dxuchálajntu'.

## 2

1 Chee le na', québedxa gunle da calela. Québedxa nu si xeje, ne quebe gunle láweze da xrlátaje. Québedxa gácale xa lazre', ne quebe bi nnele chee ljwézrele. 2 Cáteze dxeledane bidu dxe'ene ca' nizre', ca' le gane xrtizra Dios, da naca na du lazre', chee gun na se cháchale, ne lale lu na' dul-la. 3 Che da li ba guzú laule nézele naca Xránadxu chawe', na' gaca lázrele sídxale xrtizre'.

### *Cristo naque' ca xiaj xre ban*

4 Le biga lau Xránadxu, Bénnea' naque' ca xiaj xre ban. Bënneache buluzúe' Le' chalá'ala, san lau Dios naque' tu xiaj chawe' da zácale'e na. 5 Cá'anqueze le'e nácale ca xiaj ban ca'. Le güe Dios lataj guchínene' le'e chee gune' tu xudau' chee Be' Lá'azxa chee', gácale bxruze chee Dios chee guzúale lau Dios ca da dxunna Be' Lá'azxa le'e. Da nigá waca gunle ne chee Jesucristo, da xezaca ba lazre' Dios. 6 Chee le na' lu xiche lá'azxa dxenná Dios:

Neda' nuzúa' lu xezre lá'azxa tu benne'  
naque' ca tu xiaj blau chee xu'u,  
da naca na tu xiaj du lazre',  
ne da zácale'e na,  
na' nu benne' chéajle'e chee Le'  
quebe gaca xel-la' stu chee'.

7 Chee le'e dxéajlele chee', xiaj nigá zácale'e na, san chee benne' ca' quebe dxéajle'e naca na ca da dxenná xiche lá'azxa:  
Xiaj na' buluzúa benne' wen xu'u ca' chalá'ala,  
le na' naca na xiaj blau.

8 Cá'anqueze naca na ca dxenná xiche lá'azxa:  
Naque' tu xiaj da dxehegu bënneache,  
na' lawe' le na' dxeajlecházie'.

Caní naca na, dxeajlecházie' lawe' da quebe dxelezi'e dizra' chee Dios. Dios ba núnqueze' gaca caní chee benne' ca'.

*Benne' zaj naque' bi chee Dios*

<sup>9</sup> Le'e nácale benne' ba gucá'a Dios. Nácale bxuze lu zrin chee Benne' Wenná Bea, Jesús. Nácale tu xezre lá'azxa chee Dios, na' Le' naxá'awene' le'e chee guzenle bénneache ca naca xel-la' szren chee Dios. Le' gunné' le'e chee xedxúajle lu da chul-la, na' súale lu xel-la' naxaní' li lazre' chee'.  
<sup>10</sup> Gate nate quebe nu bexache lazre' le'e, san na'a Diósqueze' dxexache lazre' le'e.

*Zúale chee gunle zrin chee Dios*

<sup>11</sup> Bi bicha' nazri'ite' lazra', dxata' xueda' le'e, nácale ca benne' zaj zre'e zitu' naga zua lazre', chee quebe gunle ca da dxenná be'la' dxen chee'le, da dxedíl-lale' na bénne'du xu'ule. <sup>12</sup> Ca da dxunle, dxal-la' gaca na xrlátaje lau bénneache quebe zaj núnbe'e Dios. Caní gaca na, lálala na'a dxelenné' chee'le, dxelenné' nácale benne' ca' dxelune' da zrinnaj, na' welelé'equezne' da xrlátaje da dxunle, na' xelúe lá'anaqueze' Dios gate zrin zra xenaba Dios da ben tu tu bénneache.

<sup>13</sup> Lawe' da nácale bi chee Xránadxu, le guzúa dizra' ca da dxenná benne' xu'u lawe', bénnea' buluzúa benne' xezre ca'. Le guzúa dizra' chee benne' nape' xel-la' dxenná bea zren, <sup>14</sup> ne chee benne' dxelenná bea, benne' ca' nasel-la le' chee xuludé'e' xel-la' zi' benne' ca' dxelune' da zrinnaj, ne xelu'e' ba lá'ana benne' ca' dxelune' da xrlátaje. <sup>15</sup> Dios dxaca lazre' gunle le'e da xrlátaje chee guzúa zrile benne' ca' quebe zaj naxéajni'ine', gate dxelenné' cale'la chee dizra' chawe' da nazile.

<sup>16</sup> Le gaca ca benne' quebe zaj nada'u, san quebe guchínele da na' nazile, quebe gunle da cale'la. Le gaca ca benne' ca' dxenná be'e Dios. <sup>17</sup> Le gapa ba lá'ana xúgute' bénneache. Le zri'i bi bíchedxu ca'. Le zrebe Dios, ne le gapa ba lá'ana benne' dxenná be'e.

*Ca da guzaca zi' Cristo dxuzéajni'i na dxi'u*

<sup>18</sup> Le'e, bi wen zrin, le guzúa dizra' chee xránale duté xel-la' ba lá'ana, quegaze chee benne' zaj naque' zri'i lazre', ne dxelebé'e' gunne xue chee'le, san cá'anqueze gunle chee benne' snia ca' zaj naque' xránale.

<sup>19</sup> Naca na tu da xrlátaje che guchaga laudxu xel-la' zi' da dxulusaca bénneache dxi'u gate dxundxu da nezdxu naca na da dxezaca ba lazre' Dios. <sup>20</sup> Che dxunle tu da cale'la, na' dxulusaca zi'e' le'e, ¿bizra da ba neza gaca na chee'le? Na'a, che dxedele xel-la' zi' lawe' da dxunle da xrlátaje, ne dxuchaga laule na duté xel-la' zren lazre' chee'le, da nigá naca na xrlátaje lau Dios. <sup>21</sup> Dios gunné' le'e chee tele xel-la' zi' caní, lawe' da gudé Cristo xel-la' zi' waláz chee'le le'e, da dxuzéajni'i na le'e gunle ca da ben Le'.

<sup>22</sup> Le' quebe bene' dul-la, ne quebe nu guzú xé'e.

<sup>23</sup> Gate bulucháchalene' Le', quebe bi dizra' schanni' bechebe'.

Gate buludé'e' Le' xel-la' zi', Le' quebe bexéchaje'.

Bzua cuine' lu na' Dios, Bénnea' dxuchi'e' ca da naca na. <sup>24</sup> Biá'queze Cristo na' lu be'la' dxen chee' ca naca dul-la cheedxu gate gude'e' le'e xaga begúaj, chee gácadxu ca benne' gate, québedxa gundxu dul-la, na' gaca bandxu chee gundxu da xrlátaje.

Le' guzrí'e' we' chee xexácale le'e chawe'.

<sup>25</sup> Le'e gudale gate nate ca zrila' zaj naníteba'.

Na'a ba bela'le lau Cristo, Bénnea' dxuxúe' le'e ca dxun tu benne' dxuxúe' zríla'du ca', ne dxe'e gunne xue chee benne'du xú'ule.

### 3

*Ca dxal-la' xelún benne' zaj nuchaga na'*

<sup>1</sup> Cá'anqueze le'e, nu'ula nuchaga na'le, le guzúa dizra' chee benne' chee, na' che núlale zua benne' biu chee quebe dxéajle'e xrtizra Dios, xexúnbe'e naca na da li gate lé'eng' da xrlátaje da dxun zru'ule', ne quebe gun na ba xen bi guchalaj zru'ule', <sup>2</sup> lawe' da lé'ezeng' da xrlátaje dxune' lawe' da naque' xrlátaje, ne dxape' le' ba lá'ana. <sup>3</sup> Ca lechítaje chee tu nu'ula quebe dxal-la' gaca na cúzreze ca xel-la' dxupá'a xicha xíchaje', ne lechítaje da naca na oro, ne zra lanē' da zácale'e. <sup>4</sup> Lechítaje chee' dxal-la' gaca na lu xichaj lázrdawe', da naca na tu da xrtan da quebe te chee na. Da xrtan nigá naca na tu be' dxexruj lazre', ne zren lazre', da na' zácale'e na lau Dios. <sup>5</sup> Cá'anqueze guca lechítaje chee nu'ula ca' gulaque' bi chee Dios gate nate. Nu'ula ca' buluxrén lazre' Dios, ne buluzúe' dizra' chee benne' chee'. <sup>6</sup> Cá'anqueze guca Sara, bzue' dizra' chee Abraham, na' guzre' le': "Xran." Le'e wácaquezle ca guca Sara na' che gunle da xrlátaje, ne quebe bi guchebe lázrele.

<sup>7</sup> Cá'anqueze le'e, benne' biu, zúalele nu'ula, le gaca dxexruj lazre' nen zrú'ulale. Le gapa ba lá'ana zrú'ulale lawe' da quebe zaj naque' benne' wala ca le'e, ne cá'anqueze zaj nape' xel-la' nabán ca da nunna Dios le'e dute xel-la' chawe' chee'. Dخال-la' gunle caní chee quebe bi guzaga na le'e gate guchálajlele Dios.

*Benne' dxeledé' xel-la' zi' lawe' da dxelune' da chawe'*

<sup>8</sup> Na'a:

Le gaca tuze

Le xexache lazre' ljuwézrele, ne le zri'i ljuwézrele.

Le gaca benne' zri'i lazre', ne zren lazre'.

<sup>9</sup> Quebe gunle da calēla chee benne' dxune' chee da calēla, ne quebe gucháchalele benne' dxulucháchalēne' le'e. Le gun da chawe' chee benne' ca' lawe' da gunné' Dios le'e chee sile da chawe'. <sup>10</sup> Caní naca na lawe' da dxenná xiche lá'azxa:

Benne' dxaca lazre' gaca tu da ba neza chee',

ne sue' xel-la' dxebe'

dxal-la' guxúe' luzre' chee quebe nne' dizra' schanni',

ne guxúe' dxu'e chee quebe nne' na da wen lazre'.

<sup>11</sup> Dخال-la' gusanē' ca da calēla bene',

ne québedxa gunē' na, chee gunē' da chawe'.

Dخال-la' cueche zriē' da ba xa',

ne gaque' benne' zren lazre'.

<sup>12</sup> Xránadxu dxuxúe' benne' chawe' ca',

ne dxenne' ca da dxelenaba benne' ca'.

Dxuzúe' chalá'ala benne' wen da zrinnaj ca'.

<sup>13</sup> ¿Núzraqueze benne' gunē' chee da zrinnaj che le'e cuele gunne xue gunle da chawe'? <sup>14</sup> Lácala tele xel-la' zi' lawe' da dxunle da chawe', gaca na da ba neza chee. Quebe nu zrēbele, ne quebe xrúsale. <sup>15</sup> Le gapa ba lá'ana Cristo ca Xránale lu xichaj lázrdaule. Le súateze ban lazre' xechēbele lau benne' ca' dxelenabe' le'e bizr chee na' dxuxrén lázrele le'. Le gun na lu xel-la' dxexruj lazre', ne le gapa ba lá'ana benne' ca'. <sup>16</sup> Le gun da



chawe' chee quebe bi sua da gagu na zria lu xichaj lászraule, na' benne' ca' dxelenné' schanni' chee da chawe' da dxunle lawe' da dxéajlele chee Cristo, xelapa stu'e ca dizra' da dxelenné'. <sup>17</sup> Zácadxa tele xel-la' zi' lawe' da dxunle da chawe' cáteze dxaca lazre Dios, ne quegá tele xel-la' zi' lawe' da dxunle da calela.

<sup>18</sup> Caní naca na lawe' da gudé Cristo tu lászaze lu xel-la' gute zi xa' ne chee dul-la da nabágadxu. Le' guque' benne' xrlátaje, na' gudé' xel-la' zi' waláz cheedxu dxi'u, benne' wen da zrinnaj, chee gaca xeché'e dxi'u lau Dios. Gute Cristo lu bel-la' dxen chee', san bebánqueze' lu be' nácaqueze'. <sup>19</sup> Cá'anqueze lu be' nácaqueze' guxíaje' lataj chul-la naga xeajchálajlene' be' zaj nácaqueze benne' ca' nuzaga xel-la' gute lu lataj na'. <sup>20</sup> Benne' caní quebe buluzúe' dizra' ca da bchalaj Noé gate nate, gate na' guleza Dios duté xel-la' zren lazre' chee' dxácaté na' ben Noé da zren na' da dxedá lawe' nísadau'. Lu da dxedá lawe' nísadau' gulelá xrúnuze benne' ne chee nisa xiuj da na' bzria xi na ca naca bénneache. <sup>21</sup> Nisa xiuj na' dxulé'e na ca naca nisa naga dxelexedxúa benne' nisa, na' lu le na' naladxu na'a. Nisa nigá quegá le na' quibe na dxi'u, san dxulé'e na dxaca lászredxu cháxdedxu lau Dios, na' ladxu lawe' da bebán Jesucristo ládujla benne' gate, <sup>22</sup> ne begüene' xabáa, ne zue' chalá'a xabéla chee Dios, na' dizra' chee Le' dxuluzúa gubáz chee xabáa, gubáz ca' zaj nape' xel-la' dxenná bea, ne gubáz blau ca'.

## 4

### *Dxal-la' gundxu zrin chee Dios guchínedxu ca da ba nunna Dios dxi'u*

<sup>1</sup> Chee le na', ca ben Cristo, gudé' xel-la' zi' lu belá' dxen chee', cá'anqueze le'e dxal-la' si lu nale tele xel-la' zi' lawe' da che tu benne' ba gudé' xel-la' zi' lu belá' dxen chee', ba bzua bénnea' chalá'ala da naca dul-la, <sup>2</sup> chee guné' ca da dxaca lazre' Dios dxácaté naca bané', ne quebe guné' ca da dxenná belá' dxen chee'. <sup>3</sup> Naze cáтите da ba benle gate nate da dxeledanne benne' quebe zaj núnbe'e Dios. Ca lu iza da ba guledé benle da sban ca', ne da zrinnaj ca' da guzá lászrele, ne guzúzele, ne benle laní sban ca'. Güé'ele'ele, ne bca'ana szrenle bedau' xiaj xaga ca' da na' dxecuide Dios. <sup>4</sup> Benne' ca' quebe zaj núnbe'e Dios dxelexebánene' lawe' da québedxa dxunle le' tuze ca naca da sban da dxelune', na' chee le na' dxelenné' schanni' chee. <sup>5</sup> Benne' ca', dxun na ba xen xululé'ene' ca da zaj nuné' lau Bénnea' naca chee' guchi'e chee benne' ban ca', ne chee benne' gate ca'. <sup>6</sup> Benne' ca' zaj nate belenne' ca naca dizra' chee Dios chee xelexaca bané' lu be' zaj nácaqueze' ca naca ban Dios, lácala lu xezr la xu nigá Dios bchi'e ca da belune' ca guchi'e chee xúgute bénneache.

<sup>7</sup> Ba za cheajsé chee xúgute da dxelé'edxu. Chee le na', le sua ban lazre', ne le guchálajlequeze Dios. <sup>8</sup> Da nácadxa blau, le zrí'ile'e ljwézrele. Che nazrí'idxu benne' bíchedxu ca', na' gunite laudxu da calela da belune' cheedxu. <sup>9</sup> Le guzúa lízrele ljwézrele tule xetule, ne quebe nnele chee ljwézrele. <sup>10</sup> Tu tule le'e dxal-la' gunle zrin chee ljwézrele ca da nunna Dios chee, ca benne' dxuluchínene' chawe' ca da chawe' da dxunezruj Dios chee'. <sup>11</sup> Che nu benne' dxuchálaje', dxal-la' guchálaje' da gunezruj Dios le'. Che nu benne' guné' zrin chee, dxal-la' guné' na guchínene' xel-la' waca chee' da nunezruj Dios le'. Ca naca xúgute da dxunle, dxal-la' gaca ba Dios lawe' da nácale bi chee Jesucristo, na' chee Le' gaca xel-la' szren, ne xel-la' dxenná bea chadía chacanna. ¡Ca'an gaca na!

*Wadedxu xel-la' zi' lawe' da nácadxu bi chee Cristo*

<sup>12</sup> Benne' bícha'dau' nazri'ite lazra', quebe xebánele ca naca xel-la' zi' zren da tele, quebe guéquele naca na tu da quebe dxal-la' gaca. <sup>13</sup> Le be lawe' da tele xel-la' zi' ca xel-la' zi' da gude Cristo chee cá'aqueze béle'ele gate lé'ele xel-la' szren chee Cristo gate zezé'ē. <sup>14</sup> Che dxulugazja' benne' le'e dizra' lawe' da nácale bi chee Cristo, ba neza zren naca na chee, lawe' da zúale Be' Lá'azxa chee Dios le'e, Bénnea' ze'ē xabáa. Dxelenné bénneache schanni' chee Le', san le'e dxápale Le' ba lá'ana. <sup>15</sup> Che núlale le'e dxedele xel-la' zi', quebe dxal-la' gaca na lawe' da bétele benne', u bi gulanle chee benne', u bi da zrinnaj benle, u lawe' da guchixre chee da naca chee benne' xula. <sup>16</sup> Che nu benne' dxedé' xel-la' zi' lawe' da naque' bi chee Cristo, quebe dxal-la' xedué'ene', san dxal-la' güe lá'ang' Dios lawe' da nazí le' bi chee Cristo. <sup>17</sup> Ba bzrin zra su lau Dios guchi'ē ca da zaj nun tu tu bi nácabé' chee Le'. Che Dios su lawe' guchi'ē ca da nundxu dxi'u, ¿ájala gaca chee benne' ca' quebe dxeluné' ca dxenná dizra' chawe' chee Dios? <sup>18</sup> Che benne' xrlátaje ca' cánnaze xelélé' ¿ájazraqueze gaca chee benne' wen da zrinnaj ca', ne chee benne' wen dul-la ca'? <sup>19</sup> Caní naca, benne' dxeledé' xel-la' zi' lawe' da dxeluné' da xrlátaje da dxaca lazre' Dios, dxal-la' xelúnqueze' da xrlátaje, ne xuluzú'é' bénne'du zaj xu'ē lu na' Dios, Bénnea' bene' le', lawe' da naca Le' li lazre'.

## 5

*Pedro dxuzéajni'ine' bi ca' chee Cristo*

<sup>1</sup> Dxuzéajni'ida' le'e, benne' gula dxuxúele tu tu cue' bi ca' chee Cristo lawe' da naca' neda' benne' gula ca le'e, ne dxexechéba' ca xel-la' zi' da gude Cristo, ne cá'aqueze lawe' da gúnnaqueze' neda', ne le'e, chee sidxu da xabáa chee' da gulé'ene' te chee zra caní. <sup>2</sup> Ca dxelún benne' dxuluxúe' zrila' ca', le guxúe bidu ca' chee Dios, bénne'du ca' nabágale. Le gun na duté lázrdaule ca dxaca lazre' Dios, quebe gun na ba xen nu benne' nna bé'ene' le'e, ne quebe gunle ba chee dumí. Le gun zrin du lázrele, <sup>3</sup> ne quebe gun cuínale ca xrané bénne'du ca' nabágale. Le gun ba xuzre gácale tu da gulé'e na ca dxal-la' xelún bénne'du ca'. <sup>4</sup> Caní gaca, gate xelá' Xránadxu, Benne' Blau dxuxúe' zrila' ca', sile tu lazruj da naca na chee xabáa, da quebe te chee na. <sup>5</sup> Cá'aqueze le'e, benne' cuide', le gun ca da dxelenná benne' gula ca'. Xúgutēle dxal-la' guzúale dizra' chee ljwézrele tule xetule lu xel-la' dxexruj lazre' chee lawe' da dxenná xiche lá'azxa:

Dios dxezré'ē benne' ca' dxulucá'ana szren cuine'.

Duté xel-la' chawe' chee' dxácalene' benne' dxexruj lazre' ca'.

<sup>6</sup> Le guzexruj lázrele lu xel-la' dxenná bea zren chee Dios, na' xechisa Le' le'e ca zrin zra chee na. <sup>7</sup> Le guzúa lu na' Dios xúgutē da dxele gunne xue, lawe' da dxe' Le' gunne xue da naca chee.

<sup>8</sup> Le gaca benne' li lazre', ne le sua ban lazre' lawe' da dxedá da xriwe', da na' dxezrá'a na le'e, ne naca na ca tu bezre xixre', dxebezre xa'aba', dxíljaba' nu guébeba'. <sup>9</sup> Le tíl-lalē da xriwe', ne le se chacha lu xel-la' dxeajlí lazre' chee, lawe' da nézquezele dxeledéqueze xúgutē bíchele zaj zré'ē lu xezr la xu nigá xel-la' zi' ca da dxedele le'e. <sup>10</sup> Gate bache gudele xel-la' zi' tu chi'i, Dios guné' le'e li lazre', ne guzúa chawé'ē le'e. Dios ná'queze dxunne' dxi'u xúgutē da chawe' chee', ne ba gunné' dxi'u chee gápadxu da naca chee xabáa chee' lawe' da nácadxu bi chee Jesucristo.

11 Gaca ba Le', ne chee' Le' gaca xel-la' dxenná bea chadía chacanna. ¡Ca'an gaca na!

*Pedro dxugape' diuzre bi bíchedxu ca'*

12 Silvano, benne' nigá dxéqueda' naque' tu bi bíchedxu li lazre', ba bzuaje' dizra' caní chee' le'e cáteze neda', Pedro, ba gucha' le' guzúaje'. Dxuzéajni'ida' le'e, ne dxapa' le'e ca naca da xrlátaje da ba guzile da dxululé'e na Dios nazri'ine' le'e. Le se chacha ca zaj naca da caní.

13 Bi chee' Cristo zaj zre'e Babilonia nigá, benne' ca' gucá'a Dios ca guqué'e le'e, dxulugape' le'e diuzre. Cá'anqueze Marcos, bi na' nácabé' ca bi cheéqueza' dxugápabe' le'e diuzre. 14 Le gugapa diuzre ljuwézrele tule xetule, ne le gunida' ljuwézrele lu xel-la' zri'i lazre'.

Dxenaba' lau Dios gunne' le'e xel-la' dxebeza zri lazre', le'e nácale bi ca' chee' Jesucristo. ¡Ca'an gaca na!

## DIZRA' GUDXUPE' DA BZUAJ SAN PEDRO

*Dizra' da gusel-la San Pedro chee bi ca' chee Jesús*

<sup>1</sup> Neda', Simón Pedro, naca' wen zrin chee Jesucristo, ne benne' gubáz chee'. Dxuzúaja' da nigá cheele le'e, ba nápale xel-la' dxeajlí lazre' da zácále'e, ne naca tuze ca da nápantu' netu'. Caní naca lawe' da naca li lazre' Dios cheedxu, ne Benne' Weselá cheedxu Jesucristo. <sup>2</sup> Dxenaba' lau Dios gúnnalé'e le'e da chawe' chee', ne xel-la' dxebeza zri lazre', lawe' da núnbeale Dios, ne Xránadxu Jesús.

*Ca dxal-la' gaca bi chee Cristo*

<sup>3</sup> Dios lu xel-la' waca chee' ba nunne' dxi'u xúgutę da nachínedxu chee gápadxu xel-la' nabán chee Le', ne chee gaca gudnxu zrin chee', lawe' da núnbeadxu Bénnea' gunné' dxi'u chee gápadxu da xabáa chee Le', ne xel-la' szren chee'. <sup>4</sup> Caní naca na, ba nunne' dxi'u ca da nachębe lazre', da zaj naca na szrénle'e, ne da zaj zácále'e na, chee ne chee da guchebe lazre' wazrué'ele le'e gácale ca nácaqueze Dios, ne chee lale lu da sban da dxaca lu xęzr la xu nigá ne chee da dzezá lazre' belá' dxen chee bénneache. <sup>5</sup> Chee le na' dxal-la' cue'le gunne xue gun xel-la' dxeajlí lazre' cheele gunle da xrlátaje, ne chee gun da xrlátaje da dxunle gácale benne' sina. <sup>6</sup> Xel-la' sina cheele dxal-la' gun na nna be'e cuínale, na' xel-la' dxenná be'e cuina cheele dxal-la' gun na gácale benne' zren lazre', na' xel-la' zren lazre' cheele dxal-la' gun na zri'ile Dios. <sup>7</sup> Xel-la' zri'i lazre' cheele nen Dios dxal-la' gun na zri'ile benne' bíchedxu ca', na' xel-la' zri'i lazre' cheele nen bíchele ca' dxal-la' gun na gácale zri'i lazre'.

<sup>8</sup> Che le'e dxunle da caní, ne dxelepe ban na, quebe xegá'ana cá'aze xel-la' nabán chee, ne quebe naca na níteze núnbeale Xránadxu Jesucristo. <sup>9</sup> Benne' quebe dxunę' da caní naque' ca benne' la chul-la, u ca benne' quebe dxenné'e ca da za za'. Ba gul-la lazre' guxádxie' ca naca chee dul-la ca' da bęne' gate nate. <sup>10</sup> Chee le na', benne' bícha'dau', le gun ba xuzre nézele Dios gunné' le'e, ne ba guqué'e le'e, na' che gunle da nigá, cabata' cheajcházele. <sup>11</sup> Caní gun Dios, gúnnalé'e le'e lataj chu'ule naga nna bea Xránadxu, ne weselá cheedxu Jesucristo chadía chacanna.

<sup>12</sup> Chee le na' tu dxusá'azqueza' lázrele da caní, lálcala ba nézele na, ne ba zę cháchale lu xel-la' li da ba nápale. <sup>13</sup> Dxácatę naca bana' dxéqueda' dxun na ba xen gusá'a lázrele chee da caní <sup>14</sup> lawe' da ba nezda' wátezea' ca ba gunná Xránadxu Jesucristo, guzre' neda'. <sup>15</sup> Na'a guna' ca da séqueda' chee gate te gatia' neda', cheajsá lázrquezele chee da caní.

*Benne' belelé'eng' xel-la' szren chee Cristo*

<sup>16</sup> Da bsédentu' le'e ca naca chee xel-la' szren chee Xránadxu Jesucristo, ne ca xelé'e xecha lasa quebe naca na ca da dxenná xichaj lázrdau bénneache. Netu' blé'equezentu' ca naca xel-la' szren chee Xránadxu. <sup>17</sup> Blé'entu' Le' gate Xradxu Dios be'e Le' xel-la' ba lá'ana, ne xel-la' szren, na' Dios gúzrequeze' Le' lu da xabáa chee': "Benne' nigá naque' Zri'ina' nazri'ite lazra', ne dzezaca ba lazra' nen Le'." <sup>18</sup> Nétu'queze bęnentu' chi'i na' da za na xabáa gate zúantu' nen Xránadxu lu xi'a lá'azxa na'. <sup>19</sup> Chee le na' dxuxrén lázredxantu' dizra' da buluzáj benne' ca' gulenné' waláz chee Dios. Da xrlátaje dxunle le'e lawe' da dxenle ca naca dizra' nigá.

Naca na ca tu xi' da dxusení na tu lataj naga naca chul-la ca zrin zra chani', na' Cristo, Bénnea' naque' ca belaj zila súalene' le'e chee gusení'e lu xichaj lázrdaule. <sup>20</sup> Le guxúe xanne' ca naca da nigá. Netú da naxúaj na lu xiche lá'azxa quebe nu benne' seque' xuzájle'e na lu xel-la' dxéajni'i cheeze'. <sup>21</sup> Benne' ca' buluchálaje' waláz chee Dios quebe buluchálaje' ca da gulaca lázrequeze le'. Gulaque' benne' chee Dios, na' gulenné' waláz chee' ca da bnezruj Be' Lá'azxa le'.

## 2

*Ca naca chee benne' ca' dxulusédené' da wen lazre'  
(Judas 4-13)*

<sup>1</sup> Cá'anqueze gulezrá' ládujla benne' Israel benne' wen lazre' ca', benne' belún cuine' ca benne' dxelenné' waláz chee Dios. Cá'anqueze welezrá' ládujla le'e benne' wen lazre', benne' xelún cuine' ca benne' dxulusédené' bènneache dizra' chee Dios. Benne' caní wuluzéajni'ine' bènneache bagácheze ca naca dizra' wen lazre' da guxrinnaj na, na' caní xeledábague' Xránadxu, Bénnea' bselé' dxi'u, na' lawe' da dxulusédené' da caní xelebía xi' zéqueze'. <sup>2</sup> Benne' zan chjácalene' ca da sban dxuluséde benne' ca', na' ne chee benne' caní xelenné' bènneache schanni' chee dizra' li chee xel-la' weselá. <sup>3</sup> Lawe' da dxelezá lazre' xelezí'e dumí, xelebéaje' le'e dumí ne chee da wen lazre' da dxuluzéajni'ine' le'e. Dios ba nucueze' da guzría xi na benne' caní, lawe' da ba guchugue' gate nate ca da gaca chee benne' ca'.

<sup>4</sup> Dios quebe bnite lawe' chee gubáz chee xabáa ca' belún dul-la. Bdeq' gubáz chee xabáa ca' lu lataj ba xa', ne bzre'e le' lu da chul-la, ne bcheaje' le' du xia naga zaj nadxéaje' ca zrin zra chugu Dios ca da gaca chee gubáz chee xabáa ca'. <sup>5</sup> Cá'anqueze Dios quebe bnite lawe' chee benne' ca' gulezrá' gate nate. Gusel-le' nisa xiuj da bzria xi na benne' ca' belune' da calëla. Bselé' Noé, bènnea' bchálaje' ca naca da xrlátaje da dxal-la' xelún bènneache. Bselé' gázreze benne'. <sup>6</sup> Cá'anqueze guchugu Dios chee xezre Sodoma, ne xezre Gomorra chee xelebía xi na. Bzézxié' dxúpaté xezre ca', na' belexegá'anatë na de. Caní dxuluzéajni'i na benne' ca' xelune' da calëla, benne' xelezré'e te na'. <sup>7</sup> Dios bselé' Lot lu xezre Sodoma na' lawe' da guque' tu benne' xrlátaje, ne bexíajele'ene' gate blé'ene' ca naca da sban da dxelún benne' ca' dxelune' da calëla. <sup>8</sup> Benne' xrlátaje nigá guzúe' ládujla benne' ca', na' tu zra tu zra guzúa ba xa' lázrdawe' ca dxenné'e, ne dxenne' ca da calëla da dxelún benne' ca'. <sup>9</sup> Nézqueze Xránadxu guselé' benne' zaj naca bi chee' che bi da dxusaca zi na le', na' guzráqueze' benne' ca' dxelune' da calëla, ca tu lizre xia, ca zrin zra chugue' chee' chjaque' lataj ba xa'.

<sup>10</sup> Dios xudé' xel-la' zi' zrendxa benne' ca' dxelune' cáteze da sban da dxelezá lazre', ne dxuluzúe' chalá'ala xel-la' dxenná bea chee Xránadxu. Benne' caní zaj naque' lazre' dxugu dxelune' da sban, ne dxulucá'ana szren cuine'. Quebe dxelezrebe' dxelenné' schanni' chee gubáz chee xabáa ca'. <sup>11</sup> Gubáz ca' zaj nápadxe' xel-la' dxenná bea, ne xel-la' szren ca benne' caní, quebe dxelenné' da calëla chee benne' ca' gate dxelawe' zria chee' lau Xránadxu.

<sup>12</sup> Benne' caní zaj naque' ca bea ca' quebe zaj naxéajni'iba', be dxelunba' ca da zaj nézezeba', ne zraba' chee xelél-le'-ba', ne xelutie'-ba'. Benne' caní dxelenné' schanni' chee da quebe dxeléajni'ine', na' xelátequeze' ca

dxelate bea ca', <sup>13</sup> ne xeledéé' xel-la' zi' ca xel-la' zi' buludéé' benne' xula. Dxeléque' zaj zré'e lu da ba neza gate dxelebene' ca da dxaca tu zra tu zra. Zaj naque' ca tu da sban da dxusi'i na le'e xel-la' stu' gate zaj zré'e nen le'e lu laní chee, dxácaté ne dxelezúe' lu xel-la' dxebé lu da calela da dxelune'.

<sup>14</sup> Dxelezá lazre' xúgute nu'ula dxelelé'ene', ne quebe dxelálene' dxelune' dul-la. Dxulusi'e neza xula benne' bíchedxu quebe zaj zé chache'. Dxulucúdequeze', ne zaj naque' benne' zaj xu'e de'. <sup>15</sup> Zaj nanítie' lawe' da gulecuase' lu neza li chee Dios. Dxelune' ca da ben Balaam, zri'ine Beor. Balaam nigá bene' ba chee dumí, ne gudé' dxune' da calela, <sup>16</sup> na' bea na', be dxua xua', gunneba' ca benne', ne gudí-laba' Balaam ca naca dul-la da dxune', na' guchúguba' da xala da dxun Balaam.

<sup>17</sup> Benne' caní zaj naque' ca tu beaj bizre, ne ca tu beuj da dxua be' bdu'nu'. Ba zaj naca chee benne' ca' xelexegá'ane' chadía chacanna lu da chul-la. <sup>18</sup> Dxelenné' dizra' da dxulucá'ana szren na le', ne da zaj naca na dácheze. Dxuluchínene' da sban ca', ne da dxezá lazre' be'la' dxen chee bénneache chee dxulusi'e chalá'ala benne' ca' za dxelexedxúajteque' ládujla benne' ca' dxelune' da calela. <sup>19</sup> Dxelechebe lazre' xulunézruje' benne' ca' tu xel-la' weselá, san léqueze benne' ca' zaj naque' wen zrin chee da sban. Tu tu bénneache naque' benne' nada'u chee da dxenná be'e na le'. <sup>20</sup> Benne' ba zaj núnbe'e Xránadxu, ne Weselá cheedxu Jesucristo, ne ba gulelé' lu da sban chee xezr la xu nigá, na' te na' che xelexexu'e xecha lasa lu da sban na', ne xelu'e lataj xenná be'e na le', na' gácadxa da ba xa' chee benne' ca' ca da guca chee' gate nate. <sup>21</sup> Cháwe'dxela gaca na chee benne' caní la quebe zaj núnbe'e Cristo, quegala gate ba belúnbe'e Le', na' xelexecuase' ca naca xel-la' dxixruj bea lá'azxa da guzre Dios le' xelune'. <sup>22</sup> Ca da guca chee benne' caní dxulé'e na naca da li dizra' nigá da dxenná na:

Becu' dxexáguba' ca da ba bexébeba',

na' cuche za bexíbeba' bexú'uba' xecha lasa lu guzra' cheeba'.

### 3

#### *Ca naca chee zra xelá' Xránadxu*

<sup>1</sup> Benne' bícha'dau' nazri'ite lazra', da nigá naca na dizra' gudxupe' da dxuzúaja' chee. Lu dxúpaté xiche caní guca lazra' guzéajni'ida' le'e chee gulaba lázrele chee da caní. <sup>2</sup> Le gusá lazre' ca da gulenná benne' lá'azxa ca', benne' buluchálaje' waláz chee Dios, ne ca naca da gudixruj be'e Xránadxu, Benne' Weselá cheedxu, da na' buluséde benne' gubáz chee' ca' le'e.

<sup>3</sup> Dxunna ba xen gúnbeale, lu zra da za zá'aca welelá' benne' xelún le' chee da zaj naca na da lá'azxa, ne xelune' cáteze da dxelezá lazre', <sup>4</sup> ne xuluchebe' bénneache: ¿Bizra guca chee da guchebe lazre' Cristo, gunné': Welá'a? Xra xrtáudxu ca' ba gulatié', na' túzqueze ca guca, gaca na gate guzrete xezr la xu. <sup>5</sup> Benne' caní quebe dxeleque be'ene' gulezúa xabáa, ne xezr la xu gate nate, Dios gunné' bedxúaj na lu nisa, na' guzúa chacha na lu nisa, <sup>6</sup> na' xezr la xu da zua gate nate guzría xi na ne chee nisa xiuj, <sup>7</sup> na' xabáa, ne xezr la xu da zaj zua na na'a, ba naca chee na xelexe na ca ba núnqueze Dios chee na. Xi' na' guzezxe na da caní lu zra guchi'a Dios, gate xelebía xi' benne' ca' dxelune' da calela.

<sup>8</sup> Benne' bícha'dau' nazri'ite lazra', quebe gal-la lázrele da nigá: Lau Xránadxu tu zraze naca na ca chi gaxúa iza, na' chi gaxúa iza zaj naca na

ca tu zraze. <sup>9</sup> Quebe dxezré Xránadxu gunę' da nachebe lazre' ca dxeleque bėnneache. Naque' zren lazre' nen dxi'u lawe' da quebe dxaca lazre' nu cuía xi'. Dxaca lazre' xelexexíaje lazre' xúgute bėnneache.

<sup>10</sup> Zra xelá' Xránadxu zrin na gate quebe nu dxeque ca', ca za' tu gubán chizrela. Lu zra na' cuía xi' xabáa da dxelédxu, na' gunle'ę na schaga, ne ca naca da dxelédxu zran xabáa xelebía xi' na lu xi', na' xęzr la xu nigá chezxe na tu zren nen da de lawe na.

<sup>11</sup> Che ba nézele xelebía xi' xúgute da caní, ¿ájala dxal-la' gunle? Dخال-la' gácale li lazre' ne guzúa cuínale lu na' Dios <sup>12</sup> dxácatę ne dxebézale zra na', ne dxal-la' gunle ca da séquele zrintę zra na'. Lu zra na' cuía xi' xabáa lu xi', na' da zaj zria zran xabáa xelexuna na lu xi' na'. <sup>13</sup> Dxi'u dxebézadxu tu xabáa cube, ne tu xęzr la xu cube da ba guchębe lazre' Dios naga gaca xlátaje xúgute.

<sup>14</sup> Cheę le na', benne' bícha'dau' nazri'ite lazra', dxácatę dxebézale da caní, le gun ca da séquele cheę quebe bi bágale, ne quebe bi nadxenle cheę dul-la lau Dios, ne suale lu xel-la' dxebeza zri lazre'. <sup>15</sup> Le gusá lázrele naca Xránadxu zren lazre' nen dxi'u cheę ladxu. Cá'unqueze Pablo, benne' bíchedxu nazri'ite lázredxu, bzuaje' cheęle, bchínene' ca naca xel-la' sina da bnezruj Dios le'. <sup>16</sup> Lu xúgute xiche da ba bzuaje', ba bchálajlene' le'e ca naca cheę da caní, lácala bal-la na nácale'ę na stębe chėjni'idxu na, na' benne' ca' quebe dxelėjni'ine' na, ne benne' ca' quebe zaj zua chache' dxuluchuque' na, ca dxuluchuque' xezícala xrtizra Dios, na' cheę le na' Dios guzría xi'e benne' ca'.

<sup>17</sup> Cheę le na', benne' bícha'dau' nazri'ite lazra', che le'e ba nézele da nigá nédxula, le guxúe cuínale cheę da wen lazre' cheę benne' ca' dxelune' da calela cheę quebe xeleché le'e chalá'ala, ne quebe nite xel-la' li lazre' cheęle lau Dios. <sup>18</sup> Le gúnbea xanne' Xránadxu, Benne' Weselá cheędxu, Jesucristo, ne le gula lu xel-la' zri'i lazre' cheę'. ¡Gaca ba Le' na'a, ne chadía chacanna! ¡Ca'an gaca na!

## DIZRA' NĒDXUDAU' DA BZUAJ SAN JUAN

*Xtizra Dios da dxunna na xel-la' nabán li lazre'*

<sup>1</sup> Dxuzúaja' cheeḷe da nigá ca naca chee Bénnea' zúaqueze' gate guzú lau zua xúgute da dxelé'edxu. Dxuzúaja' ca naca chee Bénnea' ba bémentu' chee', ne ca naca da ba blé'equezentu' bene', neda' ne kezícadxa benne' ca' bseḷe Jesús. Ca naca chee Benne' nigá guzúantu' dxennantu', ne btantu' Le' nen na'ntu'. Dxuchálajntu' ca naca chee Bénnea' naque' Dizra' da dxunna na xel-la' nabán li lazre'. <sup>2</sup> Bénnea' dxunne' xel-la' nabán zeajlí canna ba ble'e, na' netu' blé'entu' Le'. Dxixruj béantu' da naca chee', ne dxuzentu' le'e ca naca chee'. Léqueze' zúaleḅe' Xradxu Dios, na' ble'e naga zúadxu. <sup>3</sup> Da blé'entu', ne da bémentu' dxuzentu' le'e chee gácale tuze nen netu'. Da lítegaze, nácadxu tuze nen Xradxu Dios, ne nen Jesucristo, Zri'ine Dios. <sup>4</sup> Ca naca da caní dxuzúaja' cheeḷe chee gaca du lazre' xel-la' dxebe cheeḷe.

*Dios naque' lení' chee xichaj lázrdau bēnneache*

<sup>5</sup> Da nigá naca dizra' da bchálajle Jesús netu', ne da dxuzentu' le'e. Gunné': Dios naque' lení', ne quebe bi zúale Le' da naca chee da chul-la. <sup>6</sup> Che dxennadxu nácadxu tuze nen Le', na' che dxundxu da naca na chee da chul-la, dxun lázredxu ca naca da dxennadxu, na' ca naca da dxundxu quebe dxundxu da li. <sup>7</sup> Che dxundxu da li da naca chee xel-la' naxaní', ca naca Dios, Bénnea' naque' li lazre', ne zue' lu xel-la' naxaní', nadxa zúadxu tuze tudxu xetudxu, na' dxen chee Jesús, Zri'ine Dios, dxibe na dxi'u ca naca xúgute dul-la nabágadxu.

<sup>8</sup> Che dxennadxu quebe nabágadxu dul-la, dxezí xéqueze cuínadxu, na' da li quebe zúale na dxi'u. <sup>9</sup> Che xrúalepedxu ca naca dul-la da nabágadxu, Dios naque' li lazre', ne xlátaje, na' chee le na' Le' gunite lawe' cheedxu ca naca dul-la da nabágadxu, ne quibe' dxi'u ca naca xúgute da sban da ba bēndxu. <sup>10</sup> Che dxennadxu quebe nundxu dul-la, dxucá'anadxu Dios ca wen lazre', ne quebe ne sidxu du lázredxu ca naca dizra' chee'.

## 2

<sup>1</sup> Le'e, bi nazri'ite lazra', dxuzúaja' da nigá cheeḷe chee quebe gunle dul-la. Che nu benne' guné' dul-la, zua wenaba cheedxu lau Dios, Jesucristo, Benne' xlátaje. <sup>2</sup> Le' gutie' waláz cheedxu chee gudúe' da nabágadxu lau Dios ca naca dul-la cheedxu, ne quegaze da nabágadxu dxi'u, san gudúe' da zaj nabaga xúgute bēnneache.

<sup>3</sup> Che dxuzúadxu dizra' ca naca da bdxixruj be'e Dios, nezdxu ba núnbeadxu Le'. <sup>4</sup> Che nu dxenná: Neda' núnbe'a Le', ne che quebe dxuzúe' dizra' ca naca da bdxixruj be'e Dios, benne' nigá naque' wen lazre', ne quebe dxenné' da li. <sup>5</sup> Che nu benne' dxuzúe' dizra' ca naca da bdxixruj be'e Dios, benne' nigá nazri'ine' Dios du lazre'. Che dxundxu caní nezdxu ba zúadxu tuze nen Le'. <sup>6</sup> Bénnea' dxenné' naque' tuze nen Dios dxal-la' gaque' ca guca Jesús.

*Tu da cube da bdxixruj be'e Jesús*

<sup>7</sup> Le'e, bi nazri'ite lazra', dxuzúaja' cheeḷe ca naca da dxenná na dxal-la' zri'idxu le sa' ljwézredxu. Quebe naca na tu da cube da bdxixruj bea Dios.



Naca na da gula na' da ba guzile nédxudautę. Da gula da bdxixruj bea Dios naca na dizra' da ba bénequezle. <sup>8</sup> Naca na ca dxuzúaja' cheęle tu da cube da dxixruj bea Dios, da naca béaqueze na naca da li lawe' da ben Jesús ca naca na, ne lawe' da dxunle le'e ca naca na. Caní naca na lawe' da ba dxusení' xel-la' naxaní' li cheę xel-la' zri'i lazre' lu xichaj lázrdaudxu, da dxegúa na da naca na cheę da chul-la.

<sup>9</sup> Che nu benne' dxenné' dxunę' da naca na cheę xel-la' naxaní', ne che dxecuídenę' le sa' ljwezre', benne' nigá ne dxedé' lu da naca na cheę da chul-la. <sup>10</sup> Benne' nazri'ine' le sa' ljwezre' dxunę' da naca cheę xel-la' naxaní', ne quebe dxunę' da guzria xi na le sa' ljwezre'. <sup>11</sup> Bénnea' quebe chawe' dxelé'eng' le sa' ljwezre', lu da naca na cheę da chul-la zua bénnea', ne lu da na' dxedé', ne quebe nézenę' ga zéaję' lawe' da dxucá'ana da chul-la le' ca tu benne' la chul-la.

<sup>12</sup> Le'e, bi nazri'ite lazra', dxuzúaja' cheęle lawe' da ba bnite lau Dios cheęle ca naca dul-la cheęle, lawe' da gute Jesucristo waláz cheędxu. <sup>13</sup> Le'e, benne' nazri'ite lazra', dxuzúaja' cheęle lawe' da ba núnbeale Bénnea' zúaqueze' nédxudautę.

Le'e, benne' cuide', dxuzúaja' cheęle lawe' da ba bsanle da dxenná da xriwe'.

Le'e, bi nazri'ite lazra', dxuzúaja' cheęle lawe' da ba núnbeale Xradxu Dios.

<sup>14</sup> Le'e, xruze xrna', dxuzúaja' cheęle lawe' da ba núnbeale Bénnea' zúaqueze' nédxudautę.

Le'e, benne' cuide', dxuzúaja' cheęle lawe' da nácale benne' wal-la, ne dizra' cheę Dios nápale, ne bsanle da dxenná da xriwe'.

<sup>15</sup> Quebe sa lázrele da caleła ca' da zaj naca na cheę xęzr la xu nigá, ne quegá da zaj de lu xęzr la xu nigá. Che nu benne' dxezá lazre' da zaj de lu xęzr la xu nigá, quebe nazri'ine' Xradxu Dios. <sup>16</sup> Da caní zaj naca na cheę xęzr la xu nigá, da dxezá lázredxu da dxezaca ba lazre' bela' dxen cheędxu, ne da dxezaca ba lazre' xiaj laudxu, ne ca naca xel-la' dxucá'ana szren cuina cheę da nápadxu. Xúgutę da caní quebe zaj naca na da dxunna Dios, san zaj naca na cheę xęzr la xu nigá. <sup>17</sup> Ba za zra xuzre lazre' xęzr la xu nigá, ne ca naca da dxezá lázredxu da naca na cheę xęzr la xu nigá. Bénnea' dxunę' da dxaca lazre' Dios wazúatecaze'.

*Ca naca da li, ne da wen lazre'*

<sup>18</sup> Le'e, bi nazri'ite lazra', zra caní zaj naca na zra bzebe. Ba bénele gulé'e lawe' benne' tábague' Cristo. Neda' dxapa' le'e na'a, bache belelá' benne' zante benne' dxeledábague' Cristo. Cheę le na' nezdxu ba zúadxu zra bzebe. <sup>19</sup> Benne' caní belexedxúajqueze' ládujla dxi'u. Da líqueze quebe gulaque' tuze nen dxi'u. La gulaque' tuze nen dxi'u, na' belexegá'analequeze' dxi'u. Caní guca cheę nezdxu quebe zaj naca xúgutę' tuze nen dxi'u.

<sup>20</sup> Ca naca cheęle le'e, ba zúale Be' Lá'azxa le'e, Bénnea' gusel-la Xradxu Lá'azxa. Cheę le na' ba nézele xúgutę da caní. <sup>21</sup> Dxuzúaja' cheęle da nigá lawe' da ba nézele da li, ne quegá dxennia' quebe nézele da li. Ba nézquezele le'e quebe dxun lazre' Bénnea' naque' da li.

<sup>22</sup> ¿Nuzra' naca benne' wen lazre'? Naca bénnea' dxenné' Jesús quebe naque' Cristo, Benne' nasel-la Dios. Benne' wen lazre' nigá dxenné' Dios quebe naque' Xra Jesús, ne Jesús quebe naque' Zri'ine Dios. <sup>23</sup> Xúgutę benne' dxelenné' Jesús quebe naque' Zri'ine Dios, Dios quebe

zúaləne' benne' ca'. Bénnea' dxexechebe' Jesús naque' Zri'ine Dios, Dios zúalequeze' bénnea'.

<sup>24</sup> Chee le na', le cu'u lu xichaj lázrdaule dizra' da ba bénele nédxudaute. Che da ba bénele nédxudaute zua na lu xichaj lázrdaule, le'e súatequezele tuze nen Zri'ine Dios, ne nen Xradxu Dios. <sup>25</sup> Da nigá naca na da nachebe lazre' Dios, gunne' dxi'u xel-la' nabán zeajlí canna.

<sup>26</sup> Ba bzuaja' chee le da nigá ca naca chee benne' ca' dxelezí xe'e le'e. <sup>27</sup> Na'a zúale Be' Lá'azxa le'e, Bénnea' gusel-la Jesucristo chee le, na' Be' Lá'azxa nigá zue' xichaj lázrdaule. Chee le na' quebe nachínele nu gusede le'e lawe' da dxusede Be' Lá'azxa le'e ca naca xúgute da caní, na' da dxusedene' le'e naca na da li, ne quebe naca na da wen lazre'. Chee le na', le súatequeze tuze nen Cristo ca naca da ba bsede Be' Lá'azxa le'e.

### *Ca naca chee benne' zaj naque' zri'ine Dios*

<sup>28</sup> Na'a, bi nazri'ite lazra', le súatequeze tuze nen Cristo, chee súadxu li lazre' gate xelá' Le', ne quebe xedué'edxu lau Le' gate xelé'e. <sup>29</sup> Ba nézele naca xlátaje Dios. Chee le na' dxal-la' nézele xúgute benne' ca' dxelúnqueze' da naca na xlátaje zaj naque' zri'ine Dios.

## 3

<sup>1</sup> Le nna' xque ca nazri'ile'e Dios dxi'u lawe' da nazí ladxu bi chee Dios, ne caní nácadxu. Chee le na' quebe zaj neze bénneache lu xezr la xu nigá da nácadxu lawe' da quebe belúnbe'e Jesús. <sup>2</sup> Le'e, bi nazri'ite lazra', na'a nácadxu bi chee Dios. Quebe ne gulé'e lawe' da gácadxu. Nezdxu gate xelá' Le', gácadxu ca naca Le' lawe' da lé'edxu Le' ca nácaqueze Le'. <sup>3</sup> Nu benne' dxebeza lazre' gaque' ca naca Jesús dxue lazre' gaque' du lazre' ca naca Jesús, naque' du lazre'.

<sup>4</sup> Nu benne' dxune' dul-la quebe dxuzúe' dizra' ca naca da bdxixruj be'e Dios lawe' da naca dul-la da dxedábaga da bdxixruj be'e Dios. <sup>5</sup> Ba nézele bla' Jesucristo chee gudúe' dul-la nabágadxu, ne Le' quebe bi dul-la bene'. <sup>6</sup> Xúgute benne' zaj zúatequeze' tuze nen Jesús quebe dxelune' dul-la, na' xúgute benne' dxelune' dul-la quebe ne xeले'ene' Cristo, ne quebe ne xelúnbe'e Le'. <sup>7</sup> Le'e, zri'ina'dau', quebe güele lataj nu si xe le'e. Bénnea' dxune' da xlátaje, xlátaje naque', ca naca Dios, naque' xlátaje. <sup>8</sup> Benne' dxune' dul-la naque' chee da xriwe' lawe' da dxun da xriwe' dul-la nédxudaute. Chee le na' bla' Zri'ine Dios, chee bzria xi'e xúgute da nun da xriwe' lu xezr la xu nigá.

<sup>9</sup> Xúgute benne' zaj naca bi chee Dios quebe dxelune' dul-la lawe' da zúaletequeze Be' chee Dios benne' ca'. Chee le na' québedxa gaca xelezúe' xelune' dul-la lawe' da zaj naque' bi chee Dios. <sup>10</sup> Naca bea nu naca bi chee Dios ne nu naca bi chee da xriwe'. Bénnea' quebe dxune' da xrlátaje ne quebe nazri'ine' le sa' ljwezre' quebe naque' bi chee Dios.

### *Dxal-la' zri'idxu tu xetudxu*

<sup>11</sup> Da nigá naca na dizra' da ba bénequezele nédxudaute, da dxenná na: Dxal-la' zri'idxu tudxu xetudxu. <sup>12</sup> Quebe gundxu ca ben Caín, bi na' gúcabe' chee da xriwe', na' bétebe' bi bíchebe'. ¿Bizr chee na' bétebe' lebe'? Bétebe' lebe' lawe' da naca da zrinnaj da ben Caín, na' da ben bi bíchebe' naca na da xrlátaje.

<sup>13</sup> Le'e, benne' bícha'dau', quebe xebánele che bénneache lu xezr la xu nigá dxuluzúe' le'e chalá'ala. <sup>14</sup> NezdXu ba bdxúajdxu lu na' xel-la' gute,

ne ba guxú'udxu lu xel-la' nabán lawe' da nazri'idxu bíchedxu ca'. Bénnea' quebe nazri'ine' bíchedxu ca' zúaqueze' lu xel-la' gute. <sup>15</sup> Bénnea' dxuzúe' chalá'ala bíchedxu ca' naque' ca tu benne' dxute benne', na' ba nézquezle le'e nu benne' dxute benne' quebe nape' xel-la' nabán zeajlí canna. <sup>16</sup> Ba nezdXu da naca xel-la' zri'i lazre' lawe' da bzanne Jesucristo xel-la' nabán chee', na' gutie' waláz cheedxu. Cá'anqueze dxi'u dxal-la' guzúadxu xel-la' nabán cheedxu chee' gácaledxu bíchedxu ca'. <sup>17</sup> Che tu benne' nape' xel-la' gunní'a da naca na chee' xezr la xu nigá, ne che dxelé'eng' le sa' ljwezre' dxexázejeng', na' che quebe xexache lazre' le', benne' nigá quebe nazri'ine' Dios. <sup>18</sup> Le'e, zrí'ina'dau', dxal-la' zri'idxu tudxu xetudxu, quegá nen dízra'ze, ne quegá nen da nnézedxu. Dخال-la' gúntequezdXu na, na' gaca bea na da li nazri'idxu bíchedxu ca'.

#### *Zua zri lárdaudxu lau Dios*

<sup>19</sup> Che gundxu caní ba nezdXu nácadxu chee' da li, na' sua zri lárdaudxu lau Dios, <sup>20</sup> gate zua tu da dxagu na zria lu lárdaudxu, lawe' da nezdXu naca Dios zrendxa ca lárdaudxu. Le' nézquezne' ca naca da dxundxu. <sup>21</sup> Ca'an naca, bi nazri'ite' lazra', che quebe zua tu da dxagu na zria lu lárdaudxu, waca sua zrize lárdaudxu lau Dios, <sup>22</sup> na' Le' gunne' dxi'u xúgute' da nábadxu lawe'. Ca'an gaca lawe' da dxuzúadxu dízra' da bdxixruj be'e Dios, ne dxundxu da dxezaca ba lazre' Le'. <sup>23</sup> Da bdxixruj be'eng' dxi'u naca na chéajledxu chee' Jesucristo, Zri'ine Dios, ne zri'idxu tudxu xetudxu ca bdxixruj be'e Le'. <sup>24</sup> Bénnea' dxuzúe' dízra' da bdxixruj be'e Le' zúalequeze' Dios, na' Dios zúalequeze' bénnea'. Ba nezdXu Le' zúalequeze' dxi'u lawe' da bache benne' dxi'u Be' chee'.

## 4

#### *Naca bea Be' chee' Dios*

<sup>1</sup> Le'e, bi nazri'ite' lazra', quebe chéajle' chee' xúgute' benne' dxeleonné' zúale' Be' chee' Dios le'. Le nna' xque ca naca da dxulusédené' chee' nézele che zúale' Be' chee' Dios le'. Caní dxal-la' gunle lawe' da ba belelá' benne' zante, benne' wen lazre', dxeleonné' dxuluchálaje' waláz chee' Dios. <sup>2</sup> Caní gaca nézele che zúale' Be' chee' Dios tu benne'. Xúgute' benne' dxelexechebe' ba bla' Jesucristo, ne guque' bénneache, benne' caní zaj naque' chee' Dios. <sup>3</sup> Xúgute' benne' quebe dxelexechebe' ca guca Jesucristo quebe zaj naque' chee' Dios. Zaj naque' chee' bénnea' dxedábage' Jesucristo. Ba bénele gulé'e lawe' bénnea', na' na'a ba zue' lu xezr la xu nigá.

<sup>4</sup> Le'e, bi nazri'ite' lazra', nácale chee' Dios, ne bache bzúale' chalá'ala benne' ca' dxelezí xe'e lawe' da szrendxa naca Be' zúale' na le'e ca be' zua na lu xezr la xu nigá. <sup>5</sup> Benne' ca' zaj naque' chee' xezr la xu nigá. Chee' le' na' dxuluchálaje' chee' da naca na chee' xezr la xu nigá, na' benne' zaj zre'e xezr la xu nigá dxeleonné' da dxuluchalaj benne' ca'. <sup>6</sup> Dxi'u nácadxu chee' Dios. Benne' zaj núnbe'e Dios dxuluzé' nague' cheedxu. Benne' quebe zaj naque' chee' Dios quebe dxuluzé' nague' cheedxu. Chee' le' na' nezdXu nu benne' zúale' Be' chee' xel-la' li le', ne nu benne' zúale' be' chee' da dxezí xe na le'.

#### *Tu dxúnzqueze Dios da naca chee' xel-la' nazri'i lazre'*

<sup>7</sup> Le'e, bi nazri'ite' lazra', dxal-la' zri'idxu tudxu xetudxu lawe' da dxunna Dios dxi'u xel-la' nazri'i lazre' na'. Xúgute' benne' zaj naque' zri'i lazre' caní zaj naque' zri'ine Dios ne zaj núnbe'e Dios. <sup>8</sup> Bénnea' quebe

naque' zri'i lazre' caní quebe núnbe'e Dios lawe' da tu dxúnzqueze Dios da naca chee xel-la nazrí'i lázre'. <sup>9</sup> Naca béaqueze Dios nazrí'ile'ene' dxi'u lawe' da gusel-le' Zrí'ine' tu licha' lu xezr la xu nigá chee zrué'edxu xel-la' nabán da naca na chee Zrí'ine' na'. <sup>10</sup> Xel-la' zri'i lazre' li naca na caní: Quegá dxi'u na' bzri'idxu Dios. Le' bzri'ine' dxi'u, ne gusel-le' Zrí'ine' chee guque' da gudúa na da nabágadxu lau Dios lawe' da nabágadxu dul-la.

<sup>11</sup> Le'e, bi nazrí'ite' lazra', che Dios bzri'ine' dxi'u caní, dxi'u dxal-la' zri'idxu tudxu xetudxu. <sup>12</sup> Quebe nu ne le'e Dios, san che zri'idxu tudxu xetudxu, Dios zúaqueze' lu xichaj lázrdaudxu, na' xel-la' zri'i lazre' chee' dxun na li lazre' xel-la' zri'i lazre' cheedxu. <sup>13</sup> NezdXu nácadxu tuze nen Dios, na' Dios naque' tuze nen dxi'u lawe' da bzué' Be' chee' lu lázrdaudxu. <sup>14</sup> Ba blé'entu', ne dxuzentu' le'e ca naca da ben Xradxu Dios, gusel-le' Zrí'ine' chee' bedajselé' bénneache chee' xezr la xu nigá. <sup>15</sup> Bénnea' dxexechebe' naca Jesús Zrí'ine Dios, Dios zúalequeze' bénnea', na' le' zúalequeze' Dios.

<sup>16</sup> Ba núnbeadxu ca nazrí'i Dios dxi'u, ne ba guxéajledxu nazri'ine' dxi'u. Tu dxúnzqueze Dios da naca chee xel-la nazrí'i lazre', na' bénnea' naque' zri'i lazre' caní zúalequeze' Dios, na' Dios zúalequeze' le'. <sup>17</sup> Caní dxaca li xel-la' zri'i lazre' cheedxu, chee' sua zrize lázrdaudxu lu zra guzrí'a xi' Dios bénneache, benne' ca' dxelune' da calëla, lawe' da nácadxu lu xezr la xu nigá ca nácaqueze Jesucristo. <sup>18</sup> Bénnea' naque' zri'i lazre' caní quebe dxezrebe' da gaca na lu zra na'. Xel-la' zri'i lazre' li dxebéaj na chalá'ala xel-la' dxezrebe na'. Nu benne' dxezrebe' dxebeze' bi da saque', na' bénnea' dxezrebe' quebe dxaca li xel-la' zri'i lazre' chee'.

<sup>19</sup> Dxi'u nazri'idxu Dios lawe' da bzri'i Dios dxi'u nédxudaute. <sup>20</sup> Che nu benne' dxenné': Nazri'ida' Dios, ne che benne' nigá dxuzúe' chalá'ala le sa' ljweze', dxun lazre'. Che quebe nazri'ine' le sa' ljweze', bi dxelé'etene', çajazra gune', zrí'ine' Dios, ne quebe dxelé'ene' Le'? <sup>21</sup> Dios ba bdxixruj be'ene' dxi'u caní, gunné': Bénnea' nazri'ine' Dios, zrí'iquezne' le sa' ljweze'.

## 5

### *Ca bdxúajdxu chawe' lu xezr la xu nigá*

<sup>1</sup> Xúgute benne' dxeléajle'e Jesús naque' Cristo, Benne' nase-la Dios, benne' caní zaj naque' bi chee Dios, na' che zaj nazri'ine' Xradxu Dios, dxal-la' xelezrí'iquezne' xúgute benne' zaj naque' bi chee Dios. <sup>2</sup> NezdXu nazri'idxu benne' zaj naque' bi chee Dios chete nazri'idxu Dios, ne dxundxu ca naca da dxi'e dxi'u. <sup>3</sup> Che da li nazri'idxu Dios, dxundxu da dxi'e dxi'u. Da dxi'e dxi'u quebe naca na stebe. <sup>4</sup> Xúgute benne' zaj naque' bi chee Dios dxedxúaje' chawe' lau da calëla da dxaca na lu xezr la xu nigá. Dxedxúajdxu chawe' lau da calëla da dxaca na lu xezr la xu nigá lawe' da dxéajledxu da naca na chee Jesucristo. <sup>5</sup> Benne' dxedxúaje' chawe' lau da calëla da dxaca na lu xezr la xu nigá naque' bénnea' dxéajle'e naca Jesús Zrí'ine Dios.

### *Da dxenná Dios ca naca chee Zrí'ine'*

<sup>6</sup> Guca bea Jesús naque' Cristo gate gudxúe' nisa, ne gate gulalaj dxen chee'. Quegá gudxúaze' nisa san cá'aqueze gulalaj dxen chee'. Be' chee Dios gudxixruj lie' da nigá, na' Le' dxuchálaje' da li. <sup>7</sup> Chunne' dxelixruj lie' chee da nigá xabáa, Xradxu Dios, ne Zrí'ine', ne Be' Lá'azxa, na' chunne' caní zaj naque' tuze. <sup>8</sup> Cá'aqueze chunna da dxelixruj li na chee da nigá

lu xęzr la xu nigá, Be' Lá'azxa, ne da guca gate gudxúa Jesús nisa, ne da guca gate gulalaj dxen cheę', na' da chunna caní, túzqueze da dxelixruj li na. <sup>9</sup> Dxéajlędxu da dxelixruj li bęnneache, san da nadxixruj li Dios zácadxa na, na' Le' nadxixruj lię' naca Jesús Zri'inequeze'. <sup>10</sup> Bęnnea' dxéajlęę naca Jesús Zri'ine Dios ba guzi'ę xichaj lázrdawę' da ba gudxixruj li Dios, san bęnnea' quebe dxéajlęę cheę Dios dxucá'ane' Dios ca tu benne' węn lazre', lawe' da quebe guxéajlęę cheę da ba gudxixruj li Dios ca naca cheę Zri'ine'. <sup>11</sup> Da nigá naca na da nadxixruj li Dios, dxennę' ba bęnne' dxi'u xel-la' nabán zeajlí canna, na' xel-la' nabán nigá za na lu na' Zri'ine', Jesucristo. <sup>12</sup> Bęnnea' zua Zri'ine Dios na' lu xichaj lázrdawę' zúalę xel-la nabán nigá le', san bęnnea' quebe zua Zri'ine' lu xichaj lázrdawę' quebe zúalę xel-la' nabán nigá le'.

*Ca gaca nezdxcu nápadxcu xel-la' nabán zeajlí canna*

<sup>13</sup> Da nigá dxuzúaja' cheęle dxéajlęle cheę Zri'ine Dios cheę nézele zúalę xel-la' nabán zeajlí canna le'e.

<sup>14</sup> Dxuxrén lázredxcu Dios lawe' da nezdxcu che bi nábadxcu lau Le' ca naca da dxaca lazre' Le', Léqueze' wenne' cheędxu. <sup>15</sup> Lawe' da nezdxcu Dios dxenne' cheędxu, cá'anqueze ba nezdxcu gunna Le' da ba gunábadxcu lau Le'.

<sup>16</sup> Che tu benne' dxelę'ene' dxun bíchedxcu dul-la da quebe nua na xel-la' gute, dxal-la' nabe' lau Dios ne cheę bíchedxcu na', na' Dios gunęzruje' xel-la' nabán cheę', che naca na tu dul-la da quebe nua na xel-la' gute. De dul-la da nua na xel-la' gute, na' quebe dxennía' ná bale lau Dios ne cheę bęnnea' dxunę' dul-la nigá. <sup>17</sup> Xúgute da calęla naca na dul-la, na' de dul-la da quebe nua na xel-la' gute.

<sup>18</sup> Nezdxcu nu benne' naca bi cheę Dios québedxa dxúnqueze' dul-la lawe' da dxuwía dxuxúe Zri'ine Dios le', na' da xriwe' quebe bi dxezeque gune na le'.

<sup>19</sup> Nezdxcu nácadxcu bi cheę Dios, na' xúgute benne' zaj naca cheę xęzr la xu nigá zaj xu'e lu na' da xriwe'.

<sup>20</sup> Nezdxcu ba bla' Zri'ine Dios, ne ba bzéajni'ine' dxi'u cheę gúnbeadxu Dios li. Nácadxcu tuze nen Bęnnea' naque' li lazre', Jesucristo, Zri'ine Dios. Benne' nigá naque' Dios li, ne Léqueze' naque' xel-la' nabán zeajlí canna da zúalę na dxi'u. <sup>21</sup> Le'e, zri'ina'dau', le guxúe xanne' cuínale cheę quebe gucá'ana szrenle bedau' xiaj xaga ca'.

## DIZRA'DAU' GUDXUPE' DA BZUAJ SAN JUAN

*Da naca li, ne xel-la' zri'i lazre'*

<sup>1</sup> Neda', benne' gula wen zrin chee Cristo, dxuzúaja' da nigá chiu' lue', nu'ula zana', ba gucá'a Dios lue'. Dxuzúaja' chee zri'inu' ca'. Da li nazrí'ida' le'e, ne quegá tuze neda', san cá'anqueze benne' ca' zaj núnbe'e da li zaj nazrí'iquezne' le'e. <sup>2</sup> Nazrí'ida' le'e lawe' da ba núnbeadxu da li, da súatequeze na xichaj lázrdaudxu. <sup>3</sup> Dxenaba' lau Xradxu Dios, ne lau Xránadxu Jesucristo, Zri'ine Dios, xezá' lazre' chee da xrlátaje, ne xache lazre' le'e, ne gunne' le'e xel-la' dxebeza zri lazre', chee gúnbeale da li, ne chee gácale zri'i lazre'.

<sup>4</sup> Dxebéle'eda' lawe' da ba benda' zri'inu' ca' dxelunbe' ca naca da li, ca naca da bdxixruj be'e Xradxu Dios. <sup>5</sup> Na'a, nu'ula zána'dau', dxata' xúeda' lue' zri'idxu tudxu xetudxu. Da nigá dxuzúaja' chiu' quebe naca na tu da cube da nadxixruj bea Dios, san naca na da ba bendxu nédxudautē. <sup>6</sup> Xel-la' zri'i lazre' li naca bea na che dxundxu ca da nadxixruj bea Dios, na' da nadxixruj be'e naca na da ba bénele nédxudautē, chee zri'idxu tudxu xetudxu.

*Benne' dxelezi xe'e*

<sup>7</sup> Ba belelá' benne' zante, benne' dxelezi xe'e. Benne' caní quebe dxelexechebe' guca Jesús be'la' dxen. Benne' caní zaj naque' benne' dxelezi xe'e, ne dxeledábage' Cristo. <sup>8</sup> Le guxúe xanne' cuínale chee quebe gunítele da dxal-la sile du naxá'.

<sup>9</sup> Nu benne' dxedé' nagá xula chee da nigá quebe dxeziléne' ca naca da bsede Cristo, ne quebe zúale Dios le'. Bénnea' dxeziléne' ca naca da bsede Cristo, da li Dios zúale' Le', na' cá'anquez zúale Cristo Le'. <sup>10</sup> Che nu benne' xide' naga zúale le'e, ne quebe dxusédene' le'e ca naca da bsede Cristo, quebe nnele bénnea' lízrele, ne quebe gápale le' ba lá'ana. <sup>11</sup> Nu benne' gape' bénnea' ba lá'ana, dxun benne' nigá tuze ca da cale'la da dxun bénnea'.

*Dizra' bzēbe*

<sup>12</sup> Da zante dxal-la' xapa' le'e, san quebe dxaca lazra' guzúaja' na lu xícheze. Dxebeza lazra' xida' xedajná'a le'e, na' guchálajlequeza' le'e, chee gaca béle'edxu.

<sup>13</sup> Bidu ca' chee bi bilu', nu'ula ba gucá'a Dios le', dxulugápabe' lue' diuzre. Ca'an gaca na.

## DIZRA'DAU' GUXUNNE' DA BZUAJ SAN JUAN

*San Juan dxenné' da chawe' chee benne' le' Gayo*

<sup>1</sup> Neda', benne' gula wen zrin chee Cristo, dxuzúaja' da nigá chiu' lue', Gayo, bi nazrí'ite lazra'. Da líqueze nazrí'ida' lue'.

<sup>2</sup> Lue', bi nazrí'ite lazra', dxenaba' lau Dios gaca da chawe' chiu', ne su' chawe', ca dxaca chee bène'du xu'u. <sup>3</sup> Gubéle'eda' gate belelá' tu chupa benne' bíchedxu, ne gulé'e neda' ca dxéajle'u chee Xránadxu, ne ca dxunu' ca naca da li. <sup>4</sup> Québequeze bi de da gundxa na neda' súale'a xel-la' dxebé, ca xel-la' dxebé da zua' gate dxenda' dxelún benne' zaj naque' ca zrí'inequeza' ca naca da li.

<sup>5</sup> Lue', bi nazrí'ite lazra', nacu' benne' li lazre' ca naca da dxunu' dxácalenu' bi bíchedxu ca', ne da naca blaudxa dxácalenu' bi bíchedxu za'aque' xezre xula. <sup>6</sup> Lau benne' zaj nazrague' chee Dios nigá dxuluchalaj bi bíchedxu caní ca nazri'inu' bi bíchedxu ca'. Da cháwedau' dxunu' gate dxugú'u benne' caní neza, dxácalenu' le' ca naca da dxezaca ba lazre' Dios. <sup>7</sup> Benne' caní zjaque' dxelune' zrin nigá lawe' da zaj nazri'ine' Cristo, ne quebe bi dxelezi'e da xelunna benne' quebe zaj núnbe'e Dios. <sup>8</sup> Chee le' na' dxal-la' gápadxu ba lá'ana benne' caní chee gúnledxu le' zrin chee da li.

*Da calela da dxun benne' le' Diótrefes*

<sup>9</sup> Ba bzuaaja' chee benne' zaj nazrague' chee Dios naga zu', na' bènea' le' Diótrefes quebe dxape' netu' ba lá'ana lawe' da dxaca lazre' gaque' blau lávela benne' ca'. <sup>10</sup> Chee le' na', che xida' naga zu', guzéajni'ida' benne' ca' ca naca da dxun bènea', dxezí tizre' netu', ne dxennéle'e cheentu'. Quegá da nigáze dxune', san cá'aqueze quebe dxezí' lu ne'e benne' bíchedxu zá'aque' ga na', ne quebe dxu'e lataj benne' ca' dxelaca lazre' xelezí' lu ne'e benne' caní, ne dxexebéaje' le' ládujla benne' ca' zaj nazrague' chee Dios.

<sup>11</sup> Lue', bi nazrí'ite lazra', quebe gunu' lue' ca naca da calela da dxelún benne' caní. Ben ca naca da xrlátaje. Bènea' dxune' da xrlátaje naque' chee Dios, san nu benne' dxune' da calela, quebe ne gúnbeaqueze' Dios.

*Da xrlátaje da dxun benne' le' Demetrio*

<sup>12</sup> Xúgutē benne' dxelenné' da chawe' ca naca da dxun Demetrio, na' da líqueze naca bea na ca dxune'. Cá'aqueze netu' dxixruj beantu' ca naca da dxune', na' lue' nézqueznu' dxuchálajntu' da li.

*Dizra' bzebe*

<sup>13</sup> Déle'e da dxal-la' guchálajlena' lue', san quebe dxaca lazra' guzúaja' na lu xícheze, <sup>14</sup> lawe' da dxebeza lazra' lé'etequezda' lue'. Nadxa guchálajdxu caníqueze.

<sup>15</sup> Dxenaba' lau Dios sua zrize lazrda'u. Bi bíchedxu zaj zra' nigá dxulugape' lue' diuzre. Bgapa lue' diuzre tu tu benne' bíchedxu zaj zre'e naga zu'. Ca'an gaca na.

## XTIZRA DIOS DA BZUAJ SAN JUDAS

*Dizra' da gusel-la San Judas chee bi ca' chee Dios*

<sup>1</sup> Neda', Judas, wen zrin chee Jesucristo, naca' benne' biche Jacobo, na' dxesel-la' dizra' nigá chee le'e, nácale benne' ca' ba gunné Xradxu Dios, ne ba guqué'e le'e chee gácale bi chee', ne dxuxúe' le'e lawe' da nácale tuze nen Jesucristo. <sup>2</sup> Dxenaba' lau Dios xache lázrele'e le'e, ne gúnnale'e chee le-la' dxebeza zri lazre', ne xel-la' zri'i lazre'.

*Ca naca chee benne' ca' dxulusédené' da wen lazre'  
(2 Pedro 2.1-17)*

<sup>3</sup> Benne' bícha'dau' nazri'ite lazra', ba guca lázreli'a guchálajlëna' le'e ca naca chee xel-la' weselá da ba nazile le'e, ne cá'aqueze neda', san na'a dxun na ba xen guchálajlëna' le'e, ne gata' xueda' le'e gapa típale da naca chee xel-la' dxeajlí lazre' da ba benna Dios chalásaze chee bi chee' ca'. <sup>4</sup> Caní naca lawe' da ba gulú'u benne' wen lazre' ca' ládujla dxi'u, benne' ca' ba gunná Dios gate nate dxal-la' xelebía xi'e. Zaj naque' benne' dxelune' da sban, na' lawe' da dxunite lau Dios chee benne' dul-la, dxeléquene' zaj nápaqueze' lataj xelune' cáteze da dxelaca lazre', ne dxuluzúe' chalá'ala Dios tu licha', Bénnea' dxenná bea, ne Xránadxu Jesucristo.

<sup>5</sup> Lácala ba nézquezle le'e da nigá, dxaca lazra' gusá'a lázrele ca ben Xradxu Dios gate bebéaje' benne' Israel ca' ládujla benne' Egipto, na' gudé na' bzria xi'e benne' Israel ca', benne' quebe guléajle'e chee'. <sup>6</sup> Cá'aqueze gubáz chee xabáa, gubáz ca' chee Dios, quebe belune' ca da guzre Dios le', san bulucá'ane' lataj chee'. Dios nuzague' le' lu da chul-la, ne nuchéaje' gubáz ca' chalásaze nen du xia, chee guzría xi'e le' lu zra bzebe ni'. <sup>7</sup> Cá'aqueze guca chee xezre Sodoma, ne xezre Gomorra ne chee xezre walízredu ca'. Ca belún gubáz chee xabáa ca', cá'aqueze belún bénneache chee xezre caní. Buluzúa cuine' lu da sban, ne belune' cáteze da gulaca lazre', ne buluzúe' chalá'ala ca da bdxixruj bea Dios chee xel-la' zúale nu'ula. Na'a, lawe' da bzria xi' Dios benne' ca', bdege' le' tu lu xi' da québedxa xexula na, na' da na' guca chee benne' caní dxuzéajni'i na dxi'u chee quebe gúnquezdxu ca'.

<sup>8</sup> Láqueze gulaca caní chee benne' ca', cá'aqueze dxelún benne' caní, zjácálene' xel-la' bchigala, ne dxuluca'ane' sban belá' dxen chee', ne dxuluzúe' chalá'ala xel-la' dxenná bea chee Xránadxu, ne dxelenné' schanni' chee gubáz chee xabáa, gubáz ca' chee Dios. <sup>9</sup> Léqueze Miguel, gubáz blau chee xabáa chee Dios gate gudíl-lalene' da xriwe', ne btil-le' dizra' nen le' na chee guca bexu'e bel-la' dxen chee Moisés, quebe bexárzjene' nnabe' da ba xa', san guzre' na: "Xránadxu Dios tíl-laqueze' lue'." <sup>10</sup> Na'a benne' caní dxelenné' schanni' chee da quebe zaj núnbe'e, na' da ba zaj núnbeaqueze', ca da zaj neze be xixre', be quebe zaj naxéajni'iba', da caní dxuluchínene' chee xuluzría xi' cuine'.

<sup>11</sup> Edxugua benne' caní lawe' da dxelune' ca da ben Caín, chee gulezí' lu ne'e dumí, buluzúe' chalá'ala da dxenná Dios ca ben Balaam, na' welxenite' ca guca chee Coré, bénnea' bzria xi' Dios lawe' da gudábage' xrtizra Dios. <sup>12</sup> Benne' caní, gate dxelágulene' le'e lu laní chee dxelune' cheajlechaze bénneache. Dxelé'aj dxelawe' nen le'e, ne quebe dxelape'



ba lá'ana Dios. Dxelún cuine' ca benne' dxuluxúe' zřila', san dxuluxúeze cuine'. Zaj naque' ca beuj ca' quebe zaj xuzru nisa, beuj ca' da dxua be'. Zaj naque' ca xaga ca' quebe dxelebía na da zixre chee na, ne zaj nabizre na du lue na, ne ba zaj zua na chee lepe na. <sup>13</sup> Zaj naque' ca xeajxruza chee nísadau' da dxedxú'u na bzřina' sgute, da dxulé'e na ca da sban da dxeluné'. Zaj naque' ca belaj ca' dxelecuasa na lu xrneze na, ne zaj nabía xi na chee cheajsúa na chadía chacanna lu da chul-la.

<sup>14</sup> Cá'anqueze Enoc, benne' chee gazre cue' zre sua Adán gunné' waláz chee Dios ca naca chee benne' caní, gunné': "Ble'eda' Xránadxu ze'e nen gaxúane gaxúane bi chee ca' <sup>15</sup> chee guchi'e ca da zaj nun xúgute bénneache. Gulezřía xi' xúgute benne' wen da sban ne chee da calęla da beluné' lu xel-la' calęla chee', nen benne' dul-la ca' ne chee xúgute dizra' schanni' da gulenné chee Dios." <sup>16</sup> Zaj naque' benne' wagu zřia, ne benne' wezí tizra', benne' dxelunze' cáteze dxelezaca ba lazre'. Dxuluchálaję dizra' da dxucá'ana szren na le', ne dxelennáze' da chawe' chee bénneache chee xelezí'e da zaj de chee benne' ca'.

*San Judas dxenné xuene' bi ca' chee Xránadxu*

<sup>17</sup> Le'e, benne' bícha'dau' nazři'ite lazra', le gusá lázrele ca zánete iza gulenná benne' gubáz chee Xránadxu Jesucristo, <sup>18</sup> gulé'e le'e: Lu zra bzebe welezřá' benne' xelún le' chee da ca' zaj naca lá'azxa, ne xeluné' cáteze zaj naca da sban da dxelezá lazre'. <sup>19</sup> Benne' caní dxeluné' chupa la'a bénneache. Zaj naque' benne' chee xęzř la xu nigá, ne quebe zúale Be' Lá'azxa chee Dios le'.

<sup>20</sup> Le'e, benne' nazři'ite lazra', le se chacha ca naca lu xel-la' dxeajlí lazre' lá'azxa da nápaie. Le guchálaję Dios, zúale xel-la' waca chee Be' Lá'azxa le'e. <sup>21</sup> Le cha' lu xel-la' zři'i lazre' chee Dios, ne le cueza zra gate gunna Xránadxu Jesucristo dxi'u xel-la' nabán da zeajlí canna lu xel-la' zři'i lazre' chee'.

<sup>22</sup> Le gácale benne' ca' dxelaca chupa lazre' ca naca chee Cristo. <sup>23</sup> Le gun xeelá benne' xula chee quebe chjaque' lu xi' chee lataj ba xa', ne le xexache lazre' xezícala bénneache. Le guxúe xanne' ca naca da sban da dxelún benne' ca' chee quebe ca'a le na le'e.

*San Judas dxue lá'ang' Dios*

<sup>24-25</sup> Dios tu licha', Benne' naque' sina, ne naque' Weselá cheedxu, wazéquene' guxúe' le'e chee quebe cuásale Le', ne chee guzúe' le'e lau Le' lu xel-la' szren chee', ne chee quebe dxenle da naca chee dul-la, ne chee súalequeze xel-la' dxebé le'e.

¡Gaca ba Le', ne gaca chee' xel-la' szren, ne xel-la' waca, ne xel-la' dxenná bea, ne chee Xránadxu Jesucristo, na'a zra, ne chadía chacanna!  
¡Ca'an gaca na!

## DIZRA' DA BLE'E JESUCRISTO JUAN

### *Da ble'e Jesucristo Juan*

<sup>1</sup> Da nigá naca tu da bnezruj Dios Jesucristo da gulé'ene' wen zrin chee' ca' ca naca da dxal-la' gácatē. Jesucristo gusel-le' gubáz chee xabáa chee', na' le' bzéajni'ine' neda', Juan, naca' wen zrin chee Jesús. <sup>2</sup> Neda' dxulé'eda' le'e da li ca naca xúgutē da ble'eda', ne dxexecheba' ca naca dizra' chee Dios, ne ca naca da gunná Jesucristo.

<sup>3</sup> Ba neza zrentē naca na chee benne' gulabe', ne cá'aqueze ba neza zrentē naca na chee benne' ca' dxuluzé nague' chee bēne' gulabe' dizra' nigá da bēna Dios, ne xelunē' ca naca da naxúaj nigá, lawe' da ba za gáguze zra gaca na.

### *Juan dxuzuaje' chee gazre cue' benne' dxeléajle'ē chee Jesús*

<sup>4</sup> Neda', Juan, dxuzúaja' chee gazre cue' benne' dxeléajle'ē chee Jesús, zaj zre'ē naga nababa Asia. Dxenaba' lau Dios gaca chawe' chee, ne gunne' le'e xel-la' dxebeza zri lazre'. Le' guzúaqueze' nédxudautē, ne zúaqueze' na'a, ne tu súaqueze' chadía chacanna. Gazre Be' ca' zaj zra' ca li naga dxe' Dios zaj naca Le' tuze, <sup>5</sup> ne cá'aqueze Jesucristo naque' Le' tuze ca naca da chawe' da dxun Dios chee. Jesucristo naque' benne' li lazre' dxexechebe' ca da zaj naca chee Dios, ne naque' benne' nedxu bebane' chalásaze ládujla benne' gate ca', ne nape' xel-la' dxenná bea lávela xúgutē wenná bea zaj zre'ē xezr la xu nigá. Cristo nazri'ine' dxi'u, ne ba gudibe' xichaj lázrdaudxu. Begüē' dul-la cheedxu gate blálaje' dxen cheéqueze' le'ē xaga begúaj. <sup>6</sup> Bēne' dxi'u ca benne' wenná bea ca', ne bxruze ca' chee gundxu zrin chee Dios chee', Bēne' naque' Xre'. ¡Gaca ba Le', ne gape' xel-la' dxenná bea chadía chacanna! ¡Ca'an gaca na!

<sup>7</sup> Le na' xque. Cristo ze'ē lu beuj bza. Xúgutē bēneache xeelé'ene' Le', ne cá'aqueze benne' ca' belunē' Le' we', na' ca naca bēneache zaj zra' lu xezr la xu xebezre xache'ē ca xeelé'ene' Le'. ¡Awe', ca'an gaca na!

<sup>8</sup> Le' dxenné': "Neda' zúaqueza' nédxudautē, ne zúaqueza' bzébedxa. Dxuna' su lau sua xúgutē ne guna' xexuzre na." Caní dxenná Xránadxu, nape' dutē xel-la' dxenná bea, naque' Bēne' guzúaqueze', ne zúaqueze', ne tu súaqueze'.

### *Juan dxelé'ene' tu da ble'e Dios le' da naca na da xabáa chee Cristo*

<sup>9</sup> Neda', Juan, naca' benne' bíchele le'e, ne naca' tuze nen le'e lu xel-la' zi', ne lu xel-la' dxenná bea, ne lu xel-la' dxuchaga lau da dxunna Jesucristo dxi'u. Ca tu benne' xu'ē lizre xia guzúa' lu xezr la xu Patmos da naxechaj nísadau', lawe' da bchálaja' dizra' chee Dios ne dxuna' ba nalí ca naca chee Jesucristo. <sup>10</sup> Guzúale' Be' Lá'azxa neda' lu zra chee Xránadxu, na' benda' cúzrula' chi'i tu benne' dxenné' zizraj ca chi'i luzu da dxulucuezre'. <sup>11</sup> Gunné':

—Neda' naca' nedxu, ne bzebe ca naca da dxezú lau, ne da dxexuzre na. Bzuaj tu lu xiche da dxelé'enu', na' gusel-la na chee gazre cue' bēneache dxeléajle'ē chia', zaj zre'ē naga nababa Asia, benne' ca' zaj zre'ē xezre Efeso, ne xezre Esmirna, ne xezre Pérgamo, ne xezre Tiatira, ne xezre Sardis, ne xezre Filadelfia, ne xezre Laodicea.

<sup>12</sup> Bexéchaja' chee le'eda' nu chi'i na' gunné neda', na' ca bexéchaja' na', ble'eda' gazre da zua na xi' da' zaj naca na oro. <sup>13</sup> Laduj da zaj zua na xi' ca' ble'eda' tu benne' naque' ca Bénnea' gulje' bèneache, nácue' zra lané' da dxezrinte lu ni'e dxe'ela, na' xu'u tu bazxu oro lachu'e. <sup>14</sup> Xicha xíchajé' zaj naca na chiche ca zrila' chiche, u ca bezxe', na' xiaj lawe' dxelácatite legala na ca xi'. <sup>15</sup> Ni'e dxelácatite na ca xia da gudete bea guxú'u na lu xi', na' chi'e naca na zizraj ca naca chi'i zane' xegu zri'a ca'. <sup>16</sup> Lu ne'e da zua xabela nuxre' da ca' zaj naca ca gazre belaj xabáa, na' dxu'e dxedxuaj da naca na ca tu xia da nalá dxupa la'ate. Dxu'a lawe' dxácatite na ca gubizra gate dxenná'le' na.

<sup>17</sup> Ca ble'eda' Le', xeajchazia' zran ni'e ca tu benne' gate. Na' Le' guxrúa ne'e xabela neda', na' gunné':

—Quebe zrebu'. Neda' zúaqueza' nédxudaute, ne zúaqueza' bzébedxa. <sup>18</sup> Naca bánqueza'. Gutia', na' na'a nabánqueza' chadía chacanna. Neda' nuxra' zren xia chee xel-la' gute, ne chee lataj ba xa'. <sup>19</sup> Bzuaj da ba blé'enu' ne da dxaca na'a, ne da gaca te nigá. <sup>20</sup> Caní naca da zéaje ca gazre belaj ca' blé'enu' nuxra' na'a xabela, ne ca naca chee gazre da zua na xi' da' zaj naca na oro. Gazre da zaj naca ca belaj ca' zéaje na gubáz ca' nasel-la' chee gazre cue' bèneache chia' ca', na' gazre da zua na xi' zéaje na gazre cue' bèneache chia' ca'.

## 2

*Dizra' gusel-la Cristo chee gazre cue' bèneache chee'*

*Dizra' gusel-le' chee bi chee' zaj zre'e xezre Efeso*

<sup>1</sup> Guzre Jesús neda':

—Bzuaj chee gubáz chia' zúalene' bi chia' zaj zre'e xezre Efeso. Bzuaj da nigá: Caní dxenná Jesús, Bénnea' nuxre' gazre belaj ne'e xabela, ne dxedé' laduj gazre da zua na xi' da zaj naca na oro. <sup>2</sup> Neda' nezda' xúgute da dxunle. Nezda' dxúnle'ele zrin ne nácale zren lazre', ne quebe dxuele lataj benne' wen da zrinnaj ca'. Neda' nezda' ba bxue xánnele benne' ca' dxelenné' zaj naque' gubáz chia' ne quebe zaj naque', na' ba ble'ele zaj naque' benne' wen lazre'. <sup>3</sup> Gúcale zren lazre', ne gudele xel-la' zi', na' bènle'ele zrin chia', ne quebe gute ni'a na'le. <sup>4</sup> Na'a zua tu da dxagu na zria chee, québedxa nazri'ile neda' ca bzri'ile neda' nédxute. <sup>5</sup> Chee le na', le gusá lazre' ca bzri'ile neda' nédxute, ne le xexíaje lazre', na' le gun ca da benle nédxute. Che quebe gunle caní xídaqueza' naga zúale, na' xecá'a xrlátajle lu da naca chia' chee québedxa gácale ca da zua na xi' chia'. Caní guna' che quebe xexíaje lázrele. <sup>6</sup> Zua tu da dxexecá'a na le'e, dxecuídele da dxelún benne' ca' zaj nazí le' nicolaíta ca', benne' ca' dxulucá'ana szrene' bedau' xiaj xaga ca', da na' dxecuídequeza' neda'. <sup>7</sup> Benne' zua nague' dxal-la' xenne' da nigá dxé Be' Lá'azxa bi chia' ca'. Benne' ca' xeledxúajé' xrlátaje lawe' da zrinnaj, neda' gunézruja' da xelawe' da dxebía xaga da dxunna na xel-la' nabán, ne zua na lu lataj xrlátaje chee Dios.

*Dizra' gusel-le' chee bi chee' zaj zre'e xezre Esmirna*

<sup>8</sup> Guzre Jesús neda':

—Bzuaj chee gubáz chia' zúalene' bi chia' zaj zre'e xezre Esmirna. Bzuaj da nigá: Caní dxenná Jesús, Bénnea' zúaqueze' nédxudaute, ne zúaqueze' bzébedxa, Bénnea' gutie', ne bebánqueze'. <sup>9</sup> Neda' nezda' xúgute da dxunu'. Nezda' gudele xel-la' zi', ne nácale benne' xache'. Da li nácale

benne' gunn'ia. Nezda' ca dxelenné schanni' cheeḷe benne' ca' dxelenné' zaj naque' judío, san zaj naque' tu cue' benne' dxulucá'ana szrene' da xriwe'. <sup>10</sup> Quebe zrébele ca naca xel-l a' zi' da tele, lawe' da guzrá' da xriwe' bál-lale le'e lizre xia chee gulé'e lau da nácale, na' tele xel-la' zi' lawe' chi zra. Le gaca li lazre' lácala xelutiē' le'e, na' neda' gunna' le'e xel-la' nabán ca tu da dxunna bea na bedxuajle chawe'. <sup>11</sup> Benne' zua nague' dxal-la' xenne' da nigá dxē Be' Lá'azxa bi chia' ca'. Benne' ca' xeledxuajē' chawe' lawe' da zrinnaj, quebe bi gune da zi' da xa' da zeajlí canna chee benne' ca'.

*Dizra' gusel-le' chee bi chee' zaj zre'e xezre Pérgamo*

<sup>12</sup> Guzre Jesús neda':

—Bzuaj chee gubáz chia' zúaleḅe' bi chia' zaj zre'e xezre Pérgamo. Bzuaj da nigá: Caní dxenná Jesús, Bénnea' nuxre' xia da nalá dxupa la'a. <sup>13</sup> Neda' nezda' xúgute da dxunle. Nezda' zúale naga dxenná bea da xriwe'. Quebe nusanle da naca chia'. Quebe bsanle dxexechébele chia', ne lu zra ca' gate belutiē' Antipas, benne' becheḅe' du lazre' da naca chia' ládujla le'e, naga zua da xriwe'. <sup>14</sup> Na'a, zua tu da dxagu na zria cheeḷe, dxuele lataj zaj zra' ládujla le'e benne' ca' ne zjácaleḅe' da bseḷe Balaam, bénnea' gulú'u xel-le' Balac, bennen' beḅe' belún benne' Israel ca' dul-la, na' gulawe' da buluzríē' lau bedau' xiaj xaga ca', ne belunē' da sban. <sup>15</sup> Cá'anqueze zaj zra' ládujla le'e bal-la benne' ne zjácaleḅe' da dxulusēde benne' zaj nazí le' nicolaíta, da na' dxecuídequeza' neda'. <sup>16</sup> Chee le' na' le xexíaje lázrele lawe' da che quebe xexíaje lázrele xida' naga zúale, na' tíl-lalēna' benne' ca' nen xia nalá da dxedxuaj na dxu'a. <sup>17</sup> Benne' zua nague' dxal-la' xenne' da nigá dxē Be' Lá'azxa bi chia' ca'. Benne' xedxuajē' chawe' lawe' da zrinnaj, neda' gunézruja' da gawe' da naca na xeta maná da nagache na xabáa, ne gunézruja' le' tu xiaj chiche, na' le'e xiaj na' naxúaj tu la cube chee bénnea', da quebe nu' neze, san tuze bénnea' si'e na.

*Dizra' gusel-le' chee bi chee' zaj zre'e xezre Tiatira*

<sup>18</sup> Guzre Jesús neda':

—Bzuaj chee gubáz chia' zúaleḅe' bi chia' zaj zre'e xezre Tiatira. Bzuaj da nigá: Caní dxenná Jesús, Bénnea' zaj zra xiaj lawe' da dxelácatite na ca xi', na' ni'e zaj naca na ca xia gache da nabá'alē'e na. <sup>19</sup> Neda' nezda' xúgute da dxunle. Nezda' ca nazri'ile neda', ne ca dxéajleḷe chia', ne ca dxunle zrin chia', ne ca nácale zren lazre', na' dxúndxale na'a da zrendxa ca da beḅle nédxute. <sup>20</sup> Na'a, zua tu da dxagu na zria cheeḷe, dxuele lataj nu'ula na' le' Jezabel, nu'ula na' dxenné' dxuchálaje' waláz chee Dios, na' dxezi xe'e benne' wen zrin chia' ca' ca naca da dxusédene' chee xelunē' da sban, ne xelawe' da dxuluzríē' lau bedau' xiaj xaga ca'. <sup>21</sup> Neda' ba be'a nu'ula na' lataj xexíaje lazre', na' quebe guca lazre'. Quebe dxusanē' ca naca da sban da dxunē'. <sup>22</sup> Na'a, che benne' ca' quebe xulusanē' ca da dxelunē' ca dxun nu'ula na', neda' cu'a le' xel-la' we' da quixruj na le', na' weledéle'e xel-la' zi' benne' ca' dxelunē' dul-la nen nu'ula na', <sup>23</sup> na' gútequeza' benne' ca' zaj de'e nu'ula na'. Caní gaca, xúgute cue' bi chia' ca' xeleque be'ene' neda' nezda' ca naca dutē da zua lu xichaj lázrdau bénneache, na' tu tule le'e gunna' le'e cáteze naca da beḅle. <sup>24</sup> Xezícadxale le'e zrale xezre Tiatira, quebe zéajleḷe da na' dxusēde nu'ula na', ne quebe ne sile da dxenné' naca na da nagache chee da xriwe', neda' dxapa' le'e, quebe bi xetú da gucha' le'e gunle. <sup>25</sup> Le gapa chi'i xel-la' dxixruj be'e da

ba gucha' le'e gunle ca zrindxa zra xelá'a neda'. <sup>26</sup> Benne' ca' xeledxúaje' chawe' lawe' da zrinnaj, ne xelunę' ca dxaca lazra' neda' ca zrindxa zra bzebe ni', neda' gunézruja' cheę benne' ca' xel-la' dxenná bea lawe' xęzre ca', <sup>27</sup> ca bęn Xra', bęnne' neda' xel-la' dxenná bea, na' xelenná be'ene' benne' xęzre ca' nen tu var xia, na' xuluzría xi'e xęzre ca' ca dxun tu benne' dxelę'e tu xesu' xu. <sup>28</sup> Cá'anqueze gu'a benne' ca' lataj xeledxúalęne' neda', naca' ca belaj zila. <sup>29</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

### 3

*Dizra' gusel-le' cheę bi cheę' ca' zaj zře'e xęzre Sardis*

<sup>1</sup> Guzre Jesús neda':

—Bzuaj cheę gubáz chia' zúalęne' bi chia' zaj zře'e xęzre Sardis. Bzuaj da nigá: Caní dxenná Jesús, Bénnea' zaj zúalę gazre Be' cheę Dios Le', ne nuxre' da gazre ca' zaj naca ca belaj ca'. Neda' nezda' xúgute da dxunle. Nezda' ba nácale ca benne' gate ca' lau Dios lácala dxeleque bęnneache naca banle. <sup>2</sup> Le guxúe, ne le sua chacha cheę québedxa gácale ca benne' ca' ba zúate xelátie'. Dxele'eda' da dxunle, quebe naca na li lazre' lau Dios chia'. <sup>3</sup> Le gusá lazre' ca naca da ba nazédele. Le chéajle na, ne le xexíaje lazre'. Che quebe guxúe cuínale wida' naga zúale ca za tu gubán, ne quebe nézele bi zra xida'. <sup>4</sup> Zaj zra' ládujla le'e bábaze benne' quebe ne xelunę' da sban, na' benne' caní xeledáleņe' neda', ne xelácue' zra lanę' chiche lawe' da caní dxal-la' gaca cheę'. <sup>5</sup> Benne' ca' xeledxúaje' chawe' lawe' da zrinnaj xelácue' zra lanę' chiche ne quebe xusula' la benne' ca' lu xiche naga zaj naxúaj la benne' ca' zúalę xel-la' nabán le', na' xechęba' cheę benne' ca' lau Xra' ne lau gubáz cheę xabáa cheę' ca'. <sup>6</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

*Dizra' gusel-le' cheę bi cheę' zaj zře'e xęzre Filadelfia*

<sup>7</sup> Guzre Jesús neda':

—Bzuaj cheę gubáz chia' zúalęne' bi chia' zaj zře'e xęzre Filadelfia. Bzuaj da nigá: Caní dxenná Jesús, Bénnea' naque' lá'azxa ne li lazre', Bénnea' nuxre' zren xia da dxunna bea na nape' xel-la' dxenná bea ca da gudapa wenná bea David, na' gate salje', netú quebe nu gaca xusezxuj, na' gate xusézxuje' netú quebe nu gaca salaj. <sup>8</sup> Neda' nezda' xúgute da dxunle. Nuzúa' laule le'e tu dxa xu'u da naxalaj, da quebe nu gaca xusezxuj. Lácala quebe nadípatecale, zéajlele dizra' chia', ne quebe ne gusán lázrele da naca chia'. <sup>9</sup> Benne' ca' dxulucá'ana szrene' da xriwe', benne' wen lazre' ca', benne' dxelennę' zaj naque' judío ne quebe zaj naque', neda' guna' xuluzú zribe' zran ní'ale cheę xelenézenę' neda' nazrí'ida' le'e. <sup>10</sup> Ba bęne ca da gucha' le'e gunle cheę gácale zren lazre', na' cheę le na' guxúequeza' le'e lawe' xel-la' zi' da xeledé xúgute bęnneache zaj zře'e lu xęzr la xu, cheę gulé'e lau da zaj naque'. <sup>11</sup> Wídazequeza'. Le gapa chi'i da nápaie cheę quebe nu ca'a ca da dxal-la' si'le. <sup>12</sup> Benne' ca' xeledxúaje' chawe' lawe' da zrinnaj, neda' gun chacha' benne' ca', na' xelaque' ca ze'e xiaj ca' zaj zua na lizre Xra', ne cabátaquezdxa xeledxúaje' na', na' lu lázrdawe' guzúaja' La Xra', ne la xęzre cheę Dios chia' da naca na Jerusalén cube da za' xabáa, ne La' cube. <sup>13</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

*Dizra' gusel-le' cheę bi cheę' zaj zře'e xęzre Laodicea*

14 Guzre Jesús neda':

—Bzuj cheę gubáz chia' zúaleņe' bi chia' zaj zřeę xęzre Laodicea. Bzuj da nigá: Caní dxenná Jesús, Bénnea' naque' li lazre', Bénnea' dxexchebe' da li, Bénnea' naque' naga guzú lau xúgute da beņ Dios. 15 Neda' nezda' xúgute da dxunle. Nezda' quebe nácale zaga ca dxunle da naca chia', ne quebe nácale látela. Dxaca lazra' la gácale zaga u la. 16 Nácale ca nisa bate, ne quebe nácale zaga, ne quebe nácale la, na' chu'una' le'e ca tu benne' dxexebe' nisa bate. 17 Le'e dxennale nácale gunní'a, ne dxaca chawe' cheęle ne quebe bi dxexázrjele, na' quebe dxéquebe'ele' dxaca ba xa' cheęle ne dzezaca zi'le, ne nácale xache', ne nácale la chul-la, ne nácale gala xide. 18 Cheę le na' dxuzéajni'ida' le'e si'le lu na' neda' da naca ca oro da nabá'a na lu xi', cheę gápale xel-la' gunní'a li lazre', ne si'le zra lánale chiche cheę gácale, da gunna' le'e, na' xenite xel-la' stu' cheę da gúcale gala xide, ne si'le da cu'ule xiaj laule cheę xel'é'ele. 19 Neda' dxusízreda', ne dxudéa' xel-la' zi' xúgute benne' ca' nazrí'ida'. Cheę le na' dxal-la' xexíaje lázrele ne gunle zrin chia' du lázrele. 20 Le na' xque. Neda' zea' dxa xu'u dxennia'. Che nu benne' xenne' chí'a, ne salje' xu'u, na' chu'a gágulena' le', na' le' gágulene' neda'. 21 Benne' ca' xeledxúaje' chawe' lawe' da zrinna, neda' gunézruja' le' lataj xeledxúaje' neda' naga dxenná be'a, ca neda' bedxúaja' chawe', ne dxé'lena' Xra' naga dxenná bea Le'. 22 Benne' zua nague' dxal-la' xenne' da nigá dxę Be' Lá'azxa bi chia' ca'.

## 4

*Dxulucá'ana szrene' Dios lu xabáa*

1 Ca gudé na' gunná'a, na' ble'eda' tu dxa xu'u da naxalaj na xabáa, na' benda' chí'i Bénnea' benda' cheę' nédxute da naca na ca chí'i luzu da dxulucuezre', na' guzre' neda':

—Guluén nigá, na' gulé'eda' lue' da ca' dxal-la' gaca ca te cheę da nigá.

2 Ca gunné' ca' guzúale Be' Lá'azxa neda', na' ble'eda' tu lataj blau xabáa, ne ble'eda' tu Benne' zaca dxe'e lataj blau na'. 3 Bénnea' dxe'e lu lataj blau na' nalé' ca tu xiaj jaspe da dxácatite na, u ca tu xiaj cornalina, na' dxu'a lataj blau na' naxechaj ca tu bchita' da dxácatite na ca tu xiaj esmeralda. 4 Dxu'a lataj blau na' zaj zua tape dxua lataj naga zaj dxe' tape dxua benne' gula ca', zaj nacue' zra lane' chiche, ne zaj zria xíchaje' da zaj naca na oro. 5 Lu lataj blau na' dxeledxúaj xesa, ne dxaca nine, ne dxelenné guziu', na' lau lataj blau na' zaj zua gazre xi' dxelala na, da zaj naca na gazre Be' cheę Dios. 6 Le na' lau lataj blau na' de ca tu nísadau' da naca na ca xiaj esa' xani'le'e.

Laduj na' dxu'a lataj blau na' zaj zra' xetapa da zaj naca ban, zaj zua xiaj lau cuzre', ne laule'. 7 Benne' nedxu nalé'e ca tu bezure xixre', na' benne' gudxupe' nalé'e ca tu bezure, na' benne' guxunne' naca lawe' ca lau bēneache, na' benne' gudape' nalé'e ca tu bsia nachiluj xilaba'. 8 Dápatę benne' caní zaj zua xrupa xrilę' tu tue', na' dxupa la'a le'e xrila benne' caní zaj zria zane' xiaj lawe'. Te zra ne chizrela quebe dxulusane' dxelenné':

Lá'azxa, lá'azxa, lá'azxa naca

Xránadxu Dios nape' dutę xel-la' dxenná bea,

Bénnea' guzúaqueze', ne zúaqueze', ne tu súazqueze'.

9 Tu tu lasa gate dápatę benne' ban caní dxelegú'e ba Dios, ne dxulucá'ana szrene' Le', ne dxel'é'e Le': Xcalenu', Bénnea' zúaqueze' chadía

chacanna, <sup>10</sup> na' dape dxuatę benne' gula ca' dxuluzú zribę' lau Lę', ne dxulucá'ana szrenę' Bénnea' zúaquezę' chadía chacanna, ne dxuluzúę' da ca' zaj zría xíchaję' ca' lau lataj blau na', dxelennę':

<sup>11</sup> Xránantu' Dios, Lue' naca chiu' si' lu na'u xel-la' szren, ne xel-la' ba lá'ana, ne xel-la' dxenná bea, lawe' da benu' Lue' xúgutę da dę, na' ca dxaca lazru' Lue' zaj zua na, ne gulá gulebinna na.

## 5

*Tu xiche nadube, ne Bénnea' naque' Zríla'dau'*

<sup>1</sup> Lu na' xabęla cheę Dios, Bénnea' dxe'e lataj blau na', ble'eda' tu xiche nadube, da naxúaj dxupa la'atę na, na' nazriche na gazre da dxelunna bea na. <sup>2</sup> Ble'eda' tu gubáz cheę xabáa nápalęę xel-la' waca, na' gunnę' zizraj:

—¿Nuzra naca cheę' chíluje' xiche na', ne cheze' da ca' dxelunna bea na?

<sup>3</sup> Queba nu chilá' xabáa, ne lu xęzr la xu, ne zranla xęzr la xu naca cheę' chíluje' xiche na', ne quebe nu gaca nne'e na cheę' lé'ene' ca naca na. <sup>4</sup> Neda' gudxézreli'a lawe' da quebe nu chilá' benne' naca cheę' chíluje' xiche na', ne gulabę' na, ne quebe gaca nne'e na. <sup>5</sup> Nadxa tu benne' ládujla benne' gula ca' guzrę' neda':

—Québedxa cuezru' lawe' da ba bzrué'e Jesús, Bénnea' nazi'i le' Bęzre Xixre' cheę xrtia Judá lawe' da nape' xel-la' dxenná bea zrente, ne naque' zrí'ine zre sua David, na' Lę' naca cheę' chíluje' xiche na', ne cheze' da gazre ca' dxelunna bea na.

<sup>6</sup> Nadxa ládujla naga zua lataj blau na', ládujla tapa benne' ban ca', ne ládujla tape dxua benne' gula ca', ble'eda' Jesús, Bénnea' naque' Zríla'dau' cheę Dios. Ze'e na', lácala zrię' wę' lawe' da belutię' Lę'. Zría gazre lúzuba' ne gazre xiaj lauba', na' xiaj lauba' ca' zaj naca na gazre Be' cheę Dios da ca' nase-la Dios du ca naca xęzr la xu. <sup>7</sup> Bénnea' naque' Zríla'dau' guxíaję' guquę'e xiche na' lu na' xabęla Bénnea' dxe'e lataj blau na'. <sup>8</sup> Ca guquę'e xiche na', na' tapa benne' ban ca', ne tape dxua benne' gula ca' buluzú zribę' lau Bénnea' naque' Zríla'dau'. Tu tu benne' gula ca' zaj nuxrę' tu da dxelúl-lalęne' da can zríadi'i na du, nazí le na árpa, ne zaj nu'e xé'ena bzri da naca na oro zaj xu'u na xala zixre, da zéaję na xel-la' dxuláwizra Dios da dxelún bi ca' cheę Dios. <sup>9</sup> Dxelul-lę' tu da cube caní:

Lue' naca chiu' ca'u xiche na', ne chezu' da ca' dxelunna bea na, lawe' da belutię' Lue', na' nen dxen chiu' bexa'u bęnneache cheę xelaque' cheę Dios, Zaj naque' benne' xúgutę cue' bęnneache, ne dxelennę' xúgutę dizra' walazre', ne zaj naque' benne' xúgutę xęzre ne xúgutę cue' xęzr la xu.

<sup>10</sup> Benu' le' benne' wenná bea ca', ne bxruze ca' lau Dios cheędxu, na' xelenná be'e lu xęzr la xu.

<sup>11</sup> Nadxa gunná'a, na' benda' chi'i zane' gubáz ca' cheę xabáa zaj naxéchaję' lataj blau na', ne tapa benne' ban ca', ne tape dxua benne' gula ca'. Zaj zra' benne' zantau' gubáz ca', <sup>12</sup> na' dxelennę' zizraj: Bénnea' naque' Zríla'dau' belutię',

naca chee' si'e xel-la' dxenná bea, ne xel-la' gunní'a,  
 ne xel-la' sina, ne xel-la' waca,  
 ne xel-la' ba lá'ana, ne xel-la' szren,  
 ne xel-la' dxue lá'ana.

<sup>13</sup> Cá'anqueze benda' dxeleenná xúgute da ca' ben Dios, da ca' zaj zra' xabáa, ne da ca' zaj zra' xezr la xu, ne da ca' zaj zra' lu nísadau', ne xúgute da ca' zaj nita xúgute lataj ca', dxeleenná na:

Xel-la' dxue lá'ana, ne xel-la' ba lá'ana,  
 ne xel-la' szren, ne xel-la' dxenná bea  
 zaj naca na chee Bénnea' dxe'e lataj blau na',  
 ne chee bénnea' naque' Zríla'dau',  
 gaxúane gaxúane iza.

<sup>14</sup> Dápatę benne' ban ca' gulenné':

— ¡Ca'an gaca na!

Na' dape dxuate benne' gula ca' buluzú zribe', ne bulucá'ana szrene' Bénnea' naca bane' gaxúane gaxúane iza.

## 6

*Dxecheze' xrupa da gazre ca' da dxelunna bea na*

<sup>1</sup> Nadxa ble'eda' gate Bénnea' naque' Zríla'dau' gucheze' da nedxu da gazre ca' dxelunna bea na. Na' benda' dxenná tu benne' tapa ca' zaj naca bane', na' chi'e ben na ca guziu', dxenné':

— Gudá, le'enu'.

<sup>2</sup> Gunná'a, na' ble'eda' tu bzrina' chiche, na' benne' zrie'-ba' nuxre' tu da dxedxú'una na xágadau' nalá xéche'ze. Bulunézruje' le' tu da naquen oro da guzúe' xíchaje', na' nen dute xel-la' dxenná bea bdxuaję chee zrué'ene' lu wedil-la.

<sup>3</sup> Gate Bénnea' naque' Zríla'dau' gucheze' da gudxupe' da dxunna bea na, na' benda' benne' gudxupe' chee benne' tapa ca' zaj naca bane', dxenné':

— Gudá, le'enu'.

<sup>4</sup> Na' bdxuaj xetú bzrina', nácaba' be xrna, na' bénnea' zrie'-ba' guzi'e xel-la' dxenná bea chee cue' xel-la' dxebeza zri lazre' lu xezr la xu, ne chee gune' xelute bénneache ljwezre' ca', na' bulunézruje' le' tu xia tunna da nalá.

<sup>5</sup> Gate Bénnea' naque' Zríla'dau' gucheze' da guxunne' da dxunna bea na, na' benda' benne' guxunne' chee benne' tapa ca' zaj naca bane', gunné':

— Gudá, le'enu'.

Gunná'a, ne ble'eda' tu bzrina' gasaj, na' benne' zrie'-ba' nuxre' zrgú'unsá. <sup>6</sup> Benda' tu chi'i dxenné na ládujla tapa benne' ban ca', gunná na:

— Chupa xia zrúa' xtila saca na lazruj chee tu zra, ne xrupa xia zrúa' cebada saca na lazruj chee tu zra, san quebe cu' za xel-la' wagu, ne quebe cu' xrise uya wal-la.

<sup>7</sup> Gate Bénnea' naque' Zríla'dau' gucheze' da gudape' da dxunna bea na, na' benda' benne' gudape' chee benne' ban ca', gunné':

— Gudá, le'enu'.

<sup>8</sup> Gunná'a, ne ble'eda' tu bzrina' gache, na' benne' zrie'-ba' le' Xel-la' Gute, na' cuzru bénnea' za tu benne' ze'e waláz chee lataj chul-la ga nnita benne' gate ca'. Bénnea' le' Xel-la' Gute guzi'e xel-la' dxenná bea chee gutie' tu cue' chee tapa cue' ca naca bénneache zaj zre'e xezr la xu. Gutie'



benne' ca' lu wedil-la, ne lu xel-la' dxedún, ne lu xízrawe' ca', ne lu na' be snia zaj zra' lu xezr la xu.

<sup>9</sup> Gate Bénnea' naque' Zríla'dau' gucheze' da gáxxue da dxunna bea na, na' ble'eda' zran cugu bénne'du ca' gulú'u benne' ca' belute bénneache le' lawe' da buluchálaje' dizra' chee Dios, ne belexechebe' ca' naca chee'.

<sup>10</sup> Bénne'du ca' gulú'u benne' ca' gulenné' zizraj:

—Xran lá'azxa, ne li lazre', ¿xeajáte chenu' chee guchi'u cheentu', ne xebéaj lazru' benne' ca' belutie' netu', benne' ca' zaj zře' lu xezr la xu?

<sup>11</sup> Nadxa bénne'du ca' gulú'u benne' ca' gulezí'e zra lanę' chiche, na' guzře' le' xelebeze' xetú chí'idau', cadxa cha benne' biche' ca' dxelunę' zrin chee Cristo, xelute bénneache le' ca' belutie' benne' ca'.

<sup>12</sup> Gate Bénnea' naque' Zríla'dau' gucheze' da xrupe da dxunna bea na, na' guná'a, na' guzrú'le' lu xezr la xu. Gubizra bexaca na da chul-la ca ladxe' gasaj, na' beu' bexaca na xrna ca dxen, <sup>13</sup> na' belaj zaj zria xabáa belexruij na lu xezr la xu, ca dxelexruij higo dxe'ene ca' gate dxácale'e be' dxunibe na xaga higo na'. <sup>14</sup> Xabáa benite na ca tu xiche da dxexedube, na' xúgutę xi'a ca', ne xezr la xu ca' da zaj naxečaj nísadau' gulecuasa na naga zaj zua na. <sup>15</sup> Benne' wenná bea ca' zaj zře' lu xezr la xu bulucache cuinę' lu bluaj ca' ne ládujla xiaj ca' zaj nita lu xi'a ca', na' tuze gulaca benne' blau ca' ne benne' gunní'a ca', ne benne' xíchaje' ca' chee benne' dxjaca wedil-la, ne benne' ca' dxeleenná bea, ne benne' zaj nada'u, ne benne' zaj nadxúaje' lu na' xranę' ca', <sup>16</sup> na' benne' caní gulé'e xi'a ca', ne xiaj xre ca':

—Le quia cha netu', ne le gucache netu' lau Dios, Bénnea' dxe'e lataj blau, ne lu xel-la' zi' zren da gunna Bénnea' naque' Zríla'dau'.

<sup>17</sup> Ba bzrin zra chee xel-la' zi' zren. ¿Núzraqueze sue le na'?

## 7

### *Benne' Israel ca' gucá'a Dios*

<sup>1</sup> Ca gudé chee da nigá, ble'eda' tapa gubáz chee xabáa zaj ze' dapa saca chee xezr la xu, na' zaj nuzague' be' da zá'aca na dapa saca, chee quebe bi be' gaca lu xezr la xu, ne lawe' nísadau', ne lawe' xaga ca'. <sup>2</sup> Cá'anqueze ble'eda' xetú gubáz chee xabáa ze'e naga dxalaj gubizra, na' nuxře' da gunna bea na nu benne' naque' chee Dios ban. Gubáz nigá gunné' zizraj, dxe'e dápatę gubáz chee xabáa ca' bache zaj nazi'e xel-la' dxenná bea xuluzría xi'e xezr la xu, ne nísadau', gunné':

<sup>3</sup> —Quebe guzría xile xezr la xu, ne nísadau', ne xaga ca', dxácatę quebe ne guchíchent'u luzrgá benne' ca' tu da gunna bea na zaj naque' chee Dios cheedxu.

<sup>4</sup> Benda' cátite zaj naca benne' ca' gulezriche luzrgue' da na' dxunna bea na. Zaj naque' tu gaxúe tape xun cue' da zaj naca na chi gaxúa weaj lówela xúgutę cue' benne' Israel. <sup>5</sup> Gulezriche luzrgue' da na':

Chazrinnu cue' benne' xrtia Judá, ne  
chazrinnu cue' benne' xrtia Rubén, ne  
chazrinnu cue' benne' xrtia Gad, ne

<sup>6</sup> chazrinnu cue' benne' xrtia Aser, ne  
chazrinnu cue' benne' xrtia Neftalí, ne  
chazrinnu cue' benne' xrtia Manasés, ne

<sup>7</sup> chazrinnu cue' benne' xrtia Simeón, ne  
chazrinnu cue' benne' xrtia Leví, ne  
chazrinnu cue' benne' xrtia Isacar, ne

<sup>8</sup> chazrinnu cue' benne' xrtia Zabulón, ne chazrinnu cue' benne' xrtia José, ne chazrinnu cue' benne' xrtia Benjamín.

*Benne' zan zaj nacu zra lanę' chiche*

<sup>9</sup> Gudé na' gunná'a ne ble'eda' benne' zan cheę xúgute cue' bėnneache: Benne' xúgute cue' xęzr la xu, ne benne' dxelenné' xúgute dizra' walazre' cha cheę', ne benne' xúgute xęzre ca'. Zaj ze' le na' naga zua lataj blau na', ne naga ze Bėnnea' naque' Zríla'dau'. Benne' caní zaj nacue' zra lanę' chiche, ne zaj nuxre' zina'. <sup>10</sup> Xúgute' dxelenné' zizraj:

Xel-la' weselá za na lu na' Dios cheędxu, Bėnnea' dxe'e lataj blau, ne lu na' Bėnnea' naque' Zríla'dau'.

<sup>11</sup> Xúgute gubáz cheę xabáa ca' zaj ze' zaj naxéchaje' lataj blau na', ne naga zaj zra' benne' gula ca', ne tapa benne' ban ca', na' buluzú zribe' belíxrujte lawe' zran ní'e, na' bulucá'ana szrene' Dios. <sup>12</sup> Dxelenné': ¡Ca'an gaca na!

¡Xel-la' dxue lá'ana, ne da xabáa, ne xel-la' sina, ne xel-la' dzezaca ba lazre', ne xel-la' ba lá'ana, ne xel-la' dxenná bea, ne xel-la' szren, zaj naca na cheę Dios cheędxu chadía chacanna! ¡Ca'an gaca na!

<sup>13</sup> Nadxa tu benne' gula ca' bchebe' neda':

—¿Nuzra benne' caní zaj nacue' zra lanę' chiche, ne gazra zesí'aque'?

<sup>14</sup> Neda' gucha' le':

—Xran, lue' nézqueznu'.

Le' guzre' neda':

—Benne' caní ba guledé' lu xel-la' zi' zren na', na' benne' caní ba zaj nacue' zra lanę' chiche lawe' da Bėnnea' naque' Zríla'dau' ba gudibe' xichaj lázrdawe' nen dxen cheę'. <sup>15</sup> Cheę le' na' zaj zre'e dxu'a lataj blau naga dxe' Dios, ne dxelúe lá'anę' Le' te zra ne chizrela lu xudau' cheę', na' Bėnnea' dxe'e lataj blau na' guxúequeze' benne' ca', ne súaletecaze' le'. <sup>16</sup> Québedxa xeledunę' ne québedxa xelebílenę', ne québedxa guzezxe gubizra benne' ca', ne québedxa xeléquene' da la, <sup>17</sup> lawe' da zua Bėnnea' naque' Zríla'dau' cuita lataj blau na', na' guxúe' benne' ca' ca dxun benne' dxuxúe' zríla' ca', ne che'e benne' ca' naga dxelalaj nisa da dxunna na xel-la' nabán, na' Diósqueze tu súalezqueze' benne' ca' cheę québedxa xelebezre'.

## 8

*Dxecheze' da gazre da ca' dxelunna bea na*

<sup>1</sup> Gate Bėnnea' naque' Zríla'dau' gucheze' da gazre da ca' dxelunna bea na, da ca' zaj nuchiche na xiche na', na' gudxé' zri xabáa tu chí'i zrénqueze. <sup>2</sup> Nadxa ble'eda' gazre gubáz cheę xabáa ca' zaj ze' lau Dios, na' bulunézruje' gubáz cheę xabáa ca' gazre luzu da xulucuezre'. <sup>3</sup> Gudé na' bla' xetú gubáz cheę xabáa nuxre' tu xé'ena bzri da naca na oro ne guzé' dxu'a cugu, na' bulunézruje'e le' xala zixre cheę guzúe' na lau Dios tu zren nen xel-la' dxuláwizra Dios ca' da belún benne' ca' zaj naque'

chee Dios. Bzue' na lu cugu naca na oro, da zua na lau lataj blau na'.  
 4 Zren chee xala na' guluén na lau Dios tu zren nen xel-la' dxuláwizra  
 Dios ca' belún benne' ca' zaj naque' chee Dios. 5 Nadxa tu gubáz chee  
 xabáa guqué'e xé'ena bzri na', na' bzre'e na xi' da guqué'e lu cugu na',  
 na' gudxú'une' xi' na' lu xezr la xu, na' gulenné guziu', ne gulenni'e'e,  
 ne gulépele'e xesa, ne guzrú' xezr la xu.

*Dxuluchine gubáz ca' da dxucuezre'*

6 Nadxa gázrete gubáz chee xabáa ca' zaj nuxre' gazre luzu da dxulu-  
 cuezre' gulez'e chawe' xuluchinene' na.

7 Gubáz nedxu na' bchínene' da dxucuezre', na' gulinnaj xiaj bezxe', ne  
 xi' da zaj nachixre na dxen da belexruj na lu xezr la xu. Xáteze quebe  
 bedú gachaj xezr la xu guzezxe na late weaj du ca naca lu xezr la xu.  
 Xáteze quebe gudache gáchajte xaga ca' zaj ze lu xezr la xu gulezxe na, ne  
 cá'anqueze guca chee xixre' xa'a ca'.

8 Gubáz chee xabáa gudxupe' bchínene' da dxucuezre', na' bexruj da  
 naca na ca tu xi'a zren da dxala na xi' lu nísadau', na' xáteze quebe guca  
 gáchajte nísadau' na' bexaca na dxen. 9 Xáteze quebe guca gáchajte bea zaj  
 zrabá' lu nísadau' guláteba', na' xáteze quebe guca gáchajte da ca' dxeledán  
 lawe' nísadau' gulebía xi na.

10 Gubáz chee xabáa guxunne' bchínene' da dxucuezre', na' bexruj tu  
 belaj zrente zran xabáa, da dxala na ca tu xi' xedxe. Naga bexruj na,  
 xáteze quebe gudache gáchajte xegu ca', ne beaj ca' gulebía xi na. 11 Belaj  
 na' le na Ajenjo, da zéaje na da naca na sla', na' xáteze quebe guca gáchajte  
 nisa da de lu xezr la xu bexaca na ajenjo, na' benne' zante gulatie' ne chee  
 nisa na' lawe' da bexaca na sla'.

12 Gubáz chee xabáa gudape' bchínene' da dxucuezre', na' xáteze quebe  
 bedú gachaj xel-la' naxaní' chee gubizra, ne xel-la' naxaní' chee beu', ne  
 xel-la' naxaní' chee belaj ca' belexaca na chul-la, na' quebe bulusení na  
 du lazre' xáteze quebe guca gachaj zra, ne cá'anqueze che zrela.

13 Nadxa gunná'a, ne benda' chi'i tu gubáz chee xabáa dxedé' lu be',  
 dxenné' zizraj:

—Edxugua bénneache zaj zra' xezr la xu gate xelebezre luzu da xulu-  
 chine xechunna gubáz chee xabáa ca'.

## 9

1 Gubáz chee xabáa gázxue bchínene' da dxucuezre', na' ble'eda' tu  
 benne' naque' ca tu belaj bexruj na lu xezr la xu, na' bulunézruje' le'  
 zren xia chee lataj chul-la chee benne' gate ca'. 2 Gusálaje' lataj chul-la  
 na', na' lu'ule na' bdxuaj zren ca naca da dxedxuaj na naga dxeluzre'  
 bla'dau', na' zren na' bchul-la na lau gubizra, ne lu be'. 3 Lu zren na'  
 beledxúaj biche zu. Guledaba' du ca naca xezr la xu, na' biche zu ca'  
 guleziba' lataj xeláduba' bénneache ca da dxelún béxrujni. 4 Dios guzre'  
 biche zu ca' quebe xuluzría xiba' xixre' xa'a ca', ne netú xaga, san  
 xeláduzeba' bénneache quebe nazriche luzrgue' da dxunna bea na benne'  
 ca' zaj naque' chee Dios. 5 Quebe zaj naziba' lataj xelúteba' bénneache, san  
 xuludézeba' bénneache ba xa' lawe' gazxu' beu', na' xel-la' dxelá chee naga  
 dxeláduba' naca na ca naca da dxun béxrujni, be' dxelúteba' bénneache.  
 6 Lu zra ca' xelaca lazre' bénneache xelxute cuine', ne quebe xelezéquene'.  
 Xelaca lazre' xelatie' ne quebe xelatie'.

7 Biche zu ca' zaj nácaba' ca bzrina' ca' ba zaj nabézaba' chjácaba' lu wedil-la. Xíchajba' zaj zria na ca tu da naca na oro, na' dxu'a lau biche zu ca' naca na ca lau bénneache. 8 Xicha xíchajba' zaj naca na ca xicha xichaj nu'ula ca', na' láchxaba' zaj naca na ca lazxa bezre xixre'. 9 Lachu'uba' xu'u na ca zraba' xia, na' xrílabá' dxeleninne na ca dxeleninne da dxelecá'a bzrina' ca' zjaca chéguba' lu wedil-la. 10 Zaj zua xrbanba' ca xrban bérxujni, zaj zua na liba'. Zaj nazi'ba' lataj xeláduba' bénneache lawe' gazxu' beu'. 11 Zua tu xrane biche zu ca' naca gubáz chee lataj chul-la, ne le na Abadón nen dizra' hebreo, ne nen dizra' griego le na Apolión, da zéaje na da dxuzría xi na.

12 Caní guca da nedxu da ba xa' da xeledé bénneache, na' da' zí'aca xechupan ca'.

13 Nadxa gubáz chee xabáa xrupe bchínene' da dxucuezre', na' benda' tu chi'i da gunná ládujla tapa luzu cugu lá'azxa na' naca na oro da zua na lau Dios. 14 Chi'i na' guzre na gubáz chee xabáa xrupe na' nuxre' luzu da dxucuezre':

—Bsan dápaté gubáz ca' zaj nadxéaje' dxu'a xegu zren le na Eufrates.

15 Ca' guca na, na' gulelá gubáz ca' chee xelutié' xáteze ca gaca gáchajte bénneache lawe' da ba zaj nabeza gubáz ca' chee zra na', ne beu' na', ne iza na'. 16 Benda' cátite zaj naca benne' dxjaca wedil-la ca' zaj zrie' bzrina' zrálene' gubáz ca'. Zaj naque' chupa cue' gaxua da zaj naca gaxúane gaxúane.

17 Lu da ble'e Dios neda' ble'eda' ca zaj naca bzrina' ca', ne ca zaj naca benne' dxjaca wedil-la ca' zaj zrie'-ba'. Zaj xu'u lachu'e zre' xrna da naca na xia, ne da nalá' ca zran xabáa, ne da gache. Xichaj bzrina' ca' zaj naca na ca xichaj bezre xixre', na' dxú'aba' ca' beledxúaj xi', ne zren, ne tu da gache da dxuzéxle'e na. 18 Xáteze quebe gudache gáchajte bénneache gulatié' lu da ca' beledxúaj na dxu'a bzrina' ca', xi', ne zren, ne da gache na'. 19 Xel-la' snia chee bzrina' ca' zua na dxú'aba', ne xrbanba' lawe' da zaj naca xrbanba' ca' bēla' ca' zaj zua xíchajba', na' nen da ca' dxuluzría xiba' bénneache.

20 Benne' ca' xezica, benne' quebe belúteba', belúnqueze' da zrinnaj ca da dxelúnqueze', ne bulucá'ana szrénqueze' be' xriwe' ca', ne bedau' oro ca', ne bedau' plata ca', ne bedau' xia gache ca', ne bedau' xiaj ca', ne bedau' xaga ca', da ca' quebe dxaca xelélé'e na, ne quebe dxaca xelén na, ne quebe dxaca si'aca na. 21 Cá'anqueze belútequeze' benne' ca', ne belúnqueze' xel-la' wazrá', ne belúnqueze' da sban, ne gulebánqueze'.

## 10

*Tu gubáz chee xabáa nuxre' tu xíchedau' nazriluj na*

1 Nadxa ble'eda' xetu gubáz chee xabáa nápalé'e xel-la' dxenná bea. Bétaje' xabáa, xu'e tu lu beuj, ne zua tu bchita' xíchaje'. Dxu'a lawe' dxácátite na ca gubizra, na' ni'e zaj naca na ca xi'. 2 Nuxre' tu xíchedau' da nazriluj na, na' bzue' ni'e zua xabēla lawe' nísadau', ne ni'e zua xéglala lawe' xezr la xu bizre. 3 Nadxa gudxezre xe'e ca dxun bezre xixre' dxebezre xa'aba', na' ca gudxezre xe'e gulenné gazre guziu'. 4 Ca gudé gulenné gazre guziu' ca', ba zúate guzúaja', na' benda' tu chí'e za xabáa, guzre neda':

—Bcache naze da gulenná gazre guziu' ca'. Quebe guzúaju' na.

<sup>5</sup> Nadxa gubáz chee xabáa na' ble'eda' ze' lawe' nísadau', ne lawe' xezr la xu bizre guchisa ne'e da zua xabéla zran xabáa, <sup>6</sup> na' bzétaje' La Bénnea' zue' chadía chacanna, ne bené' xabáa, ne xezr la xu, ne nísadau', ne xúgute da zaj de lawe' da ca' bené', na' gunné':

—Québedxa che na, <sup>7</sup> lawe' da gate su lau gubáz chee xabáa gazre guchínene' luzu da xulucuezre', ba guca li ca naca da nun Dios dxal-la' gaca ca bzenne' benne' wen zrin chee' ca', benne' gulenné' waláz chee'.

<sup>8</sup> Ca naca chi'e da benda', da za xabáa, bchálajlene' neda' xetú, gunné':

—Guxíaj xeajcá'a xíchedu na' nuxru gubáz chee xabáa na' ze' lawe' nísadau', ne lawe' xezr la xu bizre.

<sup>9</sup> Nadxa guxá'a lau gubáz chee xabáa na', na' gunaba' gunné' neda' xíchedu na', na' guzre' neda':

—Gucá'a na. Gudagu na. Lu dxu'u gaca na zixre ca bzírina'dau', na' lu le'u xexaca na da sla'.

<sup>10</sup> Nadxa gucá'a xíchedu na' lu na' gubáz chee xabáa na', na' gudawa' na, na' lu dxu'a guca na zixre ca bzírina'dau'. Ca gudé gudawa' na, bexaca na sla' lu le'a. <sup>11</sup> Nadxa gulé'e neda':

—Dxun na ba xen guchálaju' waláz chee Dios lau benne' zaj zre'e zane cue' xezr la xu, ne lau benne' zaj zre'e xezre zan ca', ne lau benne' dxelenné' dizra' walazre' cha chee' ca', ne lau benne' wenná bea ca'.

## 11

### *Chupa benne' dxelexechebe'*

<sup>1</sup> Nadxa belunne' neda' tu xia xtíladau' da naca na ca tu xaga da dxudxíredxu, na' gulé'e neda':

—Guxasa, bdxixre' xudau' chee Dios ne lu cugu, na' blaba bal-la benne' zaj zre'e na' dxulucá'ana szrene' Dios. <sup>2</sup> Quebe gudxixru' chale'aj chee xudau' na' lawe' da ba gudé na lu na' benne' zitu' ca', na' benne' ca' xululájaje' xezre lá'azxa lawe' chupe xun beu'. <sup>3</sup> Neda' sel-la' chupa benne' zaj nacue' ladxe' tuzruj, na' xelenné' waláz chia' lawe' chazrinnu gaxúa ga xun zra.

<sup>4</sup> Benne' chupa caní zaj naque' ca chupa xaga olivo ca', ne ca zaj naca chupa da zaj zuan xi', da ca' zaj zua na lau Dios, Xrane xezr la xu. <sup>5</sup> Che nu benne' dxaca lazre' guzría xi'e benne' caní, na' le' xululube' xi' da dxuaj lu dxu'e ca', na' guzéxete na benne' ca' dxeledábague' le'. Caní gate núteteze benne' tábague' benne' chupa caní. <sup>6</sup> Benne' chupa caní zaj nape' xel-la' dxenná bea xelune' ga quebe gaca xiuj dxácaté na' dxelenné' waláz chee Dios. Cá'anqueze zaj nape' xel-la' dxenná bea xelune' xaca nisa dxen, ne chee xulusaca zi'e bénneache nen xúgute xízrawe' ca', bátatezla dxelaca lazre'. <sup>7</sup> Gate bache belexuzre belune' zrin chee', na' be xixre' snia, be dxedxúajba' lataj chul-la, tíl-laléba' benne' chupa ca', na' quél-laba' le', ne gúteba' le'. <sup>8</sup> Belá' dxen gate chee benne' caní xelexegá'ana na la neza chee xezre zrentau' naga gudá' Xránadxu xaga begúaj, ne ca dxutil-la Dios lebe, le na Sodoma, ne Egipto. <sup>9</sup> Lawe' chunna zra xugachaj, bénneache chee xúgute cue' benne', ne benne' xezre ca', ne benne' zra du gabí'i xezr la xu, ne benne' dxelenné' dizra' walazre' cha chee' xelexe'eng' belá' dxen gate chee benne' caní, ne quebe xelu'e lataj nu benne' gucache' le'. <sup>10</sup> Benne' zaj zre'e lu xezr la xu xelebené' lawe' da zaj nate benne' caní, na' xelexezaca ba lázrelé'e, ne xelesel-le' da xulunezruj ljwezre' tue' xetue' lawe' da bulusaca zi' benne' caní gulenné' waláz chee Dios bénneache

ca'. <sup>11</sup> Gate guca chunna zra xugachaj, na' Dios bsebanē' benne' caní, na' belexase', na' xúgute benne' ca' belelé'ene' le' belezrébele'ē. <sup>12</sup> Nadxa dxúpatē benne' ca' dxelexechebe belenne' chi'i tu benne' dxenné' zizraj xabáa, dxē'ē benne' ca':

—Le xegüén nigá.

Na' belexegüene', na' belelé'e benne' ca' dxeledábage' le' ca guca. <sup>13</sup> Ca'an gúcate guzrú'le'ē xezr la xu, na' xu'u zaj nita na lu xezre na' gulebía xi na, na' gulate gazre cue' da nacan chi gaxúa bēnneache weaj ne chee da guzrú'. Benne' ca', benne' quebe gulate lu xezre na', nen dute xel-la' dxelezrebe belúe lá'ane' Dios zue' xabáa.

<sup>14</sup> Ba gudé da gudxupe' da ba xa' da xeledé bēnneache, na' la za'te da guxunne'.

*Gubáz gazre dxuchíne' da dxucuezre'*

<sup>15</sup> Gubáz gazre bchíne' da dxucuezre', na' ben chi'i benne' zan xabáa dxelenné' zizraj:

Naga dxelenná bea bēnneache lu xezr la xu ba guledé na

lu na' Xránadxu Dios, ne lu na' Cristo chee',

na' Le' nna be'ene' lataj ca' chadía chacanna.

<sup>16</sup> Nadxa tape dxua benne' gula ca' zaj dxē'ē dxu'a lataj blau naga dxē' Dios buluzú zribe' zaj nuzuatē lawe' zran ni'e, dxulucá'ana szrenē' Dios, <sup>17</sup> dxelenné':

Xcalenu', Xran.

Dios, napu' dute xel-la' dxenná bea.

Guzúaquezu', ne zúaquezu', ne tu súazquezu',

lawe' da ba guzi'u xel-la' dxenná bea zrente chiu',

ne ba guzú lau' dxenná be'u.

<sup>18</sup> Bēnneache xúgute xezre ca' dxelezré'ē san ba bzin zra gudéu' benne' ca' ba xa', zra na' guchi'u chee benne' gate ca'.

Xunézruju' da naca chee benne' ca' gulenné' waláz chiu',

ne da naca chee benne' ca' zaj naque' chiu',

ne da naca chee benne' ca' belune' Lue' ba lá'ana,

benne' blau ca', ne benne' quebe nu zaj naca.

Ba bzin zra guzría xi'u benne' ca' buluzría xi'e xezr la xu.

<sup>19</sup> Nadxa bxalaj xudau' chee Dios da zua xabáa, na' ble'e lau xi'ina naga xu'u xel-la' wezría xrlátaje chee', da zua na lu xudau' na'. Gulepe xesa, ne guleninne na, ne gulenné guzi'u, ne guzrú' xezr la xu, na' bxínnajle'ē xiaj bezxe'.

## 12

*Tu nu'ula ne bē snia schanni' zrente*

<sup>1</sup> Nadxa ble'e lau tu da zrente xabáa. Zua tu nu'ula naca zra lanē' ca gubizra, na' zran ni'e zua da naca ca beu', na' xíchajē' zria tu da zaca zaj zria na chazrinnu belaj. <sup>2</sup> Nu'ula nigá zue' zi'i, ne dxebezre xē'ē xel-la' dxudi'a sanē' tu bidau', dxedéle'ē xel-la' zi' chee galaj bidu na'. <sup>3</sup> Nadxa ble'e lau xabáa xetú da zrente, zua tu bē snia schanni', bē xrna, zua gazre xíchajba' ne chi lúzuba', na' zria tu da zaca tu tu xíchajba' ca'. <sup>4</sup> Nen xrbanba' gucá'a dxéguba' xáteze quebe guca gáchajte belaj zaj zria zran xabáa, na' bzálaba' na lu xezr la xu. Bē snia schanni' na' guzeba' lau nu'ula na' sanē' bidau' chee gáguba' bidu na' gate ze gálajbe'. <sup>5</sup> Nu'ula na'

guzane' tu bi biudau', bi na' nna be'ebe' dutę xęzr la xu nen tu var xia. Nadxa bi biu cheę nu'ula na' gucá'a Dios lebe', na' bexu'e-be' lataj blau cheę' naga dxe'e. <sup>6</sup> Na' nu'ula na' bzrúnnuje' zéaje' le'e xixre' lawe' lataj naga naczua Dios tu lataj naga sua nu'ula na', naga xulugawe' le' lawe' chazrinnu gaxúa ga xun zra.

<sup>7</sup> Gudé na' guxú'lu wedil-la xabáa gate gubáz cheę xabáa blau le' Miguel nen gubáz cheę xabáa zaj da' le' guledíl-lalene' bę snia schanni' zrente'. Bę snia schanni' na', ne gubáz zaj de'e-ba' belune' wedil-la. <sup>8</sup> Quebe bi gulezéquene' lu wedil-la na', na' québedxa guta' lataj cheę gubáz ca' lu xabáa. <sup>9</sup> Ca'an guca gulebéaje' bę snia schanni' na' xabáa, bę snia na' zúaba' nédxute, na' nazí laba' da xriwe', ne Satanás, da na' dxezí xę na xúgute bęnneache. Da xriwe' na', ne gubáz ca' zaj de'e na guledxú'une' na lu xęzr la xu.

<sup>10</sup> Nadxa benda' tu chi'i benne' gunné' zizraj xabáa:

—Ba bla' xel-la' weselá, ne xel-la' szren, ne xel-la' dxenná bea cheę Dios cheędxu, ne xel-la' dxenná bea cheę Cristo cheę', lawe' da ba guledxú'une' da na' gudagu zria na cheę benne' bíchedxu, da na' dxagu zria na cheę benne' ca' te zra, ne chizrela lau Dios cheędxu. <sup>11</sup> Benne' bíchedxu ca' beledxúaje' chawe' ne cheę dxen cheę Bénnea' naque' Zríla'dau', ne ne cheę da belexechebe' ca naca cheę dizra' cheę Cristo, ne quebe belezrebe' nu benne' gutię' le'. <sup>12</sup> Cheę le' na' gata' xel-la' dxebé xabáa.

¡Le be le'e zrale xabáa!

¡Edxugua benne' ca' zaj zre'e xęzr la xu, ne lawe' nísadau'

lawe' da ba bla' da xriwe' naga zúale,

dutę xel-la' dxezrá'a cheę na,

lawe' da neze na xáte'ga ne de cheę na!

<sup>13</sup> Gate guque be'e da xriwe' ba buluzale' na lu xęzr la xu, na' gudxé' nau na nu'ula na' guzane' bi biudu na'. <sup>14</sup> Nu'ula na' bulunézruje' le' chupa xriľe' zren ca xriľa bsia cheę gaca xexiaje' xezue' le'e xixre' lawe' lataj, zitu' naga zua bę snia schanni' na', na' bulugawe' le' lawe' chun iza xugachaj. <sup>15</sup> Bę snia schanni' na' bexébeba' nisa cheę benba' tu xęgu cheę gua na nu'ula na'. <sup>16</sup> Gúcale xęzr la xu nu'ula na'. Bzra xęzr la xu, na' gudebe na xęgu na' bexębe bę snia schanni' na'. <sup>17</sup> Cheę le' na' bzrá'le'e da xriwe' nu'ula na', na' guxíaj na xeaťíl-lale na xrtia nu'ula na' zaj zre'e xęzr la xu, benne' ca' dxuluzé' dizra' da bdxixruij be'e Dios, ne dxelexechebe' ca naca cheę Jesucristo.

## 13

### *Chupa bę xixre' snia ca'*

<sup>1</sup> Nadxa guzéa' dxu'a nísadau', ne ble'eda' bdxuaj tu bę xixre' snia lu nísadau' na', zua gazre xíchajba', ne chi lúzuba'. Zria tu tu lúzuba' na' tu da zaca, na' da' tu laba' xíchajba' ca' da dxeuide Dios. <sup>2</sup> Bę xixre' snia nigá nácaba' ca tu bezrtau', na' ní'aba' zaj naca na wal-la ca ni'a oso, na' dxú'aba' naca na ca dxu'a bęzre xixre'. Bę snia schanni' bnézrujba' xel-la' dxenná bea cheęba', ne lataj blau cheęba', ne xel-la' waca cheęba' lu na' bę snia na' nácaba' ca bezrtau'. <sup>3</sup> Zua tu we' tu xichaj bę xixre' snia na' nácaba' ca bezrtau' da gute na leba', na' we' na' bexaca na, na' ca naca bęnneache ca' zaj zre'e lu xęzr la xu belexebánele'ene', ne zjálalene' bę xixre' snia na'. <sup>4</sup> Bulucá'ana szrene' bę snia schanni' na' lawe' da bnézrujba' xel-la' dxenná

bea chee be xixre' na' nácabá' ca bežrtau', ne cá'anqueze bulucá'ana szrenē' be xixre' snia na', dxelenné':

—¿Núzraqueze naca ca be xixre' nigá, ne nu seque' tíl-lalē leba'?

<sup>5</sup> Nadxa da xriwe' be na leba' lataj gunneba' dizra' zri'a, na' gunneba' da calēla chee Dios, ne gudápaba' xel-la' dxenná bea lawe' chupe xun beu'. <sup>6</sup> Gunneba' da calēla chee Dios, ne chee La Dios, ne chee lataj lá'azxa chee', ne chee benne' ca' zaj zře'ē xabáa. <sup>7</sup> Cá'anqueze guziba' xel-la' dxenná bea tíl-lalēba' benne' ca' zaj naque' chee Dios, ne gútetēba' benne' ca', na' guziba' xel-la' dxenná bea lu xúgute cue' bēneache, ne benne' zaj zře'ē xúgute xezre ca', ne xúgute cue' xezr la xu ca', ne benne' dxelenné' dizra' walazre' cha chee'. <sup>8</sup> Xúgute benne' zaj zře'ē xezr la xu bulucá'ana szrenē' be xixre' snia na', benne' ca' quebe zaj naxúaj le' lu xiche naga zaj naxúaj la benne' ca' zaj nape' xel-la' nabán, xiche na' bzuaj Bēnea' naque' Zríla' dau' belutiē'-ba'.

<sup>9</sup> Che nu benne' zua nague', dxal-la' xenne' dizra' nigá. <sup>10</sup> Benne' ca' dxelegú'ē bēneache lizre xia, cá'anqueze xelú'u benne' ca' lizre xia, na' benne' ca' dxelutiē' benne' nen xia nalá, cá'anqueze xelatiē' lu xia nalá. Chee le na' benne' zaj naque' chee Dios dxal-la' xelaque' zren lazre', ne xeléajle'ē chee Dios.

<sup>11</sup> Gudé na' ble'eda' xetú be xixre' snia bdxúajba' lu xezr la xu. Bea nigá zua chupa lúzuba' zaj naca na ca luzu zríla'. Bea nigá gunneba' ca be snia schanni' na'. <sup>12</sup> Bea nigá nápaba' dutē xel-la' dxenná bea da napa be nedxu na', gate zúaba' lau be nedxu na', na' gunná be'eba' ca naca bēneache zaj zře'ē dutē xezr la xu xulucá'ana szrenē' be nedxu na', bea na' bexaca we' cheeba' da na' naca gute leba'. <sup>13</sup> Be gudxupe' na' benba' xel-la' waca zri'a ca', ne benba' bexruj xi' zran xabáa lu xezr la xu lau bēneache ca'. <sup>14</sup> Ne chee xel-la' waca ca' da benba' lau be nedxu na', guzí xēba' benne' zaj zře'ē xezr la xu, na' gunná be'eba' benne' ca' xelunē' tu bedau' ca naca be nedxu na', bea na' guzúa we' chee xia nalá, na' naca bánquezeba'. <sup>15</sup> Be gudxupe' na' guziba' xel-la' dxenná bea gunézrujba' xel-la' nabán bedau' na' naca na ca be nedxu na', chee nne bedau' na', ne gute na xúgute benne' quebe xulucá'ana szrenē' na. <sup>16</sup> Cá'anqueze bedau' na' gunná be'e na zriche tu da gunna bea na luzrgá u lu na' zua xabēla chee xúgute bēneache, benne' blau, ne benne' quebe nu naca, ne benne' gunní'a, ne benne' xache', ne benne' zaj nada'u, ne benne' zaj zře'ē cá'aze. <sup>17</sup> Netú benne' quebe gaca ga'uwe' ne gutiē' che quebe zriche da na' dxunna bea na le', u la be xixre' snia na', u xrbaba ca naca laba'. <sup>18</sup> Nu benne' gulabe' da nigá dxal-la' gague' sina. Benne' dxéajni'ine' waca gulabe' ca naca xrbaba chee laba'. Naca na tuze ca naca xrbaba chee bēneache, na' xrbaba nigá naca na xrupa gaxúa ga xun xrupa.

## 14

*Da dxelul-la tu gaxúa tape xun cue' chi gaxúa weaj benne'*

<sup>1</sup> Gudé na' gunná'a, na' ble'eda' Bēnea' naque' Zríla' dau' ze' lu xi'a Sión. Tu zren nen Le' zaj zra' tu gaxúa tape xun cue' chi gaxúa weaj benne', zaj zriche luzrgue' La Bēnea' naque' Zríla' dau', ne La Xre'. <sup>2</sup> Nadxa benda' tu da dxeninne na da za' xabáa, da dxeninne na ca schaga' da dxelún zánete xegu ca', ne ca schaga' da dxun guziu' gate dxennéle'ē na, ne ca dxeninne naga zaj zra' zánete benne' dxelínnie' da ca' cun zríadi'i na du. <sup>3</sup> Belul-le' tu da cube dxu'a lataj blau naga dxe' Dios, ne lau tapa benne' ca' zaj zua



nabancze', ne lau tape dxua benne' gula ca'. Netú benne' xezica quebe guca gul-le' ca naca da na' belul-le'. Dxaca dxelul-le na benne' tu gaxúa tape xun cue' chi gaxúa weaj, benne' ca' gulelé' lávela benne' zaj zre'e xezr la xu. <sup>4</sup> Benne' caní quebe gulezúalene' nu'ula chee benne' xula, san belexegá'ana chawe', na' zjácálenē Bénnea' naque' Zríla'dau' gáteteze zéaje'. Benne' caní gulelé' lávela bènneache, ne zaj naque' lau Dios ca tu da blaudxa chee da dxezidxu, da dxuzúadxu lau Dios, ne lau Bénnea' naque' Zríla'dau'. <sup>5</sup> Cabata' dxelún lazre', na' zaj naque' du lazre' dxu'a lataj blau naga dxe' Dios.

*Dizra' da dxuluzén chunna gubáz chee xabáa bènneache*

<sup>6</sup> Nadxa ble'eda' xetú gubáz chee xabáa dxedé' lu be' zran xabáa, nape' dizra' chawe' da chadía chacanna, chee guzenne' na benne' ca' zaj zre'e xezr la xu, benne' xúgute cue' bènneache, ne benne' xúgute cue' xezr la xu, ne xúgute xezre, ne benne' dxelenné' dizra' walazre' cha chee'. <sup>7</sup> Gubáz na' gunné' zizraj:

—Le zrebe Dios, ne le güe lá'ana Le' lawe' da ba bzrin zra guchi'a Le' chee bènneache. Le gucá'ana szren Bénnea' bené' xabáa, ne xezr la xu, ne nísadau', ne beaj ca'.

<sup>8</sup> Xetú gubáz chee xabáa zéaje' cuzru gubáz chee xabáa nedxu na', dxenné':

—jBa guzría xi'! jBa guzría xi' xezre Babilonia, xezre zren na', lawe' da bulusuzre' benne' xezre ca', ne benne' duté xezr la xu nen da naca ca xrise uva wal-la chee da sban da dxeluné'!

<sup>9</sup> Xetú gubáz chee xabáa zéaje' cuzru gubáz chupa ca', dxenné' zizraj:

—jChe nu benne' dxucá'ana szrene' be snia na', ne bedau' cheeba', ne gu'e lataj zriche luzrgue' u ne'e laba', <sup>10</sup> benne' nigá téé' lu da ba xa' da naceza Dios lu xel-la' dxezrá'a chee', na' saca zi'e lu xi' chee da dxuzéxle'e na lau gubáz chee xabáa ca' chee Dios, ne lau Bénnea' naque' Zríla'dau'! <sup>11</sup> jZren chee xi', naga saca zi'e, cuen na chadía chacanna, na' xelezaca zi' te zra ne chizrela benne' ca' dxulucá'ana szrene' be snia na', ne bedau' cheeba', ne dxelu'e lataj zriche laba' luzrgue'! <sup>12</sup> jChee le na', benne' ca' zaj naque' chee Dios, ne dxuluzúe' dizra' ca nadxixruj be'ene', ne zjácálenē da naca chee Jesús, dxal-la' xelaque' zren lazre'!

<sup>13</sup> Nadxa benda' chi'i tu benne' da za xabáa. Dxe'e neda':

—Bzuj da nigá: Na'a, ne lu da za za' ba neza zrente naca na chee benne' gate ca' xelute bènneache le' lawe' da dxeléajle'e chee Xránadxu. Be' Lá'azxa dxenné': “jCa' naca na, lawe' da xelexezí lazre' ca naca lu zrin da beluné', na' da xrlátaje da beluné' zeajle na benne' ca'!”

*Lina chee xezr la xu*

<sup>14</sup> Nadxa guná'a, na' ble'eda' tu beuj chiche, na' lawe' beuj na' dxe' tu benne' naque' ca Bénnea' gulje' bènneache. Zria tu da naca na oro xíchajé', ne nuxre' tu xia nalá. <sup>15</sup> Bdxuaj tu gubáz chee xabáa lu xudau' da zua xabáa, na' gunné' zizraj. Dxe'e bènnea' dxe'e lawe' beuj:

—jBchine xia nalá chiu', ne becá'a lina, lawe' da ba bzrin zra, na' lina chee xezr la xu ba guca na!

<sup>16</sup> Nadxa bènnea' dxe'e lawe' beuj na' gudine' xia nalá chee' na', na' bequ'é lina chee xezr la xu.

<sup>17</sup> Nadxa xetú gubáz chee xabáa bdxuajé' xudau' da zua xabáa, nuxre' tu xia nalá. <sup>18</sup> Xetú gubáz chee xabáa bdxuajé' lu cugu, gubáz chee xabáa

na' nape' xel-la' dxenná bea lu xi', na' gunné' zizraj. Dxe'e gubáz chee xabáa na' nuxre' xia nalá:

—jBchine xia nalá chiu' na', ne becá'a uva ca' da zaj den lu xezr la xu lawe' da ba güe na'

<sup>19</sup> Na' gubáz chee xabáa na' gudine' xia nalá chee' lawe' xezr la xu, ne bequ'e uva ca' da zaj de lu xezr la xu da zéaje na benne' ca' dxelune' da zrinnaj, na' bzre'e na naga xelesie' na, da na' zéaje na da ba xa' da nucueza Dios chee benne' ca' dxelune' da zrinnaj. <sup>20</sup> Uva ca' gulesie' na naga dxedxuaj xezre, na' naga dxelesie' na bdxuaj dxen chee benne' ca' dxelune' da zrinnaj da gulén na cáтите sibe zua dxu'a bzrina', na' guzá' dxen na' cáтите sadxu du gazre zra.

## 15

*Gubáz chee xabáa ca' zaj nuxre' gazre da ba xa' da xuluzále' xezr la xu*

<sup>1</sup> Ble'eda' xabáa xetú da zrente da xebánedxu, belelá' gazre gubáz chee xabáa zaj nuxre' gazre da ba xa' bzebe, da zaj naca na naga cheajsete xel-la' dxezrá'a chee Dios.

<sup>2</sup> Cá'aqueze ble'eda' tu da naca na ca nísadau' da naca na ca xiaj esa', ne nachixre na xi', na' benne' ca' quebe gulezi lu ne'e da naca na chee be snia na', ne da nacan chee bedau' cheeba', ne xrbaba chee laba', zaj ze' lu nísadau' na' da naca na ca xiaj esa', zaj nuxre' da ca' con zriadi'i na du da ba bnezruj Dios le'. <sup>3</sup> Dxelul-le' da bil-la Moisés, benne' wen zrin chee Dios, ne da dxul-la Bénnea' naque' Zríla'dau', da dxenná na:

Da zrente, ne da dxebánedxu zaj naca xúgute da ba benu' Lue'.

Xran, nacu' Dios napu' duté xel-la' dxenná bea.

Xrlátaje, ne li lazre' zaj naca xrba chiu' Lue'.

Nacu' Wenná Bea chee duté xezr la xu.

<sup>4</sup> ¿Núzraqueze quebe zrebe Lue', Xran?

¿Núzraqueze quebe güe lá'ana Lue'?

Tuze Lue' nacu' lá'azxa.

Xelelá' benne' duté xezr la xu, na' xulucá'ana szrene' Lue',

lawe' da ba belelé'ene' da xrlátaje da nunu'.

<sup>5</sup> Gudé na' gunná'a ne ble'eda' bxfalaj xudau' da zua na xabáa, naga zua lataj naga zaj naxúaj da ca' bdxixruj be'e Dios. <sup>6</sup> Lu xudau' na' beledxúaj gazre gubáz chee xabáa ca' zaj nuxre' gazre da ba xa'. Zra lane' zaj nacue' naca na ladxe' zaca, da naca na ba'a, ne dxelácatite na, na' zaj nasie' lachu'e bazxu da naca na oro. <sup>7</sup> Nadxa tu benne' laduj tapa benne' zaj naca bánqueze' bnézruje' tu tu gubáz gazre ca' tu xé'ena bzri da naca na oro, ne zaj nazrate na da ba xa' da nucueza Dios, Bénnea' zue' chadía chacanna. <sup>8</sup> Guzrate xudau' na' nen zren chee xi' da dxulé'e na ca zaj naca xel-la' szren, ne xel-la' dxenná bea chee Dios, na' netú benne' quebe guca chu'e ga na' cadxa gudé chee da gazre da ba xa' ca' da zaj nuxru gazre gubáz chee xabáa ca'.

## 16

*Da gazre da ba xa' ca'*

<sup>1</sup> Nadxa benda' chi'i tu benne' gunné' zizraj lu xudau'. Dxe'e gazre gubáz chee xabáa ca':

—Le chjaca, le cheajzala da ba xa' ca' lu xezr la xu, da ca' nucueza Dios.

<sup>2</sup> Na' guxéaj gubáz chee xabáa nedxu, xeajlatje' xé'ena bzri chee' lawe' xezr la xu, na' xúgute' bénneache, benne' zaj nazriche luzrgue' la be snia na', ne dxulucá'ana szrene' bedau' cheeba', gulebía we' lu belá' dxen chee benne' ca' da gulále'e na.

<sup>3</sup> Gubáz gudxupe' xeajlatje' xé'ena bzri chee' lu nísadau', na' nísadau' na' bexaca na dxen ca dxen chee benne' gate, na' gulate xúgute' bea zaj naca banba' lu nísadau' na'.

<sup>4</sup> Gubáz guxunne' xeajlatje' xé'ena bzri chee' lu xegu nisa ca', ne lu beaj ca', na' belexaca na dxen. <sup>5</sup> Na' benda' chi'i tu gubáz chee xabáa dxenná be'ene' nisa caní, gunné':

—Xran, Dios Lá'azxa, zúaquezu', ne guzúaquezu'. Xrlátaje nacu' lawe' da guchugu' chee benne' ca' guca caní, <sup>6</sup>lawe' da bululalje' dxen chee benne' chiu' ca', ne chee benne' ca' gulenné' waláz chiu', na' na'a dxuxí'aju' benne' caní dxen lawe' da caní zaj naca chee' xelé'aje'.

<sup>7</sup> Cá'anqueze benda' chi'i tu benne' zue' lu cugu, dxenné':

—Ca' naca na, Xran. Nacu' Dios napu' duté xel-la' dxenná bea. Ba bchi'u chee bénneache ca' ca naca da li, ne da xrlátaje.

<sup>8</sup> Gubáz gudape' xeajlatje' xé'ena bzri chee' lau gubizra, na' gubizra guzí na lataj guzezxe na bénneache ca' nen xi' chee na. <sup>9</sup> Xúgute' bénneache gulézxele'e, ne quebe belexebí'i lazre', ne quebe belúe lá'ane' Dios, san gulenné' da calela chee Bénéa' nucueze' da ba xa' na'.

<sup>10</sup> Gubáz gázxue xeajlatje' xé'ena bzri chee' lawe' lataj naga dxe' be xixre' snia, na' naga dxenná beaba' guchul-la na. Bénneache ca' gulagu xa'a luzre' lu xel-la' dxudía chee', <sup>11</sup> ne quebe bulusané' da zrinnaj da dxeluné'. Gulenné' da calela chee Dios zue' xabáa, lawe' da dxelezaque' caní ne chee we' da zaj zria belá' dxen chee' ca'.

<sup>12</sup> Gubáz xrupe xeajlatje' xé'ena bzri chee' lawe' xegu zren le na Eufrates, na' nisa xegu na' bebizre na, chee xalaj tu neza naga xeledé benne' dxjaca wedil-la chee benne' wenná bea ca' zá'aque' naga dxalaj gubizra.

<sup>13</sup> Nadxa ble'eda' beledxúaj chunna be' xriwe' dxu'a be snia schanni', ne dxu'a be xixre' snia na', ne dxu'a benne' dxenné' waláz cheeba'. Be' xriwe' ca' zaj naca na ca bluzru ca'. <sup>14</sup> Be' xriwe' caní belún na xel-la' waca zri'a ca', na' beledxúaj na chee xulutupa na xúgute' benne' wenná bea chee xezr la xu, chee chjaque' lu wedil-la chee zra zren chee Dios, Bénéa' nape' duté xel-la' dxenná bea.

<sup>15</sup> Dxenná Xránadxu:

—Le na' xque, neda' xida' gate quebe dxebézale neda', ca za' tu benne' gubán. Ba neza zrenté naca na chee bénéa' zue' ban lazre' ne nupé'e lázrdawe' ca tu benne' dxuxúe' zra lané' chee quebe te' gala xídeze, ne quebe xedué'ene' lau bénneache.

<sup>16</sup> Nadxa beledube' benne' wenná bea ca' lu lataj naga le na Armagedón nen dizra' hebreo.

<sup>17</sup> Gubáz gazre na' xeajlatje' xé'ena bzri chee' lu be', na' lu xudau' da zua xabáa ben tu chi'i benne' dxenné' zizraj, da za na lataj blau naga dxe' Dios, dxenné':

—Bache naca na.

<sup>18</sup> Nadxa gulepe xesa, ne guleninne na, ne gulenné' guziu', na' lu xezr la xu guzrú'le'e ca netú lasa quebe ne xru', na' gulálate' zaj zra' bénneache lu xezr la xu. <sup>19</sup> Xezre zrentau' na' guzrá na chunna cue', na' xezre ca' zaj nita lu xezr la xu gulebía xi na, na' xeajsá lazre' Dios benne' ca' chee

xęzre zrentau' na' lę na Babilonia cheę xeledę' lu da ba xa' zren da nucueza Dios lu xel-la' dxezrá'a cheę'. <sup>20</sup> Xúgute xęzr la xu ca' da naxechaj nísadau', ne xúgute xi'a ca' belexenite na. <sup>21</sup> Cá'anqueze belexruj zran xabáa xiaj bezxe' zri'a lawe' bęnneache ca', da dxelá'a na ca tu gaxúa xia weaj, na' bęnneache ca' gulennę' da calela cheę Dios ne cheę da ba xa' da gulezaque', lawe' da guca na tu da ba xa' zrente.

## 17

### *Dios dxuzría xi'e nu'ula dxúnle'e da sban*

<sup>1</sup> Nadxa bla' tu gubáz cheę gazre gubáz cheę xabáa ca', gubáz ca' bululátaję' xé'ena bzri ca', na' guzre' neda':

—Gudá, na' gulé'eda' lue' ca naca da ba xa' da saca' nu'ula na' dxúnle'e da sban, nu'ula na' dxe'e lawe' nísadau' ca'. <sup>2</sup> Benne' wenná bea ca' zaj zre'e xęzr la xu dxelunę' da sban nen nu'ula na', na' benne' zaj zre'e xęzr la xu zaj naque' ca benne' dxelezuzre' lawe' da dxelunę' da sban nen nu'ula na'.

<sup>3</sup> Nadxa, lu da ble'e Be' Lá'azxa neda', gubáz cheę xabáa na' guchę'e neda' lę'e xixre' lawe' lataj, na' lataj na' ble'eda' tu nu'ula zrię' cuzru tu bę xixre' schanni' xrna, na' zaj naxúaj lu bęla' dxen cheęba' laba' schanni' ca', da ca' dxecuide Dios, na' zaj naca gazre xíchajba', ne chi lúzuba'. <sup>4</sup> Nu'ula nigá nacie' zra lanę' bzawe, ne da xrna, na' lechítaję cheę' zaj naca na oro, ne xiaj zrtante, ne bga ca'. Nuxre' tu xé'ena bzri da naca na oro da nazrate na da sgute ca', ne da sban da dxunę'. <sup>5</sup> Naxúaj luzrgue' ca lę', da dxenná na: Babilonia, Xęzre Szrentau', Xrna' Xúgute Nu'ula Ca' Dxelunę' Da Sban, ne Xúgute Da Sgute Da Dę Xęzr La Xu. <sup>6</sup> Nadxa ble'eda' nu'ula na' dxezúzrenę' nen dxen cheę benne' ca' zaj naque' cheę Dios, ne cheę benne' ca' belute bęnneache lę' lawe' da belexechebę' cheę Jesús. Gate ble'eda' da na', bebánele'ęda'. <sup>7</sup> Nadxa gubáz cheę xabáa na' guzre' neda':

—¿Bizr cheę na' dxebánenu'? Gulé'eda' lue' ca naca da nagache cheę nu'ula nigá, ne cheę bę xixre' schanni' na' núaba' lę', bea na' zaj napa gazre xíchajba', ne chi lúzuba'. <sup>8</sup> Bę xixre' schanni' na' blé'enu', nácaba' tu bę zúaba' nédxute, na na'a québedxa zúaba'. Wagüenba' lu lataj chulla nédxudxa ca za gáteba' tu chí'izqueze. Benne' zaj zra' xęzr la xu, ne quebe zaj naxúaj lę' lu xiche cheę xel-la' nabán ca bęnte Dios xęzr la xu, xelexebánele'ęne' gate xelexe'ęne' bea nigá, bę zúaqueze nédxute, na' na'a québedxa zúaba', na' wela'ba'.

<sup>9</sup> Nigá dę late' da gulé'eda' benne' xelėjni'ingę' na. Gazre xíchajba' caní zaj zėję na gazre xi'a naga dxenná bea nu'ula na'. <sup>10</sup> Cá'anqueze xíchajba' ca' zaj zėję na gazre benne' wenná bea. Gazxu' benne' wenná bea caní ba gulatię'. Tu benne' ca' dxenná be'ę na'a, na' xetue' quebe ne xidę'. Gate la' benne' bzebe nigá, québedxa súateque' scha'. <sup>11</sup> Bę xixre' schanni' na', bę zúaba' nédxute, na' na'a québedxa zúaba', zėję na benne' xrunu' naque' benne' wenná bea. Naque' tu benne' ládujla benne' gazre ca', na' te na' gatię' tu chí'izqueze.

<sup>12</sup> Chi lúzu bę xixre' snia na' da blé'enu' zaj naca na chi benne' wenná bea ca', benne' quebe ne xelexú lawę' xelenná be'e, na' xelexię' xel-la' dxenná bea xelaque' wenná bea tu chí'idau'ze tu zren nen bę xixre' schanni' na'. <sup>13</sup> Benne' chi wenná bea caní zaj nunę' tuze dizra', na' xulunęzruje' xel-la' szren cheę', ne xel-la' dxenná bea cheę' lu na' bęnnea'

naque' be xixre' schanni' na'. <sup>14</sup> Benne' caní xeledíl-lalene' Bénnea' naque' Zríla'dau', na' Benne' nigá guzríá xi'e benne' wenná bea ca', lawe' da naca Le' Benne' Wenná Bea chee' benne' wenná bea ca', ne Xrane benne' zaj naque' xrane bénneache, na' benne' ca' zralene' Le', gunné Dios le', ne guque'e le', na' zaj naque' li lazre'.

<sup>15</sup> Cá'anqueze gubáz chee' xabáa na' guzre' neda':

—Nísadau' ca' blé'enu', naga dxe' nu'ula na' dxúnle'e da sban, zaj naca na xezre bénneache ca', ne benne' dxelenné' dizra' walazre' cha chee', ne benne' zane cue' xezr la xu. <sup>16</sup> Chi lúzuba' na' blé'enu' xichaj be xixre' schanni' na', da zaj naca na chi benne' wenná bea ca', xelexu'dene' nu'ula na' dxúnle'e da sban, na' xelebéaj xichaje' le', ne xulucá'ane' le' gala xídeze. Xelawe' bela' dxen chee', ne xuluzezxe' le' lu xi'. <sup>17</sup> Dios bzue' lu lázrdau benne' wenná bea ca' xelune' ca da dxaca lazre' Le', gate belune' tuze dizra', ne bulunézruje' xel-la' dxenná bea chee' lu na' bénnea' naque' be xixre' schanni' na', cadxa gaca ca da ba gunná Dios. <sup>18</sup> Nu'ula na' blé'enu' naque' Babilonia, xezre zrentau' na' dxenná be'e na benne' wenná bea ca' zaj zre'e xezr la xu.

## 18

### *Dxebía xi' xezre Babilonia*

<sup>1</sup> Gudé na' ble'eda' betaj xetú xetú gubáz chee' xabáa, nápalé'e xel-la' dxenná bea, na' bsení' xel-la' szren chee' lu xezr la xu. <sup>2</sup> Na' gunné' zizraj:

—Ba guzríá xi'. Ba guzríá xi' Babilonia, xezre zrentau' na', ne ba bexaca na lataj naga zaj zra' da xriwe' ca', ne lataj naga zaj zra' xúgute' cue' be' xriwe' ca', ne lataj naga zaj zra' be' zua xrila, be' schanni' ca', ne be' sgute ca'. <sup>3</sup> Xúgute' bénneache zaj zre'e tu tu cue' xezr la xu zaj naque' ca' benne' dxelezuzre', lawe' da dxelune' da sban da dxaca xezre na', na' benne' wenná bea ca' zaj zre'e xezr la xu belune' da sban da dxaca xezre na', na' benne' ca' dxelúti'e gulaque' benne' gunní'a ne chee' da zanté da gulezá lazre' benne' ca' zaj zre'e xezre na'.

<sup>4</sup> Nadxa benda' chi'i xetú benne' da za xabáa, dxenné':

—Le dxuaj xezre na', le'e, nácale chia', chee' quebe gácale benne' ca' tuze lu dul-la da dxelune', ne chee' quebe tele lu da ba xa' da xelezaca benne' ca'. <sup>5</sup> Dul-la chee' benne' ca' ba guxán na, na' zaj naca na ca tu da ba bgula, da ba bzrinte na zran xabáa, na' Dios ba xeajsá lazre' ca naca da zrinnaj da dxelún benne' ca'. <sup>6</sup> Dios gunézruje' chee' benne' ca' cáteze da bulunézruje' chee' benne' xula, ne xunézruje' le' chupa cuenla ca da zrinnaj da belune'. Ba nucueze' da xelezaque' da nácale'edxa zi' ca da bulusaque' benne' xula. <sup>7</sup> Gudé' benne' ca' lu da ba xa', ne gudé'e le' xel-la' zi' cáteze na' belune'. Buluzúa cuine' lu xel-la' szren, ne gulezúe' lu xel-la' dxelexezaca ba lazre' chee', lawe' da dxelenné' lu lázrdawe': Dxé'entu' nigá dxenná béantu'. Quebe nácantu' wezebe, ne quebe bi sácantu'. <sup>8</sup> Chee' le' na', tuze zra xelezrín da ba xa' ca' da xelezaque', xel-la' gute, ne xel-la' zi', ne xel-la' dxedún, na' xelezxe' lu xi', lawe' da napa Xránadxu Dios duté xel-la' dxenná bea, na' naque' Bénnea' guchugue' chee' benne' ca' xelezaque' caní.

<sup>9</sup> Benne' wenná bea ca' zaj zre'e xezr la xu, ne belúnle'ne' benne' ca' da sban ne da belexezaca ba lazre', xelebezre xache' gate xelélé'ene' ca naca zren chee' xezre na', da dxezxe na. <sup>10</sup> Welezé' zítu'la lawe' da xelezrebe' xelezaque' ca da dxelezaca benne' ca', na' xelenné':

—Baxache' nácale le'e, benne' zaj zře'ę xęzre zrentau', Babilonia, lawe' da chaditę bla' da ba xa' da dxezácale.

<sup>11</sup> Cá'anqueze benne' ca' dxelúti'e, benne' zaj zře'ę xęzr la xu, welebezre', ne welebezre xáchequeze' ca naca da dxaca cheę xęzre na', lawe' da québedxa nu chilá' benne' si'ę da dxeluti'e,

<sup>12</sup> da zaj naca oro, ne plata,  
ne xiaj xrtantę ca', ne bga ca',  
ne ladxe' zaca ca', ne ladxe' bzawe ne da xrna,  
ne xúgutę cue' xaga ca' dxelelále'ę na zixre,  
ne zřita xrtantę, ne xaga xrtantę,

ne xia gache, ne xia, ne xiaj esa',  
<sup>13</sup> ne lacu zixre, ne xíxre'dau' dxelále'ę na zixre,  
ne xala, ne da ca' dxelelále'ę na zixre,  
ne xrise uva wala, ne za xel-la' wagu,  
ne xrte xezaj, ne zrua' xtila,  
ne bę xixre', bę dxelúa xua',  
ne zřila' ca', ne bžrina' ca',  
ne da ca' dxudé xua,

ne benne' ca' dxelúti'ę le' lu na' benne' gunní'a ca'.

<sup>14</sup> Benne' caní xelé'ę benne' zaj zře'ę xęzre na':

—Na'a québedxa gápale da zixre ca' da zácale'ę na da bdánnelę'ele, ne ba bnítele tu chí'izqueze xúgutę xel-la' gunní'a cheęle, ne da xrtantę cheęle.

<sup>15</sup> Benne' ca' belúti'ę da ca' xelezé' zítu'la lawe' da dxelezrebe' xezezaque' ca da dxelezaca benne' zaj zře'ę xęzre na', na' xelebezre', ne xelebezre xáchequeze', <sup>16</sup> na' xelenné':

—Baxache' zaj naca benne' ca' zaj zře'ę xęzre zrentau' na'. Gulaque' ca tu nu'ula nacue' ladxe' zácale'ę da bzawe, ne da xrna, ne nazí'ę lechítaję da naca na oro, ne xiaj xrtantę, ne bga ca'. <sup>17</sup> Chaditę benite xel-la' gunní'a na', ne guxezxe na.

Xúgutę benne' xrane da ca' dxeledán lawe' nísadau', ne benne' zaj zře'ę lu'ule na, ne benne' dxulusé'ę da ca' dxeledán lawe' nísadau', ne benne' dxelunę' zřin lu nísadau' belezé' zítu'la, <sup>18</sup> na' gate belelé'eng' zřen cheę xęzre na' dxezxe na, na' gulenné' zizraj:

—¿Bízraqueze xetú xęzre naca na da zřen ca xęzre zrentau' nigá?

<sup>19</sup> Dute xel-la' dxelexewí'ine lazre' xuluzřé'ę xu xíchaję' ca', ne xelebezre', ne xelebezre xáchequeze', xelenné':

—Baxache' zaj naca benne' ca' zaj zře'ę xęzre zrentau' na'. Nen xel-la' gunní'a cheę benne' ca' gulenni'a xúgutę benne' ca' zaj napę' da ca' dxeledán lawe' nísadau'. Chaditę guzřía xi' xęzre zrentau' na'.

<sup>20</sup> Ca guca cheę xęzre na', le be, le'e zrale xabáa, ne le'e, gubáz cheę Cristo, ne le'e bchálajle waláz cheę Dios, ne xúgutęle le'e nácale bi cheę Dios, lawe' da gate bzřia xi' Dios xęzre na', bebéaj lazre' da naca cheęle le'e.

<sup>21</sup> Nadxa tu gubáz cheę xabáa, gubáz nápalę'ę xel-la' dxenná bea guchisę' tu xiaj zřen da naca na ca xiaj xiche, na' bzalę' na lu nísadau', gunné':

—Cá'ante cuía xi' Babilonia, xęzre zrentau' na', na' québedxa nu lé'eqezdx a le na, <sup>22</sup> ne québedxa nu xen la neza cheę xęzre na' da ca' dxulugul-la bėnneache, da can zřiadi'i na du, ne bchiuj, ne luzu da dxulucuezře', ne québedxa nu chilá' gun zřin lu xęzre na', ne québedxa xen schaga da dxun da dxutu na. <sup>23</sup> Québedxa gusení' netú xi' lu xęzre na',

ne québedxa xen laní chee wechaga na' ga na', lálcala benne' ca' belúti'e lu xezre na' gulenná be'e lawe' xúgute benne' zaj zre'e xezr la xu, ne gulezí xe'e xúgute cue' xezr la xu nen xel-la' wazrá' chee'.

<sup>24</sup> Caní guca lawe' da lu xezre na' gulalaj dxen chee benne' ca' gulenné' waláz chee Dios, ne dxen chee benne' ca' zaj naque' bi chee Dios, ne dxen chee benne' ca' belute bèneache le' du ca naca xezr la xu.

## 19

<sup>1</sup> Gudé na' benda' chi'i benne' zan zaj zre'e xabáa, dxelenné' zizraj: ¡Gaca ba Dios! ¡Xel-la' weselá, ne xel-la' szren, ne xel-la' dxenná bea zaj naca na chee Dios cheedxu.

<sup>2</sup> Ca dxuchi'a Le', xrlátaje, ne li lazre' naca na!

¡Ba bzria xi'e xezre na' dxulé'e na nu'ula na' núnle'e da sban, nu'ula na' bxrínnaje' bèneache zaj zre'e dute xezr la xu lu da sban da bene'!

¡Dios ba bebéaj lazre' nu'ula na' lawe' da betie' wen zrin ca' chee Dios!

<sup>3</sup> Nadxa gulenné' da xula:

—¡Gaca ba Dios lawe' da tu cuénzqueze zren chee xezre na' dxezxe na!

<sup>4</sup> Nadxa tape dxua benne' gula ca' ne tapa benne' ban ca' buluzú zribe', na' bulucá'ana szrené' Dios, Bènea' dxe'e lataj blau na', dxelenné':

—¡Ca' naca na! ¡Gaca ba Dios!

<sup>5</sup> Nadxa ben tu chi'i benne' lu lataj blau na', dxenné':

¡Le güe lá'ana Dios cheedxu, xúgutele le'e dxunle zrin chee', ne dxezrébele Le', le'e benne' blau, ne benne' quebe nu nácale!

*Laní chee wechaga na' chee Bènea' naque' Zríla'dau'*

<sup>6</sup> Cá'anqueze benda' tu da naca ca chi'i benne' zan, ca dxeleninne zánete xegu, ne ca dxelennéle'e guziu' ca', dxelenné':

¡Gaca ba Dios lawe' da ba guzú lau dxenná bea Xránadxu Dios, Benne' nape' dute xel-la' dxenná bea!

<sup>7</sup> ¡Du be! ¡Béle'equezdxu, ne güe lá'anadxu Le'!

¡Ba bzrin zra chee laní wechaga na' chee Bènea' naque' Zríla'dau'!

Nu'ula na' si'e ba nupá'a cuínabe',

<sup>8</sup> nu'ula na' nazi'ibe' lataj nácube' ladxe' zaca, da quebe nadxén na, ne dxácatite na.

Ladxe' zaca na' zéaje na da xrlátaje da zaj nun benne' ca' zaj naque' bi chee Dios.

<sup>9</sup> Nadxa guzre gubáz chee xabáa neda':

—Bzuaj caní: Ba neza zren naca na chee benne' ca' gunné Dios xeledé'e laní wechaga na' chee Bènea' naque' Zríla'dau'.

Nadxa guzre' neda':

—Da caní zaj naca na dizra' li chee Dios.

<sup>10</sup> Nadxa bzu zriba' lau gubáz chee xabáa na' chee gucá'ana szrena' le', na' le' guzre' neda':

—Quebe gunu' caní lawe' da nácaqueza' neda' wen zrin chee Dios ca lue', ne ca benne' bichu' ca' zéajle da li na' da ble'e Jesús le'e. Bca'ana szren Dios. Da li na' da ble'e Jesús le'e naca na da dxelenná benne' ca' dxuluchálaje' waláz chee Dios.

*Benne' zrie' bzrina' chiche*

<sup>11</sup> Nadxa ble'eda' ba naxalaj xabáa, na' ble'e lau tu bzrina' chiche, na' Benne' zrie'-ba' le' Du Lazre', ne Li Lazre', lawe' da dxenná be'e, ne dxuné'

wedil-la lu da xrlátaję. <sup>12</sup> Xiaj lawę' dxelácatite na ca xi' ca, na' xíchaję' zaj zria zánęte da zaca ca', na' naxúaj tu le' lawę', da nézene' tuze Le'. <sup>13</sup> Nacue' tu zre' da nazaj na dxen, na' La Le' naca na Xrtizra Dios. <sup>14</sup> Xúgute benne' ca' zaj zre'e xabáa zjácálene' Le', zaj nacue' ladxe' zaca ca', ladxe' chiche zriladau', ne zaj zrie' bzrina' chiche ca'. <sup>15</sup> Dxu'a Bénnea' zua tu da naca na ca tu xia nalále'e da quine' benne' xezre ca', na' nna be'ene' benne' ca' nen tu bar xia. Le' guzría xi'e benne' ca' ca tu benne' dxesie' uva ca', ne dxuláję' na, da zéaję na da ba xa' da nucueza Dios lu xel-la' dxezrá'a cheę', ca da xelezaca bénneache ca'. <sup>16</sup> Naxúaj le'e zre', ne zríchuję' da nazí Le' caní: Benne' Dxenná Be'ene' Benne' Wenná Bea Ca', ne Xrane Benne' Ca' Zaj Naque' Xrane Bénneache.

<sup>17</sup> Nadxa ble'eda' tu gubáz cheę xabáa ze' lu gubizra, na' gunné' zizraj xúgute be zua xrila, be dxeledá zran xabáa, dxenné':

—Le da. Le zraga gágule da dxúnnale'e Dios le'e, <sup>18</sup> cheę gágule beła dxen cheę benne' wenná bea ca', ne cheę benne' dxelenná be'e lu wedil-la, ne cheę benne' wal-la ca', ne cheę bzrina' ca', ne cheę benne' zaj zrie'-ba', ne cheę xúgute bénneache, benne' ca' zaj nadá'ue', ne benne' ca' quebe zaj nadá'ue', benne' blau ca' ne benne' quebe nu zaj naque'.

<sup>19</sup> Nadxa ble'eda' be xixre' schanni', ne ca naca benne' wenná bea zaj zre'e xezr la xu nen benne' dxjaca wedil-la cheę ' ca', ba nazrague' cheę xeledíl-lalęne' Bénnea' zrie' bzrina' chiche na', ne nen benne' ca' zaj de'e Le'. <sup>20</sup> Gulęl-le' be xixre' schanni' na' tu zren nen bénnea' gunné' waláz cheęba', bénnea' bęnlę'e xel-la' waca zren lauba'. Ne cheę xel-la' waca caní da bęne', benne' nigá guzi xe'e benne' ca' belú'e lataj guzriche luzrgue' laba', ne bulucá'ana szrene' bedau' cheęba'. Nadxa beleché'e be xixre' schanni' na', ne bénnea' gunné' waláz cheęba', na' belegu'e le' zaj nabante' lu xi' cheę da dxuzézxęle'e na da dxe' ca tu nísadau'. <sup>21</sup> Nadxa Bénnea' zrie' bzrina' chiche be'ie' benne' ca' xezícala nen xia nalá na' zua dxu'e, na' xúgute bea ca' zaj zua xrila gulélajba' beła dxen cheę benne' ca'.

## 20

### *Chi gaxúa iza*

<sup>1</sup> Gudé na' ble'eda' betaj tu gubáz cheę xabáa, nuxre' zren xia cheę lataj chul-la, ne nuxre' tu du xia zren. <sup>2</sup> Gubáz nigá gudęl-le' be snia schanni', nácaba' beła zua nédxute, ne nácaba' da xriwe', ne Satanás, na' bcheaję'-ba' du xia lawe' chi gaxúa iza. <sup>3</sup> Na' gudxú'unę'-ba' lataj chul-la na' naga bsézxuję'-ba', na' bde'e le'e dxa xu'u na' tu da gunna bea na, cheę québedxa si xe na bénneache cheę xezr la xu ca' cadxa te chi gaxúa iza. Te cheę chi gaxúa iza, dxal-la' xelá' na tu chí'idau'.

<sup>4</sup> Nadxa ble'eda' lataj blau ca', naga zaj dxe' benne' ca' ba zaj nazi'e xel-la' dxenná bea cheę xuluchi'e ca da zaj nun bénneache. Cá'anqueze ble'eda' benne'du ca' gulęxú'u bénneache ca' gulechugu bénneache xíchaję' lawe' da belexechebe' cheę Jesús, ne buluchálaję' xrtizra Dios. Benne' caní quebe bulucá'ana szrene' be xixre' schanni' na', ne bedau' cheęba', ne quebe belú'e lataj zriche laba' luzrgue', u ne'e. <sup>5</sup> Benne' gate ca' xezícala quebe xelexebane' ca tedxa cheę chi gaxúa iza ca'. Da nigá guca naca na xel-la' dxexebán nedxu. <sup>6</sup> Ba neza zrentę naca na cheę benne' ca' zaj naque' bi cheę Dios, benne' ca' xelexebane' nedxu. Da zi' da xa' da zeajlí canna quebe seque' bi gune na benne' ca'. Xelaque' bxruze cheę Dios, ne cheę Cristo, na' xelenná be'e tu zren nen Le' chí gaxúa iza.



<sup>7</sup> Ca te chee chi gaxúa iza ca', na' la' Satanás naga nadxéaj na, <sup>8</sup> na' xedxúaj na chee cheajxri xę na bėnneache zaj zre'e xúgute cue' xęzr la xu ca'. Si xę na bėnneache xęzre Gog, ne xęzre Magog, na' guchaga na benne' dxjaque' wedil-la chee xúgute cue' xęzr la xu lu wedil-la, na' benne' dxjaque' wedil-la zaj naque' benne' zan ca naxán xuzre' da dxe' dxu'a tu xęgu zren. <sup>9</sup> Ca' guca, beledxúaje' du ca naca lu xęzr la xu, na' guléchaje' naga zaj zra' benne' zaj naque' chee Dios, ne xęzre na' da nazrí'i Dios. Nadxa Dios gusel-le' xi' da za' xabáa, na' bzezxe xi' na' ca naca benne' ca'. <sup>10</sup> Nadxa gulel-le' da xriwe', da guzi xę na bėnneache ca', na' guledxú'une' na lu xi' chee da dxuzézrele'e na da dxe' ca tu nísadau', naga zaj zra' bę xixre' schanni', ne bėnnea' gunné' waláz cheęba'. Lu xi' na' xeledé'e lu da ba xa' te zra, ne chizrela chadía chacanna.

*Dios dxe'e lataj blau chiche, dxuchi'e chee benne' ca' dxelune' da zrinnaj*

<sup>11</sup> Nadxa ble'eda' tu lataj blau chiche, ne Bėnnea' dxe'e lataj na'. Lau Le' belexenite xęzr la xu, ne xabáa, na' québedxa nu benne' lé'ene' da ca'. <sup>12</sup> Nadxa ble'eda' benne' gate ca', benne' blau, ne benne' quebe nu zaj naque', zaj ze' lau Dios, na' belexalaj xiche ca', ne cá'aqueze xetú xiche naga zaj naxúaj la benne' ca' zaj nape' xel-la' nabán. Dios bchi'e chee benne' ca' cáteze da belún tu tue', da ca' zaj naxúaj na lu xiche ca'. <sup>13</sup> Belexedxúaj benne' gate ca' zaj nagache' lu nísadau', ne belexedxúaj benne' gate ca' zaj nagache' lataj chul-la chee benne' gate, na' Dios bchi'e chee xúgute' cáteze da belún tu tue'. <sup>14</sup> Nadxa guledxú'une' benne' gate ca' gulezú'e' lataj chul-la naga zra' benne' gate lu xi' chee da dxuzézrele'e na da dxe' ca tu nísadau'. Xi' nigá naca na da zi' da xa' da zeajlí canna, <sup>15</sup> na' lu xi' nigá guledxú'une' xúgute' benne' ca' quebe zaj naxúaj le' lu xiche chee xel-la' nabán.

## 21

*Tu xabáa cube ne tu xęzr la xu cube*

<sup>1</sup> Ca gudé na' ble'eda' tu xabáa cube, ne tu xęzr la xu cube, lawe' da belexenite xabáa nedxu, ne xęzr la xu nedxu, na' québedxa de nísadau'. <sup>2</sup> Neda', Juan, ble'eda' xęzre lá'azxa, da naca na Jerusalén cube, dxetaj na xabáa, za na naga zua Dios. Xęzre na' nabeza na ca tu nu'ula wechaga na' nupá'a cuínabe' chee gácabe' tuze nen benne' cheębe'. <sup>3</sup> Benda' chi'i tu benne' da za' xabáa, dxenné':

—Gunná'xque, Dios zue' ládujla bėnneache, na' xelaque' xęzre chee', na' Dios súaqueze' nen benne' ca', ne gaque' Dios chee'. <sup>4</sup> Dios tu súalezqueze' benne' ca' chee québedxa xelebezre', na' québedxa gata' xel-la' gute, ne xel-la' gubezre, ne xel-la' dxebezre xache', ne xel-la' dxudía, lawe' da ba gudé chee xúgute' da gulaca nédxute.

<sup>5</sup> Nadxa Dios, Bėnnea' dxe'e lataj blau na' gunné':

—Gunná'xque, neda' dxuna' cube xúgute' da ca'.

Cá'aqueze gunné':

—Bzuj dizra' caní lawe' da naca li lazre', na' waca guxrén lázrele le' na.

<sup>6</sup> Gudé na' guzre' neda':

—Ba bęna' xúgute' da ba gunnía' guna'. Neda' naca' Benne' zúaqueze' nédxudaute, ne Benne' zúaqueze' bzébedxa. Naca' Bėnnea' dxuna' su lau sua xúgute, ne dxuna' xęzuzre na. Nu benne' dxebilene', neda' gunézruja' nisa beaj xí'aje' da gunezruj na le' xel-la' nabán, ne quebe bi quízruje'. <sup>7</sup> Nu benne' zrue'ene' si'e xúgute' da caní, neda' gaca' Dios chee', na' le' gaque'

zri'ina'. <sup>8</sup>Benne' ca' zaj naque' zra' chebe, ne benne' ca' quebe dxeléajle' chia', ne benne' ca' dxelune' da zrinnaj, ne benne' ca' dxelutie' benne', ne benne' dxelune' da sban, ne benne' wazrá' ca', ne benne' dxulucá'ana szrene' bedau' xiaj xaga ca', ne xúgute' benne' dxelún lazre', gudéa' le' lu xi' chee' da dxuzézrele' e na da dxe' ca' nísadau', da naca na da zi' da xa' da zeajlí canna.

### *Jerusalén cube*

<sup>9</sup>Nadxa bla' tu gubáz chee' gazre gubáz chee' xabáa ca' belúxruē' gazre xé'ena bzri ca' naga zaj xu'u da gazre da ba xa' bzebe ca', na' guzre' neda': —Gudá. Gulé'eda' lue' nu'ula wechaga na', zru'ula Bénnea' naque' Zríla'dau'.

<sup>10</sup>Lu da ble'e Be' Lá'azxa neda', gubáz chee' xabáa na' guché'e neda' tu xi'a zren, ne sibe, na' blé'ene' neda' ca' naca xezre lá'azxa zren na', Jerusalén cube. Dxetaj na xabáa naga zua Dios. <sup>11</sup>Xezre nigá dxácatite na nen da xabáa chee' Dios, na' xel-la' dxácatite chee' na naca na ca dxácatite tu xiaj xrtante, ca tu xiaj jaspe, da naca na ca xiaj esa' xrtante. <sup>12</sup>Dxu'a xezre na' naxechaj na tu ze'e sibe, na' napa na chazrinnu dxa xu'u, na' tu tu dxa xu'u ca' zaj ze' tu weaj gubáz chee' xabáa, na' le'e dxa xu'u ca' zaj naxúaj la chazrinnu cue' benne' Israel. <sup>13</sup>Zaj zua chunna dxa xu'u weaj dapa sácatē. <sup>14</sup>Lu lane ze'e da naxechaj na xezre na' zaj zra' chazrinnu xiaj, na' zaj naxúaj lu xiaj ca' la chazrinnu benne' gubáz chee' Bénnea' naque' Zríla'dau'.

<sup>15</sup>Gubáz chee' xabáa na' dxuchálajlene' neda' nuxre' tu da naca na ca tu xia xtila da naca na oro chee' gudxixre' xezre na', ne dxa xu'u chee' na ca', ne ze'e da naxechaj na. <sup>16</sup>Xezre na' naca na lébete' dapa saca. Lébete' naca na xel-la' tunna, ne xel-la' laga chee' na. Gubáz na' bdxixre' xezre na' nen da nuxre', na' naca na laga catite sadxu tapa gaxúa zra, na' xel-la' laga, ne xel-la' tunna, ne xel-la' sibe chee' na zaj naca na lébete'. <sup>17</sup>Gudé na' bdxixre' xel-la' sibe chee' ze'e na' naxechaj na. Naca na tu gaxúa tape xun zrita, na' chazrita chee' gubáz chee' xabáa na' naca na lébete' ca chee' bénneache.

<sup>18</sup>Ze'e na' da naxechaj na xezre na' naca na xiaj jaspe, na' xezre na' naca na oro du lazre', da naca na ca xiaj esa' du lazre'. <sup>19</sup>Xiaj lane ze'e na' zaj naca na xiaj xrtante' ca':

Xiaj nedxu naca na xiaj jaspe,  
na' xiaj gudxupe' naca na xiaj zafiro,  
na' xiaj guxunne' naca na xiaj ágata,  
na' xiaj gudape' naca na xiaj esmeralda,  
<sup>20</sup>na' xiaj gázxue naca na xiaj ónice,  
na' xiaj xrupe naca na xiaj cornalina,  
na' xiaj gazre naca na xiaj crisólito,  
na' xiaj xrunu' naca na xiaj berilo,  
na' xiaj ga naca na xiaj topacio,  
na' xiaj chi naca na xiaj crisoprasa,  
na' xiaj chinéaj naca na xiaj jacinto,  
na' xiaj chazrinnu naca na xiaj amatista.

<sup>21</sup>Chazrinnu da dxusezuj na dxa xu'u ca' zaj naca na chazrinnu bga ca'. Tu tu na naca na tuze bga. Neza blau chee' xezre na' naca na oro du lazre', ca xiaj esa' du lazre'.

<sup>22</sup> Quebe ble'eda' netú xudau' xezre na', lawe' da Xránadxu Dios, Bénnea' nape' duté xel-la' dxenná bea, nácaqueze' xudau' chee xezre na', ne cá'aqueze naca Bénnea' naque' Zríla'dau'. <sup>23</sup> Xezre na' quebe nachine na gusení' gubizra na', ne beu', lawe' da dxusení'queze da xabáa chee Dios ga na', na' Bénnea' naque' Zríla'dau' naque' xel-la' naxaní' chee na. <sup>24</sup> Bénneache chee xúgute cue' xezr la xu, bénneache gulelé', xeledé' lu xel-la' naxaní' chee xezre na', na' benne' wenná bea ca' chee xezr la xu xelu'e da gunni'a chee' lu xezre na'. <sup>25</sup> Dxa xu'u chee xezre na' quebe xelexxuj na te zra, na' québedxa gata' chizrela. <sup>26</sup> Xelu'e xel-la' szren, ne xel-la' ba lá'ana chee xúgute cue' xezr la xu lu xezre na'. <sup>27</sup> Cabata' chu'u da sban ga na', ne netú benne' dxune' da zrinnaj, ne netú benne' dxun lazre'. Xelú'uze benne' ca' zaj naxúaj le' lu xiche chee xel-la' nabán da napa Bénnea' naque' Zríla'dau'.

## 22

<sup>1</sup> Nadxa gubáz chee xabáa na' blé'ene' neda' tu xegu nisa da dxunna na xel-la' nabán. Naca na xaní' ca xiaj esa', na' dxedxuaj na lataj blau naga zaj dxe' Dios, ne Bénnea' naque' Zríla'dau'. <sup>2</sup> Laduj neza blau chee xezre na' zaj naxaza xaga dxupa la'a dxu'a xegu na', na' da zixre chee xaga caní' zaj naca na da dxunna na xel-la' nabán, ne dxebía na da zixre chazrinna lasa tu tu iza. Dxebía na da zixre chee na tu tu beu', na' xrlegue xaga na' naca na da dxexún na benne' zaj zre'e du gabí'i xezr la xu. <sup>3</sup> Québedxa bi gata' da xu'u de'. Lataj blau naga zaj dxe' Dios, ne Bénnea' naque' Zríla'dau' sua na lu xezre na', na' benne' wen zrin chee' ca' xulucá'ana szrene' Le'. <sup>4</sup> Xelelé'ene' Le' caníqueze, na' La Dios zriche na luzrgá benne' ca'. <sup>5</sup> Québedxa gata' chizrela ga na', na' benne' zaj zre'e na' quebe xelechinne' xi', ne xel-la' naxaní' chee gubizra, lawe' da Xránadxu Dios gusení'e benne' ca', na' benne' ca' xelenná be'e chadía chacanna.

### *Ba zua gagu zra xelá' Cristo*

<sup>6</sup> Nadxa gubáz chee xabáa na' guzre' neda':

—Dizra' caní' zaj naca na li lazre', ne waca guxrén lázrele le' na. Xránadxu Dios, Bénnea' dxuzúe' Be' chee' xichaj lázrdau benne' ca' dxelenné' waláz chee' ba gusel-le' gubáz chee xabáa chee' chee gulé'ene' benne' wen zrin chee' da ba zua gaca, <sup>7</sup> dxenné': “La zátequeza'. Ba neza zrente naca na chee benne' zéajlene' dizra' chee Dios da naxúaj na lu xiche nigá.”

<sup>8</sup> Neda', Juan, benda', ne ble'eda' da caní'. Ca gudé benda' na, na' bzu zriba' zran ni'a gubáz chee xabáa na', gubáz blé'ene' neda' da caní' chee gucá'ana szrena' le'. <sup>9</sup> Na' le' guzre' neda':

—Quebe gunu' ca' lawe' da naca' wen zrin chee Dios ca nacu' lue', ne ca zaj naca benne' bichu' ca' dxelenné' waláz chee Dios, ne ca zaj naca xúgute benne' ca' zjácalene' ca da naxúaj na lu xiche nigá. Bca'ana szren Dios.

<sup>10</sup> Cá'aqueze guzre' neda':

—Quebe gucachu' ca naca dizra' chee Dios da naxúaj na lu xiche nigá lawe' da ba zua gaca da naxúaj na. <sup>11</sup> Dxácaté na', be' lataj benne' dxelune' da zrinnaj xelúnqueze' da zrinnaj dxelune', ne benne' ca' dxelune' da sban xelúnqueze' da sban na', san benne' xrlátaje ca' xelúnqueze' da xrlátaje, na' benne' zaj naque' bi chee Dios chjácalequeze' da naca na chee'.

<sup>12</sup> Dxenné':

—Ca' naca. La zátequeza', ne nu'a ca naca da gunézruja' tu tu benne' ca', cáteze da zaj nun tu tué'. <sup>13</sup> Neda' naca' benne' zúaqueza' nédxudautē, ne benne' zúaqueza' bzébedxa, bénnea' dxuna' su lau sua xúgute, ne dxuna' xexuzre na. <sup>14</sup> Ba neza zrente naca na chee benne' ca' dxulupé'ē xichaj lárzdawē' ca tu benne' dxibe' zra lanē', chee xelape' lataj xelawē' da zixre chee xaga da dxunna na xel-la' nabán, na' caní xelezéqueñe' xelu'ē lu dxa xu'u chee xezre na'. <sup>15</sup> Benne' ca' dxelunē' da zrinnaj quebe xelu'ē ga na', ne québequeze xelú'u benne' wazrá' ca', ne benne' dxelunē' da sban ca', ne benne' wete benne', ne benne' dxulucá'ana szrene' bedau' xiaj xaga ca', ne benne' zaj nazri'ine' da wen lazre', ne benne' dxelún lazre'. <sup>16</sup> Neda', Jesús, ba gusel-la' gubáz chee xabáa chia' chee xuluzenne' tu tu cue' bénneache chia' ca naca da nigá. Neda' naca' ca xra xrtau David, benne' wenná bea, ne naca' zri'ine zre sua David na'. Neda' naca' ca belaj zila da dxácatitele'ē na.

<sup>17</sup> Be' Lá'azxa, ne benne' ca' zaj naca ca zru'ula Bénnea' naque' Zríla'dau', dxelenné':

—Gudá, Xran.

Nu benne' xenne' da nigá dxal-la' nne':

—Gudá, Xran.

Benne' dxebilene', ne dxaca lazre' dxal-la' xide', na' xí'aje' nisa da dxunna na xel-la' nabán, na' quebe bi quízruje'.

<sup>18</sup> Xúgutele le'e dxulábale dízra' chee Dios da naxúaj na lu xiche nigá, neda' dxuzéajni'ida' le'e da nigá: Che nu benne' bi gudé'ē chee da caní, Dios gudé'ē chee bénnea' da ba xa' ca' da zaj naxúaj na lu xiche nigá.

<sup>19</sup> Cá'anqueze che nu benne' bi xequé'ē chee da zaj naxúaj na lu xiche nigá, Dios wecá'aqueze' da naca chee bénnea' lu xiche chee xel-la' nabán, ne lu xezre lá'azxa chee', cáteze naxúaj na lu xiche nigá.

<sup>20</sup> Xránadxu, Bénnea' dxulé'ene' da nigá, dxenné':

—Ca' naca na. La zátequeza'.

¡Ca' gaca na! ¡Gudá, Xrana' Jesús!

<sup>21</sup> Dxenaba' Xránadxu Jesucristo gunē' da chawe' chee le'e, xúgutele. ¡Ca'an gaca na!

## SALMO CA'

### 1

<sup>1</sup> Ba neza zrente naca na chee Bénnea'  
quebe dxezi'e da dxuluzéajni'i benne' wen da calela ca' le',  
ne quebe dxune' tuze benne' dul-la ca',  
ne quebe dxune' tu zren benne' ca' dxelún le' chee Dios.

<sup>2</sup> Zue' xel-la' dxebé lawe' da dxuzúe' dizra'  
da nadxixruj bea Xránadxu,

ne ca naca da nadxixruj bea na,  
te zra ne chizrela dxelaba lazre' na.

<sup>3</sup> Benne' nigá naque' ca tu xaga zua na dxu'a xegu nisa,  
da dxunna na da zixre chee na lu beu' cheéqueze na,  
ne xrlégue na quebe dxase na.

Ca naca da dxun benne' nigá, dxepe ban na.

<sup>4</sup> Quegá caní zaj naca benne' wen da calela ca'.

Zaj naque' ca tu xizre laga' da dxua be' bdunu'.

<sup>5</sup> Quebe xelexegá'ana chawe' benne' wen da calela ca'  
gate guchi'a Dios chee',

ne quebe xelú'u benne' dul-la ca' naga zaj nazraga  
benne' xrlátaje ca'.

<sup>6</sup> Dxezaca ba lazre' Dios ca da dxelún benne' xrlátaje ca'.

Da dxelún benne' wen da calela ca'  
che na le' naga xelebía xi'e.

### 2

<sup>1</sup> ¿Bizr chee na' dxeledábaga benne' xezr la xu ca' neda'?

¿Bizr chee na' dxululaba lázrequeze Bénneache  
da guzúa na neda' chalá'ala?

<sup>2</sup> Dxeledábagaqueze benne' wenná bea ca',  
ne dxelún tuze dizra' benne' ca' dxelenná bea ca xelune'  
chee Xránadxu Dios, ne chee Bénnea' gucá'a Le'.

<sup>3</sup> Dxelenné': "Guselá cuínadxu lu xel-la' dxenná bea chee',  
ne guzúadxu chalá'ala da zaj nadxixruj bé'ene' dxi'u."

<sup>4</sup> Naga dxe' Xránadxu xabáa dxuzrizre'.

Quebe dxezí' leñe' chee da dxelegú'u lazre' xelune'.

<sup>5</sup> Lu xel-la' dxezrá'a chee' dxedil-le' le',

ne lu xel-la' snia chee' dxuchebe' le'.

<sup>6</sup> Dxenné': "Lu xi'a lá'azxa chia', xi'a Sión  
ba nuzúa' benne' gaque' Wenná Bea waláz chia' neda'."

<sup>7</sup> Dxenná Wenná Bea na: "Guzenda' le'e da  
guzre Xránadxu neda'."

Guzre' neda': "Lue' nacu' Zri'ina'. Ná'aqueze naca' Xrau'.

<sup>8</sup> Gunabe neda', na' gunna' Lue' xúgute' cue' xezr la xu ca',  
na' gaca chiu' duté ca naca xezr la xu.

<sup>9</sup> Guzíxenu' Bénneache xezr la xu ca' nen vara xia,  
ne ca tu dxe'e xu guzuzru' le'."

<sup>10</sup> Na'a, le'e, wenná bea, le xene da nigá dxuzéajni'ida' le'e.

Le gusede da nigá dxusízreda' le'e,

benne' dxelenná bea lu xezr la xu.

11 Le gun zrin chee Xránadxu Dios, dutē xel-la' dxezrebe cheeḷe.  
 Nen xel-la' dxezrize cheeḷe, le be lau Le'.

12 Le gapa ba lá'ana Zrí'ine' chee quebe zre'e,  
 checa' cuía xile la neza cheeḷe, lawe' da la zra'atē Le'.  
 Da ba neza zrentē naca na chee xúgute benne'  
 dxuluxrén lazre' Le'.

### 3

1 Xrana' Dios, ba naxánle'e benne' dxeledábague' neda'.  
 Benne' zantē dxeledíl-lalēne' neda'.  
 2 Benne' zantē dxelenné' chia': "Quebe guselá Dios le'."  
 3 Lue', Xrana' Dios, dxucú'uju' neda'.  
 Nacu' Benne' dxebéḷena', ne Benne' dxuzé chawe' neda'.

4 Gudxezre xa'a, bláwizra' Xrana' Dios,  
 na' Le' becheḷe' chia' naga zue' lu xi'a lá'azxa chee'.

5 Guta', ne gusia',  
 na' bebana' lawe' da nuxru Xrana' neda'.

6 Quebe zreba' gaxúa gaxúa bēnneache,  
 benne' zaj naxéchaje' neda'.

7 Guzé, Xrana' Dios.  
 Bselá neda', Dios chia'.  
 Ben we' xraga benne' ca' dxeledíl-lalēne' neda',  
 ne guzuzruj lazxa benne' xriwe' ca'.

8 Xel-la' weselá za' lu na'u, Xrana' Dios.  
 Ben da chawe' chee bēnneache chiu'.

### 4

1 Becheḷe chia' gate dxuláwizra' Lue', Dios.  
 Nacu' Benne' dxuchi'e ca da dxuna'.  
 Gate guzúa' lu da stebe, Lue' btipu' lazra'.  
 Bexache lazre' neda', ne bene ca da dxuchálajḷena' Lue'.

2 Le'e, bēnneache, ¿ájatešcha' gucá'ana díjtale neda'?

¿Ájatešcha' zri'ile da quebe zaca, ne chéajḷe da wen lazre'?

3 Le xexúnbea ba gucá'a Xránadxu  
 nu benne' dxape' Le' ba lá'ana.  
 Xrana' Dios xenne' gate dxuláwizra' Le'.

4 Le zrebe lau Dios, ne quebe gunle dul-la.  
 Le gulaba lazre' chee' naga dxásale, ne le sua zrize.

5 Le gute lau Le' béadu ca' lu da naca du lazre',  
 ne le guxrén lázre' Xránadxu Dios.

6 Benne' zantē dxelenné': "¿Nuzra gun gá'anatu' chawe'?"  
 Dutē xel-la' zri'i lazre' chiu' bxue netu', Xran.

7 Lue' bzu' xel-la' dxebé lu xichaj lázrdawa',  
 da naca na zrendxa ca da zaj napa benne' zaj nápalē'e zrua',  
 ne xrise uva wal-la.

8 Dutē xel-la' dxebeza zri lazre' gata', ne gasia',  
 lawe' da dxunu' Lue', Xran, zua' zri'a chawe'.

### 5

1 Bze naga dizra' chia', Xran.

Bde lazre' ca dxebezre lazra'.

<sup>2</sup> Bene ca guchálajlena' Lue', Wenná Bea chia', ne Dios chia', q lawe' da guláwizraja' Lue', Dios.

<sup>3</sup> Xran, che zílala xennu' chi'a.

Che zílala xídaqueza' lau Lue', ne wabeza lazra' Lue'.

<sup>4</sup> Nacu' Dios quebe dzezaca ba lazru' da calela.

Benne' wen da calela quebe súaqueze' naga zu' Lue'.

<sup>5</sup> Quebe dxu'u lataj xelezrín benne' wen da calela lau'.

Dxecuídenu' xúgutē benne' dxelunē da zrinnaj.

<sup>6</sup> Guzría xí'quezu' benne' ca' dxelezí xē'e.

Guzú' chalá'ala benne' wete benne', ne benne' guzrí xē'.

<sup>7</sup> Neda' waca chu'a lizru' lawe' da nazrí'ile'enu' neda'.

Güe lá'ana' Lue' lu xudau' lá'azxa chiu' dutē xel-la' dxezrebe.

<sup>8</sup> Bsi neda' chee' guna' da xrlátaje chiu', Xran,

lawe' da zrále'ē benne' dxeledábage' neda'.

Gulú'u neda' neza chawe' chiu'.

<sup>9</sup> Benne' caní quebe dxelennē da li.

Lu xichaj lázrdawē xu'u da calela.

Xedxu lbē'e zaj naca na ca tu ba chee benne' gate da naxalaj na.

Zaj nupé'ē dizra' chawe' chee' da zaj naca na da wen lazre'.

<sup>10</sup> Bde benne' ca' lu da ba xa', Xrana' Dios.

Ben cheajlecházie' cáteze zaj naca xrtízraqueze'.

Lawe' da naxánle'ē da calela da dxelune'

ne lawe' da guledábage' Lue', bebéaje' chalá'ala.

<sup>11</sup> Welebélē'ē benne' ca' dxuluxrén lazre' Lue'.

Welebézre xá'aqueze' dutē xel-la' dxelebé

lawe' da dxucú'uju' le'.

Lau Lue' welebélē'ē benne' ca' zaj nazrí'ine' Lue'.

<sup>12</sup> Gúnquezu' da chawe' chee' benne' xrlátaje, Xran.

Gucu'uju' bēnea' lawe' da dzezaca ba lázrele'nu' le'.

## 6

<sup>1</sup> Lue', Xran, quebe til-lu' neda' lu xel-la' snia chiu',

ne quebe gudéu' neda' ba xa' lu xel-la' dxezrá'a chiu'.

<sup>2</sup> Bexache lazre' neda', Xran, lawe' da quebe chawe' zua'.

Bexún neda', Xran, lawe' da dxedéa' xel-la' zi'.

<sup>3</sup> Stébele'ē zua xichaj lázrdawa'.

Xran, ¿bátala gácalenu' neda'?

<sup>4</sup> Gudá, Xran, bselá bēne'du xu'a.

Bselá neda' dutē xel-la' zri'i lazre' chiu'.

<sup>5</sup> Naga zaj zra' benne' gate ca', quebe nu dxeajsá lazre' Lue'.

Lu lataj ba xa' ¿núzraqueze güe lá'ana Lue'?

<sup>6</sup> Ba dxexedú lazra' lawe' da dxebezre lazra'.

Tu zre' tu zre' dxebísane ga dxásia' nisa da dxebezra'.

Dxusebisa' xrcugua' nisa da dxebezra'.

<sup>7</sup> Ba dxane xiaj lawa' xel-la' dxebezre.

Ba bebízrqueze nisa xuzru xiaj lawa' lawe' da zrále'ē

benne' dxulusaca zi'e neda'.

<sup>8</sup> Le cuasa naga zua', xúgutēle dxunle da zrinnaj

lawe' da ba ben Dios dxebézrele'a.

<sup>9</sup> Xrana' Dios ba benne' da dxata' xueda' Le'.

Ba guzí' Xrana' Dios da dxuchálajlena' Le'.

10 Dxelexedué'e, ne zaj zua lu da stébele'e xúgute  
benne' dxeledábague' neda'.  
Chadite xelexebigue' naga zua', ne xelexedué'ene'.

## 7

1 Xrana' Dios, dxuxrén lazra' Lue'.  
Gúcale neda' ne bselá neda' lu na' benne' ca' dxulusaca zi'e  
neda',  
2 chee quebe xelet-le' neda' ca dxun bezre xixre',  
na' xuluzúzruje' neda' naga quebe nu chilá' nu guselá neda'.  
3 Xrana' Dios, che bēna' neda' caní:  
Che bi da zrinnaj bēn nī'a nā'a.  
4 Che bi da calela bēna' chee benne' zue' chawe' nen neda'.  
(Bselá' bēneea' dxedábague' neda' lácala quebe bi nuna' chee'.)  
5 Che caní bēna',  
bē lataj benne' dxedábague' neda' gau zi' ne xezrúnene' neda'.  
Bē lataj bēneea' guchuchu guléaje' neda' lu xu,  
ne xusunitie' xel-la' ba lá'ana chia'.  
6 Xran, dutē xel-la' dxezrá'a chiu', guzé.  
Bexechaj benne' ca' dxulusaca zi'e neda' lu xel-la' dxelezrá'a chee'.  
Gusel-la da gácale na neda' gate guchi'u da dxaca chia'  
ca da gunná be'u.  
7 Xúgute benne' zaj zre'e xezr la xu xelezrague' lau'.  
Gunná be'e benne' ca' dutē xel-la' szren chiu'.  
8 Lue', Xran, guchi'u chee benne' xúgute xezre.  
Bchi'a ca da nuna' lu da naca xrlátaje,  
ne lu da naca du lazre' chia'.  
9 Bēn cheajsé naze da zrinnaj da dxelún benne' wēn da calela ca',  
san bzua chawe' benne' xrlátaje,  
lawe' da nacu' xrlátaje, Dios, ne dxenná'u da xu'u  
xichaj lázrdau bēneache.  
10 Diósqueze dxucu'uje' neda'.  
Dxuselé' benne' zaj naque' du lazre'.  
11 Xlátaje dxuchi'a Dios chee da dxelún bēneache.  
Tu dxezrá'azqueze Dios da dxelún benne' wēn da zrinnaj ca'.  
12 Che quebe xelexíaje lazre' Dios gulé' xia chee'.  
Ba nuzúa cuásate' xaga nalá xéche'ze chee'.  
13 Ba naxrúa cuásate' xia chee' ca' chee wedil-la.  
Ba nuzúa cuásate' xaga nalá xéche'ze da dxelala.  
14 Benne' wēn da zrinnaj dxugú'u lazre' ca da calela gune'.  
Xu'u lázrdawē' da zrinnaj da gune', na' dxebéaje' da wēn lazre'.  
15 Ba gudēne' tu xēdxu situj naga cheajlechaze bēneache,  
na' lézqueze' xejcházie' lu xēdxu na'.  
16 Da zrinnaj da bēne' dxebage na léqueze',  
na' da bsaque' bēneache xezrizre na xichaje'.  
17 Güe lá'anaqueza' Xrana' Dios ca da xrlátaje da dxune',  
ne gúl-laqueza' chee La Xrana' Dios, Bēneea' naque' szrente.

## 8

1 Lue' Dios, Xránantu', zrente naca Lau' du gabí'i xezr la xu.  
Zrendxa naca xel-la' szren chiu' ca xabáa.



<sup>2</sup> Bidu ca', ne bidu dxe'ene ca' dxelúl-labe' ca naca na.  
Zúaquezu' lataj chawe' naga quebe xelezrín benne' ca'  
dxeledábague' lue'.

Dxuzúa zriu' benne' dxeledábague' lue',  
ne benne' dxelecuídeng' Lue'.

<sup>3</sup> Gate dxenná'a xabáa da nunu' Lue',  
ne beu', ne belaj ca', da ca' nuzú' cha chee na,

<sup>4</sup> na' dxucheba': "¿Ájazra naca bénneache, dxulaba lazru' chee le'?"

¿Ájazra naca bénneache, dxe'u gunne xue le'?"

<sup>5</sup> Benu' le' látezda szren ca nacu' Lué'queze,  
ne bzu' chee' xel-la' szren, ne xel-la' ba lá'ana.

<sup>6</sup> Benu' dxenná bé'ene' xúgute da ca' nunu'.

Xúgute na bdeu' lu ne'e,

<sup>7</sup> zrila' ca', ne bezre ca',  
ne xúgute be xixre' ca',

<sup>8</sup> be zaj zua xrila, ne bela ca',  
ne xúgute da zaj zua na lu nísadau'.

<sup>9</sup> Xránantu', Dios,  
szrenté naca Lau' du gabí'i xezr la xu.

## 9

<sup>1</sup> Xran, dute lázrdawa' güe lá'ana' Lue'.

Guzenda' bénneache ca zaj naca da zrenté da benu'.

<sup>2</sup> Wabéquezda', ne gúl-laqueza' ca naca chiu'.

Gul-la' chee lau' Lue', nacu' Dios zrenté.

<sup>3</sup> Buluzrunnuj benne' dxeledábague' neda'.

Xeajlechazie', ne belexenitie' lau Lue'

<sup>4</sup> lawe' da nucá'ana chawu' da xrlátaje da dxuna'.

Dxe'u lataj blau chiu', ne lu da xrlátaje dxuchi'u.

<sup>5</sup> Gudil-lu' benne' xezr la xu ca',

ne bzria xi'u benne' wen da calela ca'.

Bsulu' la benne' ca' chadía chacanna.

<sup>6</sup> Ba gulebia xi' benne' dxeledábague' neda'.

Chadía chacanna zaj nazrinnaj lataj chee benne' ca',

ne xezre chee' ca', da ca' bchínnuju' Lue'.

Netú benne' cheajsá lazre' benne' ca'.

<sup>7</sup> Xránadxu Dios súatequeze' chadía chacanna.

Ba nucueze' lataj blau chee' naga guchi'e chee bénneache.

<sup>8</sup> Lu da xrlátaje guchi'e chee bénneache dute xezr la xu,  
ne chee benne' xúgute xezre ca' lu da naca li lazre'.

<sup>9</sup> Xránadxu Dios gaque' ca tu lataj ga xelezrá chawe' benne' xache',  
naga xelezré'e chawe' gate zrin zra chee da zi' da xa'.

<sup>10</sup> Benne' ca' zaj núnbe'e Lue', Xran, xuluxrén lazre' Lue',

lawe' da quebe bsan lazru' benne' ca' belexílaje' Lue'.

<sup>11</sup> Le gul-la chee Xránadxu, Bénnea' zue' xezre Sión.

Le guzén benne' xezre ca' ca zaj naca da ca' nune',

<sup>12</sup> lawe' da dxeajsá lazre' chee benne' ca',  
ne dxexebéaj lazre' chee benne' wete benne'.

Quebe gul-la lazre' ca da dxululáwizra benne' ba xache' ca' Le'.

<sup>13</sup> Bexache lazre' neda', Xran.

Gunná' da dxezaca' lu ni'a na' benne' ca' dxelecuídene' neda'.

Dxeca'u neda' lu na' xel-la' gute,

<sup>14</sup> chee guzenda' bénneache da dxue lá'ana' Lue',

naga dxu'untu' xezre Sión,

ne chee beda' lawe' da bseláu' neda'.

<sup>15</sup> Xeajlechaze benne' xezr la xu ca' lu xedxu da gulene'.

Xeajlechu'e lu xralaj da bulucueze'.

<sup>16</sup> Xránadxu Dios blé'ene' ca da zaj naque' ne chee

da zi' da xa' da gudichaj be'e chee benne' ca' dxelune' da calela.

Xeajchaze benne' wen da calela na' lu da nun ni'a ná'queze'.

<sup>17</sup> Benne' wen da calela ca' xeledéqueze' lu lataj ba xa'.

Xúgute' benne' ca' dxelal-la lazre' Xránadxu Dios.

<sup>18</sup> Quegá chadía chacanna gal-la lazre' Dios benne' xache' ca',

ne quegá tu chí'ize xenite da dxelebeza lazre' le'.

<sup>19</sup> Guxasa, Xrana' Dios.

Quebe gu'u lataj xelexegá'ana szrénqueze bénneache.

Xelalá' lau' benne' xezr la xu ca' chee guchi'u chee'.

<sup>20</sup> Xran, ben xelezrebe benne' ca' Lue'.

Ben xelxúnbea benne' xezr la xu ca' zaj naque' bénneacheze.

## 10

<sup>1</sup> ¿Bizr chee na' zu' zitu', Xran?

¿Bizr chee na' dxucache cuinu' gate dxeledé xel-la' zi'

bénneache chiu'?

<sup>2</sup> Benne' wen da calela dxenáu zi' xuzre' benne' xache'

lu xel-la' dxucá'ana szren cuine',

na' xeajchaze benne' xache' na' lu da ba nucuéza bénnea'.

<sup>3</sup> Dxucá'ana szren cuine' ca naca da dxezá lazre'.

Nupé'e dizra' da dxenné' chee benne' dxucude',

na' dxucá'ana dítajé' Xránadxu Dios.

<sup>4</sup> Benne' wen da calela na' lu xel-la' dxucá'ana szren cuine'

quebe dxape' Dios ba lá'ana,

ne quebe dxéquene' che zua Dios.

<sup>5</sup> Tu dxúnzqueze' da calela,

ne quebe dxéquene' guchi'u Lue' ca da dxune'.

Dxuzúe' chalá'ala xúgute' benne' dxeledábague' le'.

<sup>6</sup> Lu xichaj lázrdawe' dxenné': "Quebe bi seque' guzaga na neda'.

Cabata' bi gaca chia' da calela."

<sup>7</sup> Tu dxennézqueze' dizra' schanni',

ne da wen lazre', ne ca naca da calela da gune'.

Dxeledxúaj dxu'e dizra' calela, ne dizra' xálaze.

<sup>8</sup> Dxu'a xezre ca' dxucache cuine' chee quele' bénneache.

Bagácheze dxutie' benne' dxeledeze' na'.

Bagácheze dxenné'e chee bi gune' chee benne' xache' ca'.

<sup>9</sup> Bagácheze dxebeze' ca dxun bezre xixre'.

Dxebeze' ga séquene' quel-le' benne' xache' ca'.

Dxel-le' benne' xache' lu xralaj chee', ne dxexu'e le'.

10 Dxiņę' xu bėnnea' gudęl-lę'.

Dxusaca zię' benne' zan nen ne'e wal-la.

11 Lu xichaj lązrdawę' dxennę': "Nal-la lazre' Dios benne' canı.  
Nucache lawę', ne quebe lę'ene' da dxuna'."

12 Guxasa, Xrana' Dios, ne bęę na'u.

Quebe gal-la lazru'u benne' xache' ca'.

13 ĄJazra chęn' benne' ca' dxelunę' da caleļa  
dxuluzųę' Dios chalą'ala?

Lu xichaj lązrdawę' dxelennę': "Quebe xebęaj lazre' Dios."

14 Dios, Lue' blę'equeznu' da nigą,

lawę' da dxenną'u benne' węn da caleļa,

ne da ca' dxunę' quebe naca na xrlątaje,

na' xebęaj lązrequezu' bėnnea'.

Dxuluzųa cuına benne' xache' ca' lu na'u.

Lue' dxącaleęquezu' bi wezębedu ca'.

15 Dxugų' xel-la' wal-la cheę benne' węn da caleļa.

Guleaj ląwela da caleļa da nunę', da na' bęnę' lu da bagache'.

16 Chadıa chacanna naca Xrąnadxu Wenną Bea cheędxu.

Lu xęzr la xu cheę' ba gulebıa xi' benne' dxelecuıdęnę' Lę'.

17 Bnęzruju' ca da bululąwizra benne' dxexruj lązre'du ca' Lue', Xran.

Lue' dxupa'u lązxdau bėnne'du ca' cheę xuluzę nague' xrtizru',

18 cheę guchi'u cheę bi wezębedu ca',

ne cheę benne' dxeledęę' xel-la' zi',

cheę quębedxa bi da caleļa xelún benne' ca'

dxelunę' da caleļa cheę bėnne'du canı.

## 11

1 Dxuxręn lazra' Xrana' Dios.

Ąjazra chęn' dxi'u bėnne'du xu'a:

"Bzrunnuj, guxıaj lu xı'ala ca tu bxinne?"

2 Le na' xęue, dxulucuęza benne' ca' dxelunę' da caleļa  
xaga nalą xęche'ze.

Ba zaj naxrųę' xaga nalą xęche'ze cheę' lu du cheę na,

cheę xelųtię' bagącheze benne' xrlątaje ca'.

3 Chete ca' xelexinnaj da dxulusę chuchu da xrlątaje,

ąjazra xelún benne' xrlątaje ca'?

4 Xrąnadxu Dios zųaquezę' lataj lą'azxa cheę'.

Xabąaqueze zua lataj blau naga dxe' Dios.

Dxelenną' xanne xıaj lawę'.

Dxelę'ene' ca da dxelún bėnneache.

5 Xrąnadxu Dios dxudęę' chawe' benne' xrlątaje ca' lu da stębe.

Dxeuıdęnę' benne' ca' dxelunę' da caleļa,

ne benne' dxelunę' da zrinnaj.

6 Gudęę' benne' ca' dxelunę' da caleļa lu da zi' da xa',

da zaj naca na xi', ne da dxuzęzrele'e da dxala na ca xedxe,

ne tu be' ląle'e, da ca' sel-lę' lawę' benne' ca'.

7 Canı gunę' lawę' da naca xrlątaje Xrąnadxu Dios,

ne nazrí'ine' da naca na xrlátaje.  
Benne' li lazre' ca' xeledé'ene' lawe'.

## 12

<sup>1</sup> Xrana' Dios, bselá bēneache chiu' lawe' da québedxa  
dxape' benne' xezica Lue' ba lá'ana.  
Quebe nu chilá' benne' li lazre' ládujla bēneache ca'.

<sup>2</sup> Xúgute bēneache ca' dxelezí xe'e le sa' ljwezre'.  
Lu da wen lazre' ba zaj nupé'e dizra' chee xelezí xe'e le'.

<sup>3</sup> Xránadxu Dios guzría xi'e xúgute benne'  
quebe dxuluchálaje' du lazre',  
ne benne' ca' dxuluchálaje' da dxucá'ana szren cuine'.

<sup>4</sup> Benne' ca' gulenné': "Nē chee dizra' cheentu'  
zrué'entu' da chawe'.  
Ca dxezá lázrentu' guchálajntu', ¿nuzra nna be'e netu', xca'?"

<sup>5</sup> Dxenná Xránadxu Dios: "Na'a xidaqueza' lawe' da  
dxulusaca zi'e benne' xache' ca',  
na' dxelebezre lazre' benne' baxache' ca'.

Guselá' benne' ca' dxelánene' da guna'."  
<sup>6</sup> Xrtizra' Xránadxu Dios zaj naca na du lazre'.  
Zaj naca na ca xiaj plata da ba gudé na lu xi',  
da ba gudé na lu xi' gazre lasa.

<sup>7</sup> Xran, guxúequezu' Lue' bēneache chiu' ca'.  
Chadía chacanna gucu'uju' le' lu na' benne' zaj zre'e  
lu zra na'a zra.

<sup>8</sup> Gáteteze na' dxaca da calela  
gate dxulucá'ana szren bēneache da naca sban.

## 13

<sup>1</sup> ¿Ájatequeze gal-la lazru' neda', Xran?  
¿Gal-la lázrtequezu' neda'?

¿Ájatequeze quebe le'enu' da dxaca chia'?  
<sup>2</sup> ¿Ájatequeze gun na ba xen guchaga lawa' da dxezaca'?

¿Ájatequeze gaca wi'ine lazra' te zra, ne chizrela?  
¿Ájatequeze nna be'e benne' dxedábague' Lue' neda'?

<sup>3</sup> Gunná' da dxaca chia', Xran, ne bechebe chia'.  
Btipa lazra' chee quebe gatia',

<sup>4</sup> ne chee quebe nna benne' dxedábague' neda':  
"Ba betia' ni'a ne'e."

Benne' ca' dxeledábague' neda' xelebene'  
che cheajcházia' lu da calela.

<sup>5</sup> Neda' dxuxrén lazra' Lue' xexache lazru' neda'.  
Dute lázrdawa' dxebeda' lawe' da dxuseláu' neda'.

<sup>6</sup> Gúl-laqueza' chee Xrana' Dios  
lawe' da ba nune' chia' da xrlátaje.

## 14

<sup>1</sup> Benne' lázxdau zide' dxezá' lazre', dxenné': "Quebe zua Dios."  
Benne' caní zaj nazrinnaj xichaj lázrdawe'.

Dxelunę' da sban ca'.

Quebe nu chilá' benne' dxunę' da xrlátaje.

<sup>2</sup> Xránadxu Dios zuę' xabáa dxenné'ę bėnneache  
cheę lé'ene' che zua nu benne' dxéajni'ine',

bėnnea' dxape' ba lá'ana Dios.

<sup>3</sup> Xúgutę' zaj xu'ę neza xuca'.

Xúgutę' zaj nazrinnaj xichaj lázrdawe'.

Quebe nu chilá' benne' dxunę' da xrlátaje, netúguę'.

<sup>4</sup> ¿Quebe dxeléajni'i benne' ca' dxelunę' da sban?

Dxulusunítie' bėnneache chia' ca dxuzuzruj tu benne'  
xeta da dxawe',

ne quebe dxeléquebe'ene' zua Xranę' Dios.

<sup>5</sup> Dute xel-la' dxelezrebe dxelezrize benne' ca'  
lawe' da dxácale Dios benne' xrlátaje ca'.

<sup>6</sup> Belún le' cheę da gulenná benne' xache' ca',  
san benne' caní xebebeza lazre' Xránadxu Dios.

<sup>7</sup> Xídatega Bėnnea' guselé' benne' Israel ca'.

Gate gun Xránadxu xelexezrín benne' cheę' ca',  
benne' ca' zaj nada'u zítu'la,

na' welebé zri'ine zre sua Jacob,

ne welebéle'ęquezne' benne' Israel ca'.

## 15

<sup>1</sup> Xran, ¿núzraqueze benne' suę' naga zu' Lue'?

¿Núzraqueze benne' suę' naga naca lá'azxa chiu'?

<sup>2</sup> Waca bėnnea' naque' du lazre', ne dxunę' da xrlátaje,  
bėnnea' zua da líqueze lu xichaj lázrdawe',

<sup>3</sup> bėnnea' quebe dxenné' cheę le sa' ljwezre',  
ne quebe bi da calela dxunę' cheę le sa' ljwezre',  
ne quebe dxu'ę lataj nu benne' si tizre' le sa' ljwezre'.

<sup>4</sup> Waca bėnnea' quebe dxape' ba lá'ana  
nu benne' dxunę' da sban.

Dxape' ba lá'ana benne' ca' dxelape' ba lá'ana Xránadxu Dios,  
bėnnea' quebe dxuché'ę dizra' da ba gunné' lácala bi da' gunítie'.

<sup>5</sup> Waca bėnnea' dxusanę' dumí cheę' ne quebe dxenabe' xíchajen,  
ne quebe dxezí' lu ne'ę dumí cheę nnię' cheę

nu benne' quebe bi zria nabague'.

Nu benne' dxunę' caní cabata' cheajchazie' lu da calela.

## 16

<sup>1</sup> Bxue neda', Dios, lawe' da dxuxrén lazra' Lue'.

<sup>2</sup> Lu xichaj lázrdawa' gucha' Xrana' Dios:

“Lue' nacu' Xrana'.

Quebe bi xetú da xrlátaje de chia' da quebe naca na chiu'.”

<sup>3</sup> Tuze benne' ca' zaj naque' cheę Dios lu xęzr la xu,  
ne benne' ca' zaj naque' du lazre' dxezaca ba lázrelęna'.

<sup>4</sup> Waxánqueze da dxelezaca benne' ca' dxelape' ba lá'ana  
tu dios quebe bi zaca.

Quebe guna' le' tu zren gate dxuluzrie' zren lau dios na',  
ne quebe guchíneda' la dios na'.

5 Xránadxu Dios dxugawę' neda', ne naque' da ba neza chia'.

Lue', Dios, nuxru' ca da naca chia'.

6 Ca da nuzú' chia' zaj naca na da dxezi'a ba neza,  
ne xrtante zaj naca da nunnu' chia'.

7 Tu gucá'ana szrénzqueza' Xránadxu Dios,

Bénnea' dxusédenę' neda'.

Chizrela gate ne dxasia' dxuzéajni'ine' neda' lu xichaj lázrdawa'.

8 Xránadxu Dios nuxrén lazra' gusi'ę neda'.

Lawe' da zuę' cuita', quebe bi seque' guchebe na neda'.

9 Cheę lę na' gubé lázrdawa', ne gubé lę'ęquezda',

na' zra gacha' lu xędxu ba cueza lazra'

10 lawe' da quebe gucá'anu' bénne'du xu'a lu lataj ba xa',

ne quebe gu'u lataj guzru nu benne' nácaqueze' chiu'.

11 Gulé'enu' neda' da guna' cheę gata' chia' xel-la' nabán.

Naga zu' Lue' wabé lę'ęquezda',

na' cuitu' Lue' súatequeze da ba neza chia'.

## 17

1 Bzę naga chi'a, Xran.

Ben xanne' da dxuláwizra' Lue'.

Guzí' da dxenaba' Lue', naca' du lazra'.

2 Benna lataj xelá'a lau' cheę guchi'u chia',

lawe' da dxelé'enu' xúgute cáteze zaj naca na.

3 Lue' dxenná' xánniu' xichaj lázrdawa'

ne dxelé'enu' neda' chizrela.

Gunná' xánniu' da dxuna', na' quebe bi da caleła blé'enu'.

Ba nuna' quebe bi dizra' caleła nnia'.

4 Dxuzúa' dizra' ca naca da dxennáu',

na' quebe dxuna' ca da dxelún benne' węn da zrinnaj ca'.

5 Bxue neda' lu neza chawe' chiu',

cheę quebe cheajházia' lu da caleła.

6 Dxuláwizra' Lue', Dios, lawe' da dxennu' chi'a.

Bzę naga chi'a, na' bene da dxennía'.

7 Ble'e ca dxexache lázre lę'u bénneache.

Bselá benne' ca' dxuluxrén lazre' Lue' lu na' benne'

dxeledábaguę' lę'.

8 Bxue neda' ca dxun benne' dxuxúę' xiaj lawę'.

Gudęzre neda' ca dxun bedxuj dxézreba' zrí'ineba' zran xrílabá'

9 cheę quebe bi xelún chia' benne' ca' dxelunę' da caleła,

benne' dxeledábaguę' neda', ne dxelaca lazre' xelútię' neda'.

10 Quebe dxelexache lazre' le sa' ljwezre',

na' dutę xel-la' dxulucá'ana szren cuinę' dxuluchálaję'.

11 Gáteteze dxedá' dxeléchaję' neda'.

Dxelaca lazre' xelinę' neda' xu.

12 Zaj naque' ca tu bęzre xíxre'dau' dxaca lázreba' bi gáguba'.

Zaj naque' ca tu bęzre xixre',

ba nucache cuínaba' cheę quél-laba' béadu ca'.

13 Gudá, Xran, gudábaga' benne' ca' dxelunę' da caleła,

na' bchiche' lu xu.

Bselá neda' lu na' benne' ca' dxelunę' da calęla,  
guchínenu' xia chiu'.

<sup>14</sup> Bselá neda' lu na' benne' ca' nen ni'a ná'quezu', Xran.  
Bselá neda' lu na' bėnneache, benne' ca' zaj dxe'ę gunne xue  
cheę xęzr la xu nigaze,  
benne' ca' dxeláguqueze' da zácale'ę chiu'.

Da nigáqueze dxulugawe' zri'ine' ca',  
ne dxexegá'anaqueze da dxelágu zri'ine zre sue'.

<sup>15</sup> Le'eda' neda' lau Lue' lawe' da naca' xrlátaje.  
Xezaca ba lazra' gaca' ca' nácaquezu' Lue' gate xebana'.

## 18

<sup>1</sup> Nazrí'ida' Lue', Xran.

Lue' dxuzé chuchu' neda'.

<sup>2</sup> Lue', Xran, nacu' ca tu xiaj naga zę chúchua',  
ne ca tu xu'u zren naga xu'u chawa', na' nacu' weselá chia'.  
Dios chia', Lue' dxuzé chuchu' neda', na' guxrén lazra' Lue'.  
Dxucu'uju' neda', ne dxuseláu' neda', ne dxucache chawu' neda'.

<sup>3</sup> Wannéqueza' Xránadxu Dios,

Bėnnea' naca cheę' güe lá'anadxu Le'.

Le' guselé' neda' lu na' benne' ca' dxeledábague' neda'.

<sup>4</sup> Guzúa' lu da stębe cheę xel-la' gute,  
na' guca da calęla ca tu xęgu nisa da bchebe na neda'.

<sup>5</sup> Guzúa' lu da stębe chu'a lataj ba xa'  
lawe' da zua' lu da stębe cheę xel-la' gute.

<sup>6</sup> Lu da zi' da xa' bláwizra' Xrana' Dios, ne gunnéqueza' Dios chia'.  
Le' benne' chi'a naga zue' lataj lá'azxa cheę',  
ne bzę nague' da bchálaja' lawe'.

<sup>7</sup> Nadxa guzrú' lu xęzr la xu nigá.

Gulezrize lane xi'a ca'.

Gulezrízele'ę na lawe' da bzra'a Le'.

<sup>8</sup> Bdxuaj zren cheę xi' lu zrine',  
ne bdxuaj xi' lu dxu'ę da bzezxe na da dę lawe',  
na' xi' na' gudel-la na bau ca'.

<sup>9</sup> Bzėxruje' da zria zran xabáa, na' bėtaje',  
na' guzúa da chul-la zran ni'ę.

<sup>10</sup> Gudéę' lu be' zrię' tu da nazí le na querubín.  
Chadí gudéę' lu be' bdunu'.

<sup>11</sup> Gúcuę' da chul-la, da bcache na Le',  
da na' naca na beuj bza da xuzru na nisa.

<sup>12</sup> Lu da dxácatite legala cheę' da xu'u lu beuj bza,  
na' beledxúaj bau dxelala, ne xiaj bezxe'.

<sup>13</sup> Zran xabáa gunné guziu' cheę' chi'i Xránadxu,  
na' ben chi'i Dios szrentę lądujla bau dxelala ca',  
ne xiaj bezxe' na'.

<sup>14</sup> Bsanę' xaga nalá xéche'ze cheę' ca',  
na' bęse dínnaje' benne' ca' dxeledábague' neda'.  
Bsanę' xesa guziu' ca', ne bzria xi'ę benne' ca'.

<sup>15</sup> Nadxa belelá' da zaj dę lu situj cheę nísadau',  
ne ble'e lau lane xęzr la xu da zua na zran nísadau',  
gate na' gudil-lu' benne' ca' dxeledábague' neda', Xran,

ne lu xel-la' dxezrá'a chiu' bzagu' benne' ca'.

16 Bétajé' lu da sibe, ne bequé'e neda'.

Bebéajé' neda' lu da naca ca tu nisa zila.

17 Bselé' neda' lu na' benne' wal-la dxeledábague' neda',  
ne lu na' benne' ca' dxelecuídené' neda',  
benne' zaj nácadxe' wál-la ca neda'.

18 Buluzague' neda' gate na' zua' lu da stébele'e,  
san Xrana' Dios gúcalené' neda'.

19 Bebéajé' neda' naga xu'a, ne bzue' neda' tu lataj zren.

Bselé' neda' lawe' da bezaca ba lazre' chia'.

20 Xránadxu Dios bexunne' chia' cáteze naca  
da xrlátaje da nuna'.

Cáteze naca da xrlátaje da nuna' bexunne' chia'

21 lawe' da dxuna' ca da dxusede Xrana' neda',  
ne quebe guleaj xíchaja' Dios chia'.

22 Dxuna' ca naca da dxenná bé'ene' neda',  
ne quebe bsana' da ca' nadxíxruj be'e.

23 Guca' li lazre' lau Lē',  
ne bxue cuina' chee quebe guna' da calēla.

24 Chee lē na' bexunna Xránadxu Dios chia'  
cáteze naca da xrlátaje da bēna',  
cáteze naca da xrlátaje da nuna' lau Lē'.

25 Dxexache lazru' chee benne' dxexache lazre' le sa' ljwezre',  
ne nacu' li lazre' nen benne' naque' li lazre'.

26 Dxunu' da naca chawe' chee benne' naque' chawe',  
na' gacu' snia nen benne' wen da calēla.

27 Guseláu' benne' zaj zue' lu da zi' da xa',  
san guzéxruju' benne' dxulucá'ana szren cuine'.

28 Lué'queze guzalju' xi' chia'.

Xrana' Dios, guzani'u chia' naga zua' lu da chul-la.

29 Nen xel-la' waca chiu' guzría xi'a benne' zante  
dxeledíl-lalēne' neda'.

Che Lue', Dios, súalēnu' neda'

waca guchínnaja' ze'e da zaj naxechaj xezre ca'.

30 Li lazre' zaj naca da dxun Dios, na' du lazre' naca xrtizre'.

Dxucu'uje' xúgute benne' ca' dxelebeza lazre' Lē'.

31 Tuze Xránadxu naque' Dios.

Tuze Dios cheedxu naque' Benne' dxucu'uje' dxi'u.

32 Dios naque' Bénnea' dxuné' neda' benne' wal-la,  
ne Benne' dxuné' li lazre' da dxuna' neda'.

33 Dxuné' ni'a ca zaj naca ni'a bzrina' xixre'  
ne dxuzúa chúchue' neda' lu xi'a Sión chee'.

34 Dxusédené' neda' chee gaca cha'a lu wedil-la,  
ne chee gaca guchínedá' xaga nalá xéche'ze  
da naca na xia gache'.

35 Lu xel-la' weselá chiu' bcu'uju' neda',

ne nen na'u xabela gúcalēnu' neda'.

Xel-la' zri'i lazre' chiu' ba nucá'ana szren na neda'.

36 Bēn chawu' neza naga tea',

chee quebe cuila' lu neza na'.

37 Blaga' benne' dxeledábague' neda', na' xeajzrena' lē',



na' quebe bebi'a cadxa bétetea' benne' ca'.

<sup>38</sup> Bena' benne' ca' wē', na' quebe guca xelexasē'.

Xeajlecházie' zran ni'a.

<sup>39</sup> Btipu' lazra' chee' cha'a lu wedil-la.

Bzéxruju' benne' dxeledábague' neda' zran ni'a.

<sup>40</sup> Benu' buluzrunnuj benne' dxeledábague' neda' lawa',

chee' bzria xi'a benne' ca' dxelecuídene' neda'.

<sup>41</sup> Gulenné' nu benne' gácalene' le' san quebe nu chilá'.

Gulenné' Xránadxu Dios, san quebe benne' chee'.

<sup>42</sup> Bzúzruja' benne' ca' ca bxrte xu da dxua be'.

Bléaja' le' ca dxuléaja' guna' la neza ca'.

<sup>43</sup> Bseláu' neda' lu na' benne' ca' dxeledábague',

na' benu' neda' benne' xíchaje xezr la xu ca',

na' benne' ca' quebe núnbe'a dxelune' zrin chia'.

<sup>44</sup> Gate belenne' chia', na' buluzúe' xrtizra'.

Benne' zaj zra' xezr la xu ca' belune' ca gunná be'eda'.

<sup>45</sup> Benne' zitu' ca' gulate ni'a ne'e,

na' beledxúaje' dxelezrízie' lu xezre zrentau' chee' ca'.

<sup>46</sup> Gaca ba lá'azxa Xránadxu Dios.

Gaca ba Bénnea' dxucu'uje' neda'.

Xegá'ana szrénqueze Dios, Bénnea' dxuselé' neda'.

<sup>47</sup> Naca Dios Bénnea' dxebéaj lazre' benne' dxeledábague' neda',

ne dxuzúe' benne' ca' zran ni'a.

<sup>48</sup> Naque' Bénnea' dxuselé' neda' lu na' benne' ca'

dxeledábague' neda'.

Dxune' dxenná be'eda' benne' ca' guledábague' neda'.

Bselé' neda' lu na' benne' xichaj zra'a ca'.

<sup>49</sup> Chee' le' na' xechéba' chiu', Xran, lau benne' xezr la xu ca',

na' gúl-laqueza' chee' Lau' Lue'.

<sup>50</sup> Dxun Dios dxenná bea bénnea' waláz chee',

ne dxexache lazre' bénnea' guqu'é, bénnea' naque' David,

ne zri'ine zre sue' chadía chacanna.

## 19

<sup>1</sup> Dxulé'e lau zran xabáa ca naca xel-la' szren chee' Dios.

Dxuchálajqueze na ca zaj naca da nune'.

<sup>2</sup> Tu zra tu zra dxuzén na zra xula da nigá,

na' tu zre' tu zre' dxę na zre' xula da ná'queze.

<sup>3</sup> Quebe dxuluchine na xrtizra' bénneache,

ne quebe nu dxen chi'i na,

<sup>4</sup> san dxezriluj da dxelenná na du gabí'i xezr la xu,

ne dxeleznín xrtizra' na dapa saca chee' xezr la xu.

Dios bene' xabáa ca tu xu'u naga zua gubizra.

<sup>5</sup> Che zílala dxalaj na ca tu benne' wechaga na'.

Dxebé na ca tu benne' dxezá chégúe' lu witja.

<sup>6</sup> Dxedxuaj na chalá'a naga dxalaj na,

na' dxezrín na chalá'a naga dxebía na.

Dxuchá'a na xúgutę da zaj dę.

<sup>7</sup> Du lazre' naca da nadxixruj bea Xránadxu,

ne dxuzé chacha na bénne'du xú'udxu.

Li lazre' naca da dxexechebe Xránadxu,  
ne dxunezruj na xel-la' sina chee benne' ca'  
quebe zaj nape' na.

<sup>8</sup> Da líqueze zaj naca da nadxixruj bea Xránadxu,  
na' dxelebéle'e benne' ca' dxelune' ca' zaj naca na.  
Du lazre' zaj naca da dxuzéajni'i Xránadxu dxi'u,  
da dxuluzúa na dxi'u lu xel-la' naxaní'.

<sup>9</sup> Cháwedau' naca zrébedxu Xránadxu,  
da gun na súadxu chadía chacanna.  
Da líqueze zaj naca da dxuchi'a Xránadxu cheedxu,  
ne zaj naca na chawe'.

<sup>10</sup> Zaj naca na da dxezá lázredxadxu ca oro,  
ne ca oro zrentę da zácale'e na.  
Zaj naca na zíxredxa ca bzrina'dau', da nácale'e na zixre.

<sup>11</sup> Dxulusizre na neda', wen zrin chiu'.  
Lawe' da dxuna' ca zaj naca na, da zrentę dxezi'a.

<sup>12</sup> Netú benne' quebe gaca lé'enę' da caleła da dxune'.  
Bselá neda', Xran, lu da caleła da quebe dxéquebe'eda' dxuna'.

<sup>13</sup> Bucache chawe' neda', wen zrin chiu',  
chee quebe bi dul-la guna' du lazra'.  
Quebe gu'u lataj nna be'e dul-la neda'.  
Nadxa gaca' du lazra', ne quebe baga' zria chee dul-la na'.

<sup>14</sup> Gaca da dxuchálaja', ne da dxulaba lazra'  
da dxezaca ba lazru' Lue', Xran  
Nacu' Benne' dxuxúe' neda', ne Benne' dxexá'ue' neda'.

## 20

<sup>1</sup> Dxenaba' Xránadxu xenne' chi'u lu zra zu' lu da stebe,  
ne gucu'uj La Dios chee Jacob lue'.

<sup>2</sup> Dxenaba' Le' naga zuę' lataj lá'azxa chee' sel-le'  
da gácale na lue',  
ne chee xi'a Sión xide' guxrę' lue'.

<sup>3</sup> Dxenaba' Le' cheajsá lazre' ca naca xúgute guna' bzu' chee',  
ne si' lu ne'e béadu ca' dxuzezxu' lawe'.

<sup>4</sup> Dxenaba' Le' gunne' lue' ca naca da dxezá lazru',  
ne gunę' xúgute da dxéquenu' xrlátaje.

<sup>5</sup> Béle'entu' gate guselé' lue',  
na' chísantu' tu da gulé'e lawe na La Dios cheedxu.  
Dxenaba' Xránadxu gunne' lue' xúgute da dxenabu' lau Le'.

<sup>6</sup> Na'a nezda' dxuselá Xránadxu bénnea' ba gucá'aqueze'.  
Naga zuę' xabáa lá'azxa chee' xenne' chi'i bénnea'.  
Xel-la' waca zrentę chee' guselé' bénnea'.

<sup>7</sup> Bal-la benne' dxuluxrén lazre' carro ca' chee wedil-la,  
na' xezícadxe' dxuluxrén lázre' bzrina' ca'.

Dxi'u dxuxrén lázredxu La Xránadxu Dios.  
<sup>8</sup> Benne' ca' gulate ni'a ne'e, ne xeajlechazie'.

Dxi'u bexásadxu, na' zędxu.  
<sup>9</sup> Bselá netu', Xran, nacu' Wenná Bea cheentu'.  
Ben chi'intu' gate dxuláwizrantu' Lue'.

## 21

1 Benne' dxenná bea dxebéle'ene' nen xel-la' waca chiu', Xran, na' ca naca xel-la' weselá chiu' dxebéle'ene'.

2 Bnézruju' le' da guzá lazre', ne quebe bzagu' da gunabe' Lue'.

3 Guzí' lu na'u le', ne benu' dxaca chawe' chee'. Nuzriu' xíchaje' tu da naca na oro.

4 Gunabe' Lue' gunnu' le' xel-la' nabán, na' bnézruju' na le' chee' súaqueze' zane' iza.

5 Zrente' naca xabáa chee' lawe' da bseláu' le'. Benu' le' xel-la' ba lá'ana, ne xel-la' szren.

6 Lawe' da nunu' gaca chawe' chee' chadía chacanna dxunu' dxebéle'ene' lau Lue'.

7 Lawe' da dxuxrén lazre' wenná bea na' Xránadxu, xexache lazre' Dios szrente' le', na' quebe sue' lu da stebe.

8 Xulétaju' xúgute' benne' dxeledábage' lue'. Xel-la' waca chiu' xulétaju' benne' ca' dxelecuídené' lue'.

9 Lu zra na' zra'u le' gaca chee' benne' ca' ca guzú' le' lu xi' ga dxulúzrie' bla'dau'.

Xránadxu guzúzruje' benne' ca' lu xel-la' dxezrá'a chee', na' xi' na' guzezxe na le'.

10 Xúgute' da belune' lu xezr la xu nigá guzria xi'u, ne xegú' zri'ine zre sue' ládujla bénneache,

11 lawe' da gulaca lazre' xelune' da caléla chiu' Lue'.

Gulilaj lazre' ca da xelune', san quebe bi xelezéquene',

12 lawe' da gulagu' benne' ca'.

Nucuezu' xaga nalá xéche'ze chiu' chee' le'.

13 Begá'ana szrénqueze Lue', Xran, lu xel-la' wal-la chiu'.

Tu gúl-lazquezdxu, ne tu güe lá'anazquezdxu Lue' ca naca xel-la' waca chiu'.

## 22

1 Dios chia', Dios chia', ¿bizr chee' na' nusán lazru' neda'?

¿Bizr chee' na' quebe dxennu' da dxenaba' Lue' chee' guseláu' neda'?

2 Dios chia', dxuláwizra' Lue' te zra, ne quebe dxexechebu' chia'.

Dxuláwizra' Lue' chizrela, ne quebe dxezí'i lazra'.

3 Lá'azxa nactu' Lue'.

Nactu' Benne' dxebeze' naga dxelúe lá'ana benne' Israel Lue'.

4 Xra xrtáuntu' gulebeza lazre' Lue'.

Gulebeza lazre', na' bseláu' le'.

5 Bululáwizre' Lue', na' belelé'.

Buluxrén lazre' Lue', na' quebe belexedué'ene'.

6 Neda' naca' ca tu bēla' gúna'dau', ne quegá bénneache.

Dxelecuide bénneache neda', ne dxuluzúe' neda' chalá'ala.

7 Xúgute' benne' dxelelé'e neda' dxelún le' chia'.

Lu da dxelún le' chia' dxelexrá dxu'e,

ne dxulutá xíchaje', dxelenné':

8 "Bzua cuine' lu na' Xránadxu chee' guselé' le'.

Guselé' le' che dxezaca ba lázreleṅe' le'."

<sup>9</sup>Lue' nacu' Bénnea' bexru' neda' gate gúlaja'.

Benu' bxren lazra' Lue' gate na' ne dxázrete'a'.

<sup>10</sup>Guxu'a lu na'u gate quebe ne gálajtea'.

Gate ne xu'a lu le'ḗ xrna'a, báchequeze nacu' Dios chia'.

<sup>11</sup>Quebe xebigu' naga zua' lawe' da zua gágute

da gusaca zi na neda',

ne quebe nu chilá' benne' gácaleṅe' neda'.

<sup>12</sup>Zaj naxechaj benne' dxeledábague' neda' ca beẓre ca'.

Zaj naxechaj benne' neda' zaj naque' ca beẓre wal-la ca' chee Basán.

<sup>13</sup>Gulaca lazre' xuluzría xi'e neda'

ca tu beẓre xixre' dxedunba', ne dxebeẓre xa'aba'.

<sup>14</sup>Bebizre lazra' ca nisa da nalalaj na lu xu,

na' ca naca zrita xu'a bulusán ljwezre na.

Lázrdawa' guca na ca xina' da bxuna na lu le'a ca nisa.

<sup>15</sup>Bexaca xel-la' wal-la chia' ca tu xé'ena xu la'a,  
na' luzra' bedá' na chichja'.

Nuzú' neda' lu xu xrte chee xel-la' gute.

<sup>16</sup>Zaj naxéchajé' neda' ca becu' ca'.

Zaj naxechaj benne' wēn da zrinnaj ca' neda'.

Gulídue' ni'a na'a.

<sup>17</sup>Waca gulaba' ca naca zrita xu'a,

na' benne' ca' dxelenné'e neda', ne dxelenná' xánnie' neda'.

<sup>18</sup>Belexelé'e zra lana' late' weaj,

na' lawe' zra lana' gulebeje' da gaca bea na.

<sup>19</sup>Quebe xebigu' naga zua', Xran.

Nacu' xel-la' wal-la chia'.

Gudázega gácaleṅu' neda', Xran.

<sup>20</sup>Bselá bēnne'du xu'a lu na' benne' gu'e neda' xia.

Bēnnea' guzría xi'e neda' gune' ca dxun becu'.

<sup>21</sup>Bselá neda' lu dxu'a beẓre xixre'.

Bselá neda' lu luzu beẓre wal-la ca'.

<sup>22</sup>Guzenda' bi bícha'dau' ca' lau' Lue'.

Güe lá'anaqueza' Lue' ladaj benne' zaj nazrague' lau'.

<sup>23</sup>Le'e, dxezrébele Xránadxu, le güe lá'ana Le'.

Le gucá'ana szreṅe', le'e, zri'ine zre sua Jacob.

Le zrebe Le', le'e, zri'ine zre sua Israel.

<sup>24</sup>Quebe bzua Dios chalá'ala, ne quebe gucuídené'

da zi' da xa' da guledé benne' xache' ca',

ne quebe bcache lawe' lau benne' ca'

san gate bululáwizre' Le', benne' chí'e.

<sup>25</sup>Güe lá'anaqueza' Lue' laduj benne' zan zaj nazrague' lau'.

Ca da guchebe lazra' gúnqueza' lau benne' ca' dxelezrebe' Lue'.

<sup>26</sup>Xelagu benne' dxexruj lazre', ne welélajquezne'.

Benne' ca' dxelebigue' lau Xránadxu xelúe lá'anaqueze' Le'.

Tu gácazqueze da ba neza chee benne' ca'.

<sup>27</sup>Cheajlesá lazre' benne' duté xezr la xu Xránadxu,

na' xelexebí'e lau Le'.

Xúgute cue' benne' chee xúgute cue' xezr la xu

xelúe lá'anaqueze' Le',

<sup>28</sup> lawe' da xu'u lu na' Xránadxu xel-la' dxenná bea,  
na' nna bé'ene' xúgute benne' xezr la xu ca'.

<sup>29</sup> Xeláguqueze xúgute benne' zren ca' chee xezr la xu nigá,  
ne xelúe lá'anaqueze' Dios.

Xuluzú zribe lau Le' xúgute benne' ca' xelate,  
benne' ca' quebe xelezéquene' xelegú'u chawe'  
bénne'du zaj xu'e chee quebe xelatie'.

<sup>30</sup> Zri'ine zre sua benne' ca' xelunbe' zrin chee Xránadxu.  
Xuluzenne' zri'ine' ca' ca naca chee Xránadxu  
cadxa cheajsete chee bénneache.

<sup>31</sup> Xelezrine', ne xuluzenne' bénneache ca naca  
da xrlátaje da dxun Dios.

Xuluzenne' benne' quebe ne xelálaje' ben Dios da caní.

## 23

<sup>1</sup> Xránadxu Dios dxuxúe' neda' ca tu benne' dxuxúe' zrila' chee'.  
Quebe bi dxexázejeda'.

<sup>2</sup> Ca dxelezzúa zrila'du ca' ba guláguba' xixre' xá'adau',  
caní dxune' chia' chee xezí' lazra'.

Guné' chia' ca dxaca chee zrila' ca'  
dxeché'e-ba' dxu'a xegu nisa da de zrize.

<sup>3</sup> Dxuxuzúa chúchue' neda' lu xichaj lázrdawa'.  
Dxusi'e neda' lu da xrlátaje chee gaca li da guchebe lazre'.

<sup>4</sup> Láqueze tea' naga sua' lu da stébe chee xel-la' gute,  
quebe bi da calela guchebe na neda',  
lawe' da zúalenu' Lue' neda', Xran,  
na' dxelácale zrise', ne blazru chiu' neda'.

<sup>5</sup> Dxucuezu' da xi'aj gawa' lácala benne'  
dxeledábague' neda' zaj naxečaj neda'.

Dxugú'u da za xichja' da dxapa na neda' ba lá'ana,  
ne dxusezráteu' zriga' chia'.

<sup>6</sup> Da xrlátaje, ne xel-la' dxexache lazre' chiu'  
da lítegaze xelezúale na neda' xúgute zra naca bana',  
na' lizru', Dios, gaca na lizra' chadía chacanna.

## 24

<sup>1</sup> Chee Dios naca xezr la xu nigá ne xúgute da zaj de lawe na.  
Naca chee' xezr la xu, ne xúgute bénneache zaj zre'e ga na'.

<sup>2</sup> Bzue' na lawe' nísadau',  
ne bzale' lane na sítujla zran nísadau'.

<sup>3</sup> ¿Nu seque' cuen xi'a chee Xránadxu?  
¿Nu seque' chu'u xudau' lá'azxa chee'?

<sup>4</sup> Waca benne' ca' zaj naque' du lazre' ca naca da dxelune',  
ne ca naca da dxulaba lazre'.

Benne' ca' quebe ne xelechisa ne'e lau bedáu' xiaj xaga ca',  
ne quebe bi ne xelechebe lazre' da naca wen lazre'.

<sup>5</sup> Xránadxu guné' da chawe' chee benne' caní.  
Dios guchi'e chee benne' caní, ne guselé' le'.

<sup>6</sup> Caní zaj naca bénneache dxelebigue' lau Le',  
benne' ca' dxelexu'e naga zua Dios chee Jacob.

7 Le salaj dxa xu'u chee xudau'.

Le salaj dxa xu'u chawe' ca',  
na' chu'u Wenná Bea szrentę.

8 ¿Nuzra na' Wenná Bea szrentę nigá?

Naque' Xránadxu, Benne' wal-la,  
Bénnea' nape' dutę xel-la' waca.

Naque' Xránadxu, Bénnea' dxedxúaje' chawe' lu wedil-la.

9 Le salaj dxa xu'u chee xudau'.

Le salaj dxa xu'u chawe' ca',  
na' chu'u Wenná Bea szrentę.

10 ¿Nuzra na' Wenná Bea szrentę nigá?

Naque' Xránadxu, Benne' dxenná bé'ene' xúgutę da zaj zua.

Le' naque' Wenná Bea szrentę na'.

## 25

1 Xran, dxennía' Lue' dutę lázrdawa'.

2 Dxuxrén lazra' Lue', Dios chia'.

Quebe gu'u lataj xedué'eda'.

Quebe gu'u lataj benne' dxeledábague' neda' xuluzétaje' neda'.

3 Da líqueze, benne' ca' dxelebeza lazre' Lue'

quebe xeleque zrėjene'.

Xeledué'e benne' ca' dxeledábague' xrtizru'.

4 Xran, ble'e neda' da dxaca lazru' guna'.

Ble'e neda' da dzezaca ba lazru' guna'.

5 Bşede neda' guna' ca naca da li chiu'

lawe' da nacu' Dios dxuseláu' neda'.

Tu dxebeza lázrezqueza' Lue'.

6 Bsa lazre', Xran, gacu' zri'i lazre',

ne xexache lazru' chia' cáteze da dxúntequezu'.

7 Quebe chajsá lazru' dul-la da bęna' gate ne naca'

benne' cuide', ne ca gudábaga' xrtizru'.

Nen dutę xel-la' dxexache lazre' chiu', bsa lazre' neda',

ne nen dutę xel-la' zri'i lazre' chiu', Xran.

8 Xrlátaje, ne li lazre' naca Xránadxu Dios.

Chee le' na' gusédenę' benne' dul-la ca' da dxal-la' xelunę'.

9 Gulé'ene' benne' dxexruj lazre' ca' da xrlátaje da xelunę',

ne gusédenę' benne' zren lazre' ca' da xelunę'.

10 Lu xel-la' dxexache lazre',

ne lu da li dxeché Xránadxu benne' ca' dxelunę'

ca naca xel-la' wezria chee', ne ca da dxuşede Le'.

11 Lawe' da dxunu' ca da ba gunnú', Xran,

gunite lau' ca naca dul-la nuna', da naca na zren.

12 ¿Nu benne' dxezrebe' Xránadxu Dios?

Le' gusédenę' benne' nigá da dxal-la' gunę'.

13 Gaca chee' tu da ba neza zrentę,

na' zri'ine zre sue' gaca cheebe' xęzr la xu.

14 Xránadxu Dios naque' tuze nen benne' ca' dxelezrebe' Le',

na' gunę' xelúnbe'e xel-la' wezria chee'.

15 Tu dxennázqueza' Xránadxu Dios

lawe' da guselé' neda' lu na' benne' ca' dxelaca lazre' xelexe' neda'.

<sup>16</sup> Gunná' neda', ne bexache lazre' neda'  
lawe' da zua' tuza', ne dxezaca zi'a.

<sup>17</sup> Naxánle'e da stebe da zaj zua lázrdawa'.

Bselá neda' lu da stebe zua'.

<sup>18</sup> Gunná' ca dxezaca zi'a, ne ca dxunle'a zrin,  
na' bnite lau xúgute dul-la da nabaga'.

<sup>19</sup> Gunná' benne' ca' dxeledábague' neda' ca naxánle'ene',  
ne ca dxelecuídele'ene' neda'.

<sup>20</sup> Bxue bénne' du xu'a, ne bselá neda'.

Quebe gu'u lataj xedué'eda' lawe' da dxuxrén lazra' Lue'.

<sup>21</sup> Zaj nuxru da xrlátaje, ne xel-la' li lazre' neda'

lawe' da dxebeza lazra' Lue'.

<sup>22</sup> Dios, bselá benne' Israel ca'

lu xúgute da dxelezaca zi'e.

## 26

<sup>1</sup> Bchi'a chia', Xran, lawe' da nuna' da xrlátaje.

Bxren lazra' Lue', Xrana' Dios, ne quebe ben chupa lazra'.

<sup>2</sup> Gunná' xanne' lázrdawa', Xran, ne bxue ca da nuna'.

Gunná' xanne' da xu'u lu xichaj lázrdawa'

<sup>3</sup> lawe' da dxeque be'eda' dxexache lazru' neda',  
ne dxuna' ca naca da li chiu'.

<sup>4</sup> Quebe ne guna' tu zren benne' ca' dxelune' da xrlátaje cúzreze,  
ne quebe ne guna' tuze benne' ca' dxululé'e cuine' xrlátaje.

<sup>5</sup> Dxequídeda' da dxelún benne' ca' dxelune' da calela  
naga dxelezrague',

ne quebe ne chu'a tu zren benne' ca' dxuluzúe' Dios chalá'ala.

<sup>6</sup> Dxelé'enu' quebe bi zria nabaga',  
na' waca biga' lu cugu chiu', Xran,

<sup>7</sup> chee cuezre xa'a, xapa' Lue': "Xcalenu",  
ne chee guzenda' bénneache ca naca da zren ca' da nunu'.

<sup>8</sup> Xran, nazrí'ida' lizru' naga zu',  
ne lataj lá'azxa naga zua da xabáa chiu'.

<sup>9</sup> Quebe guzrí'a xi'u neda' tu zren nen benne' dul-la ca',  
ne quebe gutiu' neda' tu zren nen benne' ca' dxelútie' benneáche,

<sup>10</sup> benne' ca' dxelune' da calela,  
ne tu dxulunézrujzqueze' dumí chee xelexe' lu da zaj nune'.

<sup>11</sup> Neda' tu gúnzqueza' da naca li lazre'.

Bselá neda', ne bexache lazre' neda'.

<sup>12</sup> Tu núnzqueza' da xrlátaje, na' güe lá'anaqueza'

Xránadxu Dios

lau benne' ca' zaj nazrague' chee'.

## 27

<sup>1</sup> Xránadxu Dios naque' xel-la' naxaní' chia',  
ne Benne' dxuselé' neda'.

¿Nu benne' gaca guchebe' neda'?

Xránadxu Dios naque' Benne' dxucu'uje' neda'.

¿Nu benne' gaca guzúe' neda' lu da stébele'e?

<sup>2</sup> Gate guléchaj benne' ca' dxelune' da calela chia',

nen benne' ca' dxulusaca zi'e neda',  
ne benne' ca' dxeledábage' neda' chee xuluzría xi'e neda',  
na' gulechégüe', ne xeajlecházie'.

<sup>3</sup> Láqueze xeléchaj tu cue' benne' dxjaque' wedil-la neda',  
benne' ca' dxeledábage' neda', quebe zrêbequeza'.  
Láqueze xuluzúe' neda' lu wedil-la, neda' guxrén lázrequeza' Dios.

<sup>4</sup> Tu da gunábeda' Xránadxu Dios.  
Da nigáze sa lazra', da naca na chee sua' lizre Xránadxu  
xúgute zra gaca bana',

chee gulaba lazra' ca naca da xrtante chee Xránadxu,  
ne chee guchálajlëna' Le' lu xudau' lá'azxa chee'.

<sup>5</sup> Le' gucache chawe' neda' lu lataj lá'azxa chee'  
lu zra dxaca da calela.

Gucache chawe' neda' lu lataj cheéqueze' naga zúaqueze'.  
Guzúe' neda' tu naga se cháweda'.

<sup>6</sup> Nadxa gunë' guzétaja' benne' dxeledábage' neda',  
ne zaj naxéchajë' neda',  
na' nen dutë xel-la' dxebé gutia' béadu ca' guzúa'-ba'  
lu cugu chee'.

Gúl-laqueza', ne tu güe lá'anazqueza' Xránadxu.

<sup>7</sup> Xran, ben chi'a gate ne dxuláwizra' Lue'.  
Bexache lazre' neda', ne bechebe chia'.

<sup>8</sup> Lu xichaj lázrdawa' benda' chí'u, gunnú': "Bexilaj chia'."  
Xexílaja' chiu', Xran.

<sup>9</sup> Quebe gucache lau' chia' neda'.

Lu xel-la' dxezra' a chiu' quebe xebigu' naga zua' neda',  
wen zrin chiu'.

Nacu' Benne' dxácalëne' neda'.

Quebe gusanu' neda', ne quebe cueaj xichju' neda',  
Dios, weselá chia'.

<sup>10</sup> Lácala xulusán xra xrna'a neda',  
tu xecá'azqueze Xránadxu Dios neda'.

<sup>11</sup> Bsede neda' da dxaca lazru' guna', Xran,  
ne ble'e neda' da li lazre' da dxal-la' guna',  
lawe' da zaj naxán benne' dxeledábage' neda'.

<sup>12</sup> Quebe gu'u lataj benne' dxeledábage' neda'  
xelunë' chia' da dxelaca lazre'  
lawe' da zaj naxechaj benne' wen lazre' neda'  
nen benne' dxelaca lazre' xulusaca zi'e neda'.

<sup>13</sup> Xránadxu Dios guchebe lazre' le'eda' da xrlátaje chee'  
naga gaca bana'.

La quebe guxéajlë'a da nigá, na' gute ni'a na'a.

<sup>14</sup> Le cueza xelá' Xránadxu.

Le gutipa lázrele, na' Le' guzé chúchue' le'e.

Awe', le cueza xelá' Xránadxu.

## 28

<sup>1</sup> Xran, dxuláwizra' Lue'.

Nacu' Benne' dxucú'uju' neda'.

Bze naga chi'a lawe' da che quebe xennu' neda'  
gaca' ca tu benne' dxu'e lataj ba xa'.



- 2 Ben chi'a dxuláwizra' Lue',  
ne dxechisa na'a lau' naga zu' lataj lá'azxa chiu'.
- 3 Quebe guzríá xi'u neda' tu zren nen benne' wen da calela ca',  
ne cá'aqueze nen benne' ca' dxelunę' da zrinnaj,  
benne' ca' dxelenné' dizra' cháwedau' lau le sa' ljwezre',  
san xu'u lázrdawe' da calela gunę' cheę'.
- 4 Bde benne' ca' lu da ba xa' cáteze naca cheę da belunę',  
cáteze naca da calela da zaj nunę'.
- Buneczruj cheę benne' ca' cáteze da belunę', da na' dxal-la' xelezí'e.
- 5 Lawe' da quebe gulape' ba lá'ana da ben Xránadxu,  
ne quegá da bene' lu ni'a ná'queze',  
guxrinnaje' benne' ca', ne gudéę' le' lu da ba xa'.
- 6 ¡Gaca ba Xránadxu Dios, Bénnea' benne' chi'a  
gate bláwizra' Le'!
- 7 Xránadxu naque' Bénnea' dxuzé chúchue' neda',  
ne dxucu'uje' neda'.
- Bxren lazra' Le', na' gúcalenę' neda',  
na' cheę le' na' gubéle'eda', na' gul-laqueza',  
ne güe lá'anaqueza' Le'.
- 8 Xránadxu naque' Bénnea' dxuzé chúchue' benne' cheę' ca',  
ne naque' Benne' dxucu'uje', ne dxuselé' bénnea' guqué'e.
- 9 Bselá benne' chiu' ca', ne ben gaca chawe' cheę da naca cheę'.
- Bxue benne' ca', ne bęxru le' chadíá chacanna.

## 29

- 1 Le güe lá'ana Xránadxu, le'e, zrale xabáa.  
Le güe lá'ana xel-la' szren cheę', ne xel-la' waca cheę'.
- 2 ¡Da xabáa naca La Xránadxu!  
¡Le güe lá'ana na!  
Le guzú zríbele lau Xránadxu lá'azxa gate xelé'e.
- 3 Chi'i Xránadxu dxen na lawe' nísadau'.  
Dxen chi'i Dios xabáa ca guziu' da dxennę na.  
Dxedá chi'e lawe' nísadau'.
- 4 Dxen chi'i Xránadxu ca naca xel-la' wal-la cheę na.  
Dxen chi'i Xránadxu dute xel-la' szren cheę na.
- 5 Chi'i Xránadxu dxichaj na xaga cedro ca'.  
Dxichaj na xaga cedro ca' zaj ze na xi'a Líbano.
- 6 Dxuxrite na xi'a Líbano ca' ca dxelexrite bęzredu ca',  
na' dxuxrite xi'a Hermón ca tu bęzredau'.
- 7 Chi'i Xránadxu dxun na chaze xesa.
- 8 Chi'i Xránadxu dxuxrize na le'e xixre' lawe' lataj.  
Dxuxrize na le'e xixre' cheę xęzr la xu Cades.
- 9 Chi'i Xránadxu dxuxrize na xaga wal-la ca'.  
Dxuchibe na xrlegue xaga ca',  
na' lu xudau' cheę' dxelenná xúgutę bénneache:  
“¡Gaca ba Dios!”
- 10 Dxenná be'e Xránadxu nísadau' ca'.  
Chadíá chacanna dxenná be'e ca Wenná Bea.
- 11 Xránadxu Dios dxuzé chache' benne' cheę' ca'.  
Dxuzé' le' lu da ba neza cheę xel-la' dxebeza zri lazre'.

**30**

<sup>1</sup> Gucá'ana szrena' Lue', Xran, lawe' da bechisu' neda',  
ne quebe bnézzuju' lataj benne' ca' dxeledábague' neda'  
xelún le' chia'.

<sup>2</sup> Xrana' Dios, bláwizra' Lue', na' bexunu' neda'.

<sup>3</sup> Xran, bseláu' neda' lu lataj ba xa'.

Bexunu' neda' chee quebe chu'a xedxu ba.

<sup>4</sup> Le gul-la chee Xránadxu, le'e nácale benne' cheéqueze'.

Le xē Le': "Xcalenu'", ne dxajsá lázrele naque' lá'azxa,

<sup>5</sup> lawe' da tu chí'idauze dxezré'e

san chadía chacanna zua xel-la' zri'i lazre' chee'.

Wabézzredxu tu zreze, san che zílala wabéle'edxu.

<sup>6</sup> Gate guzúa chawa' gunnía': Quebe nu seque' gutá neda',

<sup>7</sup> lawe' da bze chuchu' neda', Xran, ca tu xi'a zren,

ne blé'enu' neda' cháwedau'.

Gate bcache lau', na' guzúa' stēbe.

<sup>8</sup> Xran, guláwizra' Lue', ne gata' xueda' Lue'.

<sup>9</sup> ¿Bizra da ba neza gaca na chiu' che gatia',

ne chu'a xedxu ba?

¿Güe lá'ana' Lue' gate ba naca' xu xrte?

¿Waca nu guzenda' da li chiu'?

<sup>10</sup> Bze naga neda', Xran, ne bexache lazre' neda'.

Xran, gúcale neda'.

<sup>11</sup> Benu' bexaca xel-la' dxebezre chia' xel-la' wexá'a.

Bcuasu' xel-la' dxewí'ine lazre' chia', ne bzu' chia' xel-la' dxebé.

<sup>12</sup> Chee le' na' tu gúl-lazqueza' chiu', lawe' da nacu'

da ba neza chia', ne quebe sua zríqueza'.

Xrana' Dios, tu güe lá'anazqueza' Lue' chadía chacanna.

**31**

<sup>1</sup> Dxuxrén lazra' Lue', Xrana' Dios.

Quebe gu'u lataj xedué'eda'.

Lu da xrlátaje chiu' bselá neda'.

<sup>2</sup> Bze naga chi'a, ne bselá neda'.

Bze chuchu' neda', ne bucú'uj neda' chee la'.

<sup>3</sup> Nacu' Benne' dxuzé chuchu' neda', ne dxucú'uju' neda'.

lawe' da nacu' li lazre' gulé'enu' neda' neza,

ne gusi'u neda' neza na'.

<sup>4</sup> Bebéaj neda' lu xralaj da ba zaj nucueze', chee xelēl-le' neda'.

Lue' nacu' Benne' dxuxúe' neda'.

<sup>5</sup> Lu na'u dxuzúa' bēnne'du xu'a, Xran.

Lue' bexá'awenu' neda', Dios li lazre'.

<sup>6</sup> Dxecuídada' benne' ca' dxelebeza lazre' dios ca'

quebe bi zaj zaca.

Neda' dxebeza lazra' Xrana' Dios.

<sup>7</sup> Béle'eda', ne sua' lu da ba neza lawe' da dxexache lazru' neda'.

Caní dxunu' lawe' da dxelé'equeznu' ca da dxezaca zi'a.

Nézenu' ca dxedéa' lu da ba xa'.

<sup>8</sup> Quebe bdeu' neda' lu na' benne' ca' dxeledábague' neda'.

Bze chuchu' neda' tu lataj chawe'.

9 Bexache lazre' neda', Xrana' Dios, lawe' da zua' lu da ba xa'.  
Ba bebizre nisa xuzru xiaj lawa' lawe' da dxewí'ine lazra'  
dute bēnne' du xu'a, ne dute bela' dxen chia'

10 lawe' da dxedé xel-la' nabán chia' lu da ba xa',  
ne dxedéa' iza chia' ca' dxebezre lazra'.  
Dxedú lazra' lawe' da nabaga' zria, na' dxelelá zrita xu'a.

11 Xúgute benne' ca' dxeledábage' neda' dxelecuídenē' neda',  
na' benne' walíZR chia' dxuluzúē' neda' chelá'ala,  
na' benne' zaj núnbe'e neda' dxelecuase' neda'.  
Benne' ca' dxelelé'ene' neda' la neza dxuluzrúnnujē' naga zua'.

12 Benne' caní ba gulal-la lazre' neda' ca dxelal-la lazre'  
tu benne' gate.

Naca' neda' ca tu xé'ena xu da nalá'a.

13 Dxenda' dizra' schanni' da dxelelná benne' zante chia',  
na' gáteteze zua da dxuchebe na neda'.

Dxácatē na' dxelunē' tuze dizra' bi xelunē' chia',  
ne zaj nunē' xelútiē' neda'.

14 Neda' dxuxrén lazra' Lue', Xran.

Dxennía' nacu' Lue' Dios chia'.

15 Lu na'u Lue' zaj xu'u zra chia' ca'.

Bselá neda' lu na' benne' ca' dxeledábage' neda',  
ne lu na' benne' ca' zaj nau zi' xuzre' neda'.

16 Lu xel-la' szren chiu' bxue neda', wen zrin chiu'.

Lu xel-la' dxexache lazre' chiu' bselá neda'.

17 Quebe gu'u lataj xedué'eda', Xran, lawe' da dxuláwizra' Lue'.

Bēn xelxedué'e benne' ca' dxelebéaj xíchajē' Lue'.

Bēn xelézua zrie' lu lataj ba xa'.

18 Bēn quebe gaca xelenné benne' ca' dxelezí xē'e,  
benne' ca' dxelelné' da calela cheē benne' xrlátaje ca',  
da dxelelné' lu xel-la' dxulucá'ana szren cuina,

ne lu xel-la' dxulucá'ana ditaj benne' caní.

19 Da zrente naca xel-la' zri'i lazre' chiu' da napu'  
cheē bi gunu' cheē benne' ca' dxelape' Lue' ba lá'ana,

da na' dxunu' lau xúgute bēnneache

nē cheē benne' ca' dxelebeza lazre' Lue'.

20 Lu da bagácheze naga zu' Lue' dxucachu' benne' ca'

cheē quebe bi xelún bēnneache cheē'.

Dxuzú' benne' ca' tu lu xu'u nagache

cheē quebe bi gun cheē' xel-la' wetil-la dizra' cheē bēnneache.

21 ¡Gaca ba Xránadxu Dios!

Lu xel-la' dxexache lazre' cheē' bene' da zrente  
cheē gúcalenē' neda' tu lu xēzre naga guca wedil-la.

22 Gate na' guzúa da dxuchebe neda' gunnía':

Zua' naga québedxa le'e Xrana' neda'.

Lue' bennu' chí'a da guta' xueda' Lue' gate na' bláwizra' Lue'.

23 ¡Le zri'i Xránadxu, xúgutele le'e nácale benne' cheē Léqueze'!

Xránadxu dxuxúē' benne' ca' quebe dxulusanē' Le',

na' dxuxunézrujle'e cheē benne' ca' dxulucá'ana szrenē' Le'.

24 Le gutipa lázrele, xúgutele le'e dxebeza lázrele Xránadxu Dios,  
na' Le' guzé chúchue' le'e.

**32**

<sup>1</sup> ¡Ba neza zrentę naca na cheę bėnnea'  
Dios ba bnite lawe' dul-la da gubáguę',  
ne ba gudúę' zria da guzúa cheę'!

<sup>2</sup> ¡Ba neza zrentę naca na cheę bėnnea'  
Dios quebe dxusebague' le' zria,  
bėnnea' quebe dxezí xę'e'!

<sup>3</sup> Gate quebe guxrúalepa' dul-la gubaga',  
bedú lazra' lawe' da gudxezra' bedú zra.

<sup>4</sup> Te zra ne chizrela bdeu' neda' xel-la' zi', Xran.  
Bedú lazra' ca dxebizre beaj nisa beu' la.

<sup>5</sup> Nadxa guxrúalepa' dul-la gubaga',  
ne quebe bcacha' zria da guzúa chia'.  
Bechugu lazra' guxrúalepa' na lau Lue', Xran,  
na' Lue' bnite lau' cheę dul-la gubaga'.

<sup>6</sup> Xúgute bėnneache chiu' dxal-la' xuluchálajlene' Lue'  
gate de lataj xelexezrelne' Lue', na' gate zrin da zi' da xa'  
da xelesaque',

da gaca na ca tu xęgu nisa zren da dxedxuaj na,  
na' quebe bi gune na benne' ca'.

<sup>7</sup> Lue' nacu' ca tu lataj naga gaca gucache cuina',  
na' gucache chawu' neda' cheę quebe bi da saca'.

Tu gul-lazqueza' zizraj ca bseláu' neda' lawe' da dxuxú' neda'.

<sup>8</sup> Dxenná Xránadxu: "Gulé'eda' lue' neza naga dxal-la' tau'.  
Gusédeda' lue', ne guzėjajni'ida' lue' ca dxal-la' gunu'.

<sup>9</sup> Quebe gacu' ca tu bzrina' u tu bea, be quebe bi dxelėjajni'iba',  
bea ca' dxun na ba xen nna be'enu'-ba', na' cu'u xia dxú'aba',  
cheę gunu' xelunba' ca dxaca lazru'."

<sup>10</sup> Benne' wen da calela ca' dxun na ba xen  
xeledéę' lu da zi' da xa'.

Benne' ca' dxuluxrén lazre' Xránadxu,  
tu dxuxúezqueze' le' nen dutę xel-la' zri'i lazre' cheę'.

<sup>11</sup> Le'e, benne' xrlátaje, le be, ne le sua lu da ba neza,  
ne cheę da ben Xránadxu, gúcalęne' le'e.

Nen dutę xel-la' dxebé le gul-la, le'e, nácale li lazre' lau Le'.

**33**

<sup>1</sup> Le be le'e, benne' xrlátaje, lau Xránadxu Dios.

Xrtantę naca lau Dios da dxelúe lá'ana benne' xrlátaje ca' Le'.

<sup>2</sup> Le gucá'ana szren Dios nen da zríadi'i na du da dxínnele.  
Le gúl-laqueze cheę' nen da dxúl-lalęnle,  
ne nen tu da nua na chi du.

<sup>3</sup> Le gul-la cheę Le' tu da cube.

Le gul-la cháwedau', quínnele dutę xel-la' dxebé.

<sup>4</sup> Li lazre' naca xrtizra' Xránadxu Dios,  
na' nune' dutę lu xel-la' li lazre' cheę'.

<sup>5</sup> Le' nazrí'ine' da naca xrlátaje, ne da naca du lazre'.

Zaj núnbea bėnneache xel-la' dxexache lazre' cheę Xránadxu  
du gabí'i xęzr la xu.

<sup>6</sup> Ne cheę xrtizra' Xránadxu Dios, beņę' xabáa,

na' xúgutẹ belaj da zaj nalá' zran xabáa benẹ'  
nen be' dxedxuaj dxu'e.

7 Le' dxuxutube' nísadau', ne dxexune' na ca tu xi'a nisa.

Dxegá'a chawe' nisa lu da situj ca' naga nucueze' chee' na.

8 Le zrebe Xránadxu Dios, xúgutele zrale xezr la xu nigá.

Le zrebe lau Le', xúgutele le'e zrale lu xezr la xu

9 lawe' da gunneze', na' guca xezr la xu.

Gunná be'ene' na, na' zúaqueze na.

10 Xránadxu Dios dxune' dxexaca dácheze dizra' zaj nun

bénneache xezr la xu ca',

ne dxune' dxelaca níteze da ca' zaj nune' xelune'.

11 Dizra' ba nun Xránadxu Dios tu súazqueze

na chadía chacanna.

Da dxegú'u be'e lu lázrdawe' tu wadíazqueze na

lau xúgutẹ bénneache.

12 Ba neza zrentẹ naca na chee benne' xezr la xu ca'

Xránadxu naque' Dios chee le',

benne' xezr la xu ca' gucá'a Dios chee xelaque' benne' chee'.

13 Naga zue' xabáa chee' dxenná' Xránadxu Dios,

na' dxelé'ene' xúgutẹ cuen bénneache.

14 Naga zue' lataj lá'azxa chee' dxenné'e,

na' dxelé'ene' ca zaj zra' bénneache lu xezr la xu.

15 Le' bene' xichaj lázxdau xúgutẹ benne' ca',

na' dxenné'e xúgutẹ da dxelune'.

16 Quebe la benne' wenná bea ne chee benne'

dxjaque' wedil-la zantẹ chee',

ne quebe la benne' wal-la ne chee xel-la' wal-la da nape'.

17 Quebe nu benne' le' ne chee bzrina',

ne quebe nu la ne chee xel-la' wal-la zren chee'.

18 Le na' xque, dxuxúe Xránadxu Dios benne' ca' dxelezrebe' Le'.

Dxuxúe' benne' ca' dxelebeza lazre' Le' xexache lazre' le'

19 chee guselé' le' lu xel-la' gute,

ne chee gugawe' le' gate dxaca gubina'.

20 Dxebeza lázredxu Xránadxu Dios.

Le' naque' Bénnea' dxácalene' dxi'u, ne dxucu'uje' dxi'u.

21 Chee le' na' du lázredxu béle'equezdXu lau Le',

lawe' da tu dxuxrén lázrezquezdXu La lá'azxa chee'.

22 Bexache lazre' netu', Xránantu',

lawe' da dxebeza lázrentu' Lue'.

## 34

1 Tu güe lá'anazqueza' Xránadxu Dios te zra chizrela.

Tu gül-lazqueza' da güe lá'ana na Le'.

2 Xezaca ba lázrelena' Xránadxu Dios.

Xelén benne' dxexruj lazre' da caní, na' welebélé'ene'.

3 Le gucá'ana szren Xránadxu Dios tu zren nen neda',

na' tu zren gucá'ana szrendxu La lá'azxa chie'.

4 Bláwizra' Xránadxu Dios, na' Le' benne' chia',

ne bselé' neda' lu xúgutẹ da buluchebe na neda'.

5 Benne' ca' gulebeza lazre' Le' belelé'ene' da xabáa chee',

ne quebe belexedué'ene'.

- 6 Neda', benne' xache', bláwizra',  
na' ben Xránadxu Dios chia',  
ne bselé' neda' lu xúgute da dxezaca zi'a.
- 7 Gubáz chee Xránadxu zue' cuita benne' ca' dxelezrebe' Le',  
na' dxucu'uje' benne' ca'.
- 8 Le guxúe xque, na' lé'ele naca xrlátaje Xránadxu Dios.  
Ba neza zrente naca na chee bénnea' dxuxrén lazre' Le'.
- 9 Le zrebe Xránadxu Dios, le'e, nácale benne' chee Léqueze',  
lawe' da quee bi dxelexazrje benne' ca' dxelezrebe' Le'.
- 10 Bezre xixre'du ca' dxelexáxrjeba', ne dxeledunba'.  
Benne' ca' dxelebeza lazre' Xránadxu Dios  
quebe bi da chawe' xelexáxrjene'.
- 11 Le da, bidau', ne le xen chia'.  
Gusédeda' le'e chee zrébele Xránadxu Dios.
- 12 ¿Nu benne' ládujla le'e dxaca lazre' xegá'ane'  
lu xel-la' nabán,  
bénnea' dxaca lazre' sue' zane' iza chee lé'ene' da chawe'?
- 13 Bxue xanne' ca dxuchálaju' chee quebe nneu' da calela,  
ne chee quebe guchálaju' da wen lazre'.
- 14 Bsan da calela da dxunu', na' ben da xrlátaje.  
Ben ba xuzre gapu' xel-la' dxebeza zri lazre',  
ne ben ca naca chee na.
- 15 Dxuxúe Xránadxu Dios benne' ca' zaj naque' xrlátaje,  
ne dxuzé nague' da dxululáwizre' Le'.
- 16 Dxezrá'a Xránadxu Dios benne' ca' dxelune' da calela,  
chee quebe sua nu benne' chajsá lazre'  
benne' wen da calela ca'.
- 17 Benne' xrlátaje ca' dxululáwizre' Xránadxu Dios,  
na' Le' dxenne' chee',  
ne dxuselé' benne' ca' lu xúgute da dxelezaca zi'e.
- 18 Gágute zua Xránadxu Dios naga zaj zra' benne' ca'  
dxelexewi'ine lazre',  
ne dxuselé' benne' ca' dxelexewi'ine lazre'.
- 19 Da zante da dxezaca zi' benne' xrlátaje.  
Dxuselá Xránadxu Dios bénnea' lu xúgute da ca'.
- 20 Le' dxuxúequeze' xúgute zrita xu'e,  
na' netú zrita chee' quebe gachaj na.
- 21 Dul-la da dxun benne' wen da calela gute na le',  
na' xelebía xi' benne' ca' dxelecuídene' benne' xrlátaje.
- 22 Xránadxu Dios dxexá'awe' bénnea'du xu'u  
benne' wen zrin chee' ca',  
na' xúgute benne' ca' dxuluxrén lazre' Le'  
québequeze xelebía xi'e.

### 35

- 1 Xran, bsizre benne' ca' dxelenné' chia'.  
Gudíl-lale benne' ca' dxeledíl-lalene' neda'.
- 2 Gudá gucu'uju' neda' lu wedil-la,  
ne gúcale neda'.
- 3 Gudel-la xia chee wedil-la chee guzagu' benne' ca'  
dxululague' neda'.

Guzre neda' nacu' Benne' dxuselé' neda'.

<sup>4</sup> Ben xelexedué'e, ne xeleque zréaje benne' ca'  
dxelaca lazre' xelútie' neda'.

Ben xuluzrunnuj, ne xelexedué'e benne' ca' dxelaca lazre'  
xelune' chia' da calela.

<sup>5</sup> Ben xelaque' ca tu xizre bebe da dxua be',  
ne gusel-la gubáz chee xabáa chiu' chee gulague' benne' ca'.

<sup>6</sup> Ben chul-la neza naga xeledéé', na' gaca na naga xelebile',  
ne gusel-la gubáz chee xabáa chiu' chee gulague' benne' ca'.

<sup>7</sup> Bulucaché' tu xralaj chee queļa na neda',  
ne quegá bi nuna' chee'.

Gulene' tu xedxu naga cheajcházia' neda',  
ne quegá bi de da dxagu na zria chia'.

<sup>8</sup> Gusel-la da guzría xi na benne' ca', ne quebe xeleque be'ene'.  
Ben queļa xralaj chee' na' léqueze',

ne cheajlecházie' naga xelebía xi'e.

<sup>9</sup> Nadxa béle'equezda' ca naca da nun Xránadxu Dios.

Sua' lu da ba neza lawe' da bselé' neda'.

<sup>10</sup> Xúgutę zrita xu'a xelenná na: Xran, ¿núzraqueze naca  
ca nacu' Lue'?

Dxuseláu' benne' xache' lu na' benne' wál-ladxa ca le',  
ne benne' dxexazrje lu na' benne' dxebane' da du de chee'.

<sup>11</sup> Belasa benne' dxelexechebe' da wen lazre'.

Gulawe' zria neda' chee' tu da quebe dxaca be'eda'.

<sup>12</sup> Belexebi'e neda' da caleļa chee' tu da xrlátaje da beņa',  
chee' xuluzúe' neda' lu da ba xa'.

<sup>13</sup> Neda', gate quebe chawe' gulezúe', bewi'ine lazra'.

Beņa' gubasa da bsaca zi na neda',

ne du lazra' bláwizra' Dios chee' xexune' benne' ca'.

<sup>14</sup> Bewi'ine lazra' chee' benne' ca' ca dxuna' chee'

le sa' ljwezra', u chee' bi bichequeza'.

Guzúa' lu da baxache' ca dxun benne' chee' xrne'e gate dxatie'.

<sup>15</sup> Gulebé benne' ca' gate zua' lu da ba xa', ne belezrague'.

Belezraga benne' dxeledábage' neda',

benne' wen da caleļa, na' chadite' gulel-le' neda'.

Tu belúzequeze' neda', ne quebe gulezúa zrie'.

<sup>16</sup> Bulusaca zi'e neda', ne belún le' chia',

ne gulagu lazxe' lu xel-la' dxelezrá'a chee' neda'.

<sup>17</sup> Xran, ¿ájate scha' gu'u latja da dxelune'?

Bselá neda' lu na' benne' caní dxuluzría xi'e neda',

benne' zaj naque' ca bezre xixre' ca'.

<sup>18</sup> Xapa' Lue': Xcalenu', lówela benne' zan ca' zaj

nadupe' chiu' Lue'.

Tu güe lá'anazqueza' Lue' ládujla benne' zan ca'.

<sup>19</sup> Quebe gu'u lataj xelebé benne' ca' dxeledábage' neda',

ne quebe bi nuna' chee'.

Quebe gu'u lataj xelún la benne' ca' chia',

benne' dxelecuídenę' neda',

ne quebe bi de da dxagu na zria chia'.

<sup>20</sup> Benne' caní quebe dxelaca lazre' xelezúe' lu

xel-la' dxebeza zri lazre',

na' lu xel-la' dxelezí xę cheę dxelenné' cheę benne' ca'  
dxelebeza zri lazre' lu xęzr la xu nigá.

<sup>21</sup> Belún le' chia'.

Gulenné': "¡E! ¡E! ¡Ba blé'entu' da nune'!"

<sup>22</sup> ¡Xran, ba blé'eqeznu' da dxelunę'!

¡Quebe sua zriu'!

¡Xran, quebe gusanu' neda'!

<sup>23</sup> ¡Guxasa, guzúa guchi'u chia'!

¡Gudá, Xrana' Dios, cheę gácalęnu' neda'!

<sup>24</sup> ¡Bchi'a chia' lu da xrlátaje chiu', Xrana' Dios!

¡Quebe gu'u benne' ca' lataj xuluzrizre' chia'!

<sup>25</sup> ¡Quebe gu'u lataj xelenné': "Ba guca da dxezá lázredxu!"

¡Quebe xelenné': "Ba bendxu chie'!"

<sup>26</sup> Ben xelxedué'e, ne xeleque zréaje xúgute benne' ca'  
dxelebeņę gate bi dxaca chia'.

Bsi'e xel-la' stu', ne ben xelaca xala benne' ca'  
dxeledábage' neda'.

<sup>27</sup> Ben xelúl-la, ne xelebé benne' ca' zaj de'e neda',  
cheę xelennáqueze': "Tu xegá'ana szrénzqueze Xránadxu,  
Bénnea' dxezá lazre' sua lu xel-la' dxebeza zri lazre'  
benne' wen zrin cheę!"

<sup>28</sup> Tu guchálajzqueza' cheę da xrlátaje chiu',  
ne cheę da dxue lá'anaqueze na Lue' te zra chizrela.

## 36

<sup>1</sup> Da zrinnaj da dxun benne' dxuzúa chalá'ala Dios  
dxuchálaję na le' lu xichaj lázrdawę'.

Quebe dxezá lázrequeze' gape' Dios ba lá'ana.

<sup>2</sup> Cheę le' na' dxulé'e cuine' ca tu benne' zrente.

Dxéqueņę' quebe dxelé'e Dios da zrinnaj da dxune',  
ne quebe dxecuide Dios le'.

<sup>3</sup> Da tu dxuchálajzqueze' naca na da zrinnaj, ne da wen lazre'.

Québedxa dxéajni'ine', ne québedxa dxune' da xrlátaje.

<sup>4</sup> Dxulaba lazre' ca naca da caleła gunę' gate de' naga dxate'.

Xu'e neza da quebe naca neza chawe'.

Quebe dxecuıdenę' da caleła.

<sup>5</sup> Xrana' Dios, zrente naca xel-la' dxexache lazre' chiu'  
da dxezrintę na xabáa,

na' dxezrintę lu beuj xel-la' li lazre' chiu'.

<sup>6</sup> Da xrlátaje chiu' naca na ca tu xi'a zren chiu',

na' ca dxuchi'u naca na ca tu nısadau' sítujte.

Xrana' Dios, tu dxuxúezquezu' bėnneache, ne bę xixre' ca'.

<sup>7</sup> Xrdante naca xel-la' dxexache lazre' chiu', Dios.

Cheę le' na' dxuluxrén lazre' bėnneache Lue' ca dxelún  
bedxuj dxé'enedu ca' dxelexezraba' zran xrila bedxuj.

<sup>8</sup> Welélajquezne' cheę da dele'e lizru',

na' Lue' gunézruju' xelé'aje' da naca ca tu xegu da

naca na da dxezaca ba lazru' Lue'.

<sup>9</sup> Naga zu' Lue' zua beaj naga dxalaj nisa da dxunna na  
xel-la' nabán.

Lu xel-la' naxanı' chiu' walé'entu' da naca lení'.



10 Bexache lazre' benne' ca' zaj núnbe'ę Lue',  
 ne bzua cheę benne' li lazre' ca' da xrlátaje chiu'.  
 11 Quebe gu'u lataj tábaga benne' dxucá'ana szren cuina neda',  
 ne quebe gutá benne' dxun da caleła neda'.  
 12 Xeajlechaze benne' ca' dxelune' da zrinnaj.  
 Lue' bęnu' xeajlechaze benne' ca', na' quebe gaca xelexasę'.

### 37

1 Quebe su' stębe ne cheę da dxelún benne' ca'  
 dxelune' da caleła,  
 ne quebe sę lazru' da zaj nápalę'ę benne' dxelune' da zrinnaj,  
 2 lawe' da xeledę cheę benne' ca' ca dxaca cheę xixre'du ca',  
 na' gaca cheę benne' ca' ca dxaca cheę xixre' da nadxugu,  
 dxebizre na.  
 3 Bxren lazre' Xránadxu Dios, ne bęn da xrlátaje,  
 na' súaquezu' lu xęzr la xu, ne sí'quezu' ba neza da li.  
 4 Bezaca ba lazre' nen Xránadxu,  
 na' Le' gúnnaqueze' chiu' da dxezá lazru'.  
 5 Bzua cuinu' lu na' Xránadxu,  
 ne bxren lazre' Le', na' Le' gune' ca da dxenabu'.  
 6 Gulé'ęę' da xrlátaje chiu' ca tu xel-la' naxanı',  
 ne da li lazre' chiu' ca lawe' zra.  
 7 Guzúa zrize lau Xránadxu, ne guleza lazre Le'.  
 Quebe su' stębe ne cheę benne' dxezi'ę ba neza,  
 bęnnea' dxúnqueze' da caleła.  
 8 Bsan xel-la' xichaj zra'a, ne quebe cuídenu'.  
 Quebe sa lazru' bi xusacu' benne' ca' dxelune' da caleła,  
 9 lawe' da guzría xi' Dios benne' ca' dxelune' da caleła.  
 Benne' ca' dxelebeza lazre' Xránadxu, gaca cheę' xęzr la xu.  
 10 Chadite te cheę benne' ca' dxelune' da caleła.  
 Le'enu' lizre lataj benne' ca', san québedxa zaj zre'ę na'.  
 11 Benne' dxexruj lazre' ca' gaca cheę' xęzr la xu,  
 na' xelexezaca ba lazre' lu xel-la' dxebeza zri lazre' zrente.  
 12 Benne' dxelún da caleła dxelilaj lazre' bi xelune'  
 cheę benne' xrlátaje,  
 ne lu xel-la' dxelezá'a cheę' xelagu lazxa benne' ca'.  
 13 Xránadxu Dios guzrízrequeze' cheę benne' ca' dxelune'  
 da caleła  
 lawe' da nézeng' ba za zra cheajsę cheę benne' ca'.  
 14 Benne' dxelune' da zrinnaj dxelebéaję' xia cheę',  
 ne dxuluzę' xaga nalá xęche'ze cheę',  
 cheę xuluzría xi'ę benne' xache' ca', ne benne' dxelexazrję',  
 cheę xelútię' benne' ca' dxelune' da li lazre'.  
 15 Xia nalá cheę benne' ca' chaze na lu lazrdáuqueze',  
 na' gáchajqueze xaga nalá xęche'ze cheę'.  
 16 Cháwedxa naca da du da dę cheę benne' xrlátaje  
 ca da gunní'a da zaj napa zánete benne' dul-la ca',  
 17 lawe' da welátequeze ni'a na' benne' dxelúne' da zrinnaj.  
 Xránadxu ná'queze dxuxúę' benne' xrlátaje ca'.  
 18 Nunbea Xránadxu ca zaj naca zra xelezúa benne'  
 du lazre' ca',

na' da zaj napa benne' ca' xelezúa na chadía chacanna.

<sup>19</sup> Quebe xelexedué' ené' gate quebe dxaca chawe' chee  
bénneache,

na' lu zra chee gubina' gata' da xelawe'.

<sup>20</sup> Xelebía xi' benne' dxelúne' da zrinnaj,

na' benne' ca' dxeledábaga' Xránadxu,

ca dxaca chee xiaj xixre' ca'.

Xeledé chee', ne xelexenitie' ca' zren chee xi'.

<sup>21</sup> Benne' ca' dxelún da calela tu da dxelenabe' tu chí'idauze,  
ne quebe dxuluxunézruje' na,

na' benne' xrlátaje dxexache lazre' le', ne dxunézruje' chee'.

<sup>22</sup> Benne' ca' dxelé'e Xránadxu le' chawe', gaca chee

benne' ca' xezr la xu,

na' benne' ca' quebe dxelé' ené' chawe', xelebía xí' queze'.

<sup>23</sup> Da dxelún benne' xrlátaje ca' zaj naca na da ble'e

Xránadxu le', na' dxelé' ené' cháwedau' ca da dxelune'.

<sup>24</sup> Gate dxelejchaze benne' xrlátaje ca' quebe cheajlechaze'

tu chí'ize lawe' da nuxru Xránadxu na' benne' ca'.

<sup>25</sup> Benne' cuide' guca', ne na'a ba gúxrúa',

ne cabata' ble'eda' tu benne' xrlátaje gusán Dios le',

na' quebe xeledá zri'ine zre sue' xelebéaje' guna'.

<sup>26</sup> Benne' xrlátaje nigá tu dxexache lázrezqueze',

ne dxunézruje' bi dxexazrje nu benne',

na' zri'ine zre sue' zaj naque' da ba neza chee bénneache.

<sup>27</sup> Québedxa gunu' da calela, san ben da xrlátaje,

na' gaca bánquezu' chadía chacanna,

<sup>28</sup> lawe' da nazrí'i Xránadxu da naca li lazre',

ne quebe dxusané' benne' zaj de'e Le'.

Chadía chacanna tu guxúezqueze' benne' ca',

san guzría xi'e xrtia ljwezre benne' ca' dxelune' da calela.

<sup>29</sup> Benne' xrlátaje ca' gaca chee' xezr la xu nigá,

na' xelezrá' queze' chadía chacanna lu xezr la xu.

<sup>30</sup> Benne' xrlátaje dxuchálajqueze' da naca sina,

na' ca dxuchi'e naca na xrlátaje.

<sup>31</sup> Da nadxixruij bea Dios tu xú'uzqueze na xichaj lázrdawe'.

Chee le' na' quebe cheajchaze bénnea'.

<sup>32</sup> Benne' wen da zrinnaj dxenné'e benne' xrlátaje,

ne dxune' ba xuzre gutié' le'.

<sup>33</sup> Quebe gusán Xránadxu le' lu na' benne' wen da calela na',

ne quebe guzría xi'e le' gate dxuchi'e chee'.

<sup>34</sup> Guleza lazre' Xránadxu, ne ben ca da ba gunné',

na' Le' chísaqueze' Lue' chee gaca chiu' xezr la xu nigá.

Gate xelebía xi' benne' dul-la ca', na' lé'enu' na.

<sup>35</sup> Ble'eda' tu benne' wen da zrinnaj, nagá'ane' szrente,

na' guxánle'e da de chee' ca dxegula tu xaga zrente.

<sup>36</sup> Na' gudé chee', na' québedxa zue' na'a.

Bexílaja' le', san quebe nu bezrelda'.

<sup>37</sup> Blaba lazre' ca naca chee benne' li lazre',

ne gunná' benne' xrlátaje

lawe' da naga cheajsé gaca tu da ba neza chee benne'

dxebeze' zri lazre'.

38 Benne' dxelunę' da caleła xelebía xí'queze'.  
 Quebe nu cha' xrtia ljwezre benne' dxelunę' da zrinnaj.  
 39 Xránadxu Dios guseláqueze' benne' xrlátaje ca',  
 na' Le' gutipe' lazre' benne' ca' lu zra chee da stebe.  
 40 Xránadxu Dios gácalęne' le', ne guselé' le'.  
 Guselé' le' lu na' benne' ca' dxelunę' da caleła,  
 na' gunę' gaca chawe' chee' lawe' da buluxrén lazre' Le'.

### 38

1 Xrana' Dios, quebe til-lu' neda' lu xel-la' dxezrá'a chiu'.  
 Quebe gudéu' neda' da ba xa' lu xel-la' snia chiu',  
 2 lawe' da belúe xaga nalá xéche'ze chiu' neda',  
 na' be na'u neda'.  
 3 Quebe bi chawe' zua belá' dxen chia' lawe' da dxezra'u neda',  
 ne quebe zaj zua zrita xu'a cháwedau' lawe' da nuna' dul-la.  
 4 Ca naca da zrinnaj da nuna' ba zria cháqueze na xíchaja'.  
 Zaj naca na chia' ca tu xua' zí'ile'e.  
 5 We' da zaj zria bel-la' dxen chia' ba dxelelá na,  
 ne ba dxeluzru na,  
 da na' dxaca chia' lawe' da beña' da caleła.  
 6 Nucache lawa', ne dxexedué'ele'eda',  
 ne dxebezre xacha' te zra chizrelá,  
 7 lawe' da ca naca bel-la' dxen chia' dxelá na,  
 ne quebe bi chawe' zua belá' dxen chia'.  
 8 Nate ni'a na'a, ne dxéqueda' ba naxúzrujne zrita xu'a.  
 Dxebezre lazra' lawe' da zua stebe lázrdawa'.  
 9 Xran, ca naca da dxezá lazra' zaj zua na nen Lue',  
 na' da dxebezre lazra' dxelé'equeznu' Lue'.  
 10 Dxate lázrdawa', ne ba bedú lazra',  
 ne québedxa dxelé'eda' cháwedau'.  
 11 Dxelexebiga ljwezra', ne le sa' ljwezra' ca' zítu'la  
 ne chee xízrawę' chia',  
 na' benne' walízr chia' ba belexeuase' zítu'la.  
 12 Benne' ca' dxelaca lazre' xelútię' neda' dxuluzale' xralaj,  
 na' benne' ca' dxelúe lazre' bi gaca chia' dxelennę' chia'  
 wabía xí'a, ne tu zaj zúaze' bi xulusaque' neda'.  
 13 Neda' quebe dxenda' ca dxaca chee tu benne' cuezru,  
 ne naca' ca tu benne' quebe dxaca nne',  
 benne' quebe dxexrá dxu'e.  
 14 Naca' ca tu benne' quebe dxenne',  
 bénnea' quebe dxexechebe',  
 15 lawe' da dxebeza lazra' Lue', Xrana' Dios.  
 Lue' xechębu' waláz chia', Xrana' Dios.  
 16 Gunnia': Quebe gu'u lataj xelebenę' ne chee da dxaca chia'.  
 Gate dxeajchazia', quebe gu'u le' lataj xulucá'ana szren cuine'  
 lawe' da zua' lu da baxache'.  
 17 Ba zua' cheajcházia',  
 ne tu dxelázqueze dutę bel-la' dxen chia'.  
 18 Chee le' na' xrúalepequeza' da caleła da beña',  
 ne xewine lazra' ca naca dul-la da nabaga'.  
 19 Benne' ca' dxeledábague' neda' zaj zúaqueze' chawe',

ne zaj naque' benne' wal-la.

Zaj naxánle'e benne' ca' dxelecuídenē' neda',  
ne quebe bi de da dxagu na zria chia' lau le'.

<sup>20</sup> Benne' ca' dxelune' da calela chee benne' ca'  
dxelune' da xrlátaje

zaj naque' benne' dxeledábage' neda' lawe' da  
tu dxúnzqueza' da xrlátaje.

<sup>21</sup> Quebe gusanu' neda', Xrana' Dios.

Dios chia', quebe su' zitu' naga zua'.

<sup>22</sup> Ben ba xuzre gácalenu' neda', Xran.

Nacu' Benne' dxuselé' neda'.

## 39

<sup>1</sup> Neda' gunnía': Guxúe xanne' cuina' chee quebe guna' dul-la  
lu da guchálaja'.

Tu guxúe xánnezqueza' ca da guchálaja' dxácate na'  
zua benne' wen da calela naga zua'.

<sup>2</sup> Guzúa' zrize ca tu benne' quebe dxaca nnie',  
ne quebequeze bchálaja' da xrlátaje,

na' bzálaxa xel-la' dxudía chia'.

<sup>3</sup> Guca lázrdawa' ca tu da dxala,  
na' lu da dxulaba lazra' guca na ca tu xi'.

Na' gunaba' lau Xránadxu, gunnía':

<sup>4</sup> Xran, ble'e neda' da gaca chia',

ne ájate zra gaca bana'.

Bzéajni'i neda' chadite nazruzre gatia'.

<sup>5</sup> Nunu' chia' sua' bábaze zra,  
na' iza chia' quebequeze bi naca na lau Lue'.

¡Da líqueze quebe bi zaj naca zra chee xúgute bénneache!

<sup>6</sup> ¡Da líqueze zaj naca bénneache ca tu zrúl-laze!

¡Da líqueze dácheze naca zaj dxe' bénneache gunne xue  
chee xel-la' nabán chee'!

¡Dxulucúdie' xel-la' gunnía', ne quebe zaj nézene'  
nu chee gaca na!

<sup>7</sup> Na'a, Xran, ¿bízraqueze cueza lazra'?

Tuzu' Lue' dxal-la' cueza lazra'.

<sup>8</sup> Bselá neda' lu xúgute da zrinnaj da bēna'.

Quebe gu'u lataj benne' xala ca' xelún le' chia'.

<sup>9</sup> Guzúa' zrize, ne quebe bi bchálaja'

lawe' da Lué'queze bēnu' guca caní chia'.

<sup>10</sup> Becá'a xízrawe' da bzu' lu bēla' dxen chia'.

Bache gatia' lu da dxusacu' neda'.

<sup>11</sup> Dxudéu' ba xa' tu benne' ba nun dul-la  
chee dxuzéajni'inu' le',

ne ca dxun béadu dxuteba' ladxe' dxuzría xi'  
da nazrí'idxe bēnea'.

¡Da líqueze quebe bi zaj naca zra chee xúgute bénneache!

<sup>12</sup> Bene da dxenaba' lau Lue', Xran,

ne bze naga ca da dxuláwizra' Lue'.

Quebe su' zrize gate zua' dxebezra' lau'

lawe' da naca' lau Lue' ca tu benne' dxedaze', ne quebe de lize',

ne naca' ca tu benne' quebe de xezr la xu chee'

ca gulaca xra xrtawa' ca'.

<sup>13</sup> Bsan neda' cheę gata' lataj xezí' le dipa'  
nédxula ca xexá'a xenitia'.

## 40

<sup>1</sup> Nen dutę xel-la' zren lazre' chia' guleza lazra' Xrana' Dios,  
na' bze nague' chia', ne benne' da gunábeda' Lę'.

<sup>2</sup> Bebéaje' neda' ca tu lu xędxu situj, ne lu da naca  
ca guna' guzra'.

Bzue' ni'a ca tu lu xiaj xre, ne begu'e neda' neza li.

<sup>3</sup> Bene' dxul-la' tu da cube da naca na da dxue lá'ana'  
Xránadxu.

Benne' zantę xeledé'ene' da nigá dxune', na' xelezrebe' Lę',  
ne xuluxrén lazre' Xránadxu Dios.

<sup>4</sup> Ba neza zrentę naca na cheę bénnea' dxuxrén lazre'  
Xránadxu Dios,

ne quebe dxune' ca dxelún benne' ca' dxulucá'ana szrene'  
bedáu' xiaj xaga ca',

ne quegá ca dxelún benne' ca' dxelún lazre'.

<sup>5</sup> Da zantę benu', Xrana' Dios, da dxebánentu',  
ne ca zaj naca da dxezá lazru' gunu' cheętu'  
quebe gaca gulábantu' lau Lue'.

Chela nu guzenda' ca zaj naca na,  
ne che guchálaja' cheę na, quebe baben tu na.

<sup>6</sup> Quebe dxezaca ba lazru' béadu ca' gutia' lau',  
u da gunna' Lue',

ne quebe gunabu' béadu ca' guzézxea' lau', u dxen cheę  
béadu ca' da guzúa' lau' ne cheę dula nabaga',

san gusalaju' naga' cheę xenda' chi'u.

<sup>7</sup> Nadxa gunná': Guná' xque, za'a neda'.

Lu xiche lá'azxa naxúaj na ca naca chia'.

<sup>8</sup> Dxezaca ba lazra' guna' ca da dxaca lazru' Lue', Dios chia',  
na' da nadxixruj be'u zua na lu xichaj lázrdawa'.

<sup>9</sup> Ca naca da xrlátaje chiu' ba bzenda' bénneache  
naga zaj nazraga chiu' bénneache zantę.

Gunná' xque, quebe guzúa' zria',  
ca nézqueznu' Lue', Xrana' Dios.

<sup>10</sup> Quebe bcácheza' ca da xrlátaje chiu' lu lázrdawa'.

Ba bchálajqueza' ca naca xel-la' li lazre' chiu',  
ne ca dxuseláu' bénneache.

Quebe guzúa' zri ca naca xel-la' dxexache lazre' chiu',  
ne ca naca da li chiu' ládujla benne' zantę zaj nazrague' chiu'.

<sup>11</sup> Xran, quebe chenu' xexache lazru' neda'.

Xel-la' dxexache lazre' chiu', ne da li chiu'  
tu dxelácalezqueze na neda'.

<sup>12</sup> Lawe' da ba guléchajlę'ę da caleļa ca' neda',  
da caleļa ca' da ba nuna' zaj zria na neda',

na' quebe gaca nna'a naga zu'.

Zaj naxánda na ca zaj naca xicha xíchaja', na' dxedú lazra'.

<sup>13</sup> Dxenaba' lau', Xran, guseláu' neda'.

Xran, ben ba xuzre gácalęnu' neda'.

14 Ben xelexedué'e, ne xeleque zréaje  
xúgute benne' ca' dxelaca lazre' xelúti'e neda'.

Ben xeajxaca bzébela, ne xelexedué'e  
benne' ca' dxelezá lazre' xelune' chia' da calela.

15 Ben xeleque zréaje' lawe' da belún zréaje' neda'  
benne' ca' gulé'e neda': "E, e."

16 Ben xelebé, ne xelezúe lu da ba neza xúgute benne' ca'  
dxelebeze' Lue',  
ne ben xelennáqueze benne' ca' zaj nazrí'ine' Lue',  
weselá chee'.

Xelenné': "Xegá'ana szrénqueze Xránadxu."

17 Láqueze sua' neda' lu da ba xa', ne lu da baxache',  
guxúequeze Xrana' Dios ájala guné' chia'.

Nacu' Benne' dxácalene' neda', ne Benne' weselá chia'.  
Dios chia', quebe chenu' gácalenu' neda'.

## 41

1 Ba neza zrente naca na chee bénnea' dxe'e gunne xue  
chee benne' xache'.

Lu zra gate zue' lu da stébe, guselá Xránadxu bénnea'.

2 Xránadxu guxúequeze' le', ne gunézruje' le' xel-la' nabán.

Gaca na tu da ba neza zrente chee bénnea' lu xezr la xu nigá,  
na' quebe gudé Xránadxu le' lu na' benne' ca' dxeledábage' Le'.

3 Xránadxu Dios gúxruqueze' le' gate zúe' lu xel-la' dxudía.

Gun chawe' duté da naque' gate na' quebe chawe' zue'.

4 Gunnía': Xrana' Dios, bexache lazre' neda'.

Bexún bénne'du xu'a lawe' da bēna' dul-la gate gudábaga' Lue'.

5 Benne' ca' dxeledábage' neda' dxelenné' chia' da calela.

Dxelenne': "¿Bátala gate benne' nigá, ne xenite le'?"

6 Che xedajlenné'e neda', dxelún lazre'.

Dxelebéaje' neda' dizra' chee bi da calela gaca xelenné' chia',

na' gate dxelexedxúaje', na' dxelexrúe' dizra' na'.

7 Gate dxelezraga benne' dxelecuídene' neda',

na' tu dxelennézqueze' chia'.

Tu dxuluchálajlezqueze' ljwezre' chia' neda' da naca  
da calela, dxelenné':

8 "Ba guxú'e tu xízrawe' da gute na le',

ne québedxa xexásaqueze' ga na' de'."

9 Cá'aqueze bénnea' guleza zri lazre' nen neda',

bénnea' bxren lazra', na' gudágulequeze' neda',

benne' nigá dxedábagazegue' neda'.

10 Lue', Xrana' Dios, bexache lazre' neda',

ne ben xexasa' neda',

na' xunézruja' benne' ca' ca da dxal-la' xelezí'e.

11 Caníqueze nezda' ba bēna' da dxezaca ba lazru' Lue',

chee quebe bi xelebéle benne' ca' dxeledábage' neda'.

12 Ca naca chia' neda', ba bēxruquezu' neda' lawe' da  
naca' du lazre',

ne ba bzu' neda' lau Lue' chadía chacanna.

13 ¿Gaca ba Xránadxu, Dios chee benne' Israel ca'

gaxuane iza, ne chadía chacanna!  
 ¡Ca'an naca na, ne ca'an gaca na!

## 42

1 Ca dxun bzrina' xixre' dxebezre xa'aba' lawe' da  
 dxebíleba' nisa,  
 ca' dxuláwizra bénne'du xu'a da naca chiu', Dios.  
 2 Dxebile bénne'du xu'a da naca chiu', Dios ban.

¿Bata gaca xida' chee guzúa cuina' lau Dios?  
 3 Nisa xuzru xiaj lawa' guca na ca xeta dxawa'  
 te zra chizrela,  
 dxácate na' gulé'e neda' xúgute zra: "¿Ga na' Dios chiu'?"  
 4 Dxajsá lazra' chee da caní, ne dxebezre lazra'.  
 Dxajsá lazra' ca guxá'alena' benne' zan ca',  
 ne nuzúa' lawe' le' lizre Dios.  
 Tu dxúl-lazquezdxu lu xel-la' dxebé,  
 ne dxue lá'anaquezdxu Dios lu laní.  
 5 ¿Bizr chee na' dxate ni'a na'u, bénne'du xu'a?  
 ¿Bizr chee na' zu' stébe lu xichaj lázrdawa'?  
 Guleza lazre' Dios lawe' da güe lá'anaqueza' Le' da xula.  
 Naque' Benne' dxuselé' neda', ne Dios chia'.

6 Dios chia', ba nate ni'a na' bénne'du xu'a  
 lu xichaj lázrdawa'.  
 Chee le' na' dxajsá lazra' chiu' nigá zua' lu xezr la xu  
 xechalá'a xegu Jordán,  
 ne lu xezr la xu chee benne' Hermón naga zua xi'a Mizar.  
 7 Ca schaga da dxun nísadau', ne da dxun tu bdua nisa  
 zren chiu', Dios,  
 ca' dxeque bénne'du xu'a lawe' da dxusaca zi' na'u neda'.

8 Te zra xexache lazre' Xránadxu neda',  
 na' chizrela tu gúl-lazqueza' da güe lá'ana' Le',  
 ne tu guchálajlezqueza' Dios,  
 Bénea' dxunne' xel-la' nabán chia'.  
 9 Xapa' Dios: Lué'queze dxucu'uju' neda'.  
 ¿Bizr chee na' nal-la lazru' neda'?  
 ¿Bizr chee na' dxewí'ine lazra' lawe' da dxusaca zi'  
 benne' dxedábage' neda'?  
 10 Ca tu benne' dxelé'e zrita xu'a, ca' dxelún benne' ca'  
 chia', dxelún le' chia'.  
 Tu zra tu zra dxeleñé' chia': "¿Ga na' Dios chiu'?"

11 ¿Bizr chee na' dxate ni'a na'u, bénne'du xu'a?  
 ¿Bizr chee na' zu' stébe lu xichaj lázrdawa'?  
 Guleza lazre' Dios lawe' da güe lá'anaqueza' Le' da xula.  
 Naque' Benne' dxuselé' neda', ne Dios chia'.

## 43

1 Bchi'a chia', Dios, ne ble'e lau naca' xrlátaje.  
 Bselá neda' lu na' benne' ca' dxuluzúe' Lue' chalá'ala,  
 ne lu na' benne' ca' dxelezí xé'e, ne dxelune' da zrinna'j.

2 Nacu' Lue' Dios chia', ne dxuzé chuchu' neda'.

¿Bizr chee na' nusán lazru' neda'?

¿Bizr chee na' dxewí'ine lazra' lawe' da dxusaca zi' neda'  
benne' ca' dxeledábage' neda'?

3 Gusel-la chia' xel-la' naxaní' chiu', ne da li chiu'.

Da caní xulusí na neda' neza.

Xeleché na neda' lu xi'a lá'azxa chiu', ne naga zúaquezu' Lue'.

4 Chu'a naga zua lucugu chee Dios.

Chu'a lau Dios, Bénnea' dxuné dxebeda', na' zua' lu da ba neza.

Güe lá'ana' Lue' nen da zríadi'i na du, Dios chia'.

5 ¿Bizr chee na' dxate ni'a na'u, bénne'du xu'a?

¿Bizr chee na' zu' stebe lu xichaj lázrdawa'?

Guleza lazre' Dios lawe' da güe lá'anaqueza' Le' da xula.

Naque' Benne' dxuselé' neda', ne Dios chia'.

## 44

1 Dios, bache bénentu' lawe' da buluzén Xra xrtáuntu' netu'  
ca naca da beñu' lu zra chee', da naca na iza ba guledé na.

2 Bzria xi'u bénneache xezr la xu xezícadxa ca' lau  
xra xrtauntu' ca', na' bzu' le' xlataj benne' ca'.

Bsaca zi'u benne' xezr la xu ca', san bzua chachu'  
bénneache chiu' lu xezr la xu nigá.

3 Xra xrtáuntu' ca' quebe gulezi'e xezr la xu nigá  
nen xia nalá cheéqueze',

Ne quebe buluselá cuine' nen xel-la' wal-la da zaj nape'.

Lue' bseláquezu' le' nen xel-la' waca chiu',

ne nen xel-la' wal-la chiu',

ne nen xel-la' naxaní' chiu', lawe' da bezaca ba lazru' nen le'.

4 Dios, nacu' wenná bea chia'.

Bselá zrí'ine zre sua Jacob.

5 Nen xel-la' waca chiu' xebéajntu' benne' ca'  
dxeledábage' netu'.

Lu Lau' Lue' guchuchuj guléajntu' benne' ca'  
dxeledábage' netu'.

6 Quebe guxrén lazra' xaga nalá xéche'ze chia',  
ne quebe guselá xia chia' neda'.

7 Lue' bcu'uju' netu' lau benne' ca' dxeledábage' netu',  
ne beñu' belexedué'e benne' ca' belecuidene' netu'.

8 Ne chee Dios tu súazquezentu' lu da ba neza,  
na' chadíá chacanna güe lá'anantu' Lau' Lue'.

9 Nusán lazru' netu', ne nunu' dxexedué'entu',  
ne quebe dxéajlenu' benne' cheentu' ca' dxjaque' wedil-la.

10 Beñu' buzrúnnujntu' lau benne' ca' dxeledábage' netu',  
na' benne' ca' dxelecuidene' netu' gulegüe' ca naca  
da nápantu'.

11 Bdeu' netu' ca zrila' ca' lu na' benne' xelúti'e netu',  
ne ba beše dínnaju' netu' ládujla benne' xezr la xu ca'.

12 Bdéu' netu', benne' chiu' ca' cá'aze, ne quebe bi guzi'u.

13 Dxunu' dxelún la benne' walízre cheentu'.



Benne' zaj naxéchaję' netu' dxelún lę', ne dxuluzrizrę' cheętu'.

<sup>14</sup> Nuzú' netu' ca tu da dxelenná benne' xęzr la xu ca'  
naca na da baxáchele'ę.

Xúgute benne' dxelelé'ene' netu' dxulutá xíchaję',  
ne dxelexebánene' ca da baxache' nácantu'.

<sup>15</sup> Tu zra tu zra tu dxexedué'ezquezda',  
ne tu zúazqueza' lu da stébele'ę

<sup>16</sup> lawe' da dxelenné' schanni' chia', ne dxuluzúę'  
neda' chalá'ala,  
ne dxulutíl-lalę neda' benne' ca' dxeledábague' neda',  
nen benne' ca' dxelexebeaj lazrę' neda'.

<sup>17</sup> Xúgute da caní dxaca cheętu', ne quebe ne  
gal-la lazrentu' Lue',

ne quebe ne guzúantu' chalá'ala xel-la' wezría chiu'.

<sup>18</sup> Quebe ne gusán lázrentu' Lue',

ne quebe ne pecuásantu' lu da gunná be'enu' netu'.

<sup>19</sup> ¿Bizr cheę na' nuzú' netu' chalá'ala tu lataj cheę bę snia ca',  
ne nuzú' netu' naga xelaze gátentu'?

<sup>20</sup> La gul-la lázrentu' La Dios cheędxu,  
ne bca'ana szrentu' tu dios da quebe bi zaca,

<sup>21</sup> ¿quebe dxal-la' zra'a Dios netu' ne cheę da nigá?

Lę' nézquezne' da zaj zua lu xichaj lázxdau bénneache.

<sup>22</sup> Lawe' da nácantu' chiu', tu zra tu zra ba  
zaj zúatequeze' xelútię' netu'.

Zaj nune' netu' ca zrila' ca' ba zua xelútię'-ba'.

<sup>23</sup> ¡Bebán, Xran!

¿Bizr cheę na' dxasiu'?

¡Bebán!

¡Quebe su' zítu' tu chí'ize!

<sup>24</sup> ¿Bizr cheę na' nucache cuinu',

ne quebe dxeque be'enu' ca dzezaca zí'intu',

ne ca dxuluchine benne' ca' netu'?

<sup>25</sup> Ba nate ni'a na' bénne'du xú'untu', ne dxeajcházetętu' lu xu,  
na' ba dętętu' sudxú'ala lu xęzr la xu.

<sup>26</sup> ¡Guxasa, gúcale netu',

ne dutę xel-la' dxexache lazre' chiu', bselá netu'!

## 45

<sup>1</sup> Xu'u lázrdawa' tu dizra' xrtante,

na' gúl-laqueza' tu da naca cheę Wenná Bea.

Gúl-laqueza' tu da bzuaj tu benne' dxuchálajle'ę cháwedau'.

<sup>2</sup> Nacu' xrtánle'ędxca ca xúgute bénneache.

Dxezilę'ętu' ba neza cheę dizra' dxuchálaju',  
lawe' da nucá'anaqueze Dios Lue' cháwedau' tu chí'izqueze.

<sup>3</sup> Bda' xia chiu' dxu'a lę'u, Lue', benne' wal-la,  
lu dutę xel-la' szren chiu', ne xel-la' dxenná bea chiu'.

<sup>4</sup> Lu xel-la' szren chiu' chepe bánquezu'.

Bchine dizra' li, ne xel-la' dxexruj lazre', ne da xrlátaje,  
na' guzėjni'i Cuinu' da zri'a ca'.

<sup>5</sup> Zaj nalále'ę xaga nalá xéche'ze chiu' ca',

da xelute na benne' xęzr la xu ca' lau Lue',

ne cheajlechaze na lu lázrdau benne' ca' dxeledábage' Lue'.

<sup>6</sup> Lataj blau naga dxe'u, Dios, naca na da chadía chacanna,  
ne súatequeze na.

¡Xrlátaje naca ca dxenná be'u!

<sup>7</sup> Nazri'inu' da naca xrlátaje, ne dxecuídenu' da calela.

Cheę le na' ba nuzúa Dios chiu' Lue' xlátaju',  
naga dxebéle'ędxenu' ca le sa' ljwezru' ca'.

<sup>8</sup> Dxelá zixre zra lanu' nen xala da naca na nizre xaga,  
ne xiaj, da ca' dxelelá na zixre.

Lu xu'u lizru' da zácale'ę na dxuluzúę' Lue' lu da ba neza.

<sup>9</sup> Bi nu'ula cheę wenná bea ca' zaj zúabe' ládujla nu'ula  
chiu' ca' zaj naque' blaudxa.

Chalá'a xabęla chiu' dxe' nu'ula gácabe' zru'ulu' nácube' oro  
da za na xęzre Ofir.

<sup>10</sup> Bene, nú'uladau', ne gunná' xque, ne bze naga da nnia':

Bzala lazru' lazriu' ne lizre xrau',

<sup>11</sup> na' benne' wenná bea sa lazre' xel-la' xrtan chiu'.

Bzexruj lazru' lau le' lawe' da naca le' xranu'.

<sup>12</sup> Xelelá' nu'ula xęzre Tiro lau lue', zaj nu'ę da xelunne' chiu',  
na' xelenaba benne' gunní'a ca' gunu' tu culuén cheę'.

<sup>13</sup> Xrtanle'ę naca bi nu'ula cheę wenná bea lu xu'u naga zuę'.

Zra lánabe' nazí' lechítaje na oro.

<sup>14</sup> Xeleché'ę-be' lau wenná bea, nácube' zra lánabe'  
da núale'ę lechítaje na.

Nu'ula węgu'du ca' chjácabe' cuzru lebe'.

Nu'ula caní, nu'ula ljwézrebe' xuluzúabe' lawe' lue'.

<sup>15</sup> Lu dutę xel-la' dxebé, ne lu da ba neza xeleché'ę-be',  
na' xelú'ube' lu xu'u lizru', wenná bea.

<sup>16</sup> Waláz cheę xra xrna'u xelexezúa zri'inu',

bi ca' gunu' xelenná beabe' du gabí'i xęzr la xu.

<sup>17</sup> Guna' cheajlesá lazre' xúgutę bęnneache lau' lue'.

Cheę le na' xelúe lá'ana bęnneache lue' chadía chacanna,  
ne gaxuane iza.

## 46

<sup>1</sup> Dios naque' Benne' dxuxúę' dxi'u, ne dxunę' dxi'u  
benne' wal-la.

Zúatequeze' gácalęne' dxi'u gate dxededxu xel-la' zi'.

<sup>2</sup> Cheę le na', quebe zrébedxu lácala xru' xęzr la xu nigá  
na' cheajlechaze xi'a ca' lu nísadau',

<sup>3</sup> ne lácala xeajxruza zren cheę nísadau' xuluninne na,  
ne dxelúnle'ę na schaga,

na' welezrízequeze xi'a ca' ne cheę da dxezrú'.

<sup>4</sup> De tu xęgu da dxunna na xel-la' dxebé lu xęzre cheę Dios,  
ne lu xu'u lá'azxa cheę Dios, Benne' nape' dutę xel-la' szren.

<sup>5</sup> Dios zuę' xęzre na', ne cabata' cuía xi na.

Dxaní'sise' xide' gácalęne' bęnneache zaj zre'ę xęzre na'.

6 DxeleZRébele'ē benne' xēZR la xu ca',  
na' dxeleZRize benne' cheē wenná bea ca'.  
Dxenné Dios ca dxenné guziu', na' dxexuna xēZR la xu.

7 Dios, Bénnea' nape' dutē xel-la' waca, zúalēnē' dxi'u.  
Dios na' cheē Jacob dxucache chawē' dxi'u.

8 Le da lé'ele da ca' nun Xránadxu.  
Le nna' ca naca da dxebánedxu da nune' lu xēZR la xu.  
9 Dxebeque zriē' wedil-la da dxelaca du gabí'i xēZR la xu.  
DxuzúZruje' da dxuzala na xaga nalá xéche'ze ca',  
ne dxíchujē' xaga tuche' ca' cheē wedil-la,  
na' dxuzezxe' da ca' zaj nache' benne' wedil-la ca'.  
10 Dxenná Dios: "Le sua zriZe, ne le xúnbea naca' Dios.  
Naca' szrendxa ca zaj naca xúgute cue' xēZR la xu.  
Naca' szrendxa ca dutē xēZR la xu."

11 Dios, Bénnea' nape' dutē xel-la' waca, zúalēnē' dxi'u.  
Dios na' cheē Jacob dxucache chawē' dxi'u.

## 47

1 ¡Le capa na'le, le'e, xúgute bénneache!  
¡Le güe lá'ana Dios nen dutē xel-la' dxebé!  
2 DxaL-la' zrébedxu Xránadxu, nape' dutē xel-la' szren.  
Naque' Wenná Bea zren dxenná bé'ene' dutē xēZR la xu.  
3 Bzue' benne' xēZR ca' zran ní'adxu.  
Bzue' dxi'u cheē nna be'edxu zánete cue' xēZR la xu ca'.  
4 Bequé'ē tu xēZR la xu da gaca na cheēdxu,  
Da naca tu xēZR la xu xrtante cheē zri'ine zre sua Jacob,  
benne' ca' nazrí'ine'.  
5 Dxegüén Dios naga dxe'e dxenná be'ē.  
Dxelebezre luzu da dxulucuezre' gate dxegüén Xránadxu ga na'.  
6 ¡Le gul-la da gaca ba Dios!  
¡Le gul-la!  
¡Le gul-la da gaca ba Wenná Bea cheēdxu!  
¡Le gul-la!  
7 ¡Dios naque' Wenná Bea dutē lu xēZR la xu nigá!  
¡Le gul-la cheē' nen dutē xel-la' dxéajni'i cheēle!  
8 Dxe' Dios naga dxenná be'ē, lu lataj na' naca na lá'azxa.  
Dxenná bé'ene' xúgute cue' xēZR la xu ca'.  
9 DxeleZraga benne' dxelenná bé'ene' xúgute cue' xēZR la xu  
tu zren nen bénneache cheē Dios cheē Abraham.  
10 Benne' ca' dxelenná be'ē du gabí'i xēZR la xu  
buludé' xel-la' dxenná bea cheē' lu na' Dios.  
Le' dxenná bé'ene' xúgute benne' wenná bea ca'.

## 48

1 ¡Zrente naca Xránadxu!  
¡Naca cheē' güe lá'analē'dxu Le'  
ga naca lu xēzre cheē Dios cheēdxu,  
da dxe' na lu xi'a lá'azxa cheē'!  
2 Sión, da naca na xi'a cheē Dios, naca na sibe, ne xrtante.

Naca na xezre chee Wenná Bea zrente,  
da dxunna na xel-la' dxebé duté xezr la xu nigá.

<sup>3</sup> Dios ba blé'ene' dxucache chawe' dxi'u,  
lu xu'u zaca ca' chee xezre chee' na'.

<sup>4</sup> Belezraga benne' wenná bea ca',  
na' belelé'e chee xeledíl-lalene' xezre nigá,

<sup>5</sup> na' gate belelé'ene' na, na' belexebánene'.

Belezné'e, na' buluzrúnnuje'.

<sup>6</sup> Gulezré'e lu da stebe,  
ne gulezúe' xel-la' dxudía ca dxaca chee tu nu'ula  
ba zua sane' bidau'.

<sup>7</sup> Gulaque' ca da ca' dxeledá lawe' nísadau' dxexrite na  
gate dxácale'e be' bduu' lu nísadau'.

<sup>8</sup> Bendxu ca da ben Dios, na' na'a ba ble'edxu na,  
ga naca lu xezre chee Xránadxu, nape' duté xel-la' waca,  
da naca na xezre chee Xránadxu Dios.

Le' guzúa chawe' xezre nigá chadía chacanna.

<sup>9</sup> Ga naca lu xudau' chiu' Lue', Dios  
dxajsá lázredxu ca naca xel-la' zri'i lazre' zren chiu'.

<sup>10</sup> Gáteteze na' dxelúe lá'ana bénneache Lue',  
na' ca naca xel-la' szren chiu' dxezrín na  
du gabí'i xezr la xu.

Ca naca da xrlátaje dxenná be'u.

<sup>11</sup> Xelebéle'e bénneache zaj zré'e Sión.

Xelebéle'e bénneache zaj zré'e xezre ca' chee Judá  
ne chee da dxuchi'u chee'.

<sup>12</sup> Le'e, bénneache chee Dios, le chechaj dxu'a xezre na',  
ne le gulaba ca zaj naca xu'u sibe ca',  
da dxuluzé chacha na xezre na'.

<sup>13</sup> Le nna' xque ca naca ze'e zren naxechaj na xezre na'.  
Le nna' xanne' ca zaj naca xu'u wal-la chee na,  
chee guzenle bi cheele ca naca xezre na'.

<sup>14</sup> Dios nigá nácaqueze' Dios cheedxu chadía chacanna.  
Le' tu gulé'ezquezne' dxi'u neza.

## 49

<sup>1</sup> Le xen da nigá, le'e, benne' xúgute cue' xezr la xu.

Le guzé nágale, le'e, benne' duté xezr la xu,

<sup>2</sup> le'e, benne' blau, ne le'e, benne' xezícadxa,  
le'e, benne' gunní'a, ne le'e, benne' xache'.

<sup>3</sup> Guchálajqueza' xel-la' sina,  
ne guzéajni'ida' le'e da xu'u lázrdawa'.

<sup>4</sup> Guzé naga' tu dizra' sina.

Gúl-laqueza' chee tu da nagache,  
ne quinnia' da zríadi'i na du chen.

<sup>5</sup> ¿Bizr chee na' dxun na ba xen zreba' lu zra chee da stebe,  
gate naxechaj da calela neda' da dxelún benne'  
dxeledábague' neda'?

<sup>6</sup> Benne' ca' dxuluxrén lazre' da zaj de chee',  
ne dxulucá'ana szren cuine' lawe' da zaj nápalé'e.

<sup>7</sup> Quebe xelezéquene' xelexá'awe' le sa' ljwezre',

ne quebe gaca xulunézuje' Dios da guselá na le'  
 8-9 chee tu xelaca bánzqueze',  
 ne chee cabata' xeluzru bel-la' dxen chee'  
 lawe' da zrente naca da dxexa'u na xel-la' nabán chee bènneache,  
 ne cabata' seque' nu benne' quízruje' na.  
 10 Xelelé'ene' dxelátequeze benne' sina ca',  
 ne xelúzrué' cáteze dxaca chee benne' xala ca',  
 ne chee benne' lázrdau zide' ca',  
 na' dxulucá'ane' xel-la' gunní'a chee' lu na' benne' xula ca'.  
 11 Dxeléquene' wazráqueze zri'ine zre sue' chadía chacanna,  
 na' xelexegá'ana lizre' chee xelaca na chee xúgute' cuen  
 xrtia ljwezre',  
 na' dxelu'e la xezr la xu chee' ca' ca zaj nazí láqueze'.  
 12 Quebe xelexegá'anatequeze bènneache lu da ba lá'ana.  
 Zaj naque' ca be xixre' ca', be dxeláteba'.  
 13 Ca da dxelune' naca na da xálaze,  
 na' dxelexezaca ba lazre' xrtia ljwezre' ca' nen da dxelennaze'.  
 14 Zaj naque' ca tu cue' zrila' zjácaba' lataj ba xa',  
 naga guxúe xel-la' gute lèba'.  
 Benne' xrlátaje ca' xelenná bé'ene' benne' gunní'a ca'  
 gate za' chaní',  
 na' xelebía xi' da ca' guta' chee',  
 na' lataj ba xa' gaca na naga tu xelezúazqueze'.  
 15 Dios xexá'awe' xel-la' nabán chia' lu lataj ba xa'  
 lawe' da xeché'e neda' naga zúaqueze' Le'.  
 16 Quebe su' stebe gate nu benne' dxezrué'ene' xel-la' gunní'a,  
 ne gate dxune' lizre' da zácále'edxa,  
 17 lawe' da gate gatie' quebe bi xexu'e,  
 ne quebe chéajle xel-la' gunní'a chee' le'.  
 18 Lácala dxácaté naca bane' dxé cuine' zue'  
 lu da ba neza zrente,  
 na' dxelúe lá'ana bènneache le' gate dxepe bane',  
 19 san chu'e naga zaj zra xra xrtawe' ca',  
 ne cabátadxa lé'ene' xel-la' naxaní'.  
 20 Bénnea' dxelapa bènneache le' ba lá'ana san quebe  
 bi dxéajni'ine'  
 naque' ca be xixre' ca', be dxeláteba'.

## 50

1 Ba gunné Xránadxu Dios, ne ba nutube' bènneache  
 chee duté xezr la xu,  
 benne' zaj zre'e naga dxalaj gubizra,  
 ne benne' zaj zre'e naga dxebía na.  
 2 Lu xi'a Sión, da naca na xrtánle'e ba bzaní' Dios.  
 3 Xelá' Dios cheedxu, ne quebe sua zrie'.  
 Gálajqueze xi' lau Le',  
 ne gácale'e be' bduunu' da chechaj na Le'.  
 4 Xutúbequeze' benne' zaj zre'e xabáa na'ala,  
 ne benne' zaj zre'e xezr la xu,  
 chee guchi'e chee bènneache chee'.  
 5 Dxenné': "Le xutube benne' chia' ca',

benne' ca' belunē' tu xel-la' wezríā nen neda'  
da buluzúa chúchue' nen dxen cheē béadu ca'."

<sup>6</sup> Da zua xabáala gulé'e lau na naque' xrlátaje,  
lawe' da naca Dios Benne' guchi'ē cheē bēnneache.

<sup>7</sup> Dxenné': "Le xen, bēnneache chia', na' guchálaja'.

Le guzē nágale, benne' Israel, na' nnia'  
da gagu na zria cheēle.

Neda', Dios, naca' Dios cheēle.

<sup>8</sup> Quebe til-la' le'e ca naca béadu ca' bētele lawa',

ne ca naca béadu ca' bzézele,  
da zaj zúaqueze na lawa' neda'.

<sup>9</sup> Quebe ca'a lu na'ale među ca',

ne chivo biu ca', bē nápaquezle

<sup>10</sup> lawe' da zaj naca chia' xúgute bē xixre' ca',

ne zane gaxúa bē xixre' zaj zra'ba' lu xí'adu ca'.

<sup>11</sup> Xu'u lu na'a xúgute bē zua xrila,

ne naca chia' xúgute bē zaj naca banba'.

<sup>12</sup> Chela neda' dxeduna', quebe xapa' le'e ca'

lawe' da naca chia' xēzr la xu, ne xúgute da dē lawe na.

<sup>13</sup> ¿Dxun na ba xen gawa' bēla' bēzre ca'?

¿Xí'aja' dxen cheē chivo biu ca'?

<sup>14</sup> Le guzúa lau Dios da güe lá'ana Le'

ne le gunezruj ca da guchebe lázrele lau Dios szrente.

<sup>15</sup> Bláwizra neda' lu zra zu' lu da zi' da xa',

na' guselá' lue', na' lue' gapu' neda' ba lá'ana."

<sup>16</sup> Dios guzre' benne' wen da calela:

"¿Bi dxéquenu' lue', dxuchálaju' ca nadxixruj bi'a,

ne dxenníu' ca naca cheē xel-la' wezríā chia'?

<sup>17</sup> Lue' dxecuídenu' neda' che dxusízreda' lue',

ne dxuzú' chalá'ala dizra' chia'.

<sup>18</sup> Gate dxelé'enu' gubán, na' dxunu' le' tu zren,

ne nacu' tu zren benne' ca' dxeledálēne' nu'ula  
quebe zaj naca zru'ule'.

<sup>19</sup> Dxuchálajquezu' da calela,

ne tu dxúnzquezu' da wen lazre'.

<sup>20</sup> Tu dxennézquezu' da calela cheē bi bíchequezu',

Ne dxagu' zria cheē bi cheē xrná'aquezu'.

<sup>21</sup> Da caní bēnu', na' neda' guzúa' zrije.

Gúquenu' naca' tu benne' ca nacu' lue'.

Na'a wadí'laqueza' lue', ne gulé'eda' lue' ca ba bēnu'."

<sup>22</sup> Le chéajni'i da nigá na'a, le'e dxal-la lázrele Dios.

Ga gaze guzuzruj Dios le'e, ne québedxa sua nu guselá le'e.

<sup>23</sup> Bēnnea' guzúe' lawa' da güe lá'ane' neda' gape'

neda' ba lá'ana,

na' bēnnea' dxuxuchá cuine' cheē gune' da xrlátaje,

gulé'eda' le' ca guselá' le', naca' Dios cheē'.

## 51

<sup>1</sup> Gúcale neda', Dios, lu dute xel-la' dxexache lazre' chiu'.

Dute xel-la' dxexache lazre' chiu' bsula zria da nabaga'.

<sup>2</sup> Gudibe neda' ca naca da calela da nuna',

ne bca'ana chawe' neda' chee dul-la da bēna',  
<sup>3</sup>lawe' da dxexúnbe'a ca bēna' gudábaga' Lue',  
 ne ca naca dul-la chia' tu dxáguze na zria neda'.

<sup>4</sup>Lau' Lue' bēna' dul-la.

Awe', lau' Lué'queze, ne ba bēna' da calela lau' Lue'.  
 Caní dxaca na chia' chee gaca bea nacu' xrlátaje lu da dxenníu',  
 ne nacu' du lazre' ca da dxuchi'u chee bēnneache.

<sup>5</sup>Gunná' xque, báchequeze nabaga' dul-la gate gúlajtea',  
 ne lu dul-la zúaqueza' gate guzrán xrna'a neda'.

<sup>6</sup>Lue' dxezá lazru' sua da li lu xichaj lázrdawa',  
 ne lu xichaj lázrdawa' ba bzéajni'inu' neda' da naca sina.

<sup>7</sup>Bca'ana chawe' neda' nen da na' dxuchínenu',  
 na' xegá'ana' xrlátaje.

Gudibe neda', na' gaca' chíchedxa ca tu bezxe'.

<sup>8</sup>Bēn xenda' xel-la' dxebé, ne da ba neza,  
 na' xelexezi' le dipa zrita xu'a, da ba gudíchaju'.

<sup>9</sup>Quebe gusá lazru' ca naca dul-la da bēna',  
 na' bsula xúgute da calela da nuna'.

<sup>10</sup>Dios, bzua neda' tu lázrdawa' xrlátaje,  
 ne bzua tu be' li lazre' lu xichaj lázrdawa'.

<sup>11</sup>Quebe gucasu' neda' lau' Lue',  
 ne quebe xeca'u lu xichaj lázrdawa' be' lá'azxa chiu'.

<sup>12</sup>Bexunna neda' xel-la' dxebé chee xel-la' weselá chiu',  
 ne bzua chuchu be' chawe' da xu'a.

<sup>13</sup>Nadxa gusédeda' benne' ca' dxelune' da zrinnaj  
 ca dxaca lazru' xelune',

na' benne' dul-la ca' xelexexaque' chiu' Lue'.

<sup>14</sup>Bselá neda' lu zria da nabaga', betia' benne'.  
 Lue' Dios, nacu' Dios dxuseláu' neda',  
 na' gúl-laqueza' chee da xrlátaje nacu' Lue'.

<sup>15</sup>Xran, gusalaj dxu'a,  
 na' guzenda' bēnneache da dxue lá'ana' Lue'.

<sup>16</sup>Quebe dxaca lazru' béadu ca' gutia'-ba' lau',  
 ne quebe dxaca lazru' béadu ca' guzézxea' lau'.

<sup>17</sup>Da guzúadxu lau Dios da dxaca lazre' naca na  
 tu lázxdau dxexruj lazre'.

Tu lázxdau dxexruj lazre', ne da dxexíaje lazre'  
 quebe guzú' chalá'ala, Dios.

<sup>18</sup>Dute xel-la' zri'i lazre' chiu', bēn gaca chawe' chee  
 xezre Sión.

Bsegula ze'e da nazečaj na xezre Jerusalén.

<sup>19</sup>Nadxa xezaca ba lazru' nen béadu ca' gútentu' lau'  
 dute da naca xrlátaje cheentu',

ne béadu ca', ne da du ca' guzézxentu' lau'.

Nadxa xelútię' béadu ca' lu cugu chiu'.

## 52

<sup>1</sup>¿Bizr chee na' dxucá'ana szren cuinu' chee da calela  
 da nunu', lue', benne' wal-la?

Tu zúazqueze xel-la' dxexache lazre' chee Dios.

<sup>2</sup>Tu dxuchálajzquezu' chee da calela da gunu' chee le sa' ljwezru'.

Da dxenníu' naca na ca tu xia da nalále'e, dxezí xē'u ljwezru'.

<sup>3</sup> Nazrí'idxenu' da calēla quézcala da xrlátaje,  
ne dxedánnedxenu' da wēn lazre' quézcala da li.

<sup>4</sup> Nazrí'inu' xúgute dizra' da dxulucá'ana ditaj na bēnneache,  
lue', benne' dxezí xē'u.

<sup>5</sup> Cheē lē na' guzríia xi' Dios lue' tu chí'izqueze.

Waxelē' lue', ne xequé'e lue' naga zúaquezu',  
ne gucuase' lue' naga zaj zra' benne' ban ca'.

<sup>6</sup> Xelelé'e benne' xrlátaje ca' da nigá, na' xelezrébequeze'.

Xuluzrízrqueze' chiu' lue', xelenné':

<sup>7</sup> "Le na' xque, benne' nigá quebe bxren lazre' Dios  
cheē gucu'uje' lē'.

Bxren lázrequeze' ca naca xel-la' gunní'a zrentē cheē',  
ne guzúaqueze' lu da calēla da dxunē'."

<sup>8</sup> Neda' naca' ca tu xaga olivo xa'a lu xu'u lizre Dios.

Tu dxuxrén lázrequeza' xel-la' dxexache lazre' cheē  
Dios chadía chacanna.

<sup>9</sup> Güe lá'anaqueza' Lue' chadía chacanna lawe' da bēnu' da caní,  
ne cueza lazra' lau Lue' lawe' da naca na xrlátaje lau xúgute  
benne' chiu' Lue'.

## 53

<sup>1</sup> Benne' xala ca' dxelenná lu lázrdawē': Quebe zua Dios.

Xúgute' zaj naque' sban, ne zaj nune' da calēla.

Quebe nu chilá' benne' dxunē' da xrlátaje.

<sup>2</sup> Dios zuē' xabáa dxenné'e bēnneache

cheē lé'ene' che zua tu benne' sina,

bēnnea' dxape' Dios ba lá'ana.

<sup>3</sup> Xúgute' benne' zaj nabéaj xíchaje' Dios.

Xúgute' zaj naque' sban.

Quebe nu chilá' benne' dxunē' da xrlátaje, netú guē'.

<sup>4</sup> Dxenná Dios: "¿Quebe dxelējajni'i benne' caní

dxelunē' da calēla?

Dxelē'aj dxelawē' da dxelebane' cheē bēnneache chia',  
ne quebe dxelēxílaje' neda'."

<sup>5</sup> Za zrin zra xelexruse' ca da quebe ne xelegaue',

lawe' da gusedinnaj Dios zrita ca' cheē benne'

guledábaguē' bēnneache cheē'.

Dios na' nuzúē' chalá'ala benne' ca',

na' bēnneache cheē' xuluzríia xi'e benne' ca'.

<sup>6</sup> Dxenaba' Dios gunē' dxuaj Sión da gácale na

benne' Israel ca'.

Gate ba nun Dios xelezrín bēnneache cheē' lu xēzr la xu  
cheéqueze',

xelébē zrí'ine zre sua Jacob,

ne xelezúa lu da ba neza benne' Israel ca'.

## 54

<sup>1</sup> Bselá neda', Dios, nen xel-la' waca chiu'.

Gúcale neda', Dios, nen xel-la' wal-la chiu'.

<sup>2</sup> Bene da dxenaba' lau', Dios, ne bechebe chia'.



Bzē naga da guchálajləná' Lue'.

<sup>3</sup> Za'aca benne' snia ca' xeledíl-laləŋe' neda'.

Benne' xichaj zra'a ca' dxelaca lazre' xelútie' neda',  
benne' ca' quebe dxelape' ba lá'ana Lue', Dios.

<sup>4</sup> Dios naque' Benne' dxácaləŋe' neda'.

Xránadxu Dios zúaləŋe' benne' ca' dxuluxúe' neda'.

<sup>5</sup> Ca naca da caləla dxelún benne' dxeledábague' neda',  
xuzrí'i Dios na cheę benne' ca'.

Guzría xi'e benne' ca' lawe' da naque' li lazre'.

<sup>6</sup> Du lazra' cu'a da gudéa' lau Lue', Xran.

Gūe lá'anaqueza' Lau' lawe' da nácale'e na xrlátaje.

<sup>7</sup> Bseláu' neda' lu xúgutę da stębe guzúa'.

Ble'eda' gulebía xi' benne' ca' dxeledábague' neda'.

## 55

<sup>1</sup> Bzē naga, Xran, ca da dxuchálajləná' Lue',  
ne quebe guzú' chala'ala ca da dxenaba' lau'.

<sup>2</sup> Guzúa ban lazre', ne bechebe chia'.

Dxuláwizra' Lue' lu da dxuchálaja', ne zua' stębe,

<sup>3</sup> lawe' da benne' dxeledábague' neda' dxelenné' chia',  
ne lawe' da dxelún la benne' wən da caləla neda'.

Bulusebague' neda' da zrinnaj,  
ne dutę xel-la' dxelezá'a zaj nau zi' xuzre' neda'.

<sup>4</sup> Dxe' gunne xue lázrdawa' lu bęla' dxen chia',  
ne dxuchebe xel-la' gute neda'.

<sup>5</sup> Zua' lu xel-la' dxezrebe, ne dxezríztequeza',  
na' zúalę neda' da dxuchebe na neda'.

<sup>6</sup> Na' gunniá: ¿Nuzra gunna neda' xrila' ca xrila tu bsia  
cheę cha'a lu be'la naga xezí' lazra'?

<sup>7</sup> Da líqueze guzrúnnuja' zítu'la,  
na' súaqueza' le'e xixre' lawe' lataj.

<sup>8</sup> Guna' ba xuzre la' lu be' bdunu', ne lu be' wal-la.

<sup>9</sup> Bzria xi' benne' ca' dxelunę' da caləla, Xran.

Bzaga naze da dxelunę',  
lawe' da ble'eda' da zrinnaj, ne da caləla da dxelunę'  
lu xezre.

<sup>10</sup> Te zra chizrela dxeledé' lawe' ze'e da naxechaj na xezre,  
ne dxelunę' da zrinnaj, ne da caləla lu xezre nigá.

<sup>11</sup> Nazrate xezre nigá da caləla da dxelunę',  
ne tu dxelúnzqueze' da wən lazre', ne xel-la' dxezí xę  
lu neza cheę na.

<sup>12</sup> La guca tu benne' bėnnea' dxedábague' neda',  
bėnnea' bęn le' chia',

na' bchaga lawa' da na'.

La guca tu benne' dxecuıdene' neda' bėnnea' gudábague' neda',  
na' bcache cuina' lau le'.

<sup>13</sup> Lue', bėnnea', gucu' ca tu le sa' ljwezra'.

Bsi'u neda', ne gucu' tuze neda'.

<sup>14</sup> Tu zren bchálajdxu du lázredxu,

ne lu xel-la' zri'i lazre' gudadxu lu xu'u lizre Dios.

<sup>15</sup> Dios, ben queła xel-la' gute benne' ca' dxelune'  
da caleła chadite.

Ben xelexú'e lu lataj ba xa' zaj naca bane',  
lawe' da nazrate xu'u lizre' da caleła da dxelune'.

<sup>16</sup> Ca naca chia' neda', bláwizra' Dios,  
na' Xrana' Dios bselé' neda'.

<sup>17</sup> Che zílala, ne wagubizra, ne ca dxebía gubizra  
guchálajlequeza' Dios, ne guláwizra' Le',  
na' Le' xenne' chia'.

<sup>18</sup> Xexá'awe' bénne'du xu'a lu wedil-la da dxaca chia' neda',  
ne gune' cueza' zri lazra',

lácala zaj zra' zánete benne' dxeledábague' neda'.

<sup>19</sup> Wene Dios, na' guzría xí'queze' benne' ca'.

Naque' Bénnea' zúatequeze' dxenná be'e nédxute.

Caní gune' chee benne' ca' lawe' da quebe dxuluché'e  
ca dxelune', ne quebe dxelezrebe' Dios.

<sup>20</sup> Guchisa na' benne' wen da zrinnaj chee gu'e benne' ca'  
dxelebeza zri lazre' nen le'.

Gudíchaje' xrba chee xel-la' wezría da beñe' nen benne' ca'.

<sup>21</sup> Dizra' bchálaje' zaj naca na dizra' zren lazre',  
san xu'u lázrdawe' xel-la' dxezrá'a.

Dxune' xrtante dizra' dxuchálaje',  
san zaj naca na ca xia da zaj nalále'e.

<sup>22</sup> Bda xua chiu' cuzru Xránadxu, na' Le' gutipe' lazru'.

Québequeze gu'e lataj cheajchaze benne' chawe' tu chi'ize.

<sup>23</sup> Lue', Dios, gunu' xelexú'u benne' ca' dxelune'  
da caleła lataj ba xa',

benne' dxelute benne', ne benne' dxelezí xe'e,  
gate quebe ne xelezrine' gachaj catite dxal-la' xelaca bane',  
san neda' guxrén lazra' Lue'.

## 56

<sup>1</sup> Bexache lazre' neda', Dios, chee quebe xuluzría xi'  
bénneache neda'.

Tu zra tu zra dxulusaca zi' bénneache neda', benne' ca'  
dxeledíl-lalene' neda'.

<sup>2</sup> Te zra chizrela benne' ca' dxeledábague' neda'  
dxulucá'ana díraje' neda',

lawe' da zaj zra' benne' zante, benne' dxeledíl-lalene' neda'  
lu xel-la' dxulucá'ana szren cuine'.

<sup>3</sup> Lu zra dxezreba', dxuxrén lazra' Lue'.

<sup>4</sup> ¡Dxuxrén lazra' Dios, na' güe lá'ana' xrtizre'!

¡Dxuxrén lazra' Dios, na' québedxa zreba'!

¿Bízraqueze gaca gun bénneache chia' neda'?

<sup>5</sup> Xúgute zra dxuluchuque' xrtizra'.

Ca naca da dxelegú'u be'e zaj naca na chee xelune' chia'  
da caleła.

<sup>6</sup> Dxelezrague', ne dxulucache cuine'.

Dxelenná' xánnie' ca da dxuna'.

Dxelilaj lazre' ca xelune' xelútie' neda'.

7 Dios, bxue ca da dxelune',  
na' dutę xel-la' dxezrá'a chiu' bzria xi' benne' ca'.  
8 Nézqueznu' Lue' ca dxuzrúnnuja' lau benne' ca'.  
Bsa lazre' nisa da ba gudxezra'.  
¿Quebe zaj naxúaj na lu xiche chiu'?  
9 Gate dxuláwizra' Dios, lu zra ná'queze xuluxuzrunnuj  
benne' ca' dxeledábage' neda'.  
Nézquezda' zúale Dios neda'.  
10 ¡Dxuxrén lazra' Dios, na' güe lá'ana' xrtizre'!  
¡Dxuxrén lazra' Xránadxu, na' güe lá'ana' xrtizre'!  
11 ¡Dxuxrén lazra' Dios, na' québedxa zreba'!  
¿Bízraqueze gaca gun bėnneache chia' neda'?  
12 Nabaga' ca da nachębe lazra' chiu', Dios.  
Gúl-laqueza' da güe lá'ana' Lue'.  
13 Ba bseláu' bėnne'du xu'a lu xel-la' gute,  
ne bebėjaju' ni'a naga zaj zua cheajlechaze na,  
cheę gaca chu'a lau Dios lu xel-la' naxaní' da dxunne'  
cheę benne' ca' zaj naca banę'.

## 57

1 Bexache lazre' neda', Dios.  
Bexache lazre' neda', lawe' da dxuxrén lazra' Lue'  
dute lázrdawa'.  
Quezru' neda' ca dxun bedxuj dxézreba' zrí'ineba'  
zran xrílabá', cadxa te cheę da stębe caní'.  
2 Guláwizra' Dios, Benne' zrente'.  
Guláwizra' Dios cheę gácalęne' neda'.  
3 Naga zúate' xabáa cheę' sel-le' nu guselá neda' lu na'  
bėnnea' dxáca lazre' guzríá xi'e neda'.  
Gusel-la Dios xel-la' dxexache lazre', ne da li cheę'.  
4 Zua' lu da stębe ca tu benne' zue' ládujla bęzre xixre' ca'.  
Xu'a ládujla bėnneache zaj naque' ca bęzre xixre' ca'  
dxeláguba' bėnneache.  
Dizra' da dxelenné' chia' zaj naca na ca tu xia natuche',  
ne xaga nalá xęche'ze ca',  
na' xrtizre' zaj naca na ca tu xia da nalále'e'.  
5 Xega'ana szrėnquezu' lu xabáa, Dios.  
Xel-la' szren chiu' sua na lawe' dutę xęzr la xu.  
6 Ba zaj nabeche' xralaj cheę xełeł-le' neda'.  
Ba dxedú lazra' lu da dxaca chia'.  
Ba zaj naxęne' tu xędxu cheę cheajcházia' lu'ule na.  
Lu'ule da na' ba xeajlecházqueze le'.  
7 Ba zúatequeze lázrdawa', Dios.  
Ba zúatequeze lázrdawa' cheę gúl-laqueza' da güe lá'ana' Lue'.  
8 Bebán lazre', bėnne'du xu'a, ne le xebán lázrele,  
le'e dxínnele da dxúl-lalęnle, ne da zríadi'i na du.  
Che zílala chásaqueza'.  
9 Güe lá'anaqueza' Lue' ládujla bėnneache chiu', Xran.  
Gúl-laqueza' chiu' lau benne' xúgute cue' xęzr la xu,  
10 lawe' da naca xel-la' dxexache lazre' chiu' zrendxa ca xabáa,  
na' da li chiu' naca na zrendxa ca beuj bza ca'.

11 Xegá'ana szrénquezu' lu xabáa, Dios.  
Xel-la' szren chiu' sua na lawe' dutę xęzr la xu.

## 58

1 Le'e dxenná beale ¿da li dxuchálajle da naca xrlátaje?  
¿Dxuchí'ale ca naca da li cheę bėnneache chia'?

2 ¡Cabíze'!

¡Lu lázrdaule dxugú'u beale da zrinnaj!

¡Stébele'e dxuzúale bėnneache lu xęzr la xu chia'!

3 Zaj nazrinnaj lázxdau benne' ca' zaj nabéaj xíchaje' neda'  
gate gulálajte'.

Belexase dinnaje' dxelún lazre' gate gulezante xrne'e le'.

4 Dizra' da dxelenné' zaj naca na da dxelute bėnneache  
ca da zria zran lazxa bęla'.

Zaj naca na ca bęla' snia, bę nácaba' bę cuezru.

5 Quebe dxenba' chi'i benne' dxunné' lęba'

lácala dxennéle'e xrtandau'.

6 Dios, gudichaj lazxa benne' ca'.

Gudichaj, Xran, lazxa benne' ca' zaj naque' ca bezre xixre' ca'.

7 Ben xelexenítie' ca nisa da dxelalaj na lu xu.

Gate dxulusane' xaga nalá xéche'ze cheę',

bęn xeledé na chalá'ala.

8 Bęn xeledé cheę' ca dxaca cheę bę zaga dxelexexúnaba'.

Bęn québedxa xelelé'eng' gubizra ca tu bidau' dxálajbe'

ba nátebe'.

9 Nédxula gate quebe ne la xesu' lu xi'

xecá'a Dios benne' ca' tu lu be' bdunu',

benne' zaj naca banę', ne benne' ca' zaj zua xelatie'.

10 Wabé benne' xrlátaje gate lé'eng' xebéaj lazre' Dios

benne' ca' dxelunę' da caleła.

Guchuchu gulájaje' dxen cheę benne' zaj nabéaj xíchaje' Dios.

11 Nadxa nņę bėnnea': "Da líqueze de lazruj cheę

benne' xrlátaje.

Da líqueze zua Dios, Bėnnea' dxuchi'e cheę bėnneache

zaj zre'e lu xęzr la xu."

## 59

1 Bselá neda' lu na' benne' ca' dxeledábage' neda', Dios chia'.

Bselá neda' lu na' benne' ca' dxelunę' chia' da caleła.

2 Bselá neda' lu na' benne' ca' dxelunę' da zrinnaj.

Bselá neda' lu na' benne' ca' dxelutie' benne',

3 lawe' da dxelilaj lazre' xelútie' neda'.

Zaj nazraga benne' wal-la ca' cheę xeledíl-lalęne' neda',

quegá lawe' da bi zria nabaga', ne quegá ne cheę

dul-la nuna' neda', Xran.

4 Lácala quebe bi bęna' cheę benne' ca',

zá'aca chégüe', ne dxulucueze' bi xelunę' chia'.

Bebán cheę xidu' naga zua', na' le'enu' da dxelunę'.

5 Lue', Xran, Dios cheę benne' zan dxjaque' wedil-la,

ne Dios cheę benne' Israel ca',

bebán cheę gudéu' ba xa' benne' xúgutę cue' xęzr la xu.

Quebe xexache lazru' xúgutę benne' ca' dxeledábage' Lue',

ne dxelunę' da zrinnaj.

<sup>6</sup> Xelelé'e gate cuía gubizra, ne xelebezre xę'e  
ca dxelún becu', na' xeléchaje' xęzre.

<sup>7</sup> Gunná' xque, da dxuluchálaje' naca na ca da dxelexexebe'.  
Dizra' dxelenné' zaj naca na ca xia zaj nalá na,  
lawe' da dxelenné': "¿Nuzra xene?"

<sup>8</sup> Lue', Xran, guzrizru' cheę benne' ca'.

Gun lau' cheę benne' xúgute cue' xęzr la xu ca'.

<sup>9</sup> Zaj naca wal-la benne' ca' dxeledábage' neda'.

Cueza lazra' Lue' lawe' da dxucu'uju' neda', Dios.

<sup>10</sup> Dios, Bénnea' dxexache lazre' neda', cuía lawe' lawa' neda'.  
Dios gunę' le'eda' gaca cheę benne' ca' dxeledábage' neda'  
ca da dxezá lazra'.

<sup>11</sup> Quebe gutiu' benne' ca', cheę quebe xelal-la lazre'  
bénneache chia' ca da gunu'.

Bęse dinnaj benne' ca' nen xel-la' waca chiu'.

Lue', Xran, Benne' dxucu'uj netu', ben cheajlecházie'.

<sup>12</sup> Bęn xeledule' lu xel-la' dxulucá'ana szren cuine',

ne cheę dul-la dxelunę' lu da dxuluchálaje',

ne ne cheę dizra' schanni', ne da węn lazre' da dxelenné'.

<sup>13</sup> Bzria xi'e lu xel-la' dxezrá'a chiu'.

Bzria xi'e cheę québedxa xelezúe'.

Dios, bęn xeleque be'ene' dxenná be'enu' zri'ine zre sua Jacob.

Dxenná be'u du ca naca xęzr la xu.

<sup>14</sup> Dxelelé'e gate dxebía gubizra, ne dxelebezre xę'e  
ca dxelún becu', ne dxeléchaje' xęzre.

<sup>15</sup> Dxeledé' ca benne' dxeledaze', dxelílaje' da xelawe',

na' che quebe dxeléljane', na' du xela dxelawe' zria tue' xetúe'.

<sup>16</sup> Neda' gúl-laqueza' cheę xel-la' waca chiu',

na' che zílala güe lá'ana' xel-la' dxexache lazre' chiu',

lawe' da gúcalęnu' Lué'queze neda',

ne bcu'uju' neda' gate guzúa' lu da stébele'e.

<sup>17</sup> Lue' dxutipu' lazra', na' gúl-laqueza' chiu',

lawe' da nacu' Lue', Dios, Bénnea' dxucu'uje' neda',

ne Dios, dxexache lazru' neda'.

## 60

<sup>1</sup> Dios, Lue' ba bzu' netu' chalá'ala, ne bęnu' xeajcházentu'.

Bzrá'alę'ęnu' netu'.

Na'a bedá gácalęnu' netu'.

<sup>2</sup> Bęnu' guzrú' xęzr la xu, ne bęnu' bxalaj na.

Bexún na naga bxalaj na lawe' da dxebía xi na.

<sup>3</sup> Bęnu' blé'entu' netu', benne' chiu', da naca stébele'e.

Bęnu' guca cheęntu' ca güé'entu' tu da bęn na xeajcházentu'.

<sup>4</sup> Bnézruju' tu da dxulé'e lau cheę benne' dxelezrebe' Lue',

Da xeluxre' cheę gulé'e lau da naca li.

<sup>5</sup> Cheę xelélé' benne' ca' nazrí'iqueznu' Lue',

bsel-la le' dutę xel-la' waca chiu', ne bene chia'.

<sup>6</sup> Dios gunné' lu lataj lá'azxa cheę': "Wabéquezda' neda'.

Gunna' late wej cheęle xęzr la xu cheę benne' Siquem,  
ne gudxixra' cheęle xęzr la xu de cuita xęgu Sucot.

<sup>7</sup> Chia' naca xęzr la xu Galaad, ne chia' naca xęzr la xu  
cheę zri'ine zre sua Manasés.

Xęzr la xu cheę zri'ine zre sua Efraín naca na ca  
tu da napa chi'i na xíchaja'.

Xęzr la xu cheę zri'ine zre sua Judá naca na naga dxenná be'a.

<sup>8</sup> Xęzr la xu cheę benne' Moab naca na ca tu  
zriga' da xuzru nisa guná'a,

na' xęzr la xu cheę benne' Edom guchichan' nen zrela'.

Si'a ba neza xęzr la xu cheę benne' Filistea."

<sup>9</sup> ¿Nuzra che' neda' cheę guzétaja' xęzre da naxechaj na  
ze'e sibe?

¿Nuzra che' neda' cheę guzétaja' benne' Edom ca'?

<sup>10</sup> ¿Quegá Lue' na' che'u neda', Dios, nacu' Bénnea'

bzue' netu' chalá'ala,  
ne quebe guxeájłenu' benne' cheętu' ca', benne' dxjaque'  
wedil-la?

<sup>11</sup> Gúcale netu' cheę séquentu' tıl-lalęntu' benne' ca'  
dxeledıl-lalęne' netu',

lawe' da naca dácheze xelácale bėnneache netu'.

<sup>12</sup> Tu zren nen Dios gundxu tu da zrente,

na' Le' gulague' benne' ca' dxeledıl-lalęne' dxi'u.

## 61

<sup>1</sup> Bene, Dios, da dxuláwizra' Lue'.

Bzę naga da dxuchálajłena' Lue'.

<sup>2</sup> Zitu' naga zua lazria' dxuláwizra' Lue', lawe' da dxedú lazra'.

Guché' neda' naga zua Bénnea' naque' ca tu xi'a xiaj,

Bėnnea' nácadxę' szren ca neda',

<sup>3</sup> Nacu' Lue' Benne' nuxrue' neda',

ne nacu' ca tu ze'e xiaj da dxucu'uj na neda' lau benne' ca'

dxeledábague' neda'.

<sup>4</sup> Tu súazqueza' lu xu'u lá'azxa chiu'.

Sua chawa'a cuitu' Lue' ca zaj zua chawe' bedxuj dxé'enedu ca'  
zran xrila bedxuj.

<sup>5</sup> Lawe' da bennu' Lue', Dios, ca da guchebe lazra' chiu',

benu' napa' ca da dxelapa benne' ca' dxelezrebe' Lue'.

<sup>6</sup> Gunu' gaca bana' neda', wenná bea, záneteę zra.

Iza chia' xelaca na ca da zaj naca cheę chupa cuen bėnneache.

<sup>7</sup> Tu súazqueza' lau', Dios.

Bcueza xel-la' dxexache lazre' chiu', ne da li  
cheę xulucá'ana chawe' na neda', wenná bea.

<sup>8</sup> Caníqueze gúl-laqueza' cheę lau' tu chí'izqueze,

ne gúnqueza' tu zra tu zra ca da guchebe lazra'.

## 62

<sup>1</sup> Tuze nen Dios dxebeza zri lazre' bėnne'du xu'a.

Lęqueze' dxuselé' neda'.

2 Tuze Le' dxucu'uje' neda', ne dxuselé' neda'.  
 Naque' Bénnea' dxuxre' neda', na' quebe negue lazra'.  
 3 ¿Ajatezcha' gucuézale da gunle chee tu benne',  
 na' dxunle ba xen xúgutele guzría xile le',  
 ca dxun tu benne' dxuchínnaje' tu ze'e da ba de chalá'ala,  
 u tu le'aj da ba guzru"?  
 4 Dxunle tuze dizra' ájazra xebéajle neda' lu xel-la' szren chia'.  
 Nazrí'ile da wen lazre'.  
 Nen dxú'ale dxennele da xrlátaje, san xu'u lázrdaule da calela.

5 Lue', bénne'du xu'a, guleza lazre' tuze Dios,  
 lawe' da naca Le' Bénnea' dxebeza lazra'.  
 6 Tuze Le' dxucu'uje' neda', ne dxuselé' neda'.  
 Naque' Bénnea' dxuxre' neda', na' quebe negue lazra'.  
 7 Naca Dios Bénnea' dxuselé' neda', ne naque' da ba neza chia'.  
 Naca Dios Bénnea' dxucu'uje' neda', ne Benne' dxuxre' neda'.  
 8 Le cueza lazre' Le' tu chí'izqueze, le'e, bénneache.  
 Le xe'e ca da dxezá lázrele.  
 Naca Dios Bénnea' dxuxre' dxi'u.  
 9 Da líqueze, da dácheze zaj naca bénneache,  
 ne ca tu da wen lazre' benne' zren ca'.  
 Quebe bi dxelé'e tu lu zrgú'unsá.  
 Zaj nácadxe' zraze ca tu be' da dxecá'a lázredxu.  
 10 Quebe guxrén lázrele da sile gate dxexúbele,  
 ne quebe gucá'ana szren cuínale chee da ca' dxebanle.  
 Che dxegula xel-la' gunní'a chee, quebe xezaca ba lázrele  
 chee da na'.  
 11 Tu lászaze gunná Dios:  
 na' chupa lasa benda' da nigá:  
 Chee Dios naca xel-la' waca.  
 12 Chiu' Lue', Xran, naca xel-la' dxexache lazre'  
 lawe' da dxunézruju' lazruj chee tu tu bénneache  
 cáteze da zaj nune'.

## 63

1-2 Dios, Lue' nacu' Dios chia'.  
 Dxebile bénne'du xu'a da naca chiu',  
 na' belá' dxen chia' dxezá lazre' na da naca chiu'.  
 Naca chia' ca zúaqueza' tu xezr la xu bizre naga  
 quebe bi nisa de.  
 Dxaní'siseze xida' lau Lue' chee le'eda' xel-la' waca chiu',  
 ne xel-la' szren chiu',  
 cáteze ba ble'eda' da naca chiu' lu lataj lá'azxa chiu'.  
 3 Cháwedxa naca xel-la' dxexache lazre' chiu'  
 ca xel-la' nabánqueze.  
 Chee le na' güe lá'anaqueza' Lue'.  
 4 Caníqueze nnia' chiu' da xrlátaje dxácate naca bana'.  
 Chee gucá'ana szrena' Lau' chísaqueza' na'a.  
 5 Xélaje bénne'du xu'a da naca na ca beše zrita,  
 ne belá' da dxánnele'e,  
 na' dute xel-la' dxebé güe lá'anaqueza' Lue'

6 gate dxajsá lazra' chiu', ne dea' ga dxata,  
 ne gate dxulaba lazra' ca naca chiu' gate dxennaza' chizrela.  
 7 Lawe' da dxácalenu' neda', béle'eda' cuitu'  
 ca dxelún bedxuj dxé'enedu ca' zran xrila bedzuj.  
 8 Naca bénne'du xu'a Lue' tuze.  
 Nen na'u wal-la nuxru' neda'.  
 9 Benne' ca' gulezá lazre' xuluzría xi'e neda'  
 cheajlecházie' lataj ba xa'.  
 10 Xelebía xi'e lu xia nalá.  
 Xelaque' da xelagu becu' xixre' ca'.  
 11 Neda', wenná bea, beda' lu da naca chee Dios.  
 Xegá'ana ba lá'ana nüteteze benne' dxuluchínene' la',  
 lawe' da xelexxuj dxu'a benne' ca' dxelenné' da wen lazre'.

## 64

1 Dios, bze naga chi'a lawe' da zua' stébe dxuláwizra' Lue'.  
 Bxue xel-la' nabán chia' lawe' da dxezreba' bi xelún benne' ca'  
 dxeledábage' neda'.  
 2 Bcache chawe' neda' chee quebe xelún benne' wen  
 da calela chia' ca da dxelezá lazre',  
 ne chee quebe xelún benne' dxelún da zrinnaj chia'  
 ca da zaj nune' xelune' chia'.  
 3 Dizra' dxuluchálaje' zaj naca na ca xia zaj nalále'e na,  
 ne dxelenné' schanni' ca dxun tu benne' dxusané'  
 xaga nalá xéche'ze chee'.  
 4 Caní dxelenné' bagácheze chee xelune' cheajlechaze  
 benne' zaj naque' li lazre'.  
 Chadite dxelune' na, ne quebe bi dxelezrebe'.  
 5 Dxelune' ba xuzre xelune' da zrinnaj da zaj nune' xelune',  
 na' dxuluzúe' xralaj ca' chee xelele' bénneache,  
 dxelenné': "¿Nuzra le'e da dxundxu?"  
 6 Dxelílaje' ca zaj naca da zrinnaj xelune',  
 ne dxelenná' xánnie' ca zaj naca na.  
 Ca da zaj xu'u xichaj lázrdawe' zaj naca na stébele'e  
 ca zaj naca lázrdauqueze'.  
 7 Dios guné' benne' ca' we' nen tu xaga nalá xéche'ze chee'.  
 Chadite xelu'e xízrawe' zren ca'.  
 8 Dizra' buluchalaj benne' ca' xelún na cheajlecházie',  
 na' xelezrebe xúgute' bénneache gate xelele'ene' benne' ca'.  
 9 Nadxa xelezrebe xúgute' bénneache, ne xuluzenne'  
 ca da nun Dios,  
 na' xuluxúnbe'e ca zaj naca da bene' Le'.  
 10 Béqueze benne' xrlátaje lau Xránadxu, ne guxrén lazre' Le',  
 na' xelezúa lu da ba neza xúgute' benne' zaj naque' li lazre'.

## 65

1 Naca chiu' Lue', Dios, güe lá'anantu' Lue' lu xezre Sión,  
 na' guntu' da guchebe lázrentu' chiu'.  
 2 Lue' dxénqueznu' da dxuchálajentu' Lue',  
 na' xelelá' lau Lue' xúgute' bénneache.  
 3 Nabágale'a da zrinnaj da bēna',  
 san Lue' dxunite lau' ca da gudábagantu' Lue'.



4 Ba neza zrentę naca na cheę bėnnea' dxeca'u Lue',  
 ne dxennı' le' gaęę' chiu', cheę súaqueze' lataj lá'azxa chiu'.  
 Xélaįquezentu' da xrlátaje da de lizru', da ca' da zaj de  
 xudau' lá'azxa chiu'.  
 5 Lu da xrlátaje chiu' gunu' da zaj naca zrentę gate gunu'  
 ca da dxenábantu' Lue', Dios, Benne' dxuselę' netu'.  
 Xúgute bėnneache zaj zra' dutę xęzr la xu dxelebeza lazre' Lue',  
 ne cá'aqueze dxelebeza lazre' benne' dxeledę'  
 zıtu'la lawe' nısadau'.  
 6 Lué'queze dxuzúa chuchu' xi'a zren ca' nen xel-la' waca chiu'.  
 Nácaquezu' Benne' wal-la.  
 7 Dxebeche zriu' nısadau' gate dxelucu na,  
 ne schaga da dxelún xęajxruga cheę na.  
 Dxebeche zriu' benne' xęzr la xu gate dxeledábague' Lue'.  
 8 Cheę le na' benne' zaj zreę dutę xęzr la xu  
 xelezrebe' ca naca da zrentę da dxunu'.  
 Dxuzú' lu da ba neza bėnneache zaj zra' du gabı'ı xęzr la xu.  
 9 Dxenna'u xęzr la xu, ne dxesel-lu' nisa xiuj.  
 Dxunu' dxúnnaęę na lina cheę na.  
 Nuzúaquezu' lu xęzr la xu xęgu ca' da zaj deęę na nisa.  
 Dxucuezu' zrua' za da xelagu bėnneache,  
 ca ba núnquezu' gaca na.  
 10 Dxesel-lu' nisa xiuj naga ba zaj nune' na'.  
 Dxunu' dxexaca na xu xa'a.  
 Dxuculu na nen nisa xiuj na'.  
 Dxunu' dxelegula chawe' da du ca' ba zaj naxaza na.  
 11 Dxunu' dxeleęezi' bėnneache ba neza tu iza tu iza  
 ne cheę da dxunézruju',  
 na' ca zaj naca beuj bza chiu' dxelunna na xiuj  
 da dxun na dxelegula chawe' da zaj naza bėnneache.  
 12 Dxelunna na xiuj naga dxeledá be xıxre'du ca' da dxełáguba',  
 na' dxelebe bėnneache dxelelé'ene' ca bane zaj zua xı'adu ca'.  
 13 Lache' ca' zaj zra' zřila' ca',  
 na' dxu'a xęgudu ca' zaj naxaza zrua' xřıla',  
 na' dxelebezre xa'a bėnneache chiu' dutę xel-la' dxelebe,  
 ne dxelúl-laqueze' chiu'.

## 66

1 Le gucá'ana szren Dios dutę xel-la' dxebe,  
 le'e zrale dutę xęzr la xu.  
 2 Le gul-la ca naca xel-la' szren cheę le'.  
 Le gucá'ana szreęę gate dxue lá'anale Le'.  
 3 Le xę Dios: "Dxebáneęęquezentu' ca zaj naca da nunu'."  
 Ne cheę xel-la' szren cheę xel-la' waca chiu' xuluzúa  
 xřızru' benne' ca' dxeledábague' lue'.  
 4 Xúgute bėnneache zaj zra' dutę xęzr la xu xelúe  
 lá'anaqueze' Lue', ne xelúl-laqueze' chiu'.  
 Tu xelúl-lazqueze' cheę Láquezu'.  
 5 Le da, lé'ele ca zaj naca da nun Dios.  
 Da zřebedxu zaj naca da beęę cheę benne' ca'  
 belune' da calela.  
 6 Beęę' bexaca nısadau' xu bizre.

Guledé bēnneache chee' ní'aze' naga nedxu de tu xegu situj.  
 Dxu'a nísadau' na' gubéle'edxu lau Dios.  
 7 Dute xel-la' waca chee' nna be'e chadía chacanna.  
 Dxuxúequeze' ca da dxelún bēnneache dute xezr la xu.  
 Benne' dxeledábague' Le' quebe xelezrué'equenze' xel-la' szren.  
 8 Le'e, bēnneache, le gucá'ana szren Dios cheedxu,  
 ne le guzén bēnneache ca da dxue lá'ana le' Le'.  
 9 Léqueze' bxue' dxi'u chee' naca bandxu,  
 ne quebe be'e lataj cheajcházedxu.

10 Lué'queze bxu' netu' ca da bentu', Dios.  
 Bdeu' netu' xel-la' zi' ca dxelún bēnneache dxuludé'  
 xia plata lu xi' chee' xegá'ana chawe na.  
 11 Benu' xeajchú'untu' tu lu xralaj.  
 Bda'u cúzruntu' tu xua zí'ile'e.  
 12 Benu' guledé xíchajntu' benne' zaj zri'e' bzrina' chee' ca'.  
 Gudentu' tu lu xi', ne tu lu nisa situj,  
 na' bebéaju' netu', ne bzu' netu' tu lataj naga zúantu'  
 lu da ba neza.  
 13 Chú'uqueza' lu xu'u lizru' chee' guzézxea' béadu ca',  
 ne gunna' chiu' ca da guchebe lazra' guna',  
 14 da na' guchebe lazra' ca da gunnía'  
 gate guzúa' lu da stébele'e.  
 15 Guzézxea' béadu ca', be dxelanne lau' Lue',  
 ne guna' cuen zren chee' zrila'du ca' lau',  
 ne gutia' bezre ca', ne chivo biu ca' lau'.

16 Le da, xénele, xúgutele dxezrébele Dios,  
 na' guzenda' le'e ca da bene' gúcalene' neda'.  
 17 Du lazra' bláwizra' Le',  
 ne bca'ana szrénqueza' Le'.  
 18 La guzé lazra' tu da calela,  
 quebe ben Xránadxu chia'.  
 19 Da líqueze bene Dios chi'a.  
 Bze' nague' ca da gunábeda' Le'.  
 20 ¡Gaca báqueze Dios!  
 ¡Quebe bzue' chalá'ala da bchálajlena' Le',  
 san bexache lazre' neda'!

## 67

1 Dios, bexache lazre' netu', ne ben da chawe' cheentu'.  
 Dute xel-la' zri'i lazre' chiu' guzúale netu',  
 2 chee' xelúnbea bēnneache du gabí'i xezr la xu  
 ca naca da dxaca lazru',  
 ne chee' xeleneze bēnneache dute xezr la xu  
 ca dxuseláu' bēnneache.  
 3 Xúgute bēnneache dxelúe lá'ane' Lue', Dios.  
 Dxelúe lá'ana xúgute bēnneache Lue'.

4 Le be, ne le sua lu da ba neza, le'e, bēnneache dute xezr la xu,  
 lawe' da guchi'a Dios chee' ca naca da xrlátaje,  
 ne guxúequeze' xúgute bēnneache.

<sup>5</sup> Xúgute bēnneache dxelúe lá'ang' Lue', Dios.  
Dxelúe lá'ana xúgute bēnneache Lue'.

<sup>6</sup> Xezr la xu nigá ba zria na lina chee na,  
lawe' da ben Dios cheedxu da chawe' cheedxu.

<sup>7</sup> Dios ba bene' chawe' cheedxu,  
na' gáteteze dxal-la' xelapa bēnneache Le' ba lá'ana.

## 68

<sup>1</sup> Guzé, Dios, ne bese dinnaj benne' ca' dxeledábague' Lue',  
ne ben xuluzrunnuj benne' ca' dxelecuídenē' Lue'.

<sup>2</sup> Ca dxun tu be', dxulaga na zren chee xi',  
ca' gulagu' benne' ca'.

Ca dxuna xina' lu xi', ca' xelexenite benne' ca' lau Dios,  
benne' ca' dxelune' da zrinnaj.

<sup>3</sup> Xelebé benne' xrlátaje ca', ne xelezúe' lu da ba neza lau Dios,  
ne xelexrítequeze' lu xel-la' dxelebé chee'.

<sup>4</sup> ¡Le gul-la chee Dios!

¡Le gul-la da du ca' chee Láqueze'!

¡Le gucá'ana szren Bénnea' dxe'e xabáa, nazí le' Jah!

¡Le be lau Le'!

<sup>5</sup> Ca xra bi dxé'enedu ca', ne ca benne' dxuxúe  
nu'ula ca' zaj zue' tuze,  
naca Dios lu lataj lá'azxa naga zúaqueze'.

<sup>6</sup> Dxun Dios xelezúa xrtia ljwezre bēnneache quebe nu  
xrtia ljwezre' zaj zra'.

Dxebéaje' benne' zaj xu'e lu na' benne' zitu' ca'  
chee xelezúe' lu da ba neza.

Benne' ca' dxeledábaga Dios zaj zue' tu lu xezr la xu bizre.

<sup>7</sup> Dios, gate bdxúaju' lau bēnneache chiu',  
ne gudáu' lu xezr la xu bizre na',

<sup>8</sup> na' guzrú' xezr la xu na'.

Cá'aqueze gúcale'e xiuj lau Dios.

Xi'a Sinaí guzrize na lau Dios,

Dios chee benne' Israel ca'.

<sup>9</sup> Gusel-lu' tu nisa xiuj zíalē'e, Dios.

Gate belexedú lazre' bēnneache chiu', Lue' btipu' lazre'.

<sup>10</sup> Bénneache zaj naca chiu' zaj zúaqueze' lu xezr la xu chiu'.  
Dute da chawe' chiu', Dios, dxuxú' benne' xache' ca'.

<sup>11</sup> Xránadxu Dios gusel-le' tu dizra' chawe',  
na' gulezrá' benne' zante, benne' buluzenne' bēnneache  
ca naca dizra' chawe' na'.

<sup>12</sup> ¡Buluzrúnnuje'!

¡Buluzrunnuj wenná bea ca' nen

ca naca benne' chee' dxjaque' wedil-la,  
na' benne' ca' zaj nagá'ana lu xu'u lizre' belexequé'e  
da bulucá'ana benne' ca' buluzrúnnuje'.

<sup>13</sup> Lácala bcache cuínale naga dxuxúele zríla' ca',

gacu zra lánale da naca na ca xрила bgúgudu ca' da  
zaj nazí lechítaje na plata,

na' dube' chee xrílaba' ca' zaj nazí lechítaje na oro.

<sup>14</sup> Gate beše dinnaj Dios zrente wenná bea ca' lataj na',  
na' bexruj bezxe' da bgacu na xi'a Salmón.

<sup>15</sup> Tu xi'a zrente naca xi'a Basán.

Tu xi'a zri'a naca xi'a Basán na'.

<sup>16</sup> ¿Bizr chee na' dxenna'le, le'e, xi'a zri'a ca',  
xi'a na' naga dxaca lazre' Dios súaqueze'?

Da líqueze súaqueze Xránadxu lu xi'a na' chadía chacanna.

<sup>17</sup> Da zaj naché' benne' ca' lu wedil-la da napa Dios  
zánete cue' gaxúa zaj naca na.

Xránadxu Dios zezé'e xi'a Sinaí chee sue' lataj lá'azxa chee'.

<sup>18</sup> Begüenu' xabáa, zeche'u benne' ca' bebéaju'  
lu na' xel-la' gute,

na' guzi'u da chawe' ca' da belunna bènneache,  
ne cá'anqueze guzúa da bennu' chee benne' ca'

guledábage' Lue',

chee súaquezu' ládujla bènneache, Dios, leu' Jah.

<sup>19</sup> ¡Gaca ba Xránadxu!

¡Tu zra tu zra dxusezrate' dxi'u da chawe' chee'!

¡Naque' Dios, dxuselé' dxi'u!

<sup>20</sup> Dios, Bènnea' naque' Dios cheedxu guselé' dxi'u.

Léqueze Xránadxu Dios guselé' dxi'u lu na' xel-la' gute.

<sup>21</sup> Da líqueze Dios guné' we' xichaj benne' ca'  
dxeledábage' Le'.

Guné' we' xichaj benne' quebe dxulusane' ca' zaj naca  
dul-la da dxeluné'.

<sup>22</sup> Gunná Xránadxu: “Guna' xezrinle lázrele,  
xeza'ale lu xi'a Basán.

Guna' xeza'ale lu da situj chee nísadau', xezrinle lázrele,

<sup>23</sup> lawe' da guna' guchuchu guléajle dxen chee benne' ca'  
dxeledábage' le'e,

na' xelélé'e becu' chee dxen chee benne' ca'.”

<sup>24</sup> Belelé'e bènneache ca' guledá bènneache chiu' belúe  
lá'ane' Lue', Dios.

Dute xel-la' dxelebé gulu'e lataj lá'azxa chiu', Dios,  
Wenná Bea chia'.

<sup>25</sup> Benne' ca' dxelul-la zeajzrie' láwe'la,

na' benne' zaj nu'e da dxulucuezre' zja'aque' bzébelá.

Ládujla zjaca nu'ula cuíde' du ca' zaj núxrube'  
da du ca' dxulusézxebe'.

<sup>26</sup> Le güe lá'ana Dios naga zaj nazraga bènneache chee'.

Le güe lá'ana Xránadxu, le'e nácale zri'ine zre sua Israel.

<sup>27</sup> Zaj zra' zri'ine zre sua Benjamín na', guque' benne'  
cuídedxa, na' dxelenná be'e.

Zaj nazraga benne' xíchaje chee zri'ine zre sua Judá na',  
ne benne' xíchaje chee zri'ine zre sua Zabulón,

ne benne' xíchaje chee zri'ine zre sua Neftalí.

<sup>28</sup> Dios, ble'e lau xel-la' wal-la chiu'.

Bzua chacha, Dios, da na' benu' cheentu'.

<sup>29</sup> Ne chee xel-la' szren chee xudau' chiu' da zua na  
xezre Jerusalén,

xelegú'u benne' wenná bea ca' da xelunne' lau'.

<sup>30</sup> Gudil-la benne' dxjaque' wedil-la chee dute xezr la xu  
zaj nazrague' chee xeledíl-lalene' Lue',

benne' ca' zaj naque' ca bezre zan ca' nen biadu cheeba' ca',  
cadxa xuluzúa xúgute' dizra' chiu',

na' xelunne' ca naca xia plata da zaj nape'.

Bese dinnaj benne' dute xezr la xu dxelexezaca ba lazre'  
xelezúe' lu wedil-la.

<sup>31</sup> Xelelá' benne' xíchaje chee xezr la xu Egipto.

Benne' xezr la xu Etiópía xelune' ba xen xulucá'ana szrene' Dios.

<sup>32</sup> ¡Le gul-la chee Dios, le'e zrle du gabí'i xezr la xu!

¡Le gul-la chee Xránadxu!

<sup>33</sup> ¡Le gul-la chee Bénnea' dxe'e xabáa na'ala,  
da zua na nédxute'!

¡Le nna' xque, wanné', ne zízrajle'e nne'!

<sup>34</sup> ¡Le nne nápalé'e Dios xel-la' waca!

¡Lu xel-la' szren chee' dxuxúequeze' benne' Israel ca',

na' zran xabáa nalá' xel-la' waca chee'!

<sup>35</sup> Benne' zrébentu' nacu' Lue', Dios,  
naga zu' lataj lá'azxa chiu'.

Dios chee benne' Israel ca', Léqueze' dxutipe' lazre'  
bénneache chee'.

¡Gaca ba Dios!

## 69

<sup>1</sup> Bselá neda', Dios.

Naca' ca tu benne' dxepe' lu nisa.

<sup>2</sup> Naca' ca tu benne' xu'e lu guzra' situj, ne quebe dxaca se'e.

Naca' ca tu benne' xu'e lu nisa sítujle'e,  
na' nisa na' ba dxacu na xíchaje'.

<sup>3</sup> Ba dxajxréqueda' lawe' da ba gunnéle'a, ne ba da lba'a.

Ba dxelátete lawa' dxenná'a gácale Dios neda'.

<sup>4</sup> Ba naxándxa benne' dxelecuídené' neda' ca naxán  
xicha xíchaja', ne quebe bi de bi nuna'.

Zaj naca benne' wál-lale'e benne' dxeledábage' neda',

benne' ca' dxuluzría xi'e neda', ne quebe bi de bizr chee na'.

¿Dxal-la' quízruja' da quebe gulana'?

<sup>5</sup> Dios, nézqueznu' Lue' naca da xálaze da nuna',  
ne dxelé'eqeznu' dul-la da bēna'.

<sup>6</sup> Quebe gu'u lataj xelexedué'e ne chia' neda' benne' ca'  
dxuluxrén lazre' Lue', Xrana' Dios szrente.

Quebe gu'u lataj xeleque zréaje ne chia' neda' benne' ca'  
dxelebeza lazre' Lue', Dios chee benne' Israel ca'.

<sup>7</sup> Lawe' da nazrí'ida' Lue' bulucháchalene' neda',  
na' lu xel-la' stu' zúaqueza'.

<sup>8</sup> Ca tu benne' zitu' naca' lau bi bícha'dau' ca',

ne quebe zaj núnbea bi cheę xrna'a neda'.

<sup>9</sup> Lawe' da dxé'le'a gunne xue cheę lizru' dxal-la na lu lázrdawa'.

Gate dxelenné' benne' ca' schanni' chiu' Lue', Dios, naca ca dxelenné' schanni' chia' neda'.

<sup>10</sup> Gudxezra', ne beńa' gubasa, na' bde cuina' xel-la' zi', na' cheę le na' bulucháchalene' neda'.

<sup>11</sup> Cá'anqueze bgacu cuina' zra lana' tuzruj.

Buluzúę' neda' ca tu da dxulé'e na da baxache' zrente.

<sup>12</sup> Gulenné' chia' benne' ca' zaj xu'e xu'u lawe',

na' benne' ca' dxelezuzre' belún le' chia' lu da belul-le'.

<sup>13</sup> Neda' bláwizra' Lue', Xrana' Dios, lu zra dxezaca ba lazru' Lue'.

Dios, lu xel-la' dxexache lazre' zren chiu', ne lawe' da líqueze nacu' weselá cheętu', bene chia'.

<sup>14</sup> Bebéaj neda' lu da stębe zua', naca' ca tu benne'

xu'e lu guzra' situj, ne quebe gu'u lataj cházedxa'.

Bselá neda' lu na' benne' ca' dxelecuídenę' neda'.

Naca' ca tu benne' xu'e lu nisa situj.

<sup>15</sup> Quebe gu'u lataj gatia' ca tu benne' xegache' lu nisa situj,

ne quebe gaca' ca tu benne' chu'e lu da situj,

ne quebe gaca' ca tu benne' cheajchazię' tu lu xędxu situj.

<sup>16</sup> Bechebe chia', Xrana' Dios, lawe' da chawe' naca

xel-la' dxexache lazre' chiu'.

Gudá, gúcale neda', lawe' da zrente naca xel-la'

dxexache lazre' chiu'.

<sup>17</sup> Gunná' xque ca da dxaca chia' neda', węń zrin chiu'.

lawe' da zua' lu da stębele'e, beń ba xuzre xennu' chia'.

<sup>18</sup> Gudá naga zua', ne bselá neda'.

Bselá neda' lawe' da zaj naxánle'e benne' ca'

dxeledábage' neda'.

<sup>19</sup> Lue' nézqueznu' ca dxulucháchalene' neda', ne ca zua'

lu da stębele'e, ne ca dxulucá'ana dítaję' neda'.

Dxelé'equeznu' xúgute benne' ca' dxelecuídenę' neda'.

<sup>20</sup> Lawe' da dxelún le' chia' dxedú lazra', ne zua' lu da stębe.

Guleza' nu benne' xexache lazre' neda', san quebe nu chilá'.

Guleza' nu benne' xelexúe zrene' neda', san quebe nu chilá'.

<sup>21</sup> Bulugawe' neda' da sla',

na' gate gubíleda', buluxí'aje' neda' da zichaj.

<sup>22</sup> Ca naca laní cheę benne' ca' beń gaca na ca tu

xralaj naga cheajlechazię',

ne beń xexaca da ba neza cheę' tu da gun na cheajlechazię'.

<sup>23</sup> Beń xelechul-la xiaj lawę' cheę québedxa xelexé'eng',

ne beń tu xelexrízrequeze benne' ca'.

<sup>24</sup> Dute xel-la' dxezrá'a chiu' ble'e benne' ca',

ne dute xel-la' xichaj zra'a chiu' be' benne' ca'.

<sup>25</sup> Beń quebe nu chilá' lu xu'u lizre benne' ca',

ne quebe nu sua lu xęzr la xu cheę',

<sup>26</sup> lawe' da guláu zi' xuzre' bęńnea' beńu' Lue' wę',

ne dxuluzrizre' ca naca xel-la' zi' dxedé bęńnea' beńu' Lue'.

<sup>27</sup> Ble'e dul-la da zaj nabaga benne' ca',

ne quebe gu'u le' lataj xelaque' tuze benne' xrlátaje chiu'.

28 Busula la benne' ca' lu xiche chee benne' ca'  
 zaj nape' xel-la' nabán,  
 ne quebe guzúaju' le' naga zaj naxúaj la benne' xrlátaje ca'.  
 29 Neda' zua' lu da ba xa', ne lu da stébele'e.  
 Bselá neda', Dios, ne bechisa neda'.

30 Gúl-laqueza' da güe lá'ana' La Dios chia'.  
 Gucá'ana szrena' Le' nen da dxue lá'ana' Le'.  
 31 Da nigá xezaca ba lázredxa Dios ca tu beẏze, be gutia' lawe',  
 u ca tu me', béadu zaj zua lúzuba', ne xrúguba'.  
 32 Xelelé'equeze benne' baxache' ca' da nigá, na' xelebene'.  
 Le biga lau Dios, na' gaca bánqueze,  
 33 lawe' da dxene Xránadxu benne' ca' dxelexáẏjene',  
 ne quebe dxuzúe' chalá'ala benne' chee' ca', benne'  
 zaj xu'e lizre xia.  
 34 Le güe lá'ana' Le', le'e zrale xabáa, ne le'e, zrale lu xezr la xu,  
 ne le'e zrale lawe' nísadau', ne cá'anqueze xúgute  
 da zaj naca ban xúgute lataj caní.  
 35 Dios guselé' benne' zaj zre'e xezre Sión,  
 ne xexune' xezre ca' zaj zra na lu xezr la xu chee  
 benne' Judá ca',  
 na' tu xelezúazqueze' na', ne gata' chee' xezr la xu na'.

36 Zri'ine zre sua benne' wen zrin chiu' ca', gaca  
 chee' xezr la xu na',  
 na' benne' ca' zaj nazrí'ine' Lau' Lue' xelezúe' na'.

## 70

1 Bselá neda', Dios.  
 Gúcaleche neda', Xran.  
 2 Ben xelexedué'e, ne xelezúa lu da stébe benne' ca'  
 dxelaca lazre' xelútie' neda'.  
 Ben xelexebigue', ne xelexala benne' ca' dxelebene'  
 lawe' da zua' lu da stébe.  
 3 Ben xelexegá'ana xala benne' ca' dxelún le' chia'.  
 4 Benne' ca' zá'aque' lau Lue' xelebene',  
 ne xelezúe' lu da ba neza.  
 Benne' ca' dxelé'e Lue': "Xcalenu" lawe' da bseláu' le',  
 tu dxelennáqueze': "¡Zrente naca Dios!"  
 5 Zua' lu da stébe, ne nate ni'a na'a.  
 Gudázega gácalenu' neda', Dios.  
 Nacu' Weselá chia', ne Xrana'.  
 Quebe chenu', Xran.

## 71

1 Za'a lau' Lue', Xran, chee guxru' neda'.  
 Ben québedxa xedué'eda'.  
 2 Gúcale neda', ne bselá neda' nen duté da naca xrlátaje chiu'.  
 Bze naga chi'a, ne bselá neda'.  
 3 Nacu' ca tu xiaj xre naga sua' chawe', na' waca xida'  
 naga zu' te zra chizrela.  
 Gunná be'enu' nu guselá neda', lawe' da nacu' Lue'

ca tu xiaj xre naga dxaca dipa lazra'.  
<sup>4</sup> Dios chia', bselá neda' lu na' benne' ca' zaj nabéaj xíchaje' Lue',  
 ne lu na' benne' ca' dxelunę' da caleła ne zaj naqueę' xichaj zra'a,  
<sup>5</sup> lawe' da dxebeza lazra' Lue', Xrana' Dios.  
 Nacu' Bénnea' dxuxúę' neda' gate nácatea' bídau'tę.  
<sup>6</sup> Lue' núxruquezu' neda' gate gúlajtea'.  
 Lue' benu' bdxuaja' lu le'ę xrna'a.  
 ¡Tu güe lá'anazqueza' Lue'!  
<sup>7</sup> Belexebane benne' zante ca naca chia',  
 ne ca naca chiu', dxuxúę xánniu' neda'.  
<sup>8</sup> Ben tu gul-lazqueza' da güe lá'ana' Lue',  
 ne gucá'ana szrena' Lue' du zra.  
<sup>9</sup> Quebe guzú' neda' chalá'ala gate ba guxrúa'.  
 Gate ba bedú lazra', quebe gusanu' neda'.  
<sup>10</sup> Benne' dxeledábage' neda' dxelenné' chia',  
 na' benne' ca' dxelezá lazre' xelútię' neda' belunę' tuze dizra',  
<sup>11</sup> dxelenné': "Ba bsan Dios le'."  
 Chéajdxu cheajtéladxu le' lawe' da québedxa nu zua  
 nu guselá le'."  
<sup>12</sup> ¡Dios, quebe su' zitu' naga zua!  
 ¡Dios chia', gudázega gácalenu' neda'!  
<sup>13</sup> ¡Ben xelexedué'ene'!  
 "Ben xelexenite benne' ca' dxeledábage' neda'."  
 "Ben xelezúa xel-la' stu', ne xeleque zrėjae benne' ca'  
 dxelezá lazre' xelunę' chia' da caleła."  
<sup>14</sup> Neda' tu cueza lárezqueza' Lue',  
 ne tu güe lá'anazqueza' Lue'.  
<sup>15</sup> Guzenda' bėnneache nacu' xrlátaje,  
 ne tu guzėnzqueza' le' ca da benu' bseláu' neda',  
 láqueze quebe nezda' bal-la lasa bseláu' neda'.  
<sup>16</sup> Tu guchálajzqueza' cheę da zrente da benu' Lue',  
 Xrana' Dios,  
 ne gusá'a lazre' bėnneache cheę da xrlátaje cheęquezu'.  
<sup>17</sup> Dios, Lue' bsėdenu' neda' gate nácatea' bídau'tę.  
 Dxulé'eda' bėnneache ca naca da zrente da benu'.  
<sup>18</sup> Dios, quebe gusán lazru' neda' gate bache guxrúa',  
 ne ba bgucha'.  
 Be' neda' lataj guzenda' zri'ine zre sua' ca naca  
 xel-la' waca chiu',  
 ne guzenda' bi za xelalaj ca naca xel-la' wal-la chiu',  
<sup>19</sup> ne ca naca da xrlátaje chiu', da naca na da zrente, Dios.  
 Lue' ba benu' da zaj nácale'ę na zrente.  
 Dios, ¿Núzraqueze ca Lue'?'  
<sup>20</sup> Lue' benu' gudéa' lu da stebe zante, ne lu da caleła ca',  
 na' gunu' xexaca bana', na' da xula xechisu' neda' lu xędxu ba.  
<sup>21</sup> ¡Gucá'ana szrendxu' neda',  
 ne xue zrėnquezu' neda'!  
<sup>22</sup> ¡Cá'anqueze güe lá'anaqueza' Lue', quínnia' da gul-lalęna'!  
 ¡Dios chia', gúl-laqueza' cheę da li chiu', quínnia'  
 da du' zriadi'i na du!  
 ¡Nacu' Benne' Lá'azxa cheę benne' Israel ca'!



23 ꞑSua' lu da ba neza gate gúl-laqueza' chiu' Lue',  
ne béqueze bénne'du xu'a, bénne'du' bexa'u!

24 ꞑTu guchálajzqueza' cheę da xrlátaje chiu' te zra chizrela,  
lawe' da benu' belexedué'e, ne guleque zrėje  
benne' ca' belune' ba xuzre xelune' chia' da calela!

## 72

1 ꞑDios, ben guchi'a wenná bea da dxaca cheentu'  
ca dxuchí'aquezu' Lue',

ne ben xelaca xrlátaje zri'ine wenná bea na'!

2 Nadxa le' guchi'a cheę bénneache chiu' ca naca  
da naca xrlátaje,

ne ca naca da li guchi'ę cheę benne' chiu' ca' zaj zue'  
lu da ba xa'.

3 Lu xi'a ca' xelebeza zri lazre' bénneache chiu',  
ne lu xí'adu ca' xelezúę' lu da naca chawe'.

4 Guchi'ę cheę benne' ca' zaj zue' lu da ba xa'  
lu xezre cheentu',

ne guselé' bidu ca' cheę benne' ca' dxelexázejne',  
ne guzría xi'ę benne' ca' dxulusaca zi'ę bénneache.

5 Xelezrebe' Lue' dxácatę ne zua gubizra,  
ne beu' lawe' tu cuen tu cuen bénneache.

6 Gaca wenná bea na' ca nisa xiuj da dxaca naga ba nadín,  
ne ca xrlę'ela da dxaca dxęla lu xęzr la xu.

7 Lu zra cheę wenná bea na' gaca da xrlátaje,  
ne xelebeza zri lazre' bénneache dxácatę ne zua beu'.

8 Nna be'ę dute xęzr la xu,  
ne dxu'a xęgu Eufates, ga zrintę dxu'a nísadau'.

9 Lau le' xuluzú zribe benne' ca' zaj zre'ę xęzr la xu,  
na' guzérxuje' lazre' benne' guledábage' Le'.

10 Benne' wenná bea cheę xęzr la xu Tarsis,  
ne wenná bea ca' cheę tu tu cue' xęzr la xu zitu' ca'

xelélé'ę zaj nu'ę da xulunézruje' cheę',  
na' benne' wenná bea cheę xęzr la xu Sabá,

ne wenná bea cheę Seba xulunézruje' cheę' da gunní'a.

11 Xúgutę benne' wenná bea ca' xuluzú zribe' lau le',  
na' benne' xúgutę cue' xęzr la xu xelune' zrin cheę'.

12 Le' guselé' benne' ca' dxelexázejne',  
benne' dxululáwizre' le',

ne guselé' benne' ca' zaj zue' lu da ba xa',  
ne quebe sua nu benne' gácalęne' le'.

13 Xexache lazre' benne' xache' ca', ne benne' ca'  
dxelexázejne',

na' guselé' benne' xache' ca' cheę xelaca banę'.  
14 Xexá'awę' benne' xache' ca' lu na' benne' wen lazre' ca',  
ne benne' snia ca'.

Gunę' ba xuzre guselé' benne' ca' lu na' benne' ca'  
dxelutie' benne'.

15 Gaca ban wenná bea nigá,  
na' xulunézruje' cheę' oro cheę xęzr la xu Sabá,

na' tu xelenábazqueze bénneache Dios gácalęne' le',  
ne te zra chizrela xelenabe' Dios gunę' gaca chawe'

chee wenná bea na'.

<sup>16</sup> Tu zrígadauze zrua' xtila xelaze' lu xezr la xu,  
ne lu xí'adu ca',

da cuále'ē na ca da dxebía lu xi'a Líbano,  
na' benne' zaj zre'ē lu xezre ca' xelanē' ca xixre' zē lu xezr la xu.

<sup>17</sup> Tu súazqueze la benne' wenná bea na'.

Tu xuluchálajzqueze' chee la lē' dxácatē ne zua gubizra.

Nē chee lē' gaca da ba neza chee bēneache xúgute  
cue' xezr la xu,

na' xelenné' chee' naca chee' da ba neza zrente.

<sup>18</sup> Xrlátaje naca Xránadxu Dios, Dios chee benne' Israel ca',  
na' tuze Lē' dxunē' da dxexebánedxu.

<sup>19</sup> Xrlátaje naca La Lē' da naca na da xabáa chadía chacanna,

na' dutē xezr la xu nigá xelelé' enē' da xabáa chee'.

¡Ca'an naca na, ne ca'an gaca na!

<sup>20</sup> Nigá dxexuzre xrtizra' David, da dxuchálajlēne' Dios.

David nigá naque' zri'ine Isaí.

## 73

<sup>1</sup> Da líqueze ba bēn Dios da chawe' chee benne' Israel ca',  
benne' ca' zaj naque' du lazre' lau Dios.

<sup>2</sup> Neda' ba guzúa cheajcházia' lu dul-la.

Ba guzúa guna' tu da zrinnaj,

<sup>3</sup> lawe' da guca' zre'e lazre' nē chee benne' gunnía' ca',  
gate ble'eda' ca dxelepe ban benne' ca' zaj nabéaj xíchaje' Dios.

<sup>4</sup> Benne' caní quebe zaj zue' stēbe chee xel-la' gute,

lawe' da zaj zúalē'ē chawe'.

<sup>5</sup> Quebe dxeledé' lu da ba xa' ca da dxeledé xúgute benne' ca',  
ne quebe dxelezaca zi'ē ca da dxaca chee xezícadxa bēneache.

<sup>6</sup> Chee lē' na' dxulucá'ana szren cuine'.

Tu dxelexúbezquezne' dxelunē' da calēla.

<sup>7</sup> Dxelánnie' lawe' da dxelagu cháwele'ē.

Dxelezíle'ē ca naca da dxelezá lazre'.

<sup>8</sup> Dxelún lē' chee Dios, ne dxelenné' calēla ca da zrinnaj  
da xelunē'.

Dutē xel-la' dxulucá'ana szren cuina dxuluchálaje' da zrente.

<sup>9</sup> Dxelenné' chee da ca' zaj zua xabáa,

ne dxuluchálaje' ca benne' zaj nape' dutē xezr la xu.

<sup>10</sup> Chee lē' na' xúgute bēneache dxelunē' lē' tu zren,

ne dxelezi'ē ca da dxelenná benne' gunnía' ca'.

<sup>11</sup> Dxelenná benne' ca' dxelunē' da calēla:

“¿Ájazra gaca neze Dios?

¿Dxelé'equeze Bēneea' zue' na'ala?”

<sup>12</sup> Benne' caní zaj naque' benne' zaj nabéaj xíchaje' Dios,

na' dxelepe banē' lu xezr la xu, ne dxelaque' gunnía'.

<sup>13</sup> Da líqueze, dácheze naca guca' du lazre',

ne quebe bi da calēla nuna'.

<sup>14</sup> Gudéa' lu da ba xa' tu zra tu zra,

ne gudéa' xel-la' zi' xúgute zra.

<sup>15</sup> La nnia' neda': Guchálaja' ca dxuluchalaj benne' ca',

na' si xē'a bēneachedu ca' chiu', Dios.

16 Gate blaba lazra' chee chéajni'ida' da nigá,  
guca na stébele'e chia' neda'.

17 Gate guxu'a lu lataj lá'azxa chee Dios,  
na' guque be'eda' da gaca chee benne' ca' gate cheajsé.

18 Da líqueze nunu' chee benne' ca' cheajlecházie',  
ne gunu' xelebía xí'queze'.

19 Chadite gulebía xí'queze'.  
Belexenite' lu xel-la' gulezrébele'e.

20 Zaj naque' ca tu da ble'edxu lu xela da dxexenite na  
gate dxexebandxu.

Ca'an gaca, Xran, gate chasu', guzú' chalá'ala ca da  
gulaca benne' ca'.

21 Gate guca' zre'e lazre' chee benne' ca',  
guzúa lázrdawa' lu da stébe.

22 Lawe' da guca' xichaj zide', na' quebe guxéajni'ida'  
guca' ca tu be xixre' lau Lue'.

23 Tu guzúazqueza' nen Lue', na' guca'u na'a xabela.

24 Bsi'u neda' chee guna' da dxulé'enu' neda',  
na' te nigá xezí' lu na'u neda' lu xabáa chiu'.

25 Quebe nu xetú zua chia' xabáa san tuzu' Lue',  
ne quebe nu xetú dxezá lazra' lu xezr la xu, san tuzu' Lue'.

26 Dxelexedú lazre' bēla' dxen chia', ne lázrdawa'.  
Dios naque' Benne' dxutipe' lazra',  
ne naque' da ba neza chia' chadía chacanna.

27 Benne' ca' dxelexecuase' naga zu' xelexenítig'.  
Guzría xi'u xúgute benne' ca' xelexebeaj xíchaj' Lue'.

28 Ca naca chia' neda', dxaca chawe' chia' lawe' da gubiga'  
lau Dios.

Tu dxebeza lázrezqueza' Xránadxu Dios,  
chee guchálajqueza' ca naca da zrente da nung'.

## 74

1 Dios, ¿tu chí'izqueze nuzú' netu' chalá'ala?

¿Dxezra'u netu', nácantu' ca zrila' chiu' ca'?

2 Bsá lazre' bēnneache chiu', benne' ca' guzi'u nédxudaute.

Benne' ca' bexa'u chee gunu' xelaque' benne' cheéquezu',  
benne' ca' zaj zre'e lu xi'a Sión nigá, naga zúaquezu' Lue'.

3 Gudá xedajnná'u ca nabía xi' xezre nigá,

ne ca naca da calēla da belún benne' ca'  
dxeledábage' netu', lu lataj lá'azxa chiu'.

4 Dxelebezre xa'a benne' ca' dxeledábage' Lue'

laduj naga zaj nazraga bēnneache chiu'.

Zaj nuzú' nigá da dxululé'e na xu'untu' lu na' benne' ca'.

5 Buluzría xi'e xezre nigá,

ca dxun tu benne' dxine' ca naca xaga zaj ze tu xi'a.

6 Na'a nen xa waga chee' ca', ne nen xaga chee' ca',  
ba buluzría xi'e ca naca lechítaje chee xudau' chiu'.

7 Ba buluzézxie' lataj lá'azxa chiu'.

Bulucá'ana dítaje' xu'u lizru'.

Buluchínnaje' na.

- 8 Lu lázrdawę' gulenné': "Guzría xí'tegadxu na tu chi'ize."  
Ba buluzézxie' xúgute xu'u naga bezrágantu' chiu'  
lu xęzr la xu chiu'.
- 9 Québedxa dxelé'entu' da la'axza ca' da dxululé'e na  
da guchísantu' lu xęzr la xu cheentu'.
- Québedxa nu chilá' benne' guchálaje' waláz chiu',  
ne quebe nu zua ládujla netu', benne' nézenę' bátaqueze lantu'.
- 10 Díos, ¿Báta cueza na xulucháchale benne' ca' netu',  
benne' ca' dxulusaca zi'e netu'?
- ¿Chadía chacanna welenné benne' dxeledábage' lue'  
schanni' cheę Lau'?
- 11 ¿Bizr cheę na' quebe dxebéaj lazru' benne' ca'?
- ¿Bizr cheę na' quebe dxuzría xi'u benne' ca' dxelunę' da calęla?
- 12 Lue', Díos, nacu' Wenná Bea chia' nédxudaute.  
Lue'queze dxuseláu' bėnneache dutę xęzr la xu.
- 13 Xel-la' waca chiu' bėnu' nísadau' chupa la'a.  
Gula'u xichaj bę schanni' ca' lu nísadau'.
- 14 Bzúzruju' xichaj bę schanni' lęba' leviatán,  
Na' bėnu' gulagu bę xixre lęba', bea ca' zaj zraba' lu xu bizre.
- 15 Bėnu' gulaj nisa beaj, ne nisa xęgu ca'.
- Bsebizru' xęgu zri'a ca'.
- 16 Chiu' Lue' naca te zra, ne cá'anqueze chiu' naca dxęla.  
Lue' bzu' beu', ne gubizra naga dxeledé na.
- 17 Lue' bzu' tu chi'ize ca naca da zaj dę xęzr la xu nigá.  
Lue' bėnu' beu' la ca', ne beu' zaga ca'.
- 18 Bsa lazre' da nigá: Benne' ca' dxeledábage' lue'  
ba zaj nun lę' chiu' Lue', Xran.
- Benne' xala ca' ba gulenné' schanni' cheę Lau'.
- 19 Quebe gusanu' lu na' benne' zaj naque' ca bę snia ca'  
benne' ca' nazrí'iquezu',  
ne quebe gal-la lazru' tu chi'ize bėnneache chiu' zaj  
zue' lu da ba xa'.
- 20 Gunná' ca naca xel-la' wezría da bėnu',  
lawe' da gáteteze naca chul-la lu xęzr la xu,  
na' zaj zra' benne' ca' dxelunę' da zrinnaj.
- 21 Quebe gu'u lataj xelegá'ana lu xel-la' stu' benne'  
ca' zaj zue' lu da baxache'.
- Benne' dxelezaca zi'e, ne benne' dxelexárzjene'  
xelúe lá'ane' Lau'.
- 22 ¡Guzé, Díos!  
¡Bęn ca ba gunnáu'!
- ¡Bsa lazre' ca dxelún benne' xala ca', dxelún lę' chiu'  
te zra te zra!
- 23 Quebe gal-la lazru' ca da gulenná benne' ca'  
dxeledábage' lue'.
- Da schaga dxelún benne' ca' dxeledábage' Lue'  
tu dxėnzqueze na.

## 75

1 "Xcalenu'", dxęntu' Lue', Díos: "Xcalenu'."  
Dxuzentu' bėnneache zúalęnu' netu', ne ba nunu' da ca'

dxexebánequezentu'.

<sup>2</sup> Dxenná Dios: “Ba nuzúa' zra guchi'a chee bėnneache. Guchi'a ca naca da xrlátaje.

<sup>3</sup> Lácala xru' dutę xęzr la xu, ne xelexrize xúgute da zaj naca ban na,

neda' gúxruqueza' ca naca lane xęzr la xu na'.

<sup>4</sup> Dxapa' benne' xala ca': Quebe gáwele.

Dxapa' benne' ca' dxelunę' da caleła:

Quebe gucá'ana szren cuínale.

<sup>5</sup> Quebe guxrén lázrele xel-la' wal-la cheęle.

Quebe gácale benne' lázxdau zide'.”

<sup>6</sup> Quebe za xel-la' szren naga dxalaj gubizra, ne naga dxebia na,

ne quebe za na le'ę xixre' lawe' lataj.

<sup>7</sup> Dios naque' Bėnnea' guchi'ę chee bėnneache.

Dxucá'anę' cá'aze tu benne', ne dxucá'anę' szren xetú benne'.

<sup>8</sup> Dios nuxrę' tu zriga', da nazrate na xrise uva wal-la, da zeaje na xel-la' dxezrá'a chee'.

Dxulálaje' na chee xelę'aj benne' ca' dxelunę' da caleła.

Xelę'aje' na xebizrtę na.

<sup>9</sup> Neda' guzėnquezda' bėnneache,

ne gul-la' da güe lá'ana' Dios chee Jacob.

<sup>10</sup> Le' guchínnajqueze' xel-la' waca chee benne'

węn da caleła ca'.

Gusezrendxę' xel-la' waca chee benne' xrlátaje ca'.

## 76

<sup>1</sup> Zaj núnbea benne' Judá ca' Dios,

na' ládujla benne' Israel zrentę nácaqueze La Le'.

<sup>2</sup> Lu xęzre Salem zua lataj lá'azxa chee'.

Lu xęzre Sión zua naga zúaqueze'.

<sup>3</sup> Lataj na' gudíchaje' xaga nalá xéche'ze ca',

ne xia da dxucu'uj na benne' lu wedil-la,

ne ca naca da dxuluchínenę' lu wedil-la.

<sup>4</sup> Benne' xabáa nacu' Lue',

ne Benne' wál-ladxa ca xi'a zri'a ca'.

<sup>5</sup> Xeajlechaze benne' wal-la ca', ne guláse dınnaje'.

Netú benne' wal-la ca' quebe belexchisa ne'ę chee xelunę' wedil-la.

<sup>6</sup> Dios chee benne' Israel ca', gate gudil-lu' benne' ca',

guláse dinnaj bzrina' ca', ne benne' gulebíę'-ba'.

<sup>7</sup> Nacu' Lue' Benne' zrėbedxu.

¿Nu benne' gaca se' lau Lue' gate dzezra'u?

<sup>8</sup> Xabáate gunná'u, na' guchi'u chee bėnneache.

Dxelezrebe bėnneache lu xęzr la xu, na' dxelebeze'

<sup>9</sup> zra seu' Lue', Dios, chee guchi'u chee bėnneache,

ne chee guseláu' xúgute benne' dxexruj lazre' zaj zre'ę lu xęzr la xu.

<sup>10</sup> Da líqueze xel-la' dxelezzrá'a chee bėnneache

gaca na tu da gucá'ana szren na Lue'.

Guzúa zriu' xel-la' dxelezá'a chee bénneache zaj nagá'ane'.

11 Le chebe lázrele da gunle chee Dios,  
na' le gun da na' chee Xránadxu, Dios chee.  
Xúgute benne' zaj zre'e du gabi'ila xeelé'e,  
na' xulunézruje' da zaj nu'e chee Dios,

Bénnea' dxezrébedxu.

12 Guzague' da xu'u lu xichaj lázxdau benne' blau ca'.  
Le' dxuchebe' benne' wenná bea ca' zaj zre'e lu xezr la xu.

## 77

1 Nen chi'a bláwizra' Dios.

Bláwizra' Dios, na' Le' buzé nague' chi'a.

2 Guxu'a lau Xránadxu lu zra guzúa' lu da ba xa'.  
Chizrela guchisa na'a lau Le', ne quebe guzúa zria'.  
Quebe be'a lataj nu benne' xue zrene' neda'.

3 Bsa lazra' chee Dios, ne guzúa' stébe.

Gudawa' zria lawe', ne bedú lazra'.

4 Begúe' bchigala chia'.

Guzúa' stébele'e, ne quebe guca guchálaja'.

5 Blaba lazra' ca naca zra nédxute.

Ca naca iza zan ca' da ba guledé chee na.

6 Bsa lazra' ca naca da bil-la' chizrélala,  
ne blaba lázrequeza' ca zaj naca na, na' gunaba be' xu'a:

7 ¿Guzúa Xránadxu dxi'u chalá'ala tu chi'ize  
ne québedxa gácalene' dxi'u?

8 ¿Cabátadxa xexache lazre' dxi'u?

¿Cabátadxa gune' ca da guchebe lazre'?

9 ¿Gul-la lázrequeze Dios xexache lazre' dxi'u?

¿Dxezré'e dxi'u, na' québedxa xexache lazre' dxi'u?

10 Nadxa gunnía': Caní dxuna' lawe' da quebe chawe' zua'.  
Chee le na' cheajsá lazra' chee xúgute da zrente  
da ben Dios zrente lu iza ba guledé chee na.

11 Cheajsá lazra' chee da zrente ca' da ben Jah.

Awe', cheajsá lazra' chee da benu' nédxudaute da ca'  
dxexebánentu'.

12 Gulaba lazra' ca naca xúgute da ba benu',  
ne guchálaja' ca zaj naca da nunu'.

13 Dios, lá'azxa naca da dxusédenu' netu' ca guntu'.

¿Zua xetú Dios naque' benne' zren ca naca Dios cheentu'?

14 Lue' nacu' Dios, dxunu' da ca' dxexebánentu'.

Blé'enu' xúgute bénneache lu xezr la xu ca zrente  
naca xel-la' waca chiu'.

15 Nen xel-la' waca chiu' bexa'u bénneache chiu',  
zri'ine zre sua Jacob, ne zri'ine zre sua José.

16 Xegu nisa ca' belelé'en Lue', Dios.

Belelé'e xegu nisa ca' Lue', na' belezrébele'e na.

Cá'anqueze gulezúa stébe nísadau' situj ca'.

17 Nisa xiuj zila bdxuaj na lu beuj bza ca',

ne gulennéle'e guziu', ne gulépele'e xesa.

18 Lu be' bdunu' ben guziu' chiu' da gunnéle'e na.

Bulusaní' xesa guziu' ca naca xęzr la xu.

Guzúa stebe, ne guzrize xęzr la xu.

<sup>19</sup> Lawe' nísadau' guza'u,  
ne lawe' nisa zila ca' gudéquezu',  
ne quebe naca bea naga bléaju'.

<sup>20</sup> Guche'u bėnneache chiu' ca zrila' ca'  
lu na' Moisés, ne lu na' Aarón.

## 78

<sup>1</sup> Le xen, le'e, bėnneache chia', ca da dxusėdeda'.

Le xen xanne' ca da dxuchálaja'.

<sup>2</sup> Guchíneda' dizra' ca da dxuluchalaj benne' sina ca',  
na' guzėajni'ida' le'e da ca' gulezúa na bagácheze gate nate,

<sup>3</sup> da ca' bendxu, ne bėnbeadxu na,  
da ca' belixru be'e xra xrtáudxu ca' dxi'u.

<sup>4</sup> Quebe gucáchedxu na lau zrí'inedxu ca'.

Guzėnquezdxu zrí'inedxu ca' ca naca xel-la' szren  
cheę Xránadxu,

ne ca naca xel-la' waca cheę', ne ca zaj naca da zren ca'  
da bėne'.

<sup>5</sup> Bzue' tu da nadxixruj bea na da xelún benne' Israel ca',  
ne da bdxixruj be'ene' ca' da xelún zri'ine zre sua Jacob.

Gunná bé'ene' xra xrtáudxu ca' xuluzenne' bi cheę' ca'  
ca naca da gunná bé'ene',

<sup>6</sup> cheę xelúnbea zrí'ine' bidu ca' za xelálajbe' ca naca na,  
na' bi caní xuluzenbe' zrí'inebe' da na',

<sup>7</sup> cheę xuluxrén lázrebe' Dios,  
ne quebe xelal-la lázrebe' da ca' bėn Dios,  
ne cheę xuluzúabe' dizra' da ca' gunná be'ę.

<sup>8</sup> Quebe xelácabe' ca gulaca xra xrtáube' ca'.

Benne' ca' quebe buluzúę' dizra' cheę', ne guledábage' Le',  
ne quebe buluzúa chúchue' ca buluxrén lazre' Dios,  
ne quebe gulaque' li lazre' lu da naca cheę Dios lu  
be' zaj nácaqueę'.

<sup>9</sup> Benne' zrí'ine zre sua Efraín, benne' zaj nu'ę

da dxuluchínene' lu wedil-la  
buluzrúnnuje' naga dxaca wedil-la.

<sup>10</sup> Quebe belune' ca naca xel-la' wezría da bėn Dios,  
ne quebe buluzúę' dizra' da gunná bé'ene'.

<sup>11</sup> Gulal-la lazre' da ca' bėn Dios,  
ne xel-la' waca ca' blé'ene' Le'.

<sup>12</sup> Lau xra xrtawe' ca' bėne' xel-la' waca ca'  
lu xęzr la xu Egipto, ne lu xęzr la xu Zoán.

<sup>13</sup> Gusalje' neza lu nísadau' naga guledé benne' ca'.  
Bėne' nísadau' na' ca xi'a ca' chalá'a weaj.

<sup>14</sup> Te zra blé'ene' benne' ca' neza nen tu beuj bza da xjácaleņe',  
ne chizrela nen beuj bza da naca na ca tu xi'.

<sup>15</sup> Gulé'ę xiaj ca' naga naca xu bizre,  
na' bxí'aje' benne' ca' nisa da gulaj na le'ę xiaj ca'  
ca tu xęgu nisa.

<sup>16</sup> Bėne' gulaj tu xęgu nisa le'ę xiaj na',

na' bzriluj na ca tu xegu zren.

17 Lácala bene' caní belúndxaqueze' dul-la lau Dios  
le'e xixre' lawe' lataj,

ne guledábague' Dios nape' dute xel-la' szren.

18 Gulegú'u lazre' xulu'zúa zrie' Dios.

Gulenabe' xelawe' ca da dxelezá lazre' le'.

19 Gulenné' chee' Dios, gulenné':

¿Wazeque Dios na' gunne' da gágudxu le'e xixre' nigá?

20 Da líqueze gulé'e xiaj na', na' gulaj nisa na',  
na' bzriluj na ca tu xegu zren.

¿Wazéquequezne' gunne' dxi'u xeta, ne gunne' bela'  
da gágudxu?

21 Chee' le' na' bzra'a Xránadxu gate benne' da na',  
ne gusel-le' xi' da bzeze na bal-la bèneache chee',  
na' bsdxí'ule'e xel-la' dxezrá'a chee' nen benne' Israel ca',

22 lawe' da quebe guléajle'e chee' Dios,  
ne quebe buluxrén lazre' Le' guselé' le'.

23 Gunná bé'ene' beuj zran xabáa,  
ne gusalaje' dxa xu'u chee' xabáa,

24 na' bene' bxinnaj xeta maná ca dxinnaj xiuj chee'  
gulagu benne' chee' na.

Bnézruje' le' da naca ca zrua' chee' xabáa.

25 Gulawe' da dxelagu gubáz chee' xabáa ca'.

Gusél-lale'e da gulawe', na' gulélajtequezene'.

26 Bene' guca be' da za' chalá'ala naga dxalaj gubizra,  
ne xel-la' waca chee' bene' guca be' za' chalá'ala  
naga dxedé gubizra beu' zaga,

27 na' gusel-le' chee' benne' ca' bela' ca ze bxrte xu,  
béadu zaj zua xrila naxanba' ca xuzre' da dxe' dxu'a  
tu xegu zren.

28 Bene' guléxrujba' chale'aj chee' benne' ca'.

Guléxrujba' dútequeze naga zaj zua xu'u xide chee'.

29 Gulawe'-ba', ne gulélajquezene'.

Dios bnézruje' chié' ca naca da gulaca lazre'.

30 Gate quebe ne xelélajene', ne ne dxelawe'-ba',

31 bzra'a Dios benne' ca',  
na' betie' benne' zaj nácadxé' benne' wal-la,  
ne benne' Israel ca' zaj nácadxé' benne' waca.

32 Láqueze bene' caní, na' belúndxaqueze' dul-la,  
ne láqueze belelé'ene' xel-la' waca ca' da bene',  
quebe buluxrén lazre' Le'.

33 Chee' le' na' guchugue' zra chee' benne' ca' ca  
tu be' dxecá'adxu,

ne ca zaj naca iza da gulezúe', bde'e' le' lu da zi' da xa'.

34 Gate betie' bal-la benne' ca', na' xezícadxe'  
belexaque' chee' Dios.

Belexebí'i lazre', ne du lazre' buluchálajlene' Le'.

35 Xeajlesá lazre' naca Dios Benne' dxuxúe' le',  
ne Dios na' nape' dute xel-la' szren naque' Bénnea'  
bxá'awene' le',



- 36 san quebe guca li lazre' da gulenné'  
lawe' da belún lazre' lau Dios.
- 37 Quebe gulaque' li lazre' nen Le',  
ne quebe beluné' du lazre' ca naca xel-la' wezría chee'.
- 38 Dios bexache lazre' chee benne' ca',  
ne bnite lawe' dul-la beluné', ne quebe bzria xi'e le'.  
Zane' lásate bzue' chalá'ala xel-la' dxezrá'a chee',  
ne quebe bzre'e le' duté ca da dxéquene'.
- 39 Xeajsá lazre' Dios zaj naque' bela' dxen.  
Zaj naque' ca tu be' da dxdé na, ne quebe xezrín na.
- 40 Zane' lasa guledábage' Le' le'e xixre' lawe' lataj na',  
ne zane' lasa buluzúe' Le' baxache'.
- 41 Zane' lasa buluzúe' Dios chalá'ala,  
ne buluché'e Dios lá'azxa chee benne' Israel ca'.
- 42 Gulal-la lazre' ca naca xel-la' waca zren chee',  
ne ca bene' lu zra na' bxá'awene' le' lu da zi' da xa',
- 43 gate bene' xel-la' waca ca' lu xezr la xu Egipto,  
ne blé'ene' da ca' da dxebánedxu lu xezr la xu Zoán.
- 44 Bexune' xegu chee' ca' dxen,  
na' québedxa guca da xele'aj benne' Egipto ca'.
- 45 Gusel-le' be'a ládujla benne' ca', be buludeba' le' xel-la' zi'.  
Gusel-le' bluzru ca' buluzría xiba' xezr la xu chee'.
- 46 Gusel-le' biche zu ca' guláguba' lina chee',  
ne buluzría xiba' da zaj zua lu xezr la xu chee'.
- 47 Gusel-le' xiaj bezxe' zri'a da bzria xi na lba uva chee' ca',  
ne gusel-le' da zaga da bsebizre na xaga higo chee' ca'.
- 48 Gusel-le' xiaj bezxe' zri'a da bete na be xixre' chee' ca',  
ne gusel-le' xesa da bete na zrila' chee' ca'.
- 49 Bdee' benne' Egipto ca' lu xel-la' zi' zren,  
lawe' da bzrá'alé'e benne' ca',  
na' guca da ca' ca zánete gubáz ca' chee xel-la' gute.
- 50 Quebe bzague' xel-la' dxezrá'a chee',  
ne quebe bnite lawe' chee' chee' quebe xelátie',  
san betie' le' nen tu xizrawe' wal-la.
- 51 Betie' bi biu nedxu chee benne' ca',  
bi biu nedxu ca' chee benne' Egipto ca'.
- 52 Nadxa beche'e benne' chee' ca' ca tu benne'  
dxeche'e zrila' ca',  
ne bsi'e le' le'e xixre' lawe' lataj.
- 53 Bsi'e le' zri'a chawe', ne quebe bi belezrebe',  
san gulate benne' guledábage' Le' lu nísadau'.
- 54 Beche'e le' lu xezr la xu lá'azxa chee',  
naga zua xi'a nigá da guca cheéqueze'.
- 55 Bebéaje' benne' zaj zre'e lu xezr la xu na' lau  
benne' chie' ca',  
na' gulé'e xezr la xu chee' cha chee benne' Israel ca',  
ne bzre'e le' lizre benne' ca' bebéaje'.
- 56 Da xula buluzúe' Dios chalá'ala, ne buluché'e  
Dios, nape' duté xel-la' szren.  
Quebe buluzúe' dizra' da ca' gunná be'ene' le'.
- 57 Da xula guledábage' Dios ca belún xra xrtawe' ca'.

Gulaque' ca tu bdxeque' xala chee xaga nalá xéche'ze.

<sup>58</sup> Buluché'ē Le' ne chee lataj ca' naga bulucá'ana  
szrene' bedáu' xiaj xaga ca',

ne ne chee bedáu' xiaj xaga chee' ca' bzrá'ale'ē Dios.

<sup>59</sup> Bzra'a Dios gate blé'ene' na,

na' gucuídele'ēne' benne' chee' ca', benne' Israel.

<sup>60</sup> Guleaj xíchaje' xu'u xide lá'azxa chee' zua na xezre Silo,  
xu'u xide na' guzuáqueze' ládujla benne' ca'.

<sup>61</sup> Be'ē lataj belecá'a benne' ca' dxeledábage' dxi'u  
xi'ina lá'azxa chee',

da na' dxulé'e na xel-la' waca, ne xel-la' szren chee'.

<sup>62</sup> Bzre'ē benne' chee' ca',

na' bdeē' le' lu na' benne' ca' belútiē' le'.

<sup>63</sup> Benne' wal-la ca' gulátie' lu wedil-la.

Quebe nu zra' benne' wegú', benne' xelezúalene'  
nu'ula wegú' ca'.

<sup>64</sup> Cá'anqueze gulate bxruze ca' lu wedil-la,

na' nu'ula chee' bxruze ca' quebe gulebezre xache'  
chee' bxruze ca'.

<sup>65</sup> Nadxa guca Xránadxu ca tu benne' dxexebane' lu bchigala.

Guque' ca tu benne' wal-la dxebezre xē'ē gate ba né'aje'  
xrise uva wal-la.

<sup>66</sup> Na' blague' benne' guledábage' Le',

ne bca'anē' le' cá'aze chadía chacanna.

<sup>67</sup> Bzue' chalá'ala zri'ine zre sua José,

ne quebe bequē'ē zri'ine zre sua Efraín,

<sup>68</sup> san bequē'ē zri'ine zre sua Judá,

ne xi'a Sión, da na' nazrí'ile'ēne'.

<sup>69</sup> Lu xi'a na' benē' xudau' lá'azxa chee',  
da guca na ca naca da zua na xabáa.

Bzua chúchue' na chadía chacanna,

ca nácaqueze xezr la xu nigá.

<sup>70</sup> Bequē'ē David, benne' wen zrin chee'.

Bebéaje' le' naga zaj zra' zrila' ca'.

<sup>71</sup> Beche'ē le' naga zue' dxuxúē' zrila' ca' zaj nache'ēba' bedau',

chee' gaque' wenná bea, benne' guxúē' bēnneache chee',

zri'ine zre sua Jacob, benne' zaj naque' benne' Israel ca'.

<sup>72</sup> Dute xel-la' du lazre' chee' bxue' benne' ca'.

Bxue' le' dute xel-la' waca zren chee'.

## 79

<sup>1</sup> Dios, ba gulú'u benne' xezr la xu zitu' ca' lu xezr la xu  
chee' bēnneache chiu'.

Bulucá'ana dítaje' xudau' lá'azxa chiu'.

Buluzría xi'e xezre Jerusalén.

<sup>2</sup> Bulucá'anē' belá' dxen chee' wen zrin chiu' ca' naga  
gulagu be zua xrila le'.

Be xixre' ca' guláguba' belá' dxen chee' benne' ca'  
zaj naque' chiu'.

<sup>3</sup> Ca nisa bululálaje' dxen chee' benne' ca' xúgutē lu neza  
chee' xezre Jerusalén,

ne quebe nu chilá' benne' gucachē' benne' ca'.

<sup>4</sup> Benne' xēzr la xu walizre' cheḡntu' ca'  
dxulucháchalēne' netu'.

Benne' zaj zre'ē xēzre walíZR ca' dxulucá'ana dítajē' netu',  
ne dxelún le' cheḡntu'.

<sup>5</sup> ¿Bata cuézaqueze gaca caní cheḡntu', Xran?

¿Tu chí'izqueze dxezra'u netu'?

¿Tu chí'izqueze gaca xel-la' dxezrá'a chiu' ca tu xi'?

<sup>6</sup> Bzra'a benne' xēzr la xu ca' quebe zaj núnbe'ē Lue',  
na' benne' xēzr la xu ca' quebe dxululáwizre' Lue',

<sup>7</sup> lawe' da ba buluzría xi'ē zri'ine zre sua Jacob,  
ne bulucá'ana dítajē' xu'u lizre benne' ca'.

<sup>8</sup> Quebe gusebagu' netu' ca naca da zrinnaj da belún  
xra xrtauntu' ca'.

Gudázega xexache lazru' netu', lawe' da dxezraga láulē'ḡntu'.

<sup>9</sup> Gúcalē netu', Dios, nacu' Bénnea' dxuselē' netu',  
cheḡ gaca ba Lau'.

Bselá netu', ne bnite lau dul-la nuntu' cheḡ xegá'ana szren Lau',

<sup>10</sup> lawe' da xelenná bénneache: "¿Ga na Dios cheḡ benne' ca'?"

Bebéaj lazre' benne' ca' belútiḡ wḡn zrin chiu' ca'.

<sup>11</sup> Caní ben cheḡ xeledé'e xúgute benne' chiu' ca' zaj xu'ē  
lu na' benne' ca' dxeledábage' netu'.

Dute' xel-la' waca zren chiu' bselá benne' ca' ba zaj nachugue'  
cheḡ' xelatiḡ'.

<sup>12</sup> Bunezruj cheḡ benne' xēzr la xu walizre' cheḡntu'  
ca' xegazre cue'

ca da calela da belunē', bulucá'ana dítajē' Lue', Xran.

<sup>13</sup> Netu', bénneache chiu', nácantu' ca zríla' chiu' ca',  
güe lá'anaquezentu' Lue' chadía chacanna.

Tu cuen tu cuen zri'ine zre suantu' gúl-laquezentu' da  
güe lá'anantu' Lue'.

## 80

<sup>1</sup> Bene cheḡntu', Lue' dxuxú' benne' Israel ca',  
Lue' na', dxuxú' zri'ine zre sua José ca zríla'du ca',  
ne dxe'u lataj blau chiu' da zua na lávela querubín ca'.

<sup>2</sup> Ble'e xel-la' szren chiu' lau zri'ine zre sua Efraín,  
ne Benjamín, ne Manasés.

Ble'e xel-la' waca chiu', ne gudá guseláu' netu'.

<sup>3</sup> Beché' netu', Dios.

Bexache lazre' netu', na' lantu'.

<sup>4</sup> Xránantu' Dios, napu' dute' xel-la' waca,  
¿bata chajsequeze zra'u netu',

ne quebe xennu' ca da nábantu' Lue'?

<sup>5</sup> Bzúalē'u netu' lu xel-la' dxewí'ine lazre',  
ne bzílalē'u nisa dxebézrentu'.

<sup>6</sup> Bē'u lataj xēzr la xu walizre ca' bulucá'ana dítajē' netu',  
na' benne' ca' dxeledábage' netu' belún le' cheḡntu'.

<sup>7</sup> Beché' netu', Dios, napu' dute' xel-la' waca.

Bexache lazre' netu', na' lantu'.

<sup>8</sup> Bebéaju' tu zrigu' lba uva lu xēzr la xu Egipto da naca na

bénneache chiu'.  
 Blagu' benne' xęzr la xu gulezré'e nigá, na' guzu' nigá  
 zrigu' lba uva na'.  
 9 Gú'unu' lba uva na' cheę gula na.  
 Bdélé'e lue zrigu' lba uva na', na' gucu na xęzr la xu na'.  
 10 Gulú'u na zrul-la xúgute xi'a ca',  
 na' zruze na ca' gulegú'u na zrul-la xaga cedro zren ca'.  
 11 Gulechiluj zruze na, belezrintę na dxu'a nísadau',  
 ne belezrintę na dxu'a xęgu Eufrates.  
 12 ¿Bizr cheę na' gucá'u le'aj da naxečaj na le na?  
 Na'a xúgute benne' dxeledé na' dxelebanę' da zixre cheę na.  
 13 Dxuluchuchu dxululáj cuče xixre' ca' lba uva na',  
 na' bę xixre' ca' dxeláguba' na.  
 14 Bedá cheętu', Dios, napu' dute xel-la' waca.  
 Gunná' netu' ga na' zu' xabáa, ne gudá xedajnná'u lba uva chiu'.  
 15 Gudá, guseláu' lba uva nigá, da gúzaquezu'.  
 Bechuj cheę lba uva na', ba bzua chuchu' gaca na chiu'.  
 16 Benne' ca' dxeledábague' netu' ba gulechúguę' lba na',  
 ne ba guláduę' na xi'.  
 Gunná' benne' ca' lu xel-la' dxezrá'a chiu',  
 ne bzria xi' benne' ca'.  
 17 Bzua chuchu, ne bxue benne' ca' ba guca'u,  
 benne' xęzr la xu na' ba nuzúa chuchu'.  
 18 Cabátadxa cueaj xíčajntu' Lue' xecha lasa.  
 Bcache chawe' netu', naca bantu', na' güe lá'anantu' Lau'.  
 19 Xránantu' Dios, napu' dute xel-la' waca, beché' netu'.  
 Bexache lazre' netu', na' lantu'.

## 81

1 Lu dute xel-la' dxebé le gul-la cheę Dios, Bénnea' dxutipe'  
 lázredxu.  
 Lu da ba neza cheęle le cuezre xa'a lau Dios cheę  
 zri'ine zre sua Jacob.  
 2 Le gul-la, ne le capa xidedau'.  
 Le quinne xrtan da con zriadi'i na du, ne da dxúl-lalęnle.  
 3 Le gucuezre luzu da dxulucuezre' gate naca beu' dxe'ene,  
 da naca na zra nuzúadxu gundxu laní lá'azxa.  
 4 Naca na tu da dxun na ba xen xelún benne' Israel ca',  
 da bdxixruij bea Dios xelún zri'ine zre sua Jacob.  
 5 Bzue' na ca tu da gulé'e lau na zri'ine zre sua José  
 gate beledxúaje' lu xęzr la xu Egipto,  
 naga benda' tu xrtizra' bénneache da quebe guxéajni'ida'.  
 6 Gunná Dios: "Begúa' xua' da buludé'e' benne' chia' ca'.  
 Bsezrá'a benne' chia' ca' da zi'i."  
 7 Lu da ba xa' da guzúale, bláwizrale neda', na' bselá' le'e.  
 Bechéba' cheęle naga nagacha' lu beuj bza gate na'  
 gunnéle'e guziu',  
 na' bxua' ájala gunle naga zaj de beaj nisa zaj nazí le Meriba.  
 8 Le xene, bénneache chia', na' gusízreda' le'e.  
 Le'e, benne' Israel, che dxaca lázrele síle da dxennía',  
 9 quebe gápale tu dios cheę benne' xula,

ne quebe guzú zríbele lau tu dios chee benne' zitu'.

<sup>10</sup> Neda', Xránale, naca' Dios chee.

Bebéaja' le'e lu xezr la xu Egipto.

Le salaj dxú'ale, na' gunna' da gágule.

<sup>11</sup> Bénneache chia' quebe belúe lazre' da gunnía'.

Benne' Israel ca' quebe gulaca lazre' xezezí' lu ne'e neda'.

<sup>12</sup> Chee le na' bsana' benne' ca' lawe' da gulaque'  
lázxdau zide'.

Belune' ca da guléquene' xrlátaje.

<sup>13</sup> Che la gulebé' gunne xue bénneache chia' chee da gunnía',

ne che la belún benne' Israel ca da ble'eda' le',

<sup>14</sup> na' chadiṭe bzria xi'a benne' guledábage' le',

ne gudíl-laləna' benne' guledíl-laləne' le'.

<sup>15</sup> Che la belún benne' Israel caní,

na' benne' ca' dxelecuídenē' Xránadxu buluzúe' xrtizre',

(san chadía chacanna zaj nabague' zria),

<sup>16</sup> na' Dios gunē' xelawe' zrua' xtila cháwedau',

ne gunē' xelélajquezne' nen bzrina'dau'.

## 82

<sup>1</sup> Zua Dios naga zaj nazraga benne' dxuluchi'e chee bénneache chee'.

Dios dxuchi'e chee benne' ca' dxuluchi'e chee bénneache.

<sup>2</sup> Dxenná Dios: “¿Bátadxa guchi'ale chee bénneache chia' da quebe naca  
xrlátaje,

ne gápale ba lá'ana benne' ca' zaj nabéaj xíchaje' Dios?”

<sup>3</sup> Le gácale benne' xache' ca', ne bidau' wezebe ca'.

Le gun da xrlátaje chee benne' baxache' ca'

ne chee benne' ca' dxelexázejne'.

<sup>4</sup> Le guselá benne' ca' dxeledé' lu da ba xa',

ne benne' ca' quebe bi zaj nape'.

Le guselá benne' ca' lu na' benne' ca' zaj nabéaj xíchaje' Dios.

<sup>5</sup> Quebe bi zaj nézene', ne quebe dxeléajni'ine',

na' dxeledé' lu da chul-la.

Dxuluzrizre' ca naca da zaj de lu xezr la xu.

<sup>6</sup> Neda' gunnía': Le'e nácaquezle ca dios ca',

ne nácale xúgutele ca zrí'inequeze Dios szrente,

<sup>7</sup> Wátele ca dxelate xezícadxa bénneache,

na' cheajcháze ca cheajchaze núteteze benne' dxenná be'e.

<sup>8</sup> ¡Guxasa, Dios!

¡Bchi'a chee bénneache zaj zra' lu xezr la xu,

lawe' da naca dutē xezr la xu chiu' Lue'!

## 83

<sup>1</sup> ¡Dios, quebe sua zriu'!

Quebe su' zrize, Dios, ne quebe gusezxuj dxu'u,

<sup>2</sup> lawe' da dxelebezre xa'a benne' ca' dxeledábage' Lue',

ne dxulucá'ana szren cuina benne' ca' dxelecuídenē' Lue'.

<sup>3</sup> Bagácheze ba zaj nune' tuze dizra' bi xelune' chee bénneache chiu',

ne ba zaj nune' bi xelune' chee benne' ca' dxúequezu' Lue'.

<sup>4</sup> Gulenné': “Le chu'u, guzría xidxu benne' ca'

chee quédexa xelaque' tu cue' xezr la xu,  
ne quédexa nu sua benne' cheajsá lazre' la Israel."

<sup>5</sup> Ba belune' tuze dizra'.

Zaj nune' tuze dizra' xeledábage' Lue'

<sup>6</sup> benne' Edom ca', ne benne' Ismael ca',  
ne benne' Moab ca', ne benne' zri'ine zre sua ca' Agar,

<sup>7</sup> ne benne' Gebal ca', ne benne' Amón ca', ne benne' Amalec ca',  
ne benne' Filistea ca', ne benne' zaj zre'e xezre Tiro.

<sup>8</sup> Cá'aqueze benne' Asiria ca' zaj nune' le' tuze.

Xúgute benne' caní dxelune' zrin chee zri'ine zre sua Lot.

<sup>9</sup> Ben chee benne' caní ca' benu' chee benne' Madián ca',  
ne ca' benu' chee Sí Sara, ne ca' benu' chee Jabín dxu'a xegu Cisón,

<sup>10</sup> benne' ca' gulátie' lu xezr la xu Endor,

na' belexaque' ca' xrch'e bezre da gun na bebe lu xezr la xu.

<sup>11</sup> Ben gaca chee benne' blau ca' chee benne' caní

ca' guca chee Oreb, ne chee Zeeb,

ne ben gaca chee benne' dxelenná bé'ene' benne' caní

ca' guca chee Zeba, ne chee Zalmuna,

<sup>12</sup> lawe' da gulenná benne' caní: "Gaca cheedxu xezr la xu  
naga zaj zra' bénneache chee Dios."

<sup>13</sup> Dios chia', ben xelaque' ca' xizre bebe da dxua be' gate dxedube na.

Ben xelaque' ca' xrlácue xia xéladu ca' da dxua be' bdunu'.

<sup>14</sup> Ca dxun tu xi' da dxuzezxe na tu xi'a zren,

ne ca' dxun xi' da dxuzezxe na tu din zren,

<sup>15</sup> ca'an gudáu zi' xuzre benne' caní tu lu be' bdunu',

ne bchebe le' nen tu be' bdunu' chiu'.

<sup>16</sup> Ben xelexedué' ele'ene',

ne ben xelape' Lue' ba lá'ana, Xran.

<sup>17</sup> Ben xelege zréajene' ne xelezúa stébele'e tu chí'izqueze.

Ben xelexegá'ana ditaje', ne xelexenítie'.

<sup>18</sup> Ben xelexúnbe'e nacu' Lue' Xránantu' Dios.

Tuzu' Lue' nacu' Dios zrenté lawe' duté xezr la xu.

## 84

<sup>1</sup> Nazrí'ile'eda' xudau' chiu' Lue', Dios, napu' duté xel-la' waca.

<sup>2</sup> Dxaca lázrele'eda' sua' ga na',

ne dxezá lazra' sua' lu xudau' chiu', Xran.

Duté da naca', ne duté lázrdawa' dxul-la' chiu' Lue', Dios ban.

<sup>3</sup> Ba belún chjegu ca' xrú'uneba',

na' buchuj ca' zaj de lataj naga dxuluzríaba' biadu cheeba' ca'

naga zua lu cugu chiu' Lue', Dios, napu' duté xel-la' waca.

Nacu' Lue' Wenná Bea chia', ne Dios chia'.

<sup>4</sup> Ba neza zrenté naca na chee benne' ca' zaj zre'e xudau' chiu'.

Chadía chacanna xelúe lá'anaqueze' Lue'.

<sup>5</sup> Ba neza zrenté naca na chee benne' ca',

Lue' dxuzúa chuchu' le',

benne' ca' dxelezá lazre' chjaque' xi'a lá'azxa chiu', xi'a Sión.

<sup>6</sup> Gate dxeledé' lache' bizre nazí le na

Lache' Nisa Dxebézredxu,

dxexaca na lataj naga dxalaj nisa,

na' gusezrá nisa xiuj ca' zaj naca beaj ca'.

7 Dxelácadxe' benne' wal-la dxácatē ne zaj xu'ē neza  
 lawe' da xelexé'ene' Dios lu xi'a lá'azxa chee', xi'a Sión.  
 8 Bene, Xran, ca naca da dxenaba' Lue', Dios, napu' dutē xel-la' waca.  
 Bene, Dios, nacu' Dios chee' Jacob.  
 9 Ben da xrlátaje chee' benne' wenná bea cheentu', Dios,  
 benne' wenná bea na' guca'u Lue'.  
 10 Cháwedxa naca sua' tu zraze lu xudau' chiu'  
 quézcala sua' chi gaxúa iza naga xula.  
 Dxaca lazredxa' sua' dxa xu'a xudau' chee' Dios chia'  
 ca tu benne' nada'u,  
 quézcala súaqueza' tu lizra' zaca naga quebe zua Dios.  
 11 Xránadxu Dios naque' Benne' dxuxúe' dxi'u,  
 ne Benne' Wenná Bea xabáa cheedxu.  
 Dxunē' dxi'u da chawe' dutē xel-la' zri'i lazre' chee',  
 ne dxunē' dxelapa bēneache dxi'u ba lá'ana.  
 Quebe xezúene' zi' gunē' da chawe' chee' benne' ca' zaj naque' du lazre'.  
 12 ¡Dios, napu' dutē xel-la' waca!  
 ¡Ba neza zrente' naca na chee' benne' ca' dxuluxrén lazre' Lue'!

## 85

1 Benu' da xrlátaje chee' bēneache chiu', Xrana' Dios.  
 Benu' belexelá zri'ine zre sua Jacob,  
 benne' ca' gulu'ē lu na' benne' zitu' ca'.  
 2 Bnite lau' da zrinnaj da belún bēneache chiu'.  
 Bdeu' chalá'ala ca zaj naca dul-la chee' benne' ca'.  
 3 Bzua zriu' xel-la dxezrá'a chiu',  
 ne bsanu' xel-la' xichaj zra'a chiu'.  
 4 Ben xezúantu' lu da ba neza chee' xel-la' weselá chiu', Dios,  
 ne québedxa zra'u netu'.  
 5 ¿Tu chí'izqueze zra'u netu'?  
 ¿Wazrá'aquezu' tu cuen tu cuen zri'ine zre suantu'?  
 6 ¿Québedxa gunu' xexaca bantu',  
 chee' súantu' lu da ba neza lau Lue'?  
 7 ¡Xran, bexache lazre' netu', ne bselá netu'!  
 8 Guzé naga' da nne Xrana' Dios.  
 Nne' da guzúa na bēneache chee'  
 lu xel-la' dxebeza zri lazre',  
 chee' québedxa xelún benne' lá'azxa chee' da xálaze.  
 9 Da líqueze Le' zúatequeze' guselé' benne' ca' dxelezrebe' Le',  
 chee' sua da xabáa chee' lu xezr la xu cheedxu.  
 10 Zaj nazraga xel-la dxexache lazre', ne da li chee' Dios.  
 Zaj naca tuze da xrlátaje, ne xel-la' dxebeza zri lazre'.  
 11 Da li chee' gusezrá na xezr la xu nigá,  
 na' sel-le' da xrlátaje chee' da za xabáa.  
 12 Xránadxu gúnnaqueze' dxi'u da cháwedau',  
 na' gúnnale'ē xezr la xu cheedxu.  
 13 Nu benne' naque' xrlátaje waca xezrine' lau Dios,  
 na' gunē' gundxu ca da ba blé'ene' gundxu.

## 86

1 Bze' naga, Xran, ne bene chia',

lawe' da zua' lu da ba xa', ne dxexázejda'.

<sup>2</sup> Bxue neda' lawe' da naca' chiu'.

Bselá neda', Dios chia', naca' wen zrin chiu',  
ne dxuxrén lazra' Lue'.

<sup>3</sup> Bexache lazre' neda', Xrana' Dios,

lawe' da dxuláwizra' Lue' te zra chizrela.

<sup>4</sup> Ben béle'eda' neda', wen zrin chiu',

lawe' da dxuzúa cuina' lau Lue', Xran,

<sup>5</sup> na' Lue', Xran, nacu' xrlátaje, ne dxunite lau' cheentu'.

Zúatequezu' xexache lazru' benne' ca' dxululáwizre' Lue'.

<sup>6</sup> Xrana' Dios, bene da dxuchálajlena' Lue',

ne bze naga ca da dxenaba' lau'.

<sup>7</sup> Lu zra sua' lu da stébele'ē wannéqueza' Lue',

lawe' da dxexechébequezu' Lue' chia'.

<sup>8</sup> Xran, quebe nu chilá' Dios ca Lue',

ne quebe nu dxun ca da dxunu' Lue'.

<sup>9</sup> Xelélá' bēneache dutē xezr la xu da benu' Lue',

na' xelúe lá'anaqueze' Lue', Xran,

ne xulucá'ana szrenē' Lau' Lue',

<sup>10</sup> lawe' da nacu' Lue' szren, ne dxunu' da dxexebánentu'.

Tuzu' Lue' nacu' Dios.

<sup>11</sup> Bsede neda' da dxaca lazru' guna', Xrana' Dios,

na' guna' ca naca da li chiu'.

Gunná be'e lázrdawa' chee zreba' La cuinu'.

<sup>12</sup> Dutē lázrdawa' güe lá'anaqueza' Lue', Xrana' Dios,

ne gucá'ana szrénqueza' Lau' chadía chacanna,

<sup>13</sup> lawe' da zúatequezu' xexache lazru' neda',

ne bseláu' bēne'du xu'a lu lataj ba xa'.

<sup>14</sup> Dios, belasa benne' dxulucá'ana szren cuine',

ne dxeledábague' neda',

na' benne' xichaj zra'a ca' belunē' tuze dizra' xelútiē' neda',

ne quebe dxelezrebe benne' ca' Lue'.

<sup>15</sup> Lue', Xrana', nacu' Dios dxexache lazru' netu',

ne nacu' zren lazre',

ne quebe dxezrá'azeu', san zúatequezu' xexache lazru' netu',

ne nacu' li lazre'.

<sup>16</sup> Gunná' ca naca chia', ne bexache lazre' neda'.

Benna chia' neda', wen zrin chiu', xel-la' waca chiu',

nā' bxue neda', zri'ine nu'ula wen zrin chiu'.

<sup>17</sup> Ble'e neda' tu da gaca bea na gaca chawe' chia',

ne ben xelélé'e benne' ca' dxelecuídene' neda' da na',

ne ben xelxedué'ene',

lawe' da nacu' Lue', Xrana' Dios, Bēne' gúcalene' neda',

ne bexúe zrene' neda'.

## 87

<sup>1</sup> Lane xezre Sión zria na lu xi'a lá'azxa.

<sup>2</sup> Nazrí'idxa Xránadxu Dios lataj naga dxuluchi'a benne' zaj zre'ē xezre  
Sión,

ca nazrí'ine' xúgute xu'u lizre zri'ine zre sua Jacob.

<sup>3</sup> Da xrtante ca' dxelenná bēneache ca naca xezre chee Dios.

<sup>4</sup> Cheajsá lazra' lu xezr la xu Egipto, ne lu xezr la xu Babilonia



ga na' zaj zra' b́enneache zaj núnbe'ę neda'.

Le nna' xque, lu xęzr la xu Filistea, ne lu xęzre Tiro, ne lu  
xęzr la xu Etiopía gulalaj benne' caní zaj naque' chia'.

<sup>5</sup> Ca naca cheę xęzre Sión nnia':

Benne' nigá, ne b́ennea' gulálaję ga na', na' neda',  
Dios zrente, guzúa chúchua' xęzre na'.

<sup>6</sup> Gate gulaba Xránadxu Dios benne' ca' zaj naque' cheę',  
nne': "Benne' nigá gulálaję lu xęzre na'."

<sup>7</sup> Benne' ca' dxelul-łę', ne benne' ca' dxeline' xide xelenné':  
Ca naca da ba neza zúantu' lu xęzre na'.

## 88

<sup>1</sup> Xran, nacu' Dios dxuseláu' neda'.

Te zra, ne chizrela dxuláwizra' Lue'.

<sup>2</sup> Bene da dxuchálajłena' Lue',

ne bze naga da dxuláwizra' Lue'.

<sup>3</sup> Dxedú lazra' lu da calęla ca' da dxaca na chia',  
ne ba zua' gatia'.

<sup>4</sup> Dxeleque b́enneache neda' ca tu benne' gate,  
lawe' da dxátełę'ę ni'a na'a.

<sup>5</sup> Nagá'ana' cá'aze ládujla benne' gate.

Naca' ca benne' gulátie' lu wedil-la, ne zaj de' xędxu ba ca',  
benne' ca' québedxa dxajsá lazru', Dios,  
ne québedxa zaj xu'ę lu na'u Lue'.

<sup>6</sup> Dxaca chia' cáteze ba nuzú' neda' tu xędxu zren  
naga naca chul-la, ne nácalę'ę situj.

<sup>7</sup> Dxéqueda' dxezrá'łę'u neda'.

Da dxaca chia' naca na ca dxazia' zran xeajxruza zri'a  
cheę nísadau'.

<sup>8</sup> Benu' belexebiga bi ljwezra' ca' naga zua'.

Benu' neda' ca tu da dxusegute na benne' ca'.

Naca' ca tu benne' xu'ę lizre xia ne quebe gaca xedxúaję'.

<sup>9</sup> Dxelechul-la xiaj lawa' ne cheę da dxezí dzezaca'.

Xúgute zra dxuláwizra' Lue', Xrana' Dios.

Dxechisa na'a lau Lue'.

<sup>10</sup> ¿Dxúnquezu' xel-la' waca cheę xabáa dxácalęnu'  
benne' gate ca'?

¿Dxelexasa benne' gate ca' dxelúe lá'ang' Lue'?

<sup>11</sup> ¿Dxuluchalaj benne' zaj nagache' lu xędxu ba cheę  
xel-la zri'i lazre' chiu',

na' dxuluchalaj cheę da li lazre' chiu' benne' zaj xu'ę  
lataj chul-la cheę benne' gate ca'?

<sup>12</sup> ¿Welexúnbea benne' zaj xu'ę lataj chul-la na' ca  
naca da zrente da dxunu',

na' welexúnbea benne' zaj xu'ę naga quebe nu dxajsá lazre' łę'  
ca nacu' xrlátaje?

<sup>13</sup> Neda' dxuláwizra' Lue', Xrana' Dios.

Xúgute zila dxezrín lau' da dxenaba' Lue'.

<sup>14</sup> ¿Bizr cheę na' dxebéaj xíchaju' neda', Xran?

¿Bizr cheę na' quebe dxenná'u neda' cheę gácalęnu' neda'?

15 Dxezí dzezaca', ne ba zua' gatia'.  
 Nácatea' bi cuíde'tę dxedéa' xel-la' zi' da dxudeu' neda',  
 na' dxedú lazra'.  
 16 Dxéqueda' dxezrá'le'u neda'.  
 Da dxuchebu' neda' ba bsedú na lazra'.  
 17 Zaj naxechaj da caní neda' du zra.  
 Dxulusaca zi na neda' gáteteze na'.  
 18 Benu' belexebiga bi ljwezra' ca' naga zua',  
 na' tuze da naca chul-la dxedále na neda'.

## 89

1 Tu gúl-lazqueza' cheę xel-la' zri'i lazre' chiu', Xran.  
 Guzenda' tu cuen tu cuen zri'ine zre súantu' nacu' li lazre'.  
 2 Ne zda' tu súazqueze xel-la' zri'i lazre' chiu',  
 ne chadía chacanna zua xel-la li lazre' chiu',  
 cáteze zúaqueze xabáa.  
 3 Lue' gunnáu': "Bena' xel-la wezría nen bénnea' ba gucá'a.  
 Guchebe lazra' cheę David, wen zrin chia',  
 4 gunnia': Guna' tu cházqueze zri'ine zre su'.  
 Guna' xelenná be'ę tu chí'izqueze lu waláz chiu'."  
 5 Benne' zaj zra' xabáa dxelúe lá'ane' Lue',  
 ne cheę da zrente ca' da dxunu', Xran,  
 ne ne cheę xel-la' li lazre' chiu', naga zaj nazrague'.  
 6 Quebe nu zua xabáa, benne' naque' ca Lue', Xran.  
 Quebe nu zua benne' szrente, benne' naque' ca Lue'.  
 7 Benne' zaj zra' xabáa dxelape' Dios ba lá'ana,  
 na' xúgute' benne' ca' zaj nazraga cheę dxelezrebe' Le'.  
 8 Xran, nacu' Dios cheę benne' zante, benne' zaj zra' xabáa.  
 Quebe nu zua, benne' naque' ca Lue', Xran.  
 Nacu' Benne' wál-late, ne tu nácazquezu' li lazre'.  
 9 Xu'u lu na'u xeajxruza zren cheę nísadau'.  
 Gate dxelasa xeajxruza ca' Lue' dxebeque zriu' na.  
 10 Bchúchuju' benne' Egipto ca', na' belexegá'ane'  
 ca tu da gate.  
 Beşe dínnaju' benne' ca' dxeledábague' lue' nen na'u wál-late.  
 11 Chiu' Lue' naca xabáa, ne chiu' Lué'queze naca xęzr la xu.  
 Benu' xęzr la xu nigá, ne da ca' zaj nníta lawe na.  
 12 Benu' da de chalá'a naga za' be' zaga,  
 ne da de chalá'a naga dxedé gubizra beu' zaga ca'.  
 Xel-la dxelebé dxelul-la chiu' xi'a Tabor, ne xi'a Hermón.  
 13 Benne' wál-late nacu' Lue'.  
 Da zrente naca xel-la waca chiu', ne nagá'ana szren na.  
 14 Lu da xrlátaje, ne lu da li lazre' dxenná be'u.  
 Lu xel-la zri'i lazre', ne lu da li lazre' zaj zua ca da dxunu'.  
 15 Ba neza zrente naca na cheę benne' ca' dxelul-le'  
 da dxue lá'ana na Lue',  
 ne zaj zue' lu xel-la naxaní' chiu', Xran.  
 16 Ne chiu' Lue' dxelebéle'ene' du zra,  
 ne dxulucá'ana szrene' Lue' ca naca da xrlátaje chiu'.  
 17 Lué'queze nacu' xel-la wal-la cheę benne' ca',

ne xel-la xrtan chee'.  
Dxúnnadxu' netu' xel-la' waca lawe' da ca' dxéquenu' xrlátaje.

18 Xránadxu Dios dxucu'uje' dxi'u,  
na' Dios lá'azxa chee benne' Israel ca' naque'  
Wenná Bea cheedxu.

19 Nédxudautē bchálaju' lu da blé'enu' benne'  
wēn zrin chiu' ca', benne' zaj naque' li lazre', gunnáu':  
Ba gucá'a tu benne' wal-la ládujla bēnneache chia',  
ne ba bzua' le' gaque' wenná bea, ne dxácalēna' le'.

20 Ba gucá'a David, wēn zrin chia'.  
Bzúaqueza' le' gaque' wenná bea.

21 Neda' tu gácalezqueza' le'.  
Xel-la waca chia' gutípaqueza' lazre'.

22 Benne' ca' guledábaguē Le' quebe xelezéquene'  
bi xelunē' chee',  
na' benne' ca' dxelunē' da calēla quebe xelezéquene'  
xuluchúchujē' le'.

23 Guchúchujqueza' benne' dxeledábaguē Le', ne gucuasa'  
benne' ca' lau le'.

Guna' wē' benne' ca' dxelecuídene' le'.  
24 Tu zrí'izqueza' le', ne gaca' li lazre' nen le',  
na' ne chia' neda' gápadxē' xel-la' wal-la.

25 Guna' nna be'e dutē dxu'a nísadau' zren,  
ne dutē dxu'a xēgu Eufrates.

26 Le' xē'e neda': "Lue' nacu' Xra'.  
Nacu' Dios chia', dxucu'uju' neda', ne dxuseláu' neda'."

27 Neda' guzúa' le' ca zri'ina' blau,  
na' nna bé'ene' xúgutē benne' wenná bea zaj zre'e  
lu xezr la xu.

28 Tu chí'izqueze nuzúa' chee' xel-la' zri'i lazre' chia',  
na' ca naca xel-la' wezría chia' gaca líqueze na nen le'.

29 Guna' tu cházqueze zri'ine zre suē',  
na' xelenná be'e lu waláz chee' dxácatē ne zua xabáa.

30 Che xulusán zri'ine zre sua David da nadxixruj be'a,  
ne che quebe xelunē' ca da nuchi'a chee',

31 ne che xelecuasē' lu da dxenná be'a,  
ne che quebe xelunē' ca da dxapa' le',

32 na' gu'a le' zrise lawe' da dxeledábaguē' neda',  
ne quina' le' xide lawe' da dxelunē' da calēla.

33 Quebe gusana' ca nazrí'ida' David,  
ne quebe gusana' gaca' li lazre' nen le',

34 ne quebe gal-la lazra' xel-la' wezría da nuna',  
ne quebe guchá'a ca da ba gunnía'.

35 Tu lásaze bzetaj cuina' guchebe lazra',  
na' cabata' gun lazra' chee' David,

36 gunnia': Tu cházqueze zri'ine zre suē',  
na' xelenná be'e lu waláz chee' lawa' neda'  
dxácatē ne zua gubizra.

37 Xel-la' dxenná bea chee' tu sua chúchuzqueze na

ca zua beu' zran xabáa.  
 Tu sua chúchuzqueze na dxácatę ne zua xabáa.  
 38 Lue', Dios, guleaj xíchaju', ne bzu' chalá'ala bénnea' guca'u,  
 ne dxezrá'le'u le'.

39 Nuzú' chalá'ala xel-la' wezríá bēnlenu' David,  
 wēn zrin chiu',  
 ne nucá'ana dítaju' xel-la' dxenná bea cheę'.

40 Nuxrínaju' ze'e da naxechaj na xezre zréntau' cheę',  
 ne nuzríá xi'u ca naca lataj wal-la cheę' cheę' wedil-la.

41 Xúgute bēnneache, benne' dxeledaze ga na' dxelebane'  
 cheę' da zaj dę cheę',  
 na' benne' xezre walíZR cheę' dxelún le' cheę'.

42 Ba bēnu' bedxúaj chawe' benne' guledábage' Le',  
 na' dxelebéle'ēne'.

43 Bēn dítaju' da ca' dxuchínene' lu wedil-la,  
 ne quebe gúcalenu' le' lu wedil-la na'.

44 Ba gudú' ca naca da xrtante cheę',  
 ne nucá'ana dítaju' xel-la' dxenná bea cheę'.

45 Bēnu' naque' ca tu benne' gula gate ne zuę' iza cuide' cheę',  
 ne bsi'u le' xel-la' stu'.

46 Xrana' Dios, ¿bátaqueze quebe xennu' cheętu'?  
 ¿Tu chí'izqueze dxezrá'aquezu' netu'?

47 Bsa lazre' látęga sua' lu xezr la xu.  
 Látęga nunu' xel-la' nabán cheę xúgute bēnneache.

48 Quebe zua nu benne' gaca banę' tu chí'izqueze.  
 Xúgute' xelatię'.

Quebe zua nu benne' le' lu na' xel-la' gute.

49 Xran, ¿ba bsanu' David, ne québedxa nazrí'inu' le',  
 ca bzetaj cuinu' guchębe lazru' zrí'iquezenu' le'?

50 Gunná' xque, Xran, ca dxelún le' chia' neda',  
 wēn zrin chiu',  
 ne ca dxuchaga lawa' da dxelún lala benne' xúgute xezr la xu  
 chia' neda'.

51 Benne' ca' dxeledábage' lue' dxulucá'ana dítaję'  
 bēnnea' guca'u Lue', Xran.  
 Dxulucá'ana dítaję' le' gáteteze zéaję'.

52 Ba neza zrentę gaca Xránadxu Dios chadía chacanna.  
 Ca' naca na, ne ca' gaca na.

## 90

1 Xránantu' Dios, ba cua ba cua,  
 Lue' nacu' ca tu xu'u naga zra cháwentu'.

2 Nédxudautę ca za gunu' xi'a zri'a ca',  
 ne ca za sua xezr la xu, ne bēnneache,  
 na' nédxudautę, ne lu da za za' nácaquezu' Lue' Dios.

3 Dxu'u bēnneache xelexaque' da gulaque',  
 dxelexaque' xu xrte.

4 Chiu' Lue' chi gaxúa iza zaj naca na ca neaje, da ba gudé na,  
 ne ca tu chí'idau'ze chizrela.

5 Dzegú' bēnneache ca dxun guba'u,  
 da dxua na xúgute xizre laga ca'.

Zaj naque' ca tu bchigala da dxexenite na gate dxexebandxu.

<sup>6</sup> Zaj naque' ca tu xixre' da dxegula na che zilala.

Dxegula na, ne dxelá'te na xiaj,

na' xelate' zua gubizra dxelechugue' na, na' dxebizre na.

<sup>7</sup> Dxebía xi'ntu' lawe' da dxezra'u netu'.

Stébele'e zúantu' lawe' da dxezrá'le'u netu'.

<sup>8</sup> Dxenna'u ca da calela da nuntu'.

Dxulé'enu' lówela zria da nabáantu'.

<sup>9</sup> Dxuzáchiu' iza cheentu' lawe' da dxezra'u netu'.

Dxelexedú iza cheentu' ca tu be' da dxecá'antu'.

<sup>10</sup> Ca zaj naca zra naca bantu', zaj naca na ga xun chi iza,

na' che nácantu' benne' wal-la, waca bantu' du tápalalaj iza,

san ca zaj naca iza ca', dxedentu' xel-la' zi',

ne dxéquentu' zeđe.

Chadí dxeledé iza ca', na' xenítentu'.

<sup>11</sup> ¿Nuzra núnbea xanne' ca naca xel-la' dxezrá'a chiu'?

¿Nuzra núnbea ca naca xel-la' xichaj zra'a chiu'?

<sup>12</sup> Ble'e netu' ca láteze zaj naca zra cheentu'

chee gácantu' benne' dxeléajni'ing'.

<sup>13</sup> Xran, bexaca netu' tuze.

¿Bátadxa chenu'?

Bexache lazre' netu', wen zrin chiu'.

<sup>14</sup> Tu tu zila bzua xichaj lázrdauntu' xel-la' zri'i lazre' chiu',

na' dute xel-la' dxebe' tu gul-lazquezentu' chiu'

xúgute zra naca bantu'.

<sup>15</sup> Benna netu' zane' iza chee bentu' ca zaj naca iza

bsaca zi'u netu',

ne ca zaj naca iza guzúantu' lu da štebe.

<sup>16</sup> Be lataj netu', wen zrin chiu', le'entu' da zrente da dxunu',

ne xeledé'e zri'ine zre suantu' da xabáa chiu'.

<sup>17</sup> Xránantu' Dios, ben gaca cheentu' da chawe' chiu'.

Ben chepe ban ca naca zrin dxuntu'.

Awe', Xran, ben chepe ban ca naca zrin dxuntu'.

## 91

<sup>1</sup> Bénnea' dxuxrén lazre' Xránadxu Dios chee guxúe' le',

ne dxuzúe' Dios, Bénnea' nape' dute xel-la' waca,

chee gácalene' le',

<sup>2</sup> waca xe'e Dios: Nacu' Bénnea' dxebeza lazra',

ne Bénnea' dxucache chawe' neda'.

Nacu' Dios chia', na' dxuxrén lazra' Lue'.

<sup>3</sup> Dios gucache chawe' lue' lu xúgute da štebe da quebe zaj nalá',

ne lu xúgute xízrawe' da dxelute na bénneache.

<sup>4</sup> Gucache chawe' lue' ca dxun tu bedxuj dxézreba' biadu cheeba' zran

xrílaba', na' chu'u chawu' lu na' Le'.

Xel-la' li lazre' chee gácale na lue', ne gucache chawe na lue'.

<sup>5</sup> Quebe bi guchebe lue' chizrela, ne quebe bi da štebe te zra,

<sup>6</sup> ne quebe bi xízrawe' chee da chul-la,

ne quebe bi da calela ca' da dxelute na bénneache te zra.

<sup>7</sup> Welate chi gaxúa bénneache cuitu' lue',

ne gaxúa gaxúa bénneache gáguze naga zu',

san quebe bi sacu' lue'.

<sup>8</sup> Wanna'u, na' walé'enu'

ca ba xa' xeledé benne' ca' dxeluné' da calela.

<sup>9</sup> Nuzú' Xránadxu Dios ca Benne' dxebeza lazru', ne Dios, Bénnea' napé' duté xel-la' waca, chee gucache chawé' lue'.

<sup>10</sup> Chee le' na' quebe bi da calela gaca na chiu',

ne quebe bi xízrawe' chu'u na lizru'.

<sup>11</sup> Dios gusebague' gubáz chee xabáa chee' ca' chee xelácalene' lue', na' xuluxúe' lue' gáteteze chéaju'.

<sup>12</sup> Xeluxre' lue' lu ne'e chee quebe ga'a xiaj ni'u.

<sup>13</sup> Guléajquezu' bezre xixre' ca', ne bela' ca',

bezre xixre' schanní' ca', ne be snia ca'.

<sup>14</sup> Dxenná Dios: "Guselá' xúgute benne' ca' zaj

nazrí'ine' neda',

ne gucache chawa' benne' ca' dxelexechebe' naca' Xrane'.

<sup>15</sup> Gate xelenné' neda', na' xecheba' chee'.

Gate zaj xu'e lu da stebe, súalequeza' le'.

Guselá' le', ne guna' le' ba lá'ana.

<sup>16</sup> Guna' xelaca bane' zánete iza, ne guselá' le'."

## 92

<sup>1</sup> Chawe' naca dxue lá'anantu' Lue', Xrana' Dios, ne gúl-lantu' da dxucá'ana szren na Lue', Dios szrente.

<sup>2</sup> Chawe' naca dxuzé'entu' bènneache tu zra tu zra

ca dxexache lazru' netu',

na' dxela dxulé'entu' nacu' li lazre'.

<sup>3</sup> Dxúl-lantu' da caní, dxín'entu' da dxúl-lalentu'

da ze chi du chee na,

ne dxín'entu' da con zríadi'i na du da dxenné'le'e xrtandau'.

<sup>4</sup> Xrana' Dios, ne chee da dxunu' Lue', dxunu' dxebé'le'eda'.

Ca zaj naca da nun na'u zua' lu da ba neza.

<sup>5</sup> Da zrente zaj naca da nunu', Xrana' Dios.

Da zrén'le'e zaj naca da dxugú'u lazru' gunu'.

<sup>6</sup> Québequeze neze benne' lá'xdau zide',

ne quebe dxéajni'i benne' xala ca naca da nigá.

<sup>7</sup> Gate dxelegula benne' dxelebéaj xíchajé' Dios

ca dxegula xixre',

ne dxepe ban da dxelún benne' wen da zrinnaj,

naca na chee xelebía xi'e tu chí'izqueze.

<sup>8</sup> Lue', Xrana' Dios, tu nácazquezu' Dios szrente.

<sup>9</sup> Dxunna bea na ca gaca chee benne' dxedábage' Lue',

Xrana' Dios.

Dxunna bea na xelebía xi' benne' ca' dxeledábage' Lue'.

Xelase dinnaj xúgute benne' ca' dxeluné' da zrinnaj.

<sup>10</sup> Lue' dxunu' dxezrendxa xel-la' wal-la chia' ca naca

xel-la' wal-la chee bezre.

Dxugú'u da za xíchaja' da dxutipa na lazra'.

<sup>11</sup> Dخال-la' le'eda' xelezrá' zran ni'a benne'

dxeledábage' neda',

na' xenda' xelebezre xache' benne' ca' guledíl-lalene' neda',

benne' ca' dxeluné' da calela.

<sup>12</sup> Welexán benne' xrlátaje ca' ca dxun xaga zina'.

Xelegule' ca dxun xaga cedro lu xi'a Líbano.

<sup>13</sup> Zaj naque' ca tu xaga ze na lu xudau' chee Xránadxu Dios, da dxegúla'e na lu chale'aj chee xu'u lizre Dios cheedxu.

<sup>14</sup> Zaj naque' ca xaga ca' dxelebía da zixre chee na gate ba zaj nagula na, ne zaj naca na xaga xa'a wal-la.

<sup>15</sup> Benne' caní xuluzenne' bènneache naca li lazre' Xrana' Dios, Bénnea' dxuzé chúchue' neda', ne quebe bi zúale Le' da quebe naca xrlátaje.

## 93

<sup>1</sup> Xránadxu Dios naque' Wenná Bea, ne nace' zra lane' da zácale'e.

Nácu'e' zra lane', ne da nagú'u le'e naca na xel-la' waca zren. Nuzúa chúchue' xezr la xu nigá, na' quebe nu seque' gutá na.

<sup>2</sup> Lataj naga dxe'u dxenná be'u, Xran, zua chuchu na nédxudaute, na' Lue' zúaquezu' chadía chacanna.

<sup>3</sup> Dxelebezre xa'a xegu ca', Xran. Dxelebezre xa'a na, ne dxelenné na zizraj.

<sup>4</sup> Xránadxu, Bénnea' zu'e' xabáa nápadxe' xel-la' waca ca da zaj napa xegu ca' dxelebezre xa'a na, ne ca da zaj napa xeajxruza chee nísadau'.

<sup>5</sup> Chúchule'e' zaj naca da nadxixru be'u, Xran. Lá'azxa nácaqueze xudau' chiu' chadía chacánnaqueze.

## 94

<sup>1</sup> Xrana' Dios, dxebéaj lazru' bènneache. Lue', Bénnea' dxebéaj lazre' bènneache, ble'e cuinu'.

<sup>2</sup> Dxuchi'u Lue' chee da dxelún xúgut'e bènneache. Guxasa, bexizruj da dxal-la' xezezi' benne' dxulucá'ana szren cuine'.

<sup>3</sup> Xrana' Dios, ¿Bátadxaqueze xelún benne' wen da calela caní? ¿Bátadxaqueze xelebé benne' ca' dxelebéaj xíchaje' Dios?

<sup>4</sup> ¿Bátadxaqueze xulucá'ana szren cuine', ne xelenné' dizra' zi'? ¿Bátadxaqueze xulucá'ana szren cuina benne' ca' dxelebéaj xíchaje' Dios?

<sup>5</sup> Benne' caní dxuluxrínna'e' bènneache chiu' Lue', Xran, ne dxulusaca zi'e bènneache guca'u Lue'.

<sup>6</sup> Dxelúti'e' nu'ula tuze ca', ne benne' zitu' ca', ne dxelune' xelátebe' bidau' wezebe ca'.

<sup>7</sup> Dxelenné': "Quebe bi dxelé'e Dios, Xrana benne' ca'. Dios chee benne' Israel ca' quebe dxue lazre' chee da na'."

<sup>8</sup> Le chéajni'i, le'e, benne' lázxdau zide'. Le'e, benne' xala, ¿bátadxaqueze quebe chéajni'ile?

<sup>9</sup> Dios bene' nágadxu. ¿Québequeze dxenne' da dxennale? Dios bene' xiaj laudxu.

¿Québequeze dxelé'ene' da dxunle'?

<sup>10</sup> Diósqueze dxuzú'e' lu da ba xa' benne' xezr la xu ca'.

¿Québequeze til-le' le'e?

Diósqueze dxune' dxeléajni'i bénneache.

¿Québequeze gueque be'ene' da xu'u xichaj lázrdaule?

11 Xránadxu Dios nézquezne' da xu'u xichaj lázxdau  
xúgute bénneache.

Nézene' zaj naca na da dácheze.

12 Ba neza zrente naca na chee bénnea' dxuzéajni'inu', Xran,  
ne dxusédenu' le' ca naca da nadxixruj be'u,

13 chee cueza zri lazre' gate za zra dxaca da calela,  
ca zrin zra xelexú'u xedxu ba benne' dxelune' da zrinnaj.

14 Québequeze cueaj xichaj Xránadxu Dios bénneache chee',  
ne quebe gusán lazre' benne' ca' ba gucá'a Le'.

15 Naca xrlátaje ca xuluchí'e chee bénneache,  
na' xelúnqueze da xrlátaje xúgute benne' zaj naque' li lazre'.

16 ¿Núzraqueze gácale neda' tíl-lale dxu benne'  
wen da calela ca'?

¿Núzraqueze súale neda' tíl-lale dxu benne'  
dxelune' da zrinnaj?

17 Chela ca gúcale Xránadxu neda', bachelja xu'a xedxu ba.

18 Gate gunnía': Xran, ba zua cheajcházia',  
na' Lue', dute xel-la' zri'i lazre' chiu' gúcalenu' neda'.

19 Gate dxe'a gunne xue, ne zua' lu da stebe,  
Lué'queze dxexúe zrenu' neda', na' dxebéle'eda'.

20 Québequeze nacu' tuze benne' ca' dxuluchi'e chee  
bénneache da quebe naca xrlátaje,  
benne' ca' dxulucá'ane' ca xrlátaje da quebe naca na xrlátaje.

21 Benne' caní dxelune' tuze dizra' da xelune' chee  
benne' xrlátaje,  
na' dxelechugue' chee gate bénnea' quebe bi zria nabague'.

22 Xránadxu Dios naque' ca tu xu'u naga zua chawa'.  
Dios chia' naque' ca tu xiaj xre da dxuzé chacha na neda'.

23 Le' xexízruje' benne' ca' dxelune' da calela cáteze naca  
da zrinnaj da belune'.

Guzría xi'e benne' ca' lu da calela da dxelune'.

Xránadxu Dios guzría xi'e benne' ca' dxelune' da calela.

## 95

1 Le da, güe lá'anadxu Xránadxu Dios dute xel-la' dxebé.  
Dute xel-la' dxebé gúl-ladxu chee Bénnea' nuzúa chúchue'  
dxi'u naga ladxu.

2 Cheajdxu lau Le', ne xedxu Le': Xcalenu'.  
Dute xel-la' dxebé gúl-ladxu da güe lá'anadxu Le'.

3 Naca Xránadxu tu Dios szrente,  
ne naque' Wenná Bea szrente lawe' dios ca' chee bénneache.

4 Dxenná bé'ene' du gabí'i xezr la xu,  
naga naca situj, ne naga naca sibe chee xi'a ca'.

5 Dxenná bé'ene' nísadau' da núnqueze Le',  
ne cá'aqueze xezr la xu da bene'.

6 Le da, gucá'ana szrendxu Le', gátadxu sudxú'ala.  
Guzú zríbedxu lau Xránadxu, Bénnea' nune' dxi'u.



7 Le' naque' Dios cheedxu.

Nácadxu benne' ca' dxuxúequeze', ne nácadxu ca zríla'du ca' cheéqueze'.

8 Che dxenle chi'e na'a zra, quebe gun zide' lázrdaule ca belún xra xrtáule ca' naga nazí le na Meriba, ne ca belune' lu zra na' le'e xixre' lawe' lataj naga nazí le na Masah,

9 naga buluchá'a xra xrtáule neda', ne belune' neda' da stebe lácala belelé'ene' xúgute da bēna'.

10 Lawe' chua iza beditaj lazra' chee benne' ca', na' gunniá': Zaj naque' benne' dxelebéaj xíchaje' neda', ne quebe dxelune' ca da dxulé'eda' le'.

11 Chee le na', dute xel-la' dxezrá'a chia' bzetaj cuina' gunniá': Quebe xelexú'úqueze' naga xelexezi' lazre' nen neda'.

## 96

1 Le gul-la chee Xránadxu tu da cube.

Le gul-la chee Xránadxu, le'e zrале du gabí'i xezr la xu.

2 Le gul-la chee Xránadxu, ne le güe lá'ana La lá'azxa chi'e'. Tu zra tu zra le guzén ca naca xel-la' weselá da dxunne'.

3 Le guzén benne' xezr la xu ca' ca naca xel-la' szren chee', Ne benne' xúgute xezre ca zaj naca xel-la' waca zren nune'.

4 Szrentē naca Xránadxu, ne naca chee' güe lá'anale'edxu Le'. Naca chee' gápadxe' xel-la' ba lá'ana ca dios ca'

chee bēneache,

5 lawe' da zaj naca xúgute dios ca' bedáu' xiaj xaga ca'. Xránadxu Dios bene' xabáa na'.

6 Zúale Le' da xabáa, ne xel-la' szren.

Nazrate xudau' chee' xel-la' waca, ne da xrtante.

7 Le güe lá'ana Xránadxu, le'e zrале du gabí'i xezr la xu.

Le güe lá'ana xel-la' szren chee', ne xel-la' waca chee'.

8 Le gapa ba lá'ana Xránadxu ca da naca chee' si'e.

Le gua da gunézrujle, ne le da chale'aj chee' xudau' chee'.

9 Le gucá'ana szren Xránadxu lu xel-la' xrtante chee' da naca lá'azxa chee'.

Le zrebe lau Le', le'e zrале du gabí'i xezr la xu.

10 Le xe bēneache xezr la xu: Naca Xránadxu Wenná Bea.

Nuzúa chúchuē' xezr la xu nigá, na' quebe nu seque' gutá na.

Guchi'e chee' bēneache ca naca da xrlátaje.

11 Le be, le'e, xabáa, ne xezr la xu.

Le cuezre xa'a, le'e, nísadau', ne bea ca' zrале na'.

12 Le be, le'e, le'e xixre', ne bea ca' zrале na'.

Xaga ca' zaj dxe' xi'a ca' welunna schaga lu xel-la' dxebé

13 lau Xránadxu gate xide'.

Xide' guchi'e chee' bēneache zaj zre'e xezr la xu.

Nna bé'ene' bēneache du gabí'i xezr la xu.

Nna be'e Le' ca naca da xrlátaje, ne ca naca da li.

## 97

1 Naca Xránadxu Benne' Wenná Bea.

Le be, le'e zrале xezr la xu.

Le be, le'e zrale dxu'a nísadu ca'.

<sup>2</sup> Zaj naxechaj beuj, ne da chul-la Le'.

Ca naca da li, ne da xrlátaje dxenná be'e.

<sup>3</sup> Cuía lau xi' lau Le',

ne guzezxe na benne' guledábage' Le'.

<sup>4</sup> Ca naca xesa ca' chee' bulusení na xęzr la xu.

Dxelé'e xęzr la xu na, ne dxezrize na.

<sup>5</sup> Dxelexuna xi'a ca' ca da zixre chee' bęzudau' lau Xránadxu,

lau Xrana bęnneache zaj zre'e du gabí'i xęzr la xu.

<sup>6</sup> Dxulé'e xabáa ca naca da xrlátaje chee',

na' dxelelé'e bęnneache dutę xęzr la xu ca naca

xel-la' szren chee'.

<sup>7</sup> Dخال-la' xelexedué'e xúgute benne' ca' dxulucá'ana szrene'

bedáu' xiaj xaga ca',

benne' ca' dxulucá'ana szren cuine' ca zaj naca bedáu' xiaj xaga ca'.

Xúgute dios chee' bęnneache ca' dxal-la' xuluzú zribe na

lau Xránadxu Dios.

<sup>8</sup> Belén benne' zaj zre'e Sión, na' gulebene'.

Gulebé benne' zaj zre'e Judá, ne chee' da guchi'u Lue', Xran.

<sup>9</sup> Szrentę nacu' Lue', Xran, lawe' dutę xęzr la xu.

Szrendxa nacu' Lue' ca xúgute dios chee' bęnneache.

<sup>10</sup> Le'e, núlale nazrí'ile Xránadxu, le cuide da calęla.

Le' dxuxúe' bęnne'du zaj xu'e bęnneache chee'.

Dxuselé' le' lu na' benne' dxelebéaj xíchaje' Dios.

<sup>11</sup> Zualę da dxusení na benne' xrlátaje ca',

na' xel-la' dxebé zúalę na benne' li lazre' ca'.

<sup>12</sup> Le be, le'e, benne' xrlátaje, lau Xránadxu.

Le gusá lázrele ca da nun Dios lá'azxa, ne le güe lá'ana Le'.

## 98

<sup>1</sup> Le gul-la chee' Xránadxu tu da cube lawe' da nune' da ca'  
da dxebánedxu.

Ne chee' xel-la' wal-la chee', ne xel-la' waca lá'azxa chee'  
ba bđinne'.

<sup>2</sup> Ba nuzén Xránadxu ca dxune' dxuselé' bęnneache.

Ba bzenne' bęnneache xęzr la xu ca' ca naca da xrlátaje chee'.

<sup>3</sup> Ba nune' ca da guchebe lazre' chee' benne' Israel ca'

ca naca xel-la' li lazre' chee', ne xel-la' nazrí'i zren chee'.

Bęnneache du gabí'i xęzr la xu ba belelé'eng' ca naca da ben  
Dios cheędxu.

<sup>4</sup> Le gul-la lu xel-la' dxebé lau Xránadxu, le'e zrale du gabí'i  
xęzr la xu.

Le güe lá'ana Le' nen da gúl-lale, ne lu xel-la' dxebé cheęle  
le cuezre xa'a.

<sup>5</sup> Le gul-la da güe lá'anale Xránadxu.

Le gul-la nen da con zriadi'i na du ca' da quínnele.

<sup>6</sup> Le gucuezre luzu da ca' dxulucuezre', ne da dxutíl-lale ca',

ne le cuezre xa'a lu xel-la' dxebé lau Xránadxu,

Wenná Bea cheędxu.

<sup>7</sup> Le gun schaga nísadau', ne bea ca' zrale na'.

Le gul-la, le'e, xęzr la xu, ne le'e zrale na'.

<sup>8</sup> Le capa na'le, le'e xęgu ca'.

Le gul-la lu xel-la' dxebé, le'e, xi'a ca', lau Xránadxu  
 9 lawe' da xide' xedajnná bé'eng' xezr la xu nigá.  
 Nna bé'eng' benne' zaj zre'e du gabí'i xezr la xu lu da xrlátaje,  
 ne bénneache duté xezr la xu lu da naca li lazre'.

## 99

1 Naca Xránadxu Dios Benne' Wenná Bea,  
 na' dxelezrize xúgute bénneache lau Le'.  
 Dxe'e lataj blau chee' da zua na lávela querubín ca',  
 na' dxezrú' lu xezr la xu.  
 2 Szrenté naca Xránadxu lu xi'a Sión.  
 Naque' szren lawe' xúgute cue' xezr la xu ca'.  
 3 Le güe lá'ana La Xránadxu da naca na szren,  
 ne da dxal-la' zrédexu.  
 ¡Lá'azxa naca Le'!  
 4 Lue', Wenná Bea szrenté, nazrí'inu' da naca xrlátaje.  
 Nuzúa chachu' da naca li lazre'.  
 Ba nunu' da naca xrlátaje, ne da naca li lazre'  
 ládujla zri'ine zre sua Jacob.  
 5 Le gucá'ana szren Xránadxu Dios.  
 Le guzú zríbele lau Le' naga dxe'e.  
 ¡Lá'azxa naca Le'!  
 6 Moisés, ne Aarón gulaque' bxruze chee' ca'.  
 Samuel guque' tu benne' bchálajlene' Le'.  
 Gulenné' Xránadxu Dios, na' Le' bechebe'.  
 7 Tu lu beuj bza bchálajlene' benne' ca'.  
 Buluzúe' dizra' da gunná bé'eng',  
 ne da ca' bdxixruij be'ene' le'.

8 Xránantu' Dios, bechebu' lau benne' ca'.  
 Blé'enu' le' nacu' Dios, dxunité lau' chee' bénneache,  
 lácala dxudéu' le' xel-la' zi' ne chee' dul-la da zaj nabague'.  
 9 Le gucá'ana szren Xránadxu Dios.  
 Le guzú zríbele lau Le' lu xi'a lá'azxa chee',  
 lawe' da lá'azxa naca Xránadxu Dios.

## 100

1 ¡Le gul-la lau Xránadxu Dios, le'e zrale du gabí'i xezr la xu!  
 2 ¡Le gucá'ana szren Le' duté xel-la' dxebé!  
 ¡Le da lau Le', dxúl-lale duté xel-la' dxebé!  
 3 Cabata' gal-la lázrele naca Xránadxu Díósqueze.  
 Le' bene' dxi'u, na' nácadxu chee' Le'.  
 Nácadxu xezre chee', ne zríla'du chee'.  
 4 Le chu'u lataj naga zua xudau' chee', xeLe Le': Xcalenu',  
 ne chale'aj chee' na, güe lá'anale Le'.  
 Le xe Le': Xcalenu', ne le güe lá'ana Le'.  
 5 Chawe' naca Xránadxu, na' chadía chacanna zua  
 xel-la' zri'i lazre' chee'.  
 Xel-la' li lazre' chee' tu súazqueze na chadía chacanna.

## 101

1 Tu gúl-lazqueza' ca naca xel-la' zri'i lazre',

ne xel-la' li lazre' chiu'.  
 Tu gúl-lazqueza' chiu' Lue', Xrana' Dios.  
 2 Dxaca lazra' guna' da naca li lazre'.  
 ¿Bátala xidu' gácalenu' neda'?  
 Guna' da naca du lazre', ne cá'anqueze guna' caní  
 lu xu'u lizra'.  
 3 Québequeze cu'u lazra' guna' tu da zrinnaj.  
 Dxecuídeda' da dxelún benne' ca' dxelebéaj xíchajé' Dios.  
 Québequeze gu'a lataj xelebigue' naga zua' neda'.  
 4 Gucuasa' lu xichaj lázrdawa' da calęla,  
 ne quebe cu'u lazra' cheę da calęla.  
 5 Guzúa' chalá'ala benne' dxelenné' bagácheze  
 cheę benne' xula.  
 Quebe gu'a lataj súałę neda' tu benne' dxucá'ana szren cuine',  
 u naque' benne' wenná be'e.  
 6 Le'eda' chawe' benne' ca' zaj naque' li lazre' lau Dios,  
 cheę xezezré'ę lawa' neda'.  
 Tuze benne' ca' zaj naque' du lazre' xelunę' zrin chia'.  
 7 Quebe gu'a lataj benne' wecache lan chu'ę lizra'.  
 Quebe gu'a lataj tu benne' wen lazre' xegá'ane' naga zua'.  
 8 Tu zra tu zra guzría xi'a benne' ca' dxelunę' da calęla,  
 benne' ca' zaj zre'ę lu xęzr la xu chia'.  
 Gucuasa' xúgutę benne' ca' dxelunę' da zrinnaj lu xęzre cheę  
 Xránadxu Dios.

## 102

1 Xrana' Dios, bene da dxenaba' lau',  
 ne bze naga da dxuláwizra' Lue'.  
 2 Quebe gucache lau' lawa' neda', lawe' da lu da stębe zua'.  
 Bze naga neda', ne bechébeche chia' gate dxuláwizra' Lue'.  
 3 Naca xel-la' nabán chia' ca zren cheę xi' da dxexenítetę.  
 Xu'u da la lu zrita chia' ca tu xi' da dxálalę'ę na.  
 4 Dxedú lazra', ne naca lázrdawa' ca tu xixre' da dxecuade,  
 na' québedxa dxenná na gudagu xeta.  
 5 Lawe' da dxebezre wé'łę'a ba nazrítalę'a.  
 6 Naca' ca tu situgún dxedaba' tu lu xęzr la xu bizre,  
 ne ca tu bzriu zríaba' lawe' tu xu'u ze la'a.  
 7 Dxíchaja' bchigala, ne naca' ca tu bxinne zríaba' túzeba'  
 xrgu'u sibe.  
 8 Tu zra tu zra tu dxulucháchalęzqueze benne'  
 dxeledábague' neda'.  
 Benne' ca' dxelecuídene' neda' dxuluchínene' la' neda'  
 gate nu benne' dxelegú'ę de'.  
 9 Lu waláz cheę xeta dxawa' de,  
 na' nisa dxebezra' dxechixre na da dxé'aja'.  
 10 Caní dxaca chia' lawe' da dxezra'u neda',  
 ne dxecuídenu' neda'.  
 Guca'u neda', na' gudxú'unu' neda'.  
 11 Naca xel-la' nabán chia' ca tu zrul-la da dxedeze,  
 na' naca' ca tu xixre' da ba nabizre.  
 12 Lue', Xrana' Dios, tu chí'izqueze zu',  
 na' cheajlesá lazre' xúgutę cuen bėnneache Lau'.

13 Chasu', ne xexache lazru' benne' zaj zre'e xezre Sión,  
lawe' da ba bzrin zra xexache lazru' benne' ca'.

14 Netu', wen zrin chiu', nazri'intu' xiaj ca' chee xezre na'.  
Dxéquentu' zi' lawe' da ba nabía xi na.

15 Nadxa benne' xezr la xu ca' xelezrebe' lau Lue', Xran.  
Xelezrebe xúgute benne' wenná bea chee xezr la xu nigá  
da xabáa chiu',

16 gate ba bechisu' xezre Sión, Xran,  
ne xeelé'equezne' ca naca da xabáa chee na,

17 gate na' guzé nagu' da dxelenaba benne' ca' guleaj xíchaju',  
ne québedxa guzú' chalá'ala da dxelata' xuene' Lue'.

18 Xuaj da nigá chee xululaba benne' ca' za zá'aca,  
na' benne' ca' za xelalaj xelúe lá'ané' Xránadxu Dios.

19 Naga zua Xránadxu xabáa gunné'e.

Naga zué' xabáa blé'ene' lu xezr la xu nigá.

20 Dxelé'ene' benne' dxelebezre xache', benne' zaj xu'e  
lizre xia,

na' gusané' benne' ca' ba zaj nachugue' chee' xelatíe'.

21 Xuluzenne' benne' zaj zre'e xezre Sión ca szren naca

La Xránadxu Dios,  
chee xelúe lá'ané' Le' lu xezre Jerusalén,

22 gate xelezraga bénneache chee xúgute xezre, ne xúgute cue'  
xezr la xu

chee xulucá'ana szrene' Xránadxu Dios.

23 Xránadxu Dios bené' gute ni'a na'a gate ne naca' cuide'.

Xeláteze ca betíe' neda'.

24 Nadxa gunnía': Dios chia', quebe gutiu' neda',  
gate quebe ne guéxrua'.

Lue' tu chí'izqueze zu'.

25 Nédxudaute' Lue' bzu' xezr la xu nigá, na' nen na'u  
benu' xabáa.

26 Xelebía xi' da ca', san tu zúazquezu' Lue'.

Welexru xúgute da ca' ca tu ladxe'.

Ca dxuchadxu zra lánadxu tuzruj, ca' gucha'u da ca',  
na' xucúbeu' na.

27 Túzqueze ca nacu' Lue',  
ne québequeze te chiu' Lue'.

28 Zrí'inentu' netu', wen zrin chiu', xelezrabe' chawe',  
na' guzé' chúchuquezu' zri'ine zre súantu' lau Lue'.

## 103

1 Be lá'ana Xránadxu Dios, lue', bénne'du xu'a.

Be lá'ana Le' lá'azxa, duté da naca'.

2 Be lá'ana Xránadxu, lue', bénne'du xu'a,  
ne quebe gal-la lazru' ca da chawe' da nune' chiu'.

3 Dxunite lawé' chee xúgute dul-la nabaga'a.

Dxexune' neda' ca naca xúgute xízrawe' da xu'a.

4 Dxuxúe' neda' chee quebe gatia'.

Lu xel-la' zri'i lazre' chee', ne xel-la' dxexache lazre' chee'  
dxune' chawe' chia'.

5 Dxuzánle'e da chawe' da dxaca chia' chee xegá'ana'  
benne' cuide',

ne benne' wal-la ca dxaca chee tu bsia.

<sup>6</sup> Xránadxu Dios dxuchi'e chee da dxaca chee benne' dxeledé'e da ba xa',

ne dxucá'ana chawe' da dxaca chee'.

<sup>7</sup> Blé'ené' Moisés da ca' gulú'u lazre' guné',

ne be'e lataj benne' Israel ca' belelé'ené' da ca' bené'.

<sup>8</sup> Naca Xránadxu Benne' dxexache lazre', ne Benne' zri'i lazre'.

Quebe dxezrá'azie', san zrente naca xel-la' zri'i lazre' chee'.

<sup>9</sup> Quebe nníaqueze', ne quebe zrá'aqueze'.

<sup>10</sup> Quebe dxudé'e dxi'u lu da ba xa' ca naca zria

da nabágadxu,

ne quebe ne guzria xi'e dxi'u ne chee dul-la da nabágadxu.

<sup>11</sup> Ca sibe naca xabáa lawe' xezr la xu,

caníqueze naca xel-la' zri'i lazre' zren chee' nen benne' ca' dxelape' Le' ba lá'ana.

<sup>12</sup> Ca zitu' naca naga dxalaj gubizra, ne naga dxebía na,

caníqueze dxucuasé' zitu' dul-la da nabágadxu.

<sup>13</sup> Ca zri'i lazre' naca xra bidu ca' nen zri'inequeze',

caníqueze naca zri'i lazre' Xránadxu nen benne' ca'

dxelape' Le' ba lá'ana.

<sup>14</sup> Le' nézené' ca nácadxu lu bela' dxen cheedxu.

Dxajsá lazre' nácadxu xu xrté.

<sup>15</sup> Ca naca xel-la' nabán cheedxu, nácadxu ca tu xixre'.

Dxegúladxu ca tu xiaj xixre',

<sup>16</sup> na' dxedé be' dxua na le na, na' dxexenite na,

na' québedxa nu dxelé'equeze le na.

<sup>17</sup> Ca naca chee benne' ca' dxelape' ba lá'ana Xránadxu,

zúale xel-la' zri'i lazre' chee' benne' ca' chadía chacanna,

na' xel-la' xrlátaje chee' zúalequeze na xúguté zri'ine zre sua benne' ca',

<sup>18</sup> benne' ca' dxelúnqueze' ca naca xel-la' wezria nune',

ne benne' ca' dxeluné' ca zaj naca da nadxixruj be'e.

<sup>19</sup> Nuzúa Xránadxu lataj chee' xabáa naga dxe'e dxenná be'e.

Nácaqueze' Wenná Bea lawe' xúguté da zaj zua.

<sup>20</sup> Le güe lá'ana Xránadxu, le'e, gubáz chee xabáa ca',

Nácale benne' wal-la, ne benne' chúchulé'e,

na' dxunle ca dxenná Le', ne dxuzé nágale ca dxe'e le'e.

<sup>21</sup> Le güe lá'ana Xránadxu, le'e, dxenná beale xabáa.

Nácale wen zrin chee', ne dxunle ca dxaca lazre' Le'.

<sup>22</sup> Le güe lá'ana Xránadxu, xúgutele le'e ba nun Dios le'e,

zrale xúguté lataj naga dxenná bea Le'.

jBe lá'ana Xránadxu, lue', bénne'du xu'a!

## 104

<sup>1</sup> Be lá'ana Xránadxu Dios, lue', bénne'du xu'a.

jXrana' Dios, szrente nacu' Lue'!

Nacu' zra lanu' da xabáa, ne da xrtante.

<sup>2</sup> Dxugacu cuinu' xel-la' naxaní' ca zra lanu'.

Dxechilju' xabáa ca tu xu'u ladxe' chiu'.

<sup>3</sup> Nunu' lizru' lawe' nisa da ze ná'ala.

Dxuchínenu' beuj ca' ca tu da dxudé xua naga dxe'u Lue',

da dxedá na lu be'.

<sup>4</sup> Dxuchínenu' be' ca' ca gubáz chiu' ca',  
ne xesa ca' ca wēn zrin chiu' ca'.

<sup>5</sup> Bzua chuchu' xēzr la xu nigá lu lane na,  
na' quebe nu gaca gutá lē na.

<sup>6</sup> Bgacu' xēzr la xu nigá nen nísadau' ca dxun tu benne'  
dxacue' zra lanē',  
na' nisa na' bgacu na xi'a ca'.

<sup>7</sup> Gate gudil-lu' nisa na', na' bzrunnuj na.  
Bebiga na gate ben na chi'u zizraj.

<sup>8</sup> Nisa na' bgacu na xi'a ca' xajxedxé na dxu'a xēgu ca',  
lataj ca' ba nunu' chee nisa na'.

<sup>9</sup> Bzu' naga ze lau cheajsé na, naga québedxa gaca te na,  
chee québedxa gacu na xēzr la xu bizre na'.

<sup>10</sup> Dxunu' beaj ca' dxelalaj na dxu'a xégudu ca',  
ne xēgu ca' dxeledé na ládujla xi'a ca'.

<sup>11</sup> Lu xēgu ca' dxelé'aj bē xixre' ca' nisa,  
na' dxegúa na xel-la' dxelebile chee burro xixre' ca'.

<sup>12</sup> Lu xaga zaj nnita dxu'a xēgu ca' zaj zra' béadu ca'  
zaj zua xrila.

Dxelúl-laba' ládujla zruze na ca'.

<sup>13</sup> Zran xabáa dxezel-lu' xiuj da dxaca na lu xi'a ca',  
na' dxezrate xēzr la xu na' ca naca da xrlátaje da dxunu'.

<sup>14</sup> Dxusegulu' xixre' da dxelagu bezre ca',  
ne xixre'du ca' da dxelagu bēnneache,  
ne da ca' dxuluchine bēnneache dxelunē' xel-la' wagu,

<sup>15</sup> ne uva ca' da dxelunē' xrise uva wal-la da dxuzúa na  
bēnneache ca' xel-la' dxelebé,

ne olivo ca' da dxelunē' da za da dxelegú'e xíchaje',  
ne zrua' da dxelunē' xeta chee xelaca bane'.

<sup>16</sup> Xaga cedro ca' da zaj zua na xi'a Líbano dxelezíle'e na nisa xiuj.  
Zaj naca na xaga chee Xránadxu Dios, da ca' guza Le'.

<sup>17</sup> Lu xaga ca' dxuluzría bxínnedu ca' xrú'uneba',  
na' lu zruze na ca' zaj zua lizre bxuze' ca'.

<sup>18</sup> Zaj zua chivo xi'a ca' lu xi'a zri'a ca',  
na' lu bluaj ca' chee xi'a ca' zaj zua bzrizru' ca'.

<sup>19</sup> Bēnu' beu' da dxulé'e na tu beu' tu beu' chee iza,  
na' gubizra núnbea na gate dxal-la' cuía na.

<sup>20</sup> Bēnu' dxēla, na' gate bache nachul-la,  
na' dxeledxúaj bē dxēla ca'.

<sup>21</sup> Dxelebezre xa'a bezre xixre' ca', zaj nauba' bē xeláguba'.  
Dxelíajba' da nun Dios xeláguba'.

<sup>22</sup> Gate dxalaj gubizra, na' dxelexezrinba' lu bluaj cheeba',  
naga dxeláseba' te zra.

<sup>23</sup> Nadxa dxeledxúaj bēnneache dxelunē' zrin,  
na' dxelúnqueze' zrin ca' dxebía gubizra.

<sup>24</sup> Xran, da zantē zaj naca da bēnu'.  
Dutē xel-la' sina chiu' bēnu' da ca'.

Nazrate xēzr la xu nigá da ca' bēnu'.

<sup>25</sup> Na' zua nísadau', da zri'a, ne da laga,

naga zaj xu'u zánete bea ca', béadu ca', ne be zri'a ca'.  
<sup>26</sup> Lu nísadau' na' zaj zra' da dxeledá lawe' nísadau' ca'.  
 Zua be zri'a na' benu' Lue', nazi' laba' leviatán.  
<sup>27</sup> Xúgute bea ca' dxuluxrén lázreba' Lue',  
 chee gunézruju' da xeláguba' ca' zrin chee na.  
<sup>28</sup> Dxunézruju' leba', na' dxelecá'aba' na.  
 Dxunézruju' da dxeláguba', na' dxeléljeba'.  
<sup>29</sup> Gate quebe dxenná'u-ba', na' dxelegrébeba'.  
 Gate dxucuasú' be' dxelecá'aba', na' dxeláteba',  
 ne dxelexácaba' xu xrte.  
<sup>30</sup> Gate dxesel-lu' be' chiu', na' xelexaca banba'.  
 Dxunézruju' xel-la' nabán cube chee da ca' zaj zua  
 xezr la xu nigá.  
<sup>31</sup> ¡Chadía chacanna gaca ba Xránadxu Dios!  
 Dxezaca ba lazre' Xránadxu chee da ca' ba núnqueze'.  
<sup>32</sup> Dxenné'e xezr la xu nigá, na' dxezrú' na.  
 Dxuté' xi'a ca', na' dxeledxúaj na zren.  
<sup>33</sup> Gúl-laqueza' chee Xránadxu dxácaté na' naca bana'.  
 Xúgute zra zúaqueza' neda' gul-la' da güe lá'ana' Dios chia'.  
<sup>34</sup> Chawe' naca chia' da ca' dxulaba lazra' ca' naca chee',  
 na' dxebéle'eda' ne chee Xrana' Dios.  
<sup>35</sup> Welebía xi' benne' dul-la ca' zaj zre'e lu xezr la xu nigá,  
 Na' québedxa cha benne' ca' dxelebéaj xíchaje' Dios.

¡Be lá'ana Xránadxu Dios, lue', bènne' du xu'a!  
 ¡Le güe lá'ana Xránadxu!

## 105

<sup>1</sup> ¡Le güe lá'ana Xránadxu Dios!  
 ¡Le gucá'ana szren La Le'!  
 ¡Le guzén bènneache dute xezr la xu ca' naca da nune'!  
<sup>2</sup> ¡Le gul-la chee'!  
 ¡Le gul-la da güe lá'anale Le'!  
 ¡Le guchalaj chee da zrente ca' da nune'!  
<sup>3</sup> ¡Le be lu da naca chee'!

Xúgute benne' ca' dxelapa ba lá'ana Xránadxu dxal-la'  
 xelebéle'ene'.

<sup>4</sup> Le naba Xránadxu gácalene' le'e.  
 Tu zra tu zra le guxrén lazre' Xránadxu Dios.  
<sup>5-6</sup> Le'e, zri'ine zre sua Abraham, wen zrin chee Xránadxu.  
 Le'e, zri'ine zre sua Jacob, bènnea' guqué'e,  
 Le gusá lazre' xel-la' waca ca', ne da zrente ca' da bene',  
 ne ca' naca da bchi'e chee.  
<sup>7</sup> Le' naque' Xránadxu, ne Dios cheedxu.  
 Le' dxenná' bé'ene' bènneache zaj zre'e dute xezr la xu.  
<sup>8</sup> Lácala te chee chi gaxúa cuen bènneache,  
 québequeze gal-la lazre' da guchebe lazre'  
 lu xel-la' wezría chee',  
<sup>9</sup> xel-la' wezría na' bènlene' Abraham,  
 da na' bzetaj cuine' guchebe lazre' chee Isaac,



- 10 na' bzua chúchue' na ca tu da nadxixruj bea na,  
da gun Jacob,  
da gaca na tu xel-la' wezría da zeajlí canna nen  
benne' Israel ca',
- 11 da bene' gate na' gunné': "Chiu' lue' gunna' xezr la xu chee  
benne' Canaán ca',  
da gaca na tu da xudele lu na' zri'ine zre súale."
- 12 Gate na' bábaze zaj naque'  
gulezré'e lu xezr la xu nigá ca benne' zitu' ca',
- 13 ne guledé'e tu xezr la xu xetú xezr la xu, ne tu xezre  
xetú xezre.
- 14 Quebe be' Dios lataj nu benne' bi guné' chee  
bénneache chee',  
na' ne chee benne' ca' gudil-le' benne' wenná bea ca'.
- 15 Guzre' le': "Quebe bi gunle chee benne' ca' gucá'a,  
ne quebe gunle da calela chee benne' ca' dxuluchalaje'  
waláz chia'."
- 16 Bene' guta' tu gubina' lu xezr la xu na',  
na' gudúe' ca naca xeta xelawe'.
- 17 Gusel-le' tu benne' cuía lawe' lau benne' chie' ca',  
bénnea' naque' José, bi na' belutie'-be' chee gácabe'  
wen zrin chee benne' zitu'.
- 18 Buluzré'e ní'abe' lu xedxu chee cuaga da bexru na ní'abe',  
gate na' gulu'e-be' lizre xia lu xezr la xu Egipto,
- 19 ca bzrin bra guca li ca da gunná José dxal-la' gaca.  
Caní guca, zle'e xrtizra' Xránadxu cúnabe' da li.
- 20 Nadxa benne' wenná bea chee Egipto gusel-le'  
nu gusán José na'.  
Bénnea' dxenná bé'ene' zánete cue' xezr la xu bsané'-be'.
- 21 Bzue'-be' gácabe' xrana benne' zaj zre'e lizre',  
ne chee nna be'ebe' ca naca da xu'u lu ne'e,
- 22 chee til-labe' benne' szren ca' chee wenná bea cáteze  
dxaca lázrebe',  
ne chee guzéajni'ibe' benne' gula chee xezr la xu Egipto  
chee xelaque' benne' sina.
- 23 Gudé na' gulu'e benne' Israel ca' lu xezr la xu Egipto,  
na' guzúa Jacob lu xezr la xu chee zri'ine zre sua Cam.
- 24 Gulánle'e bénneache chee Xránadxu lu xezr la xu na',  
na' bene' gulaque' wál-ladxa ca benne' guledábague' Le'.
- 25 Bcha Dios lázxdau benne' Egipto ca' chee xelecuídené'  
bénneache chee',  
chee xelegú'u lazre' xelune' da calela chee wen zrin chee' ca'.
- 26 Nadxa gusel-le' Moisés, wen zrin chee', lau bénneache  
chee' ca', ne Aarón, bénnea' guqu'é'e.
- 27 Benne' caní be'e Dios lataj belune' xel-la' waca ca'  
chee xabáa,  
ne xel-la' waca zrente ca' lu xezr la xu chee zri'ine zre sua Cam.
- 28 Gusel-la Dios tu da chul-la da bgacu na duté xezr la xu na',  
san benne' Egipto ca' quebe buluzúe' dizra' da gunná be'ene' le'.
- 29 Nadxa bene' bexaca nisa xegu chee benne' ca' dxen,  
ne betie' xúgute' bela zaj zraba' xegu ca'.

30 Busezrate' xęzr la xu cheę' bluzru ca' ga bzrintę gulezraba' xu'u lizre benne' wenná bea cheę benne' Egipto ca'.  
 31 Gunnaze Dios, na' belelá' zánete be'a cheę bezre, ne be'a lase ca' dutę lu xęzr la xu cheę benne' ca'.  
 32 Waláz cheę nisa xiuj gusel-le' xiaj bezxe' lu xęzr la xu cheę benne' ca',  
 ne xi' da bzezxe na ca naca xęzr la xu cheę'.  
 33 Bzria xi'e ca zaj naca lba uva cheę', ne ca zaj naca xaga higo cheę', na' bzúxuje' ca zaj naca xaga zaj zę lu xęzr la xu cheę'.  
 34 Gunnaze', na' belelá' biche zu ca', da quebe nu seque' gulaba leba',  
 35 na' guláguba' dutę xixre' xa'a lu xęzr la xu cheę', ne guláguba' dutę lina da dxunna xęzr la xu na'.  
 36 Nadxa beție' xúgute bi biu nedxu cheę benne' Egipto ca', bi zaj nácabe' bi blau cheę'.  
 37 Bebéaje' bénneache cheę' na' zaj nu'e dumí plata, ne dumí oro,  
 na' quebe nu chilá' benne' ládujla le', benne' quebe chawe' zue'.  
 38 Gulebé benne' Egipto ca' gate beledxúaj benne' ca' ga na', lawe' da belezrébele'e le'.  
 39 Bzalaj Dios tu beuj da gulú'u na benne' ca' zrul-la, ne tu xi' da bsaní na cheę' chizrela.  
 40 Gulenabe' Dios, na' gusel-le' cheę' btau ca', ne bene' gulélajene' xeta da bdxuaj na xabáa.  
 41 Gule'e tu xiaj xre, na' gulaj nisa da gudé na lu xęzr la xu bizre na' ca tu xęgu nisa.  
 42 Caní ben Dios lawe' da bsa lazre' xrtizre' lá'azxa da guchebe lazre' gune' cheę Abraham, wen zrin cheę'.  
 43 Bebéaje' bénneache cheę' lu xęzr la xu Egipto, dxelebene'. Lu da ba neza gulezrá' benne' ca' guqué'e.  
 44 Bnézruje' benne' ca' xęzr la xu cheę benne' xezica ca', na' da belún benne' xęzr la xu ca' bexaca na cheę benne' cheę' ca',  
 45 cheę xulupá'ane' ca naca xrba cheę' ca', ne xelune' ca naca da gunná bé'ene' ca'.

¡Gaca ba lá'azxa Xránadxu Dios!

## 106

1 ¡Gaca ba lá'azxa Xránadxu Dios!

¡Le xę Xránadxu Dios: "Xcalenu!"

Caní dxal-la' gunle lawe' da naque' xrlátaje, ne lawe' da tu chí'izqueze dxexache lazre' dxi'u.

2 ¿Núzraqueze seque' gulé'ene' ca naca xel-la' waca zrente ca' da nune' Xránadxu?

¿Núzraqueze seque' güe lá'ane' Le' ca dxal-la' gundxu?

3 Ba neza zrente naca na cheę benne' ca' dxelune' da xrlátaje, benne' ca' tu dxelúnqueze' da naca xrlátaje.

4 Bsa lazre' chia', Xrana' Dios, gate dxunu' da chawe' cheę bénneache chiu'.

5 Gudá bselá neda' chee gaca le'eda' da chawe' gunu'  
chee benne' ca' ba guca'u Lue',  
ne chee beda' gate xelezrá' bènneache chiu' lu da ba neza,  
ne chee bélena' bènneache chiu'.

6 Ba bəntu' dul-la cáqueze belún xra xrtáuntu' ca'.  
Bəntu' da calela, ne bəntu' da zrinnaj.

7 Gate gulezrá' xra xrtáuntu' lu xezr la xu Egipto,  
quebe bululaba lazre' ca naca xel-la' waca ca' chee xabáa  
da bənu'.

Quebe xeajlesá lazre' ca bexache lázrele'u le'.  
Guledábague' Lue' dxu'a nísadau' da nazí le na Xrna.

8 Le' bselé' benne' ca' chee gaca ba lá'ana La Le',  
ne chee gulé'e lau ca naca xel-la' waca chee'.

9 Gudil-le' nísadau' Xrna na', na' bebizre na,  
na' guledé bènneache chee' laduj nísadau' na' lu xu bizre.

10 Bselé' benne' ca' lu na' benne' guledábague' Le',  
ne bebéaje' le' lu na' benne' ca' bulusaca zi'e le'.

11 Nadxa nísadau' na' bgacu na benne' ca' guledábague' le'.  
Netú benne' ca' quebe nu begá'ana.

12 Nadxa benne' chee' ca' guléajle'e dizra' chee',  
ne belul-le' da belúe lá'ane' Le'.

13 Chadí gulal-la lazre' ca da bene'.  
Quebe gulebeze' ca lá' dizra' chee' Dios.

14 Gulezá lazre' tu da calela le'e xixre' lawe' lataj na',  
na' buluché'e Dios le'e xixre' na'.

15 Gudé na' bnezruij Dios ca da gulenabe',  
san gusel-le' ládujla le' tu da gute na bal-la benne' ca'.

16 Gulaque' xa lazre' chee' Moisés naga zaj zre'e,  
ne chee' Aarón, Bénnea' gucá'a Xránadxu Dios.

17 Nadxa bzra xezr la xu na', ne gudebe na Datán,  
ne bgacu na benne' ca' zaj de'e Abiram.

18 Nadxa guxalaj xi' naga zaj nazraga benne' ca',  
na' bzezxe na benne' ca' dxelune' da calela.

19 Belune' tu bedáu' bezre da naca na oro lu xi'a Horeb,  
na' buluzú zribe' lau bedáu' oro na'.

20 Caní bulucá'ane' Dios, Benne' xabáa,  
chee xulucá'ana szrene' tu bedáu' bezre,  
da naca na ca tu bezre dxáguba' xixre'.

21 Gulal-la lazre' Dios, Bénnea' bselé' le',  
Bénnea' bene' xel-la' waca zrente' ca' lu xezr la xu Egipto,

22 ne bene' xel-la' waca ca' chee' xabáa lu xezr la xu  
chee' zri'ine zre sua Cam,

ne da ca' buluchebe na dxi'u dxu'a Nísadau' Xrna.  
23 Nadxa guca lazre' Dios guzría xi'e bènneache chee',  
san Moisés, bénnea' gucá'a Dios, bzua cuine' lau Dios  
chee' guzúa zrie' xel-la' dxezrá'a chee' Dios,  
na' bene' quebe guzría xi' Dios benne' ca'.

24 Buluzúe' chalá'ala xezr la xu xrtante' da gunezruij Dios le',  
ne quebe guléajle'e dizra' chee'.

25 Tu gulennézqueze' chee' Dios lu xu'u xide chee' ca',

ne quebe buluzé nague' da gunná Xránadxu Dios.

<sup>26</sup> Chee le na' bzetaj cuine' gunné' ca da gune' chee benne' ca'.

Gunné' gune' xelate benne' ca' le'e xixre' lawe' lataj na',

<sup>27</sup> ne gusi'e bénneache chee' lu xel-la' stu' lau benne'

xezr la xu ca',

ne guse dinnaje' le' ládujla benne' xezr la xu ca'.

<sup>28</sup> Nadxa belune' tuze benne' ca' dxulucá'ana szrene'

bedáu' xia nazi le na Baal-peor,

ne gulawe' béadu ca' belútie' lau dios gate ca'.

<sup>29</sup> Buluche'e Dios ne chee da belune',

na' guxalaj tu xízrawe' zren da bete na benne' zan benne' ca'.

<sup>30</sup> Nadxa guxasa Finees, ne betie' bénnea' bene' dul-la,

na' guleza xízrawe' zren na'.

<sup>31</sup> Da na' ben Finees guzi' Dios ca tu da dxucá'ana xrlátaje na

bénnea',

da gulé'e lawe na lau xúgute cuen bénneache ca'.

<sup>32</sup> Cá'anqueze buluché'e Dios dxu'a beaj nisa nazi le na

Meriba,

na' guca da calela chee Moisés ne chee benne' ca',

<sup>33</sup> lawe' da ne chee da belune' guca Moisés xichaj zra'a,

na' bexúbete Moisés da gunné'.

<sup>34</sup> Gate gulu'e lu xezr la xu nigá quebe buluzría xi'e

bénneache zaj nite' ga na'.

Caní guca, quebe belune' ca da guzre Dios le' xelune'.

<sup>35</sup> Gulaque' tuze benne' xezr la xu ca',

ne bulusédie' benne' Israel ca' xelune' ca dxelún benne' ca',

<sup>36</sup> na' bulucá'ana szrene' bedáu' xia xaga ca' chee benne' ca',

da na' ben na bxrinnaj Dios bénneache chee'.

<sup>37</sup> Belútie' zrí'ine' bi biu, ne bi nu'ula chee'

lau bedáu' chee da xriwe' ca',

<sup>38</sup> ne bululálaje' dxen chee bi dxé'enedu ca',

bi quebe zaj nunbe' dul-la,

da naca na dxen chee zrí'ine' bi biu, ne bi nu'ula,

bi ca' belútie' lau bedáu' xia xaga ca' chee bénneache Canaán,

na' guca sban xezr la xu na' ne chee dxen chee bidu ca'.

<sup>39</sup> Da ca' belune' ben na le' sban,

na' gulebéaj xíchaje' Dios lu da belune'.

<sup>40</sup> Chee le na' bzrá'alé'e Dios bénneache chee',

na' gucuídené' benne' ca' zaj naca chee'.

<sup>41</sup> Nadxa bdeé' benne' ca' lu na' benne' xezr la xu ca',

na' benne' ca' dxelecuide bénneache chee Dios

gulenná bé'ene' le'.

<sup>42</sup> Benne' ca' guledábage' le' bulusaca zi'e bénneache

chee Dios,

ne buluxrínnae' le' lu xel-la' dxenná bea chee'.

<sup>43</sup> Zánete lasa Dios bselé' bénneache chee' ca',

san guledábage' ca da bsízrene' le',

na' gulape' xel-la' stu' lawe' da belune' da calela.

<sup>44</sup> Lácala caní belune', gate gulezré'e lu da stebe,

Dios gunné'e ca da dxelezaque',

ne benne' ca da bululáwizre' Le',

45 na' xeajsá lazre' xel-la' wezría da bënleṅe' benne' ca',  
na' bexíaje lazre' chee xel-la' dxezrá'a chee'  
lawe' da nácaleṅe' benne' dxexache lazre'.

46 Cá'anqueze bene' belexache lazre' benne' ca'  
benne' ca' guleché'e le' ca benne' zaj nada'u.

47 ¡Bselá netu', Xránantu', nacu' Dios cheṅtu'!  
¡Becá'a netu' ládujla benne' xezr la xu ca',  
chee güe lá'anantu' Lau' lá'azxa,  
ne chee béleṅtu' lu da dxúl-lantu' chiu'!

48 Cháwedau' naca Xránadxu, Bénnea' naque' Dios chee  
benne' Israel ca' nédxudaute, ne chadía chacanna.  
Xúgute bënneache dxal-la' xelenné': ¡Ca'an gaca na!  
¡Gaca ba lá'azxa Xránadxu Dios!

## 107

1 ¡Le güe lá'ana Xránadxu, Benne' xrlátaje!

¡Chadía chacanna naque' Benne' zri'i lazre'!

2 Da nigá dxal-la' xelenná benne' ca' ba naxá'awe Xránadxu le',  
benne' ca' bselé' lu na' benne' guledábage' Le'.

3 Becheṅe' le' naga gulezrá' benne' xezr la xu zitu' ca',  
da zaj zua naga dxalaj gubizra, ne naga dxebía na,  
ne naga za' be' zaga, ne naga dxedé gubizra beu' zaga ca'.

4 Bal-la benne' ca' guledé' le'e xixre' naga quebe bi neza zua,  
ne quebe belezrelne' xezre naga xelezúe'.

5 Guledune', ne gulebílene',  
ne québedxa bi gulebeza lazre'.

6 Nadxa lu da dxelezaque' gulenné' Xránadxu,  
na' bselé' benne' ca' lu da dxelezaque'.

7 Na' buzreṅe' le' tu neza li,  
chee chjaque' tu xezre naga xelezúe'.

8 Dخال-la' xelúe' lá'ane' Xránadxu lawe' da bexache lazre'  
Xránadxu le',

ne lawe' da bene' chee' da ca' da dxebánedxu.

9 Dxuxí'aje' benne' ca' dxelebile lazre',  
ne dxugawé' benne' ca' dxeledún nen da chawe' chee'.

10 Bal-la benne' caní gulezúe' lu da chul-la, ne lu da stebe  
chee xel-la' gute.

Gulaque' ca benne' zaj xu'e lizre xia,  
ne zaj nadxéaj du xia, ne dxeledé'e ba xa',

11 lawe' da guledábage' xrtizra' Xránadxu,  
ne buluzúe' chalá'ala da bzéajni'i Dios zrenté le'.

12 Belexedú lazre' lu zrin zí'ite da dxelune'.  
Xeaeajcházie' zran xua da zaj nu'e,  
ne quebe nu chilá' gácalene' le'.

13 Nadxa lu da dxelezaque' gulenné' Xránadxu,  
na' bselé' benne' ca' lu da dxelezaque'.

14 Nadxa bebéaje' benne' ca' lu da chul-la  
ne lu da stebe chee xel-la' gute,  
ne bzúzruje' du xia ca' da zaj nadxéaje'.

15 Dخال-la' xelúe lá'ane' Xránadxu lawe' da bexache lazre' le',  
ne lawe' da bene' chee' da ca' da dxebánedxu.

16 Bchínnaje' dxa xu'u ca' zaj naca na xia gache,  
ne bzúzruje' xia ca' da zaj naxechaj na benne' ca'.

17 Bal-la benne' ca' gulaque' benne' xala,  
ne guledé' xel-la' zi' ne chee' dul-la da zaj nabague',  
ne ne chee' da zrinnaj ca' da belune'.

18 Belexegútene' da dxelé'aj dxelawe',  
na' xáteze ca gulátie'.

19 Nadxa lu da dxelezaque' gulenné' Xránadxu,  
na' bselé' benne' ca' lu da dxelezaque'.

20 Gusel-le' dizra' chee' chee' benne' ca',  
na' bexune' le', ne bselé' le' lu xel-la' gute.

21 Dخال-la' xelúe lá'ane' Xránadxu lawe' da bexache lazre' le',  
ne lawe' da bene' chee' da ca' da dxebánedxu.

22 Dخال-la' xelé'ē Lē': Xcalenu'.

Dخال-la' xelú'ē da xulunézruje' Lē',  
na' lu xel-la' dxelebé chee' dxal-la' xelúl-le',  
ne xuluzenne' bēnneache ca zaj naca da nune'.

23 Bal-la benne' ca' guledé' lu nísadau'  
lu da zren ca' da dxedá lawe' nísadau'.  
Belezi'e' dumí zren lu zrin dxelune' lu nísadau'.

24 Belelé'ene' ca naca da ca' dxun Xránadxu,  
da ca' dxune' lu nísadau' da zaj naca na da dxebánedxu.

25 Gunnéze', na' guzú lau dxaca be' bdunu',  
na' gulasa xeajxruza zren lu nísadau'.

26 Belegüén da dxedá lawe' nísadau' ca' ca lu xi'a zri'a  
da naca na nísadau',

na' belexexetaj na lu da situj lawe' nísadau' na'.

27 Gulechégüē', ne xeajleté' ni xeajleté' na' ca  
benne' dxelezuzre,

na' guca dácheze ca da zaj nusédie'.

28 Nadxa lu da dxelezaque' gulenné' Xránadxu,  
na' bselé' benne' ca' lu da dxelezaque'.

29 Bzua zriē' be' bdunu' na' da dxaca na,  
ne gulezúa zri xeajxruza chee' nísadau' na'.

30 Gulebéle'ene' lawe' da zaj zua zri xeajxruza ca',  
na' guché'ē Díos le' cháwedau' naga zjaque'.

31 Dخال-la' xelúe lá'ane' Xránadxu lawe' da bexache lazre' le',  
ne lawe' da bene' chee' da ca' da dxebánedxu.

32 Dخال-la' xuluzenne' ca naca xel-la' szren chee' naga  
zaj nazraga bēnneache chee',

ne xelúe lá'ane' Lē' naga zaj nazraga benne' gula ca', benne'  
dxelenná be'ē.

33 Bēn Xránadxu gulebizre xegu nisa ca',  
ne busú'aje' beaj nisa ca'.

34 Xu xa'a bexune' na xu bizre,  
ne chee' da calela da belún benne' ca' zaj zre'ē na'.

35 Naga naca xu bizre bexune' na xu nisa,

na' xu xiaj bexunę' na naga dxalaj nisa.

<sup>36</sup> Bzreę' ga na' benne' ca' benne' dxeledún,  
na' belunę' tu xęzre naga xelexúę'.

<sup>37</sup> Gulazeę' xęzr la xu na', na' belexazeę' lba uva ca',  
na' belexezi'leę' lina cheę na.

<sup>38</sup> Bęnę' da chawe' cheę benne' ca', na' gulánleę'  
bidu cheę' ca',

ne quebe bęę' lataj xelexe ca zaj naca bę xixre' cheę' ca'.

<sup>39</sup> Gate buludé benne' dxelenná bea benne' ca' lu xel-la' zi',  
ne bulusaca zi'e le',

ne gulenná bé'edxenę' le', ne belunę' le' da caleļa,  
ne buludęę' le' lu da ba xa',

<sup>40</sup> bca'ana ditaj Dios benne' xíchaje ca',

ne bęnę' guledęę' le'ę xixre' lawe' lataj naga quebe bi neza de.

<sup>41</sup> Bselé' benne' xache' ca' lu da zi' da xa' da dxeledéę',

ne bzánleę' zri'ine benne' ca' ca dxelán zřila' ca'.

<sup>42</sup> Gate dxelexé'e benne' xrlátaje ca' da caní, na' dxelexéleę'ęęę',  
na' benne' ca' dxelunę' da caleļa quebe bi gaca xelennę'.

<sup>43</sup> Benne' ca' zaj naqueę' sina dxal-la' xulaba lazreę'  
ca zaj naca da caní,

ne dxal-la' xelexúnbe'ę ca naca xel-la' zri'i lazre'  
cheę Xránadxu.

## 108

<sup>1</sup> Ba zúateęqueze lázrdawa', Dios,

cheę gúl-laqueza' da güe lá'ana' Lue'.

Da nigá dxugú'u na neda' lu da ba neza.

<sup>2</sup> Bebán lazre', bęnne'du xu'a, na' le xebán lázrele,

le'e dxínnele da dxúl-lalenle, ne da con zříadi'i na du.

Che zílala cheajsá'queza'.

<sup>3</sup> Güe lá'anaqueza' Lue' ládujla bęnneache chiu', Xran.

Gúl-laqueza' chiu' lau benne' dutę xęzr la xu,

<sup>4</sup> lawe' da naca xel-la' dxexache lazre' chiu' zrendxa ca xabáa,  
na' da li chiu' naca na zrendxa ca beuj bza ca'.

<sup>5</sup> Xegá'ana szręnquezu' xabáa, Dios.

Xel-la' szren chiu' sua na lawe' dutę xęzr la xu.

<sup>6</sup> Cheę xelexé' benne' ca' nazrí'iqueznu' Lue',

bselá le' dutę xel-la' waca chiu', ne bene chia'.

<sup>7</sup> Lu lataj lá'azxa cheę' gunná Dios: "Wabéquezda' neda'.

Gunna' late weaj cheęle xęzr la xu cheę benne' Siquem ca',  
ne gudixra' cheęle xęzr la xu de cuite xęgu Sucot.

<sup>8</sup> Chia' naca xęzr la xu Galaad,

ne chia' naca xęzr la xu cheę zri'ine zre sua Manasés.

Xęzr la xu cheę zri'ine zre sua Efraín naca na ca tu

da napa chi'i na xíchaja'.

Xęzr la xu cheę zri'ine zre sua Judá naca na naga dxenná be'a.

<sup>9</sup> Xęzr la xu cheę benne' Moab naca na ca tu zřiga'

da xuzru nisa guná'a,

na' lu xęzr la xu cheę benne' Edom chu'una' zřela' gula.

Si'a ba neza xezr la xu chee benne' Filistea."

<sup>10</sup> ¿Nuzra che' neda' chee chu'a xezre da naxechaj ze'e sibe?

¿Nuzra che' neda' chee guzétaja' benne' Edom ca'?

<sup>11</sup> ¿Quegá Lue' na' che'u neda', Dios.

Nacu' Bénnea' bzua netu' chalá'ala,

ne quebe guxéajlenu' benne' cheentu' ca', benne' dxjaque'  
wedil-la, Dios?

<sup>12</sup> Gúcale netu' chee séquentu' tíl-lalentu' benne' ca'  
dxeledíl-lalene' netu',

lawe' da naca dácheze xelácale bénneache netu'.

<sup>13</sup> Tu zren nen Dios gundxu tu da zrente,  
na' Le' gulague' benne' ca' dxeledil-lalene' dxi'u.

## 109

<sup>1</sup> ¡Dios, dxue lá'ana' Lue'!

Quebe xegá'anu' zrize

<sup>2</sup> lawe' da dxelenná benne' ca' dxelune' da calela,  
ne benne' wen lazre' ca' chia' neda'.

Dxelenné' chia' da naca da wen lazre'.

<sup>3</sup> Lu xel-la' dxelecuide chee' zaj naxéchajé' neda',  
ne dxelenné' chia'.

Dxeledíl-lalene' neda', ne quebe bi nuna' chee benne' ca'.

<sup>4</sup> Lácala bzri'ida' benne' ca', na'a dxeledábague' neda',  
san neda' dxenaba' gaca da chawe' chee benne' ca'.

<sup>5</sup> Lácala beña' neda' da chawe' chee benne' ca', dxelune' chia'  
da calela,

ne lácala bzri'ida' le', dxelecuídené' neda'.

<sup>6</sup> Bzua tu benne' wen da zrinnaj chee guchi'e chee  
benne' wen da calela ca',

ne ben sua tu benne' nnie' chee benne' ca',  
benne' guzúe' ca' naca da calela belún benne' ca'.

<sup>7</sup> Gate na' zri'a chee', ben gaca bea na zaj nabague' zria.  
Ble'e da xelenabe' lau' ca' tu dul-la da dxelune'.

<sup>8</sup> Bzache zra xelaca ban benne' ca',  
ne ben xelú'u xezica' benne' waláz chee'.

<sup>9</sup> Bca'ana zrí'ine' ca' bidau' wezebe,  
ne xelaca zru'ule' nu'ula tuze ca'.

<sup>10</sup> Ben xelaca zrí'ine' bi dxeledaze chee xelenábabe' guna',  
ne ben xelazrébe' xeta xelágube' zitu' naga zaj zua lízrebe'  
da zaj naxinnaj.

<sup>11</sup> Ben xelú'u da ca' zaj nape' lu na' benne' ca'  
bulusané' le' dumí.

Ben xelexúa benne' zitu' ca' da ca' zaj nune'.

<sup>12</sup> Ben quebe nu zrel-la benne' xexache lazre' le',  
ne quebe nu benne' zrel-la xexache lazre' bidau' wezebe  
chee' ca'.

<sup>13</sup> Ben xelebía xi' zri'ine zre sua benne' ca',  
ne québedxa nu cha' zri'ine zre sue',  
si' le' ca' zaj nazi'i la benne' ca'.

<sup>14</sup> Bsa lazre' ca' da calela da belún xra xrtawe', Xran,  
ne quebe xusulu' dul-la da gulún xrne'e ca'.



15 Tu chí'izqueze bsa lazre' ca da caleła da zaj nune'.

Québedxa cheajsá lazru' benne' ca'

16 lawe' da quebe xeleajsá lazre' xelexache lazre' le sa' ljwezre' ca',  
san bulusaca zi'e benne' baxache' ca', benne' dxelexázejne',  
ne benne' dxexruj lazre' ca', na' belúti'e bènne'du ca'.

17 Beledánene' da dxugú'u na de', na' da caníze guca na chee'.  
Quebe gulaca lazre' xelenabe' gaca chawe' chee bènneache,  
na' da chawe' bebiga na naga zaj zue'.

18 De' da gulegú'e bènneache guca na ca tu da gulacu cuine',  
na' guxú'u na le'e ca nisa gulé'aje',  
ne guxú'u na zrita chee' ca da za.

19 Tu chí'izqueze ben gaca na chee' ca xicha da dxelácue',  
ne gaca na ca tu xpádxue' dxuluchela le'e.

20 Gaca da nigá da quizruj Xránadxu Dios benne' ca'  
dxelenné' caleła chia',  
ne da quízruje' benne' ca' dxelune' da caleła,  
ne dxelenné' caleła chee bènne'du xu'a.

21 Xrana' Dios, ben culuén chia' chee xegá'ana'  
xrlátaje lau'.

Bselá neda' lawe' da dxexache lázrele'u bènneache,  
22 ne lawe' da dzezaca zi'a, ne dxexázejeda',  
ne dxeque zi' lázrdawa'.

23 Dxedé chia' ca dxedé chee tu zrul-la gate dxebía gubizra.  
Dxaca chia' ca dxaca chee biche xuaj gate dxua be' leba'.

24 Dxelate zriba' lawe' da dxuna' gubasa,  
ne nazrítale'a lawe' da quebe bi dxawa'.

25 Naca' ca tu da dxulucá'ana dítajé'.  
Dxelenné'e neda', ne dxelún le' chia', dxulutá xíchaje'.

26 Gúcale neda', Xrana' Dios.

Bselá neda' lawe' da dxexache lazru' bènneache.  
27 Ben xeleque be'ene' Lué'queze dxácalenu' neda'.

Lué'queze, Xrana' Dios, ba nunu' da nigá.

28 Dxelegu'e neda' de', san ben Lue' gaca chawe' chia'.  
Guxasa, ben xelexedué'e benne' ca' dxeledábage' neda',  
san ben beda' neda'.

29 Ben xelezrá' lu xel-la' stu' benne' ca' dxelenné'  
da caleła chia'.

Ben xeleque zréajene' tu chí'izqueze.

30 Du lazra' gúl-laqueza' da güe lá'anale'a Xránadxu Dios.  
Ládujla benne' zan ca' güe lá'ana' Le'.

31 Le' zue' cuita xabela chee benne' xache' ca'  
chee guselé' bènne'du zaj xu'e lu na' benne' ca'  
dxuluchi'e chee'.

## 110

1 Xránadxu Dios guzre' Xrana': "Gudxé'e chalá'a xabela chia'  
cadxa zrin zra guna' ga benne' ca' dxeledábage' lue'  
xuluzúa zribe' lau'."

2 Naga zu' Sión, gun Xránadxu zriluj xel-la' dxenná bea chiu'.  
Dxenné': "Gunná be'e benne' ca' dxeledábage' lue'.

<sup>3</sup> Lu zra gate tíl-lalenu' benne' ca' dxeledábage' lue',  
 da lázrequeze benne' chiu' ca' chjaque' wedíl-la.  
 Ca dxun xrlé'ela chee bálala, dxacu na xi'a lá'azxa,  
 caníqueze xelaca benne' cuide' chiu' ca',  
 xeledé'ē naga zu' xelácalene' lue'."

<sup>4</sup> Guchēbe lazre' Xránadxu, ne quebe gunítie' xrtizre',  
 gunné': "Chadíá chacanna nacu' bxruze ca guca bxruze  
 Melquisedec."

<sup>5</sup> Zua Xránadxu chalá'a xabela chiu'.

Gate zre'e, na' guzría xi'e benne' wenná bea ca'.

<sup>6</sup> Guchi'e chee benne' dutē xēzr la xu, na' gutiē' zánete  
 benne' xēzr la xu ca'.

Guzría xi'e benne' dxelenná be'e dutē xēzr la xu.

<sup>7</sup> Xi'aj benne' wenná bea nigá nisa xégudu zua na dxu'a neza,  
 na' xexape' xel-la' wal-la chee'.

## 111

<sup>1</sup> Dutē lázrdawa' güe lá'ana' Xránadxu Dios tu zren nen  
 benne' xrlátaje ca', benne' zaj nazrague' lau Le'.

<sup>2</sup> Da zrente zaj naca da ca' nun Xránadxu Dios,  
 na' xúgute benne' ca' dxelezaca ba lázrele'ē da nune',  
 ne dxelaca lazre' xeledé'ē' na.

<sup>3</sup> Da xabáa, ne da xrtante zaj naca da dxune' Le',  
 ne tu chí'izqueze zua da xrlátaje chee'.

<sup>4</sup> Dxune' dxeajsá lázredxu ca naca xel-la' waca zrente  
 da dxune'.

Xránadxu Dios naque' zren lazre', ne dxexache lazre'  
 bēneache.

<sup>5</sup> Dxugawe' benne' ca' dxelezrebe' Le'.

Tu chí'izqueze dxeajsá lazre' xel-la' wezría da nune'.

<sup>6</sup> Blé'ē' bēneache chee' ca' ca naca xel-la' waca chee'  
 da ca' bē'ē'.

Dxunézruje' benne' chee' ca' da zaj napa benne' xezica  
 xēzr la xu ca'.

<sup>7</sup> Li lazre', ne xrlátaje zaj naca da ca' dxune'.

Li lazre' zaj naca xúgute da bdxixruj be'e.

<sup>8</sup> Tu chí'izqueze, ne chadíá chacanna zaj zua da ca' bdxíruje'.

Lu da li, ne lu da li lazre' nune' ca zaj naca na.

<sup>9</sup> Gusel-ē' tu benne' weselá chee guselé' bēneache chee'.

Tu chí'izqueze nadxixruj be'e xel-la' wezría chee'.

Lá'azxa, ne tu da zrēbedxu naca La Le'.

<sup>10</sup> Chee su laudxu gácadxu sina, dxun na ba xen zrēbedxu  
 Xránadxu Dios.

Dxeléajni'i xanne' xúgute benne' ca' dxelune' ca zaj naca  
 da nadxíruje'.

Tu chí'izqueze dxal-la' güe lá'anadxu Le'.

## 112

<sup>1</sup> Ba neza zrente naca na chee bēne' dxezrebe'  
 Xránadxu Dios,

ne ca zaj naca da bdxixruj be'e dxezaca ba lázrele'ē'ē'.

<sup>2</sup> Zri'ine zre sua bēne' xelape' xel-la' dxenná bea

lu xęzr la xu,  
na' gaca chawe' cheę benne' xrlátaje ca'.  
<sup>3</sup> Da zan da de, ne xel-la' gunní'a zaj zra na xu'u lizre',  
ne tu chí'izqueze zua da xrlátaje da dxun bénnea'.  
<sup>4</sup> Dxusaní' tu xi' lu da chul-la naga zaj zra' benne' li lazre' ca',  
benne' ca' zaj naque' zren lazre', ne xrlátaje,  
ne dxexache lazre' bénneache.  
<sup>5</sup> Tu benne' xrlátaje dxexache lazre' bénneache,  
ne dxusanę' le' dumi.  
Lu da xrlátaje dxenná bé'ene' da zaj xu'u lu ne'e.  
<sup>6</sup> Cheę le' na' quebe bi gutá na le' lu lataj naga zue',  
na' tu chí'izqueze xeajlesá lazre' bénneache ca'.  
<sup>7</sup> Quebe zrebe' gate xenne' dxaca da caleļa cheę  
da xu'u lu ne'e.  
Ze chacha lázrdawe' lawe' da dxuxrén lazre' Xránadxu Dios.  
<sup>8</sup> Zua chawe' lázrdawe', ne quebe bi dxezrebe',  
ca zrindxa zra lé'ene' gaca cheę benne' ca' guledábage' le'  
ca da dxezá lazre'.  
<sup>9</sup> Dxisie' da de cheę', ne dxunézruje' da gácale  
benne' xache' ca',  
ne tu chí'izqueze zua da xrlátaje da dxunę'.  
Lu da xabáa xegá'ana szren xel-la' dxenná bea cheę'.  
<sup>10</sup> Walé'e benne' wen da caleļa da nigá, na' gueque zréajene'.  
Gágu xa'ate lazre', ne cue'e gunne xue.  
Xelenite da ca' dxelezá lazre' benne' ca' dxelunę' da caleļa.

## 113

<sup>1</sup> ¡Le'e, wen zrin cheę Xránadxu Dios, le güe lá'ana Le'!  
¡Le güe lá'ana La Xránadxu Dios!  
<sup>2</sup> ¡Gaca ba lá'azxa La Xránadxu Dios,  
na'a zra, ne chadía chacanna!  
<sup>3</sup> ¡Naga dxalaj gubizra ca zrintę naga dxebía na  
gaca ba lá'azxa La Xránadxu Dios!  
<sup>4</sup> ¡Szrentę nagá'ana Xránadxu Dios lawe' dutę xęzr la xu,  
na' lówela xabáa dxe' da xabáa cheę'!  
<sup>5</sup> ¿Núzraqueze naca ca naca Xránadxu Dios,  
Bénnea' dxe'e xabáa na'la?  
<sup>6</sup> Dios dxun cuine' dxexruj lazre' cheę lé'ene'  
da de zran xabáa, ne lu xęzr la xu.  
<sup>7</sup> Dios dxechise' benne' xache' lu xu xrte,  
ne dxebáje' benne' baxache' lu da dxezaca zi'e,  
<sup>8</sup> na' dxunę' dxelebé' benne' caní ládujla benne'  
dxelenná be'e,  
ládujla benne' ca' dxelenná bé'ene' bénneache cheę'.  
<sup>9</sup> Dxunę' zua nu'ula zue' tuze ládujla zrí'inequeze' ca',  
na' dxebé nu'ula nigá lawe' da naque' xrna bi cheęqueze'.

¡Gaca ba lá'azxa Xránadxu Dios!

## 114

<sup>1</sup> Gate beledxúaj benne' Israel ca' lu xęzr la xu Egipto,  
beledxúaj zri'ine zre sua Jacob lu xęzr la xu cheę

benne' zitu' ca',  
 2 na' gulaca zri'ine zre sua Judá ca tu xu'u lizre Dios,  
 gulaca benne' Israel ca' naga dxenná be'e.  
 3 Ble'e Nísadau' Xrna da nigá, na' bzrunnuj na,  
 na' gugá xegu Jordán.  
 4 Gulexrite xi'a zri'a ca' ca dxelexrite chivo ca',  
 na' gulexrite xí'adu ca' ca dxelexrite chíbudu ca'.  
 5 ¿Bizra guca chiu', nísadau', lawe' da ben na bzrúnnuju'?  
 ¿Bizra guca chiu', xegu Jordán, lawe' da ben na gugú'?  
 6 Le'e, xi'a zri'a ca', ¿Bizr chee na' guxrítele ca dxelexrite  
 chivo ca'?  
 Le'e, xí'adu ca', ¿Bizr chee na' guxrítele ca dxelexrite  
 chíbudu ca'?  
 7 Dxezrize xezr la xu lau Xránadxu Dios, lau Dios chee Jacob.  
 8 Dios nigá bene' bexaca xiaj xre' tu beaj nisa,  
 na' bexaca xiaj tu ga dxalaj nisa.

## 115

1 Quegá netu', Xran.  
 Quegá cuintu', san Lué' queze dxal-la' xucá'ana szrentu'  
 ne chee xel-la' zri'i lazre' chiu', ne xel-la' li lazre' chiu'.  
 2 ¿Bizr chee na' dxun na ba xen xuluchébe bèneache netu':  
 "Gazra zua Dios chee?"

3 Dios cheedxu zue' xabáa.  
 Dxuné' ca da dxaca lázrequeze'.  
 4 Dios ca' chee benne' ca' zaj naca na bedáu' plata,  
 ne bedáu' oro, da nun ni'a na' bèneache.  
 5 Zaj zua dxu'a na, san quebe dxelenné na.  
 Zaj zua xiaj lau na, san quebe dxelelé'e na.  
 6 Zaj zua naga na, san quebe dxelén na.  
 Zaj zua zrina na, san quebe dxelelé'e na.  
 7 Zaj zua na' na, san quebe bi dxelecá'a na.  
 Zaj zua ni'a na, san quebe dxeledá na.  
 Quebe dxedxuaj chi'i na lba na.  
 8 Ca zaj naca na, zaj naca benne' ca' zaj nuné' na,  
 ne benne' ca' dxuluxrén lazre' na.  
 9 Le guxrén lazre' Xránadxu, le'e, benne' Israel ca'.  
 Le' dxácalene' le'e, ne dxuxúe' le'e.  
 10 Le guxrén lazre' Xránadxu, le'e, bxruze chee Dios,  
 nácale zri'ine zre sua Aarón.  
 Le' dxácalene' le'e, ne dxuxúe' le'e.  
 11 Le guxrén lazre' Xránadxu, le'e dxucá'ana szrenle Le'.  
 Le' dxácalene' le'e, ne dxuxúe' le'e.  
 12 Xránadxu dxajsá lazre' dxi'u, na' guné' dxi'u da chawe'.  
 Guné' da chawe' chee benne' Israel ca'.  
 Guné' da chawe' chee bxruze chee', zri'ine zre sua Aarón.  
 13 Guné' da chawe' chee xúgute' benne' dxelape' Le' ba lá'ana,  
 benne' blau ca', ne benne' quebe zaj naque' blau.  
 14 Gun Xránadxu chan zri'inu' ca',  
 ne chan zri'ine bi biu chiu' ca'.  
 15 Gun Xránadxu da chawe' chiu'.

Naque' Bénnea' ben xabáa, ne xezr la xu.

<sup>16</sup> Chee tuze Xránadxu naca xabáa,  
san bnézruje' bènneache xezr la xu.

<sup>17</sup> Benne' zaj nate quebe gaca xelúe lá'ane' Xránadxu,  
ne quebe gaca benne' ca' zaj zuę' lu xędxu ba.

<sup>18</sup> Dxi'u, benne' ban, güe lá'anadxu Xránadxu,  
na'a zra, ne chadía chacanna.

¡Le güe lá'ana Xránadxu!

## 116

<sup>1</sup> ¡Nazrí'ida' Xránadxu Dios

lawe' da benne' chi'a, ne da gunaba' lawe',

<sup>2</sup> ne lawe' da bze nague' chia!

Chee le na' guláwizra' Le' dxácatę naca bana'.

<sup>3</sup> Guzúa' lu da stebe chee xel-la' gute,  
ne bzreba' ba zua' chu'a lataj ba xa'.

Guzúa' lu da stebe, ne guzaca zi'a.

<sup>4</sup> Nadxa bláwizra' Xránadxu Dios, gunnía':

Xrana' Dios, bselá bènne'du xu'a.

<sup>5</sup> Cháwe'le'e naca Xránadxu Dios, ne xrlátaje naque'.

Awe', dxexache lazre' Dios cheędxu dxi'u.

<sup>6</sup> Dxuxúe Xránadxu benne' dxexruj lazre' ca'.

Gate na' guzúa' lu da stebe bselé' neda'.

<sup>7</sup> Ben dipa lazre', bènne'du xu'a,

lawe' da nun Xránadxu da chawe' chiu'.

<sup>8</sup> Lue', Xran, bseláu' bènne'du xu'a lu na' xel-la' gute,  
chee québedxa cuezre we'a, ne chee quebe cheajcházia'.

<sup>9</sup> Ta' lau Xránadxu Dios  
naga zaj zra' benne' ca' zaj naca bane'.

<sup>10</sup> Guxéajle'a chee', na' chee le na' bchálaja', lálala guzaca zí'le'a.

<sup>11</sup> Lu xel-la' dxezrebe chia', gunnía':

Zaj naca xúgute bènneache benne' wen lazre' ca'.

<sup>12</sup> ¿Bizra quízrujqueza' Xránadxu Dios  
chee xúgute da chawe' da bene' chia'?

<sup>13</sup> Si'a lu ne'e xel-la' weselá,  
ne guláwizra' Xránadxu Dios.

<sup>14</sup> Na'a guna' da ca' guchebe lazra' lau Xránadxu.

Guna' na lau xúgute bènneache chee'.

<sup>15</sup> Xránadxu Dios dxe'e gunne xue  
chee bènneache chee' gate dxelátie'.

<sup>16</sup> Xrana' Dios, da li naca' wen zrin chiu'.

Naca' wen zrin chiu', ne zri'ine nu'ula wen zrin chiu'.

Lue' bzúzruju' da zaj nadxéaj na neda'.

<sup>17</sup> Da güe lá'ana' Lue' gaca na ca tu béadau' gutia' lau',  
ne gucá'ana szrena' Lau', Xrana' Dios.

<sup>18</sup> Lau Xránadxu Dios guna' da ca' guchebe lazra' chee',  
da guna' lau xúgute bènneache chee'.

19 Guna' na chale'aj xu'u lizre Xránadxu Dios,  
da dxe' na lu'ule xezre Jerusalén.

¡Gaca ba lá'azxa Xránadxu Dios!

## 117

1 ¡Le güe lá'ana Xránadxu Dios, le'e, benne' dutē xēzr la xu!  
¡Le güe lá'ana Le', le'e, xúgute bēneache,  
2 lawe' da zrentē naca xel-la' zri'i lazre' chee' ca nazrí'ine' dxi'u,  
ne chadía chacanna naca xel-la' li lazre' chee'!

¡Le güe lá'ana Xránadxu!

## 118

1 ¡Le güe lá'ana Xránadxu Dios lawe' da naque' xrlátaje,  
ne lawe' da chadía chacanna dxexache lazre' dxi'u!  
2 Dxel-la' xelenná benne' Israel ca:  
¡Chadía chacanna dxexache lazre' dxi'u!  
3 Dxel-la' xelenná zri'ine zre sua Aarón:  
¡Chadía chacanna dxexache lazre' dxi'u!  
4 Dxel-la' xelenná benne' ca' dxelezrebe' Xránadxu Dios:  
¡Chadía chacanna dxexache lazre' dxi'u!  
5 Gate na' guzúa' lu da stebe bláwizra' Xránadxu Dios,  
na' bechebe Xránadxu, ne bselé' neda' lu da na'  
bexru na neda'.  
6 Zualē Xránadxu neda', na' québequeze zreba'  
bi xelún bēneache chia' neda'.  
7 Zualē Xránadxu neda' ládujla benne' ca' dxelácalēne' neda'.  
Chee' le' na' le'eda' cheajlechaze benne' ca' dxelecuide' neda'.  
8 Cháwe'dxa naca guxrén lázredxu Xránadxu Dios  
quézcala guxrén lázredxu bēneache.  
9 Cháwe'dxa naca guxrén lázredxu Xránadxu Dios  
quézcala guxrén lázredxu benne' dxelenná be'e.  
10 Gulechaj benne' xúgute cue' xēzr la xu neda',  
na' lu La Xránadxu Dios guzría xi'a benne' ca'.  
11 Guléchajē' neda', ne buluchídie' neda',  
na' lu La Xránadxu Dios guzría xi'a benne' ca'.  
12 Guléchajē' neda' ca dxelún bešcutuche',  
na' guca xel-la' dxelezzá'a chee' ca tu xi' da dxuzezxe na  
xixre' xeche' bizre,  
na' lu La Xránadxu Dios guzría xi'a benne' ca'.  
13 Buluzrigue' neda' chee' cheajcházia'  
na' gúcale Xránadxu Dios neda'.  
14 Naca Xránadxu Dios ca tu xu'u naga zua chawa',  
na' tu gúl-lazqueza' chee' lawe' da Léqueze' dxuselé' neda'.  
15 Xel-la' dxelebé dxelul-la benne' xrlátaje ca'  
lawe' da dxuselá Xránadxu le'.  
Dute' xel-la' waca chee' dxun Xránadxu Dios da zrentē ca'.  
16 Szrentē nagá'ana xel-la' waca zren chee' Xránadxu Dios.  
Da zrentē ca' dxun xel-la' waca zren chee' Xránadxu.  
17 Québequeze gatia', san gaca bana',  
na' guzenda' bēneache ca zaj naca da nun Xránadxu.

18 Bde Xránadxu neda' lu da ba xa',  
san quebe bdeē' neda' lu na' xel-la' gute.

19 Gusalaj dxa xu'u cheē chu'a naga guchi'u chia', Xran,  
na' chu'a na', ne güe lá'ana' Lue', Xrana' Dios.

20 Dxa xu'u nigá naca na cheē Xránadxu Dios.  
Dxa xu'u nigá dxelú'u benne' xrlátaje ca'.

21 Güe lá'ana' Lue', Xran, lawe' da bennu' chia',  
ne bseláu' neda' lu da guca chia'.

22 Xiaj na' da buluzúa benne' wen xu'u ca' chalá'ala,  
le na' naca na xiaj blau.

23 Da nigá ben Xránadxu,  
na' naca na tu da dxexebánedxu.  
24 Zra nigá naca na zra da ben Xránadxu.

Béle'edxu, ne súadxu lu da ba neza lu zra nigá.

25 Xrana' Dios, dxata' xueda' Lue' guseláu' netu' na'a.  
Dxata' xueda' Lue', Xrana', gunu' chepe ban na'a da dxuntu'.

26 Ba neza zrentē naca na cheē bēnnea' ze'ē waláz cheē  
Xránadxu Dios.  
Lu xu'u lizre Xránadxu Dios nigá dxenábantu'  
gaca chawe' chiu'.

27 Xránadxu naque' Dios, ne ba benne' dxi'u tu da dxusaní na.  
Le guchéaj béadu ca' gütele lawe' lu luzu cugu cheē'.

28 Nacu' Lue' Dios chia', na' güe lá'ana' Lue'.  
Dios chia', gucá'ana szrena' Lue'.

29 ¡Le güe lá'ana Xránadxu Dios lawe' da naque' xrlátaje,  
ne lawe' da chadía chacanna dxexache lazre' dxi'u!

## 119

*Da dxun da bdxixruj be'e Dios dxi'u*

1 Ba neza zrentē naca na cheē benne' ca' tu dxelúnzqueze'  
da naca du lazre',  
benne' ca' tu dxelúnzqueze' ca dxenná da bdxixruj bea  
Xránadxu Dios.

2 Ba neza zrentē naca na cheē benne' ca' tu dxelúnzqueze'  
ca dxusede dizra' cheē dxi'u,  
na' dutē xichaj lázrdawe' dxuluzúe' dizra' cheē'.

3 Benne' caní québequeze dxelune' da zrinnaj,  
benne' ca' tu dxelúnzqueze' ca dxenná Dios dxal-la' xelune'.

4 Lue', Xran, bsízrenu' netu' cheē gun xánnetu'  
ca zaj naca da bdxixruj be'u Lue'.

5 Dxaca lázrele'a tu gúnzqueza'  
ca zaj naca xrba chiu'.

6 Nadxa québequeze xedué'eda',  
na' cue'a gunne xue guna' xúgute da bdxixruj be'u.

7 Dute xel-la' li lazre' chia' güe lá'ana' Lue' gate ba nusédia'  
da ca' nuchi'u cheentu', da zaj naca na xrlátaje.

8 Tu gúnzqueza' ca da dxenná be'u.

Québequeze cueaj xíchaju' neda'.

*Dxal-la' gundxu da gunnáqueze Dios*

9 ¿Ájala gun benne' cuide' gunbe' da naca na xrlátaje?

Dxal-la' tu gúnzquezebe' ca dxenná xrtizru'.

10 Dute xichaj lázrdawa' dxuna' ba xuzre guna'

da dxennáu' Lue'.

Quebe gu'u lataj guzúa' chalá'ala ca da bdxixruj be'u.

11 Lu xichaj lázrdawa' tu dxúnzqueza' ca da dxennáu' Lue'

chee quebe guna' dul-la tábaga' Lue'.

12 Ba lá'azxa nacu' Lue', Xrana' Dios.

Bséde neda' da ca' dxenná be'u.

13 Nen dxú'aqueza' ba bzenda' bènneache

ca zaj naca da ca' nuchi'u cheentu'.

14 Dxebéle'edxeda' tu dxúnzqueza' ca dxusede dizra' chiu' netu',  
quez ca dxelebé benne' ca' déle'e xel-la' gunní'a chee'.

15 Gulaba lazra' ca zaj naca da bdxixruj be'u Lue',

ne nna' xánnia' ca dxennáu' dxal-la' guntu'.

16 Béle'eda' guna' ca da dxenná be'u,

ne quebe gal-la lazra' ca zaj naca xrtizru'.

*Dxebéle'edxu dxundxu da dxennáqueze Dios*

17 Ben gaca chawe' chia' neda', wen zrin chiu',  
na' gaca bana', ne tu gúnzqueza' ca naca xrtizru'.

18 Gusalaj xiaj lawa' chee nna'a

da zrenté ca' da zaj zua na lu da bdxixruj be'u.

19 Naca' ca tu benne' dxedaze' lu xezr la xu nigá.

Ben chéajni'ida' da dxenná da bdxixruj be'u.

20 Dxedú lazra' lawe' da tu chí'izqueze

dxezá lazra' guna' da ca' nuchi'u cheentu'.

21 Gudil-lu' benne' ca' dxulucá'ana szren cuine',

benne' wen da caléla ca',

benne' ca' dxuluzúe' chalá'ala da bdxixruj be'u.

22 Quebe gu'u lataj nu benne' nne' schanni' chia',

na' quegá gucá'ana díraje' neda'

lawe' da tu dxúnzqueza' ca dxusedenu' netu'.

23 Cá'anqueze benne' dxeleenná bea ca' gulenné' chia'.

Neda', wen zrin chiu', blaba lazra' ca zaj naca xrba chiu'.

24 Dxezaca ba lázrelena' da dxusede dizra' chiu' netu'.

Dxuluzéajni'i na neda'.

*Dute lázrdaudxu gundxu da dxennáqueze Dios*

25 Zua bènne'du xu'a lu da stebe chee xel-la' gute.

Ben dipa xichaj lázrdawa' nen xrtizru'.

26 Ble'eda' Lue' ca zaj naca da dxuna', na' bezi'u neda'.

Bséde neda' ca zaj naca xrba chiu'.

27 Ben chéajni'ida' ca gaca guna' ca bdxixruj be'u

chee gulaba lazra' ca zaj naca da zrenté ca' da benu'.

28 Dxedú lazra' lawe' da dxewí'ine lázrele'a.



Bexru chacha neda' ne chee xrtizru'.

<sup>29</sup> Quebe gu'u lataj guna' da naca na wen lazre'.

Lu xel-la' dxexache lazre' chiu' bsede neda' da bdxixruj be'u.

<sup>30</sup> Bechugu lazra' guna' da naca li lazre',

na' dxe'a gunne xue guna' da ca' nuchi'u cheentu'.

<sup>31</sup> Tu dxúnzqueza' ca dxusede dizra' chiu' netu'.

Xran, quebe guzú' neda' lu xel-la' stu'.

<sup>32</sup> Tu gúnzqueza' ca bdxixruj be'u,

gate guzéajni'idxenu' neda'.

*Dxaca lázredxu chéajni'idxu xrtizra' Dios*

<sup>33</sup> Xran, bsede neda' chee guna' ca naca xrba chiu',

na' tu gúnzqueza' ca naca na ca zrindxa zra cheajsé chia'.

<sup>34</sup> Bzéajni'i neda', na' tu gúnzqueza' da bdxixruj be'u,

na' duté lázrdawa' guna' ca naca na.

<sup>35</sup> Ble'e neda' chee guna' da bdxixruj be'u,

lawe' da dxaca lázrequeza' guna' ca dxenná na.

<sup>36</sup> Ben sa lazra' guna' ca dxusede dizra' chiu' netu',

chee quebe gaca' benne' wecude.

<sup>37</sup> Quebe gu'u lataj gucá'ana szrena' bedáu' xia xaga ca'.

Ben dipa xichaj lázrdawa' chee guna' ca dxenná xrtizru'.

<sup>38</sup> Ben ca dxenná xrtizru' da guchebe lazru' chia' neda',

wen zrin chiu', chee zreba' Lue'.

<sup>39</sup> Bde chalá'ala dizra' schanni' da dxelenné' chia',

da na' dxezreba', lawe' da xrlátaje zaj naca xrba chiu'.

<sup>40</sup> Dxezá lazra' guna' da bdxixruj be'u.

Ben dipa xichaj lázrdawa' nen da xrlátaje chiu'.

*Dxuxrén lázredxu xrtizra' Dios*

<sup>41</sup> Gudá xexache lazru' neda', Xrana' Dios.

Gudá guseláu' neda', ca ba guchebe lazru' gunu'.

<sup>42</sup> Becheba' lau bénnea' dxusi'e neda' xel-la' stu', gunnía':

Dxuxrén lazra' xrtizra' Xrana' Dios.

<sup>43</sup> Ben tu séquezda' guchálaja' dizra' li lazre' chiu',

lawe' da dxebeza lazra' da ca' dxuchi'u cheentu'.

<sup>44</sup> Tu gúnzqueza' ca dxenná da bdxixruj be'u.

Guna' na tu chí'izqueze, ne chadía chacanna.

<sup>45</sup> Láqueza' neda'

lawe' da dxe'a gunne xue guna' ca bdxixruj be'u.

<sup>46</sup> Guchálajqueza' ca dxusede dizra' chiu' netu'

lau benne' wenná bea ca', na' québequeze xedué'eda'.

<sup>47</sup> Wabéle'eqezda' guna' ca bdxixruj be'u,

da ca' nazrí'ile'eda'.

<sup>48</sup> Dxechebe lazra' guna' ca bdxixruj be'u,

da nazrí'ida', na' gulaba lazra' ca naca xrba chiu'.

*Tu zúazqueze xrtizra' Dios*

<sup>49</sup> Bsa lazre' da guchebe lazru' chia' neda',

wen zrin chiu', da na' benu' dxebeza lazra'.

<sup>50</sup> Gate na' guzaca zi'a, guzúa tu da bexúe zren na neda'

lawe' da ben dipa xrtizru' xichaj lázrdawa'.

<sup>51</sup> Benne' dxulucá'ana szren cuine' belún lalé' chia' neda',

san québequeze gusana' da dxenná da bdxixruj be'u.

<sup>52</sup> Xeajsá lazra' da bchi'u cheentu' nédxudautę, Xran,  
na' bexaca zrena'.

<sup>53</sup> Nen dutę xel-la' dxezrá'a guzúa' lu da stebe

ne cheę benne' ca' dxelunę' da zrinnaj,

benne' ca' dxuluzúę' chalá'ala da bdxixruj be'u.

<sup>54</sup> Xrba chiu' ca' gulaca na chia' ca tu da dxul-la'

gate na' zua' tu xęzr la xu zitu'.

<sup>55</sup> Chizrela xeajsá lazra' lau' Lue', Xrana' Dios,

na' tu bénzqueza' ca dxenná da bdxixruj be'u.

<sup>56</sup> Lu da ba neza caní guzúa'

lawe' da tu bénzqueza' ca zaj naca da bdxixruj be'u.

*Dxebedxu dxulábadxu xrtizra' Dios*

<sup>57</sup> Da dxezá lazra' nácaquezu' Lue', Xrana' Dios.

Ba gunnía' tu gúnzqueza' ca naca xrtizru'.

<sup>58</sup> Dutę lázrdawa' dxenaba' Lue' xidu' gácalęnu' neda'.

Bexache lazre' neda' ca ba gunnú' gunu'.

<sup>59</sup> Gunná' xannia' ca zaj naca da dxuna',

na' xecha lasa dxuna' ca dxusede dizra' chiu' netu'.

<sup>60</sup> Bęna' ba xuzre, ne quebe guzreda'

cheę tu gúnzqueza' ca bdxixruj be'u.

<sup>61</sup> Xralaj cheę benne' ca' dxelunę' da caleła zaj nuchele na  
neda',

san quebe ne gal-la lazra' ca dxenná da bdxixruj be'u.

<sup>62</sup> Dxęla dxasa' cheę güe lá'ana' Lue'

lawe' da xrlátaje zaj naca da ca' dxuchi'u cheentu'.

<sup>63</sup> Naca' tuze nen xúgute benne' ca' dxelezrebe' Lue',

benne' ca' tu dxelúnzqueze' da bdxixruj be'u.

<sup>64</sup> Xrana' Dios, dxezrín dutę xęzr la xu

xel-la' dxexache lazre' chiu'.

Bsęde neda' cheę guna' ca dxenná xrba chiu'.

*Zácalę'e da wnnáqueze Dios*

<sup>65</sup> Ba bęnu' guca chawe' chia' neda', węn zrin chiu'.

Xran, bęnu' na cáteze dxenná xrtizru'.

<sup>66</sup> Bsęde neda' cheę gueque be'eda' da naca xrlátaje,

ne cheę chéajni'ida' lawe' da dxéajle'a da bdxixruj be'u.

<sup>67</sup> Nédxula ca bzéxruju' neda' gudéa' chalá'ala,

na' na'a tu dxúnzqueza' ca dxenná xrtizru'.

<sup>68</sup> Nacu' xrlátaje, ne dxunu' gaca chawe' cheentu'.

Bsęde neda' guna' ca naca xrba chiu'.

<sup>69</sup> Benne' dxulucá'ana szren cuine' gulennę' chia'

da węn lazre'

san dutę lázrdawa' tu gúnzqueza' ca bdxixruj be'u.

<sup>70</sup> Quebe xu'u xel-la' dxéajni'i lázrdau benne' ca'.

Neda' dxezaca ba lázrełęna' da dxenná da bdxixruj be'u.

<sup>71</sup> Chawe' naca bzéxruju' neda'

cheę gusédia' guna' ca naca xrba chiu'.

<sup>72</sup> Cháwedxa naca da bdxixruj be'u chia' neda'

quez ca gaxúa gaxúane dumí oro, ne plata.

*Cháwewę'e naca da wnnáqueze Dios*

73 Nen ná'quezu' benu' neda' cáteze naca'.

Bzėjani'i neda' cheę gusédia' guna' ca bdxixruj be'u.

74 Benne' dxelezrebe' Lue' xeledé'ene' neda'.

Xelebene' lawe' da dxebeza lazra' gaca ca dxenná xrtizru'.

75 Xran, ba nézquezda' xrlátaje naca da dxuchi'u cheentu',  
na' lu dutę xel-la' li lazre' chiu' bsaca zi'u neda'.

76 Lu dutę xel-la' dxexache lazre' chiu' bexúe zren neda'  
cáteze dxenná da guchębe lazru' chia' neda', węn zrin chiu'.

77 Bexache lazre' neda' cheę gaca bana'  
lawe' da dzezaca ba lázrełena' da bdxixruj be'u.

78 Ben xelexedué'e benne' ca' dxulucá'ana szren cuina  
lawe' da gulenné' schanni' chia', ne quebe bi bena' cheę'.  
Neda' gulaba lazra' ca da bdxixruj be'u.

79 Ben xelexelá' benne' ca' dxelezrebe' Lue',  
cheę xelenne' chia',  
na' xulusédię' da dxusęde dizra' chiu' netu'.

80 Ben gaca' du lazre' ca naca xrba chiu'  
cheę québequeze xedué'eda'.

*Gun Dios ca dxenná xrtizre'*

81 Zua bėnne'du xu'a lu da stębe  
lawe' da dxebeza' xidu' guseláu' neda',  
na' dxebeza lazra' gaca ca dxenná xrtizru'.

82 Dzezé bxinne xiaj lawa' lawe' da dzezá lazra' xrtizru',  
dxennia': ¿Bátaqueze xexúe zrenu' neda'?

83 Dxebizra' ca tu buzude xide zę na lu zren,  
san quebe dxal-la lazra' guna' ca dxenná xrba chiu'.

84 ¿Bal-la zra gaca bana' neda', węn zrin chiu'?

¿Bátaqueze gudéu' lu da ba xa' benne' ca'  
dxeláu zi' xuzre' neda'?

85 Benne' dxulucá'ana szren cuine' gulęne' tu xędxu  
naga cheajcházia'.

Québequeze dxelune' ca dxenná da bdxixruj be'u.

86 Da líqueze zaj naca xúgute da bdxixruj be'u.

Gúcale neda' lawe' da dxeláu zi' xuzre' neda',  
ne quebe bi nuna' cheę'.

87 Xeláteze la belutię' neda',  
san quebe ne gusana' guna' ca bdxixruj be'u.

88 Lu xel-la' dxexache lazre' chiu' ben dipa xichaj lázrdawa',  
cheę tu gúnzqueza' ca dxusęde dizra' chiu' netu'.

*Dxęaję'dxu xrtizra' Dios*

89 Xrana' Dios, tu chí'izqueze

zua xrtizru' xabáa na'la.

90 Xel-la' li lazre' chiu' sua na cheę xúgute bėnneache.

Lue' bzua chúchuquezu' xęzr la xu, na' zúaqueze na.

91 Ne cheę da gunnáquezu' zaj nnita xúgute da dę,  
na' xúgute da ca' dxelún na zrin chiu'.

92 La quebe bezaca ba lázrełena' da bdxixruj be'u  
bache benítia' lu da guzaca zi'a.

93 Cabátaqueze gal-la lazra' da bdxixruj be'u

lawe' da ne chee da ca' ba btipu' lazra'.

<sup>94</sup> Chiu' Lue' naca' neda'.

Bselá neda', lawe' da dxuna' ba xuzre guna' ca bdxixruj be'u.

<sup>95</sup> Benne' dxelebéaj xichaj Dios gulenné'ē neda' chee

xuluzría xi'ē neda',

san neda' dxulaba lazra' ca dxusede dizra' chiu'.

<sup>96</sup> Dxelé'eqezda' dxeajsé chee xúgutē da de lu xezr la xu,

san da bdxixruj be'u Lue' québequeze cheajsé chee na.

*Dxaca lázredxu gúnbeadxu xrtizra' Dios*

<sup>97</sup> Dios, nazrí'ile'eda' da bdxixruj be'u.

Du zra dxulaba lazra' ca naca na.

<sup>98</sup> Ne chee da bdxixruj be'u nunu' nácadxa' sina ca benne' ca'

dxeledábage' neda'

lawe' da tu zúalezqueze da bdxixruj be'u neda'.

<sup>99</sup> Dxéajni'idxeda' ca benne' ca' dxulusédene' neda'

lawe' da dxulaba lazra' ca dxusede dizra' chiu' neda'.

<sup>100</sup> Ba guxéajni'idxeda' ca benne' gula ca'

lawe' da tu dxúnzqueza' ca dxenná da bdxixruj be'u.

<sup>101</sup> Bena' ba xuzre quebe bi da calela guna'

chee tu gúnzqueza' ca dxenná xrtizru'.

<sup>102</sup> Quebe bsana' dxuna' da ca' nuchi'u cheentu'

lawe' da Lué'queze bsédenu' neda'.

<sup>103</sup> Xrtizru' naca na ca tu da zixrele'ē lu dxu'a.

Nácadxa na zixre ca bzrína'dau' lu dxu'a.

<sup>104</sup> Ne chee da bdxixruj be'u naca' benne' sina.

Chee le na' dxecuídeda' xúgutē da wen lazre'.

*Xrtizra' Dios dxuzéajni'i na dxi'u*

<sup>105</sup> Ca tu xi' naca xrtizru' naga dxedá',

da dxusení na neza xu'a.

<sup>106</sup> Bzétaja' Dios, ne guchebe lazra'

tu gúnzqueza' ca nuchi'u cheentu' da naca na xrlátaje.

<sup>107</sup> Dzezaca zí'le'a.

Xrana' Dios, btipa lazra' cáteze guchebe lazru' gunu'.

<sup>108</sup> Xrana' Dios, dxata' xueda' Lue' si'u da dxue lá'ana' Lue',

ne gusédenu' neda' guna' ca nuchi'u cheentu'.

<sup>109</sup> Tu zúazqueza' lu da stebe chee xel-la' gute,

san québequeze ne gal-la lazra' guna' ca bdxixruj be'u.

<sup>110</sup> Benne' dxelebéaj xichaj Dios buluzale' xralaj

da quela na neda'

san neda' quebe bsana' dxuna' ca bdxixruj be'u.

<sup>111</sup> Ba gucá'a da dxusede xrtizru' neda' chee gaca na

da gápaqueza' chadía chacanna

lawe' da zaj naca xrtizru' da dzezaca ba lázrele'a.

<sup>112</sup> Zúatequeze lázrdawa' guna' ca zaj naca xrba chiu'

tu chí'izqueze, ca zrindxa zra cheajsé chia'.

*Bexácadxu chawe' ne chee xrtizra' Xránadxu*

<sup>113</sup> Dxecuídeda' benne' ca' dxelunē' láweze da xrlátaje,

san nazrí'ida' da dxenná da bdxixruj be'u.

<sup>114</sup> Nacu' Lue' ca tu xu'u naga zua chawa', ne ca tu

da dxucu'uj na neda',

lawe' da dxebeza lazra' gaca na ca dxenná xrtizru'.

115 Le gucuasa naga zua', le'e, benne' wen da calela,  
lawe' da tu gúnzqueza' ca bdxixruj bea Dios chia'.

116 Bze chacha neda' cáteze dxenná xrtizru', na' gaca bana',  
ne quebe xedué'eda' chee da na' dxebeza lazra'.

117 Bze chacha neda', na' la',  
ne tu xezaca ba lárezqueza' ca naca xrba chiu'.

118 Bchuchu bléaju' xúgute benne' ca' bulusané' ca naca  
xrba chiu'

lawe' da wen lazre' naca xel-la' sina chee benne' ca'.

119 Ca bebe bzria xi'u xúgute benne' ca' dxelebéaj xíchaje'  
Lue' lu xezr la xu nigá.

Chee le na' nazrí'ida' da dxusede dizra' chiu' netu'.

120 Dxezrize bela' dxen chia' lawe' da dxezreba' Lue',  
ne dxezreba' da dxuchi'u cheentu' da naca na xrlátaje.

*Dxal-la' gundxu ca dxenná xrtizra' Xránadxu*

121 Ba beña' ca da nuchi'u cheentu', ne ca naca da xrlátaje.

Quebe gudéu' neda' lu na' benne' ca' dxuluchínene' neda'.

122 Guchebe lazre' chia' gunu' gaca chawe' chia'.

Quebe gu'u lataj benne' ca' dxulucá'ana szren cuine'  
xuluchínene' neda' xadía.

123 Guzé bxrinne xiaj lawa' lawe' da dxebeza' xidu'  
guseláu' neda',

ne guchi'u cheentu' ca dxenná xrtizru'.

124 Dute xel-la' dxexache lazre' chiu' ben gaca chawe'  
chia' neda', wen zrin chiu',

ne bsede neda' guna' ca naca xrba chiu'.

125 Naca' wen zrin chiu'.

Bzéajni'i neda' chee gúnbe'a da dxusede dizra' chiu' netu'.

126 Xrana' Dios, ba bzrin zra bi gunu',

lawe' da ba buluzúe' chalá'ala da bdxixruj be'u.

127 Chee le na' neda' nazrí'idxeda' da bdxixruj be'u Lue'  
quézcala oro, ne quézcala galega oro.

128 Chee le na' dxéqueda' zaj nácadxa li lazre'

da bdxixruj be'u ca xúgute da de,

na' dxecuídeda' xúgute da zaj naca na da wen lazre'.

*Dxaca lárezdxu gundxu ca dxenná xrtizra' Dios*

129 Dxebámentu' ca dxusede dizra' chiu' netu'.

Chee le na' du lazra' tu dxúnzqueza' ca dxenná na.

130 Gate nu dxuzájla'a ca naca xrtizru', dxusaní na.

Dxun na dxeléajni'i benne' dxexruj lazre' ca'.

131 Guxá dxu'a, ne gucá'a lazra'

lawe' da dxezá lazra' gúnbe'a da bdxixruj be'u.

132 Gunná' neda', ne bexache lazre' neda',

ca tu dxúnzquezu' chee benne' ca' zaj nazrí'ine' Lue'.

133 Ben tu gúnzqueza' ca dxenná xrtizru',

ne quebe gu'u lataj da zrinna' nna be'e na neda'.

134 Bselá neda' lu na' benne' xichaj zra'a ca',

na' tu gúnzqueza' ca dxenná da bdxixruj be'u.

135 Ben gaca chawe' chia' neda', wen zrin chiu',

ne bsēde neda' guna' ca zaj naca xrba chiu' ca'.

136 Nisa gudxezra' guca na ca tu xegu nisa  
lawe' da quebe dxelún bénneache ca bdxixruj be'u.

*Da li naca da dxenná Xránadxu*

137 Xrana' Dios, xrlátaje nacu' Lue',  
ne li lazre' naca ca dxuchi'u chēntu'.

138 Da dxusēde dizra' chiu' netu', da na' bzu' lu na'ntu',  
naca na da li, ne da li lazre'.

139 Dxedú lazra' lawe' da dxé'le'a gunne xue  
lawe' da gulal-la lazre' benne' ca' dxeledábage' neda'  
ca zaj naca xrtizru'.

140 Du lázrele'ē naca xrtizru',  
na' nazrí'ida' neda' na, naca' wen zrin chiu'.

141 Dxexruj lazre' naca', na' dxuluzúē' neda' chalá'ala,  
na' quebe ne gal-la lazra' da bdxixruj be'u.

142 Tu chí'izqueze zua da dxuchi'u chēntu',  
na' da li naca da bdxixruj be'u.

143 Da dxezaca zi'a, ne da stēbe zua' zaj nuchuchuj na neda',  
san dxezaca ba lázrelēna' da bdxixruj be'u.

144 Tu chí'izqueze naca li lazre' da dxusēde dizra' chiu'.  
Bzėjni'i neda', na' gaca bana'.

*Dxal-la' gulaba lázredxu da gunná Dios*

145 Dutē lázrdawa' dxuláwizra' Lue', Xrana' Dios.

Ben gaca chawe' chia', na' tu gúnzqueza' ca dxenná xrba chiu'.

146 Dxuláwizra' Lue'.

Bselá neda', na' tu gúnzqueza' ca dxusēde dizra' chiu' netu'.

147 Bálala dxasa', na' dxuláwizra' Lue'.

Dxebeza lazra' gaca ca dxenná xrtizru'.

148 Dxenná'aza' bedú xēla,  
chēe gulaba lazra' da bdxixruj be'u.

149 Dutē xel-la' dxexache lazre' chiu' bene chi'a.

Xrana' Dios, da bchi'u chēntu' btipa lazra'.

150 Benne' dxeláu zi' xuzre' neda' ba zaj zre'ē xelunē' chia'  
da calela.

Zaj nusane' da dxenná da bdxixruj be'u.

151 Xrana' Dios, zu' Lue' gagu naga zua',  
ne da li zaj naca xúgutē da bdxixruj be'u.

152 Gate nate ba núnbe'a da dxusēde dizra' chiu' netu',  
da na' nuzú' chēntu' tu chí'izqueze.

*Da gunná Dios dxuzėjni'i dxi'u*

153 Gunná' xque ca dxezaca zi'a, ne bselá neda'  
lawe' da quebe ne gal-la lazra' da dxenná da bdxixruj be'u.

154 Bechēbe waláz chia', ne bexa'u neda'.

Btipa lazra' nen xrtizru'.

155 Stébele'ē naca xeledá benne' ca' dxelebéaj xíchaje'  
Lue', Dios,

lawe' da quebe dxelebé'ē gunne xue xelunē' ca naca xrba chiu'.

156 Xrana' Dios, dxexache lázrele' u bénneache chiu'.

Btipa lazra' cáteze dxenná xrtizru' gunu'.

157 Zánetē zaj naca benne' ca' zaj nau zi' xuzre' neda',

ne benne' ca' dxeledábage' neda',  
 san quebe ne gusana' dxuna' ca dxusede dizra' chiu' netu'.  
 158 Ble'eda' benne' ca' dxelún lazre', na' dxegúteda' benne' ca'  
 lawe' da quebe dxelune' ca dxenná xrtizru'.  
 159 Gunná'xque, Xran, ca nazrí'ida' da bdxixruj be'u.  
 Dute xel-la' dxexache lazre' chiu', btipa lazra'.  
 160 Da líqueze zaj naca xúgute xrtizru',  
 ne tu chí'izqueze zaj naca da dxuchi'u cheentu' lu  
 da xrlátaje chiu'.

*Da gunná Dios dxutipá lázredxu*

161 Benne' ca' dxelenná be'e dxeláu zi' xuzre' neda'  
 na' quebe bi nuna' chee'.  
 Dute lázrdawa' dxezreba' ca zaj naca xrtizru'.  
 162 Dxebéle'eda' lu da dxenná xrtizru'  
 ca dxebé bènnea' dxezrel-lene' tu xel-la' gunní'a zrente'.  
 163 Dxecuídeda', ne dxegúteda' da wen lazre'.  
 Nazrí'ida' da dxenná da bdxixruj be'u.  
 164 Gazre laša tu zra dxue lá'ana' Lue'  
 lawe' da xrlátaje naca ca dxuchi'u cheentu'.  
 165 Dxelebeza zri lázrele'e benne' ca' zaj nazrí'ine'  
 da bdxixruj be'u,  
 na' quebe bi de da gun na cheajlecházie'.  
 166 Xrana' Dios, dxebeza' Lue' xidu' guseláu' neda',  
 ne tu dxúnzqueza' ca naca da bdxixruj be'u.  
 167 Dute lázrdawa' tu dxúnzqueza' da dxusede dizra' chiu' netu',  
 ne nazrí'ile'eda' ca naca na.  
 168 Tu dxúnzqueza' ca naca da bdxixruj be'u,  
 ne ca dxusede dizra' chiu' netu'  
 lawe' da dxelé'eqeznu' xúgute da dxuna'.

*Dxebéle'eledxu xrtizra' Dios*

169 Xrana' Dios, bene da dxuláwizra' Lue'.  
 Bzėjni'i neda' ca dxenná xrtizru' gunu'.  
 170 Bene da dxenaba' lau Lue'.  
 Bselá neda' ca dxenná xrtizru' gunu'.  
 171 Tu güe lá'anazqueza' Lue', Xran,  
 gate ba nusédenu' neda' guna' ca naca xrba chiu'.  
 172 Tu guchálajzqueza' ca naca xrtizru'  
 lawe' da xrlátaje naca ca dxenná be'enu' netu'.  
 173 Guzúatequeze gácalenu' neda'  
 lawe' da dxuna' ba xuzre guna' ca bdxixruj be'u.  
 174 Dxezá lazra' guseláu' neda', Xrana' Dios.  
 Dxezaca ba lázrelena' da bdxixruj be'u.  
 175 Ben gaca bana', na' güe lá'ana' Lue',  
 na' da dxuchi'u chia' xelácale na neda'.  
 176 Gudéa' chalá'ala ca dxedá tu zrila' naníteba'.  
 Bexilaj neda', wen zrin chiu', lawe' da quebe ne gal-la lazra'  
 da bdxixruj be'u.

## 120

<sup>1</sup> Gate guzúa' lu da stebe bláwizra' Xránadxu Dios,

na' Le' gúcalęne' neda'.

<sup>2</sup> Bselá neda', Xrana' Dios, lu na' benne' węn lazre' ca',  
ne lu na' benne' dxelezí xę'e ca'.

<sup>3</sup> ¿Bizra gunna Dios le'e, benne' dxelezí xę'e?  
¿Bizra da ba neza gaca na cheęle gate gudęę' le'e  
lu da zi' da xa'?

<sup>4</sup> Gudęę' le'e lu na' benne' ca' xuludę'e le'e xaga nalá xęche'ze,  
ne xuluzrię' le'e xi' galaj.

<sup>5</sup> Edxugúa neda'.

Dxaca chia' ca zúaqueza' ládujla benne' Mesec,  
ne ca zua' tu lu xu'u xide cheę benne' Cedar.

<sup>6</sup> Da zrentę ba guzúa' ládujla benne' caní  
dxuluzúę' chalá'ala xel-la' dxebeza zri lazre'.

<sup>7</sup> Neda' dxezá lazra' gata' xel-la' dxebeza zri lazre'.  
Gate dxuchálaja' cheęn, dxeledíl-lalę benne' ca' neda'.

## 121

<sup>1</sup> Chisa xíchaja' nna'a da dxelún bęnneache lu xi'a ca'.

¿Gazra za' da gácalę na neda'?

<sup>2</sup> Da gácalę na neda' za' lu na' Xránadxu Dios,  
Bęnnea' bęne' xabáa, ne xęzr la xu.

<sup>3</sup> Quebe gu'e lataj cheajcházium'.

Quebe gase Bęnnea' dxuxúequeze' lue'.

<sup>4</sup> Gunná' xque, quebe te bchigala cheę Bęnnea'.

Québequeze gase Bęnnea' dxuxúequeze' benne' Israel ca.

<sup>5</sup> Xránadxu Dios dxucú'uję' lue'.

Xránadxu Dios zuę' cuitu' xabela dxegu'e lue' zrul-la.

<sup>6</sup> Quebe guzezxe gubizra lue' te zra,  
ne quebe bi gune beu' lue' chizrela.

<sup>7</sup> Xranu' Dios guxúequeze' lue' cheę quebe bi da calęla  
gaca na chiu'.

Guxúequeze' bęnne'du xu'u.

<sup>8</sup> Xránadxu Dios guxúequeze' lue' gate dxedxúaju',  
ne gate dxexú'u, na'a zra, ne chadía chacanna.

## 122

<sup>1</sup> Gubęlena' benne' ca' gulę'e neda':

“Chéajdxu xu'u lizre Xránadxu Dios.”

<sup>2</sup> Na'a zúadxu nigá, zęntu' dxa xu'u ze'e  
da naxechaj lue', xęzre Jerusalén.

<sup>3</sup> Jerusalén naca na tu xęzre da belexune',  
na' naca na xrtantę, ne dxé'le'e na cháwedau'.

<sup>4</sup> Lu xęzre na' zjaca xúgute cuen bęnneache zaj dę'e  
Xránadxu Dios.

Dxelunę' ca dxenná dizra' da guzre Dios benne' Israel ca',  
cheę xelúe lá'ang' La Xránadxu Dios.

<sup>5</sup> Lu xęzre na' zaj dxę' benne' ca' dxuluchi'e cheę  
benne' Israel ca',

naga zaj dxę' benne' xrtia David, benne' ca' dxelenná be'e.

<sup>6</sup> Le naba lau Dios gata' xel-la' dxebeza zri lazre'



lu xęzre Jerusalén,  
 cheę xelege ban da dxelún benne' ca' zaj nazrí'ing' xęzre na'.  
 7 Dxenábantu' Dios sua xel-la' dxebeza zri lazre'  
 lu'ule ze'e da naxechaj na lue', Jerusalén,  
 ne cheę xelezrá' chawe' benne' zaj xu'e xu'u zren chiu'.  
 8 Nazrí'ida' le sa' ljwezra', ne bi ljwezra' ca', na' dxennía':  
 Gata' xel-la' dxebeza zri lazre' chiu', xęzre Jerusalén.  
 9 Lawe' da nazrí'ida' xu'u lizre Xránadxu Dios  
 dxuna' ba xuzre gaca chawe' chiu'.

## 123

1 Chisa xíchaja' nna'a naga zu', Xran,  
 naga zu' Lue', zu' xabáa na'la.  
 2 Ca dxun tu bi węn zrin dxenná'abe' bi nna xránabe',  
 ne ca dxun nu'ula węn zrin dxenná'abe' bi nna  
 nu'ula xránabe',  
 caní dxenná'adxu bi nna Xránadxu Dios  
 ca zrindxa zra xexache lazre' cheędxu.  
 3 Bexache lazre' cheętu', Xránantu' Dios.  
 Bexache lazre' cheętu', lawe' da dxedú lázrentu'  
 lawe' da dxulucá'ana ditaj bėnneache netu'.  
 4 Dxedú lázrentu' lawe' da dxelún lala benne' gunnía' ca'  
 cheętu',  
 ne dxulucá'ana ditaj netu', benne' ca' dxulucá'ana szren  
 cuine'.

## 124

1 Chela ca gúcale Xránadxu Dios dxi'u.  
 Caní dxal-la' xelenná benne' Israel ca' na'a.  
 2 Chela ca gúcale Xránadxu Dios dxi'u  
 gate guledíl-lalę benne' ca' dxi'u,  
 3 na' buluzría xi'te' dxi'u  
 lu dutę xel-la' dxelezrá'a zrentę cheę',  
 4 ne guca cheędxu ca dxaca cheę benne'  
 dxugacu nísadau' le', da na' gute na le'.  
 5 Chela guca caní cheędxu, na' bėtete da na' dxi'u.  
 6 Dخال-la' xędxu Xránadxu Dios; Xcalenu',  
 lawe' da quebe be'e lataj benne' ca' xuluzría xi'e dxi'u.  
 7 Beladxu ca dxelá tu bxinne lu xixruj cheę benne' wezén bxinne.  
 Bzria xi' Xránadxu xel-la' dxenná bea cheę benne' ca', na' beladxu.  
 8 Naca Xránadxu Dios Bėnnea' dxácaleņe' dxi'u,  
 Bėnnea' bėnqueze' xabáa, ne xęzr la xu.

## 125

1 Benne' ca' dxuluxrén lazre' Xránadxu Dios zaj naque' ca xi'a Sión,  
 da quebe nu seque' gutá, san tu chí'izqueze zua chacha na.  
 2 Ca zaj zua xi'a ca' da zaj naxechaj na Jerusalén,  
 zua Xránadxu Dios, dxuxúequeze' bėnneache cheę' na'a zra,  
 ne chadía chacanna.  
 3 Quegá tu chí'izqueze xelenná bea benne' ca' dxelunę'  
 da calęla lu xęzr la xu cheę benne' xrlátaje ca',  
 cheę quebe xelaca benne' xrlátaje ca' tuze nen benne'  
 węn da zrinnaj ca'.

<sup>4</sup> Xrana' Dios, ben gaca chawe' chee benne' xrlátaje ca',  
ne chee benne' ca' zaj naque' li lazre'.

<sup>5</sup> Benne' ca' dxelebéaj xichaj Dios chee xelune' da calela,  
xucuasa Xránadxu Dios benne' ca' tu zren nen benne' ca'  
dxelune' da zrinnaj.

Dxenaba' gata' xel-la' dxebeza zri lazre' chee benne' Israel ca'.

## 126

<sup>1</sup> Gate Xránadxu Dios bselé' dxi'u lu na' benne' zitu' ca',  
ne begu'e dxi'u lu xezre Sión, gúquedxu dxennedxu xela.

<sup>2</sup> Nadxa bzrízredxu, ne be lá'anadxu Xránadxu Dios.

Nadxa gulenná benne' xezr la xu ca':

“Da zrente ca' ben Dios, Xrana benne' ca', chee'.”

<sup>3</sup> Da zrente ca' ben Xránadxu Dios cheedxu dxi'u,  
na' zúadxu lu da ba neza zrente.

<sup>4</sup> Bselá Xránadxu dxi'u lu na' benne' zitu' ca',  
na' bezrindxu lu xezr la xu cheedxu  
ca dxezrin nisa guba'u lu xegu bizre ca'.

<sup>5</sup> Benne' ca' dxelebezre' tie' dxelaze',  
nen xel-la' dxelebé xelexezi'e lina.

<sup>6</sup> Dxebezre tie' zéaje' nu'e binne cháwe'du ca',  
na' duté xel-la' dxebe' dxezrine' zeajnu'e lina chee'.

## 127

<sup>1</sup> Chela ca zúale Xránadxu Dios benne' ca' dxelune' tu xu'u  
dácheze naca xelune' zrin na'.

Chela ca dxuxúe Xránadxu Dios tu xezre,  
dácheze naca dxuluxúe benne' ca' le na.

<sup>2</sup> Dácheze naca dxásazele che zílala,  
ne dxunle zrin cáteze dxalaj gubizra ca dxebiádx na,  
ne duté xel-la' dxudía dxezile da gágule,  
lawe' da dxunna Dios da xelagu benne' ca' nazrí'ine'  
dxácaté na' dxelásié'.

<sup>3</sup> Le nna' xque, zaj naca zrí'inedxu bi ca' benna Xránadxu dxi'u.  
Zaj naca be' tu da gunní'a zrente.

<sup>4</sup> Zrí'inedxu dxelálajbe' cheedxu gate ne nácadx cuide'  
zaj nácabe' ca xaga nalá xéche'ze ca' da nuxru benne'  
zeje' wedil-la.

<sup>5</sup> Ba neza zrente naca na chee bénnea' nuxrué' zánete'  
xaga nalá xéche'ze caní.

Québequeze xedué'ene' gate zri'a chee'  
tu zren nen benne' ca' dxeledíl-lalene' le'.

## 128

<sup>1</sup> Ba neza zrente naca na chee benne' ca' dxelezrebe' Xránadxu Dios,  
benne' ca' tu dxelúnzqueze' ca nadxixruj be'e Dios.

<sup>2</sup> Gate dxagu' da dxezi'u chee zrin da nunu'  
gaca chiu' tu da ba neza, ne gaca chawe' chiu'.

<sup>3</sup> Gaca zru'ulu' ca tu lba uva da dxebíá da zixre  
cuita xu'u lizru',  
na' zri'inu' ca' xelácabe' ca xaga olivo ca' zaj ze  
dxu'a ga dxagu'.

<sup>4</sup> Caní gun Xránadxu gaca chawe' chee bénnea' dxezrebe' Le'.

<sup>5</sup> Dxenaba' gun Xránadxu, zuę' xi'a Sión, gaca chawe' chiu',  
cheę le'enu' gaca chawe' cheę xęzre Jerusalén xúgute zra naca banu',  
<sup>6</sup> ne cheę le'enu' zri'ine zre su'.  
Dxenaba' gata' xel-la' dxebeza zri lazre' cheę benne' Israel ca'.

## 129

<sup>1</sup> Zúadxu lu da stébele'ę gate nácatędxu cuide',  
waca xelenná benne' Israel ca'.  
<sup>2</sup> Zúadxu lu da stébele'ę gate nácatędxu cuide'  
san quebe buluzria xi'ę dxi'u.  
<sup>3</sup> Belunę' wę' cúzrudxu gate belinę' dxi'u xide,  
na' gulaca cúzrudxu ca xęzr la xu naga dxedé xia cheę bezure.  
<sup>4</sup> Xlátaje naca Xránadxu Dios.  
Bselé' dxi'u lu na' benne' ca' buluchínene' dxi'u xadíaze.  
<sup>5</sup> Ben cheajlechaze, ne xelebígaqueze  
xúgute benne' ca' dxelecuídenę' benne' Sión ca'.  
<sup>6</sup> Ben xelaque' ca xíxre'du ca' dxelebía na xrgu'u  
da dxelebizre na gate ne zaj nadxé'ene na,  
<sup>7</sup> da na' quebe nu benne' dxexequę'ę na,  
ne quebe seque' nu benne' gunę' na tu cheaj weaj.  
<sup>8</sup> Quebe xelenná benne' dxeledé'ę naga zaj zria na:  
Dxenáantu' gun Xránantu' Dios gaca chawe' cheęle.  
Lu La Xránantu' Dios dxenáantu' gaca chawe' cheęle.

## 130

<sup>1</sup> Ga ni zua' lu da stébele'ę dxuláwizra' Lue', Xrana' Dios.  
<sup>2</sup> ¡Xran, bene chi'a!  
¡Bze naga da dxenaba' lau'!  
<sup>3</sup> Xrana' Dios, chela nna' xánniu' ca naca dul-la nabágantu'  
¿núzraqueze xegá'ana xrlátaje lau Lue'?  
<sup>4</sup> Lué'quezu' dxunite lau' cheęntu'  
cheę gápantu' Lue' ba lá'ana.  
<sup>5</sup> Dute lárzdawa' dxebeza lazra' Xránadxu Dios,  
ne dxuxrén lazra' xrtizre'.  
<sup>6</sup> Dxebeza lazredxa' Xránadxu Dios  
cáqueze dxelún benne' ca' dxuluxúę' xęzre ca',  
dxelebeze' chaní',  
ne cáqueze dxelún benne' ca' dxelicha bchigala,  
dxelebeze' chaní'.  
<sup>7</sup> Benne' Israel ca' dxal-la' xelebeza lazre' Xránadxu Dios  
lawe' da dxexache lazre' Xránadxu bėnneache cheę',  
ne dxexá'awę' benne' ca' lu na' benne' guledábague' Le'.  
<sup>8</sup> Dios xexá'awę' benne' Israel ca'  
lu na' xúgute dul-la da zaj nabague'.

## 131

<sup>1</sup> Xrana' Dios, ba bsana' xel-la' dxucá'ana szren cuina',  
ne ba bcuasa' xel-la' dxeque xrlátaje cuina'.  
Quebe dxulapa napa' lu da zaj naca szren,  
da ca' quebe naca chia' gulapa' na'a.  
<sup>2</sup> Quebe bi gunnía', ne guzúa' zrize ca tu bi dxe'ene

za bexuzrte gúzrebe'.

Naca bénne'du xu'a ca tu bi dxe'ene za bexuzrte gúzrebe'.

<sup>3</sup> Le cueza lazre' Xránadxu Dios, le'e, benne' Israel na'a zra, ne chadía chacanna.

## 132

<sup>1</sup> Bsa lazre', Xrana' Dios, ca guca chee David,  
ne ca guzaca zi'e,

<sup>2</sup> ne ca da guchebe lazre' gune' chiu',  
da guchebe lazre' lau', Dios wal-la chee Jacob.

<sup>3</sup> Guné': "Québequeze chu'a xu'u lizra',  
ne québequeze gáta'a ga dxasia'

<sup>4</sup> ne québequeze guchúdia' xiaj lawa'  
ne québequeze gasia'

<sup>5</sup> ca zrindxa zra ba bēna' tu xu'u lizre Xrana' Dios  
naga súaqueze Dios wal-la chee Jacob."

<sup>6</sup> Bénedxu zua xí'ina lá'azxa naga xu'u xel-la' wezría'  
lu xezr la xu Efrata,

na' bezréledxu na lu xezr la xu chee bēneche' le' Jaar.

<sup>7</sup> Gunnantu': Chéajntu' naga zua Dios cheentu'.

Guzú zríbentu' zran ní'a Le'.

<sup>8</sup> Guxasa, Xránantu' Dios, nen xí'ina naga xu'u  
xel-la' wezría' chiu',

ne gudá lu xi'a naga súaquezu' Lue'.

<sup>9</sup> Bēn xelún bxruze chiu' ca' da naca xrlátaje,  
ne xelebezre xa'a xúgute bēneache chiu', lu dute  
xel-la' dxelebé chee'.

<sup>10</sup> Lawe' da nazrí'inu' David, wen zrin chiu',  
quebe guzú' chalá'ala wenná bea na' ba guca'u Lue'.

<sup>11</sup> Da líqueze bzetaj cuina Xránadxu Dios,  
guchebe lazre' chee David quebe gucuae' ca da gunné'.

Gunné': "Guna' xelenná bea zri'ine zre su' naga  
dxenná béaquezu' Lue'.

<sup>12</sup> Che zri'inu' ca' tu xelúnzqueze' ca naca xel-la' wezría' chia',  
ne ca naca xrtizra' da gusédeda' le',

zri'inu' ca' tu xelenná béazqueze' naga dxenná be'u lue'."

<sup>13</sup> Lawe' da gucá'a Xránadxu Dios xezre Sión,  
guca lazre' sua xu'u lízrequeze' ga na'.

<sup>14</sup> Gunné': "Tu gácazqueze lataj nigá naga súaqueza' neda'.  
Tu súazqueza' nigá lawe' da caní dxezaca ba lazra' guna'.

<sup>15</sup> Guna' gáta'le'ē lina chee benne' ca',  
ne guna' xeledaj benne' xache' ca' xeta.

<sup>16</sup> Guna' xelún bxruze chia' ca' da naca chawe',  
na' xelebezre xa'a xúgute bēneache chia' lu dute  
xel-la' dxelebé chee'.

<sup>17</sup> Lataj na' guna' xexaca xel-la' dxenná bea chee David.

Guna' xelezúa na' zri'ine zre sua wenná bea na'  
ba gucá'a neda'.

<sup>18</sup> Guna' xeleque zréaje benne' guledábague' Le',  
na' guna' chepe ban xel-la' dxenná bea chee David na'."

**133**

<sup>1</sup> Le nna' xque, xrtante naca, ne cháwe'le'e naca gate zaj nazraga bénneache chee Dios, zaj naque' tuze.

<sup>2</sup> Naca na ca tu da za da dxuluzúa xíchaje', da dxedínnetę na dxu'a lawe', ca na' dxedínnetę na lu luzru Aarón, ne dxedínnetę na ga zria zre'.

<sup>3</sup> Dxedínnetę na ca xrlę'ela da dxexruj lu xi'a Hermón, ne dxexruj na lu xi'a Sión lawe' da gun Xránadxu Dios gaca chawe' chee bénneache zaj zre'e na', ne gunę' benne' ca' xel-la' nabán da zeajlí canna.

**134**

<sup>1</sup> Le na' xque, le güe lá'ana Xránadxu Dios, le'e, nácale wen zrin chee Xránadxu, zrале xu'u lizre Xránadxu chizrela.

<sup>2</sup> Le chisa na'le lau lataj lá'azxa, ne le güe lá'ana Xránadxu Dios.

<sup>3</sup> Dxenaba' lau Xránadxu zuę' Sión gunę' gaca chawe' chiu', naque' Bénnea' beņę' xabáa, ne xęzr la xu.

**135**

<sup>1</sup> Le güe lá'ana La Xránadxu Dios!

Le güe lá'ana Le', le'e, wen zrin chee Xránadxu,

<sup>2</sup> le'e zrале xu'u lizre Xránadxu Dios, lu chale'aj chee xu'u naga zúaqueze Dios!

<sup>3</sup> Le güe lá'ana Xránadxu lawe' da naque' xrlátaje!

Le gul-la da güe lá'anale La Le', lawe' da naque' zri'i lazre'!

<sup>4</sup> Xránadxu Dios ba guquę'e zri'ine zre sua Jacob.

Guquę'e zri'ine zre sua Israel chee xelaque' bénneache chee'.

<sup>5</sup> Nézquezdxu szrente naca Xránadxu Dios.

Xránadxu naque' szrendxa ca xúgutę dios chee benne' zitu' ca'.

<sup>6</sup> Xúgutę da dxaca lazre' Xránadxu gunę',

dxunę' na zran xabáa, ne lu xęzr la xu, ne lu nísadau', ne lu da situj chee nísadau' ca'.

<sup>7</sup> Dxunę' zá'aca beuj dapa saca chee xęzr la xu.

Dxunę' dxelepe xesa guziu' gate dxaca xiuj.

Dxunę' dxaca be' gáteteze.

<sup>8</sup> Beņę' gulate bi biu nedxu chee benne' Egipto ca'.

Gulate bi biu nedxu chee bénneache, ne béadu ca' chee be xixre' chee' ca'.

<sup>9</sup> Beņę' xel-la' waca ca' da za xabáa, ne da zrente ca' da beņę' lu xęzr la xu chee benne' Egipto ca',

da ca' beņ Dios da guca chee Faraón, ne chee xúgutę wen zrin chee Faraón na'.

<sup>10</sup> Bzria xi'e bénneache zánete cue' xęzr la xu ca',

ne beņę' benne' wenná bea ca', benne' zaj nápalę'e xel-la' dxelenná bea.

<sup>11</sup> Beņę' Sehón, wenná bea chee benne' amorreo ca',

ne Og, wenná bea chee benne' Basán ca',

ne xúgutę benne' wenná bea chee benne' Canaán ca'.

<sup>12</sup> Bequę'e xęzr la xu nigá lu na' benne' wenná bea ca',

na' bnéZRuje' na lu na' bénneache chee', benne' Israel ca'.

13 Xrana' Dios, chadía chacanna zua lau' Lue'.  
Tu cheajlesá lázrezqueze bénneache Lue'.

14 Xránadxu Dios guchi'e chee bénneache chee',  
ne xexache lazre' cheedxu dxi'u, wen zrin chee'.

15 Bedau' xia xaga ca' chee benne' xezr la xu ca'  
zaj naca na oro, ne plata.

Zaj naca na da belún bénneache.

16 Zaj zua dxu'a na san quebe dxelenné na.

Zaj zua lau na san quebe dxelelé'e na.

17 Zaj zua naga na san quebe dxelén na, ne quebe  
dxeleca'a na be'.

18 Benne' ca' dxeluné' na zaj nácaqueze' ca léqueze na,  
ne caní zaj naca xúgute benne' dxuluxrén lazre' na.

19 Le'e, benne' xrtía Israel, le güe lá'ana Xránadxu Dios.

Le'e, benne' xrtia Aarón, le güe lá'ana Xránadxu Dios.

20 Le'e, benne' xrtia Leví, le güe lá'ana Xránadxu Dios.

Le'e, núlale dxezrébele Xránadxu Dios, le güe lá'ana  
Xránadxu Dios.

21 Le'e, zrale xezre Sión, le güe lá'ana Xránadxu Dios,  
Bénnea' zúaqueze' xezre Jerusalén.

¡Gaca ba lá'azxa Xránadxu Dios!

## 136

1 ¡Le güe lá'ana Xránadxu Dios, Benne' xrlátaje!

¡Chadía chacanna dxexache lazre' dxi'u!

2 ¡Le güe lá'ana Dios, naque' szréntédxa ca zaj naca dios  
chee xezr la xu ca'!

¡Chadía chacanna dxexache lazre' dxi'u!

3 ¡Le güe lá'ana Xránadxu, naque' szréntédxa ca zaj naca  
xrana xezr la xu ca'!

¡Chadía chacanna dxexache lazre' dxi'u!

4 ¡Le güe lá'ana Dios na', dxuné' xel-la' waca zri'a ca'!

¡Chadía chacanna dxexache lazre' dxi'u!

5 ¡Le güe lá'ana Dios na', bene' xabáa duté xel-la' sina chee'!

¡Chadía chacanna dxexache lazre' dxi'u!

6 ¡Le güe lá'ana Dios na', bzué' xezr la xu lawe' nísadau'!

¡Chadía chacanna dxexache lazre' dxi'u!

7 ¡Le güe lá'ana Dios na', bene' gubizra ne beu'!

¡Chadía chacanna dxexache lazre' dxi'u!

8 ¡Bene' gubizra chee gusení na te zra!

¡Chadía chacanna dxexache lazre' dxi'u!

9 ¡Bene' beu' ne belaj ca' chee xulusení na chizrela!

¡Chadía chacanna dxexache lazre' dxi'u!

10 ¡Le güe lá'ana Dios na', betie' bi biu nedxu chee  
benne' Egipto ca'!

¡Chadía chacanna dxexache lazre' dxi'u!

11 ¡Le güe lá'ana Dios na', bebéaje' benne' Israel ca'

lu xezr la xu Egipto na!

¡Chadía chacanna dxexache lazre' dxi'u!

12 ¡Beche'e le' dutę xel-la' waca zren chee'!

¡Chadía chacanna dxexache lazre' dxi'u!

13 ¡Le güe lá'ana Dios na', bene' chupa la'a nísadau'  
da nazi le' na Xrna!

¡Chadía chacanna dxexache lazre' dxi'u!

14 ¡Bdee' benne' Israel ca' laduj nísadau' na'!

¡Chadía chacanna dxexache lazre' dxi'u!

15 ¡Bgacue' nísadau' na' Faraón, benne' wenná bea chee Egipto,  
ne benne' zeje' wedil-la chee' ca'!

¡Chadía chacanna dxexache lazre' dxi'u!

16 ¡Le güe lá'ana Dios na', beche'e benne' chee' ca'  
le'e xixre' lawe' lataj!

¡Chadía chacanna dxexache lazre' dxi'u!

17 ¡Le güe lá'ana Dios na', betie' wenná bea blau ca'!

¡Chadía chacanna dxexache lazre' dxi'u!

18 ¡Betie' wenná bea wal-la ca'!

¡Chadía chacanna dxexache lazre' dxi'u!

19 ¡Betie' Sehón, wenná bea chee benne' amorreo ca'!

¡Chadía chacanna dxexache lazre' dxi'u!

20 ¡Betie' Og, wenná bea chee xezr la xu Basán!

¡Chadía chacanna dxexache lazre' dxi'u!

21 ¡Bnézruje' xezr la xu chee benne' ca' chee gaca na  
chee benne' chee' ca'!

¡Chadía chacanna dxexache lazre' dxi'u!

22 ¡Benne' na chee benne' Israel ca', benne' wen zrin chee' ca'!

¡Chadía chacanna dxexache lazre' dxi'u!

23 ¡Naque' Dios na', quebe gul-la lazre' dxi'u  
gate buluzetja benne' ca' dxi'u!

¡Chadía chacanna dxexache lazre' dxi'u!

24 ¡Le' bselé' dxi'u lu na' benne' ca' guledíl-lalene' dxi'u!

¡Chadía chacanna dxexache lazre' dxi'u!

25 ¡Naque' Dios na', dxugawe' xúgutę da zaj naca ban!

¡Chadía chacanna dxexache lazre' dxi'u!

26 ¡Le güe lá'ana Dios chee xabáa!

¡Chadía chacanna dxexache lazre' dxi'u!

## 137

1 Dxu'a xegu chee xezr la xu Babilonia gudxé'edxu,  
ne gudxézredxu gate xeajsá lázredxu chee xezre Sión.

2 Lu zruze xaga labada' dxu'a xegu na'  
buquéladxu da cun zríadi'i na du cheedxu ca'.

3 Benne' ca' guleché'e dxi'u ca benne' zaj nada'u  
gulenábene' dxi'u gúl-ladxu.

Benne' ca' buluzría xi' xezre cheedxu gulé'e dxi'u  
súadxu lu xel-la' dxebe', gulenné':

Le gul-la cheentu' da ca' bíl-lale lu xezre Sión.

4 ¿Ájazra gúl-ladxu da güe lá'anadxu Xránadxu Dios  
naga zúantu' lu xezr la xu chee benne' zitu' ca'?

5 Chela gal-la lazra' lue', xezre Jerusalén,

gun Dios gunita na'a xabela xel-la' waca chee na.

<sup>6</sup> Ben xedá' luzra' chíhajla' che quebe cheajsá lazra' chiu',  
ne che quebe gucá'ana szrena' lue', Jerusalén,  
nacu' da dzezaca ba lázreleđa'.

<sup>7</sup> Xrana' Dios, bsa lazre' da calela da belún benne' Edom  
lu zra na' guzría xi' xezre Jerusalén,  
gate na' gulenné': "Le guchinnaj na. Le guchinnaj na,  
ca zrinte lu lane chee na."

<sup>8</sup> Le'e, benne' Babilonia, cuía xile.

Ba neza zrente gaca na chee bénnea' gune' cheele  
ca da benle le'e cheentu' netu'.

<sup>9</sup> Ba neza zrente gaca na chee bénnea' que'e bidu cheele ca',  
ne quine'-be' lu xiaj xre na'.

## 138

<sup>1</sup> Xrana' Dios, dutę lázrdawa' güe lá'ana' Lue'.

Tu dxúl-lazqueza' da dxue lá'ana' Lue' lau dios ca' chee  
benne' zitu' ca'.

<sup>2</sup> Dxuzú zriba' lau xudau' lá'azxa chiu',  
ne dxue lá'ana' Lau' lawe' da nacu' li lazre',  
ne dxexache lazru' bénneache chiu',  
ne lawe' da blé'enu' nacu' Benne' szrente,  
na' szrente naca xrtizru'.

<sup>3</sup> Gate bláwizra' Lue', na' gúcalenu' neda'.

Nen dutę xel-la' waca chiu' btipu' lazra'.

<sup>4</sup> Xúgute benne' wenná bea du gabí'i xezr la xu  
xelúe lá'anę' Lue', Xrana' Dios.

Caní xelunę' lawe' da ba belenne' ca naca xrtizru'.

<sup>5</sup> Xelúl-le' chee da ba nune' Xránadxu Dios,  
lawe' da zrente naca xel-la' ba chee Xránadxu.

<sup>6</sup> Szrente naca Xránadxu Dios, ne dxácalęne'  
benne' baxache' ca',

na' quebe dxu'e lataj benne' dxucá'ana szren cuine'  
zrine' lau Le'.

<sup>7</sup> Lácala zua' lu da ba xa', Lue' dxutipu' lazra'.

Dxedábagu' benne' ca' dxeledábaguę' neda',

ne dutę xel-la' waca chiu' dxuseláu' neda'.

<sup>8</sup> Gun Xránadxu Dios da guchebe lazre' chia'.

Xrana' Dios, tu dxexache lázrezquezu' bénneache chiu'.

Quebe gusanu' dxunu' zrin da guzú lau' dxunu'.

## 139

<sup>1</sup> Xrana' Dios, ba gunná' xánniu' neda'

ne núnbea xánniu' neda'.

<sup>2</sup> Nézqueznu' gate dxe'a, ne gate dxasa'.

Zítu'la nézqueznu' da zaj xu'u xichaj lázrdawa'.

<sup>3</sup> Ba gunná' xánniu' ca dxuna', ne ca dxexezí' lazra'.

Nézqueznu' xúgute da dxuna'.

<sup>4</sup> Gate quebe ne guchálaja' ba nézqueznu' Lue', Xran,  
xúgute da nnia'.



- 5 Gátetezla cuita' neda' zúaquezu' Lue', Xran,  
ne nuzé na'u neda'.
- 6 Ca szrenté naca da nézenu' Lue' naca na da dxebáneda'.  
Nácale'e na sina da quebe gaca chéajni'ida'.
- 7 ¿Gala cha'a zitu' naga quebe zúaqueze Be' chiu'?  
¿Gala guzrúnnuja' naga quebe zúaquezu' Lue'?
- 8 Che cuena' sibe zran xabáa, na' zúaquezu' Lue',  
ne che xétaja' lu da situj chee xezr la xu, na' zu' Lue'.
- 9 La séqueda' tea' lu be', ne cha'a zitu' naga dxalaj gubizra,  
u tea' xechalá'a nísadau' naga dxebía gubizra,
- 10 cá'anqueze na' súalenu' neda',  
ne guxru na'u xabēla neda'.
- 11 Chela gaca guna' gacu da chul-la neda',  
u guna' xexaca lení' da naxechaj neda', chee  
xaca na da chul-la,
- 12 da chul-la na' quebe gaca gucache na neda' lau Lue',  
na' chizrela xaca na ca te zra lau'.  
Túzqueze ca zaj naca da chul-la, ne xel-la' naxaní' lau Lue'.
- 13 Lue' benu' da zaj xu'u lu belá' dxen chia'.  
Lue' bzalju' neda' lu le'e xrna'a.
- 14 Güe lá'anaqueza' Lue' lawe' da szrenté zaj naca da dxunu',  
ne dxebáneda' ca zaj naca na.  
Dute lázrdawa' nézquezda' caní naca na.
- 15 Blé'equznu' neda' gate gulá' gubinna zrita xu'a,  
gate na' belezraga na lu le'e xrna'a,  
gate na' bgula' lu da bagácheze na'.
- 16 Ble'enu' belá' dxen chia' gate gulá' gubinna na.  
Xúgute da caní ba naxúaj na lu xiche chiu',  
na' ca gudé na' gulá' gubinna na,  
na' xúgute na gulaca na cáteze zaj naxúaj na.
- 17 Dios, szrenté zaj naca da dxuwía lazru' gunu'.  
Da zante ca zaj naca na.
- 18 Chela gaca lazra' gulaba' ca zaj naca na,  
zaj naca na ca xuzre' dxe' dxu'a tu xegu zren.  
Gate dxexebana', ne zúalequeza' Lue'.
- 19 Dios, da líqueze gutiu' benne' ca' dxeluné' da calela.  
Chee le na', le gucuasa naga zua', le'e, wete benne'.
- 20 Chiu' Lue', Dios, dxelenné' dizra' schanni'.  
Benne' ca' dxeledábague' lue' dxuluzétaje' Lau' lu da xálaze.
- 21 Xrana' Dios, dxecuída' benne' ca' dxuluzé' Lue'  
chalá'ala,  
ne dxezrá'li'a benne' ca' dxeledábague' Lue'.
- 22 Dute lázrdawa' dxecuída' benne' ca'.  
Dxéqueda' benne' ca' ca benne' ca' dxeledábague' nédaqueza'.
- 23 Gunná' xanne' neda', Dios, ne gunná' da xu'u na lázrdawa'.  
Bxue neda' chee nézenu' da xu'u lu xichaj lázrdawa'.
- 24 Gunná' che zúale tu da calela neda',  
na' bsi neda' lu neza chawe' chiu' da zeajlí canna.

## 140

1 Xrana' Dios, bselá neda' lu na' benne' ca' dxeluné' da calela.

Bxue neda' chee quebe bi xelún benne' xichaj zra'a ca'  
chia' neda'.

<sup>2</sup> Benne' cani dxuluwía lazre' da calela ca' da xelunē'.

Tu zra tu zra dxulutíl-lalene' bēnneache.

<sup>3</sup> Da dxelenné' naca na ca lazxa bela' da zaj nalále'e.

Xrtizra' benne' ca' zaj naca na ca nisa snia chee bela'.

<sup>4</sup> Xrana' Dios, bxue neda' chee quebe bi xelún benne' ca'  
dxelunē' da calela chia' neda'.

Bselá neda' lu na' benne' xichaj zra'a ca',

benne' ca' dxelunē' ba xuzre cheajcházia'.

<sup>5</sup> Benne' ca' dxulucá'ana szren cuine' zaj nabeque'  
tu da quel-la na neda'.

Ba zaj nuzalē' xralaj dxu'a neza.

Ba zaj nabeque' da ca' xelex-la na neda'.

<sup>6</sup> Gucha' Xrana' Dios: Lue' nacu' Dios chia'.

Xrana' Dios, bene chi'a dxuláwizra' Lue'.

<sup>7</sup> Xrana' Dios, nacu' weselá chia'.

Lue' bcu'uju' xíchaja' lu zra guca wedil-la.

<sup>8</sup> Xran, quebe gu'u lataj gaca ca da dxelezá lazre' benne' ca'  
dxelunē' da calela.

Quebe gu'u lataj chepe ban da dxuluwía lazre' xelunē',  
chee quebe xulucá'ana szren cuine'.

<sup>9</sup> Zaj naxechaj benne' ca' dxelunē' da calela neda'.

Ben gaca chee benne' ca' ca de' da dxelaca lazre' gaca  
chee benne' xula.

<sup>10</sup> Ben xexruj xi' lawe' benne' ca'.

Bzra benne' ca' lu xi'.

Bzra benne' ca' lu da sítujle'e naga cabátadxa xelexedxúaje'.

<sup>11</sup> Quebe gu'u lataj xegá'ana lu xezr la xu bēnnea' dxenné'  
da calela.

Ben gaca da calela chee benne' xichaj zra'a, da guzría xi na le'.

<sup>12</sup> Nezda' xechebe Xránadxu Dios waláz chee benne' baxache',  
ne guzé chache' da zaj xu'u lu na' benne' xache' ca'.

<sup>13</sup> Da líqueze benne' xrlátaje ca' xelúe lá'ane' Lau' Lue',  
na' benne' li lazre' ca' xelexúe' naga zu' Lue'.

## 141

<sup>1</sup> Xrana' Dios, dxuláwizra' Lue'.

Gudázega gácalenu' neda'.

Bene chi'a gate nnia' Lue'.

<sup>2</sup> Ben la' da dxenaba' lau Lue' ca zren xala.

Ble'e na'a da dxechisa' lau' ca tu béadau' dxútia'-ba' lau'.

<sup>3</sup> Xrana' Dios, bxue dxu'a nigá,

ne bxue xide dxu'a chee quebe nnia' tu da calela.

<sup>4</sup> Quebe gu'u lataj gaca lazra' guna' tu da calela,

ne chee quebe guna' tu da calela tu zren nen benne' ca'

dxelunē' da zrinnaj,

ne chee quebe gágulēna' benne' ca' dxelunē' da calela

lu laní chee'.

<sup>5</sup> Che gudé benne' xrlátaje neda' lu da ba xa', gaca na chia'

tu da chawe',

na' che til-le' neda', gaca na chia' ca tu da dxelále'e zixre

da dxegu'e xíchaja'.

Tu nábazqueza' Dios guzague' da calela da dxelún benne' ca' dxelune' da calela.

<sup>6</sup> Gate xeledxú'une' benne' xíchaje' ca' chee' benne' wən da calela ca' zran xi'a xiaj ca',

na' xeleque be'e bėnneache naca li ca da gunnía'.

<sup>7</sup> Xelase dinnaj zrita chee' benne' ca' dxu'a xedxu ba chee' ca'.

Xelaca na ca bhecu xu, da dxelase dinnaj na naga dxa'ana bezre.

<sup>8</sup> Chee' le na' dxenná'a naga zu' Lue', Xrana' Dios.

Dxuxrén lazra' Lue', quebe gusán lazru' neda'.

<sup>9</sup> Bxue neda' chee' quebe xelēl-la xralaj ca' chee' benne' ca' dxelune' da calela neda',

ne chee' quebe cheajcházia' lu da zaj nabeque' benne' wən da calela ca'.

<sup>10</sup> Bēn cheajlechaze benne' ca' dxelune' da calela lu xralaj da zaj nabéchequeze'

dxácatē na' tea' neda' ga na' zri'a chawe'.

## 142

<sup>1</sup> Zizraj dxuláwizra' Xránadxu Dios.

Du lazra' dxenaba' Xránadxu xexache lazre' neda'.

<sup>2</sup> Lau Le' dxawa' zría ca da dxaca chia'.

Lau Le' dxulé'eda' ca da stebe zua' neda'.

<sup>3</sup> Gate zua lázrdawa' lu da stebe, Lue', Xran, nézenu' da dxaca chia'.

La neza naga dxedá' gulebeque' xralaj da queł-la na neda'.

<sup>4</sup> Dxenná'a cuita' xabēla, san quebe nu chilá' gácalē neda'.

Quebe nu chilá', benne' guxúequeze' neda'.

Quebe nu chilá', benne' dxe' gunna xuē' chia' neda'.

<sup>5</sup> Dxuláwizra' Lue', Xrana' Dios, dxennia':

Dxebeza lazra' tuzu' Lue'.

Tuzu' Lue' dxezá lazra' lu xezr la xu nigá.

<sup>6</sup> Bene da dxuláwizra' Lue', lawe' da dxezaca zí'le'a.

Bselá neda' lu na' benne' ca' dxeláu zi' xuzre' neda',

lawe' da zaj naque' wál-ladxa ca neda'.

<sup>7</sup> Bebéaj neda' lu da dxaca chia', chee' gaca güe lá'ana' Lue'.

Benne' xrlátaje ca' xeléchaje' neda' lawe' da gunu' gaca chawe' chia'.

## 143

<sup>1</sup> Xrana' Dios, bene da dxuchálaja' lau Lue'.

Bze naga da dxenaba' lau'.

Gudá gácalēnu' neda' lawe' da nacu' li lazre', ne xrlátaje.

<sup>2</sup> Quebe guchi'u chia' neda', wən zrin chiu',

ca naca da nabaga',

lawe' da lau' Lue' quebe nu chilá' benne' naque' du lazre'.

<sup>3</sup> Gúcalē neda' lawe' da dxeláu zi' xuzre' neda'.

Xeláteze bache xelútiē' neda'.

Ba belune' naca' ca tu benne' dxedé' lu da chul-la

ca naca chee' benne' gate ca'.

<sup>4</sup> Zua lázrdawa' lu da stébele'e, ne dxewí'ine lázrele'a.

5 Dxeajsá lazra' ca guca nédxudaute.  
 Dxulaba lazra' ca naca xúgute da benu'.  
 Dxeajsá lazra' ca naca da zrente ca' da benu'.  
 6 Dxechisa na'a lau Lue'.  
 Naca' ca tu xezr la xu bizre, dxebíleda' Lué'queze.  
 7 Gudázega gácalenu' neda', Xran, lawe' da dxedú lazra'.  
 Quebe chenu' gácalenu' neda', chee quebe gaca' ca tu benne'  
 ba xu'e xedxu ba.  
 8 Che zílala ben cheajsá lazra' dxexache lazru' bénneache  
 chiu' ca'  
 lawe' da dxuxrén lázrequeza' Lue'.  
 Bzéajni'i neda' ca dxal-la' guna'  
 lawe' da dxezá lazra' guna' da dxaca lazru' Lue'.  
 9 Xrana' Dios, bselá neda' lu na' benne' ca' dxeledábage'  
 neda'  
 lawe' da dxuzúa cuina' lu na'u chee guxúquezu' neda'.  
 10 Bsede neda' chee guna' da dxaca lazru' Lue',  
 lawe' da nacu' Lue' Dios chia'.  
 Gusel-la Be' xrlátaje chiu' chee che'e neda' la neza chawe' chiu'.  
 11 Chee gaca bea na nacu' xrlátaje, Xran, gutipu' lazra'.  
 Lawe' da nacu' xrlátaje, guseláu' neda' lu da dxaca chia'.  
 12 Lawe' da nacu' li lazre', guzría xi'u benne' ca'  
 dxeledábage' neda',  
 ne guzría xi'u xúgute benne' ca' dxelaca lazre'  
 xuluzría xi'e neda',  
 lawe' da naca' neda' wen zrin chiu'.

## 144

1 jGaca ba lá'azxa Xránadxu Dios,  
 Bénnea' dxuzé chache' neda'!  
 Naque' Bénnea' dxuzázraje' na'a chee cha'a lu wedil-la,  
 ne dxuzázraje' zrube na'a chee séqueda' tíl-lalena' benne' ca'  
 dxelune' da calēla.  
 2 Naque' Benne' dxexache lazre' neda',  
 ne naque' ca tu xu'u naga ze chawa'.  
 Dxuzúa chache' neda', ne dxuselé' neda'.  
 Dxcu'u'je' neda', na' dxuxrén lazra' Le'.  
 Dxune' dxuluzúa bénneache chia' dizra' chia'.  
 3 Xrana' Dios, ¿ájazra naca nu benne', dxeajsá lazru' le'?  
 ¿Ájazra naca nu benne' dxe'u gunne xue chee'?  
 4 Naca benne' ca tu da níteze.  
 Zaj naca zra chee' ca tu zrul-la da dxedeze.  
 5 Xrana' Dios, gusalaj zran xabáa, ne betaj gácalenu' neda'.  
 Bta xi'a ca', na' dxuaj zren chee xi'.  
 6 Bzalaj xesa guziu', ne blaga benne' ca' dxelune' da calēla.  
 Bzalaj xaga nalá xéche'ze chiu', ne bzria xi' le'.  
 7 Naga zu' na'la, bze na'u, ne bselá neda' lu da stébele'e zua'.  
 Bselá neda' lu na' benne' zitu' ca',  
 8 benne' ca' tu dxelennézqueze' da wen lazre',  
 ne dxuluzétaje' Dios gate dxelezí xe'e.  
 9 Dios, gúl-laqueza' chiu' da cube, quínnia' da dxúl-lalēna'.  
 Nen tu da dxínnia' da nua chi du chee na gúl-laqueza' chiu'.

- 10 Nacu' Lue' Bénnea' dxunę' dxeledxúaj chawe'  
 benne' wenná bea ca'.  
 Dxuseláu' David, węn zrin chiu', lu xia nalá cheę  
 benne' węn da calęla ca'.
- 11 Bexa'u neda', ne bselá neda' lu na' benne' zitu' ca',  
 benne' ca' tu dxelennęzqueze' da węn lazre',  
 na' dxuluzętaje' Dios gate dxelezí xę'e.
- 12 Bęn xelegula bi biu cheętu' ca tu xaga da dxegula chawe',  
 ne zaj nácabe' bi cuide'.  
 Bęn xelaca bi nu'ula cheętu' ca bdu'a xiaj xrtante ca'  
 da zaj nnita tu lu xu'u zren.
- 13 Bęn chatę lızrentu' xúgute cuen lina cheętu'.  
 Bęn xelánlę'e bę xixre' cheętu', cheę xelácaba'  
 gaxúa gaxúane bę xixre'du ca' lu xęzr la xu cheętu'.
- 14 Bęn xelaca bezre cheętu' bę wal-la cheę xelunba' zrin.  
 Bęn quebe xelezanba' gate quebe ne zrin cha beu' cheęba' ca'.  
 Bęn quebe nu cha' cuezre xache' la neza cheętu'.
- 15 Ba neza zrentę naca na cheę bęnneache ca' dxaca caní cheę'.  
 Ba neza zrentę naca na cheę bęnneache ca'  
 naca Xránadxu Dios cheę'.

## 145

- 1 ¡Gucá'ana szrena' Lue', Dios chia', ne Wenná Bea chia'!  
 ¡Tu güe lá'anazqueza' Lau' Lue' chadía chacanna!
- 2 ¡Tu zra tu zra güe lá'ana' Lue'!  
 ¡Tu güe lá'anazqueza' Lau' Lue' chadía chacanna!
- 3 ¡Szrentę naca Xránadxu Dios, ne naca cheę'  
 tu güe lá'anazquezdxu Lę'!  
 ¡Québequeze séquedxu gúnbeadxu ca szrentę naque'!
- 4 Xúgute cuen bęnneache chiu' xelúe lá'ane' da bęnu' Lue',  
 ne xuluzenne' benne' xęzr la xu ca' ca naca da zrentę da bęnu'.
- 5 Gulaba lazra' ca naca da xrtante cheę da xabáa cheę  
 xel-la' szren chiu', ne ca naca da zrentę da nunu'.
- 6 Xúgute bęnneache xuluchálaje' ca naca xel-la' waca cheę  
 da zrentę da nunu',  
 na' neda' guzenda' lę' ca naca xel-la' szren chiu'.
- 7 Xuluzenne' le sa' ljwezre' ca naca xel-la' zri'i lazre' zren  
 chiu',  
 ne tu xelúl-lazqueze' cheę da xrlátaje da nacu' Lue'.
- 8 Xránadxu Dios naque' zri'i lazre', ne dxexache lazre'  
 bęnneache cheę'.  
 Dxezrenę', ne quebe dxezrá'aze', na' dxexache lázrele'ę dxi'u.
- 9 Dxun Xránadxu Dios da chawe' cheę xúgute bęnneache,  
 ne dxexache lazre' xúgute da zaj naca ban da nune'.
- 10 Xúgute da ca' nunu' xelúe lá'ana na Lue', Xran,  
 na' bęnneache chiu' xulucá'ana szrenę' Lue'.
- 11 Dxelennę' ca szrentę naca xel-la' dxenná bea chiu'.  
 Dxuluchálaje' ca naca xel-la' waca zrentę chiu',
- 12 cheę xuluzenne' xúgute bęnneache ca naca da zrentę ca'

da nunu',  
ne ca naca da xabáa cheę xel-la' szren cheę xel-la' dxenná bea  
chiu'.

13 Xel-la' dxenná bea chiu' tu súazqueze na,  
ne nna be'enu' xúguteę cuen bėnneache.

14 Nuxru Xránadxu Dios xúguteę benne' ca' dxeajlecházie',  
ne dxechise' xúguteę benne' ca' zaj nada'u lu zrin wal-la.

15 Xúguteę bėnneache dxelenné'ę Lue' cheę gácalęnu' le',  
na' Lue' gunézruju' da xelawe' ca zrin zra cheę na.

16 Dxuzé na'u, ne dxunézruju' ca naca da chawe'  
da dxelexázrje xúguteę da zaj naca ban.

17 Xlátaje naca Xránadxu Dios lu xúguteę da dxune',  
ne dxexache lazre' xúguteę da zaj naca ban da nun Le'.

18 Xránadxu Dios zúateęqueze' gácalęne' xúguteę benne' ca'  
dxululáwizre' Le',

xúguteę benne' ca' du lazre' dxululáwizre' Le'.

19 Gunę' ca dxelezá lazre' benne' ca' dxelezrebe' Le'.  
Cá'anqueze xenne' cheę' gate xululáwizre' Le', ne guselé'

benne' ca'.  
20 Xránadxu Dios dxuxúequeze' xúguteę benne' ca'  
zaj nazrí'ine' Le',

san guzría xi'ę xúguteę benne' ca' dxelebéaj xíchaje' Le'.

21 Du lazra' güe lá'ana' Xránadxu Dios.

Xúguteę benne' dxal-la' tu xelúe lá'anazqueze' Le' lá'azxa  
chadía chacanna.

## 146

1 ĴGaca ba lá'azxa Xránadxu Dios!

ĴDu lazra' güe lá'ana' Xránadxu Dios!

2 ĴDxácate naca bana' güe lá'ana' Xránadxu Dios!

ĴTu gúl-lazqueza' da güe lá'ana' Xránadxu Dios dxácate  
naca bana'!

3 Quebe guxrén lázrele benne' dxelenná bea,  
ne quegá bėnneache lawe' da quebe xelezéqueņę'  
xuluselé' le'e.

4 Dxeledxúaj be' zaj xu'e, na' xelexexaque' xu rte.

Lu ba ná'queze xelenite da dxuluwía lazre' xelunę'.

5 Ba neza zrente naca na cheę bėnnea', dxácale Dios cheę  
Jacob le',

bėnnea' dxebeza lazre' Xránadxu Dios.

6 Dios na' beņę' xabáa, ne xęzr la xu, ne nísadau',  
ne xúguteę da zaj zra' lataj ca'.

Naque' Bėnnea' tu dxúnzqueze' da li lazre'.

7 Dxuchi'ę cheę benne' baxache' ca',

ne dxugawe' benne' ca' dxeledunę'.

Xránadxu Dios dxuselé' benne' ca' zaj nada'u lu na'  
benne' ca'.

8 Xránadxu Dios dxexunę' xiaj lau benne' la chul-la ca'.

Xránadxu Dios dxechise' benne' ca' dxeajlecházie'.

Xránadxu Dios nazrí'ing' benne' xrlátaje ca'.

<sup>9</sup> Xránadxu Dios dxuxúe' benne' zitu' ca'.

Nuxre' bidau' wezebe ca', ne nu'ula tuze ca',  
na' dxuchínnaje' da dxelún benne' ca' dxelunę' da caleła.

<sup>10</sup> Tu nna béazqueze Xránadxu Dios.

Le'e, benne' xezre Sión, nna be'e Dios cheełe  
ne xúgutę cuen zri'ine zre súale.

¡Gaca ba lá'azxa Xránadxu Dios!

## 147

<sup>1</sup> ¡Le güe lá'ana Xránadxu Dios lawe' da naca chawe'

gúl-ladxu da güe lá'anadxu Dios cheedxu,  
lawe' da xrtantę naca güe lá'anadxu Le'!

<sup>2</sup> Xránadxu Dios xexunę' xezre Jerusalén.

Xequé'e benne' Israel ca' zaj zue' xezr la xu zitu' ca'.

<sup>3</sup> Dxexunę' benne' ca' dxelexewí'ine lázrele'e,  
ne dxudé'e ladxe' naga zaj naca we' cheę benne' ca'.

<sup>4</sup> ¡Nézquezne' ca' zaj naxán belaj ca'!

¡Tu tu belaj ca' dxu'e la na!

<sup>5</sup> ¡Szrentę naca Xránadxu Dios, ne nape' dutę xel-la' waca!

¡Quebe bi de da quebe dxéajni'ine'!

<sup>6</sup> Xránadxu Dios dxácalęne' benne' dxexruij lazre' ca',  
na' dxuzéxruje' benne' ca' dxelunę' da caleła.

<sup>7</sup> ¡Le gul-la da güe lá'anale Xránadxu Dios!

¡Le gul-la, ne le quinne da cun zríadi'i na du lau Dios cheedxu!

<sup>8</sup> ¡Le' dxudé'e beuj ca' zran xabáa!

¡Le' dxele-le' nisa xiuj lu xezr la xu!

¡Le' dxunę' dxelezría xíxre'du ca' lu xi'a ca'!

<sup>9</sup> ¡Le' dxunézruje' da dxelagu be xixre' ca'!

¡Dxunézruje' da dxelagu béchajdu ca', be dxelebezre xa'aba'!

<sup>10</sup> Da dxezaca ba lázreleņę' quebe naca na xel-la' wal-la

cheę bzrina' ca',

ne quegá xel-la' wal-la cheę bėnneache.

<sup>11</sup> Dxezaca ba lázreleņę' benne' ca' dxelezrebe' Le',

ne benne' ca' dxelebeza lazre' Le' cheę xexache lázre' le'.

<sup>12</sup> ¡Le güe lá'ana Xránadxu Dios, le'e zrale xezre Jerusalén!

¡Le güe lá'ana Dios cheełe, le'e zrale xezre Sión!

<sup>13</sup> ¡Le' dxuzúa chúchuę' dxa xu'u cheę xezre cheełe!

¡Dxunę' dxaca chawe' cheę benne' ca' zaj zre'e xezre cheełe!

<sup>14</sup> ¡Dxebeque' xel-la' dxebeza zri lazre' lu xezr la xu cheełe!

¡Gúnnale'e cheełe zrua' chawe'!

<sup>15</sup> ¡Dxusel-le' xrtizre' cheę benne' ca' zaj zre'e dutę xezr la xu,

na' chadí dxaca ca da dxenné'!

<sup>16</sup> ¡Dxugacue' xezr la xu bezxe' da naca na ca zrila'!

¡Dxuzéxruje' xrlę'ela dxęla ca de!

<sup>17</sup> ¡Dxunę' dxelexruij xiaj bezxe' ca weaj xíajdu ca'!

¿Nu benne' gaca guchaga lawe' da zaga cheę na?

<sup>18</sup> ¡Dxenná be'e, na' dxexuna na!

¡Dxunę' dxaca be', na' dxexaca bezxe' na' nisa guba'u!  
 19 ¡Bzėjni'ine' Jacob ca naca xrtizre', ne bdee' xrba cheę',  
 ne da ca' gunná be'e lu na' benne' Israel ca'!  
 20 Quebe ne gunę' caní cheę xęzr la xu xezícadxa ca',  
 na' benne' xęzr la xu ca' quebe dxelexúnbe'e xrba cheę'.

¡Gaca ba lá'azxa Xránadxu Dios!

## 148

1 ¡Le güe lá'ana Xránadxu Dios!  
 ¡Le güe lá'ana Xránadxu, le'e, zrale xabáa!  
 ¡Le güe lá'ana Le', le'e, zrale dxala!  
 2 ¡Le güe lá'ana Le', le'e, gubáz cheę xabáa cheę' ca'!  
 ¡Le güe lá'ana Le', le'e, benne' zante cheę'!  
 3 ¡Le güe lá'ana Le', le'e, gubizra, ne beu'!  
 ¡Le güe lá'ana Le', le'e, belaj dxusenile!  
 4 ¡Le güe lá'ana Le', le'e, xabáa ca',  
 ne le'e, nisa zrale lówela xabáa!  
 5 ¡Le güe lá'ana La Xránadxu,  
 lawe' da gunná bé'engę', na' guzúale!  
 6 ¡Bęę' súale tu chí'ize, ne chadía chacanna!  
 ¡Bzue' cheęle tu da bdxixruj be'e da quebe te cheę na!  
 7 ¡Le güe lá'ana Xránadxu lu xęzr la xu,  
 le'e, bea zri'a zrale lu nísadau', ne xúgute nisa situj,  
 8 ne le'e, xesa guziu', ne xiaj xiuj, ne bezxe', ne beuj ca',  
 ne le'e, be' bdunu' ca', dxunle ca gunná be'e!  
 9 ¡Le güe lá'ana Le', le'e, xí'adu ca', ne xi'a zri'a ca',  
 ne le'e, xaga zixre ca', ne xaga cedro ca',  
 10 ne le'e, bę xixre' ca', ne bea ca' dxuluxúe bęneache,  
 ne le'e, bę snia ca', ne bę zaj zua xrila!  
 11 ¡Le güe lá'ana Le', le'e, benne' wenná bea ca', ne xúgute  
 bęneache,  
 ne le'e, benne' dxelenná be'e, ne benne' dxuluchi'e,  
 12 ne le'e, benne' wegú' ca', ne nú'uladu ca',  
 ne le'e, benne' gula ca', ne bidu ca'!  
 13 ¡Le güe lá'ana La Xránadxu!  
 ¡Szréntędxa naca La Le' ca xúgute la bęneache!  
 ¡Da xabáa cheę' dxulú'e lau na lu xęzr la xu, ne xabáa!  
 14 ¡Le' nune' xęzr cheę' xęzre wal-la!  
 ¡Le güe lá'ana Le', le'e, bęneache cheę',  
 nácale zri'ine zre sua Israel!  
 ¡Nácale benne' nazrí'i Le'!

¡Le güe lá'ana Xránadxu!

## 149

1 ¡Le güe lá'ana Xránadxu Dios!  
 ¡Le gul-la cheę Xránadxu tu da cube!  
 ¡Le güe lá'ana Le' naga zaj nazraga bęneache cheę'!  
 2 ¡Le be, le'e, benne' Israel, lau Bęnea' bęę' le'e!  
 ¡Le sua xel-la' dxebé, le'e, zrale Sion, lau Bęnea' naque'  
 Wenná Bea cheęle!



3 ¡Le güe lá'ana La Xránadxu, ne guxa'ale!  
 ¡Le guchunchu xide ca', ne le quinne  
 da cun zriadi'i na du ca', dxue lá'anale Le'!  
 4 ¡Xránadxu Dios dxezaca ba lázreleñe' bënneache chee'!  
 ¡Dxape' ba lá'ana benne' dxexruj lazre' ca', ne dxuselé' le'!  
 5 Dخال-la' xelebéqueze bënneache chee' lu da xabáa chee',  
 ne xelúl-le' duté xel-la' dxelebé du xela.  
 6 Dخال-la' xelebezre xe'e, xelúe lá'ane' Dios,  
 zaj nu'e xia da zaj nalá dxupa la'ate,  
 7 chee' xelexebéaj lazre' benne' xezr la xu ca',  
 ne xuludéé' xel-la' zi' benne' xezre ca',  
 8 ne xuluchéaje' benne' wenná bea chee' ca' du xia,  
 ne benne' dxelenná be'e nen du xia,  
 9 ne xuluzría xi'e benne' ca' ca ba nun Dios gaca chee'.  
 Da nigá gaca na da xabáa chee' bënneache chee' Dios.

¡Le güe lá'ana Xránadxu!

## 150

1 ¡Le güe lá'ana Xránadxu Dios!  
 ¡Le güe lá'ana Xránadxu lu xudau' chee'!  
 ¡Le güe lá'ana xel-la' waca chee' lu xabáa chee'!  
 2 ¡Le güe lá'ana Le' ca zaj naca da zren da nune'!  
 ¡Le güe lá'ana Le' ca naca xel-la' szren chee'!  
 3 ¡Le güe lá'ana Le', gucuézrele luzu ca' da dxulucuezre'!  
 ¡Le güe lá'ana Le', quínnele da cun zriadi'i na du,  
 ne da ca' dxínnele!  
 4 ¡Le güe lá'ana Le', guchúnehule xide, ne guxa'ale!  
 ¡Le güe lá'ana Le', quínnele da cun zriadi'i na du,  
 ne gucuézrele bchiuj!  
 5 ¡Le güe lá'ana Le', gutíl-lale xíadu ca'!  
 ¡Le güe lá'ana Le', gutíl-lale xia zren ca'!  
 6 ¡Le güe lá'ana Xránadxu, xúgutele naca banle!  
 ¡Le güe lá'ana Xránadxu Dios!